


Tupanaarü Ore i Tóriu Cori ya Ngechuchu ya

Cristuchiga



New Testament in Ticuna (PE:tca:Ticuna)

Tupanaarü Ore i Tóru Cori ya Ngechuchu ya Cristuchiga

New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
9d5dc22a-30be-5d26-85a9-76047f4c89e6

Contents

MATEU	1
MARCU	73
LUCA	115
CUAŨ	189
PURACŪĜŪ	242
DUMACŪĀX	307
1 CORĪTIUCŪĀX	340
2 CORĪTIUCŪĀX	370
GÁRATAANECŪĀX	389
EPÉCHIUCŪĀX	401
PIRIPUCŪĀX	412
COROCHACŪĀX	420
1 TECHARÓNICACŪĀX	427
2 TECHARÓNICACŪĀX	433
1 TIMUTĒU	437
2 TIMUTĒU	446
TITU	452
FILEMUŪ	456
EBRĒUGŪ	458
CHAŨTIAGU	484
1 PEDRU	491
2 PEDRU	499
1 CUAŨ	505
2 CUAŨ	512
3 CUAŨ	513
YUDA	515
APOCARÍCHIU	518

ORE I MEXÜ GA MATEU ÜMATÜXÜ

Ngechuchu ya Cristu natanüwa ngóxü ga duixügüchiga

(Lc 3.23-38)

¹ Ñaã nixĩ ga yema nuxcümáxügüxü ga duixügü ga Ngechuchu ya Cristu natanüwa ngóxü. Rü yematanüwa rü Dabí nixĩ ga wüxi, rü Abráü nixĩ ga to.

² Rü Abráü rü Ichaánatü nixĩ.

Rü nüma ga Ichaá rü Acóbunatü nixĩ.

Rü nüma ga Acóbo rü Yudánatü rü naëneëgünatü nixĩ.

³ Rü Yudá rü Fárenatü rü Záranatü nixĩ. Rü Támara iyixĩ ga norü mamá.

Rü nüma ga Fáre rü Eróünatü nixĩ.

Rü nüma ga Eróü rü Aráünatü nixĩ.

⁴ Rü Aráü rü Aminadánatü nixĩ.

Rü nüma ga Aminadá rü Nachóünatü nixĩ.

Rü nüma ga Nachóü rü Charmóünatü nixĩ.

⁵ Rü Charmóü rü Boónatü nixĩ, rü Raá iyixĩ ga naë.

Rü nüma ga Boó rü Obénatü nixĩ, rü nae rü Rux iyixĩ.

Rü nüma ga Obé rü Ichaxínatü nixĩ.

⁶ Rü nüma ga Ichaxí rü aëxgacü ga Dabínatü nixĩ.

Rü nüma ga aëxgacü ga Dabí rü Charomóünatü nixĩ. Rü ngima ga Bechabé ga Üría namëxchirëx ixïcü iyixĩ ga naë ga Charomóü.

⁷ Rü Charomóü rü Roboáünatü nixĩ.

Rü nüma ga Roboáü rü Abíanatü nixĩ.

Rü nüma ga Abía rü Achánatü nixĩ.

⁸ Rü Achá rü Yochapánatü nixĩ.

Rü Yochapá rü Yoráünatü nixĩ.

Rü nüma ga Yoráü rü Uchíanatü nixĩ.

⁹ Rü Uchía rü Yotáünatü nixĩ.

Rü Yotáü rü Acánatü nixĩ.

Rü nüma ga Acá rü Echequíanatü nixĩ.

¹⁰ Rü Echequía rü Manachénatü nixĩ.

Rü Manaché rü Amóünatü nixĩ.

Rü nüma ga Amóü rü Yochíanatü nixĩ.

¹¹ Rü Yochía rü Yeconíanatü rü naëneëgünatü nixĩ. Rü yexguma nixĩ ga Babiróniãcüüx ga churaragü Yudiügüxü íyauüxü rü Babiróniãñewa nagagüãxü.

¹² Rü yexguma Babiróniãwa Yudiügüxü nagagüguwena, rü Yeconía nane ga Charatíe nabu. Rü nüma ga Charatíe rü Chorobabénatü nixĩ

¹³ Rü Chorobabé rü Abiúnatü nixĩ.

Rü Abiú rü Eriaquíünatü nixĩ.

Rü nüma ga Eriaquíü rü Achónatü nixĩ.

¹⁴ Rü Achó rü Chadóxnatü nixĩ.

Rü Chadóx rü Aqüíünatü nixĩ.

Rü nüma ga Aqüü rü Eriúnatü nixĩ.

¹⁵ Rü Eriú rü Ereachánatü nixĩ.

Rü Ereachá rü Matáünatü nixĩ.

Rü nüma ga Matáü rü Acóbunatü nixĩ.

¹⁶ Rū Acóbu rü Yúchenatü nixí. Rū nūma ga Yúche rü María ngíte nixí. Rū ngima ga María rü Ngechuchu ya Cristu naē iyixí. Rū guma Ngechuchuxü nixí ga naxunetaxü ga Tupana.

¹⁷ Rū yemaãcü Abráüwa inaxügü ga yema duüxügü rü 14 nixí ñuxmata Dabíwa nangu. Rū yemawena to ga 14 inaxügü ga Dabíwa rü ñuxmata Babiróniãcñax ga churaragü Yudiügüxü iyauüxguwa nangu. Rū yemawena to ga 14 inaxügü ga yexguma Yudiügüxü inayauüxguwena rü ñuxmata Cristu buxguwa nangu.

Ngechuchu ya Cristuarü buxchiga
(Lc 2.1-7)

¹⁸ Rū ñaãcü nixí ga yexguma nabuxgu ga Ngechuchu. Rū naē ga María rü marü Yúchemaã ixátechaü. Natürü naxüpa ga nügüna na nangugüxü rü marü Tupanaãe i Üünexüärü inüãxü ixãxãcü.

¹⁹ Rū Yúche ga María ngítechaü ixicü rü wüxi ga mecü nixí. Rū yemacèx tama nanangoxèechaü ga yema na naxãxãcüxü ga María. Rū nagu narüxñü ga bexmamare ngixü na inatãxü. ²⁰ Rū yexguma yemagu inaxñnyane, rü wüxi ga daxüçñax ga Tupanaärü orearü ngeruü, rü nanegüwa naxcèx nangox rü namaã nidexa. Rū ñanagürü nüxü: —Pa Yúche Pa Dabítanüxüx, jtãxü i ngixü cuxoxü i María na ngímaã cuxãmaxü! Erü Tupanaãe i Üünexü ngíxna inüxügagu nixí i naxãxãcüxü. ²¹ —Rü ngíma tá ngixü nangèxma ya wüxi ya ngine, rü cuma rü tá Ngechuchugu cunaxüxü. Rü ngéma naega rü 'maxèeruxü' ñaxüchiga nixí, erü nūma tá norü pecadugüwa inananguxüxèe i norü duüxügü —ñanagürü. ²² Rū guxüma ga yema orearü ngeruü nüxü ixuxü rü nangupetü na yanguxüçex ga Cori ga Tupanaärü ore ga nuxcūmaüxü ga norü orearü uruüwa nüxü yaxuxü ga ñaxü:

²³ “Rü tá tauemacü ngixü inayarütaxu i ngéma nge i taguma yatüxü cuèxcü. Rü tá nayatü. Rü Emanue tá nixí i naega. Rü ngéma naega rü ‘Tupana tatanüwa nangu’, ñaxüchiga nixí”,

ñanagürü. ²⁴ Rū yexguma pewa nabèiãchigu ga Yúche, rü nanaxü ga yema Tupanaärü orearü ngeruü ga daxüçñax namaã nüxü ixuxü. Rü Mariamaã naxãmèx. ²⁵ Natürü taguma ngixüñexü nacuèx ñuxmata nabu ga guma ngíne. Rū Ngechuchugu nanaxüéga.

2

Ngechuchuxü inayadaugü ga yatügü ga nüxü cuèxüchigüxü

¹ Rū Ngechuchu rü Yudéaanewa yexmane ga ñãne ga Beréügu nabu ga yexguma Erode àëxgacü ixixgu ga yema nachüñãnewa. Rū yexguma nixí ga ñãne ga Yerucharéüwa nangugüxü ga ñuxre ga yatügü ga nüxü cuèxüchigüxü ga woramacuriwa ngüexü ga yaxüwa ne ixü ga üècxü ne üxüwa. ² Rū duüxügüna nacagüe, rü ñanagürügü: —¿Ngextá nixí i nangèxmaxü ya yima Yudiügüarü àëxgacü ya ngezwacèx bucü? Toma rü yéama tochiüñãnewa nüxü tadau ya norü woramacuri rü ngèmacèx nūma taxí na nüxü tayarücuèxüügüxüçex —ñanagürügü. ³ Rū yexguma yemachigaxü nacüèxgu ga àëxgacü ga Erode rü poraãcü naxoegaãe. Rū guxüma ga duüxügü ga Yerucharéüçñaxgü rü ta naxoegaãegü. ⁴ Rū yexguma ga àëxgacü ga Erode rü naxcèx nangema ga guxüma ga paigüarü àëxgacügü rü ngüexèerüügü ga ore ga mugüwa nguxèetaegüxü. Rū nüxna naca, rü ñanagürü: —¿Ngexta nixí i nabuégaxü ya Cristu? —ñanagürü. ⁵ Rū nūmagü nanangãxügü, rü ñanagürügü: —Nuã Yudéaanewa ngèxmane ya ñãne ya Beréügu tá nixí i nabuxü.

Yerü nuxcūmaũcū ga Tupanaārü orearü uruũ rü nachiga nanaxūmatü, rü ñanagürü ga yema ore:

6 “Rü Beréü ya İâne ya Yudéaanewa ngēxmane, rü yima rü tama wüxi ya ngexnerüünemare ya İâne nixī, erü nagu tá nabu i ngēma âēxgacü i taxü i Cristu. Rü nüma tá nüxna nadau i guxüma i Tupanaārü duũxügü i Yudíugü”,

ñanagürü. 7 Rü yexguma ga âēxgacü ga Erode rü bexma naxcèx naca ga yema yatügü ga nüxü cuèxüchigüxü ga yaxüwa ne İxü. Rü nüxna naca ga tēxacü rü ngunexü na nangóxü ga noxri ga guma woramacuri. 8 Rü ñuxüchi ga Erode rü Beréüwa nanamugü ga yema yatügü. Rü ñanagürü nüxü: — ¡Rü ngema pexī rü meã naxcèx peyadēux i ngēma buxü. Rü ngēxguma nüxü ipeyangaxu rü chomaã nüxü pixu na choma rü ta ngema chaxüxücèx, na nüxü chayaxücuèxüxücèx i ngēma buxü! —ñanagürü. 9 Rü yexguma yema orexü naxinüēguwena, rü inaxīachi ga yema yatügü. Rü guma woramacuri ga noxri nüxü nadaugücü rü napēxegu nixüchigü rü ñuxmata guma bucü ga Ngechuchu İyexmaxüetüwa nangu. Rü yéma nayachaxāchi. 10 Rü yexguma guma woramacurixü nadaugüga ga yema yatügü, rü poraäcü nataäēgü. 11 Rü nagu nichocu ga guma İ ga nawa nayexmane, rü yexma nüxü nayangau ga guma bucü ngīmaã ga naē ga María. Rü guma bucüpegu nacaxāpüxügü, rü nüxü nicuèxüügü. Rü ñuxüchi nayawāxna ga norü baüxacügü, rü õchanana nanaxāmaregü ga uiru rü pumaragü ga yixichixü. 12 Rü yemawena, ga yexguma napeeyane ga yema yatügü, rü nanegüwa Tupana nayaxucüxēgü na tama Erodecèx nawoeguxücèx. Rü yemacèx to ga namagu nachüñānecèx nawoegu.

Equituanewa nabuxmü

13 Rü yexguma marü İyaxıguwena ga yema yatügü rü wüxi ga daxücüāx ga Tupanaārü orearü ngeruũ, rü nanegüwa Yühecèx nangox, rü ñanagürü nüxü: —¡Nabèixāchi rü İrüda! ¡Rü İnaxüxü namaã ya yima bucü rü naē rü Equituanewa naxü! ¡Rü ngema pengēxmagü ñuxmatáta choma cumaã nüxü chixu na ñuxgu tá cutaeguxü! Erü âēxgacü i Erode rü yima bucüçèx tá nadau na yamáāxücèx —ñanagürü nüxü. 14 Rü yexguma ga Yüche rü nabèixāchi rü İnarüda. Rü yexgumatama chütacü namaã inaxüachi ga guma bucü ga Ngechuchu rü naē. Rü Equituanewa naxī. 15 Rü Equituanewa nayexmagü ñuxmata nayux ga âēxgacü ga Erode. Rü yemaäcü nangupetü na yanguxücèx ga Tupanaārü ore ga nuxcūmaũcü ga norü orearü uruũ nüxü İxuxü ga ñaxü:

“Naxcèx changema ya Chaune rü Equituanena chanataeguxēē”,
ñaxü ga yema ore.

Erode nanamu na tüxü nadèixücèx ga buxegü

16 Rü yexguma âēxgacü ga Erode nüxü cuèxgu ga to ga namagu na nawoeguxü ga yema yatügü ga nüxü cuèxüchigüxü ga yaxüwa ne İxü, rü poraäcü nanu. Rü Beréüwa nanamugü ga norü churaragü na guxü ga yema naānewa tüxü nadèixücèx ga guxāma ga guxema buxegü ga İyatüxe ga yexwacèx buexe rü ñuxmata taxre ga taunecü tüxü yexmagüxewa nangu. Yerü yema yatügü ga yaxüwa ne İxü rü marü nüxü nixugüçü rü taxre ga taunecü nixī ga noxri na nangóxü ga guma woramacuri. 17 Rü yemaäcü ningu ga ore ga nuxcūmaũxü ga Tupanaārü orearü uruũ ga Yeremíā ümatüxü ga ñaxü:

18 “Rü Ramáwa nüxü taxĩnũe i wüxi i naga i poraãcü ngechaũgaãcüma auxexü. Rü Raquera iyixĩ i ngĩxãcügücèx poraãcü auxcü. Rü taxuacüma ngĩxü tataãèxèèga, erü nayue i ngĩxãcügü”, ñanagürü ga yema ore. 19 Natürü yexguma marü nayuxguwena ga ãèxgacü ga Erode, rü Equituanewa rü wüxi ga daxüçüãx ga Tupanaärü orearü ngerü rü nanegüwa Yúcheçèx nangox. Rü ñanagürü nüxü: 20 —Pa Yúcheç, ¡írüda, rü pechiũñecèx namaã powoegu ya yima bucü ya Ngechuchu! Erü marü nayue i ngema duũxüğü ya yima bucüxü imèxgüchaxüxü —ñanagürü. 21 Rü yexguma ga Yúche rü Inarüda rü nachiũñecèx namaã nataegu ga guma bucü rü naè. 22 Natürü yexguma Yúche nüxü cuáçhigagu na Aqueránu ãèxgacüxü ingucuchixü nanatü ga Erodèchicüü ga Yudeáanewa, rü namuü ga Yúche ga yema na naxüxü. Yerü wüxi ga daxüçüãx ga Tupanaärü orearü ngerü nanegüwa nanaxucxè na tama yema Yudeáanewa na naxüxüçèx. Rü yemacèx Gariréaanewa naxü. 23 Rü yexguma Gariréaanewa nangugüğü, rü ñane ga Nacharétuwa naxĩ, rü yexma naxãchiüğü. Rü yemaãcü nangupetü na yanguxüçèx ga yema ore ga nuxcümaüğüxü ga Tupanaärü orearü uruüğü nüxü ixugüxü ga ñaxü: “Ngechuchu ya Cristu rü Nacharétüçüãxmaã tá nanaxugü”, ñaxü.

3

Cuáü ga baiũxèèruü nüxü nixu ga Tupanaärü ore ga dauçhitawa ga ngextá taxúema íxãpataxüwa

(Mr 1.1-8; Lc 3.1-9, 15-17; Cu 1.19-28)

1-2 Rü yexguma Nacharétuwa nayexmagu ga Ngechuchu, rü Cuáü ga baiũxèèruü inanaxüğü ga Tupanaärü orexü na yaxuxü ga Yudeáanewa ga dauçhitawa ngextá taxúema íxãpataxüwa. Rü duũxüğümaã nüxü nixu rü ñanagürü: —¡Nüxü perüxoe i pecüma i chixexü! Erü marü ningaica na perü ãèxgacü na yĩxü ya Tupana —ñanagürü. 3 Rü guma Cuáü ga baiũxèèruüchiga nixĩ ga naxümatüãxü ga nuxcümaüçü ga Tupanaärü orearü uruü ga Ichaxía ga yexguma ñaxgu:

“Rü dauçhitawa i ngextá taxúema íxãpataxüwa tá nangèxma i wüxi i duũxü i ngema tagaãcü ñaxü: ‘¡Pegü pemexèèx naxcèx ya Cori! ¡Rü naxcèx ipeyanawèxãchixèèx i perü maxü!’ ”

ñaxü. 4 Rü naxchiru ga Cuáü rü cameyutèxanaxcèx nixĩ, rü norü goyexü rü naxchèxmünaxcèx nixĩ. Rü beruremaã rü munümaã naxãwemü. 5 Rü yema Cuáüxütawa inayarüxĩnègüxü ga duũxüğü ga Yerucharéçüãx, rü duũxüğü ga guxü ga Yudeáanewa ne íxü, rü duũxüğü ga natü ga Yudaüärü ngaicamagu áchiüğüxü. 6 Rü guxema duũxèğü ga nüxü ixugüxe ga tümaärü pecadugü, rü Cuáü rü tüxü ínabaiũxèè ga natü ga Yudaüwa. 7 Natürü yexguma Cuáü nüxü deüxgu ga naxütawa na nangugüxü ga muxüma ga ãèxgacüğü ga Parichéugü rü Chaduchéugü na ínabaiũxèèãxüçèx, rü Cuáü ñanagürü nüxü: —Pa Áxtapearü Duũxüğüx, çrü texè pemaã nüxü tixu na naxchaxwa pibuxmüxüçèx i ngèma Tupanaärü poxcu i äücümãxü i marü ingaicaxü? 8 —¡Rü penaxwèxe na Tupana naxwèxexüãcüma pemaxèxü na ngèmaãcü guxüma i duũxüğü nüxü nadaugüxüçèx na aixcüma marü nüxü perüxoexü i ngèma pecüma i chixexü! 9 —Erü Tupanapèxewa rü taxuwama name na pegü pixuxü na Abráütanüxü i Yudiüğü pixüğüxü erü tama ngèmacèx nixĩ ya Tupana i duũxüğüxü nayaxuxü. Rü pemaã nüxü

chixu rü ngëxguma Tupana naxwëxegu, rü tama nüxü naguxcha na daa nutawa Abráütanüxü nanguxüxëxü. ¹⁰—Rü Tupanaärü yuema rü marü ímemare na nadaxüxcëx i ngëma nanetügü i tama mexü. Rü guxüma i nanetügü i chixearü õõxü rü tá nadaxü, rü ñuxüchi tá ínagu —ñanagürü. ¹¹Rü ñanagürü ta ga Cuáü: —Choma rü aixcüma dexáwamare pexü íchabaiüxëe na togü i duüxügü nüxü cuáxcëx na aixcüma marü nüxü perüxoexü i pecüma i chixexü. Natürü choweama tá ínangu i to i Tupanaärü orearü uruü. Rü nüma tá pexütawa nanamu i Tupanaãe i üünexü na naporaexëeãxü i ngëma Tupanawe rüxüxü, rü nüma tá nanapoxcue i ngëma Tupanaxü oexü. Erü nüma rü poraãcü choxü narüyexera na ãëxgacü yüxü. Rü choma rü napëxewa rü taxuwama chame rü bai i norü chapatarü ngewaxëra chame. ¹²—Rü nüma rü marü ínamemare na ñoma i naãnewa yadexchiãxcëx i norü duüxügü ñoma wüxi i yatü trigu naãtüna idexechixürü. Rü ngëmaãcü tá nayadexechi i ngëma noxrü ixügüxü na naxütawa nangëxmagüxüxcëx, natürü ngëma tama noxrü ixügüxü rü tá ínanagu nawa ya yima üxü ya taguma ixoxüne —ñanagürü ga Cuáü.

Ngechucharü baiechiga (Mr 1.9-11; Lc 3.21-22)

¹³Rü yexguma nixü ga Gariréaanewa ne naxüxü ga Ngechuchu. Rü Cuáüxütawa nanguxü ga Yudáü ga natüwa, na Cuáü ínabaixëxüxcëx. ¹⁴Rü noxri rü tama Ngechuchuxü ínabaixëxëchaü ga Cuáü. Rü ñanagürü nüxü: —Choxü waxi nixü i namexü na ícubaixëxü. ¿Rü ñuxäcü i cuma i chauxütawa cuxüxü na choma cuxü íchabaixëxüxcëx? —ñanagürü. ¹⁵Natürü ga Ngechuchu rü ñanagürü nüxü: —Name nixü i choxü ícubaixëxë i ñuxmax. Erü name nixü i tanaxü i guxüma i ngëma Tupana tüxü muxü —ñanagürü. Rü yexguma ga Cuáü rü: —Ngü —ñanagürü. ¹⁶Rü yexguma marü Cuáü Ngechuchuxü íbaixëëguwena, rü dexáwa ínaxüãchigu ga Ngechuchu. Rü yexgumatama niwãxna ga daxüguxü ga naãne, rü Ngechuchu nüxü nadau ga Tupanaãe i Üünexü ga wüxi ga muxtucurü na inagoxü rü nüxna na nanguxü. ¹⁷Rü dauxüwa ínanaxü ga wüxi ga naga ga ñaxü: —Daa nixü ya Chaune ya nüxü changechaüxüchicü, rü poraãcü namaã chataãëxüchicü —ñaxü.

4

Ngechuchuxü naxü ga Chataná (Mr 1.12-13; Lc 4.1-13)

¹Rü yemawena rü Tupanaãe i Üünexü rü wüxi ga nachica ga ngextá taxüema íxãpataxüwa Ngechuchuxü naga na yéma Chataná nüxü üxüxcëx. ²Rü taguma nachibü ga 40 ga ngunexü rü 40 ga chütaxü. Rü yemawena rü nataiya. ³Rü yexguma ga ngoxo ga Chataná rü Ngechuchuxütawa nangu, na nüxü naxüxcëx. Rü ñanagürü nüxü: —Ega aixcüma Tupana Nane quixügu, jrü daa nutagüxü namu na päüxü nanguxüxcëx! —ñanagürü ga Chataná. ⁴Natürü Ngechuchu nanangãxü, rü ñanagürü: —Tupanaärü ore i ümatüxü rü ñanagürü: “Täütáma päüxüca nanamaxëxëe i duüxügü, natürü guxüma i ore i Tupana nüxü ixuxü nixü i duüxügüxü maxëxëxü”, ñanagürü. ⁵Rü yexguma ga ngoxo ga Chataná rü guma íãne ga üünene ga Yerucharéüwa nanaga. Rü tupaoca ga taxünetapëxegu nanamunagü. ⁶Rü ñanagürü nüxü: —Ega aixcüma Tupana Nane quixügu, jrü nuã cugü rütáe! Erü Tupanaärü ore i ümatüxüwa rü ñanagürü:

“Tupana tá nanamu i norü orearü ngeruügü i daxüçüâx na cuxna nadaugüxüçèx. Rü naxmèxmaã tá cuxü niyauxgü na tama țacü rü nutagu cunguxüçèx”,

ñanagürü. ⁷ Rü Ngechuchu nanangãxü rü ñanagürü: —Rü Tupanaãrü ore i ümatüxü rü ñanagürü ta:

“¡Tama name i nüxü na cuxüxü ya Cori ya curü Tupana!”

ñanagürü. ⁸ Rü yexguma wenaxãrü ga ngoxo ga Chataná rü wüxi ga mèxpüne ga máxpüxüchinetapèxewa nanaga. Rü yéma Ngechuchuxü nanawèx ga guxüma ga nachüñanegü na ñuxãcü yamexèchixü. ⁹ Rü Chataná rü ñanagürü nüxü: —Choma chi cuxna chanaxã i guxüma i ñaã cuxü chawèxü i ngèxguma chi chopèxegu cucaxãpüxügu rü choxü quicuèxüügu —ñanagürü. ¹⁰ Rü yexguma ga Ngechuchu rü ñanagürü nüxü: —¡Choxna ixügachi, Pa Chataná! Erü Tupanaãrü ore i ümatüxü rü ñanagürü:

“¡Nüxü icuèxüü ya Cori ya curü Tupana, rü yimaãxüxücatama napuracü!”

ñanagürü. ¹¹ Rü yexguma ga ngoxo ga Chataná rü Ngechuchuna nixügachi. Rü Ngechuchuxütawa nangugü ga daxüçüâx ga Tupanaãrü orearü ngeruügü. Rü Ngechuchuxü narüngüxèëgü rü nüxna nadaugü.

Ngechuchu rü inanaxügu ga norü puracü ga Gariréaanewa

(Mr 1.14-15; Lc 4.14-15)

¹² Rü yexguma Ngechuchu nüxü ñnügü ga na napoxcuxü ga Cuáü ga baiüxèëruü, rü Gariréaanewa naxü. ¹³ Natürü tama ñane ga Nacharétugu narüxãüx, rü ñane ga Capernáüwa naxü na yexma yaxächüxüçèx. Rü guma ñane rü nextaxa ga Gariréacutüwa nayexma ga Chaburãütanüxü rü Netarítanüxü ga duüxügu ixächüügüxüwa. ¹⁴ Rü yema nangupetü na yangüçüçèx ga ore ga nuxcümaücü ga Tupanaãrü orearü uruü ga Ichaxía ümatüxü ga ñaxü:

¹⁵⁻¹⁶ “Rü duüxüçüçèx tá nangox i wüxi i ngóonexèëruü i Chaburãüãrü naãnewa, rü Netaríarü naãnewa, rü Yudáüãrü tocutüwa rü ngèma nama i taxtücutüwa nadaxüwa, rü Gariréaanewa i ngextá duüxügu i tama Yudiügu ixígüxü ixächüügüxüwa. Rü ngèmaäcü i ngèma duüxügu ga noxri èãnexüwa yexmagüxü, rü tá nüxü nadaugü i wüxi i taxü i ngóonexèëruü. Rü ngèma duüxügu ga noxri yutüüwa yexmagüxü rü tá nüxü nabaxi i ngèma ngóonexèëruü”,

ñanagürü ga yema Ichaxiaarü ore. ¹⁷ Rü yexgumaücüü nixí ga inaxügüãxü ga Ngechuchu ga nüxü na yaxuchigaxü ga norü ore ga ñaxü: —¡Nüxü perüxoe i pecüma i chixexü! Erü marü ningaica na perü àëxgacü na yíixü ya Tupana —ñaxü.

Ngechuchu rü naxçèx naca ga ägümücü ga püchaetanüxü

(Mr 1.16-20; Lc 5.1-11)

¹⁸ Rü yexguma nextaxa ga Gariréaanacügu yaxüxgu ga Ngechuchu, rü yéma nüxü nadau ga taxre ga yatü ga nügüeneëgü ixígüxü. Rü wüxi rü Chimáü ga Pedrugu äegaxü nixí. Rü to rü Aüdrégu äegaxü nixí. Rü nümagü rü ñnapüchaegü, yerü woetama püchaetanüxü nixígü. ¹⁹ Rü yexguma ga Ngechuchu rü ñanagürü nüxü: —¡Chowe perüxí! Rü chorü puracüwa tá pexü chamugü na chauxütawa penagagüxüçèx i duüxügu —ñanagürü. ²⁰ Rü yexgumatama ga yema taxre, rü yéma nanatèxgü ga norü püchagü. Rü Ngechuchuwe narüxí. ²¹ Rü yéamaxüra naxü ga Ngechuchu, rü yéma nüxü nadau ga to ga taxre ga nügüeneëgü. Rü Acobu nixí ga wüxi, rü Cuáü nixí ga to. Rü Zebedéu nanegü nixí ga nümagü. Rü nanatümaã wüxi ga

nguewa nayexmagü. Rü yéma İnanangáitagü ga norü püchagü. Rü Ngechuchu naxcèx naca. ²² Rü yexgumatama yéma guewa tüxü natèxgü ga nanatü. Rü Ngechuchuwe narüxi.

*Ngechuchu nanangüexèe ga muxüma ga duüxügü
(Lc 6.17-19)*

²³ Rü guxü ga Gariréaanegu nixügüchigü ga Ngechuchu. Rü wüxichigü ga İanewa, rü duüxügüarü ngutaquèxepataüwa ninguxèetaechigü. Rü duüxügümaâ nüxü nixuchiga ga ore ga mexü na ñuxâcü âëxgacü İyixü ya Tupana. Rü guxüma ga duüxügü ga yema İdaaweexü rü nanameèxèe ga woo nañuxraüxü ga norü ðaawe nüxü yexmaxü, rü naxcèx nitaanegü. ²⁴ Rü Ngechuchuxü nacuéachigagü ga guxüma ga duüxügü ga Chíríaanecüâx. Rü naxütawa nanagagü ga nagüxüraüxü ga ðaxweanemaâ İdaaweexü. Rü yematanüwa nayexma ga duüxügü ga ngüanemaâ İdaaweexü, rü duüxügü ga poraâcü naxünewa nangüxü, rü duüxügü ga ngoxo nawa yexmaxü, rü duüxügü ga óxwaâxgüxü, rü duüxügü ga nawâixâchigüxü. Rü Ngechuchu nanameèxèe ga guxüma ga yema. ²⁵ Rü Ngechuchuwe narüxi ga muxüma ga duüxügü ga Gariréaanecüâx, rü Decaporíchiuanecüâx rü Yerucharéüçüâx, rü Yudeaanecüâx, rü natü ga Yudáüarü tocutüçüâx.

5

Ngechuchu rü mëxpünewa nüxü nixu ga Tupanaärü ore

¹ Rü yexguma Ngechuchu nüxü deüxgu ga yema muxüma ga duüxügü, rü wüxi ga mëxpünewa İnaxüâchi namaâ ga norü ngüexügü. Rü yéma narüto, rü norü ngüexügü nüxü İnachomaëguâchi.

*Yixema taâëgüxechiga
(Lc 6.20-23)*

² Rü İnanaxügü ga Ngechuchu ga na nangüexèeâxü, rü ñanagürü: ³ – Tataâëgü ya yixema nüxü İcuèxâchitanüxè i tumaârü pecadu rü nüxü rüxoexe. Erü tûmacèx nixi i ngema daxügüxü i naane i Tupana âëxgacü İyixüwa. ⁴ – Tataâëgü ya yixema ngechaügüxe, erü Tupana tá tüxü nataâëxèe. ⁵ – Tataâëgü ya yixema tama tûgü İcuèxüxügüxe, erü tá tanayauxgü i ñoma i naâne i Tupana tûmamaâ İxunetaxü. ⁶ – Tataâëgü ya yixema poraâcü tüxü nangüchaüxè na Tupanapèxewa meâ tamaxèxü, erü Tupana tá tüxna nanaxâ i ngéma maxü i mexü i naxcèx tadaugüxü. ⁷ – Tataâëgü ya yixema togü i duüxügü tüxü ngechaütümüügüxe, erü tûmagü rü tá ta Tupanaâxü tangechaütümüügü. ⁸ – Tataâëgü ya yixema tama chixexügu rüxüñüxè i tumaâëwa, erü yixemagü tá tixigü ya Tupanaxü daugüxe. ⁹ – Tataâëgü ya yixema togüarü chogürü İxigüxe, erü Tupana rü nanegümaâ tá tüxü naxu. ¹⁰ – Tataâëgü ya yixema togü i duüxügü tûmachi aiexe naxcèx na Tupana naxwèxexüâcüma meâ tamaxèxü. Erü tûmacèx nixi i ngema daxügüxü i naane i Tupana âëxgacü İyixüwa. ¹¹ – Petaâëgü i pema ega duüxügü taçü pemaâ İxugüegu, rü chixri pemaâ namaxëgu, rü chaugagu doramaâ poraâcü chixri pechiga yad exagügu. ¹² – Rü petaâëgüama rü tama pexoegaâëgü! Erü daxügüxü i naânewa tá penayauxgü i wüxi i perü âmare i mexèchixü. Rü ngéma ñuxma pexü ngupetüxürü nixi ga nüxü nangupetüxü ga nuxcümaügüxü ga Tupanaärü orearü uruügü, yerü ga duüxügü rü naxchi rü ta naxaie.

*Yucürarüü rü omürüü pixigü i ñoma i naânewa
(Mr 9.50; Lc 14.34-35)*

13 —Pema rü ñoma yucürarüü pixîgü i ñoma i nañewa. Erü yima yücüra rü ñna na namexêëxürüü, rü ngêxgumarüü ta i pema rü ñoma i nañecüâx i duüxügüarü mexêëruü pixîgü. Natürü ngêxguma chi nangeacagu ya yücüra, çrü tacüwa chi i namexü i ngêxgumax? Rü dücax, rü taxuwama name, rü itanatêxmare, rü ngema duüxügü nawa nangagü. 14 —Pema rü ñoma i nañecüâxârü ngóonexêëruü pixîgü. Rü wüxi ya îane ya wüxi ya mëxpúnewa ngêxmane, rü taxuacüma inicux. 15 —Rü taxüema wüxi i omüwa tanangixichi na wüxi i caichâütüügu na tayaxücuchixüçêx. Natürü wüxi i omüwa tanangixichi na norü üchicaügu tanaxünagüxüçêx, na ngema tüxü nabaxixüçêx ya guxâma ya yîxema yîma îwa ngêxmagüxe. 16 —Rü name nixî i duüxügüpêxewa na meâ pemaxêxü. Erü ngêmaâcü i pema rü omügürüü tá pinaîgü. Rü ngêmaâcü duüxügü tá nüxü nadaugü i ngêma mexü i pexüxü, rü tá nüxü nicuêxüügü ya Penatü ya daxüwa ngêxmacü.

Ngechuchu nanangüexê ga mugüchiga

17 —Tama name i nagu perüxinüë na núma chaxüxü na ichayanaxoxêëxüçêx i Tupanaârü mugü ga Moîché umatüxü, rü yema ore ga nuxcümaügüxü ga Tupanaârü orearü uruügü namaâ ngxüêëtaegüxü. Natürü núma chaxü na meâ chayangüxêëxüçêx i ngêma mugü, rü tama na ichayanaxoxêëxüçêx. 18 —Rü aixcüma pemaâ nüxü chixu, rü ñuxma na tama nangupetüxü i daxügüxü i naane rü ñoma i naâne rü taxucürüwa naxüchicüxü i ngêma mugü, rü bai i írarüwa ñuxmatáta yangu i guxüma i ngema mugü nüxü nixuxü. 19 —Rü ngêmacêx ya yîxema tama naga înüxê i ngêma mugü, rü woo i tacü i íraxü i ngêma nüxü yaxuxü rü duüxügüxü tangüxêëxgu na nümagü rü ta tama naga naxînüêxüçêx, rü yîxema rü tá guxüârü yexera wixweama tatêx i Tupana âêxgacü íxîxüwa. Natürü yîxema naga înüxê i Tupanaârü mugü rü duüxügüxü ngüexêëx na tümagü rü ta naga taxînüêxüçêx, rü guxüpêxewa tá taxü i Tupana âêxgacü íxîxüwa. 20 —Rü pemaâ nüxü chixu, rü ngêxguma tama Parichéugü rü ngüexêëruügü i ore i mugüwa ngxüêëtaegüxüârü yexera meâ pemaxêgu, rü tagutâma Tupana íngexmaxüwa pichocu.

Ngechuchu nanangüexê na tama namexü na texé tümãneëmaâ na nuxü (Lc 12.57-59)

21 —Pema rü marü nüxü pexînüë ga Moîchêarü ore ga nuxcümaügüxü ga duüxügümaâ nüxü yaxuxü ga ñaxü:
 “¡Tãxü i pemãetãgüxü! Erü texé yamáetaxe rü tá tapoxcu”,
 ñaxü. 22 —Natürü choma rü pemaâ nüxü chixu rü texé ya tümãneëmaâ nuxê, rü tá tapoxcu. Rü texé ya tacü tümãneëmaâ íxügüxe, rü âêxgacügüpêxewa tá tüxü nagagü na tüxü napoxcuxüçêx. Rü texé ya tümãneëxü ngoxo wogüxe, rü âücümaxüwa tangêxma, erü ngürüâchi tá tapoxcu nagu ya yîma üxü ya ngoxo nagu poxcuene. 23-24 —Rü ngêxguma tupaucawa Tupanana cunaxâxgu i curü díeru, rü ngema nüxna cucüxâchigu na tacüçêx cumaâ nanuxü i cueneê, ¡rü ngêxma tupaucagutama naxü i ngêma curü âmare i Tupanana cuxâxchãxü! ¡Rü cueneêxütawa naxü, rü namaâ yamexêëxîra i ngêma cuxchi na naxaixü! Rü ngêmawena rü marü name i tupaucacêx cutaegu na Tupanana cuyaxâmarexüçêx i curü díeru. 25 —Rü ngêxguma chi wüxie wüxi i ngetanüçêx cuxü íxuaxügu, rü âêxgacüxütawa cuxü tagaxgu, rü name nixî i namawatama tüxü curüngüxmüxêë na tama âêxgacügüpêxewa cuxü tagaxüçêx. Erü wüxicana na âêxgacüxütawa cunguxü, rü âêxgacü tá purichîagüna cuxü namu na cuxü napoxcuxüçêx. 26 —Rü aixcüma cumaâ

nüxü chixu rü täütáma ngema poxcupataüwa ícunguxuchi ñuxmatáta ngíxü cuxütanü i guxcü i ngéma díeru i nüxü ngíxü cungetanücü. Rü name nixí i paxa Tupanana peca na pexü nüxü nangechaüxcèx i perü pecadugü na tama pexü napoxcuexúcèx.

Ngechuchu namaã nangúexêtae na tama namexü na wüxi i ngemaã chix-exügu rüxñüxü

²⁷ —Pema marü nüxü pexñüë ga Tupanaärü mu ga Moíché nuxcüma nüxü ixuxü ga ñaxü:

“¡Tama name i naí i ngemaã na icupexü!”

ñaxü. ²⁸ —Natürü choma rü pemaã nüxü chixu, rü yíxema texé ya wüxi i ngexü dawañüxé rü tüxü nangúchaüxé na ngímaã itapexü, rü Tupanapëxewa rü marü chixexü ngímaã taxü i tümaãéwa. ²⁹ —Rü ngëxguma chi yima curü tügünexëtü pecadu cuxü üxéëgu rü jnoxtacüma nayaxu rü yaxügu naña! Erü narümemaë nixí na yima cuxetüxicatama iyarütaxuxü na tama guxü i cuxune iyarütaxuxúcèx nagu ya yima üxü ya ngoxogü nagu poxcuene. ³⁰ —Rü ngëxguma chi yima curü tügüneméxé pecadu cuxü üxéëgu, rü name nixí i noxtacüma ícunadae rü yaxügu cuyaña. Erü narümemaë nixí na yima cuxmëxícatama iyarütaxuxü na tama guxü i cuxune iyarütaxuxúcèx nagu ya yima üxü ya ngoxogü nagu poxcuene. Rü ngémaãcü ega woo pexü naguxchagu rü name nixí i nüxna pixígachi i guxüma i chixexü i nagu piyxchaüxü —ñanagürü.

Ngechuchu namaã nangúexêtae na tama namexü na texé tümamèxü ítáxü
(Mt 19.9; Mr 10.11-12; Lc 16.18)

³¹ Rü ñanagürü ta ga Ngechuchu: —Moíché rü üpa nüxü nixu rü yíxema tümamèxü ítáxe, rü tanaxwèxe i ngíxna tanaxá i wüxi i popera i nawa nüxü tixuxü na marü ngíxü ítátáxü. ³² —Natürü choma rü pemaã nüxü chixu, rü ngëxguma wüxi ya yatü naxmèxü ítèxgu, rü chi tama naí ya yatümaã nangéãëxügagu yixígu, rü äücümáxüwa ngíxü tangëxmaxéë erü ngémaãcü ngürüächí pecadu ixü. Rü yíxema ngímaã ämaxé i wüxi i nge i marü ngíte ngíxü ítèxcü, rü tüma rü ta pecadu taxü.

Ngechuchu namaã nangúexêtae ga unetachiga

³³ Rü ñanagürü ta ga Ngechuchu: —Pema rü marü nüxü pexñüë ga Moíchéarü ore ga nuxcümaügüxü ga duüxügümaã nüxü yaxuxü ga ñaxü:

“Ngëxguma Tupanaegagu texémaã tacücèx icuxunetagu, rü name nixí i cuyanguxéë i ngéma curü uneta”,

ñaxü. ³⁴ —Natürü choma rü pemaã nüxü chixu rü tama name i texéégagu rü éxna tacüégagu wüxi i duüxümaã ipexuneta. Rü tama name i daxüguxü i naãneegagu ipexuneta, erü ngema narüto ya Tupana. ³⁵ —Rü tama name i ñoma i naãneegagu ipexuneta, erü Tupanaärü cuaixcutüchica nixí. Rü tama name i Yerucharéüegagu ipexuneta, erü Tupana ya guxüärü äëxgacüarü ñane nixí. ³⁶ —Rü tama name i cugüégagu icuxuneta, erü woo wüxitama i cuyae rü taxucürüwa cunaxüchicüü na nachóxcèx rü éxna nawaxüxcèx. ³⁷ —Rü ngémacèx rü ngëxguma icuxunetagu rü narümemaë nixí i: —Ngü, tá chanaxü —ñaperügü, rü éxna: —Täütáma chanaxü —ñaperügü. Erü guxüma i to i ore i namaã icuxunetaxü, rü ngoxo i Chatanáwa ne üxü nixí.

Ngechuchu namaã nangúexêtae na ñuxácü namexü na namaã ichopetüxü i ngéma duüxügü i chixri tamaã maxèxü

38 Rū ñanagürü ta ga Ngechuchu: —Pema rü marü nüxü pexĩnüë ga Tupanaärü mu ga Moĩché nuxcũma nüxü ixuxü ga ñaxü: “Ngëxguma texé wüxi i duũxüxü icháixetüxëëgu, rü tümaxëtümaåtama tayangutanüxëë. Rü texé wüxi i duũxüxü ibüepütagu, rü tümapütamaåtama tayangutanüxëë”, ñaxü. 39 —Natürü choma rü pemaã nüxü chixu rü tama name i pegütama ípepoxü nüxna i duũxü i chixecũmaxü. Rü ngëxguma texé cuxü pechiwegu, rü marü name i curü tochiwe rü ta icunaxã na ngema rü ta cuxü tapechiwexüçèx rü tama name na cuxütanüxü. 40 —Rü ngëxguma texé cuxü íyaxuaxügu rü cuxna tayapuchaxügu i curü daxü, rü name nixĩ i curü gáuxüchiru rü ta noxtacẽma tüxna cunaxã. 41 —Rü ngëxguma texé cuxü müxgu na wüxi i kilõmetrugu tacü tüxü quingexüçèx, rü name nixĩ i taxre i kilõmetrugu tüxü cuyange. 42 —Rü ngëxguma texé curü ngëmaxüçèx cuxna caxgu, rü name nixĩ i tüxna cunaxã. Rü tama name na namaã cuxaüxü i curü ngëmaxügu ega texé paxaãchi cuxna naxcèx caxgu.

Name nixĩ i nüxü tangechaü i ngema tamaã rüuwanügüxü

43 Rū ñanagürü ta ga Ngechuchu: —Pema rü marü nüxü pexĩnüë ga Tupanaärü mu ga Moĩché nuxcũma nüxü ixuxü ga ñaxü: “¡Nüxü nangechaü i cumücü, rü naxchi naxai i curü uwanü!” ñaxü. 44 —Natürü i choma rü pemaã nüxü chixu rü: —¡Nüxü pengechaü i perü uwanügü! ¡Rü naxcèx peyumüxë i ngëma duũxügu i chixexümaa pewe ingexütanüxü! 45 —Rü ngëxguma ngëmaãcü pemaxëgu rü aixcũma Penatü ya daxügücü nanegü tá pixígü. Erü nüma rü inanabáixëë ya üèxcü naxcèx i mexü i duũxügü rü chixexü i duũxügü. Rü nanapuxëë naxcèx i duũxügü i meã maxëxü rü duũxügü i chixri maxëxü. 46 —Rü ngëxguma chi ngëma duũxügü i pexü ngechaügüxüxüxicatama pengechaügügu, çrü tacü rü ãmare tá Tupanaxütawa peyaxügü naxcèx i ngëma? Erü ngëma yatügü i Dumaärü äëxgacüçèx diëru ngixü ideetanüxüta puracüexü rü ngëxgumarüü nanaxügü. 47 —Rü ngëxguma chi peeneëgüxüxicatama perümoxëgu, rü guxü i duũxügürüütama pixígü. Erü woo ngëma duũxügü i tama Tupanaxü cuëxgüxü, rü ngëxgumarüütama nanaxügü. 48 —Rü ngëmacèx penaxwae na aixcũma namexü i perü maxü naxrüxü ya Penatü ya Tupana ya aixcũma mearü maxüäcü.

6

Ngechuchu rü norü ngüetanüxüxü nangüxëë na ñuxãcü mexü naxügüxü

1 Rū ngëxguma tacü rü mexü pexüxchaügu, rü name nixĩ i pexuãë na tama duũxügüpëxewa penaxüxü i ngëma na duũxügü pexü dauxüçèx rü pexü yacuëxüügüxüçèx. Erü ngëxguma duũxügü pexü icuëxüügüxüçèx mexü pexüxgu, rü Penatü ya daxügücü rü täütama ãmare pexna naxã. 2 —Rü ngëmacèx ngëxguma texéxü curüngüxëëchaügu, rü name nixĩ i tama poraãcü nüxü quixuchiga i ngëma. Rü tama name i ngëma duũxügü i togüpëxewa meã maxënetaxürüü na quixü. Erü nümagü rü norü me nixĩ i ngutaquëxepataügüwa rü ítamügüwa nüxü nixuchiga ega tacü rü mexü naxügügu. Rü ngëmaãcü nanaxügü na togü meã nachiga idexagüxüçèx. Natürü choma rü aixcũma pemaã nüxü chixu rü ngëma na duũxügü nüxü icuëxüügüxü nixĩ i norü ãmare, rü täütama nanayaxügü i to i ãmare i Tupanaxütawa. 3-4 —Natürü i cuma rü ngëxguma tacü tüxna cuxãxgu ya yixema ngearü ngëmaxüãxgüxe, rü name nixĩ i taxüema cuxü dauãcüma na cunaxüxü

i ngēma. Rū woo cumūcūxūchi rū tama name i nūxū na nacuáxū i ngēma. Rū Cunatū ya daxūgucū ya nūxū daucū i ngēma cuxicatama cuxūxū, rū tá cuxna nanaxā i curū āmare.

Ngechuchu nanangúexēē ga yumūxēchiga
(Lc 11.2-4)

⁵ —Rū ngēxguma peyumūxēgūgu, rū tama name i ngēma duūxūgū i togūpēxewa meā maxēnetaxūrūū pixīgū. Erū nūmagū rū ngēxguma nayumūxēgūgu, rū norū me nixī na chiācū nayumūxēgūxū i ngutaquēxepataūgūwa rū ítamūgūwa na duūxūgū nūxū na daugūxūcēx. Rū aixcūma pemaā nūxū chixu rū ngēma na duūxūgū nūxū daugūxūxīcatama nixī i norū āmare. ⁶ —Natūrū ngēxguma cuyumūxēgu, rū name nixī i curū ucapugu cuxūcu, rū cunawāxta i curū íāx, rū ngēma cuyumūxē namaā ya Cunatū ya bexma cumaāxīcatama ngēma ngēxmacū. Rū ngēxguma ya yima Cunatū ya Tupana ya nūxū daucū i ngēma cúācū cuxūxū, rū nūma tá cuxna nanaxā i curū āmare. ⁷ —Rū tama name i natūcēxma cunamēxēē i curū yumūxē naxrūū i ngēma duūxūgū i tama Tupanaxū cuēxgūxū. Erū nūmagū rū nagu narūxīnūē rū ngēma na namēxēēgūāxūcēx i norū yumūxē rū Tupana tá nūxū naxīnū. ⁸ —Rū tama name i ngēma duūxūgūrūū pixīgū, erū woo tauta naxcēx ípexaxgu rū Penatū ya Tupana rū marū nūxū nacuēx na tacū pexū taxūx. ⁹ —Rū ngēmacēx rū űaācū tá peyumūxēgū i pemax:

“Pa Tonatū ya Daxūgucūx, rū aixcūma űūnecū quixī i cumax. ¹⁰ |Rū nūma naxū na torū āēxgacū quīxūcēx! Rū tanaxwēxe i curū ngūchaū na naxūgūxū i duūxūgū i űoma i naānewa ngēxgumarūū i daxūgūxū i naānewa na curū ngūchaū ínaxūgūxūrūū. ¹¹ |Rū toxna naxā i torū űna i űoma i ngunexūcēx íxīxū! ¹² |Rū toxū nūxū nangechaū i torū chixexū i taxūxū ngēxgumarūū i toma rū tūxū nūxū na tangechaūxūrūū ya yíxema chixexū tomaā űgūxū! ¹³ |Tāxū i tacū rū chixexūpēxewa toxū cuwogūxū na tama nagu tayixūcēx! Natūrū tanaxwēxe i toxna cudau na tama ngēma chixexū taxūgūxūcēx. Erū cuma rū guxūguma guxūārū āēxgacū quixī rū cuporaxūchi rū cumexēchi. Rū ngēmaācū yī”.

¹⁴ —Rū ngēxguma pema nūxū nūxū pengechaūgu i ngēma duūxūgū i chixexū pemaā űgūxū, rū Penatū ya daxūgucū rū tá ta pexū nūxū nangechaū i perū pecadugū. ¹⁵ —Natūrū ngēxguma tama nūxū nūxū pengechaūgu i ngēma duūxūgū i chixexū pemaā űgūxū, rū Penatū ya daxūgucū rū tá ta tāūtama pexū nūxū nangechaū i perū pecadugū.

Ngechuchu nanangúexēē ga aurechiga

¹⁶ —Rū ngēxguma tama pechibūēācūma peyumūxēgūgu rū tama name i pegū pengechaūchíwexēē naxrūū i ngēma duūxūgū i togūpēxewa meā maxēnetaxū. Erū nūmagū rū ngēmaācū nanaxūgū na togū nūxū na daugūxūcēx i ngēma na Tupanacēx naxaureexū. Rū aixcūma pemaā nūxū chixu rū ngēma na duūxūgū nūxū daugūxūxīcatama nixī i norū āmare. ¹⁷ —Natūrū ngēxguma cuma rū tama cuchibūācūma cuyumūxēgu rū name nixī i meā cugū cyauxchiwe rū meā cugū curūxīxēēru. ¹⁸ —Rū ngēmaācū i togū i duūxūgū rū tāxūtama nūxū nacuēxgū na tama cuchibūācūma cuyumūxēxū. Rū Cunatū ya bexma cumaā ngēma ngēxmacūxīcatātama cuxū nadau, rū tá cuxna nanaxā i curū āmare naxcēx i ngēma cuxūxū.

űūxācū tūxū nangēxma i torū meruūgū i daxūgūxū i naānewa
(Lc 12.33-34)

19 –Rü tama name i pegücêx penanutaquêxe i muxûma i perû meruügü i ñoma i naânewa. Erü ñoma i naânewa rü paxama nagux i perû ngêmaxûgü, rü naweane rü paxama nanachixexêê, rü ngîtêxgüxü rü naxcêx nangîxgü. 20 –Rü narûmemaê nixî i penamuxêê i perû meruü i daxûguxü i naânewa. Erü ngema rü tâxûtâma nagux, rü naweane rü tâxûtâma nanachixexêê, rü ngîtêxgüxü rü tâxûtâma ngexma nachocu na naxcêx nangîxgüxücêx. 21 –Erü ngextâ íngangêxmaxûwa i perû ngemaxûgü, rü ngêxma nixî i perûxîñüêxü.

Taxûneârü omüchiga

(Lc 11.34-36)

22 –Cuxetügü rü ñoma wüxi i omürüü nixî i cuxunecêx. Rü ngêxguma ngêma Tupana cuxü naxwêxexücêx cudêyxgu, rü guxûma i curü maxü rü name. 23 –Natürü ngêxguma ñoma i naânearü ngüchaücêx cudêyxgu, rü guxûma i curü maxü rü chixexüwa nangêxma. Rü aixcûma nataxuma i êânexü i ngêmaârü yexera ixîxü i Tupanapêxewa.

¿Texécêx tá cumaxü, Tupanacêx rü êxna dîerucêx?

(Lc 16.13)

24 –Taxucürüwa wüxi i duüxü rü nataxrearü coriâx. Erü wüxi i norü corichi rü tá naxai, rü ngêma to rü tá nüxü nangechaü. Rü êxna wüxicêx rü tá meâ napuracü, rü ngêma to rü tá nüxü naxo. Rü taxucürüwa Tupanacêx pemaxê, ega perû dîeruguama perûxîñüêgu.

Tupana rü naxâcügüna nadau

(Lc 12.22-31)

25 –Rü ngêmacêx pemaâ nüxü chixu rü: ¡Tâxü i pexoegaâêgüxü naxcêx na tacü tá pengôxgüxü rü tacü tá pixaxgüxü, rü tacümaâ tá na pexâxchirügüxü! Erü perû maxü rü ñnaârü yexera nixî, rü pexene rü naxchiruarü yexera nixî. 26 –¡Dücêx penangü i werigü i tama toegüchirêxü, rü tama nanetüarü o ibuxgüxü, rü ngepatagüxü na ngexta namaâ nanguxügüxücêx i norü ñna! Natürü Penatü ya daxügücü rü nanaxüwemü. Rü pema rü Tupanacêx rü guxûma i werigüarü yexera pixîgü. 27 –Rü taxuwama name na tacücêx pexoegaâêgüxü. Erü taxucürüwa ya wüxie i pema rü wüxi i oragu rü ipenamêxâchixêê i perû maxü ega woo poraâcü naxcêx pexoegaâêgü. 28 –¿Rü tüxcüü pexoegaâêgü naxcêx i pexchiru? ¡Dücêx penangü i ngêma putüragü i ngextâmare yaexü i tama puracüexü, rü tama nügü üxchirügüxü! 29 –Natürü pemaâ nüxü chixu rü woo guma âêxgacü ga Charumóü ga na namexêchixü ga naxchiru, rü taguma wüxi ga putürachacurüü namexêchi. 30 –Rü ngêxguma Tupana ngêmaâcü nangêxâêgu i ngêma putüragü i ñuxma ngêxmagüxü natürü moxü rü marü taxuxü, rü yexera tá pexna nadau i pemax, Pa Yatügü i Tama Aixcûma Meâ Yaxôgüxüx. 31 –Rü ngêmacêx tama name i pexoegaâêgü rü ñaperügügü: –¿Tacü tá tangôxgü? rü êxna –¿tacü tá tixaxgü? rü êxna –¿tacümaâ tá taxâxchirügü? –ñaperügügü. 32 –Erü ñoma i naânecüâx i duüxügü rü naxcêx nadaugü i guxûma i ngêma pemaâ nüxü chixuxü. Natürü pema rü pexü nangêxma ya Penatü ya daxügücü ya nüêchama nüxü cuácü i pexü na nataxuxü i guxûma i ngêma. 33 –Natürü narûmemaê nixî i Tupanacêxira pedaugü na ngêma nüma pexü nanaxwêxexüxîra pexügüxücêx. Rü naetü tá pexna nanaxâ i guxûma i tacü i pexü taxuxü. 34 –¡Tâxü i naxcêx pexoegaâêgüxü i ngêma moxü tá üpetüxü! Erü ngêma moxüârü ngunexü rü tá nüxü nangêxma i guxchaxügü i namaâ

ínanguxũ. Erũ wũxichigũ i ngunexũ rũ nũxũ nangẽxma i noxrũtama guxchaxũgũ, rũ ngẽmacèx tama name i moxũãrũ guxchaxũgũcèx pexoegaãègũ i ñuxmax —ñanagũrũ.

7

Tama name i toguexũ tixu (Lc 6.37-38, 41-42)

¹ Rũ Ngechuchu rũ ñanagũrũ ta: —jRũ taxũ i toguũxũ pixuxũ! Rũ ngẽxguma ya Tupana rũ tãxũtãma pexũ nixu na pechixexũ. ² —Erũ ngẽxgumarũũ na toguũxũ pixuxũ rũ Tupana rũ tá pexũ nixu na pechixexũ. Rũ ngema na toguũxũ pepoxcuexũ, rũ ngemaãcũ tãtama nixĩ ya Tupana i pexũ napoxcuexũ. ³ —¿Rũ tũxcũũ i nũxũ cudawenũxũ i ngẽma cueneẽãrũ ùxaxetũxũ i íraxũ, ega chi tama naxcèx cuxoegaãègu i ngẽma cuxetũwatama ngẽmaxũ i naĩpũta i taxũ? ⁴ —Rũ ngẽxguma cuxetũwatama nangẽxmagu i wũxi i naĩpũta i taxũ ¿rũ ñuxãcũ i cueneẽxũ cuchixewexũ, rũ ñãcuxũ nũxũ:

“jPa Chaueneẽx, cuxũ chanayauxchaũ i ngẽma curũ ùxaxetũxũ!” —ñãcuxũ?

⁵ —Pa Duũxũ i Meã Maxnetaxũx, rũ name nixĩ i cunayauxira i ngẽma naĩpũta i cuxetũwatama ngẽmaxũ, rũ ngẽmaãcũ tá mea nũxũ cudau na cunayaxuxũcèx i ngẽma cueneẽãrũ ùxaxetũxũ. [Rũ ngẽmacèx name nixĩ i cuxira nũxũ curũxo i ngẽma chixexũ i taxũ i cumatama cuxuxũ, rũ ngẽxguma tá cume na nũxũ curũngũxẽxũcèx i cueneẽ na nũxũ naxoxũcèx i ngẽma chixexũ i íraxũ i naxũxũ.] ⁶ —Rũ tama name i Tupanaãrũ ore i ùñexũmaã penachixewe i ngẽma duũxũgũ i chixecũmagũxũ i tama yaxõgũchaũxũ, erũ ngũrũãchi ngẽmacèx tá pexũ nimèxgũ. Rũ ngẽxgumarũũ tama name i Tupanaãrũ oremaã penachixewe i ngẽma duũxũgũ i tama nũxũ cuèxgũchaũxũ, erũ tá ínanatèxgũ.

Name nixĩ i tórũ yumũxèwa Tupanana naxcèx tacã rũ naxcèx tadaugũ rũ ñãxwa: Tu tu tu, ñatarũgũgũ

(Lc 6.31, 11.9-13)

⁷ —jTupanana naxcèx peca! rũ nũma tá pexna nanaxã. jRũ Tupanaxũtagu naxcèx pedau! rũ tá nũxũ ipeyangau. jRũ norũ ñãxwa: Tu tu tu, ñapegũ! rũ tá pexcèx nayawãxna. ⁸ —Erũ guxãma ya yíxema naxcèx ícaxe, rũ tanayaxu. Rũ guxãma ya naxcèx dauxe, rũ nũxũ itayangau. Rũ guxãma ya yixema ñãxwa: Tu tu tu, ñagũxe, rũ tá tũmacèx niwãxna. ⁹ —Rũ dũcax i pemax, rũ ngẽxguma chi wũxi i pexacũ pãucèx ícaxgu, rũ ¿ñuxãcũ chi wũxi ya nuta nũxna pexãxũ? ¹⁰ —Rũ ngẽxguma chi choxnicèx pexna nacaxgu rũ ¿ñuxãcũ chi i ãxtape nũxna pexãxũ? ¹¹ —Rũ pema na pichixecũmachirèxũ rũ nũxũ pecuèx na mexũ i ãmare pexacũgũna pexãxũ. Natũrũ Penatũ ya daxũgucũ rũ ngẽma pema pexacũgũna pexãxũãrũ yexera tá tũxna naxã ya yíxema naxũtawã naxcèx ícaxe. ¹² —Rũ pemaã nũxũ chixu, rũ ngẽma pema penaxwèxexũ i togu pemaã na naxũxũ, rũ name nixĩ i pema rũ ta ngẽmaãcutama namaã penaxũ. Erũ ngẽmaãcũ tũxũ namu i Tupanaãrũ ore ga Moíchè ùmatũxũ rũ yema ore ga nuxcũmaũgũxũ ga Tupanaãrũ orearũ uruũgũ ùmatũxũ.

Ñãx i íraxũchiga (Lc 13.24)

¹³ —Name nixĩ i ngẽma ñãx i íraxũwaama pichocu. Erũ ngẽma ñãx i yuwa tũxũ gaxũ rũ ngẽma nama i yuwa daxũ rũ nata. Rũ muxũchixũma i duũxũgũ nagu naxĩ. ¹⁴ —Natũrũ ngẽma nama i maxũwa nadaxũ rũ ngẽma ñãx i maxũcèx nawa ixũcuxũ rũ naxĩra. Rũ noxretama nixĩ i duũxũgũ i nũxũ iyangaugũxũ.

Wüxi i nanetü rü norü owa nixî i nüxü icuáxü

(Lc 6.43-44)

¹⁵—Rü naxcèx pexuãègü i ngëma doratèèxgüxü i nügü ixugünetaxü na Tupanaârü orearü uruügü yixîgüxü. Erü nümagü rü petanüwa nangugü, rü nügü mexü i duüxügüneta nixîgüxëê. Natürü naãewa rü poraäcü chixexügu narüxinüê. ¹⁶—Rü pema rü nacümawa tá nüxü pecuèx i ngëma duüxügü, ngëxgumarüü i wüxichigü i nanetügü rü norü owa na nüxü icuáxü rüü ngoxi name rü êxna tama. Rü wüxi i torawa rü taxucürüwama ubagü tayaxu. Rü wüxi i chuchuxüwa rü taxucürüwama orix i igu tayaxu. ¹⁷—Erü guxüma i nanetü i mexü rü name i norü o. Rü guxüma i nanetü i chixexü rü nachixe i norü o. ¹⁸—Rü wüxi i nanetü i mexü rü taxucürüwama nachixe i norü o. Rü wüxi i nanetü i chixexü rü taxucürüwama name i norü o. ¹⁹—Rü guxüma i nanetü i tama mexü i norü o rü tayadaxüchi, rü ñuxüchi tayagu. ²⁰—Rü ngëxgumarüü nacümawa tá nüxü pecuèx i ngëma duüxügü i Tupanaârü orearü uruügüneta ixîgüxü.

Tātáma guxüma i duüxügü nichocu i ngextá Tupana äëxgacü ñixüwa

(Lc 13.25-27)

²¹—Rü tama guxüma i duüxügü i nügü ixugüxü na chorü duüxügü yixîgüxü rü tá nichocu i ngextá Tupana äëxgacü ñixüwa. Natürü yíxema aixcüma Chaunatü ya daxügücüga ñnüèxëxícatátama tixî ya ngëma ichocuxe. ²²—Rü ngëxguma ngëma ngunexü i naãeârü guxwa nanguxgu, rü muxüma i duüxügü rü choxü tá ñanagürügü: —Pa Corix, toma rü togü i duüxügümaã nüxü tixu i curü ore, rü cuégagu ítanawoxü i ngoxogü, rü cuégagu tanaxü i muxüma i mexü i taxü i Tupanaârü poramaã taxüxü —ñanagürügü tá choxü. ²³—Natürü ngëxguma rü tá ñacharügü nüxü: —Taguma chorü duüxügü pixîgü. ¡Rü choxna pixîgachi i pema i chixexü ügüe! —ñacharügü tá.

Yatü i Cristuga ñnüxü rü yatü i tama Cristuga ñnüxüchiga

(Mr 1.22, Lc 6.47-49)

²⁴—Rü ngëmacèx ya yíxema choxü ñnüxë rü naxüxe i ngëma choma tüxü chamuxü, rü wüxi ga yatü ga meã naãèxü cuácü ga nuta ga taciétügu üpatacürüü tixî. ²⁵—Rü pucü ga tacü ínangu, rü narümèx ga taxtü, rü nixüüchi ga wüxi ga tacü ga buanecü rü guma ígu nanguema. Natürü guma í rü tama niwëxtaü yerü wüxi ga nutaétügu naxü. ²⁶—Natürü yíxema choxü ñnüxë rü tama naxüxe i ngëma choma tüxü chamuxü, rü wüxi ga yatü ga tama naãèxü cuácü ga naxnücügumare üpatacürüü tixî. ²⁷—Rü pucü ga tacü ínangu, rü narümèx ga taxtü, rü wüxi ga tacü ga buanecü nixüüchi rü nagu nanguema ga guma í. Rü niwëxtaü, rü yexma nayarixo ga guxüma —ñanagürü ga Ngechuchu. ²⁸ Rü yexguma yagüegagu ga Ngechuchu ga na yadexaxü, rü ga duüxügü rü nabèjächiaègü namaã ga norü nguxëëtae. ²⁹ Yerü nüma rü Tupanaârü poramaã nanangüxëê, rü tama yema ngüxëëruügü ga ore ga mugüwa nguxëëtaegüxü rüü nixî.

8

Ngechuchu rü wüxi ga rüchaxünexüçèx nayataanexëê

(Mr 1.40-45; Lc 5.12-16)

¹ Rü yexguma guma mëxpünewa yanaxüegu ga Ngechuchu, rü muxüma ga duüxügü nawe narüxî. ² Rü Ngechuchucèx nixü ga wüxi ga yatü ga chaxünemaã idaawecü. Rü Ngechuchupéxegu nayacaxápüxü, rü ñanagürü nüxü: —Pa Corix, ngëxguma chi cuma cunaxwëxegu, rü chí cuxü natauxcha

na choxū curūmexēēxū —ñanagürü. ³ Rū yexguma ga Ngechuchu rü nüxū ningögü, rü ñanagürü nüxū: —Ngü, chanaxwëxe. ¡Rüme! —ñanagürü. Rū yexguma yema ñaxgu ga Ngechuchu, rü naxcëx nitaane ga guma yatü ga na nachaxüneāxū. ⁴ Rū Ngechuchu rü ñanagürü nüxū: —¡Dücëx, taxuemaã tá nüxū quixu! ¡Natürü ngema paixütawa naxū, rü cugü iyawëx! ¡Rü nüxna naxā i ngëma āmare ga Moiché tüxū muxū na duñxügü nüxū cuāxücëx na curūmexū! —ñanagürü.

Ngechuchu rü Dumacūāx ga churaragüarü āëxgacüarü duñxūxū narūmexēē
(Lc 7.1-10)

⁵⁻⁶ Rū Capernáüwa naxū ga Ngechuchu. Rū yexguma yéma nanguxgu, rü wüxi ga churaragüarü āëxgacü ga capitáü ga Dumacūāx rü Ngechuchucëx nixū. Rū Ngechuchuxū nacëëxū, rü ñanagürü: —Pa Corix, chorü duñxū rü nanawāixāchi. Rū ngürücarewa nangëxma i chopatawa, rü poraäcūxüchima ngüxū ninge —ñanagürü. ⁷ Rū Ngechuchu rü ñanagürü nüxū: —Marü tá ngema chaxū na naxcëx chayataanexëëxücëx —ñanagürü. ⁸ Natürü nüma ga capitáü nanangāxū, rü ñanagürü: —Pa Corix, choma rü taxuwama chame na chopatagu na cuxücuxücëx. Rū chanaxwëxe i curü orewaxicatama nüxū quixu, rü tá naxcëx nitaane i chorü duñxū. ⁹ —Erü choma rü ta rü chorü āëxgacümëxëwa changëxma. Rū choxmëxwa nangëxmagü ta i ñuxre i churaragü. Rū ngëxguma chanamuxgu i wüxi na ngextá naxūxücëx, rü ngema naxū. Rū ngëxguma chaugüxütawa naxcëx changemagu i to, rü chauxütawa nangu. Rū ngëxguma wüxi i chorü duñxūxū chamuxgu na tacü na naxūxücëx, rü choxū nanaxū —ñanagürü. ¹⁰ Rū yexguma yemaxū naxīnūgu ga Ngechuchu rü nabëixāchiāë. Rū ñanagürü nüxū ga yema duñxügü ga nawe rüxīxū: —Aixcūma pemaã nüxū chixu rü taxuüma i Yudiügütanüwa nüxū ichayangau i wüxi i duñxū i ñaã yatürüü aixcūma yaxōxū. ¹¹ —Rü choma rü pemaã nüxū chixu rü muxüchixū i duñxügü rü guxüwama tá ne naxī, rü Tupana āëxgacü íixīxüwa tá nachibüe namaã ya tórü oxigü ya Abrátü rü Ichaá, rü Acobu. ¹² —Natürü muxüma i Abráütanüxügü i Yudiügü rü taitáma nichocu i ngextá Tupana āëxgacü íixīxüwa. Rū eānexüwa tá nawogü. Rū ngema tá naxauxe, rü tá nixūxchapütagü —ñanagürü. ¹³ Rū yexguma ga Ngechuchu rü ñanagürü yema capitáüxū: —¡Cupatacëx nataegu! Rū tá naxcëx nitaane i curü duñxū, erü cuyaxō na naxcëx tá yataanexū —ñanagürü. Rū yexgumatama naxcëx nitaane ga yema capitáüarü duñxū.

Ngechuchu rü Pedru nëxëcëx nayataanexëē
(Mr 1.29-31; Lc 4.38-39)

¹⁴ Rū Pedrupatawa naxū ga Ngechuchu. Rū yéma ngīxū nadau ga Pedru nëxë ga ngürücaregu íruxāñüxcü yerü iyaxaxüne. ¹⁵ Rū Ngechuchu ngīxmëxgu ningögü, rü yexgumatama igëuxāchi ga yema na yaxaxünexū. Rū íirüda ga ngīmax. Rū ñuxüchi naxcëx inamexëë ga ñna.

Ngechuchu rü muxüma ga idaaweexücëx nayataanexëē
(Mr 1.32-34; Lc 4.40-41)

¹⁶ Rū yexguma marü yanaxüchaxügu ga üëxcü, rü Ngechuchuxütawa nanagagü ga muxüma ga duñxügü ga ngoxoāxgüxū. Rū wüxitama ga oremaã Ngechuchu ínanawoxū ga yema ngoxogü. Rū nanameëxëë ta ga guxüma ga yema togü ga idaaweexū. ¹⁷ Rū yemaäcü Ngechuchu nayanguxëë ga yema ore ga nuxcūmañxū ga Tupanaärü orearü uruü ga Ichaxía nüxū ixuxü ga ñaxū:

“Rü nüma rü tüxü naporaexêê i ngêxguma ituraegu, rü tüxü narümeexêê i ngêxguma idaaweegu”, ñaxü.

Duüxügu ga Ngechuchuwe rüixchaixüchiga
(Lc 9.57-62)

¹⁸ Rü yexguma Ngechuchu nüxü dëuxgu ga muxüma ga duüxügu na nüxü ichomaëguächixü, rü norü ngúexügümaâ nüxü nixu, rü ñanagürü: —¡Rü ngixâ, rü naxtaxaarü tocutüwa taxî! —ñanagürü. ¹⁹ Rü wüxi ga ngúexêëruü ga ore ga mugüwa nguxêetaexü, rü Ngechuchucêx nixü, rü ñanagürü nüxü: —Pa Ngúexêëruü Pa Ngechuchux, cuwe charüxüxchaü i ngextá cuma ícuxüxüwa —ñanagürü. ²⁰ Rü Ngechuchu nanangâxü rü ñanagürü: —Ngowagü rü nüxü nangêxma i naxmaügü, rü werigü rü nüxü nangêxma i naxchiâügü. Natürü choma i Tupana Nane na duüxüxü chixü, rü nataxuma i chauchica i ngextá naga chicuxeruxü —ñanagürü. ²¹ Rü wüxi ga to ga norü ngúexü, rü ñanagürü nüxü: —Pa Corix, cuwe charüxüxchaü, natürü chanaxwêxe i chaunatu tüxü ichayatêxira —ñanagürü. ²² Rü Ngechuchu nanangâxü, rü ñanagürü nüxü: —¡Noxtacüma chowe rüxü! Rü nüê i ngêma cutanüxü i tama yaxôgüxü iyatêxgü i ngêma yuexü —ñanagürü.

Ngechuchu rü buanecüxü rü yuapexü inayachaxächixêê
(Mr 4.35-44; Lc 8.22-25)

²³ Rü yexguma ga Ngechuchu rü wüxi ga nguëgu nixüe. Rü norü ngúexügü rü ta inayaxümücügü, rü inaxiâchi. ²⁴ Rü ngürüâchi naxtaxaarü ngâxütügu nüxü naxü ga wüxi ga buanecü ga taxüchicü. Rü guma nguëwa rü niyau-cuchichigü ga dexá. Natürü ga Ngechuchu rü nape. ²⁵ Rü yexguma ga norü ngúexügü rü inanabêixgügü, rü ñanagürügü nüxü: —Pa Corix, ¡toxü rüngüxêê, erü ngê mama itabaxügü! —ñanagürügü. ²⁶ Rü Ngechuchu nanangâxü, rü ñanagürü nüxü: —Pa Duüxügu i Tama Aixcüma Yaxôgüxüx, ¿tüxcüü pemüê? —ñanagürü. Rü yexguma ga Ngechuchu rü inarüda. Rü buanecü rü yuapena nachogü. Rü inayachaxâchi ga buanecü, rü inayarüxo ga yuape, rü inachaxanemare. ²⁷ Rü nümagü ga norü ngúexügü rü nabêixâchiâêgü, rü nügümaâ ñanagürügü: —¿Tacü êxna nixî i ñaâ yatü rü ngêmacêx woo ya buanecü rü yuape rü naga naxîñüxü? —ñanagürügü.

Yatügü ga Gadarácüxü ga ngoxogü nawa yexmagüxü
(Mr 5.1-20; Lc 8.26-39)

²⁸ Rü Ngechuchu rü norü ngúexügü rü naxtaxaarü tocutüwa nangugü ga Gadáaarü naânewa. Rü yexguma yéma nangugügu, rü Ngechuchucêx yéma nibuxmü ga taxre ga yatügü ga duüxêchiquêxetanügu yarüxachigütanüñüxü. Rü yema taxre rü ningoxoâx, rü nidüraexüchi. Rü yemacêx taxucürüwama texé yéma namawa taxüpetü. ²⁹ Rü yema taxre rü aita naxüe, rü ñanagürügü: —¿Tüxcüü toxü nuâ cuyachixewe, Pa Ngechuchu ya Tupana Nane? ¿Êxna nuâ cuxü na toxü ícuyawoxüxüçêx tauta nawa nanguyane na Tupana toxü poxcuxü? —ñanagürügü. ³⁰ Rü yema nachicaarü ngaicamana nachibüe ga muxüma ga cuchigü. ³¹ Rü yema ngoxogü rü Ngechuchuxü nacêxügü, rü ñanagürügü: —Rü ngêxguma toxü ícuwoxügu, ¡rü ngêma cuchigügu toxü nachocuxêê! —ñanagürügü. ³² Rü yexguma ga Ngechuchu, rü ñanagürü nüxü: —Êcü, ¡ngema pexî! —ñanagürü. Rü yexguma ga yema ngoxogü rü inachoxü nawa ga yema taxre ga yatügü, rü yema cuchigügu nayachocu. Rü ñuxüchi guxüma ga yema cuchigü rü

inaxũãchi, rü nextaxacutũarũ mèxpũxũwa nayarũyuxgũ, rü yexma nayi. ³³—Rü yema cuchigũarũ dauruũgũ rü nabèixãchiãègũ, rü ãnecèx nibuxmũ. Rü yexguma ãnewa nangugũ, rü nüxũ nixugũgũ ga guxũma ga yema ngupetũxũ ga ñuxãcũ naxcèx na yataanegũxũ ga yema taxre ga yatũgũ ga ngoxoãgxũxũ. ³⁴—Rü yexguma ga guxũma ga yema ãnecũãx ga duũxũgũ, rü Ngechuchuxũtawa naxi. Rü yexguma Ngechuchuxũ nadaugũ, rü nüxũ nacèxũgũ na ãnaxũxũcèx ga yema norũ naãnewa.

9

Ngechuchu rü wũxi ga yatũ ga nawãixãchicũcèx nayataanexè (Mr 2.1-12; Lc 5.17-26)

¹ Rü yexguma ga Ngechuchu rü wũxi ga nguëgu nixũe. Rü nextaxaarũ tocutũwa naxũ, rü noxrũtama ãnewa nangu. ² Rü yema guma ãnewa rü duũxũgũ rü Ngechuchuxũtawa nanangetaũgũ ga wũxi ga yatũ ga nawãixãchicũ. Rü yexguma Ngechuchu nüxũ dèuxgu ga ñuxãcũ aixcũma na yaxõgũãxũ ga yema duũxũgũ rü ñanagũrũ nüxũ ga guma idaawecũ: —jNataãe, Pa Chaunex! Erũ curũ pecadugũ rü marũ cuxũ nüxũ changechaũ —ñanagũrũ. ³ Rü yema nayexma ga ñuxre ga ngũxèèruũgũ ga ore ga mugũwa nguxèètaegũxũ. Rü nümagũ rü naãxègũwa ñanagũrũgũ: —¿Ñãã yatũ rü tacũ Tupanamaã nixugũ? —ñanagũrũgũ. ⁴ Natũrũ ga Ngechuchu rü nüxũ nacuèxama ga yema naãewa nagu naxĩnũèxũ. Rü yemacèx ñanagũrũ nüxũ: —¿Tũxcũũ chixexũgu perũxĩnũè? ⁵ —¿Tacũ nixĩ i ngẽma rũtauxchamaèxũ na namaã nüxũ ixũxũ ya daa nawãixãchicũ:

“Rü curũ pecadugũ rü marũ cuxũ nüxũ changechaũ”, rü èxna:

“jInachi rü ñixũ!” ñagũxũ nüxũ? ⁶ —Natũrũ i ñuxma rü tá pexũ nüxũ chadauxèè na Chaunatu ya Tupana núma choxũ muxũ na duũxũgũaxũ nüxũ changechaũxũcèx i norũ pecadugũ —ñanagũrũ. Rü yexguma rü ñanagũrũ nüxũ ga guma nawãixãchicũ: —jInachi, rü nayaxu i curũ caruũ, rü cupatawa naxũ! —ñanagũrũ. ⁷ —Rü yexgumatama ga guma nawãixãchicũ rü inachi, rü napatawa naxũ. ⁸ Rü yexguma yemaxũ nadaugũga ga duũxũgũ, rü poraãcũ namuũè. Rü Tupanaxũ nicuèxũgũ, rü ñanagũrũgũ: —Moxè, Pa Tupanax, erũ cunaporaxèè i ñãã yatũ na ngẽmaãcũ mexũ toxcèx naxũxũcèx —ñanagũrũgũ.

Mateucèx naca ga Ngechuchu (Mr 2.13-17; Lc 5.27-32)

⁹ Rü yexguma yema inaxũãchigu ga Ngechuchu, rü yema nüxũ nadau ga wũxi ga yatũ ga Mateugu àegaxũ ga yema rũtoxũ ga ngextá Dumaãrũ àèxgacũcèx dũru ngĩxũ ñnayauxgũxũwa yerũ woetama yemawa napuracũ. Rü Ngechuchu rü ñanagũrũ nüxũ: —jChowe rũxũ! —ñanagũrũ. Rü yexguma ga Mateu rü inachi, rü nawe narũxũ. ¹⁰ Rü Mateupatawa naxũ ga Ngechuchu, rü yema nachibũ. Rü ñanagũgũ ta ga muxũma ga togũ ga duũxũgũ ga Dumaãrũ àèxgacũcèx dũru ngĩxũ yaxugũxũwa puracũexũ, rü togũ ga duũxũgũ ga taxũema nacũmamaã taãègũxũ. Rü yema duũxũgũ rü yema mechawa narũtogũ namaã ga Ngechuchu rü norũ ngũexũgũ. ¹¹ Natũrũ yexguma yemaxũ nadaugũga ga Parichègũ, rü Ngechuchuarũ ngũexũgũna nacagũ, rü ñanagũrũgũ: —¿Ñuxãcũ i perũ ngũxèèruũ rü namaã nachibũ i àèxgacũarũ duũxũgũ i dũruarũ yaxwa puracũexũ, rü duũxũgũ i pecaduãgxũxũ? —ñanagũrũgũ. ¹² Rü yexguma yemaxũ naxĩnũgu ga Ngechuchu, rü ñanagũrũ nüxũ ga Parichègũ: —Ngẽma poraexũ rü tama nanaxwèxegũ ya duturu,

natürü ngêma idaaweexü nixî i naxwêxegüxü. ¹³ —jRü ípixî, rü nawa pengúe i Tupanaärü ore i ümatüxü i ñaxü:

“Choma rü tama chanaxwêxe i chauxcêx peyamêx i carnerugü, natürü chanaxwêxe i togü pexü nangechaütümüügü”, ñaxü! Rü ñanagürü ta ga Ngechuchu: —Choma rü tama mexüguna na chauxcêx nixî i nûma chaxüxü, natürü nûma chaxü na nûxna chauxcêx i ngêma pecaduãxgüxü na ngêmaãcü nûxü naxoexücêx i nacümagü i chixexügü —ñanagürü.

Ngechuchuna nacagüe ga aurechiga
(Mr 2.18-22; Lc 5.33-39)

¹⁴ Rü yexguma ga Cuáü ga baiüxêeruüärü ngüexügü, rü Ngechuchucêx naxî, rü nûxna nacagüe, rü ñanagürügü: —Toma i Cuáüärü ngüexügü na tixîgüxü rü nûmagü i Parichéugü rü muëxpüxcüna tama tachibüeácüma tayumüxégü. ¿Rü tüxcüü i curü ngüexügü rü tama toxrüü tama nachibüácüma nayumüxégü? —ñanagürügü. ¹⁵ Rü Ngechuchu nanangäxü rü ñanagürü: —¿Éxna wüxi i ngîgüarü petawa rü pexcêx namexü na nangechaüêxü rü naxaureexü i ngêma nûxna naxugüxü ega natanüwa nangêxmagu i ngêma yatü i ngexwacêx âmaxü? Maneca tama nixî. Natürü wüxi i ngunexügu rü ngêma yatü i ngexwacêx âmaxü rü tá namücügüna nixügachi. Rü ngêma ngunexügu tá nixî i aixcüma naxaureexü i namücügü. ¹⁶ —Rü taxüema tanapaita i wüxi i naxchiru i ngauxü namaã i wüxi i natüchi i ngexwacaxüxü i tauta nañaächimüxü. Erü ngêxguma nayauxgu i ngêma naxchiru rü tá nügü Ínanaxíraxâchi i ngêma natüchi i ngexwacaxüxü, rü tá nanagauxêê i ngêma wexachiru. Rü noxriarü yexera tá nixî i na nagauxü. ¹⁷ —Rü ngêxgumarüü ta rü taxüema ngexwacaxücü ya binu rü nagu tayabacuchi i wüxi i naxchixü i marü ngauxü i naxchêxmünaxcêx. Erü ngêxguma ngêmaãcü naxüxgu rü yima binu ya ngexwacaxücü rü narüngu, rü tá nayawãixêê i ngêma naxchixü i ngauxü i naxchêxmünaxcêx. Rü ngêxma tá nayarütaxu ya binu rü ngêma naxchixü rü ta. Rü ngêmacêx tanaxwêxe ya ngexwacaxücü ya binu rü ngexwacaxüxü i naxchixügu tayabacuchi. Rü ngêmaãcü táitama inayarütaxu. [Rü chorü nguxêêtae i ngexwacaxüxü rü ngêxgumarüü ta nixî na taxucürüwama namaã nawüxigüxü i ngêma nuxcümaüxü i pecümagü —ñanagürü ga Ngechuchu.]

Yáiruxacüchiga rü yema nge ga Ngechuchuchirugu ingögücüchiga
(Mr 5.21-43; Lc 8.40-56)

¹⁸ Rü yexguma yemaãcü ínangüexêetaeyane ga Ngechuchu, rü naxütawa nangu ga wüxi ga äëxgacü ga Yudíugüarü. Rü Ngechuchupêxegu naya-caxápüxü, rü ñanagürü nüxü: —Pa Corix, chauxacü rü ngexwacêx iyu. Natürü ngêxguma chi ngema cuxüxgu rü ngîxü quingögügu, rü wena chixarü imaxü —ñanagürü. ¹⁹ Rü inachi ga Ngechuchu, rü norü ngüexügümaã yema äëxgacüwe narüxü. ²⁰ Rü yexguma yema naxüyane ga Ngechuchu rü wüxi ga ngecü ga 12 ga taunecü ägüechacü rü naweama ne ixü. Rü naxpechinüchirugu iyangögü. ²¹ Yerü ngîma rü nagu irüxînú rü yexguma chi naxchiruxüxícatama yangögümaregu, rü chi ngîxcêx nitaane. ²² Natürü nûma ga Ngechuchu rü nügü inidau, rü ngîxü nadau ga yema nge. Rü ñanagürü ngîxü: —jNataãê, Pa Chauxacü! Marü cuxcêx nitaane, erü cuyaxö —ñanagürü. Rü yexgumatama ngîxcêx nitaane. ²³ Rü yexguma yema äëxgacüpatawa nanguxgu ga Ngechuchu, rü nüxü nadau ga paxetatanüxü ga marü na ínamemaregüxü na ngîxü iyatêxgüxü ga yema bucü. Rü ga duüxügü rü nixáicha rü naxauxe. ²⁴ Rü

Ngechuchu ñanagürü nüxü ga yema duüxügü: —Ípechoxü i nuã! Erü ngëma bucü rü tama iyu. Rü ipemare —ñanagürü. Natürü nümagü ga duüxügü rü Ngechuchuxü nacugüeama. ²⁵ Rü yexguma Ngechuchu inachoxüxëëxgu ga duüxügü, rü yema buciarü ucapugu naxücu. Rü ngïxmëxgu nayayauxächi, rü yexgumatama írüda ga ngïmax. ²⁶ Rü guxüwama ga yema naãnewa, rü duüxügü nüxü nixuchigagü ga yema Ngechuchu üxü.

Ngechuchu naxcëx nayataanexëë ga taxre ga yatü ga ingexetüxü

²⁷ Rü yexguma yéma ínaxüüxgu ga Ngechuchu, rü taxre ga ngexetüxü rü nawe nangëgü. Rü tagaãcü ñanagürügü: —Pa Ngechuchux, Pa Dabítanüxüx, ¡cuxü tangechaütümüügü! —ñanagürügü. ²⁸ Rü yexguma Ngechuchu guma í ga nagu napexünegu naxücuxgu, rü yema taxre ga ngexetüxü rü naxcëx naxí. Rü Ngechuchu nüxna naca, rü ñanagürü: —¿Peyaxögüxü yíxü na chaporaxü na pexü charümeëxëëxüxcëx? —ñanagürü. Rü nümagü nanangãxügü, rü ñanagürügü: —Ngü, Pa Corix, tayaxögü —ñanagürügü. ²⁹ Rü yexguma ga Ngechuchu rü naxëtügügu ningögü, rü ñanagürü nüxü: —¡cü pexcëx yataane, erü peyaxögü! —ñanagürü. ³⁰ Rü naxcëx nitaanegü. Rü Ngechuchu rü poraãcü nayaxucuxëgü na taxúemaãma nüxü na yaxugüxüxcëx ga yema nüxü ngupetüxü. ³¹ Natürü yema taxre rü yexguma yéma inachoxügu rü guxüwama ga yema naãnewa rü nüxü nixugüeama ga yema Ngechuchu üxü.

Ngechuchu rü naxcëx nayataanexëë ga wüxi ga yatü ga tama idexacü

³² Rü yexguma yema taxre ga yatü íchoüxguwena, rü ñuxre ga duüxügü rü Ngechuchuxütawa nanagagü ga wüxi ga yatü ga tama idexacü yerü ngoxo nawa nayexma. ³³ Rü Ngechuchu ínatëxüchi ga yema ngoxo. Rü yexgumatama ínanaxügü ga na yadexaxü ga guma yatü. Rü nümagü ga duüxügü rü nabëixächiãëgü. Rü ñanagürügü: —Taguma nüxü tadau i nuã tachiüãnewa i ¡tacü i ñaarüü ixixü —ñanagürügü. ³⁴ Natürü ga Parichëgü rü ñanagürügü: —Ñã yatü rü ngoxögüarü ãëxgacü i Chatanáarü poramaã nixí i ínawoxüãxü i ngoxögü —ñanagürügü.

Ngechuchuaxü nangechaütümüügü ga duüxügü

³⁵ Rü yema naãnewa rü guxüñema ga íãnegügu rü íãnexãcügügu nixügüchigü ga Ngechuchu. Rü wüxichigü ga íãnewa, rü duüxügüarü ngutaquëxepataüwa ningüëëtaechigü. Rü duüxügümaã nüxü nixuchigü ga ore ga mexü na ñuxãcü ãëxgacü na yíxü ya Tupana. Rü nanameëxëë ga duüxügü ga idaaweexü. Rü woo nañuxraüxü ga norü ñaawe nüxü yexmaxü, rü nanameëxëë. ³⁶ Rü yexguma Ngechuchu nüxü deüxgu ga yema muxüma ga duüxügü ga naxütawa ngugüxü, rü nüxü nangechaütümüügü. Yerü carnerugü ga ngearü dauruüãxürüü nanaxixächiãëgü, rü tama nataãëgü. ³⁷ Rü yexguma ga Ngechuchu rü ñanagürü nüxü ga norü ngüexügü: —Aixcüma pemaã nüxü chixu rü nangëxma i muxüchixü i duüxügü i ímemaregüxü na yaxögüãxü i Tupanaarü ore. Natürü nanoxreëxpüx i Tupanaarü puracütanüxü na namaã nüxü yaxugüxüxcëx i ngëma ore. ³⁸ Rü ngëmacëx name nixí i duüxügüarü yora ya Tupanana naxcëx peca i perü yumüxëwa na yamugüãxüxcëx i norü puracütanüxü i orearü uruügü na ngëma duüxügümaã nüxü yaxugüxüxcëx i norü ore i mexü —ñanagürü ga Ngechuchu.

10

Ngechuchu nanade ga 12 ga norü ngüexügü na toxnamana namugüãxüxcëx (Mr 3.13-19; Lc 6.12-16)

¹ Rū yexguma ga Ngechuchu, rū yema 12 ga norū ngúexǔgúcèx naca. Rū nūxna naxāga rū nanaporaexēē na ínawoxǔāxǔcèx ga ngoxogū rū nameēxēēāxǔcèx ga duǔxǔgū ga idaaweexǔ ga woo nañuxraǔxǔ ga daawe nūxǔ yexmaxǔ. ² Rū ñaā nixǔ ga naegagū ga yema 12 ga Ngechucharū ngúexǔgū ga imugǔxǔ. Rū natanūwa rū Chimáú ga Pedrugu āegacū nixǔ ga naēru íxǔxǔ. Rū to nixǔ ga Pedrueneē ga Aǔdré. Rū to nixǔ ga Chaǔtiágu rū to nixǔ ga Chaǔtiágueneē ga Cuáú. Rū yema taxre rū Zebedéu nanegū nixǔgū. ³ Rū togū nixǔ ga Piripi, rū Baturumé, rū Tumachi, rū Mateu ga Dumaārū āēxgacūcèx díeruarū yauxwa puracūchirécū. Rū togū nixǔ ga Chaǔtiágu ga Arupéu nane, rū Tadéu. ⁴ Rū to nixǔ ga Chimáú ga iporaāēcūcū. Rū to nixǔ ga Yuda ga Icariúte ga yixcama bexma cúācū Ngechuchuxǔ íxuaxǔxǔ.

Ngechuchu rū norū ngúexǔgǔxǔ nimugū na nūxǔ yanaxugúexǔcèx ga norū ore

(Mr 6.7-13; Lc 9.1-6)

⁵ Rū Ngechuchu nayamugū ga yema 12 ga norū ngúexǔgū. Rū nūxna naxāga, rū ñanagūrū: —Ǫtáutáma natanūwa pexǔ i ngēma duǔxǔgū i tama Yudíugū íxǔgǔxǔ! ¡Rū tǔtáma Chamáriacǔāx i duǔxǔgǔarū íānegúwa pexǔ! ⁶ —Natūrū chanaxwèxe i ngēma Yudíugū i carnerugūrū iyarūtauxexǔtanūwa pexǔ. ⁷ —¡Rū ngēma natanūwa nūxǔ peyarǔxu na marū yangaicaxǔ ya Tupana na norū āēxgacū yǔxǔ! ⁸ —¡Rū penameēxēēx i ngēma duǔxǔgū i idaaweexǔ! ¡Rū wena penamaxēēēx i ngēma duǔxǔgū i marū yuexǔ! ¡Rū penameēxēēx i ngēma duǔxǔgū i chaxúnemaā idaaweexǔ! Rū ngēma duǔxǔgū i ngoxogū nawa ngēxmagǔxǔ ¡rū nūxǔ ípenawoxǔxǔ! Rū tama name i penaxátanū ega texéxǔ perúmexēēxgu, erū pema rū pexǔ nangetanūmare i ngēma pora. ⁹⁻¹⁰ —¡Rū tǔtáma ípingearū díeruāxgū na perū ǫacūcèx petaxegǔxǔcèx rū bai i perū choca i perū namawaú! ¡Rū wǔxitama i pexchiru ípinge, rū bai i perū chapatu, rū bai ya perū caxǔchigǔxǔ ya naǔxmenēxā ípinge! Rū pemaā nūxǔ chixu rū wǔxi i puracūtanǔxǔ rū name nixǔ i ngēma duǔxǔ i nūxǔ napuracúǔxǔtawana nachibū. ¹¹ —Rū ngēxguma wǔxi ya íānewa rū ēxna wǔxi ya íānexācūwa pengugūgu i pemax, ¡rū naxcèx pedéux i wǔxi i duǔxǔ i mecūmaxǔ! ¡Rū ngēmaxǔtagu perūcho ñuxmatáta ípexǔāchi i ngēma íānewa! ¹² —Rū ngēxguma yima ípatagu pechocugu, rū meā tá nūxǔ perúmoxēgū i ngēma duǔxǔgū i ngēma ngēxmagǔxǔ rū: “¡Tupana pexǔ rǔngǔxēēx!” ñaperǔgǔgū tá nūxǔ. ¹³ —Rū ngēxguma ngēma duǔxǔgū rū meā pexǔ nayauxgu rū Tupana tá nūxǔ narǔngǔxēē. Natūrū ngēxguma tama meā pexǔ nayauxgu i napatawa rū ñaperǔgǔgū tá nūxǔ:

“Marū name i toxnamana taxǔ”, ñaperǔgǔgū tá. ¹⁴ —Rū ngēxguma wǔxi ya íwa rū ēxna wǔxi ya íānewa duǔxǔgū tama meā pexǔ yauxgūgu rū tama nūxǔ naxǔñūēchaǔgu i perū ore, ¡rū ípechoxǔ! Rū ngēxguma ípechoǔxgu, ¡rū meā pegū ípepagūcutū i perū ǔxaxǔcutū, na ngēmawa nūxǔ nacuēxǔgǔcèx na chixexǔ na naxǔgǔxǔ i ngēma duǔxǔgū! ¹⁵ —Rū aixcuma pemaā nūxǔ chixu rū ngēma ngunexǔ i nagu nagǔxǔ i naāne, rū Chodomacǔāx rū Gomoracǔāx i duǔxǔgǔarū yexera Tupana tá nanapoxcxe i ngēma duǔxǔgū i tama meā pexǔ yauxgǔxǔ.

Guxchaxǔgumaā tá pewé ningexǔtanū i duǔxǔgū

¹⁶ —Dúcèx, āícūmaxǔwa pexǔ chamugū, ngēxgumarū i carnerugǔxǔ aigǔtanūwa imugǔxǔrū. ¡Rū ngēmacèx penaxwèxe i āxtapegūrū pexuāēgū, natūrū muxtucugūrū taxuǔma i chixexǔ pexǔgū! ¹⁷ —¡Rū pegūna pedaugǔ!

Erü duïxügü rü tá pexü ínayauxü, rü ãëxgacügüxütawa tá pexü nagagü na pexü napoxcuexüçex. Rü ngutaquëxepataüügü tá pexü niçuaixgü. ¹⁸ —Rü chaugagu tá ãëxgacügü ya tacügüpëxewa pexü nagagü. Rü ngëmaacü tá chauchigagu pidexagü napëxewa i ngëma ãëxgacügü rü napëxewa i ngëma duïxügü i tama Yudiügü íxügüxü. ¹⁹ —Natürü ngëxguma ãëxgacügüpëxewa pexü nagagü na pexü napoxcuexüçex, jrü taxucëxáma pexoegaãëgü na facümaã tá penangãxüxü rü ëxna ñacüxü tá namaã na pixuxü! Erü ngëxguma nawa nanguxgu na pidexagüxü, rü Tupanaãë tá pexü nanguxëë na ñacüxü tá namaã pixuxü. ²⁰ —Rü täütáma pema nixí i pidexagüxü, natürü Tupanaãë i Üünexü tá nixí i pewa idexaxü. ²¹ —Rü nügüeneëgüwa rü tá nügü ínaxuaxügü na ãëxgacügü yamëxgüxüçex. Rü ngëxgumarüü tá ta nanatügü rü naxãcügüxü ínaxuaxügü, rü naxãcügü rü nanatügüxü tá ínaxuaxügü na ãëxgacügü tüxü imëxgüxüçex. ²² —Rü chaugagu tá guxü i duïxügü pexchi naxaie. Natürü yixema aixcúma yaxõmáxë i chorü ore rü tama choxü ítaxe, rü yixema tá tixí ya nayaxúxe i ngëma maxü i taguma gúxü. ²³ —Rü ngëxguma wüxi ya íãnewa rü duïxügü pexü daixchaügu, rü name nixí i pibuxmü ya yima íãnewa, rü náí ya íãnewa pexí. Rü aixcúma pemaã nüxü chixu rü täütáma guxüne ya Yudiügüarü íãnewa pengugü naxüpa na chataeguxü i chomax. ²⁴ —Rü taxuüma i wüxi i ngüexü rü norü ngüexëëruüxü narüyexera. Rü taxuüma i wüxi i coriarü duïxü rü norü corixü narüyexera. ²⁵ —Rü ngëma norü ngüexëëruüxü üpetüxürüü tátama nüxü naxüpetü i ngëma norü ngüexü. Rü ngëma norü corixü üpetüxürüü tátama nüxü naxüpetü i ngëma norü duïxü. Rü ngëxguma duïxügü rü ngoxo i Bechëbú choxü nawogüegu, jrü ñuxãcü tá pexü naxu i pemax?

Name nixí na Tupanaxü pemuüëxü
(Lc 12.2-7)

²⁶ —Rü ngëmacëx ¡täxü i nüxü pemuüëxü i ngëma duïxügü! Erü guxüma i ngëma cúãcü üxü rü tá nangoxoma. Rü guxüma i ngëma ñuxma duïxügüçex ëxügüxü, rü yixcúra rü tá nüxü nacüxëgüama. ²⁷ —Rü guxüma i ngëma pemaãxícatama nüxü chixuxü, jrü meã duïxügüçex penangoxëëx! Rü guxüma i ngëma bexma pemaã nüxü chixuxü, jrü tagaãcü guxü i duïxügümaã nüxü pixu! ²⁸ —jrü täxü i nüxü pemuüëxü i ngëma duïxügü i pexü daixchaüxü! Erü taxünexüxícatama nimëxgü. ¡Natürü name nixí i nüxü pemuüë ya yima Tupana! Erü nüma nüxü nangëxma i pora na napoxcuãxüçex i pexene rü peãë rü tá i ngëma ngoxogüxü ínapoxcuexügu. ²⁹ —¿Tama ëxna wüxítachinü i díerugu namaã petaxe i taxre i werixacügü? Natürü bai i wüxi i ngëma werixacü rü ñaxtüanegu nangu, ega tama nanaxwëxegu ya Penatü ya Tupana. ³⁰ —Rü woo i peyae rü Tupana rü wüxichigü rü nayaxugü, rü nüxü nacüex na ñuxre ngëxmaxü. ³¹ —Rü ngëmacëx ¡täxü i pemuüëxü! Erü pema rü muxüma i werixacügüarü yexeraxüchi pexü nangechaü ya Tupana.

Yixema duïxügüpëxewa tügü ixuxe na Ngechuchu ya Cristuarü duïxügü tiixü

(Lc 12.8-9)

³² —Rü guxáma ya texé i ñoma i naãnewa i duïxügüpëxewa tügü ixuxe na chorü duïxü tiixü, rü choma rü tá ta Chaunatü ya daxügücüpëxewa tüxü chixu na chorü duïxü tiixü i tümax. ³³ —Natürü texé ya ñoma i naãnewa i duïxügüpëxewa tügü ixuxe na tama chorü duïxü tiixü, rü choma rü tá ta Chaunatü ya daxügücüpëxewa tüxü chixu na tama chorü duïxü tiixü i tümax.

Ngechuchugagu nixĩ i yatoyexũ i duĩxũgũ
(Lc 12.51-53; 14.26-27)

³⁴—Rũ tama name i nagu perũxĩnũẽ na nũma chaxũxũ na guxũ i duĩxũgũ rũ wũxigu naxĩnũẽxũcẽx. Natũrũ pemaã nũxũ chixu rũ nũma chaxũ na chaugagu yatoyexũcẽx i duĩxũgũ. ³⁵—Rũ nuã chaxũ na wũxi ya yatũ rũ tama nanatũmaã wũxigu naxĩnũxũcẽx, rũ wũxi i paxũ rũ tama naẽmaã wũxigu naxĩnũxũcẽx, rũ wũxi i naneãx rũ tama ngĩxẽmaã na wũxigu naxĩnũxũcẽx. ³⁶—Rũ ngẽmaãcũ wũxi ya ĩwa, rũ nũgũtanũxũmaã tátama naxuwanũãxgũ. ³⁷—Rũ yĩxema texẽ ya choxũ na tangechaũxũrũ yexera tũmanatũxũ rũ ěxna tũmaẽxũ ngechaũxẽ, rũ taxucũrũwama chorũ duĩxũ tixĩ. Rũ yĩxema texẽ ya choxũ na tangechaũxũrũ yexera tũmanexũ rũ ěxna tũmaxãcũxũ ngechaũxẽ, rũ taxucũrũwama chorũ duĩxũ tixĩ. ³⁸—Rũ yĩxema tama yaxna namaã ĩnũxẽ i ngẽma guxchaxũgũ i chaugagu tũmacẽx ĩnguxũ rũ ngẽmaãcũ chowe rũxũxẽ, rũ taxucũrũwama chorũ duĩxũ tixĩ. ³⁹—Rũ texẽ ya tũgũ maxẽẽchaũxẽ rũ tá itayarũtaxu. Natũrũ texẽ ya chauxcẽx yuxe rũ tá tanayaxu i maxũ i taguma gũxũ.

Ãmarechiga
(Mr 9.41)

⁴⁰—Rũ texẽ ya pexũ yaxũxe rũ choxũ nixĩ i tayaxuxũ. Rũ texẽ ya choxũ yaxũxe rũ yima nũma choxũ mucũ ya Chaunatũxũ nixĩ i tayaxuxũ. ⁴¹—Rũ texẽ ya wũxi i orearũ uruũ i Tupana ngẽma muxũxũ yaxũxe, rũ ngẽmatama ãmare i wũxi i orearũ uruũ yaxuxũraũxũ tátama tayaxu. Rũ texẽ ya wũxi i yatũ i mecũmaxũxũ yaxũxe erũ namecũma, rũ ngẽmatama ãmare i wũxi i yatũ i mecũmaxũ yaxuxũraũxũ tátama tayaxu. ⁴²—Rũ texẽ ya wũxi i pochuyuãcu i dexã i gẽuxchiũxũ nũxna ãxẽ i ngẽxũrũũxũ i chorũ buxũgũ i chowe rũxĩxũ, rũ aixcũmaxũchi tá tanayaxu i tũmaãrũ ãmare —ñanagũrũ ga Ngechuchu.

11

Cuãũ ga baiũxẽẽruũ nanamu ga ñuxre ga norũ duĩxũgũ na Ngechuchuxũtawa ĩyadaugũxũcẽx
(Lc 7.18-35)

¹ Rũ yexguma nũxũ nachauxgu ga Ngechuchu ga na yaxucũxẽgũãxũ ga yema 12 ga norũ ngũxũgũ, rũ inaxũãchi ga yema na duĩxũgũxũ nangũxẽẽxũcẽx rũ nũxũ yaxũxũcẽx ga ore ga mexũ ga guxũne ga ĩãnegũ ga yema naãnewa yexmagũnewa. ²⁻³ Rũ Cuãũ ga baiũxẽẽruũ rũ yexguma poxcupataxũwa nayexmayane, rũ nũxũ nacuãxchiga ga yema Ngechuchu xũxũ. Rũ yemacẽx ga Cuãũ rũ Ngechuchuxũtawa nanamugũ ga ñuxre ga norũ duĩxũgũ na nũxna yacagũxũcẽx rũ aixcũma Cristu ga ĩnguxũẽẽgũcũ yĩ, rũ ěxna to tá yĩ ga Cristu. ⁴ Rũ Ngechuchu nanangãxũ rũ ñanagũrũ nũxũ ga yema duĩxũgũ: —;Pewoegu rũ Cuãũmaã nũxũ peyarũxu i ngẽma pematama nũxũ pedaugũxũ rũ nũxũ pexĩnũẽxũ! ⁵—;Rũ namaã nũxũ pixu rũ ngẽma ngexetũgũxũ rũ marũ nidauchigũ, rũ ngẽma ichixeparaxũ rũ marũ inachigũ, rũ ngẽma chaxũneãxgũxũ rũ marũ naxcẽx nitaanegũ, rũ ngẽma ngauchĩxẽgũxũ rũ marũ ningoxnamachĩxẽgũ, rũ ngẽma yuexũ rũ wenaxãrũ namaxẽ, rũ ngẽma ngearũ ngẽmaxũãxgũxũ rũ marũ namaã nũxũ tixu i Tupanaãrũ ore i mexũ! ⁶ Rũ tataãe ya yĩxema texẽ ya tama nũxũ rũxoxe na choxũ tayaxõxũ —ñanagũrũ ga Ngechuchu. ⁷ Rũ yexguma nawoeguxgu ga yema Cuãũ ga baiũxẽẽruũrũ duĩxũgũ, rũ Ngechuchu inanaxũgũ ga guma Cuãũchiga na yadexaxũ. Rũ ñanagũrũ nũxũ ga duĩxũgũ: —;Iacũ

nixĩ ga pema ípeyadaugũxũ ga dauxchitawa ga ngextá taxúema íxãpataxũwa? —¿Éxna wũxi ga ngẽxũrũxũmare ga yatũ ga ñoma dexne ga buanecũ yaxĩãxtanũcũxẽẽcũrũũ ixĩxũ nixĩ ga ípeyadaugũxũ? ⁸ —Rũ éxna ega tama guma ípeyadaugũgu, ¿rũ tacũ nixĩ ga ípeyadaugũxũ? ¿Éxna wũxi ga yatũ ga poraãcũ nũgũ ngẽxãẽxũ yĩxũ ga ípeyadaugũxũ? Pema nũxũ pecuẽx i ngẽma poraãcũ nũgũ ngẽxãẽgũxũ rũ ãẽxgacũgũ ya tacũgũpatawa nangẽxmagũ. ⁹ —¿Tacũ éxna nixĩ ga ípeyadaugũxũ? ¿Éxna wũxi ga Tupanaãrũ orearũ uruũxũ? Ngẽmããcũ aixcũma yema nixĩ ga ípeyadaugũxũ. Rũ pemaã nũxũ chixu rũ Cuáũ ya baiũxẽẽruũ rũ tama wũxi i ngẽxũrũxũmare i Tupanaãrũ orearũ uruũ nixĩ. ¹⁰ —Rũ Cuáũchiga nixĩ ga naxũmatũxũ ga yema Tupanaãrũ ore ga ñaxũ: “Cupẽxegu chayamu i chorũ orearũ ngerũ na cuxcẽx namexẽẽaxũcẽx i duũxũgũarũ maxũ”,

ñaxũ. ¹¹ —Rũ aixcũma pemaã nũxũ chixu rũ guxũ i duũxũgũtanũwa rũ nataxuma i Tupanaãrũ orearũ uruũ i Cuáũ ya baiũxẽẽruũãrũ yexera ixĩxũ. Natũrũ yĩxema Tupana ãẽxgacũ íxĩxũwa wixwexũchi ùxe, rũ Cuáũãrũ yexera tixĩ. ¹² —Rũ yexguma noxri Cuáũ ya baiũxẽẽruũ inaxũgũgu na nũxũ yaxũxũ i ñuxãcũ Tupana ãẽgacũ ixĩxũwa nangugũxũ i duũxũgũ, rũ nũma ga duũxũgũ rũ norũtama ngũchaxũmaã nawa nangugũchaxũ i ngema nachica. Rũ ñuxma rũ ta ngemagutama narũxĩnũe. ¹³ —Rũ guxũma ga Tupanaãrũ orearũ uruũgũarũ orewa, rũ ore ga mugũ ga Moĩché ũmatũxũwa rũ nũxũ nixuchigagũ na ínanguẽgaxũ ya Cristu na ãẽxgacũ na yĩxũcẽx. Rũ yemaãcũ nixĩ ñuxmata ínangu ga Cuáũ. ¹⁴ —Rũ ngẽxguma chi peyaxõgũchaũgu i ñãã chorũ ore, rũ pemaã nũxũ chixu rũ Cuáũ ya baiũxẽẽruũ nixĩ ya yima yanguxẽẽcũ ga yema ore ga guma nuxcũmaũcũ ga orearũ uruũ ga Eria ga ípenanguxẽẽcũchiga ũmatũxũ. ¹⁵ —Rũ yĩxema ãchixẽgũxe, ¿rũ naga taxĩnũe i ngẽma ore! —ñanagũrũ. ¹⁶ Rũ ñanagũrũ ta ga Ngechuchu: —¿Tacũgu tá chanangu i ñãã duũxũgũ i ñuxma maxẽxũ? Maneca ñãã duũxũgũ rũ taxumaãma nataãẽgũ ngẽxgumarũũ i ñuxre i buxũgũ i nũgũmaã íãxtũwa rũtogũxũ, rũ íxĩnũcẽxwẽgũxũ, rũ tagaãcũ namũcũgũxũ ñagũxũ:

¹⁷ “Marũ wowerumaã pexcẽ tapaxetagũ, natũrũ tama ípixũãchitanũxũ. Rũ marũ ngechaũ i wiyaga pexcẽ tawiyagũ, natũrũ tama pexauxe”, ñagũxũ. Rũ ngẽma buxũgũrũ nixĩ i ñãã duũxũgũ. ¹⁸ —Yerũ núma naxũ ga Cuáũ ga baiũxẽẽruũ rũ tama pãũ nangõx rũ tama binu nayaxaxũ. Rũ yexguma ga nũmagũ rũ: “Nangoxõãx” ñanagũrũgũ nũxũ. ¹⁹ —Rũ ñuxũchi núma chaxũ i choma ya Tupana Nane na duũxũxũ chíxũ. Rũ choma rũ õna changõx rũ binu chayaxaxũ. Rũ ngẽxguma i nũmagũ rũ taanũxũchixũ rũ ngãxwẽexũ choxũ nawogũe. Rũ nũxũ nixugũe rũ pecaduãxgũxũmaã chaxãmũcũ, rũ namaã chaxãmũcũ i ngẽma duũxũgũ i Dumaãrũ ãẽxgacũcẽx dũeru ngĩxũ ideetanũxũ. Natũrũ Tupanaãrũ cẽx rũ meãma nangõx tũmawa ya yĩxema aixcũma nawe rũxĩxẽ —ñanagũrũ ga Ngechuchu.

*Íãnegũ ga tama Tupanaga ñnũene
(Lc 10.13-15)*

²⁰ Rũ yexguma ga Ngechuchu rũ inanaxũgũ ga na yangagũãxũ ga yema duũxũgũ ga guma íãnegũcũãx ga ngextá yexeraãcũ ínaxũaxũwa ga taxũ ga mexũgũ ga Tupanaãrũ poramaã naxũxũ. Rũ poraãcũ nayangagũ, yerũ yema duũxũgũ rũ tama nũxũ narũxoe ga norũ chixexũ. ²¹ Rũ ñanagũrũ ga Ngechuchu: —Rũ wũxi i ngechaũ nixĩ i pexcẽx, Pa Corachũcũãxgũ rũ Pa Bechaidacũãxgũxũ, yerũ yexguma chi Tiruarũ íãnewa rũ Chidãũãrũ

ĩānewa chanaxũxgu ga yema mexũgũ ga cuẽxruũgũ ga Tupanaārũ poramaã petanũwa chaxũxũ, rũ woo ga na poraãcũ yachixexũ ga yema duũxũgũ rũ nuxcũmama chitama nũxũ narũxoe ga yema nacũma ga chixexũ, rũ poraãcũxũchi chima nũgũmaã nangechaũgũ rũ naxauxe, yerũ chi nũgũ nicuẽxãchitanũ ga na yapacaduãxgũxũ. ²²—Naturũ pemaã nũxũ chixu rũ ngẽma ngunexũ i Tupana nagu napoxcuexũ i pecaduãxgũxũ, rũ ngẽma ngunexũgu rũ Tirucũãxgũ rũ Chidãũcũãxgũarũ yexera tá pexũ napoxcue i pemax, Pa Corachũcũãxgũ rũ Bechaĩdacũãxgũxũ. ²³—Rũ pemax, Pa Capernãũcũãxgũ i Duũxũgũx, çrũ pema nagu perũxĩnũẽgu rũ daxũguxũ i naãnewa tá ipexĩũ? Pemaã nũxũ chixu rũ naãnetũũwa i ngextã Tupana Chatanãxũ Ipoxcuxũwa tá nixĩ i pewogũxũ. Rũ yexguma chi Chodomaārũ ĩānewa chanaxũxgu ga yema mexũgũ ga cuẽxruũgũ ga Tupanaārũ poramaã petanũwa chaxũxũ, rũ guma ĩāne ga nuxcũma norũ pecadugagu iyarũxoxũne rũ ñũxma rũ chi nangẽxma. ²⁴—Naturũ pemaã nũxũ chixu rũ ngẽma ngunexũ i Tupana nagu napoxcuexũ i pecaduãxgũxũ, rũ ngẽma ngunexũgu rũ Chodomacũãxgũarũ yexera tá pexũ napoxcue i pemax, Pa Capernãũcũãxgũx —ñanagũrũ.

Chauxcẽx pexĩ na chauxttagu perũngũẽxũcẽx

(Lc 10.21-22)

²⁵ Rũ yexguma rũ ñaãcũ nayumũxẽ ga Ngechuchu, rũ ñanagũrũ: —Pa Chaunatũ ya Daxũguxũ i Naãne rũ Ñoma i Naãneārũ Yorax, cuyũ chicuẽxũũ, erũ ñaã chorũ ngũexũgũxũ nũxũ cucuẽxẽẽ i ñaã ore i naxchaxwa iquicũxũ i duũxũgũ i ñoma i naãnewa nũxũ cuẽxũchigũxũ. ²⁶—Rũ moxẽ cuxna chaxã, Pa Chaunatũx, erũ cuma cunaxwẽxe na ngẽmaãcũ cunaxũxũ —ñanagũrũ. ²⁷ Rũ ñanagũrũ ta ga Ngechuchu: —Chaunatũ choxna nanaxã i guxũma i tacũ i ngẽmaxũ. Rũ Chaunatũxicatama choxũ nacuẽx na texẽ chĩixũ i choma i Nane. Rũ tama guxũma i duũxũgũ aixcũma nũxũ nacuẽx na texẽ yĩixũ ya Chaunatũ. Rũ choma ya Nane, rũ ngẽma duũxũgũ i Chaunatũxũ nũxũ chadauxẽẽchaũxũxĩcatama nixĩ i aixcũma nũxũ cuẽxgũxũ na texẽ yĩixũ ya Chaunatũ. ²⁸—Rũ nuã chauxttagu pexĩ i guxãma i pema ya ipaxe nagagu i perũ chixexũgũ rũ perũ ĩxãchiãgũ! Rũ choma rũ tá pexna chanayaxu i pexweta na iperũngũẽxũcẽx. ²⁹—Rũ ñuxũchi penayaxu i chorũ ucuxẽgũ rũ naxcẽx pedauxũtaegũ i chaucũma! Erũ choma rũ yaxna pemaã chaxĩnũ rũ taguma chaugũ chicuẽxũxũ. Rũ ngemaãcũ tá nũxũ ipeyangau i ngema taãẽ i aixcũma ĩxĩxũ. ³⁰—Erũ ngẽma pexũ chamuxũ rũ natauxcha na naga pexĩnũẽxũ. Rũ ngẽma pexũ chanaxwaexũ rũ tama naguxcha na penaxũxũ —ñanagũrũ ga Ngechuchu.

12

Ngechuchuarũ ngũexũgũ rũ trigu nicãũẽtanũ ga ngũchigaarũ ngunexũgu *(Mr 2.23-28; Lc 6.1-5)*

¹ Rũ wũxi ga ngũxchigaarũ ngunexũgu rũ Ngechuchu rũ norũ ngũexũgũmaã triguncẽgu nixũ. Rũ nataiyae ga norũ ngũexũgũ, rũ yemacẽx ĩnaxĩãcũma yoxocũne triguta nicãũẽtanũ, rũ ĩnayangũẽtanũ. ² Rũ yexguma yemaxũ nadaugũgu ga Parichẽgũ rũ ñanagũrũgũ Ngechuchuxũ: —Dũcẽx i curũ ngũexũgũ rũ chixexũ naxũe. Erũ ngũxchigaarũ ngunexũgu napuracũe, rũ nachuxu nixĩ i ngẽma —ñanagũrũgũ. ³ Rũ Ngechuchu nanangãxũ, rũ ñanagũrũ: —çTaguma ěxna poperawa nũxũ pedau ga tacũ na naxũxũ ga nuxcũmaũcũ ga ãẽxgacũ ga Dabĩ ga yexguma nataiyẽxgu ga nũma rũ

natanüxügü? ⁴—Rü Tupanapatagu naxücu rü nanangõx ga yema pãu ga üünexü ga Dabícex rü natanüxügücex chuxuxü ga na nangõxgüãxü. Yerü paigücëcicatama nixi ga yema pãu. ⁵—Rü pemax, Pa Parichéugüx çtaguma êxna nawa pengúe ga yema ore ga mugüpanegu Moíché ümatüxü ga ñaxü rü marü name i paigü rü ngüxchigaarü ngunexügu napuracüe i tupauca ya taxünewa? Rü ngêma rü tama wüxi i pecadu nixi naxcëx i ngêma paigü. ⁶—Natürü pemaã nüxü chixu rü nuã petanüwa nangêxma i wüxi i duüxü i tupauca ya taxüneãrü yexera ixixü i Tupanapêxewa. ⁷—Natürü pema rü tama nüxü pecuëx i ñuxü ñaxüchiga nixi i ngêma Tupanaãrü ore i ümatüxü i ñaxü:

“Choma rü tama chanaxwëxe i chauxcëx peyamëx i carnerugü, natürü chanaxwëxe i togü pexü nangechaütümüügü”, ñaxü. Rü ngêxguma chi meã nüxü pecuëxgügu i ngêma ore, rü tãu chima chixri nachiga pidexagü i ñaã chorü ngüexügu i taxuüma i chixexü ügüxü i Tupanapêxewa. ⁸—Rü choma i Tupana Nane na duüxüxü chiixü, rü aixcüma ngüxchigaarü yora chixi—ñanagürü ga Ngechuchu.

Wüxi ga yatü ga yumécüchiga
(Mr 3.1-6; Lc 6.6-11)

⁹Rü yexguma yema nachicawa ínaxüüxgu ga Ngechuchu, rü guma ñãneãrü ngutaqëxepataügu naxücu. ¹⁰Rü yéma nayexma ga wüxi ga yatü ga norü wüxichacüüwa yumécü. Rü nümagü ga Parichéugü rü naxcëx nadaugü ga ñuxãcü norü ãëxgacügüxütawa Ngechuchuxü na ínaxuaxügüxü. Rü yemacëx Ngechuchuna nacagüe, rü ñanagürügü: —çNamexü yíixü na texé naxcëx yataanexëëxü i wüxi i ðaawexü i ngüxchigaarü ngunexügu? —ñanagürügü. ¹¹Rü Ngechuchu nanangãxü, rü ñanagürü: —çTexé i petanüwa rü ngêxguma chi ngüxchigaarü ngunexügu wüxi i perü carneru puchugu nguxgu, rü taux êxna i ngêxgumatama ípeyadaugüxü rü ípenatüãchixü woo ngüxchigaarü ngunexü yixígu? ¹²—Natürü Tupanapêxewa rü wüxi i duüxü rü poraãcüxüchima wüxi i carneruarü yexera nixi. Rü ngêmacëx name nixi i mexü taxü i woo ngüxchigaarü ngunexü yixígu —ñanagürü. ¹³Rü ñuxüchi ga Ngechuchu rü ñanagürü nüxü ga guma yatü ga yumécü: —çIyarüwëxãchimëxé! —ñanagürü. Rü guma yatü rü inayarüwëxãchimëxë, rü yexgumatama narümemëx, rü naí ga naxmëx ga mexünerüü nixi. ¹⁴Rü yexguma yemaxü nadaugüga ga Parichéugü, rü ínachoxü ga yéma. Rü ínanaxügüe na naxcëx nadaugüxü ga ñuxãcü tá na Ngechuchuxü yamëxgüxü.

Nuxcümaüxü ga ore ga Ngechuchichiga

¹⁵Rü yexguma Ngechuchu nüxü cuáchigagu na Parichéugü na yamëxgüchaüxü, rü ínaxüxü ga guma íãnewa. Rü muxüma ga duüxügü rü nawe narüxi. Rü nüma ga Ngechuchu rü nanameëxëë ga guxüma ga yema duüxügü ga íðaaweexü. ¹⁶Rü duüxügüna naxãga na tama nüxü yaxügüxücëx na texe na yíixü ga nümax. ¹⁷Rü yemaãcü nanaxü ga Ngechuchu na yanguxëëãxücëx ga yema ore ga nuxcümaücü ga Tupanaãrü orearü uruü ga Ichaxía nüxü ixuxü ga ñaxü:

¹⁸“Daa nixi ya chorü duü ya chomatama nüxü chaxunetacü rü nüxü changechaücü rü namaã chataãëxüchicü. Rü Chauãe i Üünexü rü nüxna tá chanamu. Rü nüma tá guxü i duüxügü i tama Yudíugü íxíngüxümaã nüxü nixu i ore i mexü i aixcüma íxixü. ¹⁹Rü tagutáma ngextá texémaã niporagacüü rü taxüemaãtáma ngextá nipura. Rü

tagutáma texé ãñeãrũ Ítamũgũwa nũxũ taxĩnũ na natagaxũ. ²⁰ Rũ nũma rũ tãũtáma nanadai i ngẽma duũxũgũ i norũ õwa turaexũ, rũ tãũtáma inayanaxoxeẽ i ngẽma duũxũgũ i Írarũwatama yaxõgũxũ. Rũ ngẽmaãcũ tá nixĩ ñuxmatáta guxũ i naãnewa nangu i ngẽma norũ ore i aixcũma ixĩxũ. ²¹ Rũ guxũ i duũxũgũ i tama Yudiũgũ ixĩgũxũ rũ tá naxcẽx naxĩ na ngẽmaãcũ naxũtawa nayauxgũãxũcẽx i norũ maxũ i taguma gũxũ”, ñanagũrũ ga Ichaxiã.

Parichéugũ rũ Ngechuchuxũ nixugũe na ngoxoarũ poramaã napuracũxũ
(Mr 3.20-30; Lc 11.14-23, 12.10)

²² Rũ Ngechuchuxũtawa nanagagũ ga wũxi ga yatũ ga ngoxoãcũ ga ngexetũcũ rũ tama idexacũ. Rũ Ngechuchu nanamexeẽ. Rũ guma yatũ rũ yexgumatama nidauchi rũ nidexa. ²³ Rũ guxũma ga duũxũgũ rũ nabẽixãchiãegũ ga yexguma yemaxũ nadaugũgu. Rũ ñanagũrũgũ: —¿Taux êxna daa yĩĩxũ ya Dabĩ nane ya Cristu? —ñanagũrũgũ. ²⁴ Natũrũ yexguma yemaxũ naxĩnũegũ ga Parichéugũ, rũ ñanagũrũgũ: —Ñãã yatũ i Ngechuchu, rũ ngoxogũnatũ i Behebũarũ poramaã nixĩ i Inawoxũãxũ i ngoxogũ —ñanagũrũgũ. ²⁵ Natũrũ nũma ga Ngechuchu rũ nũxũ nacuẽxama ga ãacũgu na naxĩnũẽxũ. Rũ yemacẽx ñanagũrũ nũxũ: —Ngẽxguma chi wũxi i nachĩũãnecũãx i duũxũgũ nũgũ itoyegu rũ nũgũtanũwa chítama nũgũ nadaixgu, rũ nũgũ chítama naguxẽẽ. Rũ ngẽxguma chi wũxi ya ããnecũãx rũ êxna wũxi ya Ícũãx nũgũmaã nuẽẽchagu rũ nũgũ nadaixgu, rũ nũgũ chítama naguxẽẽ. ²⁶ —Rũ ngẽxguma chi Behebũ nũgũtama itẽxũchigu rũ nũgũtama yamẽxgu, ¿rũ ñuxãcũ chi ãẽxgacũecha yĩĩxũ? ²⁷ —Rũ pemax, Pa Parichéugũx, rũ choxũ pixuxgu rũ Behebũarũ poramaã Íchanawoxũ i ngoxogũ. Natũrũ ngẽxguma chi Behebũarũ poramaã Íchanawoxũxgu i ngoxogũ, ¿rũ texearũ poramaã nixĩ i perũ ngũexũgũ rũ Inawoxũãxũ i ngoxogũ? Rũ dũcax, rũ ngẽma perũ ngũexũgũtama nixĩ i pexcẽx nangoxẽẽxna na Ípetũexũ. ²⁸ —Natũrũ pemaã nũxũ chixu rũ aixcũma Tupanaãe i Ûnẽxũãrũ poramaã nixĩ i Íchanawoxũxũ i ngoxogũ. Rũ ngẽmawa pexũ nũxũ chacuẽẽ na marũ nũma petanũwa nanguxũ ya Tupana, na perũ ãẽxgacũ yĩĩxũcẽx. ²⁹ —¿Rũ ñuxãcũ texé wũxi ya yatũ ya poracũpatagu taxũcu na tanapuxũxũcẽx i norũ ngẽmaxũgũ, ega tama tayanẽixiragu i noxrix? Rũ ngẽxguma tayanẽixiraguxicatama nixĩ i nũxna tanapuxũxũ i norũ ngẽmaxũgũ ya yima yatũ ya poracũ. ³⁰ —Rũ yĩxema tama choxũ ngechaũxẽ rũ chauxchi taxai. Rũ yĩxema tama choxũ rũngũxẽxẽx na Tupanacẽx tananutaquẽxexũ i duũxũgũ rũ chauxchawa tangianexẽẽ. ³¹ —Rũ ngẽmaxẽx pemaã nũxũ chixu rũ Tupana tá nũxũ nũxũ nangechaũ i guxũma i pecadugũ i duũxũgũ ùgũxũ rũ guxũma i norũ dexagũ i chixexũ. Natũrũ yĩxema Tupanaãe i Ûnẽxũmaã ãacũ ixugũxe, rũ Tupana rũ tagutáma tũxũ nũxũ nangechaũ i ngẽma chixexũ. ³² —Rũ guxãma ya texé ya ãacũ chomaã ixugũxe rũ Tupana tá tũxũ nũxũ nangechaũ i ngẽma. Natũrũ texé ya Tupanaãe i Ûnẽxũmaã ãacũ ixugũxe, rũ Tupana rũ tagutáma tũxũ nũxũ nangechaũ i ngẽma, rũ bai i ñoma i naãnewa, rũ bai i daxũgũxũ i naãnewa.

Wũxi i nanetũ rũ norũ owa nixĩ i nũxũ icuáxũ na ãacũ rũ nanetũ yĩĩxũ
(Lc 6.43-45)

³³ —Rũ ngẽxguma wũxi i nanetũ rũ namexgu, rũ norũ o rũ ta name. Natũrũ ngẽxguma wũxi i nanetũ rũ nachixẽxgu, rũ norũ o rũ ta nachixe. Rũ wũxi i nanetũ rũ norũ owa nixĩ i nũxũ icuáxũ ngoxi name rũ êxna tama. ³⁴ —Pa Áxtapearũ Duũxũgũx, ¿ñuxãcũ i mexũ i orexũ pixuxũ ega pematama rũ

pichixecümagu? Erü ngēma ore i peëxmaã nüxü pixuxü rü peãēwa nixi i ne naxüxü. ³⁵ —Wüxi ya mecü ya yatü rü mexü i orexü nixu, erü naãēwa rü aixcüma mexügu narüxínü. Natürü wüxi i yatü i chixecümaxü rü chixexü i orexü nixu, erü naãēwa rü chixexügu narüxínü. ³⁶ —Rü choma pemaã nüxü chixu rü ngēma ngunexü i nagu nagüxü i naãne, rü Tupana rü tá nüxna naca i guxü i duüxügu naxcëx i guxüma i ore i chixexü i nüxü yaxuxü i ñoma i naãnewa. ³⁷ —Erü ngēma curü dexagüwa rü Tupana tá cuxü nangugü, rü tá cumaã nüxü nixu ngoxita cume i napëxewa rü ëxna tama —ñanagürü ga Ngechuchu.

Duüxügu ga tama yaxögüchaüxü rü naxcëx ínacagü ga to ga cuëxruü ga Tupanaärü poramaã üxü
(Mr 8.12; Lc 11.29-32)

³⁸ Rü yexguma rü ñuxre ga Parichéugü rü Yudíugüarü ngüexëëruügu ga ore ga mugüwa nguxëëtaegüxü rü ñanagürügü Ngechuchuxü: —Pa Ngüexëëruüx, cuxü tadauxchaü na cunaxüxü i wüxi i cuëxruü i mexü i Tupanaärü poramaã cuxüxü —ñanagürügü. ³⁹ Rü Ngechuchu nanangäxü, rü ñanagürü: —Ñã duüxügu i chixecümagüxü rü tama yaxögüxü rü naxcëx ínacagü i wüxi i cuëxruü i mexü i Tupanaärü poramaã üxü. Natürü yema cuëxruü ga nuxcümaücü ga Tupanaärü orearü uruü ga Yonáxü ngupetüxüxüxüca tátama nadaugü. Rü taxuütaama i to i cuëxruü nüxü tadauxëë i ñãã duüxügu. ⁴⁰ —Rü yexgumarüü ga Yoná ga tomaëxpüx ga ngunexü rü tomaëxpüx ga chütaxü choxni ga taxü ga bayenaänüwa na nayexmaxü rü wenaxärü na nangöxü, rü ngëxgumarüü tá ta nixi i choma i tomaëxpüx i ngunexü rü tomaëxpüx i chütaxü i chatáxüwa changëxmaxü. Natürü wena táxarü changox. ⁴¹ —Rü ngëxguma naãneärü guxgu rü Tupana rü ñãã duüxügüna nacaxgu i norü pecaduchiga, rü nuxcümaügüxü ga Nínibecüäx ga duüxügu rü tá inachigü. Rü Tupanapëxewa tá ínanaxuaxügu i ñãã duüxügu i ñuxma maxëxü. Yerü nümagü ga Nínibecüäx rü nüxü narüxoe ga nacümagü ga chixexü ga yexguma Yoná namaã nüxü íxuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera íxüxü. ⁴² —Rü ngëxguma naãneärü guxgu rü Tupana rü ñãã duüxügüna nacaxgu i norü pecaduchiga, rü ngüma ga nuxcümaücü ga Chabaaneärü äëxgacü rü tá iichi. Rü tá ínanaxuaxü i ñãã duüxügu i ñuxma maxëxü. Yerü ngüma rü yaxüwaxüchi ne íxü na äëxgacü ga Charumóüxü naxínüxüxcëx ga ñuxácü poraacü nüxü na nacüexüchixü. Natürü ñuxma nuã petanüwa nangëxma i wüxi i Charumóüärü yexera íxüxü.

ngoxo i taeguxüchiga
(Lc 11.24-26)

⁴³⁻⁴⁴ —Rü ngëxguma wüxi i ngoxo rü wüxi ya yatüwa ínaxüüxgu, rü dauxchitawa i ngextá taxüema íxãpataxüwa rü nu ne nanaxümare. Rü naxcëx nadau na ngexta na nangüxüxcëx. Rü ngëxguma taxuxguma nüxü íyangauxgu na ngexta nangüegaxü, rü nagu narüxínü na wena nataeguxü naxcëx ya yima yatü ga noxri nawa ínaxüxüchirécü. Rü ngëxguma nataegugu, rü nüxü inayangau ya yima yatü na wüxi ya i ya ngëácüne rü mexëene rü meã nabixichinerüü na yíxü. ⁴⁵ —Rü ngēma ngoxo rü ínixü rü naxcëx nayadau i to i 7 i ngoxogü i norü yexera i chixexü. Rü guxüma i ngēma rü yima yatügu nayachocu, rü ngëxma naxächigü. Rü ngëxguma ya yima yatü rü noxriarü yexera nachixe. Rü ngëxgumarüü tá ta nüxü naxüpetü i ñãã duüxügu i chixecümagüxü —ñanagürü ga Ngechuchu.

Ngechuchuarü mamá rü nañeëgüchiga
(Mr 3.31-35; Lc 8.19-21)

⁴⁶ Rü yexguma duñxüğümaã iyadexayane ga Ngechuchu, rü yéma tangu ga naë rü nañeëgü. Rü İpataarü düxétügu tarücho, rü Ngechuchumaã tidexagüchañ. ⁴⁷ Rü wüxi ga duñxü Ngechuchumaã nüxü nixu, rü ñanagürü: —Yéa düxétüwa tangëxma ya cue rü cueneëgü, rü cumaã tidexagüchañ — ñanagürü nüxü. ⁴⁸ Natürü Ngechuchu nanangãxü ga yema duñxü ga namaã nüxü ixuxü ga yema ore, rü ñanagürü nüxü: —¿Texé tixí ya chaue? ¿Rü texégü tixí ya chaueneëgü? —ñanagürü. ⁴⁹ Rü yexguma ga Ngechuchu rü norü ngüexüğüxü naxuneta, rü ñanagürü: —Dücëx, daxe tixí ya chaue, rü daagü nixí ya chaueneëgü. ⁵⁰ —Erü guxãma ya texé ya naxúxe i Chaunatü ya daxügücuarü ngüchañ, rü yíxema tixí ya chaueneë rü chaueyèx rü chaue —ñanagürü ga Ngechuchu.

13

Ore ga toecügu ixuxü
(Mr 4.1-9; Lc 8.4-8)

¹ Rü yematama ngunexügu ga Ngechuchu rü İnaxüxü nawa ga guma İ ga nagu napexüne. Rü naxtaxaãnacüwa nayarüto. ² Rü muxüma ga duñxüğü rü yéma naxcëx nangutaquëxegü. Rü yemacëx düxwa wüxi ga nguëgu nixüë ga Ngechuchu, rü guma ngüewa narüto. Rü guxüma ga duñxüğü rü yexma naxnecütëxegu nachigü. ³ Rü yexguma ga Ngechuchu rü muxüma ga ore ga cuëxruüwa nanangüexëë ga duñxüğü. Rü norü ngüxëëtaewa rü ñanagürü: —Rü wüxi ga yatü ga toecü rü trigumaã nanagüane. ⁴ —Rü yexguma trigumaã nagüaneägu, rü ñuxre ga guma trigu rü namacüwagu nayi. Rü İnangugü ga werigü, rü nanawecu. ⁵ —Rü náigü ga trigu rü nutatanügu nayi ga ngextá İnachixcaxüwa ga waixüümü. Rü paxa narüxügü ga guma trigu, yerü ga waixüümü rü tama nayaxcü. ⁶ —Rü yexguma nangunagügu ga üëxcü, rü narüngëxgü ga guma trigu. Rü nayue yerü tama poraäcü nixãmëxã. ⁷ —Rü náigü ga trigu rü tuxunecügu nayi. Rü yexguma nayaëgu ga tuxugü, rü guma triguxü inawocu, rü nanadai. ⁸ —Natürü náigü ga trigu rü mexü ga waixüümügu nayi. Rü yexguma nayaëgu rü muxüma ga trigu nawa İnanguxuchi. Rü nümaxü rü wüxireewa rü 100 püxü İnanguxuchi ga norü o, rü náireegüwa rü 60, rü náireegüwa rü 30. ⁹ —Rü yíxema ächixëgüxe, İru nagu tarüxİnüë i ngëma ore! —ñanagürü.

Tacüçëx nixí ga yema ore ga cuëxruüğügu ixuxü
(Mr 4.10-12; Lc 8.9-10)

¹⁰ Rü yexguma ga norü ngüexüğü rü Ngechuchucëx naxí, rü nüxna nacagüë, rü ñanagürüğü: —Pa Corix, ¿Tüxcüü i cuëxruüğügu cuyaxuäcüma cunangüexëëxü i ñaã duñxüğü? —ñanagürüğü. ¹¹ Rü Ngechuchu nanangãxü, rü ñanagürü nüxü: —Tupana rü pexüxİcatama nüxü nacuëxëë i ngëma ëxüguxü na ñuxäcü äëxgacü yİxü i nümax. Natürü nüma i togü i duñxüğü rü tama nüxü nüxü nacuëxëë i ngëma. ¹² —Rü texé ya aixcüma naga İnuxë i chorü ore, rü Tupana rü yexeraäcü tá tüxü nüxü nacuëxëë. Rü ngëmaäcü tá tüxü nangëxma i taxü i cuëx. Natürü texé ya tama naga İnuxë i ñaã ore rü Tupana tá tüxna nanayaxu i ngëma İraxü i cuëx i tüxü ngëxmachirëxü. ¹³ —Rü ngëmacëx nixí i ore i cuëxruümaã chanangüexëëxü i ngëma duñxüğü. Erü nümagü rü woo nüxü nadaugügu, rü ñoma tama nüxü nadaugüxürüü nixİgü. Rü woo

nüxü naxĩnũegu, rü ñoma tama nüxü naxĩnũexürüü nixĩgü. Rü tama nüxü nacuèxgüéga. ¹⁴—Rü aixcüma ngẽma duũxügüchiga nixĩ ga yema Tupanaärü ore ga nuxcümañcü ga norü orearü uruü ga Ichaxia nüxü ixuxü ga ñaxü:

“Rü ngẽma duũxügü rü tá aixcüma nüxü naxĩnũe, natürü täütáma nüxü nacuèxgüéga i ñacüchiga na yĩixü i ngẽma nüxü naxĩnũexü. Rü aixcüma tá nüxü nadaugü, natürü täütáma nüxü nacuèxgü na ñacüchiga yĩixü i ngẽma nüxü nadaugüxü. ¹⁵ Erü ngẽma duũxügü rü täütáma nüxü nacuèxgüchaü i chorü ore, rü naxchaxwa tá nügü narütütamachixëgü rü tá naxchaxwa napexetügü. Rü ngẽmaäcü tá nanaxügü na tama nüxü nadaugüxüçex i ngẽma mexü i naxçex chaxüxü, rü tama nüxü naxĩnũexüçex i chorü ore, rü tama nüxü nacuèxgüxüçex na ñuxäcü choma chanaxwexexüäcüma na namaxëxü, rü tama chauxçex nadaugüxüçex na chanamaxëxëxüçex”,

ñanagürü. ¹⁶ Rü ñanagürü ta ga Ngechuchu: —Natürü pemax, Pa Chorü Ngüexügüx, rü petaäëgü erü pexetügümaätama nüxü pedaugü i ngẽma chaxüxü rü pexmachixëmaätama nüxü pexĩnüe i chorü ore. ¹⁷—Rü aixcüma pemaä nüxü chixu rü muxüchixü ga nuxcümaügüxü ga Tupanaärü orearü uruügü rü muxüchixü ga duũxügü ga imecümaxü, rü nüxü nadaugüchaü i ngẽma ñuxma chauxütawa nüxü pedaugüxü. Natürü tama nüxü nadaugü. Rü nüxü naxĩnũechaü i ngẽma ore i ñuxma chauxütawa nüxü pexĩnüexü. Natürü tama nüxü naxĩnüe —ñanagürü.

Ngechuchu rü meã nanangoxë ga yema ore ga toecüchigagu yaxuxü

(Mr 4.13-20; Lc 8.11-15)

¹⁸ Rü ñanagürü ta ga Ngechuchu: —Düçex, iperüxĩnũe na ñuxü ñaxüchiga yĩixü i ngẽma ore i cuèxruü i toecüchiga! ¹⁹—Rü guma trigu ga namagu yixünerüü tixĩgü ya yixema nüxü ñnũexë i ore i mexü na ñuxäcü äëxgacü yĩixü ya Tupana natürü tama nüxü cuèxgüxe i ñuxü ñaxüchiga na yĩixü i ngẽma ore. Rü tümáxütawa nangu i Chataná, rü tüxü nüxü inayarüngümaëxëe i ngẽma ore i tümáëwa ngëxmachirëxü. ²⁰—Rü guma trigu ga nutatanügu yixünerüü nixĩ i ngẽma duũxügü i nüxü ñnũexü i Tupanaärü ore rü taäëcüma nayauxgüxü. ²¹—Natürü ngẽma na tama aixcüma nagu naxĩnüexü i ngẽma ore, rü paxaächitama nayaxógü, rü yixçura ngëxguma ngẽma oregagu guxchaxügü nüxü üpetügu rü ëxna duũxügü naxchi aiegu, rü ñanatëxgü i ngẽma ore. ²²—Rü guma trigu ga tuxunecügu yixünerüü nixĩ i ngẽma duũxügü i Tupanaärü orexü ñnũexü rü yaxögüxü. Natürü ñoma i naäneärü ngëmaxügüçex oegaäëgüxü, rü ngëmaguama rüxĩnüexü, rü düxwa nüxü inayarüngümae i ngẽma ore. Rü guxüma i ngẽma rü Tupanaärü orexü nüxü narüxoxëe na tama aixcüma meã Tupanawe naxüçex i ngẽma duũxügü. ²³—Natürü guma trigu ga mexü ga waixümügu yixünerüü nixĩ i ngẽma duũxügü i nüxü ñnũexü i Tupanaärü ore, rü nüxü cuèxgüxü i ñacüchiga na yĩixü, rü naga ñnũexü rü meã naxçex maxëxü. Rü tümáxë rü guma trigu ga 100 püxü nawa ñguxuchinerüü tixĩ. Rü tümáxë rü guma 60 püxü nawa ñguxuchinerüü tixĩ. Rü tümáxë rü guma 30 püxü nawa ñguxuchinerüü tixĩ —ñanagürü ga Ngechuchu.

Ore ga chixexü ga natüane ga trigutanügu toxüchigagu ixuxü

²⁴ Rü Ngechuchu rü to ga ore ga cuèxruüxü duũxügümaä nixu, rü ñanagürü: —Rü nüma ya Tupana rü ñoma wüxi ga yatü ga mexüne ga triguchire naänegu tocürüü tá nanaxü. ²⁵—Rü guma yatü rü yexguma ñapeyane rü wüxi ga norü uwanü ga naxchi aixü rü yema naxü. Rü naëchita yexma trigunecügu nayatögü ga chixexü ga natüane. Rü ñuxüchi ñnixü. ²⁶—Rü yexguma naxügügu

ga trigu rü nayaegu rü yexwacêx yaxoxgu, rü yema natüane rü ta nangox.
 27 –Rü yexguma ga yema yatüaru duüxügü, rü namaã nüxü nayarüxügü, rü ñanagürügü:

“Pa Corix, cuma rü cuanegu rü triguxicachirêx ngêxma cuto. ¿Natürü ñuxâcü i ñuxma rü chixexü i natüane rü ta ngema naxügüxü?” ñanagürügü.

28 –Rü yexguma ga yema naãneärü yora, rü ñanagürü nüxü:

“Maneca wüxi i chorü uwanü i chauxchi aixü nixi i ngema ngexü wagüxü” ñanagürü. Rü yexguma ga norü duüxügü rü nüxma nacagü, rü ñanagürügü:

“Pa Corix, ¿cunaxwêxexü na tanabêxü i ngêma chixexü i natüane?” ñanagürügü. 29 –Natürü nüma ga norü cori rü ñanagürü nüxü ga yema norü duüxügü:

“¡Nüetama ngema nangêxmagü! Erü ngêxguma chi penabêxgu, rü ngürüächi trigumaã chi ta penangauxêe na penabêxü. 30 –Rü narümemaê nixi i nüetama ngema nayae ñuxmatáta triguarü buxgüwa nangu. Rü ngêxguma rü ngema tá chanamugü i chorü puracütanüxü, rü tá nanabêxira i ngêma chixexü i natüane. Rü tá ínanagoxücüta, rü ñuxüchi tá ínanagu. Rü ngêmawena tá nayabuxgü i trigu, rü naxchiügu tá choxü namaã nanguxügü” ñanagürü.

Ore ga motachachiregu ixuxü

(Mr 4.30-32; Lc 13.18-19)

31 Rü Ngechuchu rü to ga ore ga cuèxruüxü duüxügümaã nixu, rü ñanagürü: –Rü ngêma Tupanaarü ore rü yexera nixüchigü. Rü ñoma wüxi ya motachachire ya wüxi ya yatü naãnegu toxünerüü nixi. 32 –Rü woo naxiraxüchichirêx ya yima naxchire, natürü ngêxguma naxüxgu rü nayêxgu, rü wüxi i nanetü i taetaxü nixi. Rü ngêmacêx i werigü rü natanüwa naxi, rü ngêxma nayarüxüchiãügü –ñanagürü.

Ore ga pãüärü puxêëruügu ixuxü

(Lc 13.20-21)

33 Rü Ngechuchu rü to ga ore ga cuèxruüxü duüxügümaã nixu, rü ñanagürü: –Rü Tupanaarü ore rü duüxügütanüwa nangu. Rü nixüchigü rü nanaxüchicüxü i norü maxü. Rü ñoma íxraxü i pãüärü puxêëruü i wüxi i nge taxü i ngîrü pãüchara namaã ipuxêëxürüxü nixi –ñanagürü ga Ngechuchu.

Cuèxruügu ixuxü ga oremaã nidexa ga Ngechuchu na yanguxêëãxücêx ga Tupanaarü ore

(Mr 4.33-34)

34 Rü guxüma ga yema ore ga Ngechuchu duüxügümaã nüxü ixuxü, rü cuèxruügu yaxuãcüma namaã nüxü nixu. Rü yemaãcüxicatama nixi ga namaã nüxü yaxuxü. 35 Rü yemaãcü nanaxü ga Ngechuchu na yanguxêëãxücêx ga yema Tupanaarü ore ga nuxcümañcü ga norü orearü uruü ga Ichaxía umatüxü ga ñaxü:

“Choma rü cuèxruügu ixuxü i oremaã tá duüxügümaã chidexa. Rü tá namaã chanangoxêe i ngêma cuèx i êxüguxü ga yexguma noxri naãne ixügügumama iicüxü”,

ñaxü.

Ngechuchu nanangoxêe na ñacüchiga yïxü ga yema ore ga chixexü ga natüane ga trigutanügu toxüchigagu ixuxü

36 Rü Ngechuchu ínayamugü ga duüxügü, rü guma í ga nagu napexünegu naxücu. Rü norü ngüexügü rü yema naxcêx naxi, rü ñanagürügü nüxü: – Pa Corix, ¡tomaã nangoxêe na ñacüchiga yïxü i ngêma chixexü i natüanegu

ixuxü i ore! —ñanagürügü. ³⁷ Rû yexguma ga Ngechuchu rû ñanagürü nüxü: —Rû yima mexü i trigumaã toecü, rû nûma nixî ya Tupana Nane ya duüxüxü ixîcü. ³⁸ —Rû ngêma naâne i nagu natoexü, rû ñoma i naâne nixî. Rû ngêma mexü i trigu rû ngêma nixî i duüxügü i Tupanaârü duüxügü ixîgüxü. Rû ngêma chixexü i natüane, rû ngêma nixî i duüxügü i Chatanâârü ixîgüxü. ³⁹ —Rû ngêma norü uwanü i chixexü i natüanemaã naêchita naânegu yatoexü, rû ngêma nixî i Chataná. Rû ngêma ngunexü i nagu nabuxuxü i trigu rû naâneârü gúxchiga nixî. Rû ngêma puracütanüxü i trigarü buxwa puracüexü, rû Tupanaârü orearü ngeruügü i daxüçüâx nixîgü. ⁴⁰ —Rû ngêxgumarüü i ngêma chixexü i natüane rû na nabéxü rû ñuxüchi na ñaguxü, rû ngêxgumarüü tá ta nixî i naâneârü guxgu. ⁴¹ —Rû choma i Tupana Nane na duüxüxü chîxü, rû tá chanamu i chorü orearü ngeruügü i daxüçüâx na nadeâxüçèx i ngêma duüxügü i chixexü ügüxü rû ngêma duüxügü i foguâxü chixexü ügüçèxü. Rû tá ñanawoxü. ⁴² —Rû tá üxüetüwa nayawocu. Rû ngema tá naxauxe rû tá nixüxchapütägü. ⁴³ —Natürü guxüma i ngêma duüxügü i Tupanaga ñnüexü, rû tá üexçürüü inabaixgü i ngextá Tanatü ya Tupana âêxgacü ñixüxüwa. Rû yîxema âchixêgüxe, rû nüxü taxînüê i ngêma ore! —ñanagürü.

Ore ga taxü ga dîeru ga icüxügu ixuxü

⁴⁴ Rû Ngechuchu rû to ga ore ga cuèxruüxü duüxügümaã nixu, rû ñanagürü: —Rû ngêma na âêxgacü yîxü ya Tupana rû duüxügüçèx rû namexechi ñoma wüxi i uiru i wüxi i naânegu icüxürüxü. Rû wüxi ya yatü rû ngêxguma nüxü iyangauxgu i ngêma uiru, rû paxa wena ngêma naânegu nayaçux. Rû taãêacüma namaã nataxe i guxüma i norü ngêmaxügü na naxçèx nataxexüçèx i ngêma naâne na noxrü yîxüçèx i ngêma uiru —ñanagürü.

Ore ga nuta ga ngèxâeruü ga tatanüçügü ixuxü

⁴⁵ Rû ñanagürü ta ga Ngechuchu: —Rû duüxügü rû ñoma wüxi i taxetanüxü i nutagü ya ngèxâeruüçèx dauxürüü nixîgü na poraãcü Tupanaxçèx nadaugüxü na nûma norü âêxgacü yixüçèx. ⁴⁶ —Rû ngêma taxetanüxü rû ngêxguma düxwa nüxü iyangauxgu ya wüxi ya nuta ya ngèxâeruü ya guxüârü yexera mexêchicü, rû namaã nataxe i guxüma i norü ngêmaxügü na naxçèx nataxexüçèx ya yima nuta ya mexêchicü, na noxrü yîxüçèx.

Ore ga püchagu ixuxü

⁴⁷ —Rû ngêma Tupana na âêxgacü yixüxü rû wüxi i pücha i nagüxüraüxü i choxni namaã iyaxuxüxürüü nixî. ⁴⁸ —Rû ngêxguma naxâacuxgu i ngêma pücha, rû ngêma püchaetanüxü rû naxnecüpechinügu ñanatuâchigü. Rû ngema narütogü rû nayadexechi i ngêma mexü i choxni, rû pexchigu nananucu. Rû ngêma tama ingöxü i choxni rû ñanawogü. ⁴⁹⁻⁵⁰ —Rû ngêxgumarüü tá nixî i ngêxguma naguxgu i naâne. Erü Tupanaârü orearü ngeruügü i daxüçüâx, rû nûma tá naxî. Rû tá nayadexechi i ngêma mexü i duüxügü nüxna i ngêma ichixexü, rû tá üxüetüwa nayawocu i ngêma duüxügü i chixexü. Rû ngema tá naxauxe, rû tá nixüxchapütägü —ñanagürü ga Ngechuchu.

Ngexwacaxügüxü rû nuxcümatügüxü i ngêmaxügüchiga

⁵¹ Rû yexguma ga Ngechuchu rû norü ngüexügüna naca, rû ñanagürü: —Nüxü pecuâxü yîxü na tacüchiga yîxü i ngêma pemaã nüxü chixuxü? —ñanagürü. Rû nûmagü nanangâxügü rû ñanagürügü: —Ngemáãcü, Pa Corix, nüxü tacuèx —ñanagürügü. ⁵² Rû yexguma ga Ngechuchu rû ñanagürü nüxü: —Rû ngêxguma wüxi i ngüexêeruü i ore i mugüwa nguxêetaexü aixçüma nüxü

cuèxgu na ñuxácü âëxgacü yíixü ya Tupana, rü nanaxwèxe na meã nüxü nacuáxü i ngëma nuxcümaüxü i Tupanaärü ore rü ñaã ngexwacaxüxü i chorü ore rü ta, ngëxgumarüü i wüxi i cori i norü taxepatawa duüxügücëx inawéxü i norü ngëmaxügü i ngexwacaxügüxü rü norü ngëmaxügü i nuxcümaügüxü ta –ñanagürü ga Ngechuchu.

Ngechuchu rü Nacharétuwa nayexma
(Mr 6.1-6; Lc 4.16-30)

⁵³ Rü yexguma Ngechuchu nüxü rüchaxgu ga yema ore ga cuèxruügüxü na yaxuxü, rü inaxüächi ga yéma. ⁵⁴ Rü guma ñáne ga nawa nayaxüne ga Nacharétuwa naxü. Rü guma ñáneärü ngutaquëxepataügu naxücu rü yéma nanangüexëë ga duüxügü. Rü yema duüxügü rü nabeixächiäëgü namaã ga norü ore. Rü ñanagürügü: –¿Ngextá nüxü nacuèx i ngëma nguxëëtae? ¿Rü ñuxácü nüxü nacuèx na naxüäxü i ngëma mexügü i taxügü i Tupanaärü poramaã naxüxü? ⁵⁵ –¿Taux éxna i daa yíixü ya carpinteru ya Yúche nane ya María ngíne, ya Chaütiágu rü Yúche rü Chimáü rü Yuda naëneë ixícü? ⁵⁶ –¿Rü taux éxna i naëyëxgü rü nuxma tatanügu naxächiügüxü? ¿Rü ngëxguma i ngextá yíixü i nayauxáxü i ngëma nüxü nacuáxü? –ñanagürügü. ⁵⁷ Rü yemacëx ga duüxügü rü tama nüxü inarüxínüëchaü. Natürü Ngechuchu rü ñanagürü nüxü: –Guxüma i togü i duüxügü rü namaã nataäëgü i wüxi i Tupanaärü orearü uruü. Natürü ngëma orearü uruüchiüñewatama rü duüxügü rü tama namaã nataäëgü –ñanagürü. ⁵⁸ Rü yema duüxügütanüwa rü tama poraäcü nanaxü ga mexügü ga taxügü ga Tupanaärü poramaã naxüxü, yerü tama nüxü nayaxögüchaü ga yema duüxügü.

14

Nayu ga Cuáü ga baiüxëëruü
(Mr 6.14-29; Lc 9.7-9)

¹ Rü yema ngunexügügu nixí ga Gariréaaneärü âëxgacü, ga Erode rü Ngechuchuxü nacuáchigaxü. ² Rü Erode rü norü duüxügümaã ñanagürü: –Yíma nixí ya Cuáü ga baiüxëëruü rü marü wena namaxü. Rü ngëmacëx nüxü nangëxma i pora na naxüäxü i ngëma mexügü i taxügü i Tupanaärü poramaã naxüxü –ñanagürü. ³ Rü yema ñanagürü, yerü nümatama ga Erode rü üpaacü norü churaragüxü namu na Cuáüxü yayauxgüxücëx rü cadena-maã yanëixgüäcüma poxcupataüwa nagagüäxücëx. Rü yemaäcü nanaxü ga Erode, yerü yemaäcü naxcëx íca ga naxmëx ga Erodía ga naëneë ga Piripi naxmëxchirëx ixícü. ⁴ Rü Erode rü Cuáümaã nanu yerü ga Cuáü rü ñanagürü nüxü: –Tama name na cuxumëxmaã cuxãmaxü –ñanagürü. ⁵ Rü Erode rü Cuáüxü nimáxchaü, natürü duüxügüxü namuü yerü guxüma ga duüxügü rü nagu narüxínüë rü aixcüma Tupanaärü orearü uruü nixí ga Cuáü. ⁶ Natürü yexguma norü taunecüarü ngunexüwa nanguxgu ga Erode rü wüxi ga peta naxü. Rü yema petawa rü Erodíaxacü rü iyayüxparachigüxü napëxewa ga yema petatanüxü. Rü nüma ga âëxgacü ga Erode rü poraäcü norü me nixí ga yema naxüxü ga naxäcüürücü. ⁷ Rü yemacëx ngímaã inaxuneta rü ñanagürü ngíxü: –¡Choxna naxcëx naca i ñacü i cunaxwëxexü, rü aixcüma tá cuxna chanaxã! –ñanagürü. ⁸ Rü yexguma ga ngíma rü ngíëxütawa ixü, rü ngíëna iyaca, rü ngígürügü: –Pa Ma, ñacü i cunaxwëxexü na naxcëx íchaçaxü? –ngígürügü. Rü ngíë ngíxü ingäxü, rü ngígürügü: –¡Naxcëx ínaca i Cuáü ya baiüxëëruü! –ngígürügü ga ngíë. Rü yexguma ga yema pacü rü ngígürügü nüxü ga Erode: –Chanaxwëxe i wüxi ya poratugu choxna

cunaxã i Cuáú ya baiüxêëruüëru —ngîgürügü. ⁹ Rû yexguma ga ãëxgacü ga Erode rû inayarümaãchi namaã ga yema ore, natürü norü unetacëx rû norü petatanüxüçëx rû tama ngîxü nawomüxêëchaü. Rû nanamu ga ñuxre ga norü churaragü na ngîxna naxägüãxüçëx ga yema naxcëx ínaçaxü. ¹⁰ Rû yemaãcü poxcupataüwa nanamu na yéma Cuáüxü yanadaenaãxüçëx. ¹¹ Rû yemawena wüxi ga poratugu ngîxütawa nanange ga Cuáüëru, rû yema pacüna nayaxã. Rû ngîma rû ñuxüchi ngîëna iyaxã. ¹² Rû yexguma ga Cuáüãrû ngüexügü rû yéma naxî, rû nayangegü ga naxüne, rû inayatëxgü. Rû yemawena rû Ngechuchumaã nüxü nayarüxugüe.

Ngechuchu rû nanachibüexêë ga 5000 ga yatügü

(Mr 6.30-44; Lc 9.10-17; Cu 6.1-14)

¹³ Rû yexguma yemaxü nacuáchigagu ga Ngechuchu, rû nüxícatama wüxi ga nguegu nixüe, rû ínaxüxü ga yéma. Rû wüxi ga nachica ga taxüema íxãpataxüwa naxü. Natürü ga duüxügü rû nüxü nacuëxgüama ga ngextá na naxüxü. Rû ínachoxü ga norü íãnegüwa, rû dauxchitagu nawe narüxî. ¹⁴ Rû yexguma nguewa ínaxüegu ga Ngechuchu rû nüxü nadau ga yema muxüma ga duüxügü. Rû nüxü nangechaütümüügü. Rû nanameëxêë ga yema duüxügü ga idaaweexü ga naxcëx yéma nagagüxü. ¹⁵ Rû yexguma marü nachütachaügu rû Ngechuchucëx naxî ga norü ngüexügü, rû ñanagürügü nüxü: —Marü nachütachaü, rû ñuxüchi taxüema nuxma taxãpata i nuã. Rû name nixî ícuyamugü i ñaã duüxügü na íãnexãcügu ya ngaíca-mana ngëxmagünewa naxüxüçëx, rû ngema norü ñnatëex yataxegüxüçëx —ñanagürügü. ¹⁶ Natürü ga Ngechuchu rû ñanagürü nüxü: —Taxuacüma nawoegu. ¡Rû pematama penachibüexêë! —ñanagürü. ¹⁷ Rû nümagü nanangãxügü, rû ñanagürügü: —Natürü nuã rû wüximéëxpüx i pãu rû taxre i choxnixícatama toxü nangëxma —ñanagürügü. ¹⁸ Rû Ngechuchu nanangãxü rû ñanagürü: —¡Nuã chauxütawa penana! —ñanagürü. ¹⁹ Rû yexguma ga Ngechuchu rû duüxügüxü namu na maxëtëxewa natogüxüçëx. Rû ñuxüchi nanade ga yema wüximéëxpüx ga pãu rû yema taxre ga choxnigü. Rû daxügu nadawenüãcüma Tupanana moxë naxã, rû ñuxüchi inanabücu ga yema pãügü. Rû norü ngüexügüna nanana, rû yema duüxügüxü nayanu. ²⁰ Rû guxüma ga yema duüxügü rû meãma nachibüe. Rû yemawena rû 12 ga pexchigü nanapagüamatama namaã ga yema pãu rû choxnichipëxegü ga iyaxügüxü. ²¹ Rû yema yéma chibüexü rû 5000 ga yatügü nixî, natürü ga ngexügü rû buxügü rû tama nayaxugü.

Dexáëtügu nixü ga Ngechuchu

(Mr 6.45-52; Cu 6.16-21)

²² Rû yemawena ga Ngechuchu rû duüxügüxü íyamugüyane rû wüxi ga nguegu nayachüxêë ga norü ngüexügü na yoxni naxtaxaarü tocutüwa naxüxüçëx. ²³ Rû yexguma duüxügüxü íyamugügüwena rû guma mëxpünewa ínaxüãchi ga Ngechuchu na nüxíca yéma yayumüxëxüçëx. Rû yexma nüxícatama nachütaü. ²⁴ Natürü ga norü ngüexügü rû naxtaxaarü ngãxütüchiügu nixãgü ga yexguma. Rû tacü ga buanecü yexma nüxü naxü, rû poraãcü nayuape. ²⁵ Rû yexguma marü yangunechaügu rû norü ngüexügüwe ínaxüãchi ga Ngechuchu. Rû dexáchiüëtügu nixü naxcëx ga norü ngüexügü. ²⁶ Rû yexguma norü ngüexügü nüxü daugügu ga dexáchiüëtügu na yaxüxü, rû poraãcü nabëixächiaëgü. Rû norü muümaã aita naxüe, rû ñanagürügü: —Wüxi i naxchiximare nixî —ñanagürügü. ²⁷ Natürü ga

Ngechuchu rü namaã nidexa rü ñanagürü nüxü: —¡Peporae! rü choma chixĩ. ¡Rü täxü ipemuñëxü! —ñanagürü. ²⁸ Rü yexguma ga Pedru rü Ngechuchumaã nidexa rü ñanagürü: —Pa Corix, ega chi cuma quixĩgu, ¡rü choxü namu na choma rü ta dexáétügu chixüxüçëx rü cuxütawa na chaxüxüçëx! —ñanagürü. ²⁹ Rü Ngechuchu ñanagürü nüxü: —Ëcü ¡nuã naxü! —ñanagürü. Rü yexguma ga Pedru rü ínaxüe ga nguewa. Rü inanaxügu ga dexáétügu na yaxüxü na Ngechuchuxütawa naxüxüçëx. ³⁰ Natürü yexguma nüxü yacuëxächigu ga na naporaxü ga buanecü rü namuñ, rü inanaxügu ga na dexáchiügu nanguxü. Rü aita naxü rü ñanagürü: —Pa Corix, ¡choxü rüngüxëé! —ñanagürü. ³¹ Rü yexgumatama ga Ngechuchu rü Pedrumëxëgu nayayauxächi, rü ñanagürü nüxü: —Cuma rü írarüwatama cuyaxö. ¿Rü tüxcüü tama aixcüma cuyaxöxöchi? —ñanagürü. ³² Rü yexguma nguëgu yachoügu ga Ngechuchu rü Pedru, rü nangupetü ga guma buanecü. ³³ Rü guxüma ga norü ngüexügu ga nguëwa yexmagüxü rü Ngechuchupëxëgu nacaxápüxügu rü nüxü nicüëxüügu, rü ñanagürü nüxü: —Aixcümaxüchi cuma nixĩ i Tupana Nane quixü —ñanagürü.

Yenecharétuanewa Ngechuchu nanameëxëé ga idaaweexü
(Mr 6.53-56)

³⁴ Rü yexguma marü yanguügu ga naxtaawa, rü Yenecharétuanewa nangü rü yéma ínachoü. ³⁵ Rü yexguma yema duüxügu ga yëmacüãx nüxü icüëxächitanügu ga Ngechuchu na yíxü ga guma, rü guxüma ga yema naãnewa nanguchiga ga yéma na nayexmaxü ga Ngechuchu. Rü yemacëx naxütawa nanagagü ga yema duüxügu ga idaaweexü. ³⁶ Rü Ngechuchuxü nacëëxügu na naxchirupechinügamare yangögügüxüçëx. Rü guxüma ga yema naxchirupechinüga ingögüexü rü narümeë.

15

Tacü nixĩ i Tupanapëxewa duüxüguxü chixexëxü
(Mr 7.1-23)

¹ Rü Ngechuchucëx naxĩ ga ñuxre ga Parichëgu rü ngüexëëruügu ga ore ga mugüwa ngüxëëtaëgüxü ga Yerucharéüwa ne íxü. Rü Ngechuchuna nacagü, rü ñanagürü: ² —¿Tüxcüü i curü ngüexügu rü tama nagu naxĩ i nuxcümaügüxü i torü oxigücüma? ¿Rü tüxcüü tama nayangüxëëgu i ngëma nacüma na Tupanacëx nayauxmëxgüxü naxüpa na nachibüexü? —ñanagürü. ³ Natürü ga Ngechuchu rü nüxna naca ga yema Parichëgu rü ngüexëëruügu, rü ñanagürü nüxü: —¿Rü tüxcüü i pema rü nüxü pexo i Tupanaärü mu na nagu pexüçëx i pecümagütama? ⁴ Erü Tupana rü norü orewa rü ñanagürü:

“¡Tüxü nangechaü ya cunatü rü cue!”

ñanagürü. Rü ngëma orewa rü ñanagürü ta:

“Rü texé ya tümanatümaã rü ëxna tümaëmaã guxchigaxe rü name nixĩ i noxtacüma ngëmacëx tüxü tayuxëé”,

ñanagürü. ⁵ Natürü pema rü ñaperügügu:

“Marü name ega wüxi ya yatü nanatüxü rü naëxü ñaxgu: ‘Taxucürüwa chorü ngëmaxümaã cuxü charüngüxëé erü guxüma i chorü ngëmaxü rü marü Tupanana chanaxá’,” ñaxgu. ⁶ Rü ngëxguma texé ngëma ñagügu rü pexcëx rü marü namexü na tama tümanatüxü rü tümaëxü tarüngüxëëxü. Rü ngëmaäcü ipeyanaxoxëé i Tupanaärü mu na nagu pexüçëx i pecümagütama.

⁷ Pema nixĩ i duüxügu i togüpëxewa rü meã pemaxënetaxü, natürü peãëwa

rü chixexügu perüxînüë. Rü aixcüma nixî ga yema ore ga nuxcümaücü ga Tupanaârü orearü uruü ga Ichaxía pechiga ümatüxü ga ñaxü:

8 “Naã duüxügü rü naãxmaãmare choxü nicuëxüügü. Natürü naãëwa rü tama aixcüma chaugu narüxînüë. 9 Rü taxuwama name na ngëmaäcü natüçëxma choxü yacuëxüügüxü. Rü guxüma i norü nguxëëtae rü yatüğüarü mogümare nixî rü tama aixcüma chorü mu nixî”, ñaxü. 10 Rü ñuxüchi ga Ngechuchu rü duüxügüçëx naca, rü ñanagürü nüxü: —jMeã iperüxînüë i ñaã chorü ore, rü nagu perüxînüë! 11 Ngëma ðna i duüxügü ngöxü rü tama ngëma nixî i napecaduãxëëgüxü. Natürü ngëma ore i chixexü i nüxü yaxuxü, rü ngëma waxi nixî i napecaduãxëëgüxü —ñanagürü. 12 Rü ñuxüchi ga norü ngüexüügü rü naxcëx naxî, rü ñanagürügü nüxü: —jPa Corix, tama êxna nüxü cucuëx na Parichëgüãëwa nangüxü i ngëma ore i namaã nüxü quixuxü? —ñanagürügü. 13 Natürü nüma ga Ngechuchu rü nanangaxü rü ñanagürü nüxü: —Guxüma i ngema nanetü i tama Chaunatu itoxü rü tá nanabëx. 14 Rü nüetama i ngëma Parichëgü, erü namaârü cuëxruügü i ngexetüxürü nixigü. Rü ngëxguma wüxi i ngexetüxü rü naxrüü ngexetüxümaã inacuëxgu rü ngürüãchi ngëma taxre rü wüxi i äxmaügu tá nügümaã nayayicu —ñanagürü. 15 Rü ñuxüchi ga Pedru rü Ngechuchuna naca, rü ñanagürü: —jTomaã meã nangoxëë na ñuxü ñaxüchiga yixü i ngëma ore i tomaã nüxü quixuxü! —ñanagürü. 16 Rü Ngechuchu nanangãxü rü ñanagürü: —jÊxna pema rü ta tama nüxü pecuëxgüëga i ngëma ore? 17 jTama êxna nüxü pecuëx rü guxüma i ngëma ðna i duüxügü ngöxü rü naãnüwa naxü, rü yixcama rü ñuxüchi ínaxüxü? 18 Natürü guxüma i ngëma ore i duüxügü nüxü ixuxü rü naãëwa nixî i ne naxüxü. Rü ngëma ore i chixexü waxi nixî i napecaduãxëëgüxü i ngëma duüxügü. 19 Erü naãëwa nixî i chixexüga naxînüëxü i duüxügü. Rü ngema ne naxü na namãëtaxü, rü to i ngexü i ätexümaã na inapexü, rü na nangëãëmarexü, rü na nangixü, rü na yadoratëxáxü, rü na naguxchigawëxexü. 20 Rü guxüma i ngëma chixexü waxi nixî i duüxügüxü pecaduãxëëxü. Natürü ngëma na tama nayauxmëxgüxü naxüpa na nachibüëxü, rü ngëma rü tama nanapecaduãxëë i duüxügü —ñanagürü.

Wüxi ga ngecü ga to ga nachüãñecüãx ga Ngechuchuxü yaxüxcüchiga (Mr 7.24-30)

21 Rü yexguma yéma inaxüãchigu ga Ngechuchu, rü Tiruane rü Chidãüãneârü íãnegüwa naxü. 22 Rü Ngechuchuxütawa ingu ga wüxi ga ngecü ga Canácüãx ga Tiruanegu ächiücü. Rü tagaäcü ngigürügü nüxü: —Pa Cori Pa Dabitanüxüx, jcuüxü changechattümü! Erü chauxacü rü wüxi i ngoxo ngüwa nangëxma i poraäcü ngixü chixewexü —ngigürügü. 23 Natürü ga Ngechuchu rü tama ngixü nangãxü. Rü düxwa ga norü ngüexüügü rü naxcëx naxî, rü Ngechuchuxü nacëëxügü, rü ñanagürügü: —Pa Corix jNgümaã nüxü i xu i ngëma nge rü iyaxü, erü tawe iyacaechigü! —ñanagürügü. 24 Rü yexguma ga Ngechuchu rü ñanagürü: —Tupana núma choxü namu na Yudiügü i pecaduãxgüxüçëxicatama na chadauxüçëx —ñanagürü. 25 Natürü ngüma ga yema nge ga tama Yudü ixü rü Ngechuchucëx iyaxü. Rü napëxegu iyacaxápüxü, rü ngigürügü nüxü: —Pa Corix jchoxü rü ngüxüëë! —ngigürügü. 26 Natürü Ngechuchu rü ñanagürü: —Tama name i taxacügüna tanapu i norü ðna na airügüna naxãxüçëx —ñanagürü. [Rü yema ñanagürü yerü nümagü ga Yudiügü rü nügü nixugü na Tupanaxäcügüxüchi yigüxü rü yema togü rü ñoma airügürü na yixigüxü.] 27 Natürü ngüma ga yema nge rü

ngīgürügü: —Rü aixcūma nixī i curū ore, Pa Corix, natürü airugü rü ta norü yoraarü ðnatüchi i mechawa rüyixū nangōx —ngīgürügü. ²⁸ Rü yexguma ga Ngechuchu rü ñanagürü ngīxū: —Pa Ngecūx, aixcūmaxūchi cuyaxō. Marü tá chanaxü i ngēma cuma cunaxwēxexū —ñanagürü. Rü yexgumatama ngīxcèx nitaane ga ngīxácü.

Ngechuchu rü nanameēxēē ga muxūma ga idaaweexū

²⁹ Rü yemawena ga Ngechuchu rü inaxūāchi ga yema naānewa, rü nax-taxa ga Gariréacutūwa naxū. Rü ñuxūchi wūxi ga mēxpūnewa inaxūāchi, rü yéma nayarūto. ³⁰ Rü muxūma ga duūxūgü naxūtawa nangugü. Rü yéma naxūtawa nanagagü ga duūxūgü ga ichixeparagūxū, rü ngexetügūxū, rü tama idexagūxū, rü chixechacūügūxū, rü muxūma ga togü ga idaaweexū. Rü Ngechuchupēxegu nayamugü, rü nūma ga Ngechuchu rü nanameēxēē. ³¹ Rü ga duūxūgü rü poraācū nabējxāchiāēgü ga yexguma nūxū nadaugūga ga ñuxácü yema noxri tama idexagūxū rü marü na yadexagūxū, rü yema noxri chixechacūügūxū rü marü naxcèx na yataanegūxū, rü yema noxri chixeparagūxū rü marü na nameparagūxū, rü yema noxri ngexetügūxū rü marü na yadauchigūxū. Rü yemacèx ga duūxūgü rü Tupanaxū nicuēxūgü.

Ngechuchu nanachibüexēē ga 4000 ga yatügü

(Mr 8.1-10)

³² Rü ñuxūchi ga Ngechuchu rü norü ngúexügücèx naca, rü ñanagürü nūxū: —Choxū nangechaütümüügü i ñaā duūxūgü, erü marü tomaēxpūx i ngunexū nuā chauxūtawa nangēxmagü, rü nūxū nataxuma i norü ðna. Rü taxuacūma ngēmaācūmare nachiūwa chanamugü, erü ngürüāchi namagu tá nayaturae —ñanagürü. ³³ Rü norü ngúexügü rü ñanagürügü nūxū: —¿Natürü ngextá tá tanayaxu i ðna naxcèx i guxūma i ñaā duūxūgü? Erü taxúema nuxma taxāpata i nuā —ñanagürügü. ³⁴ Rü Ngechuchu nūxna naca, rü ñanagürü: —¿Ñuxre i pāu pexū nangēxma i pemax? —ñanagürü. Rü nanangāxūgü, rü ñanagürügü: —Toxū nangēxma i 7 i pāu rü noxretama i choxnixácügüxicatama —ñanagürügü. ³⁵ Rü ñuxūchi ga Ngechuchu rü duūxūgūxū namu na ñaxtūanewa natogūxūcèx. ³⁶ Rü nanade ga yema 7 ga pāu rü yema choxnigü. Rü Tupanana moxē naxā. Rü ñuxūchi inanabūcu. Rü norü ngúexügūna nanana na duūxūgūxū yanūāxūcèx. ³⁷ Rü guxūma ga duūxūgü rü meāma nachibūe. Rü yemawena rü 7 ga pexchigü nana-pagūamatama namaā ga yema pāu rü choxnichipēxegu ga iyaxūgūxū. ³⁸ Rü yema yéma chibüexū rü 4,000 ga yatügü nixī, natürü ga ngexügü rü buxūgü rü tama nayaxugü. ³⁹ Rü yemawena ga Ngechuchu rü duūxūgūxū ínimugü. Rü ñuxūchi wūxi ga ngegu nixūe, rü Magadāarü naānewa naxū.

16

Parichéugü rü Chaduchéugü naxcèx ínacagü na nūxū nūxū nadauxēēgūxūcèx ga wūxi ga cuèxruū ga Tupanaärü poramaā naxūxū

(Mr 8.11-13; Lc 12.54-56)

¹ Rü ga Parichéugü rü Chaduchéugü rü Ngechuchuxū ínayadaugü. Rü Ngechuchuna nacagüe na nūxū nūxū nadauxēēgūxūcèx ga wūxi ga cuèxruū ga Tupanaärü poramaā naxūxū, yerü nūxū naxūgūchaūmare. ² Natürü nūma ga Ngechuchu rü nanangāxū, rü ñanagürü nūxū: —Pema rü yáuanecü rü ñaperügügü:

“Name tá nixí i moxúärü ngunexü, erü nadautüweane”, ñaperügügü. ³ Rü ngëxguma pëxmama nadautüweanegu rü poraäcü nacaixanegu, rü:

“Nachixe tá nixí i ngunexü” ñaperügügü. Pema nixí i duüxügü i togüpëxewa meã pemaxënetaxü, natürü chixexügu perüxínüë. Rü pema nüxü pecuëxü na penangügüxü i ñuxgu tá nameänexü rü ñuxgu tá nachixeanexü. Natürü ñuxma na yanguxü i ngëma cuëxruügü ga nuxcüma Tupana pemaã ixunetaxü rü tama nüxü pecuëxgüëga na taçüchiga yíixü —ñanagürü.

⁴ Rü ñanagürü ta ga Ngechuchu: —Ñãã duüxügü i chixecümagüxü rü tama yaxögüxü rü naxcëx ínacagü i wüxi i cuëxruü i Tupanaärü poramaã üxü. Natürü yema cuëxruü ga nuxcümaücü ga Tupanaärü orearü uruü ga Yonáxü ngupetüxürüüxicatátama nadaugü. Rü yexgumarüü na bayenaänüwa na ínaxüxüxü, rü choma rü íchatáxüwa tá íchaxüxü. Rü taxuxütáma i to i cuëxruüxü nüxü chadauxëë i ñãã duüxügü —ñanagürü. Rü ñuxüchi nüxna yéma nixü ga Ngechuchu, rü inaxüächi.

Parichéugüarü pãüärü puxëëruüchiga

(Mr 8.14-21)

⁵ Rü yexguma naxtaxaarü tocutüwa naxíxgu ga norü ngüexügü, rü nüxü inayarüngümaë na nawemü ta íyangegüxü. ⁶ Rü yexguma ga Ngechuchu rü ñanagürü nüxü: —¡Dücëx, pexuãëgü naxcëx i Parichéugü rü Chaduchéugüarü pãüärü puxëëruü! —ñanagürü. ⁷ Rü yema norü ngüexügü rü inanaxügüë ga nügü na ñagüxü: —Ngëma ñanagürü tüxü, erü tama tawemüta ítingegü —ñanagürügü. ⁸ Natürü ga Ngechuchu rü nüxü nacüëxama ga ñuxäcü na yadexagüxü ga norü ngüexügü. Rü yemacëx ñanagürü nüxü: —¿Tüxcüü,

“Tüxü nataxu i tawemü” ñaperügügü? Pema rü tama aixcüma peyaxögü. ⁹ —¿Tama éxna nüxü pecuëxgüëga rü nüxna pecuëxächie ga yema wüximëëxpüx ga pãü ga yema 5,000 ga yatügücëx ichabücxüxü? ¿Rü ñuxre ga pexchi penaxüäcxüxü namaã ga yema naxchipëxegü ga íyaxügüxü? ¹⁰ —¿Rü tama éxna nüxna pecuëxächie ga yema 7 ga pãü ga yema 4,000 ga yatügücëx ichabücxüxü? ¿Rü ñuxre ga pexchi penaxüäcxüxü namaã ga yema naxchipëxegü ga íyaxügüxü? ¹¹ —¿Rü ñuxäcü nixí i tama nüxü pecuáxü i tama pãüchiga na chidexaxü i ngëxguma ñachagu:

“¡Pexuãëgü naxcëx i Parichéugü rü Chaduchéugüarü pãüärü puxëëruü!” ñachagu? —ñanagürü ga Ngechuchu. ¹² Rü yexguma ga norü ngüexügü rü nüxü nacüëxgü ga tama pãüärü puxëëruüchiga na yadexaxü ga Ngechuchu, natürü Parichéugü rü Chaduchéugüarü nguxëëtaechiga na yíixü ga na yadexaxü.

Pedru nanangoxëë na Cristu na yíixü ga Ngechuchu

(Mr 8.27-30; Lc 9.18-21)

¹³ Rü yexguma Checharéa ga Piripuaneärü ngaicamana nanguxgu ga Ngechuchu, rü norü ngüexügüna naca, rü ñanagürü: —¿Ñuxü ñaxü i duüxügü i chauchiga na texé chíxü i chomax? —ñanagürü. ¹⁴ Rü nüma ga norü ngüexügü rü nanangäxü rü ñanagürügü: —Nangëxma i duüxügü rü:

“Cuáü ya baiüxëëruü quixí” ñagüxü. Rü togü i:

“Eriá quixí” ñagüxü. Rü togü i:

“Yeremiá quixí” ñagüxü. Rü togü rü:

“Wüxi ga nuxcümaücü ga Tupanaärü orearü uruü quixí” ñagüxü —ñanagürügü. ¹⁵ Rü yexguma ga Ngechuchu rü nüxna naca rü ñanagürü: —¿Rü pema i ñuxü ñapëgüxü choxü na texé chíxü? —ñanagürü. ¹⁶ Rü Chimáü

ga Pedru nanangãxũ, rü ñanagürü nüxũ: —Cuma nixĩ i Cristu ya Tupana ya maxũcü Nane quiĩxũ —ñanagürü. ¹⁷ Rü Ngechuchu nanangãxũ rü ñanagürü nüxũ: —Cuma rü aixcũma cutaãe, Pa Chimátix, Pa Yoná Nanex, erü taxuũma i duũxũ nixĩ i cuxũ nüxũ cuexẽexũ i ngẽma, natürü Chaunatu ya daxũgucũ nixĩ ya cuxũ nüxũ cuexẽecũ na Nane chiĩxũ. ¹⁸ —Rü choma cumaã nüxũ chixu rü cuma rü Pedru quiixĩ. Rü ngẽma cuẽga rü “nuta” ñaxũchiga nixĩ. Rü cuma tá nixĩ i chorü duũxũgũarũ dauruũ quiĩxũ. Rü Chataná rü tãütãma nüxũ narüyexera i ngẽma chorü duũxũgũ. ¹⁹ —Rü choma rü tá cuxna chanaxã i chorü ore na duũxũgũmaã nüxũ quixuxũcex na nüxũ nacuxẽgũxũcex na ñuxãcü daxũguxũ i naãnewa nangugũxũ i ngextã Tupana ãẽxgacũ íixĩxũwa. Rü yixema tama cuxũ irũxĩnũexẽ i ngẽma ore rü tãütãma ngema tichocu. Natürü yixema meã cuxũ irũxĩnũexẽ i ngẽma ore rü aixcũma ngema Tupana ãẽxgacũ íixĩxũwa tá tangugũ —ñanagürü. ²⁰ Rü yexguma ga Ngechuchu rü norü ngũexũgũmaã nüxũ nixu, rü ñanagürü: —Taxũemaãtãma nüxũ pixu na choma rü Cristu chiĩxũ! —ñanagürü.

Ngechuchu nanaxunagũ ga norü yuxchiga
(Mr 8.31-9.1; Lc 9.22-27)

²¹ Rü yemawena inanaxũgũ ga norü ngũexũgũmaã nüxũ na yaxuxũ ga tacũ tá nüxũ na üpetũxũ. Rü ñanagürü: —Choma rü Yerucharẽtũwa tá chaxũ, rü ngema poraãcü ngũxũ tá choxũ ningexẽegũ. Rü choxũ tá nimẽxgũ i Yudiugũarũ ãegacũgũerugũ rü paigũarũ ãẽxgacũgũ rü ngũexẽerũgũ i ore i mugũwa nguxẽetaegũxũ. Natürü tomaẽxpũx i ngunexũ ngupetũgũ rü wena táxaru chamaxũ —ñanagürü. ²² Rü yexguma ga Pedru rü nüxĩca noxrũwama Ngechuchuxũ naga, rü inanaxũgũ ga na naxucuxẽãxũ, rü ñanagürü: —Pa Corix, Tupana rü tama nanaxwẽxe na ngẽmaãcü quidexaxũ. Rü tãütãma ngẽmaãcü cuxũ nangupetũ i cumax —ñanagürü. ²³ Natürü ga Ngechuchu rü Pedrucẽx nadaueguãchi, rü ñanagürü nüxũ: —Choxna ixũgachi, Pa Chatanáx, erü chixexũgu choxũ cunguxẽẽchaũ! Rü tama Tupana nagu rũxĩnũxũgu curũxĩnũ, rü yatũgũ nagu rũxĩnũxũgumare curũxĩnũ i cumax —ñanagürü. ²⁴ Rü yexguma ga Ngechuchu rü norü ngũexũgũxũ ñanagürü: —Rü ngẽxguma texẽ chowe rũxũxchaũgu, jẽcü nüxũ tarũxo i tũmaãrũ ngũchaũ, rü namaã tapora i ngẽma guxchaxũgũ i tũmacex ínguxũ i ñoma curuchawa tipotaxũrũ tũxũ íixĩẽexũ, rü ngẽmaetũwa chowe tarũxũãma! ²⁵ Erü yixema tũgũ maxẽchaxẽẽchaũxẽ rü tá tayu. Natürü yixema chauxcex yũxe rü aixcũma tá tũxũ nangẽxma i maxũ i taguma gũxũ. ²⁶ Rü ¿Tacũwa i nüxũ namexũ ya wũxi ya yatũ ega nayauãxgu i guxũma i ñoma i naãneãrũ ngẽmaxũgũ, natürü iyanatauxẽẽãgu i norü maxũ? Erü tacucürũwama wũxi ya yatũ rü norü dũerũmaã naxcex nataxe i norü maxũ. ²⁷ Erü choma i Tupana Nane na duũxũxũ chiĩxũ rü wena táxaru nũma chaxũ. Rü ngẽxguma rü Chaunatu ya Tupanarũ tá ãẽxgacũ chixĩ, rü daxũcũãx i orearũ ngerũgũmaã tá íchangu. Rü ngẽxguma tá nixĩ i nüxũ chanaxũtanũxũ i wũxichigũ i duũxũgũ i ngẽma ñuxãcü chauxcex na namaxẽxũrũũãcũma maxẽxũ. ²⁸ Rü aixcũma pemaã nüxũ chixu rü nangẽxma i ñuxre i duũxũgũ i nũma ngẽxmagũxũ rü tãütãma nayu ñuxmatãta choxũ nadaugũ na yuwa ícharũdaxũ rü aixcũma ãẽxgacũ ya poracũ na chiĩxũ —ñanagürü ga Ngechuchu.

17

Ngechuchu rü toraxũãcü nangox
(Mr 9.2-13; Lc 9.28-36)

1 Rŭ 6 ga ngunexŭguwena rŭ Ngechuchu ínayagagŭ ga Pedru rŭ Chaŭtiágu rŭ Cuáŭ ga Chaŭtiágueneē. Rŭ nŭxícata ma wŭxi ga mēxpŭnewa noxrŭwama namaã naxŭ. 2 Rŭ yēma yema ngúexŭgŭpēxewa rŭ toraxŭdácŭ nangox ga Ngechuchu. Rŭ ũēxcŭrŭŭŭ nixí ga nachiwe ga na yayauracŭŭxŭ. Rŭ naxchiru rŭ tá ũēxcŭemarŭŭŭ nixí ga na nangóonexēēãxŭ. 3 Rŭ ngŭrŭãchi yēma naxcē nangoxgŭ ga Moíché rŭ Ería. Rŭ Ngechuchumaã yēma nidexagŭ. 4 Rŭ yexguma ga Pedru rŭ ñanagŭrŭ Ngechuchuxŭ: —Pa Corix, name nixí nuã tangēxmagŭ. Rŭ ngēxguma cunaxwēxegu rŭ tá tanaxŭ ya tomaēxpŭx ya dŭxenŭ, rŭ wŭxi ya cuxcēx, rŭ náí ya Moíchécēx, rŭ náí ya Eriacēx —ñanagŭrŭ. 5 Rŭ yexguma íyadexayane ga Pedru rŭ wŭxi ga caixanexŭ ga nangóonexēēxŭ rŭ natanŭgu nayangaixema. Rŭ yema caixanexŭwa inanaxŭ ga wŭxi ga naga ga ñaxŭ: —Daa nixí ya Chaune ya nŭxŭ changechaŭxŭchicŭ rŭ namaã chataãēxŭchicŭ. ¡Rŭ naga pexínŭé! —ñanagŭrŭ. 6 Rŭ yexguma yemaxŭ naxínŭēgu ga yema ngúexŭgŭ, rŭ ñaxtŭanegu nanangŭcuchiãchitanŭ, yerŭ poraãcŭ namuē. 7 Natŭrŭ ga Ngechuchu rŭ naxcēx nixŭ, rŭ nŭxŭŭŭ nayarŭngōgŭ, rŭ ñanagŭrŭ nŭxŭ: —¡lpechigŭ rŭ táxŭ ipemuŭēxŭ! —ñanagŭrŭ. 8 Rŭ yexguma wenaxãrŭ nadaunagŭtanŭgu, rŭ Ngechuchuxŭŭŭcatama nadaugŭ rŭ taxŭema ga toguexŭ nadaugŭ. 9 Rŭ yexguma ínaxŭgŭgu ga guma mēxpŭnewa, rŭ Ngechuchu nayaxucŭxēgŭ ga taxŭemaãma na nŭxŭŭŭ yaxugŭēxŭcēx ga yema yēma nŭxŭŭŭ nadaugŭxŭŭŭ, ñŭxmatáta yuwa ínadaxgu rŭ wena namaŭxgu. 10 Rŭ ñŭxŭchi ga yema ngúexŭgŭ rŭ Ngechuchuna nacagŭ, rŭ ñanagŭrŭgŭ: —¿Tŭxcŭŭŭ i ngēma ngŭexēerŭŭgŭ i ore i mugŭwa ngŭxēetaegŭxŭŭŭ rŭ ñanagŭrŭgŭ:

“Ería tá nixí ya nŭxíra cuxŭpa nuã ũcŭ?” ñanagŭrŭgŭ. 11 Rŭ Ngechuchu nanangãxŭŭŭ, rŭ ñanagŭrŭ: —Aixcŭma nixí i Ería na nŭxíra tá nŭma naxŭxŭŭŭ na chauxŭpa Tupanacēx yamexēēãxŭcēx i duŭxŭgŭ. 12 Natŭrŭ choma pemaã nŭxŭŭŭ chixu, rŭ Ería rŭ marŭ nŭma naxŭ, natŭrŭŭŭ duŭxŭgŭŭŭ rŭ tama nŭxŭŭŭ nacuēxgŭ na texe yíŭxŭ. Rŭ yemacēx chixri namaã nachopetŭ. Rŭ ngēxgumarŭŭŭ tá ta nixí na chixri tá chomaã nachopetŭxŭŭŭ i duŭxŭgŭŭŭ —ñanagŭrŭ. 13 Rŭ yexguma ga yema ngúexŭgŭŭŭ rŭ nŭxŭŭŭ nicuēãchitanŭŭŭ ga Cuáŭŭŭ ga baiŭxēerŭŭchiga na yíŭxŭŭŭ ga yema Ngechuchu namaã nŭxŭŭŭ ixuxŭŭŭ.

Ngechuchu rŭ nanamexēē ga wŭxi ga bucŭ ga ngoxo nawa yexmacŭ (Mr 9.14-29; Lc 9.37-43)

14 Rŭ yexguma duŭxŭgŭŭŭ íyexmaxŭwa nangugŭgu, rŭ wŭxi ga yatŭ Ngechuchucēx nixŭ. Rŭ napēxegu nayacaxãpŭxŭŭŭ rŭ ñanagŭrŭ nŭxŭ: 15 —Pa Corix, ¡nŭxŭŭŭ nangechaŭŭŭ ya chaune rŭ naxcēx yataanexēē! Erŭ muēxpŭxcŭna rŭ naxãŭãēxŭŭŭ, rŭ poraãcŭŭŭ nŭxŭŭŭ nangŭx. Rŭ muēxpŭxcŭna rŭ ũxŭxetŭgu nayangŭxēē, rŭ ēxna dexágŭ. 16 —Rŭ nuã curŭŭŭ ngúexŭgŭxŭŭŭtawa chanaga, natŭrŭŭŭ nŭmagŭŭŭ rŭ tama nŭxŭŭŭ nacuēxgŭ na namexēēgŭãxŭŭŭ —ñanagŭrŭ. 17 Rŭ yexguma Ngechuchu nanangãxŭŭŭ, rŭ ñanagŭrŭŭŭ nŭxŭŭŭ ga yema duŭxŭgŭŭŭ ga yēma yexmagŭxŭŭŭ: —Pa Duŭxŭgŭŭŭ i Tama Yaxōgŭxŭŭŭ i Chixri Maxēŭŭŭŭ, ¿ñŭxguratáta i pemaã chanuxmaxŭŭŭ rŭ yaxna pemaã chaxínŭxŭŭŭ? ¡Nuã penaga ya yima bucŭ! —ñanagŭrŭ. 18 Rŭ Ngechuchu nananga ga yema ngoxo ga guma bucŭwa yexmaxŭŭŭ. Rŭ yemaãcŭŭŭ ínatēxŭchi ga yema ngoxo. Rŭ yexgumatama naxcēx nitaane ga guma bucŭ. 19 Rŭ yemawena ga norŭŭŭ ngúexŭgŭŭŭ rŭ noxrŭwama Ngechuchumaã nidexagŭ. Rŭ nŭxna nacagŭe, rŭ ñanagŭrŭgŭŭŭ nŭxŭ: —Pa Corix, ¿tŭxcŭŭŭŭ i toma rŭ taxuacŭma ínatēxŭchi i ngēma ngoxo? —ñanagŭrŭgŭ. 20 Rŭ Ngechuchu nanangãxŭŭŭ, rŭ ñanagŭrŭŭŭ nŭxŭ: —Pema rŭ taxuacŭma ípenatēxŭchi erŭ tama aixcŭma peyaxōgŭ. Rŭ aixcŭma pemaã

nüxü chixu, rü ngëxguma chi woo wüxi ya motachachirerüxü naxiraxüchigu i perü õ, rü chi daa mëxpünemaã nüxü pixuxgu na yaxügachixüçex, rü chi pega naxinü. Rü taxuxü chima pexü naguxcha ega aixcüma peyaxögügu. ²¹—Natürü ñaarüü i ngoxo rü tama ínaxüxü ega tama íxaureácüma iyumüxëgu —ñanagürü.

*Ngechuchu rü wenaxärü nanaxunagü ga norü yuxchiga
(Mr 9.30-32; Lc 9.43-45)*

²² Rü yexguma norü ngüexüğümaã Gariréaarü naãnegu yaxüxgu ga Ngechuchu, rü norü ngüexüğümaã nüxü nixu, rü ñanagürü: —Choma ya Tupana Nane na duñüxü chüxü, rü chixri tá chomaã nachopetü rü äëxgacügüna tá choxü namugü i duñüxü. ²³—Rü tá choxü nimëxgü, natürü tomaëxpüx i ngunexüguwena rü wena táxarü chamaxü —ñanagürü. Rü yexguma yema orexü naxinüëgu ga norü ngüexüğü, rü poraacü nangechaügü.

*Ngechuchu ngixü naxütanü ga yema diëru ga tupauca ga taxüñecëx ngixü
nayauxgüü*

²⁴ Ngechuchu rü norü ngüexüğümaã Capernáüärü íñewa naxí. Rü yexguma yéma nangugügu rü Pedruxü ínayadaugü ga yema yatügü ga tupauca ga taxüñecëx diëru ngixü yauxgüxü. Rü Pedruna nacagüe rü ñanagürügü: —¿Yima curü Cori rü tama éxna ngixü naxütanü i ngéma diëru i tupauca ya taxüñeärü íxícü? —ñanagürügü. ²⁵ Rü Pedru nanangäxü, rü ñanagürü: —Ngëmaãcü nanaxütanü —ñanagürü. Rü yixcama ga yexguma íxgu naxücuxgu ga Pedru, rü Ngechuchuxira Pedrumaã nidexa, rü ñanagürü nüxü: —¿Ñuxü ñacuxü i cumax, Pa Pedrux, rü ngextá nixí i nayauxgüäxü i norü diëru i guxü i nachüñeärü äëxgacügü? ¿Cuxcëx i nügütanüwatama rü éxna togü i duñüxügütanüwa? —ñanagürü. ²⁶ Rü Pedru nanangäxü, rü ñanagürü: —Maneca togü i duñüxügütanüwa nixí i nayauxgüäxü —ñanagürü. Rü ñuxüchi Ngechuchu nanangäxü rü ñanagürü: —Rü ngëxguma ngëmaãcü yixígu, rü yixema na Tupanaärü íxíxüxü rü taxucëxma tanaxütanügü. ²⁷—Natürü ngëma na taxüema tamaã nuxüçex, rü chanaxwëxe i cuyaxütanü i ngëma diëru. ¡Rü yéa naxtaawa naxü, rü ngëma yapoxwaxe! ¡Rü ngëma nüxírañüxü i choxni i cunapoxwañüxü rü nañxwa tá nüxü icuyangau i wüxi i diëru i nagu mexü na yangutanüëëxüçex i chauxcëx rü cuxcëx rü ta! ¡Rü tupauca ya taxüñewa nange i ngëma diëru, rü yaxütanü! —ñanagürü.

18

*¿Texé tá tixí ya guxäärü yexera íxíxë?
(Mr 9.33-37; Lc 9.46-48)*

¹ Rü yexguma ga norü ngüexüğü rü Ngechuchucëx naxí rü nüxna nacagü, rü ñanagürügü: —¿Pa Corix, texé tá tixí ya guxüärü yexera íxíxë i ngëma Tupana äëxgacü íxíxüwa? —ñanagürügü. ² Rü yexguma ga Ngechuchu rü wüxi ga buxüçex naca, rü norü ngüexügüärü ngäxütanügu nanachixëë. ³ Rü ñuxüchi ñanagürü nüxü: —Dücëx, Pa Chorü Ngüexügüx, aixcüma pemaã nüxü chixu, rü ngëxguma tama nüxü perüxoegu i ngëma na togüärü yexera pegü pixíxüxëëchañüxü rü ñuxüchi tama ñaã buxüürüü pegü íperüxíragu, rü taxucürüwa pichocu i ngextá Tupana äëxgacü íxíxüwa. ⁴—Rü aixcüma yixema tügü íruxíraxe rü ñaã buxüürüü íxíxë, rü yixema tá tixí ya guxüärü yexera íxíxë

i ngextá Tupana ãẽxgacü íixĩtwa. ⁵—Rü texé ya chauégagu meã nayaxúxe i wüxi i buxü i ñaãrũü íixĩtũ rü choxtü nixĩ i tayaxuxü.

Naxãücüma nixĩ na pecadugu inguxü
(Mr 9.42-48; Lc 17.1-2)

⁶—Rü texé ya pecadugu nanguxẽẽxẽ i wüxi i ñaã buxügü i choxtü yaxõgüxü rü tũmacèx rü narũmemaẽ chi nixĩ na noxtacüma wüxi ya nuta tũmanaãwa nayangacuchixü, rü ñuxüchi ngẽmaãcü taxtũchiüwa tũxü nayarütáexü na ngẽxma tayuxücèx. ⁷—Ñoma i naãneçüãx i duũxügüçèx rü wüxi i taxü i ngechaü nixĩ na nangẽxmaxü i muxüchixü i tãcü i pecadugu nayixẽẽxü. Rü guxüguma tá nangẽxma i ngẽma chixexügü, natürü wüxi i ngechaüxüchi tá nixĩ naxcèx i ngẽma yatü i togüxü pecadugu nguxẽẽxü. ⁸—Rü ngẽmacèx i ngẽxguma chi cuxmèx rü ãxna cucutü pecadugu cuxü nguxẽẽgu, rü name nixĩ i noxtacüma ícunadae rü yaxügu cuyaña. Erü narũmemaẽ nixĩ i cuboxmèxãcũma rü ãxna cubocutüãcũma na cunayaxuxü i curü maxü na tama guxüne ya cuxmèxmaã rü ãxna guxüne ya cucutümaã üxü ya taguma ixoxũnewa quitèxcuchixücèx. ⁹—Rü ngẽxguma chi cuxetü pecadugu cuxü nguxẽẽgu, rü name nixĩ i ícunacaxüchi, rü yaxügu cunaña. Erü narũmemaẽ nixĩ i wüxixetümaã na cunayaxuxü i curü maxü na tama guxüne ya cuxetümaã üxü ya ngoxogü nagu poxcuenewa na quitèxcuchixücèx. [Rü ngẽmaãcü woo cuxü naguxchagu, natürü name nixĩ i nüxna quixügachi i guxüma i ngẽma chixexügü i nagu cunguchaüxü.]

Ore ga carneru ga iyarütaxuxügu ixuxü
(Lc 15.3-7)

¹⁰—Rü tama name i nüxü pexoox i wüxi i buxü i ñaãrũü choxtü yaxõxü. Erü ngẽma norü dauruügü i orearü ngeruügü i daxüçüãx rü guxüguma Chaunatu ya daxügüçüpèxewa nangẽxmagü na ngẽma ngẽma buxüçetüwa nachogüxüçèx. ¹¹—Rü choma i Tupana Nane na duũxüxü chiüxü rü núma chaxü na chanamaxẽẽxüçèx i duũxügü iyarütaxuxü. ¹²—¿Rü ñuxü ñapegüxü i pema ega wüxi ya yatü rü nüxü nangẽxmagu i 100 i carnerugü rü wüxi nüxü iyarütaxuxü? ¿Taux ãxna i nachitaügu namugüãxü i ngẽma 99, rü ñuxüchi naxcèx yadauxü i ngẽma nüxü iyarütaxuxü? ¹³—Rü ngẽxguma nüxü iyangaugu, rü namaã nataãẽxüchi i ngẽma norü carneru. Rü woo guxüguma namaã nataãẽ i ngẽma 99 i tama iyarütaxuxü, natürü yexeraãcũxüchi namaã nataãẽ i ngẽma wüxi i iyarütaxuxü, erü marü nüxü inayangau. ¹⁴—Rü ngẽxgumarüü ta nixĩ ya Penatü ya daxügücü na tama nanaxwèxexü na wüxi i ñaã buxü na iyarütaxuxü.

Ñuxãcü tamüçüxü na ingechaüxüchiga
(Lc 17.3)

¹⁵—Rü ngẽxguma cueneẽ chixexü cumaã üxgu, rü name nixĩ i nüxĩcatama namaã quidexa, rü nüxna nüxü cucuèxãchixẽẽ i ngẽma norü chixexü i cumaã naxüxü. Rü ngẽxguma cuga naxĩnũgu, rü marü wenaxarü mexüçèx cunataeguxẽẽ i ngẽma cueneẽ. ¹⁶—Natürü ngẽxguma tama cuga naxĩnũgu i ngẽma cueneẽ, rü name nixĩ i naxcèx cuca i wüxi rü ãxna taxre i duũxügü na nümagü rü ta namaã yadexagüxüçèx i ngẽma cueneẽ. ¹⁷—Rü ngẽxguma rü ta tama nüxü inaxĩnũgu i ngẽma taxre i duũxügüarü ore, rü name nixĩ i guxü i yaxõgüxümaã nüxü quixu na ngẽma cueneẽmaã yadexagüxüçèx. Rü ngẽxguma rü ta tama nüxü inaxĩnũgu i ngẽma yaxõgüxüãrü ore, rü name nixĩ i wüxi i duũxü i tama yaxõxürüügu namaã curüxĩnü. ¹⁸—Rü aixcũma pemaã nüxü chixu rü yixema núma ñoma i naãnewa tama pexü íruxĩnũxẽ

i chorü ore rü täütáma Tupana äëxgacü ííxíüwa tichocu. Natürü yíxema meã pexü irüxíñüxë i ngëma ore rü aixcüma ngëma tá tangu. ¹⁹—Rü pemaã nüxü chixu rü ngëxguma chi taxre i pema i núma ñoma i naãnewa rü wüxigu ñacüçëx ípëcaxgu i Chaunatu ya daxüügücüxütawa, rü núma ya Chaunatu rü tá pexna nanaxã. ²⁰—Erü ngëma ngextá taxre rü éxna tomaëxpüx i duüxügü chaeügagu íngutaquëxëüwa, rü choma rü ta norü ngäxütanüwa changëxma —ñanagürü. ²¹Rü yëxguma ga Pedru rü Ngechuchucëx nixü, rü nüxna naca, rü ñanagürü: —¿Pa Corix, ngëxguma chaueneë chixexü chomaã üxgu, rü ñuxreëxpüxcüna i namexü na nüxü nüxü changechaüxü naxcëx i ngëma chixexü i chomaã naxüxü? ¿Rü marü namexü i cuxcëx ega 7 éxpüxcüna yixügu na nüxü nüxü changechaüxü? —ñanagürü. ²²Rü Ngechuchu nanangãxü rü ñanagürü: —Tama name i 7 éxpüxcünaxícatama nüxü nüxü cungechaü. Natürü guxügutáma nixü i nüxü nüxü na cungechaüxü woo 70 éxpüxcüna i 7 wa nangu —ñanagürü.

Ore ga äëxgacüarü duüxü ga tama namücüaxü nüxü ngechaüxü ga norü ngetanügu íxuxü

²³Rü Ngechuchu rü ñanagürü: —Rü ngëma Tupana na äëxgacü íxíxü, rü ñoma wüxi ga nachíüãneärü äëxgacü ga norü duüxügü ga nüxü nange-tanügüxümaã namexëëchaüxürü nixü. ²⁴—Rü yëxguma ínaxügüãgu ga meã nüxü na yadaugüxü ga yema nüxü nangetanügüxüpane, rü naxütawa nanagagü ga wüxi ga norü duüxü ga taxüchicü ga dïeru nüxü ngíxü nge-tanüxü. ²⁵—Natürü ga yema norü duüxü rü nangearü dïeruãx, rü taxuacüma norü cori ga äëxgacüaxü nanaxütanüega. Rü yemacëx ga yema äëxgacü rü norü churaragüxü namu na to ga corixü namaã nataxëgüxüçëx ga yema yatü, wüxigu tümamaã ga naxmëx rü naxácügü rü norü yemaxügü, na yema natanü ga dïerumaã naxütanüãxüçëx ga norü ngetanü. ²⁶—Rü yëxguma ga yema norü duüxü rü norü äëxgacüpëxegu nacaxãpüxü, rü nüxü nacëëxü, rü ñanagürü:

“Pa Corix ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ²⁷—Rü yema norü äëxgacüaxü nangechaütümüü, rü yemacëx namaã nüxü nixu ga marü tama nüxü na naxütanüãxüçëx ga yema norü ngetanü. Rü ñuxüchi ínananguxuchíëë. ²⁸—Natürü yëxgumatama yëma äëxgacüxütawa ínaxüüxgu ga yema yatü, rü nüxü inayangau ga wüxi ga namücü ga írarüwatama nüxü nangetanüxü. Rü yema yatü rü nüxna natüxüë, rü nananüxnaxã, rü ñanagürü nüxü:

“¡Choxü ngíxü naxütanü i ngëma dïeru i ngíxü cungetanücü!” ñanagürü. ²⁹—Rü yëxguma ga yema namücü rü yema yatüpëxegu nacaxãpüxü, rü nüxü nacëëxü, rü ñanagürü:

“Pa Chomüçüx, ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ³⁰—Natürü ga yema yatü rü tama nüxü nacüaxüchaü ga yema ore. Rü poxcupataügu tüxü napoxcuama ñuxmata nüxü tanaxütanü ga yema tümäärü ngetanü. ³¹—Rü yëxguma togü ga yema äëxgacüarü duüxügü nüxü daugügu ga yema ngupetüxü, rü poraãcü naãëwa nangux ga yema naxüxü ga yema yatü. Rü norü corixütawa naxü rü nüxü nayarüxügüë ga guxüma ga yema ngupetüxü. ³²—Rü yëxguma ga yema äëxgacü rü nanamu ga norü churaragü na naxütawa nagagüãxüçëx ga yema yatü. Rü yëxguma naxütawa nanguxgu, rü ñanagürü nüxü:

“Wüxi i chixexü i chorü duüxü quixü. Choma rü cuxü nüxü changechaü ga yema choxü cungetanüxü, erü choxü cucëëxü na tama cuxü chapoxcuxüçëx.

33 —Rü cuma rü chita nüxü nüxü cungechaü i ngēma cumücü i cuxü nange-tanüxü, yexgumarüü ga choma rü cuxü nüxü na changechaüxürüü ga yema choxü cungetanüxü”, ñanagürü nüxü. 34 —Rü poraäcü nanuxüchi ga yema äëxgacü. Rü norü churaragüxü namu na napoxcugüäxücxë ga yema yatü ñuxmata guxü nüxü naxütanü ga yema nüxü nangetanüxü —ñanagürü ga Ngechuchu. 35 Rü ñuxüchi ñanagürü ta: —Rü ngëxgumarüü tá pemaä nanaxü ya Chaunatü ya daxügcü i ngëxguma tama wüxichigü aixcüma peenexëgüaxü nüxü perüngümaegu i ngema chixexü i pemaä naxüxü —ñanagürü.

19

Parichëgü rü Ngechuchuna nacagü i táxmëxchiga (Mr 10.1-12; Lc 16.18)

1 Rü yema ñaxguwena ga Ngechuchu rü inaxüächi ga Garirëaarü nañewa. Rü natü ga Yudáüärü tocutüwa naxü ga Yudëaarü nañewa. 2 Rü muxüma ga duüxügü nawe narüxi, rü nüma ga Ngechuchu rü yéma nanameëxëë ga yema idaaweexü. 3 Rü Ngechuchucëx naxi ga ñuxre ga Parichëgü, rü nüxna nacagü rü ñanagürügü: —¿Cuxcëx namexü i wüxi i yatü na ínatáxmëxmarexü ega tacü rü chixexü taxüxgu ya naxmëx? —ñanagürügü. Rü yemaäcü nüxna nacagü yerü Ngechuchuxü chixexügu nanguxëëgüchaü. 4 Rü Ngechuchu nanangäxü rü ñanagürü: —¿Taguma ëxna nawa pengüe i ngēma Tupanaärü ore i ümatüxü i nüxü ixuxü ga noxri Tupana naxüxgu ga duüxügü, rü yatüxü rü ngecüxü na naxüxü? 5 —Rü ñanagürü ga Tupana:

“Rü ngëmacëx ya yatü rü tá nanatü rü naëna nixügachi na namëxmaä in-axäüxücxë. Rü ngëmaäcü i ngëma taxre rü ñoma wüxitama i duüxürüü tá nixügü”.

6 —Rü ñuxüchi tama taxre nixi, rü wüxitama nixi. Rü ngëmacëx taxucürüwa texé nügüna tayaxigachitanüxëë i ngëma taxre i Tupana nügüna mugüxü —ñanagürü. 7 Rü yexguma Ngechuchuna nacagü rü ñanagürügü: —¿Tüxcüü nixi ga Moïché ga duüxügümaä nüxü yaxuxü rü ngëxguma texé tümamëxü ítáxchaügu rü name nixi i wüxi i popera i tëxgüpane ngixna taxä, rü ñuxüchi ngixü ítatëx? ñaxü —ñanagürügü. 8 Rü Ngechuchu nanangäxü, rü ñanagürü nüxü: —Pegagu nixi ga Moïché ga tama pexna nachüxäxü na pexmëxü ípetäxü. Yerü nüma nüxü nacüëx na tama aixcüma peyaxögüxü. Natürü noxriarü ügügu rü tama yemaäcü nixi. 9 —Rü choma pemaä nüxü chixu rü tama name na texé tümamëxü ítáxü ega tama naí ya yatümaä nangëäëxügagu yixügu. Rü ngëxguma chi yima yatü rü ñuxüchi naí i ngemaä naxäxmëxgu, rü chixexü naxü, rü ñoma naí i ngemaämare nangëäëxürüü nixi. Rü texé ya ngümaä ämaxë i ngëma nge i ngite ngixü ítëxcü, rü ñoma naí i ngemaämare itapexürüü tixi —ñanagürü ga Ngechuchu. 10 Rü ñuxüchi ga norü ngüexügü rü ñanagürügü nüxü: —Ega ngëmaäcü yixügu rü name nixi i noxtacüma tama naxämëx ya yatü rü tama ixäte i nge —ñanagürügü. 11 Rü Ngechuchu norü ngüexügüxü nangäxü rü ñanagürü: —Taxucürüwa guxüma i duüxügü nüxü nacüëx i tacüchiga na yixü i ngëma nguxëëtae. Natürü yixëma Tupana tüxü nüxü cuëëxëxëicatama tixi ya nüxü cuëxgüxe. 12 —Rü nangëxma i nagüxüraüxü i guxchaxü na tama naxämëxücxë ya yatü. Erü nümaxü i yatü rü woetama taxucürüwa naxämëx erü norü bucüma nangepüxüchare. Rü nümaxü i yatü rü taxucürüwa naxämëx erü nayauxpüxüchare. Rü togü tama naxämëx erü Tupanaärü ngüchaüxëicatama naxügüchaü. Rü texé ya ngëmaäcü maxchaüxë rü marü name i ngëmaäcü tamaxü —ñanagürü ga Ngechuchu.

Ngechuchu rü buxügüxü nameãxë
(Mr 10.13-16; Lc 18.15-17)

¹³ Rü duüxügü rü Ngechuchuxütawa nanagaü ga ñuxre ga buxügü na Ngechuchu nüxü ingögüxücëx rü namaã nayumüxëxücëx. Natürü ga Ngechuchuarü ngüexügü rü inanaxügüe ga na yangagüãxü ga yema duüxügü ga Ngechuchuxütawa buxügüxü gagüxü. ¹⁴ Natürü ga Ngechuchu rü ñanagürü nüxü ga norü ngüexügü: —Marü name i chauxütawa naxi i buxügü. ¡Rü täxü i nüxna penachuxuxü! Erü Tupana äëxgacü ííxüüwa rü tümacëx nixi ya yixema ñaã buxügürüü meã yaxögüxe —ñanagürü. ¹⁵ Rü ñuxüchi ga Ngechuchu rü yema buxügüétü naxümëx. Rü yemawena in-xüächi ga yéma.

Wüxi ga ngextüxücü ga dïeruãxüchicü Ngechuchumaã nidexa
(Mr 10.17-31; Lc 18.18-30)

¹⁶ Rü wüxi ga ngextüxücü rü Ngechuchuxütawa nangu, rü nüxna naca, rü ñanagürü: —Pa Ngüexëerüü ya Mecüx, ¿tacü tá chaxüxü na chanayaxuxücëx i maxü i taguma gúxü? —ñanagürü. ¹⁷ Rü Ngechuchu nanangãxü rü ñanagürü nüxü: —¿Tüxcüü “Mecü” ñacurügü choxü? Erü Tupanaxicatama nixi ya mecü ixícü, rü nataxuma i to. Natürü ngëxguma cunayauxchaügu i maxü i taguma gúxü, rü ¡naga naxinü i Tupanaärü mugü! —ñanagürü. ¹⁸ Rü yexguma ga guma ngextüxücü rü ñanagürü: —¿Ngëxürüüxü tá nixi i Tupanaärü mugü i naga chaxinüxü? —ñanagürü. Rü Ngechuchu nanangãxü rü ñanagürü nüxü: —¡Tãütáma cumáëta, rü tãütáma na i ngemaã icupe, rü tãütáma cungtëëx, rü tãütáma doraxü quixu i togüchiga! ¹⁹ —¡Rü tümaga naxinü ya cunatü rü cue, rü nüxü nangechaü i cumücügü ngëma na cügü cungechaüxürüü! —ñanagürü. ²⁰ Rü yexguma ga guma ngextüxücü rü ñanagürü: —Guxüma i ngëma mugü i nüxü quixuxü rü woetama chorü bucüma meã chayanguxëë. ¿Rü tacü rü to tá chaxü na choxü nangëxmaxücëx i maxü i taguma gúxü? —ñanagürü. ²¹ Rü Ngechuchu nanangãxü rü ñanagürü nüxü: —Ega aixcüma Tupanapëxewa mecü quixüxchaügu, rü name nixi i namaã cutaxe i guxüma i curü ngëmaxügü rü togü i ngearü ngëmaxüãxgüxüna cunaxã i ngëma curü natanü. Rü ngëxguma tá cuxü nangëxma i cuchica i daxügüxü i nañewa. Rü ñuxüchi marü name i chowe curüxü —ñanagürü. ²² Natürü yexguma yemaxü naxinügu ga guma ngextüxücü rü poraãcü nangechaü, yerü namuärü dïeruãxüchicü. ²³ Rü yexguma ga Ngechuchu rü norü ngüexügüxü ñanagürü: —Aixcüma pemaã nüxü chixu rü naguxchaxüchi nixi na wüxi i duüxü i dïeruãxüchixü rü Tupana äëxgacü ííxüüwa na nanguxü. ²⁴ —Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüärü yexera narügüxchamaë naxcëx i wüxi i duüxü i dïeruãxüchixü na yaxücuxü i ngextã Tupana äëxgacü ííxüüwa —ñanagürü. ²⁵ Rü yexguma yemaxü naxinüëgu ga norü ngüexügü rü poraãcü nabëixächiaëgü. Rü nügüna nacagüe rü ñanagürügü: —¿Rü texë tá ëxna tixi ya nayaxüxe i maxü i taguma gúxü? —ñanagürügü. ²⁶ Rü Ngechuchu nüxü nadawenü rü ñanagürü nüxü: —Duüxügü rü taxuacüma nügü namaxëë, natürü Tupanaãxü rü natauxcha na namaxëxëãxü —ñanagürü. ²⁷ Rü yexguma ga Pedru rü ñanagürü nüxü: —Pa Corix, toma rü marü ítanawogü ga guxüma ga torü yemaxügü na cuwe tarüxücëx. ¿Rü tacü tá nixi i torü natanü i ñuxmax? —ñanagürü. ²⁸ Rü Ngechuchu nanangãxü rü ñanagürü nüxü: —Aixcüma pemaã nüxü chixu rü ngëma ngunexü i Tupana nagu nangexwacaxüxëëxü i guxüma, rü choma rü äëxgacü ya tacü tá chixi. Rü chorü tochica i mexëchixüwa tá charüto.

Rü pema i 12 i chorü ngüexüü na chowe perüixüü rü pema rü tá ta pexü nangëxma i perü tochicaxü i mexëchixü i chauxütawa. Rü ngema tá perütogü na norü maxüchigacëx nüxü picagüxü i guxüma i Yudiügu. ²⁹ Rü guxäma ya yixema tümapata chauxcëx ítáxe, rü ëxna tümaëneëgü rü tümaëyëxgüxü chauxcëx ítáxe, rü ëxna tümanatü rü tümaëxü chauxcëx ítáxe, rü ëxna tümamëx rü tümaxäcügüxü rü tümaärü naäne chauxcëx ítáxe, rü 100 ëxpüxcüna i ngëma noxri tüxü ngëxmaxüärü yexera tá tayaxu. Rü naetü tá tanayaxu i maxü i taguma güxü. ³⁰ –Natürü muxüma i nümaxü i ñoma i naänewa duüxügü wixpëxewa ügüxëëxü, rü daxüguxü i naänewa rü Tupana tá wixweama nanaxügüxëë. Rü muxüma i nümaxü i ñoma i naänewa duüxügü wixweama ügüxëëxü, rü daxüguxü i naänewa rü Tupana tá wixpëxewa nanaxügüxëë.

20

Ore ga puracütanüxügu ixuxü

¹ –Rü ngëma Tupana äëxgacü lixüxüwa rü ñoma wüxi ga ubanecüarü yora ga pëxmama norü puracütanüxü ta yadaucürüü nixü. ² Rü yema puracütanüxümaä nanamexëë na wüxitchinü ga diëru gu nüxü na naxütanüäxücëx ga wüxichigü ga ngunexügu. Rü ñuxüchi naänewa nanamagü na yéma yapuracüexücëx. ³ –Rü yixcama ga 9 arü oragu rü inayadau ga ngextá yatügü ga puracücëx daugüxü ingutaquëxëgüxüxüwa. Rü yexma nüxü nayangau ga ñuxre ga yatügü ga ngearü puracüäxgüxü. ⁴ –Rü ñanagürü nüxü:

“¡Ngema chorü ubanecüwa peyapuracüe! Rü meä tá pexü chanaxütanü”, ñanagürü. Rü nümagü rü yéma naxü. ⁵ –Rü yema ubanecüarü yora rü tocuchigu rü wenaxärü togü ga puracütanüxü ta nayadau. Rü tomaëxpüxarü oragu ga yáuanecü rü wenaxärü yëxgumarüü ta nayadau. ⁶ –Rü yixcama ga wüximëëxpüxarü oragu ga yáuanecü rü wenaxärü inayadau ga ngextá yatügü ga puracücëx daugüxü ingutaquëxëgüxüxüwa. Rü yexma nüxü nayangau ga ñuxre ga togü ga yatügü ga ngearü puracüäxgüxü. Rü ñanagürü nüxü:

“¿Tüxcüü i pema rü nuxä perüchomare i guxü i ñoma i ngunexügu, rü tama pepuracüe?” ñanagürü. ⁷ –Rü nümagü nanangäxügü, rü ñanagürügü nüxü:

“Tama tapuracüe erü taxüema toxëx tadau na tüxü tapuracüexücëx”, ñanagürügü. Rü yëxguma ga yema naäneärü yora rü ñanagürü nüxü:

“¡Pema rü ta ngëma chorü ubanecüwa pexü rü peyapuracüe! Rü meä tá pexü chanaxütanü”, ñanagürü. ⁸ –Rü yëxguma marü nachütagu rü yema naäneärü yora, rü naxcëx naca ga norü puracütanüxüärü dauruü, rü ñanagürü nüxü:

“¡Naxcëx naca i ngëma puracütanüxü. Rü nüxüra nüxü naxütanü i ngëma wixwenaxüchima ngema Ìxü, rü nawa tá icuyacuëxëë i ngëma nüxüra ngema puracüexü!” ñanagürü. ⁹ –Rü yéma naxü ga yema puracütanüxü ga wüximëëxpüxarü oragu ga yáuanecü puracüwa Ìxü. Rü wüxichigü ngüxü nayauxgü ga wüxitchinü ga diëru. ¹⁰ –Rü yemawena rü yéma naxü ga yema nüxürama puracüexü ga puracütanüxü. Rü nümagü nagu naxüñëgu rü yexera tá ngüxü nayauxgü ga diëru, natürü nümagü rü ta ngüxü nayauxgü ga wüxitchinütama ga diëru ga wüxichigü. ¹¹ –Rü yëxguma ngüxü nayauxgügu rü inanaxügüga ga chixri na yadëxagüxü nachigagu ga yema naäneärü yora. ¹² –Rü ñanagürügü:

“Yixema rü guxü i ngunexügu üëxcüxetüwa tapuracüe, natürü i ñaä puracütanüxü i wixwenaxüchi ingügüxü rü wüxi i oratama napuracüe. Natürü

ngêma tûxû naxûtanûãxûêxpûxtama nûxû nanaxûtanû”, ñanagûrûgû. ¹³ – Natûrû ga yema ubanecûarû yora nanangãxû, rû ñanagûrû nûxû ga wûxi ga yema puracûtanûxû:

“Pa Chomûcûx, tama cuxû changîx. ¿Tama êxna i wûxitachinûgu yîxû ga chomaã cunamexêêxû na cuxû chanaxûtanûxû i ngêma puracû? ¹⁴ –¡Ñãã i curû diêru, rû íixû! Rû ngêma puracûtanûxû i wûxi i oratama puracûêxû, rû choma nûxna ngxû chaxãxchaû i ngêma cuxna ngxû chaxãcûêxpûx. ¹⁵ – ¿Tama êxna name i ngêma choma chanaxwêxexûãcûma ngîmaã na chaxûxû i chorû diêru? ¿Rû êxna quixãûxãchi erû ngêmaãcû chamecûma?” ñanagûrû. ¹⁶ –Rû yîxema ñuxma duûxûgû wixweama tûxû ügûêêxê, rû daxûguxû i naãnewa rû Tupana tá wixpêxewa tûxû naxûgûêê. Rû yîxema ñuxma duûxûgû wixpêxewa tûxû ügûêêxê rû daxûguxû i naãnewa rû Tupana tá wixweama tûxû naxûgûêê. Erû Tupana rû muxûchiena naxu, natûrû noxretama tixî ya yîxema tûxû nadexe –ñanagûrû ga Ngechuchu.

Ngechuchu rû norû tomaêxpûcûna nanaxunagû ga norû yuxchiga
(Mr 10.32-34; Lc 18.31-34)

¹⁷ Rû yexguma namagu yaxûxgu ga Ngechuchu ga Yerucharêûwa na naxûxû rû noxrûwama naxcêx naca ga yema 12 ga norû ngûêxûgû, rû ñanagûrû nûxû: ¹⁸ –Pema nûxû pecuêx na marû ingaicaxû na Yerucharêûwa ingugûxû. Rû ngema rû duûxûgû rû tá chixri chomaã nachopetû. Rû tá paigûarû âêxgacûgû rû ngûêêruûgû i ore i mugûwa nguxêetaegûxûna tá choxû namugû. Rû nûmagû rû tá chomaã nanaxuegûgû na chayuxûcêx. ¹⁹ – Rû tá to i nachiûãnecûãxna choxû namugû. Rû ngêmagû tá nixî i chaugu idaaxcûraûgûxû rû choxû cuaixgûxû. rû ñuxûchi tá curuchawa choxû nipotagû na ngêxma chayuxûcêx. Natûrû tomaêxpûx i ngunexûguwena rû tá wenaxârû chamaxû –ñanagûrû.

Wûxi ga ngûêêcêx íica ga Chaûtiágu rû Cuáûrû mamá
(Mr 10.35-40)

²⁰ Rû yéma iyexma ga naê ga Chaûtiágu rû Cuáû. Rû yema taxre rû Zebedéu nanegû nixîgû. Rû ngîma rû Ngechuchucêx iyaxû namaã ga yema taxre ga ngînegû. Rû Ngechuchupêxegu iyacaxãpûxû, rû wûxi ga ngûêêcêx nûxna iyaca. ²¹ Rû nûma ngxîna naca, rû ñanagûrû: –¿Tacû nixî i cunaxwêxexû? – ñanagûrû. Rû ngîma inangãxû rû ngîgûrûgû: –Pa Corix, ngêxguma âêxgacûxû quingucuchigu rû chanaxwêxe i cunamu na wûxi i ñãã chaune rû curû tûgûnecûwawa na natoxû, rû ngêma to i curû toxwecûwawa na natoxû – ngîgûrûgû. ²² Natûrû Ngechuchu ngîxû nangãxû rû ñanagûrû: –Pema rû tama nûxû pecuêx na tacûcêx ípeçaxû. ¿Namaxã chi peporaexû i ngêma ngûxû i tá choxû ûpetûxû? –ñanagûrû. Rû nûmagû nanangãxûgû rû ñanagûrûgû: –Ngêmaãcû namaã tá taporae –ñanagûrûgû. ²³ Rû Ngechuchu nanangãxû rû ñanagûrû nûxû: –Aixcûma tá nixî i chauxrûû ngûxû pingegûxû. Natûrû ngêma chorû tûgûnecûwawa rû chorû toxwecûwawa na perûtogûxûcêx, rû tama choxmêxwa nangêxma na pexna chanaxãxû. Rû Chaunatumêxêwa nixî na nangêxmaxû i ngêma, rû nûma tá tûxna nanaxã ya yîxema tûmacêx íyîxê –ñanagûrû. ²⁴ Rû yexguma yemaxû naxînûêgu ga yema togû ga 10 ga Ngechucharû ngûêxûgû, rû Chaûtiágumaã rû Cuáûmaã nanuê. ²⁵ Natûrû Ngechuchu naxcêx naca rû ñanagûrû nûxû: –Pema nûxû pecuêx rû guxû i nachiûãnegûarû âêxgacûgû rû poraãcû nanamu i norû duûxûgû. Rû

ngêma âêxgacügü i taxüügü rü norü duüxüügüarü yora nügü nixüügüxêê. ²⁶ — Natürü tãütáma ngêmaácü nixi i petanüwa. Rü ngêxguma texé naxwêxegu na âêxgacü tixü i petanüwa, rü name nixi i noxri rü guxãârü ngüxêêruü tixi. ²⁷ —Rü ngêxguma chi texé i petanüwa naxwêxegu na tümamücügüeru na tixü, rü name nixi i noxri rü guxüma i tümamücügüarü ngüxêêruü tixi. ²⁸ —Yerü chomatama i Tupana Nane na duüxüü chüüxü rü tama togü choxü rüngüxêêxücêx nixi i núma chaxüxü. Natürü núma chaxüxü na duüxüügüü charüngüxêêxücêx rü naxcêx na chayuxücêx rü ngêmaácü chanaxütanüxücêx na muxüma i nümagü rü nüxü nangêxmaxücêx i maxü i taguma güxü —ñanagürü.

Ngechuchu nanameêxêê ga taxre ga ngexetügüxü

(Mr 10. 46-52; Lc 18.35-43)

²⁹ Rü yexguma Ngechuchu norü ngüexüügümaã Yericüarü ñãnewa íchoüxgu, rü muxüma ga duüxüügü nawe narüxí. ³⁰ Rü yéma namacüwawa narütogü ga taxre ga ingexetüxü. Rü yexguma nüxü naxüñêgu na Ngechuchu yéma üpetüxü, rü tagaácü Ngechuchuna nacagüe, rü ñanagürügü: —Pa Corix, Pa Dabítanüxüx, ¡Cuxü tangechaütümüügü! —ñanagürügü. ³¹ Rü yema duüxüügü ga Ngechuchuwe rüxüxü rü nayangagü na iyanangeêxgüxücêx. Natürü nümagü ga yema ingexetüxü rü yexeraácü Ngechuchuna nacagüe, rü ñanagürügü: —Pa Corix, Pa Dabítanüxüx, ¡cuxü tangechaütümüügü! —ñanagürügü. ³² Rü yexguma ga Ngechuchu rü yexma nayachiãchi rü naxcêx naca ga yema ingexetüxü. Rü nüxna naca rü ñanagürü: —¡Tacü i penaxwêxexü na pexcêx chanaxüxü? —ñanagürü. ³³ Rü nümagü nanangãxüügü rü ñanagürügü: —Pa Corix, tanaxwêxe na toxü quidauchitanügüxêêxü —ñanagürügü. ³⁴ Rü yexguma ga Ngechuchu rü nüxü nangechaütümüügü, rü naxêtügügu ningögü. Rü yexgumatama nidauchigü, rü Ngechuchuwe narüxí.

21

Yerucharéügu naxücu ga Ngechuchu

(Mr 11.1-11; Lc 19.28-40; Cü 12.12-19)

¹ Rü yexguma marü yangaicagügu ga Yerucharéüwa na nangugüxü, rü nawa nangugü ga guma ñãne ga Bechagué ga Oríbunecüarü mëxpüneãrü ngaicamana yexmane. Rü Ngechuchunanamu ga taxre ga norü ngüexüügü.

² Rü ñanagürü nüxü: —¡Gua tórü tqxmêxtawa ngêxmane ya ñãnexãcüwa pexi! Rü ngêxma tá ngixü pengau i wüxi i buru i ngêxma ngaxücü namaã i wüxi i ngixãcü i yatüxü i ngixütagu irüxãüxü. ¡Rü ngixü piwêxü, rü nuã chauxütawa ngixü pega namaã i ngixãcü! ³ Rü ngêxguma texé pexna caxgu na ñacücêx ngixü piwêxüxü, ¡rü tümamaã nüxü pixu rü ñapegügü:

“Torü Cori nangixwêxe namaã i ngixãcü, natürü paxa tá ngixü na-woeguxêê”, ñapegügü tüxü! —ñanagürü. ⁴ Rü yema naxüpetü yerü yemaácü Tupana nayanguxêê ga norü ore ga nuxcúmaüxü ga norü orearü uruü ümatüxü ga ñaxü:

⁵ “¡Yerucharéücüãxgümaã nüxü pixu rü ñapegü: ‘¡Dücêx ya perü âêxgacü ya nuã pexütawa ücü! Rü núma rü tama nügü yacuêxüãcü ñnangu, rü wüxi i buruxacüétügumare naxaunagü!’ ”

ñanagürü ga yema ore. ⁶ Rü yexguma ga yema taxre ga norü ngüexüügü rü yéma naxí, rü nanaxügü ga yema Ngechuchu namaã nüxü ixuxü. ⁷ Rü Ngechuchuxütawa ngixü nagagü ga yema buru ngixacümaã. Rü yema norü

ngúexüğü rü naxchirumaã nanaçhatagü ga yema ngixacü, rü ñuxüchi ga Ngechuchu rü natagu naxaunagü. ⁸Rü yema muxüma ga duüxüğü ga nawe rüxixü rü naxchirumaã nayaçhamatanü ga nama. Rü togü rü naixätü ta nadaügü rü yemamaã nayaçhamatanü ga nama. ⁹Rü yema duüxüğü ga napéxegu ägüxü, rü yema togü ga wixweama ägüxü, rü tagaäcü ñanagürüğü: —iNüxü ticuëxüxüğü ya daa äëxgacü ya Dabítanüxü! iRü namecümäxüchi ya daa Tupanaegagu núma ücü! iRü pema rü ta, Pa Daxücüäx, rü nüxü picuëxüxüğü ya Tupana! —ñanagürüğü. ¹⁰Rü yexguma Ngechuchu Yerucharéüwa ixücxugu, rü guxüma ga yema iänecüäx rü nanaxixächiaëgü, rü ñanagürüğü: —iTexe nixi ya daa? —ñanagürüğü. ¹¹Rü yema Ngechuchuwe rüxixü ga duüxüğü rü nanangäxüğü rü ñanagürüğü: —Daa nixi ya Tupanaärü orearü uruü ya Ngechuchu ya Gariréaenewa ngëxmane ya iäne ya Nacharétücüäx ixücü —ñanagürüğü.

Ngechuchu rü tupauca ga taxünewa ínanawoxü ga duüxüğü ga yéma taxegüxü

(Mr 11.15-19; Lc 19.45-48; Cu 2.13-22)

¹²Rü tupauca ga taxünegu naxücu ga Ngechuchu, rü ínanawoxü ga yema yéma tacümaã taxegüxü rü naxcëx taxegüxü. Rü nanangüegutanü ga norü mechagü ga yema duüxüğü ga yéma Tupanaarü ämarewa mexü ga diërumaã taxegüxü rü muxtucugümaã taxegüxü. ¹³Rü ñanagürü nüxü ga yema duüxüğü: —Tupanaärü ore i ümatüxüwa rü ñanagürü: “Chopata rü yumüxëpataü nixi”.

Natürü pema rü ngítëxgüxüpataü peyaxixëë —ñanagürü. ¹⁴Rü yéma tupauca ga taxünewa rü Ngechuchucëx naxi ga ñuxre ga ingexetügüxü rü ichixeparagüxü. Rü Ngechuchu nanameëxëë. ¹⁵Natürü ga paigüarü äëxgacügü rü ngüxëëruüğü ga ore ga mugüwa nguxëëtaegüxü, rü nüxü nadaugü ga yema mexüğü ga taxüğü ga Tupanaärü poramaã naxüxü ga Ngechuchu rü buxüğüxü naxinüë ga na ñagüxü: —iNamexëchi ya daa äëxgacü ya Ngechuchu ya Dabítanüxü! —ñagüxü. Rü yemacëx ga yema äëxgacügü rü nanuë. ¹⁶Rü ñanagürüğü Ngechuchuxü: —iNüxü cuxinüxü i ngëma buxüğü namaã idexagüxü? —ñanagürüğü. Rü Ngechuchu nanangäxü, rü ñanagürü: —Ngü, nüxü chaxinü. iNatürü taguma ëxna nawa pengüé i Tupanaärü ore i ümatüxü i ñaxü:

“Rü ngëma buxüğü i íraxüchixü rü õxchanagü rü tá ta cuxü nicuëxüüğü”, ñaxü? —ñanagürü. ¹⁷Rü yexguma ga Ngechuchu rü nüxna yéma nixü, rü ñuxüchi ínaxüxü ga guma iänewa. Rü iäne ga Betániawa naxü, rü yexma nayape.

Ngechuchu rü orix ga iguera ga ngearü oðxümaã chixexü naxuegu

(Mr 11.12-14, 20-26)

¹⁸Rü moxüäcü ga pëxmama rü yexguma wenaxärü Yerucharéücëx nataegugu ga Ngechuchu rü nataiya. ¹⁹Rü namacüwawa nüxü nadau ga wüxi ga orix ga iguera. Rü naxcëx nixü, natürü taxuüma ga norü oxü inayangau, rü naätüxüxücatama inayangau. Rü yemacëx ñanagürü nüxü ga yema orix: —Rü tagutáma wena cuxox, —ñanagürü. Rü yexgumatama narüñëxë ga yema orix. ²⁰Rü yexguma yemaxü nadaugü ga norü ngüexüğü, rü nabëixächiaëgü. Rü Ngechuchuna nacagüé rü ñanagürüğü: —iRü ñuxäcü i ñaã orix i paxama nañëxëxü? —ñanagürüğü. ²¹Rü Ngechuchu nanangäxü rü ñanagürü: —Aixcüma pemaã nüxü chixu rü ngëxguma chi meã peyaxögügu rü tama ngëma igueramaã chaxüxüxüca chi pexü. Natürü yexeraxü chi pexü.

Rü ngëxguma chi daa mëxpúnemaã nüxü pixuxgu na yaxügachixüçëx rü taxtü i taxüchiüwa naxüçëx, rü pega chi naxînu. ²² Rü guxüma i tacü i naxcëx ípeçaxü i perü yumüxëwa, rü tá penayauxgü ega aixcüma peyaxögüäcüma naxcëx ípeçaxgu.

Ngechuchuna nacagüe na texégagu tupauca ga taxünewa nanguxëëtaexü
(Mr 11.27-33; Lc 20.1-8)

²³ Rü Ngechuchu rü tupauca ga taxünegu naxücu. Rü yexguma yéma ínanguxëëtaeyane rü naxcëx naxî ga paigüarü äëxgacügü rü Yudiügüarü äëxgacügüerügü. Rü Ngechuchuna nacagüe rü ñanagürügü: —¿Rü texégagu nixî i cunaxüxü i ngëma núma cuxüxü? ¿Rü texé cuxü tamu na cunaxüçëx i ngëma? —ñanagürügü. ²⁴⁻²⁵ Rü Ngechuchu nanangäxü rü ñanagürü: —Choma rü tá ta pexna chaca, rü ngëxguma choxü pengäxügu i ngëma pexna naxcëx chaçaxü, rü choma rü tá ta pemaã nüxü chixu na ngëxürüüxü i äëxgacü na choxü muxü na nuã changuxëëtaexü. ¿Rü texé tanamu ga Cuáü na duüxügüxü ínabaiüxëëxüçëx? ¿Pexcëx rü Tupana yüxü ga namucü rü ëxna duüxügümare? —ñanagürü. Rü yexguma ga yema äëxgacügü rü inanaxügüe ga nügümaã na yaporagatanücüxü. Rü nügümaãtama ñanagürügü: —¿Ñuxü ñagügüxü tá? Erü ngëxguma chi nüxü ixuxgu na Tupana núma namuxü rü núma rü tá ñanagürü tüxü:

“¿Rü tüxücüü ga tama nüxü peyaxögüxü?” ñanagürü tá. ²⁶ —Rü ngëxguma chi nüxü ixuxgu na yatügümare núma namuxü rü taxcëx rü tá naxäücüma, erü duüxügü tá tüxü nadai. Erü nümagü i duüxügü rü nagu narüxînüe na Tupana yüxü ga Cuáüxü núma mucü —ñanagürügü. ²⁷ Rü yemacëx Ngechuchuxü nangäxügü rü ñanagürügü: —Tama nüxü tacüex ga texé núma na namuxü ga Cuáü ga baiüxëeruü —ñanagürügü. Rü yexguma ga Ngechuchu rü ñanagürü nüxü: —Choma rü tá ta täütama pemaã nüxü chixu na texé choxü muxü na chanaxüxü i ngëma choxna naxcëx peçaxü —ñanagürü.

Ore ga taxre ga nanegügu ixuxü

²⁸ Rü ñanagürü ta ga Ngechuchu —¿Ñuxü ñapegüxü naxcëx i ñaã ore i tá pemaã nüxü chixuxü? Rü wüxi ga yatü rü nüxü nayexma ga taxre ga nane. Rü wüxi ga guma nanemaã nüxü nixu rü ñanagürü nüxü:

“Pa Chaunex, chanaxwëxe i yéa chorü ubaarü buxgüwa cuyapuracü”, ñanagürü. ²⁹ —Rü guma nane nanangäxü rü ñanagürü:

“Choxü nawëxtümüü na ngëma chaxüxü”, ñanagürü. Natürü ga yixca-maxüra rü nagu narüxînü rü düxwa yéma nayapuracü. ³⁰ —Rü yixcüra ga guma nanatü rü naí ga nanexütawa naxü, rü yexgumarüü ta nüxü yema ñanagürü. Rü guma nane nanangäxü rü ñanagürü:

“Marü name, Pa Pa, rü ngëma tá chaxü”, ñanagürü. Natürü tama aixcüma yéma naxü. ³¹ —Rü ñuxma chanaxwëxe i chomaã nüxü pixu rü ngexcürüücü ga guma taxre ga nane ga aixcüma naxücü ga yema nanatü naxwëxexü —ñanagürü. Rü nümagü nanangäxügü rü ñanagürügü: —Ga guma nüxîra namuäcü nixî ga naga ínücü —ñanagürügü. Rü yexguma ga Ngechuchu rü ñanagürü nüxü: —Aixcüma pemaã nüxü chixu rü ngëma yatügü i Dumaärü äëxgacücëx diëru ngîxü dexü rü ngëma ngexügü i chixri maxëxü tá nixî i pexüpa nüxîra ichocuxü i ngextá Tupana äëxgacü íixüxüwa. ³² —Yerü Cuáü ga baiüxëeruü rü núma naxü na pemaã nüxü yaxuxüçëx na ñuxäcü tá na pemaxëxü, natürü ga pema rü tama nüxü peyaxögü. Natürü ga yema yatügü ga Dumaärü äëxgacücëx diëru ngîxü dexü rü yema ngexügü ga chixri maxëxü

rü Cuáñãxũ nayaxõgũ. Natürü ga pema rü woo nüxũ na pedaugũxũ ga ñuxácũ na yaxõgũãxũ, rü tama nüxũ perüxoechaũ i pecũma i chixexũ na peyaxõgũxcèx –ñanagürü.

Ore ga chixexũ ga puracũtanũxũgu ixuxũ
(Mr 12.1-12; Lc 20.9-19)

³³ Rũ ñanagürü ta ga Ngechuchu: –Rũ chanaxwèxe i iperüxĩnũe i ñãã to i ore i cuèxruũ i tá pemaã nüxũ chixuxũ. Rũ nayexma ga wũxi ga yatũ ga nüxũ nayexmacũ ga wũxi ga norũ naãne. Rũ yexma nanato ga muxũma ga orix ga uba. Rũ ñuxũchi ñanapoxegu, rü nanaxũ ga wũxi ga ubaarũ yaxutũũxũchica rü wũxi ga dauxtũtaechica. Rũ ñuxũchi ñuxre ga puracũtanũxũna nüxũ nadauxèe. Rũ namaã nanamexèe na ngãxũgu namaã ngĩxũ yatoyexũcèx ga yema ubatanũ. Rũ ñuxũchi ga yema naãneärü yora rü wũxi ga to ga nachĩũãne ga yaxũguxũwa naxũ. ³⁴ –Rũ yexguma norũ ubaarũ buxgũwa nanguxgu, rü yema naãneärü yora rü yema nanamugũ ga ñuxre ga norũ duũxũgũ na yema puracũtanũxũna ngĩxcèx yaxaxũcèx ga yema ubatanũ ga nüxna uçũ. ³⁵ Natürü ga yema puracũtanũxũgũ rü ñanayauxũ ga yema coriarũ duũxũgũ. Rũ naãnaaixgũ ga wũxi, rü ga to rü nayamèxũchigũ, rü ga yema to rü nutamaã ñanamuxũchigũ. ³⁶ –Rũ yema naãneärü yora rü wenaxãrũ noxriarũ yexera rümumaèxũ ga norũ duũxũgũ yema namugũ. Natürü ga yema puracũtanũxũgũ rü yema togürũũtama chixri namaã nachopetũ. ³⁷ –Rũ düxwa ga yema naãneärü yora rü yema nanexũchixũ namu yerũ nüma nagu naxĩnũgu rü chi nanega naxĩnũe ga yema puracũtanũxũgũ. ³⁸ –Natürü yexguma yema cori nanexũ nadaugũgu ga yema puracũtanũxũgũ, rü nügũmaã ñanagürügũ:

“Ngẽmaärü tá nixĩ i ñãã naãne i yixcama. ¡Rũ ngĩxã tayamèxgũ na tóxrũ yĩxũcèx!” ñanagürügũ. ³⁹ –Rũ nayayauxgũ, rü toxnamana nanagagũ, rü yexma nayamèxgũ –ñanagürü. ⁴⁰ Rũ yexguma ga Ngechuchu rü yema paigũarũ ãexgacũgũna naca rü ñanagürü: –¡Rũ ngẽxguma ñanguxgu i ngẽma naãneärü yora, rü tacũ tá yema puracũtanũxũmaã naxũ? –ñanagürü. ⁴¹ Rũ yema ãexgacũgũ rü Ngechuchuxũ nangãxũgũ, rü ñanagürügũ: –Ngẽma naãneärü yora rü tama nüxũ nangechaũtũmũũãcũma tá nanadai i ngẽma puracũtanũxũgũ i chixri maxèxũ. Rũ ñuxũchi togũ i puracũtanũxũgũ i meã namaã ngĩxũ itoyexũ i dẽruna tá nüxũ nadauxèe –ñanagürügũ. ⁴² Rũ Ngechuchu rü ñanagürü nüxũ: –¡Taguma èxna nawa pengũe i Tupanaärü ore i ñmatũxũ? Erũ ngẽmawa rü ñanagürü:

“Rũ yima nuta ya mecũ ya ñãrũ ùruũgũ nüxũ oechirècũ rü ñuxma rü yimatama nixĩ ya Tupana nüxĩra yaxũcuchicũ na namaã inaxũgũãxũcèx ya ñpata. Rũ tórũ Cori ya Tupana nixĩ ga naxũcũ ga yema, rü ñuxma rü namexèchi i taxcèx”, ñanagürü i ngẽma ore. ⁴³ –Rũ ngẽmacèx pemaã nüxũ chixu rü woo pexcèxchirèx na yĩxũ i ngẽma naãne i ngextã Tupana ãexgacũ ñixũũwa, natürü pexna tá nanapu. Rũ togũ i duũxũgũ i aixcũma Tupanaga ñnũxũna tá nanaxã. ⁴⁴ –Rũ yima nuta ega texè namaã yarũñaxgu rü tá itapoũgũ. Rũ yixma tũmaetũgu nanguxe ya yima nuta, rü tá tũxũ ñiñãixmũ –ñanagürü ga Ngechuchu. ⁴⁵ Rũ yexguma ga paigũarũ ãexgacũgũ rü Parichègũ nüxũ ñnũègu ga yema ore ga cuèxruũ ga Ngechuchu namaã nüxũ ixuxũ, rü nüxũ nicuèxãchitanũ ga nachiga na yĩxũ ga yema ore. ⁴⁶ Rũ yexgumatama ga yema ãexgacũgũ rü Ngechuchuxũ niyauxgũega. Natürü tax-

ucürüwama nayayauxgü yerü duñxügüxü namuñē, yerü nümagü ga duñxügü rü nayaxögü ga aixcüma Tupanaärü orearü uruñ na yixü ga Ngechuchu.

22

Ore ga ngigüarü petagu ixuxü

(Lc 14.15-24)

¹ Rü Ngechuchu rü wenaxärü nanangüexē. Rü ore ga cuèxruñgu namaä nayaxu, rü ñanagürü nüxü: ²—Rü ngēma Tupana na äëxgacü ixixü rü ñoma wüxi ga nachüñāneärü äëxgacü ga naneärü ngigü üchiücürüñ nixi. ³—Rü norü duñxügüxü namu na naxcèx yaçaxüçèx ga yema duñxügü ga marü ùpacü nüxna naxuxü. Natürü yema duñxügü ga marü nüxna naxuchiréxü rü tama yéma naxixchañ. ⁴—Rü wenaxärü togü ga norü duñxügüxü yéma namugü. Rü ñanagürü nüxü:

“iNgema pexi naxütawa i ngēma duñxügü i nüxna chaxuchiréxü, rü namaä nüxü peyarüxu rü marü íname i chorü ñna i taxü. Rü marü chanadai i chorü wocagü i ingüexü rü guxüma marü ínamemare. Rü chanaxwèxe i paxa nuä naxi naxcèx i ñaä chorü peta!” ñanagürü. ⁵—Natürü yema duñxügü ga nüxna naxuchiréxü rü tama naga naxinüē. Rü wüxi rü nañnewa naxü, rü ga to rü norü taxepatañwa naxü. ⁶—Rü ga togü rü yema äëxgacüarü duñxügüxü ñayauxü rü nayacuaixgü ñuxmata nayueñē. ⁷—Rü yexguma ga guma äëxgacü rü poraäcü nanu. Rü norü churaragüxü yéma namugü na yadaiañcèx ga yema duñxügü ga máëtagüxü, rü na yagugüäñcèx ga guma norü ñāne. ⁸—Rü ñuxüchi ñanagürü nüxü ga norü duñxügü:

“Guxüma i chorü peta rü marü ínamemare. Natürü ga yema duñxügü ga nüxna chaxuchiréxü rü woetama nüxü chaxo na nuä naxixüçèx. ⁹—iRü yéa taxü i ítamüwa pexi, rü nüxna peyaxu i guxü i duñxügü i ngema nüxü pedauxü, na núma chorü petawa naxixüçèx!” ñanagürü. ¹⁰—Rü yema äëxgacüarü duñxügü rü yéma ítamüwa naxi. Rü nüxna nixuetanü ga guxüma ga duñxügü ga mexügü rü chixexügü ga nüxü iyangaugüxü. Rü yemaäcü duñxügümaä nanapa ga guma äëxgacüpata. ¹¹—Rü yexguma ga guma äëxgacü rü nixücu nawa ga yema ucapu ga nawa peta naxüñ, yerü ñayadau ga yema duñxügü ga nüxna naxuxü. Natürü yéma nüxü nadau ga wüxi ga yatü ga tama norü ngèxäëchirugu icüxü. ¹²—Rü ñanagürü nüxü:

“Pa Chomücüx ¿ñuxäcü i nuxä cuxücuxü na tama curü ngèxäëchirugu quicüxü?” ñanagürü. Natürü nüma ga yema yatü rü nangeëxmare. ¹³—Rü yexguma ga guma äëxgacü rü ñanagürü nüxü ga yema norü duñxügü:

“iMeä peyanëxpara rü peyanëxchacüügü i ñaä yatü, rü yéma düxëtüwa i poraäcü ñaxëñexüwa peyatá! Rü ngema tá narüdoxü rü tá nixüchapäta erü poraäcü tá nüxü nangux”, ñanagürü. ¹⁴—Rü Tupana rü muxüchiena naxu, natürü noxretama tixi ya yixéma aixcüma Tupana tüxü ndexe —ñanagürü ga Ngechuchu.

Dñeru i äëxgacüna ngxüñ ixäcüchiga

(Mr 12.13-17; Lc 20.20-26)

¹⁵ Rü yexguma ga Parichégü rü nixigachi. Rü noxrüwama nügümaä nayamexëgü na tacü rü oremaä tá Ngechuchuna nacagüexüçèx na chixexüga nanguxëgüäñcèx rü ñuxüchi äëxgacüñtawa na ñaxuaxügüäñcèx.

¹⁶ Rü yemacèx Ngechuchuxütawa nanamugü ga ñuxre ga norü duñxügü namaä ga ñuxre ga Erodearü duñxügü na yema oremaä Ngechuchuna na yacagüexüçèx. Rü yexguma Ngechuchuxütawa nangugü rü ñanagürügü:

—Pa Ngúexēeruũx, nüxũ tacuèx rü aixcüma nixĩ i ngēma nüxũ quixuxũ i curü ore. Rü aixcüma cunangúexēē i duũxũgü na Tupana naxwèxexũäcüma namaxèxüçèx. Rü tama duũxũgügamare cuxĩnũ, erü tama norü düxétüxũñegu cudawenü, natürü nacüma nixĩ i cungugüxũ. ¹⁷ —jRü tomaã nüxũ ixu! rü ngēma diēru ya äëxgacü ya tacü ya Dumacũäx totanüwa yayauxchaũxũ, ¿rü namexũ yĩxũ na nüxna ngĩxũ taxãxũ rü éxna tama? —ñanagürügü. ¹⁸ Natürü Ngechuchu nüxũ nacüèxama na chixexũgu naxĩnüèxũ ga yema duũxũgü, rü yemacèx ñanagürü nüxũ: —Pema nixĩ i togüpèxewa meã pemaxēnetaxũ, natürü peãewa rü chixexũgu perüxĩnüè. ¿Rü tüxcüũ i chixexũgu choxũ penguxēèchaũxũ? ¹⁹ —jChoxũ ngĩxũ pewé i wüxi i diēru i ngĩmaã äëxgacüaxũ penaxütanüçü! —ñanagürü. Rü yéma naxütawa ngĩxũ nangegü ga wüxitachinü ga yema diēru. ²⁰ Rü yexguma Ngechuchu ngĩxũ dèuxgu, rü nüxna naca, rü ñanagürü —¿Rü texéhicünèxã rü texéga nixĩ i ngĩgu üxũ? —ñanagürü. ²¹ Rü nümagü nanangãxũgü, rü ñanagürügü: —Dumacũäx ya äëxgacü ya tacüchicünèxã nixĩ —ñanagürügü. Rü yexguma ga Ngechuchu rü ñanagürü nüxũ: —jÄëxgacüna ngĩxũ pexã i ngēma äëxgacüarü ixĩçü, rü Tupanana ngĩxũ pexã i ngēma Tupanaärü ixĩçü! —ñanagürü. ²² Rü yexguma yema orexũ naxĩnüègu, rü nabèixãchiãègü. Rü Ngechuchuna ínixĩ.

Ngechuchuna nacagüe rü ngoxi yuwa ínadagü i duũxũgü

(Mr 12.18-27; Lc 20.27-40)

²³ Rü yematama ngunexũgu rü ñuxre ga Chaduchéugü rü Ngechuchuxütawa naxĩ. Rü nümagü nixĩ ga nagu naxĩnüèxũ na yuexũ rü tagutáma wena namaxèxũ. Rü yemacèx Ngechuchuna nacagüe, rü ñanagürügü: ²⁴ —Pa Ngúexēeruũx, Moíché nüxũ ixuxgu rü ngëxguma wüxi ya yatü naxãmèx rü nangexacüyane nayuxgu, rü name nixĩ i naēneētama ngĩmaã naxãmèx i ngēma yutecü i naxümmèx, na ngēmaãçü naxãxãçüxüçèx nüxũ ya yima naēneè ya marü yucü —ñanagürü ga yema ore. ²⁵ Rü ñanagürügü ta ga Chaduchéugü: —Nayexma ga totanüwa ga 7 ga nügueneè. Rü naxãmèx ga guma yacü, natürü tauta naxãxãçüyane nayu. Rü yexguma ga naĩ ga naēneè nüxĩ ngĩmaã naxãmèx ga yema ngeçü. ²⁶ —Rü guma rü ta nayu, rü nangexacü. Rü yexguma rü naĩ ga naēneè nüxĩ ngĩmaã naxãmèx. Rü yemaãçü gucüma ga guma 7 ga nügueneè rü ngĩmaã naxãmèx ga yema nge. Rü gucüma nayue tauta naxãxãçüyane. ²⁷ —Rü yemawena rü ngĩma rü ta iyu ga yema nge. ²⁸ —Rü ngëxguma yuexũ wena maxègu, ¿rü ngexçürüçüçü ga guma 7 ga nügueneè naxmèx tá iyixĩ i ngēma nge? Yerü gucüma ga guma 7 ga nügueneè ngĩmaã naxãmèx —ñanagürügü. ²⁹ Rü yexguma ga Ngechuchu rü nanangãxũ, rü ñanagürü: —Pema rü ípetüe erü tama nüxũ pecuèx i Tupanaärü ore i ümatüxũ, rü tama nüxũ pecuèx i ñuxãçü na yĩxũ i Tupanaärü pora. ³⁰ —Rü ngëxguma yuexũ wena maxègu rü taxüetáma tixãmèxgü rü éxna tixãtegü. Erü daxüçüäx i Tupanaärü orearü ngeruügürüũ tá tixĩgü i ngëxguma. ³¹ —Pema choxna peca i yuexũärü dagüçhiga. ¿Natürü tama éxna nawa pengüe i Tupanaärü ore i ümatüxũ i ngextá Tupanatama ngēmachigaxũ pemaã íyaxuxüwa? Erü ngema rü ñanagürü ya Tupana:

³² “Choma nixĩ i Abrãtãrü Tupana, rü Ichaárü Tupana, rü Acobuarü Tupana”,

ñanagürü. Rü ngēma orewa nüxũ tacuèx rü woo ñoma i nañewa nayuegu i duũxũgü, natürü Tupanaärü ínüwa rü guxũguma namaxè —ñanagürü ga Ngechuchu. ³³ Rü yexguma yemaxũ naxĩnüègu ga duũxũgü, rü guxüma nabèixãchiãègü namaã ga norü nguxèētae ga Ngechuchu.

*Ngëma Tupanaärü mu i guxü i norü mugüarü yexera ixixü
(Mr 12.28-34)*

³⁴ Rü nangutaguëxegü ga Parichéugü ga yexguma nüxü naxinüëgu ga ñuxäcü Ngechuchu rü yema Chaduchéugüxü na iyanangeëxgüxëëxü. ³⁵ Rü wüxi ga yema Parichéugü ga ore ga mugüwa nguxëëtaexü rü Ngechuchxü chixexügu nanguxëëchaü. Rü yemacëx Ngechuchuna naca rü ñanagürü: ³⁶ — Pa Ngüexëëruüx, ¿ngëxürüüxü i Tupanaärü mu nixi i guxü i norü mugüarü yexera ixixü? —ñanagürü. ³⁷ Rü Ngechuchu nanangäxü rü ñanagürü: —Ngëma Tupanaärü mu i guxü i norü mugüarü yexera ixixü, rü ñanagürü:

“¡Rü nüxü nangechaü ya Cori ya curü Tupana i guxüne ya curü maxünemaã, rü guxü i cüãemaã, rü guxü i nagu curüxünüxümaã!” ñanagürü. ³⁸ —Rü ngëma nixi i Tupanaärü mu i guxü i norü mugüarü yexera ixixü. Rü ngëma nixi i nüxüraüxü i norü mu ga duüxügüna naxäxü ga Tupana. ³⁹ —Rü ngëma norü taxre i Tupanaärü mu, rü ngëma nüxüraüxü i norü murüütama nixi, rü ñanagürü:

“¡Nüxü nangechaü i cumücü ngëma na cugü cungechaüxürüü!” ñanagürü. ⁴⁰ —Rü ngëma taxre i Tupanaärü mugüwa nixi inaxügüxü i guxüma i Tupanaärü mugü ga Moiché ümatüxü rü nuxcümaüxü ga Tupanaärü orearü uruügü namaã nguxëëtaegüxü —ñanagürü.

*¿Texétaa yixü ya Cristu?
(Mr 12.35-37; Lc 20.41-44)*

⁴¹⁻⁴² Rü yoxni ga Parichéugü rü yema nangutaquëxegü, rü Ngechuchu nüxna naca, rü ñanagürü: —¿Rü ñuxü ñapegüxü i pema nüxü ya Cristu? ¿Rü texétaa yixü? —ñanagürü. Rü nümagü ga Parichéugü rü nanangäxügü rü ñanagürügü: —Cristu rü nuxcümaücü ga äëxgacü ga Dabítaa nixi —ñanagürügü. ⁴³ Rü yexguma ga Ngechuchu rü ñanagürü: —¿Tüxcüü ga Dabí ga norü Corimaã naxuaxü ga Cristu ga yexguma Tupanaäe ga Üünexü Dabíxü idexaxëëgu? Yerü ga Dabí rü ñanagürü:

⁴⁴ “Tupana rü chorü Cori ya Cristuxü ñanagürü: ‘¡Nuã chorü tügü necüwawa rüto ñuxmatáta nüxü charüporamaë i curü uwanügü na cuga naxinüëxücëx!’ ” ⁴⁵ —Natürü ¿ñuxücürüwa i Dabítaa yixü ya Cristu ega nümatama ga Dabí rü norü Corimaã naxuägu? —ñanagürü ga Ngechuchu. ⁴⁶ Rü taxumaãma nanangäxügüéga ga yema Parichéugü, rü bai ga wüxi ga oremaã. Rü yemawena rü guxüma namuüë na tacücëx Ngechuchuna nacagüexü.

23

*Ngechuchu rü duüxügütanüwa ñanaxuaxü ga Parichéugü rü ngüexëëruügü ga Moichéarü mugüwa nguxëëtaegüxü
(Mr 12.38-40; Lc 11.37-54, 20.45-47)*

¹ Rü yemawena ga Ngechuchu rü duüxügüxü rü norü ngüexügüxü ñanagürü: ² —Ngëma ngüexëëruügü i ore i mugüwa nguxëëtaegüxü rü Parichéugü, rü meãma nüxü nacüëxgü ga Tupanaärü ore ga Moiché ümatüxü. ³ —Rü ngëmacëx name i naga pexinüë i guxüma i ngëma pemaã nüxü yaxügüxü. Natürü tama name i nüma namaxëxüäcüma pemaxë, erü nüma nüxü nixügü i mexü i ore natürü chixri namaxë. ⁴ —Erü nüma rü poraäcü pexü namu na naga pexinüëxücëx i norü mugü i guxchaxü i taxucürüwama texé aurexü. Natürü nümagütama rü bai i írarüwa naga na naxinüëxü i ngëma nawa pexü namuxü. ⁵ —Rü guxüma i ngëma naxügüxü, rü nanaxügü na

duñxügü nüxü daugüxcèx. Rü ina-yangegü i Tupanaärü ore na ngēmaäcü duñxügü nagu rüxinüegu rü aixcüma Tupanaärü duñxügü na yigüxü. Rü nügü nangëxäegü na duñxügü nüxü rüdaunüxcèx. ⁶—Rü petagüarü ònawa rü nümagü i Parichéugü rü nanaxwèxegü i ònaärü yoraxütawaxüchi na natogüxü na duñxügü ngema nüxü rüdaunüxcèx. Rü ngutaquëxepataügüwa rü nanaxwèxegü na napëxewaxüchi ügüxü i naxmëxwèxegüwa natogüxü. ⁷—Rü ìâneärü ítamügüwa rü nanaxwèxegü na duñxügü meä nüxü rümoxëgüxü ñoma äëxgacüxü meä rümoxëxürüü. Rü nanaxwèxegü na duñxügü rü: “Pa Ngüxëëruüx” ñagüxü nüxü. ⁸—Natürü pema rü täütäma ngëmagu perüxinüë! Erü guxäma i pema rü pegüeneëgü pixigü, rü wüxixicatama nixi ya perü ngüxëëruü ixicü. ⁹—Rü tama name i ñoma i naänecüäxmaä pëxänatü, erü wüxixicatama nixi ya Penatü, rü nüma rü daxüwa nangëxma. ¹⁰—Rü tama name i texé: “Pa Äëxgacüx” ñatarügü pexü. Erü chaxicatama nixi i perü äëxgacü chiixü. ¹¹—Rü yixema petanüwa guxäärü yexera ixixë rü tanaxwèxe na guxüma i tümamüciarü ngüxëëruü tiixü. ¹²—Erü yixema tügü írütaxe rü Tupana tá tüxü naxänexëë. Naturü yixema tügü íruxírxaxe, rü Tupana tá tüxü nicüexüü. ¹³—Pa Ngüxëëruügü i Ore i Mugüwa Ngüxëëtaegüxü rü Pa Parichéugüx, pema nixi i togü i duñxügüpëxewa meä pemaxënetaxü naturü peäëwa rü chixexügu perüxinüëxü. Rü wüxi i ngechaü nixi i pexcèx erü pegagu nixi na tama Tupanaxütawa nangugüxü i togü i duñxügü. Rü pema rü ta rü täütäma ngëxma pechocu, Rü ngëxgumarüü ta rü nüxü pe-naguxchaxëë na tama ngëxma nachocuxüxcèx i togü i ngëxma chocuchaüxü. ¹⁴—Pa Ngüxëëruügü i Ore i Mugüwa Ngüxëëtaegüxü rü Pa Parichéugüx, pema nixi i togü i duñxügüpëxewa meä pemaxënetaxü naturü peäëwa rü chixexügu perüxinüëxü. Rü wüxi i ngechaü nixi i pexcèx erü tüxna penapuxü ya tümapata ya yixema yutegüxe. Rü ñuxüchi penamëxëë i perü yumüxëgü na duñxügü nagu rüxinüegu rü aixcüma mexü i Tupanaärü duñxügü na pixigüxü. Rü ngëmacèx pema tá nixi i togü i duñxügüarü yexera pepoxcuexü. ¹⁵—Pa Ngüxëëruügü i Ore i Mugüwa Ngüxëëtaegüxü rü Pa Parichéugüx, pema nixi i togü i duñxügüpëxewa meä pemaxënetaxü naturü peäëwa rü chixexügu perüxinüëxü. Rü wüxi i ngechaü nixi i pexcèx erü guxüwama pexi na togü i duñxügümaä nüxü peyarüxuxüxcèx i ore na wüxitama ya duñxë pexrüü na yaxõxüxcèx. Rü ngëxguma marü pexü tanguüxgu, rü tüxü pechixexëë na düxwa taxreëxpüxcüna perü yexera chixexüwa tangëxmaxüxcèx. ¹⁶—Pa Ngüxëëruügü i Ore i Mugüwa Ngüxëëtaegüxü rü Pa Parichéugüx, pema rü ñoma cuëxruügü i ngetetüxürüü pixigü. Rü wüxi i ngechaü nixi i pexcèx, erü nüxü pixuxgu rü:

“Ngëxguma texé ya tupauca ya taxüneegagu tacüxcèx ixunetagu, rü marü name ega tama tayanguxëëgu i ngëma tümaärü uneta”, ñaperügügü. Naturü ngëxguma texé tupauca ya taxüneärü dïëruëgagu tacüxcèx ixunetagu, rü:

“Tanaxwèxe i aixcüma tayanguxëë i ngëma tümaärü uneta”, ñaperügügü. ¹⁷—Pema rü pengëäëgü rü ñoma pengëxetügüxürüü pixigü. ¿Pexcèx rü tacü nixi i yexera rümemaëxü, tupauca ya taxüneärü dïëru rü éxna nümatama ya tupauca ya nagagu naxüünene i ngëma dïëru? ¹⁸—Rü tupauca ya taxünewa nangëxma i ngëma ämarechica i ngexta Tupanacügü inadaiaixüwa i naxünagü na Tupanana naxämarexëcèx. Rü pema rü ñaperügügü:

“Rü ngëxguma texé ya tupauca ya taxüneärü ämarechicagü tacüxcèx ixunetagu, rü marü name ega tama tayanguxëëgu i ngëma tümaärü uneta. Naturü ngëxguma texé tupauca ya taxüneärü ämarechicawa ngëxmaxü i

ãmareégagu ñacücèx ixunetagu, rü tanaxwèxe i aixcüma tayanguxèê i ngéma tümaärü uneta”, ñaperügügü. ¹⁹ —Pema rü pengèäägü rü ñoma pengexetügüxürüü pixigü. ¿Pexcèx rü ñacü nixi i yexera rümemaèxü, rü yima tupauca ya taxüneaärü ãmarechicawa ngèxmaxü i ãmare rü èxna nümatama ya tupauca ya taxüneaärü ãmarechica i nagagu naxüünexü i ngéma ãmare? ²⁰ —Erü yixema tupauca ya taxüneaärü ãmarechicéagagu ñacücèx ixunetaxe, rü tama ngéma nachicacéagaguxicatama itaxuneta, natürü ngéma ãmare i ngéma nachicawa ngèxmaxüégagu rü ta itaxuneta. ²¹ —Rü yixema tupauca ya taxüneegagu ñacücèx ixunetaxe, rü tama ngéma tupaucaéagaguxicatama itaxuneta, natürü Tupana ya ngéma maxücüégagu rü ta itaxuneta. ²² Rü yixema daxügüxü i naäneegagu ñacücèx ixunetaxe, rü Tupanaärü toruüégagu rü ta itaxuneta, rü ngèxgumarüü ta Tupana ya ngema rütocüégagu rü ta itaxuneta. ²³ —Pa Ngüxèèruügü i Ore i Mugüwa Ngüxèètaegüxü rü Pa Parichéugüx, pema nixi i togü i duüxügüpèxewa meã pemaxènetaxü, natürü peãewa rü chixexügu perüxüñüèxü. Rü wüxi i ngechaü nixi i pexcèx, erü woo ñacü i íraxü i pexü ngèxmaxü rü Tupanana penaxã i ngéma nüxna üxü. Natürü tama naga pexüñüè i Tupanaärü mugü i guxü i mugüarü yexera ixixü. Erü pexü nataxu na àèxgacügü i aixcüma meãma duüxügümaã icuèxgüxü na pixigüxü, rü pexü nataxu na duüxügü pexü nangechaütümüügüxü, rü aixcüma meã Tupanamaã pixaixcümagüxü. Rü guxüma i ngéma nixi i Tupana naxwèxexü na penaxüxü, tama nüxü ipeyarüngümaèäcüma i ngéma mexü i marü pexüxü. ²⁴ —Pa Cuèxruügü i Ngexetügüxü, pema rü guxüma i mugü i woo íraxüchixü rü meãma penaxaure, natürü tama Tupana naxwèxexüäcüma pemaxè. Pema rü ñoma wüxi i duüxü i tunüèx norü axexü bapetüxü rü ñuxüchi arü wüxi i cameyu ixaxwetaüxürüü pixigü. ²⁵ —Pa Ngüxèèruügü i Ore i Mugüwa Ngüxèètaegüxü rü Pa Parichéugüx, pema nixi i togü i duüxügüpèxewa meã pemaxènetaxü natürü peãewa rü chixexügu perüxüñüèxü. Rü wüxi i ngechaü nixi i pexcèx, erü perü düxétüxüñewaxicatama pegü pemexèèchaü, natürü perü maxüwa rü poraäcü pichixe. Erü penawomüxèèäcüma poraäcü naxcèx pengüx i duüxügüarü ngèmaxügü, rü pegüguxicatama perüxüñüè. ²⁶ —Pa Parichéugü i Ñoma Ngexetüxürüü Ixigüxü, name nixi i pegü pimexèè i perü aixepewa i perü maxüwa. Rü ngèxguma tá nixi i perü düxétüwa rü tá ta pimexü. ²⁷⁻²⁸ —Pa Ngüxèèruügü i Ore i Mugüwa Ngüxèètaegüxü rü Pa Parichéugüx, pema nixi i togü i duüxügüpèxewa meã pemaxènetaxü natürü peãewa rü chixexügu perüxüñüèxü. Rü wüxi i ngechaü nixi i pexcèx, erü ñoma yuetachiquèxegü i düxétüwa cómuxümaã chauxetügüxü natürü aixepewa rü yuetachinaxãmaã rü nagüxüraüxü i äüächixümaã napagüxürüü pixigü. Erü perü düxétüwa i duüxügü nüxü ídaugüxüwaxicatama pime, natürü aixepewa i peãewa rü poraäcü pichixe. ²⁹ —Rü wüxi i ngechaü nixi i pexcèx, Pa Ngüxèèruügü i Ore i Mugüwa Ngüxèètaegüxü rü Pa Parichéugüx. Pema rü peyamecagü ga naxchiquèxegü ga nuxcümaügüxü ga Tupanaärü orearü uruügü rü yema duüxügü ga imexü ga yuexü. ³⁰ —Rü ñuxüchi ñaperügügü:

“Rü yexguma chi nuxcümaügüxü ga tóru oxigü maxèyane imaxègu, rü tãu chima nüxü tarüngüxèè ga na nadaiäxü ga yema nuxcümaügüxü ga Tupanaärü orearü uruügü”, ñaperügügü. ³¹ —Rü ngéma oremaã rü pegü pengoxèè na nataagü pixigüxü ga yema duüxügü ga nuxcümaügüxü ga Tupanaärü orearü uruügüxü deüxü. ³² —Ícü, noxtacüma chomaã rü ta peyanguxèèx ga yema chixexü ga nuxcümaügüxü ga perü oxigü ügüexü!
³³ —Pa Áxtapearü Duüxügüx, pema rü poraäcü pichixe. ¿Ñuxäcü tá nax-

chaxwa pibuxmü ya yima üxü ya Tupana tá namaã pexü poxcuene? ³⁴ — Rü ngëmacëx i choma rü tá pexcëx núma chanamugü i Tupanaärü orearü uruüügü, rü yatüügü i mexüügü i nüxü cuëxüchigüxü, rü ngüexëëruüügü i mexüügü. Natürü pema rü tá curuchawa peyapotaguãcúma penadai i ñuxre. Rü togü rü ngutaquëxepataüügüwa rü tá peyaçuaixgü, rü togü rü ñanechigüwa rü tá nawe pingëxütanü na chixexü namaã pexüügüxüçëx. ³⁵ —Natürü Tupana tá pexü napoxcúe naxcëx i guxüma ga norü duüxüügü ga imexüügü ga perü oxigü deüxü. Rü Abéwa nixi ga inaxüügüãxü ga na nadaiãxü rü Chacaría ga tupauca ga taxünegu peyamëxgücügu nixi ga yacuáxü ga yema. ³⁶ —Rü aixcúma pemaã nüxü chixu rü guxüma ga yema chixexüçëx rü Tupana tá nanapoxcúe i duüxüügü i ñomaücüü maxëxü —ñanagürü ga Ngechuchu.

Ngechuchu rü Yerucharéüçüãx ga duüxüügüçëx naxaxu
(Lc 13.34-35)

³⁷ Rü ñanagürü ta ga Ngechuchu: —Pa Yerucharéüçüãx, pema penadai i Tupanaärü orearü uruüügü, rü nutamaã ípenamuxüchigü i Tupanaärü orearü ngeruüügü i pexcëx núma namugüxü. Rü ñuxreëxpüxcúna wüxigu chaugüxütagu pexü chanutaquëxexëëchaü ñoma wüxi i ota i naxäcüxã nügütüügü tüxü nutaquëxexürü. Natürü pema rü tama penaxwëxe. ³⁸ —Dücëx i ñuxma ya perü ñane, rü Tupana tá ínanatëx. ³⁹ —Rü pemaã nüxü chixu rü täütama wena choxü pedau ñuxmatáta daxüguü i nañewa ne chaxü. Rü ngëxuma rü tá choxü pedaugü rü tá ñaperüügü:

“Namexëchi nixi ya yima Cori ya Tupana núma namücü”, ñaperüügü tá —ñanagürü ga Ngechuchu.

24

Ngechuchu nanaxunagü na tupauca ga taxüne rü tá nagu na napogüexü
(Mr 13.1-2; Lc 21.5-6)

¹ Rü yexguma tupauca ga taxünewa ínaxüüxgu ga Ngechuchu, rü norü ngüexüügü naxcëx naxi. Rü ñanagürüügü nüxü: —Dücëx, Pa Corix, ñuxäcü nimexëchi ya daa tupauca ya taxüneärü ípatagü —ñanagürüügü. ² Natürü Ngechuchu nanangãxü rü ñanagürü: —Pema nüxü pedaugü ya guxüñema ya yima tupauca ya taxüneärü ípatagü. Natürü pemaã nüxü chixu rü aixcúma guxüñema ya daa ípatagü rü tá nagu napogüe. Rü naxtapüxarü nutagü rü taxucütáma nügütü naxüxüra, rü bai ya wüxi —ñanagürü.

Cuëxruüügü i tá nüxü idaxü naxüpa na nagüxü i naãne
(Mr 13.3-23; Lc 17.22-24, 21.7-24)

³ Rü ñuxüchi guma Mëxpüne ga Oríbunecügu äeganewa naxi. Rü yexguma guma mëxpünewa natoxgu ga Ngechuchu rü norü ngüexüügüxicatama naxütawa naxi na noxrüwama nüxna nacagüexüçëx. Rü ñanagürüügü: —Tanaxwëxe i tomaã nüxü quixu na ñuxgu tá nangupetüxü i ngëma nüxü quixuxü. ¿Rü tacü tá nixi i norü cuëxruü i nawa nüxü tacuáxü i ñuxgu tá wena núma na cuzüxü rü tá na nagüxü i naãne? —ñanagürüügü. ⁴ Rü yexguma ga Ngechuchu rü ñanagürü nüxü: —¡Pexuãëgü na taxüema pexü womüxëxüçëx! ⁵ —Erü muxüchixü i duüxüügü tá ínangugü, rü chaugu tá nügü nicüxgü rü tá ñanagürüügü:

“Choma nixi i Cristu”, ñanagürüügü tá. Rü muxüchixü i duüxüügüxü tá nawomüxëë. ⁶ —Rü tá nüxü pexüñüëchiga na nügü nadëxüxü i ñuxre i nachiüãnegü rü nügü na nadaixchaüxü i togü i nachiüãnegü. ¡Natürü täütama ngëmacëx

pebèixächiaëgü! Erü woetama ngēmaācü tátama nangupetü i noxrix. Natürü täütáma naāneärü gux nixí i ngēma. ⁷—Erü wüxi i nachiuāne rü to i nachiuānemaā tá nügü nadai. Rü wüxi i äëxgacü rü to i äëxgacümaā tá nanu, rü norü churaragü rü ngēma to i äëxgacüarü churaragümaā tá nügü nadai. Rü tá taiya nangux, rü tá nataxüchi i daaweanegü, rü muxüma i nachicawa rü tá naxiāxächiane. ⁸—Rü guxüma i ngēma pemaā nüxü chixuxü, rü ngēma nixí i norü ügümare i ngēma ngüxü i tá ngupetüxü. ⁹—Rü ngëxguma i togü i duüxügü rü tá pexü ínayauxü na chixexü pemaā naxügüxüçèx. Rü tá pexü nadai. Rü guxü i naānewa i duüxügü rü tá pexchi naxaie, erü chorü duüxügü pixigü. ¹⁰—Rü ngëxguma rü tá muxüchixü i chorü duüxügü ínanatëxgü i chorü ore, rü nügütanüwa rü tá nügüchi naxaie. Rü nügüechita tá äëxgacüxütawa nügü ínayauxüxügü. ¹¹—Rü muxüchixü i orearü uruügüneta tá ínangügü. Rü tá nüxü nixügügü na Tupana yixü ya núma namugücü na nüxü yaxugüxüçèx i ore. Rü ngēmaācü tá muxüchixü i duüxügüxü nawomüxëëgü. ¹²—Rü poraācü tá nangëxma i chixexü, rü ngëmagagu rü muxüchixütáma i duüxügü rü täütáma nügü nangechaügü. ¹³—Naturü yixema naetüwa meā Tupanaāxü yaxöómáxë rü yixema tá tixí ya aixcüma nayaxúxe i maxü i taguma gúxü. ¹⁴—Rü ngēma Tupanaärü ore i mexü rü guxü i naānewa tá nüxü nixügügü na guxü i duüxügü nüxü na cuëxgüxüçèx. Rü ngēmawena tá nixí i nagüxü i naāne. ¹⁵—Rü nuxcümaücü ga Tupanaärü orearü urü ga Danié nachiga nanaxümatü i ngēma chixexü i Tupanapëxewa äüächixü i ínguxcháxü. Rü ngëxguma nüxü pedëuxgu na tupauca ya taxünewa nangóxü i ngēma chixexü i Tupanapëxewa chixexüchixü, rü name nixí i pexuäëgü. ¹⁶—Rü ngëxguma ngēma üpetügu, rü ngēma Yudeaanewa ngëxmagüxü i duüxügü rü nanaxwëxe na mëxpüneānewa nabuxmüxü. ¹⁷—Rü ngēma ngunexügu ega texé tümapataëtüwa ngëxmagu, rü tama name i tümapatagu tayangaxi na tümaärü ngëmaxü tayayaxüçèx. ¹⁸—Rü texé ya tümaānewa ngëxmaxë rü tama name i tümapataçèx tataegu na tümachirugü tayayaxüçèx. ¹⁹—Rü ngēma ngunexügügu rü wüxi i ngechaü tá nixí i tümacèx ya yixema ngeäxtagü ya tacharaügüxe rü yixema imaixäcügüxe. ²⁰—Rü Tupanana naxçèx peça i perü yumüxëwa na tama gáuane íxüyane rü ëxna ngüchigaarü ngunexügüyane pexü na nangupetüxüçèx i ngēma chixexü! ²¹—Erü ngēma ngunexügügu rü poraācü tá nangëxma i ngüxü ga noxri naāne íxügügumama taguma yexmaxü, rü ngēmawena rü tagutáma wena nangëxma. ²²—Rü ngëxguma Tupana tama nanoxrexëëgu i ngēma ngunexügü, rü taxúetáma tamaxü. Naturü Tupana tá nananoxrexëë i ngēma ngunexügü tümacèx ya yixema núma tüxü nadexe. ²³—Rü ngëxguma texé pexü ñagügu:

“Düçèx, daa nixí ya Cristu” ñagügu, rü ëxna:

“Gua nixí ya Cristu” ñagügu, jrü tama name i nüxü peyaxögü! ²⁴—Erü Cristügüneta rü Tupanaärü orearü uruügüneta tá ínangügü. Rü tá nanaxügü i muxüma i cuëxruügü i taxügü na ngēmaācü, ega nüxü natauxchagu, na tüxü nawomüxëëgüxüçèx ëjrxüxe ya yixema duüxëgü ya Tupanatama tüxü dexë. ²⁵—Düçèx, naxüpa na nangupetüxü i guxüma i ngēma ngüxü, rü marü pemaā nüxü chixu i nachiga. ²⁶—Rü ngëmacèx i ngëxguma duüxügü ñagügu pexü:

“Düçèx, yéa taxúema íxäpataxüwa nangëxma ya Cristu”, ñagügu, rü tama name i ngema pexí. Rü ngëxguma ñagügu pexü:

“Düçèx, nuā ucapuwa nangëxma ya Cristu”, ñagügu, rü tama name i nüxü peyaxögü. ²⁷—Erü ñoma wüxi i bëjxbëxane i guxüwama nangóonexëëxürüü

tá nixí i ngëxguma wenaxârü núma chaxûxgu i choma i Tupana Nane na duûxûxü chiixü. ²⁸ Rü duûxûgü rü tá chauxcèx nangutaquëxegü ñoma êchxagü nawemücèx ngutaquëxëxürüü.

*Ñuxâcü tá nixí i ngëxguma nataegugu ya Tupana Nane ya duûxûxü ixïcü
(Mr 13.24-37; Lc 21.25-33, 17.26-30, 34-36)*

²⁹ —Rü nawena i ngëma ngûxûgü rü tá nixo ya üèxcü, rü täütáma inabáxi ya tauemacü. Rü woramacurigü rü êxtagü rü tá narüyi. Rü guxûma i ñoma i naâne rü üèxcü rü tauemacü rü woramacurigü rü êxtagü rü tá naxîâxâchitanü rü tá nu ne nanaxîmare. ³⁰ —Rü ñuxûchi duûxûgü tá nüxü nadaugü na ñuxâcü daxûwa ne chaxûxü. Rü guxü i nachîûânecûâx i duûxûgü rü tá naxauxe. Rü tá choxü nadaugü i ngëxguma caixanexûgü ícharûxîxgu rü núma chaxûxgu. Rü ngëxguma i choma rü âëxgacü ya poraxüchicü rü mexêchicü tá chíxí. ³¹ —Rü tá chanamu i chorü orearü ngeruûgü i daxûcûâx na yacuegüâxúcèx ya norü cornetagü na ngëmaâcü naxîtaquëxexêâxúcèx i guxûma i ngëma duûxûgü i chadexü i guxûwama ngëxmagûxü ñuxmata naâne iyacuâxûwa ngëxmagûxü. ³² —¡perûxînüë i ñaâ ore i cuèxrüü i orîx i iguerachiga, rü naxcèx pengüe! Rü ngëxguma ngexwacaxûxü i nachacüügü iyarüyixgu rü naxûátügu, rü ngëmawa nüxü pecuèx na paxa tá taunecü na yîxü. ³³ —Rü ngëxgumarüü tá nixí i ngëxguma nagûxchaûgu i naâne. Erü ngëxguma nüxü pedëuxgu na nangupetûxü i ngëma pemaâ nüxü chixuxü, rü ngëmawa tá nüxü pecuèx na marü chingaicaxüchixü. ³⁴ —Rü aixcüma pemaâ nüxü chixu rü guxûma i ngëma nüxü chixuxü rü tá nangupetü naxûpa na nayuexü i duûxûgü i ñomaücüü maxêxü. ³⁵ —Rü ñoma i naâne rü ngëma daxûwa nüxü idauxü rü tá nagux. Natürü chorü ore rü tagutáma inayarüxo rü aixcüma tá ngu. ³⁶ —Natürü ngëma ngunexü rü ora i nagu tá nangupetûxü i ngëma pemaâ nüxü chixuxü, rü Chaunatü ya Tupanaxícata ma nüxü nacuèx na ñuxgu tá nangupetûxü i ngëma, rü taxúema ya togue nüxü tacuèx. Rü woo i norü orearü ngeruûgü i daxûcûâx rü tama nüxü nacuèxgü, rü woo i choma i Nane na chíxü rü tama nüxü chacuèx na ñuxgu tá nangupetûxü i ngëma. ³⁷ —Rü yexgumarüü ga duûxûgûxü ngupetûxü ga yexguma Noe maûxgu, rü ngëxgumarüü tá ta nüxü nangupetü i ngëxguma íchanguxgu i choma i Tupana Nane na duûxûxü chiixü. ³⁸ —Rü yexguma, naxûpa ga guma mucü ga taxüchicü ga guxûwama inanguanexêëcü, rü ga duûxûgü rü nachibüe, rü naxaxegü, rü nixâmèxgü rü nixütexacügü ñuxmata nawa nangu ga yema ngunexü ga nagu Noe naweûgu ixüexü. ³⁹ —Rü noxri ga yema duûxûgü rü tama nüxü nacuèxgüéga ga ¡acü tá nüxü na ngupetûxü. Natürü yexguma ínanguxgu ga guma mucü ga taxüchicü ga yema duûxûgûxü daicü, rü yexguma nixí ga nüxü yacuèxâchitanüxü. Rü ngëxgumarüü tá ta nixí i ngëxguma wenaxârü núma chaxûxgu i choma i Tupana Nane na duûxûxü chíxü. ⁴⁰ —Rü ngëma ngunexûgu rü taxre i yatügü rü wüxi i naânëwa tá nügümaâ nangëxmagü. Rü wüxi tá nixí i Tupana ígaxü rü ngëma to rü tá ngëma natèx. ⁴¹ —Rü taxre i ngexûgü tá nügümaâ ínaeaegü. Rü wüxi tá nixí i Tupana ígaxü rü ngëma to rü tá ngëma natèx. ⁴² —¡Rü pexuâëgü! Erü tama nüxü pecuèx i ¡acü rü ora tá íchangu i chomax. ⁴³ —¡Rü nagu perûxînüë i ñaâ ore! Rü ngëxguma chí wüxi i ípataarü yora nüxü cuèxgu na ¡acü rü oragu tá ínanguxü i ngîtèxáxü rü täü chîma nape. Erü nüxna chí nadau ya napata na tama ngëxma naxúcuxúcèx i ngëma ngîtèxáxü na ¡acücèx ngëma yangîxúcèx. ⁴⁴ —Rü ngëmacèx name nixí i pexuâëgü i pemax. Erü ngëma ngunexü i tama

nagu íperüxínüëxügu tá nixí i ngürüächi íchanguxü i choma i Tupana Nane na duüxüxü chíxü.

Wüxi ga duüxü ga meã norü coriga ñüxü rü to ga tama meã norü coriga ñüxüchiga

(Lc 12.41-48)

⁴⁵ —¿Rü texé tíxü ya tümaärü coriarü duüxü ya aixcüma yanguxëxë rü tümaäxü cuáxe? ¿Tama êxna yíxema tíxü ya tümaärü cori tüxna ágaxe na meã nüxna tadauxüçèx rü meã oragu tanachibüexëxüçèx i norü duüxüügü? ⁴⁶ Rü tataãë ya yíxema coriarü duüxë ega ngëxguma ínanguxgu i tümaärü cori rü tüxü íyanguexügu na meãma ítanaxüxü i ngëma puracü i nagu tüxü namuxü. ⁴⁷ —Rü aixcüma pemaã nüxü chixu rü ngëma tümaärü cori rü tá guxüma i norü ngëmaxügüarü dauruüxü tá tüxü nixíxëë. ⁴⁸⁻⁵⁰ —Natürü ngëxguma chi ngëma coriarü duüxü rü wüxi i yatü i chixexü yixügu, rü chi nagu naxíñügu na táütáma paxa ínanguxü i norü cori, rü chi inaxüügüágu na chixri namuãxü i namüçügü i norü coriarü duüxüügü, rü chi ngãxëxütanügu naxãxgu na namaã nachibüxüçèx rü naxaxexüçèx, rü ngürüächi ngëma ngunexü rü ngëma ora i tama nagu ínanguxëëãxügu rü tá ínangu i norü cori. ⁵¹ —Rü poraäçüxüchima tá nanapoxcu i ngëma norü duüxü, ñoma meã maxënetaxü i duüxüügüxü napoxcuexürü. Rü ngëma tá narüdoxü rü nixüxchapüta.

25

Ore ga 10 ga pacügu ixuxü

¹ Rü ñanagürü ga Ngechuchu: —Pemaã tá nüxü chixu i wüxi i ore na nawa nüxü pecuãxüçèx i ñuxäcü tá duüxügüarü äëxgacü na yíxü ya Tupana i ngëxguma naguxgu i naãne. Rü iyexma ga 10 ga pacü ga ngürü daparinamaã ngügarü petawa ícü na yaxümüçügüãxüçèx ga guma yatü ga ingíxchaücü. ² —Rü 5 ga yema pacü rü tama íxuäëgü. Rü yema naí ga 5 ga pacü rü meãma íxuäëgü. ³ —Rü yema tama uäëgücü, rü yexguma ngürü daparina íyangegügu rü tama to ga ngürü queruchinu ta íyangegü. ⁴ —Natürü ga yema uäëgücü rü to ga ngürü queruchinu ta íyangegü. ⁵ —Natürü ga guma yatü ga ingíxchaücü rü tama paxa ínangu. Rü düxwa ga yema pacügu rü ipee yerü iyaxtae. ⁶ —Rü yexguma ngãxüçüüwa nanguxgu, rü yema pacügu nüxü íxíñüë ga wüxi ga naga ga ñaxü:

“Domama nixí ya yima yatü ya ingíxchaücü. ¡Rü íperüdagü, rü ípeyadaugü!” ñaxü. ⁷ —Rü guxcüma ga yema pacügu rü írüdagü, rü iyamexëëgü ga ngürü daparinagü. ⁸ —Rü yexguma ga yema 5 ga pacügu ga tama uäëgücü rü ngígürügügu ngíxü ga yema pacügu ga uäëgücü:

“¡Íraxü i perü queruchinu toxnata pexã, erü torü omügü rü nixogü!” ngígürügügu. ⁹ —Natürü ga yema pacügu ga uäëgücü rü ngíxü ingãxüügü, rü ngígürügügu:

“Taxucürüwa pexna ta taxã, erü ngëxguma chi pexna ta taxãxgu rü tãü chima ningu i toxçèx rü pexçèx. Rü ngëmacèx narümemae nixí i ngextá namaã íntaxegüxüwa pegüxü nawa pexí”, ngígürügügu. ¹⁰ —Natürü yexguma ga yema 5 ga pacügu ga tama uäëgücü ngürü queruchinuwa naxíyane, rü ínangu ga guma yatü ga ingíxchaücü. Rü ga yema pacügu ga uäëgücü rü iyachocu nawa ga guma í ga nawa íyangíxüne. Rü ñüxüchi narüwãxta ga íãx. ¹¹ —Rü yemawena íngügü ga yema pacügu ga tama uäëgücü, rü ngígürügügu:

“¡Pa Corix, toxçèx yawãxna i íãx!” ngígürügügu. ¹² —Natürü nüma ga cori, rü ngíxü nangãxü, rü ñanagürü:

“Pemaã nüxü chixu rü aixcüma tama pexü chacuèx na texégü pixigüxü”, ñanagürü. ¹³ Rü ñuxüchi ñanagürü ga Ngechuchu: —¡Ípexuãégü! Erü tama nüxü pecuèx i tacü rü ngunexü rü tacü rü ora tá íchangu i choma i Tupana Nane na duüxüxü chüxü —ñanagürü.

*Ore ga dïeruğu ixuxü
(Lc 19.11-27)*

¹⁴ Rü ñanagürü ta ga Ngechuchu: —Rü ngëma Tupana na duüxügüarü äëxgacü na ixüxü rü ñoma wüxi ga yatü ga ixüächichaücü ga to ga nachüñanewa na naxüxüçexrü nixü. Rü nüma ga guma yatü rü norü duüxügüçex naca, rü nüxna ngixü naxä ga dïeru na nüxü ngïmaã nanguxüxüçex rü ngïmaã na ínapuracüexüçex. ¹⁵ —Rü wüxi ga yema norü duüxüna ngixü naxä ga 5000 tachinü ga dïeru. Rü yema tona ngixü naxä ga 2000 tachinü ga dïeru. Rü yema tona ngixü naxä ga 1000 tachinü ga dïeru. Rü yemaäcü nanangügü na ñuxäcü tá yema dïerumaã napuracüexü ga wüxichigü ga norü duüxügü rü yemaäcü wüxichigüna ngixü naxä ga yema dïeru. Rü ñuxüchi inaxüächi ga yema cori na to ga nachüñanewa naxüxüçex. ¹⁶ —Rü yema norü duüxü ga 5000 tachinü ga dïeru ngixü yaxuxü, rü ngïmaã napuracü, rü naí ga 5000 tachinü ngïmaã nayaxu. ¹⁷ —Rü yexgumarüxü ta ga yema norü duüxü ga 2000 tachinü ga dïeru ngixü yaxuxü, rü ngïmaã napuracü, rü naí ga 2000 tachinü ngïmaã nayaxu. ¹⁸ —Natürü ga yema norü duüxü ga 1000 tachinü ga dïeru ngixü yaxuxü, rü ngïmaã ínixü. Rü ngixü nixaixmaü, rü yexma ngixü natèx ga yema norü coriarü dïeru. ¹⁹ —Rü nuxcüxürama nataegu ga yema duüxügüarü cori. Rü yexguma ínanguxu rü inanaxü ga norü duüxügümaã na namexëëaxü ga norü dïeruchiga. ²⁰ —Rü nüxïra norü corixütawa naxü ga yema norü duüxü ga 5000 tachinü ga dïeru ngixü yaxuxü. Rü norü corina ngixü naxä ga yema 5000 tachinü. Rü ngïetü ngixü inaxä ga naí ga 5000 tachinü ga ngixü nayaxucü ngïmaã ga yema norü cori nüxna ngixü äcü ga dïeru. Rü ñanagürü norü corixü:

“Dücèx Pa Corix, ñaã iyixü ga yema 5000 tachinü ga dïeru ga choxna ngixü cuxäcü. Marü ngïmaã chapuracü rü ngïmaã cuxü ngixü chayaxu i ñaã naí i 5000 tachinü”, ñanagürü. ²¹ —Rü norü cori rü ñanagürü nüxü:

“Pa Chorü Duüxüx, wüxi i mexëchixü quixü, rü meãma cupuracü. Rü meã nüxna cudau ga yema noxre ga dïeru ga cuxna ngixü chaxäcü, rü meãma ngïmaã cupuracü. Rü ngëmacèx i ñuxma rü tá rümumaëcüna cuxü chadauxëë. ¡Rü ixücu i chopatawa rü ngixä tataãégü!” ñanagürü. ²² —Rü yemawena ínangu ga yema to ga norü duüxü ga 2000 tachinü ga dïeru ngixü yaxuxü. Rü ñanagürü norü corixü:

“Dücèx Pa Corix, ñaã iyixü ga yema 2000 tachinü ga dïeru ga choxna ngixü cuxäcü. Marü ngïmaã chapuracü rü ngïmaã cuxü ngixü chayaxu i naí i 2000 tachinü. Rü ñaã iyixü”, ñanagürü. ²³ —Rü norü cori rü ñanagürü nüxü:

“Pa Chorü Duüxüx, wüxi i mexëchixü quixü, rü meãma cupuracü. Rü meã nüxna cudau ga yema noxre ga dïeru ga cuxna ngixü chaxäcü, rü meãma ngïmaã cupuracü. Rü ngëmacèx i ñuxmax rü tá rümumaëcüna cuxü chadauxëë. ¡Rü ixücu i chopatawa rü ngixä tataãégü!” ñanagürü. ²⁴ —Natürü yexguma norü corixütawa nanguxgu ga yema norü duüxü ga 1000 tachinü ga dïeru ngixü yaxuxü, rü ñanagürü norü corixü:

“Dücèx Pa Corix, choma nüxü chacuèx rü wüxi i yatü i aüxü quixü. Rü cunayaxu i nanetüarü o i ngextá tama ícutoxüwa, rü cunabuxarü oox i nanetü i tama icutoxü. ²⁵ —Rü yemacèx chamuü. Rü waixüümügu ngixü

chixaixmañ rü ngîxñ ichatèx. Natürü ñaã iyixî i ngêma curü dîeru”, ñanagürü.
 26 Rû yexguma ga norü cori rü nanangãxñ rü ñanagürü:

“Pa Chorü Duñxñ, wüxi i chixexñ rü oxñ i chorü duñxñ quixî. Rû cuma meãma nüxñ cucuèx rü ngextá tama íchatoexñwa rü chanayaxu i nanetüarü o, rü chanabuxarü oñ i nanetü i tama ichatoxñ. 27 —Rû yemacèx narümemaë chi nixî ga bancugu choxñ ngîmaã na cunguxñxñ ga chorü dîeru na ngema choxñ ngîxñ yamuxëëgüxñcèx, rü ngêmaãcü mucü ngîxñ na chayaxuxñcèx i ngëxguma íchanguxgu”, ñanagürü. 28 —Rû yexguma ga yema cori rü nanamu ga yema togü ga norü duñxñgü ga yema yexmagüxñ, rü ñanagürü nüxñ:

“¡Nüxna ngîxñ peyaxu i ngêma dîeru, rü ngêma yatü i 10,000 i dîeru nüxñ ngëxmaxña ngîxñ pexã! 29 —Erü yíxema tüxñ nangëmèxcü rü yexera tá tüxna ngîxñ taxã, rü ngêmaãcü tá tüxñ imuxüchi. Natürü yíxema tüxñ natauxcü rü woo ngêma noxre i tüxñ ngëmèxcü rü tá tüxna ngîxñ tayaxu. 30 —¡Rû yéma düxétüwa i poraãcü ínaxëñexñwa peyatá i ñaã chorü duñxñ i taxuwama mexñ! Rû ngema tá narüdoxü rü tá nixñxchapüta”, ñanagürü.

Naãneärü guxgu rü Cristupëxegu tá nangutaquëxegü i guxñ i nachiüñnecüñx i duñxñgü na yadexechiãxñcèx i ngêma mexñgü rü na napoxcueãxñcèx i ngêma chixexñgü

31 Rû ñanagürü ga Ngechuchu: —Rû ngëxguma wenaxärü núma chaxñxgu i choma i Tupana Nane na duñxñxñ chiñx, rü chorü orearü ngeruñgü i daxñcñx rü tá choxñ naxümücügü. Rû ãëxgacü ya tacü tá chixî rü chorü tochica i mexëchixñwa tá charüto. 32 —Rû guxñ i nachiüñnecüñx i duñxñgü rü tá chopëxegu nangutaquëxegü. Rû choma rü tá chayadexechi ñoma wüxi i carneruarü dauruñ i norü carnerugü rü chibugü noxrüwama mugüxñrñüñ. 33 —Rû ngêma choxrü ixñgüxñ rü chorü tügñnecüwawa tá chanangëxmagüxëë. Rû ngêma tama choxrü ixñgüxñ rü chorü toxwecüwawa tá chanangëxmagüxëë. 34 —Rû ngëxguma i choma i tá ãëxgacü ya tacü na chiñxñ rü ñacharügü tá nüxñ i ngêma chorü duñxñgü:

“¡Nuã pexî i pema ya texé ya Chaunatü ya Tupana tüxñ rüngñxëëgüxe, rü penayaxu i ngêma pechica i ngextá núma ãëxgacü íyñxñwa! Yerü Chaunatü rü pexcèx nanamexëë i ngêma pechica ga yexguma tauta naãne naxñxgu.

35 —Rû ngêmaãcü tá pemaã namecüma yerü yexguma chataiyagu rü pema rü choxñ pechibüxëë. Rû yexguma chitawagu rü choxñ pexaxexëë. Rû yexguma tama nüxñ pecuèxgu na texé chiñxñ rü meã choxñ peyaxugü ga pepatawa. 36 —Rû yexguma changexchirugu rü choxñ pexñxchiru. Rû yexguma chidaawegu rü choxñ perüngñxëë. Rû yexguma poxcupatañwa chayexmagu rü choxñ ípeyadau”, ñacharügü tá nüxñ. 37 —Rû ngëxguma i ngêma duñxñgü i chadexñ rü ñanagürügü tá choxñ:

“Pa Corix, ¿ñuxgu ga cuxñ tadauxñ ga na cutaiyaxñ rü cuxñ tachibüxëëxñ? ¿Rû ñuxgu ga cuxñ tadauxñ ga na quitaawaxñ rü cuxñ taxaxëëxñ? 38 —¿Rû ñuxgu ga tochixñwa cunguxñ rü meã cuxñ tayauxgüxñ ga woo tama cuxñ tacuèxgügu? ¿Rû ñuxgu ga cungexchiruxñ rü cuxñ taxñxchirugüxñ? 39 —¿Rû ñuxgu ga cuxñ tadaugñxñ na quidaawexñ rü ëxna poxcupatañwa cuyexmaxñ rü cuxñ ítayadaugñxñ?” ñanagürügü tá choxñ. 40 —Rû choma na ãëxgacü ya tacü na chiñxñ, rü tá chanangãxñ, rü ñacharügü tá:

“Aixcüma pemaã nüxñ chixu rü yexguma nüxñ perüngñxëëgügu i ngêma chorü duñxñ i yexeraãcü ngearü ngemaxñáxñ, rü choxñ nixî ga perüngñxëëgüxñ”, ñacharügü tá nüxñ. 41 Rû ñuxñchi i choma na ãëxgacü ya tacü na chiñxñ, rü ñacharügü tá nüxñ i ngêma tama chorü duñxñgü ixñgüxñ:

“¡Choxna pixĩgachi i pema i perü chixexüçex poxcuexe! ¡Rü ngema pexĩ nawa ya yima üxü ya taguma ixoxüne ya Tupana ímexēne naxçex i ngoxo i Chataná rü norü duñxügü! 42 —Yerü yexguma chataiyagu rü pema rü tama choxü pechibüxēē. Rü yexguma chiřawagu rü tama choxü pexaxēē. 43 —Rü yexguma tama nüxü pecuēxgu na texē chiñxü rü tama meã choxü peyaxugü ga pepatawa. Rü yexguma changexchirugu rü tama choxü pexüchirugü. Rü yexguma chiřaawegu rü poxcupatañwa chayexmagu rü tama choxü ípeyadaugü”, ñacharügü tá nüxü. 44 —Rü ngēxguma i nümagü i tama chorü duñxügü ixĩgüxü, rü ñanagürügü tá choxü:

“Pa Corix, çñuxgu tochixüwa cungu rü tama meã cuxü tayauxgü yerü tama cuxü tacuēxgü? ¿Rü ñuxgu ga cuxü tadaugüxü ga na cutaiyaxü, rü éxna na quiřaawaxü, rü éxna na cungechiruxü, rü éxna quidaawaxü, rü éxna poxcupatañwa na cuyexmaxü, rü tama cuxü tarüngüxēēgüxü?” ñanagürügü tá choxü. 45 —Rü choma na ãēxgacü ya tacü na chiñxü, rü tá chanangāxü, rü ñacharügü tá nüxü:

“Aixcüma pemaã nüxü chixu rü yexguma tama nüxü perüngüxēēgüga wüxi ga duñxü ga yexeraäcü ngearü ngemaxüáxü, rü choxü rü ta tama perüngüxēēgü”, ñacharügü tá nüxü. 46 —Rü ñuxüchi i ngēma duñxügü i tama chorü duñxügü ixĩgüxü rü tá poxcu i taguma güxüwa naxí. Natürü ngēma duñxügü i aixcüma meã chauxçex maxēxü rü tá nanayauxgü i maxü i taguma güxü, —ñanagürü ga Ngechuchu.

26

Yudiugüarü ãēxgacügü naxçex nadaugü na ñuxäcü Ngechuchuxü yayauxgüxü

(Mr 14.1-2; Lc 22.1-2; Cu 11.45-53)

1 Rü yexguma Ngechuchu nüxü rüchaxugü ga yema orexü na yaxuxü, rü ñanagürü norü ngüexügüxü: 2 —Pema nüxü pecuēx rü taxre i ngunexü nataxu na nangōxgüãxüçex i ngēma ñna i Üpetüchigaarü petaçex naxügüxü. Rü ngēxguma tá nixí i choxü yayauxgüxü i chorü uwanügü na curuchawa choxü yapotagüxüçex —ñanagürü. 3 Rü yexgumaäcüü ga paigüarü ãēxgacügü, rü ngüxēēruügü ga ore ga mugüwa ngüxēētaegüxü, rü Yudiugüarü ãēxgacügüerugü rü nangutaquēxegü ga napatawa ga Caipá ga paigüarü ãēxgacü ixĩcü. 4 Rü yéma nügümaã nanamexēēgü na Ngechuchuxü nawomüxēēgüäcüma na yayauxgüãxüçex rü na yamēxgüãxüçex. 5 Natürü nügümaã ñanagürügü: —Taxucürüwama i ñuxma petagu tayayauxgü, erü duñxügü rü tá tamaã nanuē —ñanagürügü.

Wüxi ga nge rü Ngechuchuerugu inaba ga pumara

(Mr 14.3-9; Cu 12.1-8)

6 Rü Ngechuchu rü Betániãwa nayexma napatawa ga Chimáü ga rüchaxüñecümaã naxugüäcü. 7 Rü Ngechuchuçex yéma iyaxü ga wüxi ga ngecü ga yéma nangecü ga wüxiweñ ga pumara ga tatanüxüchixü ga mexēchicü ga butiyamaã ächiñxü. Rü yexguma mechawa ínachibüyane ga Ngechuchu, rü ngíma rü naēruyu inaba ga yema pumara. 8 Rü yexguma yemaxü nadaugüga Ngechuchuarü ngüexügü, rü naäēwa nanguxgü, rü ínanaxügü ga na ñagüxü. —¿Tüxcüü ngēxma ínaxaiyaxü i ngēma pumara? 9 —Rü narümemae chi nixí i tatanüxügu namaã itaxe, rü ñuxüchi ngēma díerumaã nüxü irüngüxēē i ngēma duñxügü i ngearü ngēmaxüãxgüxü —ñanagürügü. 10 Rü Ngechuchu nüxü naxínü. Rü ñuxüchi ñanagürü norü

ngúexúgúxú: —¿Túxcúü ngíxú pechixewe i ngêma nge? Erü ngêma chomaã naxúxú rü wúxi i mexú nixí. ¹¹ —Ngêma ngearü ngêmaxúãxgúxú rü guxúgutáma petanüwa nangêxmagü. Natürü choma rü tãütáma guxúgu petanüwa changêxma. ¹² —Rü ngêma chomaã naxúxú i ñaã ngecü na chaxunegu nabaãxú i ngêma pumara i yixixú, rü ngêmaãcü inaxú erü paxa tá chayü rü tá choxú inatêxgü. Rü ngêmacêx nixí i chaxunegu nabaãxú i ngêma pumara. ¹³ —Rü aixcüma pemaã nüxú chixu rü guxú i nañewa i ngextá duúxúgü nüxú íxugúgúxúwa i Tupanaärü ore i mexú, rü ñaã ngecü chomaã úxú rü tá ta nüxú nixugúgü. Rü ngêmaãcü tá ngíxna nacuéxáchie i duúxúgü —ñanagürü ga Ngechuchu.

Yuda rü ãëxgacügümaã nanamexêê na ñuxãcü Ngechuchuxú yayauxgúxúcêx

(Mr 14.10-11; Lc 22.3-6)

¹⁴ Rü ñuxúchi ga wúxi ga Ngechucharü ngúexú ga Yuda ga Icariúte rü paigüarü ãëxgacügúxúttawa naxú rü namaã nayarüdexa. ¹⁵ Rü Yuda rü ñanagürü nüxú: —¿Ñuxre tá choxú penaxútanüxú i ngêxguma pexú chanataux-chaxêëgu na Ngechuchuxú piyauxgúxúcêx? —ñanagürü. Rü yexguma ga nümagü ga paigüarü ãëxgacügü rü 30 tachinü ga díerugu namaã naxuneta. ¹⁶ Rü yexgumama inanaxúgü ga Yuda ga naxcêx na nadauxú ga ñuxãcü nüxú na natauxchaxêëgüãxú na Ngechuchuxú yayauxgúxúcêx.

Coriarü ðnachiga

(Mr 14.12-25; Lc 22.7-23; Cu 13.21-30; 1 Co 11.23-26)

¹⁷ Rü nawa nangu ga ngunexú ga nagu inaxúgúxú ga yema peta ga pãü ga ngearü puxêëruúãxú nagu nangôxgúxú. Rü norü ngúexúgü rü Ngechuchucêx naxí, rü ñanagürügü nüxú: —¿Ngextá tá tanamexêê i nachica i nawa nangôxgúxú i ðna i Üpetüchigaarü petagu ingôxú? —ñanagürügü. ¹⁸ Rü nüma ga Ngechuchu rü ñanagürü nüxú: —¿Ngema ñanewa pexí, rü yima yatü ya pemaã nüxú chaxunetacüpatawa pexí! ¡Rü namaã nüxú pixu rü ñapegügü:

“Torü ngúexêëruú rü ñanagürü: ‘Marü ningaicaxúchi na chayuxú rü nuã cupatawa rü chorü ngúexúgümaã chanangupetüxêêchaú i Üpetüchigaarü peta’,” ñaperügügü tá nüxú! ¹⁹ Rü yéma naxí ga yema norü ngúexúgü. Rü yema Ngechuchu namaã nüxú ixuxürüü nanaxúgü. Rü nanamexêëgü ga yema ðna ga Üpetüchigaarü petagu tá nangôxgúxú. ²⁰ Rü yexguma nachütagu rü yéma mechawa nachibü ga Ngechuchu namaã ga yema 12 ga norü ngúexúgü.

²¹ Rü yexguma ínachibüeyane, rü Ngechuchu rü ñanagürü nüxú: —Aixcüma pemaã nüxú chixu rü wúxie i petanüwa tá tixí ya bexma chauechita choxú íyaxuaxúxê —ñanagürü. ²² Rü yexguma ga nümagü ga norü ngúexúgü rü poraãcü nangechaügü. Rü wúxichigü nüxna nicachigü, rü ñanagürügü: —Pa Corix, ¿choma êxna tá chíxú ya yíxema cuxú íyaxuaxúxê? —ñanagürügü. ²³ Rü nüma ga Ngechuchu nanangãxú rü ñanagürü: —Ngêma wúxi ya poratuwa namaã tá chachibüxú, rü ngêma tá nixí i chauechita choxú íyaxuaxúxú. ²⁴ —Rü choma i Tupana Nane na duúxúxú chíxú rü tá chayü ngêxgumarüü i Tupanaärü ore i úmatüxú nüxú ixuxürüü. Natürü wúxi i ngechaúxúchi nixí naxcêx i ngêma yatü i choxú íyaxuaxúxú. Rü narümemae chí nixí ga noxtacüma tãü chima na nabuxú —ñanagürü. ²⁵ Rü nadexaãchi ga Yuda ga naêchita íyaxuaxúxú, rü ñanagürü: —Pa Ngúexêëruúx, ¿tãütáma choma nixí?

—ñanagürü. Rü Ngechuchu nanangãxú rü ñanagürü: —Ngêmaãcü cuma nixí —ñanagürü. ²⁶ Rü yexguma ínachibüeyane rü Ngechuchu nanayaxu ga wúxi ga

pãu. Rũ Tupanana moxê naxã, rũ inanabũcu, rũ norũ ngũexũgũxũ nayanu. Rũ ñanagũrũ: —Ñãã pãu rũ chaxunechiga nixĩ. Rũ ¡penangõ! —ñanagũrũ. ²⁷ Rũ yemawena rũ nanayaxu ga wũxi ga pochiyu ga binumaã ããcuxũ. Rũ yexgumarũ ta Tupanana moxê naxcêx naxãxĩra, rũ ñuxũchi norũ ngũexũgũna nanaxã, rũ ñanagũrũ nũxũ: —¡Rũ guxãma i pema rũ peyaxêux ya daa binu! ²⁸ —Erũ daa binu rũ nachiga nixĩ ya chaugũ ya muxũma i duũxũgũcêx tá ibacũ na ngẽmaãcũ Tupana nũxũ nũxũ nangechaũxũcêx i norũ pecadugũ. Rũ yimawa Tupana nanangoxêê na aixcũma yĩixũ i norũ uneta. ²⁹ —Rũ pemaã nũxũ chixu rũ tagutãma wena binu chayaxaxũ ñuxmatãta Chaunatũ ya Tupana ãexgacũ iixĩxũwa ngexwacaxũcũ ya binu pemaã chayaxêux —ñanagũrũ.

Ngechuchu nũxũ nixu rũ Pedru rũ taxũtãma nũgũ nixu na norũ ngũexũ yĩixũ (Mr 14.26-31; Lc 22.31-34; Cu 13.36-38)

³⁰ Rũ ñuxũchi nawiyaegũ ga wũxi ga Tupanaãrũ wiyaegu. Rũ yemawena rũ guma Mẽxpũne ga Orĩbunecũgu ãeganewa naxĩ. ³¹ Rũ yexguma ga Ngechuchu rũ ñanagũrũ nũxũ ga norũ ngũexũgũ: —Guxãma i pema rũ tá choxũ ipetêxgũ i ñoma i chũtaxũgu. Erũ Tupanaãrũ ore i ũmatũxũwa rũ ñanagũrũ: “Tã chayamêx ya carneruarũ dauruũ, rũ tá nanaxũanemare i carnerugũ”, ñanagũrũ i ngẽma ore. ³² —Natũrũ ngêxguma marũ yuwa ¡charũdaxguwena, rũ tá chaxira pexũpa Garirẽaanewa chaxũ —ñanagũrũ. ³³ Rũ yexguma ga Pedru rũ nanangãxũ rũ ñanagũrũ: —Rũ woo guxũma i togũ cuxũ itêxgu, natũrũ i chomax rũ tãũtãma cuxũ ¡chatêx —ñanagũrũ. ³⁴ Rũ Ngechuchu ñanagũrũ nũxũ: —Aixcũma cumaã nũxũ chixu rũ ñomatama i chũtaxũgu rũ naxũpa na otã ¡çaxũ, rũ tomaẽxpũxcũna tá cugũ iquicux na chorũ duũxũ quĩixũ. ³⁵ Rũ Pedru nanangãxũ rũ ñanagũrũ: —Rũ woo wũxigu cumaã chayuxgu rũ tãũtãma chaugũ ichicux na curũ duũxũ chĩixũ —ñanagũrũ. Rũ guxũma ga togũ ga norũ ngũexũgũ rũ ta yema ñanagũrũgũ.

Ngechuchu rũ Yechemanĩwa nayayumũxê (Mr 14.32-42; Lc 22.39-46)

³⁶ Rũ Ngechuchu rũ norũ ngũexũgũmaã nawa nangugũ ga wũxi ga nachica ga Yechemanĩgu ãegaxũ. Rũ Ngechuchu rũ ñanagũrũ nũxũ: —¡Nuã perũtogũ! Rũ paxa yoxni yã chayayumũxê —ñanagũrũ. ³⁷ Rũ Ngechuchu nũgũwe nanagagũ ga Pedru rũ Zebedũ nanegũ ga Chaũtiãgu rũ Cuãũ. Rũ Ngechuchucêx inaxũgũ ga na porãcũ nangechaũxũ rũ naxĩxãchiãêxũ. ³⁸ Rũ yexguma ga Ngechuchu rũ ñanagũrũ nũxũ: —Poraãcũ changechaũ rũ nagu charũxinũ rũ ngẽmamaã tá chayũ. ¡Rũ nuxa perũcho i pemax, rũ chauxrũũ ipedaue! —ñanagũrũ. ³⁹ Rũ yexguma ga Ngechuchu rũ yãxũra naxũ. Rũ waixũmũãnegu nanangũcuchi. Rũ nayumũxê rũ ñanagũrũ: —Pa Chaunatũx, ngêxguma cuma canaxwêxegu, ¡rũ nũxna choxũ inanguxuchixêê i ñãã ngũxũ i tá choxũ ũpetũxũ! Natũrũ chanaxwêxe i cuxrũtama ngũchaũ cuxũ rũ tama i choxrũ —ñanagũrũ. ⁴⁰ Rũ yemawena ga Ngechuchu rũ nataegu ga yema norũ ngũexũgũ ¡yexmagũxũwa. Rũ nũxũ inayangau ga na inapeexũ. Rũ ñanagũrũ Pedruxũ: —Pa Pedrux, ¿taxucũrũwama êxna namaã peporae na chomaã ipedauxũ, rũ bai i wũxi i ora? ⁴¹ —¡Rũ pexuãêgũ rũ Tupanana naxcêx peça na pexũ nangũxêxũcêx na tama choxũ ipetãxũcêx ega ngêxguma ¡acũ rũ guxchaxũ pexũ ũpetũgu! Erũ aixcũma peãêwa rũ ¡pememare, natũrũ pexene nixĩ ituraxũ —ñanagũrũ. ⁴² Rũ yexguma rũ wenaxãrũ noxri ¡nayumũxêxũcêx nataegu ga Ngechuchu. Rũ wenaxãrũ nayumũxê, rũ ñanagũrũ: —Pa Chaunatũx,

ngëxguma tama cunaxwëxegu na nawa choxü ícunguxichixëëxü i ñaã ngúxü i tá chingexü, rü marü name i ngëma cuma cunaxwëxexüãcúma chomaã cunaxü —ñanagürü. ⁴³ Rü ñuxüchi wenaxärü norü ngúexüügü íyexmagüxüüwa naxü. Rü nüxü inayangau ga na ínapeexü, yerü poraãcü nayaxtaexüchi. ⁴⁴ Rü yéma nüxna nixü, rü wenaxärü nayayumüxë. Rü noxriãcüta nayumüxë. ⁴⁵ Rü yemawena rü norü ngúexüügü íyexmagüxüüwa naxü. Rü ñanagürü nüxü: —ñuxma waxi pepee rü iperüngüë! Erü marü nawa nangu i ora na chorü uwanü choxü iyauxgüxü rü pecaduãxgüxüna choxü namugüxü. ⁴⁶ ¡pechigü rü ngíxã ítixí! Erü marü ñomatáma nixí i ngëma choxü íyaxuaxüxü —ñanagürü.

Ngechuchuxü niyauxgü

(Mr 14.43-50; Lc 22.47-53; Cu 18.2-11)

⁴⁷ Rü yexguma íyadexayane ga Ngechuchu, rü ínangu ga Yuda ga norü ngúexüchirëx íxíxü. Rü nawe narüxí ga muxüma ga duüxüügü ga taramaã rü naímaã íxãxnexü. Rü yema nixí ga duüxüügü ga paigüarü ãëxgacügü rü Yudiugarü ãëxgacügüerugü yéma mugüxü. ⁴⁸ Rü ga Yuda ga ínaxuaxüxü rü marü yema duüxüügümaã nanamexëë, rü ñanagürü: —Ngëma nüxü chachüxuxü tá nixí i Ngechuchu. Rü ngëma tá nixí i piyauxgüxü —ñanagürü: ⁴⁹ Rü yexguma Ngechuchucëx nixü, rü ñanagürü nüxü: —Nuxmaë Pa Ngúexëeruüx —ñanagürü. Rü ñuxüchi nüxü nachüxu. ⁵⁰ Rü Ngechuchu nanangãxü rü ñanagürü: —Pa Chomücüx, çtacüwa nuã cuxü? —ñanagürü. Rü yexgumatama Ngechuchuxü niyauxgü ga yema duüxüügü ga Yudawe rüxíxü. ⁵¹ Rü wüxi ga Ngechuchumücü nanawëxechi ga norü tara, rü paigüarü ãëxgacüarü duüxüügü ínadaechinü. ⁵² Rü yexguma ga Ngechuchu rü ñanagürü: —ñaxchiügu yaxücuchi i curü tara! Erü guxãma ya yíxema taramaã nuëxë, rü taragu tátama tayue. ⁵³ —çTama ëxna nüxü cucuëx rü ngëxguma chi choma chanaxwëxegu, rü Chaunatüna chi naxcëx chaca na choxü núma namugüãxücëx i muxüma i norü orearü ngeruüügü i daxücüãx na choxü yanangüxëëgüxücëx? ⁵⁴ —Natürü ngëxguma chi ngëma chaxüxgu, rü çñuxãcü chi ningü i Tupanaärü ore i úmatüxü i nüxü ixuxü na choma rü tá chayuxü? ⁵⁵ Rü yexguma ga Ngechuchu rü ñanagürü nüxü ga yema duüxüügü: —çTüxcüü taragü rü naíxmenëxãgümaã chauxcëx nuã pexí na choxü peyarüyauxgüxücëx ñoma wüxi i ngítëxãxü chíxüürüü? Rü guxü ga ngunexügu rü tupauca ga taxünewa changuxëëtae natürü taguma yexma choxü piyauxgü. ⁵⁶ —Natürü guxüma i ñaã ñuxma ngupetüxü, rü ngëmaãcü nangupetü na yanguxücëx i Tupanaärü ore ga nuxcümaügüxü ga norü orearü uruüügü úmatügüxü —ñanagürü. Rü yexguma ga guxüma ga norü ngúexüügü rü nüxna nibuxmü. Rü nüxícatama yéma nanatëxgü ga Ngechuchu.

Ãëxgacügü ga taxügüpëxewa Ngechuchuxü nagagü

(Mr 14.53-65; Lc 22.54-55, 63-71; Cu 18.12-14, 19-24)

⁵⁷ Rü Caijá ga paigüarü ãëxgacüxütawa Ngechuchuxü nagagü ga yema duüxüügü ga yayauxgüxü. Rü yexma nixí ga nangutaquëxegüxü ga ngúexëëruüügü ga ore ga mugüwa nguxëëtaegüxü rü Yudiugarü ãëxgacügüerugü. ⁵⁸ Natürü ga Pedru rü yaxügu nawe nixãchigü ñuxmata paigüarü ãëxgacü ga Caijáxütawa nangu. Rü purichíagü ga tupaucaarü dairuüügümaã yéma íãxtüwa narüto, yerü nüxü nadauxchaü ga çacü tá Ngechuchumaã na naxüexü. ⁵⁹ Rü ga paigüarü ãëxgacügü rü guxüma ga Yudiugarü ãëxgacügüerugü rü naxcëx nadaugü ga wüxi ga ore ga doramare íxíxü na yemamaã Ngechuchuxü ínaxuaxüügüxücëx na yamëxgüãxücëx.

60-61 Natürü woo muxüma ga duüxügü doraxümare nachigaxü yéma yarüxugüe, natürü taxuxüma ga chixexü inayangaugü ga naxcèx tá yamèxgüâxü. Rû düxwa yéma naxî ga taxre ga yatügü ga doraxümare yéma yarüxugüxü. Rû ñanagürügü: —Toma nüxü taxînüe i ñaã yatü rû ñanagürü:

“Tá nagu chapogü ya daa tupauca ya taxüne ya Tupanaärü, rû tomaèxpüx i ngunexügu tá wenaxârü íchanadaxèè”, ñanagürügü. ⁶² Rû yexguma ga paigüarü âëxgacü ga Caipá rû inachi, rû ñanagürü Ngechuchuxü: —¿Rû tacümaa cunangäxü i ñuxmax? ¿Rû ñuxü ñaxü yîixü i ngëma cuchiga i nüxü yaxugügüxü? —ñanagürü. ⁶³ Natürü ga Ngechuchu rû nangeëxmare. Rû yemacèx ga paigüarü âëxgacü ga Caipá rû ñanagürü nüxü: —Tupana ya Maxücégagu chanaxwëxe i aixcüma tomaã nüxü quixu na texé quiixü. ¿Rû cuma èxna i Cristu ya Tupana Nane quiixü, rû èxna tama? —ñanagürü. ⁶⁴ Rû Ngechuchu nanangäxü rû ñanagürü: —Ngü, rû ngëma nüxü quixuxü chixî. Rû pemaã nüxü chixu rû tá choxü pedaugü i ngëxguma Chaunatü ya Poracüxütawa charütöxgu rû ngëxguma caixanexügu wenaxârü núma chaxüxgu —ñanagürü. ⁶⁵ Rû yexguma ga paigüarü âëxgacü rû norü numaã nügüchirugu nagaugü. Rû ñanagürü: —Rû ñaã yatü rû tacü Tupanamaã nixugü. Rû taxucèxma marü tanaxwëxe i ñuxma i to i ore na napoxcuxücèx i ñaã yatü. Rû pematama marü nüxü pexînüe na ñuxäcü chixexümaa na yadexaxü. ⁶⁶ —¿Ñuxü ñapegüxü i pemax? —ñanagürü. Rû nümagü ga togü ga âëxgacügü rû nanangäxügü rû ñanagürügü: —Ngëmaäcü chixexü naxü. Rû name nixî i noxtacüma nayu —ñanagürügü. ⁶⁷ Rû yexguma rû Ngechuchuchiwewa naçuaixgüe. Rû nüxna nanaçuaixcagü. Rû togü rû nanapegüchiwegü. ⁶⁸ Rû ñanagürügü: —Pa Cristux, ñnüxü nacüèx na texé cuxü pegüchiwegüxü rû cuxna naçuaixcagü! —ñanagürügü.

*Pedru rû tama nügü nixu na Ngechuchuxü nacüáxü
(Mr 14.66-72; Lc 22.56-62; Cu 18.15-18, 25-27)*

⁶⁹ Rû yoxni ga Pedru rû âëxgacüpataèxtüwa narüto. Rû wüxi ga pacü ga âëxgacüarü duüxü ixícü, rû Pedrucèx iyaxü. Rû ngígürügü nüxü: —Cuma rû ta namücü quixî i ngëma Ngechuchu i Gariréaanecüâx —ngígürügü. ⁷⁰ Natürü ga Pedru rû guxü ga yema duüxügüpèxewa rû tama nügü nixu na Ngechucharü duüxü yîixü, rû ñanagürü: —Choma rû tama nüxü chacuèx i tacüchiga nixî i ngëma nüxü quixuxü —ñanagürü. ⁷¹ Rû yexguma marü yema ípataèxtüarü íaxwa ínaxüüxgu ga Pedru, rû naí ga pacü nüxü idau. Rû ngígürügü namaã ga yema duüxügü ga yéma yexmagüxü: —Ñaã yatü rû Ngechuchu ya Nacharétucüâxmücü nixî —ngígürügü. ⁷² Natürü ga Pedru rû wenaxârü tama nügü nixu na Ngechucharü duüxü yîixü. Rû ñanagürü: —Choma rû tama nüxü chacuèx i ngëma yatü. Rû Tupana choxü poxcux ega tama aixcüma yixügu i chorü ore —ñanagürü. ⁷³ Rû yixcamaxüra rû yema duüxügü ga yéma yexmagüxü rû Pedrucèx naxî, rû ñanagürügü nüxü: —Aixcüma nixî i cuma rû ta rû ngëma Ngechuchutanüxü quiixü, erü wüxi i Gariréaanecüâx idexaxürü quidexa —ñanagürügü. ⁷⁴ Rû nüma ga Pedru rû poraäcü nügü nixü, rû ñanagürü nüxü: —Rû aixcüma tama nüxü chacuèx i ngëma yatü. Rû ngëxguma doraxü chixuxgu rû Tupana choxü poxcux —ñanagürü. Rû yexgumatama nica ga otá. ⁷⁵ Rû nüma ga Pedru rû yexguma nüxna nacüèxächi ga yema ore ga Ngechuchu namaã nüxü ixuxü ga ñaxü:

“Rü naxüpa na otá içaxü, rü cuma rü tomaêxpüxcüna cugü tá quixã na chorü duüxü quiüxü”, ñaxü. Rü yéma ínaxüxü ga Pedru rü poraácüxüchima naxaxu.

27

Yudiügarü äêxgacügü rü Piratuxütawa nanagagü ga Ngechuchu (Mr 15.1; Lc 23.1-2; Cu 18.28-32)

¹ Rü yexguma yangunegu rü guxüma ga paigüarü äêxgacügü rü Yudiügarü äêxgacügüerugü, rü nügümaã nanamexêêgü na ñuxãcü Ngechuchuxü yamêxgüxü. ² Rü nayanêixgüchacüügü rü yemaácü äêxgacü ga Piratuxütawa nanagagü. Piratu nixí ga Dumacüâx ga äêxgacü ga Yudeaanemaã icuácü.

Nayu ga Yuda

³ Rü nüma ga Yuda ga Ngechuchuxü íyaxuaxüxü rü nüxü nadau ga Ngechuchuxü na napoxcuexü. Rü poraácü nagu narüxinü ga yema chixexü ga nümatama naxüxü. Rü yéma naxü naxütawa ga yema paigüarü äêxgacügü rü yema Yudiügarü äêxgacügüerugü. Rü ngíxü nayataeguxêê ga yema 30 tachinü ga díeru ga nüxna ngíxü naxägücü. ⁴ Rü ñanagürü nüxü: — Choma rü marü chixexü chaxü, erü naêchita íchayaxuaxü i wüxi i yatü i taxuüma i chixexü üxü, rü ñuxma rü tá ngêmagagu nayu —ñanagürü. Natürü nümagü ga äêxgacügü rü nanangãxügü, rü ñanagürügü: —Toma rü tama nüxü tacuáxchaü i ngêma. Cugagutama nixí, rü cuma i nüxü cucuáxü na ñuxãcü cugümaã cunamexêêxü i ngêma —ñanagürügü. ⁵ Rü yexguma ga Yuda rü yexma tupauca ga taxünechiãgu ngíxü nawotanü ga yema díeru. Rü ñuxüchi ínixü rü nügü nayawêxnaxã. ⁶ Rü ga paigüarü äêxgacügü rü ngíxü nade ga yema díeru. Rü ñanagürügü: —Taxucürüwa tupauca ya taxüneärü díeruchiügu ngíxü tanu i ñaã díeru, erü ngêmamaã tanaxütanü i ngêma yatü i tá yuxü —ñanagürügü. ⁷ Rü ñuxüchi nügümaã nanamexêêgü na yema díerumaã naxcêx nataxegüxücêx ga wüxi ga naâne ga waixüümü ga üwechixü nawa nayauxgüxü. Rü yema naânecêx nataxegü na nüxü nayemaxücêx ga nachica ga ngexta na natêxgüãxücêx ga yema duüxügü ga togü ga nachüãnecüâx ixígüxü. ⁸ Rü ngêmacêx i ñuxma rü ta i ngêma naâne rü Nagüchitaügu naxãega. ⁹ Rü yemaácü ningu ga Tupanaärü ore ga nuxcümaücü ga norü orearü uruü ga Yeremiã ümatüxü ga ñaxü:

“Rü nümagü ngíxü nade ga yema 30 tachinü ga díeru ga Cristutanü Yudiügarü ngíxü ixägücü. ¹⁰ Rü yema díerumaã naxcêx nataxegü ga wüxi ga naâne ga waixüümü ga üwechixü nawa nayauxgüxü, yema Cori ga Tupana chomaã nüxü ixuxrüü”, ñaxü.

Piratupêxewa nayexma ga Ngechuchu (Mr 15.2-5; Lc 23.3-5; Cu 18.33-38)

¹¹ Rü äêxgacü ga Piratuxütawa Ngechuchuxü nagagü. Rü nüma ga Piratu rü Ngechuchuna naca, rü ñanagürü: —¿Cuma quiüxü i Yudiügarü äêxgacü ya tacü? —ñanagürü. Rü Ngechuchu nanangãxü, rü ñanagürü: —Ngü, rü ngêma nüxü quixuxü chixí i chomaxü —ñanagürü. ¹² Rü Ngechuchuxü ínaxuaxüügü ga paigüarü äêxgacügü rü Yudiügarü äêxgacügüerugü. Natürü ga Ngechuchu rü taxuxümaãma nanangãxü. ¹³ Rü yexguma ga Piratu rü ñanagürü: —¿Tama êxna nüxü cuxínü i ngêma ore i namaã cuxü ínaxuaxüügüxü? —ñanagürü.

14 Natürü ga Ngechuchu rü taxuxümaäma nanangäxü. Rü yemacëx poraäcü nabëjxächiäë ga äëxgacü ga Piratu.

*Piratu rü Ngechuchumaä nanaxuegu na nayuxücëx
(Mr 15.6-20; Lc 23.13-25; Cu 18.38-19.16)*

15 Rü guxüguma ga yema Üpetüchigaarü petagu, rü Piratu ínananguxuchixëëxü ga wüxi ga poxcuxü ga duüxügü naxcëx ícagüxü, yerü yema nixí ga nacüma. 16 Rü yéma nayexma ga wüxi ga poxcuxü ga guxü ga duüxügü meä nüxü cuáxü. Rü Barabá nixí ga nagega. 17 Rü yexguma yéma nangutaquëxegüga ga duüxügü, rü Piratu nüxna naca, rü ñanagürü: —¿Rü ngexürüxüxü i penaxwæxü na íchananguxuchixëëxü? ¿Penaxwëxexü na Barabáxü íchananguxuchixëëxü rü éxna Ngechuchu i Cristumaä naxugüxüxü íchananguxuchixëëxü? —ñanagürü. 18 Rü yema ñanagürü ga Piratu yerü nüxü nacüëx na Ngechuchuchi naxaixü ga Yudiügarü äëxgacügü, rü yemacëx nixí ga naxütawa nagagüaxü. 19 Rü yexguma norü tochicawa natoxgu ga Piratu, rü naxmëx yéma imuga, rü ngígürügü: —Tama name i cunapoxcu i ngëma yatü i taxuüma i chixexü üxü. Yerü nagagu íne chütacü rü poraäcü chachixenegü —ngígürügü. 20 Natürü yema paigüarü äëxgacügü rü Yudiügarü äëxgacügüerügü, rü duüxügüxü naxucuxëgü na naxcëx ínacagüxücëx na Barabáxü ínananguxuchixëëxücëx rü Ngechuchuxü na nayuxëëgüxücëx. 21 Rü äëxgacü ga Piratu rü wenaxärü duüxügüna naca, rü ñanagürü: —¿Ngëxürüüxü i ngëma taxrewa i pema penaxwëxexü na íchananguxuchixëëxü? —ñanagürü. Rü nümagü ga duüxügü nanangäxügü, rü ñanagürügü: —Tanaxwëxe i Barabáxü ícunguxuchixëë —ñanagürügü. 22 Rü yexguma ga äëxgacü ga Piratu rü nüxna naca, rü ñanagürü: —¿Tacü tá chaxüxü namaä i ngëma Ngechuchu i Cristugu äëgaxü? —ñanagürü. Rü guxüma ga duüxügü rü nanangäxügü, rü ñanagürügü: —¿Curuchawa yapota! —ñanagürügü. 23 Rü yexguma ga Piratu rü ñanagürü nüxü: —¿Natürü tacü rü chixexü naxü? —ñanagürü. Natürü ga nümagü ga duüxügü rü wenaxärü tagaäcü ñanagürügü: —¿Curuchawa yapota! —ñanagürügü. 24 Rü yexguma Piratu nüxü dëuxgu ga marü taxucürüwama Ngechuchuxü na ínananguxuchixëëgaxü, yerü ga duüxügü rü marü nanaxixächiäëgüchaxü, rü yemacëx wüxi ga norü duüxüxü namu ga dexá naxütawa na tanangëxücëx. Rü nügü nayauxmëx ga Piratu napëxewa ga guxüma ga yema duüxügü. Rü ñanagürü: —Tama chaugagu tá nixí i na nayuxü i ñaä yatü i taxuüma i chixexü üxü, rü pegagu tátama nixí —ñanagürü. 25 Rü guxüma ga yema duüxügü nanangäxügü, rü ñanagürügü: —Togagu rü toxocügügagu tá nixí i nayuxü —ñanagürügü. 26 Rü yexguma ga Piratu rü Barabáxü ínananguxuchixëë. Rü ñuxüchi norü churaragüxü namu na Ngechuchuxü naçuaixgüxücëx, rü yemawena curuchawa na yanapotagüäxücëx. 27 Rü ñuxüchi ga yema churaragü rü Piratupataarü aixepewa Ngechuchuxü nagagü. Rü yexma Ngechuchuxütagu nanangutaquëxexëë ga guxüma ga churaragü. 28 Rü ñuxüchi Ngechuchuxü ínacüxuchigü, rü wüxi ga máxü ga naxchiru ga dauxügu nayacuxëëgü. 29 Rü naëruwa nayangëxcuchigü ga wüxi ga boxü ga chuchuxüwa naxügüxü. Rü wüxi ga naixmenëxäxäcüxü nüxü nayayauxächixëë ga norü tügünemëxëwa. Rü ñuxüchi napëxegu nacaxäpüxügü, rü nüxü nacugüe, rü ñanagürügü: —¿Namaüx ya Yudiügarü Äëxgacü ya Tacüx! —ñanagürügü. 30 Rü nüxna naçuaixgüe. Rü nüxna nanayauxgü ga guma naixmenëxäxäcü, rü naëruwa namaä nanaçuaixcagü.

³¹ Rū yexguma nūxū nacugūeguwena rū inanaxuchigū ga yema naxchiru ga daucharaxū. Rū wenaxārū naxchirugutama nayacūxēēgū. Rū űuxūchi nayagagū na curuchawa yanapotagūāxūcēx.

Ngechuchuxū curuchawa nipotagū

(Mr 15.21-32; Lc 23.26-43; Cu 19.17-27)

³² Rū yexguma yēma inaxīāchigu, rū nūxū nadaugū ga wūxi ga yatū ga Chirēnecūāx ga Chimāūgu āegacū. Rū guma yatūxū ngīxū iningexēēgū ga Ngechucharū curucha. ³³ Rū nawa nangugū ga wūxi ga nachica ga Gōrgutaegu āegaxū. Rū ngēma naega rū Duūxēēruchinēxā űaxūchiga nixī. ³⁴ Rū nūxna nanaxāgū ga binu ga ngūxūārū naāchixēēruūmaā āexūcū na yaxaxāxūcēx. Rū Ngechuchu nūxū naxaxneta, natūrū tama nayaxaxū. ³⁵ Rū yexguma marū curuchawa yapotagūāxguwena rū ga churagarū rū nanade ga Ngechuchuchiru. Rū űuxūchi wūxi ga dīēru ngīxū nañanagūgū na yemawa nūxū nacūxgūxūcēx na űacū tá nayaxuxū ga wūxichigū. ³⁶ Rū űuxūchi yēma narūtogū ga churagarū na Ngechuchuna yēma nadaugūxūcēx. ³⁷ Rū norū curuchatapēxewa nayapocuchi ga wūxi ga mūrapewa ga āegatachinūxū ga nūxū ixuxū ga űacūcēx Ngechuchuxū curuchawa na yapotagūxū. Rū űanagūrū: “űaā nixī i Ngechuchu i Yudiūgūārū Āēxgacū ya Tacū”, űanagūrū. ³⁸ Rū yexgumarū tā curuchawa nayapotagū ga taxre ga māētagūxū. Rū wūxi rū Ngechucharū tūgūnecūwawa naxū, rū to ga norū űoxwecūwawa. ³⁹⁻⁴⁰ Rū yema duūxūgū ga yēma chopetūxū, rū Ngechuchumaā naguxchigagū, rū nanexāērugūācūma űanagūrūgū: —Dūcēx, cuma cunangutaūxēēga ya tupaucā ya űaxūne, rū tomaēxpūx i ngunexūgu wenaxārū ĩcunadaxēēga. ĩCugūtama namaxēē i űuxmax! Rū ngēxguma chi aixcūma Tupana Nane quixūgu, rū ĩrūxī i curuchawa! —ñanagūrūgū. ⁴¹ Rū yexgumarū tā Ngechuchuxū nacugūecūraxū ga paigūārū āēxgacūgū, rū ngūxēēruūgū ga ore ga mugūwa nguxēētaegūxū, rū Parichēugū, rū Yudiūgūārū āēxgacūgūerugū. Rū nūgūmaā űanagūrūgū: ⁴² —Rū nūma rū togūxū namaxēēē natūrū i űuxma rū tama nūxū nacūcēx na nūgūtama namaxēēxū. Rū ngēxguma chi aixcūma Yudiūgūārū āēxgacū yixūgu, ĩrū űuxma rū ĩnaxīx i curuchawa na nūxū yaxōgūxūcēx! ⁴³ —Rū nūma nagu naxīnūgu rū Tupana tá nūxū narūngūxēē. Ēcū, űuxma rū Tupana nūxū rūngūxēēx ega aixcūma nūxū nangūxēēchaūgu. ĩTama ēxna nūmatama tamaā nūxū yaxuxū na Tupana Nane yīxū? —ñanagūrūgū. ⁴⁴ Rū woo ga yema māētagūxū ga naxrū curuchawa ipotagūxū, rū namaā naguxchigagū.

Nayu ga Ngechuchu

(Mr 15.33-41; Lc 23.44-49; Cu 19.28-30)

⁴⁵ Rū yexguma rū guxū ga naānawa naxēāne. Rū tocuchigu inaxūgū ga yema űuxmata tomaēxpūxarū orawa nangu ga yāuanecū. ⁴⁶ Rū yema tomaēxpūxarū oragu nixī ga Ngechuchu ga tagaācū aita naxūxū, rū űaxū: —Eri, Eri, ĩdamā chabātani? —ñanagūrū. Rū ngēma rū űaxūchiga nixī:

“Pa Chorū Tupana, Pa Chorū Tupanax, ĩűūxcū űoxna quixūgachixū?” űaxūchiga nixī. ⁴⁷ Rū nūmaxū ga duūxūgū ga yēma yexmagūxū rū nūxū naxīnūē, rū űanagūrūgū: —űaā yatū rū nuxcūmaūcū ga Tupanaārū orearū urūū ga Eriacēx naca —ñanagūrūgū. ⁴⁸ Rū yexgumatama rū wūxi ga yema duūxūgū ga yēma yexmagūxū rū inañāāchi rū Ngechuchuxūtawa nanange ga wūxi ga tūaxmū ga binu ga marū ngūchiēxūchicūmaā yawaixēēxū. Rū wūxi ga dexnawa nayanēx. Rū űuxūchi Ngechuchuxū nanawēx na nūxū

natuxuxúcèx. ⁴⁹ Natürü ga yema togü ga duüxügü ga yéma yexmagüxü rü ñanagürügü: —Yixrüma. Rü ngixã itarüdaunü ngoxita Eria nuã ü na nüxü yanangüxëèxücèx —ñanagürügü. ⁵⁰ Rü wenaxärü tagaäcü aita naxü ga Ngechuchu, rü ñuxüchi nayu. ⁵¹ Rü yexgumatama ga tupauca ga taxünearü tüyemachiãxü rü taxregu narügaute. Rü daxüwa inanaxügü ga na nagautexü rü ñuxmata ñaxtüwa nangu. Rü naxiãxãchiane, rü narüngüxtegü ga nutagü ga itacü. ⁵² Rü yuetamaügü rü ningenagü. Rü wena namaxë ga muxüma ga duüxügü ga yuechirëxü ga Tupanaãxü yaxögüxü. ⁵³ Rü yexguma Ngechuchu wena maüxguwena, rü naxmaüwa ínachoxü ga yema duüxügü ga wena maxëxü. Rü Yerucharëüwa naxi. Rü muxüma ga duüxügü nüxü nadaugü. ⁵⁴ Rü yema churaragüarü äëxgacü rü norü churaragü ga Ngechuchuna ídaugüxü, rü nüxü nadaugü ga na naxiãxãchianexü rü guxüma ga yema ngupetüxü. Rü yexguma rü poraäcü namuë, rü ñanagürügü: —Aixcüma nixi ya daa yatü i Tupana Nane na yiixü —ñanagürügü. ⁵⁵ Rü iyexmagü ga mucüma ga ngecügü ga yéma yaxüwa nüxü rüdaunücü. Rü yema ngecügü iyixi ga Ngechuchuxü íxümcügücü rü nüxü rüngüxëègücü ga yexguma Garirëaanewa ne naxüxgu. ⁵⁶ Rü yema ngecügütanüwa iyexma ga María ga Magadácüãx, rü María ga Chaütiágu rü Yúche naë, rü Zebedéu namëx ga Chaütiágu rü Cuáü naë.

Ngechuchu rü naxmaügu nayaxücuchigü

(Mr 15.42-47; Lc 23.50-56; Cu 19.38-42)

⁵⁷ Rü yexguma marü nachütachaügu, rü yéma nangu ga wüxi ga yatü ga Arimatëacüãx ga taarü díeruäcü ga Yúhegu äegacü. Rü nüma rü ta Ngechuchuaxü nayaxö. ⁵⁸ Rü nüma rü Piratuna nayaca rü ngoxita name na nayauxãxü ga Ngechuchuxüne ga curuchawa. Rü Piratu norü churaragüxü namu na nüxna naxägüãxücèx ga Ngechuchuxüne. ⁵⁹ Rü Yúche nanayaxu ga Ngechuchuxüne ga curuchawa. Rü wüxi ga naxchápenüü ga ngëmataxümaã nananauque. ⁶⁰ Rü yema naxmaü ga yexwacaxüxü ga Yúche nügücëxtama duüxügüxü yaxamaxëèxü ga nuta ga tacüarü mëxpüxüwa yexmaxügu nayaxücuchi ga Ngechuchuxüne. Rü ñuxüchi nanangüxtaü namaã ga wüxi ga nuta ga taxüchicü. Rü yemawena rü ínixü. ⁶¹ Rü yéma Ngechuchumaüarü toxmëxtawa irütogü ga María ga Magadácüãx rü nai ga María.

Purichiaqü nüxna nadaugü ga yema naxmaü ga Ngechuchuxü nagu yaxücuchigüxü

⁶² Rü moxüäcü ga ngüxchigaarü ngunexügu rü paigüarü äëxgacügü rü Parichëügü rü yéma Piratuxütawa naxi. ⁶³ Rü ñanagürügü nüxü: —Pa Corix, nüxna tacuëxãchie ga yema yatü ga Ngechuchu ga idoratëxãxü rü yexguma namaüxgu rü ñanagürü tomaã:

“Ngëxguma chayuxgu rü tomaëxpüx i ngunexügwena rü wena táxarü ícharüda”, ñanagürü tomaã. ⁶⁴ —Rü ngëmacëx tanaxwëxe i churaragü ngëma cumugü na nüxna yadaugüxücèx i ngëma naxmaü ñuxmatáta tomaëxpüx i ngunexüwa nangu na tama chütacü ngëma naxiãxücèx i norü ngüxügü na yayauxgüãxücèx i naxüne rü ñuxüchi duüxügümaã nüxü na yaxugüxücèx na marü wena namaxüxü. Erü ngëxguma chi ngëmaäcü naxüpetügu, rü noxriyü xexera tá nixi na duüxügüxü nawomüxëèxü —ñanagürügü. ⁶⁵ Rü Piratu ñanagürü nüxü: —Ngëägü nixi i churaragü i pexcèx. ¡Eçü ngëma namaã pexi na meãma pema penaxwëxëxüäcüma nüxna pedaugüxücèx i naxmaü! —ñanagürü. ⁶⁶ Rü yema churaragümaã yéma naxi, rü meãma

nayataixêégü ga guma nuta ga Ngechuchumaxü namaã rüngüxtaücü. Rü nanaxüarü cuëxruüãxgü na taxúema naëchita ínaxügachigüxcëx ga guma nuta. Rü ñuxüchi yexma nanamugü ga churaragü na nüxna nadaugüxcëx.

28

Yuwa ínarüda ga Ngechuchu (Mr 16.1-8; Lc 24.1-12; Cu 20.1-10)

¹ Rü sabaduarü ngunexüguwena ga yüxüarü pëxmama, rü yéma naxmaüwa íyadaugü ga María ga Magadácüãx rü naí ga María. ² Rü ngürüãchi poraacü naxíãxãchiane, yerü wüxi ga daxücüãx ga Cori ga Tupanaárü orearü ngeruü ínarüxí, rü naxmaüwa nangu rü ínanangüxgachi ga guma nuta ga namaã nangüxtaücü ga yema naxmaü. Rü ñuxüchi guma nutaétüwa narüto. ³ Rü yema orearü ngeruü rü wüxi ga bëixbëxanexürüü niyauracüü. Rü nacómüxüchi ga naxchiru. ⁴ Rü yexguma yemaxü nadaugügu ga churaragü rü norü muümaã niduruxe, rü yexma niyuãchitanü. ⁵ Rü yexguma ga yema orearü ngeruü, rü ñanagürü ngíxü ga yema ngecügü: —¡Tãxü i pemuüëxü! Choma nüxü chacuëx rü naxcëx pedaügü ya Ngechuchu ga guma curuchawa yapotagüãcü. ⁶ Nataxuma i nuã, erü marü wena namaxü, yema nüma üpa pemaã nüxü yaxuxürüü. ¡Rü nuã pexí, rü ípeyadëux i naxmaü i ngëma ínaxügüãxüwa ga naxüne! ⁷ ¡Rü paxa ípixí, rü norü ngüexüügümaã nüxü peyarüxugüe rü marü ínarüda rü wena namaxü ya Ngechuchu! Rü ñuxma rü marü pexüpa nüxíra Gariréaanewa naxü i nümax. Rü ngëma tá nixí i nüxü peyadauxü. Rü ngëma nixí i ore i pemaã nüxü chayarüxuxü — ñanagürü. ⁸ Rü yexguma ga yema ngecügü rü paxama nüxna íyaxí ga yema naxmaü. Rü imuüë, natürü itaãégü ta. Rü poraacü íixüãchi na Ngechuchuarü ngüexüügümaã nüxü na yanaxugüexüxcëx ga yema ore ga daxücüãx ngímaã nüxü íxuxü. ⁹ Rü yexguma ínaxüãchiyane, rü ngürüãchi yéma ngíxcëx nangox ga Ngechuchu, rü ngíxü narümoxë. Rü ngímagü rü Ngechuchucëx iyabuxmü rü nüxü iyacuëxüügü, rü naparawa inëixãchitanü. ¹⁰ Rü nüma ga Ngechuchu rü ñanagürü ngíxüügü: —¡Tãxü i pemuüëxü! ¡Rü ípixí rü chaueneëgü i chorü ngüexüügümaã nüxü peyarüxu rü Gariréaanewa naxí! Rü ngëma tá nixí i choxü nadaugüxü — ñanagürü.

Churaragü rü paigüarü ãëxgacügümaã nüxü nayarüxugüe ga yema ngupetüxü

¹¹ Rü yexguma ga yema ngecügü rü namagu naxíyane, rü ñuxre ga churaragü ga yéma naxmaüwa dauxütaegüxü rü Yerucharéüwa naxí. Rü paigüarü ãëxgacügümaã nüxü nayarüxugüe ga guxüma ga yema ngupetüxü. ¹² Rü yema paigüarü ãëxgacügü rü namaã nayarüdexagü ga Yudiügüarü ãëxgacügüerugü. Rü nügümaã nanamexëëgü ga tacümaã tá churaragüxü na yaxucuxëgüxü. Rü ñuxüchi nüxna ngíxü naxãgü ga tacü ga díeru. ¹³ Rü namaã nüxü nixugüe rü ñanagürügü: —¡Pema rü ñaperügügü tá:

“Ngëxguma chütacü tapeeyane, rü norü ngüexügü toechita ngëma naxí rü nayayauxgü ga naxüne” ñaperügügü tá! ¹⁴ Rü ngëxguma ãëxgacü ya Piratu tá nüxü cuëxgu i ngëma ngupetüxü, rü toma rü tá namaã tidexagü rü namaã tá tanamexëë na taxuüma pemaã naxüxcëx — ñanagürügü. ¹⁵ Rü yexguma ga yema churaragü rü ngíxü nayauxgü ga yema díeru. Rü yema ãëxgacügü namaã nüxü íxugüxürüü duüxügümaã nüxü nixugüe. Rü ñuxma rü ta ngëmatama dexa nixí i nüxü yaxugüxü i Yudiügü.

Ngechuchu nanamu ga norü ngüexüğü
(Mr 16.14-18; Lc 24.36-49; Cu 20.19-23)

¹⁶ Rü yema 11 ga Ngechucharü ngüexüğü rü Gariréa- anewa naxĩ ga guma mèxpúne ga Ngechuchu namaã nüxü ixuxünewa. ¹⁷ Rü yexguma Ngechuchuxü nadaugügu rü nüxü nicuèxüüğü, woo ñuxre ga norü ngüexüğü rü tama aixcüma nayaxögü na Ngechuchu yĩxü. ¹⁸ Rü yexguma ga Ngechuchu rü naxcèx nixü, rü ñanagürü nüxü: —Tupana rü ãëxgacüxü choxü nixixèè i guxü i daxüguxü i naãnewa rü guxü i ñoma i naãnewa. ¹⁹ —Rü ñuxma rü chanaxwèxe i guxü i nachiuãnewa pexĩ i guxü i duüxügütanüwa. ¡Rü chorü duüxügüxü peyaxĩgüxèëx! ¡Rü ípenabaiüxèëx chauégagu rü Chaunatuégagu rü Naãè i Üünexüegagu! ²⁰ ¡Rü penangüexèëx na naga naxĩnüèxüçèx i guxüma i ngèma pexü chamuxü! ¡Rü dücax, guxügutáma pexütawa changèxmaècha ñuxmatáta nagü i naãne! —ñanagürü ga Ngechuchu.

ORE I MEXÛ GA MARCU ÛMATÛXÛ

Cuáñ ga baiñxēẽruñ nixũ nixu ga Tupanaãrũ ore ga dauxchitawa ga ngextá taxúema íxãpataxũwa

(Mt 3.1-12; Lc 3.1-9, 15-17; Cu 1.9-28)

¹ Ñaã nixĩ i norũ ügũ i ore i mexũ ya Ngechuchu ya Cristu ya Tupana Nanechiga. ² Rũ nuxcũmaũcũ ga Tupanaãrũ orearũ uruũ ga Ichaxía ñmatũxũ ga Tupanaãrũ ore, rũ ñanagũrũ:

“Cupẽxegu chayamu i chorũ orearũ ngeruñ na namexēẽãxũcèx i cumaũ. ³ Rũ dauxchitawa i ngextá taxúema íxãpataxũwa rũ tá nangẽxma i wũxi i duũxũ i ngema tagaãcũ ñaxũ: ‘¡Pegũ pemexēẽx naxcèx ya Cori. Rũ naxcèx ipeyanawẽãchixēẽx i perũ maxũ!’ ”

ñaxũ tá. ⁴ Rũ Cuáñ rũ dauxchitawa ga ngextá taxúema íxãpataxũwa nangox rũ yéma ínanabaiũxēẽ ga duũxũgũ. Rũ namaã nixũ nixu ga na namexũ na Tupanacèx nadaugũxũ rũ ínbaiũxũ na Tupana nixũ nixũ nangechaũxũcèx ga norũ pecadugũ. ⁵ Rũ guxũma ga duũxũgũ ga Yudéanecũãx rũ ñãne ga Yerucharéucũãx rũ yéma Cuáñxũtawa naxũxũ ga na nixũ iyanaxĩnũẽxũcèx. Rũ nũmagũ rũ norũ pecadugũxũ yéma nayarũxugũxũ, rũ Cuáñ rũ natũ ga Yudáũwa ínayabaiũxēẽtanũ. ⁶ Rũ naxchiru ga Cuáñ rũ cameyutèxanacèx nixĩ, rũ norũ goyexũ rũ naxchèxmũnaxcèx nixĩ. Rũ beruremaã rũ munũmaã naxãwemũ. ⁷ Rũ Cuáñ rũ yema nixũ yaxuxũ ga orewa, rũ ñanagũrũ: — Choweama tá ne naxũ ya choxũ rüyexeracũ. Rũ choma rũ taxuwama chame rũ bai na ichayarũmaxãchixũ na íchayawẽxũcèx i norũ chapatucunũgũ. ⁸ — Choma rũ dexáwamare pexũ íchabaiũxēẽ, natũrũ nũma rũ tá Tupanaãe i Ûnèxũ pexna nanguxēẽ —ñanagũrũ ga Cuáñ.

Ngechuchuarũ baièchiga

(Mt 3.13-17; Lc 3.21-22)

⁹ Rũ yema ngunexũgũ, rũ Ngechuchu rũ ínaxũxũ nawa ga guma ñãne ga Nacharétu ga Gariréaanewa yexmane. Rũ Cuáñ rũ natũ ga Yudáũwa ínanabaixēẽ. ¹⁰ Rũ yexguma dexáwa ínaxũãchigu, rũ Ngechuchu nixũ nadau ga na yangenaxũ ga daxũwa. Rũ yema Tupanaãe i Ûnèxũ rũ wũxi ga muxtucurũ ínanago, rũ Ngechuchuna nangu. ¹¹ Rũ daxũwa ínanaxũ ga wũxi ga naga ga ñaxũ: —Cuma nixĩ i Chaune i cuxũ changechaũxũchixũ rũ cumaã chataãẽxũchixũ —ñaxũ.

Ngechuchuxũ naxũ ga Chataná

(Mt. 4.1-11; Lc 4.1-13)

¹² Rũ yemawena rũ Tupanaãe i Ûnèxũ rũ dauxchitawa ga ngextá taxúema íxãpataxũwa Ngechuchuxũ naga. ¹³ Rũ yéma nayexma ga 40 ga ngunexũ. Rũ naẽũgũ ga idũraexũ íyexmagũxũwa nayexma, rũ ngoxo ga Chataná rũ nixũ naxũ. Natũrũ Tupanaãrũ orearũ ngerũgũ ga daxũcũãx rũ Ngechuchuxũ narũngũxēẽgũ.

Ngechuchu rũ Gariréaanewa ínanaxũgũ ga norũ puracũ

(Mt 4.12-17; Lc 4.14-15)

¹⁴ Rũ nawena ga poxcupataũgu na napoxcuxũ ga Cuáñ, rũ Gariréaanewa naxũ ga Ngechuchu na naxunagũãxũcèx ga Tupanaãrũ ore i mexũ. ¹⁵ Rũ ñanagũrũ: —Marũ nawa nangu i ngunexũ ga Tupana naga unetaxũ, rũ

pexcèx ningaica na perü âëxgacü na yîixü. ¡Rü ñuxma rü name nixî i Tupanacèx pedaugü rü peyaxögü i ngëma norü ore i mexü! —ñanagürü.

Ngechuchu rü ägümücü ga püchaetanüxcèx naca
(Mt 4.18-22; Lc 5.1-11)

¹⁶ Rü yexguma naxtaxa ga Gariréaanacügu yaxūxgu ga Ngechuchu, rü yéma nüxü nadau ga Chimáü rü naëneë ga Aüdré. Rü nümagü rü woetama püchaetanüxü nixîgü rü yéma naxtaawa napüchaegü. ¹⁷ Rü Ngechuchu rü ñanagürü nüxü: —¡Chowe perüxî rü tá pexü charüngüxëë na chauxütawa penagagüxcèx i duüxügü! —ñanagürü. ¹⁸ Rü yexgumatama ga yema taxre, rü yéma nanawogü ga norü püchagü. Rü Ngechuchuwe narüxî. ¹⁹ Rü yéamaxüra naxü ga Ngechuchu, rü yéma nüxü nadau ga Chaütiágu rü naëneë ga Cuáü. Rü Zebedéu nanegü nixîgü ga nümagü. Rü wüxi ga nguewa nayexmagü, rü yéma ínanangáitagü ga norü püchagü. ²⁰ Rü yexgumatama Ngechuchu naxcèx naca. Rü nümagü rü yéma nguewa tüxü natëxgü ga nanatü ga Zebedéu namaã ga túmaärü puracütanüxügü, rü Ngechuchuwe narüxî.

Wüxi ga yatü ga ngoxo nawa yexmaxüchiga
(Lc 4.31-37)

²¹ Rü íâne ga Capernáüwa nangugü. Rü yexguma ngüxchigaarü ngunexüwa nanguxgu, rü Ngechuchu rü ngutaquëxepataüwa naxü rü yexma naxücu. Rü yéma ínanaxügü ga na nangüxëëtaexü. ²² Rü duüxügü rü nabëjxächiäëgü namaã ga norü nguxëëtae, yerü aixcüma Tupanaärü poramaã meã nanangüxëë rü tama ngüxëëruügü ga Moichéarü mugüwa nguxëëtaegüxü rü nixî. ²³⁻²⁴ Rü guma íanéärü ngutaquëxepataüwa nayexma ga wüxi ga yatü ga ngoxo nawa yexmaxü. Rü aita yéma naxü, rü ñanagürü: —¿Tüxcüü totanüwa cuxü, Pa Ngechuchu Pa Nacharétucüãx? ¿Nuã cuxü na toxü cuyadëjxüxcèx? Choma rü cuxü chacuèx na Tupana Nane ya Üünecü quiixü —ñanagürü. ²⁵ Rü Ngechuchu nüxü naxoox ga yema ngoxo, rü ñanagürü: —¡Iyarüngeèx rü ínaxüxü nawa ya yima yatü! —ñanagürü. ²⁶ Rü yexguma ga yema ngoxo rü guma yatüxü niyuächixëë, rü tagaäcü aita naxüäcüma nawa ínaxüxü. ²⁷ Rü guxüma ga duüxügü rü nabëjxächiäëgü, rü namücügüna nicachigü rü ñanagürügü: —¿Tacü nixî i ñaã? Maneca wüxi i ngexwacaxüxü i nguxëëtae nixî. Nüma rü aixcüma Tupanaärü poramaã meã nanguxëëtae. Rü woo i ngoxogü rü naga naxínüë i ngëxguma namuãxgu —ñanagürügü. ²⁸ Rü yemaäcü nixî ga paxa guxüwama ga Gariréanewa rü Ngechuchuchigaxü nacüëxgüxü ga duüxügü.

Ngechuchu rü Chimáü ga Pedru nëxëcèx nayataanexëë
(Mt 8.14-15; Lc 4.38-39)

²⁹ Rü yexguma ngutaquëxepataüwa ínaxüxügu ga Ngechuchu, rü Chaütiágu rü Cuáümaã Chimáü rü Aüdrépatawa naxü. ³⁰ Rü Chimáü nëxë rü ngürücarewa iyexma, yerü iyaxaxüne. Rü Ngechuchumaã ngüxü nixugüë. ³¹ Rü ngüxcèx nixü, rü ngüxmëxgu nayayauxächi, rü ngüxü ínarüdadëë. Rü yexgumatama igëüxächi ga na yaxaxünexü. Rü írüda, rü ínaxügü ga naxcèx na namexëëaxü ga ñna.

Ngechuchu rü muxüma ga idaaweexüxcèx nayataanexëë
(Mt 8.16-17; Lc 4.40-41)

³² Rü yexguma marü yanaxücuxgu ga üëxcü ga na nachütachaüxü, rü Ngechuchuxütawa nanagagü ga guxüma ga duüxügü ga idaaweexü rü guxüma ga ingoxoãxgüxü. ³³ Rü guxüma ga yema ínecüãx rü yexma

guma İpataarũ İāxwa naxcèx nangutaquèxegũ. ³⁴ Rũ nũma nanameèxèẽ ga muxũma ga duũxũgũ ga nagũxũraũxũ ga daawemaã İdaaweexũ. Rũ İnanawoxũ ga muxũma ga ngoxogũ, natũrũ nũxna nanachuxu ga na yadex-agũxũ, yerũ nũmagũ ga ngoxogũ rũ nũxũ nacuèxgũ na texè yĩxũ.

Ngechuchu rũ nanaxunagũ ga ore ga mexũ ga ngutaquèxepataũwachigũ (Lc 4.42-44)

³⁵ Rũ ngunetũũ ga tauta yangóonegu, rũ inaxũāchi ga Ngechuchu. Rũ İāneārũ yéaxũra ga ngextá taxũema İxāpataxũwa naxũ na yéamaxũra yayumũxèxũcèx. ³⁶ Rũ Chimáũ rũ namũcũgũmaã Ngechuchucèx nayadaugũ. ³⁷ Rũ yexguma nũxũ iyangaugũgu, rũ ñanagũrũgũ nũxũ: –Guxũma i duũxũgũ rũ cuxcèx nadaugũ –ñanagũrũgũ. ³⁸ Natũrũ ga nũma rũ nanangāxũ rũ ñanagũrũ nũxũ: –İNgĩxā rũ toxnamana taxĩ náigũ ya İānexācũgũ ya ngaicamagũnewa na ngema rũ ta chanaxunagũxũcèx i ore i mexũ! Erũ woetama ngèmacèx nixĩ i Capernáũārũ İānewa İchaxũxũxũ. ³⁹ Rũ yemaācũ ga Ngechuchu rũ guxũma ga Gariréaanegu nixũāgũchigũ. Rũ wũxichigũ ga İāneārũ ngutaquèxepataũwa rũ nũxũ nixuchigũ ga ore ga mexũ, rũ İnayawoxũĪetanũ ga ngoxogũ.

Ngechuchu rũ wũxi ga rũchaxũnexũcèx nayataanexèẽ (Mt 8.1-4; Lc 5.12-16)

⁴⁰ Rũ Ngechuchucèx nixũ ga wũxi ga yatũ ga chaxũnemaã İdaawecũ. Rũ napèxegu nayacaxāpũxũācũma ñanagũrũ nũxũ: –Pa Corix, ngèxguma cunaxwèxegu na choxũ curũmexèẽxũ, rũ cuxũ natauxcha na chauxcèx cuyataanexèẽxũ –ñanagũrũ. ⁴¹ Rũ Ngechuchuaaxũ nangechaũtũmũũ ga guma yatũ. Rũ nũxũ ningögũ rũ ñanagũrũ nũxũ: –Ngũ, chanaxwèxe. İMarũ curũme! –ñanagũrũ. ⁴² Rũ yexgumatama nũxũ İnayarũ_{xo} ga na nachaxũnexũ ga guma yatũ. Rũ meāma naxcèx nitaane. ⁴³⁻⁴⁴ Rũ Ngechuchu rũ yexgumatama İnayamu. Rũ meāma nanaxucuxè rũ ñanagũrũ nũxũ: –İDũcèx, tāxũtāma texémaã nũxũ quixu! İNatũrũ ngema paixũtawa naxũ, rũ cugũ nũxũ yadauxèẽ! İRũ curũ mexèècèx nũxna yaxuaxũ i curũ āmare ga yema Moĩchè tũxũ muxũ na nũxũ nacuāxũcèx i duũxũgũ na curũmexũ nawa i curũ daawe! –ñanagũrũ. ⁴⁵ Natũrũ nũma ga guma yatũ rũ İnixũ rũ İnanaxũgũ ga na guxāmaāma nũxũ yaxuxũ ga yema nũxũ ngupetũxũ. Rũ yemacèx ga Ngechuchu rũ marũ taxucũrũwa ngóxũwama duũxũgũpèxewa İānegũgu naxũcu. Natũrũ dauxchitagu ga ngextá duũxũgũ İtaxũxũgu narũxāũx. Rũ yema naxcèx naxĩxũ ga duũxũgũ ga guxũānewa ne İxũ.

2

Ngechuchu rũ wũxi ga yatũ ga nawāĩxāchicũcèx nayataanexèẽ (Mt 9.1-8; Lc 5.17-26)

¹⁻² Rũ yixcama ga ñuxre ga ngunexũwena rũ wenaxārũ Capernáũārũ İānegu naxũcu ga Ngechuchu. Rũ yexguma duũxũgũ nũxũ cuāchigagũgu na İpatawa nayexmaxũ, rũ yema nangutaquèxegũ ga muxũma ga duũxũgũ. Rũ dũxwa ga İāxtũwa rũ nanapá. Rũ nũma ga Ngechuchu rũ namaã nũxũ nixu ga ore i mexũ. ³ Rũ yema nangugũ ga āgũmũcũ ga yatũgũ ga yema nange-tāũgũxũ ga wũxi ga yatũ ga nawāĩxāchicũ. ⁴ Natũrũ yema na namuxũchixũ ga duũxũgũ, rũ taxucũrũwama Ngechuchuxũtawa nangugũ. Rũ yemacèx İnanapogũètũ ga Ngechuchu İyexmaxũwa ga guma İpata. Rũ yema norũ caruũgu İnanachũxũetaũgũ ga guma nawāĩxāchicũ. ⁵ Rũ yexguma Ngechuchu

nüxü dëuxgu ga ñuxäcü aixcüma na yaxögüäxü ga yema duüxügü, rü ñanagürü nüxü ga guma nawäixächicü: —Pa Chaunex, curü pecadugü rü marü cuxü nüxü changechaü —ñanagürü. ⁶⁻⁷ Natürü ñuxre ga ngüexëëruügü ga Moïchéarü mugüwa nguxëëtaegüxü rü yéma narütogü. Rü naäëwa ñaxügu narüxñünë: —¿Ñuxäcü tama namuü na ngëmaäcü yadexaxü? ¿Rü tacü Tupanamaä yaxugüxü? Erü Tupanaxicatama nixi ya duüxügüarü pecaduxü ngechaücü —ñaxügu narüxñünë. ⁸ Natürü yexgumatama ga Ngechuchu rü nüxü nicuëxächi ga yema nagu naxñünëxü, rü yemacëx nüxna naca rü ñanagürü nüxü: —¿Tüxcüü ngëmagu perüxñünë i pemax? ⁹ —¿Tacü nixi i rütauchamaëxü na namaä nüxü ixuxü ya daa nawäixächicü:

“Curü pecadugü rü marü cuxü nüxü changechaü”, rü éxna:

“¡Inachi, rü nayaxu i curü caruü, rü íixü!” ñaxü? ¹⁰⁻¹¹ —Natürü ñuxma rü tá pexü nüxü chadauxëë na Chaunatü núma choxü muxü na duüxügüaxü nüxü changechaüxüçëx i norü pecadugü —ñanagürü. Rü yexguma yema ñaxguwena rü guma nawäixächicüxü ñanagürü: —Cumaä nüxü chixu rü ¡inachi, rü nayaxu i curü caruü, rü cupatawa naxü! —ñanagürü. ¹² Rü yexgumatama inachi ga guma idaawecü. Rü nanayaxu ga norü caruü, rü inaxüxü napëxewa ga guxüma ga yema duüxügü ga yéma yexmagüxü. Rü yemacëx ga yema duüxügü rü nabëxächiäëgü, rü Tupanaxü nicuëxüügü, rü ñanagürügü: —Taguma nüxü tatau i tacü i ñaarüü íixü —ñanagürügü.

Lebícëx naca ga Ngechuchu
(Mt 9.9-13; Lc 5.27-32)

¹³ Rü yemawena rü wenaxärü naxtaacutüwa naxü ga Ngechuchu. Rü yema muxüma ga duüxügü rü naxcëx naxi. Rü nüma rü nanangüexëë. ¹⁴ Rü yexguma yéma naxüpetügu ga Ngechuchu, rü yéma nüxü nadau ga Lebí ga Arupéu nane. Rü nüma ga Lebí rü yéma narüto nawa ga yema nachica ga duüxügüna dñëru ngixü inayaxuxüwa naxcëx ga Dumacüäxärü äëxgacü yerü woetama yema nixi ga norü puracü. Rü Ngechuchu rü ñanagürü nüxü: —¡Chowe rüxü! —ñanagürü. Rü inachi ga Lebí, rü nawe narüxü. ¹⁵ Rü yéma Lebípatawa nachibü ga Ngechuchu. Rü yéma nachibüe ga muxüma ga duüxügü ga Lebírüü Dumaärü äëxgacüçëx dñëru ngixü yauxgüxü. Rü nayexmagü ta ga togü ga duüxügü ga taxüema nacü mamaä taäëgüxü ga yéma mechawa rütogüxü namaä ga Ngechuchu rü norü ngüexügü. Yerü namu ga yema nawe rüixü. ¹⁶ Rü yéma nayexmagü ta ga ñuxre ga Parichëgü rü ngüexëëruügü ga Moïchéarü mugüwa nguxëëtaegüxü. Rü yexguma nüxü nadaugüga ga yema togümaä na nachibüxü ga Ngechuchu, rü norü ngüexügüna nacagü, rü ñanagürügü: —¿Ñuxäcü i perü ngüexëëruü rü namaä nachibü i äëxgacüarü duüxügü i dñëruarü yauxwa puracüexü rü duüxügü i pecaduäxgüxü? —ñanagürügü. ¹⁷ Rü yexguma yemaxü naxñünëga ga Ngechuchu rü ñanagürü nüxü: —Ngëma poraxü rü tama nanaxwëxe ya duturu, natürü ngëma idaawexü waxi nixi i naxwëxexü ya duturu. Choma rü tama mexügüna na chaxuxüçëx nixi ga núma chaxüxü, natürü núma chaxü na nüxna chaxuxüçëx i pecaduäxgüxü —ñanagürü.

Ngechuchuna aurechigacëx nacagüe
(Mt 9.14-17; Lc 5.33-39)

¹⁸ Rü wüxi ga ngunexügu rü tama nachibüe yerü Tupanacëx naxauree ga Cuäü ga baiüxëëruüärü ngüexügü rü Parichëgüarü ngüexügü. Rü yemaxü nadaugüga ga ñuxre ga duüxügü, rü Ngechuchuxütawa naxi rü nüxna

nayacagüe, rü ñanagürügü: —Ngêma Cuáñârü ngúexüügü rü Parichéugüarü ngúexüügü rü naxauree. ¿Rü tüxcüü i curü ngúexüügü i tama naxaureexü? —ñanagürügü. ¹⁹ Rü Ngechuchu nanangāxü rü ñanagürü nüxü: —¿Éxna wüxi i ngígüarü petawa rü pexcêx namexü na naxaureexü i ngêma nüxna naxugüxü ega natanüwa nangêxmagu i ngêma yatü i ngexwacêx âmāxü? Pemaã nüxü chixu rü ngêxguma natanüwa nangêxmayane i ngêma yatü i ngexwacêx âmāxü rü taxucürüwama naxauree i ngêma nüxna naxugüxü. ²⁰ —Natürü wüxi i ngunexü rü ngêma yatü i ngexwacêx âmāxü rü tá namücügüna nixügachi. Rü ngêma ngunexügu tá nixí i naxaureexü. [Rü chorü ngúexüügü rü taxucürüwama naxauree i ñuxma erü natanüwa changêxma. Natürü ínangu tá i ngêma ngunexü na nüxna chixügachixü, rü ngêxguma tá nixí i naxaureexü.] ²¹ —Rü taxúema wüxi i naxchirutüchi i ngexwacaxüxümaã tanapaita i wüxi i naxchiru i ngauxü. Erü ngêxguma nanaächimügu i ngêma natüchi i ngexwacaxüxü, rü tá nanagāuxêe i ngêma ngauxü i naxchiru. Rü noxriarü yexera tá narügáu. ²² —Rü ngêxgumarüü ta taxúema ngexwacaxücü ya binu rü wüxi i marü ngauxü i naxchiü i naxchêxmünaxcêxgu tayabacuchi. Erü ngêxguma ngêmaäcü naxüxgu rü yima binu ya ngexwacaxücü rü narüngu, rü tá nayawāixêe i ngêma naxchiü i ngauxü i naxchêxmünaxcêx. Rü ngêxma tá inayarüxo ya binu rü naxchiü rü ta. Rü ngêmacêx tanaxwêxe ya ngexwacaxücü ya binu rü ngexwacaxüxü i naxchiügu tayabacuchi. [Rü chorü nguxêetae i ngexwacaxüxü rü ngêxgumarüü ta nixí na taxucürüwama namaã nawüxiguxü i ngêma nuxcümaüxü i pecümagü —ñanagürü ga Ngechuchu.]

Ngechuchuarü ngúexüügü rü trigu nibuxetanü ga ngüxchigaarü ngunexügu (Mt 12.1-8; Lc 6.1-5)

²³ Wüxi ga ngüxchigaarü ngunexügu ga Ngechuchu rü norü ngúexüügümaã trigunecüwa nachopetü. Rü nümagü ga norü ngúexüügü rü inaxiäcüma inanaxügüe ga trigu na yabuxetanüxü. ²⁴ Rü yema Parichéugü rü Ngechuchuna nacagü rü ñanagürügü: —Dücêx ¿rü tüxcüü i curü ngúexüügü rü nanaxügü i ngêma tama mexü i ngüxchigaarü ngunexügu na naxüxü? —ñanagürügü. ²⁵ Natürü nüma ga Ngechuchu rü ñanagürü nüxü: —¿Taguma éxna poperawa nüxü pedau ga ñacü na naxüxü ga nuxcümaücü ga äêxgacü ga Dabí rü natanüxüügü ga yexguma ðna nüxü tauxgu rü nataiyeagu? ²⁶ Rü yexguma paigüarü äêxgacü yixügu ga Abiatáru, rü Dabí rü Tupanapatagu naxücu. Rü nanangöx ga yema päu ga üünexü ga paigücêxicatama ixíxü. Rü nüma ga Dabí rü natanüxümaã rü ta nangau ga yema päu —ñanagürü. ²⁷ Rü ñanagürü ta ga Ngechuchu: —Ngêma ngüxchigaarü ngunexü rü duüxügücêx nixí ga naxüxü. Rü tama ngüxchigaarü ngunexücüx nixí ga naxüxü ga duüxügü. ²⁸ —Rü ngêmacêx ya Tupana Nane ya duüxüxü ixícü rü namaã inacüx ta i ngüxchigaarü ngunexü —ñanagürü.

3

Wüxi ga yatü ga yumécüchiga (Mt 12.9-14; Lc 6.6-11)

¹ Rü wenaxärü ngutaquêxepataügu naxücu ga Ngechuchu. Rü yéma nayexma ga wüxi ga yatü ga norü wüxichacüüwa yumécü. ² Rü yema Parichéugü, rü Ngechuchuxü nangugügü ngoxi tá namexêeã ga ngüxchigaarü ngunexügu, na yemaäcü nüxü nayexmaxücüx ga ñacücüx na ínaxuaxügüäxü. ³ Rü yexguma ga Ngechuchu rü ñanagürü nüxü ga guma

yumécü: —ǵǵrúda, rü nuxā ngāxǵtanügu yachi! —ñanagürü. ⁴ Rü yexguma ga Ngechuchu rü yema togü ga yéma yexmagüxǵna naca, rü ñanagürü nüxǵ: —ǵTacü nixǵ i mexǵ na naxǵxǵ i ngǵxchigaarü ngunexǵügu? ǵNamexǵ na naxǵxǵ i mexǵ rü éxna chixexǵ? ǵRü namexǵ na namaxééxǵ rü éxna yamáxǵ? —ñanagürü. Natürü ga nümagü rü yexma nayarüngeéxǵmare. ⁵ Rü nüma ga Ngechuchu rü nuchametüācüma nüxǵ nidaugüāchi ga yema nüxǵ íchomaéguāchixǵ. Rü nangechaǵ yerü tama inaxǵñüechaǵ ga yema duǵxǵgü. Rü guma yatǵxǵ ñanagürü: —ǵyanawéxāchixéé ya cuxméx! —ñanagürü. Rü yexguma ga guma yatü rü nügü inayarüwéxāchiméxéxéé. Rü yexgumatama rü narümexméx. ⁶ Natürü yexguma yemaxǵ nadaugügu ga Parichéugü, rü ínachoxǵ ga yéma. Rü Erodetanüxǵmaā inanaxǵgüe ga na naxcèx nadaugǵxǵ ga ñuxācü tá na Ngechuchuxǵ yaméxǵxǵ.

Naxtaacutüwa Ngechuchucèx nangutaquèxegü ga muxǵma ga duǵxǵgü

⁷ Rü Ngechuchu rü norü ngúexǵgümaā naxtaacutüwa naxǵ. Rü muxǵma ga duǵxǵgü ga Gariréaanecǵāx rü nawe narǵxǵ. ⁸ Rü yexguma nüxǵ nacuáchigagügu ga guxǵma ga yema mexǵgü ga naxǵxǵ ga Ngechuchu, rü naxcèx naxǵtaquèxe ga muxǵma ga duǵxǵgü ga Yudéaanecǵāx, rü Yerucharéucǵāx, rü Iduméāanecǵāx, rü Yudaǵārü tocutǵcǵāx rü yema naāne ga Tiru rü Chidāǵārü íānegü nawa yexmaxǵcǵāx. ⁹ Rü yemacèx ga Ngechuchu rü norü ngúexǵgüxǵ namu na wǵxi ya ngue naxcèx namexéégüxǵcèx na tama yéma yaxǵxtǵgüāxǵcèx ga yema muxǵma ga duǵxǵgü. ¹⁰ Yerü nüma rü nanameéxéé ga muxǵma, rü yemacèx guxǵma ga yema idaaweexǵ rü naxcèx naxǵ na nüxǵ yangögügüxǵcèx. ¹¹ Rü yexguma yema ngoxoāxǵxǵ ga duǵxǵgü nüxǵ daugügu, rü napèxegu nacaxǵpǵxǵgü rü tagaācü ñanagürügü: —Cuma nixǵ ya Tupana Nane quǵxǵ —ñanagürügü. ¹² Natürü nüma ga Ngechuchu rü poraācü nayaxucǵxǵgü na tama duǵxǵgümaā nüxǵ yaxugüexǵcèx ga nachiga.

Ngechuchu nanade ga 12 ga norü ngúexǵgü na toxnamana namugüāxǵcèx (Mt 10.1-4; Lc 6.12-16)

¹³ Rü yemawena ga Ngechuchu rü wǵxi ga mèxpǵnewa ínaxǵāchi. Rü yéma naxcèx naca ga yema ngúexǵgü ga nüma nanaxwèxexǵ. Rü naxǵtagu naxǵtaquèxegü. ¹⁴ Rü yematanüwa nayadexechi ga 12 ga norü ngúexǵgü na namücügüxǵchi yǵxǵcèx, rü na yamugüāxǵcèx ga norü orearü unagüwa. Rü yemagü rü Imugǵxǵgu nanaxǵéga. ¹⁵ Rü pora nüxǵna naxā na Tupanaārü poramaā ínawoxǵāxǵcèx ga ngoxogü. ¹⁶ Rü ñaāgü nixǵ ga naega ga yema 12 ga norü ngúexǵgü ga nadexǵ. Rü wǵxi nixǵ ga Chimáu ga Pedrugu naxǵégaxǵ. ¹⁷ Rü togü nixǵ ga Chaǵtiágu rü naéneé ga Cuáǵ. Rü nümagü rü Zebedü nanegü nixǵ. Rü Ngechuchu rü Boanéregu nanaxǵéga. Rü ngéma nixǵ i Duruanexǵ Nanegü —ñaxǵchiga. ¹⁸ Rü togü nixǵ ga Aǵdré, rü Piripi, rü Baturumé, rü Mateu, rü Tumachi, rü Chaǵtiágu ga Arupéu nane, rü Tadéu, rü Chimáu ga iporaācüücü. ¹⁹ Rü to nixǵ ga Yuda ga Icarǵte ga yǵxcama bexma Ngechuchuxǵ íxuaxǵxǵ.

Ngechuchuxǵ nixugüe na ngoxoarü poramaā napuracǵxǵ (Mt 12.22-32; Lc 11.14-23, 12.10)

²⁰ Rü yemawena rü wǵxi ga Ípatagu naxǵcu ga Ngechuchu. Rü we-naxārü naxcèx nangutaquèxegü ga muxǵma ga duǵxǵgü. Rü yemacèx woo na nachibüexǵcèx rü nangechicagü ga nüma rü norü ngúexǵgü. ²¹ Rü yexguma yemaxǵ taxǵñüégu ga guxema natanǵxǵgü ga Ngechuchu, rü

ítayadaugü na tayagagüxücèx, yerü nüxü tixugügü rü: —Naxãüãemare —ñatagürügü. ²² Rü yexgumarüü ta ga yema ngüexëëruüügü ga Moïchëarü mugüwa ngüxëëtaegüxü ga Yerucharëüwa ne ìxü, rü ñanagürügü: —Ñã yatü i Ngechuchu, rü ngoxogünatü i Bechebúarü poramaã nixí i ínawoxüãxü i ngoxogü —ñanagürügü. ²³ Natürü ga Ngechuchu rü naxcèx naca ga yema ngüexëëruüügü. Rü wüxi ga ore ga cuëxruüxü namaã nixu, rü ñanagürü: —¿Rü ñuxácü i Chataná i nügütama ínatëxüchixü? ²⁴ —Rü ngëxguma chi wüxi i nachüüãnecüãx i duüxügü rü nügütanüxüwatama nügü nadaixgu, rü taxuacüma natai i ngëma nachüüãne. ²⁵ —Rü ngëxguma chi wüxi ya ípatacüãx nügü itoyegu, rü taxuacüma natai ya yima ípata. ²⁶ —Rü ngëxgumarüü chi ta nixí i Chataná ega nügümaã nanuxgu rü nügü yamëxgu, rü taxuacü chima natai i ngëxguma. Rü chi ngëxma nagux. ²⁷ —Rü taxuacüma texé wüxi ya yatü ya poracüpatagu taxüca na nüxna tanapuxüxücèx i norü ngëmaxügü, ega tama tayanëixiragu. Erü ngëmaãcücica tá nixí i tüxü nanguxüxü na tanapuxüxü i norü ngëmaxügü. ²⁸ —Rü aixcüma pemaã nüxü chixu rü Tupana tá nüxü nüxü nangechaü i duüxügü i guxüma i norü pecadugü rü guxüma i tacü i chixexü i namaã yadexagüxü. ²⁹ —Natürü texé ya chixexü namaã ixugüxe i Tupanaãë i Üünexü, rü tagutáma tüxü nüxü nangechaü ya Tupana. Rü guxügutáma chixexüwa tüxü natëx —ñanagürü. ³⁰ Rü yema ñanagürü ga Ngechuchu, yerü yema ngüexëëruüügü ga Moïchëarü mugüwa ngüxëëtaegüxü rü: “Nangoxoãx” ñanagürügü nüxü.

Ngechucharü mamá rü naëneëgüchiga
(Mt 12.46-50; Lc 8.19-21)

³¹ Rü yexgumayane rü ítangügü ga Ngechucharü mamá rü naëneëgü. Natürü ípataarü düxétügu tarücho, rü naxcèx yéma tangemagü. ³² Rü yema duüxügü ga Ngechuchuxü íchomaëguãchixü, rü ñanagürügü nüxü: —Curü mamá rü cueneëgü rü cueyëxgü, rü yéa düxétüwa tangëxmagü, rü cuxcèx tadaugü —ñanagürügü. ³³ Rü nüma nanangãxü, rü ñanagürü: —¿Texé tixí ya chae rü chaueneëgü? —ñanagürü. ³⁴ Rü yema nüxü íchomaëguãchixüxü nidaugüãchi, rü ñanagürü: —Rü daxegü tixí ya chae rü chaueneëgü. ³⁵ —Erü guxãma ya texé ya naxüxe i Tupanaarü ngüchaü, rü yíxema tixí ya chaueneë rü chaueyëx rü chae —ñanagürü.

4

Ore ga toecügu ixuxü
(Mt 13.1-9; Lc 8.4-8)

¹ Rü wenaxãrü inanaxügü ga Ngechuchu ga na nangüexëëãxü ga duüxügü ga guma naxtaxaãnacüwa. Rü muxüma ga duüxügü yexma naxcèx nangataquëxegü. Rü yemacèx düxwa wüxi ga ngue ga yéma naxtaawa yexmanegu nixüe ga Ngechuchu, rü gumawa narüto. Rü yema duüxügü rü naxtaxaãnacügu narücho. ²⁻³ Rü yexguma ga Ngechuchu rü inanaxügü ga muxüma ga ore ga cuëxruüwa na nangüexëëãxü ga duüxügü. Rü norü ngüxëëtaewa rü ñanagürü: —¡Dücèx, iperüxñüë i ñãã ore! Wüxi ga yatü ga toecü rü triguarü towa naxü. ⁴ —Rü yexguma triguchiremaã nagüaneãgu, rü ñuxre ga triguchire rü namagu nayí. Rü ínangügü ga werigü, rü nanawecu. ⁵ —Rü náígü ga triguchire rü nutatanügu nayí ga ngextá ínachicaxüwa ga waixüümü. Rü paxa narüxügü ga guma triguchire, yerü ga waixüümü rü tama nayaxcü. ⁶ —Natürü yexguma nangunagügu ga üexcü, rü ínanagu ga

guma trigu rü narüñexgü. Rü nayue, yerü tama poraãcü nixãmaxã. ⁷ – Rü náigü ga triguchire rü toranecügu nayi. Rü yexguma nayaegu ga tora, rü guma triguxü inawocu, rü yemacèx tama nixo. ⁸ –Natürü náigü ga triguchire rü mexü ga waixüümügu nayi. Rü meãma nayae, rü muxüma ga trigu nawa ínguxuchi. Rü nümaxüneyèxawa rü 30 püxü ínguxuchi ga norü o, rü náigüwa rü 60, rü náigüwa rü 100 ínguxuchi –ñanagürü. ⁹ Rü ñuxüchi ñanagürü ta: –Rü yixema ächixègüxe, jrü nüxü taxínüë i ñaa ore! –ñanagürü.

Tacüchiga nixi ga yema ore ga cuèxruügu ixuxü

(Mt 13.10-17; Lc 8.9-10)

¹⁰ Rü yemawena ga yexguma nanüxícèxgu ga Ngechuchu, rü yema naxütagügüxü wüxigu namaã ga yema 12 ga norü ngüexügu, rü nüxna nacagüe ga na tacüchiga yïixü ga yema ore ga cuèxruügu ixuxü. ¹¹⁻¹² Rü nüma nanangãxü rü ñanagürü nüxü: –Tupana rü pexü nüxü nacuèxëë i ngëma èxügüxü i taxuüma i togü nüxü cuáxü na ñuxãcü äëxgacü na yïixü i nümax. Natürü ngëma togü i tama tatanüxü ixüxücèx rü cuèxruügu chayaxüacüma namaã nüxü chixu i ore na woo nüxü nadaunügu rü ñoma tama nüxü nadaugüxürüü na yïixücèx, rü woo nüxü naxínüëgu rü tama nüxü na nacuèxgüxücèx. Rü ngëmaãcü namaã nüxü chixu na tama nüxü naxoexücèx i nacüma i chixexü rü tama Tupana nüxü nüxü ngechaüxücèx i norü pecadugü –ñanagürü.

Ngechuchu rü meã nanangoxëë ga yema ore ga cuèxruü ga toecüchigagu ixuxü

(Mt 13.18-23; Lc 8.11-15)

¹³ Rü Ngechuchu ñanagürü nüxü: –¿Pema rü ta èxna tama nüxü pecuèxgü na tacüchiga yïixü i ngëma ore i cuèxruü i nüxü chixuxü? ¿Rü ñuxücürüwa tá nüxü nacuèxgü i ngëma togü? ¹⁴ –Rü yixema toexe, rü yixema tixi ya ore i mexü unagüxe. ¹⁵ –Rü nangëxma i duüxügü i guma triguchire ga namagu yixünerüü ixügüxü. Rü nümagü rü nüxü naxínüë i ore i mexü, natürü yixcama marü nüxü naxínüëguwena, ngëma nangu i Chataná rü nüxna nanapu i ngëma ore i mexü ga noxri yaxögüxü. ¹⁶ –Rü togü rü ngëma triguchire ga nutatanügu yixünerüü nixügü. Rü ngëmagü nixi i nüxü ínüëxü i ore i mexü, rü taãëacüma nayauxgüxü. ¹⁷ –Natürü ngëma na tama aixcüma nagu naxínüëxü i ngëma ore, rü paxaächitama nayaxögü. Rü ngëmacèx i yixcama ngëxguma ngëma oregagu guxchaxütgü nüxü üpetügu rü èxna duüxütgü naxchi aiegu, rü nüxü narüxoe i ngëma ore ga noxri yaxögüxü. ¹⁸⁻¹⁹ –Rü togü rü guma triguchire ga toranecügu yixünerüü nixügü. Nümagü nixi i nüxü ínüëxü i ngëma ore i mexü, natürü ñoma i naãneãrü ngëmaxügücèx naxoegaãëgü rü norü dïeruguma narüxínüë, rü nanaxwëxegü i nüxü na nangëxmaxü i muxüma i to i norü ngëmaxügü. Rü guxüma i ngëma rü nüxü nüxü inayarüngümaëxëë i ngëma ore i mexü rü nüxü nüxü narüxoexëë na tama naxügüãxücèx i ngëma mexü i Tupana nüxü naxwëxexü. ²⁰ –Rü togü rü guma triguchire ga mexü ga waixüümügu yixünerüü nixügü. Ngëmagü nixi i nüxü ínüëxü i ore i mexü rü nayauxgüxü rü meã Tupana naxwëxexüãcüma maxëxü. Rü nümaxü rü guma trigu ga 30 püxü nawa ínguxuchinerüü nixügü. Rü nümaxü rü guma 60 püxü nawa ínguxuchinerüü nixügü. Rü nümaxü rü guma 100 püxü nawa ínguxuchinerüü nixügü –ñanagürü.

Ore ga omügu ixuxü

(Lc 8.16-18)

21 Rū yexgumarūū ta ñanagürü nüxū: –ǵÉxna nuã tanange i wūxi i omū na wūxi i caichãütüügu rü éxna wūxi i pechicatüügu na yaxūcuchixūcèx? Tama ngémaãcü nixī, erū wūxi i omū rü dauxnagu tanaxūnagū na ngema inabaxixūcèx. 22 –Rū ngëxgumarūū ta i guxūma i ƣacū iicūxū, rü yixcūra rü duūxūgū rü tá nüxū nacuèxgūama. Rū guxūma i ngéma ñuxma duūxūgūcèx èxūguxū rü tá nangoxoma i yixcūra. 23 –Rū yixema àchixégūxe, jrū nüxū taxīnūē i ngéma ore! –ñanagürü. 24 Rū yexgumarūū ta ñanagürü nüxū: –jMeã naga pexīnūē i ngéma nüxū pexīnūèxū! Rū ngéma pema naga na pexīnūèxūrūū tá nixī i Tupana i pexna naxããxū i cuèx. Rū naetū tá poraãcü pexū narüngūxèē. 25 –Rū pemaã nüxū chixu, rü texé ya aixcūma naga ñnūxè i ñãã ore i mexū rü Tupana rü yexeraãcü tá tüxū nüxū nacuèxèē. Natürü yixema tama naga ñnūxè i ñãã ore rü Tupana tá tüxna nanayaxu i ngéma íraxū i cuèx i tüxū ngëxmachiréxū –ñanagürü.

Ore ga triguchire ga rüxūxūgu ixuxū

26 Rū Ngechuchu rü ñanagürü ta: –Pemaã tá nüxū chixu i wūxi i ore i cuèxruū na nüxū pecuáxūcèx na ñuxãcü àèxgacū na yīixū ya Tupana. Rū wūxi ya yatū rü waixūmūgu nanato ya triguchire. 27 –Rū nūma ya yatū rü chūtacū nape rü moxūãcü ínarūda, rü yoxni ya yima triguchire rü narūxū rü niyachigū. Natürü nūma ya yatū rü tama nüxū nacuèx na ñuxãcü na naxūxū rü na nayaxū. 28 –Rū ngémaãcü i ngéma waixūmū rü nūèchamatama nanaxūxèē ya yima triguchire. Rū naätūgūxira narūxū rü yixcama i nachacu rü ngémawena nachacuwa nanguxū i norū o. 29 –Rū ngëxguma marū yadauxgu i ngéma norū o, rü nanabuxu erū marū nawa nangu i norū buxgū –ñanagürü.

*Ore ga motachachiregu ixuxū
(Mt 13.31-32; Lc 13.18-19)*

30 Rū ñanagürü ta ga Ngechuchu: –Rū Tupanaarū ore rü yexera nixūchigū ǵRū nanaƣacūraxū rü ƣacūgu tanangu? 31-32 –Rū ñoma wūxi ya motachachire ya waixūmūgu itoxūnerūū nixī. Rū woo guxūnema ya nanetūchirexū narūxíramaē, natürü ngëxguma inatoxgu, rü narūxū rü naya ñuxmata guxūma i togū i nanetūxū nayexera. Rū nachacūū rü nita, rü woo werigū rü natanūgu nixūachiãū –ñanagürü.

*Cuèxruūgu ixuxū ga oremaã nidexa ga Ngechuchu
(Mt 13.34-35)*

33 Rū yemaãcü ga Ngechuchu rü muxūma ga nayexgumaãchiraūxū ga ore ga cuèxruūgūmaã nanangūexèē ga duūxūgū. Natürü yema cuèxruūgū rü tama yema duūxūgūarū cuèxū nangupetū. 34 Rū ore ga cuèxruūgu ixuxūxīcatama nixī ga norū nguxèētae. Rū yixcama ga yexguma nanūxīcèxgūgu, rü norū ngūexūgūcèx meãma nanangoxèē ga guxūma.

*Ngechuchu rü buanecūxū rü yuapexū ínayachaxāchixèē
(Mt 8.23-27; Lc 8.22-25)*

35 Rū yematama ngunexūgu ga marū nachūtachaūgu, rü Ngechuchu rü ñanagürü nüxū ga norū ngūexūgū: –jNgīxã rü naxtaxaarū tocūtūwa taxī! –ñanagürü. 36 Rū yexguma duūxūgūna yéma inaxīãchi. Rū norū ngūexūgū rü Ngechuchuxū nigagū nagu ga guma ngue ga marū nawa nayexmane. Rū yexgumarūū ta ga togū ga duūxūgū rü náigū ga nguegūgu ínayaxūmūcūgū. 37 Rū yexguma yaxāūyane rü inaxū ga wūxi ga buanecū ga taxūchicū. Rū yema na nataxūchixū ga buanecū, rü guma nguegu niyauxcuchichigū

ga yuape, rü yexma nabaxüügüchaü. ³⁸ Natürü ga Ngechuchu rü guma ngeuchinüwa wüxi ga cüxeruügu naca, rü yéma nape. Rü ínanabaixgügü, rü ñanagürügü nüxü: —Pa Ngúexêëruüx, ¿éxna curü me nixí na nuxma íbaxüügüxü? —ñanagürügü. ³⁹ Rü yexguma ínarüda ga Ngechuchu. Rü buanecüna nachogü rü ñanagürü nüxü ga guma naxtaxa: —¡lyarüchiane rü íyachaxáchi! —ñanagürü. Rü ínayachaxáchi ga buanecü rü guxüwama ínachaxanemare. ⁴⁰ Rü yemawena ga Ngechuchu rü norü ngúexüügüxü ñanagürü: —¿Tüxcüü ngémaacü poraacü pemuê? ¿Ñüxma rü ta éxna tama aixcüma peyaxögü? —ñanagürü. ⁴¹ Natürü nümagü ga norü ngúexüügü rü poraacü namuê. Rü nügüna nacagüe rü ñanagürügü: —¿Texe éxna nixí ya daa rü èjxrcü ya buanecü rü yuape rü naga naxínüëxü? —ñanagürügü.

5

Yatü ga Gadarácūāx ga ngoxogü nawa yexmagüxi (Mt 8.28-34; Lc 8.26-39)

¹ Rü naxtaxaarü tocutüwa nangugü ga Gadaraanewa. ²⁻³ Rü yexguma marü nguewa ínaxüegu ga Ngechuchu, rü yéma naxcèx nixü ga wüxi ga yatü ga ngoxo nawa yexmaxü. Rü yema yatü rü duüxëgüchiquéxewa ne naxü, yerü yexma nixí ga yanaxauchigünexüxü. Rü taxüexüma nanguxü na tayanáixü, woo cadenamaã. ⁴ Rü woo muëxpüxcüna cadenamaã nayanèixparagü rü nayanèixchacüügü, natürü nüma rü guxüguma íraxügu ínacacauügüama, rü yemaacü taxüexüma nanguxü. ⁵ Rü ngunecü rü chütacü rü yuetachiquéxetanügu rü naxpüxgügu nanaxauchigüane. Rü yexma nanacaean, rü nutamaã nügügu napogü. ⁶ Natürü yexguma yaxügutama Ngechuchuxü nadëuxgu, rü naxcèx ínañaachi, rü napéxegu nayacaxápxüxü. ⁷ Rü aita naxüacüma ñanagürü nüxü: —¿Tüxcüü nuã choxü cuyachixewe, Pa Ngechuchux, Pa Tupanaxüchi Nanex? Rü Tupanaegagu cuxü chacèèxü na tama ngüxü choxü quingexêëxü —ñanagürü. ⁸ Rü yemaacü nidexa ga yema ngoxo yerü Ngechuchu rü marü ñanagürü nüxü: —Pa ngoxox, ¡naxüxü nawa ya yima yatü! —ñanagürü. ⁹ Rü yexguma ga Ngechuchu rü nüxna naca, rü ñanagürü: —¿Tacü nixí i cuéga? —ñanagürü. Rü nüma ga ngoxo nanangáxü, rü ñanagürü: —Muxüchixü nixí i chauéga, erü tamu i tomox —ñanagürü. ¹⁰ Rü poraacü Ngechuchuxü nacèèxügü na tama ínawoxüäxüxcèx ga yema naãnewa. ¹¹ Rü yema nachicaarü ngaicamana ga naxpüxpechinüwa rü nayexmagü ga muxüma ga cuchigü ga yéma chibüexü. ¹² Rü yemacèx ga yema ngoxogü rü Ngechuchuxü nacèèxügü, rü ñanagürügü: —¡Ngema cuchitanüwa toxü namugü na nagu tachocuxüxcè! —ñanagürügü. ¹³ Rü Ngechuchu rü: —Ngü —ñanagürü. Rü yexguma ga yema ngoxogü rü guma yatüwa ínachoxü, rü yema cuchigügu nayachocu. Rü yema cuchigü ga wixgu 2000 íxügüxü rü ínaxüächi, rü naxtaacutüarü mëxpüxüwa nayarüyuxgü. Rü yexma nayi. ¹⁴ Rü yema cuchigüarü dauruügü rü íãnewa nabuxmü. Rü íãnewa rü yema íãnearü ngaicamana ípeagüxü ga duüxügütanüwa nüxü nayarüxügügü ga yema üpetüxü. Rü ga duüxügü rü ínayadaugü. ¹⁵ Rü yexguma Ngechuchu íyexmaxüwa nangugügu, rü yéma nüxü nadaugü ga guma yatü ga ngoxoäxchirécü. Rü yéma narüto, rü naxáxchiru, rü meãma naãèxü nacuéx. Rü poraacü nañaixáchiãëgü ga duüxügü. ¹⁶ Rü yema cuchigüarü dauruügü ga nüxü daugüxü ga tacü na nüxü ngupetüxü ga guma yatü ga ngoxoäxchirécü rü tacü nüxü na ngupetüxü ga yema cuchigü, rü yema nixí

ga togü ga duüxügümaã nüxü ixugüexü ga guxüma ga yema ngupetüxü. ¹⁷ Rü yexguma yemaxü naxinüëgu ga duüxügü, rü inanaxügüe ga Ngechuchuxü na nacëëxügüxü ga na inaxüüxücëx ga yema naãnewa. ¹⁸ Rü yexguma wenaxäru ngegu yaxüegu ga Ngechuchu, rü guma yatü ga ngoxoãxchirëcü, rü nüxü nacëëxü na Ngechuchuwe naxüxücëx. ¹⁹ Natürü ga Ngechuchu rü tama nanaxwëxe, rü ñanagürü nüxü: —¡Cuchiüwa naxü rü cutanüxümaã nüxü yarüxu i guxüma i ngëma cuxcëx naxüxü ya Cori ya Tupana, rü ñuxäcü nüxü na cungechaütümüxü! —ñanagürü. ²⁰ Rü nüma ga guma yatü rü inixü. Rü inanaxügü ga guxüma ga Decaporíchiuanewa yexmagüene ga ñanegüwa nüxü na yaxuxü ga yema Ngechuchu naxcëx üxü. Rü guxüma ga duüxügü rü nabaixächiaëgü.

Yáiruxacüchiga rü yema nge ga Ngechuchuchirugu ingögücüchiga (Mt 9.18-26; Lc 8.40-56)

²¹ Rü yexguma ngegu naxtaxaarü tocutüwa nataegugu ga Ngechuchu, rü muxüma ga duüxügü rü naxcëx yéma nangutaquëxegü. Rü nüma rü naxtaapechinüwa nayexma. ²² Rü yexguma yéma nayexmayane, rü yéma naxütawa nangu ga ngutaquëxepataüärü äëxgacü ga Yáirugu äegacü. Rü yexguma Ngechuchuxü nadëuxgu, rü napëxegu nanangücuchi. ²³ Rü poraacü nüxü nacëëxü, rü ñanagürü nüxü: —Chauxacü rü ituraxüchi. Rü chanaxwëxe i ngema cuxü na ngixü cuyarüngögüxücëx na ngixcëx yataanexücëx rü namaxüxücëx —ñanagürü. ²⁴ Rü yexguma ga Ngechuchu rü nawe narüxü. Rü muxüma ga duüxügü inayaxümücügü. Rü yéma nayaxüxtügü. ²⁵ Rü yema muxü ga duüxügütanüwa iyexma ga wüxi ga nge ga 12 ga taunecü idaawecü namaã ga na naxägüechaxü. ²⁶ Rü muxüma ga duturugü ngixü naxüxügü rü poraacü ngüxü ngixü ningexëëgü. Rü yemaacü natücëxma ngixü iguxëë ga guxcü ga ngirü dïeru. Natürü tama ngixcëx nitaaneega, rü niyexeraguchigüama ga ngirü daawe. ²⁷ Rü üpaacü togüëxwa Ngechuchuchigaxü ixinü. Rü yemacëx yéma ixü. Rü natanüwa ga yema muxüma ga duüxügü rü Ngechuchuweama ne ixü rü naxchirugu iyangögü. ²⁸ Yerü ñaxügu irüxinü: —Ngëxguma chi naxchiruxümare chingögügü, rü chi chauxcëx nitaane —ñaxügu iruxinü. ²⁹ Rü yexgumatama inayachaxüchi ga ngigü, rü nüxü iyacuëxächi ga ngixinewa ga na ngixcëx yataanexü. ³⁰ Natürü ga Ngechuchu rü nüxü nicuëxächi ga na nawa inaxüüxü ga pora. Rü naxcëx nadauegu ga yema muxüma ga duüxügü, rü nüxna naca, rü ñanagürü: —¿Texé tixi ya chauxchirugu ingögüxe? —ñanagürü. ³¹ Rü norü ngüexügü nanangäxügü, rü ñanagürügü: —Cuma nüxü cudau i ñuxre i duüxügü ngema cuxü na yaxütügüxü rü ngëxguma rü ta:

“¿Texé ya choxü ingögüxe?” ñacuxü —ñanagürügü. ³² Natürü ga Ngechuchu rü nüxü nidaugüächiana na tüxü nadauxücëx ga na texé na tiixü ga guxema nüxü ingögüxe. ³³ Rü yexguma ga yema nge rü ngirü muümaã yaduruxäcüma naxütawa ingu, yerü nüxü icuëx ga tacü na ngixü ngupetüxü. Rü napëxegu iyacaxäpüxü, rü aixcümäxüchi namaã nüxü iyaxu ga guxüma. ³⁴ Rü nüma ga Ngechuchu rü ñanagürü ngixü: —Pa Chauxacüx, curüme erü cuyaxö. ¡Rü taäëcüma iixü, erü marü naxüxü i curü daawe! —ñanagürü. ³⁵ Rü yexguma iyadexayane, yéma nangugü ga ñuxre ga natanüxügü ga guma ngutaquëxepataüärü äëxgacü rü ñanagürügü nüxü: —Cuxacü rü marü iyu. ¿Tüxcüü nüxü cuchixeweecha ya Ngüexëëruü? —ñanagürügü. ³⁶ Natürü ga Ngechuchu rü tama nüxü nacuáxchaü ga yema duüxügüarü dexa. Rü

yemacèx guma ngutaquèxepataũârũ ãèxgacũxũ ñanagũrũ: —jTãxũ i cumũxũ, rũ yaxõmare! —ñanagũrũ. ³⁷ Rũ yexguma ga Ngechuchu rũ ñayagagũ ga Pedru rũ Chaũtiãgu rũ Cuãũ ga Chaũtiãgueneẽ. Natũrũ tama nanaxwèxe na texe ga togue nawe rũxũxũ. ³⁸ Rũ yexguma guma ngutaquèxepataũârũ ãèxgacũpatawa nangugũgu, rũ Ngechuchu nũxũ nadau ga na ñyacuxcuxũ rũ poraãcũ aita naxũeãcũma naxauxexũ ga duũxũgũ. ³⁹ Rũ guma ñpatagu naxũcu ga Ngechuchu, rũ ñanagũrũ: —¿Tũxcũũ ñpicuxcu rũ ngẽmaãcũ pexauxe? Ngẽma bucũ rũ tama iyu. Rũ ipemare —ñanagũrũ. ⁴⁰ Rũ nũxũ nacugũecũrãxũãma ga duũxũgũ. Natũrũ nũma ga Ngechuchu rũ ñãxtũwa nanamugũ ga guxũma. Rũ yema bucũnatũcèx naca rũ ngĩe, rũ yema namũcũgũ, rũ namaã nixũcu ga ñayexmaxũwa ga yema bucũ. ⁴¹ Rũ ngĩxmèxgu nayayauxãchi, rũ ñanagũrũ ngĩxũ: —Tarita cumi —ñanagũrũ. Rũ ngẽma ore rũ ñaxũchiga nixĩ:

“jInachi, Pa Bucũ, ñacharũgũ cuxũ!” ñaxũchiga nixĩ. ⁴² Rũ yexgumatama ga yema bucũ ga 12 ga taunecũ ngĩxũ yexmèxcũ, rũ ñrũda rũ ñyaxũ. Rũ poraãcũ nãbaixãchiãègũ ga duũxũgũ. ⁴³ Natũrũ ga Ngechuchu rũ poraãcũ nũxna nanachũxu na taxũemaãma nũxũ yaxugũexũcèx ga yema ngupetũxũ. Rũ ñũxũchi nanamu na ngĩxũ naxũwemũgũxũcèx ga yema bucũ.

6

Nacharétuwa nayexma ga Ngechuchu

(Mt 13.53-58; Lc 4.16-30)

¹ Rũ yema inaxũãchi ga Ngechuchu, rũ guma ñãne ga Nacharétu ga nawa nayaxũnewatama naxũ. Rũ norũ ngũexũgũ rũ nawe narũxĩ. ² Rũ yexguma ngũxchigaarũ ngunexũwa nanguxgu rũ inanaxũgũ ga na nangũexèẽtaexũ ga ngutaquèxepataũwa. Rũ yema muxũma ga duũxũgũ ga yema irũxĩnũexũ, rũ nãbaixãchiãègũ. Rũ nũgũna nacagũe rũ ñanagũrũgũ: —¿Ngextã naxcèx nangux i guxũma i ngẽma nguxèẽtae? ¿Rũ ngextã nanayaxu i ngẽma cuèx? ¿Rũ ñũxãcũ nanaxũ i ngẽma mexũgũ i taxũgũ i naxũxũ? ³ —¿Taux èxna ñãã yĩxũ i carpinteru i Ngechuchu, i Mariãne, ya Chaũtiãgu rũ Yũche rũ Chimãũ rũ Yudaeneẽ ixĩcũ? ¿Rũ taux èxna i naèyèxgũ rũ nuxma tatanũgu naxãchiũgũxũ? —ñanagũrũgũ. Rũ yemacèx ga yema duũxũgũ rũ tama naga naxĩnũeãã. ⁴ Natũrũ ga Ngechuchu rũ ñanagũrũ nũxũ: —Wũxi i Tupanaãrũ orearũ uruũ rũ guxũwama i duũxũgũ rũ nũxũ nangechaũgũ. Natũrũ norũ ñãnewatama rũ natanũxũgũtanũwatama rũ napatawatama rũ tama aixcũma nũxũ nangechaũgũ —ñanagũrũ. ⁵ Rũ yemacèx taxuacũma yema nanaxũ ga muxũma ga mexũgũ ga Tupanaãrũ poramaã naxũxũ. Rũ noxretama ga duũxũgũ ga ñdaaweexũxũxĩcatama ningõgũ rũ naxcèx nayataanexèègũ. ⁶ Rũ nãbaixãchiãè ga Ngechuchu, yerũ yema duũxũgũ rũ tama nũxũ nayaxõgũ.

Ngechuchu rũ norũ ngũexũgũxũ nimugũ na nũxũ yanaxugũexũcèx ga Tupanachiga

(Mt 10.5-15)

Rũ Ngechuchu rũ guma ngaicamagũne ga ñãnexãcũgũgu nixũgũchigũ, rũ nayangũexèẽtanũ ga duũxũgũ. ⁷ Rũ naxcèx naca ga yema 12 ga norũ ngũexũgũ, rũ inanaxũgũ ga na namuãxũ ga taxrechigũ. Rũ nũxna nanaxã ga pora na ñawoxũxũcèx ga ngoxogũ. ⁸ Rũ nũxna naxãga ga na taxuũma ñyangèxũcèx ga norũ namawaxũ, rũ bai ga choca rũ bai ga pãũ rũ bai ga norũ ñièru. Rũ nanaxwèxe ga naxnetũxũxĩcatama na ñyangèxũxũ. ⁹ Rũ namaã nũxũ nixu na nacuaixcuxũ ga norũ chapatu. Natũrũ tama nanaxwèxe ga taxre ga naxchiru na ñyangèxũxũ. ¹⁰ Rũ ñanagũrũ nũxũ: —Rũ ngèxguma wũxi

ya ñānewa wūxi ya ĩgu pechocuxgu, ĩrū ngēxma pepegu ñuxmata pema ñuxgu ngema ipexiāchix nawa ya yima ñāne! ¹¹ —Rū ngēxguma ngexnerūine ya ñānewa tama meā pexū nayauxgūchaūgu rū tama pexū inaxīnūēchaūgu, ĩrū ĩpechoxū i ngema! Rū ngēxguma ipexiāchigu, ĩrū ipenapagu i perū ūxaxūcutū na ngēmawa nūxū nacūēxgūxūcēx na nataxūchixū tá i norū poxcu i ngēxguma naguxgu i naāne! —ñānagūrū. ¹² Rū yexguma inaxiāchi ga norū ngūēxūgu. Rū duūxūgūmaā nūxū nixugūe ga na nūxū naxoexūcēx ga nacūma ga chixexū rū Tupanacēx na nadaugūxūcēx. ¹³ Rū ĩnanawoxū ta ga muxūma ga ngoxogū. Rū chixūmaā yachagūācūma nanameēxēē ga muxūma ga ĩdaaweexū.

*Nayu ga Cuáŭ ga baiŭxēēruŭ
(Mt 14.1-12; Lc 9.7-9)*

¹⁴ Rū Ngechuchuchigaxū naxīnū ga āēxgacū ga Erode, yerū guxūwama duūxūgū poraācū nachiga nidexagu. Rū yexguma ga Erode rū ñānagūrū: —Rū ngēma Ngechuchu nixī i Cuáŭ i baiŭxēēruŭ ĩxīxū rū wena namaxū, rū ngēmācēx nixī i nūxū nangēxmaxū i pora na naxūāxūcēx i ngēma taxū i mexū i Tupanaārū poramaā naxūxū. ¹⁵ Natūrū ga togū rū ñānagūrūgū: —Nuxcūmaūcū ga orearū uruŭ ga Eria nixī —ñānagūrūgū. Rū togū rū ñānagūrūgū: —Wūxi i Tupanaārū orearū uruŭ i nuxcūmaŭgūxūrū nixī —ñānagūrūgū. ¹⁶ Natūrū yexguma yemaxū naxīnūgu ga Erode, rū ñānagūrū: —Rū ngēma Ngechuchu nixī i Cuáŭ ga chorū churaragūxū chidayenaxāxēēchirēxū, rū ñuxma rū wenaxārū namaxū —ñānagūrū. ¹⁷ Rū yema ñānagūrū ga Erode yerū marūchirēx Cuáŭxū niyaxu rū poxcupataŭgu cadenamaā nayachota. Rū yemaācū nanaxū ngīgagu ga naxmēx ga Erodía ga naēneē ga Piripimēxchirēx ĩxīcū ga ngīxū napucū ga Erode. ¹⁸ Yerū ūpaacū ga Cuáŭ rū Erodemaā ñānagūrū: —Tama name i cuxmēxū cuyaxīxēē i cueneēmēx —ñānagūrū. ¹⁹ Rū yemacēx ga Erodía rū poraācū Cuáŭchi ĩxai rū inaxwēxe ga na yamáāxū, natūrū poraācū ngīxū naguxcha. ²⁰ Yerū ngīte ga Erode rū Cuáŭxū namuŭ, yerū nūxū nacūēxchirēx na wūxi ga yatū ga mecū rū ūnecū na yīŭxū, rū yemacēx nixī ga naētūwa nachogūxū. Rū yexguma Cuáŭārū orexū naxīnūgu ga Erode, rū naxoegaāē, natūrū meā nūxū ĩnarūxīnū. ²¹ Natūrū wūxi ga ngunexū nawa nangu na ngīxū natauxchaxū na yamáāxūcēx ga Cuáŭ, ga yexguma Erodearū taunecūarū ngunexūwa nanguxgu rū wūxi ga peta ga taxū naxūxgu naxcēx ga norū ñatūgumaēgūxū ga āēxgacūgū, rū norū churaragūarū āēxgacūgū rū yema Garirēaanecūŭax ga corīgū ga taxūgū. ²² Rū yema petawa iyaxūcu ga Erodíaxacū, rū yema petatanūxūpēxewa iyañāāchixūchigūxū. Rū poraācū norū me iyixī ga Erode rū norū petatanūxūgū. Rū yemacēx ga nūma ga āēxgacū ga Erode rū ñānagūrū ngīxū ga yema pacū: —ĭChoxna naxcēx naca i ŭacū i cunaxwēxexū, rū tá cuxna chanaxā! —ñānagūrū. ²³ Rū aixcūmaxūchi ngīmaā ĩnaxuneta, rū ñānagūrū: —Ngēxūrūūxū i ŭacū i choxna naxcēx cuçaxū rū tá cuxna chanaxā, woo ngāxūgu i chorū naāne yixīgu —ñānagūrū. ²⁴ Rū nūxna iyaxūgachi, rū ngīēna iyaca, rū ngīgūrūgū: —ĭTacū i cunaxwēxexū na naxcēx ĩchaçaxū? —Ngīgūrūgū. Rū ngīē ngīxū ĩngāxū, rū ngīgūrūgū: —ĭNaxcēx ĩnaca i Cuáŭ ya baiŭxēēruŭēru! —ngīgūrūgū. ²⁵ Rū yexgumatama ga yema pacū rū paxa iyaxūcu ga āēxgacūxūtawa rū ngīgūrūgū: —Chanaxwēxe i ñuxmatama paxa wūxi ya poratugu choxna cunaxā i Cuáŭ ya baiŭxēēruŭēru —ngīgūrūgū. ²⁶ Rū nūma ga āēxgacū rū poraācū ĩnayarūmaāchi, natūrū yema

norü petatanüxpëxewa marü ngĩmaã na inaxunetaxüçèx, rü tama ngĩxü na-womüxëèchaü. ²⁷ Rü yemacèx ga Erode rü yexgumatama yéma inapoxcuxüwa nanamu ga wüxi ga churara na naxütawa nangeaxüçèx ga Cuáüëru. ²⁸ Rü poxcupataüwa naxü ga yema churara, rü Cuáüxü nidaeru. Rü wüxi ga poratugu äëxgacüxütawa nanange ga yema naëru. Rü yema pacüna nanaxä. Rü ngĩma rü ngĩëna iyaxä. ²⁹ Rü yexguma yemaxü nacuáchigagügu ga norü ngüexügu ga Cuáü, rü yéma poxcupataüwa nayayauxgü ga naxüne, rü inayatëxgü.

Ngechuchu rü nanachibüexëè ga 5000 ga yatügü
(Mt 14.13-21; Lc 9.10-17; Cu 6.1-14)

³⁰ Rü yemawena rü yema norü ngüexügu ga yamugüxü rü Ngechuchumaã nangutaquëxegü. Rü namaã nüxü nixugüe ga guxüma ga yema naxügüxü rü yema nanguxëètaegüxü. ³¹ Rü Ngechuchu rü ñanagürü nüxü: —jNuã pexĩ, rü ngĩxä, wüxi i nachica i ngextá taxüema íxãpataxüwa taxĩ, na paxaãchi ngëxma yarüngügüxüçèx! —ñanagürü. Rü yema ñanagürü yerü namu ga duüxügü ga yéma ingugütanücüüxü rü woeguxü ga togü. Rü yemacèx ga Ngechuchu rü norü ngüexügu rü woo na nachibüexüçèx rü nangechicagü. ³² Rü yemacèx wüxi ga nguegu nichoü, rü noxrüwama wüxi ga nachica ga taxüema íxãpataxüwa naxĩ. ³³ Natürü muxüma ga duüxügü nüxü nadaugü ga yexguma inaxĩachigu, rü nüxü nacüexgü ga texégü na yĩxü. Rü yemacèx guxüne ga guma ñanegücüãx ga duüxügü, rü dauxchitagu nibuxmü rü napëxegu nayayi. ³⁴ Rü yexguma nguewa inaxüegu ga Ngechuchu, rü nüxü nadau ga yema muxüma ga duüxügü. Rü nüxü nangechaütümügü yerü ñoma carnerugü ga ngearü dauruüãxgüxürüü nixigü. Rü inanaxügü ga na nangüxëèãxü ga muxüma ga norü ore. ³⁵ Rü yexguma marü nayáuanegu, rü norü ngüexügu rü naxcèx naxĩ, rü ñanagürügü: —Marü nayáuanexüchi rü ñaã rü wüxi i nachica i taxüema nagu äpataxü nixĩ. ³⁶ —Rü ngëmacèx name nixĩ i ícuyamugü i duüxügü na namapechinüwa ipeagüxü i duüxügüxütawa rü ñanexãcügü ya ngaicamagünewa naxixüçèx na ngema norü õnacèx yataxegüxüçèx —ñanagürügü. ³⁷ Natürü ga Ngechuchu rü nanangãxü, rü ñanagürü nüxü: —jPematama penaxüwemü! —ñanagürü. Rü nümagü nanangãxügü rü ñanagürügü: —¿Éxna cunaxwëxe i 200 tachinü i diëru naguxü i pãücèx nüxü tayataxexü na ngëmamaã tanachibüexëèxüçèx? —ñanagürügü. ³⁸ Rü yexguma ga Ngechuchu rü ñanagürü nüxü: —¿Ñuxre i pãü pexü nangëxma? jRü ípeyadëux! —ñanagürü. Rü yexguma íyadaugüãgu, rü ñanagürügü nüxü: —Toxü nangëxma i wüximëxpüx i pãü rü taxre i choxni —ñanagürügü. ³⁹ Rü yexguma ga Ngechuchu rü duüxügüxü namu na ñuxrechigü nügüxütawa rütogüxüçèx ga maxëtëxewa. ⁴⁰ Rü inarütogü ga 100 chigü rü 50 chigü ga duüxügü. ⁴¹ Rü yexguma ga Ngechuchu rü nanade ga yema wüximëxpüx ga pãü rü yema taxre ga choxni. Rü daxügüxü ga naãnegu nadawenüãcüma Tupanana moxë naxä. Rü inanabücu ga yema pãü, rü norü ngüexügüna nanana na yema duüxügüxü yanuãxüçèx. Rü yema taxre ga choxni rü ta guxüma ga yema duüxügüxü nüxü nayanuxëè. ⁴² Rü guxüma nachibüe ñüxmata meãma nüxü yangu. ⁴³ Rü yemawena rü 12 ga pexchigü nanapagüamatama namaã ga yema pãü rü choxni ga íyaxügüxü. ⁴⁴ Rü yema yéma pãügü ngõxgüxü rü 5000 ga yatügü nixĩ.

Dexátügu nixü ga Ngechuchu
(Mt 14.22-27; Cu 6.16-21)

45 Rū yemawena ga Ngechuchu rü duñxũgũxũ ÿamugũyane rü wũxi ga ngegu nayachũxẽẽ ga norũ ngũexũgũ na yoxni naxtaxaarũ tocutũwa Bechaidawa naxĩxũcẽx. 46 Rū yexguma duñxũgũxũ ÿamugũguwena, rü mẽxpũnewa naxũ ga Ngechuchu na yẽma yayumũxẽxũcẽx. 47 Rū yexguma marũ nachũtagu, rü naxtaxaarũ ngãxũtũwa nayexmagũ ga norũ ngũexũgũ. Rū Ngechuchu rü nũxĩcatama dauxchitawa nayaxũãchi. 48 Rū nũxũ nadau na guxchaxũãcũma yaxãgũxũ ga norũ ngũexũgũ, yerũ ga buanecũ rü nawaama nabuxuchi. Rū yexguma marũ yangunechaũgu, rü Ngechuchu rü dexãétũgu nawe narũxũ. Natũrũ ñoma nũxũ naxũpetũchaũxũrũũ nũgũ nixĩxẽẽ. 49-50 Rū yexguma norũ ngũexũgũ nũxũ daugũgu ga dexãétũgu na yaxũxũ, rü nagu narũxĩnũẽ ga wũxi ga naxchiximare na yĩxũ. Rū yemacẽx aita naxũe, yerũ guxũma nũxũ nadaugũ rü porãcũ nãbaixãchiãẽgũ. Natũrũ yexgumatama ga Ngechuchu rü namaã nidexa rü ñanagũrũ nũxũ: —¡Peporae! Rū chomachirẽxtama chixĩ. ¡Tãxũ i pemuñẽxũ! —ñanagũrũ. 51-52 Rū ngegu nixũe, rü inarũxó ga buanecũ. Natũrũ nũmagũ ga norũ ngũexũgũ rü nãbaixãchiãẽgũmare yerũ woo nũxũ na nadaugũxũ ga yema mexũ ga Tupanaãrũ poramaã naxũxũ ga Ngechuchu ga yexguma yema pãũ yamuxẽẽgu, natũrũ tama nũxna nacũe x-ãchie na Tupana Nane na yĩxũ yerũ nũxũ naguxcha na yaxõgũãxũ.

Yenecharétuanewa Ngechuchu nanameẽxẽẽ ga idaaweexũ
(Mt 14.34-36)

53 Rū yexguma marũ yanguũgu ga naxtaawa, rü Yenecharétuanewa nangũgũ. Rū yexma naxãnacũgu nanangaxũgũ ga naweũ. 54 Rū yexguma nguewa ñnachoũgu, rü yexgumatama ga duñxũgũ rü nũxũ nicuẽxãchitanũ ga Ngechuchu na yĩxũ. 55 Rū yema naãnewa rü guxũne ga ñgũwa nabuxmũ ga yema duñxũgũ. Rū yexguma nũxũ nacũxgũgu ga ngextã na nayemaxũ ga Ngechuchu, rü yẽma norũ carũgũgu naxcẽx nanagagũ ga idaaweexũ. 56 Rū guxũwama ga ngextã ÿanguchigũxũwa ga Ngechuchu, ga ñãnexãcũgũwa rü ñãnegũ ga itaxũnewa, rü ñãnepechinũwa, rü yexma ñtamũpechinũgu naxcẽx nayamugũ ga idaaweexũ. Rū nũxũ nacẽexũgũ na tama nũxna nachũxãxũcẽx na naxchirupechinũgũmare yangõgũgũxũcẽx. Rū guxũma ga yema nũxũ ingõgũexũ, rü naxcẽx nitaanegũ.

7

Tacũ nixĩ i Tupanapẽxewa duñxũgũxũ chixexẽẽxũ
(Mt 15.1-20)

1 Rū Ngechuchucẽx naxĩ ga Parichẽgũ namaã ga ñuxre ga ngũexẽẽruũgũ ga mugũwa nguxẽẽtaegũxũ ga Yerucharẽũwa ne ñxũ. 2 Rū yexguma ñuxre ga Ngechuchuarũ ngũexũgũxũ nadaugũgu ga tama Yudiũgũcũma na yangũxẽẽgũxũ, rü tama Yudiũgũ yauxmẽxgũxũrũũ na nayauxmẽxgũxũ naxũpa na nachibũexũ, rü chixri nachiga nidexagũ. 3 Yerũ nũmagũ ga Parichẽgũ rü guxũma ga togũ ga Yudiũgũ rü nagu naxĩ ga norũ oxigũcũma na nayauxmẽxiraxũ na yemaãcũ Tupanapẽxewa nũgũ yamexẽẽgũxũ naxũpa ga na nachibũexũ. 4 Rū ngẽxguma taxepataũwa ne naxĩxgu ga nũmagũ rü tama nachibũe ega tama ngẽmaãcũ nũgũ nayauxmẽxiragu. Rū nangẽxma i muxũma i togũ i nuxcũmaũxũ i nacũmagũ. Rū ngẽmacẽx nagu naxĩ i ngẽma nacũmagũ na Tupanacẽx nayauxgũãxũ i norũ pochiyugũ rü basugũ rü paneragũ rü pechicaxũgũ. 5 Rū yemacẽx ga yema Parichẽgũ rü ngũexẽẽruũgũ rü Ngechuchuna nacagũ, rü ñanagũrũgũ: —¿Tũxcũũ i

curü ngúexüügü i tama nagu naxixü i ngëma tórü oxigücüma rü tama toma tayauxmëxgüxürüü nayauxmëxgüxü naxüpa na nachibüexü? –ñanagürügü.

⁶ Natürü Ngechuchu nanangäxü rü ñanagürü: –Pa Duüxügü ya Pegü Nax-aixcümaraügüxe, rü aixcüma pechiga nixi ga yema ore ga nuxcümaücü ga Tupanaärü orearü uruü ga Ichaxía ümatüxü ga ñaxü:

“Ñaä duüxügü rü naäxmaãmare choxü nicuëxüügü, natürü naäëwa rü tama chaugu narüxinüë. ⁷ Rü taxuwama name na ngëmaäcü natüçëma choxü yacuëxüügüxü. Erü guxüma i ngëma norü nguxëëtae rü yatügüarü mugümare nixi, rü tama aixcüma chorü mu nixi”,

ñaxü. ⁸ –Rü pema i ñuxma rü aixcüma nüxü perüxoe i Tupanaärü mugü na nagu pexixüçëx i ngëma duüxügücümamare ixixü –ñanagürü. ⁹ Rü yexgumarüü ta ñanagürü nüxü: –Pema rü penangexrü i Tupanaärü mugü na pecümagügutama pexixüçëx. ¹⁰ –Yerü ga Moïché rü ñanagürü:

“¡Tüxü nangechaü ya cunatü rü cue!”

ñanagürü. Rü ñanagürü ta:

“Texé ya tümanatümaã rü ëxna tümaëmaã chixexü ixugüxe, rü äëxgacü tá tümamaã nanaxuegu na tayuxüçëx”,

ñanagürü. ¹¹ –Natürü pema rü ñaperügüü:

“Marü name ega wüxi ya yatü nanatüxü rü naëxü ñaxgu: ‘Taxucürüwama chorü ngëmaxümaã cuxü charüngüxëë, erü guxüma i chorü ngëmaxü rü marü Tupanana chanaxä’,” ñaxgu. ¹² –Rü ngëxguma texé ngëma ñagügu, rü pexçëx rü marü namexü na tama tümanatüxü rü tümaëxü tarüngüxëëxü.

¹³ –Rü ngëmaäcü ipeyanaxoxëë i Tupanaärü mugü, na nagu pexixüçëx i pecümagütama i togüwa pexüexëëxü. Rü ngëxgumarüü ta muxüma i to

i pecümagü i ngëmarüü ixixügu pexi –ñanagürü. ¹⁴ Rü yexgumawena duüxügüçëx naca ga Ngechuchu, rü ñanagürü nüxü: –¡Meã choxü iperüxinüë,

rü nüxü pecuá i ñaä chorü ore! ¹⁵ –Rü taxuüma i tacü i düxétüwa ne üxü rü taëxwa ixücuxü nixi i Tupanapëxewa tüxü chixexëëxü. Natürü ngëma taäëwa ne üxü, rü ngëma waxi nixi i tüxü chixexëëxü i Tupanapëxewa. ¹⁶ –

Rü ngëxguma pixächixëgu, jrü nüxü pexinüë i ngëma ore! –ñanagürü. ¹⁷ Rü yexguma Ngechuchu duüxügüna ixügachigu rü ipatagu naxücxugu, rü norü ngúexüügü nüxna nacagü nachiga ga yema nguxëëtae. ¹⁸ Rü nüma rü ñanagürü

nüxü: –¿Pema rü ta ëxna tama nüxü pecuëxéga i ngëma? ¿Éxna tama i nüxü pecuáxü na taxuüma i tacü i düxétüwa ne üxü rü taëxwa ixücuxü yixü i

Tupanapëxewa tüxü chixexëëxü? ¹⁹ –Erü guxüma i ngëma düxétüwa ne üxü rü taëxwa ixücuxü, rü tama taäëwa nangu. Natürü taanüwa naxümare na yix-

cama taxünewa ínaxüxüçëx –ñanagürü. Rü yemaäcü nüxü nixu na guxüma i ñna rü namexü na nangöxü. ²⁰ Rü ñanagürü ta: –Rü ngëma duüxüäëwa ne

üxü, rü ngëma waxi nixi i Tupanapëxewa nachixexëëxü. ²¹⁻²² –Erü norü aixepewa i naäëwa nixi i ne naxüxü i muxüma i chixexügü. Rü ngëma

nixi i chixexügü na naxinüxü, rü naxüneärü ngúchaüwe na naxüxü, rü na nangixü, rü na namáëtaxü, rü naí i ngëmaã na inapexü, rü togüarü

ngëmaxü na nüxü nanguchaüxü, rü chixexü na naxüxü, rü na yadoratëxáxü, rü chixexü i nacümagüga na naxäüxü, rü na yaxäüxächiwëxexü, rü na nax-

oregütëxáxü, rü nügü na yacuëxüxü, rü tama meã naäëxü na nacuáxü. ²³ –Rü guxüma i ngëma chixexügü rü duüxüärü aixepewa nixi i ne naxixü, rü

ngëma nixi i Tupanapëxewa nachixexëëxü –ñanagürü.

Wüxi ga ngecü ga to ga nachüäñecüäx ga Ngechuchuauxü yaxöcühiga (Mt 15.21-28)

24 Rū yemawena rū ñāne ga Tīru nawa yexmaxū ga naānewa naxū ga Ngechuchu. Rū yéma wūxi ga Īpatawa nangu, natūrū tama nanaxwēxe na texé nūxū cuāxū ga yéma na nanguxū. Natūrū taxuacūma nūgū inīcux. 25 Rū paxama nūxū icuāchiga ga wūxi ga nge ga ngīxācūwa ngoxo yexmēxcū. Rū yéma ixū, rū Ngechuchupēxegu iyacaxāpūxū. 26 Rū yema nge rū to ga nachīñānecūāx ga Chiropenīchiucūāx iyixī. Rū Ngechuchucēx iyaxū, rū nūxū icēēxū na ngīxācūwa ĩnatēxūchiāxūcēx ga yema ngoxo. 27 Natūrū ga Ngechuchu rū ñānagūrū ngīxū: —Name nixī i taxacūgūxūxīra tachibūexēē. Erū tama name i taxacūgūna tanayaxu i norū ōna na airugūna naxāxūcēx —ñānagūrū. [Rū yema ñānagūrū yerū nūmagū ga Yudīgū rū nūgū nixugūe na Tupanaxācūgūxūchi yixīgūxū rū yema togū rū ñoma airugūrū na yixīgūxū.] 28 Natūrū ngīma ga yema nge rū inangāxū, rū ngīgūrūgū: —Aixcūma nixī i curū ore, Pa Corix, natūrū woo airugū rū ta nanangōx i ngēma ōnatūchi i mechatūgū nayixēēxū i ngēma Īpataarū yoraxacūgū —ngīgūrūgū. 29 Rū yexguma ga Ngechuchu rū ñānagūrū ngīxū: —Aixcūma name nixī i ngēma nūxū quixuxū. Rū marū name i cutaegu, erū ngēma ngoxo rū marū ĩnaxūxū ngīwa i cuxacū —ñānagūrū. 30 Rū yexguma ngīpatawa nanguxgu ga yema ngecū, rū yema ngīrū ngūrūcarewa ngīxū iyanguēū ga ngīrū bucū. Natūrū marū ngīxna ĩnaxūxū ga yema ngoxo.

Ngechuchu nanamexēē ga wūxi ga yatū ga ngauchīxēcū rū moxūcū

31 Rū Tīruanewa nataegu ga Ngechuchu. Rū Chidāūārū ñānewa naxūpetū, rū ñuxūchi Decaporīchiuaneārū ĩānegūwa rū ta naxūpetū rū ñuxmata Garīréaneārū naxtaawa nangu. 32 Rū yéma naxūtawa nanagagū ga wūxi ga yatū ga ngauchīxēcū rū moxūcū, rū nūxna naxcēx nacagū ga nūxū na yangōgūxūcēx. 33 Rū yexguma ga Ngechuchu rū noxrūwama duūxūgūna nanaga. Rū naxmachīxēgu nixuxmēx, rū naxbūxāgūmaā nūgū yawaixmēxēēacūma norū conūgu ningōgū. 34 Rū yemawena rū daxū nadawenūācūma yaxna narūngū, rū guma yatūxū ñānagūrū: —Epēta —ñānagūrū. Rū ngēma rū: “¡Ingoxna!” ñaxūchiga nixī. 35 Rū yexgumatama ningoxnamachīxē ga guma ngauchīxēcū, rū norū conū rū marū narūme rū meā nidexa. 36 Rū Ngechuchu rū duūxūgūxū namu na taxūemaāma nūxū yaxugūexūcēx. Natūrū yexguma yexeraācū duūxūgūna nachūxāgu ga na taxūemaāma nūxū yaxugūexūcēx ga nachiga rū yexeraācū nūxū nixugūeama. 37 Rū poraācū nañāixāchiāēgū ga duūxūgū, rū ñānagūrūgū: —Meāma nanaxū i guxūma rū woo ngauchīxēgūxū rū nayangoxnamachīxēgūxēē, rū ngeēxgūxū rū nayadexagūxēē —ñānagūrūgū.

8

Ngechuchu nanachibūexēē ga 4000 ga duūxūgū (Mt 15.32-39)

1 Rū wūxi ga ngunexūgu wenaxārū naxcēx naxītaquēxe ga muxūma ga duūxūgū, rū nūxū nataxuma ga norū ōnagū. Rū Ngechuchu rū norū ngūexūgūcēx naca, rū ñānagūrū nūxū: 2 —Choxū nangechaūtūmūgū i ñāā duūxūgū, erū marū tomaēxpūx i ngunexū nuā chauxūtawa nangēxmagū, rū nataxuma i nawemū i nangoxgūxū. 3 —Rū ngēxguma chi ngēmaācūmare íchayamugūgu, rū chi ngūrūāchi namagu tá nayaturae, erū nūmaxūgū rū yaxūwama ne naxī —ñānagūrū. 4 Rū norū ngūexūgū rū nanangāxūgū, rū ñānagūrūgū: —¿Natūrū ñuxācū tá tanachibūexēē i nūma i ngextā taxūema

ixãpataxüwa? —ñanagürügü. ⁵ Rü Ngechuchu nüxna naca, rü ñanagürü: —¿Ñuxre i pãu pexü nangëxma i pemax? —ñanagürü. Rü nümagü nanangãxügü, rü ñanagürügü: —Toxü nangëxma i 7 i pãu —ñanagürügü. ⁶ Rü ñuxüchi ga Ngechuchu rü duüxügüxü namu na ñaxtüanewa natogüxüçëx. Rü nanade ga yema 7 ga pãu, rü Tupanana moxë naxã. Rü ñuxüchi inanabücu, rü norü ngüexügü nanana. Rü nümagü rü duüxügüxü nayanu. ⁷ Rü nüxü nayexma ta ga ñuxre ga choxnixãcügü. Rü Ngechuchu rü Tupanana moxë naxã, rü ñuxüchi norü ngüexügüxü namu na iyanuãxüçëx. ⁸ Rü guxüma ga yema duüxügü rü meãma nachibüe ñuxmata meã nüxü yangu. Rü yexguma rü ta 7 ga pexchi nanapagü namaã ga yema íyaxügüxü. ⁹ Rü yema duüxügü ga yema chibüexü rü maneca 4000 nixí. Rü yemawena ga Ngechuchu rü duüxügüxü ímíngü. ¹⁰ Rü ñuxüchi wüxi ga nguegu nixüe namaã ga norü ngüexügü, rü Damanútaanewa naxü.

Parichéugü naxcëx ínacagü ga wüxi ga cuèxruü ga Tupanaãrü poramaã üxü
(Mt 16.1-4; Lc 12.54-56)

¹¹ Rü Ngechuchuxütawa nangugü ga Parichéugü, rü inanaxügüe ga na namaã yaporagatanücüxü. Rü nüxna nacagüe na nüxü nüxü nadauxëxüçëx ga wüxi ga cuèxruü ga Tupanaãrü poramaã naxüxü, na yemaãcü nüxü naxügüxüçëx, rü nüxü nacüexügüxüçëx ngoxi aixcüma Tupana Nane yíixü. ¹² Rü Ngechuchu rü poraãcü yaxna narüngü, rü ñanagürü: —¿Tüxcüü i ñãã duüxügü naxcëx ínacagü i wüxi i cuèxruü i Tupanaãrü poramaã üxü? Rü aixcüma pemaã nüxü chixu rü bai i wüxi i cuèxruü tá nüxü chawëx —ñanagürü. ¹³ Rü yema ñaxguwena, rü nüxna yema nixü ga yema duüxügü. Rü wenaxãrü nguegu nixüe rü nextaxaarü tocutüwa naxü.

Parichéuarü pãüarü puxëëruüchiga
(Mt 16.5-12)

¹⁴ Natürü ga norü ngüexügü rü nüxü inayarüngümaë ga norü ðna na íyangegüxü, rü wüxixicatama ga pãu nüxü nayexma ga nguewa. ¹⁵ Rü yexguma ga Ngechuchu rü nayaxucuxëgü, rü ñanagürü nüxü: —¿Düçëx, yemaã naxcëx i Parichéugüarü rü Erodëarü pãüarü puxëëruü! —ñanagürü. ¹⁶ Rü yema norü ngüexügü rü inanaxügüe na nügümaã ñagüxü: —Ngëma ñanagürü tüxü erü tama tawemü ta ítingegü —ñanagürügü. ¹⁷ Natürü ga Ngechuchu rü nüxü nacüexama na yema ñagüxü, rü yemacëx ñanagürü nüxü: —¿Tüxcüü “Tangëarü ðnaãx”, ñaperügügü? ¿Éxna ñuxma rü ta tama nüxü pecüexgüëga rü tama nüxü picüexãchitanü i ngëmachiga? ¿Éxna pexcëx naxë i ngëma? ¹⁸ Pema rü pexãëtügüchirëx, ¿rü ñuxãcü i tama nüxü pedauxü? Rü pexãmachixëgüchirëx, ¿rü ñuxãcü i tama nüxü pexínüëxü? ¿Rü éxna tama nüxna pecüexãchie ga yexguma chayamuxëëgu ga yema pãu rü choxni? ¹⁹ —Rü yexguma yema 5000 ga duüxügüxü chayanuxgu ga yema wüximëëxpüx ga pãu, ¿rü ñuxre ga pexchigü yíixü ga napagücü ga yexguma penadëxgu ga yema íyaxügüxü? —ñanagürü. Rü nümagü nanangãxügü rü ñanagürügü: —Rü 12 ga pexchigü —ñanagürügü. ²⁰ Rü ñuxüchi ñanagürü ta ga Ngechuchu: —Rü yexguma yema 4000 ga duüxügüxü chayanuxgu ga yema 7 ga pãu, ¿rü ñuxre ga pexchigü yíixü ga napagücü ga yexguma penadëxgu ga yema íyaxügüxü? —ñanagürü. Rü nanangãxügü rü ñanagürügü: —7 ga pexchigü —ñanagürügü. ²¹ Rü yexguma rü ñanagürü nüxü: —¿Rü ñuxma rü ta taütama nüxü pecüexgüëgaxü na Parichéugücüma rü Erodëcüma i chixëxüchiga yíixü i ngëma pãüarü puxëëruüga pemaã chixuxü? —ñanagürü.

Ngechuchu rü nanamexêê ga wüxi ga ngexetücü ga Bechaídawa

22 Rü yemawena rü Bechaídaarü ñānewa nangugü. Rü yéma Ngechuchuxütawa nanagagü ga wüxi ga ngexetücü. Rü nüxü nacēêxügü na nüxü yangögüxüçex. 23 Rü Ngechuchu rü guma ngexetüçümēxēgu nayayauxāchi, rü ñāneärü yéamaxüra nanaga. Rü yéma naxbüxägümaā nayayaixetüxēê, rü ñuxüchi naxētügu ningögü, rü nüxna naca ngoxi marü tacüxü nadau. 24 Rü yexguma ga guma ngexetücü rü inanaxügü ga na yadauchixü. Rü ñānagürü: —Nüxü chadau i duüxügü i ñoma naïgü i ixixünerüü ixigüxü —ñānagürü. 25 Rü yexguma ga Ngechuchu rü wenaxärü naxētügu ningögü. Rü nüma ga guma yatü rü meāma inadawenü. Rü yemaācü naxcēx nitaane rü meāma naxcēx nangox ga guxüma. 26 Rü yemawena ga Ngechuchu rü napatawa nanamu. Rü namaā nüxü nixu na tama ñānecēx nataeguxü.

Pedru nüxü nixu rü Ngechuchu nixi ya yima Tupana nüxü unetacü ya Cristu (Mt 16.13-20; Lc 9.18-21)

27 Rü yemawena rü Checharéa ga Piripuanewa yexmane ga ñānaxügüwa naxü ga Ngechuchu norü ngüexügümaā. Rü namawa rü Ngechuchu rü norü ngüexügüna naca, rü ñānagürü nüxü: —¿Ñüxü ñagüxü i duüxügü i chauchiga na texé chüixü i chomax? —ñānagürü. 28 Rü norü ngüexü nanangāxügü rü ñānagürügü: —Nangēxma i duüxügü rü:

“Cuáü ya baiüxēeruü quixi”, ñagüxü, rü togü i:

“Eria quixi”, ñagüxü, rü togü rü:

“Wüxi ga nuxcümaücü ga Tupanaärü orearü uruü quixi”, ñagüxü —ñānagürügü. 29 Rü yexguma Ngechuchu rü nüxna naca rü ñānagürü: —¿Rü pema i ñuxü ñāpegügüxü choxü na texé chüixü? —ñānagürü. Rü Pedru nanangāxü rü ñānagürü: —Cuma nixi i Cristu i Tupana cuxü unetacü quixü —ñānagürü. 30 Rü yexguma ga Ngechuchu rü norü ngüexügüxü namu na taxüemaāma nüxü yaxugüexüçex ga yema ore ga nachiga.

Ngechuchu nanaxunagü ga norü yuchiga (Mt 16.21-28; Lc 9.22-27)

31 Rü yemawena rü Ngechuchu inanaxügü ga norü ngüexügümaā nüxü na yaxuxü ga tacü tá nüxü na üpetüxü. Rü ñānagürü nüxü: —Choma i Tupana Nane na duüxüxü chüixü, rü poraäcü ngüxü tá chinge. Rü choxü tá naxoxgü i Yudiügarü äëxgacügüerugü, rü paigüarü äëxgacügü, rü ngēma ngüexēeruügü i Moïchéarü mugüwa ngüxēetaegüxü. Rü tá choxü nimēxgü, natürü tomaëxpüx i ngunexügu rü wena táxarü chamaxü —ñānagürü. 32 Rü yema ore rü meāma namaā nanangoxēê. Natürü yexguma ga Pedru rü nüxica noxrüwama Ngechuchuxü naga, rü inanaxügü ga na naxucüxēaxü na tama yemaäcü yadeaxüçex. 33 Natürü ga Ngechuchu rü nadauegu, rü norü ngüexügüxü nadawenü. Rü Pedruxü nanga, rü ñānagürü: —¡Choxna ixügachi, Pa Chatanáx! Cuma rü tama Tupana nagu rüxüñüxügu curüxüñü, erü yatügü nagu rüxüñüxügumare nixi i curüxüñüxü —ñānagürü. 34 Rü yexguma ga Ngechuchu rü norü ngüexügüçex rü duüxügüçex naca. Rü ñānagürü nüxü: —Rü ngēxguma texé chowe rüxüxüchaügu, jēcü nüxü tarüxu i tümaärü ngüchaü, rü ñoma wüxi i curucha ngixü tayaxuxürü namaā tapora i guxüma i ngüxü i chauxcēx tingexü, rü chowe tarüxü! 35 —Erü yixema tügü maxēchaxēêchaüxē rü tá tayu. Natürü yixema chaugagu rü ore i mexügagu yuxe, rü aixcüma tá tamaxü. 36 —¿Rü tacüwa nüxü namexü ya yatü ega

ngêxguma nayauxãgu i guxũma i ñoma i naãneãrũ ngêmaxũgũ, natürü norü maxũ iyanatauxêëgu? ³⁷ –Rü ngêxgumarũ ta, ¿rũ ñuxre i diëru iyangu na ngê mamaã naxcêx nataxexũ i norü maxũ i wüxi ya yatü? ³⁸ –Rü ngêxguma texé i ñaã duũxũgũ i pecaduãxgũxũ i tama yaxõgũxũpêxewa chauxcèx taxãnegu rü naxcèx taxãnegu i chorü ore, rü choma i Tupana Nane i duũxũxũ na chiĩxũ rü tá ta tũmacèx chaxãne i ngêxguma Chaunatãrũ poramaã rü norü orearü ngeruũgũ i daxũcũãx i üünegũxũmaã wenaxãrũ núma chaxũxgu.

9

¹ Rü yexgumarũ ta ga Ngechuchu rü ñanagürü nüxũ: –Aixcũma pemaã nüxũ chixu rü ñuxre i duũxũgũ i nuã ngêxmagũxũ rü tãütãma nayu ñuxmatãta nüxũ nadêũx na ñuxãcũ ãëxgacũ ya poracũ na yĩxũ ya Tupana –ñanagürü.

Ngechuchu rü toraxũãcũ nangox (Mt 17.1-13; Lc 9.28-36)

² Rü 6 ga ngunexũguwena rü Ngechuchu rü wüxi ga mèxpũnewa naxũ. Rü ñayagagũ ga Pedru rü Chaũtiãgu rü Cuãũxĩcatama. Rü yéma yema ngúexũgũpêxewa toraxũãcũ nangox ga Ngechuchu. ³ Rü niyauracũü ga naxchiru rü nacómũxũchi. Rü nataxuma i yaxchiruxũ i nüxũ cuãxũ na ngêmaãcũ nacómũxêëãxũ. ⁴ Rü nüxũ nadaugũ ga Eria rü Moĩché ga yéma Ngechuchumaã idexagũxũ. ⁵ Rü yexguma ga Pedru rü ñanagürü Ngechuchxũ: –Pa Ngúexêëruũx, namexêchi nixĩ na nuã ingêxmagũxũ. Rü tá tanaxũ ya tomaëxpũx ya dũxenü, rü wüxi ya cuxcèx, rü naĩ ya Moĩchécèx, rü naĩ ya Eriacèx –ñanagürü. ⁶ Rü yema na poraãcũ nabaixãchiãëgũxũ ga yema ngúexũgũ, rü yemacèx ga Pedru rü tama nüxũ nacuèx ga na ñuxũ ñaxũ. ⁷ Rü yexgumatama wüxi ga caixanexũ ñnarũxĩ, rü natanũgu nayangêixema. Rü yema caixanexũwa ñanaxũ ga wüxi ga naga ga ñaxũ: –Daa nixĩ ya Chaune ya nüxũ changexãxũchicü. ¡Rü nüxũ iperũxĩnũë! –ñaxũ. ⁸ Rü yexgumatama nügücũwagu ñadaueguãchitanü, rü taxúexũma ga toguexũ nadaugũ, rü Ngechuchuxũxĩcatama. ⁹ Rü yexguma ñaxĩgũgu nawa ga guma mèxpũne, rü Ngechuchu nüxna naxãga ga taxúemaãma na nüxũ yaxugũxũ ga yema yéma nüxũ nadaugũxũ, ñuxmatãta yuwa ñadaxgu ga nümax. ¹⁰ Rü yemacèx ga yema ngúexũgũ rü bexma nüxũ nacuèxgũ ga yema nüxũ nadaugũxũ. Natürü nügũna nacagũ ga ñacũchiga na yĩxũ ga:

“Yuwa ñadaxgu”, ñaxũ. ¹¹ Rü ñuxũchi ga yema ngúexũgũ rü Ngechuchuna nacagũ, rü ñanagürũgũ: –¿Tũxcũü i ngúexêëruũgũ i ore i mugũwa nguxêëtaegũxũ rü ñanagürũgũ:

“Eria tá nixĩ ya nüxĩra cuxũpa núma ücũ?” ñanagürũgũ. ¹² Rü Ngechuchu nanangãxũ, rü ñanagürü nüxũ: –Aixcũma nixĩ i Eria na nüxĩra núma naxũxũ na chauxũpa namexêëãxũcèx i guxũma. ¿Natürü tũxcũü i ore i umatũxũwa i ñaxũ:

“Rü Tupana Nane ya duũxũxũ ixĩcũ rü tá ngúxũ ninge, rü duũxũgũ rü tá nüxũ naxoe”,

ñaxũ? ¹³ Natürü i choma rü pemaã nüxũ chixu, rü Eria rü marü núma naxũ. Natürü ga duũxũgũ rü nümagü nanaxwêxegũxũãcũma poraãcũ chixri namaã nachopetü, yexgumarũü ga ore ga umatũxũwa nüxũ yaxuxũrũü –ñanagürü.

Ngechuchu nanamexêë ga wüxi ga buxũ ga ngoxo nawa yexmaxũ (Mt 17.14-21; Lc 9.37-43)

¹⁴ Rü yexguma yema togü ga norü ngúexũgũtanüwa nangugũgu, rü yéma nüxũ nadaugũ ga muxũma ga duũxũgũ ga yema ngúexũgũxũ

íchomaēguāchixũ. Rũ ñuxre ga ngúexēēruũgũ ga Moĩchēarũ mugũwa nguxēētaegũxũ, rũ yēma niporagatanũcũũ namaã ga yema ngúexũgũ. ¹⁵ Rũ yexguma Ngechuchuxũ nadaugũgu ga yema muxũma ga duũxũgũ, rũ poraãcũ nañaxĩachiãēgũ. Rũ guxũma naxcèx nibuxmũ na nũxũ yanamoxēgũxũcèx. ¹⁶ Rũ nũma ga Ngechuchu rũ nũxna naca, rũ ñanagũrũ nũxũ: —¿Tacũ nixĩ i pema namaã naxcèx íporagatanũcũũxũ? —ñanagũrũ. ¹⁷ Rũ wũxi ga yema duũxũgũ ga yēma yexmagũxũ rũ nanangãxũ, rũ ñanagũrũ: —Pa Ngúexēēruũx, nuã cuxcèx tũxũ chaga ya chaune, erũ tũmawa nangēxma i wũxi i ngoxo i tũxũ ngegaxēēxũ. ¹⁸ —Rũ ngextã ítangēxmaxũwa rũ ngēxma tũxũ yaxũxgu rũ waixũmũñanegu tũxũ naña. Rũ tarũchièx, rũ tixũxchapũta, rũ ngēxma tiyuãchi. Rũ marũ nũxũ chacèèxũ i curũ ngúexũgũ na tũmawa ínatèxũchiãxũcèx i ngēma ngoxo, natũrũ tama nũxũ inaxĩnũ —ñanagũrũ. ¹⁹ Rũ Ngechuchu nanangãxũ, rũ ñanagũrũ: —Pa Duũxũgũ i Tama Yaxõgũxũ, ¿ñuxguratãta i pemaã chanuxmaxũ rũ yaxna pemaã chaxĩnũxũ? ¡Nuã penaga ya yima bucũ! —ñanagũrũ. ²⁰ Rũ Ngechuchuxũtawa nanagagũ ga guma bucũ. Natũrũ yexguma Ngechuchuxũ nadèuxgu ga yema ngoxo, rũ guma bucũxũ naxũ ga na yayuãchixēēãxũ. Rũ yexma ñaxtũanegu nayangu. Rũ yexma nidixegugũ, rũ narũchièx. ²¹ Rũ Ngechuchu rũ guma bucũnatũna naca, rũ ñanagũrũ: —¿Rũ ñuxgumama nixĩ ga naxcèx inaxũgũxũ ga yema? —ñanagũrũ. Rũ guma bucũnatũ nanangãxũ rũ ñanagũrũ: —Nabuxgumamatama. ²² Rũ muēxpũxcũna i ngēma ngoxo rũ ùxũxetũgu rũ dexãgu nanañaũxũ na ngēmaãcũ yamáãxũcèx. Rũ ngēmacèx ega cumaã nanguxũgu na íacũ toxcèx cuxũxũ, ¡rũ cuxũ tangechaũtũmũũgũ, rũ toxũ rũngũxēè! —ñanagũrũ. ²³ Rũ yexguma ga Ngechuchu rũ ñanagũrũ nũxũ: —¿Rũ tũxcũũ “ega chomaã nanguũxgu”, ñacurũgũ? Erũ guxũma natauxcha tũmacèx ya yixema yaxõxē —ñanagũrũ. ²⁴ Rũ yexguma ga guma bucũnatũ rũ tagaãcũ ñatarũgũ: —Chayaxõ. ¡Choxũ rũngũxēè na yexeraãcũ chayaxõxũcèx! —ñatarũgũ. ²⁵ Rũ yexguma Ngechuchu nũxũ dèuxgu na muxũma ga duũxũgũ marũ yexma ngutaquèxexũ, rũ nananga ga yema ngoxo. Rũ ñanagũrũ nũxũ: —Pa ngoxo i Ngegaxēēruũ rũ Ngauchixēēēruũx, ¡choma cuxũ chamu na nawa ícuxũxũxũ ya daa bucũ, rũ tagutãma wena nagu cuyaxũcuxũ! —ñanagũrũ. ²⁶ Rũ yexguma ga yema ngoxo rũ aita naxũ, rũ wenaxãrũ guma bucũxũ niyuãchixēè. Rũ ñuxũchi nawa ínaxũxũ, rũ ñoma nayuxuchixũrũũ yēma nanatèx. Rũ yemacèx ga muxũma ga duũxũgũ rũ ñanagũrũgũ: —Marũ nayuxuchi nixĩ —ñanagũrũgũ. ²⁷ Natũrũ ga Ngechuchu rũ naxmēxgu nayayauãchi, rũ ínanadaxēè. Rũ nũma ga guma bucũ rũ inachi. ²⁸ Rũ yemawena ga Ngechuchu rũ wũxi ga ípatagu nayaxũcu namaã ga norũ ngúexũgũ. Rũ yēma nũxĩca nũxna nacagũ, rũ ñanagũrũgũ nũxũ: —Pa Corix, ¿tũxcũũ i toma rũ taxuacũma ínatèxũchi i ngēma ngoxo? —ñanagũrũgũ. ²⁹ Rũ Ngechuchu nanangãxũ rũ ñanagũrũ: —Tama ngēmaãcũmare ínatèxũchi i ngēmarũũ íxĩxũ i ngoxo. Natũrũ tanaxwèxe i Tupanana tanaxuaxũ i tórũ yumũxēwa na nũma ínatèxũchiãxũcèx. Rũ ngēmaãcũxícatama nixĩ i ínaxũxũxũ —ñanagũrũ.

Ngechuchu rũ wenaxãrũ nanaxunagũ ga norũ yuchiga
(Mt 17.22-23; Lc 9.43-45)

³⁰⁻³¹ Rũ yēma ínaxĩachi rũ Gariréaanewa nachopetũ. Natũrũ ga Ngechuchu rũ tama nanaxwèxe ga texè nũxũ na cuãxũ ga na yēma nayexmaxũ, yerũ norũ ngúexũgũxũ ínangúexēè. Rũ ñanagũrũ nũxũ: —Tupana Nane ya duũxũxũ íxĩcũ, rũ duũxũgũ tá nayayauxgũ rũ tá nayamēxgũ. Natũrũ tomaēxpũx i

ngunexũgu rü wena tá ínarũda —ñanagürü. ³² Natürü ga nümagü rü tama meã nüxũ nacuèxgü ga ñacüchiga na yĩxũ ga yema ore, rü namuũe ga nüxna na nacagüextũ.

¿Texé tá tixĩ ya guxããrũ yexera ixĩxẽ?

(Mt 18.1-5; Lc 9.46-48)

³³ Rü Capernãũãrũ íãnewa nangugü. Rü yexguma íxwa nayexmagügu, rü Ngechuchu nüxna naca, rü ñanagürü: —¿Rü tacü nixĩ ga pegümaã naxcèx piporagaetanũxũ ga namawa? —ñanagürü. ³⁴ Natürü ga nümagü rü nangeèxgümare, yerü ga namawa rü nachigagu nügümaã niporagaetanü ga texé tixũ ga natanüwa rüyexeramaèxè. ³⁵ Rü yexguma ga Ngechuchu rü ínarũto, rü naxcèx naca ga yema 12 ga norü ngüexũgü, rü ñanagürü nüxũ: —Rü ngèxguma texé nawwèxegu na guxãetüwa na taxũxũ, rü name nixĩ i noxri rü guxããrũ ñaxtümaèwa tũgü taxũxèe na guxããrũ ngüxèerũ tixũ —ñanagürü. ³⁶ Rü yemawena rü norü ngãxütanügu nayachixèe ga wüxi ga buxũ. Rü ñuxüchi nachacüügu yayauxãchiãcüma ñanagürü: ³⁷ —Rü texé ya chauégagu meã nayaxúxe i wüxi i buxũ i ñããrũ, rü choxũ nixĩ i tayaxuxũ. Rü texé ya choxũ yaxúxe, rü tama choxũxĩcatama tayaxu, natürü yima núma choxũ mucü ya Chaunatũxũ rü ta nixĩ i tayaxuxũ —ñanagürü.

Texé ya tama taxchi aixe rü torü ngüxèerũ tixĩ

(Mt 10.42; Lc 9.49-50)

³⁸ Rü yexguma ga Cuãũ rü ñanagürü nüxũ: —Pa Ngüexèerũx, nüxũ tadau ga wüxi ga yatü ga cuégagu ngoxogü íwoxũxũ. Natürü toma nüxna tanachuxu ga yema, yerü tama tatanũxũ nixĩ ga nümax —ñanagürü. ³⁹ Natürü Ngechuchu nanangãxũ, rü ñanagürü: —Tama name i nüxna na penachuxuxũ. Erü texé ya chauégagu naxúxe i wüxi i mexũ i Tupanaãrũ poramaã üxũ, rü taxucürüwama yixcama chixri chauchiga tidexa. ⁴⁰ Erü texé ya tama taxchi aixe, rü torü ngüxèerũ tixĩ. ⁴¹ Rü texé ya woo wüxitama i pochiyuãcu i dexã pexna ãxè naxcèx na chorü duũxũgü pixĩgũxũ, rü aixcüma pemaã nüxũ chixu rü tá tũxũ nangèxma i tümaãrũ ãmare —ñanagürü.

Naxãcüma nixĩ na pecadugu inguxũ

(Mt 18.6-9; Lc 17.1-2)

⁴² Rü ñanagürü ta: —Texé ya pecadugu nanguxèxè i wüxi i ñãã buxũgü i choxũ yaxögũxũ, rü tümacèx rü narümemaè chi nixĩ i noxtacüma wüxi ya nuta ya tacü tümanaxãwa tayangacuchi, rü ngèmaãcü taxtüchiüwa tũxũ tayatãe. ⁴³⁻⁴⁴ —Rü ngèxguma chi wüxi ya cuxmèx pecadugu cuxũ nguxèegu, rü name nixĩ i noxtacüma ícunadae. Erü narümemaè nixĩ i cuboxmèxãcüma cunayaxu i curü maxũ na tama guxũne ya cuxmèx ya mexünemaã nawa quitèxcuchixũcèx ya yima üxü ya ngoxogü nagu poxcuene ya taguma ixoxũne. ⁴⁵⁻⁴⁶ —Rü ngèxguma chi wüxi ya cucutü pecadugu cuxũ nguxèegu, rü name nixĩ i noxtacüma ícunadae. Erü narümemaè nixĩ i cubocutüãcüma cunayaxu i curü maxũ na tama guxũne ya cucutü ya mexünemaã nawa quitèxcuchixũcèx ya yima üxü ya ngoxogü nagu poxcuene. ⁴⁷⁻⁴⁸ —Rü ngèxguma chi wüxi ya cuxetü pecadugu cuxũ nguxèegu, rü name nixĩ i noxtacüma ícunacaxüchi. Erü narümemaè nixĩ i wüxitama ya cuxetümaã Tupana ãèxgacü íxĩxüwa quixücu, na tama guxũne ya cuxetü ya mexünemaã nawa quitèxcuchixũcèx ya yima üxü ya taguma ixoxũne ya ngoxogü nagu poxcuene i ngextã õxmigü taguma íyuxèüwa. ⁴⁹ —Rü aixcüma ñoma õnawa yucüra nagüxürũ tá nixĩ na guxãtãma guxchaxüwa chopetũxũ. ⁵⁰ —Name ya yucüra. Natürü ngèxguma chi nangeacagu, ¿rü ñuxãcü tá wenaxãrũ naxããca?

¡Rü meã pegüna pedaugü na ñoma yücüra ya taguma iyarüngeacacürüü na namexücex i perü maxü! ¡Rü meã pegümaã pemaxë! —ñanagürü.

10

Ngechuchu namaã nangüexëtae na tama namexü na texé tümamëxü ítáxü
(Mt 19.1-12; Lc 16.18)

¹ Rü yexguma ga Ngechuchu rü Capernáürü ñanewa inaxüächi. Rü Yudéaanewa naxüpetü rü ñuxmata natü ga Yudáürü tocutüwa nangu. Rü yéma rü wenaxärü naxcëx nangutaquëxegü ga duüxügü. Rü nüma rü inanaxügü ga na nangüexëtaexü guxügürüü. ² Rü ñuxre ga Parichéugü rü naxcëx naxi ga na nüxü yaxügüxcëx yerü chixexügu nanangüxëgüchaü. Rü yemacëx nüxna nacagüe, rü ñanagürügü: —¿Namexü i cuxcëx na wüxi ya yatü rü naxmëxü ñatáxü? —ñanagürügü. ³ Rü nüma nanangäxü, rü ñanagürü nüxü: —¿Rü tacü yixü ga Moiché pexü muxü? —ñanagürü. ⁴ Rü nümagü nanangäxügü, rü ñanagürügü: —Moiché nüxü nixu ga na tama nachuxuxü na wüxi ya yatü rü ñatámaxü, ega wüxi i popera i tëxgüpane ngixna naxäxgu —ñanagürügü. ⁵ Rü yexguma ga Ngechuchu rü nanangäxü, rü ñanagürü nüxü: —Rü yema na taxüegama na pexinüxügü nixi ga Moiché ga tama pexna nachüaxü ga pexmëxü na ipetáxü. ⁶ —Natürü noxriarü ügüga, rü Tupana nanaxü ga yatüxü rü ngëxü. ⁷ —Rü ngëmacëx ya yatü rü tá nanatü rü naëna nixügachi na naxmëxmaã inaxäxücëx. ⁸ —Rü ngëmaäcü i ngëma taxre rü ñoma wüxitama i duüxürüü tá nixigü. Rü marü täütáma taxre nixi, erü wüxi tátama nixi. ⁹ —Rü ngëmacëx taxucürüwa texé nügüna tayaxigachixë i ngëma taxre i Tupana nügüna mugüxü —ñanagürü. ¹⁰ Rü yexguma marü ipatawa nangügüga, rü norü ngüexügü rü wenaxärü nüxna nacagüe naxcëx ga yema. ¹¹ Rü Ngechuchu rü ñanagürü nüxü: —Rü yixema tümamëxü ítáxe rü na i ngëmaã ämaxë rü pecadu taxü ngëmaã i ngëma noxriücü i tümamëx. ¹² —Rü ngëxgumarüü ta, ega wüxi i nge ítëxtegu rü na i yatümaã naxätegu, rü ngëma rü ta pecadu ixü —ñanagürü.

Ngechuchu rü buxügüxü nameäxë
(Mt 19.13-15; Lc 18.15-17)

¹³ Rü yéma Ngechuchuxütawa tüxü nagagü ta ga ñuxre ga buxegü na tüxü yangögügüxcëx. Natürü ga yema norü ngüexügü rü inanaxügü ga tüxü na yangagüxü ga guxema tümacëxügüxü Ngechuchuxütawa gagüxe. ¹⁴ Rü yexguma yemaxü nadëuxgu ga Ngechuchu, rü naäëwa nangux, rü ñanagürü nüxü: —Chanaxwëxe i chauxütawa naxi i buxügü. ¡Rü täxü i nüxna penachuxuxü! Erü Tupana äëxgacü ñixixüwa rü tümacëx nixi ya yixema ñaã buxügürüü taxuüma i chixexüxü icuáxe. ¹⁵ —Rü aixcüma pemaã nüxü chixu rü texé ya tama wüxi i buxürüü Tupanaxü yaxüxe na tümäärü äëxgacü yixücëx, rü tagutáma nagu taxücu i ngëma naëne i Tupana äëxgacü ñixixüwa —ñanagürü. ¹⁶ Rü nüma rü tüxü naganagütanü ga guxema buäxta, rü tümäärugüga naxümëxäcüma ñanagürü tüxü: —¡Tupana pexü rüngüxëx! —ñanagürü.

Wüxi ga yatü ga ñerüxüchixü Ngechuchumaã nidexa
(Mt 19.16-30; Lc 18.18-30)

¹⁷ Rü yexguma marü inaxüächichaügu ga Ngechuchu, rü yéma naxcëx niña ga wüxi ga yatü. Rü napëxegu nayacaxäpüxü, rü nüxna naca rü ñanagürü nüxü: —Pa Ngüxëerüü ya mecüx, ¿tacü tá chaxüxü na chanayaxuxücëx i maxü i taguma güxü? —ñanagürü. ¹⁸ Rü Ngechuchu nanangäxü, rü ñanagürü

nüxü: —¿Tüxcüü, “Mecü” ñacurügü choxü? Erü Tupanaxĩcatama nixĩ ya mecü ixĩcü, rü nataxuma i to. ¹⁹ Cuma rü marü nüxü cucuèx i Tupanaärü mugü i ñaxü:

“¡Tãütáma cumáëta, rü tãütáma nai i ngemaã icupe, rü tãütáma cungtèèx, rü tãütáma doraxü quixu i togüchiga, rü tãütáma quidoratèèx, rü tümaga naxĩnũ ya cunatũ rü cue!”

ñaxü —ñanagürü. ²⁰ Rü yexguma ga guma yatü rü ñanagürü nüxü: —Pa Ngúxëëruüx, rü chorü bucúmatama meã chanaxaure i guxüma i ngëma mugü i nüxü quixuxü —ñanagürü. ²¹ Rü yexguma ga Ngechuchu rü nüxü nangechaüãcúma nüxü nadawenü, rü nanangãxü rü ñanagürü: —Rü wüxixicatama cuxü nataxü. ¡Rü íixü, rü namaã yataxe i guxüma i curü ngëmaxüügü, rü ñuxüchi togü i ngearü ngëmaxüãxgüxüna naxã i ngëma curü natanü! Rü ngëmaãcü tá cuxü nangëxma i cuchica i daxüguxü i naãnewa. Rü ngëmawena rü marü name i chowe curüxü —ñanagürü. ²² Natürü nüma ga guma yatü rü nanaxixãchiãë ga yexguma nüxü naxĩnũga ga yema ore. Rü nangechaüãcúma ínixü, yerü namuxüchi ga norü yemaxüügü. ²³ Rü Ngechuchu rü nüxü nidaugüãchi, rü ñanagürü norü ngúxëügüxü: —Naguxchaxüchi tá nixĩ na Tupana ãëxgacü íyíxüwa na yachocuxü i ngëma díëruãxüchigüxü —ñanagürü. ²⁴ Rü nabaixãchiãëgü ga norü ngúxëügü namaã ga yema ore. Natürü ga Ngechuchu rü wenaxãrü namaã nüxü nixu, rü ñanagürü: —Pa Chauxacügüx, ñuxãcü wüxi i guxchaxüchixü nixĩ na Tupana ãëxgacü íyíxüwa na yaxücuxü i wüxi i duüxü. ²⁵ —Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüãrü yexera narüguxchamaë naxcèx i wüxi i duüxü i díëruãxüchixü na yaxücuxü i ngextã Tupana ãëxgacü íxíxüwa —ñanagürü. ²⁶ Rü yexguma yemaxü naxĩnũëgu ga norü ngúxëügü, rü yexeraãcü nabaixãchiãëgü. Rü nügüna nacagüë, rü ñanagürügü: —¿Rü texé tá ëxna tixĩ ya nayaxúxe i maxü i taguma gúxü? —ñanagürügü. ²⁷ Rü Ngechuchu rü nüxü nadawenü, rü nanangãxü rü ñanagürü nüxü: —Yatügü rü taxuacúma nügü namaxëë, natürü Tupanaãxü rü natauxcha i ngëma, erü Tupanacèx rü nataxuma i tacü i guxchaxü —ñanagürü. ²⁸ Rü yexguma inanaxügü ga Pedru ga na yadexaxü, rü ñanagürü nüxü: —Toma rü marü yéma tanawogü ga guxüma ga torü yemaxüügü na cuwe tarüxíxüdcèx —ñanagürü. ²⁹⁻³⁰ Rü Ngechuchu nanangãxü, rü ñanagürü: —Aixcüma pemaã nüxü chixu rü texé ya chaugagu rü ore i maxëëëruüggagu tümapatana, rü ëxna tümãëneëgüna, rü ëxna tümãëyëxgüna, rü ëxna tümãëna, rü ëxna tümãanatüna, rü ëxna tümãaxëcügüna, rü ëxna tümããnegüna ngema ixüxë, rü tá tanayaxu i tümãärü natanü. Rü aixcüma ñuxma i ñoma i naãnewa rü tá tanayaxu i 100 ëxpüxcüna ya tümapatagü, rü tümãëneëgü, rü tümãëyëxgü, rü tümãëgü, rü tümãaxëcügü, rü tümããnegü. Natürü ngëxgumarüü tá ta tanayaxu i ngúxüügü i togü tá tüxü ingexëëgüxü. Natürü yixcamaxüra i daxüguxü i naãnewa rü tá tanayaxu i maxü i taguma gúxü. ³¹ —Natürü muxüma i nümaxü i ñuxma ñoma i naãnewa duüxügü wixpëxewa ügüxëëxü, rü daxüguxü i naãnewa rü Tupana tá wixweama nanaxügüxëë. Rü muxüma i nümaxü i ñuxma ñoma i naãnewa duüxügü wixweama ügüxëëxü, rü daxüguxü i naãnewa rü Tupana tá wixpëxewa nanaxügüxëë —ñanagürü.

*Ngechuchu rü wenaxãrü nanaxunagü ga norü yuxchiga
(Mt 20.17-19; Lc 18.31-34)*

³² Rū Yerucharéŭwaama naxī. Rū nūma ga Ngechuchu rū norū ngúexŭgúpéxegu nixū. Rū nūmagū rū nabaixāchiāēgū, rū yema togū ga duŭxŭgū ga wixweama āgūxŭ rū namuŭē. Rū Ngechuchu rū wenaxārū noxrūwama naxcèx naca ga yema 12 ga norū ngúexŭgū. Rū inanaxūgū ga namaā nūxŭ na yaxuxŭ ga ŭacū tá nūxŭ na ngupetūxŭ. ³³ Rū űanagūrū nūxŭ: —Pema nūxŭ pecuèx na marŭ ingaicaxŭ na Yerucharéŭwa ingugūxŭ. Rū ngema rū duŭxŭgū rū tá chixri chomaā nachopetū. Rū paigūarū āēxgacūgū rū ngúexēeruŭgū i ore i mugūwa nguxēētaegūxŭna tá choxŭ naxuaxŭgū. Rū nūmagū rū tá chomaā nanaxuegugū na chayuxŭ, rū tá ngēma Dumacŭāxgūna choxŭ namugū. ³⁴ Rū ngēmagū tá nixŭ i chaugu idauxcūraŭgūxŭ. Rū tá choxna nacuaixgūe, rū tá choxna nanaçuaixcagū, rū tá choxŭ nayuxēēgū. Natūrū tomaēxpūx i ngunexŭguwena táxarū chamaxŭ —űanagūrū.

*Chaŭtiāgu rū Cuāŭ rū wūxi ga ngŭxēēcèx űnacagū
(Mt 20.20-28)*

³⁵ Rū Ngechuchucèx naxī ga Chaŭtiāgu rū Cuāŭ ga Zebedéu nanegū, rū űanagūrūgū nūxŭ: —Pa Ngúexēeruŭx, tanaxwèxe i toxcèx cunaxū i ngēma ngŭxēē i naxcèx tá cuxna taçaxŭ —űanagūrūgū. ³⁶ Rū nūma rū nūxna naca, rū űanagūrū: —ŭTacū nixŭ i penaxwèxexŭ na pexcèx chanaxūxŭ? —űanagūrū. ³⁷ Rū űanagūrūgū: —Rū ngēxguma āēxgacūxŭ quingucuchigu, rū tanaxwèxe na wūxie i toma rū curū tūgūnecūwawa tarūtoxŭ, rū togue i curū ŭoxwecūwawa —űanagūrūgū. ³⁸ Rū Ngechuchu nanangāxŭ, rū űanagūrū nūxŭ: —Pema rū tama nūxŭ pecuèx na ŭacūcèx űpeçaxŭ. ŭRū pexŭ chi natauxchaxŭ i na peyaxaxŭxŭ i ngēma axexŭ i ŭxchiūxŭ i choma tá chixaxūxŭ? ŭRū namaā chi peporaexŭ i ngēma ngúxŭ i tá chingexŭ? —űanagūrū. ³⁹ Rū nūmagū nanangāxŭgū rū űanagūrūgū: —Ngēmaācū, namaā tá taporae —űanagūrūgū. Rū Ngechuchu nanangāxŭ, rū űanagūrū nūxŭ: —Aixcūma tá nixŭ i chauxrūŭ peyaxaxŭxŭ i ngēma axexŭ i ŭxchiūxŭ rū chauxrūŭ ngúxŭ na pingegūxŭ. ⁴⁰ —Natūrū ngēma chorū tūgūnecūwawa rū chorū ŭoxwecūwawa na perūtogūxŭcèx, rū tama choxmèxwa nangēxma na pexna chanaxāxŭ, erū Chaunatŭ tá tūxna nanaxā ya yixema tūmacèx űyīxē —űanagūrū. ⁴¹ Rū yexguma yemaxŭ naxŭnūēgu ga yema togū ga 10 ga ngúexŭgū, rū Chaŭtiāgumaā rū Cuāŭmaā nanuē. ⁴² Natūrū Ngechuchu naxcèx naca rū űanagūrū nūxŭ: —Pema nūxŭ pecuèx i togū i nachīŭűanegūwa rū nangēxmagū i āēxgacūgū i nūgū nacuèxgūgu na namexŭ na nuācū namuāxŭ i norū duŭxŭgū. Rū ngēma āēxgacūgū i taxŭgū rū norū duŭxŭgūarū yora nūgū nixŭgūxēē. ⁴³ —Natūrū tātūma ngēmaācū nixŭ i petanūwa. Erū ngēxguma texé naxwèxegu na guxāārū yexera na tīxŭ i petanūwa, rū name nixŭ i noxri rū guxāarū ngŭxēeruŭ na tīxŭ. ⁴⁴ —Rū ngēxguma chi texé i petanūwa naxwèxegu na tūmamūcūgūeru na tīxŭ, rū name nixŭ i noxri rū guxūma i tūmamūcūgūarū ngŭxēeruŭ na tīxŭ. ⁴⁵ —Rū woo i choma i Tupana Nane na duŭxŭxŭ chiŭxŭ, rū tama togū choxŭ rŭngŭxēēxŭcèx nixŭ i nūma chaxūxŭ. Natūrū nūma chaxŭ na duŭxŭgūxŭ charŭngŭxēēxŭcèx rū naxcèx ichanaxāxŭcèx i chorū maxŭ, na ngēmaācū chanaxŭtanūxŭcèx na norū pecadugūna űnanguxŭxŭcèx i muxŭma i duŭxŭgū —űanagūrū.

*Bartiméu ga ngexetūcūxŭ narūmexēē ga Ngechuchu
(Mt 20.29-34; Lc 18.35-43)*

⁴⁶ Rū Yericūarū űānewa nangugū. Rū Ngechuchuwe narūxŭ ga norū ngúexŭgū rū muxŭma ga togū ga duŭxŭgū. Rū yexguma guma űāneārū

guxwa nangugüchaŋgu ga nüxna na Ínachoŋüxü, rü yéma namacüwawa narüto ga wüxi ga ngexetücü ga Bartiméügu äegacü ga Timéü nane. ⁴⁷ Rü yexguma guma ngexetücü nüxü Ínügu ga Ngechuchu ga Nacharétücüäx na yíxü ga guma yéma üpetücü, rü inanaxügü ga poraäcü aita na naxüxü, rü: —Pa Ngechuchu ya Dabítanüxüx, ¡cuxü changechaütümüü! —ñanagürü. ⁴⁸ Natürü muxüma ga yema duüxügü rü Ínanangaxüchigüama ga na iyanangeáxüçex. Natürü ga nüma rü yexeraäcü aita naxüama, ñaxümaä: —Pa Dabítanüxüx, ¡cuxü changechaütümüü! —ñaxümaä. ⁴⁹ Rü yexguma ga nüma ga Ngechuchu rü inayachiächi, rü ñanagürü: —¡Naxcèx peca! —ñanagürü. Rü guma ngexetücücèx nacagü, rü ñanagürügü: —¡Nataäe rü inachi! Rü cuxcèx nixí i naçaxü —ñanagürügü. ⁵⁰ Rü guma ngexetücü rü yexacü nanaña ga norü gáuxüchiru. Rü inayuxnagü rü Ngechuchucèx nixü. ⁵¹ Rü Ngechuchu nüxna naca, rü ñanagürü nüxü: —¿Tacü nixí i cunaxwèxexü na cuxcèx chanaxüxü? —ñanagürü. Rü nüma ga guma ngexetücü, rü nanangäxü, rü ñanagürü: —Pa Ngúexèeruüx, chanaxwèxe na chidauchixü —ñanagürü. ⁵² Rü yexguma ga Ngechuchu, rü ñanagürü nüxü: —¡Ëcü, íxü! Rü marü cuxcèx nitaane erü cuyaxö —ñanagürü. Rü yexgumatama ga guma ngexetücü rü nidauchi, rü Ngechuchuwe narüxü ga namawa.

11

Ngechuchu rü Yerucharéügu naxücu (Mt 21.1-11; Lc 19.28-40; Cu 12.12-19)

¹ Rü marü Yerucharéüärü ngaicamana nangugü ga Oríbunecüarü Mèxpüneärü ngaicamana yexmagüne ga Íänexäcügü ga Bechagué rü Betániä. Rü yexguma yéma nangugügu, rü Ngechuchu nanamu ga taxre ga norü ngüexügü. ² Rü ñanagürü nüxü: —¡Gua tóru toxmèxtawa ngèxmane ya Íänexäcüwa pexí! Rü ngèxguma nawa pengugügu, rü ngèxma tá nüxü peyangau i wüxi i buru i ngèxma ngaxüxü i taguma texé natagu aunagüxü. ¡Rü peyawèxü rü nuä penaga! ³ —Rü ngèxguma texé pexna caxgu na ñacücèx peyawèxüxü i ngèma buru, ¡rü tümamaä nüxü pixu rü ñapegügü:

“Torü Cori nanaxwèxe, rü ñuxma tátama nanataeguxèè”, ñapegügü! ⁴ Rü yéma naxí. Rü yexma namacüwagu nüxü nanangaugü ga yema buru ga wüxi ga Ípataèxüttagu ngaxüxü. ⁵ Rü ñuxre ga duüxügü ga yéma yexmagüxü rü nüxna nacagüe, rü ñanagürügü: —¿Tacü Ípexüe? ¿Rü tüxcüü peyawèxü i ngèma buru? —ñanagürügü. ⁶ Rü nümagü ga yema ngüexügü, rü yema ore ga Ngechuchu namaä nüxü ixuxüäcü nanangäxügü. Rü yemacèx tama nüxna nanachuxgü. ⁷ Rü natagu nanachagümü ga naxchirugü. Rü yemaäcü Ngechuchuxütawa nanagagü. Rü nüma ga Ngechuchu rü natagu naxaunagü. ⁸ Rü muxüma ga duüxügü rü naxchirumaätama nanachamagü. Rü togü rü naixätügü ga naänewa nadaüxümaä nayaçhamagü. ⁹ Rü yema duüxügü ga napèxegu ägüxü rü yema togü ga wixweama ägüxü, rü tagaäcü ñanagürügü: —¡Cuxü ticüexüxügü! ¡Rü naxüüne ya daa Tupanaegagu núma ücü! ¹⁰ ¡Rü äëxgacü ya Dabíruxü namecümäxüchi ya daa äëxgacü ya núma ngcü! ¡Rü pema ru ta, Pa Daxücüäx, rü nüxü picüexüxügü ya Tupana! —ñanagürügü. ¹¹ Rü Yerucharéügu naxücu ga Ngechuchu, rü tupauca ga taxüncèx nixü. Rü meäma guxüwama inanadauaxüne. Rü ñuxüchi yema norü 12 ga ngüexügümaä Betániäärü Íänecèx nataegu, yerü marü nayáuane.

Ngechuchu rü orix ga iguera ga ngearü oðxümaã chixexü naxuegu (Mt 21.18-19)

¹² Rü moxüãcü yexguma Betániãwa inaxiãchigu ga Ngechuchu rü nataiya. ¹³ Rü yaxügu nüxü nadau ga wüxi ga orix ga iguera ga äãtuxü. Rü nüma ga Ngechuchu rü naxcex nixü na iyadauãxücex rü ngoxi nayexmex ga norü o. Natürü yexguma naxütawa nanguxgu, rü taxuüma inayangau, rü naãtuxüxĩcatama, yerü tauta norü owa nangu. ¹⁴ Rü yexguma rü ñanagürü igueraxü: —¡Tagutãma texé wena cuxü tamüãrü oðx! —ñanagürü. Rü norü ngüexügu rü nüxü naxĩnüe ga yema.

Ngechuchu inawanoxü ga yema tupauca ga taxünewa taxegüxü ga duüxügu (Mt 21.12-17; Lc 19.45-48; Cu 2.13-22)

¹⁵ Rü yexguma Yerucharéüwa nangugügu, rü Ngechuchu rü tupauca ga taxünegu naxücu. Rü inanaxügu ga na inawanoxüãxü ga yema yema tacümaã taxegüxü rü naxcex taxegüxü. Rü nanangüegutanü ga norü mechagu ga yema duüxügu Tupanaarü ãmarewa mexü ga diërumaã taxegüxü rü muxtucumaã taxegüxü. ¹⁶ Rü nanachuxu ga texé tacü na yema ngepetüxü tupauca ga taxünemachiawa. ¹⁷ Rü inanaxügu ga na nangüexëëtaexü, rü ñanagürü: —Tupanaãrü ore i ümatüxüwa rü ñanagürü:

“Chopata rü guxüma i nachiüãnecüãxgüarü yumüxëpataügu tá naxãega”, ñanagürü. Natürü pema rü ngitëexgüxüpataü peyaxĩxëë —ñanagürü.

¹⁸ Natürü yexguma yemaxü naxĩnüegu ga paigüarü äëxgacügü rü ngüexëëruügu ga Moĩchéarü mugüwa ngüxëëtaegüxü, rü inanaxügüe ga naxcex na nadaugüxü ga ñuxãcü Ngechuchuxü na yamëxgüxü. Natürü duüxügu namuüë, rü yemacex taxucürüwama duüxügupegu nayayauxgü. Yerü nüma ga duüxügu rü namaã nataãxëgü ga yema Ngechuchuarü ngüxëëtae. ¹⁹ Natürü yexguma marü nayáuanegu, ga Ngechuchu rü norü ngüexügümaã nawa inachoxü ga guma ñane.

Nariñexë ga yema iguera ga ngearü oðxü (Mt 21.20-22)

²⁰ Rü moxüãcü pëxmama rü igueraxütawa nachopetü. Rü yema nüxü nadaugü ga na nañexëxü ñuxmata naxchümëãwa nangu. ²¹ Rü yexguma ga Pedru rü nüxna nacüexãchi ga yema ñeãcü ngupetüxü, rü ñanagürü Ngechuchuxü: —Pa Ngüexëëruüx, dücax i iguera ga chixexü namaã cuxuegüxü, rü marü nariñexë —ñanagürü. ²² Rü Ngechuchu nanangãxü, rü ñanagürü: —¡Nüxü peyaxögü ya Tupana! ²³ —Rü aixcüma pemaã nüxü chixu rü ngëxguma chi wüxie daa mëxpünexü tamuxgu na yaxügachixücex rü taxtü i taxüchiüwa nügu na yatãexücex, rü chi pega naxĩnü, ega aixcüma peyaxögüãcüma nüxü ngëma ñapegügu. ²⁴ —Rü ngëmacex pemaã nüxü chixu rü guxüma i tacü i naxcex ipeçaxü i perü yumüxëwa, rü name nixi na peyaxögüxü na marü penayaxuxü, rü aixcüma tá penayaxu. ²⁵ —Rü ngëxguma peyumüxëgügu, natürü nangëxmagu i tacücex texëmaã na penuëxü, ¡rü tüxü nüxü pengeçau! na Penatü ya daxügucü rü ta pexü nüxü nangeçaxücex i perü pecadugü. ²⁶ —Natürü ngëxguma pema tama tüxü nüxü pengeçauügu, rü Penatü ya daxügucü rü ta ta täütama pexü nüxü nangeçau —ñanagürü.

Ngechuchuna nacagüe na texéarü oregagu tupauca ga taxünewa nangüxëëtaexü (Mt 21.23-27; Lc 20.1-8)

²⁷ Rū yemawena rū Yerucharéúçèx nawoegu. Rū yexguma Ngechuchu rū tupauca ga taxūnegu yaxūgūchigūyane, rū naxcèx naxī ga paigūarū āēxgacūgū, rū ngūexēēruūgū ga Moīchēarū mugūwa nguḡēētaegūxū, rū Yudiūgūarū āēxgacūgūerugū. ²⁸ Rū nūxna nacagūe, rū ñanagūrūgū: —¿Texēarū mugagu nixī i cunaxūxū i ngēma nūma cuxūxū? ¿Rū texé cuxū tamu na cunaxūxūcèx i ngēma? —ñanagūrūgū. ²⁹⁻³⁰ Rū yexguma ga Ngechuchu rū nanangāxū, rū ñanagūrū nūxū: —Choma rū tá ta pexna chaca, rū ngēxguma choxū pengāxūgu i ngēma pexna naxcèx chaçaxū, rū choma rū tá ta pemaā nūxū chixu na texé choxū muxū na chanaxūxūcèx i ngēma. ¿Rū texé tanamu ga Cuáú na duūxūgūxū ínbaiūxēēxūcèx? ¿Rū Tupana yīxū ga namucū rū ēxna duūxūgūmare? —ñanagūrū. ³¹ Rū yexguma ga nūmagū rū inanaxūgūe ga nūgūmaā na yaporagatanūcūxū, rū ñanagūrūgū: —Rū ngēxguma chi:

“Tupana nūma nanamu”, ñagūgūgu, rū nūma rū chi ñanagūrū tūxū:

“¿Tūxūcūú ga tama nūxū peyaxōgūxū?” ñanagūrū chi tūxū. ³² ¿Rū ñuxūcūrūwa rū:

“Yatūgūmare nūma nanamu”, ñatarūgūgū tá? Rū yema ñanagūrūgū yerū duūxūgūxū namuē. Yerū guxūma ga duūxūgū rū nayaxōgū rū aixcūma Tupana nanamu ga Cuáú na nūxū yaxuxūcèx ga norū ore. ³³ Rū yemacèx Ngechuchuxū nangāxūgū, rū ñanagūrūgū: —Tama nūxū tacuèx ga texé nūma na namuxū ga Cuáú ga baiūxēēruū —ñanagūrūgū. Rū yexguma ga Ngechuchu rū nanangāxū rū ñanagūrū nūxū: —Choma rū ta tātáma pemaā nūxū chixu na texé choxū muxū na chanaxūxū i ngēma choxna naxcèx peçaxū —ñanagūrū.

12

Ore i puracūtanūxū i chixexūgūgu ixuxū (Mt 21.33-46; Lc 20.9-19)

¹ Rū Ngechuchu rū inanaxūgū ga ore ga cuèxruūgūgu ixuxūmaā na nangúexēētaexū. Rū ñanagūrū nūxū: —Nayexma ga wūxi ga yatū ga norū naānegu ubanecū ūcū. Rū ínanapoxegu, rū nanaxū ga wūxi ga ubaarū yauxtūxūxūchica, rū wūxi ga dauxūtaechica na meā nūxna nadauxūcèx ga guxūma. Rū ñuxūchi ñuxre ga puracūtanūxūna nūxū nadauxēē. Rū namaā nanamexēē na ngāxūgu namaā ngīxū yatoyexūcèx ga yema ubatanū. Rū ñuxūchi ga yema naāneārū yora rū to ga nachīūānewa naxū. ² —Rū yexguma nawa nanguxgu ga na yadauxū ga yema ubagū, rū guma yatū rū yéma puracūtanūxūgūxūtawa nanamu ga wūxi ga norū duūxūxū na naxcèx íyaçaxūcèx ga yema ubagū ga nūxna ūxū. ³ —Natūrū yema puracūtanūxūgū rū nayayauxgū, rū nanaçuaixgū ga guma yatūarū duūxū. Rū taxuūma ga ubagū nūxna naxāgū, rū yemaācū ínayamugū. ⁴ —Rū yexguma ga guma yatū rū to ga norū duūxūxū yéma namu. Natūrū ga guma rū nayamēxerugū, rū namaā naguxchigagū. ⁵ —Rū yexguma rū to ga norū duūxūxū yéma namu. Natūrū nayamēxgū. Rū yemawena, rū yéma nanamugū ga muxūma ga togū ga norū duūxūgū. Natūrū ga yema puracūtanūxūgū rū nayaçuaixgū ga ñuxre, rū togū rū nanadai. ⁶ —Rū yexguma rū nūxū ínayaxū ga nanexūchi ga porācū nūxū nangeçhaçūc. Rū dūxwa guma nanexū yéma namu, yerū nūma nagu naxīnūgu rū chi nanega naxīnūe ga yema puracūtanūxūgū. ⁷ —Natūrū yexguma guma cori nanexū nadaugūgu ga yema puracūtanūxūgū, rū nūgūmaā ñanagūrūgū:

“Ngēmaārū tá nixī i ñaã naãne i yixcama. ¡Rū ngīxã tayamèxgü na tóxrü na yīixüxcèx!” ñanagürügü. ⁸—Rü yemaãcü nayayauxgü, rü nayamèxgü. Rü yema ubanecüpechinüwa nayatèxgü ga naxüne. ⁹—Rü ñuxma rü pexna chaca, çpexcèx rü tacü tá naxü ya yima ubanecüarü yora namaã i ngēma puracütanüxügü i chixexügü? Rü dücax, rü ngema tá naxü, rü tá nanadai i ngēma puracütanüxügü, rü togüna tá nanaxã i ngēma ubanecü. ¹⁰—¿Taguma êxna nawa pengúe i Tupanaárü ore i úmatüxü? Erü ngēmawa rü ñanagürü: “Rü yima nuta ya mecü ya ñärü üruügü nüxü oechirécü, rü ñuxma rü yimatama nixī ya Tupana nüxīra yaxücuchicü na namaã inaxügüãxüxcèx ya Ipata. ¹¹ Rü tórü Cori ya Tupana nixī ga naxücü ga yema, rü ñuxma rü namexèchi i taxcèx”,

ñanagürü i ngēma ore. ¹² Rü yexguma ga yema paigüarü ãëxgacügü, rü ngüxèëruügü ga Moichéarü mugüwa ngüxèëtaegüxü, rü Yudiugüarü ãëxgacügüerugü, rü Ngechuchuxü niyauxgüchaü. Yerü nüxü nacuèxgü ga nachiga na yīixü ga yema ore ga cuèxruügu yaxuxü. Natürü duüxügüxü namuüë rü yemacèx taxuüma namaã naxüe. Rü nüxna yéma ñinximare.

*Ãëxgacüaxü dīerumaã naxütanüxüchiga
(Mt 22.15-22; Lc 20.20-26)*

¹³ Rü yexguma ga yema ãëxgacügü rü Ngechuchuxütawa nanamugü ga ñuxre ga norü duüxügü ga Parichéugü rü Erodetanüxügü na nüxna yacagüexüxcèx, rü ngoxi tacü rü chixexü ga dexamaã nüxü nangãxü na yemaãcü ãëxgacügüxütawa na íyaxuaxügüãxüxcèx. ¹⁴ Rü nümagü rü naxütawa naxī, rü ñanagürügü nüxü: —Pa Ngüxèëruüx, nüxü tacuèx rü aixcüma nixī i ngēma nüxü quixuxü i ore. Rü tama duüxügügamare cuxinü, erü tama norü düxétüxünegu cudawenü, natürü nacüma nixī i cungugüxü. Rü aixcüma cunangüxèë i duüxügü na Tupana naxwèxexüãcüma namaxèxüxcèx. ¡Tomaã nüxü ixu! Rü ngēma dīeru ya ãëxgacü ya tacü ya Dumacüãx totanüwa ngīxü yauxchaücü çrü namexü yīixü na nüxna ngīxü taxãxü, rü êxna tama? —ñanagürügü. ¹⁵ Natürü ga Ngechuchu rü nüxü nacüexama ga na chixexügu namaã naxīnüëxü ga yema duüxügü woo meã namaã na yanadexagüxü. Rü yemacèx ñanagürü nüxü: —¿Tüxcüü chixexügu choxü pengüxèëchaüxü? ¡Nuã ngīxü pingé i wüxitachinü i dīeru na ngīxü chadauxüxcèx! —ñanagürü. ¹⁶ Rü yéma naxütawa ngīxü nangegü ga wüxitachinü ga dīeru. Rü Ngechuchu rü ñanagürü nüxü: —¿Texèchicünèxã rü texéega nixī i ngīgu üxü? —ñanagürü. Rü nümagü nanangãxügü, rü ñanagürügü: —Dumacüãx ya ãëxgacü ya tacüchicünèxã nixī —ñanagürügü. ¹⁷ Rü yexguma ga Ngechuchu rü ñanagürü nüxü: —¡Ãëxgacüna ngīxü pexã i ngēma ãëxgacüarü ixicü, rü Tupanana ngīxü pexã i ngēma Tupanaárü ixicü! —ñanagürü. Rü yexguma yema orexü naxīnüëgu, rü namaã nahãixãchiãëgü.

*Ngechuchuna nacagüe rü ngoxi wena namaxè i duüxügü
(Mt 22.23-33; Lc 20.27-40)*

¹⁸ Rü yemawena rü Ngechuchuxütawa ínayadaugü ga ñuxre ga Chaduchéugü. Rü nümagü nixī i nüxü yaxügüxü na tagutáma wena namaxèxü i yuexü. Rü yemacèx Ngechuchuna nayacagüe, rü ñanagürügü: ¹⁹ —Pa Ngüxèëruüx, Moichéarü mugüwa rü ñanagürü: “Rü ngëxguma wüxi ya yatü naxmèx ngexacüyane nayuxgu, rü name nixī i naëneëtama ngīmaã naxãmèx i ngēma yutecü i naxümèx, na ngēmaãcü naxãxãcüxüxcèx ya naëneë ga marü yucü”,

ñanagürü ga yema ore. ²⁰—Düçèx, nayexma ga 7 ga nügüeneëgü. Rü naxâmèx ga guma yacü, natürü tauta naxâxäcüyane nayu. ²¹⁻²²—Rü yexguma ga naï ga naëneë nüxî ngîmaâ naxâmèx ga yema ngecü, natürü guma rü ta nayu rü nangexacü. Rü yexguma ga guma norü tomaëxpüx ga naëneë nüxî ngîmaâ naxâmèx, natürü yexgumarüütama nüxü nangupetü. Rü yemaäcü, gücüma ga guma 7 ga nügüeneë rü ngîmaâ naxâmèx ga yema nge. Rü gücüma nayue tauta naxâxäcüyane. Rü düxwa ngîma rü ta iyu ga yema nge. ²³—Rü dücax, ngëxguma yuexü wena maxëgu, ¿rü ngexcürüücü naxmèx tá iyixî i ngëma nge? Yerü gücüma ga guma 7 ga nügüeneëgü ngîmaâ naxâmèx —ñanagürügü. ²⁴ Rü yexguma ga Ngechuchu rü nanangäxü, rü ñanagürü nüxü: —Pema rü ípetüe erü tama nüxü pecuèx i Tupanaärü ore i umatüxü, rü tama nüxü pecuèx i ñuxäcü na naporaxü ya Tupana. ²⁵—Rü ngëxguma yuexü wena maxëgu, rü taxüetama tixâmèxgü rü èxna tixätëgü. Erü daxüçüâx i Tupanaärü orearü ngeruügürüü tá tixîgü i ngëxguma. ²⁶—Pema choxna peca i yuexüärü dagüchiga. ¿Natürü tama èxna nawa pengúe i Tupanaärü ore ga Moïché umatüxü ga naïxäcü ga iyiauxratanünechigaxü iyaxuxüwa? Erü yema orewa rü Moïchéxü ñanagürü ga Tupana:

“Choma nixî i Abräüärü Tupana, rü Ichaáarü Tupana, rü Acobuarü Tupana”, ñanagürü. ²⁷—Rü ngëma orewa nüxü tacuèx rü Tupana rü maxëxüärü Tupana nixî rü tama yuexüärü Tupana nixî, erü Tupanaärü ñnüwa rü taxüema tayu. Rü ngëmaäcü i pema rü poraäcü ípetüe —ñanagürü.

Ngëma Tupanaärü mu i guxü i norü mugüarü yexera ixixü
(Mt 22.34-40)

²⁸ Rü wüxi ga ngüexëeruü ga Moïchéarü mugüwa nguxëëtaexü, rü nüxü naxînü ga yema togü ga namücügü ga Ngechuchumaâ na íyaporagatanücüüxü. Rü nüma rü nüxü nicuëxächi ga meâma na nangäxüâxü. Rü yemacèx Ngechuchucèx nixü, rü nüxna naca, rü ñanagürü nüxü: —Pa Ngüexëeruüx, ¿ngëxürüüxü i Tupanaärü mu nixî i guxü i norü mugüarü yexera ixixü? —ñanagürü. ²⁹ Rü Ngechuchu nanangäxü, rü ñanagürü: —Ngëma Tupanaärü mu i guxü i norü mugüarü yexera ixixü, rü ñaâ nixî, ñanagürü:

“¡Iperüxinüë, Pa Iraéanecüâxgü! Rü nüma ya Cori ya tórü Tupana, rü yixicatama nixî ya tórü Cori. ³⁰ ¡Rü nüxü nangechaü ya Cori ya curü Tupana guxüne ya curü maxünemaâ, rü guxü i cuäëmaâ, rü guxü i nagu curüxinüxümaâ, rü guxü i curü poramaâ!”

ñanagürü. ³¹—Rü ngëma norü taxre i Tupanaärü mu, rü ñanagürü:

“¡Rü nüxü nangechaü i cumücü na cügü cungechaüxürüü!”

ñanagürü. Rü nataxuma i to i Tupanaärü mu i ngëmagüarü yexera ixixü —ñanagürü. ³² Rü yexguma ga yema ngüexëeruü ga mugüwa nguxëëtaexü, rü ñanagürü Ngechuchuxü: —Marü name, Pa Ngüexëeruüx, erü aixcüma nixî i ngëma nüxü quixuxü na wüxixicatama na yixü ya Tupana, rü nataxuma ya naï. ³³—Rü ngëma Tupanaxü na ingechaüxü guxüne ya tórü maxünemaâ, rü guxü i nagu rüxinüxümaâ, rü guxü i tórü poramaâ, rü nüxü na ingechaüxü i tamücü i yigü na ingechaüxürü, rü ngëma rü guxüma i carnerugü i Tupanacèx idéixü rü íguxüarü yexera narümemaë —ñanagürü. ³⁴ Rü yexguma Ngechuchu nüxü dëuxgu ga mexügu na naxînüäcüma na nangäxüâxü ga yema ngüexëeruü ga mugüwa nguxëëtaexü, rü ñanagürü nüxü: —Marü tama taxü cuxü nataxu na cunayaxuxü ya Tupana na curü äëxgacü yixüçèx

—ñanagürü. Rū yemawena rū marü taxuñma nügü naporaxëë na nüxna yacachigüxcëx.

*¿Texé nane nixĩ ya Cristu?
(Mt 22.41-46; Lc 20.41-44)*

³⁵ Rū yexguma tupauca ga taxñnewa ñangüxëëtaeyane ga Ngechuchu, rū duñxügüna naca, rū ñanagürü: —¿Tüxcüü nixĩ i ngëma ngüxëëruügü i mugüwa ngüxëëtaegüxü i ñagüxü:

“Yima Cristu ya Tupana nüxü unetacü rū nuxcümañcü ga ãëxgacü ga Dabítaa nixĩ”, ñagüxü? ³⁶ —¿Rü ñuxãcü i ngëmañcü yadexagüxü? Yerü nümatama ga Dabí, rū yexguma Tupanaãë i Üünexü naãëwa ideaxgu rū ñanagürü:

“Cori ya Tupana rū chorü Corixü ñanagürü: ‘ñuã chorü tügü necüwawa rüto ñuxmatáta nüxü charüporamaë i curü uwanügü na cuga naxññëxcëx!’ ”

ñanagürü ga yema orewa. ³⁷ —¿Natürü ñuxücürüwa i Dabítaa yixü ya Cristu, ega nümatama ga Dabí, rū norü Corimaã naxuãgu? —ñanagürü. Rū yema muxüma ga duñxügü ga yéma yexmagüxü, rū taãëcüma Ngechuchuaxü inarüxñüë.

Ngechuchu rū nüxü nixu na tama yameãrü maxüãxgüxü ga yema ngüxëëruügü ga Moïchëarü mugüwa ngüxëëtaegüxü

(Mt 23.1-36; Lc 11.37-54, 20.45-47)

³⁸ Ngechuchu rū norü ngüxëëtaewa rū ñanagürü: —¿Pexuãëgü naxcëx i ngëma ngüxëëruügü i Moïchëarü mugüwa ngüxëëtaegüxü! Erü nümagü rū norü me nixĩ i mexü i naxchirumaã na naxññëxcëx. Rū nanaxwëxegü na itamüwa duñxügü meã nüxü na rümoxcëgüxü. ³⁹ —Rü ngutaquëxepataügüwa rū norü me nixĩ i ãëxgacügümëxwëxewa na natogüxü. Rū ñonagü i taxüwa rū ngëma ñnaãrü yoraxütawa ügüxü i nachicacëx nadaugü. ⁴⁰ —Natürü tüxna nanapuxü ya tümapatagü ya yixema yutegüxe. Rū ñuxüchi nanamëxëë i norü yumüxëgü na ngëmagu nügü yacüxgüxcëx rū duñxügü nagu rüxññëxcëx na aixcüma mexügü na yixügüxü. Natürü nümagü tá nixĩ i yexeraãcü napoxcuxëü —ñanagürü.

*Yutecü ga ngearü dñëruãxcü ga Tupanacëx dñëru ngixü ixãcü
(Lc 21.1-4)*

⁴¹ Wüxicana ga Ngechuchu rū tupauca ga taxñnewa dñëruchiññü rü toxmëxtawa narüto. Rū yéma inadawenü ga ñuxãcü duñxügü yexma ngixü yanaxücuchigüxü ga norü dñërugü. Rū muxüma ga duñxügü ga idñëruãxgüxüchixü rū yexma ngixü nayarüxcuchigü ga muxüchicü ga norü dñëru. ⁴² Rū ngürü yéma ingu ga wüxi ga yutecü ga ngearü dñëruãxcü. Rū ngüma rū wüxi ga yema dñëruchiññü ngixü iyarüxcuchü ga taxretachinü ga dñëruacü ga itanücü. ⁴³ Rū yexguma ga Ngechuchu rū norü ngüxëëgüxcëx naca, rū ñanagürü nüxü: —Aixcüma pemaã nüxü chixu rū ñaã ngecü i yutecü i ngearü dñëruãxcü, rū guxü i ngëma togü i dñëruchiññü dñëru ngixü ixüxcuchigüxüññü yexera ngixü ixã. ⁴⁴ Erü guxüma i togü rū ngixü inaxãgü i ngëma nüxü iyaxügücü. Natürü ngüma ngixü natauxyane ngixü ixã i guxcüma i ngixü ngëxmëxcü i ngürü ñonanü —ñanagürü.

13

*Ngechuchu nanaxunagü na tupauca ga taxñnewa tá na napogüxü
(Mt 24.1-2; Lc 21.5-6)*

¹ Rū yexguma tupauca ga taxūnewa ínaxūxūgu ga Ngechuchu, rū wūxi ga norū ngūexūgū rū ñanagūrū nūxū: —Pa Ngūexēeruūx ¡dūcax ñuxācū nímexēchi ya daa tupauca ya itaxūne rū naxtapūxarū nutagū! —ñanagūrū.
² Natūrū Ngechuchu nanangāxū, rū ñanagūrū: —Pema nūxū pedaugū ya guxūnema ya yima tupauca ya taxūneārū ípatagū. Natūrū pemaā nūxū chixu rū aixcūma guxūnema ya daa ípatagū rū tá nagu napogūe. Rū norū nutagū rū taxucūtama nūgūētū naxūxūra, rū bai tá ya wūxi —ñanagūrū.

*Cuèxruūgū i tá nūxū idaaxū naxūpa na nagūxū i naāne
 (Mt 24.3-28; Lc 21.7-24, 17.22-24)*

³⁻⁴ Rū yemawena rū Oríbunecūarū Mèxpúne ga tupauca ga taxūneārū toxmèxtawa yexmanewa naxī. Rū yéma narūto ga Ngechuchu. Rū Pedru rū Chaūtiágu rū Cuáū rū Aūdré rū naxūtawa naxī na noxrūwama nūxna nacagūexūcèx. Rū ñanagūrūgū: —Tanaxwèxe i tomaā nūxū quixu na ñuxgu tá nangupetūxū i ngēma nūxū quixuxū. ¿Rū ¡acū tá nixī i norū cuèxruū i nawa nūxū tacuáxū ega nawa tá nanguxgu i ngēma? —ñanagūrūgū. ⁵ Rū yexguma ga Ngechuchu rū nanangāxū rū ñanagūrū nūxū: —¡Pexuāēgū na taxúema pexū womūxēxūcèx! ⁶ —Erū muxūchixū i duūxūgū tá ínangugū, rū chaugu tá nūgū nicūxgū, rū ñanagūrūgū tá:

“Choma nixī i Cristu”, ñanagūrūgū tá. Rū muxūchixū i duūxūgūxū tá nawomūxēē. ⁷ —Rū ngēxguma nūxū pexīnūēgu na nūgū nadèixū i nachīūānegū i ngaicamagūxū rū togū i nachīūānegū i yaxūgugūxū, ¡rū tāūtáma ngēmacèx pebaixāchiāēgū! Erū woetama ngēmaācū tá nangupetū. Natūrū tāūtáma naāneārū gux nixī i ngēma. ⁸ —Erū wūxi i nachīūāne rū to i nachīūānemaā tá nūgū nadai. Rū wūxi ya āēxgacūarū churaragū rū to i āēxgacūarū churaragūmaā tá nūgū nadai. Rū muxūma i nachicawa rū tá naxīāxāchiane. Rū tá taiya nangux. Natūrū guxūma i ngēma rū norū ūgūmare nixī i ngēma ngūxū i tá ínguxū. ⁹ —¡Rū meā pegūma pedaugū! Erū āēxgacūgūpèxewa tá pexū nagagū, rū ngutaquèxepataūgūgu tá pexū niçuaixgū. Rū nachīūānegūarū āēxgacūgūpèxewa tá pexū nagagū naxcèx na chorū duūxūgū na pixīgūxū. Natūrū ngēmaācū tá pexū natauxcha na ngēma āēxgacūgūmaā nūxū pixuxū i chauchiga. ¹⁰ —Natūrū naxūpa na nagūxū i naāne rū tá nūxū nixugūe i Tupanaārū ore i guxū i nachīūānegūwa. ¹¹ —Natūrū ngēxguma āēxgacūgūpèxewa pexū nagagūgu, ¡rū tāūtáma pex-oegaāēgū naxcèx na ¡acūmaā tá penangāxūxū! ¡Rū namaā nūxū pixu i ngēma ore i ngēxgumatama Tupana pexna āxū na nūxū pixuxūcèx! Erū tāūtáma pema nixī na pidexagūxū, natūrū Tupanaāē i Ūūnexū tá nixī i pewa idexaxū. ¹² —Rū nūgūeneēgūwa tátama rū āēxgacūgūxūtawa nūgū ínayaxuaxūgū na ngēmaācū tūxū nadèixūcèx. Rū ngēxgumarūū tá ta i papágū rū mamágū rū tá naxācūgūxū ínayaxuaxūgū. Rū nūmagū i naxācūgū rū tá nanatūgūmaā rū naēgūmaā nanuē, rū tá tūxū ínayaxuaxūgū na āēxgacūgū tūxū nadèixūcèx. ¹³ —Rū guxū i naānema rū duūxūgū tá pexchi naxaie naxcèx na chorū duūxūgū pixīgūxū. Natūrū yíxema naētūwa meā Tupanaāxū yaxōōmāxē, rū yíxema tá tixī ya aixcūma nayaxūxe i maxū i taguma gūxū. ¹⁴ —Rū ngēxguma nūxū pedèuxgu i ngēma āūāchixū rū āūcūmaxūchixū i chixexēeruū i ngextá tama ínaxwèxexūta na nangēxmaxū, rū ngēxguma ya yíxema Yudéaanewa ngēxmagūxe, rū tanaxwèxe i mèxpúneānema tabuxmū. Rū texé ya yíxema nūxū daumatūxe, ¡rū name nixī i meā nagu tarūxīnū i ngēma! ¹⁵ —Rū ngēma ngunexūgu texé tūmapataēxtūwa ngēxmagu, rū tama

name i tūmapatagu tayangaxi na **ƒacü** i tūmaärü ngēmaxü tayayaxuxüçèx.
 16 –Rü texé ya tūmaänewa ngēxmaxē rü tama name i tūmapatacèx tataegu na tūmachirugü tayayaxuxüçèx. 17 –Rü ngēma ngunexüügü, rü wüxi i ngechaü tá nixi i tūmacèx ya yixema ngexegü ya itacharaüügüxè rü yixema maïäcügüxè.
 18 –jRü Tupanana naxcèx peca i perü yumüxèwa na tama gáuane ixüyane pexü na nangupetüxüçèx i ngēma chixexü! 19 –Erü ngēma ngunexüügü rü poraäcü tá nangēxma i ngüxü ga noxri Tupana naäne ixüügumama taguma yexmaxü, rü ngēmawena rü tagutáma nangēxma. 20 –Rü ngēxguma Tupana tama nanoxrexèegu i ngēma ngunexüügü, rü taxúetáma tamaxü. Natürü Tupana rü marü nananoxrexèè i ngēma ngunexüügü erü tüxü nangechaü ya yixema noxrüxü tüxü nadexe. 21 –Rü ngēxguma texé pexü ñagügu:

“Düçèx, daa nixi ya Cristu”, ñagügu, rü èxn:

“Gua nixi ya Cristu”, ñagügu, jrü täxü i nüxü peyaxögüxü! 22 –Erü Cristugüneta rü Tupanaärü orearü uruügüneta tá inangügu. Rü tá nanaxügu i muxüma i cuèxruügü i taxügu. Rü ngēmaäcü, ega nüxü natauxchagu, rü tá tüxü nawomüxèégü woo ya yixema duüxègü ya Tupanatama tüxü dexe. 23 –jPexuäégü! Erü guxüma i ngēma tá ngupetüxü, rü marü naxüpa pemaä nüxü chixu.

Ñuxäcü tá nixi i ngēxguma nataegugu ya Tupana Nane ya duüxüxü ixücü (Mt 24.29-35, 42, 44; Lc 21.25-36)

24 –Natürü marü nangupetügu i ngēma ngüxüügü, rü ngēma ngunexüügü rü tá nixu ya üèxcü rü täütáma inabaxi ya tauemacü. 25 –Rü woramacurigü rü èxtagü rü tá narüyi. Rü guxüma i daxüwa ngēxmaxü rü tá naxiäxächitanü rü nachicana tá nixigachitanü. 26 –Rü ngēxguma i duüxüügü rü tá nüxü nadaugü ya Tupana Nane ya duüxüxü ixücü na caixanexügu inaxixü i guxüma i norü poramaä rü norü ngóonexümaä. 27 –Rü tá nanamu i norü orearü ngeruügü i daxücüäx na tüxü nanutaquèxexüçèx ya yixema Tupana tüxü idexechixe ya guxüwama ngēxmagüxè ñuxmatáta naäne iyacuáxüwa nangu. 28 –jperüxínüè i ñaä nguxèetae i orjx i iguerachiga, rü naxcèx pengüe! Rü ngēxguma ngexwacaxüxü i nachacüüxacügü iyarüyixgu rü naxüátügu, rü ngēmawa nüxü pecuèx na paxa tá taunecü yixü. 29 –Rü ngēxgumarüü ta, rü ngēxguma nüxü pedèuxgu na nangupetüxü i ngēma pemaä nüxü chixuxü, rü ngēmawa tá nüxü pecuèx na paxaxüchi tá inangüxü ya Tupana Nane ya duüxüxü ixücü. 30 –Rü guxüma i ngēma ñuxma pemaä nüxü chixuxü rü aixcüma tá nangupetü naxüpa na nayuexü i ngēma duüxüügü i ngēxguma maxèxü. 31 –Daxüguxü i naäne rü ñoma i naäne rü tá inayarüxo. Natürü chorü ore rü tagutáma inayarüxo, rü aixcüma tá ningü. 32 –Natürü ngēma ngunexü rü ora i nagu tá nangupetüxü i ngēma pemaä nüxü chixuxü, rü Tanatü ya Tupanaxicatama nüxü nacuèx i ñuxgu tá na nangupetüxü i ngēma, rü taxüema ya togue nüxü tacuèx. Rü woo i norü orearü ngeruügü i daxücüäx rü tama nüxü nacuèxgü, rü woo i choma na Nane chüxü rü tama nüxü chacuèx i ñuxgu tá na nangupetüxü i ngēma. 33 –Rü ngēmacèx, jipedaue rü pexuäégü! Erü tama nüxü pecuèx i ƒacü rü ora tá íchangu i chomax. 34 –Rü guxüma i ngēma pemaä nüxü chixuxü, rü ñoma wüxi ga yatü ga ixüächichaücü na to ga nachüänewa naxüxüçèxrüxü nixi. Rü yemacèx norü puracütanüxüna naxäga na mea nüxna nadaugüxüçèx ga guma napata. Rü ñuxüchi wüxichigüna nanaxä ga norü puracü. Rü yéma iäxärü dauruü rü nagu nanamu na mea nadauxütaegüxüçèx. 35-36 –jRü ngēmacèx i pema rü name na ípexuäègüxü!

Erü tama nüxü pecuèx i ñuxgu tá ínangu ya yima cori ya ìpataarü yora, rü bexmana noxri nachütagu, rü êxna ngâxücüügu, rü êxna otá icaxgu, rü êxna noxri yangóonegu. ¡Rü ngêmacèx ipedaue na ngürüächi ìnanguxgu tama ìpepeeyane pexü na ìyanguéüxcèx! ³⁷ —Rü ngêma ore i pemaã nüxü chixuxü, rü guxü i duüxügücèx nixi. ¡Rü ipedaueecha! —ñanagürü.

14

Ãëxgacügü naxcèx nadaugü na ñuxãcu Ngechuchuxü yayauxgüxü
(Mt 26.1-5; Lc 22.1-2; Cu 11.45-53)

¹ Rü taxre ga ngunexü nataxu ga na nawa nanguxü ga Yudiügarü peta ga Üpetüchiga ga nagu nangöxgüãxü ga pãu ga ngearü puxêëruüãxü. Rü ga paigüarü ãëxgacügü rü nguëxêëruügü ga mugüwa nguxêëtaegüxü rü naxcèx nadaugü ga ñuxãcü bexma duüxügüechita Ngechuchuxü na yayauxgüxü rü na yamëxgüãxcèx. ² Yerü nümaxü rü ñanagürügü: —Taxucürüwama ñuxma petagu tayayauxgü, erü duüxügü rü tá tamaã nanuë —ñanagürügü.

Wüxi ga nge rü Ngechucherugu inaba ga pumara
(Mt 26.6-13; Cu 12.1-8)

³ Rü Ngechuchu rü Betániãwa naxü napatawa ga Chimãu ga rüchaxü necümaã naxugüãcü. Rü yexguma mechawa natoyane, rü yéma ingu ga wüxi ga ngecü ga wüxiweü ga pumara ga yixichixü ga tatanüxüchixü yéma ngecü. Rü iyapoyenagu ga yema pumarachixü ga nuta ga mexêchicünaxcèx, rü Ngechucherugu inaba. ⁴ Natürü ñuxre ga yema yéma yexmagüxü rü nanuë naxcèx ga yema naxüxü ga yema ngecü, rü nügümaã ñanagürügü: —¿Tüxcüü ngêxma inaxaiyaxü i ngêma pumara? ⁵ —Rü narümemaë chi nixi i 300 tachinü i dïerugu namaã itaxe, rü ñuxüchi ngêma dïerumaã nüxü irüngüxêë i ngêma duüxügü i ngearü dïeruãxgüxü —ñanagürügü. Rü yemaãcü ngïchiga nidexagü ga yema nge. ⁶ Natürü ga Ngechuchu rü ñanagürü nüxü: —¡Ngexrüma! ¿Tüxcüü ngïxü pechixewe? Erü ngêma chomaã naxüxü, rü wüxi i mexü nixi. ⁷ —Rü ngêma ngearü dïeruãxgüxü rü guxügutáma petanüwa nangëxmagü, rü ngêmaãcü pexü natauxcha na nüxü perüngüxêëxü i ngëxguma penaxwëxegu. Natürü i choma rü täütáma guxügu petanüwa changëxma. ⁸ —Rü ñaã nge rü inaxü i guxüma i ngêma ngïxü tauxchaxü, rü ngêmacèx yoxni choxü ipumaraxüne naxüpa na ichatáxü. ⁹ —Rü aixcüma pemaã nüxü chixu rü guxü i naãnewa i ngextá duüxügü nüxü ìxugügüxüwa i ore i maxêëëruü, rü ñaã ngecü chomaã üxü rü tá ta nüxü nixugügü. Rü ngêmaãcü tá ngïxna nacüëxãchie i duüxügü —ñanagürü ga Ngechuchu.

Yuda rü ãëxgacügümaã nanamexêë na ñuxãcü tá na Ngechuchuxü yayauxgüxüxcèx
(Mt 26.14-16; Lc 22.3-6)

¹⁰ Rü Yuda Icarüte ga wüxi ga yema 12 ga ngüexütanüxü ìxüxü, rü Yudiügarü paigüarü ãëxgacügütanüwa naxü na namaã yamexêëãxüxcèx na ñuxãcü tá na Ngechuchuxü yayauxgüxüxcèx. ¹¹ Rü yexguma yemaxü naxinüëgu, rü nümagü ga yema ãëxgacügü rü nataãëgü. Rü dïeru Yudana ngïxü naxuaxügü. Rü yexgumama inanaxügü ga Yuda ga naxcèx na nadauxü ga ñuxãcü nüxü na natauxchaxêëgüãxü na duüxügüechita Ngechuchuxü yayauxgüxüxcèx.

Coriarü ònachiga
(Mt 26.17-29; Lc 22.7-23; Cu 13.21-30; 1 Co 11.23-26)

¹² Rū nawa nangu ga ngunexũ ga nagu inaxügüxũ ga yema peta ga pãu ga ngearũ puxëëruũãxũ nagu nangõxgüxũ. Rū yema nixĩ ga ngunexũ ga nagu carneruxacũ naxcëx yamëxgüxũ ga Üpetüchigaarũ peta. Rū yexguma ga norũ ngüexũgü rü Ngechuchuna nacagüe, rü ñanagürügü: —¿Ngextá cunaxwëxe na tanamexëëxũ i õna i Üpetüchigaarũ petagu ingõxũ? —ñanagürügü. ¹³ Rū yexguma ga nũma rü nanamu ga taxre ga norũ ngüexũgü, rü ñanagürü nüxũ: —¡Ëcũ, yéa ñanewa pexĩ! Rū ngëxma tá nüxũ peyangau i wüxi i yatü i wüxi ya tũxũ ya dexámaã ãacuxe ngëxma tũxũ ingexũ. ¡Rü nawe perüxĩ! ¹⁴ —¡Rü yima ñpata ya nagu yaxücune i ngëma yatü, rü yima ñãrũ yoramaã nüxũ pixu, rü ñapegügü nüxũ:

“Torü ngüexëëruũ nüxũ nacuáxchaũ na ngëxũ yĩxũ i ngëma ucapu i norũ ngüexũgümaã tá nawa nachibüxũ i Üpetüchigaarũ õnagu”, ñapegügü nüxũ! ¹⁵ —Rü nũma tá pexũ nüxũ nadauxëë i wüxi i ucapu i taxũ i marü meã mexëëxũ i norũ daxüchiũwa ngëxmaxũ. ¡Rü ngëma penamexëëx i tóru õna i Üpetüchigacëx ixĩxũ! —ñanagürü nüxũ. ¹⁶ Rū inaxĩãchi ga yema taxre ga ngüexũgü, rü ñanewa naxĩ. Rū yexma nüxũ inayangaugü ga guxũma yema Ngechuchu namaã nüxũ ixuxürüũ. Rū yéma nanamexëë ga õna ga Üpetüchigacëx ixĩxũ. ¹⁷ Rū yexguma marü nachütachaũgu, rü ínangu ga Ngechuchu namaã ga yema 12 ga norũ ngüexũgü. ¹⁸ Rū yexguma mechawa ñnachibüeyane, rü Ngechuchu rü ñanagürü nüxũ: —Aixcũma pemaã nüxũ chixu rü wüxie ya petanüwa i ñũxma chomaã nuã chibüxe tá tixĩ ya bexma choxũ iyaxuaxũxë —ñanagürü. ¹⁹ Rū yexguma ga nũmagü ga norũ ngüexũgü rü poraãgü nangechaũgü. Rū inanaxügüe ga na wüwichigü nüxma ñcachigüxũ, rü ñanagürügü: —Pa Corix, ¿choma tá chiĩxũ i cuxũ íchayaxuaxũxũ? —ñanagürügü. ²⁰ Rū nũma ga Ngechuchu nanangãxũ rü ñanagürü nüxũ: —Wüxi i pema i 12 tanüwa i daatama poratuwa norũ pãu iwaixëëxũ, rü ngëma tá nixĩ i choxũ iyaxuaxũxũ. ²¹ —Rü choma i Tupana Nane na duũxũxũ chiĩxũ, rü tá chayü ngëma Tupanaãrũ ore i ümatüxũ nüxũ ixuxürüũ. Natürü wüxi i ngechaũxüchi nixĩ naxcëx i ngëma yatü i choxũ iyaxuaxũxũ. Rū narümetaë chi nixĩ ga noxtacũma tãu chima na nabuxũ —ñanagürü. ²² Rū yexguma ñnachibüeyane, rü Ngechuchu nanayaxu ga pãu. Rū Tupanana moxë naxã, rü inanabücu, rü norũ ngüexũgüxũ nayanu. Rū ñanagürü nüxũ: —¡Penayax i ñãã pãu! Rū ngëma rü chaxunechiga nixĩ —ñanagürü. ²³ Rū yemawena nanayaxu ga wüxi ga pochiyu ga binumaã ãacuxũ. Rū yexgumarüũ ta Tupanana moxë naxcëx naxãira, rü ñũxüchi norũ ngüexũgüna nanaxã. Rū guxũma nawa naxaxegü. ²⁴ Rū ñanagürü nüxũ: —Daa binu ya chaugü i muxũma i duũxũgücëx ibacüchiga nixĩ. Rū yimawa Tupana meãma nanangõxëë na aixcũma yĩxũ i norũ uneta. ²⁵ —Rü aixcũma pemaã nüxũ chixu rü tãxütáma wena chayaxaxü ya daa binu ñũxmatáta Tupana ãëxgacü íixĩxũwa binu ya ngexwacaxũcü chayaxaxüx —ñanagürü.

Ngechuchu nüxũ nixu rü Pedru rü taxütáma nügü nixu na norũ ngüexũ yĩxũ (Mt 26.30-35; Lc 22.31-34; Cu 13.36-38)

²⁶ Rū ñũxüchi nawiyaegü ñuxre ga Tupanaãrũ wiyaequ. Rū yemawena rü Oríbunecüarü Mëxpúnewa naxĩ. ²⁷ Rū yexguma ga Ngechuchu rü ñanagürü nüxũ: —Guxãma i pema rü tá choxũ ípetëxgü. Erü ngëmaãcü nüxũ nixu i Tupanaãrũ ore i ümatüxũ i ñaxũ:

“Tá chayamëx ya carneruarü dauruũ, rü tá nanaxüanamare i carnerugü”,

ñaxũ. ²⁸ —Natürü ngëxguma marü yuwa ícharüdaxguwena, rü chaxira tá pexũpa Gariréaanewa chaxũ —ñanagürü. ²⁹ Rü yexguma ga Pedru rü ñanagürü nüxũ: —Woo guxũma i togü cuxũ ítëxgu, rü choma rü täütama cuxũ íchatëx —ñanagürü. ³⁰ Rü Ngechuchu nanangãxũ rü ñanagürü nüxũ: —Aixcũma cumaã nüxũ chixu rü ñomatama i chütaxũgu rü naxũpa na taxreëxpũxcũna yaçaxũ i otá, rü tomaëxpũxcũna taxütáma cugü quixu na chorü duũxũ quíxũ —ñanagürü. ³¹ Natürü nüma ga Pedru rü ñanagürüama: —Woo wũxigu cumaã chayuxgu, rü tãxütáma chaugü ichicux na curü duũxũ chíxũ —ñanagürü. Rü guxũma ga togü ga norü ngüexũgü rü ta yema ñanagürügü.

Ngechuchu rü Yechemaníwa nayayumüxë
(Mt 26.36-46; Lc 22.39-46)

³² Rü yemawena rü Ngechuchu rü norü ngüexũgü rü nawa naxĩ ga wüxi ga nachica ga Yechemanígu äegaxũ. Rü Ngechuchu rü ñanagürü nüxũ: —¡Nuã perütogü yoxni paxa yéa chayayumüxë! —ñanagürü. ³³ Rü ñuxũchi inayagãgu ga Pedru, rü Chaútiágu, rü Cuáũ. Rü naxcëx inaxũgü ga na poraãcũ nangechaũxũ rü naxixãchiãëxũ. ³⁴ Rü yexguma rü ñanagürü nüxũ: —Poraãcũ changechaũ, rü nagu charüxĩnũ na ngëmamaã tá chayuxũ. ¡Rü nuxa perücho i pemax, rü ipedaue! —ñanagürü. ³⁵ Rü yexguma ga Ngechuchu rü yéaxũra naxũ. Rü ñaxtũanegu nanangücuchi. Rü Tupanana naxcëx naca na nawa ínanguxuchixũcëx ga yema ngüxũ ga yexguma chi Tupanaãrũ ngüchaũ yixĩgu. ³⁶ Rü norü yumüxëwa rü ñanagürü: —Pa Chaunatũx, cuxcëx rü guxũma natauxcha. ¡Rü nüxna choxũ ínanguxuchiëë i ñãã ngüxũ i tá choxũ üpetũxũ! Natürü chanaxwëxe i cunaxũ i cuxrütama ngüchaũ rü tama i choxrũ —ñanagürü. ³⁷ Rü ñuxũchi nataegu ga norü ngüexũgü íyexmagũxũwa. Rü nüxũ inayangau ga na ínapeexũ. Rü ñanagürü Pedruxũ: —Pa Chimáũx, ¿¿cupe? ¿Tama éxna namaã cupora na icudauxũ, rü bai i wüxi i ora? ³⁸ —¡Rü ipedaue, rü Tupanana naxcëx peça na pexũ nangũxëëxũcëx na tama choxũ ípetãxũcëx i ngëxguma ñacũ rü guxchaxũ pexũ üpetũgu! Erü aixcũma peãëwa rü ípememare, natürü pexene nixĩ i ngëma turaxũ —ñanagürü. ³⁹ Rü wenaxãrũ ínixũ, rü noxrirũütama nayayumüxë. ⁴⁰ Rü yexguma wenaxãrũ norü ngüexũgücëx nataegugu, rü nüxũ inayangau ga na wenaxãrũ ínapeexũ, yerü poraãcũ nayaxtaexũchi. Rü yemacëx ga nümagũ rü tama nüxũ nacuëxgũ ga na ñacũmaã tá nangãxũgũãxũ. ⁴¹ Rü norü tomaëxpũxcũna wenaxãrũ norü ngüexũgücëx nataegu, rü ñanagürü nüxũ: —¿Ñuxma rü ta éxna ípepeeama rü íperũngũëãma? ¡Rü marütama! Erü choma i Tupana Nane na duũxũxũ chíxũ rü marü nawa nangu i ora na choxũ na yauxgũxũ rü nüxna na choxũ namugũxũcëx i duũxũgü i chixexũ i pecaduãxgũxũ. ⁴² —¡Rü ipechigü, rü ngĩxã ítixĩ! Erü marü ñomama nixĩ i ngëma choxũ íyaxuaxũxũ —ñanagürü.

Ngechuchuxũ niyauxgü
(Mt 26.47-56; Lc 22.47-53; Cu 18.2-11)

⁴³ Rü yexguma íyadexayane ga Ngechuchu, rü ínangu ga Yuda ga norü ngüexũchirëx íixũ. Rü nawe narũxĩ ga muxũma ga duũxũgü ga taramaã rü naĩmaã íxãxnexũ. Rü yema nixĩ ga duũxũgü ga yéma namugũxũ ga paigũarũ äëxgacũgü rü ngüexëëruũgü ga mugũwa nguxëëtaegũxũ rü Yudiũgũarũ äëxgacũgüerugü. ⁴⁴ Rü Yuda ga ínaxuaxũxũ rü marü yema duũxũgũmaã nanamexëë, rü ñanagürü:

“Ngëma nüxũ chachũxuxũ nixĩ i Ngechuchu. Rü ngëma tá nixĩ i piyauxgũxũ rü meã peyanáíacũma peyagagũxũ” —ñanagürü. ⁴⁵ Rü yemaãcũ

Ngechuchucèx nixū, rū ñanagürü nüxū: —Pa Ngúexēēruūx —ñanagürü. Rū ñuxūchi nanachúxu. ⁴⁶ Rū yexgumatama Ngechuchuxū niyauxgü. ⁴⁷ Natürü wūxi ga Ngechuchutanūxū nanawēxechi ga norū tara, rū yemamaā paigüarū āēxgacüarū duūxūxū ínadaechinü. ⁴⁸ Rū yexguma ga Ngechuchu rū yema duūxūgūna naca, rū ñanagürü nüxū: —¿Tūxcüü taragü rū naixmenēxägūmaā chauxcè nuā pexī na choxū peyarüyauxgūxūcèx ñoma wūxi i ngítèxáxū chiixürüü? ⁴⁹ —Rū guxū ga ngunexūgu rū petanūwa chayexma ga yexguma tupauca ga taxūnewa changūxēētaegu, rū taguma choxū piyauxgü. Natürü ñaā ñuxma ngupetūxū, rū nangupetü na yanguxūcèx i Tupanaarū ore i umatūxū —ñanagürü. ⁵⁰ Rū yexguma ga guxūma ga norū ngúexūgü rū nüxna nibuxmü. Rū nüxīcatama yéma nanatēxgü ga Ngechuchu. ⁵¹ Natürü wūxi ga ngextūxūcū ga dūxruūmaāxīca nūgü nuquecū nawe nixūchigü. Rū yema duūxūgü rū nayayauxgü. ⁵² Natürü nüma rū nüxū ningēx ga yema dūxruū, rū yemaacū ngexchiruacūma niña.

*Āēxgacügüpēxewa Ngechuchuxū nagagü
(Mt 26.57-68; Lc 22.54-55, 63-71; Cu 18.12-14, 19-24)*

⁵³ Rū yexguma ga yema duūxūgü rū paigüarū āēxgacügüpēxewa nana-gagü ga Ngechuchu. Rū yexma nangutaquēxegü ga guxūma ga togü ga paigü ga āēxgacügü ixīgūxū, rū yema Yudīgüarū āēxgacügüerugü, rū yema ngüexēēruūgü ga mugüwa nguxēētaegūxū. ⁵⁴ Natürü ga Pedru rū yaxūgu nawe nixāchigü ñuxmata guma paigüarū āēxgacüpataèxtūwa nangu. Rū purichíagü ga tupauca ga taxūnearū dauruūgūmaā yéma iāxtūwa narūto. Rū nūgü yéma nanaixū üxūxūtawa. ⁵⁵ Rū yema paigüarū āēxgacügü rū guxūma ga yema togü ga āēxgacügü ga itaxū rū naxcèx nadaugü ga ñuxācū Ngechuchuxū na ínaxuaxūgūxū rū na yamēxgūāxūcèx. Natürü taxucürüwa nüxū inayangaugü ga tacūcèx tá na yamēxgūāxū. ⁵⁶ Yerü woo muxūma ga duūxūgü rū nüxū nixugüe ga doramare ga nachiga, natürü nūgütanūwatama rū tama nawūxigu ga norū ore. ⁵⁷⁻⁵⁸ Rū ñuxre ga togü inachigü rū doraxūmare nixugüe ga Ngechuchuchiga. Rū ñanagürügü: —Toma nüxū taxīnūē ga na ñaxū:

“Tá chanangutaxūxēē ya daa tupauca ya taxūne ya duūxūgü üxūne. Rū tomaēxpūx i ngunexūgu tá chanaxū ya náí ya tama duūxūgü üxūne”, ñaxū —ñanagürügü. ⁵⁹ Natürü woo yema oremaā, rū tama nawūxiguéga ga norū ore. ⁶⁰ Rū yexguma ga guma paigüarū āēxgacü rū guxūpēxewa inachi. Rū Ngechuchuna naca, rū ñanagürü: —¿Éxna taxuxūmaāma cunangāxū i ñuxmax? ¿Rū tacü nixī i ngēma nüxū yaxugūxū i cuchiga? —ñanagürü. ⁶¹ Natürü ga Ngechuchu rū nangeēxmare, rū taxuxūmaāma nanangāxū. Rū yemacèx ga nüma ga paigüarū āēxgacü rū wenaxārü nüxna naca, rū ñanagürü: —¿Rū cuma quiixū ya Cristu ya Tupana ya mecü Nane? —ñanagürü. ⁶² Rū Ngechuchu rū ñanagürü nüxū: —Ngū. Ngēma nüxū quixuxū chixī. Rū tá choxū pedaugü i ngēxguma Tupana ya poracüarū tūgūnecūwawa charütōxgu rū ngēxguma caixanexūgu wenaxārü núma chaxūxgu —ñanagürü. ⁶³ Rū yexguma ga guma paigüarū āēxgacü rū norū numaā nūgūchirugu nagaugü. Rū ñanagürü: —¿Tūxcüü marü tanaxwēxe i to i duūxū i nüxū ixugūxū i nachiga? ⁶⁴ —Rū pematama marü nüxū pexīnūē na ñuxācū Tupanamaā naguxchigaxū. ¿Rū ñuxū ñapegūxū i ñuxmax? —ñanagürü. Rū guxūma wūxigu narūxīnūē rü: —Aixcūma nixī na chixexū naxūxū rü namexū na nayuxū —ñanagürügü. ⁶⁵ Rū ñuxre ga nümagü rü inanaxūgüe ga nüxna na naçuaixgüexū. Rū nanatūxetügü rü ñuxūchi nüxū nidagügü ñaxūmaā: —¡Nūxū nacūex na

texé cuxü idagüxü! —ñanagürügü. Rü yema tupauca ga taxüñeärü dauruügü ga purichíagü rü nanapechiwegü.

Pedru rü tama nügü nixu na Ngechuchuxü nacuáxü
(Mt 26.69-75; Lc 22.56-62; Cu 18.15-18, 25-29)

⁶⁶ Rü yoxni ga Pedru rü ñaxtüwa ãëxgacüpataëxtüwa nayexma. Rü yexgumayane yéma ingu ga wüxi ga pacü ga guma ãëxgacüarü duüxü ixícü. ⁶⁷ Rü yexguma Pedruxü nadëuxgu ga yéma üxüxütawa nügü na nanaixüxü, rü meá nüxü idawenü, rü ngígürügü nüxü: —Cuma rü ta namücü quixí i ngëma Ngechucha i Nacharétucüãx —ngígürügü. ⁶⁸ Natürü ga Pedru rü nügü inícux na Ngechucharü duüxü yíixü, rü ñanagürü: —Choma rü tama nüxü chacuèx ya yima. Rü tama nüxü chacuèx i tacüchiga nixí i ngëma nüxü quixuxü —ñanagürü. Rü yexguma ga nüma rü ípataëxtüarü düxétüwa naxü. Rü yexgumatama nica ga otá. ⁶⁹ Natürü ga yema pacü rü wenaxärü Pedruxü idau, rü inaxügü ga yema togümaã nüxü na yaxuxü, rü ngígürügü: —Ñaa rü wüxi i natanüxü nixí —ngígürügü. ⁷⁰ Natürü nüma ga Pedru rü wena tama nügü nixu. Rü yixcamaxüra rü yema duüxügü ga yéma yexmagüxü rü wenaxärü ñanagürügü nüxü: —Aixcúma nixí na cuma rü ta ngëma Ngechuchutanüxü na quiixü, erü wüxi i Gariréañecüãx quixí —ñanagürügü. ⁷¹ Rü yexguma ga Pedru rü poraäcü nügü nixá, rü ñanagürü: —Rü aixcúma tama nüxü chacuèx i ngëma yatü i nachiga pidexagüxü. Rü ngëxguma doraxü chixuxgu rü ¡Tupana choxü poxcux! —ñanagürü. ⁷² Rü yexgumatama norü taxreëxpüxcüna nica ga otá. Rü yexguma ga Pedru rü nüxna nacüèxáchi ga yema ore ga üpaacü Ngechuchu namaã nüxü ixuxü ga ñaxü:

“Rü naxüpa na taxreëxpüxcüna otá ícaxü, rü cuma rü tá tomaëxpüxcüna cugü quícux na chorü duüxü quiixü”, ñaxü. Rü yexguma ga Pedru rü poraäcüxüchima naxaxu.

15

Piratupëxewa nayexma ga Ngechuchu
(Mt 27.1-2, 11-14; Lc 23.1-5; Cu 18.28-38)

¹ Rü yexguma yangunegu, rü nangutaquëxegü ga ãëxgacügü ga taxügü ga paigüarü ãëxgacügü rü Yudiügüarü ãëxgacügüerügü rü ngüxëëruügü ga mugüwa ngüxëëtaegüxü rü guxüma ga togü ga yema ãëxgacügütanüwa ügüxü. Rü Ngechuchuxü yanëixgüchacuüäcúma ãëxgacü ga Piratuxütawa nangagü. ² Rü nüma ga Piratu rü Ngechuchuna naca rü ñanagürü: —¿Cuma quiixü i Yudiügüarü ãëxgacü ya tacü? —ñanagürü. Rü Ngechuchu nanangäxü, rü ñanagürü: —Ngü, yima nüxü quixucü chixí —ñanagürü. ³⁻⁴ Natürü yema paigüarü ãëxgacügü rü poraäcü ínanaxuaxügüama, rü yemacèx ga Piratu rü wenaxärü Ngechuchuna naca, rü ñanagürü: —¿Éxna taxuxümaãma cunangäxü? ¡Dücèx i ñuxre i cuchiga i nüxü yaxugüexü! —ñanagürü. ⁵ Natürü ga Ngechuchu rü taxuxümaãma nanangäxü. Rü yemacèx ga Piratu rü poraäcü nabaixáchiãë.

Piratu rü Ngechuchumaã nanaxuegu na nayuxülcèx
(Mt 27.15-31; Lc 23.13-25; Cu 18.38-19.16)

⁶ Rü gucü ga taunecüga ya yexguma yema Üpetüchigaarü petawa nanguxgu rü Piratu ínananguxuchixëëxü ga wüxi ga poxcuxü ga duüxügü naxcèx ícagüxü, yerü yema nixí ga nacüma. ⁷ Rü wüxi ga yatü ga Barabágu äegaxü, rü poxcupataügu napoxcu wüxigu namaã ga togü ga natanüxü ga máëtagüxü

ga yexguma ãëxgacüxü ñatëxüchigüchaügu. ⁸ Rü yema duüxüügü rü yéma Piratuxütawa nangugü. Rü inanaxüügüe ga Piratuna na nacagüexü na naxcëx yangéãxücëx ga wüxi ga poxcuxü aixrügumarü. ⁹ Rü Piratu nanangãxü, rü ñanagürü: —¿Penaxwëxëxü na pexcëx íchananguxuchixëëxü ya yima Ngechuchu ya duüxüügü Yudiügiarü ãëxgacümaã naxugüãcü? —ñanagürü. ¹⁰ Rü yema ñanagürü ga Piratu yerü nüxü nacüex ga na yema paigüarü ãëxgacügü rü na yaxauxãchixëxëxë yüxü ga Ngechuchu nüxna yamugüãxü. ¹¹ Natürü ga yema paigüarü ãëxgacügü rü duüxüügüxü namugü ga na tagaãcü naxcëx ínacagüxü ga na Barabãxü yangéxücëx. ¹² Rü yexguma ga Piratu rü nüxna naca, rü ñanagürü: —¿Rü íacü nixí i penaxwëxëxü na chanaxüxü namaã ya yima Yudiügiarü ãëxgacügü pexüégacü? —ñanagürü. ¹³ Rü nümagü ga duüxüügü rü tagaãcü nanangãxüügü, rü ñanagürügü: —¡Curuchawa yapota! —ñanagürügü. ¹⁴ Rü yexguma ga Piratu rü ñanagürü nüxü: —¿Natürü íacü rü chixëxü naxü? —ñanagürü. Natürü ga nümagü rü wenaxãrü tagaãcü ñanagürügü: —¡Curuchawa yapota! —ñanagürügü. ¹⁵ Rü yexguma ga Piratu rü Barabãxü ínanguxuchixëë, yerü duüxüügüxü nataãëxëëchaü. Rü yexguma churaragüxü Ngechuchuxü naçuaixëëguwena ga Piratu, rü ñuxüchi nüxna nanamu na curuchawa yanapotagüãxücëx. ¹⁶ Rü yexguma ga nümagü ga churaragü rü ãëxgacüpataëxtüwa nanagügü. Rü yéma nanangutaquëxëë ga guxüma ga namücügü ga churaragü. ¹⁷ Rü ñuxüchi ga yema churaragü rü wüxi ga máxü ga daucharaxü ga naxchirugu nayacuxëëgü. Rü naëruwa nayangëxcuchigü ga wüxi ga boxü ga chuchuxüwa naxügüxü. ¹⁸ Rü yemawena inanaxüügüe na tagaãcü ñagüxü: —¡Namaxü ya Yudiügiarü ãëxgacü! —ñagüxü. ¹⁹ Rü wüxi ga naíxmenëxãmaã naëruwa nanaçuaixcagü, rü nüxna nacuaixgüe. Rü napëxegu nacaxãpüxügü rü nüxü nicuëxüügünetá. ²⁰ Rü yexguma yemaãcü nagu yadauxcüraxüügüguwena, rü ínacamaxuchigü ga yema naxchiru ga daucharaxü. Rü wenaxãrü naxchirugutama nayacuxëëgü. Rü ñuxüchi ínanagaxüchigü na curuchawa yanapotagüãxücëx.

*Ngechuchuxü curuchawa nipotagü
(Mt 27.32-44; Lc 23.26-43; Cu 19.17-27)*

²¹ Rü yéma naxüpetü ga wüxi ga yatü ga Chirenecüãx ga Chimãügu ãegacü ga Areyãüdrü rü Rufu nanatü íxícü ga naãnewa ne ücü. Rü yexguma yéma naxüpetü rü yema churaragü rü guma yatüxü ngüxü iningëxëëgü ga Ngechucharü curucha. ²² Rü Ngechuchuxü nawa nagagü ga wüxi ga nachica ga Górgutagu ãegaxü. Rü yema naega rü: Duüxëëruchinëxãchitaü, ñaxüchiga nixí. ²³ Rü nüxna nanaxãgü ga binu ga miramaã ãëücü. Natürü nüma ga Ngechuchu rü tama nayaxaxü. ²⁴ Rü yemawena curuchawa nayapotagü. Rü nümagü ga churaragü rü wüxi ga díeru ngüxü nañanagügü na yemawa nüxü nacüëxgüxücëx na ñuxãcü tá nügümaã yatoyeãxücëx ga Ngechuchuchiru, rü íacü tá na yangëxü ga wüxichigü. ²⁵ Rü meãma 9 arü oragu ga pëxmama nixí ga curuchawa yapotagüãxü. ²⁶ Rü yéma nayapocuchi ga wüxi ga mürapewa ga ãegatachinüxü ga nüxü íxuxü ga íacücëx curuchawa na yapotagüãxü. Rü yema naega ga mürapewagu üxü, rü ñanagürü: “Yudiügiarü ãëxgacü”, ñanagürü. ²⁷ Rü naxrüü curuchawa nayapotagü ga taxre ga máëtagüxü rü wüxi ga norü tügüncëwawa rü to ga norü íoxwecüwawa. ²⁸ Rü yemaãcü ningu ga Tupanaãrü ore ga úmatüxü ga ñaxü:

“Ngëma chixëxü ügüxütanüwaama natëx”,

ñaxũ. 29-30 Rũ yema duũxũgũ ga yema chopetũxũ, rũ Ngechuchumaã naguxchigagũ, rũ nanexãerugũãcũma ñanagũrũgũ: —¡Dũcex! Cuma cunangutaũxẽẽega ya tupauca ya taxũne, rũ tomaẽxpũx i ngunexũgu wemaxãrũ ícunadaxẽẽega. ¡Ëcũ! ¡Cugũtama namaxẽẽ i ñuxmax, rũ írũxĩ i curuchawa! —ñanagũrũgũ. 31 Rũ yexgumarũũ ta Ngechuchuxũ nacugũecũraxũ ga paigũarũ ãẽxgacũgũ, rũ nguẽxẽerũũgũ ga ore ga mugũwa nguxẽetaegũxũ. Rũ ñanagũrũgũ: —Nũma rũ togũxũ namaxẽẽ, natũrũ taxucũrũwama nũgũtama namaxẽẽ. 32 —¡Ñuxma rũ ínaxĩx i curuchawa i ngẽma Cristu i Iraéanecũãxãrũ ãẽxgacũ na nũxũ idaugũxũcẽx rũ nũxũ yaxõgũxũcẽx! —ñanagũrũgũ. Rũ woo ga yema máẽtagũxũ ga naxrũũ curuchawa ipotagũxũ, rũ namaã naguxchigagũ.

Nayu ga Ngechuchu

(Mt 27.45-56; Lc 23.44-49; Cu 19.28-30)

33 Rũ yexguma tocuchiwa nanguxgu, rũ guxũ ga naãnewa naxẽãne ñuxmata yáuanecũ tomaẽxpũxãrũ orawa nangu. 34 Rũ yematama oragu rũ tagaãcũ aita naxũ ga Ngechuchu, rũ ñanagũrũ: —Erix, Erix, ¿damã chabátani? —ñanagũrũ. Rũ ngẽma rũ ñaxũchiga nixĩ: “Pa Chorũ Tupanax, Pa Chorũ Tupanax ¿tũxcũũ choxũ nuã cutex?” ñaxũchiga nixĩ. 35 Rũ nũmaxũ ga duũxũgũ ga yema yexmagũxũ, rũ nũxũ naxĩnũẽ rũ ñanagũrũgũ: —¡Dũcẽx, nũxũ pexĩnũẽ! Nuxcũmaũcũ ga Tupanaãrũ orearũ urũũ ga Eriacẽx naca —ñanagũrũgũ. 36 Rũ yexguma rũ wũxi ga yema duũxũgũ ga yema yexmagũxũ, rũ inañãchi rũ wũxi ga tũaxmũ niwaixẽẽ namaã ga binu ga marũ nguõchiẽxũchicũ. Rũ wũxi ga dexnewa nayanẽix, rũ ñuxũchi Ngechuchuẽxgu nanawẽx na nũxũ natuxuxũcẽx. Rũ yema togũxũ ñanagũrũgũ: —¡Yixrũma! ¡Ngĩã rũ itarũdaunũ ngoxita Eriã nuã ù na curuchawa ínaxĩxẽẽãxũcẽx! —ñanagũrũgũ. 37 Natũrũ nũma ga Ngechuchu rũ tagaãcũ aita naxũ, rũ ñuxũchi nayu. 38 Rũ yexguma ga tupauca ga taxũneãrũ tũyemachiãxũ rũ taxregu narũgaute. Rũ daxũwa inaxũgũ ga na nagautexũ rũ ñuxmata ñaxtũwa nangu. 39 Rũ guma churaragũarũ ãẽxgacũ ga Dumacũãx ga Ngechuchupẽxewa yexmacũ, rũ yexguma nũxũ nadẽuxgu ga na nayuxũ, rũ ñanagũrũ: —Aixcũma nixĩ ya daa yatũ i Tupana Nane na yĩxũ —ñanagũrũ. 40 Rũ iyexmagũ ta ga ñuxre ga ngecũgũ ga yema yaxũwa nũxũ rũdaunũcũ. Rũ yematanũwa iyexmagũ ga María ga Magadãcũãx, rũ Charumẽ, rũ María ga Yũche rũ Chaũtiãgu ga rũbumaẽcũ naẽ. 41 Rũ yema ngecũgũ iyixĩ ga Ngechuchuxũ íxũmũcũgũcũ rũ nũxũ rũngũxẽẽgũcũ ga yexguma Garirẽaanewa nayexmagu. Rũ yexgumarũũ ta yema iyexmagũ ga mucũma ga naĩgũ ga ngecũgũ ga Ngechuchuwe rũxĩcũ ga yexguma Yerucharẽũwa naxũxgu.

Ngechuchu rũ naxmaxũgu nayanaxũcuchigũ

(Mt 27.57-61; Lc 23.50-56; Cu 19.38-42)

42-43 Rũ yexguma marũ nachũtachaũgu ga yema ngunexũ ga Yudĩugũ nagu nũgũ imexẽẽgũxũ naxcẽx ga ngũxchigaarũ ngunexũ, rũ noxtacũma Piratuxũtawa naxũ ga Yũche ga Arimatãcũãx. Rũ nũma ga guma Yũche rũ Yudĩugũarũ ãẽxgacũgũ ga tacũtanũwa naxũ, rũ wũxi ga ãẽxgacũ ga porãcũ nũxũ nangechũgũcũ nixĩ. Rũ nũma rũ ta ínananguxẽẽ na Tupana norũ ãẽxgacũ yĩxũcẽx. Rũ Piratuxũtawa naxcẽx ínayaca ga Ngechuchuxũne. 44 Rũ naõaixãchiãẽ ga Piratu ga marũ na nayuxũ. Rũ yemacẽ norũ churaragũarũ ãẽxgacũcẽx nangema na nũxna naçaxũcẽx na ñuxgumama yĩxũ ga marũ na nayuxũ. 45 Rũ yexguma norũ churaragũarũ ãẽxgacũ namaã nũxũ ixuxgu

ga marü na nayuxü, rü nüma ga Piratu rü Yúchena nanaxã ga naxüne.
⁴⁶ Rü yexguma ga Yúche rü naxcèx nataxe ga wüxi ga naxchápenüü ga mexèchixü. Rü curuchawa nanayaxu ga Ngechuchuxüne, rü yema naxchápenüümaã nananuque. Rü wüxi ga mèxpüne ga nutanaxcèxu üpaacü yacaxmaügüxü ga naxmaxügu nayanaxücuchi. Rü ñuxüchi wüxi ga nuta ga tacümaã nanangüxtaü. ⁴⁷ Rü María ga Magadácüãx rü María ga Yúche naë rü nüxü írúdaunü ga ngexta na yanaxücuhigüãxü.

16

Wenaxãrü namaxü ga Ngechuchu (Mt 28.1-10; Lc 24.1-12; Cu 20.1-10)

¹ Rü sabadarü ngunexüguwena, rü María ga Magadácüãx, rü Charumé, rü María ga Chaütiágu naë naxcèx itaxegü ga pumara na namaã nachaãxücèx ga Ngechuchuxüne. ² Rü pèxmamaxüchi ga noxri üèxcü iyarügoxgu ga yüxüarü ngunexügu, rü yema ngecügü rü íiyadaugü ga yema naxmaxü ga nagu yanaxücuhigüãxüwa. ³ Rü ngígü ngígürügügu: —¿Texé tá taxcèx ítanaxügachi ya yima nuta ya namaã nangüxtaücü? —ngígürügügu. ⁴ Natürü yexguma meãma nüxü nadaunügu, rü nüxü idaugü ga marü na ínaxügachixü ga guma nuta ga tacü ga namaã nangüxtaücü ga yema naxmaxü. ⁵ Rü yexguma nagu nadaugügu ga yema naxmaxü, rü nüxü idaugü ga wüxi ga ngextüxücü ga mèxchiruxü ga cómüchiruxü ga yéma naxmaxüarü tügüncëwawa rütöxü. Rü poraãcü íbaxiãchiãëgü ga yema ngecügü. ⁶ Natürü nüma rü ñanagürü ngíxü: —¡Tãxü i pebaxiãchiexü! Pema rü naxcèx pedaügü ya Ngechuchu ya Nacharétucüãx ga guma curuchawa yapotagüãcü. Marü wena namaxü, rü nataxuma i nuã. ¡Dücèx, meã nüxü pedèux i ñaã nachica ga nagu naxügüãxü! ⁷ —¡Rü paxa ípixü rü Pedrumaã rü ngëma togü i ngüexügümaã nüxü peyarüxugüe, rü ñapegügü nüxü:

“Nüma ya Ngechuchu rü marü nüxüra pexüpa Gariréaanewa naxü. Rü ngema tá nüxü peyadaugü ngëma pemaã nüxü yaxuxürüü”, ñapegügü nüxü! —ñanagürü. ⁸ Rü yexguma ga yema ngecügü rü nüxna íiyabuxmü ga yema naxmaxü, yerü ngürü muüëmaã poraãcü iyaduruxe. Rü taxüemaãma nüxü iyaxugügü, yerü poraãcü imuüë.

Ngechuchu rü ngíxcèx nangox ga María ga Magadácüãx (Cu 20.11-18)

⁹ Rü yexguma Ngechuchu yuwa írúdaxguwena ga noxri yangunegu ga yüxüarü ngunexügu, rü ngíxcèxira nangox ga María ga Magadácüãx ga ngíwa ínawoxüãcü ga 7 ga ngoxogü. ¹⁰ Rü ngíma rü íiyaxü, rü namaã nüxü iyarüxu ga yema Ngechuchumücügü ga íngechaügüxü rü íxaxexü. ¹¹ Natürü ga nümagü rü tama nayaxögüchaü ga yexguma nüxü naxínüëgu ga na namaxüxü ga Ngechuchu rü na nüxü nadauxü ga ngímax.

Ngechuchu rü taxre ga norü ngüexügüçèx nangox (Lc 24.13-35)

¹² Rü yemawena ga Ngechuchu rü tööcü nangox naxcèx ga taxre ga norü ngüexügü ga yexguma nama ga naãnewaama nadaxügu naxíxgu. ¹³ Rü nümagü rü nawoegu, rü yema togü ga ngüexügümaã nüxü nayarüxugü. Natürü yemagüaxü rü ta tama nayaxögü.

Ngechuchu nanamu ga norü ngüexügü (Mt 28.16-20; Lc 24.36-49; Cu 20.19-23)

¹⁴ Rū yemawena ga Ngechuchu rü naxcèx nangox ga yema 11 ga norü ngúexüğü ga yexguma mechawa ínachibüeyane. Rū nayangagü naxcèx ga tama aixcüma na yaxögüäxü rü tama na inaxĩnüèxü. Yerü ga nümagü rü tama nüxü nayaxögüchaü ga yema nüxü daugüxü ga marü wena na namaxüxü.

¹⁵ Rū ñanagürü nüxü: —jGuxü i nañnewa pexĩ rü guxü i duüxügümaã nüxü peyarüxu i ore i mexü! ¹⁶—Rü yixema yaxöxè rü íbaixè rü tá tüxü nangèxma i maxü i taguma gúxü. Natürü yixema tama yaxöxè rü tá tapoxcu. ¹⁷—Rü ñaã tá nixĩ i cuèxruüğü i nawa nüxü icuáxü i ngèma yaxögüxü. Rū chauégagu tá ínanawoxü i ngoxogü. Rū ngexwacaxüxü i nagagüwa tá nidexagü. ¹⁸—Rü naxmèxmaã tá nüxü nayayauxächĩ i äxtapegü. Rū ngèxguma yaxaxgüägu i tacü i nawa iyuxü, rü täütáma nanachixexè. Rū tá tüxü ningögüğü ya idaaweexe rü tá tümacèx nitaanegü —ñanagürü.

Ngechuchu rü daxügüxü ga nañnewa naxü

(Lc 24.50-53)

¹⁹ Rū nüma ga Cori ga Ngechuchu rü yexguma norü ngúexügümaã yadeaxguwena, rü Tupana rü daxügüxü ga nañnewa nanaga. Rü Tupanaärü tügüncüwawa nayarüto. ²⁰ Rü nümagü ga norü ngúexügü rü inaxĩächĩ na guxüwama nüxü yanaxugüexü ga ore i mexü. Rü nüma ga Cori rü nüxü narüngüxèè, rü nanangoxèè na aixcüma yĩxü ga yema ore, yerü wüxigu namaã napuracü na naxügüäxücxèx ga mexü ga taxüğü ga Tupanaärü poramaã naxügüxü.

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

1-2 Pa Mecü Pa Teóquirux, nayexma ga ñacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëëgüxü ga norü orearü uchigawa. 3-4 Rü ngëmacëx, Pa Teóquirux, rü choma rü ta meãma naxcëx íchaca ga nachiga ga guxüma ga yema Ngechuchu üxü. Rü ñuxma rü chauxcëx rü name na meãma cuxcëx chanaxümatüxü i ngëma na meãma nüxü cucuáxücëx na aixcüma yüxü ga yema ore ga marüchirëx cuxü nangüxëëgüxü ga togü.

Tupanaärü orearü ngeruü ga daxüçüãx nanaxunagü ga Cuáü ga baiüxëëruüärü buxchiga

5 Rü yexguma Erode äëxgacü ixüxgu ga Yudéaanewa, rü yéma nayexma ga wüxi ga Yudiügüarü pai ga Zacariagu äëgacü. Rü pai ga Arãütã ga Abiatanüxü nixü ga nümax. Rü namëxéga rü Erichabé nixü. Rü tüma rü ta pai ga Arãütanüxü tixü. 6 Rü nüma ga Zacaría rü namëx ga Erichabé rü meãma Tupanapëxewa, namaxë rü aixcüma naga naxüñüë ga norü mugü. Rü yemaãcü taxucürüwa texé chixri nachiga tidexagü. 7 Natürü nangexacügü yerü namëx rü ingexacü. Rü ñuxüchi ga nümagü rü marü yaguãxgü nixügü. 8 Rü wüxi ga ngunexügu rü yema paigütücumü ga Zacaría natanüwa üxügu nangu na tupauca ga taxünewa Tupanaärü puracü naxügüxücëx. 9 Rü yema paigü rü nacüma nixü ga nüxü na naxunetagüxü ga wüxi ga natanüxü na tupaucaarü aixepëgu naxücuxücëx rü yéma Tupanacëx na yaguãxücëx ga pumara ga yixixü. Rü yema ngunexügu rü Zacariagu nangu na tupaucaarü aixepëgu naxücuxücëx na yéma yaguãxücëx ga pumara. 10 Rü yema pumara íyaguyane rü guxüma ga duüxügü ga düxétüwa yexmagüxü rü ínayumüxëgü. 11 Rü ngürüächü Zacariacëx nangox ga wüxi ga Tupanaärü orearü ngeruü ga daxüçüãx. Rü yema nachica ga pumara nawa yagugüxüärü tügüñecüwagu nachi. 12 Rü yexguma Zacaría nüxü dëuxgu ga yema Tupanaärü orearü ngeruü ga daxüçüãx, rü poraãcü nabaixächüäë, rü poraãcü namuü. 13 Natürü yema daxüçüãx ga Tupanaärü orearü ngeruü rü ñanagürü nüxü: —Pa Zacaría, ¡täxü i cumuüxü! Erü Tupana rü marü nüxü naxüñü i curü yumüxë. Rü cumxë i Erichabé rü cuxü tá ixãxäcü, rü Cuáügu tá cunaxüéga. 14 —Rü cuma rü tá poraãcü cutaãëxüchi i ngëxguma nabuxgu. Rü muxüma i togü i duüxügü rü tá ta nataãëgüxüchi. 15 —Erü yima cune rü Tupanapëxewa rü tá wüxi ya mexëchicü nixü. Rü täütãma binu nayaxaxü, rü taxuüma to i ñacü rü ngüchixáxü tá nixaxü. Rü tauta nabuyane rü Tupanaãë i Üünexü rü tá nüxna nangu. 16 —Rü nüma tá muxüma i Yudiügüxü narüngüxëë na norü Cori ya Tupanacëx nawoëgüxücëx. 17 —Rü nüma ya Cuáü rü tá Cori ya Cristupëxëgu nixü. Rü nuxcümaücü ga Tupanaärü orearü uruü ga Eriarüü tá nixü erü tá nüxü nangëxma i Tupanaãë i poraxü. Rü ngëmaãcü tá nüxü narüngüxëë i papágü na naxãcügüxü nangechaüxü, rü ngëma tama Tupanaga ínüëchaüxü rü na aixcüma inaxüñüëxücëx. Rü ngëmaãcü tá duüxügüxü ínamëxëë naxcëx ya Cori ya Cristu —ñanagürü ga yema daxüçüãx. 18 Rü Zacaría rü yema daxüçüãxna naca, rü ñanagürü: —¿Ñuxãcü tá nixü i ngëma na naxãxãcüxü

i choxmèx? Erü marü chayaxüchi i chomax rü ngîma rü ta marü iya — ñanagürü. ¹⁹ Rû Zacariaxü nangãxü ga yema daxüçüãx, rü ñanagürü: — Choma nixî i Gabi i Tupanaârü puracü chaxüxü. Rû nüma núma choxü namu na cumaã nüxü na chixuxüçèx i ñaã ore i mexü. ²⁰ —Natürü ñuxma i cuma rü tama choxü cuyaxö i ngêma ore i cumaã nüxü chixuxü. Rû ngêmacèx i ñuxma rü tá cungega ñuxmatáta nabu i ngêma cune. Natürü ngêma cumaã nüxü chixuxü, rü aixcüma tá ningu nagu i ngêma ngunexü i Tupana ixunetaxü —ñanagürü. ²¹ Rû yoxni ga duüxügü rü tupaucaarü düxétüwa Zacariaxü nananguxèëgü. Rû nügüna nacagüe ga ñacüçèx na tama paxa yéma ínaxüxüxü. ²² Rû yexguma Zacaría tupaucawa íxüüxgu, rü taxucürüwa duüxügümaã nidexa, yerü nangega. Rû nümagü ga duüxügü rü nüxü nicuèxächitanü ga ñacüxü na nadauxü ga Zacaría ga tupaucaarü aixepena. Rû Zacaría rü naxmèxmaã duüxügüxü nüxü nacuèxèë ga ñacü nüxü na üpetüxü, yerü nangega. ²³ Rû yexguma Zacaría naguxèëgu ga na naxüãxü ga Tupanaârü puracü ga tupauca ga taxünewa, rü wenaxârü napatacèx nataegu. ²⁴ Rû yemawena rü Zacaría namèx ga Erichabé rü íxãxäcü. Rû ngîpatagu irüxãüêcha, rü wüximèëpxüxü ga tauemacü taguma düxétüwa íxü. ²⁵ Rû ngîxícatama ngîgürügü: —Cori ya Tupana rü poraãcü choxü narüngüxèë. Rû ñuxma rü marü täütáma chixri chauchiga nidexagü i duüxügü naxcèx na changexacüxü —ngîgürügü.

Wüxi ga Tupanaârü orearü ngeruü ga daxüçüãx nüxü nixu ga Ngechuchuarü buxchiga

²⁶ Rû 6 ga tauemacü marü ngîxü mexgu ga Erichabé ga yema na naxãxäcüxü, rü Gariréaanewa yexmane ga íãne ga Nacharétuwa Tupana nanamu ga norü orearü ngeruü ga Gabi. ²⁷ Rû ngîxütawa naxü ga wüxi ga pacü ga taguma yatü ngîmaã maüxcü. Rû María nixî ga ngîëga. Rû ngîma rü íxãtechaü namaã ga wüxi ga yatü ga Yúhegu äëgacü. Rû nüma ga Yúche rü nuxcümaücü ga äëxgacü ga Dabítanüxü nixî. ²⁸ Rû yema nachica ga María nawa yexmaxügu naxücu ga Gabi, rü ñanagürü ngîxü: —Nuxmaë Pa Maríax. Tupana rü poraãcü cumaã nataãë. Rû Cori ya Tupana rü cuxütawa nangèxma, rü guxü i ngexügüarü yexera marü cuxü narüngüxèë —ñanagürü. ²⁹ Natürü yexguma María nüxü dèuxgu ga yema daxüçüãx ga Tupanaârü orearü ngeruü, rü namaã íhãixächíãë ga yema norü ore ga ngîmaã nüxü yaxuxü. Rû ngîgüãëwa nagu irüxínü ga tüxcüü yemaãcü ngîxü na namoxèxü. ³⁰ Rû yexguma ga Gabi rü ñanagürü ngîxü: —Pa Maríax, tama name na cumuüxü, erü Tupana rü poraãcü cumaã nataãë. ³¹ —Rü ñuxma rü tá tauemacü cuxü inayarütaxu, rü tá cuxãxäcü, rü tá nayatü i cuxacü. Rû Ngechuchugu tá canaxüëga. ³² —Rü nüma rü wüxi ya äëxgacü ya taxüchicü tá nixî. Rû Tupana ya Taxüchicü Nane tá nixî i naega. Rû Cori ya Tupana rü tá nuxcümaücü ga äëxgacü ga Dabírüü äëxgacüxü nayaxíxèë. ³³ —Rü nüma rü guxügütáma Yudíngüarü äëxgacü nixî. Rû tagutáma ínanguxuchi na äëxgacü na yíixü —ñanagürü. ³⁴ Rû yexguma ga María rü Gabina ica, rü ngîgürügü: —¿Nuxäcü tá nixî i ngêma na chaxãxäcüxü, erü tauta chaxãte? —ngîgürügü. ³⁵ Rû nüma ga Gabi rü ngîxü nangãxü, rü ñanagürü: —Tupanaãë i Üünexü tá cuxna nangu. Rû Tupana ya Tacüarü pora rü wüxi i caixanexürüü tá cugu nayangaixema. Rû ngêmacèx ngêma õxchana i namaã cuxãxäcüxü rü Tupanapèxewa mecüxüchi tá nixî, rü Tupana Nanemaã tá nanaxugü i duüxügü. ³⁶ —Rü cutanüxü i Erichabé rü marü íxãxäcü woo marü yaguãxchirèx na yíixü. Rû woo ga duüxügü rü:

“Tagutáma ixãxãcü” ñanagürügü ngĩxũ, natürü i ñuxma rü marü 6 ya tauemacü ngĩxũ name na marü naxãxãcüxũ. ³⁷—Erü Tupanaãxũ rü taxuüma naguxcha —ñanagürü. ³⁸ Rü yexguma ga María rü ngĩgürügü: —Chorü Cori ya Tupanaärü duüxü chixi i chomax. Rü marü name i chomaã nanaxü i ngẽma chomaã nüxü quixuxüãcüma —ngĩgürügü. Rü yexguma ngĩxna ínixü ga yema Tupanaärü orearü ngeruü ga daxüçüãx ga Gabi.

María rü Erichabéxütagu inaxüãne

³⁹ Rü yexgumaücüü ga María rü paxama nawa ixü ga guma iãne ga Zacariapata nawa yexmane ga Yudéaaneärü dauxchitawa. ⁴⁰ Rü Zacariapatawa ingu, rü iyaxücu, rü Erichabéxü irümoxë. ⁴¹ Rü yexguma Erichabé nüxü ínúgu ga Maríaarü moxë, rü ngĩrü õxchana ga ngĩãnúwa yexmaxü rü nixiãxücüü. Rü Tupanaãë ga Üünexü rü Erichabéna nangu. ⁴² Rü yexguma ga Erichabé rü tagaãcü Mariaxü ngĩgürügü: —Guxü i ngexügiarü yexera Tupana cuxü narüngüxëë. Rü ngëxgumarüü ta cunexü narüngüxëë. ⁴³ —¿Tãcüwa chame na nuã chauxütagu cunaxüãnaxü? Pa Chorü Cori Naëx. ⁴⁴ —Erü ngëxguma nüxü chaxínügu i curü moxë, rü chauxacü i chauanuwa ngëxmaxü rü norü taãëmaã nixiãxücüü. ⁴⁵ —Cuma rü cutaãë erü nüxü cuyaxõ i norü ore ya Tupana. Rü ngëmacëx Tupana tá nayanguxëë i ngẽma ore i cumaã nüxü yaxuxü —ngĩgürügü ga Erichabé. ⁴⁶ Rü yexguma ga María rü ngĩgürügü: —Choma rü chauãëwa poraãcü Tupanaxü chicuëxüü. ⁴⁷ —Rü chorü Cori ya chorü Maxëëruümaã chataãëxüchi. ⁴⁸ —Rü woo wüxi i Tupanaärü duüxü i ngearü díeruãxë chixi, natürü Tupana chaugu narüxínü. Rü ñuxmaücüü i duüxügü rü taãëxcümaã guxügutáma choxü naxügü. ⁴⁹ —Erü Tupana ya Poracü rü taxü i mexü chauxcëx naxü. Rü naxüüne i naega ya Tupana. ⁵⁰ —Rü núma ya Tupana rü guxügutáma nüxü tangechaütümüüügü ya guxáma ya yíxema aixcüma nüxü muüëxë. ⁵¹ —Rü guxü ga norü poramaã tüxü narüyexera ga guxema tügütama icuëxüüügüxë. ⁵² —Rü marü ínanawoxü ga yema äëxgacügü ga nügü icuëxüüügüxü. Natürü guxema duüxëgü ga tama tügü icuëxüüügüxë, rü poraãcü tüxü narüngüxëë. ⁵³ —Rü guxema tüxü nataxüxë, rü muxüma tüxna naxã. Natürü guxema muärü díeruãxgüxë rü taxuüma tüxna naxããcüma tüxü ínimügü. ⁵⁴ —Rü poraãcü nüxü narüngüxëë ga norü duüxügü ga Yudiügü. Rü tama nüxü inarüngüma na nüxü ingechaütümüüügüxü, yexgumarüü ga nuxcümaüügüxü ga tatanüxümaã na inaxunetaxü. ⁵⁵ —Yerü yemaãcü inaxuneta namaã ga tóru õxi ga Abráü rü namaã ga tatanüxügü na guxügutáma tüxü nangüxëëxü —ngĩgürügü ga María. ⁵⁶ Rü tomaëxpüx ga tauemacü Erichabéxütagu irüãüx ga María. Rü ñuxüchi ngĩpatacëx itaegu.

Cuáü ga baiüxëëruüärü buxchiga

⁵⁷ Rü nawa nangu ga ngunexü ga na naxíraxacüxü ga Erichabé. Rü nayatü ga ngĩxãcü. ⁵⁸ Rü yexguma nüxü nacüëxgügu na ñuxãcü Tupana ngĩmaã mecümaxü, rü ngĩrü ngaicamagu pegüxü ga duüxügü rü ngĩtanüxügü rü ngĩxü ínayadaugü, rü ngĩxü narümoxëgü rü ngĩxü nayataãëgüxëë. ⁵⁹ Rü 8 ga ngunexüguwena rü ínayawiechëxmüpëxechiraüügü ga guma ngĩne. Rü nanatü ga Zacariagu nanaxüëgagüchaü ga duüxügü. ⁶⁰ Natürü naë ga Erichabé rü tama inaxwëxe. Rü ngĩgürügü: —Narümeaë nixi i Cuáügu tanaxüëga —ngĩgürügü. ⁶¹ Rü duüxügü rü ñanagürügü ngĩxü: —¿Tüxcüü cunaxwëxe i ngẽma naega? Erü cutanüxütanüwa rü tataxuma ya texé ya ngëmagu äëgaxe —ñanagürügü. ⁶² Rü yexguma ga duüxügü rü naxmëxwa nanatü ga Zacariána

nacagüe ga tacü rü naegagu tá na naxüégaãxü. ⁶³ Rü yexguma ga Zacaría rü poperaxü naxuneta na yexma na naxümatüãxücèx ga naega. Rü yexma nanaxümatü, rü ñanagürü:

“Cuáü tá nixí i naega”, ñanagürü ga namatü. Rü guxüma ga duüxügü rü nabaixächiaëgü ga yexguma yema naegaxü nadaugügu. ⁶⁴ Rü yexgumatama wenaxärü nidexa ga Zacaría. Rü inanaxügü ga Tupanaxü na yacuèxüxü. ⁶⁵ Rü yemacèx guxüma ga yema duüxügü ga norü ngaicamagu ápatagüxü rü poraäcü nabaixächiaëgü. Rü guxüwama ga yema naãnewa ga Yudéaanewa rü duüxügü nüxü nixuchigagü ga yema ngupetüxü. ⁶⁶ Rü guxüma ga nüxü cuáchigagüxü ga yema ngupetüxü, rü nügüãxëwa nagu narüxñüéecha, rü ñanagürügü: —¿Tacü tá nixí i ngëma buxü? Erü Tupana rü aixcüma naxütawa nangëxma —ñanagürügü.

Zacaría rü Tupanaxü nicuèxüü

⁶⁷ Rü nanatü ga Zacária nangu ga Tupanaãe i Üüenxü. Rü nüxü nixu ga yema ore ga Tupana namaã nüxü ixuxü. ⁶⁸ Rü ñanagürü: —Name nixí i nüxü ticuèxüügü ya tórü Cori ga nuxcümaücü ga tórü oxí ga Iraéarü Tupana. Erü núma tatanüwa nangu na tüxü yamaxèxèxücèx i yixema i norü duüxügü na ixígüxü. ⁶⁹ —Rü ngëmacèx tüxna nanamu ya wüxi ya poracü ya tórü maxèxèëruü ga nuxcümaücü ga norü duüxü ga Dabítanüxüwa ne ücü. ⁷⁰ —Rü yemaäcü Tupana tamaã inaxuneta nawa ga yema nuxcümaügüxü ga norü orearü uruügü ga üünegüxü. ⁷¹ —Rü yema orearü uruügüwa nüxü nixu rü tá tüxü ñnangüxüëë naxmëxwa i tórü uwanügü rü guxüma i ngema duüxügü i taxchi aixü. ⁷² —Rü nuxcümaügüxe ga tórü oxigümaã nüxü nixu na nüxü tangechaütümüügüxü rü tagutáma nüxü iyanangümaxü ga yema tümamaã inaxunetaxü. ⁷³⁻⁷⁵ —Rü yemaäcü ga Tupana rü nuxcümaücü ga tórü oxí ga Abráümaã inaxuneta. Rü namaã nüxü nixu rü tá tüxü ñnangüxüëë nüxna i tórü uwanügü na tama imuüëäcüma naxüxücèx i Tupanaärü puracü rü aixcüma mecü na ixígüxü napëxewa i guxü i tórü maxüwa i wüxichigü i ngunexügu —ñanagürü ga Zacaría. ⁷⁶ Rü ñanagürü ta: —Cumax, Pa Chaunex, rü Tupana ya Taxüchicüarü orearü uruümaã tá cuxü naxügü. Erü cuma rü tá Corixüpa yoxni duüxügümaã nüxü quixu i nachiga ya Cori. ⁷⁷ —Cuma rü Coriarü duüxügüxü tá nüxü cucuèxèë na Tupana tá nüxü nüxü ngechaütü i norü pecadugü na ngëmaäcü nayauxgüãxücèx i maxü i taguma güxü. ⁷⁸⁻⁷⁹ —Erü nüxü tangechaütümüügü ya Tupana ya poraäcü tüxü ngechaücü. Rü ngëmacèx daxügüxü i naãnewa taxcèx ne nanamu i ñoma i naãneärü ngóonexèëruü i ngexwacaxüxü na nangóonetanüxèëãxücèx i ngëma duüxügü ga noxri guxüguma norü chixexügagu äücümaxüwa yexmagüxü. Rü núma tá tüxü narüngüxüëë na Tupanamaã rüngüxmüëxücèx —ñanagürü ga Zacaría. ⁸⁰ Rü yema buxü rü niyachigü rü wüxichigü ga ngunexügu yexeraäcü Tupanaxü nicuáchigü. Rü dauxchita ga ngextá taxüema Ixápataxüwa nayexma ñuxmata yema ngunexüwa nangu ga na Yudiügüxü nügü nacuèxèëxü.

2

*Ngechucharü buxchiga
(Mt 1.18-25)*

¹ Rü yexguma Agutu äëxgacü ga tacü ixíxgu ga Dumawa, rü nanaxunagü ga na yaxügüãxü ga guxüma ga duüxügü ga guxü ga naãnewa. ² Rü yema nüxíraüxü ga duüxügüarü ugüchiga, rü nanaxü ga yexguma Quirinu äëxgacü ixíxgu ga Chíríaarü naãnewa. ³ Rü guxüma ga duüxügü rü wüxichigü norü ñane

ga nagu nabuxñewana nixũchigũ ga yéma na yaxugũãxũcèx. ⁴ Rũ yemacèx ga Yũche rũ Gariréaanaewa yexmane ga ããne ga Nacharétuwa ìnaxũxũ, rũ Yudéaarũ naãnewa yexmane ga ããne ga Beréũwa naxũ. Rũ guma nixĩ ga ããne ga nuxcũmaũcũ ga ãẽxgacũ ga Dabĩ nagu buxũne. Rũ yemacèx nixĩ ga Yũche ga yéma naxũxũ, yerũ Dabítanũxũ nixĩ ga nũmax. ⁵ Rũ Beréũwa naxũ ga Yũche na yaxugũũcèx wũxigu ngĩmaã ga María ga ngĩmaã naxãmèxchaũcũ. Natũrũ ga María rũ itacharaũ ga na naxãxãcũxũ. ⁶ Rũ yexguma Beréũwa nayexmagũyane, ngĩxna nangu ga ngĩrũ ngunexũ ga na naxĩraxacũxũ ga María. ⁷ Rũ yexma nabu ga nũxĩraũcũ ga ngĩne. Rũ naxchápenũũmaã inanuque. Rũ wũxi ga wocaarũ chibũchicagumare inacanagũxẽe, yerũ marũ guxũma nixããcu ga ucapu nawa ga guma pegũpataũ.

Tupanaãrũ orearũ ngeruũ ga daxũcũãx rũ carnerugũarũ dauruũcèx nangox

⁸ Rũ Beréũrũ ngaicamana nayexmagũ ga ñuxre ga carnerugũarũ dauruũgũ ga chũtacũ nachitaũwa norũ carnerugũna ìdaugũxũ. ⁹ Rũ ngũrũãchi yema carnerugũarũ dauruũgũcèx nangox ga wũxi ga orearũ ngeruũ ga daxũcũãx. Rũ Cori ya Tupanaãrũ ũũne rũ nawa nayexma rũ yemacèx poraãcũ nangóone. Rũ yema carnerugũarũ dauruũgũ rũ poraãcũ namuũe. ¹⁰ Natũrũ yema orearũ ngeruũ ga daxũcũãx, rũ ñanagũrũ nũxũ: —¡Tãxũ i pemuũèxũ! erũ pexcèx nuã chanange i wũxi i ore i mexèchixũ i guxũ i duũxũgũarũ taãèxèèruũ tá ixĩxũ. ¹¹ —Erũ ñuxma rũ Beréũgu nabu ya perũ maxèxèèruũ. Rũ nũma rũ Cori ya Cristu nixĩ. ¹² —Rũ ñãã tá nixĩ i perũ cuèxruũ. Rũ tá nũxũ ipeyangau i wũxi i õxhana i naxchápenũũmaã nuquexũ rũ wocaarũ chibũchicagu caxũ —ñanagũrũ. ¹³ Rũ yexgumatama ngũrũãchi yema daxũcũãx ga orearũ ngeruũxũtawa nangox ga muxũma ga togũ ga daxũcũãx ga orearũ ngeruũgũ. Rũ Tupanaxũ nicuèxũũgũ, rũ ñanagũrũgũ: ¹⁴ —Rũ ñuxma rũ Tupanaxũ ìnicuèxũũgũ rũ ìnataãègũ i daxũgũxũ i naãnewa. Rũ pema i ñoma i naãnecũãx i Tupana pemaã taãègũe, rũ name nixĩ i pegũmaã perũngũxmũe —ñanagũrũgũ. ¹⁵ Rũ yexguma daxũwa naxĩxguwena ga yema orearũ ngeruũgũ rũ yema carnerugũarũ dauruũgũ rũ nũgũmaã ñanagũrũgũ: —¡Ngĩxã ìtayadau i Beréũwa i ngẽma ngupetũxũ i Cori ya Tupana tamaã nũxũ ixuxũ nawa i norũ orearũ ngeruũgũ! —ñanagũrũgũ. ¹⁶ Rũ paxa inaxĩãchi, rũ yéma naxĩ. Rũ yexma inayangaugũ ga Yũche rũ María rũ guma bucũ ga wocaarũ chibũchicagu cacũ. ¹⁷ Rũ yexguma yema bucũxũ nadaugũgu ga yema carnerugũarũ dauruũgũ, rũ duũxũgũmaã nũxũ nixugũe ga yema ore ga Tupanaãrũ orearũ ngeruũ ga daxũcũãx namaã nũxũ ixuxũ ga guma bucũchiga. ¹⁸ Rũ guxũma ga duũxũgũ ga nũxũ ñnũèxũ ga yema carnerugũarũ dauruũgũarũ ore rũ namaã nabaixãchiãègũ. ¹⁹ Natũrũ ga María rũ inayaxu ga guxũma ga yema ngupetũxũ rũ ngĩãègu namaã inguxũ rũ nagu irũxinũècha. ²⁰ Rũ nawoegu ga yema carnerugũarũ dauruũgũ. Rũ taãècũma Tupanaxũ nicuèxũũgũ naxcèx ga guxũma ga yema nũxũ naxĩnũèxũ rũ nũxũ nadaugũxũ yerũ aixcũma yema orearũ ngeruũ ga daxũcũãx namaã nũxũ ixuxũãcũma nangupetũ.

Bucũ ga Ngechuchu rũ tupauca ga taxũnewa nanagagũ

²¹ Rũ yexguma 8 ga ngunexũ nũxũ yexmagu ga na nabuxũ ga õxhana, rũ ìnanawiechẽxmũpèxechiraũgũ. Rũ Ngechuchugu nanaxũégagũ. Rũ yematama nixĩ ga naega ga daxũcũãx ga Tupanaãrũ orearũ ngeruũ Marĩamaã nũxũ ixuxũ ga tauta namaã naxãxãcũgu. ²² Rũ yexguma marũ yan-guxgu ga yema ngunexũ na tupauca ga taxũnewa Tupanapèxewa na nũgũ

yamexēēgūxū rü yéma naxī na yemaācū Tupanapēxewa yanguxēēgūāxūcēx ga yema Moīchéarū mugū nūxū ixuxūrū. Rū Yerucharéūwa ga tupauca ga taxūnewa nanagagū ga guma bucū na Tupanana namugūāxūcēx. ²³ Rū yemaācū nanaxūgū yerū Tupanaārū mugūwa naxūmatū, rü ñanagürü:

“Ngēxguma wūxi i nge rü nayatūgu i nūxīraūxū i ngīxācū, rü name i Cori ya Tupanana inamu”,

ñanagürü. ²⁴ Rū yéma naxī rü yéma nanagagū ga taxre ga muxtucugū ga yexwacēx yaexū, na Tupanacēx nadaiāxūcēx ga paigū ga tupaucawa, yerū yema ñanagürü ga Tupanaārū mugūwa. ²⁵⁻²⁶ Rū yexgumaūcū Yerucharéūgu naxāchiū ga wūxi ga yatū ga Chimeūgu āegacū. Rū wūxi ga yatū ga mecūmacū nixī ga nūmax, rü aixcūma Tupanaxū ngechaūcū nixī. Rū nūma rü guxūguma ñnananguxēē na ñuxguacū tá ñnanagūxū ya Yudiūgūarū nguxūxēērū ya Cristu. Rū Tupanaāē i Ūñexū rü Chimeūxūtawa nayexma, rü nūxū nūxū nacūxēē na tāūtāma nayuxū ega tama nūxū nadauxiragu ya Cristu ya Cori ya Tupana nūma namucū. ²⁷ Rū yema ngunexūgu rü tupauca ga taxūnewa Chimeūxū naxūxēē ga Tupanaāē i Ūñexū. Rū yéma nayexma ga Chimeū ga yexguma Yúche rü María tupaucawa nagagūgu ga guma bucū ga Ngechuchu na Tupanana namugūāxūcēx na yemaācū yanguxēēgūāxūcēx ga Moīchéarū mu. ²⁸ Rū Ngechuchuxū naganagū ga Chimeū. Rū Tupanaxū nicūxūū, rü ñanagürü: ²⁹ —Pa Corix, ñuxma rü marū name na chayūxū, erū marū cuyanguxēē ga yema chomaā icuxunetaxū. ³⁰⁻³¹ —Rū chauxetūmaāxūchi nūxū chadau ya daa Maxēxēērū ya guxū i duūxūgūcēx nūma cunamucū.

³² —Rū nūma nixī i ngōonexēērū naxcēx i guxūma i duūxūgū i tama Yudiūgū ixīgūxū. Rū ñāā ōxchanagagu rü togū i duūxūgū tá nūxū nicūxūūgū i curū duūxūgū i Yudiūgū —ñanagürü. ³³ Rū Yúche rü María rü nabaixāchiāēgū namaā ga Chimeūārū ore ga ñuxācū guma ōxchanachigamaā na yadexaxū. ³⁴ Rū yexguma ga Chimeū rü Tupanana naca na meā nūxū nangupetūgūxūcēx ga Yúche rü María rü guma ōxchana. Rū ñanagürü ngīxū ga María ga Ngechuchunaē: —Dūcēx, daa ōxchana rü tá nanamaxēxēē i muxūma i Yudiūgū, natūrū ngēma tama nūxū yaxōgūchaūxū rü tá inayarūtauxe. Rū nūma rü wūxi i cuēxruū tá nixī i duūxūgūcēx, rü muxūma tá nūxū naxoe. ³⁵ —Rū ngēmaācū tá nanangoxēēāma i guxūma i naāēwa nagu naxīnūxū i muxūma i duūxūgū.

Rū guxūma i ngēma tá ñāā ōxchanaxū ngupetūxū rü ñoma wūxi i cūxchi i curū maxūnewa yarūwāxūrūū tá cuxū nangux, Pa Mariāx —ñanagürü. ³⁶ Rū yéma ta iyexma ga wūxi ga ngecū ga Tupanaārū orexū ixucū. Rū Ana nixī ga ngīega. Rū Panuēxācū iyixī, rü Ácherutanūxū iyixī. Rū marū yaguāxūchi iyixī. Rū yexguma napaxūchigutama ixāte. Natūrū 7 ga taunecū- guxicatama ngītemaā iyarūxūūxū, yerū nayu ga ngīte. ³⁷ Rū yemaācū wūxi ga yutecū ga yaguāxūchi iyixī, yerū 84 nixī ga ngīrū taunecū. Rū taguma tupauca ga taxūnewa ñixūxū. Rū guxūguma ngunecū rü chūtacū rü naxaureācūma iyumūxēēcha. Rū yemaācū Tupanaxū iyacuēxūū rü inataxēē. ³⁸ Rū yexgumatama Chimeū ñidexayane, rü yéma ingu ga Ana. Rū Tupanana moxē ixā. Rū ñinaxūgū ga ōxchana ga Ngechuchuchiga na yadexaxū napēxewa ga guxūma ga yema Yudiūgū ga Yerucharéūcūāx ga Cristuxū ñnananguxēēgūxū na norū nguxuchixēērū yīxūcēx.

Īāne ga Nacharétucēx nawoegu

³⁹ Rū yexguma marū yanguxēēgūāguwena ga guxūma ga yema Tupanaārū mugū nūxū ixuxū, rü Yúche rü María rü naxcēx nawoegu ga norū ñāne

ga Nacharétu ga Gariréaanewa yexmane. ⁴⁰ Rū guma bucū rū niyachigū, rū yexeraācū niporachigū, rū yexeraācū nūxū nicuáchigū. Rū Tupana rū poraācū nūxū narūngūxēē.

Bucū ga Ngechuchu rū tupauca ga taxūnewa naxo

⁴¹ Nanatū rū naē rū cucū ga taunecūgu Yerucharéuwa taxīxū naxcēx ga Ūpetūchigaarū peta. ⁴² Rū yexguma Ngechuchu 12 ga taunecū nūxū yexmagu, rū Yerucharéuwa taxī namaā ga nanatū rū naē, yerū yema nixī ga Yudiūgūcūma naxcēx ga Ūpetūchigaarū peta. ⁴³ Rū yexguma yagūechigagu ga Ūpetūchigaarū peta, rū tūmachiūcēx tawoegu ga nanatū rū naē. Natūrū ga Ngechuchu rū tūmaēchita tūxna Yerucharéūgu narūxāūx. ⁴⁴ Rū tūma nūxū tacuēxgūgu rū yema muxū ga duūxūgū ga tūmaweama ixīxūtanūxūtanūgu naxā ga Ngechuchu. Rū yemaācū marū itaxī ga wūxi ga ngunexū. Natūrū yexguma naxcēx tadaugūgu tūmatanūxūtanūgu rū yema tūxū cuēxgūxūtanūgu rū tama nūxū itayangaugū. ⁴⁵ Rū yemacēx wenaxārū Yerucharéuēcēx tawoegu na yexma naxcēx tayadaugūxūcēx. ⁴⁶ Rū tomaēxpūx ga ngunexūguwena Ngechuchuxū itayangaugū ga tupauca ga taxūnegu. Rū yēma narūto natanūwa ga yema ngūexēēruūgū ga Tupanaārū mugūwa nguxēētaegūxū, rū inarūxīnū ga norū nguxēētae, rū nūxna nicachigū. ⁴⁷ Rū guxūma ga yema duūxūgū ga Ngechuchuxū inūxū, rū nabaixāchiāēgū na nūxācū nūxū nacuēxūchixū rū meāma nangāxūāxū. ⁴⁸ Rū yexguma nanatū rū naē nūxū daugūgu rū tabaixāchiāēgū. Rū naē rū natarūgū nūxū: —Pa Chaunex, ¿tūxcūū tomaā ngexū cuwagū? Cunatū rū choma rū poraācū cuxcēx taxoegaāēcūma cuxcēx tadaugūecha —ñatarūgū. ⁴⁹ Rū yexguma ga Ngechuchu rū nānagūrū: —¿Tūxcūū chauxcēx pedaugū? ¿Tama ēxna nūxū pecuēx na woetama Chaunatūchiūwa tá changēxmaxū? —ñanagūrū. ⁵⁰ Natūrū ga tūmagū rū tama nūxū tacuēxgūēga ga yema tūmamaā nūxū yaxuxū. ⁵¹ Rū yexguma ga Ngechuchu rū tūmawe nataegu ga Nacharétuwa. Rū guxūguma meā tūmaga naxīnūēcha. Rū naē ga María rū ngīāewa nagu irūxīnūēcha ga guxūma ga yema ngupetūxū. ⁵² Rū niyachigū ga Ngechuchu, rū yexeraācū nūxū nicuáchigū. Rū Tupana rū namaā nataāē, rū guxūma ga duūxūgū rū ta namaā nataāēgū.

3

Cuāū ga baiūxēēruū nūxū nixu ga Tupanaarū ore ga dauxchitawa ga ngextá taxūema íxāpataxūwa

(Mt 3.1-12; Mr 1.1-8; Cu 1.19-28)

¹ Rū yexguma Tibériu 15 ga taunecū Dumaarū āēxgacū yixīngu, rū yexguma nixī ga Pōūchiu Piratu rū Yudéaaneārū āēxgacū yixū, rū Erode rū Gariréaaneārū āēxgacū yixū, rū Lichániā rū Abiriniāaneārū āēxgacū yixū. ² Rū yexguma ga Aná rū Caipá rū paigūeru nixīgū. Rū yexguma nixī ga Zacaría nane ga Cuāūmaā yadexaxū ga Tupana ga dauxchitawa ga ngextá taxūema íxāpataxūwa. ³ Rū guxūma ga yema nachicagū ga Yudaūcutuarū ngaicamana yexmagūxūgu nixūgūchigū ga Cuāū. Rū duūxūgūmaā nūxū nixuchigū na nūxū naxoexūcēx ga nacūmagū ga chixexū rū inabaiūxūcēx na yemaācū Tupana nūxū nūxū rūngūmaxūcēx ga norū pecadugū. ⁴ Rū guma nuxcūmaūcū ga Ichaxía ga Tupanaārū orearū uruū naxūmatūxūrū nixī ga nangupetūxū. Yerū duūxūgūarū maxūārū mexēēchigaxū nixu ga yexguma naxgu:

“Ngēma nachica i ngextá taxúema íxāpataxūwa rü tá nangēxma i wüxi i duūxū i ngema tagaācūma ñaxū: ‘¡Pegü pemexēē naxcēx ya Cori! ¡Rü naxcēx ipeyanawēxāchixēē i perü maxū!’ ⁵ Rü guxāārü maxū rü tá inayarūwēxāchi ñoma wüxi i ngatexū rügütaxūrūū na iyawēxūcēx i nama. Rü guxāma ya yíxema togüētūwa tügü ngēxmaxēēgūxe rü tá ítarūxí ñoma wüxi ya mēxpūne rü wüxi i ngüchitaeru idoxochixēēxūrūū. Rü guxūma i nacūma i wūxū rü tá inayarūwēxāchigü. Rü ngēma duūxūgūarü maxūwa tama mexū rü tá nayamexēēgü. ⁶ Rü guxūma i duūxūgü rü tá nüxū nadaugü ya yima Maxēēerüü ya Tupana núma namucü”,

ñanagürü ga Ichaxía ümatūxū ga ore. ⁷ Rü yexguma Cuáūxūtawa naxīxgu ga duūxūgü na ínabaiūxēēāxūcēx, rü núma ga Cuáū rü ñanagürüama nüxū: —Pa Áxtapearü Duūxūgūx ¿Rü ñuxācü nagu perüxínüe na naxchaxwa pibuxmūxū i ngema poxcu i marü ingaicamaxū ega tama nüxū perüxoegu i pecūma i chixexū? ⁸ —¡Rü meā pemaxē na ngēmaācü guxūma i duūxūgü nüxū daugūxūcēx na aixcūma marü nüxū perüxoexū i pecūma i chixexū! Rü tama name i ñaperügüü:

“Tāütáma Tupana toxū napoxcue, erü Abráütanūxū tixīgü” ñaperügüü. Erü tama ngēmacēx nixí ya Tupana i duūxūgūxū nayaxuxū. Rü pemaā nüxū chixu rü ngēxguma Tupana naxwēxegu rü tama nüxū naguxcha na daa nutawa Abráütanūxū nanguxūxēēxū. ⁹ —Tupanaärü yuema rü marü íimemare na yadaxūāxūcēx i ngēma nanetügü i tama mexū. Rü guxūma i nanetügü i chixearü öðxū rü tá nadaxū, rü ñuxūchi üxūwa tá ínagu —ñanagürü ga Cuáū. ¹⁰ Rü yexguma ga duūxūgü rü Cuáūna nacagü, rü ñanagürügü: —¿Tacü ēxna nixí i mexū na tanaxūxū? —ñanagürügü. ¹¹ Rü Cuáū rü nanangāxū rü ñanagürü: —Texé ya taxrearü gauxūchirūāxē rü name nixí i texé ya tūxū natakūxena tanaxā. Rü texé ya ónaāxē rü name nixí i texé ya ngearü ónaāxēmaā tangau i tūmaärü óna —ñanagürü. ¹² Rü Cuáūxūtawa naxí ta ga ñuxre ga yatügü ga Dumaärü āēxgacūcēx díeru ngīxū ideetanūxū. Rü nanaxwēxegü ga Cuáū na ínabaiūxēēxū. Rü Cuáūna nacagü, rü ñanagürügü: —Pa Ngúxēēerūx, ¿Tacü nixí i mexū na tanaxūxū i tomax? —ñanagürügü. ¹³ Rü Cuáū rü ñanagürü nüxū: —Tama name i āēxgacü pemaā nüxū ixuxūārü yexera penayaxgü i díeru i duūxūgūxūtawa —ñanagürü. ¹⁴ Rü ñuxre ga churagarü rü ta Cuáūna nacagü, rü ñanagürügü: —¿Toma rü tacü nixí i mexū na tanaxūxū? —ñanagürügü. Rü nanangāxū ga Cuáū rü ñanagürü: —Tama name i texéxū pexāxūneācūma tūmaärü ngēmaxūgü pepuxū. Rü tama name i tacü rü doraxū tūmachigaxū pixu na ngēmaācü tūmaärü ngēmaxūgü pepuxūxūcēx. Rü name nixí i ngēma díeru i āēxgacü pexū ngīmaā naxūtanūcūmaātama petaāgü rü tama yexeracūcēx ípeca —ñanagürü. ¹⁵ Rü yexguma ga duūxūgü rü poraācü ínananguxēēgü na paxa ínanguxū ga Tupana Nane ga Cristu. Rü nagu narūxínüē ga na bexmana Cuáū rü Cristu yīxū. ¹⁶ Natürü ga Cuáū rü guxāxū ñanagürü: —Aixcūma i choma rü dexāwamare pexū íchabaiūxēē, natürü tá ínangu i to i Tupanaärü orearü uruū, rü núma tá pexna nananguxēē i Tupanaāē i Üñexū wüxi i üxūemarūū. Erü núma rü poraācü choxū narüyexera na āēxgacü yīxū. Rü choma rü napēxewa rü taxuwama chame rü bai i norü chapatucunūärü wēgūwa chame. ¹⁷ —Rü núma rü marü ínamemare na ñoma i naānewa yadexechiāxūcēx i norü duūxūgü ñoma wüxi ya yatü trigu naātūna idexechixūrūū. Rü ngēmaācü tá nayadexechi i ngēma noxrü íxīgūxū na naxū- tawa nangēxmagūxūcēx,

natürü ngëma tama noxrü ixīgüxü, rü tá ínanagu nawa ya yima üxü ya taguma ixoxüne —ñanagürü. ¹⁸ Rü yema oremaã rü muxüma ga to ga ucuxëgümaã, rü Cuáü duüxügümaã nüxü nixu ga ore ga mexü ga Ngechuchuchiga. ¹⁹ Rü Cuáü rü ãëxgacü ga Erodexü nanga, yerü ngímaã naxãmèx ga Erodía ga naëneë ga Piripi namèx. Rü nananga ta naxcèx ga yema togü ga chixexü ga naxüxü. ²⁰ Natürü ga Erote rü tama Cuáüga naxínü. Rü yexeraxü ga chixexü naxü, yerü poxcupataüwa Cuáüxü namu.

Ngechucharü baiechiga
(Mt 3.13-17; Mr 1.9-11)

²¹ Rü yexguma taxüta napoxcugu ga Cuáü, rü guxü ga duüxügüxü ínabaiüxëxyane, rü yexguma ta nixí ga Ngechuchuxü ínabaiexëxü. Rü yexguma Ngechuchu íyumüxëxyane rü ningena ga daxüguxü ga naäne. ²² Rü Tupanaãë i Üünexü rü wüxi ga muxtucurü ínanago rü Ngechuchuna nangu. Rü daxüwa ínanaxü ga wüxi ga naga ga ñaxü: —Cuma nixí, Pa Chaunex, i cuxü changechaüxüchixü rü cumaã chataãexü —ñaxü.

Ngechuchu ya Cristu natanüwa ngóxü ga duüxügüchiga
(Mt 1.1-17)

²³ Ngechuchu rü 30 ga taunecü nüxü nayexma ga yexguma ínaxügüãgu na guxüwama duüxügümaã nüxü yaxuxü ga Tupanaarü Ore. Rü duüxügü nagu narüxínüë rü Yúche nane nixí ga nümax.

Rü Yúche rü Erí nane nixí.

²⁴ Rü Erí rü Matáx nane nixí.

Rü Matáx rü Lebí nane nixí.

Rü Lebí rü Merequí nane nixí.

Rü Merequí rü Yana nane nixí.

Rü Yana rü Yúche nane nixí.

²⁵ Rü Yúche rü Matatía nane nixí.

Rü Matatía rü Amó nane nixí.

Rü Amó rü Naüü nane nixí.

Rü Naüü rü Echi nane nixí.

Rü Echi rü Nagái nane nixí.

²⁶ Rü Nagái rü Maãx nane nixí.

Rü Maãx rü Matatía nane nixí.

Rü Matatía rü Chemeí nane nixí.

Rü Chemeí rü Yuchéx nane nixí.

Rü Yuchéx rü Yudá nane nixí.

²⁷ Rü Yudá rü Yuanáü nane nixí.

Rü Yuanáü rü Récha nane nixí.

Rü Récha rü Chorobabé nane nixí.

Rü Chorobabé rü Charatía nane nixí.

Rü Charatía rü Nerí nane nixí.

²⁸ Rü Nerí rü Merequí nane nixí.

Rü Merequí rü Adí nane nixí.

Rü Adí rü Cocháü nane nixí.

Rü Cocháü rü Elmadáü nane nixí.

Rü Elmadáü rü Erú nane nixí.

²⁹ Rü Erú rü Yochué nane nixí.

Rü Yochué rü Erieché nane nixí.

Rü Erieché rü Yoríü nane nixí.

Rü Yoríü rü Matáx nane nixí.

Rü Matáx rü Lebí nane nixí.

- 30 Rŭ Lebí rŭ Chimeũŭ nane nixĩ.
 Rŭ Chimeũŭ rŭ Yudá nane nixĩ.
 Rŭ Yudá rŭ Yúche nane nixĩ.
 Rŭ Yúche rŭ Yonáŭ nane nixĩ.
 Rŭ Yonáŭ rŭ Eriaquíŭ nane nixĩ.
- 31 Rŭ Eriaquíŭ rŭ Meréa nane nixĩ.
 Rŭ Meréa rŭ Ména nane nixĩ.
 Rŭ Ména rŭ Matáta nane nixĩ.
 Rŭ Matáta rŭ Natáŭ nane nixĩ.
 Rŭ Natáŭ rŭ Dabí nane nixĩ.
- 32 Rŭ Dabí rŭ Ichaxí nane nixĩ.
 Rŭ Ichaxí rŭ Obé nane nixĩ.
 Rŭ Obé rŭ Boó nane nixĩ.
 Rŭ Boó rŭ Cháru nane nixĩ.
 Rŭ Cháru rŭ Nachóŭ nane nixĩ.
- 33 Rŭ Nachóŭ rŭ Aminadá nane nixĩ.
 Rŭ Aminadá rŭ Admíŭ nane nixĩ.
 Rŭ Admíŭ rŭ Arni nane nixĩ.
 Rŭ Arni rŭ Esróŭ nane nixĩ.
 Rŭ Esróŭ rŭ Fare nane nixĩ.
 Rŭ Fare rŭ Yudá nane nixĩ.
- 34 Rŭ Yudá rŭ Acóbu nane nixĩ.
 Rŭ Acóbu rŭ Ichaá nane nixĩ.
 Rŭ Ichaá rŭ Abráŭ nane nixĩ.
 Rŭ Abráŭ rŭ Taré nane nixĩ.
 Rŭ Taré rŭ Nacúx nane nixĩ.
- 35 Rŭ Nacúx rŭ Cherúx nane nixĩ.
 Rŭ Cherúx rŭ Ragáu nane nixĩ.
 Rŭ Ragáu rŭ Peréx nane nixĩ.
 Rŭ Peréx rŭ Ebéx nane nixĩ.
 Rŭ Ebéx rŭ Cháru nane nixĩ.
- 36 Rŭ Cháru rŭ Caináŭ nane nixĩ.
 Rŭ Caináŭ rŭ Arpacháx nane nixĩ.
 Rŭ Arpachá rŭ Chéŭ nane nixĩ.
 Rŭ Chéŭ rŭ Noę nane nixĩ.
 Noę rŭ Laméx nane nixĩ.
- 37 Rŭ Laméx rŭ Matucharéŭ nane nixĩ.
 Rŭ Matucharéŭ rŭ Enóx nane nixĩ.
 Rŭ Enóx rŭ Yaréx nane nixĩ.
 Rŭ Yaréx rŭ Maararéx nane nixĩ.
 Rŭ Maararéx rŭ Caináŭ nane nixĩ.
- 38 Rŭ Caináŭ rŭ Enóx nane nixĩ.
 Rŭ Enóx rŭ Chex nane nixĩ.
 Rŭ Chex rŭ Adáŭ nane nixĩ.
 Rŭ Adáŭ rŭ Tupana nane nixĩ.

4

Ngechuchuxŭ naxŭ ga Chataná
 (Mt 4.1-11; Mr 1.12-13)

¹ Ngechuchuxŭtawa nayexma ga Tupanaãe i Üünexŭ. Rŭ yexguma Yudáŭchiüwa Ínaxŭŭchigu ga Ngechuchu, rŭ Tupanaãe i Üünexŭ rŭ dauxchitawa ga ngextá taxúema Íxápataxŭwa nanaga. ²Rŭ yéma nayexma ga 40 ga ngunexŭ. Rŭ ngoxo ga Chataná rŭ nüxŭ naxŭ. Rŭ yexguma yéma nayexmagu

rü taguma nachibü. Natürü ga yixcama rü nataiya. ³ Rü yexguma ga ngoxo ga Chataná rü ñanagürü nüxü: —Ega aixcüma Tupana Nane quixigu, rü jdaa nutamaã nüxü ixu na päuxü nanguxuchixüçex! —ñanagürü ga Chataná. ⁴ Rü Ngechuchu nanangäxü rü ñanagürü: —Tupanaärü ore i ümatüxüwa rü ñanagürü:

“Täütäma ðnamaãxica namaxë i duüxügü, natürü guxüma i ore i Tupana nüxü ixuxü tá nixi i duüxügüxü maxëxëxü”,

ñanagürü. ⁵ Rü yexguma ga ngoxo ga Chataná rü wüxi ga mëxpünechitaeruwa nanaga. Rü yéma paxaächü nüxü nüxü nadauxëë ga guxüma ga nachüñanegü ga ñoma ga nañecüãx. ⁶ Rü Chataná rü ñanagürü nüxü: —Guxü i ñaã nachüñanegü i mexü rü norü ngëmaxügü rü chi cuxna chanaxã. Erü choxrü nixi i guxüma i ñaãgü, rü tüxna chanaxã ya texë ya choma chorü me ixixë na tüxna na chanaxãxü. ⁷ —Rü ngëxguma chi chopëxegu cucaxäpüxügu rü choxü quicuëxüügu rü cuxrü chi nixi i guxüma i ñaã cuxü chawëxü —ñanagürü.

⁸ Natürü ga Ngechuchu rü nanangäxü, rü ñanagürü: —¡Choxna ixügachi! Pa Chata-nãx. Erü Tupanaärü ore i ümatüxüwa rü ñanagürü:

“¡Nüxü icuëxüü ya Cori ya curü Tupana, rü yimaãxüxicatama napuracü!”

ñanagürü. ⁹ Rü yexguma ga ngoxo ga Chataná rü Yerucharëü ga ñanewa nanaga. Rü tupauca ga taxünetapëxegu nanamunagü. Rü ñanagürü nüxü: —Ega aixcüma Tupana Nane quixigu, rü jnuã cugü rütæ! ¹⁰ —Erü Tupanaärü ore i ümatüxüwa rü ñanagürü:

“Tupana tá nanamu i norü orearü ngeruügü i daxüçüãx na cuxna nadaugüxüçex. ¹¹ Rü naxmëxmaã tá cuxü niyaxügü na tama tacü rü nutagu cunguxüçex”,

ñanagürü. ¹² Rü Ngechuchu nanangäxü rü ñanagürü: —Tupanaärü ore i ümatüxüwa rü ñanagürü ta:

“¡Tama name i nüxü na cuxüxü ya Cori ya curü Tupana!”,

ñanagürü. ¹³ Rü yexguma marü taxucürüwama Ngechuchuxü naxüxgu, rü nüma ga Chataná rü nüxna niña ñuxmata nüxü iyangau na ñuxäcü wena nüxü na naxüxü.

Ngechuchu rü Garirëaanewa inanaxügü ga norü puracü
(Mt 4.12-17; Mr 1.14-15)

¹⁴ Rü Ngechuchu rü Garirëaanecëx nataegu. Rü Tupanaãë i Üünexü rü naxütawa nayexma rü poraãcü nanaporaxëë. Rü ga duüxügü rü nachiga nidexagü ga guxü ga yema nañewa. ¹⁵ Rü wüxichigü ga ñanëärü ngutaquëxepataüguwa rü nanguxëëtae. Rü guxüma ga duüxügü rü nüxü nicuëxüügü.

Nacharëtuwa nayexma ga Ngechuchu
(Mt 13.53-58; Mr 6.1-6)

¹⁶ Rü Nacharëtuwa naxü ga Ngechuchu. Rü guma nixi ga ñanë ga nanatügü nawa nayaxëëgüne. Rü ngüxchigaarü ngunexügu rü ngutaquëxepataügu naxücu, yerü yema nixi ga nacüma ga guxü ga ngüxchigaarü ngunexügu. Rü yéma inachi rü duüxügüçex nüxü nadaumatü ga Tupanaärü ore ga ümatüxü. ¹⁷ Rü nüxna nanaxägü ga popera ga Tupanaärü orearü uruü ga Ichaxia ümatüxü. Rü yexguma yangenaätüägu, rü nüxü inayangau ga ngextá inaxümatüxüwa ga ore ga ñaxü:

¹⁸ “Cori ya Tupanaãë rü chauxütawa nangëxma. Rü nüma rü choxü naxuneta na nüxü chixuxüçex i ore i mexü namaã i ngëma duüxügü i ngearü ngëmaxüãxgüxü. Rü choxü namu na ngëma duüxügü i pecadutüüwa

ngëxmagüxümaã nüxü na chixuxüçèx rü tá na ínanguxüxü. Rü choxü namu na chayadauchixetüxëëgüxüçèx i ngëma ingexetügüxü rü na íchananguxüxëëxüçèx i ngëma duüxügü i togümëxëwa ngëxmagüxü.
 19 Rü núma choxü namu na duüxügümaã nüxü chixuxüçèx na Tupana nüxü rüngüxëëchaüxü i ngëma nüxü yaxögüxü”,

ñanagürü ga yema ore. 20 Rü yexguma ga Ngechuchu rü nügüna nananuxächíatü ga popera. Rü ngutaquëxepataüärü dauruüna nanaxã rü ñuxüchi ínarüto. Natürü guxüma ga yema ngutaquëxepataüwa yexmagüxü ga duüxügü rü nüxü narüdaunüëcha. 21 Rü yexguma ga Ngechuchu rü ínanaxügü ga na yadexaxü, rü ñanagürü: –Ñuxmatama nixí i pepëxewa Tupana yanguxëëxü i ñaã ore ga Ichaxía umatüxü –ñanagürü. 22 Rü guxüma ga duüxügü rü meã Ngechuchuchiga nidexagü. Rü nabaixächíãëgü namaã ga yema ore ga mexü ga namaã nüxü yaxuxü. Natürü tama aixcüma nayaxögüchaü. Rü yemacëx nügüna nacagü rü ñanagürügü: –¿Taux éxna daa yíixü ya Yúche nane? –ñanagürügü. 23 Rü Ngechuchu rü ñanagürü nüxü: –Choma nüxü chacuëx rü tá chomaã penaxuxuchi i ngëma ore i ñaxü:

“Pa Duturus ¡Cugütama rümexëë!” ñaxü. Rü éxna tá choxü ñaperügügü:

“Yema mexü ga taxü ga nüxü taxínüëxü ga Tupanaärü poramaã cuxüxü ga Capernáüwa, rü tanaxwëxe i nuã curü íänewa rü ta na cunaxüxü”, ñaperügügü tá. 24 Rü nayadaxëë ga Ngechuchu na yadexaxü rü ñanagürü: –Aixcüma pemaã nüxü chixu rü guxüma i Tupanaärü orearü uruü, rü norü íänewatama i duüxügü rü tama meã nanayauxgü. 25 –Rü aixcüma pemaã nüxü chixu rü Iraéanewa rü nayexma ga muxüchixüma ga ngexügü ga iyutegüxü ga yexguma Ería maüxgu. Rü yexguma nixí ga tomaëxpüx ga taunecüarü ngãxü rü taguma napuxü, rü poraãcü nangüxü ga taiya ga guxü ga ñaa nachixüánewa. 26 –Natürü ga Tupana rü tama wüxi ga Iraéanecüãx ga yutecüxütawa Eríaxü namu. Natürü ngíxütawa nanamu ga yema yutecü ga Charépacüãx ga Chidãüärü íänearü ngaicamagu ächíücü. 27 –Rü yexguma namaüxgu ga Erichéu, rü Iraéanewa nayexmagü ta ga muxüma ga duüxügü ga chaxünemaã ídaaweexü. Natürü taxuüma ga yema ídaaweexü ga Iraéanewa yexmagüxü rü naxcëx nitaaneë. Rü Namáü ga Chíríanecüãxícatama nixí ga guma naxcëx yataanecü –ñanagürü ga Ngechuchu. 28 Rü yexguma yema orexü naxínüëgu, rü guxüma ga yema duüxügü ga guma ngutaquëxepataüwa yexmagüxü rü poraãcü naxcëx nanuë. 29 Rü ínachigü ga duüxügü rü Ngechuchuxü ínatëxüchigü ga guma íänewa. Rü guma mëxpüne ga guma íâne nawa yexmanechitaeruwa nanagagü na yéma yanataegüãxüçèx. 30 Natürü ga Ngechuchu rü norü ngãxütanüwa ínaxüxüãma, rü ínixü.

*Wüxi ga yatü ga ngoxo nawa yexmaxüchiga
 (Mr 1.21-28)*

31 Rü yexguma ga Ngechuchu rü Gariréaaneärü íäne ga Capernáüwa naxü. Rü ngüxchigaarü ngunexügü yéma duüxügüxü nangüxëë. 32 Rü duüxügü rü nabaixächíãëgü namaã ga norü nguxëëtae, yerü Tupanaärü poramaã nidexa. 33 Rü guma ngutaquëxepataüwa nayexma ga wüxi ga yatü ga ngoxo nawa yexmaxü. Rü aita yéma naxü, rü ñanagürü: 34 –¡Toxna íxügachi! ¿Tüxcüü totanüwa cuxü, Pa Ngechuchux, Pa Nacharétucüãx? ¿Nuã cuxü na toxü cudëixüçèx? Choma cuxü chacuëx na Tupana Nane ya Üünecü na quíixü

—ñanagürü. ³⁵ Rü Ngechuchu nananga ga yema ngoxo rü ñanagürü: — ¡Iyarüngeèx rü ñaxūxū nawa ya yima yatū! —ñanagürü. Rü yexguma ga yema ngoxo rü duūxūgūpéxegu nayanguxēē ga guma yatū, rü nawa ñaxūxū. Natürü tama nanapixēē. ³⁶ Rü guxūma ga duūxūgū rü naḅaixāchiāēgū. Rü nūgūmūcūgūmaāchigū nachiga nidexagū, rü ñanagürügū: —¿Tacū rü ore nixī i ngēma? Erū ñāā yatū rü aixcūma ngēma ngoxogūmaā ñacaxē rü poraācū nanamu. Rü nūmagū rü naga naxīnūē, rü ñachoxū —ñanagürügū. ³⁷ Rü guxūwama ga yema naānewa rü Ngechuchuchigaxū nixugūe ga duūxūgū.

Ngechuchu rü Chimáū ga Pedru nēxēcēx nayataanexēē
(Mt 8.14-15; Mr 1.29-31)

³⁸ Rü guma ngutaquēxepataūwa ñaxūxū ga Ngechuchu rü Chimáūpatawa naxū. Rü Chimáū nēxē rü poraācū iyaxaxūne. Rü Ngechuchuna nacagūe ga ngīxcēx na yataanexēēāxūcēx. ³⁹ Rü nūma rü ngīxūtagu nayachi rü narūmēxāchi rü nananga ga yema axūne. Rü yexgumatama igēuxāchi ga na yaxaxūnēxū. Rü yexgumatama iirūda, rü naxcēx ñanamexēē ga ōna.

Ngechuchu rü muxūma ga idaaweexūcēx nayataanexēē
(Mt 8.16-17; Mr 1.32-34)

⁴⁰ Rü yexguma marū yanaxūcuchaūgu ga uēxcū, rü Ngechuchuxūtawa nanagagū ga guxūma ga duūxūgū ga nagūxūraūxū ga daaweanemaā idaaweexū. Rü ga Ngechuchu rü wūxichigū ga yema duūxūgūxū ningōgū, rü yemaācū naxcēx nayataanexēēchigū. ⁴¹ Rü nanameēxēē ga muxūma ga duūxūgū ga idaaweexū ga ngoxo nawa yexmagūxū. Rü yema ngoxogū rü aita naxūe, rü ñanagürügū: —Cuma nixī i Tupana Nane quīxū —ñanagürügū. Natürü ga Ngechuchu rü nayangagū ga yema ngoxogū. Rü nūxna nanachuxu ga na yadexagūxū, yerū yema ngoxogū rü nūxū nacūxēgū na Cristu yīixū.

Ngechuchu rü nanaxunagū ga ore ga mexū ga ngutaquēxepataūwachigū
(Mr 1.35-39)

⁴² Rü yexguma noxri yangóonegu rü yema ñānewa ñaxūxū ga Ngechuchu. Rü wūxi ga nachica ga taxūema íxāpataxūwa naxū. Natürü ga duūxūgū rü naxcēx nadaugū rü dūxwa naxūtawa nangugū. Rü nūxū nacēxūgū ga tama na ñaxūxūxūcēx ga yema norū naānewa. ⁴³ Natürü ga Ngechuchu rü ñanagürü nūxū: —Taxucūrūwama petanūgu charūxāūēcha erū chanaxwēxe na náigū ya íānegūwa ngēxmagūxū i duūxūgūmaā rü ta nūxū chixuxū na ñūxācū āēxgacū yīixū ya Tupana. Erū woetama ngēmacēx nūma choxū namu —ñanagürü. ⁴⁴ Rü yemaācū Ngechuchu nūxū nixuchigū ga ore ga ngutaquēxepataūgūwachigū ga guxūma ga Gariréaanewa.

5

Muxūma ga choxni na ñayauxūxūchiga
(Mt 4.18-22; Mr 1.16-20)

¹ Rü wūxicana ga yexguma nextaxa ga Yenecharétuanacūwa nayexmagu ga Ngechuchu, rü muxūma ga duūxūgū rü naxūtawa nangugū. Rü dūxwa yēma nayaxāūtūgū, yerū nūxū naxīnūēchaū ga Tupanaārū ore. ² Rü Ngechuchu yēma nūxū nadau ga taxre ga ngue ga ingeācune. Rü guma nguegū rü naxnecūpechinūwa nanadagū, yerū ga pūchaetanūxū rü nūxna yēma ñachoū, yerū norū pūcha niyauxgū. ³ Rü wūxi ga guma nguegu nixūe ga Ngechuchu. Rü guma ngue rü Chimáūārū nixī. Rü Chimáūna naca ga naxnecūpechinūārū ngāxūtūwaxūra na nangeaxūcēx. Rü guma nguewa narūto ga Ngechuchu. Rü

yéma inanaxügü ga duñxügüxü na nangúexêêxü. ⁴ Rû yexguma yagúégagu ga Ngechuchu ga na yadexaxü, rû Chimáúxü ñanagürü: —jyéa ínamátamaxüwa namaã naxâ ya daa ngue. Rû ngema penatáe i perü pücha na choxnita piyauxgüxüçêx! —ñanagürü. ⁵ Rû Chimáú nanangãxü, rû ñanagürü nüxü: —Pa Ngúexêêruüx, ngewêx rû guxü i chütaxü rû tapüchae, natürü taxuüma i choxni tiyaxu. Natürü ñuxma na choxü cumuxü rû wena táxarü íchanatáe i chorü pücha —ñanagürü. ⁶ Rû yexguma ínatágüágu ga norü pücha, rû muxüma ga choxni ínayauxü. Rû düxwa narügáuxchaü ga norü pücha yerü namuxüchi ga choxni. ⁷ Rû naxmêxmaã náí ga nguewa yexmagüxü ga natanüxügüçêx nacagü na nüxü yanangüxêégüxüçêx. Rû yéma naxí ga yema natanüxügü ga naxçêx nacagüxü. Rû nanaxüácügü ga guma taxre ga ngue rû wixgutaêx ínangutaügü yerü namuxüchi ga choxni. ⁸ Rû yexguma yemaxü nadêuxgu ga Chimáú ga Pedru, rû Ngechuchupêxegu nayacaxápüxü, rû ñanagürü nüxü: —jChoxna ixügachi! Pa Corix. Erü choma rû wüxi i duñxü i pecaduãxü chixí —ñanagürü. ⁹ Rû yema ñanagürü ga Chimáú yerü nüma rû guxüma ga natanüxügü rû namaã nabaixächíãégü ga yema muxüma ga choxni na ínayauxüxü. ¹⁰ Rû nabaixächíãégü ta ga Chimáúmücügü ga Chaütiágu rû Cuáü ga Zebedéu nanegü. Natürü Ngechuchu rû Chimáúxü ñanagürü: —jTãxü i cumuñxü! Erü ñuxmacürüwa rû tá choxü cupuracü na chauxütawa cunagagüxüçêx i duñxügü —ñanagürü. ¹¹ Rû yexguma naxánacüwa namaã nangugüga ga naweügü, rû yéma nanawogü ga norü guxüma rû Ngechuchuwe narüxi.

Ngechuchu rû wüxi ga rüchaxünexüçêx nayataanexêê
(Mt 8.1-4; Mr 1.40-45)

¹² Rû yexguma wüxi ga yéma yexmagüne ga íãnewa nayexmagu ga Ngechuchu, rû yéma naxütawa nangu ga wüxi ga yatü ga chaxünemaã ídaawexü. Rû yexguma Ngechuchuxü nadêuxgu rû napêxegu naya-caxápüxü rû yexma nanangücuchi. Rû Ngechuchuxü nacêêxü, rû ñanagürü: —Pa Corix, ngêxguma cuma cunaxwêxegu, rû cuxü natauxcha na choxü curümexêêxü nawa i chorü ðaawe —ñanagürü. ¹³ Rû yexguma ga Ngechuchu rû nüxü ningögü, rû ñanagürü nüxü: —Ngü, chanaxwêxe. jRüme! —ñanagürü. Rû yexguma yema ñaxgu ga Ngechuchu, rû naxçêx nítaane ga yema yatü ga chaxüneãxü. ¹⁴ Rû Ngechuchu nanaxucuxê rû ñanagürü nüxü: —jDüçêx, taxúemaátáma nüxü quixu, natürü paixü cugü yadauxêê na curümexü rû yanguxêê i ngema Tupana Moichéwa nüxü ixuxü na duñxügü nüxü caúxüçêx na marü curümexü nawa i curü ðaawe! —ñanagürü. ¹⁵ Natürü ga Ngechuchuchiga rû guxüwama ninguchigüama. Rû muxüma ga duñxügü rû naxçêx naxítaquêxegu na norü orexü naxínüêxüçêx, rû naxçêx na yataaneêxêêãxüçêx ga norü ðaawegüwa. ¹⁶ Natürü Ngechuchu rû ñuxguacü rû ngextá taxúema íxãpataxüwa naxüñxü. Rû yéma nayayumüxêxü.

Ngechuchu rû wüxi ga yatü ga nawãixächíçêx nayataanexêê
(Mt 9.1-8; Mr 2.1-12)

¹⁷ Rû wüxi ga ngunexü Ngechuchu ínguxêêtaeyane, rû yéma narütogü ga ñuxre ga Parichêgü rû ñuxre ga ngúexêêruügü ga Moichéarü mugümaã nguxêêtaegüxü ga guxü ga Gariréaaneãrü íãnexãcügüwa ne íxü, rû Yudéaanewa ne íxü, rû Yerucharéüwa ne íxü. Rû Tupana rû poraãcü Ngechuchuwa ínanawêx ga norü pora rû muxüma ga íðaawexü narümeêxêê. ¹⁸ Rû

Ngechuchuxütawa nangugü ga ñuxre ga yatügü, rü naxcèx yéma nanange-taügü ga wüxi ga yatü ga nawāixāchicü. Rü İpatagu nanangecuchi-taügüchañ na Ngechuchupêxegu yaxütaügüaxütcèx. ¹⁹ Natürü taxuacüma yexma nanangecuchitaügüéga, yerü namuxüchi ga duüxügü. Rü yemacèx ñacèxwèxgu naxügü. Rü meäma Ngechuchu İyexmaxüetüwa İnanapogüaxüügü ga guma İpata. Rü yéma duüxügütanüwa Ngechuchupêxewa İnanaxüüetaügü ga guma nawāixāchicü. ²⁰ Rü yexguma Ngechuchu nüxü dèuxgu ga na nüxü yaxögüaxü ga yema yatügü, rü ñanagürü guma nawāixāchicüxü: — Pa Chaunex, marü cuxü nüxü changechañ i curü pecadugü —ñanagürü. ²¹ Natürü yema ngüexèèruügü ga Moïchéarü mugüarü nguxèètaeruügü rü Parichégü, rü nagu narüxinüè, rü nügüäewa ñanagürügü: —¿Tacü nixi i ñaä yatü ecèx Tupanamaä chixexü yaxugüxü? Erü taxüema pora tüxü nangèxma na duüxügüaxü pecaduxü tangechañxü. Rü Tupanaxıcatama nixi ya nüxü nangèxmacü i ngéma pora —ñanagürügü naäewa. ²² Natürü ga Ngechuchu rü nüxü nacüex ga tacügu na İnaxınüèxü. Rü yemacèx ñanagürü nüxü: —¿Tüxcüñ ngè-magu perüxinüè i pemax? ²³ —¿Tacü nixi irütauxchamaèxü na namaä nüxü İxuxü ya daa yatü ya nawāixāchicü:

“Curü pecadugü rü marü cuxü nüxü changechañ”, rü èxna:

“İnachi rü İxü!” ñágüxü nüxü? ²⁴ —Natürü ñuxma rü tá pexü nüxü chadauxèè na Chaunatü núma choxü muxü na duüxügüaxü nüxü changechañxütcèx i norü pecadugü —ñanagürü. Rü yexguma yema ñaxguwena rü guma nawāixāchicüxü ñanagürü: —Cumaä nüxü chixu rü İnachi, rü nayaxu i curü caruñ, rü cupatawa naxü! —ñanagürü. ²⁵ Rü yexgumatama guxü ga duüxügüpêxewa İnachi ga guma nawāixāchicü. Rü nanayaxu ga norü caruñ ga nagu nacaxü. Rü Tupanaxü yacuèxüüchigüäcüma napatawa naxü. ²⁶ Rü guxüma ga duüxügü rü nabaixāchiägü. Rü Tupanaxü nicuèxüügü. Rü poraäcü namuñèäcüma ñanagürügü: —Ñuxma rü nüxü tadaugü i ñuxre i Tupanaärü puracügü i aixcüma mexèchixüügü —ñanagürügü.

Lebicèx naca ga Ngechuchu (Mt 9.9-13; Mr 2.13-17)

²⁷ Rü yemawena ga Ngechuchu rü İnaxüxü ga guma İwa. Rü wüxi ga yatü ga Dumaärü äèxgacücèx dièru ngıxü ideetanüxüxütawa naxüpetü. Rü guma yatü rü Lebı nixi ga naega. Rü yéma dièru ngıxü İnadexüwa narüto. Rü Ngechuchu rü ñanagürü nüxü: —¿Chowe rüxü! —ñanagürü. ²⁸ Rü İnachi ga Lebı, rü yéma nanatèx ga norü guxüma, rü Ngechuchuwe narüxü. ²⁹ Rü yıxcama ga Lebı rü Ngechuchucèx napatawa wüxi ga taxü ga ðna naxü. Rü muxüma ga yatügü ga Lebırüñ dièruarü degüwa puracüèxü, rü muxüma ga togü ga duüxügü rü ta yéma mechawa narütogü. ³⁰ Natürü ga yema Parichégü rü ngüexèèruügü ga Moïchéarü mugüarü nguxèètaeruügü, rü İnanaxügüè na Ngechuchuarü ngüèxügüchigagu chixri yadexagüxü. Rü ñanagürügü: —¿Tüxcüñ wüxiwa pechibüè rü namaä pexaxegü i ngéma yatügü i Dumaärü äèxgacücèx dièru ngıxü dexü rü ngéma pecaduäxgüxü? —ñanagürügü. ³¹ Rü Ngechuchu nanangāxü, rü ñanagürü nüxü: —Ngéma poraèxü rü taxucèxma duturu nanaxwèxegü, natürü ngéma İdaaweexü nixi i duturu naxwèxegüxü. ³² —Choma rü tama mexügüna na chaxuxütcèx nixi i núma chaxüxü, natürü pecaduäxgüxüna na chaxuxütcèx nixi i núma chaxüxü na ngémaäcü nüxü naxoèxütcèx i nacümagü i chixexüügü rü Tupanawe naxıxü —ñanagürü.

*Ngechuchuna nacagüe ga aurechiga
(Mt 9.14-17; Mr 2.18-22)*

³³ Rũ yexguma Ngechuchuna nacagüe ga duũxũgũ, rũ ñanagũrũgũ: –Cuáũ ya baiũxẽerũũãrũ ngũexũgũ rũ Parichéugũarũ ngũexũgũ rũ nayumãxẽgũecha, rũ muẽxpũxcũna rũ naxaaree rũ tama nachibũe erũ Tupanagu narũxĩnũe. Natũrũ i curũ ngũexũgũ, rũ guxũguma nachibũe rũ naxaxegũmare –ñanagũrũgũ. ³⁴ Natũrũ ga Ngechuchu rũ nanangãxũ, rũ wũxi ga ore ga nũgũchigaxũtama namaã nixu, rũ ñanagũrũ: –¿Éxna wũxi i ngĩgũarũ petawa rũ pexcèx namexũ na penaxaareeexẽxũ i ngẽma nũxna naxugũxũ ega natanũwa nangẽxmagu i ngẽma yatũ i ngexwacèx ãmaxũ? Rũ tama nixĩ. ³⁵ –Natũrũ wũxi i ngunexũ rũ ngẽma yatũ i ngexwacèx ãmaxũ, rũ tá namũcũgũna nixũgachi. Rũ ngẽma ngunexũgu tá nixĩ i aixcũma naxaareexũ i namũcũgũ –ñanagũrũ. ³⁶ Rũ yexguma ga Ngechuchu rũ namaã nũxũ nixu ga wũxi ga ore ga yema duũxũgũcũma ga nuxcũmaũxũchiga rũ noxrũtama nguxẽẽtae i ngexwacaxũxũchiga. Rũ ñanagũrũ: –Taxũema wũxi i ngexwacaxũxũ i naxchiruta tiyo na namaã tanapaitaxũcèx i wũxi i naxchiru i marũ ngauxũ. Erũ ngẽxguma ngẽmaãcũ tanaxũxgu rũ tanachixexẽe i ngẽma naxchiru i ngexwacaxũxũ. Rũ ñũxũchi ngẽma natũchi i ngexwacaxũxũ rũ tama nũxũ nayatãũxũ i ngẽma naxchiru i marũ ngauxũ. ³⁷ –Rũ ngẽxgumarũũ ta rũ taxũema ngexwacaxũcũ ya binu rũ nagu tayabacuchi i wũxi i naxchiũ i marũ ngauxũ i naxchẽxmũnaxcèx. Erũ ngẽxguma ngẽmaãcũ naxũxgu rũ yima binu ya ngexwacaxũcũ rũ tá narũngu, rũ tá nayawãixẽe i ngẽma naxchiũ i ngauxũ i naxchẽxmũnaxcèx. Rũ ngẽxma tá nayarũtaxu ya binu rũ ngẽma naxchiũ rũ ta. ³⁸ –Rũ ngẽmacèx tanaxwẽxe na yima ngexwacaxũcũ ya binu rũ ngexwacaxũxũ i naxchiũgu yabacuchixũ. Rũ ngẽmaãcũ rũ taxuũtãma inayarũtaxu. ³⁹ –Rũ taxũema ya texe ya tũmamaã yaxũxe na ngũchiacũ ya binu tayaxaxũxũ rũ tũxũ nangũchaũ na tayaxaxũxũ ya binu ya ngexwacaxũcũ ya maĩcuracũ. Rũ ngẽxgumarũũ ta nixĩ i ngẽma duũxũgũ i marũ namaã yaxũxũ i nuxcũmaũxũ i nacũma i chixexũ rũ tama nanayauxgũchaũ i ngẽma mexũ i nguxẽẽtae i ngexwacaxũxũ –ñanagũrũ ga Ngechuchu.

6

*Ngechucharũ ngũexũgũ rũ trigu nicãũetanũ ga ngũxchigaarũ ngunexũgu
(Mt 12.1-8; Mr 2.23-28)*

¹ Rũ wũxi ga ngũxchigaarũ ngunexũgu rũ Ngechuchu rũ norũ ngũexũgũmaã triguncũwa nachopetũ. Rũ norũ ngũexũgũ rũ inaxĩãcũma yoxocũne trigu nicãũetanũ. Rũ naxmẽxmaã nanadaxi ga trigu rũ nayangõẽtanũ. ² Rũ ñuxre ga Parichéugũ rũ yema ngũexũgũna nacagũ, rũ ñanagũrũgũ: –¿Tũxcũũ ngũxchigaarũ ngunexũgu penabuxu i trigu? Erũ ngũxchigaarũ ngunexũgu rũ nachũxu na texe puracũxũ –ñanagũrũgũ. ³ Rũ Ngechuchu nanangãxũ, rũ ñanagũrũ: –¿Taguma éxna poperawa nũxũ pedau ga ñacũ na naxũxũ ga nuxcũmaũcũ ga ãẽxgacũ ga Dabĩ ga yexguma nataiyagu ga nũma rũ natanũxũgũ? ⁴ –Rũ Tupanapatagu naxũcu rũ nũxũ nadau ga yema pãu ga yũnexũ ga yexma nuxũ. Rũ yema pãu rũ nachũxu ga ngexerũxemare na nangõxũ, rũ paigũcèxicatama nixĩ. Natũrũ Dabĩ nanayaxu ga yema pãu rũ nanangõx, rũ natanũxũmaã rũ ta nangau –ñanagũrũ. ⁵ Rũ ñanagũrũ ta ga Ngechuchu: –Tupana Nane ya duũxũxũ ixĩcũ rũ namaã inacuẽx i ngũxchigaarũ ngunexũ –ñanagũrũ.

*Wüxi ga yatü ga yumécüchiga
(Mt 12.9-14; Mr 3.1-6)*

⁶ Rü to ga ngüxchigaarü ngunexügu rü Ngechuchu rü ngutaquëxepataügu naxücu. Rü inanaxügü ga na nanguxëëtaexü. Rü yéma nayexma ga wüxi ga yatü ga norü tügünewa yumécü. ⁷ Rü yema ngüxëëruüügü ga Moïchéarü mugüwa ngüxëëtaegüxü rü Parichéugü, rü Ngechuchuxü nangugügü ngoxita ngüxchigaarü ngunexügu guma yumécüxü namexëë, yerü naxcëx nadaugü ga ñuxácü norü äëxgacügüxütawa na ínaxuaxügüaxü. ⁸ Natürü nüma ga Ngechuchu rü nüxü nacuëx ga yema naäëwa nagu naxínüëxü ga yema yatügü. Rü yemacëx guma yumécüxü ñanagürü: —¡Írúda rü nuxã ngãxütanügu yachi! —ñanagürü. Rü guma yumécü rü inachi rü norü ngãxütanügu nayachi. ⁹ Rü yexguma ga Ngechuchu rü nüxna naca ga yema Parichéugü rü yema mugüwa ngüxëëtaegüxü, rü ñanagürü nüxü: —¿tacü nixí i ngema mexü ixüxü i ngüxchigaarü ngunexügu? ¿Rü ngema mexü rü ëxna chixexü? ¿Rü namexü i na namaxëëxü rü ëxna yamáxü? —ñanagürü. ¹⁰ Rü yexguma Ngechuchu nüxü nidaugüächi ga yema duüxügü ga yéma yexmagüxü. Rü guma yumécüxü ñanagürü: —¡yanawëxächixëë ya cuxmëx! —ñanagürü. Rü guma yatü rü nügü inayarüwëxächimëxëxëë, rü narümemëx. ¹¹ Natürü yema Parichéugü rü ngüxëëruüügü ga Moïchéarü mugüwa ngüxëëtaegüxü, rü poraacü nanuë. Rü nügü nixucuxëgü na ñuxácü tá Ngechuchuxü na yamëxgüxü.

*Ngechuchu nanade ga 12 ga norü ngüexügü na tóxnamana namugüaxüxcëx
(Mt 10.1-4; Mr 3.13-19)*

¹² Rü yexguma ga Ngechuchu rü dauxchitawa, wüxi ga mëxpúnëwa naxü na yéma yayumüxëxüxcëx. Rü guxü ga yema chütaxügu rü yéma nayumüxë. ¹³ Rü yexguma yangóonegu, rü Ngechuchu norü ngüexügüxcëx naca. Rü natanüwa nayadexechi ga 12. Rü yema nixí ga yatügü ga Ngechuchu nüxü unetagüxü na tóxnamana nangegüaxüxcëx ga norü ore. ¹⁴ Rü yema yatügü ga nadexü rü Chimáü ga Pedrugu nanaxüéga nixí ga wüxi. Rü to nixí ga Aüdré ga Chimáü naëneë, rü Chaütiágu rü Cuáü, rü Piripi, rü Baturumé, ¹⁵ rü Mateu, rü Tumachi, rü Chaütiágu ga Arupéu nane rü Chimáü ga iporaäëcüücü, ¹⁶ rü Yuda ga Chaütiágueneë, rü Yuda Icaríute ga yixcama Ngechuchuxü íxuaxüxü naëchita.

*Ngechuchu rü muxüma ga duüxügüxü nangüxëë
(Mt 4.23-25)*

¹⁷ Rü Ngechuchu rü yema yatügü ga nadexümaä ínarüxügü nawa ga guma mëxpüne. Rü wüxi ga nachica ga ínametachinüánëxüwa nayachaxächitanü. Rü yéma nayexmagü ga muxüma ga duüxügü ga guxü ga Yudeaanëwa ne íxü, rü Yerucharëüwa ne íxü, rü taxtü ga taxüánacüwa ga Chidáüwa rü Tiruwa ne íxü. Rü yéma naxí yerü Ngechuchuxü naxínüëchaü, rü nanaxwëxëgü ga Ngechuchu na namëxëëxü ga norü daawegüwa. ¹⁸ Rü yema duüxügü ga chixexü ga naäë nawa yexmagüxü rü ta naxcëx nitaanëgü. ¹⁹ Rü guxüma ga duüxügü rü Ngechuchuxü ningögügüchaü, yerü norü poramaä nanamëxëë.

*Duüxügü i taäëgüxüchiga rü duüxügü i ngechailgüxüchiga
(Mt 5.1-12)*

²⁰ Rü yexguma Ngechuchu rü norü ngüexügüxü nadawenü, rü ñanagürü nüxü: —¡Petaäëgü i pema ya ingearü ngëmaxüäxgüxe! Rü Tupana äëxgacü íxíxüwa rü pema rü tá ta pexächica. ²¹ —¡Rü petaäëgü i pema i ñuxma

taiyaexe! ¡Rü tá meãma pingãxcharaũgü! ¡Rü petaãëgü i pema i ñuxma auxexe! Rü yixcama rü tá pecugüe. ²²—¡Rü petaãëgü i pema i ngëxguma duũxũgü pexchi aiegu, rü pexũ ñawoũxgu, rü ñacü pemaã yaxugüiegu, rü chaugagu chixri pechiga yadexagügu! ²³—Rü ngëxguma ngëma pexũ üpetügu, rü ¡petaãëgüama rü tama pexoegaãëgü! Erü daxũguxũ i naãnewa rü tá penayauxgü i wüxi i perü ãmare i mexëchixũ. Rü dücax, ñaã duũxũgü i ñuxma pexchi aiexũãrũ oxigü rü yexgumarũ ta nixĩ ga naxchi na naxaiexũ ga nuxcũmaũgũxũ ga Tupanaãrũ orearũ uruũgü. ²⁴—Natürü wüxi i ngechaũ tá nixĩ i pexcëx i pema ya muãrũ ngëmaxũãxgũxe erü núma ñoma i naãnewa rü marü petaãëgü. ²⁵—Rü wüxi i ngechaũ tá nixĩ i pexcëx i pema ya marü ingaxcharaũgũxe erü tá petaiyae. Rü wüxi i ngechaũ tá nixĩ i pexcëx i pema i ñuxma marü cugüexe, erü yixcama rü perü ngechaũmaã tá pexauxe. ²⁶—Rü wüxi i ngechaũ tá nixĩ i pexcëx i ngëxguma guxũma i duũxũgü pexũ icuëxũgũgü. Erü ngëma duũxũgü i ñuxma pexũ icuëxũgũxũãrũ oxigü rü yexgumarũ nüxũ nicuëxũgũgü ga nuxcũmaũgũxũ ga orearũ uruũgünetã.

*Name nixĩ i nüxũ tangechaũ i ngëma tamaã rüxuwãngũxũ
(Mt 5.38-48, 7.12)*

²⁷—Natürü pema i ñuxma na choxũ pexĩnüexũ rü pemaã nüxũ chixu rü: —¡Nüxũ pengechaũ i ngema pemaã rüxuwãngũxũ! ¡Rü meã nüxũ perũngũxëxĩ i ngëma pexchi aiexũ! ²⁸—¡Rü meã nachiga pidexagü rü naxcëx ¡peca i Tupanaãrũ ngũxëë naxcëx i ngëma pemaã guxchigagũxũ! ¡Rü naxcëx peyumũxëgü i ngëma chixri pechigamaã idexagũxũ! ²⁹—Rü ngëxguma texé cumaã nuxgu rü cuxũ tapechiwegu rü name nixĩ i tama cuxũtanũ ega woo curü tochiwewa rü ta cuxũ tapechiwegu. Rü ngëxguma texé cuxũ napuarü gãuxũchiruãxgu, rü name nixĩ i tüxũ cungechaũãma ega woo curü daxũ rü ta cuxna tanapuxgu. ³⁰—¡Rü tüxna naxã ya texé ya curü ngëmaxũcëx ¡caxe! Rü ngëxguma texé curü ngëmaxũ cuxna napuxgu, rü tama name i naxcëx cungema. ³¹—Rü ngëma mexũ i pema penaxwëxexũ na togü pemaã naxũxũ, rü name nixĩ i pema rü ta ngëmaãcü mexũ namaã pexũ. ³²—Rü ngëxguma pema rü ngëma duũxũgü i pexũ ngechaũxũxũxĩcatama pengechaũgu, rü ¿ñacüwa namexũ i ngëma? Erü ngëma duũxũgü i tama yaxögũxũ rü ngëmaãcü nanaxũgü. ³³—Rü ngëxguma ngëma duũxũgü i cuxũ rüngũxëxũxũxĩcatama curũngũxëëgu, rü ¿ñacüwa namexũ i ngëma? Erü ngëma duũxũgü i tama yaxögũxũ rü ngëmaãcü nanaxũgü. ³⁴—Rü ngëxguma ngëma duũxũgü i ixããrũ dïeruãxũnaxĩcatama cunaxãxgu i curü dïeru, rü ¿ñacüwa namexũ i ngëma? Erü ngëma duũxũgü i tama yaxögũxũ rü ngëmaãcü nanaxũgü, erü nüxũ nacuëxgü rü tá nüxũ nanataeguxëë i ngëma dïeru. ³⁵—Natürü pema rü name nixĩ i nüxũ pengechaũ i ngema pemaã rüxuwãngũxũ, rü nüxũ perũngũxëë. Rü ngëxguma ¿ñacüx pexna nacaxgu, rü name nixĩ i tama pexoegaãëcũma nüxna penaxã ega woo nagu perũxĩnüegu na ngürüãchi täütãma pexũ nataeguxëëãxũ. Erü ngëxguma ngëmaãcü penaxũxgu, rü Tupana rü ngëmaãrũ yexera tá porãcü pexũ nanataeguxëë, rü naxãcügü tá pixĩgü ya yima Tupana ya Poraxũchicü ya nüxũ rüngũxëëcü ta i ngëma taguma moxë nüxna ãgũxũ rü ngëma chixecũmagũxũ. ³⁶—Rü pema rü name nixĩ i pengechaũwaxegü, ngëma Penatü ya Tupana na ngechaũwaxexürũ.

*Tama name i chixexũgu namaã perũxĩnüe i togü
(Mt 7.1-5)*

³⁷—¡Rü taxũ i togũxũ pixuxũ! Rü ngëxguma ya Tupana rü täxũtãma pexũ nixu na pechixexũ. ¡Rü taxũ i poxcu namaã pexueguxũ i togü! Rü

ngëxguma ya Tupana rü täxütáma poxcu pemaã naxuegu. ¡Rü nüxü nüxü perüngümae i norü chixexü i togü! Rü ngëxguma ya Tupana rü tá pexü nüxü narüngüma i perü chixexü. ³⁸ —¡Rü togümaã pengau i perü ngemaxügu! Rü ngëxguma ya Tupana rü tá pexna nanaxã. Rü ñoma wüxi i choca i meãma napaxürüü rü meama ípoócuxürüü tá Tupana pexna nanaxã. Erü ngema nguruxü i namaã cumücüna cuxãxü i curü ngemaxü rü ngematama nguruxümaã tá Tupana cuxna nanaxã —ñanagürü. ³⁹ Rü Ngechuchu rü ñaã cuèxruü norü ngüexügümaã nixu, rü ñanagürü: —¿Ñuxãcü i wüxi i ngexetüxü rü to i ngexetüxüxü namaxü nacüexëëxü? Erü ngëma taxre i ngexetüxü rü wüxi i äxmaxügu tá nügümaã nayayicu. ⁴⁰ —Rü taxuüma i ngüexü rü norü ngüexëëruüxü narüyexera. Natürü ngëxguma meã nanguxgu rü tá naxrüxü nixü ya norü ngüexëëruü. ⁴¹ —¿Rü tüxcüü nachiga quidexa i cumücü naxcëx i ngëma íraxü i chixexü i naxüxü natürü tama cugütama cungügü naxcëx i ngëma chixexü i taxü i cuxüxü? ⁴² —Rü ngëxguma tama nüxna cucuèxãchigu i ngëma chixexü i taxü i cumatama cuxüxü, rü ¿ñuxücürüwa i nagu curüxínüxü na cunamexëëxü i ngëma cumücüarü chixexü i íraxü? Pa Duüxü i Meã Maxnetaxüx, name nixü i cuxira nüxü curüxo i ngëma chixexü i taxü i cumatama cuxüxü, rü ngëxguma tá cume na nüxü curüngüxëëxüxëx i cumücü na nüxü naxoxüçëx i ngëma chixexü i íraxü i naxüxü.

Wüxi i nanetü rü norü owa nixü i nüxü icuáxü

(Mt 7.17-20, 12.34-35)

⁴³ —Nataxuma i nanetü i mexü i chixearü oóxü. Rü nataxuma i nanetü i chixexü i meärü oóxü. ⁴⁴ —Rü wüxichigü i nanetü rü norü owa nixü i nüxü icuáxü. Rü wüxi i torawa rü taxucürüwama wüxi i orix i imüxü tayaxu. Rü wüxi i chuxchuxüwa rü taxucürüwama uba tayaxu. ⁴⁵ —Rü wüxi ya mecü ya yatü rü mexü i orexü nixu, erü naãëwa rü aixcüma mexügu narüxínü. Natürü wüxi i yatü i chixecümaxü rü chixexü i orexü nixu, erü chixexügu narüxínü. Rü ngëma naãëwa ngëmaxü i chixexü nixü i nüxü yaxuxü.

Ípata ya nutaétügu üxüne rü ípata ya naxnücüétügu üxünehchiga

(Mt 7.24-27)

⁴⁶ —¿Tüxcüü i pema rü: “Pa Torü Corix” ñaperügü choxü, natürü tama penaxü i ngëma pemaã nüxü chixuxü? ⁴⁷ —Rü ñuxma tá pemaã nüxü chixu na ñuxãcü tíixü ya yíxema chowe rüxüxë rü choxü ínüxë rü naxüxe i ngëma tümamaã nüxü chixuxü. ⁴⁸ —Rü tümã rü wüxi ga yatü ga üpatacü rü yamëxmaücü ga norü caxta ñuxmata nutawa nangucürüü tixü. Rü yëxguma namëxgu ga taxtü rü yabaixügu ga napata, rü woo ga na naporãchiüxü, rü tama niwëxtaü, yerü meãma inapugüarü caxtaãx ga guma í. ⁴⁹ —Natürü yíxema nüxü ínümarexe i chorü ore natürü tama naxüxe i ngëma tümamaã nüxü chixuxü, rü wüxi ga yatü ga naxnücüétügumare üpatacü rü tixü. Rü yëxguma namëxgu ga taxtü, rü nibaixü ga napata, rü naporãchiü. Rü niwëxtaü ga napata, rü yëxma nayarüxo ga guma í.

7

Ngechuchu rü Dumacüãx ga churaragüarü äëxgacüarü duüxüxü narümexëë
(Mt 8.5-13)

¹ Rü yëxguma nüxü nachauxgu ga duüxügümaã na yadexaxü ga Ngechuchu, rü Capernáüwa naxü. ² Rü yéma nayexma ga wüxi ga churaragüarü capitáü ga Dumacüãx. Rü guma capitáü rü nüxü nayexma ga wüxi ga norü duüxü ga poraãcü nüxü nangechaüxü. Rü yema

norü duüxü rü niḏaawe, rü naturaxüchi. ³ Rü yexguma Ngechuchuxü naxīnūchigagu ga guma capitáü, rü Ngechuchuxütawa nanamugü ga ñuxre ga Yudíugüarü äëxgacügüerugü. Rü ñanagürü nüxü: —¡Ngema Ngechuchuxütawa pexī na nüxü pecëëxügüxcëx rü núma naxü na chorü duüxüxcëx yanataanexëäxüxcëx! —ñanagürü. ⁴ Rü Ngechuchuxütawa naxī, rü poraäcü nüxü nacëëxügü, rü ñanagürügü: —Name nixī i nüxü curüngüxëë ya torü capitáü. ⁵ —Erü núma rü guxü i Yudíugüxü nangechaü. Rü nümatama nanaxütanü na naxügüäxüxcëx ga torü ngutaquëxepataü —ñanagürügü. ⁶ Rü yexguma ga Ngechuchu rü nawe narüxü. Natürü yexguma marü capitáüpataxü yangaicagu, rü núma ga capitáü rü Ngechuchucëx yéma nanamu ga ñuxre ga namücügü na namaä nüxü yanaxugüxcëx ga norü ore ga ñaxü: —Pa Corix, tama cuxü chachixewechaü na chopatawa conguxü erü choma rü taxuwama chame na chopatagu na cuxücuxü. ⁷ —Rü ngëmacëx nixī i tama chomatama cuxcëx chayaçaxü. Rü chanaxwëxe i curü orewaxicatama nüxü quixu na naxcëx yataanexü tá i chorü duüxü. ⁸ —Erü choma rü ta chorü äëxgacümëxëwa changëxma, rü choxmëxwa nangëxmagü ta i ñuxre i churaragü. Rü ngëxguma chanamuxgu i wüxi na ngextá naxüxcëx, rü ngema naxü. Rü ngëxguma chaugüxütawa naxcëx changemagu i to, rü chauxütawa nangu. Rü ngëxguma chorü duüxüxü chamuxgu na tacü na naxüxcëx, rü choxü nanaxü —ñanagürü. ⁹ Rü núma ga Ngechuchu rü yexguma nüxü naxīnūgu ga yema capitáüärü ore rü naḏaixächiaë. Rü yema duüxügü ga nawe rüxüxü nadawenü, rü ñanagürü: —Aixcüma pemaä nüxü chixu rü taxuüma i Yudíugütanüwa nüxü ichayangau i wüxi i duüxü i ngëma yatürü äixcüma yaxöxü —ñanagürü. ¹⁰ Rü yexguma nawoegugu ga yema capitáümcügü ga Ngechuchuxütawa namugüxü, rü nüxü inayangaugü ga marü naxcëx na yataanexü ga yema capitáüärü duüxü.

Ngechuchu ínanadaxëë ga wüxi ga yutecü ngíne

¹¹ Rü yemawena ga Ngechuchu rü wüxi ga íäne ga Naígu äeganewa naxü. Rü nawe narüxü ga norü ngüexügü, rü muxüma ga togü ga duüxügü. ¹² Rü yexguma guma íäneärü ngaicamana nanguxgu, rü tüxü nadau ga wüxi ga yueta ga tëxgüwa tüxü nangegüxe. Rü guxema yuetaarü mamá rü tayute rü guma yucü rü guxicatama nixī ga tümane ixícü. Rü muxüma ga duüxügü ga guma íanecüäx rü tüxü ínixümücügü. ¹³ Rü yexguma Cori ga Ngechuchu guma yucüarü mamaxü dëuxgu, rü nüxü ingechaütümüü. Rü ñanagürü ngíxü: —¡Täxü i cuxaxuxü! —ñanagürü. ¹⁴ Rü yexguma ga Ngechuchu rü yuetacëx nixü, rü nüxü ningögü ga tümachiü. Rü yema tüxü ingetaügüxü rü tümamaä inayachiächitanü. Rü ñanagürü ga Ngechuchu tüxü ga guxema yueta: —Pa Ngextüxcüx, jírüda! —ñanagürü. ¹⁵ Rü yexguma ga guxema yuchirëxe rü ítarüto, rü itanaxügü ga na tidexaxü. Rü Ngechuchu rü tümäëna tüxü namu. ¹⁶ Rü yexguma yemaxü nadaugüga ga duüxügü, rü guxüma namuë. Rü inanaxügüe ga Tupanaxü na yacuëxüügüxü. Rü ñanagürügü: —Wüxi i Tupanaärü orearü uruü i poraxü tatanüwa nangox. Rü ñanagürügü ta: —Tupana nuä naxü na norü duüxügüxü yanangüxëëxüxcëx —ñanagürügü. ¹⁷ Rü guxüma ga Yudéaanewa rü norü ngaicamana, rü duüxügü nüxü nacüächigagü ga yema Ngechuchu üxü.

Cuáú ga baiüxêëruü rü Ngechuchuxütawa nanamugü ga taxre ga norü duüxügü
(Mt 11.2-19)

18 Rü Cuáú ga baiüxêëruü rü nüxü nacuáchiga ga guxüma ga yema Ngechuchu üxü, yerü norü ngúexüügü ga Cuáú rü namaá nüxü nix-ügü. Rü yemacèx ga Cuáú rü taxre ga norü ngúexüügücèx naca. 19 Rü Ngechuchuxütawa nanamugü. Rü Cuáú rü ñanagürü nüxü: —¿Ngema pexí rü Ngechuchuna peca rü ñapegügü nüxü: “¿Cuma yiüxü i Cristu i cuxü ítananguxêëxü, rü éxna to tá yixí i Cristu?” ñapegügü nüxü! 20 Rü yema yatügü ga Cuáú Ngechuchuxütawa mugüxü, rü Ngechuchucèx naxí. Rü ñanagürügü nüxü: —Cuáú ya baiüxêëruü núma cuxütawa toxü namugü na cuxna tay-acagüxüçèx rü ¿aixcüma cuma quiüxü i Cristu ya núma nguxchaüçü, rü éxna to tá yixí i Cristu? —ñanagürügü. 21 Rü yexgumatama Ngechuchuxütawa nangugüga ga Cuáúärü ngúexüügü, rü Ngechuchu nanameéxêë ga muxüma ga duüxügü ga nagúütraüxü ga daawemaá idaaweexü rü yema ingoxoáxü. Rü nayadauchigüxêë ga muxüma ga ingexetüxü. 22 Rü yemacèx Ngechuchu nanagäxü rü ñanagürü: —¿Pewoegu rü Cuáúmaá nüxü peyarüxu i ngéma pematama nüxü pedaxü rü nüxü pexínüéxü! ¿Rü namaá nüxü pixu i ñuxácü i ngéma ingexetüxü rü marü nidauchigü, rü ngéma ichixeparaxü rü marü inachigü, rü ngéma chaxüneáxgüxü rü marü naxcèx nitaanegü, rü ngéma ngauchixêgüxü rü marü ningoxnamachixêgü, rü ngéma yuexü rü wenaxäru namaxê, rü ngéma ingearü ngémaxüáxümaá rü marü nüxü tixu i Tupanaärü ore i mexü! 23 —Rü tataáë ya yixema texé ya tama choxü rüxoxe —ñanagürü ga Ngechuchu. 24 Rü yexguma nawoeguxgu ga yema duüxügü ga Cuáú yéma mugüxü, rü Ngechuchu inanaxügü ga guma Cuáúchiga na yadexaxü. Rü duüxügümaá nüxü nixu, rü ñanagürü: —¿Tacü nixí ga pema ípeyadaugüxü ga dauxchitawa ga taxüema íxäpataxüwa? ¿Éxna wüxi ga yatü ga turaxü ga ñoma dexne ga buanecü yaxíäxtanüçüüxêëçürüü íxixü nixí ga ípeyadaugüxü? 25 —Rü éxna tama guma ípeyadaugüga, ¿rü tacü nixí ga ípeyadaugüxü? ¿Éxna wüxi ga yatü ga poraäcü nügü ngèxäécü ípeyadaugü? Pema nüxü pecuèx i ngéma poraäcü nügü ngèxäégüxü rü äëxgacügü ya tacügüpatawa nangëxmagü, rü taxucèxma dauxchitawa nangëxmagü. 26 —¿Tacü éxna nixí ga ípeyadaugüxü? ¿Éxna wüxi ga Tupanaärü orearü uruü? Ngémaäcü aixcüma yema nixí ga ípeyadaugüxü. Rü pemaá nüxü chixu rü Cuáú ya baiüxêëruü rü tama wüxi i ngèxürüüxü i Tupanaärü orearü uruü nixí. 27 —Rü Cuáúchiga nixí ga naxümatüxü ga yema Tupanaärü ore ga ñaxü: “Cupèxegu chayamu i chorü orearü ngeruü na cuxcèx namexêëäxüçèx i duüxügüarü maxü”, 28 —Rü pemaá nüxü chixu rü guxü i duüxügütanüwa rü nataxuma i Tupanaärü orearü uruü i Cuáú ya baiüxêëruüärü yexera. Natürü yixema Tupana äëxgacü íxixüwa wixwexüchi üxe, rü Cuáúärü yexera tixí —ñanagürü. 29 Rü guxüma ga duüxügü rü woo yema yatügü ga Dumaärü äëxgacücèx dïëru ngíxü ideetanüxü, rü nüxü naxínüé ga yema Ngechucharü ore rü ñüxüchi Tupanaxü nicuèxüügü yerü nüxü nicuèxächitanü na aixcüma mecü yiüxü ga Tupana. Rü yema nixí ga duüxügü ga üpaacü Cuáú íbaiüxêëxü. 30 Natürü yema Parichügü rü yema ngúexêëruüügü ga Moïchéarü mugüwa nguxêëtaegüxü rü tama nanaxwèxegü ga Cuáú na ínbaiüxêëxü. Rü yemaäcü nüxü naxoe ga yema mexü ga Tupana naxcèx üxchaüxü. 31 Rü núma ga Cori ga Ngechuchu rü ñanagürü: —¿Tacüga tá chanangu i ñomaüçüü

maxëxü i duüxügü? ¿Rü nanatacüräügü? ³² –Rü ñaã duüxügü rü taxuxümaama nataaëgü ngëxgumarüü i ngema buxügü i ñaxtüwa rütogüxü, rü íñtücëxwëxügü, rü tagaãcü namücügüxü ñagüxü:

“Marü wowerumaã pexcëx tapaxetagu natürü tama ípíxüãchitanüxü. Rü marü ngechaüxü i wiyaeu pexcëx tawiyaeü natürü tama pexauxe”, ñagüxü. Rü ngëma buxügürüü taxuxümaama nataaëgü i ñomaücüü i duüxügü. ³³ –Yerü ga Cuáü ga baiüxëëruü rü núma naxü, rü tama pãü nangõx rü tama binu nayaxaxü. Rü yexguma ga pema rü: “Nangoxoãx” ñaperügü nüxü. ³⁴ –Rü ñuxüchi núma chaxü i choma ya Tupana Nane na duüxüxü chíxü, rü ñna changõx rü binu chayaxaxü. Rü ngëxguma i pema rü ñaperügü choxü:

“Choma rü chataanüxüchi rü changãxwëxe, rü pecaduã x-güxü i duüxügümaã chaxãmücü, rü yatügü i Dumaärü äëxgacücëx díëru ngíxü ideetanüxümaã chaxãmücü”, ñaperügügü choxü. ³⁵ –Natürü Tupanaärü cuëx rü meãma nangõx tümawa ya yixema aixcüma nawe rüxixë –ñanagürü ga Ngechuchu.

Ngechuchu rü Chimáü ga Parichéputawa nayexma

³⁶ Rü wüxi ga Parichéu rü Ngechuchuna naxu na napatawa nachibüxütcëx. Rü yéma naxü ga Ngechuchu rü yema Parichéuarü mechawa nayarütü. ³⁷ Rü wüxi ga ngecü ga chixri maüxcü ga guma ñanecüãx, rü yexguma nüxü nacuáchigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcëxmaã äxchiüxü. ³⁸ Rü naxauxácüma Ngechuchucutüxütawa iyarütöxöchi. Rü ngíxgüxüxëtümaã iyawaicutüxëë. Rü ngíyaemaã ínapicutü, rü inachuxcutü. Rü ñuxüchi yema pumaramaã inachacutü. ³⁹ Rü yexguma yemaxü nadëuxgu ga yema Parichéu ga Ngechuchuna uxü, rü naãëwa nagu narüxínü rü nügümaátama ñanagürü: –Ngëxguma chi ñaã Ngechuchu rü aixcüma wüxi i Tupanaärü orearü uruü yixígu, rü nüxü chí nacuëx na tacü yíxü i ñaã ngexü i nüxü ingögüxü rü ñuxácü na namaxüxü rü poraãcü na napecaduãxü –ñanagürü ga naãëwa. ⁴⁰ Rü yexguma ga Ngechuchu rü nüxü nacuëxama rü Parichéuxü ñanagürü: –Pa Chimáüx, choxü nangëxma i wüxi i ore i cumaã nüxü chixuxchaüxü –ñanagürü. Rü núma ga Parichéu rü Ngechuchuxü nangãxü, rü ñanagürü: –jËcü, chomaã nüxü ixu, Pa Ngúexëëruüx! –ñanagürü. ⁴¹ Rü ñanagürü ga Ngechuchu: –Taxre ga yatügü rü wüxi ga corixütawa nanangetanü. Rü wüxi nanangetanü ga 500 tachinü ga díëru rü to nanangetanü ga 50 tachinü. ⁴² –Natürü yema taxre rü taxuacü nanaxütanü ga norü ngetanü. Rü yemacëx düxwa yema norü cori rü nüxü nüxü narüngüma ga yema nüxü na nangetanügüãxü. Rü ñuxmax, Pa Chimáüx, rü jchomaã nüxü ixu! rü ¿ngëxürüüxü ga yema taxre ga yatügü rü yexeraãcü norü corixü nangechaü? –ñanagürü. ⁴³ Rü Ngechuchuxü nangãxü ga Chimáü, rü ñanagürü: –Chauxcëx ga yema yexeraãcü nüxü nangetanüxü níxí ga yexeraãcü norü corixü ngechaüxü –ñanagürü. Rü Ngechuchu rü ñanagürü nüxü: –Ngëmaãcü aixcüma núma níxí –ñanagürü. ⁴⁴ Rü yexguma ga Ngechuchu rü ngíxü nadawenü ga yema ngecü, rü ñanagürü Chimáüxü: –¿Ngíxü cudauxü i ñaã ngecü? Rü cupatagu chaxücu i chomax, Pa Chimáüx, natürü tama dexá choxnata cuxá chorü yauxcutüruü. Natürü ñaã ngecü rü ngíxgüxüxëtümaã choxü iyawaicutüxëë, rü ngíyaemaã choxü ípicutü. ⁴⁵ –Cuma rü tama choxü cuchuxu i noxri

choxü curümoxëgu, natürü ngîma i ñaã ngecü rü noxri núma changuxgumama rü choxü iyachuxcutüchigü. ⁴⁶—Cuma rü tama pumaramaã choxü cuhaeruxüra, natürü ngîma i ñaã ngecü rü chaucutügu inaba i pumara. ⁴⁷—Rü ngëmacëx woo namu i ngîrü pecadugü natürü Tupana ngîxü nüxü nangechaü i guxüma, erü ngîma rü aixcüma choxü ingechaü. Natürü yixema tama aixcüma ngechaücëx iyaçaxe, rü tama poraäcü Tupanaxü tangechaü —ñanagürü. ⁴⁸ Rü yexguma ga Ngechuchu rü yema ngecüxü ñanagürü: —Curü pecadugü rü marü cuxü nüxü changechaü —ñanagürü. ⁴⁹ Rü yema togü ga nüxna naxugüxü ga yéma Ngechuchumaã mechawa yexmagüxü, rü inanaxügü ga nügümücügümaächigü na yadexagüxü. Rü ñanagürügü: —¿Tacü nixi i ñaã yatü, cëx ngëmaäcü duüxügüaxü pecaduxü nangechaüxü? —ñanagürügü. ⁵⁰ Natürü Ngechuchu rü ñanagürü ngîxü ga yema ngecü: —Marü cuxü nangeçma i maxü i taguma güxü, erü choxü cuyaxö. ¡Ñuxma rü taãëcüma cuchiüwa naxü! —ñanagürü.

8

Ngexügü ga Ngechuchuxü rüngüxëëgüxü

¹ Rü yemawena ga Ngechuchu rü Garirëaaneärü ñanegügu nixüägüchigü. Rü duüxügümaã nüxü nixuchigü ga Tupanaärü ore na ñuxäcü äëxgacü yixü ya Tupana. Rü inayaxümücügü ga yema 12 ga ngüexügü ga marü nadexü. ² Rü yexgumarüü ta iyaxümücügü ga ñuxre ga ngecügu ga üpaacü ngoxögü ngîwa inawoxücü rü ngîrü daaweewa ngîxü nameëxëëcü. Rü yematänüwa iyexma ga María ga Magadäcüäxmaã ngîxü naxugücü ga üpaacü Ngechuchu 7 ga ngoxo ngîwa inawoxücü. ³ Rü yéma iyexma ta ga Cuána ga Cuchu naxmëx. Rü Cuchu nixi ga wüxi ga äëxgacü ga Erodeaxü puracüxü. Rü yéma nayexmagü ta ga Chuchana rü mucüma ga náigü ga ngecügu ga ngîrü diërumaã Ngechuchuxü rüngüxëëgücü.

Ore ga toecügu ixuxü (Mt 13.1-9; Mr 4.1-9)

⁴ Rü muxüma ga yema ñanegücüäx ga duüxügü, rü Ngechuchuxütawa inayadaugü. Rü yexguma yéma nangutaquëxegügu ga muxüma ga duüxügü, rü Ngechuchu namaã nüxü nixu ga wüxi ga ore ga cuëxruü, rü ñanagürü nüxü: ⁵ —Wüxi ga yatü ga toecü rü trigümaã nanagüane. Rü yexguma trigümaã nagüaneägu rü ñuxre ga trigu, rü namagu nayi. Rü duüxügü nawa nangagüxü, rü werigü rü nanawecu. ⁶ —Rü náigü ga trigu rü nutatanügu nayi. Rü yexguma naxügügu ga guma trigu, rü nipagü rü nayumate, yerü nataxuma ga norü waianaxü. ⁷ —Rü náigü ga trigu rü tuxunecügu nayi. Natürü yexguma nayaegu ga tuxugü rü guma triguxü inawocu rü nanadai. ⁸ —Natürü náigü ga trigu rü mexü ga waixüümügu nayi. Rü yemacëx ga yexguma nayaegu rü muxüma ga trigu nawa inanguxuchi. Rü wüxipüxü ga triguwa inanguxuchi ga 100 püxü ga trigu —ñanagürü. Rü yemawena rü Ngechuchu tagaäcü ñanagürü nüxü ga duüxügü: —Rü yixema ächixëgüxe, rü jnaga taxinüë i ngëma ore! —ñanagürü.

Tacüchiga nixi ga yema ore ga cuëxruügügu ixuxü (Mt 13.10-17; Mr 4.10-12)

⁹ Rü yexguma ga norü ngüexügü rü nüxna nacagüe na tacüchiga yixü ga yema ore ga yatü ga toecügu ixuxü. ¹⁰ Rü Ngechuchu ñanagürü nüxü: —Tupana rü pexü nüxü nacüxëë i ngëma ëxügüxü i taxuüma i togü nüxü

cuáxũ i ñuxácũ ãëxgacũ na yĩxũ i nũmax. Natürũ togücèx rü cuèxruũgu chayaxũácũma namaã nũxũ chixu i ore. Rũ ngexguma woo nũxũ nadaugũgu rü ñoma tama nũxũ nadaugũxũrũũ nixĩgũ, rü woo nũxũ naxĩnũëgu rü ñoma tama nũxũ naxĩnũëxũrũũ nixĩgũ —ñanagürũ.

Ngechuchu rü meã nanangoxëë ga yema ore ga toecũchigagu yaxuxũ
(Mt 13.18-23; Mr 4.13-20)

¹¹ Rũ Ngechuchu rü ñanagürũ: —Ngẽma ore i toecũchigagu pemaã chixuxũ rü ñaãchiga nixĩ. Rũ ngẽma trigupũxũ rü Tupanaãrũ orechiga nixĩ. ¹² — Rũ guma trigu ga namagu yixũnerũũ nixĩ i duũxũgũ i ngẽma orexũ ñnũëxũ. Natürũ Chataná rü ngẽma duũxũgũxũ nũxũ inayarũngũmaëxëë i ngẽma ore, na tama yaxõgũãxũcèx rü tama nayauxgũãxũcèx i maxũ i taguma gũxũ. ¹³ — Rũ guma trigu ga nutatanũgu yixũne, rü ngẽma nixĩ i duũxũgũ i nũxũ ñnũëxũ i Tupanaãrũ ore rü taãëãcũma yaxõgũxũ. Natürũ tama aixcũma nanayauxgũ i ngẽma ore, erũ paxaãchi nayaxõgũ, rü yixcũra guxchaxũ nũxũ ñpetũgu, rü nũxũ narũxoe i ngẽma ore. ¹⁴ —Rũ guma trigu ga tuxunecũgu yixũne, rü ngẽma nixĩ i duũxũgũ i Tupanaãrũ orexũ ñnũëxũ rü yaxõgũxũ natürũ ñoma i naãneãrũ ngẽmaxũcèx oegaãëgũxũ, rü norũ ngẽmaxũguama rũxĩnũëxũ rü tama nũxũ rũxoechaũxũ i norũ ngũchaũgũ. Rũ ngẽmagagu dũxwa tama Tupanacèx namaxë. ¹⁵ —Natürũ guma trigu ga mexũ ga waixũmũgu yixũne, rü ngẽma nixĩ i duũxũgũ i aixcũma taãëãcũma nayauxgũxũ i Tupanaãrũ ore, rü naga ñnũëxũ, rü meã naxcèx maxëxũ. Rũ ngẽma nixĩ i duũxũgũ i aixcũma Tupanawe rũxĩxũ rü naxũgũxũ i ngẽma nũma nanaxwèxexũ.

Cuèxruũ ga omũgu ixuxũ
(Mr 4.21-25)

¹⁶ —Taxũema wũxi i omũwa tanangixichi na tanatũxpechitaxũcèx rü ëxna tũmaãrũ pechicatũũgu tayaxũcuchixũcèx. Natürũ ngõxũgu tanaxũ na tũxũ nabaxixũcèx ya yixema ngexma chocuxe. ¹⁷ —Rũ ngëxgumarũũ ta i guxũma i tacũ i cũãcũma ixũxũ rü yixcũra rü duũxũgũ tá nũxũ nacuèxgũama. Rũ guxũma i ngẽma ñuxma duũxũgũcèx ëxũguxũ rü tá nangõxoma. ¹⁸ —¡Meã iperũxĩnũë i ñuxmax! Erũ texë ya naga ñnũë i ngẽma ore i mexũ, rü Tupana tá yexeraãcũ tũxũ nũxũ nacuèxëë. Natürũ yixema tama naga ñnũë, rü yexeraãcũ tá tũxna nanayaxu i ngẽma íraxũ i tũmaãrũ cuèx i noxri tũxũ ngëxmachirëxũ —ñanagürũ.

Ngechucharũ mamá rü naëneëgũchiga
(Mt 12.46-50; Mr 3.31-35)

¹⁹ Rũ naë ga Ngechuchu rü naëneëgũ, rü yema Ngechuchu íyexmaxũwa tangugũ. Natürũ taxuacũ naxũtawaxũchi tangugũ, yerũ namuxũchi ga duũxũgũ. ²⁰ Rũ wũxi ga duũxũ Ngechuchumaã nũxũ nixu, rü ñanagürũ: — Yéa dũxëtũwa tangëxma ya cue rü cueneëgũ, rü cuxũ tadaugũchaũ —ñanagürũ. ²¹ Natürũ nũma ga Ngechuchu rü ñanagürũ nũxũ ga duũxũgũ: —Rũ yixema nũxũ ñnũëxë i Tupanaãrũ ore rü nagu maxexe rü yixema tixĩ ya chaue rü chaueneëgũ ixĩgũxe —ñanagürũ.

Ngechuchu rü buanecũxũ rü yuapexũ ñnayachaxãchixëë
(Mt 8.23-27; Mr 4.35-41)

²² Rũ wũxi ga ngunexũgu ga Ngechuchu rü norũ ngũexũgũmaã wũxi ga nguegu nichoũ. Rũ ñanagürũ nũxũ: —¡Ngĩxã daa naxtaxaarũ tocutũwa taxĩ! —ñanagürũ. Rũ inaxĩãchi. ²³ Rũ yexguma yaxãũyane rü nipechigũ ga Ngechuchu. Rũ ngürũãchi yexma nũxũ naxũ ga wũxi ga tacũ ga buanecũ. Rũ

guma nguewa rü niyauxcuchichigü ga dexá. Rü düxwa inayangutaüügüchaü.
²⁴ Rü yemacèx nüma ga norü ngüexüügü rü Ngechuchuxü nacagü ga na inadxücèx. Rü ñanagürügü nüxü: —Pa Ngüexèèruüx, ngëmama itabaxüügü —ñanagürügü. Rü yexguma ga Ngechuchu rü inarüda, rü buanecüxü rü yuapexü nanga. Rü inayachaxächi ga buanecü, rü inayarüxo ga yuape, rü inachaxanemare. ²⁵ Rü yexguma ga Ngechuchu rü ñanagürü nüxü ga norü ngüexüügü: —¿Tacü pexü naxüpetü ecèx tama meá peyaxögüxü? —ñanagürü. Natürü ga nümagü rü nabaixächiäëgü. Rü nügümücügüna nicachigü, rü ñanagürügü: —¿Tacü èxna nixi i ñaã yatü rü ngëmaccèx èixrücü ya buanecü rü yuape rü naga naxinüexü? —ñanagürügü.

*Yatü ga Gadáraacüäx ga ngoxogü nawa yexmagüxü
 (Mt 8.28-34; Mr 5.1-20)*

²⁶ Rü düxwa nextaxaarü tocutüwa nangugü ga Gadáaarü naãnewa. Rü yema naane rü Gariréaaneärü toxmèxtawa nayexma. ²⁷ Rü yexguma marü nguewa inaxüegu, ga Ngechuchu, rü naxcèx nixü ga wüxi ga yatü ga guma ñaneacüäx ga mucü ga taunecü ngoxogü nawa yexmagücü. Rü guxüüguma nangexchiruecha. Rü tama iwa nayexma, yerü duüxèchiquèxetanügu nayarüauxchigünexü. ²⁸ Rü yexguma Ngechuchuxü nadèuxgu, rü napèxegu nayacaxäpüxü. Rü aita naxüäcüma ñanagürü: —¿Tüxcüü nuã choxü cuyachixewe, Pa Ngechuchux, Pa Tupana ya Tacüxüchi Nanex? Rü cuxü chacèexü na tama ngüxü choxü quingexèèxü —ñanagürü. ²⁹ Rü yema ñanagürü yerü Ngechuchu marü nanamu ga yema ngoxogü na inachoxüxücèx. Rü muèxpüxcüna rü guma yatüxü naxüäèxèèxü ga yema ngoxogü. Rü duüxüügü rü cadenamaã nayanèixchacüügüxü rü nayanèixparagüxü na taxuwama naxüxücèx. Natürü nüma rü nagu nacaugüama ga cadenagü. Rü yema ngoxogü rü dauxchitawa ga taxüema íxäpataxüwa nanagagü. ³⁰ Rü Ngechuchu nüxna naca rü ñanagürü: —¿Tacü nixi i cuéga? —ñanagürü. Rü nüma rü Ngechuchuxü nangäxü, rü ñanagürü: —Muxüchixü nixi i chauéga —ñanagürü. Rü yema ñanagürü yerü namuxüchi ga yema ngoxogü ga guma yatügu choxü. ³¹ Rü yema ngoxogü rü Ngechuchuna nacagü ga tama ngëma poxcuchica i äxmaxü i taguma iyacuáxügu na nawocuáxücèx. ³² Rü guma mëxpüneärü tuãchiwa nayexmagü ga muxüma ga cuchigü ga yéma chibüexü. Rü yemacèx ga yema ngoxogü rü Ngechuchuxü nacèèxüügü na yema cuchigügu nayachocuxücèx. Rü Ngechuchu rü: —Ngü —ñanagürü. ³³ Rü yexguma ga yema ngoxogü rü guma yatüwa inachoxü rü yema cuchigügu nayachocu. Rü guxüma ga yema cuchigü rü inaxüächi, rü nextaacutüarü mëxpüxüwa nayarüyuxgü, rü yexma nayi. ³⁴ Rü yexguma yema cuchigüarü dauzüügü nüxü daugügu ga yema ngupetüxü, rü nabaixächiäëgü rü inibuxmü. Rü ñanewa nüxü nayarüxugü, rü yema ñaneärü ngaicamana ipeagüxü ga duüxügütanüwa rü ta nüxü nayarüxugügü. ³⁵ Rü ga duüxügü rü inayadaugü ga yema ngupetüxü. Rü yexguma Ngechuchuxütawa nangugügu, rü yéma nüxü nadaugü ga guma yatü ga ngoxoäxchirécü. Rü Ngechuchucutüxütawa narüto, rü marü tama naxüäè. Rü namuüè ga duüxügü. ³⁶ Rü yema duüxügü ga nüxü daugüxü ga yema ngupetüxü, rü yema iyadaugüxümaã nüxü nixugügü ga ñuxäcü Ngechuchu na namexèèxü ga guma yatü ga ngoxoäxchirécü. ³⁷ Rü yexguma yemaxü naxinüëgu, rü guxüma ga yema Gadáraanecüäx ga duüxügü, rü Ngechuchuxü nacèèxüügü na inaxüxücèx ga yema naãnewa,

yerü poraãcü namuñê. Rû yemacèx ga Ngechuchu rû nguëgu nixüe, rû inaxüãchi. ³⁸ Rû guma yatü ga ngoxoãxchirécü rû Ngechuchuxü nacèèxü ga nawe na naxüxüçèx. Natürü ga Ngechuchu rû nanamu ga yexma na naxãüxüçèx, rû ñanagürü nüxü: ³⁹ —¡Cuchiüwa naxü, rû duüxügümaã nüxü yarüxu ga ñacü cuxcèx na naxüxü ga Tupana! —ñanagürü. Rû ínixü ga guma yatü, rû guxüma ga yema ñanecüãx ga duüxügümaã nüxü nayarüxu ga ñacü naxcèx na naxüxü ga Ngechuchu.

Yáiruxacüchiga rû yema nge ga Ngechuchuchirugu ingögüçichiga
(Mt 9.18-26; Mr 5.21-43)

⁴⁰ Rû yexguma Ngechuchu wenaxärü taëgugu ga nextaxaarü tocutüwa, rû duüxügü rû taãèacüma nanayauxgü, yerü guxüma ínananguxèëgü. ⁴¹ Rû yéma Ngechuchuxütawa nangu ga wüxi ga yatü ga Yáiru ga naëga. Rû nüma ga Yáiru rû wüxi ga ngutaquëxepataüärü ãëxgacü nixí. Rû Ngechuchupëxegu nayacaxápüxü rû nüxü nacèèxü ga napatawa na naxüxüçèx. ⁴² Yerü nüxü iyexma ga wüxi ga naxãcü ga ngígümaã wüxicacü, rû iyadaawe, rû ituraxüchi. Rû ngíma rû maneca 12 ga taunecü ngíxü nayexma. Rû yexguma Yáirupatawa naxüxgu ga Ngechuchu, rû muxüchixü ga duüxügü nawe narüxü, rû düxwa ínayaxütügü. ⁴³ Rû yema duüxügütanüwa iyexma ga wüxi ga ngecü ga 12 ga taunecü ägüechacü. Rû yemamaã iyadaaweëcha. Rû duturugüxüttagu ngíxü iguxèë ga guxcü ga ngírü dñëru, natürü taxüema ga texé ngíxcèx tayataanexèëga. ⁴⁴ Rû yema ngecü ga Ngechuchuëma ne ixü, rû naxpechinüchirugu iyangögü. Rû yexgumatama ínayachaxãchi ga na naxägüxü. ⁴⁵ Rû yexguma ga Ngechuchu rû duüxügüna naca, rû ñanagürü: —¡Texé tixí ya choxü ingögüxe? —ñanagürü. Rû guxüma ga duüxügü rû: —Taxüema —ñanagürügü. Rû yexguma ga Pedru rû namücügü rû ñanagürügü: —Pa Ngüexèëruüx, cuma nüxü cudadu i ñuxre i duüxügü ngema cuxü na nayaxütügüxü, rû ngëxguma rû ta:

“¡Texé ya choxü ingögüxe?” ñacuxü —ñanagürügü. ⁴⁶ Natürü ga Ngechuchu rû ñanagürü: —Ngëmáãcü wüxie choxü tingögü, erü nüxü chicuëxãchi na chorü poramaã tüxü na charümexèëxü —ñanagürü. ⁴⁷ Rû yexguma nangoxomagu ga na nüxü nacüëxamaxü ga Ngechuchu ga yema nüxü na yangögüxü, rû yaduruxácüma naxütawa ixü ga yema ngecü. Rû napëxegu iyacaxápüxü. Rû guxü ga duüxügüpëxewa namaã nüxü iyaxu ga ñacüçèx nüxü na yangögüxü, rû ñuxãcü yexgumatama ngíxcèx na yataanexü. ⁴⁸ Rû yexguma ga Ngechuchu rû ñanagürü ngíxü: —Pa Chauxacüx, cuxcèx nitaane, erü cuyaxö. ¡Rû ñuxma rû taãèacüma íxü! —ñanagürü. ⁴⁹ Rû yexguma íyadexayane ga Ngechuchu, rû yéma nangu ga wüxi ga duüxü ga ngutaquëxepataüärü ãëxgacü ga Yáirupatawa ne üxü. Rû ñanagürü Yáiruxü: —Cuxacü rû marü iyu. ¡Rû táxü i cuyachixewechigüxü ya Ngüexèëruü! —ñanagürü. ⁵⁰ Natürü yexguma yema orexü naxínügu ga Ngechuchu, rû ñanagürü Yáiruxü: —¡Tãxü i cuyanguãëxü! Erü ngëxguma cuyaxöxgu rû cuxacü rû tá wena imaxü —ñanagürü. ⁵¹ Rû yexguma Yáirupatawa nangugügu, rû Ngechuchu nayachocuxèë ga Pedru rû Chaütíagu rû Cuáü rû ngínatü rû ngíë ga yema bucü ga yuxcü. Natürü tama nanaxwëxe na togü yexma chocuxü. ⁵² Rû guxüma ga duüxügü ga yéma yexmagüxü rû naxauxe rû ngíxcèx nangechaügü. Natürü Ngechuchu rû ñanagürü nüxü: —¡Tãxü i pexauxexü! Erü ngéma bucü rû tama nixí i nayuxü. Rû ipemare —ñanagürü. ⁵³ Natürü ga yema duüxügü rû Ngechuchuxü nacugüëama, yerü ngíxü nadaugü rû aixcüma marü iyu. ⁵⁴ Rû yexguma ga Ngechuchu rû ngíxmëxgu

nayayauxāchi, rü tagaācü ñanagürü: —Pa Bucüx, írüda! —ñanagürü. ⁵⁵ Rü yexguma ga ngīma rü wena imaxü, rü yexgumatama írüda. Rü Ngechuchu rü duüxügümaā nüxü nixu na ngīxü naxüwemügüxüçex. ⁵⁶ Rü ngīnatü rü ngīe ga yema bucü, rü poraācü tabaixāchiāēgü. Natürü Ngechuchu rü tüxü namu na taxüemaāma nüxü na tixuxüçex ga yema ngupetüxü.

9

Ngechuchu norü ngüexügüxü namu na nüxü yanaxugüexüçex ga Tupanaarü ore

(Mt 10.5-15; Mr 6.7-13)

¹ Rü Ngechuchu rü nanangutaquēxexē ga yema 12 ga norü ngüexügü. Rü pora nüxna naxā rü nüxna naxāga na ínawoxüāxüçex ga nagüxüraüxü ga ngoxogü, rü na nameēxēāxüçex ga duüxügü ga idaaweexü. ² Rü nayamugü na duüxügümaā nüxü yaxugüexüçex ga ore ga mexü na ñuxācü āēxgacü yīxü ya Tupana, rü na nameēxēāxüçex ga duüxügü ga idaaweexü. ³ Rü ñanagürü nüxü: —jRü taxuxütáma ípinge i perü namawaü, rü bai ya perü caxüchigüxü ya naixmenēxā, rü bai i perü choca, rü bai i perü pāü, rü bai i perü dīeru. Rü wüxitama i perü daxü ípinge, rü tama i taxre! ⁴ —Rü ngēxguma wüxi ya íānewa pengugügu, jrü wüxi ya ípatagutama perücho rü ñuxmata ipexiāchi nawa ya yima íāne! ⁵ —Rü ngextá tama pexü ínayauxgüxüwa, jrü ípexoxü nawa ya yima íāne! Rü ngēxguma ngema ipexiāchigu jrü ípepagücutü i perü üxaxücutü na ngēmawa nüxü nacüexgüxüçex na chixexü naxügüxü i ngēma duüxügü! —ñanagürü. ⁶ Rü inaxiāchi, rü guxüma ga íānexācügüwa naxi. Rü nüxü nixugüetanü ga Tupanaarü ore ga mexü. Rü guxüwama nanameēxētānū ga duüxügü ga idaaweexü.

Eróde rü tama nüxü nacüexéga na texe yixü ga Ngechuchu

(Mt 14.1-12; Mr 6.14-29)

⁷ Rü Gariréaaneärü āēxgacü ga Erode, rü nüxü nacüáchiga ga guxüma ga yema Ngechuchu üxü. Rü poraācü nagu narüxīnü rü naxoegaāe ga Erode, yerü nūmaxü ga duüxügü rü ñanagürügü: —Cuáü ya baiüxēerü nixi ya yima, rü marü wena namaxü —ñanagürügü. ⁸ Natürü togü rü ñanagürügü: —Nuxcūmaücü ga Tupanaarü orearü uruü ga Ería nixi, rü wena nangox —ñanagürügü. Rü togü rü ñanagürügü: —Bexmana náí ga nuxcūmaücü ga Tupanaarü orearü uruü nixi, rü wena namaxü —ñanagürügü. ⁹ Natürü Erode rü ñanagürü: —Chomatama chanamu ga churaragü na Cuáüxü yadae-naxāgüxüçex. jRü tacü éxna nixi i ngēma yatü i duüxügü ngēmaācü poraācü nüxü ixuchigagüechaxü? —ñanagürü. Rü Erode rü nüxü nangüchxüxüchi na ñuxācü Ngechuchuxü na nadauxü.

Ngechuchu rü nanachibüexē ga 5000 ga yatügü

(Mt 14.13-21; Mr 6.30-44; Cu 6.1-14)

¹⁰ Rü yexguma nawoeguxgu ga yema Ngechuchuarü ngüexügü ga yamugüxü, rü Ngechuchumaā nüxü nixugüe ga yema naxügüxü. Rü nūma ga Ngechuchu rü yema norü ngüexügümaā nixügachi, rü Becháidaarü íānewa namaā naxü. ¹¹ Natürü yexguma duüxügü nüxü cuēxgügu ga ngextá na nayemaxü, rü Ngechuchuwe narüxü. Rü Ngechuchu rü meāma yema duüxügüxü nayaxu, rü namaā nüxü nixu na ñuxācü āēxgacü yīxü ya Tupana. Rü nanameēxē ga yema duüxügü ga idaaweexü. ¹² Rü yexguma marü nayáuanegu, rü Ngechuchucüx naxi ga yema 12 ga ngüexügü ga yamugüxü.

Rü ñanagürügü nüxü: —Íyamugü i ñaã duüxügü na ñanexãcügü rü İpatagü ya ngaicamana ngëxmagünewa na naxixücëx, rü ngëxma na napegüxücëx rü norü ònatëex yataxegüxücëx! Erü nuã ñingëxmagüxüwa rü nataxuma i taçü rü òna —ñanagürügü. ¹³ Natürü Ngechuchu rü ñanagürü nüxü: —İPematama penaxüwemü! —ñanagürü. Rü nanangãxügü, rü ñanagürügü: —Wüximëxpüx i pãü rü taxre i choxnixicatama toxü nangëxma. İRü êxna cunaxwëxe na naxcëx tayataxegüxü i òna naxcëx i guxüma i ñaã duüxügü? —ñanagürügü. ¹⁴ Rü 5000 ga yatügü nixi ga yema yëma yexmagüxü. Natürü Ngechuchu rü ñanagürü nüxü ga norü ngüexügü: —İËcü İpenatogüxëëx rü 50 chigü i wüxi tücumüwachigü! —ñanagürü. ¹⁵ Rü yemaãcü nanaxügü ga norü ngüexügü. Rü İnanatogüxëë ga guxüma ga duüxügü. ¹⁶ Rü yexguma ga Ngechuchu rü nanade ga yema wüximëxpüx ga pãü rü yema taxre ga choxni. Rü daxügu nadawenüãcüma Tupanana moxë naxã, rü ñuxüchi İnanabücu ga yema pãü rü choxni. Rü norü ngüexügüna nanaxã na nüxü yanuãxücëx ga yema duüxügü. ¹⁷ Rü guxüma ga yema duüxügü rü meãma nachibüe. Rü yemawena rü 12 ga pexchigü nanapagüamatama namaã ga yema pãü rü choxnichipëxegü ga iyaxügüxü.

Pedru nanangoxëë na Cristu na yixü ga Ngechuchu

(Mt 16.13-19; Mr 8.27-29)

¹⁸ Rü wüxi ga ngunexü rü Ngechuchu norü ngüexügümaã noxrüwama yayumüxëgu, rü nüma rü norü ngüexügüna naca, rü ñanagürü: —İÑuxü ñaxü i duüxügü i chauchiga i choma na texë chiixü? —ñanagürü. ¹⁹ Rü norü ngüexügü nanangãxügü rü ñanagürügü: —Nangëxma i duüxügü rü:

“Cuãü ya baiüxëëruü quixi”, ñagüxü, rü togü rü:

“Eria quixi”, ñagüxü, rü togü rü:

“Wüxi ga nuxcümaücü ga Tupanaãrü orearü uruü i wena maxücü quixi”, ñagüxü —ñanagürügü. ²⁰ Rü yexguma Ngechuchu nüxna naca rü ñanagürü: —İRü pema i ñuxü ñapegüxü choxü na texë chiixü? —ñanagürü. Rü Pedru nanangãxü rü ñanagürü: —Cuma nixi i Cristu i Tupana Nane —ñanagürü.

Ngechuchu nanaxunagü ga norü yuxchiga

(Mt 16.20-28; Mr 8.30-9.1)

²¹ Rü Ngechuchu rü nayaxucüxëgü ga norü ngüexügü na taxüemaãma nüxü yaxugüexücëx ga nüma rü Cristu na yixü. ²² Rü ñanagürü nüxü ga norü ngüexügü: —Choma i Tupana Nane na duüxüxü chiixü, rü poraãcü ngüxü tá chinge. Rü choxü tá naxooxgü i Yudiugüarü ãëxgacügüerugü, rü paigüarü ãëxgacügü, rü ngëma ngüexëëruügü i Moichëarü mugüwa nguxëëtaegüxü. Rü tá choxü nimëxgü, natürü tomaëxpüx i ngunexügü rü wena táxarü chamaxü —ñanagürü. ²³ Rü yixcama rü guxüma ga norü ngüexügüxü ñanagürü: —Rü ngëxguma texë chowe rüxüxchaügu, İcü nüxü tarüxo i tümaãrü ngüchaü, rü namaã tapura i ngëma guxchaxügü i tümacëx İnguxü i ñoma curuchawa tipotaxürüü tüxü İxixëëxü, rü ngëmaetüwa chowe tarüxüãma! ²⁴ —Erü yixema tügü maxëchaxëëchaüxë rü tá tayu, natürü yixema chauxcëx yuxe rü aixcüma tá tüxü nangëxma i maxü i taguma güxü. ²⁵ İRü taçüwa i nüxü namexü ya wüxi ya yatü ega nayauxãgu i guxüma i ñoma i naãneãrü ngëmaxügü, natürü İyanatauxëëãgu i norü maxü? ²⁶ —Rü ngëxguma texë chauxcëx ãnegu rü naxcëx taxãnegu i chorü ore, rü choma i Tupana Nane i duüxüxü na chiixü rü tá ta tümacëx chaxãne i ngëxguma ãëxgacü chixiãcüma nüma chaxüxgu. Rü ngëxguma wenaxãrü nüma chaxüxgu rü Chaunatü ya Tupanarüü tá chapora, rü daxücüãx i Tupanaãrü orearü ngerüügü i üünegüxürüü tá chamexëchi.

27 —Rü aixcūma pemaã nüxü chixu rü ñuxre i duüxügü i nuã ngëxmagüxü rü tá nüxü nadaugü na ñuxäcü ãëxgacü na yïixü ya Tupana naxüpa na nayuxü —ñanagürü.

*Ngechuchu rü toraxü nangox
(Mt 17.1-8; Mr 9.2-8)*

28 Rü 8 ga ngunexüguwena ga na yema ñaxü, rü Ngechuchu rü wüxi ga mëxpúnewa naxü na yéma yayumüxëxüçëx. Rü ínayaxümücügü ga Pedru rü Chaütiágu rü Cuáü. 29 Rü yexguma ínayumüxëyane ga Ngechuchu rü nachiwe rü ngürüächi niyauracüü, rü naxchiru rü ta niyauracüü, rü poraäcüxüchima nacómü. 30 Rü yexguma rü yéma nangox ga taxre ga yatügü ga Ngechuchumaã idexagüxü. Rü Moïché nixi ga wüxi, rü Eria nixi ga to. 31 Rü yema taxre íyexmagüxüwa rü poraäcüxüchi nangóone. Rü ínidexagü nachiga ga ñuxäcü Yerucharëügu tá na nayuxü ga Ngechuchu. 32 Rü woo ga Pedru rü namüçügü rü poraäcü na nayaxtaexü rü tama napee. Rü nüxü nadaugü ga ñuxäcü poraäcü na nangóonexü ga naxütawa ga Ngechuchu rü yema taxre ga yatügü ga namaã yexmagüxüxütawa. 33 Rü yexguma yema taxre ga yatügü Ngechuchuna íxígachitanügu, rü Pedru rü ñanagürü Ngechuchuxü: —Pa Ngúexëëruüx, namexëchi nixi na nuã ingëxmagüxü. ¡Rü ngíxã tanaxü ya tomaëxpüx ya düxenü, rü wüxi ya cuxçëx, rü náí ya Moïchéçëx, rü náí ya Eriacëx! —ñanagürü. Natürü ga Pedru rü tama nüxü nacüx ga na ñuxü ñaxü yerü poraäcü nabaixächiãë. 34 Rü yexguma íyadexayane ga Pedru, rü wüxi ga caixanexü natanügu nayangëixema. Rü poraäcü namuüë ga yema ngúexügü ga yexguma yema caixanexü natanügu yangëixemagu. 35 Rü yema caixanexüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü. ¡Rü naga pexíntü! —ñaxü. 36 Rü yexguma yema ñaxguwena ga yema naga rü Ngechuchuarü ngúexügü rü taxúexüma ga toguexü nadaugü, rü Ngechuchuxüxícatama nadaugü. Rü yema ngúexügü rü taxúemaãma nüxü nixugüë ga yema nüxü nadaugüxü.

*Ngechuchu rü nanamexëë ga wüxi ga bucü ga ngoxo nawa yexmacü
(Mt 17.14-21; Mr 9.14-29)*

37 Rü yexguma moxüäcü ga guma mëxpúnewa yanachoügu, rü muxüma ga duüxügü yexma Ngechuchuxü nayangaugü. 38-39 Rü yema duüxügütanüwa rü wüxi ga yatü tagaäcü Ngechuchuxü ñanagürü: —Pa Ngúexëëruüx, ¡choxü rüngüxëë, rü tüxü nadau ya chaune! Erü tügümaã choxü tawüxícëx, rü wüxi i ngoxo tümawa nangëxma. Rü ngëxguma tüxü naxüxgu, rü aita tüxü naxüxëë, rü tüxü naxüãüëxëë, rü tüxü narüchiëxëë. Rü chixexü tümamaã naxü, rü tama tüxü ningëxchaü. 40 Rü marü nüxü chacëëxü i curü ngúexügü na tümawa ínatëxüchigüãxüçëx i ngëma ngoxo, natürü tama nüxü inaxínü —ñanagürü. 41 Rü yexguma Ngechuchu nanangäxü, rü ñanagürü: —Pa Duüxügü i Tama Yaxögüxüx, ¿Ñuxguratáta i pemaã chanuxmaxü rü yaxna pemaã cha xí-nüxü? ¡Nuã naga ya cune! —ñanagürü. 42 Natürü yexguma Ngechuchuxütawa nanguxgu ga guma bucü, rü yema ngoxo rü guma bucüxü ñaxtüanegu nayanguxëë, rü nanaxüãüëxëë. Natürü Ngechuchu nananga ga yema ngoxo, rü nanamexëë ga guma bucü. Rü ñuxüchi nanatüxütawa nanamu. 43 Rü guxüma ga duüxügü rü nabaixächiãëgü ga yexguma nüxü nadaugügu ga ñuxäcü na naporaxü ya Tupana.

*Ngechuchu rü wenaxärü nanaxunagü ga norü yuxchiga
(Mt 17.22-23; Mr 9.30-32)*

Rü yexguma duüxügü namaã haixächieyane ga yema Ngechuchu üxü, rü ñanagürü ga Ngechuchu nüxü ga norü ngüexügü: ⁴⁴ —¡Meã iperüxñüë i ñãã ore i pemaã nüxü chixuxü! ¡Rü tãütãma nüxü ipeyarüngümaë! Choma i Tupana Nane na duüxüxü chiixü, rü chauechita tá choxü ínaxuaxügü i duüxügü na ãëxgacügü choxü iyauuxgüxcëx —ñanagürü. ⁴⁵ Natürü ga norü ngüexügü rü tama nüxü nacüexgüëga ga yema namaã nüxü yaxuxü. Yerü Tupana rü tama naxcëx nanangoxëë ga yema ore na nüxü nacüexgüxcëx. Rü yema ngüexügü rü namuüë ga Ngechuchuna na nacagüxü na meã namaã nangoxëëãxüxcëx ga yema namaã nüxü yaxuxü.

¿Texé tá tixí ya guxããrú yexera ixíxë?

(Mt 18.1-5; Mr 9.33-37)

⁴⁶ Rü yexguma ga norü ngüexügü rü inanaxügüë ga nügümaã na yaporagatanücüxü nachiga ga texé tá tiixü ya natanüwa guxããrú yexera ixíxë. ⁴⁷ Natürü Ngechuchu rü nüxü nacüexama ga yema norü ngüexügü nagu rüxñüëxü. Rü yemacëx wüxi ga buxü nügüxütawa naga, rü nügüxütagu nayachixëë. ⁴⁸ Rü ñanagürü nüxü ga norü ngüexügü: —Texé ya ñãã buxüxü meã yaxüxe chauégagu, rü choxü nixí i tayaxuxü. Rü yíxema meã choxü yaxüxe, rü Chaunatü ya núma choxü mucüxü rü ta meã tayaxu. Rü yíxema guxããrú yexera tügü írúxírxaxë, rü yíxema tixí ya guxããrú yexera ixíxë —ñanagürü.

Texé ya tama taxchi aixe rü tóru ngüxëëruü tixí

(Mr 9.38-40)

⁴⁹ Rü yexguma ga Cuáü rü ñanagürü nüxü: —Pa Ngüexëëruüx, nüxü tadau ga wüxi ga yatü ga cuégagu ngoxogü íwoxüxü. Rü toma nüxna tanachuxu ga yema yerü tama tatanüxü nixí ga númax —ñanagürü. ⁵⁰ Natürü Ngechuchu rü ñanagürü nüxü: —Tama name i nüxna na penachuxuxü. Erü texé ya tama taxchi aixe, rü tóru ngüxëëruü tixí —ñanagürü.

Ngechuchu nayangagü ga Chaütiágu rü Cuáü

⁵¹ Rü yexguma marü yangaicagu ga Ngechuchu ga daxügüxü ga naãnewa na naxüxü, rü tama namuüãcúma inaxüãchi ga Yerucharéüwa na naxüxü. ⁵² Rü nügüpëxegu nayamugü ga ñuxre ga norü orearü ngeruügü. Rü númagü rü nawa naxí ga wüxi ga ñanexãcü ga Chamáriaanewa yexmane, na yexma naxcëx yadaugüxcëx ga wüxi ga í na Ngechuchu nagu pexüxü. ⁵³ Natürü yema Chamáriaanecüãx rü tama nanayaugüchaü, yerü nüxü nacüexgü ga Yerucharéüwa tá na naxüxü. ⁵⁴ Rü yexguma yemaxü nadaugügu ga norü ngüexügü ga Chaütiágu rü Cuáü, rü ñanagürügü Ngechuchuxü: —Pa Corix, çunaxwëxexü na Tupanana naxcëx tacaxü na daxüwa ne namuãxüxcëx ya üxü na nagüxëëãxüxcëx i guxüma i ñãã duüxügü, yema nuxcümaücü ga Tupanaãrü orearü uruü ga Ería üxürüü? —ñanagürügü. ⁵⁵ Rü yexguma ga Ngechuchu rü nüxü nadawenü, rü nayangagü, rü ñanagürü nüxü: —Pema rü tama nagu perüxñüë na texëarü duüxügü pixígüxü. ⁵⁶ —Erü choma i Tupana Nane na duüxüxü chiixü, rü tama duüxügüarü tauxexëëwa núma chaxü, natürü núma chaxü na duüxügüxü chamaxëxëëxüxcëx —ñanagürü. Rü yexguma rü náí ga ñanexãcüwa naxí.

Duüxügü ga Ngechuchuwe rüxíxchaüxüchiga

(Mt 8.19-22)

⁵⁷ Rü yexguma namagu naxíxgu rü wüxi ga yatü Ngechuchuxü ñanagürü: —Pa Corix, cuwe charüxüxchaü i ngextá cuma ícuxüxüwa —ñanagürü. ⁵⁸ Rü

Ngechuchu nanangãxũ rü ñanagürü: —Ngowagü rü nüxũ nangëxma i naxmaxũgü, rü werigü rü nüxũ nangëxma i naxchiãũgü, natürü choma i Tupana Nane na duũxũxũ chiũxũ, rü nataxuma i chauchica i ngextá nagu chicuxeruxũ —ñanagürü. ⁵⁹ Rü Ngechuchu ñanagürü nüxũ ga wüxi ga to ga yatü: —¡Chowe rüxũ! —ñanagürü. Natürü numa ga yema yatü rü ñanagürü nüxũ: —Pa Corix, noxri chanawëxe i chaunatũxũ ichayatëxira —ñanagürü. ⁶⁰ Rü Ngechuchu nanangãxũ rü ñanagürü: —Nüë ngëma cutanũxũ i tama yaxõgũxũ iyatëxgü i ngëma naxrũũ yuexũ, natürü cuma rü curü puracü nixĩ na paxa duũxũgümaã nüxũ cuyarũxuxũ i Tupanaãrũ ore na ñuxãcũ guxããrũ ãëxgacü na yĩĩxũ i nümax —ñanagürü. ⁶¹ Rü wüxi ga to ga duũxũ rü ñanagürü Ngechuchuxũ: —Pa Corix, ngëmáãcũ cuwe charũxũxchaũ, natürü noxri chanaxwëxe i nüxũ chayarümoxë i ngëma chopatacũãxgü —ñanagürü. ⁶² Natürü Ngechuchu rü ñanagürü nüxũ: —Texë ya yixema inaxũgũxe na Tupanaãrũ puracüwa tapuracũxũ natürü tümaãrũ ngëmaxũguama rüxĩnũxë, rü tama tame na Tupanaãxũ tapuracũxũ —ñanagürü.

10

Ngechuchu nayamugü ga 72 ga norü ngüexũgü

¹ Rü yemawena ga Cori ga Ngechuchu rü nayadexechi ga 72 ga to ga norü ngüexũgü. Rü taxrechigü inayamugü na yoxni guxũ ga yema iãnegü rü nachicagü ga Ngechuchu nawa üxchaũxũwa na naxĩxũcëx. ² Rü ñanagürü nüxũ: —Aixcũmaxũchi nangëxma i muxũchixũ i duũxũgü i yaxõgũchaũxũ natürü ngema Tupanaãrũ orearü uwa puracüexũ rü noxretama nixĩ. Rü ngëmacëx name i perü yumũxëwa nüxna peca ya yima puracüarü yora na ngema norü puracüwa namugüãxũcëx i to i puracütanũxũ. ³ —¡Rü ipexĩãchi rü ngema pexĩ! Rü dücax, ñoma carnerugü i aigütanũwa imugũxũrũũ nixĩ i pexũ chimugũxũ. ⁴ —¡Rü täütama choca ípinge, rü bai i perü dïeru, rü bai i perü chapatu! Rü tama chanaxwëxe i namagu penuxcũ i ngëxguma namawa texëxũ perümoxëgü. ⁵ —Rü ngëxguma wüxi ya iwa pengugügu, rü ñaããcũ tá nüxũ perümoxëgü i ngëma duũxũgü:

“¡Petaãxë erü Tupana rü napetanügu!”, ñaperügügü tá. ⁶ —Rü ngëxguma ngema nangëxmagu i duũxũgü i Tupanaxũ cuëxgũchaũxũ rü Tupana rü tá nüxna nanaxã i taãxë. Natürü ngëxguma ngëma nataxuxgu i duũxũgü i Tupanaxũ cuëxgũchaũxũ, rü ngema Tupanaãrũ taãxë rü pexrütama nixĩ. ⁷ —¡Rü wüxi ya ígutama perücho, rü ngema pechibüe rü peyaxü i ngëma nüxũ ngëxmaxũ i ngëma ícũãxgü! Erü wüxi i puracütanũxũ rü name nixĩ na nayauxãxũ i norü natanũ naxcëx i norü puracü. Rü yima iãnewa pengëxmagüyane rü tama chanaxwëxe i náí ya ígu peyapegü. ⁸ —Rü ngëxguma wüxi ya iãne ya nawa meã pexũ nayaxunewa pengugügu, ¡rü penangõ i ngëma õna i pexna naxãgũxũ! ⁹ —¡Rü penameëxëx i ngëma idaaweexũ i yima iãnewa ngëxmagũxũ! ¡Rü namaã nüxũ pixu rü ñapegügü nüxũ:

“Tupanaãrũ pora rü marü pexna nangaicama rü napexũtagu”, ñapegügü nüxũ! ¹⁰ —Natürü ega nawa pengugügu ya wüxi ya iãne i ngextá duũxũgü tama meã pexũ íyauxgũxũwa, ¡rü ngëma itamũgu ípechoxũ rü ñapegügü nüxũ i ngëma iãnecũãx!:

¹¹ “Rü woo ñaã perü iãneãrũ üxaxũ i tocutüwa yaxũxũ, rü itanapagü, na ngëmawa nüxũ pecuãxũcëx na Tupana rü tama pemaã nataãëxũ. ¡Natürü tama nüxũ ipeyarüngümaë na marü pexna nangaicamaxũchichiréxũ ya Tupana na perü ãëxgacü yĩĩxũ”, ñaperügügü tá nüxũ i ngëma iãnecũãx!

12 —Rü pemaã nüxü chixu rü ngēma ngunexü i nagu nagúxü i naãne, rü Chodomacüãx i duüxügüarü yexera Tupana tá nanapoxcue i ngēma duüxügü i tama meã pexü yauxgüxü.

*Ïãnegü ga tama Tupanaga ïnüene
(Mt 11.20-24)*

13 —Rü wüxi i ngechaü nixi i pexcèx, Pa Corachicüãx rü Bechaídacüãx i Duüxügüx, yerü yexguma chi Tiruarü ïãnewa rü Chidãüârü ïãnewa chanaxüxgu ga yema mexügü ga cuèxruügü ga Tupanaârü poramaã petanüwa chaxüxü, rü woo ga na poraãcü yachixexü ga yema Tirucüãx rü Chidãücüãx ga duüxügü rü nuxcümama chitama nüxü narüxoe ga nacüma ga chixexü, rü poraãcüxüchi chima nügümaã nangechaügü rü naxauxe, yerü chi nügü nicuèxächitanü ga na yapedaduãxgüxü. 14 —Natürü pemaã nüxü chixu rü ngēma ngunexü i Tupana nagu napoxcuexü i pecaduãxgüxü, rü ngēma ngunexü rü Tirucüãx rü Chidãücüãxârü yexera tá pexü napoxcue i pemax. 15 —Rü pemax, Pa Capernáucüãxgü i Duüxügüx ¿éxna pema nagu perüxinüégu rü daxüguxü i naãnewa tá pexixü? Pemaã nüxü chixu rü naãnetüüwa i ngextá Tupana Chatanáxü ípoxcuxüwa tá nixi i pewogüxü. 16 Rü ñuxüchi norü ngúexügüxü ñanagürü: —Rü yixema pega ïnüëxë, rü chauga rü ta taxinüë. Natürü yixema tama pega ïnüëxë, rü chauga rü ta tama taxinüë. Rü yixema tama chauga ïnüëxë, rü tama naga taxinüë ya Chaunatü ya núma choxü mucü —ñanagürü ga Ngechuchu.

Nawoegu ga yema 72 ga Ngechucharü ngúexügü

17 Rü taãëcümama nawoegu ga yema 72 ga norü ngúexügü ga yamugüxü. Rü ñanagürügü nüxü: —Pa Corix, ngëxguma cuégagu tidexagügu, rü èjxrüxü i ngoxogü rü toga naxinüë —ñanagürügü. 18 Rü Ngechuchu rü ñanagürü nüxü: —Ngëmaãcü aixcümama nixi. Yerü nüxü chadau ga Chataná ga daxüguxü ga naãnewa na nataëxü wüxi ga aëmacürü. 19 —Rü choma nixi ga pexna chanaxãxü ga pora na tama chixexü pemaã naxügüxüçèx ega woo äxtapegüwa rü éxna tuxchinawegüwa pengagügu. Rü yexgumarüü ta pexna chanaxã ga pora na nüxü perü- yexeraxüçèx i guxüma i Chatanáârü pora na ngëmaãcü taxucürüwama ñacü rü chixexü pemaã naxüxüçèx. 20 —¡Natürü täxü i petaãëgüxü naxcèx i ngēma na pega naxinüëxü i ngoxogü! Rü narümemae nixi i petaãëgü naxcèx na marü naxümatüxü i peëga i Tupanaârü poperawa i daxügüxü i naãnewa —ñanagürü.

*Ngechuchu rü nataãë
(Mt 11.25-27, 13.16-17)*

21 Rü yexgumatama ga Tupanaãë ga Üünexü rü poraãcü Ngechuchuxü nataãëxëë. Rü ñanagürü ga Ngechuchu: —Pa Chaunatü, Pa Daxügüxü i Naãne rü Ñoma i Naãneârü Yorax, cuxü chicuèxüü, yerü ñaã chorü ngúexügüxü nüxü cucuèxëë i ñaã ore ga naxchaxwa iquicüxü ga duüxügü i ñoma i naãnewa nüxü cuèxüchigüxü. Rü yemaãcü cunaxü, Pa Chaunatüx yerü yemaãcü nixi ga cunaxwèxexü —ñanagürü. 22 Rü ñanagürü ga Ngechuchu: —Chaunatü choxna nanaxã i guxüma i ñacü i ngëxmaxü. Rü taxüema choxü tacuèx na Tupana Nane chiüxü. Rü Chaunatüxicatama nixi ya choxü cuácü na Nane chiüxü. Rü ngëxgumarüü ta taxüema nüxü tacuèx na texe yixü ya Chaunatü. Rü choma ya Nane rü ngēma duüxügü i Chaunatüxü nüxü chadauxëëchaüxüxicatama nixi i nüxü cuëxgüxü na texe yixü —ñanagürü.

²³ Rū yexguma norū ngúexūgūxū nadawenū, rū namaāxīca ñanagūrū: — Tataāēgū ya yīxema tūmaxētūmaāxūchi nūxū daugūxe i ñāā ñūxma pema nūxū pedaugūxū. ²⁴ —Erū pemaā nūxū chixu, rū muxūma ga nuxcūmaūgūxū ga Tupanaārū orearū uruūgū rū āēxgacūgū ga tacūgū, rū nūxū nangūchaū ga nūxū na nadaugūchaūxū i ñāā ñūxma pema chauxūtawa nūxū pedaugūxū. Natūrū tama nūxū nadaugū. Rū nūxū nangūchaū ga nūxū na naxīnūechaūxū i ñāā ñūxma pema chauxūtawa nūxū pexīnūēxū. Natūrū tama nūxū naxīnūē —ñanagūrū.

Ore ga mecū ga Chamáriacūāxgu ixuxū

²⁵ Rū yexguma inachi ga wūxi ga ngúexēēruū ga Moīchēarū mugūwa nguxēētaexū, rū Ngechuchuxūtawa naxū na namaā yanadexaxūcēx. Rū Ngechuchuxū naxūxchaū, rū yemacēx nūxna naca rū ñanagūrū: —Pa Ngúexēēruū ya Ngechuchux, ¿Tacū nixī i mexū na chanaxūxū na choxū nangēxmaxūcēx i maxū i taguma gūxū? —ñanagūrū. ²⁶ Rū Ngechuchu nanangāxū, rū ñanagūrū: —¿Nūxū ñaxū i ngēma ore i Moīchēarū mugūwa ūmatūxū? ¿Rū tacūxū i cumaā yaxuxū? —ñanagūrū. ²⁷ Rū yema ngúexēēruū ga Moīchēarū mugūwa nguxēētaexū, rū Ngechuchuxū nangāxū, rū ñanagūrū: —Nūxū nangechaū ya Cori ya curū Tupana i guxūma i curū maxūmaā, rū guxū i cuāēmaā, rū guxū i curū poramaā, rū guxū i nagu curūxīnūxūmaā! ¿Rū nūxū nangechaū i cumūcū ngēma na cugūtama cungechaūxūrū! —ñanagūrū. ²⁸ Rū yexguma ga Ngechuchu rū ñanagūrū nūxū: —Ngēma ore i choxū namaā cūngāxūxū rū marū name. Rū ngēxguma ngēma ore quinguxēēxgu, rū tá cunayaxu i maxū i taguma gūxū —ñanagūrū. ²⁹ Natūrū ga yema ngúexēēruū ga Moīchēarū mugūwa nguxēētaexū, rū nūgētūwa nachogūchaū. Rū yemacēx Ngechuchuna naca, rū ñanagūrū: —¿Rū texé tixī ya chomūcū? —ñanagūrū. ³⁰ Rū yexguma ga Ngechuchu rū nanangāxū, rū ñanagūrū nūxū: —Wūxi ga yatū Yerucharēūwa ne naxū, rū Yericū ga īānewa naxū. Rū namagu nūxū nangaugū ga ngītēēxgūxū. Rū guxūma ga norū yemaxūcēx nangīxgū, rū èjrxūxū ga naxchiru rū ta naxcēx nangīxgū. Rū nanaçuaixgū, rū nayayuāchixēēgū, rū yemaācū yēma nanatēxgū. ³¹ —Rū yematama namawa naxūpetū ga wūxi ga Yūdīugūarū pai. Natūrū yexguma yema yatūxū nadēūxgu rū nūxū yēma naxūpetūmare. ³² —Rū yēma naxūpetū ta ga wūxi ga Lebītanūxū ga tupauca ga taxūnewa puracūxū. Rū yexguma yema yatūxū nadēūxgu, rū nūma rū ta nūxū naxūpetūmare. ³³ —Natūrū yixcūra rū wūxi ga Chamáriaaneçūāx ga yatū rū yematama namawa naxūpetū. Rū yexguma guma yatūxū nadēūxgu rū nūxū nangechaūtūmū. ³⁴ —Rū guma yatūcēx nixū. Rū chixū rū binumaā nanaxūxū ga norū oxrigū, rū meāma nayanēixgū ga yema norū oxrigū. Rū ñūxūchi norū burugu nanamunagū, rū wūxi ga pegūchicawa nanaga. Rū yēma nūxna nadau. ³⁵ —Rū moxūācū ga yexguma inaxūāchīgu ga yema Chamáriaaneçūāx, rū ngīxū nayaxu ga taxretachīnū ga norū dīēru, rū yema pegūchīcaarū yorana ngīxū naxā. Rū ñanagūrū nūxū:

“Nūxna nadau i ñāā yatū! Rū ngēxguma yexeragu naxātanūgu na nuā nangēxmaxū, rū choma tá cuxū chanaxūtanū i ngēxguma chataeguxgu”, ñanagūrū. ³⁶ Rū ñanagūrū ga Ngechuchu nūxū cha yema ngúexēēruū ga Moīchēarū mugūwa nguxēētaexū: —Ñūxma chanaxwēxe i chomaā nūxū quixu i ngēxūrūxūxū ga yema tomaēxpūxtanūwa ga aixcūma namūcū ixīxū ga yema yatū ga ngītēēxgūxū imēxgūxū —ñanagūrū ga Ngechuchu. ³⁷ Rū yexguma ga yema ngúexēēruū ga Moīchēarū mugūwa nguxēētaexū rū

ñanagürü: —Yema Chamáriaanecũãx nixĩ ga yema yatümücü ixĩxũ, yerü nüxũ nangechaütümüũ —ñanagürü. Rũ yexguma ga Ngechuchu rũ ñanagürü nüxũ: —¡Ñuxma rũ íixũ rũ yema Chamáriaanecũãx üxürüü naxũ! —ñanagürü nüxũ.

Marta rũ Mariapatawa nangu ga Ngechuchu

³⁸ Rũ yexguma Ngechuchu namagu ixũxgu norü ngüexũgümaã rũ wüxi ga ñanexãcüwa nangu. Rũ yema guma ñanexãcüwa rũ wüxi ga nge ga Martagu äegacü ngĩgüpatawa inanguxëë. ³⁹ Rũ Martaaxũ iyexma ga wüxi ga ngĩeyèx ga Mariagu äegacü. Rũ ngĩma rũ Ngechuchucutũxütawa irüto na inaxĩnũxücèx ga Ngechuchuarü ore. ⁴⁰ Natürü ga Marta rũ itaarü puracũãx rũ yemaãcü ngĩrũ puracũguama irũxĩnũ. Rũ yemacèx Ngechuchucèx iyaxũ, rũ ngĩgürügü nüxũ: —Pa Corix, çtama éxna nagu curũxĩnũ i ngẽma na chataarü puracũãx rũ ngẽma chaueyèx rũ choxnaxĩca na nataãxũ i guxũma i ngẽma puracü? ¡Rũ namaã nüxũ ixu na choxũ nangũxëèxücèx! —ngĩgürügü. ⁴¹ Natürü Ngechuchu rũ ngĩxũ nangãxũ, rũ ñanagürü ngĩxũ: —Pa Martax, cuma rũ poraãcü curü puracücèx cuxoegaãë, rũ muxũma i ngẽmaxũgu curũxĩnũ. ⁴² —Natürü wüxixicatama nixĩ i guxũarü yexera i mexũ na nagu rũxĩnũxũ. Rũ María iyixĩ i ngẽmagu rũxĩnücü. Rũ taxüetama ngĩxna tayanuxũ i ngẽma —ñanagürü ga Ngechuchu.

11

Ngechuchu nanangüexëë ga yumüxëchiga

(Mt 6.9-15, 7.7-11)

¹ Rũ wüxicana wüxi ga nachicawa nayumüxë ga Ngechuchu. Rũ yexguma nüxũ nachauxgu, rũ wüxi ga norü ngüexũ rũ ñanagürü nüxũ: —Pa Corix ¡toxũ nangüexëë na ñuxãcü tayumüxëgũxũ, yema Cuãũ ga baiũxëëruũ norü ngüexũgũxũ nangüexëèxürüü! —ñanagürü. ² Rũ Ngechuchu ñanagürü nüxũ: —Rũ ngëxguma peyumüxëgügu rũ ñaperügügu tá:

“Pa Tonatü ya Daxügücũx, rũ aixcüma Üü necü quixĩ i cumax. ¡Rũ núma naxũ na torü äëxgacü quĩxũcèx! Rũ tanaxwëxe i curü ngüchaũ na naxũgũxũ i duũxũgü i ñoma i naãnewa, ngẽma daxügũxũ i naãnewa na curü ngüchaũ inaxũgũxürüü. ³ ¡Rũ toxna naxã i torü õna i wüxichigü i ngunexũcèx ixĩxũ! ⁴ ¡Rũ toxũ nüxũ nangechaũ i torü pecadugü, erü toma rũ ta tüxũ nüxũ tangechaũ ya guxãma ya yixema chixri tomaã chopetüxe! ¡Rũ täxũ i ¡acü rũ chixexũpëxewa toxü cuwogũxũ na tama nagu tayixũcèx!”

ñanagürü. ⁵ Rũ ñanagürü ta ga Ngechuchu: —Ngëxguma chi wüxie i pema rũ tüxũ nangẽmaxgu i wüxi i tümamücü, rũ chi ngãxũcüü napatawa taxũxgu rũ ñatagũgu nüxũ:

“Pa Chomücũx, ¡tomaëxpüx i pãu choxna naxã! ⁶ —Erü wüxi i chomücü rũ yaxüwa ne naxũ, rũ ngëxwacèx chopatawa nangu. Rũ choma rũ changearü õnaãx, rũ taxuũmaãma chanachibũxëëga”, ñatagũgu. ⁷ —Rũ ngẽma tümamücü i napatawa ngëxmaxũ, rũ chi tüxũ nangãũxgu rũ ñaxgu:

“¡Tãxũ i choxũ cuchixewexũ! Chorü ñãx rũ marü narüwãxta, rũ choma rũ chauxacügü rũ ngürücarewa tangëxmagü. Rũ ngẽmacèx taxucürüwa ícharüda na ¡acü cuxna na chaxãxũcèx”, ñaxgu chi tüxũ. ⁸ —Rũ pemaã nüxũ chixu, rũ ngẽma na tümamücü yĩxũcèx rũ täütãma inarüda na ¡acü tüxna naxãxũcèx. Natürü tá inarüda na tama tanachixewechaxũcèx, rũ tá tüxna nanaxã i guxũma i ¡acü i tanaxwëxexũ. ⁹ —Rũ ngẽmacèx pemaã nüxũ chixu rũ, ¡Naxcèx ípeça rũ Tupana rũ tá pexna nanaxã! ¡Rũ Tupanacèx pedëux rũ tá nüxũ

ipeyangau! ¡Rü ñãxwa: Tu tu tu ñapegü, rü tá pexcèx niwãxna i ñãx! ¹⁰ — Erü guxãma ya yíxema naxcèx ícaxe rü tanayaxu, rü guxãma ya naxcèx dauxe rü nüxü itayangau. Rü guxãma ya ñãxwa: Tu tu tu ñagüxe, rü tümacèx tá niwãxna i ñãx. ¹¹ —¿Rü ñuxãcü i wüxi i pema na papágü piixü rü penena penaxãxü ya wüxi ya nuta ega pãucèx pexna nacaxgu, rü éxna wüxi i áxtape ega choxnícèx pexna nacaxgu? ¹² —¿Rü texé i petanüwa rü penena penaxã i tuxchinawe ega wüxi ya otacharãcèx pexna nacaxgu? ¹³ —Rü ngëma pema na pichixecümachiréxü natürü nüxü pecuèx na ñuxãcü mexü i ãmare pexacügüna na pexãxü, rü pemaã nüxü chixu rü Penatü ya Daxügücü rü perü yexera tá nixí na pexna mexü naxãxü. Rü guxãma ya yíxema Tupanaxütawa Naãe i Üünexüçèx ícaxe, rü tá tüxna nanaxã —ñanagürü ga Ngechuchu.

*Ngechuchuxü nixugüe na ngoxoarü poramaã napuracüxü nawogüe
(Mt 12.22-30; Mr 3.20-27)*

¹⁴ Rü Ngechuchu ínanatèxüchi ga wüxi ga ngoxo ga wüxi ga yatüxü nge-gaxèxü. Rü yexguma ínaxüüxgu ga yema ngoxo rü guma yatü rü nidexa. Rü guxüma ga duüxügü rü nabaixãchiãégü ga yexguma yemaxü nadaugügu. ¹⁵ Natürü ñuxre ga duüxügü rü ñanagürügü: —Ñãã yatü i Ngechuchu, rü Bechebü i ngoxogüarü ãëxgacüarü poramaã nixí i ínanawoxüãxü i ngox-ogü —ñanagürügü. ¹⁶ Natürü ga togü rü nüxü naxügüchaü, rü yemacèx naxcèx ínacagü ga nüxü na nawéaxü ga wüxi ga cuèxruü ga daxüçüãx na yemawa nüxü nacuèxgüçèx rü ngoxi aixcüma Cristu yí. ¹⁷ Natürü nüma ga Ngechuchu rü nüxü nacuèxama ga tacügu na naxínüèxü, rü yemacèx ñanagürü nüxü: —Ngëxguma chi wüxi i nachüãnecüãx i duüxügü nügü itoyegu rü nügütanüwa chitama nügü nadaixgu, rü nügü chitama naguxèe. Rü ngëxguma chi wüxi ya íçüãx nügümaã nuèèchagu rü nügü nadaixgu, rü nügü chitama naguxèe. ¹⁸ —¿Rü ngëxguma chi Chataná nügümaãtama nuxgu, rü nügütama yamëxgu, rü ñuxãcü chi i ãëxgacüecha yíixü? Rü ngëma ñacharügü i ñuxma erü pema choxü pixuxgu rü Bechebüarü poramaã íchanawoxü i ngox-ogü. ¹⁹ —Natürü ngëxguma chi Chatanáãrü poramaã íchanawoxügu i ngoxogü, rü perü ngüexügü rü chita Chatanáãrü poramaã ínanawoxü i ngoxogü. Rü ngëmawa meã nüxü tacuèx na pema rü ípetüexü. ²⁰ —Natürü pemaã nüxü chixu rü aixcüma Tupanaãrü poramaã nixí i íchanawoxüxü i ngoxogü. Rü ngëmawa pexü nüxü chacuèxèe na núma petanüwa nanguxü ya Tupana na ãëxgacü yíxüçèx. ²¹ —Rü ngëxguma wüxi ya yatü ya poracü rü meãma nügü naxüxnegu rü nüxna nadèuxgu ya napata, rü taxüetama naxcèx tangüx i norü ngëmaxü i napatawa ngëxmaxü. ²² —Natürü ngëxguma ínanguxgu i to i yatü i nüxü rüporamaèxü, rü nüxü nayexeragu, rü tá nüxna nanapuxü ya naxne ya nügü namaã ínaporaãxüne, rü tá nüxna nanapuxü i guxüma i norü ngëmaxü, rü tá nayaana. ²³ —Yíxema tama choxü ngechaüxè rü chauxchi taxai. Rü yíxema tama choxü rüngüxèxè na Tupanacèx tayagagüxü i duüxügü rü chauxchawa tanangianexèe.

*ngoxo i taeguxüchiga
(Mt 12.43-45)*

²⁴ —Rü ngëxguma wüxi i ngoxo rü wüxi ya yatüwa ínaxüüxgu, rü daux-chitagu nanañaãne, rü naxcèx nadau na ngextá na nangüxü. Rü ngëxguma taxuguma nangüegagu, rü nügü ínicuèx rü ñanagürü:

“Maneca naxcèx tá chataegu ya yima yatü ga noxri nawa íchaxüxüchirécü”, ñanagürü. ²⁵ —Rü ngëxguma nataegugu, rü yima yatüxü inayangau na ñoma

wüxi ya ĩ ya mexēne rü meã nabixichinerüü na yïxü. ²⁶ –Rü ĩnixü rü naxcèx nayadau i to i 7 i ngoxogü i norü yexera i chixexü. Rü guxüma i ngēma ngoxogü rü wüxigu yima yatügu nachocu, rü ngēma naxächiüğü. Rü ngēxguma ya yima yatü rü noxriarü yexera nachixe –ñanagürü.

Taãe i aixcüma ixüüchiga

²⁷ Rü yemaxü ĩyaxuyena, rü wüxi ga ngecü rü duüxüğütanüwa tagaãcü ngīgürüğü: –Tataãe ya yixema tüğüanüwa cuxü yaxēxē rü tüğü nixüwa cuxü maixē –ngīgürüğü. ²⁸ Natürü ga Ngechuchu rü ñanagürü: –Yexeraãcü tataãe ya yixema nüxü ĩnuxē i Tupanaärü ore rü naga ĩnuxē –ñanagürü.

Duüxüğü ga tama yaxöğüchaixü rü naxcèx ĩnacagüama ga to ga cuèxruü ga Tupanaärü poramaã üxü (Mt 12.38-42; Mr 8.12)

²⁹ Rü nimuētanü ga duüxüğü ga Ngechuchuxütawa ngutaquēxegüxü. Rü inanaxüğü ga Ngechuchu ga namaã na yadexaxü. Rü ñanagürü: –Ñãã duüxüğü i ñomaücüü maxèxü rü nichixecüma. Rü naxcèx ĩnacagü i wüxi i cuèxruü i mexü i Tupanaärü poramaã üxü. Natürü Tupana rü wüxixicatama i cuèxruü tá nüxü nawēx. Rü ngēma nixi i cuèxruü ga Tupanaärü orearü uruü ga Yonáwa duüxüğüxü nawèxü na nüxü nacuèxgüxüdcèx na aixcüma Tupana yïxü ga guma yēma namucü. ³⁰ –Rü yexgumarüü ga Yoná rü wüxi ga cuèxruü nixi naxcèx ga Níñibecüäx ga duüxüğü, rü ngēxgumarüü tá ta nixi ya Tupana Nane ya duüxüxü ixicü na wüxi i cuèxruü tá yïxü naxcèx i ñomaücüü maxèxü i duüxüğü. ³¹ –Rü ngēxguma naãneärü guxgu rü Tupana rü ñomaücüü maxèxü i duüxüğüna nacèxgu i norü pecaduchigacèx, rü ngēma ga nuxcümaücü ga Chabaaneärü äëxgacü tá ĩrúda rü tá ĩnaxuaxü i ñomaücüü maxèxü i duüxüğü. Yerü ngēma rü yaxüwaxüchi ne ixü ga na äëxgacü ga Charumóüxü naxĩnuxüdcèx ga ñuxäcü poraãcü nüxü na nacuèxüchixü. Natürü ñuxma nuã petanüwa nangēxma i wüxi i Charumóüärü yexera ixicü. ³² –Rü ngēxguma naãneärü guxgu rü Tupana rü ñomaücüü maxèxü i duüxüğüna nacèxgu norü pecaduchigacèx, rü nuxcümaüğüxü ga Níñibecüäx ga duüxüğü rü tá ĩnarüdagü rü tá ĩnaxuaxüğü i ñomaücüü maxèxü i duüxüğü. Yerü nümagü ga Níñibecüäxgü ga duüxüğü rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangēxma i wüxi i Yonáärü yexera ixixü.

Taxüeneärü omüchiga

(Mt 5.15, 6.22-23)

³³ –Taxüema wüxi i omüwa tanangixichi rü ñuxüchi itayacux rü éxna tacütüüğü tayaxücüchi. Natürü norü üchicaüğü tanaxünagü na ngēma tüxü nabaxixüdcèx ya yixema duüxüğü ya yima ĩgu chocuxe. ³⁴ –Cuxetüğü rü ñoma wüxi i omürüü nixi i cuxunecèx. Rü ngēxguma ngēma Tupana cuxü naxwèxexüdcèx cudèuxgu, rü guxüma i curü maxü rü name. Natürü ngēxguma ñoma i naãneärü ngüchaüdcèx cudèuxgu, rü guxüma i curü maxü rü chixexüwa nangēxma. ³⁵ –ĩMeã cugüna nadau na tama eãnexüxü nanguxüchixüdcèx i ngēma ore i mexü i cuxü ngēxmaxü, i ñoma wüxi i omürüü ixixü! ³⁶ –Ngēxguma chi guxü i curü maxüwa nangēxmagu i Tupanaärü ngóonexü rü taxuwama nachixèxgu i curü maxü, rü meã chi nüxü cucuèx i Tupanaärü ngüchaü ñoma wüxi i omü i cuxü baxixürüü –ñanagürü.

Ngechuchu rü duüxügütanüwa İnanaxuxü ga Parichéugü rü ngúxêëruüğü ga Moïchéarü mugüwa nguxêëtaegüxü

(Mt 23.1-36; Mr 12.38-40; Lc 20.45-47)

³⁷ Rü yexguma nüxü nachauxgu ga na yadexaxü ga Ngechuchu rü wüxi ga Parichéu nüxna naxu ga napatawa na yachibüxücèx. Rü yema Parichéupatawa naxü, rü mechawa nayarüto. ³⁸ Rü yema Parichéu rü nabaixächiaê ga yexguma Ngechuchuxü nadéuxgu na tama yanguxêëaxü ga yema Moïchéarü mu na nayauxmêxgüxiraxü ga yexguma nachibüegu. ³⁹ Natürü nüma ga Cori ga Ngechuchu rü ñanagürü nüxü: —Pema i Parichéugü rü ñoma pochiyu rü poratu i düxétüwaxicatama iyaxuxürüü pixigü. Natürü i peäxêwa rü nagu perüxînüê na pengixü rü chixexü pexüxü. ⁴⁰ —Pa Naêchitamare Maxêxüx, çtama êxna nüxü pecuèx na guma Tupana ga naxücü i ngêma tórü düxétüxünewa ngêmaxü, rü gumatama yixü ga naxücü ga tórü maxü i tórü aixepewa ngêmaxü? ⁴¹ —Rü name nixi i Tupanana penaxâ i perü maxü na aixüma naxcèx pemaxêxücèx. Rü ngêmaäcü tá pime i guxüwama. ⁴² —Natürü wüxi i ngechaü nixi i pexcèx, Pa Parichéugüx, erü pema rü perü ngêmaxüwa rü meâ Tupanana penaxâ i ngêma noxrü ixixü, natürü perü maxüwa rü tama aixüma naga pexînüê rü tama nüxü pengechaü. Rü marü name na perü ngêmaxüwa Tupanana penaxâxü i ngêma noxrü ixixü. Natürü perü maxüwa rü ta penaxwêxe i meâ naga na pexînüêxü rü nüxü na pengechaüxü. ⁴³ —Rü wüxi i ngechaü nixi i pexcèx, Pa Parichéugüx, erü pema rü pexü nangúchaü i âëxgacüchicagüwa na perütogüxü i ngutaquêxepataügüwa. Rü penaxwêxe na ñoma âëxgacüxü rümoxêxürüü na meâ pexü namoxêgüxü i duüxügü i itamügüwa. ⁴⁴ —Rü wüxi i ngechaü nixi i pexcèx, erü ñoma yuetamaügü i tama nüxü idauxü i duüxügü naêchitamare naetüwa chopetüxürüü pixigü. Erü woo perü düxétüwa pime, natürü aixepewa i peäêwa rü poraäcü pichixe —ñanagürü ga Ngechuchu. ⁴⁵ Rü wüxi ga ngúxêëruü ga Moïchéarü mugüwa nguxêëtaexü, rü Ngechuchuxü nangaxü rü ñanagürü: —Pa Ngúxêëruü Pa Ngechuchux, rü ngêma na ngêma ñacuxü, rü toma rü toäêwa nangux —ñanagürü. ⁴⁶ Natürü Ngechuchu rü ñanagürü nüxü: —Wüxi i ngechaü nixi i pexcèx, Pa Ngúxêëruüğü i Moïchéarü Mugüwa Nguxêëtaegüxüx, erü poraäcü penamu i duüxügü na naga naxînüêxücèx i ngêma Moïchéarü mugü i guxchaxü i pematama bai i irarüwa naga pexînüêchaüxü. ⁴⁷ —Rü wüxi i ngechaü nixi i pexcèx, erü peyamexêëgü i tûmamaügü ga guxema nuxcümaügüxe ga Tupanaârü orearü uruügü ga perü oxigü tixü dêixe. ⁴⁸ —Rü ngêmawa nüxü tacuèx na pema rü ta ipexägüxü nawa ga yema chixexü ga perü oxigü ügüxü. Yerü nümagü rü tixü nadai ga guxema Tupanaârü orearü uruügü, rü ñuxma i pema rü peyamexêëgü i tûmamaügü. ⁴⁹ —Rü yemacèx nixi ga Tupana ga ñaxü:

“Ngêma duüxügütanüwa tá chanamugü i chorü orearü uruügü rü chorü orearü ngeruügü. Natürü ngêma duüxügü i chixexügü rü tá nanadai i nümaxü rü togüxü rü tá nachixewegü rü tá nawe ningêxütanü”,

ñaxü ga Tupana. ⁵⁰⁻⁵¹ Rü ñanagürü ga Ngechuchu: —Rü pemaâ nüxü chixu rü Tupana tá nayapeguächixêê i pema i ñuxma maxêxê erü pema rü ta perü oxigücümüga pexi. Nümagü rü noxritama naâneârü ügügumama rü nanadai ga muxüma ga Tupanaârü orearü uruügü. Rü nüxîra nayamêxgü ga Abé rü gumawena nayadaietanü ga muxüma ga togü ñuxmata Zacaria ga tupauca ga taxünegu yamêxgüäcüwa nangu. Rü guxüma ga yema orearü uruügü ga perü oxigü dêixücèx rü Tupana tá pexna naca, erü

pema rü ta perü oxigürüdtama pixīgü rü tama nüxü perüxoechaü i ngēma chixexü i pexüxü. ⁵² —Rü wüxi i ngechaü nixi i pexcex, Pa Ngüexēeruügü i Moïchéarü Mugüwa Nguxēētaegüxüx, erü duüxügüchaxwa ipeyacux i Tupanaärü ore i aixcüma ixixü i pematama tama pixögüxü. Rü nüxna penachuxu i togü i duüxügü i aixcüma yaxögüchaüxü na nümagü rü ta tama yaxögüäxüxcex —ñanagürü ga Ngechuchu. ⁵³⁻⁵⁴ Rü yexguma Ngechuchu yema ñaxgu, rü yema ngüexēeruügü ga Moïchéarü mugüwa nguxēētaegüxü rü yema Parichéugü rü poraäcü Ngechuchumaã nanuē. Rü inanaxügü ga nüxna na nacagüexü naxcex ga muxüma ga ore ga guxchaxümaã na yemaäcü chi nüxü iyangaugüxüxcex ga ore ga chixexü na yemamaã norü äëxgacügüxü- tawa Ngechuchuxü İyaxuaxügüxüxcex.

12

Ngechuchu nanangüexēē na tama namexü na duüxügüpëxewa meã imaxnetaxü natürü taãewa rü chixexügu rüxinüxü

¹ Rü yoxni yexma nangutaquëxegü ga muxüchixü ga duüxügü. Rü yema na namuxüchixüxcex rü düxwa nügücutüwa ningagüetanü ga duüxügü. Rü Ngechuchu inanaxügü ga norü ngüexügümaãxira na yadexaxü, rü ñanagürü: —¡Pexuäëgü naxcex i Parichéugü! Erü duüxügüpëxewa meã namaxënetaxü natürü naãewa rü chixexügu narüxinüē. ² —Natürü guxüma i ñacü i wüxie cúacü üxü rü tá nangoxoma. Rü guxüma i ñacü iicüxü rü yixcüra rü tá duüxügü nüxü nacuëxgüama. ³ —Rü ngëmacëx guxüma i ngëma ore i ëanexüwa cúacü nüxü pixuxü rü yixcüra rü tá nangoxoma rü guxü i duüxügü tá nüxü naxinüē. Rü ngëma ore i ucapuarü aixepewa cúacü nüxü pixuxü, rü yixcüra rü guxäpëxewa tá nüxü nixugügü i duüxügü.

Name nixi na Tupanaxü pemuüëxü (Mt 10.26.31)

⁴ —Rü ngëmacëx i pemax, Pa Chomücügüx, rü pemaã nüxü chixu rü jtama nüxü pemuüē i ngëma duüxügü i pexü daixchaüxü! Erü taxünexüxicatama nimëxgü, natürü taxucürüwama taãëxü nimëxgü. ⁵ —Natürü pemaã tá nüxü chixu na texëxü tá na pemuüëxü. ¡Nüxü pemuüē ya Tupana! Erü nüma nüxü nangëxma i pora na yamaãxü i pexene, rü napoxcuãxü i peãē i ngextá ngoxogüxü İnapoxcuxügu. ¡Rü yimaxü tá nixi i pemuüëxü! ⁶ —¿Tama ëxna taxretachinü i diëruxacügu namaã petaxe i wüximëëxpüx i werixacügü? Natürü Tupana rü tama tüxü inayarüngüma ya yixema werixacüãxgü, rü bai ya wüxi. ⁷ —Rü woo i peyaegü rü Tupana nüxü nacuëx na ñuxre i peyae ngëxmaxü. Rü ngëmacëx, ¡täxü i pexoegaãëgüxü! Erü pema rü muxüma i werixacügüarü yexeraxüchi pexü nangechaü ya Tupana.

Yixema duüxügüpëxewa tügü ixuxe na Ngechuchu ya Cristuarü duüxü tiixü (Mt 10.32-33, 12.32)

⁸ —Rü pemaã nüxü chixu rü guxäma ya texé i ñoma i naãnewa duüxügüpëxewa tügü ixuxe na chorü duüxü tiixü, rü choma i Tupana Nane na duüxüxü chiixü, rü napëxewa i Tupanaärü orearü ngeruügü i daxücläx rü tá tüxü chixu na chorü duüxü tiixü i tümax. ⁹ —Natürü texé ya ñoma i naãnewa duüxügüpëxewa tügü ixuxe na tama chorü duüxü tiixü, rü choma rü tá ta napëxewa i Tupanaärü orearü ngeruügü i daxücläx rü tá tüxü chixu na tama chorü duüxü tiixü i tümax. ¹⁰ —Rü guxäma ya texé ya chixri chauchiga idexaxe i choma i Tupana Nane na duüxüxü chiixü, rü Tupana

tá tūxū nūxū nangechaū i ngēma. Natūrū texé ya Tupanaāē i Ūūnexūchiga chixri idexaxe, rū Tupana rū tāūtama tūxū nūxū nangechaū i ngēma. ¹¹—Rū ngēxguma duūxūgū ngutaquēxepataūgūwa rū ēxna āēxgacūgūpēxewa pexū nagagūgu na pexū napoxcuexūcēx, rū įtāxū i pexoegaāēgūxū na įacūmaā tá penangāxūxū rū ēxna įacūxū tá namaā na pixuxū! ¹²—Erū ngēxguma nawa nanguxgu na pidexagūxū, rū Tupanaāē i Ūūnexū tá pexū nanguxēē na įacūxū tá namaā pixuxū —ñanagūrū ga Ngechuchu.

Wūxi i āūcūmaxū nixī na imuārū dīruāxū

¹³ Rū yema duūxūgūtanūwa rū wūxi ga yatū Ngechuchuxū ñanagūrū: —Pa Ngūxēēruūx, įnamaā nūxū ixu ya chaueneē rū choxna naxāā i ngēma chaunatū ga yucūarū ngēmaxū i choxna ūxū! —ñanagūrū. ¹⁴ Natūrū Ngechuchu rū ñanagūrū nūxū: —Pa Yatūx, įtexé perū āēxgacūxū choxū tingucuchixēē na chaytoyexūcēx i ngēma penatūarū ngēmaxū! —ñanagūrū. ¹⁵ Rū ñanagūrū ta ga Ngechuchu: —įPexuāē na tama pexū nangūchaūxūcēx i togūarū ngēmaxū! Erū wūxi i duūxū rū tama ngēma na namuārū ngēmaxūāxūcēx nixī i nayauxāxū i norū maxū i taguma gūxū —ñanagūrū. ¹⁶ Rū yexguma wūxi ga ore ga cuēxruūxū namaā nixu, rū ñanagūrū: —Nayexma ga wūxi ga yatū ga muārū dīruācū, rū guxūma ga yema nanetūgū ga naānegu natogūxū rū meāma nūxū nixu. ¹⁷—Rū guma yatū rū nagu narūxīnū rū naāēwa ñanagūrū:

“įĮacū tá chaxūxū i ñūxmax? Erū nataxuma i chorū nachica i ngexta namaā na changuxūxū i chaunetūgūarū o”, ñanagūrū. ¹⁸—Rū naāēwa ñanagūrū:

“Marū nūxū chacuēx na įacū tá chaxūxū. Rū nagu tá chapogū ya guxūdnema ya chorū įpatagū ga nagu namaā changuxūne ga chaunetūgūarū o. Rū nāi ya taxūragūne tá chaxū na ngēxma namaā changuxūxūcēx i guxūma i chaunetūgūarū o rū guxūma i chorū ngēmaxūgū. ¹⁹—Rū ngēxguma marū namexgu i guxūma, rū chaugūmaā tá ñacharūgū: ‘Ñuxma rū tá icharūngū rū meā tá chachibū rū meā chaxaxe rū ngēmaācū tá chataāē. Erū namuxūchi i chorū ngēmaxūgū, rū mucūma ya taunecū tá choxū natai’, ñacharūgū tá chaugūmaā”. ²⁰—Natūrū Tupana rū ñanagūrū guma yatūxū:

“Pa Yatūx, cungēāēmare i cuma erū ñoma i chūtaxūgu tátama cuyu. Rū ngēma curū ngēmaxūgū i namaā cunguxūxū, rū įtexéarū tá nixī i ngēxguma?” ñanagūrū ga Tupana. ²¹—Rū ngēxgumarūū tá ta namaā nangupetū i ngēma duūxūgū i nūgūcēxtama norū ngēmaxūgūmaā nguxūxū rū tama nūgū imexēēxū i Tupanapēxewa —ñanagūrū ga Ngechuchu.

Tupana rū naxācūgūna nadau

(Mt 6.25-34)

²² Rū yemawena rū norū ngūexūgūxū ñanagūrū ga Ngechuchu: —Pemaā nūxū chixu įrū tāxū i pexoegaāēgūxū naxcēx i įacū tá na pengōxū rū įacūmaā tá na pixāxchiruxū! ²³—Erū perū maxū rū ōnaārū yexera nixī, rū pexene rū naxchiruarū yexera nixī. ²⁴—įDūcēx penangugū i werigū i tama toegūchirēxū, rū tama nanetūarū o ibuxgūxū, rū ngepatagūxū na ngexta namaā nanguxūgūxūcēx i norū ōna! Natūrū Tupana rū nanaxūwemū. Rū pema rū Tupanacēx rū poraācū guxūma i werigūarū yexera pixīgū. ²⁵—Rū taxuwama name na pexoegaāēgūxū. Erū taxucūrūwama wūxie i pema rū pegūtama ipemēxchixēē ngāxū ya metruğu ega woo poraācū naxcēx pexoegaāēgūgu. ²⁶—Rū ngēxguma tama pemaā nanguxū i ngēma įraxū rū taxucūrūwama pegūtama ipemēxchixēē ega woo naxcēx pexoegaāēgūgu, rū

¿tūxcūi i ngēxguma rü ta ꞑacü i togü i ngēmaxūgücèx pexoegaãēgüxü? ²⁷ — ꞑDücèx penangugü i putüragü na ñuxácü nayaexü i nachacu! Rü tama napu-racüexü, rü tama nügü üxchirugüxü. Natürü woo guma ãēxgacü ga Charumóü ga na namexèchixü ga naxchiru rü taguma wüxi ga putürachacuarü mexürüü nixi. ²⁸ —Rü marü nüxü pedau i ñuxácü Tupana na nangèxãēxü i putüragü i ñuxma naãnewa rüxügümarexü natürü moxü rü marü taxuxü. Rü ngēxguma Tupana ngēmaãcü nangèxãēgu i putüragü rü pema rü tá ngēmaärü yex-era pexchiru pexna naxã, Pa Duñxügü i Írarüwatama Yaxögüxü. ²⁹ —Rü ngēmacèx tama name i pexoegaãē naxcèx i ꞑacü tá na pengöxü rü ꞑacü tá na pixaxüxü. ³⁰ —Erü ñoma i naãnecüãx i duñxügü rü naxcèx nadaugü i guxüma i ngēma pemaã nüxü chixuxü. Natürü pema rü pexü nangèxma ya Penatü ya Tupana ya nüèchama nüxü cuácü na pexü nataxuxü i guxüma i ngēma. ³¹ —Rü ngēmacèx narüemema nixi na Tupanaärü ngüchaücèx pedaugüxü na perü ãēxgacü yüxücèx. Rü ñuxüchi nüma rü tá pexna nanaxã i guxüma i ꞑacü i pexü taxuxü.

Ñuxácü tüxü nangèxma i tóru ngēmaxügü i daxügüxü i naãnewa (Mt 6.19-21)

³² —ꞑTãxü i pemuñèxü, Pa Chauxacügüx! Pema rü noxretama pixügü natürü Penatü ya Tupana rü norü ngüchaü nixi na pexna naxããxü i pechica i ngextá nüma ãēxgacü iyüxüwa. ³³ —ꞑRü namaã petaxe i perü ngēmaxügü rü togü i duñxügü i nüxü nataxuxüna penaxã i ngēma dñeru! Rü ngēmaãcü tá pegüxü penangèxmaxèè i perü ngēmaxügü i taguma pexü ngauxü rü taguma gúxü i daxügüxü i naãnewa i ngextá tama iyaxücuxüwa i ngítèxáxü rü naweane tama ínachixexèxüwa. ³⁴ —Erü ngextá ínangèxmaxüwa i perü ngēmaxügü, rü ngèxma nixi i perüxünèxü.

Name nixi i yigü ítamexègü naxüpa na ínangüxü ya Cristu

³⁵ —ꞑRü ípememare namaã i perü omügü i naigüxü! ³⁶ —Rü name nixi i wüxi i coriarü duñxügü i ímemaregüxürüü na pixügüxü. Rü penaxwèxe na ñoma duñxügü i íãxwa norü corixü nanguxèègüxürüü na pixügüxü. Rü ngēxguma norü cori rü wüxi i ngígüarü petawa ne naxüxgu rü: Tu tu tu ñaxgu, rü paxa naxcèx nayawãxnagü i íãx. ³⁷ —Rü nataãgü i ngēma coriarü duñxügü ega inadauegu i ngēxguma ínangüxgu i norü cori. Rü pemaã nüxü chixu rü ngēma cori rü norü mechawa tátama nanatogüxèè i ngēma norü duñxügü i nüxü ínangüxègüxü, rü nüma tátama ngēma norü duñxügüxü inaxüwemü. ³⁸ —Rü woo ngãxücüü ínangüxgu rü èxna marü yangunèchaügu rü nataãgü i ngēma coriarü duñxügü ega inadauegu i ngēxguma ínangüxgu i norü cori. ³⁹ —Rü ngēxguma chi wüxi ya íarü yora nüxü cuèxgu na ñuxguacü ínangüégaxü i ngítèxáxü, rü tãu chima nape. Rü chi nüxna nadau ya napata na tama yawãxnaãxücèx rü tama na nüxü nangíxücèx. ⁴⁰ —Rü pema rü ta penaxwèxe na ípememarexü. Erü ngürüãchi tama nagu íperüxünüéyane tá íchangu i choma i Tupana Nane na duñxüxü chiixü —ñanagürü ga Ngechuchu.

Wüxi ga duñxü ga meã norü coriga íñüxü rü to ga tama meã norü coriga íñüxüchiga (Mt 24.45-51)

⁴¹ Rü yexguma ga Pedru rü Ngechuchuna naca rü ñanagürü: —Pa Corix, ¿toxcèxicatama èxna nixi i ñaã ore i cuèxruü i tomaã nüxü quixuxü, rü èxna guxü i duñxügücèx yüxü? —ñanagürü. ⁴² Rü ñanagürü ga Cori ga Ngechuchu: —¿Texè tíxü ya yíxema túmaärü coriarü duñxè ya aixcüma yanguxèxè rü meã

tümaãëxü cuáxe? ¿Tama êxna yíxema tüxü ya tümaärü cori tüxna ägaxe na meã nüxna tadauxüçèx rü meã oragu tanachibüexëëxüçèx i norü duüxügü? ⁴³ — Rü tataãe ya yíxema coriarü duüxë i ngëxguma ínanguxgu i tümaärü cori rü tüxü íyanguëügu na meãma ítanaxüxü i ngëma puracü i nagu tüxü namuxü. ⁴⁴ — Rü aixcüma pemaã nüxü chixu rü ngëma tümaärü cori rü tá guxüma i norü ngëmaxügüarü dauruüxü tá tüxü nixíxëe. ⁴⁵⁻⁴⁶ — Natürü ngëxguma chi ngëma duüxü nagu rüxínügu rü norü cori rü tama paxa na ínanguxü, rü inaxügüägu na chixri namuãxü i natanüxügü i yatüxügü rü ngexügü, rü peta naxüxgu rü nachibüxgu, rü naxaxegu, rü nügü nangãxëëgu, rü ngürüächi ngëma ngunexü rü ngëma ora i tama nagu ínanguxëëaxügu tá ínangu i norü cori. Rü poraãcüxüchi tá nanapoxcu ngëma duüxügü i tama norü coriga ínüxüxü napoxcuexürüü. ⁴⁷ — Rü ngëma coriarü duüxü i nüxü cuëxchiréxü na tacü nanaxwëxexü i norü cori, natürü tama nügü ímexëëxü rü tama norü coriga ínüxü, rü tá poraãcü nanaçuxi. ⁴⁸ — Natürü ngëma coriarü duüxü i tama nüxü nacuaãcüma chixri norü coriga ínüxü, rü chixexü üxü, rü tá írarüwaxüra nanaçuxi. Rü texé ya Tupana muxüma tüxna äxë, rü muxüçéxtáma tüxna naca. Rü texé ya muxüna tüxü nadauxëxë rü tá yexeraãcü tüxna naca.

Ngechuchugagu nixí i yatoyexü i duüxügü

(Mt 10.34-36)

⁴⁹ — Nüma chaxü na ñoma i naãnewa duüxügüxü chidauchitanüxëëxüçèx. Rü chierü aixcüma marü yadauchitanügu. ⁵⁰ — Rü choma rü tá poraãcü ngüxü chinge, rü chanaxixãchiãe ñuxmatáta yangu i ngëma. ⁵¹ — Rü tama name i nagu perüxínüe na núma chaxüxü na guxü i duüxügü rü wüxigu naxínüxüçèx. Natürü pemaã nüxü chixu rü núma chaxü na chaugagu yatoyexüçèx i duüxügü. ⁵² — Erü ñaãwena ega wüxi ya ípatawa nangëxmagu i wüximëxpüx i duüxügü, rü tomaëxpüx tá choxü nayaxögü rü taxre i tama, rü êxna taxre tá choxü nayaxögü rü tomaëxpüx i tama. ⁵³ — Rü wüxi i papá tá nayaxö rü nane rü täütáma nayaxö, rü êxna nane tá nayaxö natürü nanatü i tama. Rü ngëxgumarüü ta wüxi i mamá tá iyaxö rü ngíxãcü rü täütáma iyaxöxchãü, rü êxna ngíxãcü tá iyaxö rü ngíe rü täütáma iyaxöxchãü. Rü wüxi ya ngíxë tá iyaxö rü ngíneãx rü täütáma iyaxö, rü êxna ngíneãx tá iyaxö rü ngíxë rü täütáma iyaxö —ñanagürü ga Ngechuchu.

Cuëxruülgü i nachiga i tacü tá nangupetüxü

(Mt 16.1-4; Mr 8.11-13)

⁵⁴ Rü Ngechuchu ñanagürü ta nüxü ga duüxügü: —Ngëxguma nüxü pedëuxgu na naxëächianexü, rü nagu perüxínüe tá na napuxü. Rü aixcüma ngëmaãcü nixí. ⁵⁵ — Rü pema nüxü pecuëx na ñuxãcü penangugüxü ya buanecü, rü ngëmaãcü nüxü pecuëx rü tá na nanguxetüxü. Rü aixcüma ngëmaãcü nixí. ⁵⁶ — Pa Duüxügüx, pema rü togü i duüxügüpëxewa meã pemaxënetá, natürü peãewa rü chixexügu perüxínüe. Pema nüxü pecuëx na ñuxãcü penangugüxü ega tá napuxgu rü êxna tá nanguxetügu. ¿Rü ñuxãcü i ñuxma i tama nüxü pecuáxü na Tupana yíxü ya petanüwa ngucü?

Name nixí na curüngüxmüxü namaã i curü uwanü

(Mt 5.25-26)

⁵⁷ — Rü tüxçüü tama nüxü pecuáxchãü i ngëma nama i mexü i Tupana pexü naxwëxexü na nagu pexíxü. ⁵⁸ — Rü ngëxguma chi wüxie wüxi i nge-tanüçèx cuxü íxuaxügu rü äëxgacüxütawa cuxü tagaxgu, rü name nixí i namawatama tüxü icurüngüxmüxëe na tama äëxgacüpëxewa cuxü tagaxüçèx.

Erü wüxcana na ãëxgacüxütawa cunguxü rü ãëxgacü tá purichíagüna cuxü namu. Rü purichíagü tá cuxü napoxcu. ⁵⁹—Rü cumaã nüxü chixu rü ngëxma poxcuchicagu tá curüxãux ñuxmatáta ngíxü cuxütanü i guxcü i dïeru i nüxü ngíxü cungetanücü. [Rü aixcüma ngëxgumarüü tá cumaã nanaxü ya Tupana ega tama namaã cunamexëëxgu i curü maxü —ñanagürü ga Ngechuchu.]

13

Wüxi i mexü nixü na nüxü rüxoexü i tacüma i chixexü

¹ Rü yexgumatama Ngechuchuxütawa nangugü ga ñuxre ga duüxügü. Rü Ngechuchumaã nüxü nixugü ga na ñuxácü ãëxgacü ga Piratu namuxü ga norü churaragü na nadaiaxücëx ga ñuxre ga yatügü ga Gariréaanecüãx ga yexguma yema yatügü rü Tupanacëx carneru nadaixgu tupauca ga taxünewa. ² Rü Ngechuchu nüxna naca rü ñanagürü nüxü: —¿Pema nagu perüxinüëgu rü yemaácü nüxü nangupetü ga yema yatügü, yerü yema togü ga Gariréaanecüãxãrü yexera nipecaduãxgü? ³—Pemaã nüxü chixu rü tama nixü. Rü ngëxguma chi pema rü tama nüxü perüxoegu i pecüma i chixexü, rü guxãma i pema rü tá ta ipeyarütauxe. ⁴—¿Rü ëxna pema nagu perüxinüëgu rü guxü ga Yerucharéücüãxãrü yexera nipecaduãxgü ga yema 18 ga yatügü ga yuexü ga yexguma Chiruëwa yexmaxü ga dauxütaechica naetü rüngutaügu? ⁵—Pemaã nüxü chixu rü tama nixü. Rü ngëxguma chi pema rü tama nüxü perüxoegu i pecüma i chixexü, rü guxãma i pema rü tá ta ipeyarütauxe —ñanagürü ga Ngechuchu.

Ore ga nanetü ga iguera ga ngearü döxügu ixuxü

⁶ Rü nüma ga Ngechuchu rü nüxü nixu ga wüxi ga ore ga igueragu ixuxü, rü ñanagürü: —Rü wüxi ga yatü nüxü nayexma ga wüxi ga ubanecü. Rü yexma nanato ga wüxi ga iguera. Rü nüma ga guma yatü rü ínayadauxü ga yema iguera rü ngoxi naxöð, natürü taxuxüma ga norü oxü inayangau. ⁷—Rü yemacëx yema norü duüxü ga norü naãnena dauxüxü ñanagürü:

“Dücëx, tomaëxpüx ya taunecü guxüguma íchayadauxü i ñaã iguera, rü taguma naxo. Rü ngëmacëx chanaxwëxe na cuyadaxüchixü na tama natücëxma nuã naãnewa naxíaneãxücëx”, ñanagürü nüxü. ⁸—Natürü ga yema norü duüxü ga norü naãnena dauxü, rü norü corixü nangãxü, rü ñanagürü:

“Pa Corix, ¡nütama doma taunecüxícatama nangëmèx! Rü tá chanaxaimüãnepüne rü waxmüãnexümaã tá chanagüpüne. ⁹—Rü bexmana ngëxguma rü tá naxo. Natürü ngëxguma táütama naxoxgu rü tá chayadaxüchi”, ñanagürü.

Ngechuchu rü ngüxchigaarü ngunexügu ngíxcëx nayataanexëë ga wüxi ga ngecü ga pücëxwecü

¹⁰ Rü wüxi ga ngüxchigaarü ngunexügu rü Ngechuchu nanguxëëtae ga wüxi ga ngutaquëxepataüwa. ¹¹ Rü yéma iyexma ga wüxi ga ngecü ga 18 ga taunecü idaawecü. Rü ipücëxwe yerü wüxi ga ngoxo ngíxü napücëxwexëë, rü taxuacüma iyarüwëxãchi. ¹² Rü yexguma Ngechuchu ngíxü deüxgu rü ngíxcëx naca, rü ñanagürü ngíxü: —Pa Ngecüx, ñuxma rü marü cuxcëx nitaane i curü daawewa —ñanagürü. ¹³ Rü yexguma rü ngíxü ningögü, rü yexgumatama iyarüwëxãchiwemüxü, rü inaxügü ga Tupanaxü na yacuëxüxü. ¹⁴ Natürü yema ngutaquëxepataülarü ãëxgacü rü nanu, yerü Ngechuchu rü ngüxchigaarü ngunexügu ngíxü narümemëë ga yema nge. Rü yemacëx ga yema ãëxgacü rü ñanagürü duüxügüxü: —Nangëxma i 6 i ngunexü i nagu

namexü na ipuracüexü. Rü ngēma ngunexüügü nixi i namexü na nuã pexü na pegü peyarümexēügüxcèx rü tama i ngüxchigaarü ngunexüügü –ñanagürü. ¹⁵ Rü yexguma ga Cori ga Ngechuchu rü nanangãxü, rü ñanagürü: –Pa Duüxügü, pema rü togü i duüxügüpëxewa meã pemaxēneta, natürü peãewa rü chixexü perüxünë. ¿Tama êxna guxã i pema rü ngüxchigaarü ngunexüügü peyawëxü i perü woca rü êxna perü buru na peyaxaxexēügüxcèx? ¹⁶ –Rü ñaã ngecü rü Abrãütanüxü iyixi, rü Chataná rü 18 ya taunecü ngixü nachixexēë namaã i ñaã daawe. ¿Rü taux êxna i namexü na ngüxcèx chayataanexēëxü i ngüxchigaarü ngunexüügü? –ñanagürü. ¹⁷ Rü yexguma yema ñaxgu ga Ngechuchu, rü guxüma ga norü uwanügü rü poraãcü naxãneë. Natürü guxüma ga togü ga duüxügü rü nataãëgü ga yexguma nüxü nadaugügü ga yema mexügü ga Ngechuchu üxü.

Ore i motacha- chiregu ixuxü
(Mt 13.31-32; Mr 4.30-32)

¹⁸ Rü ñanagürü ga Ngechuchu: –¿Ñuxãcü nixi i ãëxgacü na yixü ya Tupana, rü nañuxraüxü i nüma ãëxgacü iyixüwa? ¿Rü ñacügu tá chanangu? ¹⁹ –Maneca wüxi ya motachachire ya wüxi ya yatü naãnegu toxünerüü nixi. Rü woo naxiraxüchichirëx ya naxchire natürü narüxü, rü naya ñuxmata wüxi i nanetü i taetaxü nixi. Rü ngēmaccèx i werigü rü natanügu nixüachiãü –ñanagürü.

Ore i pãüärü puxëëruügu ixuxü
(Mt 13.33)

²⁰ Rü ñanagürü ta ga Ngechuchu: –¿Ñuxãcü nixi i Tupana ãëxgacü iyixüwa? ¿Rü ñacügu tá chanangu? ²¹ –Rü pãüärü puxëëruüü nixi na guxüwama nanguxü. Erü wüxi i ngecü rü íraxü- tama i pãüärü puxëëruümaã inaxüëü i taxü i ngürü pãüchara. Rü ngēma pãüärü puxëëruü rü woo naxira rü nayapuxëë i guxüma i ngürü pãüchara –ñanagürü ga Ngechuchu.

Ïãx i íraxüchiga
(Mt 7.13-14, 21-23)

²² Rü inixüchigü ga Ngechuchu ga Yerucharëüwa na naxüxü. Rü yexguma namagu yaxüxu rü ñanegüwa rü ñanexãcüguwa nixüpetüchigü, rü yema nayangüxëëtanü ga duüxügü. ²³ Rü wüxi ga duüxü nüxna naca rü ñanagürü: –Pa Corix ¿noxretátama nixi i ngēma nayauxgüxü i maxü i taguma gúxü? –ñanagürü. Rü nüma ga Ngechuchu nanangãxü, rü ñanagürü: ²⁴ –Daxügüxü i naãneärü ñax rü naxiraxüchi. ¿Rü paxa naxcèx pedau na nawa pichocuxüxcèx! Erü pemaã nüxü chixu rü muxüchixüma i duüxügü tá nüxü nangüchaü na nawa yachocuxü, natürü täütama nawa nichocu. ²⁵ –Erü ngëxguma ñärü yora marü nawãxtagu i ñax, rü pema i düxëtüwa ngëxmagüxe rü tá penatutuãü. Rü ñaperügügü tá:

“Pa Corix, ¿paxa toxcèx yawãxna i ñax!” ñaperügügü tá. Natürü nüma i cori rü tá pexü nangãxü, rü ñanagürü tá:

“Tama pexü chacuèx na ngextãcüñax pixigüxü”, ñanagürü tá pexü. ²⁶ –Rü ngëxguma rü tá ñaperügügü nüxü:

“Cumaãchirëx wüxiwa tachibüë rü taxaxegü. Rü toxü cüngüxëë ga torü ñaneärü ítamüguwa”, ñaperügügü tá. ²⁷ –Natürü nüma rü tá pexü nangãxü rü ñanagürü tá: “Marü pemaã nüxü chixu rü tama pexü chacuèx na ngextãcüñaxgü pixigüxü. ¿Rü ípixi i nuã chauxütawa i guxãma i pemax, Pa Chixri Maxëxü!” ñanagürü tá. ²⁸ –Rü ngema tá pexaxe, rü tá

pixl̄xchapütägü i ngëxguma nüx̄l̄ pedèuxgu i Abrául̄ rü Ichaá rü Acobu rü gux̄l̄ma i Tupanaärü orearü uruügu na Tupana äëxgacü íix̄l̄twa na nangëxmagüx̄l̄ rü pema rü nüx̄na na ípewox̄l̄x̄l̄. ²⁹ —Erü gux̄l̄watáma ne nax̄i i duüx̄l̄gü. Rü Tupana äëx- gacü íix̄l̄twa tá nangëxmagü. Rü ngema tá narütögü na ngema nachibüex̄l̄cëx. ³⁰ —Rü tá nangëxma i nümáx̄l̄ i ñoma i naãnewa duüx̄l̄gü nüx̄l̄ oex̄l̄, natürü dax̄l̄gux̄l̄ i naãnewa rü Tupana tá wixpëxewa nanax̄l̄güx̄eë. Rü tá nangëxma i nümáx̄l̄ i ñoma i naãnewa duüx̄l̄gü nüx̄l̄ icuëx̄l̄güx̄l̄, natürü dax̄l̄gux̄l̄ i naãnewa rü Tupana rü tá wixweama nanax̄l̄güx̄eë —ñanagürü ga Ngechuchu.

Ngechuchu rü Yerucharéücl̄äx ga duüx̄l̄güicëx naxaxu (Mt 23.37-39)

³¹ Rü yematama ga ngunex̄l̄gu rü Ngechuchux̄l̄tawa nangugü ga ñuxre ga Parichéugü. Rü ñanagürügü Ngechuchux̄l̄: —Íix̄l̄ i nuá! Erü äëxgacü ya Erode rü cux̄l̄ nimèxéga —ñanagürügü. ³² Natürü nüma ga Ngechuchu nanangäx̄l̄ rü ñanagürü: —¡Nax̄l̄tawa pex̄i i ngëma yatü i nüx̄l̄ cuëx̄l̄chix̄l̄ na ñuxácü duüx̄l̄güx̄l̄ nawomüx̄eëx̄l̄, rü namaã nüx̄l̄ pixu rü ñuxma rü mox̄l̄ rü tá íchana- wox̄l̄ i ngoxogü, rü tá chanameëx̄eë i ngëma duüx̄l̄gü i idaaweex̄l̄, rü pëxmaácü tá chanagux̄eë! ³³ —Natürü chanaxwëxe i ichix̄l̄chigü i ñuxma rü mox̄l̄ rü paxmaácü ñuxmatáta Yerucharéüwa changu. Erü Yerucharéügu nix̄i i na nayux̄l̄ i gux̄l̄ma i Tupanaärü orearü uruügu. ³⁴ —Rü dücax, Pa Yerucharéücl̄äx, pema peyadaietanü i Tupanaärü orearü uruügu, rü nutamaã ípenamux̄l̄chigü i Tupanaärü orearü ngeruügu i pexcëx nüma namugüx̄l̄. Rü ñuxreëxpüxcüna wüxigu chaugüx̄l̄tagu pex̄l̄ chanutaquëx̄eëchaü, ñoma wüxi i ota ya nax̄l̄cl̄äx nügütüügu tük̄l̄ nutaquëx̄l̄rüü. Natürü pema rü tama penaxwëxe. ³⁵ —Dücx̄ i ñuxma ya perü íane, rü Tupana tá ínanatëx. Rü pemaã nüx̄l̄ chixu rü táütáma wena chox̄l̄ pedau ñuxmatáta dax̄l̄gux̄l̄ i naãnewa ne chax̄l̄. Rü ngëxguma rü tá chox̄l̄ pedau rü tá ñaperügügü:

“Namex̄ëchi nix̄i ya yima Cori ya Tupana núma namucü”, ñaperügügü tá —ñanagürü ga Ngechuchu.

14

Ngechuchu rü naxcëx nayataanex̄eë ga wüxi ga yatü ga rüchax̄l̄nëx̄l̄

¹ Rü wüxi ga ngüxchigaarü ngunex̄l̄gu rü Ngechuchu rü wüxi ga Parichéupatawa nayachibü. Rü yéma nayexmagü ga togü ga Parichéugü ga yéma bexma Ngechuchux̄l̄ ngugüex̄l̄. ² Rü yéma nayexma ta ga wüxi ga yatü ga idaawex̄l̄ ga rüchax̄l̄nëx̄l̄. ³ Rü yexguma ga Ngechuchu rü yema ngüx̄eëruügu ga Moíchéarü mugüwa ngux̄eëtaegüx̄l̄na rü Parichéugüna naca, rü ñanagürü: —¿Tama penachux̄l̄x̄l̄ ega ngüxchigaarü ngunex̄l̄gu chanamex̄eëx̄l̄gu i wüxi i idaawex̄l̄? —ñanagürü. ⁴ Natürü ga nümagü rü nangeëxgümare. Rü yexguma ga Ngechuchu rü naxmëxgu nayayaux̄l̄chi ga yema idaawex̄l̄, rü nanamex̄eë. Rü namaã nüx̄l̄ nixu ga na íyax̄l̄x̄l̄cëx. ⁵ Rü Ngechuchu rü ñanagürü Parichéugüx̄l̄: —¿Texé i pema i ngëxguma perü buru rü éxna perü woca puchugu nagoxgu, rü taux éxna i ngëxgumatama ípeyadaux̄l̄ rü ípe- yatüächix̄l̄ i woo ngüxchigaarü ngunex̄l̄gu? —ñanagürü. ⁶ Rü nümagü rü taxuümaãma nanangäx̄l̄gü.

Duüx̄l̄gü ga ngíüariü petawa nüx̄na naxugüx̄l̄chiga

⁷ Rū yexguma mechawa natogüchaŭgu ga yema nüxna naxugüxü, rü Ngechuchu nüxü nadau na wüxichigü rü İärü yoraxütawaxüchi natoxchaŭxü. Rū yexguma yemaxü nadëuxgu rü nayaxucuxëgü, rü İnanagürü: ⁸—Ngëxguma texé cuxna uxgu i wüxi i ngïgüarü petawa, rü tama name i petaarü yoraxütawaxüchi üxü i naxmëwxëwewa cuyarüto. Erü yixcüra ngürüächü tá inagü i to i nüxna naxuxü i curü yexeraxüchi ixixü. ⁹—Rü ngëma petaarü yora i pexna uxü, rü tá cumaã nüxü nayarüxu na icuchixüçëx i ngëma nachicawa na ngema natoxëëaxüçëx i ngëma to i curü yexera ixixü. Rū ngëxguma i cuma rü poraäcü cuxâneäcüma rü nawa iyacuáxü i naxmëwxëwewa tá cuyarüto. ¹⁰—Rü narümemaë ega texé cuxna uxgu, rü nawa iyacuáxü i naxmëwxëwewa curüto. Rū ngëxguma i ngëma petaarü yora i cuxna uxü rü İnanagürü tá cuxü: “Pa Chomücüx, İnuã chauxütawa yarüto!” İnanagürü tá cuxü. Rū ngëmaäcü ngëma petaarü yora rü wüxi i mexü tá cumaã naxü napëxewa i guxüma i duüxügü i nüxna naxuxü i cumaã ngema rütogüxü. ¹¹—Erü texé ya tügü írütaxe rü Tupana tá tüxü naxänexëë. Natürü texé ya tügü írüxírxaxë rü Tupana tá tüxü nicuëxüü—İnanagürü ga Ngechuchu. ¹² Rū İnanagürü ta ga Ngechuchu nüxü ga yema yatü ga nüxna uxü: —Rü ngëxguma wüxi i ðnacëx rü ëxna petacëx texëna cuxuxchaŭgu, rü tama name i nüxna cuxu i cumüçügü, rü bai i cueneëgü, rü bai i cutanüxügü, rü bai i curü ngaicamagu pegüxü i duüxügü i dïëruãxgüxü. Erü nümagü rü tá nüxü cuxna naxugü, rü ngëmaäcü tá cuxü nanaxütanügü. ¹³—Natürü ngëxguma wüxi i peta cuxüxgu, rü narümemaë nixü i nüxna cuxu i duüxügü i ngearü dïëruãxgüxü, rü duüxügü i taxucürüwama puracüexü, rü ngëma ichixeparagüxü, rü ngëma ingexetügüxü. ¹⁴—Rü tá cutaäëxüchi i ngëxguma erü nümagü rü taxucürüwa cuxü nanaxütanügü. Natürü tá cunayaxu i curü natanü i ngëxguma wena namaxëgu i Tupanaärü duüxügü i mexü—İnanagürü.

Ore i taxü i ðnagu ixixü
(Mt 22.1-10)

¹⁵ Rū yexguma yemaxü naxinügu ga wüxi ga yatü ga mechawa rütöxü rü Ngechuchuxü İnanagürü: —Rü tataäë ya yixëma Tupana äëxgacü İxixüwa chibüxe—İnanagürü. ¹⁶ Rū yexguma ga Ngechuchu rü İnanagürü nüxü: —Wüxi ga yatü nanaxü ga wüxi ga ðna ga taxü. Rū norü duüxüxü namu na nüxna yaxuxüçëx ga muxüma ga duüxügü. ¹⁷—Rü yexguma marü namexgu ga norü ðna, rü wena norü duüxüxü namu na yema duüxügü ga marü nüxna naxugüxümaã nüxü na yanaxuxüçëx ga marü na namemarexü ga norü ðna, rü paxa yéma na naxüxüçëx. ¹⁸—Natürü guxüma ga yema nüxna naxugüxü, rü inanaxügü ga nügü na İnaxuegüxü. Rū yema nüxíra nüxna naxu rü İnanagürü:

“Ngëxwacaxtama naxçëx chataxe i wüxi i naãne. Rū paxa tá İchayadau. İRü namaã nüxü İxu i cori rü taxucürüwama ngema chaxü!” İnanagürü. ¹⁹—Rü ga yema to rü İnanagürü:

“10 i wocagü i puracürüçëx chataxe, rü tá ngëmaxü chayaxü. İRü namaxã nüxü İxu i cori rü taxucürüwama ngema chaxü!” İnanagürü. ²⁰—Rü ga to rü İnanagürü:

“Ngëxwacaxtama chaxãmëx rü ngëmæcëx taxucürüwama ngema chaxü”, İnanagürü. ²¹—Rü yexguma nataegugu ga yema coriarü duüxü, rü norü corimaã nüxü nixu ga guxüma ga yema ore. Rū yexguma ga norü cori rü nanu, rü İnanagürü nüxü ga norü duüxü:

“İPaxa ngema İtamügü i taxüwa rü İtamüacügüwa naxü, rü nuã nagagü i ngëma duüxügü i ngearü dïëruãxgüxü, rü ngëma duüxügü i taxucürüwama

puracüexü, rü ngëma ichixeparagüxü, rü ngëma ingexetügüxü!” ñanagürü.
 22 –Rü yixcamaxüra ga yema norü cori namaã nüxü ixuxü naxüxguwena
 rü yema norü duüxü ñanagürü nüxü:

“Pa Corix, marü chanaxü i ngëma chomaã nüxü quixuxürüü, natürü
 naxächicaaneãmatama i nuã cupatawa”, ñanagürü. 23 –Rü yexguma ga norü
 cori rü ñanagürü nüxü:

“¡Paxa ngema nama i taxüğüwa rü nama i íraxüğüwa naxü, rü nuã na-
 gagü i togü i duüxüğü na nüxã chopatagu nachocuxüçex, rü ngëmaãcü na
 naxããcuxüçex ya daa chopata! 24 Erü pemaã nüxü chixu rü taxuüma ga yema
 nüxüra nüxna chaxuxü rü nuã chorü õnawa tá nachibüe”, ñanagürü.

Tama natauxcha na Cristuwe rüxüxü
 (Mt 10.37-38)

25 Rü muxüchixüma ga duüxüğü Ngechuchuwe narüxü. Rü nadauegu ga
 Ngechuchu, rü ñanagürü nüxü: 26 –Rü ngëxguma texé chowe rüxüxchaügu,
 rü tanaxwëxe i choxü tangechaü tümanatüarü yexera, rü tümaëãrü yexera,
 rü tümamëxãrü yexera, rü tümaxãcügüarü yexera, rü tümaëneëgüarü yexera,
 rü tümaëyëxgüarü yexera, rü tümaãrü maxüãrü yexera rü ta. Rü ngëxguma
 tama ngëmaãcü choxü tangechaügu rü taxucürüwama aixcüma chorü ngüexü
 tixü. 27 –Rü yixema tama naxwëxexë na chaugagu ngüxü tingeãcüma chowe
 tarüxüxü, rü taxucürüwama chorü ngüexü tixü. 28 –Rü ngëxguma chi wüxie
 i petanüwa rü wüxi ya ípata ya taxüne taxüxchaügu, ¿rü tama ëxna i noxri i
 tanangugüxiraxü na ñuxre i diëru tá nagu ngüxü ítatãxü? Rü ngëmawa nüxü
 tacuëx rü marü tüxü iyangu i ngëma tümaãrü diëru i tüxü ngëxmacü na
 tayangüëëxüçex ya yima í. 29 –Erü ngëxguma chi tama meã tanangugügu
 i tümaãrü diëru na ñuxregu tá naxãtanüxü ya yima í, rü norü caxtaxica chi
 itapugügu rü yixcüra rü taxucürüwa chi tanangüëëgu i ngëma puracü, rü
 guxüma i duüxüğü i nüxü daugüxü i ngëma tümaãrü puracü rü tá tüxü
 nacugüe. 30 –Rü ñanagürüğü tá:

“Ngëma yatü inanaxüğü na naxüpataxü, natürü taxucürüwama nayan-
 guxëë”, ñanagürüğü tá. 31 –Rü ngëxguma wüxi i nachüüãneãrü ãëxgacü rü
 to i nachüüãneãrü ãëxgacümaã nüğü nadaixchaügu, ¿rü tama ëxna i noxri
 inangugüãxü rü ngoxi 10,000 i churaragü rü yangu na nüğü nadaixüçex
 namaã i norü uwanü i 20,000 i churaragü nüxü ngëxmaxü? 32 –Rü
 ngëxguma nangugüãgu na tama yanguxü i norü churaragü rü, ¿taux ëxna i
 ngëxguma yaxüwa nangëxmagutama i norü uwanü, rü naxütawa namugüãxü
 i norü orearü ngerüğü, rü namaã nüxü na yanaxugüëxüçex na nüğümaã
 nangüxmüëxü? 33 –Rü ngëxgumarüü tá ta nixü i pemax, erü ngëxguma
 ngexerüxüxe i petanüwa tama ngema tanawogügu i guxüma i tüxü ngëxmaxü
 na chowe tarüxüçex, rü taxucürüwama aixcüma chorü ngüexü tixü.

Ngëxguma nangeacagu ya yücüra rü taxuwama name
 (Mt 5.13; Mr 9.50)

34 –Pema rü ñoma yücürarüü pixüğü i ñoma i naãnewa, erü yima yücüra rü
 õna na namexëëxürüü rü pema rü ñoma i naãnecüãx i duüxüğütanüwa rü
 norü mexëëruü pixüğü. Name ya yücüra. Natürü ngëxguma chi nangeacagu,
 ¿rü ñuxãcü tá wenaxãrü naxããca? 35 –Rü taxuwama name. Rü woo
 waixüümüãrü waxmüãnëxëëruüçex rü tama name. Rü ítanatëxmare. Rü yixema
 aixcüma ächixëxë, ¡rü name nixü i nagu tarüxüñüë i ñaã ore! –ñanagürü.

15

Ore i carneru i iyarütaxuxügu ixuxü
(Mt 18.10-14)

¹ Rû guxüma ga yema yatügu ga Dumaärü âëxgacücèx diëru ngîxü idee-tanüxü, rû togü ga duüxügu ga chixexü ga nacümagu İxü, rû Ngechuchucèx naxî na iyanaxinüëxücèx ga norü ore. ² Rû yemacèx ga Parichéugü rû ngüexëëruügu ga Moïchéarü mugüwa nguxëëtaegüxü, rû Ngechuchuxü nixugüe, rû ñanagürügu: —Ñaa yatü rû norü me nixî i pecaduâxgüxümaa na naxâmücüxü, rû namaâ na nachibüxü —ñanagürügu. ³ Rû yexguma ga Ngechuchu rû ñaa ore ga cuëxruüxü namaâ nixu, rû ñanagürü: ⁴ —¿Texé i petanüwa rû ngëxguma tüxü nangëxmagu i 100 i tümaärü carnerugü rû wüxi tüxü iyarütaxuxu, rû taux êxna i nachitaüwa tanawogüxü i ngëma 99, rû naxcèx tayadauxü i ngëma tüxü iyarütaxuxü ñuxmata nüxü itayangau? ⁵ —Rû ngëxguma nüxü itayangëuxgu rû taãëacüma tügüätügu tayagaxü. ⁶ —Rû ngëxguma tümapatawa tanguxgu, rû tanangutaquëxexëe i tümamücügü, rû duüxügu i tümaärü ngaicamagu pegüxü, rû ñatagüxü nüxü:

“¡Wüxigu chomaâ petaãëgü, Pa Chomücügüx! Erü marü nüxü ichayangau i ngëma chorü carneru ga iyarütaxuxü”, ñatagüxü nüxü. ⁷ —Rû pemaâ nüxü chixu rû ngëxgumarüü ta nataãëgü i daxüçüâx i ngëxguma nangëxmagu i 99 i duüxügu i mexügu i marü Tupanaärü ixigüxü, natürü yexeraäcü nataãëgü i ngëxguma wüxi i duüxü i pecaduâxü nüxü rüxoxgu i nacüma i chixexü rû Tupanaâxü yaxôögu —ñanagürü.

Ore ga diëru ga iyarütaxuxügu ixuxü

⁸ Rû Ngechuchu rû wüxi ga to ga ore ga cuëxruüxü nixu, rû ñanagürü: —Ngëxguma chi wüxi i ngecüaxü nangëxmagu i 10 tachinü i diëru, rû wüxi ngîxü iyarütaxuxu, ¿rû taux êxna i omüwa nangixichiâxü rû nabixichiâxü ya ngîpata, rû meâma ngîxcèx nadauxü ñuxmata ngîxü iyangau? ⁹ —Rû ngëxguma ngîxü iyangauxgu, rû inangutaquëxexëe i ngîmücügü i ngexügu rû ngîtanüxügu i ngîrü ngaicamagu pegüxü, rû ngîxü nüxü:

“¡Wüxigu chomaâ petaãëgü, Pa Chomücügüx! Erü marü ngîxü ichayangau i ngëma chorü diëru ga iyarütaxuxüchirëcxü”, ngîxü. ¹⁰ —Rû pemaâ nüxü chixu rû ngëxgumarüü ta nataãëgü i daxüçüâx i Tupanaärü orearü ngerügu i ngëxguma wüxi i duüxü i pecaduâxü nüxü rüxoxgu i nacüma i chixexü rû Tupanaâxü yaxôögu —ñanagürü ga Ngechuchu.

Ore ga wüxi ga ngextüxücü ga nanatüna ixücügu ixuxü

¹¹ Rû ñanagürü ta ga Ngechuchu: —Nayexma ga wüxi ga yatü ga taxre ga nane nüxü yexmacü. ¹² —Rû guma rübumaëcü, rû nanatüxü ñanagürü:

“Pa Pa, jchoxna naxâ i ngëma curü ngëmaxügu i choxna üxü!” ñanagürü. Rû yexguma ga nanatü rû yema taxre ga nanemaâ nayatoye ga norü yemaxügu. ¹³ —Rû ñuxre ga ngunexüguwena rû guma nane ga rübumaëcü rû nananutaquëxe ga guxüma ga norü yemaxügu rû namaâ nataxe. Rû yema diërumaâ rû to ga nachüânëwa naxü. Rû chixri yëma namaxü, rû yemaäcü ngîxü naguxëë ga guxcüma ga norü diëru. ¹⁴ —Natürü yexguma marü ngîxü naguxëëguwena ga guxcüma ga norü diëru, rû poraäcü nataxu ga ðna ga yema nachüânëwa. Rû yemacèx ga guma ngextüxücü rû inanaxügu ga taiya nüxü na ngüxü. ¹⁵ —Rû yexguma rû norü puracücèx nadau naxütagu ga wüxi ga yatü ga yema nachüânëwëçüâx. Rû nüma ga yema yatü rû norü naânëwa nanamu na yëma norü cuchigüna yadauxücèx. ¹⁶ —Rû düxwa nüxü nachixëga

ga yema cuchiwemü, yerü poraãcü nataiyaxüchi. Natürü taxüema òna nüxna taxã. ¹⁷—Rü yexguma naãewa nagu narüxĩnü, rü ñanagürü:

“¿Ñuxre i chaunatüarü puracütanüxü rü nüxü nangëxma i òna rü nüxü ínayaxü? Rü choma i nuã rü taiyamaã tá nuxma chayü. ¹⁸—Rü chaunatücëx tá chataegu, rü ñachagürü tá tüxü: ‘Pa Papax, marü chixexü Tupanapewa chaxü rü cupewa rü ta. ¹⁹—Rü tama marü chame na Chaune, ñacuxü choxü. ¡Rü wüxi i curü puracütanüxü choxü ixixëê!’ ñacharügü tá tüxü ya chaunatü”, ñanagürü. ²⁰—Rü inaxüãchi rü nanatüpatacëx nataegu. Rü yexguma yangaicagu ga nanatüpata, rü yaxügu nüxü tadau ga nanatü, rü tüxü nangechaütümü. Rü naxcëx tiña, rü nüxna tanëxãchi, rü nüxü tachüxu. ²¹—Rü yexguma ga nüma ga tümane rü ñanagürü tüxü:

“Pa Papax, marü chixexü Tupanapewa chaxü, rü cupewa rü ta. Rü ngemacëx marü tama name na ‘Chaune’ ñacuxü choxü”, ñanagürü. ²²—Natürü tümã ga nanatü rü tümäärü duüxügüxü ñatarügü:

“¡Paxa nuã penange i naxchiru i mexëchixü rü peyacuxcuchix! ¡Rü wüxi i anera ta naxmëxwa ngixü pingëxcuchix! ¡Rü chapatu rü ta nuãta penge, rü peyacuaixcuchix! ²³—¡Rü peyayaxux i ngëma wocaxacü i rüngümaexü, rü peyamã, rü ngixã namaã tachibüe rü tapetae! ²⁴—Erü daa chaune rü chauxcëx rü marü nayu, natürü maxücü chauxcëx ínangu. Rü marü inayarütaxchirëx, rü wenaxãrü nangox”, ñanagürü. Rü yexguma inanaxügüe ga na napetaegüxü. ²⁵—Rü yoxni ga guma nane ga rüyamaëcü, rü naãnewa nayexma. Rü yexguma nataegugu rü marü ñãrü ngaicamana nangugu, rü nüxü naxĩnü ga na ínaxetagüxü rü íyaxüãchitanüxüxü. ²⁶—Rü wüxi ga nanatüarü duüxücëx naca, rü nüxna naca ga ñacü na ínaxüexü ga íwa. ²⁷—Rü yema nanatüarü duüxü rü nanangãxü, rü ñanagürü: “Cueneë rü marü ínangu. Rü ngëmacëx cunatü toxü tamu na tayamáxücëx i ngëma wocaxacü i rüngümaexü, erü cueneë rü mecü ínangu rü tama ndaawe”, ñanagürü nüxü. ²⁸—Natürü ga guma naëneë ga rüyamaëcü rü nanu, rü tama ígu naxücuchaü. Rü yemacëx düxwa ga nanatü rü naxcëx ítaxüxü, rü nüxü tayacëexü na yaxücuxücëx. ²⁹—Rü nüma rü ñanagürü tüxü ga nanatü:

“Cuma nüxü cucuëx i ñuxre ya taunecü cuxü chapuracü, rü taguma chixri cuga chaxĩnü. Rü bai i ñuxgu wüxicana wüxi i chibuxacü choxna cumu na chomücügümaã chapetaexücëx. ³⁰—Natürü ñuxma na ínanguxü i ngëma cune i chixri curü díeru ngixü guxëëxü nagu i ngexügü i ngëãëxü, rü naxcëx cuyamëx i ngëma wocaxacü i rüngümaexü”, ñanagürü. ³¹—Rü yexguma ga nanatü rü ñatarügü nüxü:

“Pa Chaunex, cuma rü guxüguma chauxütawa cungëxma, rü guxüma i chorü ngëmaxügü rü cuxrü nixí. ³²—Natürü ñuxma rü name nixí na ípetaegüxü rü na itaãegüxü erü cueneë ga guma chauxcëx rü marü yucü, rü maxücü taxcëx ínangu. Rü woo tüxna inayarütaxu, rü wenaxãrü taxcëx nangox”, ñatarügü.

16

Ore ga yatü ga chixri norü coriarü yemaxüna dauxügu ixuxü

¹ Rü ñanagürü ta ga Ngechuchu norü ngüexügüxü: —Nayexma ga wüxi ga cori ga muãrü yemaxüãxüchixü. Rü nüxü nayexma ga wüxi ga norü duüxü ga norü yemaxüãrü daurü. Natürü togü ga duüxügü rü norü corimaã nüxü nixügü na yema norü duüxü rü chixri norü yemaxüna na nadauxü. ²—Rü yexguma ga yema cori rü yema norü duüxücëx naca, rü ñanagürü nüxü:

“Dücèx, cuchigaxù chomaã nixugügü i duùxügü. ¿Rü facü nixi i ngëma? ¡Rü chomaã nüxü ixu rü ñuxácü nixi i curü puracü, erü marü täütáma chorü ngëmaxüârü dauruùxü cuxü chixixëë!” ñanagürü nüxü. ³—Rü yexguma ga yema coriarü duùxü rü nagu narüxîñü, rü nügüãëwa ñanagürü:

“¿Facü tá chaxü i ñuxmax, erü chorü cori rü marü choxü inatëxüchi i ngëma chorü puracüwa? Tama chapora na naãnewa chapuracüxcëx, rü chaxãne na dïerucëx na íchaçaxü nüxna i togü. ⁴—Rü marü nüxü chachuë na facü tá na chaxüxü na choxü nangëxmaxüxcëx na texë tümapatawa choxü yaxuxü i ngëxguma changearü puracüãxgu”, ñanagürü. ⁵—Rü yexguma nügüxütawa naxcëx naca ga wüxichigü ga yema duùxügü ga norü coriaxü yangetanügüxü. Rü yema nüxîra yéma naxütawa nguxüna naca, rü ñanagürü:

“¿Ñuxre i nüxü cungetanüxü i chorü cori?” ñanagürü. ⁶—Rü nüma nanangãxü, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duùxü rü ñanagürü nüxü:

“Ñãã nixi i popera i curü ngetanü nawa ngóxü. ¡Rü paxa íruto rü to i popera naxü, rü 50 i dataguxicatama naxü i curü ngetanü!” ñanagürü. ⁷—Rü yemawena rü yema to ga duùxü ga norü coriaxü nangetanüxüna naca, rü ñanagürü:

“¿Cuma rü ñuxre yïixü i nüxü cungetanüxü i chorü cori?” ñanagürü. Rü nüma rü nanangãxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duùxü rü ñanagürü nüxü:

“Ñãã nixi i popera i curü ngetanü nawa ngóxü. ¡Rü paxa íruto rü to i popera naxü rü 80 i chocaguxicatama naxü i curü ngetanü!” ñanagürü.

⁸—Rü norü cori rü nüxü nicuëxüñãma ga yema norü duùxü ga chixexü, yerü nüxü nadau ga ñuxácü na naxããëxüchixü. Rü pemaã nüxü chixu rü ñoma i naãnecüãx i duùxügü, rü ngëma Tupanaãxü yaxögüxü i duùxügüarü yexera paxa naxcëx nadaugü na ñux-ácü nüxü natúxü i duùxügü. ⁹—Rü pemaã nüxü chixu rü ngëma ñoma i naãne i chixexüwa pexü ngëxmaxü rü name nixi i ngëmamaã nüxü penangúchaüxëë i duùxügü na Tupanaxütawa nangugüxü. Rü ngëmaãcü i ngëxguma naguxgu i ngëma ñoma i naãnewa pexü ngëxmaxü rü peyuxgu, rü tá pexü nangëxma ya Penatü ya pexü yaxucü i daxügüxü i naãnewa. ¹⁰—Yíxema meã namaã icuáxe ega wox noxretama tümamëxëwa ngëxmagu, rü ngëxguma muxüma tümamëxëwa ngëxmagu rü tá ta meã namaã itacuëx. Natürü yíxema chixri namaã icuáxe ega noxretama tümamëxëwa ngëxmagu, rü ngëxguma muxüma tümamëxëwa ngëxmagu rü ngëxgumarüü tá ta chixri namaã itacuëx. ¹¹—Rü ngëxguma tama meã namaã ipecuëxgu i ngëma pexmëxwa ngëxmaxü i ñoma i naãne i chixexüwa, ¿rü texë tá pexmëxgu tanaxü i ngëma aixcüma mexü i Tupanaãrü ixixü? ¹²—Rü ngëxguma tama meã namaã ipecuëxgu i ngëma Tupana pexna äxü i ñoma i naãnewa, ¿rü ñuxácü tá pexna nanaxã i pechica i daxügüxü i naãnewa? ¹³—Taxucürüwama i wüxi i duùxü rü nataxrearü coriãx. Erü wüxi i norü corichi rü tá naxai, rü ngëma to rü tá nüxü nangechaü. Rü ëxna wüxicëx rü tá meã napuracü rü ngëma to rü tá nüxü naxo. Rü pema rü taxucürüwama Tupanacëx pemaçë ega perü dïeruguxicatama perüxîñüëgu —ñanagürü ga Ngechuchu. ¹⁴ Natürü ga yema Parichéugü rü poraãcü norü dïeruguama narüxîñüë. Rü yemacëx Ngechuchuxü nacugüë ga yexguma nüxü naxîñüëgu ga guxüma ga yema ore. ¹⁵ Rü yexguma ga Ngechuchu rü ñanagürü nüxü: —Pema nixi i

duũxũgũpẽxewa meã pemaxẽnetaxũ, natũrũ Tupana pexũ nacuèx na ãacũgu perũxĩnũèxũ. Rũ woo duũxũgũ pexũ nicuèxũũgũ naxcèx i ngẽma pexũxũ, natũrũ Tupana rũ naãẽwa nangũx i ngẽma –ñanagũrũ ga Ngechuchu.

Tupanaãrũ mugũ ga Moĩché ùmatũxũ rũ ñuxãcũ ãẽxgacũ na yĩxũ ya Tupanachiga

¹⁶ Rũ yexguma ga Ngechuchu rũ ñanagũrũ: –Noxri nayexma ga Tupanaãrũ mugũ ga Moĩché duũxũgũxũ nguxẽèxũ, rũ yema nguxẽètae ga nuxcũmaũgũxũ ga Tupanaãrũ orearũ uruũgũ duũxũgũxũ namaã nguxẽèxũ. Natũrũ yexguma Cuãũ ga baiũxẽèruũ inguxguwena, rũ marũ duũxũgũmaã nũxũ chixuchiga i Tupanaãrũ ore i mexũ i ñuxãcũ ãẽxgacũ na yĩxũ. Rũ ñuxma rũ guxũma i ngẽma duũxũgũ rũ poraãcũ nũgũ naporaexẽè na yachocuxũcèx i ngema Tupana ãẽxgacũ ãixĩxũwa. ¹⁷ –Naxũpa na yanguxũ i Tupanaãrũ mugũ rũ woo wũxi i mu i íramarexũ yixĩgu, rũ naguxchaxũchi na iyanaxoxũ i ngẽma nũxũ yaxuxũ. Natũrũ aixcũma narũtauxchamaè nixĩ na iyanaxoxũ i ñoma i naãne rũ guxũma i ngẽma daxũwa nũxũ idaxũ.

Ngechuchu namaã nangũxẽètae na tama namexũ na texé tũmamaxũ ítáxũ (Mt 19.1-12; Mr 10.1-12)

¹⁸ –Ngẽxguma wũxi ya yatũ ítámèxgu rũ naĩ i ngemaã naxãmèxgu rũ Tupanapẽxewa rũ pecadu naxũ. Rũ texé ya yĩxema ngĩmaã ãmaxè i wũxi i nge i ngĩte ngĩxũ ítèxcũ, rũ Tupanapẽxewa rũ tũma rũ ta pecadu taxũ.

Yatũ i dĩeruãxũchixũchiga rũ Dácharuchiga

¹⁹ –Nayexma ga wũxi ga yatũ ga dĩeruãxũchixũ ga guxũguma mexèchixũ ga naxchirugu icũxũ. Rũ guxũ ga ngunexũgu rũ taxũma ga õna naxũ rũ napetaexũ. ²⁰ –Rũ nayexma ta ga wũxi ga yatũ ga ngearũ dĩeruãcũ ga Dácharugu ãegacũ. Rũ guxũguma yema dĩeruãxũchixũpataẽxwa nayarũtooxũ. ²¹ –Rũ guma Dácharu rũ nanangõxchaũ ga yema õnatũchi ga yema yatũ ga dĩeruãxũchixũãrũ mechawa rũyĩixũ. Rũ naxcèx naxĩ ga airugũ, rũ nanawearũ oxriãxgũ. ²² –Rũ wũxi ga ngunexũ nayu ga guma ngearũ dĩeruãcũ, rũ daxũcũãx ga Tupanaãrũ orearũ ngeruũgũ rũ daxũgũxũ ga naãnewa nanagagũ na wũxiwa Abrãũmaã nayexmaxũcèx. Rũ nayu ta ga yema yatũ ga dĩeruãxũchixũ, rũ inayatèxgũ ga duũxũgũ. ²³ –Rũ ngẽma nachica i Tupana ngoxogũxũ nagu poxcuxũwa naxũ ga yema yatũ ga dĩeruãxũchixũ rũ yema poraãcũ ngũxũ ninge. Rũ daxũ nadau, rũ yaxũgu Abrãũxũ nadau na Dácharumaã wũxiwa nayexmaxũ ga daxũgũxũ ga naãnewa. ²⁴ –Rũ yexguma ga yema yatũ ga dĩeruãxũchichirèxũ rũ aita naxũ rũ ñanagũrũ:

“Pa Oxi Pa Abrãũx, jcxũ changechaũtũmũ, rũ nuã namu ya Dácharu na dexãmaã nũgũ yawaixpèxemèxècũma choxũ yanawaixpèxearũ conũãxũcèx! Erũ poraãcũ choxũ nangũx i nuã ùxũwa”, ñanagũrũ. ²⁵ –Natũrũ Abrãũ rũ ñanagũrũ nũxũ:

“Pa Chaunex, jnũxna nacuèxãchi na taxuũma cuxũ taxuxũ ga yexguma cumaũxgu! Natũrũ Dácharu rũ poraãcũ chixexũ nũxũ naxũpetũ. Rũ ngẽmacèx i ñuxma rũ nuã mexũwa nangẽxma, rũ cuma rũ ngema poxcuchicawa ngũxũ quinge. ²⁶ –Rũ ñuxũchi nangẽxma i wũxi i taxũchixũ i ngatèxũ i tóru ngãxũwa ùxũ. Rũ ngẽmacèx ega númacũãx ngema íxchaũgu, rũ taxucũrũwama ngema naxĩ. Rũ woo ngemacũãx núma íxchaũgu rũ taxucũrũwama núma naxĩ”, ñanagũrũ. ²⁷ –Rũ yexguma ga yema yatũ ga dĩeruãxũchichirèxũ rũ ñanagũrũ:

“Cuxũ chacèèxũ, Pa Oxi, Pa Abráũx, na chaunatũpatawa cunamuxũcèx ya Dácharu. ²⁸—Erũ ngema nangẽxmagũ ya wũximẽẽxpũx ya chaueneẽgũ. Rũ chanaxwèxe na namaã nũxũ na yanaxuxũcèx na tama nuã ñãã poxcuchica i poraãcũ choxũ ñangũxũwa naxĩxũcèx”, ñanagũrũ. ²⁹—Naturũ ga Abráũ rũ ñanagũrũ nũxũ:

“Cueneẽgũ nũxũ nangẽxma i Tupanaãrũ mugũ ga Moĩché ũmatũxũ rũ yema ore ga nuxcũmaũgũxũ ga Tupanaãrũ orearũ uruũgũ ũmatũxũ. Rũ name nixĩ i ngẽma orega na naxĩnũẽxũ”, ñanagũrũ. ³⁰—Rũ yexguma ga yema yatũ ga ñeruãxũchichirẽxũ rũ Abráũxũ nangãxũ, rũ ñanagũrũ:

“Ngẽmaãcũ, Pa Oxi, Pa Abráũx, natũrũ ngẽxguma chi wũxi i duũxũ i yuchirẽxũ ngema ũxgu rũ namaã nũxũ yanaxuxgu, rũ chi nũxũ narũxoe i nacũma i chixexũ”, ñanagũrũ. ³¹—Naturũ Abráũ, rũ ñanagũrũ nũxũ:

“Ngẽxguma tama naga naxĩnũẽgu ga yema ore ga Moĩché ũmatũxũ rũ yema ore ga nuxcũmaũgũxũ ga Tupanaãrũ orearũ uruũgũ ũmatũxũ, rũ woo chi wũxi i marũ yuwa írũdaxũ i duũxũ ngema ũxgu, rũ namaã nũxũ yanaxuxgu i ore, rũ tãũ chima nũxũ nayaxõgũ”, ñanagũrũ.

17

Naxãũcũma nixĩ na pecadugu inguxũ (Mt 18.6-7, 21-22; Mr 9.42)

¹ Rũ Ngechuchu rũ norũ ngũexũgũxũ ñanagũrũ: —Rũ guxũgutama nangẽxma i tacũ i duũxũgũxũ pecaduãxẽẽxũ. Naturũ wũxi i ngechaũ tá tũmacèx nixĩ ya yĩxema duũxẽ ya togũxũ pecadugu ngxũẽẽxẽ. ²⁻³—Rũ tũmacèx rũ narũmemaẽ nixĩ na tũmanaxãwa yangacuchixũ ya wũxi ya nuta ya tacũ rũ ngẽmaãcũ taxtũwa tũxũ na itãexũ naxũpa na pecadugu tananguxẽẽxũ i wũxi i chorũ duũxũ. ¡Rũ ngẽmacèx name nixĩ i pexuãẽgũ i pemax! Rũ ngẽxguma wũxi i cueneẽ chixexũ cumaã ũxgu rũ ¡meã naxuxcuxẽ! Rũ ngẽxguma nũxũ naxoxgu i nacũma i chixexũ rũ ¡nũxũ nũxũ nangechaũ i ngẽma! ⁴—Rũ woo 7 ãxpũxcũna chixexũ cumaã naxũxgu i wũxi i ngunexũgu, rũ 7 ãxpũxcũna cuxna yacaxgu na nũxũ nũxũ cungechaũxũcèx, rũ name nixĩ i nũxũ nũxũ cungechaũ —ñanagũrũ ga Ngechuchu.

Ñuxãcũ tapora ega yaxõxgu

⁵ Rũ norũ ngũexũgũ ga norũ orearũ uwa namugũxũ rũ ñanagũrũgũ: —Pa Corix, ¡toxũ rũngũxẽẽ na yexeraãcũ tayaxõgũxũcèx! —ñanagũrũgũ. ⁶ Rũ yexguma ga Cori ga Ngechuchu rũ ñanagũrũ nũxũ ga norũ ngũexũgũ: —Rũ ngẽxguma chi woo naxĩraxũchigu i perũ õ, rũ daa naĩ rũ chi pega naxĩnũ ega ñapegũgu:

“¡Cugũ nabẽx i nuã rũ taxtũchiũgu cugũ yatõ!” ñapegũgu, rũ chi pega naxĩnũ.

Wũxi i ngũxẽẽruĩãrũ puracũchiga

⁷—Ngẽxguma chi wũxie i petanũwa rũ tũxũ nangẽxmagu i wũxi i tũmaãrũ duũxũ i tũmaãnewa ne ũxũ i puracũwa rũ ãxna carneruarũ dauwa, rũ tama nũgũcèxira naxũwemũ. ⁸—Naturũ norũ corixũxĩra naxũwemũ na nachibũxũcèx rũ naxaxexũcèx, rũ nũma rũ yixcama nachibũ. ⁹—Rũ norũ cori rũ tama moxẽ nũxna naxã na naxũwemũãxũcèx, erũ woetama ngẽma nixĩ i norũ puracũ i ngẽma norũ duũxũ. ¹⁰—Rũ ngẽxgumarũtũ tá pixĩgũ i pemax. Erũ ngẽxguma ngẽma Tupana pexũ ũxẽẽxũxĩcatama pexũxgu, rũ penaxwèxe i pegũ ñaperũgũgũ:

“Puracütanüxü i taxuwama mexü tixīgü, erü ngēma nawa tüxü namuxüxīcatama nixī i tinguxēēxü”, ñaperügü —ñanagürü ga Ngechuchu.

Ngechuchu nanameēxē ga 10 ga yatügü ga chaxüneañgüxü

11 Rü yexguma namagu yaxüxgu ga Ngechuchu ga Yerucharéüwa na naxüxü, rü Chamáriaane rü Gariréaane nügümaá íxüyexüwa naxüpetü. 12 Rü yexguma wüxi ga íānexācüwa nanguxgu, rü yexma napēxegu nayayi ga 10 ga yatügü ga chaxünemaá idaaweexü. Rü yaxügu nüxü nachigü. 13 Rü tagaācü ñanagürügü nüxü: —Pa Ngechuchux, Pa Ngüexēeruüx, ¡cuxü tangechaütümügü! —ñanagürügü. 14 Rü yexguma Ngechuchu nüxü dēuxgu, rü ñanagürü nüxü: —¡Yéa paigüxütawa pexí, rü nüxü pegü peyawēxgü! —ñanagürü. Rü yexguma namagu naxīyane, rü naxcèx nitaanetanü ga yema yatügü. 15 Natürü natanüwa rü nayexma ga wüxi ga Ngechuchucèx taeguxü ga yexguma marü nügü nadēuxgu ga naxcèx na yataanexü. Rü tagaācü Tupanaxü nicuèxüüchigü. 16 Rü Ngechuchupēxegu nanangüchuchi rü moxé nüxna naxā. Rü yema yatü rü Chamáriaanecüāx nixí. 17 Rü yexguma ga Ngechuchu rü ñanagürü: —¿Taux éxna i 10 chiréx pixīgüxü na pexcèx chayataanexēēgüxü? ¿Ngēxügü nixí i ngēma togü i 9 i yatügü? 18 —¿Rü ñāa to i nachíüānecüāx i duüxüxīcatama nixí itaeguxü na Tupanaxü yacuèxüüxüxcèx? —ñanagürü. 19 Rü yexguma rü guma yatüxü ñanagürü: —¡nachi rü íxü! Cuxcèx nitaane, erü cuyaxō —ñanagürü.

Ñuxācü tá nixí i ngēxguma ínanguxgu ya Tupana na ãēxgacü yīxü (Mt 24.23-28, 36-41)

20 Rü Parichégü rü Ngechuchuna nacagü, rü ñanagürügü: —¿Ñuxgu tá nixí na yangucuchixü ya Tupana na ãēxgacü yīxüxcèx i núma? —ñanagürügü. Rü Ngechuchu nanangāxü, rü ñanagürü: —Norü nguchiga ya Tupana rü tama wüxi i tacü i nüxü idaaxürüü nixí. 21 —Rü taxuacüma ñaperügügü:

“Daa nixí”, rü éxna “Gua nixí”, ñaperügügü. Erü marü petanüwa nangu ya Tupana na ãēxgacü yīxüxcèx —ñanagürü. 22 Rü yexguma norü ngüexügüxü ñanagürü: —Rü tá pexcèx ínangu i ngunexü i nagu poraācü tá choxü pedaugüchaüxü woo wüxi i paxaāchicèxtama yixígu. Natürü tãütama choxü pedaugü i ngēxguma. 23 —Rü duüxügü rü tá ñanagürügü pexü:

“Daa nixí ya Cristu”, rü éxna, “Gua nixí ya Cristu”, ñanagürügü tá. Natürü pemax ¡rü tãütama nüxü peyaxōgü, rü tãütama nawe perüxí! 24 —Rü ngēxguma íchanguxgu i choma i Tupana Nane na duüxüxü chíxü, rü wüxi i ãēmacü i guxüāneguma baxixürüü tá chixí. 25 —Natürü noxri rü tá poraācü ngüxü chinge, rü ñoma i naānecüāx i duüxügü i ñuxma maxēxü rü tá choxü naxoe. 26 —Rü yexgumarüü ga duüxügü na chixri maxēxü ga yexguma Noē maüxgu, rü ngēxgumarüü tá ta chixri namaxé i duüxügü i ngēxguma íchanguxgu i choma i Tupana Nane na duüxüxü chíxü. 27 —Rü ga duüxügü ga yexguma rü nachibüe, rü naxaxegü, rü nixāmèxgü, rü nixütexacügü ñuxmata nawa nangu ga yema ngunexü ga Noē naweügu nagu ixüexü. Rü ínangu ga mucü ga taxüchicü, rü guxüma ga yema duüxügü rü nayue. 28 —Rü yexgumarüü ta nangupetü ga yexguma nuxcūmaücü ga Lox maüxgu. Rü duüxügü rü nachibüe, rü naxaxegü, rü norü yemaxüxcèx nataxegü, rü namaā nataxegü, rü nixüānegü rü nitoegü, rü nixüpatagü. 29 —Natürü yexguma Lox ixüxgu nawa ga guma íāne ga Chodoma, rü daxüwa narüyi ga üxü ga naxíchine, rü nanadai ga guxüma ga yema duüxügü. 30 —Rü ngēxgumarüü tá ta nangupetü i ngēxguma íchanguxgu i choma i Tupana Nane na duüxüxü chíxü. 31 Rü

ngēma ngunexūgu rü texé tama tūmapataarü aixepewa ngēxmagu, rü tama name i tūmapatagu tayangaxi na tūmaarü ngēmaxūgü tayatoxūcēx. Rü texé ya tūmaānewa ngēxmaxē, rü tama name i tūmapatacēx tataegu na tacü ngema tayayaxuxūcēx. ³²—Rü nüxna pecuēxāchie ga ñuxācü ngīxü na naxüpetüxü ga Lox namēx ga na nayuxü, ga yexguma ngīgüweama nadēuxgu. ³³—Erü yixema tügü maxēchaxēēchaüxē rü tá itayarütaxu, natürü yixema chauxcēx yuxe rü aixcūma tá tüxü nangēxma i maxü i taguma gúxü. ³⁴—Rü pemaā nüxü chixu rü ngēma chütaxūgu rü wüxi i ngürücarewa tá nangēxmagü i taxre i duüxūgü. Rü wüxi tá niga, rü ngēma to rü tá ngēma natēx. ³⁵—Rü taxre i ngexūgü tá nügūmaā ínacaegü. Rü wüxi tá niga rü ngēma to rü tá ngēma natēx. ³⁶—Rü taxre i yatügü rü wüxi i naānewa tá nangēxmagü. Rü wüxi tá niga rü ngēma to rü tá ngēma natēx —ñanagürü ga Ngechuchu. ³⁷ Rü yemaxü naxínüegu ga norü ngüexūgü, rü Ngechuchuna nacagü, rü ñanagürügü: —Pa Corix, ¿ngextá tá nixi i nangupetüxü i ngēma nüxü quixuxü? —ñanagürügü. Rü nüma ga Ngechuchu rü nanangāxü, rü ñanagürü: —Duüxūgü rü tá chauxcēx nangutaquēxegü ñoma ēxchagü nawemücēx ngutaquēxexürüü —ñanagürü.

18

Ore ga āēxgacügu rü yutecügu ixuxü

¹ Rü Ngechuchu rü wüxi ga to ga orexü namaā nixu na yemawa nangüxēēāxūcēx na ñuxācü nanaxwēxexü na taguma nüxü nachaueācūma nangüxuma nayumüxēgüxü. ² Rü ñanagürü nüxü ga norü ngüexūgü: —Wüxi ga ñānewa nayexma ga wüxi ga āēxgacü ga tama Tupanaga ínūxü rü taxüexūma ngechaüxü. ³—Rü guma ñānewatama iyexma ga wüxi ga nge ga yutecü ga ngxü nayexmacü ga wüxi ga guxcha namaā ga to ga duüxü. Rü yemacēx yema āēxgacüxütawa ixüxecha na ngxü namexēēāxūcēx ga yema guxcha. ⁴—Rü muēxpüxcüna yéma ixüüxü, natürü yema āēxgacü rü tama ngīxü narüngüxēēchaü. Natürü düxwa nagu narüxinü ga yema āēxgacü rü naāēwa ñanagürü:

“Choma rü tama Tupanaxü changechaü, rü taxüexūma chacuáxchaü. ⁵—Natürü ngēma choxü na nachixeweechaxūcēx i ñāā nge, rü noxtacūma tá ngīxü charüngüxēē na tama yeücürü choxü nachixeweechaxūcēx”, ñanagürü. ⁶ Rü Cori ga Ngechuchu rü ñanagürü: —Yema nixi ga norü ore ga yema āēxgacü ga chixexü. ⁷—¿Taux ēxna i Tupana rü paxa tüxü ínapoxüxü ya yixema duüxé ya tüxü nayaxuxe i ngēxguma chütacü rü ngunecü rü norü ngüxēcēx nüxna tacaxgu i tūmaarü yumüxēwa? ⁸—Rü pemaā nüxü chixu rü Tupana rü paxatáma tüxü narüngüxēē. Natürü ngēxguma wenaxärü núma chaxūxgu i choma i Tupana Nane na duüxüxü chíxü, ¿rü ñuxre i duüxūgü i aixcūma yaxögüxüxü tá ichayangau i ñoma i naānewa? —ñanagürü ga Ngechuchu.

Ore i Parichégu ixuxü rü dīēruarü derüügu ixuxü

⁹ Rü Ngechuchu rü nüxü nixu ga ñāā ore nachiga ga yema duüxūgü ga nügü írümegünetaxü rü tama togüxü cuáxchaügüxü. ¹⁰ Rü ñanagürü: —Taxre ga yatü rü tupauca ga taxünewa nayayumüxēgü. Rü wüxi rü Parichéu nixi, rü yema to rü wüxi ga yatü ga Dumaarü āēxgacüxē dīēru ngīxü dexü nixi. ¹¹—Rü yema Parichéu rü yexma naxi, rü ñāācü nayumüxē:

“Pa Tupanax, moxē cuxna chaxā erü tama togü i duüxūgürüü chixi. Rü tama togürüü changitēx, rü tama ngēmarüü taxü i chixexü chaxü rü ēxna

wüxi i nge i âtecümaã ichape. Rü bai i ñaã yatü i Dumaârü âêxgacüçèx dîëru ngîxü dexürüü chixî. ¹² —Choma rü guxcü ya yüxügu rü taxreëxpüxcüna chaxaure rü tama chachibü na cugu charüxinüxüçèx. Rü chorü dîëruwa rü guxüguma meã cuxna chanaxâ i ngêma cuxna üxü”, ñanagürü. ¹³ —Natürü ga guma yatü ga Dumaârü âêxgacüçèx dîëru ngîxü decü, rü yaxügu narüxâüx. Rü namuü ga daxü na nadawenüxü, rü yema norü ngechaümaã nügü napaxremü, rü ñanagürü:

“Pa Tupanax, ¡Cuxü changechaütümüü! Erü wüxi i pecaduãxü chixî”, ñanagürü ga guma yatü. ¹⁴ —Rü ngêmacèx pemaã nüxü chixu rü guma yatü ga Dumaârü âêxgacüçèx dîëru ngîxü decü rü yexguma napatacèx nataegugu rü Tupanapêxewa rü mecü nixî. Naturü yema Parichéu rü Tupana rü tama namaã nataãê. Erü texé ya tügü icuèxüxüxe rü Tupana tá tüxü naxânexêê. Naturü texé ya tama tügü icuèxüxüxe rü Tupana rü tá tüxü nicuèxüxü —ñanagürü ga Ngechuchu.

Ngechuchu rü meã buãxgüxü nayaxu
(Mt 19.13-15; Mr 10.13-16)

¹⁵ Rü yéma Ngechuchuxütawa tüxü tagagü ta ga buãxgü na tüxü yangögüchigüxüçèx. Naturü yexguma norü ngüexügü yemaxü dauxgügu rü tüxü ningagü ga guxema tümamacüegü Ngechuchuxütawa tüxü gagüxe. ¹⁶ Naturü Ngechuchu rü nügüxütawa tümacèx naca ga guxema buãxta rü ñanagürü norü ngüexügüxü: —Chanaxwèxe i chauxütawa naxî i buxügü. ¡Rü täxü i nüxna penachuxuxü! Erü Tupana âêxgacü íixüxüwa rü tümacèx nixî ya yíxema ñaã buxügürüü ixigüxe. ¹⁷ —Aixcüma pemaã nüxü chixu rü texé ya tama wüxi i buxürüü Tupanaxü yaxúxe na tümäärü âêxgacü na yíxüçèx, rü tagutáma nagu taxücu i Tupana âêxgacü íixüxüwa —ñanagürü ga Ngechuchu.

Wüxi ga yatü ga dîëruãxüchicü Ngechuchumaã nidexa
(Mt 19.16-30; Mr 10.17-31)

¹⁸ Rü wüxi ga yema Yudiugüarü âêxgacü rü Ngechuchuna naca rü ñanagürü: —Pa Ngüexêëruü ya Mecüx, ¿tacü tá chaxüxü na chanayaxuxüçèx i maxü i taguma gúxü? —ñanagürü. ¹⁹ Rü Ngechuchu nanangãxü rü ñanagürü nüxü: —¿Tüxcüü “Mecü” ñacurügü choxü? Erü Tupanaxícatama nixî ya mecü ixicü, rü nataxuma i to i mecü ixixü. ²⁰ —Cuma nüxü cucuèx i Tupanaârü mugü i ñaxü:

“¡Tãütáma naí i ngemaã icupe, rü tãütáma cumáêta, rü tãütáma cungtêèx, rü tãütáma doraxü quixu i togüchiga, rü tümaga naxínü ya cunatü rü cue!” ñaxü. ²¹ Rü yexguma ga guma yatü rü ñanagürü Ngechuchuxü: —Woetama chorü bucüma meãma chayanguxêê i guxüma i ngêma mugü i nüxü quixuxü —ñanagürü. ²² Rü yemaxü naxínügu ga Ngechuchu rü ñanagürü: —Wüxixicatama cuxü nataxu, rü ngêma nixî na namaã cutaxexü i guxüma i curü ngêmaxügü rü togü i ngearü ngêmaxüãxgüxüna na cunaxãxü i curü natanü, rü ngêxguma rü tá cuxü nangêxma i cuchica i daxüguxü i naãnewa. Rü ñuxüchi marü name i chowe curüxü —ñanagürü. ²³ Naturü yemaxü naxínügu ga guma yatü rü poraãcü inayarümaãchi, yerü namuârü dîëruãxüchi. ²⁴ Rü yexguma Ngechuchu nüxü dèuxgu ga ñuxãcü na nangechaüxü, rü ñanagürü nüxü ga norü ngüexügü: —Naguxchaxüchi tá nixî na Tupana âêxgacü íixüxüwa na yachocurü i ngêma dîëruãxüchigüxü. ²⁵ —Rü dücax, wüxi i cameyu rü taxucürüwama wüxi ya ucumaxêtüwa naxüpetü. Rü ngêxgumarüü ta nixî i wüxi i duüxü i dîëruãxüchixü rü taxucürüwama Tupana âêxgacü íixüxüwa nixücu [ega norü dîëreguama naxínügu rü tama yaxöögü —ñanagürü.]

26 Rū yexguma yemaxū naxīnūēgu ga duūxūgū rū ñanagūrūgū: —¿Éxna texé tá ya nayaxúxe i maxū i taguma gúxū? —ñanagūrūgū. 27 Rū Ngechuchu ñanagūrū nūxū: —Duūxūgū rū taxuacūma nūgū namaxēē, natūrū Tupanaāxū rū natauxcha na namaxēxēēāxū —ñanagūrū. 28 Rū Pedru ñanagūrū Ngechuchuxū: —Pa Corix, toma rū yéma tanawogū ga guxūma ga torū yemaxūgū na cuwe tarūxīxūcēx —ñanagūrū. 29-30 Rū yexguma ga Ngechuchu rū ñanagūrū nūxū ga norū ngúexūgū: —Aixcūma pemaā nūxū chixu rū texé ya Tupanacēx tūmapatana, rū éxna tūmanatūna, rū éxna tūmaēna, rū éxna tūmaēneēgūna, rū éxna tūmaēyēxgūna, rū éxna tūmamēxna, rū éxna tūmaxācūgūna ngema ixūxē na Tupanaāxū tapuracūxūcēx, rū ñoma i naānewa tátama poraācū tanayaxu i tūmaārū natanū. Rū daxūgūxū i naānewa rū tá ta tanayaxu i maxū i taguma gúxū —ñanagūrū.

Ngechuchu rū wenaxārū nanaxunagū ga norū yuxchiga
(Mt 20.17-19; Mr 10.32-34)

31 Rū Ngechuchu rū noxrūwama naxcēx naca ga norū ngúexūgū, rū ñanagūrū nūxū: —Ñuxma rū Yerucharéŵta tá taxī na ngema yanguxūcēx i guxūma ga yema ore ga nuxcūmaūgūxū ga Tupanaārū orearū uruūgū ūmatūxū ga chauchiga. 32 —Rū Yerucharéŵcūāx i duūxūgū rū tá to i nachīŵānecūāxna choxū namugū. Rū ngēma duūxūgū rū tá chaugu nidauxcūraūgū, rū tá chomaā naguxchigagū, rū tá chauchiwewa nacaixgūe. 33 —Rū tá choxū naçuaixgū, rū yīxcūra rū tá choxū nimēxgū. Natūrū tomaēxpūx i ngunexūguwena rū tá wenaxārū chamaxū —ñanagūrū. 34 Natūrū yema norū ngúexūgū rū tama nūxū nacuēxgūēga ga na ŷacūchiga yīxū ga yema ore ga namaā nūxū yaxuxū. Yerū poraācū nūxū naguxcha ga aixcūma nūxū na nacuēxgūxūcēx.

Ngechuchu nanamexēē ga wūxi ga ngexetūcū ga Yericúwa
(Mt 20.29-34; Mr 10.46-52)

35 Rū yexguma Ngechuchu iāne ga Yericúwa nguxchaūgu, rū yéma namacūwawa narūto ga wūxi ga yatū ga ngexetūcū ga dīerucēx yéma iwémécū. 36 Rū yexguma guma ngexetūcū nūxū Inūgu ga muxūma ga duūxūgū na yéma chopetūxū, rū duūxūgūna naca ga ŷacū na ngupetūxū. 37 Rū nanangāxūgū, rū ñanagūrūgū: —Ngechuchu ya Nacharétucūāx nuā naxūpetū —ñanagūrūgū. 38 Rū yexguma ga guma ngexetūcū rū tagaācū ñanagūrū: —Pa Ngechuchux, Pa Dabītanūxūx, ꝑcuxū changechaūtūmū! —ñanagūrū. 39 Rū yema duūxūgū ga Ngechuchupēxegu īxū, rū nanangagū ga na iyanangeáxūcēx. Natūrū guma ngexetūcū rū yexeraācū tagaācū ñanagūrū: —Pa Dabītanūxūx, ꝑcuxū changechaūtūmū! —ñanagūrūama. 40 Rū yexma nayachiāchi ga Ngechuchu, rū duūxūgūxū namu na naxūtawa nagagūāxūcēx. Rū yexguma marū naxūtawa nanguxgu, rū guma ngexetūcūna naca ga Ngechuchu, rū ñanagūrū: 41 —¿ŷacū i cunaxwēxexū na cumaā chanaxūxū? —ñanagūrū. Rū guma ngexetūcū nanangāxū rū ñanagūrū: —Pa Corix, chanaxwēxe na choxū quidauchixēēxū —ñanagūrū. 42 Rū Ngechuchu ñanagūrū nūxū —¡dauchi! Rū marū cuxcēx nitaane erū cuyaxō —ñanagūrū. 43 Rū yexgumatama nidauchi ga guma ngexetūcū, rū Ngechuchuwe narūxū, rū Tupanaxū nicuēxūchigū. Rū guxūma ga duūxūgū ga nūxū daugūxū ga yema ngupetūxū rū Tupanaxū nicuēxūgū ta.

19

Ngechuchu rü Zaqueúchiga

¹ Rû Ngechuchu rü Yericúarü ñanewa naxüpetü. ² Rû yéma nayexma ga wüxi ga yatü ga díeruãxüchixü ga Zaqueúgu ãegaxü. Rû nûma nixí ga naêru ga yema yatügü ga Dumaârü ãëxgacücêx díeru ngíxü ideetanüxü. ³ Rû yema Zaqueú rü poraãcü nüxü nangúchaü ga Ngechuchuxü na nadauxü na nüxü nacuáxücêx. Natürü taxuacüma nüxü nadau, yerü namuxüchi ga duüxügü, rü ñuxüchi nanuxchanexüchi ga nûmax. ⁴ Rû yemacêx Ngechuchupêxegu nayangu, rü namacüwawa wüxi ga naügu naxínagü na Ngechuchuxü nadauxücêx ga yexguma yéma naxüpetügu. ⁵ Rû yexguma yéma naxüpetügu ga Ngechuchu, rü daxü nadau natüüwa ga guma naí. Rû ñanagürü nüxü: —Pa Zaqueúx, ¡paxa íruxí i ngema! Erü cupatawa tá changu i ñuxma —ñanagürü. ⁶ Rû paxa ínaruíxí ga Zaqueú, rü taãëãcüma Ngechuchuxü nayaxu. ⁷ Rû yexguma yemaxü nadaugüga ga duüxügü, rü guxüma inanaxügüe ga chixri Ngechuchuchiga na yadexagüxü. Rû ñanagürügü: —¿Ñuxãcü i nûma rü wüxi i duüxü i pecaduãxüpatawa nangu? —ñanagürügü. ⁸ Rû yexguma ga Zaqueú rü inachi rü ñanagürü Ngechuchuxü: —Dücêx, Pa Corix, choma rü ngearü díeruãxgüxüna tá chanaxã i ngãxügu i guxüma i chorü ngêmaxügü. Rû ngêxguma chi texê tüxü chawomüxêëãcüma tüxü changíxgu, rü ágümücüéxpüxcüna tá tüxü ngíxü chataeguxêë i ngema túmaârü díeru —ñanagürü. ⁹ Rû Ngechuchu rü ñanagürü nüxü: —Rü ñoma i ngunexügu cupatawa nangu i maxü i taguma gúxü, erü cuma rü ta rü Abráürüü cuyaxö. ¹⁰ —Rü choma i Tupana Nane na duüxüxü chíxü, rü ñoma i nañewa chaxü na naxcêx chayadauxücêx i ngema duüxügü i iyarütauxexü na chanamaxêxêxücêx —ñanagürü.

*Ore i díerugu ixuxü
(Mt 25.14-30)*

¹¹ Rû yoxni yema Ngechuchuarü ore inaxínüëyane ga duüxügü, rü Ngechuchu rü wüxi ga to ga ore ga cuëxruüxü namaã nixu, yerü marü Yerucharéüxü ningaica, rü duüxügü nagu rüxínüëgu rü paxa tá ínangu ga Tupana na norü ãëxgacü yíxücêx. ¹² Rû yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori ixícü ga nayaxücü ga ore na nachíüãneârü ãëxgacüxütawa naxüxücêx ga yaxüwa na yema ãëxgacü nüxü unetaxücêx na guma nawa ne naxüxüne ga ñãneârü ãëxgacü yíxücêx. ¹³ —Rü yexguma tauta inaxüächigu, rü naxcêx nangema ga 10 ga norü duüxügü. Rû wüxichigüna ngíxü naxã ga wüxitachinü ga tatanücü ga díeru. Rû ñanagürü nüxü:

“¡Ngímaã pepuracüe rü ngíxü pimuxêë i ñãã díeru ñuxmatáta chataegu!” ñanagürü. ¹⁴ —Natürü yema ñãnecüãx ga duüxügü rü naxchi naxaie ga guma cori. Rû yemacêx nawenaãma nayamugü ga ñuxre ga orearü ngeruügü na nachíüãneârü ãëxgacümaã nüxü yanaxugüxücêx na tama nanaxwêxegüxü na norü ãëxgacüxü na yíxücêx ga guma cori. ¹⁵ —Natürü nachíüãneârü ãëxgacü rü nayangucuchixêëãma ga guma cori. Rû ñuxüchi ga guma cori rü norü ñãnecêx nataegu na yéma ãëxgacü na yíxücêx. Rû yexguma ñanguxgu rü naxcêx nangema ga yema 10 ga norü duüxügü ga díeru nûxna ngíxü naxãxü, yerü nüxü nacuáxchaü ga ñuxrechigü ngíxü na yamuxêëxü ga norü díeru ga wüxichigü ga yema norü duüxügü. ¹⁶ —Rü yema nüxíra díeru nûxna ngíxü naxãxü rü norü corixütawa nangu, rü ñanagürü:

“Pa Corix, curü dîeru rü 10 êxpüxcüna ngîxü chimuxêê”, ñanagürü. 17 —Rü guma Cori ga yexwaca âêxgacüxü ingucuchicü rü nanangâxü, rü ñanagürü:

“Wüxi i mexü i chorü duüxü quixî. Maneca meâma namaâ cupuracü i ngêma íraxü i dîeru i cuxna chaxâxü. Rü ñüxma rü 10 ya îânegüarü âêxgacüxü tá cuxü chixîxêê”, ñanagürü. 18 —Rü yéma nangu ga to ga norü duüxü, rü ñanagürü:

“Pa Corix, curü dîeru rü wüximêêxpüxcüna ngîxü chimuxêê”, ñanagürü. 19 —Rü norü cori nanangâxü rü ñanagürü nüxü:

“Cuma rü wüximêêxpüx ya îânegüarü âêxgacüxü tá cuxü chixîxêê”, ñanagürü. 20 —Rü yéma nangu ga to ga norü duüxü rü ñanagürü nüxü:

“Pa Corix, ñaâ iyixî i curü dîeru. Rü wüxi ya dechugu ngîxü chanuque, rü ngêmaâcü ngîmaâ changuxü. 21 —Yerü cuxcêx chamuü, erü wüxi i yatü i aüxü quixî. Rü cunayauxtanü i ngêma tama cuxrü ixîxü, rü cunayaxu i nanetüarü o i ngextá tama cuma ícutoxüwa”. 22 —Rü yexguma ga guma âêxgacü rü ñanagürü nüxü:

“Wüxi i chorü duüxü i chixexü quixî i cumax. Rü curü oretama nixî i cuxü ixuxü na cuchixexü. Marü nüxü cucuêxchirêx ga na chaxaüxü, rü chanayautanüxü i ngêma tama choxrü ixîxü, rü chanayaxuxü i nanetüarü o i tama choma ichatoxü. 23 —¿Natürü tûxcüü tama bancugu choxü ngîmaâ cunguxü i chorü dîeru na ngema choxü ngîxü yamuxêêgüxücêx, rü ngêmaâcü mucü ngîxü na chayaxuxücêx i ngêxguma íchanguxgu?” ñanagürü. 24 —Rü yexguma ga âêxgacü rü yema yexmagüxümaâ nüxü nixu, rü ñanagürü:

“¡Nüxna ngîxü peyaxu i ngêma dîeru, rü ngêma 10 i dîeru nüxü ngêxmaxüna ngîxü pexâ!” ñanagürü. 25 —Rü nümagü rü nanangâxüügü, rü ñanagürüügü:

“Natürü, Pa Corix, núma rü marü nüxü ingêxma i 10 i dîeru”, ñanagürüügü. 26 —Rü guma âêxgacü nanangâxü, rü ñanagürü:

“Pemaâ nüxü chixu rü texé ya chauga ínuxê rü yexera tá tûxna chanaxâ. Natürü texé ya tama chauga ínuxê rü tá tûxna chanayaxu i woo ngêma íraxü i tûxü ngêxmaxü. 27 —Rü yema chorü uwanügü ga tama naxwêxegüxü ga norü âêxgacüxü na chiîxü, ¡rü nuâ penagagü, rü nuâ chopêxegu peyadai!” ñanagürü.

Ngechuchu rü Yerucharéügu naxücu (Mt 21.1-11; Mr 11.1-11; Cu 12.12-19)

28 Rü yema orexü yaxuxguwena ga Ngechuchu, rü inixüchigü ga Yerucharéüwa na naxüxü. 29 Rü yexguma marü nawa nangugüchaügu ga guma îânegü ga Bechagué rü Betániâ ga Oribunecüarü Mêxpüneârü ngaicamana yexmagüne, rü Ngechuchu nanamu ga taxre ga norü ngüexüügü.

30 Rü ñanagürü nüxü: —¡Gua îânexâcüwa pexî! Rü ngêxma tá nüxü peyangau i wüxi i buru i ngexwaca yaxü i ngêxma ngaxüxü i taguma texé natagu aunagüxü. ¡Rü peyawêxü, rü nuâ penaga! 31 —Rü ngêxguma texé pexna çaxgu na íacücêx peyawêxüxü i ngêma buru, ¡rü tûmamaâ nüxü pixu rü ñapegügü:

“Torü Cori nanaxwêxe”, ñapegügü tûxü! 32 Rü yéma naxî ga yema taxre ga norü ngüexüügü. Rü yexma nüxü nayangau ga yema buru ga Ngechuchu namaâ nüxü ixuxürüü. 33 Rü yexguma yawêxügüâgu ga yema buru, rü norü yoragü rü yema ngüexügüna nacagüe, rü ñanagürüügü: —¿Tûxcüü peyawêxü i ngêma buru? —ñanagürüügü. 34 Rü nümagü nanangâxüügü, rü ñanagürüügü: —Rü tayawêxü erü torü Cori nanaxwêxe —ñanagürüügü. 35 Rü Ngechuchuxütawa nanagagü ga yema buru. Rü yema norü ngüexüügü rü norü gáuxüchirumaâ

nanatütägü. Rū ñuxūchi Ngechuchuxū natagu naxaunagüxēēgü. ³⁶ Rū duūxūgü rü Ngechuchupēxewa norü gáuxūchirumaã nayachamagü ga nama. ³⁷ Rū yexguma inaxügüägu na inaxīgūxū nawa ga yema nama ga Orībuncüarü Mēxpūnewa yarūdaexū, rü guxūma ga yema duūxūgü ga yaxōgūxū ga nawe ruxīxū rü inanaxūgü ga taāēacūma aita na naxūexū rü tagaācū Tupanaxū na yacuēxūgūxū naxcēx ga guxūma ga yema cuēxruūgü ga taxū ga nūxū nadaugūxū ga Tupanaārü poramaã naxūxū ga Ngechuchu. ³⁸ Rū ñanagürügü: —¡Namecūmaxūchi ya daa tórü āēxgacū ya Tupanaégagu núma ūcū! ¡Rū pema rü ta, Pa Daxūcūāx, rü petaāxēgü rü nūxū picuēxūūgü ya Tupana! —ñanagürügü. ³⁹ Rū yéma duūxūgütanūwa nayexmagü ga ñuxre ga Parichéugü. Rū ñanagürügü Ngechuchuxū: —Pa Ngúexēēruūx, ¡Yangagü i ngēma cuwe ruxīxū i duūxūgü na yanachianegūxūcēx! —ñanagürügü. ⁴⁰ Natürü Ngechuchu nanangāxū rü ñanagürü nūxū: —Pemaã nūxū chixu rü ngēxguma chi iyanangeēxgūgu i ñaã duūxūgü, rü daa nutagü ya namacūwawa ngēxmagücū rü chi nūxī aita naxūe —ñanagürü. ⁴¹ Rū yexguma Yerucharéūārü ngaicamana nanguxgu ga Ngechuchu, rü guma iānecūāx ga duūxūgūcēx naxaxu. ⁴² Rū ñanagürü: —Pa Yerucharéūcūāxgü, chierü ñoma i ngunexūgu nūxū pecuēxgu na texē aixcūma taāē pexna āxū. Natürü ngēma rü pexchawa inicūx i ñuxma, rü taxuacūma nūxū pecuēx. ⁴³ —Rū tá guxchaxūgü pexū naxūpetü. Rū perü uwanügü tá nanaxū i norü poxūchica i norü guxūcūwawa ya perü iāne. Rū norü churaragü tá pexū inachoeгуāchi, rü guxūcūwawa tá pexcēx ne naxī. ⁴⁴ —Rū tá nagu napogüe ya perü iāne, rü tá pexū nadai. Rū taxucūtáma ya nuta ngextá nügūxētü nanugūxūra i perü iāneārü poeguxūtapūwa. Rū ngēmaācū tá pexū naxūpetü, yerü tama nūxū pecuēxgūchaū ga yexguma Tupana petanūgu naxūānegu —ñanagürü.

Ngechuchu rü tupauca ga taxūnewa inanawoxū ga duūxūgü ga yéma tax-güxū
(Mt 21.12-17; Mr 11.15-19; Cu 2.13-22)

⁴⁵ Rū Ngechuchu rü tupauca ga taxūnewa nangu rü yexma naxūcu. Rū inanaxūgü na inawoxūāxū ga yema duūxūgü ga tupauca ga taxūnewa tax-güxū. ⁴⁶ Rū Ngechuchu rü ñanagürü nūxū: —Tupanaārü ore i ūmatūxūwa rü ñanagürü:

“Chopata rü yumūxēpataū nixī”.
Natürü pema rü ngītēxgūxūpataū peyaxīxēē —ñanagürü. ⁴⁷ Rū guxū ga ngunexūgu rü tupauca ga taxūnewa nayanguxēētae ga Ngechuchu. Natürü ga paigūarü āēxgacūgü, rü ngúexēēruūgü ga Moīchēarü mugūwa nguxēētaegūxū, rü Yerucharéūārü āēxgacūgü, rü naxcēx nadaugü ga ñuxācū tá na yamēxgūāxūcēx. ⁴⁸ Natürü taxucürüwa tacū namaã naxūgü, yerü guxūma ga duūxūgü rü namaã nataāēgü, rü meã inarūxīnūe ga norü ore.

20

Ngechuchuna nacagü na texēarü oregagu tupauca ga taxūnewa nanguxēētaexū
(Mt 21.23-27; Mr 11.27-33)

¹ Wūxi ga ngunexū ga Ngechuchu rü tupauca ga taxūnewa nayexma. Rū nanangūexēē ga duūxūgü, rü namaã nūxū nixu ga Tupanaārü ore. Rū yexguma íyadexayane rü yéma nangugü ga paigūarü āēxgacūgü, rü ngúexēēruūgü ga Moīchēarü mugūwa nguxēētaegūxū, rü Yudíugūarü āēxgacūgüerügü. ² Rū ñanagürügü nūxū: —¡Texēarü mugagu nixī i cunaxūxū

i ngēma núma cuxūxū? ¿Rū texé cuxū tamu na cunaxūxūcēx i ngēma? —ñanagürügü. ³ Rū yexguma ga Ngechuchu rü ñanagürü nüxū: —Choma rü tá ta pexna chaca, rü chanaxwēxe i choxū pengāxūgü. ⁴ —¿Rū texé tanamu ga Cuáú na duūxūgūxū ínabaiūxēēxūcēx? ¿Pexcēx rü Tupana yīixū ga namucü rü éxna duūxūgūmare? —ñanagürü. ⁵ Rū yexguma ga Parichéugü rü inanaxūgüe ga nügümaā na yaporagatanūcūxū. Rū nügümaātama ñanagürügü: —¿Ñuxū ñagūgūxū tá? Erü ngēxguma chi:

“Tupana núma nanamu”, ñagügu, rü núma rü chi ñanagürü tüxū:

“¿Rū tüxçüü ga tama nüxū peyaxōgūxū?” ñanagürü chi tüxū. ⁶ —Rü ngēxguma chi ñagügu:

“Yatügūmare nuā nanamu”, ñagügu, rü guxū i duūxūgü chi nutamaā tüxū ínamuxūchigü, rü tüxū chi nadaí. Erü nūmagü i duūxūgü rü nagu narūxīnūē na Tupana yīixū ga Cuáúxū mucü. ⁷ Rū Ngechuchuxū nangāxūgü rü ñanagürügü: —Tama nüxū tacuēx ga texé núma na namuxū ga Cuáú ga baiūxēēruū —ñanagürügü. ⁸ Rū yexguma ga Ngechuchu rü ñanagürü nüxū: —Choma rü ta tātūta pemaā nüxū chixu na texé choxū muxū na chanaxūxūcēx i ngēma choxna naxcēx peçaxū —ñanagürü.

Ore ga puracūtanūxū ga chixexūgu ixuxū

(Mt 21.33-44; Mr 12.1-11)

⁹ Rū inanaxūgü ga Ngechuchu ga duūxūgümaā na yadexaxū. Rū ñaā ore ga cuēxruūxū namaā nixu, rü ñanagürü: —Nayexma ga wūxi ga yatü ga wūxi ga ubanecü ücü ga norü naānewa. Rū ñuxūchi ñuxre ga puracūtanūxūna nanaxā na nüxna nadaugūxūcēx rü yixcama rü norü yoramaā na yayauxyegüāxūcēx ga yema norü o. Rū ñuxūchi ga guma yatü rü nixū ga yēma rü nuxçüma nataegu. ¹⁰ —Rü yexguma nawa nanguxgu ga na yadauxū ga yema ubagü, rü guma yatü rü yēma puracūtanūxūgūxūtawa nanamu ga wūxi ga norü duūxū na naxcēx íyaçaxūcēx ga yema ubagü ga nüxna üxū. Natürü yema puracūtanūxūgü rü nanaçuaixgü ga guma yatüarü duūxū, rü taxuūma ga uba nüxna naxāgü. Rü yemaācü ínayamugü. ¹¹ —Rü yexguma ga guma yatü rü wenaxārü to ga norü duūxū yēma ta namu. Natürü ga yema puracūtanūxūgü rü chixexū namaā nixugüe, rü nanaçuaixgü, rü taxuūma ga uba nüxna naxāgü. Rü yemaācü ínayamugü. ¹² —Rü wenaxārü to ga norü duūxū yēma ta namu ga guma yatü. Natürü ga yema puracūtanūxūgü rü nanapixēē, rü ínatēxūchigü ga yema naānewa. ¹³ —Rü düxwa ñanagürü ga guma naāneärü yora:

“¿Tacü tá chaxūxū i ñuxmax? Rü name nixī i chaune ya nüxū changechaücü ngema chanamu. Rü ngēxguma nüxū nadaugüga rü bexmana naga tá naxīnūē”, ñanagürü. ¹⁴ —Natürü ga yema puracūtanūxūgü rü yexguma guma yatü nanexū nadaugügu, rü nügümaā ñanagürügü:

“Naāärü tá nixī i ñaā naāne i yixcama. ¡Rü ngīxā tayamēxgü na tórü na yīixūcēx!” ñanagürügü. ¹⁵ —Rü ínatēxūchigü ga yema naānewa, rü nayamēxgü —ñanagürü ga Ngechuchu. Rü yexguma ga Ngechuchu rü duūxūgüna naca, rü ñanagürü: —¿Tacü tá ngēma puracūtanūxūmaā naxū i ngēma naāneärü yora i ñuxmax? ¹⁶ —Rü ngema tá naxū rü tá nanadaí i ngēma puracūtanūxūgü, rü togüna tá nanaxā i norü naāne —ñanagürü ga Ngechuchu. Rü yexguma yemaxū naxīnūēgu ga duūxūgü rü ñanagürügü: —Chierü tama ngēmaācü nangupetūxēēaxgu ya Tupana —ñanagürügü. ¹⁷ Natürü Ngechuchu rü nüxū nadawenü, rü ñanagürü nüxū: —¿Natürü ñuxū ñaxūchiga nixī i ngēma Tupanaärü ore i úmatūxū i ñaxū?:

“Yima nuta ya mecü ya fãrũ üruũgũ nüxũ oechirécü, rü ñuxma rü yimatama nixĩ ya Tupana nüxĩra yaxücuchicü na namaã inaxũgũãxũ ya İpata”, ñaxũ. ¹⁸ Rũ ñanagürü ta ga Ngechuchu: —Texé ya yima nutamaã yarũñaxê, rü tá itapoũgũ. Rũ yixema tũmaetũgu nanguxe ya yima nuta, rü tá tũxũ ñinãixmũ —ñanagürü ga Ngechuchu. ¹⁹ Rũ ga paigüarũ ãëxgacũ rü ngüxëëruũgũ ga Moĩchëarũ mugüwa ngüxëëtaegũxũ, rü yexgumatama Ngechuchuxũ niyaxugüchaũ. Yerü nüxũ nacüëxgũ ga nachiga na yĩxũ ga yema ore ga cuëxruũ ga nüxũ yaxuxũ. Natürü tama nayayaugũ, yerü duũxũgũxũ namuñê.

Ãëxgacũxũ dïërumaã naxütanüxũchiga
(Mt 22.15-22; Mr 12.13-17)

²⁰ Rũ yemacëx ga yema paigüarũ ãëxgacũgũ rü Ngechuchuxũtawa nanamugũ ga ñuxre ga norü duũxũgũ na mexũ i duũxũgürüũ yéma iyanaxĩnũëxüçëx natürü naxcëx na nadaugũxüçëx ga ñuxãcü nachiũñeãrũ ãëxgacũxũtawa Ngechuchuxũ na inaxuaxũgũxüçëx. ²¹ Rũ yemacëx Ngechuchuna nacagũ rü ñanagürügũ: —Pa Ngüxëëruũx, toma nüxũ tacuëx rü aixcũma nixĩ i ngëma nüxũ quixuxũ rü ngëma namaã cungüxëëtaexũ. Rũ tama duũxũãrũ düxëtüxũnegu cudawenü erü nacũma nixĩ i cungugũxũ. Rũ aixcũma cunangüxëë i duũxũgũ na Tupana naxwëxexũãcũma namaxëxüçëx. ²² —Rũ dücax, ngëma ñeãrũ dïëru i ãëxgacũ ya tacü ya Dumacũãx naxwëxexũ na tanaxütanüxũ, ¿rü namexũ yĩxũ na nüxũ tanaxütanüxũ rü ëxna tama? —ñanagürügũ. ²³ Natürü Ngechuchu nüxũ nacüëxama na chixexũgu naxĩnũëxũ ga yema duũxũgũ, rü yemacëx ñanagürü nüxũ: —¿Tüxcüũ i chixexũgu choxũ pengüxëëchaũ? ²⁴ —¿Choxũ ngĩxũ pewé i wüxi i dïëru na ngĩxũ chadauxüçëx! ¿Rũ texëchicünëã rü texéëga ngĩgu üx? —ñanagürü. Rũ nanangãxũgũ rü ñanagürügũ: —Dumacũãx ya ãëxgacũ ya tacüchicünëã nixĩ —ñanagürügũ. ²⁵ Rũ yexguma ga Ngechuchu rü ñanagürü nüxũ: —¿Ãëxgacũna ngĩxũ pexã i ngëma ãëxgacüarũ ixicü, rü Tupanana ngĩxũ pexã i ngëma Tupanaãrũ ixicü! —ñanagürü. ²⁶ Rũ yemaãcü ga Ngechuchu rü woo norü orewa rü taxucürüwama chixexũgu nanangüxëëgũ ga duũxũgũpëxewa, yerü meãma nanangãxũ. Rũ guxũma ga duũxũgũ rü nangeëxgũmare yerü nabaixãchiãëgũ namaã ga yema norü ore.

Chaduchëgũ rü Ngechuchuna nacagüë rü ngoxi wena namaxë i duũxũgũ
(Mt 22.23-33; Mr 12.18-27)

²⁷ Rũ Ngechuchuxũtawa İnayadaugũ ga ñuxre ga Chaduchëgũ. Rũ nümagũ nixĩ ga nagu naxĩnũëxũ na tagutãma wena namaxëxũ i yuexũ. Rũ yemacëx Ngechuchuxũ ñanagürügũ: ²⁸ —Pa Ngüxëëruũx, Moĩchëarũ mugüwa rü ñanagürü: “Ngëxguma wüxi ya yatü naxmëx ngexacüyane nayuxgu, rü name nixĩ i naëneëtama ngĩmaã naxãmëx i ngëma yutecü i naxũmëx, na ngëmaãcü naxãxãcũxüçëx nüxũ ya naëneë ya marü yucü”, ñanagürü ga yema ore. ²⁹ Rũ ñanagürügũ ta ga Chaduchëgũ: —Nayexma ga 7 ga nügüeneë. Rũ naxãmëx ga guma yacü, natürü tauta naxãxãcüyane nayu. ³⁰ —Rũ yexguma naĩ ga naëneë nüxĩ ngĩmaã naxãmëx ga yema ngecü. Rũ guma rü ta nayu, rü nangexacü. ³¹ —Rũ yexguma rü naĩ ga naëneë nüxĩ ngĩmaã naxãmëx. Rũ yemaãcü gucũma ga guma 7 ga nügüeneëgũ rü ngĩmaã naxãmëx ga yema nge. Rũ gucũma nayue tauta naxãxãcüyane. ³² —Rũ ngĩma rü ta düxwa iyu ga yema nge. ³³ Rũ ngëxguma yuexũ wena maxëgu,

¿rū ngecürüücü naxmèx tá iyixī i ngēma nge? Yerū yexguma namaxēgu rū gucüma ga guma 7 ga nügüeneē ngīmaā naxāmèx —ñanagürügü. ³⁴ Rū yexguma ga Ngechuchu rū nanangāxū rū ñanagürü: —Ñoma i naānewa rū yatügü rū nixāmèxgü rū ngexūgü rū nixātegü. ³⁵ —Natürü ngēma duūxūgü i Tupanapēxewa mexū na wena namaxēxū na daxūguxū i naānewa naxīxūcèx rū ngema rū tāūtáma nixāmèxgü rū éxna nixātegü. ³⁶ —Erū ngema rū tagutáma nayue. Rū daxūcūāx i Tupanaārū orearū ngeruūgürū tá nixīgü. Rū aixcüma Tupanacügü nixīgü erū yuwa inarūdagü. ³⁷ —Rū yema ore ga naīxācü ga iyauratanücūxūnechigawa, rū Moīché tūxū nüxū nacuèxēē rū yuexū rū tá wena na namaxēxū. Erū yema orewa, rū ñanagürü ga Cori ga Tupana:

“Choma nixī i Abráúārū Tupana, rū Ichaárū Tupana, rū Acobuarū Tupana”, ñanagürü. ³⁸ —Rū ngēmawa nüxū tacuèx rū woo ñoma i naānewa nayuegu i duūxūgü, natürü Tupanacèx rū guxūguma namaxē —ñanagürü. ³⁹ Rū yexguma ga ñuxre ga ngüexēēruūgü ga Moīchéarū mugüwa ngüxēētaegūxū rū ñanagürügü: —Aixcüma meāma nüxū quixu, Pa Ngüexēēruūx —ñanagürügü. ⁴⁰ Rū yemawena rū marū namuūē ga tacūchigacèx Ngechuchuna na nacagüexū.

¿Texé nane nixī ya Cristu?

(Mt 22.41-46; Mr 12.35-37)

⁴¹ Rū Ngechuchu rū ñanagürü nüxū: —¿Tūxcüü duūxūgü nüxū nixugüe rū Cristu rū nuxcümaūcü ga āēxgacü ga Dabítáa nixī? ⁴²⁻⁴³ —Yerū Dabítáma ñaācü nanaxūmatú ga Wiyægüarū poperawa:

“Tupana rū chorū Cori ya Cristuxū ñanagürü: ‘¡Nuā chorū tügüncüwawa rüto, ñuxmatáta cuxmèxwa chanangēxmagüxēē i curū uwanügü na namaā icucuáxūcèx!’ ”

ñāācü nanaxūmatú. ⁴⁴ Rū ñanagürü ga Ngechuchu: —¿Ñuxücürüwa i Dabítáa yīxū ya Cristu ega nūmatama ga Dabí rū norü Corimaā naxuāgu? —ñanagürü.

Ngechuchu rū nüxū nixu na tama nameārū maxūāxgūxū ga yema ngüexēēruūgü ga Moīchéarū mugüwa ngüxēētaegūxū

(Mt 23.1-36; Mr 12.38-40; Lc 11.37-54)

⁴⁵ Rū guxūma ga duūxūgü rū yéma inarūxīnūē ga yexguma Ngechuchu norü ngüexūgūxū ñaxgu: ⁴⁶ —¡Pexuāēgü naxcèx i ngēma ngüexēēruūgü i Moīchéarū mugüwa ngüxēētaegūxū! Erū nūmagü rū norü me nixī i mexū i naxchirumaā na naxīāneāxū. Rū itamūwa nanaxwèxegü na duūxūgü meā nüxū rümoxēgūxū. Rū ngutaquēxepataūgüwa rū norü me nixī i āēxgacügümèxwèxewa na natogūxū. Rū ñna i taxūwa rū ngēma ñnaārū yoraxūtawa ügūxū i nachicacèx nadaugü. ⁴⁷ —Rū tūxū nawomüxēēgüācüma tūxna nanapuxū ya tūmapatagü ya yīxema yutegüxe. Rū ñuxūchi nanamèxēē i norü yumüxēgü na duūxūgü nagu rüxīnūēxūcèx na aixcüma mexūgü yīīgūxū. Natürü nūmagü tá nixī i yexeraācü napoxcuxēx —ñanagürü.

21

Yuteciuarū āmarechiga

(Mr 12.41-44)

¹ Rū yexguma tupaüca ga taxūnewa nayexmagu ga Ngechuchu, rū yéma nüxū nadau ga ñuxācü duūxūgü ga idiēruāxū Tupanana ngīxū na naxāgūxū ga norü diēru ga tupaücaarū diēruchiūwa. ² Rū ngīxū nadau ta ga wūxi ga

ngecū ga yutecū ga ngearū dīeruāxcū ga tupaucaarū dīeruchiūgu taxretachinū ga íraxūchicū ga dīeru ngīxū íxūcuchicū. ³ Rū ñanagūrū ga Ngechuchu: —Aixcūma pemaā nūxū chixu rū ñaā ngecū i yutecū i ngearū dīeruāxcū rū guxū i togū i dīeru ngīxū íxāgūxūārū yexera ngīxū íxā. ⁴ —Erū guxūma i togū rū ngīxū ínaxā i ngema nūxū íyaxūgūcū. Natūrū ngīma ngīxū natauxyane ngīxū íxā i guxcūma i ngīxū ngexmaxcū i ngīrū ōnatanū —ñanagūrū.

Ngechuchu nanaxunagū na tupauca ya taxūnegu tá napogūexū
(Mt 24.1-2; Mr 13.1-2)

⁵ Rū ñuxre ga norū ngūexūgū rū nidexagū nachiga ga tupauca ga taxūne ga ñuxācū na namexēchixū ga naxtapūx ga nutanaxcēxgū, rū na namexēchixū ga guxūma ga guma tupaucaarū yemaxūgū ga duūxūgū nūxna āmarexū. Rū yexguma ga Ngechuchu rū ñanagūrū: ⁶ —Rū nawa tá nangu i ngunexūgū i guxūnetama ya daa tupauca ya nūxū pedauxūne, rū tá nagu napogūe. Rū naxtapūxarū nutagū rū taxucūtāma nūgūétū naxūūra, rū bai ya wūxi —ñanagūrū.

Cuēxruūgū i tá nūxū idauxū naxūpa na nagūxū i naāne
(Mt 24.3-28; Mr 13.3-23)

⁷ Rū yexguma ga norū ngūexūgū rū Ngechuchuna nacagū, rū ñanagūrūgū: —Pa Ngūexēeruūx, ¿ñuxgu tá nixī i nangupetūxū i ngēma nūxū quixuxū? ¿Rū tacūwa tá nūxū tacuēx na nangupetūxū tá i ngēma? —ñanagūrūgū. ⁸ Rū Ngechuchu rū ñanagūrū: —¡Pexuāēgū tá na taxuūma pexū womūxēēxūcēx! Erū muxūchixū tá chaugu nūgū nicūxgū rū tá ínangugū rū ñanagūrūgū tá:

“Choma nixī i Cristu, rū paxa tá nagux i naāne”, ñanagūrūgū tá pexū. ¡Natūrū tāūtāma nūxū peyaxōgū! ⁹ —Rū ngēxguma tá nūxū pexīnūegu na nūgū nadēixū i wūxi i nachīūāne to i nachīūānemaā, rū ēxna nūxū pexīnūegu na wūxi i nachīūānewatama rū duūxūgū rū norū āēxgacūmaā nūgū nadēixū, ¡rū tāūtāma pebaixāchiāēgū! Erū ngēmaācū tá nangupetū i noxrix. Natūrū tāūtāma naāneārū gux nixī i ngēma. ¹⁰ —Erū wūxi i āēxgacūarū churaragū rū to i āēxgacūarū churaragūmaā tá nūgū nadai. Rū wūxi i nachīūāne rū to i nachīūānemaā tá nūgū nadai. ¹¹ —Rū nūmaxū i nachīūānegūwa rū poraācū tá naxīāxāchiane, rū poraācū tá nangux i taiya, rū tá nataxūchi i daaweane. Rū duūxūgū tá nūxū nadaugū i daxūwa i tacū i namaā nūxūbaixāchiexū, rū taxū i cuēxruūgū. ¹² —Natūrū naxūpa i guxūma i ngēma rū duūxūgū tá pexū ínayauxū, rū tá pewe ningēxūtanū. Rū ngutaquēxepataūgūwa tá pexū nagagū na ngema pexna nacagūxūcēx, rū tá pexū napoxcue. Rū nachīūānegūarū āēxgacūgūpēxewa tá pexū nagagū, naxcēx na chorū duūxūgū pixīgūxū. ¹³ —Rū ngēmaācū tá pexū natauxcha na āēxgacūgūmaā nūxū pixuxū i chauchiga. ¹⁴ —Rū ngēxguma tá ngema pexū nagagūgu, ¡rū tāxū i pexogaāēgūxū naxcēx na tacūmaā tá penangāxūxū na pegūétūwa pechogūxūcēx! ¹⁵ —Erū choma tá pexū charūngūxēē na nūxū pecuāxūcēx na tacūmaā penangāxūxū i perū uwanūgū. Rū nūmagū rū tāūtāma nūxū nacūxgū na tacūmaā pexū nangāxūgūxū i ngēxguma. ¹⁶ —Natūrū pema rū woo penatūgū, rū peegū, rū peeneēgū, rū peeyēgū, rū petanūxūgū, rū pemūcūgū rū tá napeechitaegū na purichīagūxūtawa pexū íyaxuaxūgūxū. Rū purichīagū rū tá pexū nadai i ñuxre i pemax. ¹⁷ —Rū guxū i naānewa rū duūxūgū tá pexchi naxaie, erū choxū peyaxōgū rū chorū duūxūgū pixīgū. ¹⁸ —Natūrū woo tacū pexū ūpetūgu rū Tupanamēxēwa tá pengēxmagū, rū nūma tá pexū ínapoxū rū bai i wūxi i peyae tá ínayarūtaxu. ¹⁹ —Rū ngēxguma aixcūma peyaxōgūmagu rū tama choxū

ípetèxgu, rü tá penayauxgü i maxü i taguma gúxü. ²⁰ —Rü ngèxguma nüxü pedèuxgu na perü uwanügüarü churaragü Yerucharéüxü íchomaèguächixü, rü ngémawa tá nüxü pecuèx na paxa tá nagu napogüexü ya yima íāne. ²¹ —Rü yíxema Yudéaanewa ngèxmagüxe rü name nixí i mëxpúneānewa tabuxmü. Rü yíxema Yerucharéüwa ngèxmagüxe rü tanaxwèxe na paxa ítachoxüxü. Rü yíxema túmaānewa ngèxmagüxe rü tama name na íānecèx tawoegüxü. ²² —Erü ngéma ngunexügügu tá ínangu i Tupanaärü poxcu. Rü ngémaācü tá nayanguxèè i guxüma i ngéma norü ore i ümatüxüwa nüxü yaxuxü. ²³ —Rü ngéma ngunexügügu rü tá poraācü tüxü naguxcha ya yíxema ngexegü ya itacharaügüxe rü yíxema imaíxäcügüxe. Erü tá nangèxma i taxü i ngúxü, rü Tupana rü poraācü tá nanapoxcue i ngéma duüxügü. ²⁴ —Rü ñuxre, rü tá norü uwanügü taramaā nanadaí. Rü togü, rü tá ínanayauxü na to i nachíüānewa nagagüāxcèx. Rü ñuxüchi i ngéma norü uwanügü rü tá nagu napogüe ya yima íāne ya Yerucharéü. Rü ngémaācü tá nangupetü ñuxmatáta nawa nangu na Tupana ínamuxüxü i ngéma.

Tupana Nanearü taeguchiga
(Mt 24.29-35, 42-44; Mr 13.24-37)

²⁵ —Rü ngexguma rü tá nangox i cuèxruüxügü. Rü üèxcü rü tauemacü rü woramacurígü rü tá nixíxächitanü i nachicawa.. Rü guxü i nachíüānegüwa rü duüxügü rü tá nanaxíxächíāñetanü rü tá nabaixächíāñegü namaā na poraācü naxāügaächixü i taxü i taxtü rü norü yuapegü. ²⁶ —Rü duüxügü rü norü muümaā tá inayayíāxè i ngèxguma nüxü nadaugu i ngéma üpetüchaüxü i ñoma i naānewa. Erü woo guxüma i íacü i daxüwa nüxü idauxü rü tá naxíāxächitanü rü tá nu ne nanaxímare. ²⁷ —Rü ngèxguma rü guxü i duüxügü i ñoma i naānecüāx rü tá choxü nadaugu i ngèxguma wüxi i caixanexügu ícharüxíxgu rü núma chaxüxgu namaā i chorü pora rü üüne. ²⁸ —Rü ngèxguma inaxügügu na naxüpetüxü i ngéma pemaā nüxü chixuxü, rü name nixí na petaāégüxü rü meā pedaunagüxü, erü paxa tá íchangu na pexü íchangüxüxèxüxcèx —ñanagürü. ²⁹ Rü yemawena rü wüxi ga ore ga cuèxruüxü namaā nixu ga Ngechuchu, rü ñanagürü: —¡Düxcèx penangügü i iguera, rü éxna ngèxürüüxümare i to i naígü! ³⁰ —Rü ngèxguma nüxü pedèuxgu na ngexwaca naxüátüxü, rü ngémawa nüxü pecuèx na paxa tá taunecü na yíxü. ³¹ —Rü ngèxgumarüü ta i ngèxguma nüxü pedèuxgu na nangupetüxü i ngéma pemaā nüxü chixuxü, rü ngémawa tá nüxü pecuèx na yimama yíxü ya Tupana na äëxgacü yíxüxcèx. ³² —Aixcüma pemaā nüxü chixu rü guxüma i ngéma nüxü chixuxü rü tá ningu naxüpa na nayuxü i duüxügü i ñuxma maxèxü. ³³ —Daxügüxü i naāne rü ñoma i naāne rü tá nagux. Natürü chorü ore rü tagutáma inayarüxo. ³⁴ —¡Pexuāégü na tama íacü rü chixexügügu düxwa nüxü perüxoexü na peyaxögüxü! Rü ngémacèx penaxwèxe na pegüna pedaügüxü na tama pengāxèxü rü éxna ñoma i naāneärü ngüchaüguama na perüxínüèxü. Erü ngürüāchi ngémagu íperüxínüèyane tá pexü íchayabaixgü. ³⁵ —Rü ñoma wüxi ya yüta ya ngürüāchi íacü iyaxünerüü tá nixí naxcèx i guxüma i duüxügü i ñoma i naānecüāx i ngèxguma we-naxärü núma chaxüxgu. ³⁶ —Rü ngémacèx name nixí i pegü ípemexèégü. ¡Rü guxügüma peyumüxégü na ngémaācü tama pexü naxüpetüxüxcèx i ngéma äücümaxügü, rü aixcüma pimexüxcèx i ngèxguma chopèxewa pengügügu! —ñanagürü ga Ngechuchu. ³⁷ Rü guxü ga ngunexügügu rü tupauca ga taxünewa nayexma ga Ngechuchu, rü duüxügüxü nangüxèè.

Rü chütacü rü guma Mèxpúne ga Oríbunecügu ãeganegu nayapeexü. ³⁸ Rü guxüma ga duüxügü rü pèxmamaxüchi tupauca ga taxünewa nangugüxü na Ngechuchuxü naxínüëxüçèx.

22

Ãëxgacügü naxcèx nadaugü na ñuxäcü Ngechuchuxü yayauxgüxü (Mt 26.1-5, 14-16; Mr 14.1-2, 10-11; Cu 11.45-53)

¹ Rü marü ningaica ga Yudíugüarü peta ga Üpetüchiga ga nagu nangõxgüãxü ga pãu ga ngearü puxëeruüãxü. ² Rü ga paigüarü ãëxgacügü rü ngüexëëruüügü ga Moichéarü mugüwa nguxëëtaegüxü rü naxcèx nadaugü ga ñuxäcü duüxügüechita Ngechuchuxü na yamëxgüxü, yerü duüxügüxü namuüë. ³ Rü yexguma ga Chataná rü Yuda ga Icariütegu nangaxi. Rü nüma ga Yuda rü yema 12 ga Ngechuchuarü ngüexügü ga imugüxütanüxüchirëx nixí. ⁴ Rü nüma ga Yuda rü ínayadau natanüwa ga paigüarü ãëxgacügü rü tupauca ga taxüneärü purichíagüarü ãëxgacügü. Rü namaã nüxü nixu ga ñuxäcü na natauxchaxü ga Ngechuchuxü na yayauxgüxüçèx. ⁵ Rü nümagü ga yema ãëxgacügü rü nataãëgü. Rü dïëru Yudana ngíxü naxuaxügü. ⁶ Rü Yuda rü ngixü nayaxu ga yema dïëru. Rü inanaxügü ga naxcèx na nadauxü ga ñuxäcü duüxügüechita Ngechuchuxü na yayauxgüxü ga ãëxgacügü.

Üpetüchigaarü ðnawa nachibü ga Cori (Mt 26.17-29; Mr 14.12-25; Cu 13.21-30; 1 Co 11.23-26)

⁷ Rü nawa nangu ga yema petaarü ngunexü ga nagu nangõxgüãxü ga pãu ga ngearü puxëeruüãxü. Rü yema nixí ga ngunexü ga nagu carneruxacü yamëxgüxü naxcèx ga Üpetüchigaarü peta. ⁸ Rü Ngechuchu nanamu ga Pedru rü Cuáü, rü ñanagürü nüxü: —¡Peyamexëëx i torü ðna i Üpetüchigacèx! — ñanagürü. ⁹ Rü nümagü Ngechuchuxü nangãxügü, rü ñanagürügü: —¿Ngextá nixí i cunaxwëxexü na tanamexëëxü? —ñanagürügü. ¹⁰ Rü Ngechuchu nanangãxü, rü ñanagürü: —Ngëxguma Yerucharëüwa pengugügu rü ngëxma tá nüxü peyangau i wüxi ya yatü i wüxi i tüxü i dexámaaããcuxcú ngíxü ingexü. ¡Rü nawe perüxí ñuxmatáta napatawa pengugü! ¹¹ —¡Rü yima ípata ya nagu yaxücune ya yima yatü, rü yima íarü yoramaã nüxü pixu rü ñapegügü nüxü:

“Torü ngüexëëruü rü nüxü nacuáxchaü na ngëxürüüxü yíixü i ngëma ucapu i norü ngüexügümaa tá nawa nachibüxü i Üpetüchigaarü ðnacèx”, ñapegügü nüxü! ¹² —Rü tá pexü nüxü nadauxëë i wüxi i ucapu i taxü i marü mexëëxü i norü daxüchiüwa ngëxmaxü. ¡Rü ngëmawa tá panamexëë i ngëma ðna i Üpetüchigacèx ixíxü! —ñanagürü nüxü. ¹³ Rü yéma naxí ga nümagü rü nüxü inayangaugü ga guxüma yema Ngechuchu namaã nüxü ixuxürüü. Rü yéma nanamexëëgü ga ðna ga Üpetüchigacèx ixíxü. ¹⁴ Rü yexguma nawa nanguxgu ga ora ga na nachibüexü, rü mechawa narüto ga Ngechuchu namaã ga norü ngüexügü. ¹⁵ Rü yexguma ga Ngechuchu rü ñanagürü: —Ñuxäcü poraäcü choxü nangüchaü na pemaã chachibüxü i ñaã Üpetüchigaarü ðnawa naxüpa na chayuxü. ¹⁶ —Natürü pemaã nüxü chixu rü täütáma wenaxärü Üpetüchigaarü ðnawa chachibü, ñuxmatáta chowa yangu i ngëma Tupana naxwëxexü — ñanagürü. ¹⁷ Rü yexguma nanayaxu ga wüxi ga pochuyu ga binumaããcuxü. Rü Tupanana moxë naxãxïra, rü ñuxüchi ñanagürü nüxü ga norü ngüexügü: —¡Peyaxaxü ya daa binu, rü pegümaaã pengau! ¹⁸ —Erü pemaã nüxü chixu rü tagütáma wena chayaxaxü ya binu ñuxmatáta nawa nangu na pecaduarü

ütanüçèx chayuxü na aixcüma pemaã inacuaüçèx ya Tupana —ñanagürü.
 19 Rû nanayaxu ta ga pãu, rû Tupanana moxê naxcèx naxã. Rû ñuxüchi
 inanabücu, rû norü ngüexügüna nanaxã. Rû ñanagürü nüxü: —Ñaa pãu rû
 chaxune i pexcèx yuxüchiga nixi. ¡Rû ñaãwena rû ñaãcü tá penaxü na choxna
 pecuèxãchiexüçèx! —ñanagürü. 20 Rû marü chibüwena rû to ga pochiyu
 ga binumaã äacuxü norü ngüexügüna naxã, rû ñanagürü: —Daa binu rû
 Tupanaãrü uneta i ngechwacaxüüãrü cuèxruü nixi. Rû chaugü ya pexcèx
 ibacüwa Tupana pexü nüxü nadauxêê na aixcüma yïxü i ngêma norü uneta.
 21 —Natürü ngêma yatü i chauechita äëxgacügüna choxü muxchaüxü, rû nuã
 mechawa tamaã narüto i ñuxmax. 22 —Rû choma i Tupana Nane na duüxüxü
 chiüxü, rû Chaunatu ixunetaxürüü tá chayü. Natürü wüxi i ngechaüxüchi tá
 nixi naxcèx i ngêma yatü i äëxgacügüna choxü muxü. 23 Rû yexguma ga norü
 ngüexügü rû inanaxügüe ga nügüna na nacagüexü, rû ñanagürügü: —¿Texé tá
 tixi ya yixema naëchita äëxgacügüna namuxé? —ñanagürügü.

Norü ngüexügü rû nügüna nacagüe na texé tá tixüxü ya guxãxü rüyexeraxe i natanüwa

24 Rû yexguma ga yema ngüexügü rû nügümaã niporagatanücüü nachiga
 na texé tá tixüxü ya natanüwa guxããrü yexera ixixê. 25 Natürü ga Ngechuchu
 rû ñanagürü nüxü: —Ñoma i naãnewa rû guxü i nachiüãnegüarü äëxgacügü,
 rû poraãcü norü duüxügüxü namugü. Rû ñuxüchi nügü yaxugügu rû
 norü duüxügüarü dauruü i mexügü nixigü. 26 —¡Natürü pema rû täütama
 ngëxgumarüü pixigü! Rû ngëxguma texé naxwëxegu na guxããrü yexera tixü
 i petanüwa, rû name nixi na tügü ítarüxíraxü i guxüma i tümamücügütanüwa.
 Rû texé naxwëxegu na peeru tixü i petanüwa, rû name nixi i noxri rû guxããrü
 ngüxêëruü tixi. 27 —Rû ñoma i naãnewa rû corigü rû mechawa narütogü na
 nachibüexüçèx, rû norü duüxügü nixi i ngêma naxcèx òna ixüxü rû nüxü
 rüngüxêëxü. Natürü tatanüwa rû tama ngêmaãcü nixi, erü choma i perü
 cori na chiüxü rû perü ngüxêëruü chixi. 28 —Rû pemagü nixi ga guxügüma
 chauxütawa peyexmagüxü ga yexguma ngüxü chingexgu. 29 —Rû ngëmacèx
 i choma rû äëxgacügüxü pexü chixigüxêê yema chaunatu äëxgacüxü choxü
 ingucuchixêëxürü. 30 —Rû ngêmaãcü äëxgacü ichixüüwa rû chomaã tá
 pechibüe rû tá pexaxegü. Rû äëxgacüchicawa tá perütogü na norü maxüçèx
 nüxna pecagüxü i guxüma i Yudiügü —ñanagürü.

Ngechuchu nüxü nixu na Pedru tá nügü icüxü na norü ngüexü yïxü
(Mt 26.31-35; Mr 14.27-31; Cu 13.36-38)

31 Rû Pedruxü ñanagürü ta ga Cori ga Ngechuchu: —Pa Pedrux, Chatanaã
 rû pexcèx ínaca na chixexümaã poraãcü pexü naxüxüçèx. 32 —Natürü choma
 rû Chaunatuüxü cuxcèx chacèëxü na taguma nüxü curüxoüçèx na cuyaxöxü.
 Rû ngëmacèx i cumax, Pa Pedru, rû ngëxguma chauxcèx cutaeguxgu, rû
 chanaxwëxe i nüxü curüngüxêê i cumücügü na nümagü rû yaxögüechaãxüçèx
 —ñanagürü. 33 Rû ñanagürü ga Pedru: —Pa Corix, choma rû marü íchamemare
 na wüxigu cumaã na chapoxcuxü rû êxna wüxigu cumaã na chayuxü —
 ñanagürü. 34 Natürü Ngechuchu rû ñanagürü nüxü: —Pa Pedrux, cumaã
 nüxü chixu rû ñomatama i chütaxügu naxüpa na otá içaxü, rû cuma rû
 tomaëxpüxcüna tá nüxü quixu na tama choxü cucuaüxü —ñanagürü.

Marü ningaica ga na guxchaxügü nüxü üpetüxü

35 Rû yexguma ga Ngechuchu rû norü ngüexügüna naca, rû ñanagürü:
 —Yexguma pexü chimugügu ngearü chocaãxgüxemaã rû ngearü

dīeruāxgūxemaã rü ngearü chapatuāxgūxemaã, çrü facü pexü taxuxü ga yexguma? –ñanagürü. Rü nümagü nanangāxüğü rü ñanagürüğü: –Taxuüma –ñanagürüğü. ³⁶ Rü yexguma norü ngüexüğüxü ñanagürü ga Ngechuchu: –Natürü ñuxma rü texé ya petanüwa ya chocaāxë rü tanaxwëxe na ítayangëxü i tümaärü choca rü tümaärü dīeruchixü rü ta. Rü ngëxguma texé ngearü taraāxgu rü tanaxwëxe i namaã tataxe i tümaärü gāuxüchiru na tümaärü poxürüü i taracëx tataxëxëcëx. ³⁷ –Erü pemaã nüxü chixu rü chauchiga nixi i ngëma Tupanaärü ore i ümatüxü i ñaxü:

“Wüxi i máëtaxürüü tá nanapoxcugü rü tá nayamëxgü”, ñaxü. Erü guxüma i ngëma chauchiga ümatüxü i Tupanaärü ore i ümatüxüwa rü aixcüma ngëmaäcü tá ningü –ñanagürü. ³⁸ Rü yexguma ga norü ngüexüğü rü ñanagürüğü: –Pa Corix, nuã nangëxma i taxre i tara –ñanagürüğü. Rü nüma ga Ngechuchu rü nanangāxü rü ñanagürü: –Marü ningü i ngëma –ñanagürü.

Ngechuchu rü Yehemaníwa nayayümüxë
(Mt 26.36-46; Mr 14.32-42)

³⁹ Rü yexguma ga Ngechuchu rü ínaxüxü ga guma íñewa. Rü Oríbunecüarü Mëxpúnëwa naxü, yerü woetama nacüma nixi ga yéma na naxüüxüxü. Rü norü ngüexüğü rü ta nawe narüxí. ⁴⁰ Rü yexguma yema nachicawa nanguxgu, rü norü ngüexüğüxü ñanagürü: –jTupanana naxcëx peça na pexü nangüxëëxëcëx na tama Chatanáärü ügagu chixëxügu peyixüçëx! –ñanagürü. ⁴¹ Rü yexguma ga Ngechuchu rü yéamaxüra 50 ga metruwa norü ngüexüğüna naxü. Rü yexma nacaxāpüxü rü nayümüxë. ⁴² Rü ñanagürü: –Pa Chaunatüx, ngëxguma cuma cunaxwëxegu, jrü nüxna choxü ínanguxuchixëë i ñaã ngüxü i tá choxü üpetüxü! Natürü chanaxwëxe i cunaxü i curü ngüchaü rü tama i choxrü –ñanagürü. ⁴³ Rü yexguma wüxi ga daxüçüāx ga Tupanaärü orearü ngerüü rü naxcëx nangox, rü nanaporaxëë. ⁴⁴ Rü poraäcü nanaxixāchiāë ga Ngechuchu, rü yemacëx yeheraäcü nayümüxë. Rü yema na naxixāchiāëxümaã poraäcü nanaxaiyaachi. Rü guma norü aiyacümaã nichuruxüne. Rü ñoma nagü waixümüñëwa ichuruxürüü nixi ga norü aiyacü. ⁴⁵ Rü yema ínayümüxëxüwa rü inachi ga Ngechuchu, rü norü ngüexüğütanüwa naxü. Rü nüxü inayangau ga na ínapexü yerü norü ngechaümaã düxwa nayaxtae. ⁴⁶ Rü yexguma ga Ngechuchu rü ñanagürü nüxü: –çTüxcüü ípepee? jÍperüdagü rü Tupanana naxcëx peça na pexü nangüxëëxëcëx na tama Chatanáärü ügagu chixëxügu peyixüçëx! –ñanagürü.

Ngechuchuxü niyauxgü
(Mt 26.47-56; Mr 14.43-50; Cu 18.2-11)

⁴⁷ Rü yexguma iyadexayane ga Ngechuchu, rü yéma nangugü ga muxüma ga duüxüğü. Rü Yuda ga Ngechuchuarü ngüexüchirëx ixixü nixi ga naxüpëxëxü. Rü Ngechuchucëx nixü na nüxü nachüxācüma nüxü namoxëxüçëx. ⁴⁸ Rü Ngechuchu rü ñanagürü: –Pa Yudax, çtüxcüü wüxi i chüxumaã cuchauechitae? –ñanagürü. ⁴⁹ Rü yema togü ga Ngechuchuarü ngüexüğü ga naxütawa yexmagüxü, rü yexguma nüxü nadaugügu ga yema ngupetüxü rü ñanagürüğü nüxü: –Pa Corix, çcunaxwëxëxü na taramaã tanadëjxü? –ñanagürüğü. ⁵⁰ Rü wüxi ga Ngechuchuarü ngüexü rü paigüarü āëxgacüarü duüxüxü nanapixëë, rü ínanadae ga norü tügünechinü. ⁵¹ Natürü Ngechuchu rü ñanagürü: –jNgexrüma na pegü namaã pedëjxü! –ñanagürü. Rü yexguma ga Ngechuchu rü yema yatü ga ídaechinüxüxü ningögü,

rü nanamexêê. ⁵² Rü Ngechuchu namaã nidexa ga yema âêxgacügü ga norü yaxwa yéma İxü. Rü yema âêxgacügütanüwa nayexmagü ga paigüarü âêxgacügü, rü tupauca ga taxünearü purichüagüarü âêxgacügü, rü Yudiügüarü âêxgacügüerugü. Rü Ngechuchu rü ñanagürü nüxü: —Tüxcüü taragü rü naİxmenêâgümaã chauxcèx nuã pexi ñoma wüxi i ngîtèxáxü chíxürüü? ⁵³ —Rü guxü ga ngunexügu ga yexguma petanüwa chayexmagu ga tupauca ga taxünewa, rü tama choxü piyauxgü. Natürü marü nawa nangu na pexü natauxchaxü na choxü piyauxgüxü, erü ñoma nixi i ora na naporaxü i Chataná —ñanagürü.

Pedru inayacux na Ngechuchuxü nacuéxü
(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rü Ngechuchuxü niyauxgü, rü paigüarü âêxgacüpatawa nanagagü. Rü Pedru rü nawe narüxü, natürü yaxüguma nüxü nixüchigü. ⁵⁵ Rü yéma paigüarü âêxgacüpataèxtüarü ngäxüwa, rü purichüagü nanaxügü ga wüxi ga üxü. Rü nüxü İnachomaêguãchi. Rü Pedru rü ta yéma natanüwa narüto. ⁵⁶ Rü yexguma yéma üxücutüwa natoxgu ga Pedru, rü wüxi ga ngecü ga âêxgacüarü duüxü nüxü idau. Rü meãma nüxü idawenü, rü ngigürügü: —Ñã yatü rü Ngechuchutanüxü nixi —ngigürügü. ⁵⁷ Natürü Pedru rü tama nüxü nacuéxchaü ga yema ore, rü ñanagürü: —Pa Ngecüx, choma rü tama nüxü chacuèx ya yima Ngechuchu —ñanagürü. ⁵⁸ Natürü yixcamaxüra rü to ga duüxü Pedruxü nadau, rü ñanagürü nüxü: —Cuma rü ta Ngechuchutanüxü quixi —ñanagürü. Natürü Pedru nanangäxü rü ñanagürü: —Tama nixi, Pa Yatüx. Tama natanüxü chixi —ñanagürü. ⁵⁹ Rü wüxi ga ora ngupetüguwena rü to ga duüxü rü nüxü ñanagürüama: —Aixcümáxüchi ñã yatü rü Ngechuchutanüxü nixi, erü Garirèaanecüãx nixi —ñanagürü. ⁶⁰ Rü yexguma ga Pedru rü ñanagürü: —Pa Yatüx, tama nüxü chacuèx na tacüchigaxü quixuxü —ñanagürü. Rü yexgumatama Pedru İdexayane rü nica ga otá. ⁶¹ Rü yexguma ga Cori ga Ngechuchu rü Pedrucèx nügü İnidau. Rü nüma ga Pedru rü nüxna nacuéxãchi ga yema ore ga Cori ga Ngechuchu namaã nüxü ixuxü ga ñaxü:

“Ñomatama i chütaxügu naxüpa na otá içaxü, rü tomaêxpüxcüna taxütáma cugü quixu na chorü duüxü quüxü”, ñaxü. ⁶² Rü yexguma ga Pedru rü İnaxüxü ga yéma. Rü poraãcüxüchi naxaxu.

Ngechuchugu nidaux-cüraügü
(Mt 26.67-68; Mr 14.65)

⁶³ Rü yema yatügü ga Ngechuchuna daugüxü, rü nagu nidauxcüraügü, rü nüxna nanaçuaixcagüxü. ⁶⁴ Rü nayadüxétügü, rü nachiwegu nidagügü, rü ñanagürügü: —Nüxü nacuéx na texé cuxü na idagüxü! —ñanagürügü. ⁶⁵ Rü muxüma ga to ga ore ga chixexü namaã nixügüe.

Âêxgacügü ga tacügüpèxewa nanagagü ga Ngechuchu
(Mt 26.59-66; Mr 14.55-64; Cu 18.19-24)

⁶⁶ Rü yexguma yangunegu rü nangutaquèxegü ga Yudiügüarü âêxgacügüerugü, rü paigüarü âêxgacügü, rü ngüxèèruügü ga Moichéarü mugüwa ngüxèètaegüxü. Rü ñuxüchi norü purichüagüxü namu na napèxewa Ngechuchuxü nagagüxècè. Rü yéma Ngechuchuna nacagü, rü ñanagürügü: ⁶⁷ —Toma rü nüxü tacuéxchaü rü cuma quüxü i Cristu rü èxna tama. ¡Tomaã cugü İxu! —ñanagürügü. Rü Ngechuchu nanangäxü rü ñanagürü: —Ngèxguma chi pemaã nüxü chixuxgu na choma chíxü i Cristu, rü täu chima choxü

peyaõõgü. ⁶⁸ —Rü ngëxguma chi pexna chacaxgu na tacücëx choxna peçaxü, rü tãu chima choxü pengãxüga, rü tãu chima choxü pingëxgü. ⁶⁹ —Natürü ñuxmawena rü choma i Tupana Nane na duñxüxü chüixü rü Chaunatü ya Tupana ya poracüxütawa tá changëxma —ñanagürü. ⁷⁰ Rü yexguma guxüma ga yema äëxgacügü nüxna nacagü, rü ñanagürügü: —¿Ëxna cuma quiixü i Tupana Nane? —ñanagürügü. Rü Ngechuchu nanangãxü, rü ñanagürü: —Ngü. Tupana Nane chixi ngëxgumarüü i pematama nüxü pixuxürüü —ñanagürü. ⁷¹ Rü yexguma nügümaã ñanagürügü ga yema äëxgacügü: —Ñuxma rü marü taxucëxma naxcëx tadau i to i duñxügü i nüxü ixuxü i ñaã yatüchiga. Erü yixematama marü naãxwatama nüxü taxinüë i norü ore na ñuxü ñaxü —ñanagürügü.

23

Piratupëxewa nayexma ga Ngechuchu

(Mt 27.1-2,11-14; Mr 15.1-5; Cu 18.28-38)

¹ Rü guxüma ga yema äëxgacügü rü inachigü, rü äëxgacü ga Dumacüãx ga Piratuxütawa Ngechuchuxü nagagü. ² Rü yéma Piratupëxewa inanaxügüë ga Ngechuchuxü na yaxugüëxü. Rü ñanagürügü: —Ñaã yatü rü nüxü itayangaugü na cumaã nanuëxëëãxü i duñxügü. Rü tomaã nüxü nixu na tama namexü na äëxgacü ya Dumawa ngëxmacüaxü na tanaxütanüxü. Rü nügü nixu na nüma na yixü i torü äëxgacü i Cristu —ñanagürügü. ³ Rü yexguma ga Piratu rü Ngechuchuna naca rü ñanagürü: —¿Cuma quiixü i Yudiugüarü äëxgacü? —ñanagürü. Rü Ngechuchu nanangãxü rü ñanagürü: —Ngëmaãcü, ngëma nüxü quixuxü chixi i chomax —ñanagürü. ⁴ Rü yexguma ga Piratu rü ñanagürü nüxü ga paigüarü äëxgacügü rü togü ga duñxügü: —Chauxcëx rü taxuüma i chixexü naxü i ñaã yatü —ñanagürü. ⁵ Natürü nümagü rü yexeraãcü Ngechuchuxü nixugüëama, rü ñanagürügü: —Nüma rü guxü i Yudëaanewa nanangüexëë i duñxügü na cuxchi naxaieüxëcëx. Rü Garirëaanewa inanaxügü ga yemaãcü na duñxügüxü nangüexëëxü, rü ngëmaãcü nanaxü ñuxmata nüma Yudëaanewa nangu —ñanagürügü.

Erodepëxewa nayexma ga Ngechuchu

⁶ Rü yexguma yemaxü naxinügu ga Piratu, rü duñxügüna naca rü ngoxi Garirëaanecüãx yixi ga Ngechuchu. ⁷ Rü yexguma Piratu nüxü inügu ga aixcüma Garirëaanecüãx na yixü ga Ngechuchu rü Garirëaanearü äëxgacü ga Erodexütawa nanamu, yerü Yerucharéüwa nayexma ga Erode ga yexguma. ⁸ Rü yexguma Ngechuchuxü nadëuxgu ga Erode rü nataãëxüchi. Yerü nuxcümama poraãcü nüxü nadauxchaü, yerü üpaacü nüxü naxinü ga nachiga. Rü ínanangüxëë na Ngechuchuxü nadauxchaüxü na napëxewa naxüãxü ga wüxi ga mexü ga taxü ga Tupanaãrü poramaã naxüxü. ⁹ Rü muëxpüxcüna Ngechuchuna naca ga Erode. Natürü Ngechuchu rü tama nanangãxü. ¹⁰ Rü yéma nayexmagü ta ga paigüarü äëxgacügü rü ngüxëëruügü ga Moichéarü mugüwa ngüxëëtaegüxü. Rü nümagü rü poraãcü Ngechuchuxü inaxuaxügü. ¹¹ Rü yexguma ga Erode rü norü churaragü rü poraãcü chixri Ngechuchumaã nachopetü. Rü nagu nidauxcüraügü. Rü ñuxüchi wüxi ga äëxgacüchirugu nayacüxëëgü na yemaãcü nüxü nacügüexücëx. Rü yemawena Piratuxüta wenaxärü Ngechuchuxü namu ga Erode. ¹² Rü woo üpaacü ga Piratu rü Erodemaã nügüchi na naxaieüxü, natürü yema ngunexügu nixi ga nügümaã nangüxmüëxü.

Piratu rü Ngechuchumaã nanaxuegu na nayuxücêx
(Mt 27.15-26; Mr 15.6-15; Cu 18.39-19.16)

13 Rû yexguma ga Piratu rü nanangutaquêxexêê ga paigüarü âêxgacügü, rü togü ga Yudiügüarü âêxgacügü, rü guxüma ga duüxügü ga yéma yexmagüxü. 14 Rû Piratu ñanagürü nüxü: —Pema nuã chauxcêx penaga i ñãã yatü, rü nüxü pixu na chomaã nanuêxêêxü i duüxügü. Natürü pepêxewa nüxna chaca i ngêmachiga rü ñuxma rü marü nüxü pedau na taxuüma nawa ichayangauxü i ngêma chixexü i naxcêx ípenaxuaxüxü. 15 —Rü Erode rü ta taxuüma nawa inayangau i ngêma chixexü, rü ngêmacêx wenaxârü taxcêx nanamuêgu. Rû dücax, taxuüma i chixexü naxü na ngêmagagu nayuxücêx. 16 —Rü ngêmacêx chorü churaragüxü tá chamu na naçuaixgüãxücêx, rü ñuxüchi tá chayangêx —ñanagürü. 17 Rû nüma ga Piratu rü guxüguma ga yexguma yema petawa nanguüxgu rü duüxügüxü nataâêxêêchaü namaã ga na yangêãxü ga wüxi ga yatü ga poxcuxü. 18 Natürü guxüma ga yema duüxügü rü wüxigu inanaxügüe ga aita na naxüexü. Rû ñanagürügü: —¡Napoxcu i ngêma Ngechuchu! ¡Rü Barabáxü waxi ínanguxuchixêê! —ñanagürügü. 19 Rû yema Barabá rü napoxcu yerü üpaacü Yerucharéüwa âêxgacümaã nananuêxêê ga duüxügü, rü ñuxüchi namáeta. 20 Natürü ga Piratu rü wenaxârü duüxügümaã nidexa, yerü nüma rü Ngechuchuxü ningêxchaü. 21 Natürü ga duüxügü rü yexeraãcü aita naxüe rü ñanagürügü: —¡Curuchawa yapota! ¡Curuchawa yapota! —ñanagürügü. 22 Rû Piratu norü tomaêxpüxcüna duüxügümaã nidexa, rü ñanagürü: —Dücêx, ¿tácü rü chixexü êxna naxü? Choma rü taxuüma i chixexüxü nawa ichayangau na ngêmacêx chanayuxêêxü. Rû chorü churaragüxü tá chamu na naçuaixgüãxücêx, rü ñuxüchi tá chayangêx —ñanagürü. 23 Natürü nümagü ga duüxügü rü yexeraãcü aita naxüeama, rü naxcêx ínacagü na curuchawa yapotaãxücêx. Rû yema na nayexer-agüamaxü ga yema duüxügü rü düxwa ga Piratu rü duüxügüga naxínü. 24 Rû nüma ga Piratu rü norü churaragüxü namu na naxügüãxücêx ga yema duüxügü naxwêxegüxü. 25 Rû Barabáxü ningêx, yerü yema nixí ga duüxügü naxcêx ícagüxü. Rû yema Barabá nixí ga poxcuxü naxcêx na duüxügüxü âêxgacümaã nanuêxêêxü rü namaêtaxü. Rû yexguma ga Piratu rü duüxügüna Ngechuchuxü namu na namaã naxügüãxücêx ga yema nümagü nanaxwêxegüxü.

Ngechuchuxü curuchawa nipotagü
(Mt 27.32-44; Mr 15.21-32; Cu 19.17-27)

26 Rû yema duüxügü rü Ngechuchuxü nigagü na curuchawa yanapotagüãxücêx. Rû yexguma Ngechuchuxü yagagüyane, rü yexma namagu nüxü nangaugü ga wüxi ga yatü ga Chireneçüãxü ga naãnewa ne ücü. Rû Chimáü nixí ga naega. Rû Chimáüxü niyauxgü ga duüxügü, rü naãtügü ngíxü naxünagügü ga curucha na Ngechuchuwe ngíxü nangexücêx. 27 Rû muxüma ga duüxügü rü nawe narüxí. Rû yema duüxügütanüwa nayexmagü ga muxüma ga ngexügü ga auxexü rü aita üexü, yerü Ngechuchucêx nangechaügü. 28 Natürü ga Ngechuchu rü yema ngexügüxü nadawenü, rü ñanagürü nüxü: —Pa Ngeçügüx, Pa Yerucharéüçüãxü ¡tãxü i chauxcêx pexauxexü, natürü pegücêxtama pexauxe rü pexacügücêx! 29 —Erü nawa tá nangu i ngunexügü i nagu ñagüxü tá i duüxügü:

“Tataãêgü ya yíxema ngeãxta ya taxuacüma äxácügüxe, rü taguma tacharaügüxe, rü taguma maíxácügüxe, erü taxucatáma tümaxácügücêx

taxauxe”, ñagüxü. ³⁰—Rü ngëxguma i duüxügü rü tá mēxpúnegüxü nacèèxügü rü ñanagürügü tá:

“¡Toétügu rübuemü!” ñanagürügü tá. Rü tá ngüchitaerugüxü nacèèxügü, rü ñanagürügü tá:

“¡Toxü idüxétügü!” ñanagürügü tá. ³¹—¿Erü ñuxäcü tá namaã nachopetü i ngēma duüxügü i aixcüma chixexü ügüxü, ega ñaã chixexü chomaã naxügügu na woo taxuüma i chixexü chaxüchiréxü? —ñanagürü ga Ngechuchu. ³² Rü yēma nanagagü ta ga taxre ga máētagüxü na Ngechuchurüü curuchawa yanapotagüãxüçèx. ³³ Rü yexguma nawa nangugügu ga yema nachica ga Duüxēeruchinèxägu äegaxü, rü yēma curuchawa Ngechuchuxü nipotagü. Rü yema taxre ga máētagüxü rü ta Ngechuchurüü curuchawa nipotagü, wüxi ga norü tügüncëwawa rü to ga norü toxwecüwawa. ³⁴ Rü yexguma Ngechuchuxü curuchawa íyapotagüyane, rü ñanagürü ga Ngechuchu: —Pa Chaunatüx, ¡ñüxü nangechaü i ñaã duüxügü, erü tama nüxü nacüèxgü na taxü rü chixexü naxüèxü! —ñanagürü. Rü yema churaragü rü nanade ga Ngechuchuchiru. Rü ñüxüchi wüxi ga díeru ngüxü nañanagügü na yemawa nüxü nacüèxgüxüçèx na texéarü tá yüxü ga yema Ngechuchuchiru. ³⁵ Rü duüxügü rü yēma inarüdaunü. Natürü yema Yudiügüarü äëxgacügü rü Ngechuchuxü nacugüe, rü ñanagürügü: —Nüma rü togüxü namaxëxë. ¡ëcü, ñüxma rü nügütama namaxëë ega aixcüma Cristu ya Tupana nüxü unetacü yixügu! —ñanagürügü. ³⁶ Rü yema churaragü rü ta Ngechuchuxü nacugüe. Rü naxütawa naxü, rü nüxma nanaxã ga binu ga üxchiücü. ³⁷ Rü ñanagürügü nüxü: —Ega Yudiügüarü äëxgacü ya tacü quixügu, ¡rü cügütama rüngüxëë i ñüxmax, na ícunguxuchixüçèx! —ñanagürügü. ³⁸ Rü norü curuchatapëxewa nipota ga wüxi ga mürapewaxacü ga äegatachinüxü ga Griëgügügawa rü Dumacüüxgügawa rü Yudiügügawa ümatüxü ga ñaxü: —Daa nixü ya Yudiügüarü Äëxgacü ya Tacüxüchi —ñaxü. ³⁹ Rü wüxi ga yema máētaxü ga naxrüü curuchawa ípotaxü rü Ngechuchumaã naguxchiga, rü ñanagürü: —Ega aixcüma Cristu quixügu, ¡rü cügütama rüngüxëë na ícunguxuchixüçèx, rü toxü rü ta rüngüxëë na ítangüxüçèx! —ñanagürü. ⁴⁰ Natürü ga yema to ga máētaxü rü namücüxü ínangaxüchiamä, rü ñanagürü nüxü: —Cuma rü naxrüü na curuchawa quipotachiréxü, ¿rü ngëxguma rü ta tama Tupanaxü cumüxü? ⁴¹—Yixema rü name nixü na ípoxcuexü erü tagagutama nixü i ngüxü ingegüxü rü ngēma nixü i tóru natanü naxcèx ga yema chixexü ga ixügüxü. Natürü daa yatü rü taxuüma i chixexü naxü —ñanagürü. ⁴² Rü yexguma ga yema máētaxü rü ñanagürü: —Pa Ngechuchux, ¡choxna nacüèxächi i ngëxguma wēnaxärü núma cuxüxgu rü äëxgacüxü ícunguxgu! —ñanagürü. ⁴³ Rü Ngechuchu nanangäxü rü ñanagürü: —Aixcüma cumaã nüxü chixu rü ñomatátama i ngunexügu chomaã cüngëxma i mexëchixü i nañewa —ñanagürü.

Nayu ga Ngechuchu
(Mt 27.45-56; Mr 15.33-41; Cu 19.28-30)

⁴⁴ Rü yexguma tocuchiwa nanguxgu rü guxüwama naxëäne ñüxmata tomaëxpüxarü orawa nangu ga yáuanecü. ⁴⁵ Rü ga üèxcü rü nixu. Rü tupaüca ga taxüñeärü tüyemachiüxü rü ngäxügu narügaute. ⁴⁶ Rü yexguma ga Ngechuchu rü poräcü aita naxü rü ñanagürü: —Pa Chaunatüx, cuxmëxwa chanangëx i chauäë —ñanagürü. Rü yema ñaxguwena rü nayu. ⁴⁷ Rü yexguma yema churaragüarü äëxgacü ga Dumacüüx nüxü dëuxgu ga yema ngupetüxü, rü Tupanaxü nicüèxüü, rü ñanagürü: —Aixcüma ñaã yatü rü

taxuŭma i chixexŭ naxŭ —ñanagŭrŭ. ⁴⁸ Rŭ guxŭma ga yema togŭ ga duŭxŭgŭ ga yema yexmagŭxŭ rŭ nŭxŭ daugŭxŭ ga yema ngupetŭxŭ, rŭ poraãcŭ nangechaŭgŭãcŭma napatacèx nawoegu. ⁴⁹ Natŭrŭ guxŭma ga yema duŭxŭgŭ ga aixcŭma Ngechuchuxŭ cuèxgŭxŭ rŭ yaxŭwa- tama nŭxŭ narŭdaunŭ ga yema ngupetŭxŭ. Rŭ yema duŭxŭgŭtanŭwa ta iyexmagŭ ga yema ngecŭgŭ ga Ngechuchuwe rŭxŭcŭ ga yexguma Gariréanewa ne naxŭxgu.

Ngechuchu rŭ naxmaŭgu nayanaxŭcuchigŭ
(Mt 27.57-61; Mr 15.42-47; Cu 19.38-42)

⁵⁰ Rŭ nayexma ga wŭxi ga yatŭ ga Yudeáanewa yexmane ga ñãne ga Ari-
matéacŭãx, rŭ Yúche nixŭ ga naega. Rŭ nŭma rŭ Yudiŭgŭarŭ ãèxgacŭgŭtanŭwa
naxŭ, natŭrŭ namecŭma rŭ meã namaxŭ. ⁵¹ Rŭ nŭma rŭ poraãcŭ
ínananguxèè na ínanguxŭ ga Tupana na yema ãèxgacŭ yŭixŭcèx. Rŭ yemacèx
tama norŭ me nixŭ ga yema Ngechuchumaã naxŭgŭxŭ ga yema togŭ
ga namŭcŭgŭ ga ãèxgacŭgŭ. ⁵² Rŭ nŭma ga Yúche rŭ Piratuxŭtawa
naxŭ, rŭ Ngechuchuxŭnecèx ínayaca. ⁵³ Rŭ curuchawa nayayaxu ga
Ngechuchuxŭne, rŭ wŭxi ga dŭxruŭmaã nananuque. Rŭ wŭxi ga naxmaŭ
ga nutaarŭ mèxpŭxŭwa yacaxmaŭgŭxŭgu nayanaxŭcuchi. Rŭ yema naxmaŭ
rŭ nayexwacaxŭ, rŭ taguma texéxŭ nagu yaxŭcuchigŭxŭ nixŭ. ⁵⁴ Rŭ yema
nixŭ ga ngunexŭ ga nagu Yudiŭgŭ nŭgŭ imexèègŭxŭ naxcèx ga ngŭxchigaarŭ
ngunexŭ. Rŭ marŭ ningóonechaŭ ga yema ngŭxchigaarŭ ngunexŭ. ⁵⁵ Rŭ
yema ngecŭgŭ ga Ngechuchumaã Gariréanewa ne ícŭ, rŭ Ngechuchuxŭ
iyaxŭcuchigŭxŭwa íyadaugŭ. Rŭ nŭxŭ idaugŭ ga ñuxãcŭ na iyaxŭcuchigŭãxŭ
ga naxŭne. ⁵⁶ Rŭ yexguma ngŭpatawa nangugŭgu, rŭ inamexèègŭ ga pumara
rŭ chixŭ. Rŭ irŭngŭgŭ ga ngŭxchigaarŭ ngunexŭgu, yerŭ yema nixŭ ga
Tupanaarŭ mu.

24

Yuwa ínarŭda ga Ngechuchu
(Mt 28.1-10; Mr 16.1-8; Cu 20.1-10)

¹ Rŭ pèxmamaxŭchi ga yŭxŭarŭ ngunexŭgu, rŭ yema ngecŭgŭ rŭ wenaxârŭ
naxmaŭwa íyadaugŭ. Rŭ yema inangegŭ ga yema pumara ga yamexèègŭxŭ.
Rŭ naŭgŭ ga ngecŭgŭ rŭ ta ngŭxŭ íyaxŭmŭcŭgŭgŭ. ² Rŭ yexguma yema nan-
gugŭgu, rŭ nŭxŭ iyangaugŭ ga marŭ na ínaxŭgachixŭ ga guma nuta ga
naxmaŭarŭ ngŭxtaŭxŭ. ³ Rŭ yexma nagu ichocu, natŭrŭ taxuŭma idaugŭ ga
naxŭne ga Cori ga Ngechuchu. ⁴ Rŭ yema ngecŭgŭ rŭ poraãcŭ íbaixãchiãègŭ,
rŭ tama nŭxŭ icuèxgŭéga ga tacŭ na naxŭgŭxŭ. Rŭ ngŭrŭãchi nŭxŭ idaugŭ
ga taxre ga yatŭgŭ ga ngŭxŭtagu chigŭxŭ ga poraãcŭ iyaurachirutanŭcŭxŭ.
⁵ Rŭ yema ngecŭgŭ rŭ iyarŭmaxãchierugŭ, yerŭ poraãcŭ imuŭè. Rŭ yemacèx
ga yema yatŭgŭ rŭ ñanagŭrŭgŭ ngŭxŭ: —¿Tŭxŭcŭŭ nuxã yuetamaŭgu naxcèx
peyadau ya yima maxŭcŭ? ⁶ —Nataxuma i nuã ya Ngechuchu, erŭ marŭ
wena namaxŭ. ¡Rŭ nŭxna pecuèxãchie ga yema ore ga pemaã nŭxŭ yax-
uxŭ ga yexguma Gariréanewa nayexmagu! ⁷ —Yerŭ pemaã nŭxŭ nixu ga
ñuxãcŭ pecaduãxgŭxŭ tá na yayauxgŭxŭ, rŭ curuchawa na yapotagŭãxŭ,
rŭ ñuxãcŭ tomaèxpŭxŭ i ngunexŭgu tá wena na namaxŭxŭ —ñanagŭrŭgŭ ga
yema yatŭgŭ. ⁸ Rŭ yexguma ga yema ngecŭgŭ rŭ nŭxna icuèxãchie ga yema
Ngechucharŭ ore. ⁹ Rŭ nŭxna iwoegu ga yema naxmaŭ. Rŭ yema 11 ga
Ngechucharŭ ngŭexŭgŭmaã nŭxŭ iyarŭxugŭe ga guxŭma ga yema nŭxŭ

nadaugüxü. Rû guxüma ga togü ga yaxögüxü ga yéma yexmagüxümaã rû ta nüxü iyarüxugüe. ¹⁰ Rû María ga Magadácüãx, rû Cuána, rû María ga Chaütiágu naë, rû naígü ga ngecüü iyixi ga wüxigu yéma Ngechucharü ngüexügüxtawa nangedücü ga yema ore. ¹¹ Natürü yema ngüexügücèx rû ñucamare nixi ga yema ore, rû tama ngixü nayaxögüchaü. ¹² Natürü ga Pedru rû inaãachi, rû ñayadau ga naxmaüwa. Rû yexguma nagu yadaucuchigu ga naxmaü, rû nüxü nadau ga düxruügü ga wüxücüwagu na nanuxü. Rû poraücü nabaixächiaë namaã ga yema ngupetüxü, rû ñaixächiaëcüma napatacèx nataegu.

*Emaüarü namawa nangox ga Ngechuchu
(Mr 16.12-13)*

¹³ Rû yema ngunexügutama rû taxre ga yema Ngechucharü ngüexügü rû wüxi ga ñâne ga Emaüwa naxi. Rû norü yaxü ga guma ñâne rû 11 ga kilómetru nixi nüxna ga Yerucharéü. ¹⁴ Rû yexguma namagu naxiyane, rû nachigagu nidexatanü ga guxüma ga yema ngupetüxü. ¹⁵ Rû yexguma yemachigagu iyadexatanüyane, rû numatama ga Ngechuchu rû ngürüachi naxcèx yéma nixü, rû natanügu nixüchigü. ¹⁶ Natürü yema ngüexügü rû woo Ngechuchuxü nadaugü, rû tama nüxü nacüexgüéga na Ngechuchu yixü, yerü Tupana rû nanatoðégü na tama Ngechuchuxü nacüexgüxüdcèx. ¹⁷ Rû yexguma ga Ngechuchu, rû yema taxre ga ngüexügüna naca, rû ñanagürü: —¿Tacüchiga nixi i pidexatanüxü na nuxã namagu na pexixü? ¿Rü tacücèx nixi i pengechaüxü? —ñanagürü. ¹⁸ Rû wüxi ga yema ngüexü ga Creopágu äegaxü nanangãxü, rû ñanagürü: —Guxüma i düxügü nixi i nüxü cuáxü ga yema yexwaca ngupetüxü ga Yerucharéüwa. Rû cuma na yexma cunaxüãnechiréxü rû maneca cuxicatama nixi i tama nüxü cucuáxü ga yema ngupetüxü —ñanagürü. ¹⁹ Rû yexguma ga nüma ga Ngechuchu rû ñanagürü: —¿Tacü nangupetü ga Yerucharéüwa? —ñanagürü. Rû nanangãxügü ga yema ngüexügü, rû ñanagürügü: —Poraücü chixexü nüxü naxüpetü ga Ngechuchu ga Nacharétüdüãx. Nüma ga Ngechuchu rû Tupanaärü orearü uruü ga mecü nixi. Rû Tupanapëxewa rû düxügüpëxewa namecüma rû nanaxü ga taxü ga cuèxruügü ga Tupanaärü poramaã naxüxü, rû meã düxügüxü nangüexë. ²⁰ —Natürü ga paigüarü äëxgacügü rû törü äëxgacügü rû nayayauxgü. Rû Dumacüãx ga äëxgacügüna nanamugü na curuchawa yapotagüãcüma nayuxëgüãxüdcèx. Rû yemaücü nayamëxgü. ²¹ —Toma nüxü tacüexgu rû nüma tá nixi i tomaã naporaxü na ñanguxuchixüdcèx i tachiüãne nüxna i Dumacüãxärü äëxgacü. Rû ñuxma rû marü tomaëxpüx i ngunexü nawena nixi ga na yamëxgüãxü. ²²⁻²³ —Natürü tama ngëxicatama nixi, yerü ñuxre ga ngexügü ga totanüxü rû toxü ñayabaixgügü. Yerü yema ngexügü rû pëxmamaxüchi ñayadaugü ga naxmaüwa, rû tama nüxü ñayangaugü ga naxüne ga guma Ngechuchu. Rû yemacèx ga yema ngexügü rû toxcèx nawoegu, rû tomaã nüxü nayarüxugüe ga nüxü na nadaugüxü ga Tupanaärü orearü ngeruügü ga daxüdüãx. Rû yema daxüdüãxgü rû namaã nüxü nixugügü ga Ngechuchu rû na namaxüxü —ñanagürügü. ²⁴ Rû yexguma yema ngexügüarü orexü taxüñüëgu, rû ñuxre ga tomücügü rû naxmaüwa ñayadaugü. Rû yema ngexügü nüxü ixügüxürü nüxü ñayangaugü ga naxmaü. Natürü tama Ngechuchuxü nadaugü —ñanagürügü. ²⁵ Rû yexguma ga Ngechuchu rû ñanagürü nüxü: —¿Tüxcüü tama peãeta ipexü i pemax? ¿Rü ñuxgura tá ta ipeyaxögüxü i nuxcümaügüxü ga Tupanaärü orearü uruügüarü ore? ²⁶ ¿Rü tama ëxna nüxü pecüex ga yema ngüxü tá na

yangexũ ga Cristu naxũpa na daxũguxũ i naãnewa naxũũ, na ngema ãẽxgacũ yĩxũcex? —ñanagũrũ. ²⁷ Rũ yexguma inanaxũgũ ga namaã na nangoxẽẽaxũ ga guxũma ga Tupanaãrũ ore ga nachiga ũmatũxũ. Rũ yema Tupanaãrũ ore ga Moĩché ũmatũxũmaã inanaxũgũ. Rũ ñuxũchi namaã nũxũ nixu ga guxũma ga yema Tupanaãrũ ore ga nuxcũmaũgũxũ ga Tupanaãrũ orearũ uruũgũ ũmatũgũxũ. ²⁸ Rũ yexguma yema iãne ga Emaũwa nangugũ, rũ Ngechuchu rũ nũmaxũ toxnamana nũgũ naxũxẽẽneta. ²⁹ Natũrũ ga yema ngũexũgũ rũ nũxũ nacẽexũgũ na yexma naxãũxũcex, rũ ñanagũrũgũ: —¡Nuxma toxũtagu nape, erũ marũ nayáuane, rũ paxa tá nachũta! —ñanagũrũgũ. Rũ yexguma ga Ngechuchu rũ nawe yexma narũxãũx. ³⁰ Rũ yexguma chibũcex wũxiwa mechawa natogũ, rũ Ngechuchu nanayaxu ga pãũ. Rũ Tupanaana moxẽ naxcex naxã. Rũ ñuxũchi inanabũcu, rũ wũxichigũna nanaxã. ³¹ Rũ yexgumatama naãexũ nicuexãchitanũ. Rũ nũxũ nacuexgũ na guma yĩxũ ga Ngechuchu. Natũrũ yexgumatama ngũrũãchi inayarũtaxu ga nũmax. ³² Rũ yema taxre ga ngũexũgũ rũ nũgũmaã ñanagũrũgũ: —¿Tama ẽxna ga itaãẽgũxũ ga tũrũ maxũnewa ga yexguma namawa tamaã yadeaxgu rũ tamaã nangoxẽẽãgu ga Tupanaãrũ ore i ũmatũxũ? —ñanagũrũgũ. ³³ Rũ yexgumatama ga yema taxre ga ngũexũgũ rũ inaxĩãchi ga Yerucharẽcex na nawoegũxũ. Rũ yexma nũxũ nayangau ga na inangutaquẽxegũxũ ga yema 11 ga Ngechucharũ ngũexũgũ rũ togũ ga natanũxũgũ. ³⁴ Rũ yema duũxũgũ ga ingutaquẽxegũxũ rũ ñanagũrũgũ nũxũ: —Aixcũma nixĩ i marũ wena namaxũxũ ya Cori ya Ngechuchu. Rũ Chimãũ ga Pedru rũ marũ nũxũ nadau —ñanagũrũgũ. ³⁵ Rũ yexguma ga yema taxre ga ngũexũgũ rũ ta nũxũ nixugũgũ ga yema nũxũ ngupetũxũ ga namawa, rũ ñuxãcũ nũxũ na yacuẽxãchitanũxũ ga guma na yĩxũ ga Ngechuchu ga yexguma pãũ inabũcũxgu.

*Ngechuchu rũ norũ ngũexũgũcex nangox
(Mt 28.16-20; Mr 16.14-18; Cu 20.19-23)*

³⁶ Rũ yexguma yemaãcũ iyadexagũyane, rũ ngũrũãchi norũ ngãxũtanũgu nachi ga Ngechuchu. Rũ nũxũ narũmoxẽ, rũ ñanagũrũ: —Nuxmaẽ Pa Chorũ Duũxũgũx —ñanagũrũ. ³⁷ Natũrũ nũmagũ rũ naãaixãchiãẽgũ, rũ porããcũ namuũẽ, yerũ nagu naxĩnũẽgu rũ wũxi ga naxchixixũmare nadaugũ. ³⁸ Natũrũ ga Ngechuchu rũ ñanagũrũ nũxũ: —¿Tũxcũũ peãaixãchiãẽgũ rũ tama peyaxõgũ na choma chiĩxũ? ³⁹ —¡Dũcex, nũxũ pedẽux ya choxmẽxgũ rũ chaucutũgũ! Rũ chomatama chixĩ. ¡Rũ choxũ pingõgũ rũ meã choxũ perũdaunũ! Erũ wũxi i naxchixi rũ tama choxũ pedauxũrũũ naxãmachi rũ naxãxchinẽã —ñanagũrũ. ⁴⁰ Rũ yema ñaxguwena, rũ nũxũ nanawẽx ga naxmẽx rũ nacutũ. ⁴¹ Natũrũ ga yema duũxũgũ rũ yexguma rũ ta tama nũxũ nayaxõgũ, yerũ naãaixãchiãẽgũ rũ nataãẽgũ. Rũ yemacex ga Ngechuchu rũ nũxna naca rũ ñanagũrũ nũxũ: —¿Pexũ nangẽxmaxũ i õna i nuã? —ñanagũrũ. ⁴² Rũ yexguma nũxna nanaxãgũ ga wũxi ga choxni ga iguxũchipẽxe rũ wũxiweũ ga berure. ⁴³ Rũ nũma ga Ngechuchu rũ nanayaxu. Rũ yema duũxũgũpẽxewa nanangõx. ⁴⁴ Rũ ñuxũchi ñanagũrũ nũxũ: —Rũ yema choxũ ngupetũxũ rũ yema nixĩ ga pemaã nũxũ chixuxũ ga yexguma tauta chayuxgu rũ petanũwa chayexmagu. Yerũ yexguma rũ pemaã nũxũ chixu rũ ñacharũgũ:

“Rũ tá ningu i guxũma i Tupanaãrũ ore i chauchiga ũmatũxũ i Wiyægũarũ poperawa, rũ Moĩché ũmatũxũ i mugũwa, rũ ore i nuxcũmaũgũxũ ga Tupanaãrũ orearũ uruũgũ ũmatũxũwa”, ñacharũgũchirẽx pexũ. ⁴⁵ Rũ yemaãcũ

namaã nanangoxêê ga Tupanaãrũ ore ga ũmatũxũ. ⁴⁶ Rũ ñanagũrũ nũxũ: — Tupanaãrũ ore i ũmatũxũwa rũ nũxũ nixu rũ choma i Cristu rũ tá chayu, rũ tomaẽxpũx i ngunexũgu rũ tá wena chamaxũ. ⁴⁷ —Rũ yematama ore i ũmatũxũwa nũxũ nixu rũ tá chauégagu tá nixĩ i nũxũ yaxugũxũ i ore i mexũ. Rũ Yerucharéũwa tá inaxũgũ i ngẽma ñũxmatáta guxũ i naãnewa nangu na ngẽmaãcü duũxũgũ nũxũ rũxoexũcẽx i nacũma i chixexũ na Tupana nũxũ nũxũ ngechaũxũcẽx i norũ pecadugũ. ⁴⁸ —Rũ ñũxma rũ pematama nixĩ i chorũ orearũ uruũgũ, rũ tá duũxũgũmaã nũxũ pixu ga yema chauxũtawa nũxũ pedaugũxũ rũ nũxũ pexĩnũẽxũ. ⁴⁹ —Rũ dũcax, choma rũ pexcẽx tá núma chanamu i Naãẽ i Ũñexũ ga pexcẽx nũxũ naxunetaxũ ya Chaunatu. Natũrũ chanaxwẽxe i númatátama daa iãne ya Yerucharéũwa pengẽxmagũ, ñũxmatáta penayauxgũ i ngẽma Tupanaãẽ i Ũñexũ i daxũwa ne ũxũ i tá pexũ poraexẽẽxũ —ñanagũrũ.

Ngechuchu rũ daxũguxũ ga naãnewa naxũ

(Mr 16.19-20)

⁵⁰ Rũ yexguma ga Ngechuchu rũ Yerucharéũãrũ toxnamana norũ ngũexũgũxũ nagagũ, ñũxmata Betániããrũ ngaicamana nangugũ. Rũ yéma norũ ngũexũgũétũ nawémẽx, rũ Tupanana naxcẽx naca na nũxũ nangũxẽẽxũcẽx. ⁵¹ Rũ yexguma yema ngũexũgũcẽx nayumũxẽguwena rũ nũxna nixũgachi. Rũ Tupana daxũguxũ ga naãnewa nanaga. ⁵² Rũ nũmagũ ga norũ ngũexũgũ rũ Ngechuchuxũ nicuẽxũũgũ. Rũ ñũxũchi taãẽãcũma Yerucharéũcẽx nawoegu. ⁵³ Rũ guxũguma tupauca ga taxũnewa naxĩĩxũ, rũ yéma Tupanaxũ nicuẽxũũgũ. Rũ ngẽmaãcü yĩ.

ORE I MEXŪ GA CUÁŪ ŪMATŪXŪ

Tupana Nane rü duŭxŭācŭ nangox

¹ Naxŭpa ga guxŭma, rü marŭ nayexma ga Tupana Nane. Rü Tupanamaā nayexma rü woetama Tupana nixŭ ga nŭmax. Nŭma rü Tupanaārŭ Ore nixŭ i naega erŭ tamaā nŭxŭ nixu i Tupanachiga. ² Rü naxŭpa ga guxŭma rü nŭma ga Tupana Nane rü naxŭtawatama nayexma. ³ Rü guma Nanexŭ nixŭ ga namuxŭ ga Tupana na naxŭāxŭcèx ga guxŭma. Rü nataxuma i ŭacŭ i űuxma ngèxmaxŭ i tama nŭma naxŭxŭ. ⁴ Rü Nanewa nixŭ i nangexmaxŭ i maxŭ. Rü ngema maxŭ rü guxŭ i duŭxŭgŭarŭ ngóonexèèruŭ nixŭ. ⁵ Rü yima Nane rü woo chixexŭ íporaxŭwa rü duŭxŭgŭxŭ nŭxŭ nacuèxèè i Tupanachiga. Rü ngèma chixexŭ rü taxucŭ-rŭwama ngèma mexŭxŭ narŭyexera. ⁶⁻⁷ Rü nayexma ga wŭxi ga yatŭ ga Cuáŭ ga baiŭxèèruŭgu āegacŭ. Rü guma nixŭ ga Tupana nŭma namucŭ na nŭxŭ yaxuxŭcèx ga nachiga ga guma ngóonexèèruŭ na yemaācŭ guxāma nŭxŭ yaxŭgŭxŭcèx. ⁸ Rü nŭma ga Cuáŭ rü tama Tupana Nane ya duŭxŭgŭarŭ ngóonexèèruŭ nixŭ. Natŭrŭ nŭma nixŭ ga Tupana nŭma namuxŭ na nŭxŭ yaxuxŭcèx ga nachiga ga guma ngóonexèèruŭ. ⁹ Rü űoma ga naānewa nangu ya yima aixcŭma Tupana Nane ixŭcŭ i guxŭma i duŭxŭgŭxŭ ngóonetanŭxèècŭ. ¹⁰ Rü nŭma ga guma Nane ga Tupanaārŭ Ore ixŭcŭ rü űoma ga naānewa nayexma. Rü woo nagagu nixŭ ga naxŭāxŭ ga guxŭma ga űoma ga naāne, natŭrŭ űoma ga naāne-cŭāx ga duŭxŭgŭ rü tama nŭxŭ nacuèxgŭ na texe yŭxŭ. ¹¹ Nuā norŭ naānewatama nangu, natŭrŭ norŭ duŭxŭgŭ ga Yudŭgŭ rü tama nanayauxgŭ. ¹² Natŭrŭ guxema nayauxgŭxe rü nŭxŭ yaxŭgŭxe rü tŭxŭ nanatauxchaxèè na Tupanaxācŭgŭ tixŭgŭxŭ. ¹³ Rü űuxma rü Tupanaxācŭgŭ tixŭgŭ ga guxema yaxŭgŭxe. Natŭrŭ tama noxri tabuxŭgagu nixŭ i ngèma rü tama tŭmanatŭgŭarŭ ngŭchaŭgagu nixŭ. Natŭrŭ i űuxma rü Tupanaxācŭgŭ tixŭgŭ ga guxema yaxŭgŭxe yerŭ nŭmatama ga Tupana rü naxācŭgŭxŭ tŭxŭ nixŭgŭxèè. ¹⁴ Rü nŭma ya yima Nane ya Tupanaārŭ ore ixŭcŭ rü duŭxŭācŭ nangox. Rü totanŭwa nayexma rü poraācŭ toxŭ nangechaŭ rü aixcŭma nixŭ ga norŭ ore. Rü toma nŭxŭ tadaugŭ ga űuxācŭ na naxŭūnexŭ. Rü Nanatŭxŭtawā nanayaxu ga yema ŭūne yerŭ nŭgŭmaā nŭxŭ nawŭxicèx ga nŭma. ¹⁵ Rü gumachigaxŭ nixŭ ga yaxuxŭ ga Cuáŭ ga yexguma űaxgu: —Daa nixŭ ga guma pemaā nŭxŭ chixuchigacŭ ga yexguma űachaxgu:

“Rü yima choweama ne ŭcŭ rü choxŭ rŭyexeracŭ nixŭ, yerŭ woetama marŭ nayexma ga tauta chabuxgu ga chomax”, űanagŭrŭ ga Cuáŭ. ¹⁶ Rü yima Tupana Nane rü namecŭmaxŭchi rü naxmèxwa nangèxma i guxŭma. Rü naxŭtawā nixŭ i nayauxgŭxŭ i guxŭma i ngŭxèègŭ. ¹⁷ Rü Moŭchéxŭ nixŭ ga namuxŭ ga Tupana na tŭxŭ nangŭxèèxŭcèx ga yema norŭ mugŭ. Natŭrŭ Ngechuchu ya Cristuxŭ nixŭ ga namuxŭ na tŭxŭ nangŭxèèxŭcèx na yigŭ ingechaŭgŭxŭ rü nagu imaxèxŭcèx i ore i aixcŭma ixŭxŭ. ¹⁸ Taguma texé űuxgu nŭxŭ tadau ga Tupana. Natŭrŭ Nane ya nŭgŭmaā nŭxŭ wŭxicacŭ nixŭ ya tŭxŭ nŭxŭ cuèxèècŭ. Rü yima Nane rü Tupanaxŭchi nixŭ, rü Nanatŭmaā wŭxiwa nangèxmagŭ.

*Cuáŭ ga baiŭxèèruŭ rü nŭxŭ nixu ga Ngechuchu ya Cristuchiga
(Mt 3.11-12; Mr 1.7-8; Lc 3.15-17)*

19 Rũ yema Yudiũgũarũ ãẽxgacũgũ ga Yerucharẽũcũãx rũ Cuáũ ga baiũxẽerũxũtawã nanamugũ ga paigũ rũ Lebítãnũxũgũ na nũxna yacagũexũcẽx na texe yĩxũ. 20 Rũ nũma ga Cuáũ rũ meãma nũgũ nĩxu, rũ ñanagũrũ: —Tama nĩxĩ i Cristu chĩxũ i chomax —ñanagũrũ. 21 Rũ wenaxãrũ nũxna nacagũ rũ ñanagũrũgũ: —¿Texẽ ãxna quixĩ? ¿Ãxna cuma ga nuxcũmaũcũ ga Tupanaãrũ orearũ uruũ ga Ería quĩxũ? —ñanagũrũgũ. Rũ Cuáũ nanangãxũ rũ ñanagũrũ: —Tama Ería chixĩ —ñanagũrũ. Rũ nũmagũ rũ wenaxãrũ nũxna nacagũe rũ ñanagũrũgũ: —¿Ãxna cuma quĩxũ ya yima orearũ uruũ ga Moĩchẽ nũxũ ixucũ ga ñnguxchaũcũ? —ñanagũrũgũ. Rũ Cuáũ nanangãxũ rũ ñanagũrũ: —Tama yima chixĩ —ñanagũrũ. 22 Rũ yexguma ñanagũrũgũama: —¿Ãxna texẽ quĩxũ? Erũ tanaxwẽxe i ngẽma nũma toxũ mugũxũxũtawã tanange i curũ ngãxũga. ¿Rũ ñuxũ ñacuxũ i ñuxma na texẽ quĩxũ? —ñanagũrũgũ. 23 Rũ Cuáũ nanangãxũ rũ ñanagũrũ nũxũ: —Choma nĩxĩ i ngẽma duũxũ i dauxchitawã i ngextã taxũema íxãpataxũwã tagaãcũ ñachaxũ:

“iRũ nũxũ perũxoe i pecũma i chixexũ rũ ipeyanawẽxãchixẽẽx i perũ maxũ naxcẽx ya Cori ya Tupana!” ñachaxũ, guma nuxcũmaũcũ ga orearũ uruũ ga Ichaxía nũxũ ixuxũrũ —ñanagũrũ. 24-25 Rũ yexguma ga yema paigũ rũ Parichẽgũ yẽma mugũxũ ga Cuáũmaã na yanadexagũxũcẽx rũ wenaxãrũ nũxna nacagũe, rũ ñanagũrũgũ: —Rũ ngẽxguma tama Cristu quixĩgu, rũ tama Ería quixĩgu, rũ tama yima orearũ uruũ ya ñnguxchaũcũ quixĩgu, ¿rũ tũxcũũ i duũxũgũxũ ícubaiũxẽẽxũ i ñuxmax? —ñanagũrũgũ nũxũ. 26-27 Rũ Cuáũ nanangãxũ rũ ñanagũrũ: —Choma rũ dexãwamare íchanabaiũxẽẽ i duũxũgũ. Natũrũ petanũwã nangẽxma ya yima tama nũxũ pecuãcũ ya choweama ne ũcũ. Rũ choma rũ napẽxewa rũ taxuwama chame, rũ bai i norũ chapatucunũgũarũ wẽgũwã chame —ñanagũrũ ga Cuáũ. 28 Rũ yema nachica ga Betãniãgu ãegaxũwã nĩxĩ ga Cuáũ ga nũxũ yaxuxũ ga yema ore. Rũ natũ ga Yudaũãrũ tocutũwã nĩxĩ ga yema nachica ga ngextã Cuáũ duũxũgũxũ íbaiũxẽẽxũwã.

Ngechuchu nĩxĩ ga Tupana nũma namucũ na duũxũgũarũ pecaducẽx nayuxũcẽx

29 Rũ moxũãcũ ga Cuáũ rũ Ngechuchuxũ nadau ga naxcẽx na yaxũxũ. Rũ ñanagũrũ ga Cuáũ: —iRũ dũcax! Daa nĩxĩ ya yima Tupana nũma namucũ na nayuxũcẽx na ñoma i naãneçũãx i duũxũgũarũ pecaduxũ iyanaxoxẽẽxũcẽx. 30 —Rũ choma rũ daa Ngechuchuchigaxũ nĩxĩ ga chixuxũ ga yexguma ñachagu:

“Rũ choweama ne naxũ ya wũxi ya chorũ yexeracũ, yerũ nũma rũ woetama nayexma ga tauta chabuxgu ga chomax”, ñachagu. 31 —Rũ chomatama ga noxri rũ tama nũxũ chacuẽx ga texe na yĩxũ ga nũmax. Natũrũ nũma chaxũ na dexãwamare duũxũgũxũ íchibaiũxẽẽtanũxũcẽx na tatanũxũ i Yudiũgũ nũxũ cuẽxgũxũcẽx na texẽ yĩxũ —ñanagũrũ. 32 Rũ ñanagũrũ ta ga Cuáũ: —Rũ chomatama nũxũ chadau ga Tupanaãẽ ga ũnẽxũ ga yexguma wũxi ga muxtucurũũ daxũwã ñnaxexeegu rũ Ngechuchuxũnẽgu yanawẽxgux. 33 —Choma rũ noxri tama nũxũ chacuẽx ga texe na yĩxũ ga nũmax. Natũrũ ga Tupana ga choxũ mucũ na dexãwamare duũxũgũxũ íchabaiũxẽẽxũcẽx, rũ ñanagũrũ choxũ:

“Rü yima nüxũ cudadũcũ ya chauãẽ i Üünexũ naetũgu íruxexecũ, rü yima tá nixĩ ya chauãẽ i Üünexũ duũxũgũna nguxẽẽcũ”, ñanagürũ choxũ. ³⁴ – Choma rü marũ yima Ngechuchuxũ chadau rü pemaã nüxũ chixu na nüma rü aixcũma Tupana Nane yĩxũ –ñanagürũ.

Nüxĩraũxũ ga norũ ngüexũgũ ga Ngechuchu

³⁵ Moxũãcũ rü wenaxãrũ Cuãũmaã yema nachicawa tayexmagũ ga toma ga taxre ga norũ ngüexũgũ. ³⁶ Rü yexguma Ngechuchuxũ nadẽuxgu ga yéma na naxũpetũxũ, rü Cuãũ rü ñanagürũ toxũ: –jDücè! Yima nixĩ ya Tupana nüma namucũ na pecaducèx nayuxũcèx –ñanagürũ. ³⁷ Rü toma ga Cuãũãrũ ngüexũgũ rü nüxũ taxĩnũe ga yexguma yema ñaxgu. Rü Ngechuchuwe tarũxĩ. ³⁸ Rü nügũ ínidau ga Ngechuchu, rü toxũ nadau ga nawe na tarũxĩxũ. Rü toxna naca rü ñanagürũ toxũ: –jTacũcèx pedau? –ñanagürũ. Rü tomagũ rü ñatarũgũgũ: –Pa Ngüexẽẽruũx, jngexta nixĩ i cupexũ? –ñatarũgũgũ. ³⁹ Rü Ngechuchu toxũ nangãxũ, rü ñanagürũ toxũ: –jNuã chowe perũxĩ rü ípayadẽux! –ñanagürũ. Rü nawe tarũxĩ, rü nüxũ tadaugũ ga na ngexta napexũ. Rü yexguma yéma tangugũ, rü marũ ãgũmũcũarũ orawa nangu ga na nayáuanexũ. Rü yexma naxũtagu tarũcho rü ñuxmata nachũta. ⁴⁰ Rü choma chixĩ ga noxri Cuãũ ga baiũxẽẽruũxũ chaxĩnũxũ ga yixcama Ngechuchuwe charũxũxũ. Rü chomũcũ rü Aũdré nixĩ. Rü nüma rü Pedru ga Chimáũneẽ nixĩ. ⁴¹ Rü yexgumatama ga Aũdré, rü naẽneẽ ga Chimáũcèx nayadau. Rü ñanagürũ nüxũ: –Rü marũ nüxũ itayangau ya yima Cristu ga nuxcũma Tupana nüxũ unetacũ –ñanagürũ. ⁴² Rü yemawena, rü Ngechuchu íyexmaxũwa Chimáũxũ naga ga Aũdré. Rü yexguma Ngechuchu Chimáũxũ dẽuxgu, rü ñanagürũ nüxũ: –Cuma nixĩ i Chimáũ i Cuãũ nane quiĩxũ. Natürũ i ñuxmawena rü Nuta tá nixĩ i cuẽga –ñanagürũ. Rü ngẽma naega rü Pedru ñaxũchiga nixĩ.

Ngechuchu rü naxcèx naca ga Piripi rü Natanae

⁴³ Rü moxũãcũ ga Ngechuchu rü nügũ namexẽẽ na Gariréaanewa naxũxũcèx. Rü Piripixũ inayangau rü ñanagürũ nüxũ: –jChowe rũxũ! –ñanagürũ. ⁴⁴ Rü nüma ga Piripi rü íane ga Bechaĩdacũãx nixĩ. Rü yemacũãx ta nixĩ ga Aũdré rü Pedru. ⁴⁵ Rü Piripi rü Natanaecèx nayadau, rü ñanagürũ nüxũ: –Marũ nüxũ itayangau ya yima Cristu ga Moĩché nachiga naxũmatũcũ ga mugũarũ poperawa, rü nuxcũmaũgũxũ ga Tupanaãrũ orearũ uruũgũ ta nachiga naxũmatũgũcũ. Yima nixĩ ya Yũche nane ya Ngechuchu ya Nacharétucũãx –ñanagürũ. ⁴⁶ Rü ñanagürũ ga Natanae: –jÑuxãcũ i tacũ rü mexũ i Nacharétuwa ne naxũxũ? –ñanagürũ. Rü Piripi nanangãxũ, rü ñanagürũ nüxũ: –jDücèx, ngĩxã rü itayadau! –ñanagürũ. ⁴⁷ Rü yexguma Ngechuchu Natanaexũ dẽuxgu ga naxcèx na yaxũxũ, rü ñanagürũ: –jDücè! Yéa ne naxũ i wũxi i yatũ i aixcũma Yudíu ixĩxũ i aixcũma ngearũ chixexũãxũ –ñanagürũ. ⁴⁸ Rü yexguma ga Natanae rü Ngechuchuna naca, rü ñanagürũ nüxũ: –jÑuxãcũ i choxũ cucuáxũ? –ñanagürũ. Rü Ngechuchu nanangãxũ rü ñanagürũ nüxũ: –Naxũpa ga Piripi cuxcèx na yaxãxũ, rü choma rü cuxũ chadau ga yexguma orĩx ga igueratũũgu curũxãũxgux –ñanagürũ. ⁴⁹ Rü Natanae nanangãxũ rü ñanagürũ nüxũ: –Pa Ngüexẽẽruũx, cuma rü Tupana Nane quiĩx. Rü cuma nixĩ i guxũma i Yudiugũarũ ãxgacũ quiĩxũ –ñanagürũ. ⁵⁰ Rü Ngechuchu nanangãxũ, rü ñanagürũ nüxũ: –Cuma rü choxũ cuyaxõ erũ cumaã nüxũ chixu na igueratũũwa cuxũ na chadauxũ. Rü ngẽmacèxicatama nixĩ i cuyaxõxũ. Natürũ ngẽma ñuxma nüxũ cudadũãrũ

yexera tá nixī i nūxū cudauxū i yixcūra —ñanagürü. ⁵¹ Rū ñanagürü ta ga Ngechuchu: —Rū aixcūma pemaã nūxū chixu rü tá nūxū pedaugū na yawāxnaxū i daxūguxū i naāne. Rū tá nūxū pedaugū i Tupanaärü orearü ngeruūgū i daxūcūñax i ngema daxū īgūxū rü īrūxīgūxū i naetūwa ya Tupana Nane ya duūxūxū ixīcū —ñanagürü.

2

Ngīarū peta ga iāne ga Canáwa ūxū ga Gariréaanewa

¹ Rū yexguma marū tomaēxpūx ga ngunexū Gariréaanearū īane ga Canáwa nayexmagu ga Ngechuchu, rü nayexma ga wūxi ga ngīarū peta. Rū yemawa ngixna naxugū ga naē ga Ngechuchu. ² Rū Ngechuchuna rü toxna rü ta naxugūe na yéma taxīxūcēx. ³ Rū nagux ga norū axexū ga binu. Rū Ngechuchu naē ngīgürügū nūxū ga Ngechuchu: —Marū naguarū binuāxgū —ngīgürügū. ⁴ Natürü Ngechuchu ngīxū nangāxū, rü ñanagürü: —Pa Mamax, žtūxcūl chomaã nūxū quixu i ngēma? Erū tauta nawa nangu na chanaxūxūcēx i žacū rü mexū i Tupanaärü poramaã ūxū —ñanagürü. ⁵ Natürü ga ngīma ga naē rü ngīgürügū nūxū ga yema baegūxū namaã ga binuchiū: —jPenaxūx i guxūma i ngēma nūma pemaã nūxū yaxuxū! —ngīgürügū. ⁶ Rū yéma iyexma ga 6 ga tūxū ga nutagūngīxcēx. Rū wūxichigū ga yema tūxūwa rü maneca yexma name ga 50 rü ēxna 70 litrugū ga dexá. Rū yema tūxūgū iyixī ga yema Yudiūgū ngīxū ixūgūācugūcū ga yexguma dexámaã nūgū yayauxmēxgūchaūgu na Tupanacēx nūgū yamexēēgūxūcēx. ⁷ Rū Ngechuchu rü yema baegūxūxū namu, rü ñanagürü: —jDexámaã ngīxū pixūgūācu i ñaã tūxūgū! —ñanagürü. Rū nūmagū ga yema baegūxū rü meāma ngīxū nixūgūācu. ⁸ Rū Ngechuchu ñanagürü nūxū: —Rū ñuxma chanaxwēxe i iraxū peyau, rü petaarū yoraxūtawa penange —ñanagürü. Rū yemaācū nanaxūgū ga yema baegūxū. ⁹ Rū yema petaarū yora nūxū naxaxneta ga yema dexá ga binuxū nacēxichixū. Natürü tama nūxū nacūxē ga ngextá na nayauxgūāxū. Rū yema baegūxūxūcatama nixī ga nūxū cuēxgūxū ga dexámare na yīxū ga noxrix. Rū yexgumatama ga yema petaarū yora rü yema yatū ga ingīxūcēx naca. ¹⁰ Rū ñanagürü nūxū: —Guxū i naānewa rü duūxūgū rü noxri rü namaã nabae ya mecū ya binu. Rū ngēxguma marū meāma guxūma axegūga i ngēma nūxna naxuxū, rü ngēmawena rü nūxna nanaxā ya ngexcürūcūmare ya binu. Natürü i cuma rü marū nagūxchaūgu i peta, rü mexēchicū ya binumaātama cuyaxaxegūxēē i duūxūgū —ñanagürü. ¹¹ Rū guma Gariréaanewa yexmane ga iāne ga Canáwa nixī ga yema naxūxū ga Ngechuchu. Rū yema nixī ga nūxīraūxū ga cuēxruū ga Tupanaärü poramaã ūxū ga nawa nūgū inawēxū ga Tupana Nane na yīxū. Rū toma ga norū ngūexūgū rü nūxū tayaxōgū. ¹² Rū yemawena rü Capernáu ga iānewa naxū ga Ngechuchu. Rū naē rü naēneēgū rü toma ga norū ngūexūgū rü ta itayaxūmūcūgū. Rū yéma guma iānewa tayexmagū ga ñuxre ga ngunexū.

Ngechuchu rü tupauca ga taxūnewa ínanawoxil ga yema duūxūgū ga yéma taxegūxū

(Mt 21.12-13; Mr 11.15-18; Lc 19.45-46)

¹³ Rū toma ga Yudiūgū rü marū ningaica ga torū peta ga Ūpetūchiga. Rū yemacēx ga Ngechuchu rü Yerucharēūwa naxū. ¹⁴ Rū yexma tupauca ga taxūnegu nūxū nayangau ga duūxūgū ga yéma norū wocagūmaã rü carnerugūmaã rü muxtucugūmaã taxegūxū. Rū yéma nūxū nadau ta ga duūxūgū ga norū taxechicawa rūtogūxū rü Tupanaarū āmarewa mexū ga

dĭerumaã yéma taxegũxũ. ¹⁵ Rũ yexguma yemaxũ nadèuxgu ga Ngechuchu, rũ nanaxũ ga wũxi ga c̣uaixruũ ga naxchèxm̄naxcèx. Rũ yemamaã tupauca ga taxũnewa ínanawoxũ ga yema duũxũgũ guxũma ga norũ carnerugũmaã rũ wocagũmaã. Rũ yema dĭerucèx taxegũxũãrũ dĭeru rũ ngĩxũ narũwoũ ñaxtũanegu. Rũ norũ mechagũ rũ ta nũxũ nawoneta. ¹⁶ Rũ yema muxtucugũmaã taxegũxũxũ ñanagũrũ: —Ípeyana i ngẽma perũ muxtucugũ i nuã! Tama name i taxepataũxũ peyaxĩxèè ya daa Chaunatũpata —ñanagũrũ. ¹⁷ Rũ yexguma ga toma ga norũ ngũexũgũ rũ nũxna tacuèxãchie ga nuxcũmaũxũ ga ũmatũxũ ga ñaxũ:

“Duũxũgũ rũ tá chauxchi naxaie erũ chanachuxu i tacũ i chixexũ na naxũgũxũ i Tupanapatawa”,

ñaxũ. ¹⁸ Rũ yexguma ga yema ãèxgacũgũ rũ Ngechuchuna nacagũ, rũ ñanagũrũgũ: —¿Tacũ rũ cuèxruũxũ toxũ cudaduxèè na nawa nũxũ tacuãxũcèx na aixcũma Tupana yĩxũ ya cuxũ mucũ na ícunawoxũxũcèx i ñaã duũxũgũ i nuã? —ñanagũrũgũ. ¹⁹ Rũ Ngechuchu nanangãxũ, rũ ñanagũrũ: —¿Nagu pepogũe ya daa tupauca ya taxũne! Rũ choma rũ tomaèxpũx i ngunexũgu rũ tá wena íchanadaxèè —ñanagũrũ. ²⁰ Rũ yexguma ga yema ãèxgacũgũ rũ nanangãxũgũ, rũ ñanagũrũgũ: —Rũ 46 ga taunecũ nawa napuracũe ga duũxũgũ na naxũgũãxũcèx ga daa tupauca ya taxũne. ¿Rũ ñuxãcũ tá i cuma i tomaèxpũx i ngunexũ tátama wena ícunadaxèèxũ? —ñanagũrũgũ. ²¹ Natũrũ guma Tupanapata ga Ngechuchu nachiga idexane rũ naxũnechigatama nixĩ. ²² Rũ yemacèx ga toma ga norũ ngũexũgũ, rũ yexguma Ngechuchu yuwa írũdaxgu, rũ nũxna tacuèxãchie ga yema ore ga Ngechuchu nũxũ ixuxũ. Rũ aixcũma tayaxõgũ ga yema ore ga nũxũ yaxuxũ rũ yema Tupanaãrũ ore ga nuxcũmaũgũxũ ga orearũ uruũgũ Ngechuchuchigagu ũmatũgũxũ.

Ngechuchu rũ nũxũ nacuèx i guxũma i duũxũgũ

²³ Rũ yexguma Ngechuchu Ũpetũchigaarũ petacèx Yerucharètwa yexmagu, rũ muxũma ga duũxũgũ rũ nũxũ nayaxõgũ, yerũ nũxũ nadaugũ ga yema taxũ ga mexũgũ ga Tupanaãrũ poramaã naxũxũ. ²⁴ Natũrũ ga nũma ga Ngechuchu rũ tama yema duũxũgũmèxèwa nũgũ nayexmaxèèchaũ, yerũ woetama marũ nũxũ nacuèx ga tacũgu na naxĩnũèxũ ga guxũma ga yema duũxũgũ. ²⁵ Rũ yemacèx ga nũma rũ taxucèxma texé namaã nũxũ tixu na tacũgu naxĩnũèxũ ga yema duũxũgũ. Yerũ nũmatama marũ nũxũ nacuèx ga tacũgu na naxĩnũèxũ ga naãèwa ga wũxichigũ.

3

Ngechuchuxũtagu nanaxũãne ga Nicodému

¹ Nayexma ga wũxi ga Parichéu ga Nicodémugu ãegacũ. Rũ nũma rũ wũxi ga ãèxgacũ ga nũxũ nangechaũgũcũ nixĩ ga Yudĩugũtanũwa. ² Rũ guma Nicodému rũ Ngechuchuxũtagu nanaxũãne ga chũtacũ. Rũ ñanagũrũ Ngechuchuxũ: —Pa Ngũexèèruũx, toma nũxũ tacuèx na aixcũma Tupana nũma cuxũ muxũ na toxũ cungũexèèxũcèx. Erũ taxucũrũwa texé cuxrũt tanaxũ i ngẽma taxũ i mexũgũ i Tupanaãrũ poramaã ũxũ, ega tama Tupana tũmaxũtawã ngèxmagu —ñanagũrũ. ³ Rũ Ngechuchu nanangãxũ rũ ñanagũrũ nũxũ: —Aixcũma cumaã nũxũ chixu, rũ yĩxema tama wenaxãrũ buxe rũ taxucũrũwama Tupana ãèxgacũ íxĩxũtwa tangu —ñanagũrũ. ⁴ Rũ Nicodému rũ Ngechuchuna naca, rũ ñanagũrũ nũxũ: —¿Natũrũ ñuxãcũ i wũxi i yatũ i marũ yaxũ i wena nabuxũ? ¿Éxna wena naèãnũgu naxũcuxũ rũ ngẽmaãcũ wena

nabuxŭ? —ñanagürü. ⁵ Rŭ Ngechuchu nanangãxŭ rŭ ñanagürü: —Rŭ aixcŭma cumaã nüxŭ chixu rŭ yíxema tama nüxŭ rŭxoxe i tŭmaãrŭ pecadu rŭ tama Tupanaãe i Üünexŭwa nayaxúxe i maxŭ i ngexwacaxŭxŭ, rŭ taxucürŭwama Tupana ãëxgacŭ íxixŭwa tichocu ⁶—Yíxema duŭxŭwa buxe rŭ duŭxŭtama tixí. Natürü yíxema Naãe i Üünexŭwa nayaxúxe i maxŭ i ngexwacaxŭxŭ, rŭ Tupanaxãcŭ tixí. ⁷ —jTãütama cubaixãchiãe na cumaã nüxŭ chixuxŭ na Tupana naxwëxexŭ na guxŭma i duŭxŭgŭ rŭ wena nabuxŭ! ⁸ —Ya buanecŭ rŭ nŭma ínanaxwëxexŭwa nabu. Rŭ nüxŭ cuxínŭ i naga, natürü tama nüxŭ cucuëx na ngextãama ne naxŭxŭ rŭ ngextãama na naxŭxŭ. Rŭ ngëxgumarŭŭ ta tixígŭ ya guxãma ya yíxema Naãe i Üünexŭwa nayaxúxe i maxŭ i ngexwacaxŭxŭ —ñanagürü. ⁹ Rŭ Nicodému wenaxãrŭ Ngechuchuna naca, rŭ ñanagürü: —¿Natürü ñuxãcŭ nixí i ngëma? —ñanagürü. ¹⁰ Rŭ Ngechuchu nanangãxŭ, rŭ ñanagürü nüxŭ: —Cuma rŭ Yudíngüarŭ ngúexëëruŭ i nüxŭ cuáxŭ quixí. ¿Rŭ ñuxãcŭ chi i cuma i tama nüxŭ cucuáxŭ i ngëma? ¹¹ —Aixcŭma cumaã nüxŭ chixu rŭ toma rŭ namaã tidexagŭ i ngëma nüxŭ tacuáxŭ. Rŭ norŭ uruŭ tixígŭ i ngëma nüxŭ tadaugŭxŭ. Natürü pema rŭ tama toxŭ peyaxögŭ i ngëma pemaã nüxŭ tixuxŭ. ¹² —Rŭ ñuxma na tama choxŭ peyaxögŭxŭ i ngëma pemaã nüxŭ chixuxŭ i ñoma i naãneãrŭ ngëmaxŭchiga, rŭ ¿ñuxãcŭ tá peyaxögŭxŭ ega pemaã nüxŭ chixuxgu i daxŭguxŭ i naãneãrŭ ngëmaxŭchiga? ¹³ —Taguma texé daxŭguxŭ i naãnewa taxŭ. Natürü i choma i Tupana Nane na duŭxŭxŭ chiŭxŭ, rŭ chaxicatama nixí i ngema ne chaxŭxŭ rŭ ngema tá chaxŭxŭ. ¹⁴⁻¹⁵ —Pema nüxŭ pecuëx ga ñuxãcŭ nuxcŭmaxŭchima yema nachica ga ngextã taxúema íxãpataxŭwa, rŭ Moíché wŭxi ga naígu nanaxŭnagŭ ga yema ãxtape ga díerumünaxcëx. Rŭ ngëxgumarŭŭ tá ta i choma i Tupana Nane i duŭxŭxŭ chiŭxŭ, rŭ wŭxi i naígu tá choxŭ naxŭnagŭgŭ i duŭxŭgŭ na guxãma ya texé ya choxŭ yaxögŭxe rŭ tüxŭ nangëxmaxŭcëx i maxŭ i taguma gŭxŭ.

Tupana rŭ poraãcŭ nüxŭ nangechaŭ i ñoma i naãnecŭãx

¹⁶ —Rŭ Tupana rŭ poraãcŭ nüxŭ nangechaŭ i ñoma i naãnecŭãx i duŭxŭgŭ. Rŭ yemacëx inanamu ga Nane ga nügŭmaã wŭxicacŭ na guxãma ya texé ya nüxŭ yaxögŭxe rŭ tama itarŭtauxexŭcëx rŭ tüxŭ nangëxmaxŭcëx i maxŭ i taguma gŭxŭ. ¹⁷ —Yerŭ ga Tupana rŭ tama ñoma ga naãnewa nanamu ga Nane na duŭxŭgŭmaã naxueguãxŭcëx na napoxcuxŭ. Natürü nŭma nanamu na namaxëxëãxŭcëx i duŭxŭgŭ. ¹⁸ —Rŭ yíxema Tupana Naneãxŭ yaxõxë, rŭ Tupana rŭ tama tŭmamaã nanaxuegu na tapoxcuxŭ. Natürü yíxema tama nüxŭ yaxõxë, rŭ marŭ tŭmamaã nanaxuegu na tapoxcuxŭ, erŭ tama nüxŭ tayaxõ ya yima Tupana Nane ya nügŭmaã wŭxicacŭ. ¹⁹ —Rŭ yíxema tama nüxŭ yaxögŭxe, rŭ Tupana rŭ marŭ tŭmamaã nanaxuegu na tapoxcuxŭ. Yerŭ yexguma ñoma ga naãnewa nanguxgu ga Tupana Nane ya duŭxŭgŭarŭ ngóonexëëruŭ, rŭ tama nawe tarŭxíchaŭ. Natürü yexera tŭmaãrŭ me nixí ga eãnexŭwaama na tayexmagŭxŭ, yerŭ chixexŭ taxŭgŭ. ²⁰ —Guxãma ya yíxema chixexŭ ügŭxe rŭ naxchi taxaie i ngóonexŭ. Rŭ tama nüxna tangaicamagŭchaŭ erŭ tama tanaxwëxe na nangóxŭ i ngëma chixexŭ i ítaxŭgŭxŭ. ²¹ —Natürü yíxema aixcŭma Tupanaãrŭ ore nüxŭ ixuxŭãcŭma meã maxëxë rŭ nüxna tangaicama i ngëma ngóonexŭ. Rŭ ngëmaãcŭ tanaxŭ na meã nangóxŭcëx na Tupanaãrŭ ngŭchaŭãcŭma na yíxŭ i guxŭma i ngëma taxŭgŭxŭ —ñanagürü.

Cuãl ga baiŭxëëruŭ rŭ wenaxãrŭ nüxŭ nixu ga Ngechuchuchiga

²² Rũ yemawena rũ tomaã Yudéaanewa naxũ ga Ngechuchu. Rũ ñuxre ga ngunexũ tomaã yéma nayexma rũ yéma duũxũgũxũ ítabaiũxêëgũ. ²³ Rũ Cuáũ ga baiũxêëruũ rũ Enóárũ íãnewa ga Charíarũ ngaicamana rũ ínanabaiũxêë ta ga duũxũgũ yerũ yéma nayexma ga taxũ ga dexá. Rũ yema yéma íngugëtanũxũ ga duũxũgũ, rũ Cuáũ ínayabaiũxêëtanũ. ²⁴ Rũ yemaãcũ nãpupetũ naxũpa ga na poxcupataũgu yatëxcuchixũ ga Cuáũ. ²⁵ Rũ yexguma rũ ñuxre ga norũ ngúexũgũ ga Cuáũ, rũ wũxi ga Yudíumaã niporagatanũcũũ nachiga ga nacũmagũ na ñuxãcũ namexũ na Tupanacèx nũgũ yamexêëgũxũ ga duũxũgũ. ²⁶ Rũ Cuáũmaã nũxũ nayarũxugũe, rũ ñanagũrũgũ: —Pa Ngúexêëruũx, dũcax guma yatũ ga tomaã nũxũ quixucũ rũ cumaã yexmacũ ga natũ i Yudáũãrũ tocutũwa, rũ yima rũ ñuxma rũ duũxũgũxũ ínabaiũxêë, rũ guxũma i duũxũgũ rũ nawe narũxĩ —ñanagũrũgũ. ²⁷ Rũ Cuáũ nanangãxũ rũ ñanagũrũ nũxũ: —Taxúema ñacũ tũxũ nangëxma ega Tupana tama tũxna naxãxgu. ²⁸ —Pematama rũ marũ choxũ pexĩnũë ga yexguma ñachagu:

“Choma rũ tama Cristu chixĩ. Natũrũ choma chixĩ i Tupana yima Cristupëxegu choxũ imuxũ na nũxũ chixuxũcèx i nachiga”, ñachagu. ²⁹ —Rũ wũxi i ngĩgũwa rũ yima yatũ ya íngĩcũ rũ naxmèxãrũ yora nixĩ. Rũ yima yatũmũcũ i naxũtawa ngëxmaxũ rũ nũxũ ínarũxĩnũ i norũ ore. Rũ nataãë i ngëxguma nũxũ naxĩnũgu i ngëma na yadexaxũ. Rũ ngëxgumarũũ i choma rũ aixcũma Cristumaã chataãëxũchi i ñuxmax. ³⁰ —Nũma rũ tá nixĩnagũchigũ na ãëxgacũ yĩxũ, natũrũ i choma rũ tá ícharũxĩchigũ.

Yima daxũwa ne ùxcũchiga

³¹ —Rũ yima Cristu ya daxũwa ne ùxcũ rũ guxãëtũwa nangëxma. Natũrũ i choma rũ ñoma i naãnewa changëxma, rũ ñoma i naãnecũãx chixĩ, rũ ngëma ñoma i naãnewa ngëxmaxũchigaxũ chixu. Natũrũ i nũma ya Cristu ya daxũwa ne ùxcũ, rũ guxãëtũwa nangëxma. ³² —Rũ nũma rũ tamaã nũxũ nixuchiga ga yema nũxũ nadauxũ rũ nũxũ naxĩnũxũ. Natũrũ noxretama nũxũ nayaxõgũ i ngëma nũxũ yaxuxũ. ³³ —Natũrũ ngëxguma texé nũxũ yaxõxgu i norũ ore, rũ ngëmaãcũ tanangõxêë na aixcũma yĩxũ i ngëma Tupana nũxũ ixuxũ. ³⁴ —Rũ yima Tupana nũma namucũ, rũ Tupanaãrũ orexũ nixu. Erũ Tupana rũ nũxna nanamu i Naãë i Ùñexũ na guxũguma naxũtawa nangëxmaxũcèx. ³⁵ —Rũ Tanatũ ya Tupana rũ Nanexũ nangechaũ. Rũ ngëmacèx marũ naxmèxwa nanangëxmaxêë i guxũma i ñacũ i ngëxmaxũ. ³⁶ —Rũ yĩxema Tupana Naneãxũ yaxõxê rũ tũxũ nangëxma i maxũ i taguma gũxũ. Natũrũ yĩxema tama nũxũ yaxõxchaũxê ya Tupana Nane, rũ tãutãma tũxũ nangëxma i ngëma maxũ i taguma gũxũ. Natũrũ tá tanayaxu i ngëma ãũcũmaxũ i poxcu i Tupana tá namaã tũxũ poxcuxũ —ñanagũrũ ga Cuáũ ga baiũxêëruũ.

4

Ngechuchu rũ Chamáriaanecũãx ga ngecũ

¹ Rũ Parichégũ rũ nũxũ nacuáchigagũ ga Ngechuchu rũ Cuáũãrũ yexera nũxũ na nayexmaxũ ga norũ ngúexũgũ, rũ norũ yexera duũxũgũxũ na ínabaiũxêëxũ. ² Natũrũ tama Ngechuchu nixĩ ga ínabaiũxêëcũ ga duũxũgũ. Rũ toma ga norũ ngúexũgũ tixĩ ga tanaxũxũ ga yema. ³ Rũ yexguma Ngechuchu nũxũ ínũgu ga Parichégũ rũ nachigagu na yadexagũxũ, rũ yéma Yudéaanewa ítachoxũ na Gariréaanecèx tawoeguxũ. ⁴ Natũrũ ga yema nama ga nagu tawoeguxũ rũ Chamáriaanewa nadapetũ. ⁵ Rũ yemacèx ga toma rũ nawa tangugũ ga wũxi ga Chamáriaaneãrũ íãne ga Chicaru. Rũ guma

ĩãneãrũ ngaicamana nayexma ga yema naãne ga nuxcũmaũcũ ga Acobuaxũ yexmaxũ rũ yixcama rũ nane ga Yũchena naxãxũ. ⁶ Rũ yẽma nayexma ga wũxi ga puchu ga duũxũgũ dexácẽx ixaixmaũgũcũ ga Acobuarũ Puchugu ãegacũ. Rũ poraãcũ nipa ga Ngechuchu ga namagu na yaxũxũ. Rũ yemacẽx guma puchuxũtawa nayarũtoochi. Rũ tocuchiwa nanguxchaũ ga yexguma. ⁷⁻⁸ Rũ toma ga norũ ngũexũgũ rũ guma ããnewa taxĩ na torũ õnacẽx tayataxegũxũcẽx. Rũ towena yẽma ingu ga wũxi ga ngecũ ga Chamãriaanecũãx ga guma puchuwa dexãwa ũcũ. Rũ Ngechuchu rũ ñanagũrũ ngĩxũ: —jĩraxũ i dexã choxna naxã! —ñanagũrũ. ⁹ Natũrũ ga yema nge rũ ibaixãchiãẽ yerũ ga Yudiũgũ rũ Chamãriaanecũãxgũmaã nũgũchi naxaie rũ yemacẽx ga yema nge rũ inangãxũ rũ ngĩgũrũgũ nũxũ: —jNuxãcũ i cuma na Yudiũ quiũxũ i dexácẽx choxna cuçaxũ i choma na Chamãriaanecũãx chiũxũ? —ngĩgũrũgũ. ¹⁰ Rũ Ngechuchu ngĩxũ nangãxũ, rũ ñanagũrũ: —Ngẽxguma chi nũxũ cucuẽxgu i ngẽma mexũ i Tupana cuxna ãxchaũxũ, rũ chi nũxũ cucuẽxgu na texẽ yĩxũ ya yima dexã cuxna taçacũ, rũ cuma rũ chi nũxnata cuca i dexã i maxũ nawa ngẽxmaxũ rũ nũma rũ chi cuxna nanaxã i ngẽma dexã —ñanagũrũ. ¹¹ Rũ yema ngecũ inangãxũ, rũ ngĩgũrũgũ nũxũ: —Pa Corix, jNuxãcũ tá i dexãta cuyaxu? Erũ daa puchu rũ namátamaxũchi rũ cuxũ nataxuma na ãacũmaã cunayaxuxũcẽx i dexã. jRũ ngextã tá i cunayaxuxũ i ngẽma dexã i maxũ nawa ngẽxmaxũ na choxna cunaxãxũcẽx? ¹² —Nuxcũmaũcũ ga torũ oxĩ ga Acobu toxcẽx nũma Chamãriaanewa nanatẽx ga daa puchu. Rũ gumawa nixĩ ga naxaxexũ ga nũma rũ nanegũ rũ norũ wocagũ. jRũ ñuxãcũ chi i cuma i norũ yexera quiũxũ? —ngĩgũrũgũ. ¹³ Rũ Ngechuchu ngĩxũ nangãxũ, rũ ñanagũrũ: —Rũ guxãma ya texẽ ya daa pucharũ dexãwa axexe, rũ wena táxaru tiãawae. ¹⁴ —Natũrũ texẽ ya yĩxema choma tũxna chaxãxũ i dexãwa axexe, rũ tagutãma wena tiãawa. Erũ ngẽma dexã i choma tũxna chaxãxũ rũ wũxi ya puchu ya wũxũguma ibaibecũrũũ tá nixĩ i tũmawa, erũ ngẽma dexãwa nangẽxma i maxũ i taguma gũxũ —ñanagũrũ. ¹⁵ Rũ ngĩma ga yema nge rũ inangãxũ rũ ngĩgũrũgũ: —Pa Corix, jchoxna naxã i ngẽma dexã na taguma wena chiãawaxũcẽx, rũ taguma wena daa puchuwa dexãwa chaxũxũcẽx! —ngĩgũrũgũ. ¹⁶ Rũ Ngechuchu ñanagũrũ ngĩxũ: —jYĩyadau ya cute, rũ naxcẽx yaca, rũ nuã pexĩ! —ñanagũrũ. ¹⁷ Rũ yema ngecũ rũ inangãxũ, rũ ngĩgũrũgũ nũxũ: —Nataxuma ya chaute —ngĩgũrũgũ. Rũ Ngechuchu ñanagũrũ ngĩxũ: —Aixcũma nixĩ i ngẽma nũxũ quixuxũ na nataxuũma ya cute. ¹⁸ —Yerũ wũximẽẽxpũxchirẽx nixĩ ga cute, rũ yima ñuxma cuxũtawa ngẽxmacũ rũ tama aixcũma cutexũchi nixĩ. Rũ ngẽmacẽx aixcũma nixĩ i curũ ore i chomaã nũxũ quixuxũ —ñanagũrũ. ¹⁹ Rũ yexguma yemaxũ naxĩnũgu ga yema ngecũ, rũ ngĩgũrũgũ: —Pa Corix, nũxũ chicuẽxãchi rũ cuma rũ wũxi i Tupanaãrũ orearũ uruũ quixĩ. ²⁰ —Nuxcũmaũgũxũ ga torũ oxĩgũ ga Chamãriaanecũãxgũ rũ daa mẽxpũne ga Garachĩwa Tupanaxũ nicuẽxũũgũ. Natũrũ i pema i Yudiũgũ rũ ñaperũgũgũ:

“Rũ Yerucharẽũ nixĩ i nachica i mexũ i ngextã Tupanaxũ ticuẽxũũgũ”, ñaperũgũgũ. ²¹⁻²² Rũ Ngechuchu ngĩxũ nangãxũ rũ ñanagũrũ: —Pema i Chamãriaanecũãxgũ rũ tama aixcũma nũxũ pecuẽxgũ ya yima nũxũ picuẽxũũgũcũ. Natũrũ toma i Yudiũgũ rũ aixcũma nũxũ tacuẽx ya yima nũxũ ticuẽxũũgũcũ, erũ Yudiũgũgagu nixĩ i Tupana namaxẽxẽẽxũ i guxũma i duũxũgũ. jChoxũ yaxõ, Pa Ngecũx! Rũ aixcũma ãnangu tá i ngunexũ na tãũtãma daa mẽxpũnewa rũ õxna Yerucharẽũwa tá nũxũ na picuẽxũũgũxũ

ya Tanatü ya Tupana. ²³ —Erü yíxema aixcúma Tupanaxü icuèxüügüxe rü nüetama nixí i ngèxürüüxümare i nachicawa Tupanaxü ticuèxüügü. Erü ñuxma rü ngéma Naãe i Üünexü naxwèxexü nixí na guxüma i túmaãemaã rü túmaãrü maxümaã aixcúma Tupanaxü ticuèxüügüxü. Rü ngémaãcü nixí i nanaxwèxexü ya Tanatü na nüxü ticuèxüügüxü. ²⁴ —Erü Tupana rü wüxi i Naãe nixí. Rü ngémaçex yíxema texé ya nüxü icuèxüügüxe rü tanaxwèxe i guxüma i túmaãemaã rü túmaãrü maxümaã na aixcúma nüxü ticuèxüügüxü, ngéma Naãe i Üünexü naxwèxexüãcüma —ñanagürü. ²⁵ Rü yema ngecü inangãxü rü ngígürügü: —Choma nüxü chacuèx rü tá ñoma i naãnewa nangu ya yima Cristu ya Tupana nüxü unetacü. Rü ngèxguma yima núma üxgu rü tá tamaã nanangoxèe i guxüma i Tupanachiga —ngígürügü. ²⁶ Rü Ngechuchu rü ñanagürü ngíxü: —Choma na cumaã chidexaxü, rü yima chixí —ñanagürü. ²⁷ Rü yexguma iyadexayane rü ítangugü ga toma ga norü ngèxüügü. Rü tabaixächiaëgü yerü ga Ngechuchu rü wüxi ga ngecümaã inidexa. Natürü taxúema ga toma rü togü taporaxèe ga nüxna na tacagüxü ga tacü ngímaã na nanaxwèxexü rü tacüchiga yiixü ga ngímaã na iyadexaxü. ²⁸ Rü yexguma ga yema ngecü rü yéma ngíxü itèx ga ngírü tüxü. Rü ñanewa ixü na duüxügümaã nüxü yanaxuxüçex. ²⁹ Rü ngígürügü: —¡Ngíxã rü ítayadaugü i wüxi i yatü i chomaã nüxü ixuxü ga guxüma ga tacü ga chaxüxü! ¿Taux éxna yima yiixü ya Cristu? —ngígürügü. ³⁰ Rü inaxíachi ga yema ñanecüãx, rü Ngechuchu iyexmaxüwa naxí. ³¹ Rü yoxni ga toma ga norü ngüexüügü rü Ngechuchuxü tachixewegü na nachibüxüçex. ³² Natürü ga núma rü ñanagürü toxü: —Choma rü choxü nangéxma i chowemü i pema tama nüxü pecuáxü —ñanagürü. ³³ Rü yexguma ga toma ga norü ngüexüügü rü togüna tacagüe, rü ñatarügügü: —Bexmana marü çtexé nuã tanange i nawemü? —ñatarügügü. ³⁴ Natürü ga Ngechuchu rü ñanagürü toxü: —Ngéma ñna i choxü poraxèèxü nixí na chanaxüxü i norü ngüchaü ya yima nuã choxü mucü ya Chaunatü, rü na chayanguxèèxü i norü puracü. ³⁵ —Rü pema rü ñaperügügü:

“Rü ägümücü ya tauemacü nataxu na yabuxgüxü i trigu”, ñaperügügü. Natürü i choma rü ñacharügü pexü:

“¡Düçex, rü meã penangugü i duüxüügü! Erü marü ínamegü na Tupanaxü nayauxgüxüçex, ngèxgumarüü i wüxi i trigunecü i marü nawa nanguxü na yabuxgüxü erü marü nidau”. ³⁶ —Rü yíxema Tupanacèx nadexe i duüxüügü rü tá tanayaxu i túmaãrü natanü. Rü guxüma i ngéma duüxüügü i tüxü irüxüñüèxü rü tá nanayauxgü i maxü i taguma gúxü. Rü ngémaãcü rü wüxigu tá tataãëgü ya yíxema tüxira ngéma duüxüügümaã Tupanaãrü orexü ixuxe rü yíxema yíxcama ngéma duüxüügüxü Tupanacèx dexe. ³⁷ —Rü aixcúma nixí i ngéma ore i ñaxü:

“Wüxie tixí ya namaã toexe i trigu rü toge tixí ya yíxema yabuxgüxe i norü o”, ñaxü. [Rü ngèxgumarüü rü wüxie tixí ya tüxira duüxüügümaã nüxü ixuxe i Tupanaãrü ore, rü toge tixí ya yíxcama ngéma duüxüügüxü dexe Tupanacèx.]

³⁸ —Rü noxri rü togü nixí ga duüxüügümaã nüxü ixuxü ga Tupanaãrü ore, natürü ga duüxüügü rü tama nayaxögü ga yexguma. Rü yemawena rü pexü chamu na yema duüxüügümaã nüxü pixuxüçex ga yema ore. Rü pema nixí ga yema duüxüügüxü pedexü Tupanacèx, yerü nayaxögü ga yexguma namaã nüxü pixuxü ga yema ore. Rü yemaãcü ga pema rü marü peyoxnië nawa ga togüarü puracü —ñanagürü. ³⁹ Rü muxüma ga guma Chamáriaanewa yexmane ga ñanecüãx rü Ngechuchuaxü nayaxögü, yerü nüxü nayaxögü ga yema ore ga yema ngecü namaã nüxü ixuxü ga yexguma ngíxgu:

“Guxŭma ga ŧacŭ ga ũpa chaxŭxŭ rŭ chomaã nŭxŭ nixu” ngŭxgu. ⁴⁰ Rŭ yemacèx ga yema Chamáriaanecŭŭãxgŭ rŭ yexguma Ngechuchuxŭtawana nangugŭ rŭ nŭxŭ nacèèxŭgŭ ga yexma natanŭgu na naxãxŭcèx. Rŭ taxre ga ngunexŭ yexma natanŭgu narŭxãŭx ga Ngechuchu. ⁴¹ Rŭ muxŭma ga togŭamachigŭ ga Chamáriaanecŭŭãxgŭ rŭ Ngechuchuaxŭ nayaxŭgŭ ga yexguma nŭxŭ naxŭnŭègu ga yema norŭ ore ga nŭmatama nŭxŭ yaxuxŭ. ⁴² Rŭ yexguma ga yema duŭxŭgŭ rŭ ñanagŭrŭgŭ ngŭxŭ ga yema ngecŭ: —Ñuxma waxi nixŭ i aixcŭma nŭxŭ tayaxŭgŭxŭ erŭ tomatama nŭxŭ taxŭnŭè i ngèma norŭ ore i tomaã nŭxŭ yaxuxŭ. Rŭ ngèma nŭxŭ tacuèx na aixcŭma yima yŭxŭ ya Cristu ya ñoma i nañecŭŭãx i duŭxŭgŭarŭ maxèxèèrŭ. Rŭ tama ngèma cuma tomaã nŭxŭ quixuxŭcèxicatama tayaxŭgŭ —ñanagŭrŭgŭ.

Ngechuchu rŭ nanamexèè ga wŭxi ga ãèxgacŭ nane

⁴³ Rŭ taxre ga ngunexŭguwena ga Ngechuchu rŭ tomaã inaxŭãchi ga Chamáriaanewa na Gariréaanewa naxŭxŭcèx. ⁴⁴ Rŭ nŭmatama ga Ngechuchu ga ũpaacŭ rŭ ñanagŭrŭ: —Wŭxi i Tupanaãrŭ orearŭ uruŭ, rŭ norŭ naãnewatama i duŭxŭgŭ rŭ tama meã nanayauxgŭ —ñanagŭrŭ. ⁴⁵ Natŭrŭ yexguma Gariréaanewa tangugŭgu, rŭ yema nañecŭŭãx ga duŭxŭgŭ rŭ meãma nanayauxgŭ. Yerŭ nŭmagŭ ga yema nañecŭŭãxgŭ rŭ Yerucharéŭwa naxŭ ta naxcèx ga Ũpetŭchigaarŭ peta, rŭ yéma nŭxŭ nadaugŭ ga yema taxŭ ga mexŭgŭ ga Tupanaãrŭ poramaã naxŭxŭ ga Ngechuchu ga yexguma. ⁴⁶ Rŭ ga Ngechuchu rŭ tomaã nataegu naxcèx ga guma ñane ga Caná ga Gariréaanewa yexmane. Rŭ guma ñane nixŭ ga binuxŭ nanguxuchixèèãxŭ ga dexá. Rŭ ñane ga Capernáŭwa nayexma ga wŭxi ga tacŭ ga ãèxgacŭ, rŭ niŭaawe ga wŭxi ga nane. ⁴⁷ Rŭ yexguma guma ãèxgacŭ nŭxŭ cuáchigagu ga Ngechuchu rŭ Gariréaanewa na nanguxŭ ga Yudéaanewa na ne naxŭxŭ, rŭ naxŭtawana naxŭ. Rŭ nŭxŭ nayacèèxŭ na napatawa naxŭxŭcèx, rŭ naxcèx na yanataanexèèãxŭcèx ga guma nane ga marŭ turaxŭchicŭ. ⁴⁸ Rŭ Ngechuchu nanangãxŭ, rŭ ñanagŭrŭ nŭxŭ: —Pema rŭ tama peyaxŭgŭ ega tama nŭxŭ pedauxiragu i taxŭ i cuèxruŭgŭ i Tupanaãrŭ poramaã ŭxŭ —ñanagŭrŭ. ⁴⁹ Natŭrŭ ga guma ãèxgacŭ rŭ ñanagŭrŭ nŭxŭ: —Pa Corix, ipaxa chowe rŭxŭ naxŭpa na nayuxŭ ya chaune! —ñanagŭrŭ. ⁵⁰ Rŭ Ngechuchu nanangãxŭ rŭ ñanagŭrŭ nŭxŭ: —¡Nataegu i cupatawa! Erŭ cune rŭ marŭ naxcèx nitaane —ñanagŭrŭ. Rŭ guma yatŭ rŭ nayaxŭ ga yema ore ga Ngechuchu namaã nŭxŭ ixuxŭ. Rŭ napatacèx nataegu. ⁵¹ Rŭ yexguma napatawa nanguxchaŭgu ga guma ãèxgacŭ, rŭ norŭ duŭxŭgŭ napèxegu nayayi, rŭ ñanagŭrŭgŭ nŭxŭ: —Cune rŭ marŭ naxcèx nitaane —ñanagŭrŭgŭ. ⁵² Rŭ yexguma rŭ norŭ duŭxŭgŭna naca, rŭ ñanagŭrŭ nŭxŭ: —¿ŧacŭ rŭ oragu inaxŭgŭxŭ na naxcèx yataanexŭ? —ñanagŭrŭ. Rŭ yema norŭ duŭxŭgŭ nanangãxŭ rŭ ñanagŭrŭgŭ: —Íne tocuchiguwena nixŭ ga nŭxŭ nangupetŭxŭ ga na yaxaxŭnexŭ —ñanagŭrŭgŭ. ⁵³ Rŭ guma bucŭ nanatŭ rŭ nŭxna nacuèxãchi ga yema oragu na yŭxŭ ga Ngechuchu ga ñaxŭ nŭxŭ:

“Cune rŭ marŭ naxcèx nitaane” ñaxŭ. Rŭ nŭma ga guma ãèxgacŭ rŭ guxŭma ga napatacŭŭãx rŭ Ngechuchuaxŭ nayaxŭgŭ. ⁵⁴ Rŭ yexguma Yudéaanewa ne naxŭxgu ga Ngechuchu, rŭ yema nixŭ ga norŭ taxre ga cuèxruŭ ga taxŭ ga Tupanaãrŭ poramaã duŭxŭgŭxŭ nawéxŭ ga Gariréaanewa.

5

Ngechuchu rü nanamexêẽ ga wüxi ga yatü ga idaawexü ga Betchawa yexmaxü

¹ Rü ñuxre ga ngunexügü ngupetüguwena rü nayexma ga wüxi ga peta ga Yudiügü auregüxü na yemaäcü Tupanaxü yacuëxüügüxüçex. Rü yemacëx ga Ngechuchu rü Yerucharéüçex nataegu. ² Rü guma ñãneärü poxeguxü rü nüxü nayexma ga wüxi ga ñãx ga Carneruarü Choxüchicagu äegaxü. Rü yema ñãxärü ngaicamana nayexma ga wüxi ga puchu ga Yudiügügawa Betchagu äegaxü. Rü guma puchuanacüwa nayexma ga wüximêëxpüx ga chopetüchica ga äxpataüetügüxü. ³ Rü yema chopetüchicagu nacagü ga muxüma ga duüxügü ga idaaweexü. Rü nümaxü rü nangexetügü, rü togü rü nachixeparagü, rü togü rü nanawãixächigü. Rü yema idaaweexü rü yéma nananguxêëgü ga guma puchu ga na naxiãxächichiüxüçex. ⁴ Yerü ñuxguacü rü guma puchugu ñarüxüxü ga wüxi ga daxüçüãx ga Tupanaärü orearü ngeruü, rü nayaxiãxchiüçüxêëxü. Rü guxema tüxira tügü yéma táxe nachiüwa ga guma puchu ga yexguma yaxiãxchiüçüügu, rü tümacëx nitaane woo ga ngëxürüümare ga daawe tüxü yexmaxê. ⁵ Rü yéma natanüwa nayexma ga wüxi ga yatü ga marü 38 ga taunecü idaawecü. ⁶ Rü yexguma Ngechuchu nüxü dëuxgu ga guma yatü ga yexma na nacaxü, rü nüxü nacuáchiga ga marü mucüma ga taunecü na yaðaawexü. Rü yemacëx nüxna naca rü ñanagürü nüxü: —¿Cunaxwëxexü i cuxcëx na yataanaxü? —ñanagürü. ⁷ Rü Ngechuchuxü nangäxü ga guma idaawecü, rü ñanagürü: —Pa Corix, tataxuma ya texé ya choxü rüngüxêëxê na ngema choxü tafäexüçex i ngëxguma naxiãxächichiügu ya daa puchu. Rü guxüguma i ngëxguma ngema chaugü chatäechaügu, rü yoxni i togü rü marü nüxira nügü ngema natäegü —ñanagürü. ⁸ Rü Ngechuchu rü ñanagürü nüxü: —¡Inachi, rü nayaxu i curü caruü, rü ñixü! —ñanagürü. ⁹⁻¹⁰ Rü yexgumatama naxcëx nitaane ga guma yatü. Rü nanayaxu ga norü caruü, rü ñixü. Natürü ga yema ngunexü rü ngüxchigaarü ngunexü nixi. Rü yemacëx ga yemacüãxgü ga Yudiügüarü äëxgacügü rü ñanagürügü nüxü ga guma yatü ga naxcëx itaanecü: —Ñoma nixi i ngüxchigaarü ngunexü. Rü ngëmacëx nachuxu nixi na cuyangexü i curü caruü erü yemaäcü tamaã nüxü nixu ga Moïché —ñanagürügü. ¹¹ Natürü ga guma yatü rü yema Yudiügüarü äëxgacügüxü nangäxü, rü ñanagürü: —Yima choxü rümexêëcü rü ñanagürü choxü:

“¡Nayaxu i curü caruü rü ñixü!” ñanagürü. ¹² Rü yexguma ga yema äëxgacügü rü nüxna nacagü, rü ñanagürügü: —¿Texé ngëma ñatarügü cuxü:

“¡Nayaxu i curü caruü rü ñixü!” ñatarügü cuxü? —ñanagürügü. ¹³ Natürü ga guma yatü rü tama nüxü nacüx ga texé naxcëx na yataanexêëxü, yerü namuxüchi ga duüxügü ga yéma, rü yexma nayarütaxu ga Ngechuchu. ¹⁴ Natürü yixcama ga Ngechuchu rü tupauca ga taxünegu nüxü nayangu ga guma yatü, rü ñanagürü nüxü: —¡Düçex i ñuxma marü cuxcëx na yataanaxü, rü täütäma wena chixexü cuxü na tama quidaawexüçex namaã i wüxi i daawe i ngëma marü cuxü ngupetüxüärü yexera ixixü! —ñanagürü. ¹⁵ Rü ñixü ga guma yatü, rü Yudiügüarü äëxgacügümaã nüxü nayarüxu ga Ngechuchu na yixü ga guma namexêëcü. ¹⁶ Rü yemacëx nixi ga yema äëxgacügü ga Ngechuchucëx nadaugüxü na yamëxgüãxüçex, yerü ngüxchigaarü ngunexügu napuracü. ¹⁷ Natürü ga Ngechuchu rü ñanagürü nüxü: —Chaunatü ya Tupana rü guxü i ngunexügu napuracü rü mexü naxü.

Rü ngëmacèx i choma rü ta naxrüü chapuracü —ñanagürü. ¹⁸ Rü yemacèx ga yema Yudüügäürü äëxgacügü rü yexeraäcü Ngechuchuxü nimëxgüchaü. Yerü tama naxrüü nanaxaure ga ngüxchigaarü ngunexü rü ñuxüchi nüxü nixu ga Nanatüxüchi na yïxü ga Tupana, rü yemaäcü nügü nixu ga Nanatü ga Tupanamaä na nawüxiguxü.

Nüma ga Tupanatama nixi ga Nanena naxäxü ga pora

¹⁹ Rü yexguma ga Ngechuchu rü ñanagürü nüxü ga yema äëxgacügü: —Aixcüma pemaä nüxü chixu rü choma i Tupana Nane rü tama chorü poramaä chanaxü i tacü rü puracü i mexü. Natürü ngëma nüxü chadauxü i Chaunatü üxüxicatama nixi ichaxüxü. Rü guxüma i ngëma Chaunatü üxü, rü choma ya Nane rü ta chanaxü. ²⁰ —Chaunatü ya Tupana rü choxü nangechaü, rü ngëmacèx choxü nüxü nadauxëë i guxüma i tacü i nüma naxüxü. Rü ngëma ñuxma choxü nüxü nadauxëëxüärü yexera tá choxü nüxü nadauxëë i yixcüra. Rü ngëxguma i pema ega ngëmaxü pedaugügu, rü tá pebaixächiaëgü namaä. ²¹ —Rü Chaunatü rü ñanadagüxëë i yuexügü rü wena nanamaxëëë. Rü ngëxguma-rüü ta i choma i Nane rü tüxna chanaxä i maxü ya yixema chatümawëxëxe na tüxna chanaxäxü. ²²⁻²³ —Rü tama Chaunatü nixi ya duüxügüxü icagücü i norü maxüchiga. Natürü choxü nixi i namuxü na chanaxüxcëx i ngëma, na choxü yacuëxüügüxcëx i duüxügü, ngëma Chaunatüxü na yacuëxüügüxürü. Rü yixema tama choxü icuëxüxüxë, rü tama nüxü ticuëxüü ta ya Chaunatü ya choxü nuä mucü. ²⁴ —Aixcüma pemaä nüxü chixu rü yixema texé ya choxü irüxüxüxë i chorü ore, rü nüxü yaxöxë ya yima Chaunatü ya núma choxü mucü, rü tüxü nangëxma i maxü i taguma güxü. Rü Chaunatü rü täütäma tümamaä nanaxuegu na tapoxcuxü erü marü nawa itanguxuchi na tayuxü, rü tüxü nangëxma i maxü i taguma güxü. ²⁵ —Rü aixcüma pemaä nüxü chixu rü marü nawa tá nangu i ngunexü rü ñuxmatama nixi i chauga naxüñüxü tá i ngëma duüxügü i norü pecadugu yuexü rü iyarütauxexü. Rü texé ya chauga ñnüxë rü tá tamaxë. ²⁶ —Nüma ya Chaunatü rü nüxü nangëxma i pora na namaxëëëxüxcëx i duüxügü. Rü ngëma pora rü choxna nanaxä ya Chaunatü na choma rü ta duüxügüxü chamaxëëëxüxcëx. ²⁷ —Rü Chaunatü ya Tupana choxü namu na duüxügüna chaçaxüxcëx naxcëx i norü maxüchiga, erü choma nixi i Nane i duüxüxü chiixü. ²⁸ —¡Täxü i pebaixächiaëgüxü namaä i ñää ore i pemaä nüxü chixuxü! Erü tá ñangu i ngëma ngunexü i nagu guxüma i duüxügü i yuexü rü tá na nüxü naxüñüxü i chauga. ²⁹ —Rü naxmaügüwa tá ñnaxoxü. Rü ngëma meä maxëxü, rü tá ñnarüdagü na nayauxgüäxüxcëx i maxü i taguma güxü. Natürü ngëma chixexü ügüxü, rü tá ñnarüdagü na napoxcuxüxcëx.

Nawa nüxü icuäxü na Tupana yïxü ga Ngechuchuna naxäcü ga pora

³⁰ —Choma rü taxucürüwa tacü chaxü chauchamatama ega tama choxü naxüxëëägu ya Chaunatü. Rü Chaunatü chomaä nüxü ixuxüäcüma nixi i nüxna chaçaxü i duüxügü i norü maxüchiga. Rü ngëxguma nüxna chaçaxgu rü aixcüma meäma chanangugü i duüxügü. Erü tama choxrütama ngüchaü nixi i ngëma chaxüxü, natürü Chaunatü ya nuä choxü mucüarü ngüchaü nixi i ngëma chaxüxü. ³¹ —Rü ngëxguma chi chauchigaxütama chixuxgu rü taxuwama name i ngëma. ³² —Natürü nangëxma i to i chauchigaxü ixuxü. Rü nüxü chacuëx rü aixcüma nixi i norü ore i pemaä nüxü yaxuxü. ³³ Pema rü Cuáü ya baiüxëëruüxütawa penamugü ga perü duüxügü na nüxü pecuäxüxcëx ga ore ga aixcüma ixüxü ga chauchiga. Rü yema ore ga Cuáü pexü namaä ngäxüxü rü aixcüma nixi. ³⁴ —Natürü i choma rü

tama chanaxwêxe i ñacü rü yatü chauétüwa nachogü, erü choma tátama chaugüna chadau. Natürü pemaã nüxü chixu i ngêma Cuáũrü ore na choxü peyaxögüxcêx rü na penayauxgüxcêx i maxü i taguma gúxü. ³⁵—Cuáũ rü wüxi ga omü ga iyauracüüxü rü pexü báyixü-rüü nixi ga pexcêx. Rü pema rü paxaãchi namaã petaãegü. ³⁶—Natürü nangêxma i ñacü i Cuáũrü orearü yexera chauétüwa íchogüxü. Rü ngêma nixi ga yema taxügu ga cuèxruügu ga Chaunatu choxü muxü na norü poramaã chanaxüxcêx. Rü yemawa pexü nüxü chadauxêê na aixcüma Chaunatu ya Tupana yiixü ga núma choxü mucü. ³⁷—Rü ngêxgumarüü ta ya Chaunatu ga guma núma choxü mucü, rü marü chauétüwa ínachogü, woo taguma nüxü pexinüê ga naga rü taguma nüxü pedau. ³⁸—Rü ngêma Chaunatüaru ore rü ta tama peãêwa nixücu, erü tama choxü peyaxögü woo Chaunatu núma choxü na muxü. ³⁹⁻⁴⁰—Pema meãma nawa pengü i Tupanaaru ore i umatüxü, erü nagu perüxinüê rü ngêmawa tá nüxü ipeyangau i perü maxü i taguma gúxü. Natürü woo ngématama Tupanaaru ore i umatüxüwa rü chauchiga meã na yadexaxü, natürü i pema rü tama choxü peyaxögüchaü na ngêmaãcü penayauxgüxcêx i ngêma maxü. ⁴¹⁻⁴²—Rü choma rü tama chanaxwêxe na choxü picuèxüügüxü erü meãma pexü chacuèx, rü nüxü chacuèx na tama aixcüma Tupanaxü pengechaügüxü. ⁴³—Chaunatu ya Tupana nixi ga núma choxü mucü, natürü i pema rü tama choxü peyaxögüchaü. Natürü ngêxguma chi tomare i yatü nagagutama núma üxgu, rü ngêma chi nixi i taãêãcüma peyaxögüxü. ⁴⁴—¿Rü ñuxãcü chi choxü peyaxögü ega penaxwêxegu na pemücügütama pemaã taãêxü rü tama naxcêx pedaugüga na Tupanaxüchi pemaã taãêxü? ⁴⁵—¡Tãxü i nagu perüxinüêxü na choma tá yiixü na pexü chixugüxü i Chaunatüxütawa! Erü Moiché ga guma perü maxüxcêx nüxü peyaxögücü tátama nixi ya yima pexü ixugücü i Chaunatüxütawa. ⁴⁶—Rü ngêxguma chi peyaxögüga i ngêma ore ga Moiché umatüxü, rü choxü rü chi ta peyaxögü. Yerü ga Moiché rü chauchigagu nixi ga naxümatüãxü ga norü poperawa. ⁴⁷—Natürü ngêxguma tama peyaxögüga i ngêma Moiché umatüxü i ore, ¿rü ñuxãcü tá peyaxögü i ngêma choma pemaã nüxü chixuxü? —ñanagürü ga Ngechuchu.

6

Ngechuchu rü nanachibüexêê ga 5000 ga yatügu (Mt 14.13-21; Mr 6.30-44; Lc 9.10-17)

¹ Rü yemawena ga Ngechuchu rü nextaxa ga Gariréagu äeganearütocutüwa tomaã naxü. Rü norü toéga ga guma nextaxa rü Tibéria nixi. ² Rü muxüma ga duüxügu rü nawe narüxi. Yerü üpaacü rü marü nüxü nadaugü ga ñuxãcü Ngechuchu na naxüxü ga taxü ga mexügu ga Tupanaaru poramaã üxü ga yexguma duüxügu ga ídaawwegüxcêx yataanexêêgüãgu. ³ Rü yexguma ga Ngechuchu rü wüxi ga mëxpúnewa tomaã ínaxüãchi. Rü wüxigu tomaã yéma narüto. ⁴ Rü marü ningaica ga yema Yudiügarü peta ga Üpetüchiga. ⁵ Rü yexguma Ngechuchu nüxü dawanügu rü nüxü nadau ga muxüma ga duüxügu ga nawe rüxüxü. Rü yemacêx Piripina naca, rü ñanagürü: —¿Rü ngextá tá naxcêx tataxe i nawemü i ñaã duüxügu na nachibüexêêxüxcêx? —ñanagürü. ⁶ Rü nümatama ga Ngechuchu rü marü nüxü nacuèx ga ñacü tá na naxüxü. Natürü yema ñanagürü Piripixü, yerü nüxü nacuãxchaü ga ñacümaã tá na nangãxüãxü. ⁷ Rü yexguma Ngechuchuxü nangãxü ga Piripi, rü ñanagürü: —Woo chi naxcêx itaxegüga i 200 i dïeru naguxü i pãü, rü tãü chima nüxü ningü ega woo wüxichigüna íraxü íxächigüga —ñanagürü. ⁸⁻⁹ Rü

yexguma ga AŦdré ga NgechucharŦ ngúexŦ ga Pedru ga ChimáŦ naēneē, rŦ ŦnanagŦrŦ: —Nuā nangēxma i wŦxi i buxŦ rŦ nŦxŦ nangēxma i 5 i pāŦ i chebadanaxcèx rŦ taxre ta i choxni. ¿NatŦrŦ facŦwa name i ngēma naxcèx i Ŧnā muxŦchixŦ i duŦxŦgŦ? —ŦnanagŦrŦ. ¹⁰ RŦ yexguma ga Ngechuchu rŦ ŦnanagŦrŦ toxŦ: —jĒcŦ, namaā nŦxŦ pixu i duŦxŦgŦ na ínatogŦxŦcèx! —ŦnanagŦrŦ. RŦ yema nachicawa rŦ nametēxeanē ga guma maxē. RŦ gumatēxewa narŦtogŦ ga duŦxŦgŦ. RŦ maneca 5000 wa nangu ga yexguma yatŦgŦxica ixugŦ. ¹¹ RŦ yexguma ga Ngechuchu rŦ nanade ga yema pāŦgŦ, rŦ Tupanana moxē naxā. RŦ yemawena rŦ toxŦ nayanu na yema duŦxŦgŦ ga yēma rŦtogŦxŦxŦ tayanuxŦcèx. RŦ yexgumarŦŦ ta ga choxni rŦ nŦxŦ toxŦ nayanuxēē, ŦŦxmata meāma nachibŦe ga guxŦma ga yema duŦxŦgŦ. ¹² RŦ yexguma marŦ meā nachibŦegu ga guxŦma, rŦ Ngechuchu toxŦ namu rŦ ŦnanagŦrŦ toxŦ: —jPenade i ngēma naxchipegegŦ i íyaxŦgŦxŦ na tama inaxaiyèxŦcèx! —ŦnanagŦrŦ. ¹³ RŦ tanade ga yema naxchipegegŦ ga yema 5 ga pāŦwa íyaxŦxŦ, rŦ 12 ga pexchi namaā tanaxŦācugŦ. ¹⁴ RŦ yexguma yema duŦxŦgŦ nŦxŦ daugŦga ga yema mexŦ ga taxŦ ga TupanaārŦ poramaā naxŦxŦ ga Ngechuchu, rŦ ŦnanagŦrŦgŦ: —AixcŦmaxŦchi daa nixŦ ya TupanaārŦ orearŦ uruŦ ga guma ínanguxēēcŦ —ŦnanagŦrŦgŦ. ¹⁵ NatŦrŦ ga Ngechuchu rŦ nŦxŦ nicuèxāchi ga duŦxŦgŦ rŦ na norŦ āexgacŦxŦ yangucuchixēēgŦchaŦāxŦ. RŦ yemacèx nŦxna nixŦgachi rŦ yēamaxŦra naxŦ nawa ga guma mēxpŦne na nŦxŦcatama nayexmaxŦcèx.

DexáétŦgu nixŦ ga Ngechuchu
(Mt 14.22-27; Mr 6.45-52)

¹⁶ RŦ yexguma marŦ nachŦtagu, rŦ toma ga NgechucharŦ ngúexŦgŦ rŦ wenaxārŦ naxtaacutŦwa taxŦ. ¹⁷ RŦ poraācŦ naxēāne. RŦ tama ínangu ga Ngechuchu. RŦ yemacèx wŦxi ga ngue ga taxŦnegu tichoŦ, rŦ itaxŦāchi ga na tocutŦwa taxŦxŦ ga CapernāārŦ íānewa na tangugŦxŦcèx. ¹⁸ RŦ yexguma tixāŦyane rŦ inaxŦgŦ ga na poraācŦ yabuaxŦ. RŦ yemagagu rŦ poraācŦ nayuape. ¹⁹ RŦ yexguma marŦ 5 ga kilómetru tixāŦgu, rŦ NgechuchuxŦ tadaugŦ ga na dexāchiuētŦgu yaxŦxŦ. RŦ toma ga norŦ ngúexŦgŦ rŦ poraācŦ tamuē. ²⁰ NatŦrŦ nŦma ga Ngechuchu rŦ ŦnanagŦrŦ toxŦ: —Choma chixŦ. jRŦ tāxŦ i pemuŦèxŦ! —ŦnanagŦrŦ. ²¹ RŦ yexguma ga toma ga norŦ ngúexŦgŦ rŦ taāēācŦma tanayauxgŦchaŦ ga toweŦwa. RŦ yexgumatama ítangugŦ ga yema ítaxŦŦwa.

Ngechuchucèx nadaugŦ ga duŦxŦgŦ

²² RŦ moxŦācŦ ga yema duŦxŦgŦ ga naxtaxaarŦ tocutŦgu rŦchoxŦ, rŦ nŦxŦ nicuèxāchanŦ ga toma ga NgechucharŦ ngúexŦgŦ ga marŦ nagu na taxŦxŦ ga guma ngue ga taxŦne ga nŦgŦmaā wŦxicane. RŦ nŦxŦ nacuèxgŦ ta ga Ngechuchu rŦ tama towe na naxŦxŦ. ²³ RŦ yexguma yemagu ínaxŦnŦēyane, rŦ yoxocŦne ínangugŦ ga náigŦ ga ngue ga itaxŦne ga TibériaarŦ íānewa ne íxŦne. RŦ norŦ ngaicamana nangugŦ ga yema nachica ga ngextá Ngechuchu ínachibŦexēēxŦwa ga yema muxŦma ga duŦxŦgŦ ga yexguma moxē inaxāxgu naxcèx ga yema pāŦ. ²⁴ RŦ yexguma yema duŦxŦgŦ nŦxŦ daugŦga ga guma nguewa na Ngechuchu rŦ toma ga na tatauxexŦma rŦ yexma guma nguegŦgu nichoŦ na Ngechuchucèx yadaugŦxŦ CapernāārŦ íānegu.

Ngechuchu nixŦ i pāŦ i maxŦ tŦxna āxŦ

²⁵ Rŭ yexguma guma naxtaxaarŭ tocutŭwa nangugŭga ga yema duŭxŭgŭ, rŭ Ngechuchuxŭ yexma nayangaugŭ. Rŭ nŭxna nacagŭe, rŭ űanagŭrŭgŭ: – Pa Ngŭexŭeŭrŭŭ, ŭűŭxgu nixŭ i nuā cunguxŭ? – űanagŭrŭgŭ. ²⁶ Rŭ Ngechuchu nanangāxŭ, rŭ űanagŭrŭ nŭxŭ: – Aixcŭma pemaā nŭxŭ chixu rŭ tama yema nŭxŭ na picuēxāchitanŭxŭcēx ga yema mexŭgŭ ga Tupanaarŭ poramaa chaxŭxŭ nixŭ i chauxcēx pedaugŭxŭ. Natŭrŭ chauxcēx pedaugŭ yerŭ meāma pechibŭe nawa ga yema ōna ga pexna chaxāxŭ. ²⁷ –ŭTāxŭ i naxcēx pepuracŭxŭ i ōna i paxama gŭxŭ! Rŭ narŭmemaē nixŭ i naxcēx pepuracŭe i ngema maxŭ i aixcŭma ixŭxŭ i taguma gŭxŭ. Rŭ ngēma nixŭ i maxŭ i choma i Tupana Nane ya duŭxŭxŭ chixŭcŭ tā pexna chaxāxŭ, erŭ Chaunatŭ ya Tupana rŭ marŭ nanangŭxēē na aixcŭma Nane chiŭxŭ – űanagŭrŭ. ²⁸ Rŭ yexguma ga nŭmagŭ rŭ nŭxna nacagŭ, rŭ űanagŭrŭgŭ: – ŭTacŭ tā taxŭe na tayangŭxēxŭcēx i ngēma Tupana toxŭ naxwēxexŭ? – űanagŭrŭgŭ. ²⁹ Rŭ Ngechuchu nanangāxŭ rŭ űanagŭrŭ nŭxŭ: – Rŭ Tupana rŭ nŭma choxŭ namu. Rŭ ngēma nŭma pexŭ nanaxwēxexŭ nixŭ na choxŭ peyaxŭgŭxŭ – űanagŭrŭ. ³⁰ Rŭ yexguma ga nŭmagŭ rŭ nŭxna nacagŭ, rŭ űanagŭrŭgŭ nŭxŭ: – ŭTacŭ rŭ cuēxruŭxŭ tā toxŭ cudauxēē na cuxŭ tayaxŭgŭxŭcēx na aixcŭma Cristu quiŭxŭ? ŭRŭ tacŭ i to i mexŭ tā toxcēx cuxŭxŭ i űŭxmax? ³¹ Yerŭ nuxcŭmaŭgŭxŭ ga tŭrŭ oxigŭ, rŭ nanangŭxŭgŭ ga yema pāu ga Tupana nŭxna āxŭ ga chianexŭtwa ga ngextā taxŭema ixāpataxŭtwa. Rŭ Tupanaarŭ ore i ŭmatŭxŭtwa rŭ űanagŭrŭ:

“Tupana rŭ daxŭcŭŭāx ga pāumaā nanachibŭexēē ga duŭxŭgŭ”, űanagŭrŭ i ngēma orewa. ³² Rŭ Ngechuchu nanangāxŭ rŭ űanagŭrŭ nŭxŭ: – Aixcŭma pemaā nŭxŭ chixu rŭ tama nixŭ ga Moŭché yŭxŭ ga nŭxna naxāxŭ ga yema pāu ga daxŭ- cŭāx, natŭrŭ Chaunatŭ ga Tupana nixŭ ga nŭxna naxācŭ. Rŭ nŭma nixŭ i űŭxma i pexna naxāāxŭ i pāu i aixcŭma ixŭxŭ i daxŭwa ne ŭxŭ. ³³ –Erŭ ngēma pāu i Tupana ixāxŭ, rŭ daxŭgŭxŭ i naānewa ne naxŭ rŭ nanamaxēxēē i űoma i naāneŭŭāx i duŭxŭgŭ – űanagŭrŭ. ³⁴ Rŭ nŭmagŭ rŭ naxcēx űnacagŭ, rŭ űanagŭrŭgŭ nŭxŭ: – Pa Corix, ŭguxŭguma toxna naxāēcha i ngēma pāu! – űanagŭrŭgŭ. ³⁵ Rŭ Ngechuchu űanagŭrŭ nŭxŭ: – Choma nixŭ i ngēma pāu i maxēxēerŭ chiŭxŭ. Rŭ yŭxema texē ya chauxŭtwa ŭxē rŭ tagutāma tataiya. Rŭ texē ya choxŭ yaxŭxē rŭ tagutāma tŭtawa. ³⁶ – Natŭrŭ marŭ pemaā nŭxŭ chixu rŭ woo na choxŭ pedaugŭxŭ rŭ tama choxŭ peyaxŭgŭ i pemax. ³⁷ –Rŭ guxāma ya yŭxema duŭxēgŭ ya Chaunatŭ choxna tŭxŭ mugŭxe rŭ chorŭ duŭxŭgŭ tixŭgŭ. Rŭ texē ya choxŭ yaxŭgŭxe rŭ tātŭtama tŭxŭ chaxŭox. ³⁸ –Yerŭ tama choxrŭtama ngŭchaŭ na chaxŭxŭcēx nixŭ ga daxŭgŭxŭ ga naānewa ne chaxŭxŭ. Natŭrŭ nŭma chaxŭ na chanaxŭxŭcēx i norŭ ngŭchaŭ ya Chaunatŭ ya nŭma choxŭ mucŭ. ³⁹ –Rŭ ngēma norŭ ngŭchaŭ ya Chaunatŭ ya Tupana ya nŭma choxŭ mucŭ nixŭ na taxŭexŭma ichayarŭtauxēxŭ ya yŭxema choxna tŭxŭ namugŭxe. Erŭ nŭma ya Chaunatŭ nanaxwae na tŭxŭ yuwa ŭcharŭdagŭxēxŭ i naānearŭ guxgu. ⁴⁰ –Choma nixŭ i Tupana Nane chiŭxŭ. Rŭ ngēma norŭ ngŭchaŭ ya Chaunatŭ ya Tupana ya nŭma choxŭ mucŭ nixŭ na tŭxŭ nangēxmaxŭ i maxŭ i taguma gŭxŭ ya guxāma ya texē ya choxŭ daugŭxe rŭ choxŭ yaxŭgŭxe. Erŭ choma tā nixŭ i tŭxŭ ŭcharŭdagŭxēxŭ i naānearŭ guxgu – űanagŭrŭ. ⁴¹ Rŭ yexguma yema orexŭ naxŭnŭgŭ ga yema Yudŭgŭ, rŭ inanaxŭgŭe ga Ngechuchuga na yadexagŭxŭ. Yerŭ űanagŭrŭ ga Ngechuchu: – Choma nixŭ i pāu i daxŭgŭxŭ i naānewa ne chaxŭxŭ – űanagŭrŭ. ⁴² Rŭ űanagŭrŭgŭ: – ŭTaux ēxna űaā yŭxŭ i Ngechuchu i Yŭche nane? Rŭ yŭxema rŭ tŭxŭ tacŭex ya nanatŭ rŭ naē. ŭRŭ

ñuxăcũ i nũma i “Daxũwa ne naxũxũ”, ñaxũ? —ñanagũrũgũ. ⁴³ Rũ Ngechuchu ñanagũrũ nũxũ: —¡Nũxũ perũxoe na choxũ na pixuechaxũ! ⁴⁴ —Taxũema chauxũtawa tangu ega tama choxna tũxũ namũxgu ya chaunatu ga guma nũma choxũ mucũ. Rũ texé ya chauxũtawa ngugũxe rũ choma rũ tá wena tũxũ chamaxẽxẽ i naãneărũ guxgu. ⁴⁵ —Nuxcũmaũgũxũ ga Tupanaărũ orearũ uruũgũarũ poperawa naxũmatũ i ore i ñaxũ:

“Tupana tá guxăxũ nangũxẽxẽ”,

ñaxũ. Rũ ngẽmacèx guxăma ya texé ya Chaunatu xũ ñũxẽ rũ naxũtawa ngũxe, rũ chauxũtawa taxĩ. ⁴⁶ —Taguma texé Chaunatu ya Tupanaxũ tadau. Rũ chaxicatama nixĩ i nũxũ chadauxũ erũ naxũtawa ne chaxũ. ⁴⁷ —Aixcũma pemaã nũxũ chixu rũ texé ya choxũ yaxõxẽ rũ tũxũ nangẽxma i maxũ i taguma gũxũ. ⁴⁸ —Choma nixĩ i pãũ i maxẽxẽruũ chĩxũ. ⁴⁹ —Rũ perũ oxigũ ga nuxcũmaũgũxũ rũ nanangõxũ ga yema pãũ ga Tupana nũxna ãxũ ga yema nachica ga ngextá taxũema íxăpataxũwa. Natũrũ woo nanangõxgũ ga yema pãũ rũ nayueamatama. ⁵⁰ —Natũrũ ñaã pãũ i pemaã nũxũ chixuxũ i daxũwa ne ũxũ rũ chomatama chixĩ. Rũ guxăma ya texé ya choxũ yaxũxe ñoma pãũ tangõxũrũ rũ tá tamaxẽcha. ⁵¹ —Chomatama nixĩ i pãũ i maxẽxẽruũ i daxũwa ne chaxũxũ. Rũ texé ya ñoma chomaã taxăwemũxũrũ choxũ yaxõxẽ rũ guxũgutama tamaxẽcha. Erũ ngẽma pãũ i choma tũxna chaxăxũ rũ chaxunetama nixĩ. Rũ ichanaxă i chaxune na namaxẽxũcèx i ñoma i naãnecũăx i duũxũgũ —ñanagũrũ ga Ngechuchu. ⁵² Rũ yexguma ga yema Yudiũgũ rũ poragaăcũ nũgũna nacagũe, rũ ñanagũrũgũ: —¡Nũxăcũ tá i ñaã yatũ i naxũne tătama tũxũ nangõxẽxũ? —ñanagũrũgũ. ⁵³ Rũ Ngechuchu ñanagũrũ nũxũ: —Rũ choma i Tupana nane na duũxũxũ chĩxũ rũ aixcũma pemaã nũxũ chixu rũ ngẽxguma pema rũ tama chaxunemaã pexăwemũgũ rũ tama nawa pexaxegũgu ya chaugũ, rũ tăũtama pexũ nangẽxma i maxũ i taguma gũxũ. ⁵⁴ —Texé ya chaxunemaã awemũxẽ rũ chaugũwa axexe rũ tũxũ nangẽxma i maxũ i taguma gũxũ. Erũ choma rũ tá tũxũ chamaxẽe ega naãneărũ guxgu. ⁵⁵ —Erũ chaxune rũ õnaxũchi nixĩ rũ chaugũ rũ axexũxũchi nixĩ. ⁵⁶ —Texé ya chaxunemaã awemũxẽ rũ chaugũwa axexe rũ chowa tayaxũx rũ choma i tũmawa. ⁵⁷ —Chaunatu ga nũma choxũ mucũ rũ namaxũ. Rũ nũma choxna nanaxă i maxũ. Rũ ngẽxgumarũũ ta i choma rũ tá tũxna chanaxă i maxũ ya yĩxema choxũ yaxũxe rũ choxũ yaxõxẽ. ⁵⁸ —Marũ pemaã nũxũ chixu na choma rũ pãũ i daxũwa ne ũxũ chĩxũ. Natũrũ choma rũ tama yema pãũ ga nuxcũmaũgũxũ ga perũ oxigũ ngõxgũxũ ga pãũrũ chixĩ. Yerũ woo ga yema pãũ na nangõxgũxũ ga perũ oxigũ rũ nayueamatama. Natũrũ texé ya choxũ yaxũxe, ñoma pãũ tangõxũrũ, rũ choxũ yaxõxẽ rũ guxũgutama tamaxũ —ñanagũrũ. ⁵⁹ Rũ Ngechuchu rũ duũxũgũmaã nũxũ nixu ga yema ore ga yexguma nangũxẽxẽăgu ga Yudiũgũarũ ngutaquẽxepataũwa ga ñane ga Capernăũwa.

Ngechucharũ orewa nangẽxma i maxũ i taguma gũxũ

⁶⁰ Rũ yexguma nũxũ naxĩnũegu ga yema nguxẽetae, rũ muxũma ga yema duũxũgũ ga nawe rũxĩxũ rũ ñanagũrũgũ: —Rũ ngẽma tamaã nũxũ yaxuxũ, rũ naguxchaxũchi na nũxũ icuăxũ na ñuxũ ñaxũ. ¡Nũxăcũ texé tũxũ natauxcha na naga taxĩnũxũ? —ñanagũrũgũ. ⁶¹ Natũrũ ga Ngechuchu rũ nũxũ nacuèxama ga yemaăcũ nũgũmaã na íyadexagũxũ naxcèx ga yema nguxẽetae, rũ yemacèx nũxna naca, rũ ñanagũrũ: —¡Ëxna peăewa nangux i ngẽma ore? ⁶² —Rũ ngẽxguma peăewa nanguxgu i ngẽma ore i pemaã nũxũ chixuxũ, rũ

¿tacügu chi perüxinüëxü ega choxü pedëuxgu na wenaxârü daxü na chaxixü, ga noxri ne chaxüxüwa na chaxüxü i choma i Tupana Nane na duüxüxü chiixü? ⁶³—Tupanaãe i Üünexü nixi i inaxaxü i maxü i taguma güxü. Rü tama pexene nixi i pexü maxëxëxü. Rü ngëma ore i pemaã nüxü chixuxü rü peãëcëx nixi, rü nawa nangëxma i maxü i taguma güxü. ⁶⁴—Natürü tangëxma i petanüwa ya ñuxre ya tama yaxögüxe —ñanagürü. Rü yema ñanagürü ga Ngechuchu yerü noxriarü ügügumama marü nüxü nacüëx ga texé tá nüxü na yaxögüxü, rü texé tá cúãcü inaxuaxüxü. ⁶⁵ Rü ñanagürü ta: —Rü ngëmacëx marü pemaã nüxü chixu rü taxuacüma texé chauxütawa tangu ega tama Chaunatu chauxütawa tüxü gaxgu —ñanagürü. ⁶⁶ Rü yexguma inanaxügüe ga nüxna na yaxügüxü ga muxüma ga yema duüxügü ga noxri nawe rüxichirëxü. Rü marü tama nawe inaxüxü. ⁶⁷ Rü yexguma ga Ngechuchu rü norü 12 ga ngüxügüna naca, rü ñanagürü nüxü: —¿Ëxna pema rü ta choxna pixigachitanüchaü? —ñanagürü. ⁶⁸ Natürü Chimáu ga Pedru rü nanangãxü, rü ñanagürü: —Pa Corix, ¿Texëxütawa chi taxixü ega cuxna tixigachitanügu? Erü cuma rü cuxü nangëxma i ore i nawa nangëxmaxü i maxü i taguma güxü. ⁶⁹ —Toma rü marü cuxü tayaxögü, rü nüxü tacüëx na cuma quüxü ya Cristu ya Üünecü ya Tupana Nane —ñanagürü. ⁷⁰ Rü Ngechuchu toxü nangãxü, rü ñanagürü: —¿Taux ëxna choma yüxü ga pexü chidexechixü ga pema ga 12? Natürü nangëxma i wüxi i petanüwa i Chatanãârü duüxü ixixü —ñanagürü. ⁷¹ Rü Yuda ga Icarüte ga Chimáu nanechiga nixi ga yadexaxü ga Ngechuchu. Yerü Yuda tá nixi ga cúãcü inaxuaxüxü rü woo ga nüma rü wüxi ga totanüxüchirëx na yüxü.

7

Ngechuchueneëgü rü tama nüxü nayaxögü

¹ Rü yemawena ga Ngechuchu rü Garirëaanewa yexmagüne ga ñänegügu nixüãgüchigü. Rü tama Yudëaanewa nayexmachaü yerü yëmacüãx ga Yudiügüarü äëxgacügü rü naxcëx nadaugü ga na yamëxgüchaüãxücëx. ² Natürü marü ñingaica ga yema Yudiügüarü peta ga nagu norü düxenügü yaxügüxü na yemawa nüxna nacüëxãchieücëx ga ñuxãcü nuxcümaügüxü ga norü oxigü na naxügüxü ga norü düxenügü ga naixätünaxcëx ga yexguma Moïchéwe naxixgu ga ngextá taxüema íxãpataxüwa. Rü yemacëx nixi ga Düxenügüarü Petagu naxãegaxü. ³ Rü naëneëgü ga Ngechuchu rü ñanagürügü nüxü: —Tama name i nuxã Garirëaarü naãnegu curüxãüx. Rü name nixi i petacëx Yudëawa cuxü, na ngëma duüxügü i cuwe rüxixü i ngema ngëxmagüxü nüxü daugüxücëx i ngëma cuëxruügü i mexügü i Tupanaârü poramaã cuxüxü. ⁴ —Erü ngëxguma chi wüxi ya yatü rü duüxügüxü nügü nacüëxëchaügu rü tama cúãcü nanaxü i tacü i naxüxü. Rü ñuxma na cunaxüxü i muxüma i mexügü i Tupanaârü poramaã cuxüxü, rü name nixi i guxü i duüxügüpëxewa cunaxü —ñanagürügü. ⁵ Rü yema ñanagürügü ga naëneëgü yerü woo ga nümagü rü ta tama nüxü nayaxögü. ⁶ Rü yexguma ga Ngechuchu rü nanangãxü, rü ñanagürü nüxü: —Tauta nawa nangu i ngunexü na petawa chaxüxü. Natürü pëxcë rü ngëxürüüxümare i ngunexü nixi i mexü na petawa nagu pëxixü. ⁷ —Ngëma duüxügü i ñoma i naãnecüãx rü tama pëxchi naxaie. Natürü chauxchi naxaie erü chanangoxëë i ngëma naxügüxü rü na nachixëxü. ⁸ —Name nixi i petawa pëxi i pemax. Choma rü tauta

ngema chaxũ erũ tauta nawa nangu i ngunexũ i nagu ngema chaxũxũ — ñanagũrũ ga Ngechuchu. ⁹ Rũ yexguma yema ñaxguwena, rũ Gariréaanegu narũxãũx.

Ngechuchu rũ Düxentũgũarũ Petawa naxũ

¹⁰ Natũrũ nawena ga naẽneẽgũ ga petawa na naxĩxũ, rũ Ngechuchu rũ ta yema naxũ. Natũrũ cúacũ yema naxũ, rũ tama poraacũ duũxũgũxũ nũgũ nadauxẽẽ. ¹¹ Rũ yema Yudĩugũarũ ãẽxgacũgũ rũ naxcẽx nadaugũ ga yema petawa, rũ ñanagũrũgũ: —¿Ngextã nangẽxma i ngẽma yatũ? — ñanagũrũgũ. ¹² Rũ nũgũtanũwa ga yema duũxũgũ ga yema yexmagũxũ, rũ poraacũ Ngechuchuchiga ínindexagũ. Rũ ñuxre ga yema duũxũgũ rũ ñanagũrũgũ: —Yima rũ wũxi ya yatũ ya mecũ nixĩ —ñanagũrũgũ. Natũrũ ga togũ rũ ñanagũrũgũ: —Ngẽma yatũ rũ tama name erũ duũxũgũxũ nawomũxẽẽ —ñanagũrũgũ. ¹³ Natũrũ taxuũma ga duũxũgũ rũ mea togũpẽxewa Ngechuchuxũ nicuẽxũũgũchaũ, yerũ yema Yudĩugũarũ ãẽxgacũgũxũ namuũẽ. ¹⁴ Rũ yexguma marũ yema petaarũ ngãxũwa nanguxgu, rũ nixũcu ga Ngechuchu nawa ga tupauca ga taxũne. Rũ inanaxũgũ ga na nanguxẽẽtaexũ. ¹⁵ Rũ yema Yudĩugũarũ ãẽxgacũgũ, rũ nabaixãchiãẽgũ namaã ga yema ore ga Ngechuchu nũxũ ixuxũ. Rũ ñanagũrũgũ: —¿Ñuxãcũ i ngẽmaãcũ poraacũ nũxũ nacuãxũ, rũ taguma texẽ nanguxẽẽ? —ñanagũrũgũ. ¹⁶ Rũ Ngechuchu nanangãxũ rũ ñanagũrũ nũxũ: —Ñãã chorũ nguxẽẽtae rũ tama choxrũ nixĩ, erũ Chaunatu ya núma choxũ mucũarũ nixĩ. ¹⁷ —Ngẽxguma texẽ naxũxchaũgũ i Tupanaãrũ ngũchaũ rũ yixema tá nũxũ tacuẽx ngoxi aixcũma Tupanaxũtawama chanayaxu i ngẽma chorũ nguxẽẽtae rũ ẽxna chaugũxũtawatama chayaxuxũ yixĩ i ngẽma. ¹⁸ —Yixema texẽ ya mexũ i tũmachigaxũtama ixuxe rũ ngẽmaãcũ tanaxũ erũ tanaxwẽxe i duũxũgũ na tũxũ icuẽxũũgũxũ. Natũrũ texẽ nũxũ tixu i ore i mexũ nachiga i ngẽma tũxũ muxũ, rũ aixcũma nixĩ i tũmaãrũ ore. Rũ tama dora nixĩ i ngẽma nũxũ tixuxũ. ¹⁹ —¿Tama ẽxna aixcũma yĩĩxũ ga Moĩché pexna naxãxũ ga Tupanaãrũ mugũ? Natũrũ taxũema i pema naga pexĩnũe i ngẽma mugũ. ¿Rũ ñuxma rũ tũxcũũ nixĩ i choxũ pimẽxgũchaũxũ? —ñanagũrũ. ²⁰ Rũ yema duũxũgũ nanangãxũgũ, rũ ñanagũrũgũ: —Cuma rũ ngoxo cuwa nangẽxmamare. ¿Éxna texẽ cuxũ timẽxgũchaũ? —ñanagũrũgũ. ²¹ Natũrũ ga Ngechuchu rũ ñanagũrũ nũxũ: —Choma rũ ngũxchigaarũ ngunexũgu chanamexẽẽ ga wũxi ga yatũ. Rũ guxãma i pema rũ penuãẽgũ naxcẽx ga yema wũxitama ga mexũ ga ngũxchigaarũ ngunexũgu chaxũxũ. ²² —Natũrũ pema rũ ta ngũxchigaarũ ngunexũgu pepuracũe na nagu pexĩxũcẽx ga Moĩchéarũ mugũ. Rũ Moĩché pemaã nũxũ nixu na tũxũ ípewiechẽxmũpẽxechiraũxũ ya guxãma ya yatũxe ya buxe. Natũrũ tama Moĩché nixĩ ga inaxũgũcũ ga yema, yerũ nuxcũmaũgũxũ ga perũ oxigũwa nixĩ ga ne naxũxũ. Rũ ñuxma i pema rũ yema mugagu rũ tũxũ ípewiechẽxmũpẽxechiraũ ya guxãma ya buxe ya yatũxe woo ngũxchigaarũ ngunexũ yixĩgu. ²³ —Rũ ngẽmaãcũ i pema rũ ngũxchigaarũ ngunexũgu buxexũ ípewiechẽxmũpẽxechiraũ erũ naga pexĩnũechaũ i Moĩchéarũ mugũ. ¿Rũ ñuxma rũ tũxcũũ yĩĩxũ i chomaã penuẽxũ naxcẽx na ngũxchigaarũ ngunexũgu chanamexẽẽxũ ga wũxi ga yatũ ga idaaweecũ? ²⁴ —Rũ ngẽmacẽx tama name i ngũrũmare penangugũ i ngẽma chaxũxũ. Rũ penaxwẽxe i meã nagu perũxĩnũexira, na aixcũma meã penangugũxũcẽx —ñanagũrũ ga Ngechuchu.

Ngechuchu rũ Tupana Nane nixĩ

²⁵ Rŭ ñuxre ga yema duŭxŭgŭ ga Yerucharéŭga āchiŭgŭxŭ rŭ nŭgŭna nacagŭe, rŭ ñanagŭrŭgŭ: —¿Taux éxna daa yiŭxŭ ya yima yatŭ ya āēxgacŭgŭ naxcèx daugŭcŭ na yamèxgŭchaŭāxŭcèx? ²⁶ —¿Dŭcèx! Gua nixŭ rŭ yéa guxŭ i duŭxŭgŭpèxewa nidexa rŭ taxŭema ñuxŭ ñatarŭgŭ nŭxŭ. ¿Taux éxna i tóru āēxgacŭgŭ i marŭ nŭxŭ yaxŭgŭāxŭ na aixcŭma Cristu na yiŭxŭ i nŭmax? ²⁷ —Natŭrŭ i yixema rŭ nŭxŭ tacuèxgŭ na ngextá ne naxŭxŭ i nŭmax. Natŭrŭ ngèxguma aixcŭma Cristu nŭma ŭxgu rŭ tagŭetáma nŭxŭ tacuèx na ngextá na ne naxŭxŭ —ñanagŭrŭgŭ. ²⁸ Rŭ nŭma ga Ngechuchu rŭ tupauca ga taxŭnewa ínanangŭexèe ga duŭxŭgŭ. Rŭ yexguma nŭxŭ naxŭnŭgu ga yema ore ga Yudiŭgŭ nŭxŭ ixugŭexŭ ga nachiga, rŭ tagaācŭ ñanagŭrŭ: —Pema rŭ marŭ choxŭ pecuèx rŭ nŭxŭ pecuèx na ngextá na ne chaxŭxŭ. Natŭrŭ tama chaugagu nixŭ i nŭma chaxŭxŭ. Choma nŭma chaxŭ yerŭ nŭma choxŭ namu ga Tupana ya naxwèxecŭ na nŭxŭ yaxŭgŭxŭ natŭrŭ i pema rŭ tama nŭxŭ pecuācŭ. ²⁹ —Choma rŭ nŭxŭ chacuèx yerŭ naxŭtawa ne chaxŭ, rŭ nŭma nixŭ i nŭma choxŭ namuxŭ —ñanagŭrŭ. ³⁰ Rŭ yexguma ga yema āēxgacŭgŭ rŭ Ngechuchuxŭ niyauxgŭchaŭ. Natŭrŭ taxuŭma nayayauxgŭ, yerŭ tauta nawa nangu ga ngunexŭ ga na yayauxgŭāxŭ rŭ na yamèxgŭāxŭcèx. ³¹ Natŭrŭ muxŭma ga duŭxŭgŭ rŭ nŭxŭ nayaxŭgŭ. Rŭ ñanagŭrŭgŭ: —¿Ngèxguma ínanangxu ya Cristu rŭ tacŭ rŭ cuèxrŭ i taxŭ tá naxŭ ya daa yatŭ tama ŭxŭ i ñuxmax? —ñanagŭrŭgŭ.

Parichéugŭ rŭ Ngechuchuxŭ niyauxgŭchaŭ

³² Rŭ yema Parichéugŭ rŭ duŭxŭgŭxŭ naxŭnŭe ga yemaācŭ Ngechuchuchiga na yadexagŭxŭ. Rŭ yemacèx ga nŭmagŭ rŭ paigŭarŭ āēxgacŭgŭ rŭ yéma nanamugŭ ga tupauca ga taxŭneārŭ purichíagŭ na Ngechuchuxŭ yanayauxgŭxŭcèx. ³³ Rŭ yexguma ga Ngechuchu rŭ ñanagŭrŭ nŭxŭ: —Paxaāchi tátama nixŭ i petanŭwa changèxmaxŭ, rŭ ñuxŭchi tá chataegu naxŭtawa ya yima nŭma choxŭ mucŭ. ³⁴ —Pema rŭ tá chauxcèx pedaugŭ, natŭrŭ tātáma choxŭ ipeyangaugŭ. Erŭ ngéma ngextá tá íchangèxmaxŭwa rŭ taxuacŭ ngema pengugŭ. ³⁵ Rŭ yexguma ga yema Yudiŭgŭarŭ āēxgacŭgŭ rŭ nŭgŭna nacagŭe, rŭ ñanagŭrŭgŭ: —¿Ngextá tá naxŭ ega taxuacŭtáma nŭxŭ iyarŭngaugŭgu? ¿Éxna ngéma Yudiŭgŭ i to i nachíŭānewa ngèxmaxŭxŭtanŭwa tá naxŭ rŭ éxna ngéma tama Yudiŭgŭ ixŭgŭxŭtanŭwa tá naxŭ na yangŭexèeāxŭcèx? ³⁶ —¿Rŭ tacŭchiga nixŭ i ngéma na ngéma ñaxŭ:

“Tá chauxcèx pedaugŭ natŭrŭ tātáma choxŭ ipeyangaugŭ, erŭ taxuacŭtáma ngema pexŭ i ngéma tá íchangèxmaxŭwa”, ñaxŭ? —ñanagŭrŭgŭ.

Dexá i maxèerŭtchiga nidexa ga Ngechuchu

³⁷ Rŭ yema nawa iyacuāxŭ ga petaarŭ ngunexŭ nixŭ ga guxŭ ga togŭ ga ngunexŭārŭ yexera rŭmemaèxŭ naxcèx ga Yudiŭgŭ. Rŭ yema ngunexŭgu nixŭ ga inachixŭ ga Ngechuchu rŭ tagaācŭ ñaxŭ: —Rŭ ngèxguma texé itawaxgu rŭ ñuā chauxŭtawa taxŭ rŭ tayaxax! ³⁸ —Rŭ “texé ya choxŭ yaxŭxé rŭ tumaārŭ maxŭnewa tá nibaibe i taxŭ i dexá i maxèerŭtŭ” ngéma Tupanaārŭ ore i ŭmatŭxŭ nŭxŭ ixuxŭrŭŭ —ñanagŭrŭ. ³⁹ Rŭ yexguma yema ñaxgu ga Ngechuchu rŭ Tupanaāe i Ŭnèxŭchiga nixŭ ga yadexaxŭ. Rŭ nŭxŭ nixu ga guxŭma ga yema nŭxŭ yaxŭgŭxŭ rŭ tá na nayauxgŭāxŭ i

Naãe i Üünexũ. Natürũ tama yexgumatama nanayauxgũ, yerũ tauta wenaarũ daxũguxũ ga naãnecèx nataegu ga Ngechuchu na guxũarũ ãëxgacũ na yĩxũcèx.

Ngechuchugagu nũgũ nitoye ga duũxũgũ

⁴⁰ Rũ nũmaxũ ga yema duũxũgũ rũ yexguma nũxũ naxĩnũëgu ga yema Ngechuchu nũxũ ixuxũ, rũ ñanagürügũ: —Aixcũma ñaã yatũ nixĩ i ngẽma Tupanaarũ orearũ uruũ i inguxchaũxũ —ñanagürügũ. ⁴¹ Rũ togũ rũ ñanagürügũ: —Daa nixĩ ya Cristu —ñanagürügũ. Natürũ togũ rũ ñanagürügũ: —Tama nixĩ, erũ taxucürũwa Gariréanecũãx nixĩ ya Cristu. ⁴² —Erũ Tupanaarũ ore i ñmatũxũwa rũ ñanagürũ:

“Cristu rũ tá Dabítaa nixĩ, rũ tá nangox i ñãe i Beréũwa ga ngextá Dabĩ ñbuxũwa”, ñanagürügũ. ⁴³ Rũ yemaãcũ Ngechuchugagu nũgũ nitoye ga duũxũgũ. ⁴⁴ Rũ ñuxre ga yema duũxũgũ rũ Ngechuchuxũ niyauxgũchaũ, natürũ taxuũma nayauxgũ.

Yudiũgũarũ ãëxgacũgũ rũ tama Ngechuchuxũ nayaxõgũchaũ

⁴⁵ Rũ yema tupauca ga taxũnearũ purichĩagũ, rũ Parichéugũcèx rũ paigũarũ ãëxgacũgũcèx nawoegu. Rũ yema ãëxgacũgũ rũ nũxna nacagũ, rũ ñanagürügũ: —¿Tũxçũũ tama nuã penaga? —ñanagürügũ. ⁴⁶ Rũ yema purichĩagũ rũ nanangãxũgũ rũ ñanagürügũ: —Taguma texé tidexa i ñaã yatũ idexaxürũũ —ñanagürügũ. ⁴⁷ Rũ yexguma ga Parichéugũ rũ ñanagürügũ nũxũ: —¿Éxna pexũ rũ ta marũ nawomũxëe i nũmax? ⁴⁸ —Dücèx, rũ taxúema i tomãx i Parichéugũ rũ taxuũma i tórũ ãëxgacũgũ rũ nũxũ nayaxõgũ i ngẽma Ngechuchu. ⁴⁹ —Natürũ ñaã duũxũgũ i tama Tupanaarũ mugũxũ cuèxgũxũ rũ marũ nachixexũgũgũ —ñanagürügũ. ⁵⁰ Natürũ Nicodému ga Parichéu ixĩcũ ga wũxicana Ngechuchuxũtagu naxũãnecũ, rũ ñanagürũ nũxũ: ⁵¹ —Ngẽma tórũ mugũ i ñmatũxũwa rũ ñanagürũ:

“Taxuacũma wũxi i yatũxũ tapoxcu ega tama nũxũ ixĩnũëxĩragu i norũ dexa na nũxũ icuãxũcèx na ñacũ na naxũxũ”, ñanagürũ. ⁵² Rũ yexguma ga natanũxũgũ rũ nanangãxũgũ, rũ ñanagürügũ nũxũ: —¿Éxna cuma rũ ta Gariréanecũãx quixĩ? ¡Nawa nangux i Tupanaarũ ore i ñmatũxũ rũ ngema tá nũxũ cudau rũ taxuũtãma i Tupanaarũ orearũ uruũ rũ Gariréanecũãx nixĩ! —ñanagürügũ. ⁵³ Rũ yexguma ga wũxichigũ rũ nachĩũwa naxĩ.

8

Nge ga ãtecũ ga naĩ ga yatũmaã ngẽãexcũ

¹ Rũ Ngechuchu rũ Orĩbunecũgu ãegane ga mèxpũnewa naxũ. ² Rũ moxũãcũ ga yexguma yangunegu, rũ wenaarũ tupauca ga taxũnecèx nataegu. Rũ ga duũxũgũ rũ naxcèx naxĩ. Rũ nũma ga Ngechuchu rũ ñnarũto, rũ inanaxũgũ ga na nangúexëãaxũ ga duũxũgũ. ³ Rũ yema ngúexëeruũgũ ga Moĩchearũ mugũwa nguxëãtaegũxũ rũ Parichéugũ, rũ Ngechuchuxũtawã ngĩxũ nagagũ ga wũxi ga nge ga ãtecũ ga ngĩxũ nadaugũcũ ga naĩ ga yatũmaã na inapexũ. Rũ guxũma ga yema duũxũgũ ga yema yexmagũxũpèxegu ngĩxũ nayachixëëgũ. ⁴ Rũ ñanagürügũ Ngechuchuxũ: —Pa Ngúexëeruũx, ñaã nge i ãtecũ rũ ngĩxũ itayangau na naĩ ya yatũmaã na inapexũ. ⁵ Moĩchearũ mugũwa tamaã nũxũ nixu na nutamaã ngĩxũ íimuxũchiãcũma ngĩxũ imãxũ i wũxi i nge i ngẽmaãcũ maxũcũ. ¿Nuxũ ñacuxũ i cuma i ñuxmax? —ñanagürügũ. ⁶ Rũ yema

ñanagürügü ga nümagü, yerü Ngechuchuxü guxchaxügu nanguxëëgüchaŭ na nüxü nayexmaxüçex ga tacüçex na ínaxuaxügüãxü. Natürü ga Ngechuchu rü inayarümaxächi rü inanaxügü ga naxmëxmaã waixümwä na naxümatüãxü. ⁷ Natürü nüxü nacëëxügüama, rü yemacëx düxwa wenaxärü nadaunagü ga Ngechuchu, rü ñanagürü nüxü: —Ngexerüxe i petanüwa ya ngearü pecaduãxë rü tuxira nuta ngixü tanaña —ñanagürü. ⁸ Rü wenaxärü inayarümaxächi ga Ngechuchu rü naxmëxmaã nanaxümatü ga waixümwä. ⁹ Natürü yexguma nüxü naxínüëgu ga yema ore ga Parichëügü rü inanaxügüe ga nügü na yawüxixü ga nügüwe na ínachoxüxü. Rü yaguãxgü ga Parichëügüwa inaxügü ga na ínachoxüxü rü düxwa guxüma ínachoxü. Rü yexguma marü guxüma ga Parichëügü íchoüxgu, rü Ngechuchu rü yema ngeçüxicatama yëma duüxügüpëxewa nayaxügü. ¹⁰ Rü yexguma ga Ngechuchu rü wena nadaunagü. Rü ngixna naca rü ñanagürü ngixü: —Pa Ngeçüx, çNgëxügü nixi i ngëma cuxü ixügüexü? çRü taxuüma cuxü imáxchaŭ? —ñanagürü. ¹¹ Rü ngïma rü ngïgürügü nüxü: —Taxuüma Pa Corix —ngïgürügü. Rü yexguma ga Ngechuchu rü ñanagürü ngixü: —Choma rü ta tama cuxü chapoxcu. Nüxma rü marü name rü íquixü rü tama wena pecadu cuxü —ñanagürü.

Ngechuchu rü ñoma i naãneärü ngóonex- ëëruü nixi

¹² Rü wenaxärü duüxügümaã nidexa ga Ngechuchu, rü ñanagürü nüxü: —Choma nixi i ñoma i naãnecüãxärü ngóonexëëruü. Rü yixema chowe rüxüxë rü chorü ngóonexüwa tangëxma rü tuxna chanaxä i maxü. Rü tá nüxna ítanguxuchi i tümaärü chixexü —ñanagürü. ¹³ Rü yexguma ga Parichëügü rü ñanagürügü nüxü: —Cuma rü cugüchigaxütama quixu. Rü ngëma cuchiga i nüxü quixuxü rü taxuwama name —ñanagürügü. ¹⁴ Rü Ngechuchu nanangãxü rü ñanagürü nüxü: —Rü ngëma ore i chauchiga nüxü chixuxü rü aixcüma nixi woo chomatama yixügu i namaã chaugüëtüwa chidexaxü. Erü choma rü nüxü chacuëx i ngextá ne chaxüxü, rü ngextá tá chaxüxü. Natürü pema rü tama nüxü pecuëx na ngextá ne chaxüxü rü tama nüxü pecuëx na ngextá tá chaxüxü. ¹⁵ Pema rü choxü pengügü i ñoma i naãnecüãx i duüxügü nagu rüxínüëxüãcümamare. Natürü i choma rü taxüexüma changugü. ¹⁶ Natürü ngëxguma chi texëxü changugügu rü aixcüma meãma tüxü changugü. Erü tama chaxicatama tüxü changugü, natürü yima Chaunatü ga núma choxü mucümaã nixi i wüxigu tüxü tan-gugüxü. ¹⁷ Rü ngëma muçü ga Moïché ümatüxü i nagu pexixü, rü ñanagürü:

“Ngëxguma taxre i duüxügü rü wüxitama i orexü yaxugügu, rü ngëmawa aëxgacü nüxü nacuëx na aixcüma yixü i ngëma nüxü yaxugüexü”, ñanagürü. ¹⁸ Rü dücax, choma nixi i wüxi i chauchigaxü chixuxü rü Chaunatü ga núma choxü mucü nixi ya naí. çRü tüxcüü tama choxü peyaxögüchaŭ i ñuxmax? —ñanagürü. ¹⁹ Rü yexguma ga nümagü rü nüxna nacagüe rü ñanagürügü: —çNgexcü ya yima Cunatü? —ñanagürügü. Rü Ngechuchu nanangãxü rü ñanagürü: —Choxü rü tama pecuëx rü Chaunatüxü rü ta tama pecuëx. Rü ngëxguma chi choxü pecuëxgügu rü Chaunatüxü rü chi ta pecuëxgü —ñanagürü. ²⁰ Rü yema orexü nixu ga Ngechuchu ga yexguma nanguxëëtaegu ga tupauca ga taxünewa naxütawa ga yema nachica ga ngextá duüxügü tupaucana díëru ngixü íxägüxüwa. Natürü taxuüma Ngechuchuxü niyauxgü, yerü tauta nawa nangu ga yema ngunexü ga nagu yayauxgüãxü.

Ngechuchu rü Parichëügümaã nüxü nixu rü ngextá nüma ínaxüüwa rü taxucürüwa ngema naxi

21 Rŭ Ngechuchu rŭ wenaxârŭ namaã nŭxŭ nixu, rŭ ñanagŭrŭ: —Choma rŭ tá pexna chixŭ i núma, rŭ pema rŭ tá chauxcèx pedaugŭ, natŭrŭ tá perŭ pecadugu peyue. Rŭ ngextá íchaxŭxŭwa rŭ taxucŭrŭwama ngema pexŭ — ñanagŭrŭ. 22 Rŭ yexguma ga yema Yudiugŭ rŭ ñanagŭrŭgŭ: —¿Éxna nŭgŭ tátama nimèx rŭ ngèmacèx tamaã nŭxŭ yaxuxŭ na taxucŭrŭwama ngema ixŭxŭ i ngèma ínaxŭxŭwa? —ñanagŭrŭgŭ. 23 Rŭ Ngechuchu ñanagŭrŭ nŭxŭ: —Pema rŭ ñoma i naãnecŭãx i duŭxŭgŭ pixŭgŭ, natŭrŭ i choma rŭ daxŭguxŭ i naãnewa ne chaxŭ. Pema rŭ ñoma i naãnearŭ duŭxŭgŭ pixŭgŭ natŭrŭ i choma rŭ tama ñoma i naãnecŭãx chixŭ. 24 —Rŭ ngèmacèx pemaã nŭxŭ chixu rŭ tá perŭ pecadugu peyue. Erŭ ngèxguma tama choxŭ peyaxŭgŭgu na choma chiŭxŭ ya Cristu, rŭ perŭ pecadugu tá peyue —ñanagŭrŭ. 25 Rŭ yexguma nŭxna nacagŭe, rŭ ñanagŭrŭgŭ: —¿Natŭrŭ texé quixŭ i cumax? —ñanagŭrŭgŭ. Rŭ Ngechuchu nanangãxŭ, rŭ ñanagŭrŭ: —Marŭ noxritama pemaã nŭxŭ chixu na texé chiŭxŭ. 26 —Rŭ choma rŭ choxŭ nangèxma i muxŭma i tacŭ i chomatama pexŭ changŭexèèchaŭxŭ rŭ tacŭcèx pexna na chaçaxŭ, natŭrŭ táutáma chanaxŭ i ngèma. Erŭ yima Chaunatŭ ga núma choxŭ mucŭ chomaã nŭxŭ ixuxŭ i orexicatama nixŭ i ñoma i naãnecŭãxgŭmaã nŭxŭ chixuxŭ. Rŭ guxŭma i ngèma nŭxŭ yaxuxŭ ya Chaunatŭ, rŭ aixcŭma nixŭ —ñanagŭrŭ. 27 Natŭrŭ nŭmagŭ rŭ tama nŭxŭ nacuèxgŭéga ga Nanatŭ ya Tupanachiga na yiŭxŭ na yema ñaxŭ ga Ngechuchu. 28 Rŭ yemacèx ga Ngechuchu rŭ ñanagŭrŭ nŭxŭ: —Choma nixŭ i Tupana Nane i duŭxŭxŭ chiŭxŭ. Rŭ yixcŭra ngèxguma curuchawa choxŭ pipotagŭgu, rŭ tá nŭxŭ picuèxãchitanŭ na Cristu na chiŭxŭ. Rŭ tá nŭxŭ pecuèx na taxuŭma chauechamatama chaxŭxŭ. Rŭ ngèma Chaunatŭ chomaã nŭxŭ ixuxŭxŭicatama nixŭ i pemaã nŭxŭ chixuxŭ. 29 —Yima núma choxŭ mucŭ ya Chaunatŭ rŭ chauxŭtawa nangèxma. Rŭ taguma choxna nixŭgachi, erŭ choma rŭ guxŭguma chanaxŭ i ngèma norŭ ngúchaŭ ixŭxŭ —ñanagŭrŭ. 30 Rŭ yexguma yema ñaxgu ga Ngechuchu rŭ muxŭma ga duŭxŭgŭ nŭxŭ nayaxŭgŭ.

Yixema Tupanaxãcŭgŭ ixŭgŭxechiga, rŭ yixema pecadutŭŭwa ngèxmagŭxechiga

31 Rŭ yexguma ga Ngechuchu rŭ ñanagŭrŭ nŭxŭ ga yema Yudiugŭarŭ ãèxgacŭgŭ ga nŭxŭ yaxŭgŭxŭ: —Ngèxguma pema meãma peyaxŭgŭechagu i ngèma pemaã nŭxŭ chixuxŭ, rŭ aixcŭmaxŭchi tá chorŭ ngúexŭgŭ pixŭgŭ. 32 —Rŭ tá nŭxŭ pecuèx i ore i aixcŭma ixŭxŭ. Rŭ ngèma ore tá pexŭ ínanguxŭxèè —ñanagŭrŭ. 33 Rŭ nŭmagŭ rŭ Ngechuchuxŭ nangãxŭgŭ, rŭ ñanagŭrŭgŭ: —Toma rŭ nuxcŭmaŭcŭ ga torŭ oxŭ ga Abrãŭtaa tixŭgŭ rŭ taguma texémèxèwa tangèxmagŭ. ¿Nuxãcŭ i cumax rŭ tá na ítanguxŭxŭ, ñacuxŭ? —ñanagŭrŭgŭ. 34 Rŭ Ngechuchu ñanagŭrŭ nŭxŭ: —Aixcŭma pemaã nŭxŭ chixu rŭ guxãma ya pecaduãxè rŭ pecadutŭŭwa tangèxmagŭ. 35 —Wŭxi i coriarŭ duŭxŭmare rŭ tama norŭ coripatacŭãx nixŭ. Natŭrŭ wŭxi i cori nane rŭ guxŭguma nanatŭ nane nixŭ. 36 —Choma rŭ Tupana Nane chixŭ. Rŭ ngèxguma chi choma pecaduna pexŭ íchanguŭxèègu, rŭ aixcŭma tá nŭxna ípenguŭ. 37 —Marŭ nŭxŭ chacuèx na Abrãŭtaa pixŭgŭxŭ i pemax. Natŭrŭ choxŭ pimèxgŭchaŭ erŭ tama aixcŭma choxŭ peyaxŭgŭ i ngèma ore i pemaã nŭxŭ chixuxŭ. 38 —Choma rŭ yema Chaunatŭ choxŭ wèxŭ nixŭ i pemaã nŭxŭ chixuxŭ. Natŭrŭ pema rŭ penaxŭ i ngèma penatŭ pemaã nŭxŭ ixuxŭ —ñanagŭrŭ ga Ngechuchu. 39 Rŭ nŭmagŭ rŭ Ngechuchuxŭ nangãxŭ rŭ ñanagŭrŭgŭ: —Torŭ oxŭ nixŭ ga Abrãŭ —ñanagŭrŭgŭ. Natŭrŭ Ngechuchu nanangãxŭ rŭ ñanagŭrŭ nŭxŭ: —Ngèxguma chi aixcŭma Abrãŭtaa pixŭgŭgu rŭ chi Abrãŭ

üxürüü penaxü. ⁴⁰ —Natürü woo pemaã nüxü chixu i ore i aixcüma ixixü ga Chaunatü ga Tupana choxü nguxëëxü, rü pema rü choxü pimëxgüchaü. Natürü ga Abráü rü taguma yemaãcü nanaxü. ⁴¹ —Pema rü penaxü i penatügümatama —ñanagürü. Rü yexguma ga nümagü rü ñanagürügü: —Toma rü tama tangürüwaügümare, rü toxü nangëxma ya wüxitama ya tonatü. Rü yima nixi ya Tupana —ñanagürügü. ⁴² Rü Ngechuchu nanangãxü, rü ñanagürü nüxü: —Ngëxguma chi aixcüma Tupana yixigu ya penatü rü choxü chi pengechaü, erü choma rü Tupanaxütawa nixi i ne chaxüxü, rü ngëmacëx chanuxma. Rü tama chauechamatama núma chaxü, natürü núma chaxü yerü Chaunatü ya Tupana núma choxü namu. ⁴³ —¿Tüxcüü tama nüxü pecuëxéga i ngëma pemaã nüxü chixuxü? Pexü naguxcha erü woetama tama iperüxüñüëchaü i ngëma pemaã nüxü chixuxü i ore. ⁴⁴ —Penatü rü Chataná nixi rü pema rü naxäcügü pixigü. Rü ngëmacëx penaxü i ngëma núma pexü nanaxwëxexü. Rü ngëma Chataná rü noxriarü ügügumama wüxi i máëtaxü nixi. Rü taguma ore i aixcümaxügu narüxüñü rü taguma ore i aixcümaxü nixu. Rü ngëxguma yadeaxgu rü doraxüxücatama nixu, erü núma rü wüxi i doratëxáxü nixi. Rü guxüma i doratëxáxüñatü nixi. ⁴⁵ —Natürü i pema rü tama choxü peyaxögüchaü erü ore i aixcümaxü chixu. ⁴⁶ —¿Texé ya petanüwa choxü dauxe na pecadu chaxüxü? Rü ñuxma na nüxü chixuxü i ore i aixcüma ixixü, rü ¿tüxcüü tama choxü peyaxögü? ⁴⁷ —Texé ya Tupanaärü duüxü ixixë rü itarüxüñü i Tupanaärü ore. Natürü i pema rü tama Tupanaärü duüxügü pixigü, rü ngëmacëx nixi i tama iperüxüñüëchaüxü i Tupanaärü ore —ñanagürü.

Tauta nangoxgu ga Abráü rü Cristu rü marü nayexma

⁴⁸ Rü yexguma ga yema Yudíguarü äëxgacügü rü ñanagürügü nüxü: —Rü aixcüma nixi ga yema torü ore ga yexguma ñatagügügu:

“Cuma rü wüxi i Chamáriacüãx quixi, rü ngoxo cuwa nangëxma”, ñatagügügu —ñanagürügü. ⁴⁹ Rü Ngechuchu nanangãxü, rü ñanagürü nüxü: —Chowa rü nataxuma i ngoxo. Rü ngëma chaxüxü nixi na Chaunatüxü chicuëxüüxü, natürü i pema rü chixri chauchiga pidexagü. ⁵⁰ —Choma rü tama naxcëx chadau na texé choxü icuëxüügüxüçëx. Natürü Tupana nixi ya naxwëxecü na duüxügü choxü icuëxüügüxü. Rü núma tá nanapoxcue i ngëma chauxchi aiexü. ⁵¹ —Aixcüma pemaã nüxü chixu, rü texé ya naga ñnüxë i ngëma tümamaã nüxü chixuxü rü guxügutáma tamaxëcha —ñanagürü. ⁵² Rü yexguma ga yema Yudíguarü äëxgacügü, rü Ngechuchuxü nangãxügü, rü ñanagürügü: —Ñuxma rü meãxüchima nüxü tacuëx na cuwa nangëxmaxü i wüxi i ngoxo. Yerü ga Abráü rü guxüma ga nuxcümaügüxü ga Tupanaärü orearü uruügü rü nayue. Natürü cuma rü ñuxma tomaã nüxü quixu rü texé ya naga ñnüxë i ngëma curü ore rü guxügutáma tamaxëcha —ñacurügü.

⁵³ —¿Ëxna cuma rü törü oxü ga Abráüärü yexera quixi? Yerü núma rü nayu rü guxüma ga nuxcümaügüxü ga Tupanaärü orearü uruügü rü ta nayue. ¿Rü cugüçëx rü texé quixi? —ñanagürügü. ⁵⁴ Rü Ngechuchu nanangãxü, rü ñanagürü nüxü: —Ega chaugü chitama chicuëxüügu rü ngëma rü taxuwama name. Natürü yima choxü icuëxüücü rü Chaunatü nixi. Rü yima Chau-natütama nixi ya perü Tupana ixicü —ñapegücü nüxü. ⁵⁵ —Natürü i pema rü tama aixcüma nüxü pecuëx ya Chaunatü ya Tupana. Natürü i choma rü ngëmaãcü nüxü chacuëx. Rü ngëxguma chi:

“Tama nüxü chacuëx”, ñachaxgu, rü pexrüü chi wüxi i doratëxáxü chixi. Natürü i choma rü aixcümaxüchima nüxü chacuëx ya Chaunatü ya Tupana,

rü naga chaxĩnü i guxũma i norü ore i chomaã nüxũ yaxuxũ. ⁵⁶—Perü oxĩ ga Abráũ rü nataãe yerü aixcũma nayaxõ rü tá na íchanguxũ i ñoma i naãnewa. Rü yemaxũ nacuèx rü yemacèx nataãe —ñanagürü ga Ngechuchu. ⁵⁷Rü yexguma ga yema Yudíuguarü äëxgacügü rü Ngechuchuxũ nangãxũgü, rü ñanagürügü: —Cuma rü tauta 50 ya taunecü cuxũ nangëxma. ¿Ñuxãcü Abráũxũ cudau ga tauta cunçoqxug ga yexguma? —ñanagürügü. ⁵⁸Rü Ngechuchu nanangãxũ rü ñanagürü nüxũ: —Aixcũma pemaã nüxũ chixu rü tauta Abráũ ngoxgu rü choma rü marü chayexma —ñanagürü. ⁵⁹Rü yexguma ga nümagü rü nutane nanayauxgü na gumamaã ínamuxũchigüãxũcèx. Natürü ga Ngechuchu rü naxchaxwa inicux. Rü yemaãcü ínaxũxũ nawa ga guma tupauca ga taxũne.

9

Ngechuchu nanamexëe ga wüxi ga yatü ga norü bucüma ngexetücü

¹ Rü yexguma namagu tomaã yaxũxgu ga Ngechuchu, rü yéma nüxũ nadau ga wüxi ga yatü ga woetama norü bucüma ngexetücü. ² Rü toma ga norü ngüexũgü rü nüxna tacagü, rü ñatarügügü: —Pa Ngüexëeruũx, ¿Tüxcüũ ngexetücüma nabu ya daa yatü? ¿Éxna nanatü rü naëärü pecadugagu rü éxna norü pecadugagutama? —ñatarügügü. ³ Rü Ngechuchu toxũ nangãxũ, rü ñanagürü toxũ: —Tama norü pecadugagu rü tama i nanatü rü naëärü pecadugagu nixĩ i ngëmaãcü nabuxũ. Natürü ngëmaãcü nabu na nawa nüxũ pedauxũcèx na ñuxãcü Tupana tüxũ na rümexëèxũ. ⁴ —Rü ñoma rü ta nangune rü name nixĩ na paxama na naxũxũ i ngëma puracü ya Chaunatü ga núma choxũ mucü tüxna äxũ. Erü paxa tá nachüta rü ngëxguma rü taxucürüwama texé tá tapuracü. ⁵ —Rü ñuxma na ñoma i naãnewa changëxmaxũ rü ñoma i naãneärü ngóonexëeruũ chixĩ —ñanagürü. ⁶ Rü yexguma yema ñaxguwena rü Ngechuchu waixũmüãnewa nacuaxi. Rü yema waixũmü ga iwaixũmaã nanachaxetü ga guma yatü ga ngexetücü. ⁷ Rü yexguma guma ngexetücüxũ ñanagürü: —¡Dexámaã cugü yayauxetü i Chiruéarü puchuwa! —ñanagürü. Rü ngëma naega rü “Tüxũ muxũ”, ñaxũchiga nixĩ. Rü yéma naxü ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸ Rü yexguma ga yema duũxũgü ga guma ngexetücüpataarü ngaicamixetü pegüxũ rü yema duũxũgü ga üpaacü nüxũ daugüxũ ga na nangexetüxũ, rü ñanagürügü: —¿Taux éxna i ñaã yĩixũ ga yema yatü ga ngexetüchiréxũ ga duũxũgüxũ díerucèx cèèxũxũ? —ñanagürügü. ⁹ Rü nümáxũ rü ñanagürügü: —Ngëmaãcü núma nixĩ —ñanagürügü. Rü togü rü ñanagürügü: —Tama nixĩ i yima yĩixũ, natürü nanangëxgumaraũxũchi —ñanagürügü. Natürü nümatama ga guma yatü ga ngexetüchirécü, rü ñanagürü: —Ngëmaãcü choma chixĩ —ñanagürü. ¹⁰ Rü yexguma ga yema duũxũgü rü nüxna nacagü rü ñanagürügü: —¿Rü ñuxãcü nixĩ i marü quidauchixũ i ñuxmax? —ñanagürügü. ¹¹ Rü núma nanangãxũ rü ñanagürü: —Yima yatü ya Ngechuchugu äegacü rü yima waixũmüãnewa nacuaxi. Rü yema waixũmü ga iwaixũmaã choxũ nachaxetü. Rü ñanagürü choxũ:

“¡Yéa Chiruéarü puchuwa naxü rü ngema dexámaã cugü yayauxetü!” ñanagürü choxũ. Rü yéma chaxũ, rü yexguma dexámaã chaugü chayauxetü rü chidauchi —ñanagürü ga guma yatü. ¹² Rü yexguma nüxna nacagü, rü ñanagürügü: —¿Ngextá nangëxmaxũ i ñuxma ya yima yatü ya cuxũ rümexëècü? —ñanagürügü. Rü núma ga guma yatü ga ngexetüchirécü rü ñanagürü: —Tama nüxũ chacuèx —ñanagürü.

Parichéugü rü guma ngexetücü ga Ngechuchu namexêëcûna nacagüe

13-14 Natürü yema ngunexü ga Ngechuchu nagu namexêëxü ga guma ngexetücü, rü ngüxchigaarü ngunexü nixí. Rü yemacêx ga duüxügü rü Parichéugüxütawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü ñanagürügü: —¿Ñuxácü i marü curümexêtüxü i ñuxmax? —ñanagürügü. Rü nüma nanangãxü rü ñanagürü: —Waixüümü ga naxbüxágümaã yawaixêëxümaã choxü nachaxetü ga Ngechuchu, rü ñuxüchi dexámaã chaugü chayayauxetü, rü ngêmacêx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxü rümexêëxü rü tama Tupanaärü duüxü nixí, erü tama nanaxaure i ngüxchigaarü ngunexü —ñanagürügü. Natürü togü ga Parichéugü rü ñanagürügü: —¿Ñuxácü nanaxü i ngêma cuèxruü i mexü i taxü ega wüxi i pecaduãxü yixixgux? —ñanagürügü. Rü yemaãcü nügü nitoye ga nagu naxínüëxüwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxü ñacuxü nachiga i ngêma yatü ga cuxü rümexêëxü? —ñanagürügü. Rü nüma nanangãxü, rü ñanagürü: —Chauxcêx rü wüxi i Tupanaärü orearü uruü nixí —ñanagürü. ¹⁸ Natürü ga yema Yudíugüarü ãëxgacügü rü tama nüxü nayaxögüchaü ga nüma na yíxü ga na nangexetüchiréxü ga noxrix, rü ñuxma rü marü na yadauchixü. Rü yemacêx ga yema ãëxgacügü rü tümacêx nangemagü ga nanatü rü naë ga guma yatü ga rümexêtücü. ¹⁹ Rü tüxna nacagü, rü ñanagürügü: —¿Daa yíxü ga guma pene ga nüxü pixucü ga woetama ngexetüácü bucü? ¿Ñuxácü i ñuxma i yadauchixü? —ñanagürügü. ²⁰ Rü nanatü rü naë tanangãxügü rü ñatarügügü: —Ngêmaãcü nüxü tacuèx rü daa nixí ya tone ga ngexetüácüma buchirécü. ²¹ Natürü tama nüxü tacuèx ga ñuxácü na yadauchixü i ñuxmax. Rü tama nüxü tacuèx ga texé na namexêtüxêëxü. ¡Ëcü nüxnatama pecagü! Erü nüma rü marü naya, rü nümatama pemaã nüxü na yaxuxücêx —ñatarügügü. ²² Rü yema ñatarügügü ga nanatü rü naë, yerü tamuüê. Yerü ga Yudíugüarü ãëxgacügü rü marü nügümaã nanamexêëgü na tüxü ínatêxüchigüxücêx ga ngutaquêxepataüwa ga texé ga Ngechuchuaxü yaxôxê na Cristu yíxü. ²³ Rü yemacêx nixí ga nanatü rü naë ga ñatagügüxü: “¡Ëcü, nüxnatama pecagü! Erü nüma rü marü naya rü nümatama pemaã nüxü na yaxuxücêx”, ñatagügüxü. ²⁴ Rü yexguma ga yema Yudíugüarü ãëxgacügü rü wenaxärü naxcêx nacagü ga guma ngexetüchirécü. Rü ñanagürügü nüxü: —Rü ñuxma tanaxwêxe i Tupanapêxewa rü aixcüma tomaã nüxü quixu na texé cuxü rümexêëxü. Erü toma rü meãma nüxü tacuèx i ngêma Ngechuchu rü wüxi i pecaduãxü na yíxü —ñanagürügü. ²⁵ Rü nüma nanangãxü rü ñanagürü nüxü: —Choma rü tama nüxü chacuèx ega wüxi i pecaduãxü yixígu rü êxna tama. Rü ngêma nüxü chacuãxü nixí ga na changexetüchiréxü ga noxrix rü ñuxma rü na chidauchixü —ñanagürü. ²⁶ Rü wenaxärü nüxna nacagüe, rü ñanagürügü: —¿Rü tacü nixí ga cumaã naxüxü? ¿Rü ñuxácü ga naxüãxü ga cuxü na yadauchixetüxêëxü? —ñanagürügü. ²⁷ Rü nanangãxü rü ñanagürü nüxü: —Marü pemaã nüxü chixu, rü tama choxü iperüxínüëchaü. ¿Tüxcüü penaxwêxe na wena pemaã nüxü chixuxü? ¿Ëxna pema rü ta nüxü peyaxögüchaü? —ñanagürü. ²⁸ Rü yexguma rü guma yatümaã chixexü nixügüe, rü ñanagürügü: —Cumaërü nixí i nüxü cuyaxôxü i ngêma yatü,

natürü i toma rü Moïchéarü oreaxü nixi i tayaxögüxü. ²⁹ –Toma rü nüxü tacuèx ga Tupana rü aixcüma Moïchémaã na yadexaxü, natürü ngëma Ngechuchu rü tama nüxü tacuèx na ngextá na ne naxüxü –ñanagürügü. ³⁰ Rü guma yatü nanangãxü, rü ñanagürü nüxü: –¿Ñuxãcü nixi i ngëma? Nüma rü marü choxü narümexëtüxëë, natürü ¿ñuxãcü i pema i tama nüxü pecuáxü na ngextá na naxüxü? ³¹ –Rü guxãma i yixema rü meãma nüxü tacuèx rü Tupana tama nüxü naxínü i pecaduãxgüxüãrü yumüxë. Natürü Tupana rü tüxü nüxü naxínü i tümaãrü yumüxë ya yixema nüxü icuèxüügüxe rü naxüxe i Tupanaãrü ngúchaü. ³² –Taguma ñuxgu nüxü taxínüchiga i wüxi i yatü na yadauchixëëãxü i wüxi i duüxü i norü bucüma ngexetüxü. ³³ –Rü ngëxguma chi tama Tupana núma namüxgux ya daa yatü ya choxü rümexëëcü, rü taxuacü chima mexü naxü –ñanagürü ga guma yatü ga ngexetüchirécü. ³⁴ Rü yexguma ga yema Yudiugüarü ãëxgacügü, rü ñanagürügü nüxü: –Cuma na pecadugu na cubuxü, ¿rü ñuxãcü cunaxwëxe na toxü cungüxëëchaüxü? –ñanagürügü. Rü ñuxüchi ínanatëxüchigü ga ngutaquëxepataüwa.

Duüxügü i tama yaxögüxü rü ngexetüxürüü nixigü

³⁵ Rü Ngechuchu rü nüxü nacuáchiga ga na ínatëxüchigüãxü ga guma ngexetüchirécü. Rü yexguma nüxü nadëuxgu, rü ñanagürü nüxü: –¿Nüxü cuyaxöxü ya Tupana Nane ya duüxüxü ixícü? –ñanagürü. ³⁶ Rü yexguma ga nüma rü Ngechuchuxü nangãxü rü ñanagürü: –Pa Corix, jchomaã nüxü ixu na texe yíxü na nüxü chayaxöxücëx! –ñanagürü. ³⁷ Rü Ngechuchu nanangãxü, rü ñanagürü: –Marü nüxü cudad ya Tupana Nane. Rü chomatama nixi i cumaã na íchidexaxü chixü –ñanagürü. ³⁸ Rü yexguma ga guma yatü ga ngexetüchirécü rü Ngechuchupëxegu nacaxãpüxü, rü nüxü nicuèxüü, rü ñanagürü nüxü: –Ngëmaãcü cuxü chayaxö, Pa Corix –ñanagürü. ³⁹ Rü yexguma ga Ngechuchu rü ñanagürü: –Rü ñoma i naãnewa chaxü na chayadexechixücëx i chorü duüxügü nüxna i ngëma duüxügü i tama choxrü ixigüxü. Rü nuã chaxü na chanameëxëëxücëx i ngëma duüxügü i noxri tama Tupanaxü cuëxgüxü. Rü ngëxgumarüü ta núma chaxü na duüxügü i tama choxü cuëxgüchaüxüxü chanawëxü na duüxügü i ngexetüxürüü na yixigüxü, erü tama choxü nayaxögüchaü –ñanagürü. ⁴⁰ Rü ñuxre ga Parichëügü ga yéma Ngechuchumaã yexmagüxü, rü yexguma yema orexü naxínüëgu, rü Ngechuchuna nacagü, rü ñanagürügü: –¿Ëxna toma rü ta tama Tupanaxü tacuèxgü ñacuxü? –ñanagürügü. ⁴¹ Rü Ngechuchu nanangãxü rü ñanagürü nüxü: –Ngëxguma chi tama aixcüma Tupanaxü pecuèxgügu rü tãü chima pegagu nixi na pepecaduãxgüxü. Natürü ngëma na pegü pixuxü na Tupanaxü pecuáxü rü ngëmacëx pegagutama nixi na pepecaduãxgüxü i ñuxmax –ñanagürü.

10

Carnerugüarü dauruü rü norü carnerugü

¹ Rü yexguma ga Ngechuchu rü ñanagürü: –Rü aixcüma pemaã nüxü chixu rü ngëma yatü i tama carnerupüxüãrü ñãxwa ixücuxü rü wüxi i ngítëxáxü nixi i ngëma, erü ngextámare nixüxü. ² –Natürü ngëma carnerupüxüãrü ñãxwa meãma ixücuxü, rü ngëma nixi i norü dauruüxüchi i carnerugü. ³ –Rü ngëma yatü i carnerupüxüãrü ñãxna dauxü rü nayawãxna i ñãx na yaxücuxücëx i carnerugüarü dauruü. Rü nüma i carnerugü rü nüxü nacuèxgü i naga i ngëma norü dauruü. Rü ngëma norü dauruü rü wüxichigü i norü

carneru rü naeggamaã naxcèx naca na ínamuxũãxũcèx i naxpúxũwa. ⁴—Rü ngèxguma ínamuxũãxgu i guxũma i norü carnerugü, rü nüma i norü dauruũ rü napèxegu nixũchigü. Rü nümagü i carnerugü rü nawe narüxĩ, erü nüxũ nacuèxgü i naga. ⁵—Natürü ngèxguma wüxi i yatü i tama aixcüma norü dauruũ íxixũ, rü tama nawe narüxĩ i ngèma carnerugü. Rü nüxna naxĩgü, erü tama nüxũ nacuèxgü i naga i ngèma tama norü dauruũ íxixũ —ñanagürü ga Ngechuchu. ⁶ Rü Ngechuchu rü duũxũgümaã nüxũ nixu ga yema ore ga cuèxruũ, natürü ga nümagü rü tama nüxũ nacuèxgüéga ga tacüchiga na yĩxũ.

Ngechuchu rü carneruarü dauruũ ya mecü nixi

⁷ Rü yexguma ga Ngechuchu rü wenaxârü ñanagürü nüxũ: —Aixcüma pemaã nüxũ chixu rü choma nixĩ i carnerupúxũãrũ íãx i nawa yachocuxũxũ i carnerugü. ⁸ Guxũma ga yema chopegu nüxira núma íxũ rü ngítèèxgüxũ rü máétaxũxũ nixĩgü. Natürü yema carnerugü rü tama naga naxĩnüë. ⁹ Choma nixĩ i íãx. Rü texé ya chowa íxũcuxe rü tá tamaxũ. Rü meãma tá tüxũ naxüpetü ngèxgumarüũ i wüxi i carneru i naxpúxũgu ücuxũ rü íxũxũxũxũ rü nüxũ iyan-gaucü ya mecü ya maxë. ¹⁰ Ngèma ngítèxáxũ rü núma naxũ na yangĩxüçèx rü namáétaxũcèx rü nachixexèèxũcèx. Rü ngèmacèxicatama núma naxũ. Natürü i choma rü núma chaxũ na chanamaxèxèèxũcèx i duũxũgü rü na aixcüma nüxũ nangèxmaxüçèx i maxũ i taguma gúxũ. ¹¹ Choma nixĩ i carneruarü dauruũ ya mecü chíxũ. Erü wüxi i carneruarü dauruũ ya mecü rü norü carnerugüxũ ínapoxũ rü ñuxmata naxcèx nayux. ¹² Natürü ngèma díerucèxmare puracüxũ, rü ega ngèxguma aixũ nadèuxgux rü carnerugüna ngema niña. Rü ngèmaãcü nanaxü erü tama aixcüma norü dauruũ nixĩ i nümax, rü tama noxrü nixĩ i ngèma carnerugü. Rü ngèma ai rü carnerugüxũ ínayauxũ rü ngèxma tüxũ naxũanexèèmare. ¹³ Rü ngèma yatü rü niña, erü norü díerucèxicatama ngema napuracü. Rü tama aixcüma carnerugügu narüxĩnü. ¹⁴⁻¹⁵ Choma nixĩ i carnerugüarü dauruũ ya mecü chíxũ. Rü ngèxgumarüũ rü Chaunatü na choxũ nacuáxũ rü choma rü Chaunatüxũ na chacuáxũ, rü ngèxgumarüũ ta nüxũ chacuèx i chorü carnerugü, rü nümagü rü choxũ nacuèxgü. Rü choma rü naxcèx chayü i chorü carnerugü. ¹⁶ Rü choxũ nangèxmagü ta i togü i carnerugü i tama ñaã naxpúxũwa ngèxmagüxũ. Rü ngèmagü rü tá ta nuã chanagagü, rü tá chauga naxĩnüë. Rü wüxitücumü tátama nixĩ rü choma tátama nixĩ i norü dauruũ chíxũ. ¹⁷ Chaunatü rü choxũ nangechaũ, erü chorü carnerugüçèx chayü rü wena táxarü chamaxũ. ¹⁸ Taxúema choxũ tayuxëë, natürü chomatama chorü ngüchaũmaãtama ichanaxã i chorü maxũ. Erü choxmèxwa nangèxma na ichanaxãxüçèx, rü wena na chanayaxuxüçèx, yerü yemaãcü choxũ namu ga Chaunatü —ñanagürü. ¹⁹ Rü yexguma yema orexũ naxĩnüëgu ga yema Yudiugüarü äèxgacügü rü wenaxârü nügü nitoye ga yema nagu naxĩnüëxüwa. ²⁰ Rü muxũma ga nümagü rü ñanagürügü: —¿Tüxcüũ nüxũ iperüxĩnüë i ñaã yatü i ngèãèxũ i ngoxo nawa ngèxmaxũ? —ñanagürügü. ²¹ Natürü ga togü rü ñanagürügü: —Taxuũma i yatü i ngoxo nawa ngèxmaxũ rü ñaarüũ meã nidexa. ¿Nüxãcü i wüxi i yatü i ngoxo nawa ngèxmaxũ rü tüxũ narümemètüxèë ya wüxi ya ngexetüxe? —ñanagürügü.

Yudiugüarü Äèxgacügü rü Ngechuchuxũ naxoxe

²² Rü nawa nangu ga yema peta ga gucü ga taunecügu norü tupauca ga taxüncèx naxügüxũ ga Yudiugü na nüxna nacuèxächigüxüçèx ga yema ngunexũ ga nagu yanguxũ ga guma tupauca. Rü nagáuane ga Yerucharéüwa

ga yexguma. ²³ Rû guma tupauca ga taxûnewa nayexma ga wûxi ga chopetûchica ga Charumóûârû Chopetûchicagu âegaxû. Rû yemagu nararûxûxû ga Ngechuchu. ²⁴ Rû ga yema Yudiúgûarû âêxgacûgû rû nûxû ínachomaêguâchi, rû ñanagûrûgû nûxû: —¿Ñuxgurátá tomaâ quixaixcûma na cugû quixuxû na texé na quiixû? Ega aixcûma cuma rû Cristu quixîgu, rû jmeâ noxtacûma tomaâ nûxû ixu! —ñanagûrûgû. ²⁵ Rû Ngechuchu nanangâxû, rû ñanagûrû nûxû: —Marû pemaâ nûxû chixu, natûrû i pema rû tama choxû peyaxôgû. Guxûma i ñacû i chaxûxû rû Chaunatûarû poramaâ nixî i chanaxûxû, rû ngêmawa meâma pexû nûxû chadauxêê na choma rû Cristu na chiixû. ²⁶ —Natûrû pema rû tama peyaxôgû, erû tama chorû carnerugûtanûxû pixîgû. ²⁷ —Chorû carnerugû rû nûxû nacuèx i chauga, rû choma rû chorû carnerugûxû chacuèx, rû nûma rû chowe narûxî. ²⁸ —Rû choma rû nûxna chanaxâ i maxû i taguma gûxû. Rû nûmagû rû tagutâma inayarûtauxe, rû taxûetâma choxna tanapuxû i choxmêxwa. ²⁹ —Rû yîxema Chaunatû choxna tûxû mugûxe ya chorû carnerugû, rû guxûârû yexera tixî i napêxewa. Rû taxûema texé nûxna tûxû tapuxû. ³⁰ —Chaunatû rû choma rû wûxitama tixîgû —ñanagûrû. ³¹ Rû yexguma ga yema Yudiúgûarû âêxgacûgû rû wenaxârû nutane nanayauxgû na gumamaâ Ngechuchuxû ínamuxûchigûxûcêx. ³² Natûrû ga Ngechuchu rû ñanagûrû nûxû: —Pepêxewa chanaxû i muxûma i mexûgû i Chaunatûarû poramaâ chaxûxû. ¿Rû ngêxûrûxûxû i ngêma mexû i chaxûxûcêx nixî i choxû nutamaâ ípemuxûchigûchaûxû? —ñanagûrû. ³³ Rû yema Yudiúgûarû âêxgacûgû rû Ngechuchuxû nangâxûgû, rû ñanagûrûgû: —Tama wûxi i puracû i mexûcêx cuxû ítamuxûchigûchaû. Natûrû cuxû ítamuxûchigûchaû erû Tupanamaâ rû ñacû quixugû. Cuma rû wûxi i duixûmare quixî rû cugû Tupanaxû quixîxêêchaû —ñanagûrûgû. ³⁴ Rû nûma ga Ngechuchu rû ñanagûrû nûxû: —Perû mugûpanewa rû naxûmatû i Tupanaârû ore i ñaxû: “Rû pematama nixî i tupanagû pixîgûxû”, ñaxû. ³⁵ —Rû ngêma Tupanaârû ore i ûmatûxûwa nûxû yaxuxû, rû nûxû tacuèx rû taxucûrûwama texé itayanaxoxêê. Rû ngêma orewa rû Tupana rû ñanagûrû: “Guxâma ya yîxema texé yanayauxgûxe i chorû ore rû tupanagû tixîgû”, ñanagûrû i ngêma orewa. ³⁶ —Rû Tupana choxû nayaxu na chanaxûxûcêx i norû puracû, rû yemacêx ñoma ga nañewa choxû namu. ¿Rû ñuxâcû i pema nagu perûxînuêgu rû chixexû Tupanamaâ chaxûxû i ngêxguma Tupana Nane chixî —ñachagu pemaâ? ³⁷ —Rû ngêxguma chi tama chanaxûxgu i ngêma mexû i Chaunatû ûxû, rû marû name ega woo tama choxû peyaxôgûgu. ³⁸ —Natûrû ngêxguma chanaxûxgu i ngêma Chaunatû ûxû, rû woo tama choxû peyaxôgûgu, rû chanaxwêxe i nûxû peyaxôgû i ngêma taxû i mexûgû i Chaunatûarû poramaâ chaxûxû. Erû ngêmawa tá nûxû pecuèx na Chaunatû rû chowa nangêxmaxû rû choma i nawa —ñanagûrû. ³⁹ Rû wenaxârû Ngechuchuxû niyauxgûchaû ga yema Yudiúgûarû âêxgacûgû. Natûrû nûma ga Ngechuchu rû naxchaxwa niña. ⁴⁰ Rû yexguma ga Ngechuchu rû natû ga Yudaûârû tocutûcêx tomaâ nataegu. Rû yema nachica ga Cuáû duixûgûxû ûpacû nawa íbaiixêêxûgu tomaâ narûxâûx. ⁴¹ Rû muxûma ga duixûgû rû Ngechuchuxû inayadaugû, rû ñanagûrûgû: —Cuáû rû taxûma ga taxû ga mexû ga cuèxruû naxû ga Tupanaârû poramaâ. Natûrû guxûma ga ore ga Cuáû tamaâ nûxû ixuxû ga ñaâ yatûchiga rû aixcûma nixî —ñanagûrûgû. ⁴² Rû yema nachicawa rû muxûma ga duixûgû rû Ngechuchuxû nayaxôgû.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu äegacü. Rü nüma rü naëyëxgü ga María rü Marta rü iäne ga Betániäcũäx nixigü. ² Rü yema María iyixi ga Cori ga Ngechuchucutügu pumara bacü rü ñuxüchi ngíyaemaã inapicutücü. Rü guma Dácharu ga idaawecü nixi ga ngĩeneë. ³ Rü poraãcü nidaawe ga Dácharu. Rü yemacëx ga naëyëxgü, rü Ngechuchuxütawa imugagü, rü ngigürügügü: “Pa Corix, cumücy ga Dácharu ya nüxü cungechaücü rü nidaawe”, ngigürügügü. ⁴ Rü yexguma yema orexü naxĩnügü ga Ngechuchu, rü ñanagürü: —Ngẽma daawe rü tãütáma yumaã inayacuëx. Natürü nidaawe na duüxügü nüxü nadaugüxcëx na ñuxäcü naporaxü ya Tupana rü ñuxäcü choma i Nane rü ta na chaporaxü —ñanagürü. ⁵ Rü Ngechuchu poraãcü María rü Marta rü Dácharuxü nangechaü. ⁶ Natürü yexguma nüxü naxĩnügü ga na yaðaawexü ga Dácharu, rü tama paxa inayadau. Rü taxre ga ngunexüamatama yexma narüxãux ga yema nachica ga nawa nayexmaxüwa. ⁷ Rü yixcama ga yemawena rü toxü ñanagürü: —jNgĩã rü wena Yudéaanewa taxí! —ñanagürü. ⁸ Rü toma ga norü ngüexügü rü ñatarügügü nüxü: —Pa Ngüexëëruüx, yexwacatama nixi ga yëmacũäx ga Yudiugüarü äëxgacügü yexma nutamaã cuxü imuxüchigüchaüxü. ¿Rü tüxcüü wena ngema cuxüchaü i ñuxmax? —ñatarügügü. ⁹ Rü Ngechuchu rü tomaã nüxü nixu ga wüxi ga ore na nüxü tacuëxgüxcëx na tauta nawa nanguxü na nayuxü ga nümax. Rü ñanagürü toxü: —¿Taux ëxna i wüxi i ngunexü rü 12 i ora nawa ngëxmaxü? Ngëxguma texé ngunecü ixüxgu rü tama tacümaã itayarüña, erü tümacëx nangóone. ¹⁰ —Natürü ngëxguma wüxie chütacü ixüxgu rü ngëmaãcü tacümaã itayarüña, erü tümacëx naxëäne —ñanagürü. Rü yemaãcü nanangoxëë na tauta nawa nanguxü na nayuxü ga nümax. ¹¹ Rü yemawena ga Ngechuchu rü ñanagürü toxü: —Tamücü ya Dácharu rü napemare. Natürü ñuxma rü tá chayãixächixëë —ñanagürü. ¹² Rü yexguma ga toma ga norü ngüexügü rü ñatarügügü: —Pa Corix, ega napemaregu, rü ngëmawa nüxü tacuëx na naxcëx tá yataanexü —ñatarügügü. ¹³ Natürü ga Ngechuchu rü nüxü nixuxchaüchirëx ga Dácharu ga marü na nayuxü. Natürü ga toma nüxü tacuëxgü rü na napemarexüchigaxü yixü ga tomaã yaxuxü. ¹⁴ Rü yexguma ga Ngechuchu rü meãma tomaã nüxü nixu rü ñanagürü: —Dácharu rü marü nayu. ¹⁵ —Natürü choma rü chataãe na tama ngema changëxmaxü, erü ngëmaãcü nixi i namemaëxü i pexcëx na choxü peyaxögüxcëx. jRü ngĩã rü itayadaugü! —ñanagürü. ¹⁶ Rü yéma nayexma ga totanüxü ga Tumachi ga Wüxigu Buexü ga Taxreëxpüxümaã, naxugüxü. Rü nüma ga Tumachi rü ñanagürü toxü: —jNgĩã i yixema rü ta ngema taxí na wüxigu Ngechuchumaã iyuexcëx! —ñanagürü.

Ngechuchu nixi i wena namaxëxëxü i yuexü

¹⁷ Rü yexguma Betániãwa tomaã nanguxgu ga Ngechuchu, rü marü ägümücü ga ngunexü nangupetü ga na iyatëxgüäxü ga Dácharu. ¹⁸ Rü guma Betániã rü Yerucharëüärü ngaicamana nayexma. Rü tomaëxpüx ga kilómetru nixi ga norü yaxü. ¹⁹ Rü muxüma ga Yudiugü rü Dácharueyëx ga Marta rü Mariaxütawa naxi na ngixü yataãëëgüxcëx, yerü nayu ga ngĩeneë. ²⁰ Rü yexguma Marta nüxü cuëxgu ga marü na ínganguxü ga Ngechuchu, rü nüxü iyatüxãchi. Natürü ga María rü íxgutama irüxãux. ²¹ Rü Marta rü ngigürügü nüxü ga Ngechuchu: —Pa Corix, yexguma chi cuma

cunumèxgu rü tãũ chima nayu ga chaueneẽ. ²²—Natürü choma nüxũ chacuèx na woo i ñuxma na nayuxũ, rü Tupana tá cuxna nanaxã i guxũma i ñacü i naxcèx ícuçaxũ —ngígürügü. ²³ Rü Ngechuchu ngixũ nangãxũ rü ñanagürü: —Cueneẽ rü wena tá namaxũ —ñanagürü. ²⁴ Rü Marta ngígürügü nüxũ: —Ngẽmããcü nüxũ chacuèx rü wena tá namaxũ i ngèxguma naguxgu i naãne rü ngèxguma wena namaxègu i guxũma i yuexũ —ngígürügü. ²⁵ Rü yexguma ga Ngechuchu rü ñanagürü: —Choma nixĩ i íchanadagüxèèxũ i yuexügü, rü wena chanamaxèxèèxũ. Rü yixema choxũ yaxõxè rü woo tayuxgu rü tá wenaxãrũ tamaxũ. ²⁶—Rü guxãma ya texé ya maxũxè rü choxũ yaxõxè, rü guxũgutãma tamaxũ. ¿Cuyaxõxũ yĩxũ i ngẽma? —ñanagürü ga Ngechuchu. ²⁷ Rü ngĩma rü ngígürügü nüxũ: —Ngũ, Pa Corix, choma rü chayaxõ na cuma rü Tupana Nane ya Cristu ga ítananguxèècü na quiĩxũ —ngígürügü.

Dácharu itáxũwa naxaxu ga Ngechuchu

²⁸ Rü yema ñaxguwena rü Marta rü ngĩyèx ga Maríacè x iyaca. Rü bexma ngĩmaã nüxũ iyarũxu, rü ngígürügü: —Marũ nuã nangu ya Ngúexèèruũ ya Ngechuchu, rü choxũ cuxcèx nayacaxèè —ngígürügü. ²⁹ Rü yexguma María nüxũ ñnũgu ga marũ yéma na nanguxũ ga Ngechuchu, rü paxa ichi, rü Ngechuchuxũ íyadau. ³⁰ Rü Ngechuchu rü tauta íãnewa nangu ga yexguma, rü yema nachica ga Marta nüxũ ídauxũwatama nixĩ ga nayexmaxũ. ³¹ Rü Maríapatawa nayexma ga ñuxre ga yémacũãx ga Yudiügüarũ àèxgacügü ga ngixũ yéma taãèxèègüxũ. Rü yexguma ngixũ nadaugügu ga paxa na inachixũ rü na ínaxũxũxũ, rü ngiwe narũxĩ. Yerũ nüma nüxũ nacuèxgügu rü yéma Dácharu itáxũwa ixũ na yéma yaxaxuxũcèx. ³² Rü yexguma Ngechuchuxũtawa nanguxgu ga María, rü napèxegu iyacaxãpũxũ, rü ngígürügü: —Pa Corix, yexguma chi cuma cunumèxgu rü tãũ chima nayu ga chaueneẽ ya Dácharu —ngígürügü. ³³ Rü yexguma Ngechuchu ngixũ dèuxgu ga na naxaxuxũ rü na naxauxexũ ga yema Yudiügüarũ àèxgacügü ga ngiwe rüxixũ, rü poraãcü ngechaũ nüxũ nangux. ³⁴ Rü Ngechuchu nüxna naca rü ñanagürü: —¿Ngexta nixĩ i ípenatãxũ? —ñanagürü. Rü nümagü nanangãxũ rü ñanagürügü: —Pa Corix, ¡dücax, nuã naxũ, rü íyadau! —ñanagürügü. ³⁵ Rü naxaxu ga Ngechuchu. ³⁶ Rü yema Yudiügü rü ñanagürügü: —¡Dücèx ñuxãcü poraãcü Dácharuxũ nangechaũ! —ñanagürügü. ³⁷ Natürü ñuxre ga yema àèxgacügü ga Yudiügüarũ rü ñanagürügü: —Daa nixĩ ga guma yatü ga ngexetüçüxũ rümexèècü. ¿Rü tüxçüũ taxucürüwa ñacü rü mexũ Dácharucèx naxü na tama nayuxũcèx? —ñanagürügü.

Wenaxãrũ namaxũ ga Dácharu

³⁸ Rü Ngechuchu poraãcü ngechaũ nüxũ nangux rü Dácharumaxũcèx nixũ. Rü wüxi ga mèxpũneãrũ àxmaxũ nixĩ ga yema naxmaxũ. Rü nayexma ga wüxi ga nuta ga norü ngüxtaũruũ. ³⁹ Rü Ngechuchu rü ñanagürü: —¡Ípenangüxgachix ya yima nuta ya namaã nangüxtaũcü! —ñanagürü. Natürü ga Marta ga Dácharuyèx rü ngígürügü: —Pa Corix, cuxá marũ nayixane nixĩ, erü marũ àgümücü i ngunexũ naetü nixĩ ga na nayuxũ —ngígürügü. ⁴⁰ Natürü ga Ngechuchu rü ñanagürü ngixũ: ¿Taux èxna i marũ cumaã nüxũ chixuchirèxũ rü ngèxguma cuyaxõxgu rü tá nüxũ cudau i wüxi i mexũ i taxũ i Tupana üxũ? —ñanagürü. ⁴¹ Rü yexguma ínanangüxgachigü ga guma nuta. Rü Ngechuchu daxügu nadawenüãcuma ñanagürü: —Pa Chaunatü Pa Tupanax, moxè cuxna chaxã erü marũ choxũ cuxĩnũ. ⁴² —Choma nüxũ chacuèx rü guxũguma choxũ cuxĩnũ. Natürü moxè cuxna chaxã i ñuxma

erü chanaxwèxe i ñaã duũxũgü na yaxõgüãxũ na cuma núma choxũ cumuxũ –ñanagürü. ⁴³ Rü yexguma yema ñaxguwena, rü tagaãcü ñanagürü: –Pa Dácharux, ¡ñaxũxũ i ngema! –ñanagürü. ⁴⁴ Rü ¡naxũxũ ga Dácharu ga naxchápenüümaã guxũwama rübuxpũxũcü. Rü Ngechuchu ñanagürü nüxũ ga duũxũgü: –¡Ípeyawëxpũxũ na ¡yaxũxũcèx! –ñanagürü.

Äëxgacügü naxcèx nadaugü na ñuxãcü Ngechuchuxũ yayauxgüxũ
(Mt 26.1-5; Mr 14.1-2; Lc 22.1-2)

⁴⁵ Rü yema Yudiügüarü äëxgacügü ga Mariawe rüxĩxũ rü nüxũ nadaugü ga yema Ngechuchu üxũ, rü muxũma Ngechuchuxũ nayaxõgü ga yexguma nüxũ nadaugüga ga ñuxãcü wena Dácharuxũ na namaxëëxũ. ⁴⁶ Natürü ñuxre ga yema äëxgacügü rü Parichéugümaã nüxũ nayarüxugü ga yema Ngechuchu üxũ. ⁴⁷ Rü yexguma ga yema Parichéugü rü paigüarü äëxgacügü rü nangutaquëxegü namaã ga guxũma ga yema äëxgacügütücumüwa ügüxũ. Rü ñanagürügü: –¿Tacü tá taxüe? Erü ñaã yatü i Ngechuchu rü nanaxũ i muxũma i mexũ i cuèxruügü. ⁴⁸ –Ngëxguma chi tama yayauxgüga, rü guxũtáma i duũxũgü rü tá nüxũ nayaxõgü, rü Dumacũãxgüarü churaragü rü núma chi naxĩ rü nagu napogüe ya tórü tupauca ya taxüne, rü düxwa tãü chima tóxrü nixĩ i ñaã tachiüãne –ñanagürügü. ⁴⁹ Natürü guma taunecügu rü yema paigütanüwa rü Caipá nixĩ ga norü äëxgacü. Rü núma rü ñanagürü nüxũ: –Pemagü rü taxüma pecuèx. ⁵⁰ –¿Éxna tama nüxũ pecuèx rü taxcèx rü na namemaëxũ na wüxitama i yatü guxũ i duũxũgücèx na yuxũ, na tama nayuexũcèx i guxũma i tachiüãnecũãx i duũxũgü? –ñanagürü. ⁵¹ Natürü ga Caipá rü tama nüëchama yema ñanagürü, yerü guma taunecügu rü núma nixĩ ga paigüarü äëxgacü yĩxũ. Rü yemacèx rü Tupana nixĩ ga Caipáwa idexacü ga yexguma nüxũ yaxuxgu na Ngechuchu rü guxũma i Yudiügücèx tá na nayuxũ. ⁵² Rü yema orewa rü nanangoxëë na tama Yudiügücèxicatama tá na nayuxũ, natürü guxũma i Tupanaãrü duũxũgü i guxũ i naãnewa ngëxmagüxũcèx rü tá ta na nayuxũ, na ngëmaãcü wüxigu nangutaquëxexũcèx i guxũma i ngëma duũxũgü i Tupanaãrü ixĩgüxũ. ⁵³ Rü yexgumaãcüü nixĩ ga ¡naxügüëãxũ ga Yudiügüarü äëxgacügü ga nagu na naxĩnüëxũ ga ñuxãcü tá na Ngechuchuxũ yamëxgüxũ. ⁵⁴ Rü yemacèx ga Ngechuchu rü marü tama yema Yudiügü ¡muxeütanügu naxã. Rü tomaã ¡naxũxũ ga Yudéaanewa, rü wüxi ga ¡ãnexãcü ga Efraïgu äeganewa naxũ. Rü yexma tomaã narüxãũx. Rü guma ¡ãne rü wüxi ga nachica ga ngextá taxüema ¡xãpataxũãrü ngaicamana nayexma. ⁵⁵ Rü marü ningaica ga yema Yudiügüarü peta ga Üpetüchiga. Rü yemacèx muxũma ga duũxũgü ga nái ga ¡ãnecũãx rü Yerucharéüwa naxĩ na Tupanacèx nügü yamexëëgüxũcèx naxũpa ga yema peta. ⁵⁶ Rü Ngechuchucèx nadaugü ga duũxũgü. Rü tupauca ga taxünewa nügüna nicagüetanü, rü ñanagürügü: –¿Nuxũ ñapegüxũ i pemax? ¿Noma i petawa tá naxũxũ rü ëxna tama? –ñanagürügü. ⁵⁷ Rü yema Parichéugü rü paigüarü äëxgacügü rü duũxũgüna naxãgagü, rü ñanagürügü: –Ngëxguma ngextá nüxũ pedaugüga i ngëma Ngechuchu, ¡rü tomaã nüxũ peyarüxu na tayayauxgüxũcèx! –ñanagürügü.

12

Wüxi ga nge rü Ngechuchucutügu pumara iba
(Mt 26.6-13; Mr 14.3-9)

¹ RŦ 6 ga ngunexŦ naxŦpa ga ŦpetŦchigaarŦ peta, rŦ Ngechuchu rŦ tomaã Betániãwa naxŦ. RŦ guma ïãne nixŦ ga nagu naxãchixŦne ga Dãcharu ga Ngechuchu wena namaxẽẽcŦ. ² RŦ yẽma DãcharuchixŦwa Ngechuchucẽ nanaxŦgŦ ga taxŦ ga õna. RŦ totanŦwa ga yema mechawa yexmagŦxe rŦ Dãcharu nixŦ ga NgechuchuxŦtawaama chibŦcŦ. RŦ Marta iyixŦ ga inaxŦcŦ ga õna. ³ RŦ yexguma ga María rŦ yẽma inange ga wŦxi ga taxŦraweŦxŦ ga pumara ga yixichixŦ rŦ tatanŦxŦchixŦ. RŦ NgechuchuxŦ namaã iyixcutŦ. RŦ ñuxŦchi ngŦyaemaã ïnapicutŦ. RŦ guma ï rŦ guxŦwama nayixmachŦã namaã ga yema pumara. ⁴⁻⁵ RŦ yexguma ga Yuda ga IcarŦute ga wŦxi ga totanŦxŦchirẽx ixŦxŦ ga yixcama bexma cŦãcŦ NgechuchuxŦ ïxuaŦxŦ, rŦ ñanagŦrŦ: —jTŦxcŦŦ tama tatanŦxŦgu namaã itaxe i ngẽma pumara na ngẽma dŦerumaã nŦxŦ nangŦxẽẽxcẽx i ngẽma duŦxŦgŦ i ngearŦ dŦeruãxŦgŦxŦ? —ñanagŦrŦ. ⁶ NatŦrŦ ga Yuda rŦ tama aixcŦma nagu narŦxŦnŦ ga yema ngearŦ dŦeruãxŦgŦxŦ. NatŦrŦ yema ñanagŦrŦ yerŦ nŦma rŦ wŦxi ga ngŦtẽxãxŦ nixŦ. RŦ naxmẽxwa nayexma ga yema choca ga dŦeru ngŦxŦ nagu taxŦgŦxŦ ga guxãma ga toma ga NgechuchuarŦ ngŦexŦgŦ. RŦ Yuda rŦ ñuxguacŦ rŦ noxrŦtama ngŦxne nangŦxŦxŦ. ⁷ RŦ yexguma ga Ngechuchu rŦ ñanagŦrŦ nŦxŦ: —jTãxŦ i ngŦxŦ cuchixewexŦ! ErŦ choma rŦ paxa tá chayu rŦ tá ichatẽx. RŦ ngẽmacẽx nixŦ i ngẽma pumaramã choxŦ nachaxŦ. ⁸ —Ngẽma ngearŦ dŦeruãxŦgŦxŦ rŦ guxŦgutãma petanŦwa nangẽxmagŦ. NatŦrŦ i choma rŦ tãŦtãma guxŦgu petanŦwa changẽxma —ñanagŦrŦ.

PaigŦarŦ ãẽxgacŦgŦ rŦ nŦgŦmaã nanamexẽẽgŦ ga ñuxãcŦ DãcharuxŦ tá na yamẽxgŦxŦ

⁹ RŦ muxŦma ga YudiŦgŦ rŦ nŦxŦ nacuãchiga ga Betániãwa na nayexmaxŦ ga Ngechuchu. RŦ yẽma naxŦ na nŦxŦ nadaugŦxŦcẽx. RŦ tama NgechuchuxŦxŦcatama nadaugŦchaŦ natŦrŦ nŦxŦ nadaugŦchaŦ ta ga Dãcharu ga Ngechuchu wena namaxẽẽcŦ. ¹⁰ RŦ yexguma ga paigŦarŦ ãẽxgacŦgŦ rŦ nŦgŦmaã nanamexẽẽgŦ ga DãcharuxŦ rŦ ta na yamẽxgŦxŦcẽx. ¹¹ YerŦ Dãcharugagu nixŦ ga muxŦma ga YudiŦgŦ ga NgechuchuxŦ yaxõgŦãxŦ rŦ yema paigŦna naxŦgŦxŦ.

*Ngechuchu rŦ YerucharẽŦgu naxŦcu
(Mt 21.1-11; Mr 11.1-11; Lc 19.28-40)*

¹² RŦ muxŦma ga duŦxŦgŦ rŦ YerucharẽŦwa naxŦ naxcẽx ga ŦpetŦchigaarŦ peta. RŦ moxŦãcŦ duŦxŦgŦ nŦxŦ nacuãchigagŦ ga Ngechuchu rŦ guma ïãnewa na nanguxchaŦxŦ. ¹³ RŦ yexguma moruãtŦta nadaŦgŦ rŦ yemamaã NgechuchuxŦ nayatŦxŦgŦtanŦãchi. RŦ tagaãcŦ ñanagŦrŦgŦ: —jRŦ naxŦne rŦ namecŦmaxŦchi ya daa Tupanaẽgagu nŦma ŦcŦ! jRŦ yixema na IraẽtanŦxŦ ixŦgŦxŦ rŦ namecŦmaxŦchi ya daa tórŦ ãẽxgacŦ! —ñanagŦrŦgŦ. ¹⁴ RŦ Ngechuchu nŦxŦ inayangau ga wŦxi ga buru, rŦ naetŦgu naxaunagŦ ga yema TupanaãrŦ ore ga ŦmatŦxŦ nŦxŦ ixuxŦrŦŦ ga yexguma ñaxgu:

¹⁵ “jTãxŦ i pemuŦẽxŦ, Pa YerucharẽŦcŦãxŦgŦ! jRŦ iperŦdaunŦ na ngẽma ne naxŦxŦ ya perŦ ãẽxgacŦ ya wŦxi i buru i ïraxŦetŦgu aunagŦcŦ!”

ñaxŦ. ¹⁶ RŦ noxrŦ ga toma ga norŦ ngŦexŦgŦ rŦ tama nŦxŦ tacuẽxgŦẽga ga Ngechuchuchiga na yŦxŦ ga yema ore. NatŦrŦ yixcŦra marŦ Ngechuchu TupanaxŦtawa Ŧxgu, rŦ yexguma nixŦ ga nŦxna tacuẽxãchixŦ ga guxŦma ga yema NgechuchuxŦ ngupetŦxŦ, rŦ yema TupanaãrŦ ore nŦxŦ ixuxŦãcŦtama nŦxŦ na nangupetŦxŦ. ¹⁷ RŦ yema duŦxŦgŦ ga NgechuchuxŦtawa yexmagŦxŦ ga yexguma DãcharuxŦ wena namaxẽẽgu, rŦ nŦxŦ nixugŦe ga

yema nüxü nadaugüxü. ¹⁸ Rü yemacêx nixi ga duüxügü ga Ngechuchuxü yatüxächitanüxü na nayauxgüäxücêx, yerü nüxü nacuáchigagü ga yema taxü ga mexü ga Tupanaärü poramaã naxüxü. ¹⁹ Natürü ga yema Parichéugü rü nügümaã ñanagürügü: —Marü nüxü pedauxü i ñuxma na taxucürüwama tacü namaã ixüxü. ¡Rü dücax, guxüma i duüxügü rü nawe narüxi! —ñanagürügü.

Griégugü rü Ngechuchuxü nadaugüchaü

²⁰ Rü muxüma ga duüxügü rü petacêx Yerucharéüwa naxi na yéma Tupanaxü na yanacuêxüügüxücêx. Rü yema duüxügütanüwa nayexma ga ñuxre ga Griégugü. ²¹ Rü yema Griégugü rü Piripicêx naxi. Rü nüma ga Piripi rü Gariréaaneärü ñäne ga Bechaidacüäx nixi. Rü nüxü nacêxügü rü ñanagürügü: —Pa Corix, nüxü tadauxchaü ya Ngechuchu —ñanagürügü. ²² Rü Piripi rü Aüdrémaã nüxü nayarüxu. Rü yema taxre rü wüxigu Ngechuchuxütawa naxi, rü namaã nüxü nayarüxugü. ²³ Rü yexguma ga Ngechuchu rü ñanagürü nüxü: —Rü marü nawa nangu tá na chayuxü rü wenaxärü Chaunatüxütawa tá na chaxüxü i choma i Tupana Nane i duüxüxü chiüxü. ²⁴ —Rü aixcüma pemaã nüxü chixu rü ngêxuma chi wüxipüxü i trigu tama waixümüänegu toxgu rü wüxipüxüechatama nixi. Natürü ega waixümügu natoxgu, rü ngêma naxüxgu, rü muxüchinema ínguxuchi. [Rü ngêxgumarüü tá ta Tupanaxütawa nangugü i muxüma i duüxügü ega chayuxgux.] ²⁵ —Rü pemaã nüxü chixu rü texé ya yixema tümaärü maxüxü ngechaüxé i ñoma i nañewa rü tá itayarütaxu. Natürü texé ya yixema tama tümaärü maxüxü ngechaüxé rü tama yuxü muüxé i ñoma i nañewa, rü tá tüxü nangêxma i maxü i taguma güxü. ²⁶ —Rü ngêxuma texé choxü puracüchaügu rü name nixi i chowe tarüxü. Rü ngêma choma tá íchangêxmaxüwa rü ngema rü tá ta tangêxma i tümax. Rü ngêxguma texé choxü puracügu rü Chaunatü ya Tupana rü tá tümamaã nataãë —ñanagürü.

Ngechuchu nanaxunagü ga norü yuxchiga

²⁷ —Rü Ngechuchu ñanagürü: —Rü ñuxma rü poraãcü changechaü rü chanaxixächiaë. ¡Rü tacüxü tá Chaunatümaã chixuxü? Taxucürüwa namaã nüxü chixu na choxü ínguxuchixêxücêx na tama chayuxücêx, erü woetama ngêmacêx núma chaxü —ñanagürü. ²⁸ Rü ñanagürü: —Pa Chaunatüx, ¡Choxü rüngüxêe na duüxügüpêxewa cuxü chataxêxücêx! —ñanagürü. Rü yexguma ga yema duüxügü ga yéma yexmagüxü rü nüxü naxinüë ga wüxi ga naga ga daxüwa inaxüxü ga ñaxü: —Marü cuxü charüngüxêe na choxü cutaxêxücêx ga noxrix, rü wena táxarü cuxü charüngüxêe na choxü cutaxêxücêx —ñanagürü ga yema naga. ²⁹ Rü yema duüxügü ga yéma yexmagüxü ga nüxü inüëxü ga yema naga, rü ñanagürügü: —Wüxi i duruanexü nixi —ñanagürügü. Natürü togu rü ñanagürügü: —Wüxi i Tupanaärü orearü ngerüü i daxücüäx nixi i namaã idexaxü —ñanagürügü. ³⁰ Rü yexguma ga Ngechuchu rü ñanagürü nüxü: —Tama chauxcêx nixi i nüxü pexinüëxü i ngêma naga. Rü pexcêxtama nixi i nüxü pexinüëxü. ³¹ —Rü ñuxma tá nixi i Tupana inaxügüäxü na tüxü napoxcuexü ya duüxé naxcêx i tümaärü pecadugü. Rü ñuxma tá nixi i Tupana ínatêxüchixü i ngêma ñoma i nañewa poraxü i Chataná. ³² —Rü ngêxguma curuchawa chipotagu rü chaugüxütawa tá chanagagü i guxüma i duüxügü —ñanagürü ga Ngechuchu. ³³ Rü yema orewa duüxügümaã nüxü nixu ga ñuxäcü tá na nayuxü. ³⁴ Rü yema duüxügü nanangäxügü, rü ñanagürügü: —Torü mugü i umatüxüwa nüxü tadaugü na guxügutáma namaxêchaxü ya Cristu. ¡Rü ñuxäcü i cuma rü ñacurügü: “Rü

Tupana Nane ya duŦxŦxŦ ixŦcŦ rŦ curuchawa tá nipota”, ŦnacurŦgŦ? ¿RŦ texé tixŦ ya yŦxema Tupana Nane ya duŦxŦxŦ ixŦxé? —ŦnanagŦrŦgŦ. ³⁵ RŦ yexguma ga Ngechuchu rŦ ŦnanagŦrŦ nŦxŦ: —ŦŦoma rŦ ta petanŦwa changĕxma na ŦŦoma i naŦnewa pexŦ changŦgŦexĕxŦcĕx rŦ ngĕmaĕcŦ pexŦ changŦoonetanŦxĕxŦcĕx. NatŦrŦ paxaĕchicĕxĕcatama petanŦwa changĕxma. RŦ name nixŦ i paxa choxŦ peyaxŦgŦ ŦŦoma rŦ ta pexcĕx chanangŦonexĕĕ naxŦpa na naxĕĕnexŦ. ErŦ yŦxema ĕĕnexŦwa ngĕxmaxĕ rŦ tama nŦxŦ tacuĕx na ngextá taxŦxŦ. ³⁶ — RŦ ŦŦoma rŦ ta petanŦwa changĕxma rŦ name nixŦ i paxa choxŦ peyaxŦgŦ na chorŦ ngŦonexŦwa pengĕxmagŦxŦcĕx —ŦnanagŦrŦ. RŦ yema Ŧnaxguwena rŦ natanŦwa inaxŦxŦ ga Ngechuchu. RŦ naxchaxwa inicux.

ŦacŦcĕx nixŦ ga YudŦgŦ ga tama NgechuchuaxŦ yaxŦgŦĕxŦ

³⁷ RŦ woo ga Ngechuchu rŦ duŦxŦgŦpĕxewa nanaxŦ ga muxŦma ga taxŦ ga mexŦ ga cuĕxruŦgŦ ga TupanaĕrŦ poramaĕ naxŦxŦ, natŦrŦ yexguma rŦ ta tama nŦxŦ nayaxŦgŦ ga duŦxŦgŦ. ³⁸ RŦ yemaĕcŦ Tupana nayanguxĕĕ ga yema ore ga IchaxŦĕ ŦmatŦxŦ rŦ ŦnaxŦ:

“Pa Corix, taxŦxema tayaxŦ ga yema ore ga tŦxŦ tangŦgŦexĕĕxŦ. RŦ woo nŦxŦ tadaugŦ na ŦnŦxĕcŦ naporaxŦ ya Tupana, rŦ tama tayaxŦgŦ”, ŦnaxŦ. ³⁹⁻⁴⁰ RŦ yemaĕcŦ ga yema duŦxŦgŦ rŦ tama nayaxŦgŦ yema IchaxŦĕ ŦmatŦxŦwa nŦxŦ yaxuxŦrŦ, rŦ:

“Yema duŦxŦgŦ rŦ tama nŦxŦ nadaugŦchaŦ rŦ tama nayaxŦgŦchaŦ rŦ tama Tupanacĕx nawoeguchaŦ. RŦ yemacĕx ga Tupana rŦ nŦxna nixŦ na tama nŦxŦ nadaugŦxŦcĕx rŦ tama yaxŦgŦĕxŦcĕx rŦ tama naxcĕx nawoeguxŦcĕx na nŦma nŦxna naxĕĕxŦcĕx i maxŦ i ngexwacaxŦxŦ”, ŦnaxŦ. ⁴¹ RŦ yema ŦnanagŦrŦ ga IchaxŦĕ yerŦ nangoxetŦgu marŦ nŦxŦ nadau na ŦnŦxĕcŦ ĕĕxgacŦ ya tacŦxŦŦchi na yŦixŦ ya Ngechuchu ya Cristu. RŦ yemaĕcŦ nachiga nidexa. ⁴² NatŦrŦ muxŦma ga yema YudŦgŦarŦ ĕĕxgacŦgŦ rŦ NgechuchuaxŦ nayaxŦgŦ, rŦ woo ga Ŧnuxre ga naĕrugŦ rŦ ta nayaxŦgŦ, natŦrŦ tama nŦgŦ nixugŦchaŦ ga duŦxŦgŦpĕxewa, yerŦ namuŦĕ na ParichĕgŦ ngutaquĕxepataŦwa inawoxŦxŦ. ⁴³ RŦ yemaĕcŦ tama nŦgŦ nixugŦchaŦ, yerŦ norŦ me nixŦ ga duŦxŦgŦ namaĕ nataĕĕgŦxŦ rŦ tama aixcŦma naxcĕx nadaugŦ na Tupana namaĕ taĕĕxŦ.

Texé ya tama NgechucharŦ oreaxŦ yaxŦxĕ rŦ tá tapoxcu

⁴⁴ RŦ tagaĕcŦ ŦnanagŦrŦ ga Ngechuchu: —Texé ya choxŦ yaxŦxĕ rŦ tama choxŦxĕcatama tayaxŦ. NatŦrŦ ChaunatŦ ya nŦma choxŦ mucŦaxŦ rŦ ta tayaxŦ. ⁴⁵ —RŦ texé ya choxŦ dauxe, rŦ ChaunatŦ ya nŦma choxŦ mucŦxŦ rŦ ta tadau. ⁴⁶ —Choma na ngŦonexĕĕruŦ chŦixŦ, rŦ ŦŦoma i naŦnewa changu na guxĕma ya texé ya choxŦ yaxŦxĕ rŦ tama ĕĕnexŦwa na tangĕxmagŦchaxŦcĕx. ⁴⁷ —NatŦrŦ ngĕxguma texé nŦxŦ inŦgu i chorŦ ore rŦ tama tayaxŦxgu rŦ tama choma nixŦ i tŦxŦ chapoxcuxŦ. ErŦ tama ŦŦoma i naŦnewa changu na chanapoxcuexŦcĕx i duŦxŦgŦ, natŦrŦ nŦma chaxŦ na chanamaxĕxĕxŦcĕx. ⁴⁸ —YŦxema texé ya tama choxŦ yaxŦxĕ rŦ tama chauga inŦxĕ rŦ marŦ tŦxŦ nangĕxma na ŦacŦcĕx tá Tupana tŦxŦ poxcuxŦ. ErŦ ngĕma ore i nŦxŦ chixuxŦgagu tátama nixŦ ya Tupana i tŦxŦ naporcuxŦ i naŦĕĕrŦ gŦxgu, erŦ tama tayaxŦ i ngĕma ore i nŦxŦ chixuxŦ. ⁴⁹ —Tama chaugagutama chidexa, natŦrŦ guma ChaunatŦ ga nŦma choxŦ mucŦ, rŦ guma nixŦ ga chomaĕ nŦxŦ ixucŦ na ŦacŦxŦ tá duŦxŦgŦmaĕ chixuxŦ rŦ ŦnŦxĕcŦ tá chanangŦexĕĕxŦ. ⁵⁰ — RŦ nŦxŦ chacuĕx na ChaunatŦarŦ orewa nangĕxmaxŦ i maxŦ i taguma gŦxŦ.

Rü ngëmacëx i ngëma ore i nüxŦ chixuxŦ, rü ngëmatama ore nixŦ i Chaunatu choxŦ muxŦ na nüxŦ chixuxŦ –ñanagürü ga Ngechuchu.

13

Ngechuchu rü norü ngüexŦgüxŦ niyauxgücutü

¹ Rü wüxi ga ngunexŦ nataxu ga nawa na nanguxŦ ga yema Yudiugüarü peta ga Üpetüchiga. Rü Ngechuchu nüxŦ nacuëx ga marü nawa na nanguxŦ ga ñoma ga nañnewa na yaxüxŦ rü wenaxärü NanatüxŦtawata na naxüxŦ. Rü nüma rü yexguma ñoma ga nañnewa nayexmagu rü guxŦguma tüxŦ nangechaŦ ga guxema noxrü ixŦgüxe. Rü yexgumarüŦ ta ga yexguma toxna yaxüxchaŦgu ga daxüguxŦ ga nañnewa na naxüxŦ, rü yemaäcü poraäcü toxŦ nangechaŦ. ²⁻⁴ Natürü ga Chataná rü marü Yuda ga Chimáü ga Icarüte nanena nangu na bexma cüäcü NgechuchuxŦ ínaxuaxŦxŦcëx. Rü Ngechuchu rü marü nüxŦ nacuëx ga NanatüxŦtawata na ne naxüxŦ rü wena táxarü Nanatüçëx na nataeguxŦ. Rü nüxŦ nacuëx ga Nanatü rü naxmëxgu na naxüäxŦ ga guxŦma ga pora. Rü yemacëx ga yema chütaxŦgu ga yexguma mechawa ítachibüeyane, rü inachi ga Ngechuchu. Rü ínacuexuchi ga norü gáuxŦchiru, rü wüxi ga tuayamaã nügü nigoye. ⁵ Rü ñuxŦchi yaxumëxŦpáxŦgu dexáta naba, rü toxŦ niyauxgücutü. Rü guma tuaya ga namaã yagoyecümaã toxŦ ínapiçücutü. ⁶ Rü yexguma Chimáü ga PedruxŦ nayauxcutüchaŦgu rü ñanagürü ga Pedru: –Pa Corix, çñuxäcü tá i cuma i choxŦ cuyauxcutüxŦ? –ñanagürü. ⁷ Rü Ngechuchu nanangäxŦ rü ñanagürü: –Ñuxma rü tama nüxŦ cucuëx i tüxcüŦ na chanaxüxŦ i ñaã, natürü yixcama rü tá nüxŦ cucuëx –ñanagürü. ⁸ Natürü ga Pedru rü ñanagürü: –Choma rü täütáma chanaxwëxe na choxŦ cuyauxcutüxŦ –ñanagürü. Rü Ngechuchu nanangäxŦ rü ñanagürü nüxŦ: –Ngëxguma tama cuxŦ chayauxcutügu, rü täütáma choxrü quixŦ –ñanagürü. ⁹ Rü yexguma ga Chimáü ga Pedru rü ñanagürü nüxŦ: –Pa Corix, çTama choxŦ cuyauxcutüxicatama! Natürü chanaxwëxe i choxŦ cuyauxmëx rü choxŦ cuyauxeru ta –ñanagürü. ¹⁰ Natürü Ngechuchu nanangäxŦ rü ñanagürü nüxŦ: –Texé ya ngexwacëx aiyaxe rü tanaxwëxe i tümacutüxicatama tayaxu, erü guxŦwama tangemata. Rü pema rü marü pingematagü, natürü tama guxáma aixcüma tingemata –ñanagürü. ¹¹ Rü Ngechuchu nüxŦ nacuëx na texé tá bexma cüäcü ínaxuaxŦxŦ, rü yemacëx ñanagürü nüxŦ: –Natürü tama guxáma aixcüma tingemata –ñaxŦ. ¹² Rü yexguma toxŦ yayauxgücutüguwena, rü Ngechuchu wena nicüxcuchi ga norü gáuxŦchiru. Rü wenaxärü mechawa narüto. Rü ñanagürü toxŦ: –çNüxŦ pecuáxŦ yïixŦ i ngëma chaxüxŦ? ¹³ –Pema rü: “Pa NgüexëëruŦ” rü “Pa Corix”, ñaperügü choxŦ. Rü marü name i ngëma ñaperügü, erü aixcümaxŦchi ngëma chixŦ. ¹⁴ –Rü ñuxma i choma na ngüexëëruŦ chixŦxŦ rü pemaã na ichacuáxŦ, rü pexŦ chiyauxgücutü. Rü ngexgumarüxŦ ta i pema rü name i wüxichigü i pemüçüxŦ piyauxgücutü. ¹⁵ –Choma rü pexŦ nüxŦ chadauxëë na ñuxäcü tá penaxüxŦ na pema rü ngema pemaã chaxüxŦäcü penaxüxŦcëx. ¹⁶ –Rü aixcüma pemaã nüxŦ chixu rü taxüma i wüxi i coriarü duŦxŦ rü norü coriétüwa nügü nangexmaxëë. Rü taxüma i äëxgacürü orearü ngeruxŦ i norü äëxgacü i namuxŦétüwa nügü nangexmaxëë. ¹⁷ –Rü ngëxguma nüxŦ pecuëxgu i chorü ore rü penaxüxgu i ngëma pemaã nüxŦ chixuxŦ, rü aixcüma tá petaãëgü. ¹⁸ –Rü tama guxáma i pechiga nixŦ i chidexaxŦ. Erü choma rü tüxŦ chacuëx rü texëgü tixŦ ya yixema

tüxŦ chidexechíxe. Natürü Tupana nayanguxêêchaŦ i norü ore i ümatüxŦ i ñaxŦ:

“Texé ya chomaã chibüxe rü chomaã tarüxuwauü”,

ñaxŦ. Rü ngêmaãcü tá nangupetü na yanguxüçèx i ngema Tupanaarü ore.

¹⁹—Natürü naxüpa na nangupetüxŦ i ngêma, rü pemaã nüxŦ chixu na choxŦ peyaxögüxüçèx i ngêxguma nangupetüxgu. ²⁰—Aixcüma pemaã nüxŦ chixu rü texé ya tüxŦ yaxúxe ya yíxema choma ngema tüxŦ chamuxê, rü choxŦ nixí i tayaxuxŦ. Rü texé ya choxŦ yaxúxe, rü Chaunatü ga núma choxŦ mucüxŦ nixí i tayaxuxŦ —ñanagürü ga Ngechuchu.

*Ngechuchu nüxŦ nixu ga Yuda rü tá bexma cúácü na ínaxuaxüxŦ
(Mt 26.20-25; Mr 14.17-21; Lc 22.21-23)*

²¹ Rü yexguma yema ñaxguwena ga Ngechuchu rü poraãcü ngechaŦ nüxŦ nangux, rü meãma tomaã nanangoxêê, rü ñanagürü toxŦ: —Aixcüma pemaã nüxŦ chixu rü wüxie i petanüwa tá nixí i bexma cúácü choxŦ ítaxuaxüxŦ —ñanagürü. ²² Rü yexguma ga toma ga norü ngüexüğü rü wüxichigü togü tadawenü, rü tama nüxŦ tacuèxgü ga texéçhiga na yema ñaxŦ. ²³ Rü choma ga norü ngüexŦ ga poraãcü choxŦ nangechaŦxê rü nacüwawa charüto ga Ngechuchu ga mechawa. ²⁴ Rü Chimáü ga Pedru rü bexma choxŦ naxuneta ga na Ngechuchuna chaçaxüçèx ga texéçhiga na yíxŦ ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, ¿texé tá tixí ya yíxema? —ñacharügü. ²⁶ Rü Ngechuchu choxŦ nangáxŦ, rü ñanagürü: —Wüxi i pãüärü bücuxŦ tá íchacúe, rü yíxema tüxna chanaxãxê, rü yíxema tixí —ñanagürü. Rü yexguma ínanacúe ga wüxi ga pãüärü bücuxŦ rü Yuda ga Icaríute ga Chimáü nanana nanaxã. ²⁷ Rü yexgumatama Yuda nayauxgu ga yema pãüärü bücuxŦ rü ngoxo ga Chatana rü Yudagu naxücu. Rü yexguma ga Ngechuchu rü ñanagürü nüxŦ: —Rü ngêma cuxüxchaŦxŦ, ¡rü paxa naxü! —ñanagürü. ²⁸ Natürü taxúema ga toma ga mechawa chibüxe nüxŦ tacuèxgü ga tacüçhiga na yíxŦ ga yema ñaxŦ ga Ngechuchu. ²⁹ Rü núma ga Yuda rü díeruchiñärü dauruŦ nixí. Rü yemacèx ñuxre ga toma nüxŦ tacuèxgü rü Ngechuchu taxewa nanamu, na tacüçèx yataxexüçèx naxcèx ga peta, rü êxna duñüğü ga ngearü díeruãxüna ngüxŦ na naxãxüçèx ga díeru. ³⁰ Rü yexguma Yuda nayauxgu ga yema pãü, rü ínaxüxŦ ga yema ucapuwa. Rü marü nachüta ga yexgumax.

Ngechuchu norü ngüexüğümaã nüxŦ nixu ga yexwacaxüxŦ ga norü mu

³¹ Rü yexguma Yuda íxüxguwena, rü Ngechuchu rü ñanagürü: —Rü ñuxma rü tá aixcüma nangox na ñuxãcü naporaxŦ ya Tupana Nane ya duñüxŦ íxícu. Rü yimawa tá nixí i nangoxêêãxŦ ya Tupana i norü pora. ³² —Rü ngêxguma yima Tupana Nane nangoxêêxgu i Tupanaärü pora, rü ngêxgumarüü tá ta ya Tupana rü nanangoxêê i Naneärü pora. Rü paxa tá nixí i ngêma. ³³ —Pa Chauxacüãxgüx, táütáma muxŦ i ngunexŦ petanüwa changéxma. Rü pema rü tá chauxcèx pedaugü, natürü ngêma choma íchaxüxüwa rü taxucürüwama ngema pexí. Rü ñaãtama ore nixí ga marü Yudiügarü äxgacügümaã nüxŦ chixuxŦ, rü ñuxma rü pemaã rü ta nüxŦ chixuxŦ. ³⁴ —Rü pemaã nüxŦ chixu i wüxi i ngexwacaxüxŦ i mu. Rü ngêma pexŦ chamuxŦ nixí i pemücügüxŦ na pengechaŦxŦ i wüxichigü. Rü ngêma na choma pexŦ changechaŦxŦrüü, rü chanaxwèxe i wüxichigü i pema rü pemücügüxŦ pengechaŦgü. ³⁵ —Rü ngêxguma wüxichigü pemücügüxŦ

pengechaũgu, rü guxũma i duũxũgũ tá nüxũ nicuèxãchitanũ na chorũ ngũexũgũ pixĩgũxũ –ñanagũrũ.

Ngechuchu nüxũ nixu rü Pedru rü tãxũtãma nügũ nixu na norũ ngũexũ yixĩxũ (Mt 26.31-35; Mr 14.27-31; Lc 22.31-34)

³⁶ Rũ Chimãu ga Pedru rü Ngechuchuna naca, rü ñanagũrũ: –Pa Corix ¿ngextã tá cuxũ? –ñanagũrũ. Rũ Ngechuchu nanangãxũ, rü ñanagũrũ: –Ngema íchaxũxũwa rü taxucũrũwa chowe curũxũ i ñũxmax. Natũrũ yixcama rü ngẽmããcũ tá chowe curũxũ –ñanagũrũ. ³⁷ Rũ yexguma ga Pedru rü ñanagũrũ: –Pa Corix, ¿tũxcũ taxucũrũwa cuwe charũxũ i ñũxmax? Erũ marũ íchamemare na cuxcèx na chayuxũ –ñanagũrũ. ³⁸ Rũ Ngechuchu nanangãxũ, rü ñanagũrũ: –¿Aixcũma yĩxũ i marũ ícunemarexũ na chauxcèx cuyuxũ? Aixcũma cumaã nüxũ chixu rü tãtãtãma yacaxgu ya otã, rü tomaẽpũxcũna tá nüxũ quixu na tama choxũ cucuãxũ –ñanagũrũ ga Ngechuchu.

14

Ngechuchu rü nama i Nanatũxũtãwa nadaxũ nixĩ

¹ –¿Tãxũ i penaxĩxãchiãẽgũxũ i pemax! ¡Tupanaãxũ peyaxõgũ rü choxũ rü ta peyaxõgũ! ² –Chaunatũxũtãwa nangẽxma i muxũchixũma i nachicagũ. Ngẽxguma chi natauxguma, rü tãu chima pemaã nüxũ chixu na pexcèx chayamexẽẽxũcèx i pechicagũ. ³ –Rũ ngẽxguma marũ ngema chaxũxgu rü wũxi i pechica chamexẽẽxgu, rü wena táxarũ núma chaxũ. Rũ pexũ tá chayagagũ na ngẽma nachica i chomatãtãma nawa changẽxmaxũwa na pengẽxmagũxũcèx i pemax. ⁴ –Rũ pema rü nüxũ pecuèx na ngextã tá na chaxũxũ, rü marũ nüxũ pecuèx i nama i ngema nadaxũ –ñanagũrũ ga Ngechuchu. ⁵ Rũ Tumachi rü ñanagũrũ: –Pa Corix, tama nüxũ tacuèx na ngextã na cuxũxũ. ¿Rũ ñũxãcũ tá i nüxũ tacuãxũ i ngẽma nama? –ñanagũrũ. ⁶ Rũ Ngechuchu nanangãxũ, rü ñanagũrũ: –Choma nixĩ i ngẽma nama i Chaunatũxũtãwa nadaxũ chĩxũ. Rũ aixcũma nixĩ i ngẽma ore i nüxũ chixuxũ. Rũ choma nixĩ i duũxũgũxũ chamaxẽẽxũ. Rũ chaugaguxicatama nixĩ i Chaunatũxũtãwa nangugũxũ i duũxũgũ. ⁷ –Rũ ngẽxguma chi pema rü aixcũma meã choxũ pecuèxgũgũ, rü Chaunatũxũ rü chi ta pecuèxgũ. Rũ ñũxmaũcũũ nixĩ i Chaunatũxũ pecuãxũ, erũ marũ nüxũ pedaugũecha –ñanagũrũ. ⁸ Rũ yexguma ga Piripi rü ñanagũrũ: –Pa Corix, ¡Toxũ nüxũ nadauxẽẽ ya Cunatũ! Rũ ngẽxĩcatama i tanaxwèxegũxũ –ñanagũrũ. ⁹ Rũ Ngechuchu nanangãxũ, rü ñanagũrũ: –Pa Piripix, ¿ñuxre ya tauncẽ marũ petanũwa changẽxma rü ñũxma rü ta tama choxũ cucuèxégaxũ? Yĩxema choxũ dauxe rü Chaunatũxũ rü ta tadau. ¿Rũ tũxcũ i ngẽxguma rü ta cunaxwèxexũ i pexũ nüxũ na chadauxẽẽxũ ya Chaunatũ? ¹⁰ –¿Tama õxna cuyaxõ na choma rü Chaunatũmaã rü wũxitama tixĩgũxũ? Rũ guxũma i ore i pemaã nüxũ chixuxũ rü tama chauxchama nüxũ chixu. Erũ yima Chaunatũ ya wũxiwa chomaã ngẽxmacũ, rü yima nixĩ ya naxũcũ i guxũma i noxrũtãma puracũ. ¹¹ –Chanaxwèxe i choxũ peyaxõgũ na choma rü Chaunatũmaã wũxitama tixĩgũxũ. Natũrũ woo tama ngẽma pixõgũgũ rü chanaxwèxe na choxũ peyaxõgũxũ naxcèx i ngẽma mexũgũ i taxũ i Tupanaãrũ poramaã chaxũxũ. ¹² –Aixcũma pemaã nüxũ chixu rü yĩxema choxũ yaxõxẽ rü tá tanaxũ i guxũma i choma chaxũxũ. Rũ ngẽma chaxũxũãrũ yexera tá taxũ, erũ

choma rü tá Chaunatüxütawa chaxü. ¹³—Rü guxüma i tacü i chauégagu Tupanaxütawa naxcèx ipeçaxü rü tá pexna chanaxã. Rü ngëmaäcü tá chanaxü na chaugagu nangóxücèx i Chaunatüarü pora. ¹⁴—Rü choma tá chanaxü i guxüma i tacü i chauégagu choxna naxcèx peçaxü.

Ngechuchu rü norü ngüexügümaã inaxuneta na naxcèx tá núma namuãxü i Naãe i Üünexü

¹⁵—Rü ngëxguma aixcüma choxü pengechaügu, rü naga tá pexinüe i chorü mugü. ¹⁶—Rü choma tá Chaunatüna naxcèx chaca na núma peçcèx namuãxücèx i to i perü ngüxëeruü i Naãe i Üünexü, na guxügutáma petanüwa nangëxmaxücèx. Rü núma tá nixi i peçcèx nangoxëëãxü i ore i aixcüma ixixü. ¹⁷—Rü ñoma i naãneçüãx i duüxügü rü taxucürüwama nanayauxgü, erü tama nüxü nadaugü rü tama nüxü nacüexgü. Natürü i pema rü marü nüxü pecuèx, erü núma rü petanüwa nangëxma. Rü guxügutáma pemaã inarüxãüx. ¹⁸—Rü täütáma núma pexü chawogümare i chomax, erü wena táxarü peçcèx chataegu, na petanüwa changëxmaxücèx. ¹⁹—Rü paxa tá nixi na täütáma choxü nadaugüxü i ñoma i naãneçüãx i duüxügü. Natürü i pema rü tá choxü pedaugü. Rü tá pemaxë, erü choma rü chamaxü. ²⁰—Rü ngëxguma yuwa ícharüdaxgu rü wena chamaüxgu, rü ngëxguma tá nüxü picuëxãchitanü na choma rü Chaunatüwa chamaxüxü rü pema i chowa rü pema i pewa. ²¹—Yíxema texé ya nüxü cuáxe rü naga ínüxë i chorü mugü, rü tanangoxëë na aixcüma choxü tangechaüxü. Rü Chaunatü tá tüxü nangechaü ya yíxema choxü ngechaüxë, rü choma rü tá ta tüxü changechaü. Rü tüxü tá chaugü chawëx —ñanagürü ga Ngechuchu. ²² Rü nayexma ga to ga Ngechuchuarü ngüexü ga Yudagu äegaxü ta. Rü yema rü ñanagürü: —Pa Corix, çtüxcüü toxü cugü cwëx, rü tama ñoma i naãneçüãx i duüxügüxü cugü cwëx? —ñanagürü. ²³ Rü Ngechuchu nanangãxü, rü ñanagürü: —Yíxema choxü ngechaüxë rü naga taxinü i ngëma ore i tümamaã nüxü chixuxü. Rü Chaunatü tá tüxü nangechaü. Rü choma rü Chaunatümaã wüxigu tümaxütawa tá tangëxmagü. ²⁴—Yíxema tama choxü ngechaüxë rü tama naga taxinü i ngëma chorü ore. Rü ngëma ore i chauxütawa nüxü pexinüexü rü tama chorü ore nixi, natürü guma Chaunatü ga núma choxü mucüarü ore nixi. ²⁵—Ñoma rü ta petanüwa changëxma rü pemaã nüxü chixu i guxüma i ngëma ore i peçcèx choxü ngëxmaxü. ²⁶—Natürü Chaunatü rü tá chauégagu núma nanamu i Naãe i Üünexü na pexü nangüxëëxücèx. Rü núma i Naãe i Üünexü tá pexü nangüexëë i guxüma, rü tá nüxna pexü nacüëxãchixëë i guxüma i ore ga pemaã nüxü chixuxü. ²⁷—Rü ñuxma na pexna íchixüxü, rü pexna chanaxã i taãe. Natürü ngëma taãe i pexna chaxãxü, rü tama ñoma i naãneçüãx pexna äxü i taãërü nixi. Rü tama chanaxwëxe i penaxixãchiãëgü rü pemuëë. ²⁸—Marü pemaã nüxü chixu na pexna tá íchixüxü rü wena táxarü peçcèx chataeguxü na pemaã changëxmaxücèx. Rü choxü pexinüe ga yexguma yema ñachaxgu. Rü ngëxguma aixcüma choxü pengechaügu rü tá petaãëgü ega nüxü pecuèxgu na Chaunatücèx chataeguxü, erü Chaunatü rü chorü yexera nixi. ²⁹—Rü naxüpa na nangupetüxü i ngëma, rü pemaã nüxü chixu na choxü peyaxögüxücèx i ngëxguma nangupetügu. ³⁰—Marü täütáma poraäcü pemaã chidexa, erü marü ínangu i Chataná i ñoma i naãneãrü äëxgacü ixixü. Natürü núma rü taxuwama choxü narüyexera. ³¹—Natürü ngëma tá choxü ngupetüxü, rü ngëmaäcü tá nixi na guxüma i ñoma i naãneçüãx i duüxügü nüxü nacüáxücèx na choma rü Chaunatüxü na changechaüxü, rü chanaxüxü

i ngêma nûma choxũ namuxũ. ¡Rũ ipechigũ, rũ ngĩxã Ítixĩ! —ñanagũrũ ga Ngechuchu.

15

Ubanegu nũgũ nangu ga Ngechuchu

1 Rũ ñanagũrũ ga Ngechuchu: —Choma nixĩ i ñoma wũxi i ubanerũũ chũĩxũ rũ Chaunatũ nixĩ ya norũ yora ixĩcũ i ngêma uba. 2 —Rũ chorũ duũxũgũ rũ ngêma ubachacũũgũrũũ nixĩgũ. Rũ ngêma ubachacũũ i tama oxũ, rũ norũ yora rũ nayadae. Natũrũ ngêma nachacũũ i oxũ, rũ meã nanamexẽẽtanũ na yexeraãcũ poraãcũ naxoxũcẽx. 3 —Pema rũ marũ pime, yerũ naga pexĩnũẽ ga yema ore ga pexũ changũexẽẽxũ. 4 —Rũ name nixĩ i guxũguma chowa peyaxũxgũ, ngêma na choma rũ pewa chayaxũxũrũũ. Erũ wũxi i ubachacũũ rũ tama nũxĩca naxo, ega tama nanewa yaxũxgux. Rũ ngẽxgumarũũ ta i pema rũ taxuacũma chauxcẽx pemaxẽ, ega tama chowa peyaxũxgũechagu. 5 —Choma nixĩ i ubane, rũ pema i nachacũũgũ. Rũ yĩxema chowa yaxũẽchaxe rũ choma i tũmawa, rũ aixcũma tá chauxcẽx tamaxũ. Rũ ngêmaãcũ wũxi i ubachacũũ i oxũrũũ tá tixĩ. Natũrũ ngẽxguma tama chowa peyaxũxgũechagu, rũ taxucũrũwama ñacũ pexũe. 6 —Rũ texé ya tama chowa yaxũẽchaxe rũ tá ítatèxũchi. Rũ wũxi i ubachacũũ i daexũ rũ ipaxũ rũ iguxũrũũ tá tixĩ, rũ ngẽxma tá tayarũxo. 7 —Rũ ngẽxguma chowa peyaxũxgũechagu rũ taguma nũxũ ipeyarũngũmaẽgu i ngêma ore i pexũ changũexẽẽxũ, rũ marũ name i naxcẽx ípeca i ñacũ i penaxwèxexũ, rũ choma rũ tá pexna chanaxã. 8 —Rũ ngẽxguma aixcũma meã chauxcẽx pemaxẽgu, rũ Chaunatũxũ tá nicuèxũũgũ i duũxũgũ. Rũ ngêmaãcũ aixcũma chorũ ngũexũgũ tá pixĩgũ. 9 —Choma rũ pexũ changechaũ ngêma na Chaunatũ choxũ ngechaũxũrũũ. Rũ chanaxwèxe i aixcũma meã chauga pexĩnũẽcha, erũ choma rũ guxũguma pexũ changechaũ. 10 —Choma rũ naga chaxĩnũ i Chaunatũrũ mugũ rũ nũma rũ guxũguma choxũ nangechaũ. Rũ ngẽxgumarũũ tá ta nixĩ ega naga pexĩnũẽgu i chorũ mugũ, rũ guxũgutáma pexũ changechaũẽcha. 11 —Choma rũ ngêmaãcũ pemaã nũxũ chixu na wũxigu chomaã petaãẽgũxũcẽx. Rũ ngêmaãcũ tá aixcũma petaãẽgũ. 12 —Rũ choma pexũ chamu na pemũcũgũxũ pengechaũgũxũcẽx, ngêma choma na pexũ changechaũxũrũũ. 13 —Rũ ngẽxguma wũxie aixcũma tũmamũcũxũ ngechaũgu, rũ nũxũ tangechaũãma rũ nũẽtama ega woo tũmamũcũcèx tayuxgu. Rũ nataxuma i to i ngechaũ i ngêmaãrũ yexera. 14 —Pema rũ chomũcũgũ pixĩgũ i ngẽxguma chauga pexĩnũẽgu. 15 —Choma rũ marũ tama chorũ duũxũgũmareãcũ pexũ chaxu. Erũ wũxi i coriarũ duũxũmare rũ tama nũxũ nacuèx i ngêma norũ cori ùxũ. Natũrũ ñuxma rũ chomũcũgũmaã pexũ chaxu, erũ pexũ nũxũ chacuèxẽ i guxũma i ore ga Chaunatũ chomaã nũxũ ixuxũ. 16 —Pema rũ tama pexira chauxcẽx pedaugũ, natũrũ chaxira nixĩ ga pexcèx chadauxũ rũ pexũ chamuxũ na aixcũma chauxcẽx pemaxèxũcèx rũ chauxũtawa penagagũxũcèx i muxũma i duũxũgũ na guxũguma choxũ yaxõgũãxũcèx. Rũ Chaunatũ ya Tupana tá pexna nanaxã i guxũma i ñacũ i chauégagu nũxna naxcèx peçaxũ. 17 —Rũ ngêma nixĩ i pexũ chamuxũ na pemũcũgũxũ pengechaũgũxũcèx.

Ñoma i naãneçũãx i duũxũgũ rũ Ngechuchuchi rũ norũ ngũexũgũchi naxaie

18 —Ngẽxguma ñoma i naãneçũãx i duũxũgũ pexchi aiegu, rũ ñnũxna pecuèxãchie ga chaxira chauxchi na naxaiexũ! 19 —Rũ ngẽxguma chi

ñoma i nañecũãx i duũxũgũrũũ pixĩgũgu, rũ ñoma i nañecũãx i duũxũgũ rũ chi pexũ nangechaũgũ ngẽma natanũxũgũxũ na nangechaũgũxũrũũ. Natũrũ choma nixĩ ga pexcẽx chadauxũ natanũwa ga ñoma ga nañecũãx ga duũxũgũ. Rũ ngẽmacẽx nixĩ i pexchi naxaixũ, erũ marũ tama naxrũũ pixĩgũ. ²⁰—jNũxna pecuẽxãchie ga pemaã ñachagu:

“Taxuxũma i wũxi i coriarũ duũxũ rũ norũ coriẽtũwa nũgũ nangexmaxẽẽ”, ñachagu! Rũ yema na chauxchi na naxaixũ, rũ pexchi rũ tá ta naxaie. Rũ yexguma chi chauga naxĩnũẽgu rũ ñũxma rũ chi ta pega naxĩnũẽ. ²¹—Rũ ngẽmaãcũ ta chaugagu pexchi naxaie i ñoma i nañecũãx i duũxũgũ erũ tama nũxũ nacuẽxgũ ya Chaunatu ga nũma choxũ mucũ. ²²—Rũ ngẽxguma chi choma tama namaã chanangoxẽẽgu na ñuxãcũ chixri na namaxẽxũ, rũ tãũ chima nũxũ nacuẽxgũ ga pecadu na naxũgũxũ. Natũrũ ñũxma namaã nũxũ na chixuxũ na ñuxãcũ chixri namaxẽxũ, rũ ngẽmacẽx i ñũxma rũ taxuacũma nũxũ nixugũ na yangearũ pecaduãxũ. ²³—Rũ guxũma i duũxũgũ i chauxchi aixũ rũ Chaunatu chi rũ ta naxaie. ²⁴—Rũ ngẽma duũxũgũpẽxewa rũ Tupanaãrũ poramaã chanaxũ i mexũgũ i taxũ i taguma texẽ ya togue ũxũ. Rũ ngẽxguma chi tama napẽxewa chanaxũxgu i ngẽma mexũgũ rũ tãũ chima Tupana namaã nanaxuegu na nagagutama yapecaduãxgũxũ. Natũrũ na woo marũ nũxũ nadaugũxũ i ngẽma mexũgũ i taxũ i Tupanaãrũ poramaã chaxũxũ, rũ ngẽxguma rũ ta chauxchi naxaieama rũ Chaunatu chi rũ ta naxaie. ²⁵—Natũrũ ngẽmaãcũ nangupetũ erũ Tupana nayanguxẽẽchaũ i norũ ore i ũmatũxũ i ñãxũ:

“Chauxchi naxaie woo taxuũma i chixexũ chaxũxgu”, ñãxũ. ²⁶—Natũrũ choma rũ tá Chaunatuẽgagu pexcẽx nũma chanamu i perũ ngũxẽẽruũ i Tupanaãẽ i ũnẽxũ i tá pexũ nũxũ cuẽxẽẽxũ i ore i aixcũma ixĩxũ. Rũ nũma tá nixĩ i meãma pemaã nũxũ yaxuxũ i chauchiga. ²⁷—Rũ pema rũ tá ta chauchigaxũ pixugũe, yerũ noxri ichanaxũgũgu ga duũxũgũmaã nũxũ na chixuxũ ga chorũ ore, rũ woetama marũ chauxũtawa peyexmagũ —ñanagũrũ ga Ngechuchu.

16

¹ Rũ Ngechuchu rũ ñanagũrũ nũxũ: —Rũ pemaã nũxũ chixu i ñãã ore na tama nũxũ na perũxoexũcẽx na choxũ peyaxũgũxũ. ²—Rũ ngutaquẽxepataũgũwa tá pexũ ínawoxũ. Rũ aixcũma tá nawa nangu na texẽ pexũ dẽixũ rũ tá nagu tarũxinũxũ na ngẽmaãcũ mexũ Tupanacẽx taxũxũ. ³—Rũ ngẽmaãcũ tá pemaã namaxẽ i duũxũgũ, erũ taguma nũxũ nacuẽxgũ ya Chaunatu, rũ choxũ rũ ta tama nacuẽxgũ. ⁴—Rũ pemaã nũxũ chixu i ñãã ore i ñũxmax, na nũxna pecuẽxãchieũcẽx i ngẽxguma yixcũra ngẽmaãcũ pexũ nangupetũgu.

Tupanaãẽ i ũnẽxũãrũ puracũchiga

—Noxri rũ tama pemaã nũxũ chixu i ñãã ore, yerũ petanũgu charũxãũx. ⁵—Natũrũ i ñũxma rũ tá pexna íchixũ na Chaunatu ga nũma choxũ mucũxũtawa na changẽxmaxũcẽx. Rũ pema rũ taxũema choxna peca na ngextá tá na chaxũxũ. ⁶—Natũrũ poraãcũ pengechaũgũama erũ pemaã nũxũ chixu i ngẽma ore. ⁷—Natũrũ aixcũma pemaã nũxũ chixu rũ pexcẽx narũmemaẽ nixĩ na Chaunatuẽcẽx chataeguxũ. Rũ ngẽxguma chi tama Chaunatuũtawa chaxũxgu rũ tãũ chima nũma naxũ i Naãẽ i ũnẽxũ i pexũ rũngũxẽẽxũ. Natũrũ ngẽxguma ngẽma chaxũxgu rũ choma tá nũma chanamu i Naãẽ i ũnẽxũ. ⁸—Rũ ngẽxguma Naãẽ i ũnẽxũ nũma ũxgu rũ tá guxũ i duũxũgũxũ nũxũ

nacuèxèè na yapecaduãxgüxü. Rü tá nanangoxèè i ñuxãcü na yïixü i ngêma maxü i Tupanapêxewa aixcüma mexü. Rü tá duüxügüxü nüxü nacuèxèè na Tupana tá napoxcuexü i duüxügü naxcèx i norü pecadugü. ⁹—Rü nüma i Naãe i Üünexü tá duüxügüxü nüxü nacuèxèè na pecaduãxgüxü yïixü erü tama choxü nayaxögü. ¹⁰—Rü tá nanangüexèè i ñuxãcü na yïixü i ngêma maxü i Tupanapêxewa aixcüma mexü, erü choma rü tá Chaunatüxütawa chaxü, rü pema rü täütáma marü choxü pedaugü. ¹¹—Rü Naãe i Üünexü tá duüxügüxü nüxü nacuèxèè na Tupana tá napoxcuexü i duüxügü i chixexü ügüxü, erü Tupana rü namaã nanaxuegu na marü napoxcuãxü i Chataná i ñoma i naãnemaã icuáxü. ¹²—Choma rü choxü nangêxma i muxüma i to i ore i pemaã nüxü chixuxchaüchirèxü. Natürü ega ñuxma chi pemaã nüxü chixuxgu rü täu chima nüxü pecuèxgü. ¹³—Rü Tupanaãe i Üünexü rü nüxü nixu i ore i aixcüma ixïxüxícatama. Rü ngêxguma núma naxüxgu rü nüma tá pexü nangüexèè i guxüma i ore i aixcüma ixïxü. Erü nüma rü tama nüèchama tá nidexa, natürü ngêma ore i Chaunatüxütawa rü chauxütawa nüxü naxïnüxüxüxica tátama nixu. Rü tá pexü nüxü nacuèxèè i guxüma i ñacü i yixcüra tá ngupetüxü. ¹⁴—Rü nüma rü tá choxü nataxèè, erü chauxütawa tá nanayaxu i norü nguxèètae, rü ñuxüchi tá pexü nangüexèè namaã i ngêma nguxèètae. ¹⁵—Guxüma i Chaunatüaxü ngêxmaxü rü choxrü ta nixï. Ngêmacèx pemaã nüxü chixu rü Naãe i Üünexü rü chauxütawa tá nanayaxu i norü nguxèètae, rü ñuxüchi pexü tá namaã nangüexèè. ¹⁶—Rü paxa täütáma choxü pedau. Natürü ngêmawena rü wena táxarü choxü pedau erü Chaunatüxütawa tá chaxü —ñanagürü ga Ngechuchu.

Ngema guxchaxügü rü yixcüama rü tá taãèxü nananguxuchi

¹⁷ Rü yexguma ñuxre ga toma ga Ngechchuarü ngüexügü rü togüna tacagü, rü ñatarügügü: —¿Tacüchiga nixï na ngêma ñaxü:

“Rü paxa täütáma choxü pedaugü. Natürü ngêmawena rü wena táxarü choxü pedaugü”, ñaxü? ¿Rü ñacüchiga ta nixï na ñaxü:

“Choma rü Chaunatüxütawa tá chaxü”, ñaxü? ¹⁸—¿Rü ñacüchiga ta nixï na ñaxü:

“Rü paxa täütáma choxü pedaugü”, ñaxü? Rü yixema rü tama nüxü tacuèxgüéga na ñacüchigaxü tamaã yaxuxü —ñatarügügü. ¹⁹ Rü Ngechuchu rü nüxü nacuèxama ga nüxna na tacagüchaüxü ga tomox. Rü yemacèx ñanagürü toxü: —Choma rü marü pemaã nüxü chixu rü paxa täütáma choxü pedau, natürü ngêmawena rü wena táxarü choxü pedau. ¿Rü ngêma dexacèxtama i pegüna pecagüxü? ²⁰—Rü aixcüma pemaã nüxü chixu rü pema rü tá pexauxe, rü tá pengechaügü. Natürü ñoma i naãnecüãx i duüxügü rü tá nataãégü. Natürü woo pema tá pengechaügü, rü ngêma perü ngechaü rü tá taãèxü nananguxuchi. ²¹—Ngêxguma wüxi i nge íraxacüchaügu rü inaxïxãchiãe, erü inguxneca. Natürü ngêxguma marü tabuxgu ya ngürü õxhana, rü nüxü iyarüngüma na ñuxãcü poraãcü ngïxü na nanguxchirèxü i noxrix, erü tümamaã itaãe ya ngürü õxhana. ²²—Rü ngêxgumarüü tá ta pexü nangupetü i pemax, erü ñuxma rü penaxïxãchiãégü. Natürü wena táxarü chataegu rü pexü íchayadau. Rü ngêxguma rü tá pexü nangêxma i wüxi i taãe i taxucürüwama texé pexna yaxuxü. ²³—Rü ngêxguma ínanguxgu tá i ngêma ngunexü na yanguxü i ñaã pemaã nüxü chixuxü, rü taxucèxtáma ñacücèx choxna pecagü erü aixcüma Chaunatü tá nixï ya pexna naxãcü i guxüma i ñacü i chauégagu nüxna naxcèx pecaxü. ²⁴—Ñuxmarüta i pema rü taxuücèxma

chauégagu ípecagü. ¡Naxcèx ípeca rü tá penayaxu i ngêma naxcèx ípecaxü! Rû ngêmaâcü rü tá aixcüma petaâégü.

Ngechuchu rü marü nüxü narüyexera i guxüma i tacü i ñoma i naânewa ngêxmaxü

²⁵—Ñuxma rü cuèxruügügu chayaxuâcüma pemaâ nüxü chixu i ore. Natürü nawa tá nangu i ngunexü i marü tâütâma ngêmaâcü pemaâ nüxü chixu. Rû ngêxguma rü tá noxtacüma meâ pemaâ chanangoxêê i Chaunatüchiga. ²⁶⁻²⁷—Rû ngêma ngunexügu i pema rü Chaunatüxütawa tá chauégagu naxcèx ípeca i tacü i penaxwèxexü. Rû taxucèxma tüxcüü choma tá Chaunatüxütawa pexü naxcèx íchaca, erü nümatama ya Chaunatü rü woetama pexü nangechaü, erü pema rü choxü pengechaü rü peyaxögü na naxütawa ne chaxüxü. ²⁸—Chaunatüxütawa ne chaxü na ñoma ga naânewa chaxüxüçex. Rû ñuxma rü tá nüxna chataegu i ñoma i naâne na wenaxârü Chaunatüxütawa chaxüxüçex —ñanagürü. ²⁹ Rû yexguma ga toma ga norü ngüexügu rü ñatarügügu: —Ñuxma waxi nixi i meâxüchima tomaâ cunangoxêêxü i curü ore i tomaâ nüxü quixuxü. Rû tama tacügu ixuxüâcüma tomaâ nüxü quixu. ³⁰—Rû ñuxma rü nüxü tacüèx na aixcüma guxüxüma na cucuáxü. Rû taxuacüma texé ñuxü ñatagürü cuxü. Rû ngêmacèx nixi i tayaxögüxü na aixcüma Tupanaxütawa na ne cuxüxü —ñatarügügu. ³¹ Rû Ngechuchu toxü nangäxü rü ñanagürü: —¿Aixcüma peyaxögüxü i ñuxmax? ³²—Rû nawa tá nangu i ngunexü rü ñuxmatátama nixi i na pegü pewoonexü. Rû wüxichigü i pema rü tá pepatawa pexü, rü chaxica tá nuâ choxü petèx. Natürü tama chaxica tá icharüxâüx, erü Chaunatü rü chauxütawa nangêxma. ³³—Rû guxüma i ñaâ ore rü pemaâ nüxü chixu na chaugagu petaâégüxüçex. Rû ñoma i naânewa rü tá ngüxü pinge. Natürü ¡peporae! erü choma rü marü nüxü charüyexera i guxüma i tacü i ñoma i naânewa ngêxmaxü —ñanagürü.

17

Ngechuchu rü norü ngüexüçex nayumüxê

¹ Rû yema ñaxguwena rü Ngechuchu daxügu nadawenü, rü ñanagürü: —Pa Chaunatüx, marü nawa nangu i ngunexü na chayuxü. Rû chanaxwèxe na duüxügüxü nüxü cucuèxêêxü na aixcüma choma rü cune chiüxü. Rû ngêmaâcü i choma rü tá nüxü nüxü chacuèxêê na cuma rü aixcüma Tupana na quiüxü. ²—Erü marü guxü i duüxügüarü âêxgacüxü choxü quixixêê, na chanamaxêêxüçex i guxüma i duüxügü i choxna cumugüxü. ³—Rû ngêma duüxügü tá nüxü nangêxma i maxü i taguma gúxü ega cuxü nacuèxgügu na cuxicatama Tupana na quiüxü, rü choxü nacuèxgügu na choma rü Cristu ga núma choxü cumucü na chiüxü. ⁴—Choma rü marü cuxü chataxêê i ñoma i naânewa rü chayanguxêê i guxüma i puracü ga nawa choxü cumuxü. ⁵—Rû ñuxma Pa Chaunatüx, rü chanaxwèxe i cugüxütawa choxü cungêxmaxêê na choxü nangêxmaxüçex ga yematama pora ga cumaâ choxü yexmaxü ga noxri tauta naâne üxgu. ⁶—Rû guxema duüxügü ya tüxü quidexechixe ga ñoma ga naânewa na choxna tüxü cumugüxüçex, rü marü tüxü nüxü chacuèxêê i texé na quiüxü i cumax. Rû woetama cuxrügü tixügü rü cuma nixi ga choxna tüxü cumugüxü. Rû tûmagü rü marü naga taxinüê i curü ore. ⁷—Rû ñuxma rü marü nüxü tacuèx rü guxüma i ngêma choxna cuxäxü, rü aixcüma cuxütawa ne naxü. ⁸—Rû choma rü marü tûmamaâ nüxü chixu ga curü ore ga chomaâ nüxü quixuxü. Rû tûmagü rü marü tayaxögü i ngêma ore. Rû nüxü

ticuêxâchitanû na aixcûma cuxûtawa na ne chaxûxû i chomax. Rû tayaxôgû ga cuma núma choxû na cumuxû. ⁹—Rû ngêmacêx cuxna chaca na tûxû na curüngûxêêxûcêx. Rû tama cuxna chaca na nüxû curüngûxêêxûcêx i ñoma i naâ necûâx i duûxûgû, natürü cuxna chaca na tûxû curüngûxêêxûcêx ya guxema choxna tûxû cumugûxe, erü curü duûxûgû tixîgû. ¹⁰ Rû guxâma ya yixema choxrügü ixîgûxe rü cuxrügü tixîgû. Rû guxâma ya cuxrügü ixîgûxe rü choxrügü tixîgû. Rû tûmagagu rü duûxûgû choxû nicuêxûgû. ¹¹—Choma rü marû tãütáma ñoma i naânewa changêxmaêcha, natürü i tûmagü rü ngêmaâcü ñoma i naânewa tá tangêxmagü ngêxguma cuxûtawa chaxûyane. Pa Chaunatû ya Üñecûx, rü chanaxwêxe na curü pora ga choxna cuxâxûmaâ tûxna cudauxû ya yixema choxna tûxû cumugûxe, na ngêmaâcü guxâma wûxigu rûxîñuêxûcêx, ngêma cuma rü choma na wûxigu rûxîñuêxûrûü. ¹²—Rû yexguma guxema choxna tûxû cumugûxetanûwa chayexmagu ga ñoma ga naânewa, rü curü pora ga choxna cuxâxûmaâ tûxna chadagu rü tûxû íchapoxû. Rû taxúema ga guxema choxna tûxû cumugûxe rü itayarütaxe. Rû Yuda ga woetama iyarütaxuxûxícatama inayarütaxu na yanguxûcêx i curü ore i úmatûxû. ¹³—Rû ñuxma rü cuxûtawa tá chaxû. Natürü ñomarûta ñoma i naânewa changêxma-yane rü nüxû chixu i ñaa curü ore na tûmagü rü ta tûxû nangêxmaxûcêx i ngêma taâe i aixcûma ixîxû i choma choxû ngêxmaxû. ¹⁴—Choma rü marû tûmamaâ nüxû chixu i curü ore. Natürü ñoma i naâ necûâx i duûxûgû rü tûmachi naxaie, erü tûma rü tama naxrûü tixîgû, ngêxgumarûü i choma rü tama ñoma i naâ necûâx rûü chixî. ¹⁵—Tama cuxna tûmacêx chaca na tûxû na quigagûxûcêx i ñoma i naânewa. Natürü cuxna chaca na tûxû na ícupoxûxûcêx nüxna i ngoxo i Chataná. ¹⁶—Choma rü tama ñoma i naâ necûâx chixî. Rû tûmagü rü ta tama ñoma i naâ necûâx tixîgû, erü cuxrügü tixîgû i ñuxmax. ¹⁷—Curü ore rü aixcûma nixî. Rû chanaxwêxe i tûxû cüngûxêê i curü ore, na aixcûma cupêxewa tixûñuêxûcêx ya yixema choxna tûxû cumugûxe. ¹⁸—Rû yexgumarûü ga ñoma ga naâ necûâx ga duûxûgûtanûwa choxû na cumuxûrûü, rü ngêxgumarûü i choma rü ta ñoma i naâ necûâx i duûxûgû-tanûwa tûxû chamugû. ¹⁹—Rû tûmagagu chaugû ichaxâ na tûxû changûexêêxûcêx i curü ore i aixcûma ixîxû, na cupêxewa tixûñuêxûcêx ya yixema choxna tûxû cumugûxe. ²⁰—Natürü tama yixema ñuxma yaxôgûxecícatama cuxna chaca. Natürü cuxna chaca ta tûmacêx ya yixema yixcûra tá yaxôgûxe nagagu i tûmaârü ore ya yixema ñuxma yaxôgûxe. ²¹—Rû guxâma ya yixemacêx cuxna chaca na aixcûma wûxitama tixîgûxûcêx. Rû ngêma cuma rü choma na wûxitama ixîgûxûrûü, Pa Chaunatûx, rü chanaxwêxe i guxâma i tûma rü ta wûxitama tixîgû. Rû ngêmaâcü i ñoma i naâ necûâx i duûxûgû, rü tá nayaxôgû na cuma núma choxû cumuxû. ²²—Rû choma rü marû tûxna chanaxâ i ngêmatama pora i cuma choxna cuxâxû na ngêmaâcü wûxitama tixîgûxûcêx ngêma cuma rü choma na wûxitama ixîgûxûrûü. ²³—Rû chanaxwêxe na tûmawa changêxmaxû rü cuma i chowa na cüngêxmaxû na ngêmaâcü aixcûma wûxi-tama ixîgûxû i guxâma i yixema. Rû ngêmaâcü i ñoma i naâ necûâx i duûxûgû rü tá nüxû nicuêxâchitanû na cuma núma choxû cumuxû, rü tá nüxû nicuêxâchitanû na tûxû cungechaûxû ya yixema choxna tûxû cumugûxe ngêma na choxû cungechaûxûrûü. ²⁴—Pa Chaunatûx, cuma choxna tûxû cumugû. Rû chanaxwêxe i chauxûtawa tangêxmagü i ngema tá íchangêxmaxûwa, na nüxû tadaugûxûcêx i chorü pora ga choxna cuxâxû. Yerü choxû cungechaû ga yexguma tauta naâne ixûgûgumama. ²⁵—Pa Chaunatû ya Mecûx, ñoma i

nañnecũāx i duũxũgũ rũ tama cuxũ nacuèxgũ. Natũrũ choma rũ cuxũ chacuèx. Rũ yixema choxna tũxũ cumugũxe rũ ta marũ nũxũ tacuèxgũ na cuma nũma choxũ cumuxũ. ²⁶ –Rũ marũ tũxũ nũxũ chacuèxèẽ na texé quiĩxũ. Rũ guxũgutáma tũxũ nũxũ chicuèxèẽãmachigũ na cuma choxũ cungechaũũrũ tũgũ tangechaũgũxũcèx rũ choma rũ tũmaxũtawa na changèxmaxũcèx –ñanagũrũ ga Ngechuchu.

18

Ngechuchuxũ niyauuxgũ

(Mt 26.47-56; Mr 14.43-50; Lc 22.47-53)

¹ Rũ yema ñaxguwena ga Ngechuchu rũ tomaã inaxũāchi, na Cheduruarũ ngatexũārũ tocutũwa taxĩũcèx. Rũ yema nayexma ga wũxi ga nanetũnecũ. Rũ yemawa naxũ ga Ngechuchu tomaã. ² Rũ Yuda ga yema bexma cúācũ Ngechuchuxũ íyaxuaxũxũ rũ nũxũ nacuèx ga yema nachica, yerũ Ngechuchu rũ muèxpũxcũna yema tomaã nangutaquèxexũ. ³ Rũ yema nangu ga Yuda namaã ga ñuxre ga churaragũ rũ ñuxre ga tupauca ga taxũneārũ purichĩagũ ga yema namugũxũ ga paigũarũ āèxgacũgũ rũ parichèugũ. Rũ meãma nixāxne, rũ yema nanangegũ ga omũgũ. ⁴ Natũrũ ga Ngechuchu rũ marũ nũxũ nacuèx ga guxũma ga facũ tá nũxũ na ngupetũxũ. Rũ yemacèx naxcèx nixũ, rũ nũxna naca, rũ ñanagũrũ: –¿Texécèx nixĩ i pedaugũxũ? –ñanagũrũ. ⁵ Rũ nũmagũ rũ Ngechuchuxũ nangāxũgũ, rũ ñanagũ-rũgũ: –Nacharétucũāx i Ngechuchucèx nixĩ i tadaugũxũ –ñanagũrũgũ. Rũ Ngechuchu nanangāxũ, rũ ñanagũrũ: –Choma chixĩ –ñanagũrũ. Rũ Yuda ga bexma cúācũ ínaxuaxũxũ rũ yema churaragũtanũwa nayexma. ⁶ Rũ yexguma yema ñaxgu ga Ngechuchu: “Choma chixĩ”, ñaxgu, rũ nũgũweama nacaixũtanũ ga yema churaragũ, rũ yexma nayayi. ⁷ Rũ yexguma ga Ngechuchu rũ wena nũxna naca, rũ ñanagũrũ: –¿Texécèx nixĩ i pedaugũxũ? –ñanagũrũ. Rũ nũmagũ rũ nanangāxũgũ rũ ñanagũrũgũ: –Nacharétucũāx i Ngechuchucèx nixĩ i tadaugũxũ –ñanagũrũgũ. ⁸ Rũ Ngechuchu rũ wenaxārũ ñanagũrũ nũxũ: –Marũ pemaã nũxũ chixu rũ choma chixĩ. Rũ ngèxguma chauxcèx pedaugũgu rũ jípeyaxĩxèẽ i ñaã chorũ ngũexũgũ! –ñanagũrũ. ⁹ Rũ yemaãcũ nangupetũ na yanguxũcèx ga norũ ore ga nũmatama ga Ngechuchu nũxũ yaxuxũ ga ñaxgu:

“Yixema Chaunatũ choxna tũxũ mugũxe rũ taxúetáma itayarũtauxe”, ñaxgu.

¹⁰ Rũ Chimáũ ga Pedru rũ nũxũ iyexma ga wũxi ga cũxchi. Rũ ngĩxũ nayaxu ga norũ cũxchi rũ yemamaã ínanaecheinũ ga paigũarũ āèxgacũarũ duũxũ ga Macugu āegaxũ. Rũ norũ tũgũnechinũ ínadae. ¹¹ Natũrũ ga Ngechuchu rũ Pedruxũ ñanagũrũ: –¡Ngĩxchixũgu ngĩxũ ixũcuchi i curũ cũxchi! ¿Tama èxna nũxũ cucuèx na choma rũ tá ngũxũ chingexũ ngẽma Chaunatũ chomaã naxueguxũrũ? –ñanagũrũ.

Anápatawa Ngechuchuxũ nagagũ

(Mt 26.57-58; Mr 14.53-54; Lc 22.54)

¹² Rũ yexguma ga churaragũarũ āèxgacũ, namaã ga norũ churaragũ rũ tupaucarũ purichĩagũ, rũ Ngechuchuxũ niyauuxgũ. Rũ nayanèixchacũũgũ. ¹³ Rũ noxri rũ āèxgacũ ga Anápatawa nanagagũ. Rũ Aná rũ Caipánèxtũ nixĩ. Rũ guma taunecũgu ga Caipá rũ paigũeru nixĩ. ¹⁴ Rũ yema Caipá nixĩ ga ũpaacũ yema Yudiũgũarũ āèxgacũgũmaã nũxũ ixuxũ ga na namemaèxũ ga wũxitama ga yatũ guxũma ga Yudiũgũcèx na yuxũ.

Pedru rü Ngechuchuxü nixā***(Mt 26.69-70; Mr 14.66-68; Lc 22.55-57)***

¹⁵ Rü choma rü Chimáü ga Pedru rü wüxigu Ngechuchuwe tarüxī. Rü yema paigüarü äëxgacü rü choxü nacuëx. Rü yemacëx ga choma rü wüxigu Ngechuchumaä tichocu ga äëxgacüpataëxtüwa. ¹⁶ Natürü ga Pedru rü İāxârü düxétügutama narüxâüx. Rü yemacëx íchaxüxü ga choma, rü yema İāxârü dauruü ga ngecümaā chayarüdexa rü yexguma Pedruxü iyamucuchi. ¹⁷ Rü yexguma ga yema ngecü ga İāxârü dauruü, rü Pedruna ica, rü ngígürügü: —¿Tama êxna cuma rü ta wüxi i norü ngüexü quixü i ngëma yatü i yayauxgüxü? —ngígürügü. Rü Pedru ngixü nangâxü, rü ñanagürü: —Tama nixī —ñanagürü. ¹⁸ Rü yema İāxtüwa rü äëxgacüarü duüxügü rü purichíagü rü nanaxügü ga wüxi ga üxü, yerü nagáuane. Rü guma üxüxetüarü ngaicamagu nachigü, rü yema nügü ninaixügü. Rü Pedru rü ta yema nügü nanaixü naxëtüwa ga guma üxü.

Paigüarü äëxgacü rü Ngechuchuna naca***(Mt 26.59-66; Mr 14.55-64; Lc 22.66-71)***

¹⁹ Rü yema paigüarü äëxgacü rü inanaxügü ga Ngechuchuna na naçaxü, rü ñanagürü: —¿Tacü nixī ga duüxügüxü namaä cungüexëëxü? ¿Rü texégü tixī ya yixema curü ngüexügü? —ñanagürü. ²⁰ Rü Ngechuchu ñanagürü nüxü: —Choma rü guxü ga duüxügüpëxewa nüxü chixu ga chorü ore. Rü ngutaquëxepataügüwa rü tupauca ya taxünewa i ngextá guxüma i Yudiügü İngutaquëxegüxüwa chanangüexëë ga duüxügü. Rü yemaäcü taxuüma ichicux ga chorü ore. ²¹ —¿Rü tüxcüü i choxna cuçaxü i ñuxmax? Êcü, İñuxna naca i ngëma duüxügü ga nüxü İñüexü ga chorü ore! Rü nümagü ta cumaä nüxü nixugüe ga İacüchigaxü namaä na chixuxü. Erü nümagü rü nüxü nacüëxgü i guxüma ga İacü ga namaä nüxü chixuxü —ñanagürü. ²² Rü yexguma Ngechuchu yema ñaxgu, rü wüxi ga tupauca ga taxünearü purichía ga naxütagu chixü, rü Ngechuchuchiwegu nidagü. Rü ñanagürü Ngechuchuxü: —¿Tüxcüü ngëmaäcü cunangâxü ya daa paigüarü äëxgacü? —ñanagürü. ²³ Rü Ngechuchu nanangâxü rü ñanagürü: —Rü ngëxguma İacü rü chixëxüxü chixuxgu, İrü nüxü İxu na ñuxâcü chixri na chidexaxü! Natürü ega chorü ore rü aixcüma yixügu, rü İtüxcüü i choxü quidagüxü i ñuxmax? —ñanagürü. ²⁴ Rü yexguma ga Aná rü Ngechuchuxü yanáİacüma paigüarü äëxgacü ga Caipaxütawa nanamu.

Pedru rü wenaxârü tama Ngechuchuxü nacüëxnetā***(Mt 26.71-75; Mr 14.69-72; Lc 22.58-62)***

²⁵ Rü yoxni ga Pedru rü üxüarü ngaicamagu nachiecha, rü yema nügü nanaixüāma. Rü yema yema yexmagüxü rü nüxna nacagüe, rü ñanagürügü: —¿Tama êxna cuma rü ta norü ngüexü quixü i ngëma yatü i yayauxgüxü? —ñanagürügü. Natürü ga Pedru rü tama nügü nixu, rü ñanagürü: —Tama nixī —ñanagürü. ²⁶ Rü yema nayexma ga wüxi ga paigüarü äëxgacüarü duüxü. Rü yema rü Pedru İdaechinüxütanüxü nixī. Rü Pedruna naca, rü ñanagürü: —¿Tama êxna cuma yixü ga nanetüncüwa Ngechuchumaä cuxü chadauxü? —ñanagürü. ²⁷ Rü Pedru rü wena tama nügü nixu. Rü yexgumatama nica ga otā.

Ngechuchu rü Piratu-pëxewa nayexma***(Mt 27.1-2, 11-14; Mr 15.1-5; Lc 23.1-5)***

²⁸ Rü yexguma Ngechuchumaä nüxü nachauegu ga nüxna na nacagüxü, rü Caipápatawa İnanagaxüchigü rü Yudeáaneärü äëxgacü ga Dumacüİaxpatawa

nanagagü. Natürü marü ningóonechaŭ ga yexguma rü yemacèx ga yema Yudiügü rü tama guma ãëxgacüpatagu nachocu, yerü norü mugü nüxŭ nixu rü taxŭ ga pecadu nixŭ na wüxi ga Dumacŭãxpatagu na nachocuxŭ ga yema ngunexŭgu. Rü yemaãcü tama Tupanapëxewa nügü nixüxaarü maxŭãxëëgüchaŭ, yerü yexguma nügü yaxüxaarü maxŭãxëëgügu, rü taxucürüwa nanangõxgü ga ðna ga Üpetüchigaarü petacëx namexëëxŭ. ²⁹ Rü yemacèx ga guma ãëxgacü ga Dumacŭãx ga Piratu rü napatawa ñanaxüxŭ ga duŭxŭgümaã na yadexaxŭcëx. Rü ñanagürü nüxŭ: —¿Tacücëx ípenaxuaxŭ ya daa yatü? —ñanagürü. ³⁰ Rü nümagü rü Piratuxŭ nangãxŭgü, rü ñanagürügü: —Ngëxguma chi tama wüxi i taxŭ i chixexŭ naxŭxgu, rü tãu chima cuxŭtawata tanaga —ñanagürügü. ³¹ Rü yexguma ga Piratu rü ñanagürü nüxŭ: —¿Ëcü perü ãëxgacügüxŭtawata penaga, rü perü mugü pemaã nüxŭ ixuxŭãcüma penapoxcux! —ñanagürü. Natürü ga yema Yudiügü rü Piratuxŭ nangãxŭgü, rü ñanagürügü: —Natürü pema i Dumacŭãxgü rü marü toxna penachuxu na texëxŭ timëxgüxŭ tümaärü chixexŭcëx —ñanagürügü. ³² Rü yemaãcü ningü ga yema ore ga Ngechuchu ũpaacü nüxŭ ixuxŭ ga ñuxãcü tá na nayuxŭ. ³³ Rü Piratu rü wenaxãrü napatagu naxücu, rü Ngechuchucèx nangema. Rü nüxna naca, rü ñanagürü: —¿Cuma yŭixŭ i Yudiügüarü ãëxgacü quiixŭ? —ñanagürü. ³⁴ Rü Ngechuchu ñanagürü nüxŭ: —¿Cuechatamata i nagu curüxinüxŭ na ngëmaãcŭ choxna cuçaxŭ, rü ãxna togü marü cumaã nüxŭ nixu na ngëmaãcŭ choxna cuçaxŭcëx? —ñanagürü. ³⁵ Rü Piratu Ngechuchuxŭ nangãxŭ, rü ñanagürü: —¿Éxna cuma nagu curüxinügu rü Yudiü chiixŭ? Rü ngëma cuchiüãnecŭãxgü rü paigüarü ãëxgacügütama nixŭ i chauxŭtawata cuxŭ gagüxŭ. ¿Éxna tacü rü chixexŭ cuxü? —ñanagürü. ³⁶ Rü yexguma ga Ngechuchu rü nanangãxŭ, rü ñanagürü: —Choma rü tama ñoma i naãnewa ãëxgacü chixŭ. Rü ngëxguma ñoma i naãnewa ãëxgacü chixŭgu, rü chorü duŭxŭgü rü chi Yudiügüarü ãëxgacügümaã nügü nadai rü tãu chima choxŭ niyauxgü i ngëxguma. Natürü tama ñoma i naãnewa ãëxgacü chixŭ —ñanagürü. ³⁷ Rü yexguma ga Piratu rü ñanagürü nüxŭ: —¿Éxna to i nachiüãneärü ãëxgacü quiixŭ i cumax? —ñanagürü. Rü Ngechuchu nanangãxŭ rü ñanagürü: —Cumatama marü nüxŭ quixu na ãëxgacü chiixŭ. Rü yemacèx ga choma rü chabu rü ñoma ga naãnewa chaxŭ na duŭxŭgümaã nüxŭ chayarüxuxŭcëx i ore i aixcüma ixŭxŭ. Rü guxãma ya texé ya nüxŭ cuãxchaŭxë i ngëma ore i aixcüma ixŭxŭ, rü choxŭ itarüxinüë i ngëma ore i nüxŭ chixuxŭ —ñanagürü. ³⁸ Rü Piratu rü ñanagürü nüxŭ: —¿Tacü nixŭ i ngëma ore i aixcüma ixŭxŭ? —ñanagürü.

Ngechuchumaã nanaxuegu na yamëxgüãxŭ

(Mt 27.15-31; Mr 15.6-20; Lc 23.13-25)

Rü yemaãcü Ngechuchuna nacaxguwena ga Piratu, rü wenaxãrü Yudiügümaã nayarüdexa. Rü ñanagürü nüxŭ: —Taxuüma i chixexŭxŭ nawa chadau i ñaã yatü. ¿Rü tüxcüü chi inapoxcuxŭ? ³⁹ —Natürü guxŭguma ega Üpetüchigaarü petawa nanguxgu, rü pecüma nixŭ na choxna naxcëx na peçaxŭ na íchananguxuchixëëxŭcëx i wüxi i duŭxŭ i poxcuxŭ. ¿Rü penaxwëxexŭ na pexcëx íchananguxuchixëëxŭ i ñaã perü ãëxgacü, Pa Yudiügüx? —ñanagürü. ⁴⁰ Rü yexguma ga guxŭma ga yema duŭxŭgü, rü tagaãcü aita naxüë, rü ñanagürügü: —Tama tanaxwëxe na cuya-ngëxŭ i ngëma yatü. Rü Barabá waxi nixŭ i tanaxwëxexŭ na cuyangëxŭ —ñanagürügü. Rü yema Barabá rü wüxi ga mãëtaxŭ nixŭ.

19

1 Rũ yexguma ga Piratu rũ churaragũxũ namu na Ngechuchuxũ naçuaixgũxũcêx. 2 Rũ yema churaragũ rũ chuchuxũwa nanaxũgũ ga wũxi ga boxũ, rũ ñuxũchi naêruwa nayangêxcuchigũ. Rũ wũxi ga máxũ ga naxchiru ga daucharaxũgu nayacuxêêgũ. 3 Rũ ñuxũchi naxcêx naxĩ, rũ nũxũ nacugũeácũma ñanagũrũgũ nũxũ: —¡Namaxũ, Pa Yudíugũarũ Æxgacũ! —ñanagũrũgũ. Rũ nanapechiwegũ. 4 Rũ Piratu rũ wenaxãrũ dũxétũwa naxũ, rũ Yudíugũxũ ñanagũrũ: —¡Dúcêx! ñuxma tá nuã pepêxewa chanaga na nũxũ pecuáxũcêx na taxuũma i chixexũxũ nawa chadauxũ —ñanagũrũ. 5 Rũ dũxétũwa naxũ ga Ngechuchu. Rũ namaã nangêxcueru ga yema boxũ ga chuchuxũwa naxũgũxũ. Rũ nagu nicux ga yema máxũ ga naxchiru ga daucharaxũ. Rũ yex-guma ga Piratu rũ Yudíugũxũ ñanagũrũ: —Daa nixĩ ya yima yatũ —ñanagũrũ. 6 Natũrũ yexguma Ngechuchuxũ nadaugũgu ga paigũarũ ãêxgacũgũ rũ purichíagũ, rũ inanaxũgũe ga aita na naxũexũ. Rũ ñanagũrũgũ: —¡Curuchawa yapota! ¡Curuchawa yapota! —ñanagũrũgũ. Rũ Piratu rũ ñanagũrũ nũxũ: —¡Êcũ, peyaga rũ pematama curuchawa peyapota! Erũ choma rũ taxuũma i chixexũxũ nawa chadau —ñanagũrũ ga Piratu. 7 Natũrũ ga yema Yudíugũ rũ Piratuxũ nangãxũgũ, rũ ñanagũrũgũ: —Toma toxũ nangêxma i wũxi i torũ mu. Rũ ngẽma torũ mu toxũ nũxũ nacuêxêê na namexũ na nayuxũ i ñaã yatũ, yerũ nũma rũ nũxũ nixu ga Tupana Nane na yĩxũ —ñanagũrũgũ. 8 Rũ yexguma yemaxũ naxĩnũgu ga Piratu, rũ yexeraãcũ namuũ. 9 Rũ wena Ngechuchumaã napatagu naxũcu. Rũ yema Ngechuchuna nayaca, rũ ñanagũrũ: —¿Ngextácũãx quixĩ i cumax? —ñanagũrũ. Natũrũ ga Ngechuchu rũ tama nanangãxũ. 10 Rũ yexguma ga Piratu rũ Ngechuchuxũ ñanagũrũ: —¿Êxna ngẽma tãutãma choxũ cungãxũ? ¿Tau êxna i nũxũ cucuáxũ na çõxmêxwa cungêxmaxũ na curuchawa cuxũ chipotaxũ rũ êxna cuxũ na íchanguxuchixêêxũcêx? —ñanagũrũ. 11 Rũ Ngechuchu nanangãxũ, rũ ñanagũrũ: —Tãu chima cuxmêxwa changêxma, ega tama Tupana naxwêxegu. Rũ ngẽmacêx nixĩ i ngẽma duũxũgũ i cuxna choxũ mugũxũ rũ curũ yexera poraãcũ napecaduãxgũ —ñanagũrũ. 12 Rũ yemawena rũ Piratu nagu narũxĩnũ ga ñuxãcũ Ngechuchuxũ na ínanguxuchixêêgaxũ. Natũrũ yema Yudíugũ rũ poraãcũ aita naxũe, rũ ñanagũrũgũ: —Ngêxguma tá ícunanguxuchixêêxgu rũ tama curũ ãêxgacũ ya tacũ ya Dumacũãx ya Chêcharuxũ cungechaũ. Erũ ngexerũxe ya ãêxgacũ ya tacũxũ tũgũ ingucuchixêêxê, rũ Dumacũãx ya ãêxgacũ ya tacũ ya Chêcharuarũ uwanũ tixĩ —ñanagũrũgũ. 13 Rũ yexguma yemaxũ naxĩnũgu ga Piratu, rũ churaragũxũ namu ga Ngechuchuxũ dũxétũwa na nagagũxũcêx. Rũ nawa nayarũto ga wũxi ga tohicaũ ga taxũ ga nutagũnaxcêx ga togawa rũ Gabatagu ãegaxũ. Rũ yema nachicawa nixĩ ga poxcuexũ ga duũxũgũna naçaxũ ga ãêxgacũ. 14 Rũ wũxi ga ngunexũ nataxu ga Ũpetũchigaarũ petawa na nanguxũ ga yexguma, rũ marũ tocuchiwa nangu. Rũ Piratu rũ Yudíugũxũ ñanagũrũ: —¡Daa nixĩ ya yima perũ ãêxgacũ! ñanagũrũ. 15 Natũrũ ga nũmagũ rũ aita naxũe, rũ ñanagũrũgũ: —Tanaxwêxe na nayuxũ. Rũ ¡curuchawa yapota! —ñanagũrũgũ. Rũ Piratu nũxna naca rũ ñanagũrũ nũxũ: —¿Ñuxãcũ i choma rũ ichanamu na curuchawa yapotagũãxũcêx ya perũ ãêxgacũ? —ñanagũrũ. Natũrũ ga paigũarũ ãêxgacũgũ rũ Piratuxũ nangãxũgũ, rũ ñanagũrũgũ: —Yima ãêxgacũ ya tacũ ya Chêcharu ya Dumawa ngêxmacũ rũ yima nixĩ ya torũ ãêxgacũ, rũ nataxuma i to —ñanagũrũgũ. 16 Rũ yexguma ga Piratu rũ

yema Yudiŋgũna Ngechuchuxũ namu na curuchawa yapotagũãxũcèx. Rũ nũmagũ rũ nayagagũ.

Curuchawa Ngechuchuxũ nipotagũ
(Mt 27.45-56; Mr 15.33-41; Lc 23.44-49)

¹⁷ Rũ ìnaxũxũ ga Ngechuchu, rũ norũ curucha ngĩxũ ìninge. Rũ yẽma nana-gagũ nawa ga wũxi ga nachica ga “Duũxẽeruchinèxãgu” àegaxũ. Rũ yema rũ Górguta nixĩ ga naega ga togawa. ¹⁸ Rũ yẽma curuchawa Ngechuchuxũ nayarũpotagũ. Rũ Ngechuchurũũ curuchawa nayapotagũ ga taxre ga to ga yatũgũ, rũ wũxi ga norũ tũgũnecũwawa rũ to ga norũ ìoxwecũwawa. ¹⁹ Rũ Piratu rũ churaragũxũ namu na Ngechuchuarũ curuchatapèxewa na yapocuchigũãxũcèx ga wũxi ga mũrapewaxacũ ga àegatachinũxũ ga ñaxũ:

“Ngechuchu ya Nacharètucũãx ya Yudiŋgũarũ Àèxgacũ”, ñaxũ. ²⁰ Rũ muxũma ga yema Yudiŋgũ nũxũ nadaumatũ ga yema namatũ ga mũrapewaxacũgu ùxũ. Yerũ yema nachica ga Ngechuchuxũ curuchawa ìyanapotagũxũwa, rũ ìãneãrũ ngaicamana nixĩ. Rũ tomaèxpũx ga nagawa naxũmatũ ga yema naega ga yema mũrapewawa. Rũ togawa rũ Griègugũgawa rũ Dumacũãxgũgawa naxũmatũ. ²¹ Rũ yemacèx ga yema Yudiŋgũarũ paigũarũ àèxgacũgũ rũ Piratuxũ ñanagũrũgũ: —Toma rũ tama tanaxwèxe i cunaxũmatũ i “Yudiŋgũarũ Àèxgacũ”, ñaxũ. Rũ narũmemaè nixĩ i cunaxũmatũ rũ ñacurũgũ:

“Nũgũ ixucũ na Yudiŋgũarũ Àèxgacũ yĩxũ”, ñacurũgũ. ²² Natũrũ Piratu nanangãxũ rũ ñanagũrũ: —Ngẽma chaxũmatũxũ rũ marũ ngèxma naxũmatũ —ñanagũrũ. ²³ Rũ curuchawa marũ Ngechuchuxũ yapotagũguwena ga chur-aragũ, rũ nanade ga Ngechuchuchiru. Rũ yema àgũmũcũ ga churaragũ rũ nũgũmaã nayatoye ga naxchiru. Rũ nanayauxgũ ta ga norũ gãuxũchiru ga máxũ. Natũrũ taxuwama narũngèixte, yerũ woetama yemaãcũ naxũ. ²⁴ Rũ yemacèx ga yema churaragũ rũ nũgũmaã ñanagũrũgũ: —ÌTãũtãma nagu tagaugũe! Rũ narũmemaè nixĩ i naxcèx tá naxĩnũcèxwèxegũ rũ ngĩxũ tafanagũgũ i wũxi i dũeru na ngẽmawa nũxũ icuèxgũxũcèx na texéarũ tá na yĩxũ —ñanagũrũgũ. Rũ yemaãcũ ningu ga Tupanaãrũ ore ga ùmatũxũ ga ñaxũ:

“Nũgũmaã nayatoye i chauxchiru, rũ naxcèx ngĩxũ tanañanagũgũ i wũxi i dũeru”,

ñaxũ. Rũ aixcũma yemaãcũ nixĩ ga naxũgũãxũ ga churaragũ. ²⁵ Rũ Ngechuchuarũ curuchapũnewa iyexma ga naè ga María, rũ ngĩyèx, rũ María ga Creopã naxmèx, rũ María ga Magadãcũãx. ²⁶ Rũ yexguma Ngechuchu naèxũ dèuxgu ga yexma chauxũtagu na nachixũ, rũ ñanagũrũ ngĩxũ: —Pa Mamax, yima nixĩ ya cune, —ñanagũrũ. ²⁷ Rũ yemawena, rũ ñanagũrũ choxũ: —Ngẽma iyixĩ i cue —ñanagũrũ. Rũ yexgumamama rũ chopatawa ngĩxũ chayaxu. Rũ chauxũtawa iyexmaècha.

Nayu ga Ngechuchu

²⁸ Rũ Ngechuchu nũxũ nacuèx ga marũ na yanguxũ ga guxũma ga norũ puracũ ga ñoma ga naãnewa. Rũ yema Tupanaãrũ ore ga ùmatũxũ na yanguxèèxũcèx, rũ ñanagũrũ: —Chĩtawa —ñanagũrũ. ²⁹ Rũ yẽma iyexma ga wũxi ga tũxũãcũ ga binu ga marũ ùxchiũcũmaã àãcuxcũ. Rũ wũxi ga tũèxmũ guma binumaã niwaixèegũ, rũ wũxi ga dexnenenèxãwa nayanèix. Rũ yemamaã naãxgu nanawèxgũ. ³⁰ Rũ Ngechuchu nayaxaxũ ga guma binu ga ùxchiũcũ rũ ñanagũrũ: —Marũ ningu i guxũma i chorũ puracũ —ñanagũrũ. Rũ ñuxũchi inayarũmaxèchieru, rũ nayu.

Wüxi ga churara rü wocaxemaã Ngechuchuxü nacanapacütüxü

³¹ Natürü ga yema Yudiügüarü ãëxgacügü rü tama nanaxwëxegü ga curuchagüwa na nayexmagüxü ga yema naxünegü. Yerü moxüãcü rü ngüxchigaarü ngunexü nixi. Rü yema Yudiügücëx rü yema nixi ga guxü ga ngüxchigaarü ngunexüarü yexera ga üünexü, yerü norü peta ga Üpetüchigaarü ügü nixi. Rü yemacëx Piratuna naxcëx nacagü na churaragü yéma namugüxüçëx na yapoyeparagüãxüçëx na paxa nayuxüçëx ga yema curuchawa ipotagüxü, rü paxa na nadeãxüçëx ga curuchawa naxüpa ga ngüxchigaarü ngunexü. ³² Rü yéma naxi ga churaragü rü inanapoeparagü ga yema taxre ga yatügü ga Ngechuchumaã yéma curuchawa ipotagüxü. ³³ Rü Ngechuchucëx naxi ga churaragü, natürü nüxü nadaugü ga marü na nayuxü. Rü yemacëx tama nayapoyeparagü. ³⁴ Natürü wüxi ga churara rü Ngechuchuxü nacanapacütüxü. Rü yexgumatama inayëxüchi ga nagü rü dexá. ³⁵ Rü choma i Cuáü rü nüxü chadau i guxüma ga ñaã pemaã nüxü chixuxü. Rü aixcüma nixi i ñaã chorü ore. Rü chomatama nüxü chacuëx i aixcüma na yiixü, rü pemaã nüxü chixu na pema rü ta peyaxögüxüçëx. ³⁶ Rü yema nangupetü na yanguxüçëx i Tupanaarü ore i ümatüxü i ñaxü: “Rü taxünetáma ya naxchinëxã nipoyegü”, ñaxü. ³⁷ Rü toxnamana i Tupanaarü ore i ümatüxüwa rü ñanagürü: “Tá nüxü narüdaunü ya yima nacanapacütüxügüãcü”, ñanagürü.

Ngechuchuxü inatëxgü

(Mt 27.57-61; Mr 15.42-47; Lc 23.50-56)

³⁸ Rü nayexma ga wüxi ga yatü ga Arimatéacüãx ga Yúhegu ägagcü. Rü nüma rü ta Ngechuchuxü nayaxö, natürü cúãcü nayaxö yerü natanüxü ga Yudiügüarü ãëxgacügüxü namuü. Rü guma nixi ga Piratuna yaçacü na nayauxüçëx ga Ngechuchuxüne. Rü Piratu rü: —Ngü, —ñanagürü. Rü yexguma ga Yúche rü yéma naxü ga curuchawa íyapotaxüwa, rü curuchawa nayayaxu ga naxüne ga Ngechuchu. ³⁹ Rü yéma nangu ga Nicodému ga üpaacü chütacü Ngechuchuxütagu naxüãnecü. Rü yéma nanange ga 30 kilo naguxü ga pumara ga yixichixü na Ngechuchuxü namaã nachaxünegüxüçëx. ⁴⁰ Rü yemaãcü ga Yúche rü Nicodému rü curuchawa nanayauxgü ga naxüne ga Ngechuchu. Rü naxchiru ga marü pumaracharaxümaã nayanáixpüxügü. Yerü yema nixi ga tocüma ga toma ga Yudiügü ga yexguma wüxi ga yueta tüxü itatëxgügu. ⁴¹ Rü yema nachica ga Ngechuchu curuchawa ípotaxüwa nayexma ga wüxi ga nanetüneçü. Rü yema nanetüneçüwa nayexma ga wüxi ga naxmaxü ga yexwacaxüxü ga taguma texëxü nagu natëxgüxü. ⁴² Rü yema naxmaxügu nayaxüchigü ga Ngechuchuxüne yerü nangaicama, rü paxa tá ningune ga ngüxchigaarü ngunexüçëx.

20

Ínarüda ga Ngechuchu

(Mt 28.1-10; Mr 16.1-8; Lc 24.1-12)

¹ Rü yüxüarü pëxmamaxüchi ga tauta meã yangóonegu, rü María ga Magdáçüãx rü Ngechuchuxü íyaxüchigüxüwa ixü. Rü nüxü idau ga guma nuda ga Ngechuchumaxü namaã rüngüxtaüçü, rü marü na inaxügachixü. ² Rü yexgumatama iññaachi, rü yema choma rü Chimáü ga Pedrumaã ítayexmagüxüwa iña. Rü ngígürügü toxü: —Rü marü nanayauxgü ya Cori ya Ngechuchu i naxmaxüwa. Rü tama nüxü tacuëx na ngexta na

naxügüãxŦ —ngŦgürügü. ³ RŦ yexguma ga choma rŦ Pedru rŦ NgechuchuxŦ íyaxŦcuchigŦxŦwa taxŦ. ⁴ RŦ wŦxigu itaxŦãchi ga tomach, natŦrŦ ga choma rŦ poraãcŦ PedruarŦ yexera ichaŦaãchi. RŦ chaxira NgechuchuxŦ íyaxŦcuchixŦwa changu. ⁵ RŦ ichayarŦmaxãchi na nagu chidaucuchixŦcèx. RŦ nüxŦ chadau ga naxchiru ga namaã yanãixpŦxŦgüãxŦ ga yexma na naxŦxŦ. NatŦrŦ tama aixepegu chaxŦcu. ⁶ RŦ choweama ínangu ga Chimãu ga Pedru. RŦ nüma rŦ yema naxmaxŦgu naxŦcu. RŦ nüma rŦ ta nüxŦ nadau ga yema naxchiru ga namaã yanãixpŦxŦchiréxŦ. ⁷ RŦ nüxŦ nadau ta ga naxchiru ga namaã yanèixèrugüãxŦ ga meãma dixcumŦxŦ ga nüxrŦguma ŦxŦ. RŦ tama wŦxigu namaã nanu ga yema naxchiru ga namaã yanãixpŦxŦgüãxŦ. ⁸ RŦ yexguma ga choma ga chaxiraxŦchi yéma na changuxŦ, rŦ choma rŦ ta chixŦcu. RŦ nüxŦ chadau ga guxŦma, rŦ chayaxŦ ga Ngechuchu rŦ marŦ wena na namaxŦxŦ. ⁹ YerŦ noxri rŦ tama nüxŦ tacuèxgüéga ga yema TupanaãrŦ ore ga ŦmatŦxŦ ga ñaxŦ: “Cristu rŦ tá wena namaxŦ”, ñaxŦ. ¹⁰ RŦ yexguma ga toma rŦ tochiŦcèx tawoegu.

Ngechuchu rŦ ngŦxcèx nangox ga María ga MagadãcŦãx
(Mt 16.9-11)

¹¹ NatŦrŦ ga María rŦ yexma irŦxãŦx naxŦtagu ga NgechuchumaxŦ. RŦ yéma íxaxu. RŦ naxauxãcŦma iyarŦmaxãchi, rŦ nagu iyadaucuchi ga naxmaxŦ. ¹² RŦ nüxŦ idau ga taxre ga daxŦcŦãx ga TupanaãrŦ orearŦ ngeruŦgŦ ga ícómŦchiruxŦ. RŦ NgechuchuxŦne íxŦchiréxŦwa narŦtogŦ, rŦ wŦxi ga Ngechuchueru íxŦxŦwaama rŦ to ga nacŦtawaama. ¹³ RŦ yema daxŦcŦãx ga duŦxŦgŦ rŦ ngŦxna nacagŦe, rŦ ñanagŦrŦgŦ: —Pa NgecŦx, çtacŦcèx cuxaxu? —ñanagŦrŦgŦ. RŦ ngŦma rŦ inangãxŦ, rŦ ngŦgŦrŦgŦ: —Chaxaxu erŦ nayangegŦ í naxŦne ya chorŦ Cori, rŦ tama nüxŦ chacuèx na ngexta naxŦgüãxŦ —ngŦgŦrŦgŦ. ¹⁴ RŦ yexgumatama yema ngŦxgu, rŦ ngŦgŦweama idau. RŦ nüxŦ idau ga Ngechuchu ga ngŦxŦtawa na nayexmaxŦ. NatŦrŦ tama nüxŦ ícuèx ga Ngechuchu na yŦxŦ ga guma. ¹⁵ RŦ yexguma ga Ngechuchu rŦ ngŦxna naca, rŦ ñanagŦrŦ: —Pa NgecŦx, çtacŦcèx cuxaxu? çRŦ texècèx nixŦ í cudaduxŦ? —ñanagŦrŦ. RŦ ngŦma nüxŦ nacuèxgu rŦ yema nixŦ ga yema nanetŦnecŦarŦ dauruŦ. RŦ yemacèx ngŦgŦrŦgŦ nüxŦ: —Pa Corix, ega cuma cuyangexgu í naxŦne ya Ngechuchu, rŦ çchomaã nüxŦ íxu na ngexta na cunaxŦxŦ na choma chayayaxuxŦcèx! —ngŦgŦrŦgŦ. ¹⁶ RŦ yexguma ga Ngechuchu rŦ ñanagŦrŦ ngŦxŦ: —Pa Mariax —ñanagŦrŦ. RŦ ngŦma rŦ naxcèx idaueguãchi, rŦ togawa ngŦgŦrŦgŦ nüxŦ: —Pa Rabunix —ngŦgŦrŦgŦ. RŦ ngèma rŦ “Pa NgúexèerŦx”, ñaxŦchiga nixŦ. ¹⁷ RŦ Ngechuchu rŦ ñanagŦrŦ ngŦxŦ: —çTãxŦ í choxŦ quingögŦxŦ, erŦ tauta ChaunatŦxŦtawa chaxŦ! çNatŦrŦ ngema chaueneègŦtanŦwa naxŦ rŦ namaã nüxŦ yarŦxu na choma rŦ tá ChaunatŦ ya chorŦ Tupana ya PenatŦ ya perŦ TupanaxŦtawa chaxŦxŦ! —ñanagŦrŦ. ¹⁸ RŦ yexguma ga María ga MagadãcŦãx rŦ tomaã nüxŦ iyarŦxu ga marŦ nüxŦ na nadauxŦ ga Cori ga Ngechuchu. RŦ ñaxŦchi tomaã nüxŦ íyaxu ga yema ore ga Ngechuchu ngŦmaã nüxŦ íxuxŦ.

NorŦ ngŦexŦgŦcèx nangox ga Ngechuchu
(Mt 28.16-20; Mr 16.14-18; Lc 24.36-49)

¹⁹ RŦ yema yŦxŦarŦ ngunexŦãrŦ chŦtacŦ, rŦ tangutaquèxegŦ ga toma ga NgechuchuarŦ ngŦexŦgŦ. RŦ togŦ tarŦwãtaŦgŦ, yerŦ yema YudŦgŦarŦ ãèxgacŦgŦxŦ tamuŦé. RŦ Ngechuchu rŦ ngŦrŦãchi yéma nangox, rŦ torŦ ngãxŦtanŦgu nachŦ. RŦ toxŦ narŦumoxè, rŦ ñanagŦrŦ: —çPetaãègŦ! —ñanagŦrŦ.

²⁰ Rŭ yema ñaxguwena rŭ toxŭ ñŭgŭ nawémĕx, rŭ ñŭgŭ inawépacütŭxŭ. Rŭ tomagŭ ga norŭ ngŭexŭgŭ rŭ tataãĕgŭ, yerŭ ñŭxŭ tadaugŭ ga guma torŭ Cori. ²¹ Rŭ yexguma rŭ wenaxârŭ ñanagŭrŭ toxŭ: —¡Petaãĕgŭ! Rŭ yema Chaunatŭ nŭma choxŭ na muxŭrŭŭ tâtama nixŭ i pexŭ chamuxŭ i chomax —ñanagŭrŭ. ²² Rŭ yexguma rŭ toétŭ “cue” ñanagŭrŭ ga Ngechuchu. Rŭ ñŭxŭchi ñanagŭrŭ toxŭ: —¡Penayauxgŭ i Tupanaãĕ i Ũñexŭ! ²³ Rŭ ngĕxguma duŭxŭgŭ ñŭxŭ rŭxoegu i norŭ pecadugŭ, rŭ pema rŭ pexŭ nangĕxma i pora na namaã ñŭxŭ pixuxŭ na Tupana marŭ ñŭxŭ ñŭxŭ rŭngŭmaxŭ i norŭ pecadugŭ. Natŭrŭ ngĕxguma duŭxŭgŭ tama ñŭxŭ rŭxoegu i norŭ pecadugŭ, rŭ pema rŭ pexŭ nangĕxma i pora na namaã ñŭxŭ pixuxŭ na marŭ ngĕma norŭ pecadugŭwatama nangĕxmagŭxŭ —ñanagŭrŭ ga Ngechuchu.

Tumachi ñŭxŭ nadau ga Cori ga wena maxŭcŭ

²⁴ Natŭrŭ totanŭxŭ ga Tumachi ga Wŭxigu Buexŭmaã taxugŭxŭ, rŭ tama totanŭwa nayexma ga yexguma Ngechuchu toxĕx ngoxgŭ. ²⁵ Rŭ yixcama ga toma rŭ Tumachimaã ñŭxŭ tixugŭe, rŭ ñatarŭgŭgŭ: —Marŭ ñŭxŭ tadau ya tŭrŭ Cori ya Ngechuchu —ñatarŭgŭgŭ. Natŭrŭ ga Tumachi rŭ toxŭ nangĕxŭ rŭ ñanagŭrŭ: —Ngĕxguma tama ñŭxŭ chadèuxgŭ i norŭ itapuamaxŭ i naxmĕxwa rŭ tama ñŭxŭ chingŭgŭgŭ i ngĕma itapuamaxŭ rŭ ngĕma norŭ cana-pacütŭxŭ, rŭ tãtãma chayaxŭ i ngĕma ore i chomaã ñŭxŭ pixuxŭ —ñanagŭrŭ. ²⁶ Rŭ 8 ga ngunexŭguwena rŭ wenaxârŭ tangutaquĕxegŭ ga toma ga wŭxi ga İpatawa. Rŭ totanŭwa nayexma ga Tumachi ga yexguma. Rŭ woo ga na nawãxtaxŭ ga İax, rŭ ngŭrŭãchi yĕma nangox ga Ngechuchu, rŭ torŭ ngãxŭtanŭgu nachŭ. Rŭ toxŭ narŭmoxĕ, rŭ ñanagŭrŭ: —¡Petaãĕgŭ! —ñanagŭrŭ. ²⁷ Rŭ yexguma Tumachixŭ ñanagŭrŭ ga Ngechuchu: —¡Ñŭxŭ ingŭgŭ i ñãã chorŭ itapuamaxŭ i choxmĕxwa ngĕxmaxŭ, rŭ ñŭxŭ nadau ya daa choxmĕx! ¡Rŭ nuxa chorŭ canapacütŭxŭgu ingŭgŭ! ¡Rŭ ñŭxŭ rŭxo na tama cuyaxŭxŭ! ¡Rŭ meãma yaxŭ i ñŭxmax! —ñanagŭrŭ. ²⁸ Rŭ yexguma ga Tumachi rŭ Ngechuchuxŭ nangĕxŭ, rŭ ñanagŭrŭ: —Pa Chorŭ Corix, cuma nixŭ i chorŭ Tupana quiŭxŭ —ñanagŭrŭ. ²⁹ Rŭ Ngechuchu rŭ ñanagŭrŭ ñŭxŭ: —Pa Tumachix, cuma cuyaxŭ i ñŭxma erŭ choxŭ cudau. Natŭrŭ tataãĕgŭ ya yixema tama choxŭ daugŭãcŭma yaxŭgŭxe —ñanagŭrŭ.

Tacŭcĕx naxŭmatŭ i ñãã popera

³⁰ Rŭ Ngechuchu rŭ topĕxewa nanaxŭ ga muxŭma ga to ga mexŭgŭ ga cuĕrxrŭgŭ i tama ñãã poperagu ũmatŭxŭ. ³¹ Natŭrŭ guxŭma i ñãã poperagu ũmatŭxŭ, rŭ naxŭmatŭ na peyaxŭgŭxŭcĕx na Ngechuchu rŭ Cristu ya Tupana Nane na yiŭxŭ. Rŭ ngĕxguma ñŭxŭ peyaxŭgŭgŭ rŭ tá pexŭ nangĕxma i maxŭ i taguma gŭxŭ.

21

Ngechuchu rŭ 7 ga norŭ ngŭexŭgŭcĕx nangox

¹ Rŭ yemawena ga Ngechuchu rŭ wenaxârŭ toxĕx nangox naxtaxa ga Garirĕaanacŭwa. Rŭ Tibĕria nixŭ ga to ga naega. Rŭ ñããcŭ nixŭ ga toxĕx nangŭxŭ. ² Rŭ wŭxiwa tayexmagŭ ga choma rŭ Chaŭtiãgu ga Zebedeu nanegŭ rŭ Chimãu ga Pedru, rŭ Tumachi ga Wŭxigu Buexŭmaã taxugŭxŭ, rŭ Natanaĕ ga Garirĕaanegune ga İãne ga Canãcŭãx, rŭ to ga taxre ga tomŭcŭgŭ ga Ngechuchuarŭ ngŭexŭgŭ. ³ Rŭ Chimãu ga Pedru rŭ ñanagŭrŭ toxŭ: —Tã chayapŭchae —ñanagŭrŭ. Rŭ yexguma ga toma rŭ tanangĕxŭgŭ, rŭ ñatarŭgŭgŭ ñŭxŭ: —Toma rŭ tá ta cuwe tarŭxŭ —ñatarŭgŭgŭ. Rŭ yĕma taxŭ,

rü wüxi ga ngegu tichoŦ. Natürü yema chütaxŦgu rü taxuŦma ga choxni tiyauxgü. ⁴ Rü yexguma noxri yangóonegu rü Ngechuchu toxçèx nangox ga naxtaxaanacüwa. Natürü ga toma rü tama nüxŦ tacuèxgü ga Ngechuchu na yïxŦ. ⁵ Rü yexguma ga Ngechuchu rü toxna naca, rü ñanagürü toxŦ: —Pa Ngextüxcügüx, çéxna taxuŦma i choxni piyauxgü? —ñanagürü. Rü toma rü tanangäxŦgü rü ñatarügü: —TaxuŦma —ñatarügü. ⁶ Rü yexguma ga Ngechuchu rü ñanagürü toxŦ: —¡PeweŦärü tügüneçüwawaama penatäe i perü pücha! rü tá ípenayauxŦ i choxni —ñanagürü. Rü yémaäma tanatægü ga torü pücha, rü taxucürüwa ítanatüächigü, yerü muxüchixŦ ga choxni tiyauxgü. ⁷ Rü yexguma ga choma rü PedruxŦ ñacharügü: —Yima nixŦ ya Cori ya Ngechuchu —ñacharügü. Rü yexguma yemaxŦ naxínügu ga Pedru ga guma na yïxŦ ga Cori, rü nicüxcuchi ga naxchiru yerü noxri rü ínacüxuchichirëx. Rü natüchiüwa nayaxu, rü naxänacüwa naxçèx nawëxë. ⁸ Rü toma ga natanüxŦ rü nguemaätama naxänacüwa taxägü. Rü yéma tanatügü ga yema pücha ga choxnimaã äächüxŦ yerü 100 metruxicatama nataxu ga na naxänacüwa na tangügüxŦ. ⁹ Rü yexguma nguewa ítachoŦgu rü yéma nüxŦ tadau ga wüxi ga üxü, rü naxëtügu naxü ga wüxi ga choxni. Rü yéma nayexma ta ga wüxi ga päu. ¹⁰ Rü Ngechuchu rü ñanagürü toxŦ: —¡Nuäta penge i ñuxre i ngéma choxni i ípeyauxŦxŦ! —ñanagürü. ¹¹ Rü Chimáu ga Pedru rü nguema nixüe. Rü yema püchamaã naxnücügu ínanatüächiwetaŦ ga choxni ga ínayauxŦxŦ. Rü 153 ga choxni ga itaxŦ nayexma nawa ga yema pücha. Rü woo ga na namuxüchixŦ, rü tama narügäu ga pücha. ¹² Rü yexguma ga Ngechuchu rü ñanagürü toxŦ: —¡Nuä pexŦ rü peyachibüe! —ñanagürü. Rü taxüema ga toma rü nüxna tacaxchaŦ na texë yïxŦ ga nümax, yerü marü nüxŦ tacuèxgü ga guma na yïxŦ ga Cori ga Ngechuchu. ¹³ Rü yexguma ga Ngechuchu rü yéma toxŦtawä naxü. Rü nanayaxu ga päu rü wüxichigü toxna nanaxä. Rü yexgumarüŦ ta ga choxni rü toxna nanaxä. ¹⁴ Rü yema nixŦ ga norü tomaëxpüxcüna ga toxçèx na nangóxŦ ga Ngechuchu ga yuwa ínadaxguwena.

Ngechuchu rü Pedrumaã nidexa

¹⁵ Rü yexguma chibüewa tingügüwena rü Ngechuchu rü Chimáu ga Pedruna naca, rü ñanagürü: —Pa Chimáu Pa CuáŦ Nanex, çaixcüma choxŦ cungechaŦxŦ i ñaã cumücügüxŦ na cungechaŦxŦärü yexera? —ñanagürü. Rü Pedru nanangäxŦ, rü ñanagürü: —NgŦ, Pa Corix, cuma nüxŦ cucuèx na cuxŦ changechaŦxŦ —ñanagürü. Rü Ngechuchu rü ñanagürü nüxŦ: —¡Nachibüexëe i chorü duŦxŦgü! —ñanagürü. ¹⁶ Rü wenaxärü Pedruna naca, rü ñanagürü: —Pa Chimáu Pa Yoná Nanex, çaixcüma i choxŦ cungechaŦxŦ? —ñanagürü. Rü Pedru nanangäxŦ, rü ñanagürü: —NgŦ, Pa Corix, cuma nüxŦ cucuèx na cuxŦ changechaŦxŦ —ñanagürü. Rü Ngechuchu rü ñanagürü nüxŦ: —Ëcü, ¡nüxna nadau i chorü duŦxŦgü! —ñanagürü. ¹⁷ Rü norü tomaëxpüxcüna wenama Pedruna naca, rü ñanagürü: —Pa Chimáu Pa Yoná Nanex, çaixcümaxŦchi yïxŦ i choxŦ cungechaŦxŦ? —ñanagürü. Rü yexguma ga Pedru rü düxwa nangechaŦ, yerü norü tomaëxpüxcüna Ngechuchu nüxna naca ngoxi aixcüma nüxŦ nangechaŦ. Rü ñanagürü ga Pedru: —Pa Corix, cuma nüxŦ cucuèx i guxŦma. Rü cuma nüxŦ cucuèx na aixcümaxŦchi cuxŦ changechaŦxŦ —ñanagürü. Rü Ngechuchu ñanagürü nüxŦ: —Ëcü ¡nachibüexëe i chorü duŦxŦgü! ¹⁸ —Rü aixcüma cumaã nüxŦ chixu rü yexguma cungextüxügu rü cügü quicüxcuchi ga na ngextá cuma ícunaxwëxëüwa cuxüxŦçëx. Natürü ngëxguma yaguäx quixŦgu rü tá quixuuchichacüü na

togue cuxŭ icuxcuchixŭcèx. Rŭ ngēma tama cuma ícunaxwèxexŭwa tá cuxŭ nagagŭ –ñanagŭrŭ. ¹⁹ Rŭ Ngechuchu rŭ yema ñanagŭrŭ na nŭxŭ nŭxŭ nacuèxèèxŭcèx ga ñuxácŭ tá na nayuxŭ ga Pedru na yemaácŭ Tupanaxŭ nataxèèxŭcèx. Rŭ yemawena ga Ngechuchu rŭ ñanagŭrŭ nŭxŭ: –¡Chowe rŭxŭ! –ñanagŭrŭ.

Yema ngŭexŭ ga Ngechuchu poraácŭ nŭxŭ ngechaŭxŭchiga

²⁰ Rŭ yexguma nŭgŭweama nadèuxgu ga Pedru rŭ choxŭ nadau ga naweama na ne chaxŭxŭ. Rŭ chomachirèx nixŭ ga chibŭwa Ngechuchucŭwawa charŭtoxŭ rŭ nŭxna chaçaxŭ rŭ ñachaxŭ:

“Pa Corix, ¿texè tá tixŭ ya yíxema bexma cuechita cuxŭ íxuaxŭxè?” ñachaxŭ.

²¹ Rŭ yexguma Pedru choxŭ dèuxgu rŭ Ngechuchuna naca, rŭ ñanagŭrŭ: – Pa Corix, ¿ñaã Cuáŭ rŭ tacŭ tá nŭxŭ ũpetŭxŭ? –ñanagŭrŭ. ²² Rŭ Ngechuchu nanangāxŭ, rŭ ñanagŭrŭ nŭxŭ: –Ngèxguma choma chanaxwèxegu rŭ chanamaxèè ñuxmatáta wena núma chaxŭ. ¿Rŭ tŭxcŭxŭ i nagu curŭxŭnŭxŭ i ngema? Rŭ cuma ¡rŭ chowe rŭxŭ! –ñanagŭrŭ. ²³ Rŭ yexguma yema chomŭcŭgŭ nŭxŭ ñnŭègu ga yema chauchiga, rŭ nagu narŭxŭnŭe na taxŭtáma chayuxŭ. Natŭrŭ Ngechuchu rŭ tama nŭxŭ nixu ga táxŭtáma na chayuxŭ. Natŭrŭ ñanagŭrŭmare:

“Ngèxguma choma chanaxwèxegu rŭ chanamaxèè ñuxmatáta wena núma chaxŭ. ¿Rŭ tŭxcŭxŭ i nagu curŭxŭnŭxŭ i ngēma?”, ñanagŭrŭmare. ²⁴ Rŭ chomatama nixŭ ga nŭxŭ chadauxŭ i guxŭma i ñaã pemaã nŭxŭ chixuxŭ, rŭ chomatama nixŭ i pexcèx chanaxŭmatŭxŭ i ñaã ore. Rŭ guxāma i toma rŭ nŭxŭ tacuèx na aixcŭma na yŭxŭ i ñaã pemaã nŭxŭ chixuxŭ. ²⁵ Rŭ nayexma ga to ga muxŭchixŭma ga tacŭ ga Ngechuchu ũxŭ. Rŭ ngèxguma chí naxŭmatŭgu i guxŭma ga yema naxŭxŭchiga, rŭ nagu charŭxŭnŭgu rŭ tãŭ chima ñoma i naãnegu name i ngēma poperagŭ i nachiga ũmatŭxŭ.

NGECHUCHUARÜ NGÜEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

¹⁻² Pa Mecü Pa Teóquirux, nüxíra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangüexëëxü ga noxritama inaxügüagu ga norü puracü ñuxmata yema ngunexü ga Tupana daxüguxü ga naãnewa nagaxgu. Rü yexguma tauta daxüguxü ga naãnewa naxüxgu ga Ngechuchu rü nayadexechi ga norü ngüexügü ga yamugüchaüxü na Tupanaärü puracü naxügüxüçex. Rü Tupanaãe i Üünexüärü poramaã nanangüexëë ga yema duüxügü, rü namaã nüxü nixu ga tacü tá na naxüexü. ³ Rü yexguma marü yuwa ínadëxguwena ga nüma ga Ngechuchu rü 40 ga ngunexügu rü nügü nangoxëëxü naxcëx ga norü ngüexügü rü muxüma ga togü ga nüxü yaxögüxü na yemaãcü nüxü nacüexgüxüçex na aixcüma wena namaxüxü. Rü namaã nüxü nixuchiga na ñuxäcü na yixüxü i Tupana äëxgacü íyixüwä. ⁴ Rü yexguma yema ngüexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxüxüçex ga Yerucharëü. Rü ñanagürü nüxü: —Ípenanguxëëx i ngëma Tupanaãe i Üünexü ga Chaunatü pemaã ixunetaxü ga pemaã nüxü chixuchigaxü! ⁵ Aixcüma nixü ga Cuáü rü dexáwa duüxügüxü ínabaiüxëëxü, natürü i pema rü täütäma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxüguxü ga naãnewa naxü ga Ngechuchu

⁶ Rü yexguma nangutaquëxegüga ga yema norü duüxügü, rü Ngechuchuna nacagü, rü ñanagürügü: —Pa Corix, çëxna ñoma tá nixü i ngunexü i marü ícunawoxü i nuã Yudiügüchiüãnewa i torü uwanügüarü churaragü na wenaxärü tomatama namaã itacüaxüçex i ñaã tochiüãne? —ñanagürügü. ⁷ Rü Ngechuchu nanangäxü, rü ñanagürü: —Pema rü taxucëxma nüxü pecüaxchaü i ñuxgu tá nixü i ngëma ngunexü, erü Chaunatüxicatama nüxü nangëxma i pora na nüxü naxunetaxü i ngëma ngunexü i choxna naxcëx peçaxü. ⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëë. Rü tá ípechoxü na nüxü peyarüxugüexüçex i chauchiga i Yerucharëüwa, rü guxüma i Yudéaanewa, rü Chamáriaanewa, rü ñuxmatáta guxü i naãnewa nangu —ñanagürü. ⁹ Rü yexguma yema ñaxguwena rü nüxü ínadaunüyane ga norü ngüexügü, rü Tupana rü daxüguxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxärü nüxü nadaugü. ¹⁰ Rü yexguma Ngechuchuxü ínadaunüyane ga daxüwa na naxüxü, rü ngürüächí natanüwa nangox ga taxre ga yatü ga ícómüchiruxü. ¹¹ Rü ñanagürügü nüxü: —Pa Yatügü i Gariréaneçüãx, çtüxçüü daxügu íperüdaunü? Erü daatama Ngechuchu ga petanüwa yexmacü rü ñuxma Tupana daxüwa nagacü, rü ngëma ñuxma nüxü na pedaxü na ñuxäcü daxüwa naxüxü, rü ngëmaãcü tátama nixü i wena nüma naxüxü —ñanagürügü.

Yudachicüü nanayauxgü ga Matía

¹² Rü yema ngüexügü ga Ngechuchu imugüxü na Tupanaärü puracü naxügüxüçex, rü nüxna ínixü ga guma mëxpüne ga Oríbunecügu äegane. Rü

Yerucharéúçex nawoegu. Rû guma ïanearû yaxû nüxna ga guma mëxpúne rû wüxi ga kilómetru nixî. ¹³ Rû yexguma Yerucharéúârû ïanewa nangugûgu, rû nagu nachocu ga guma ï ga nagu napegüne. Rû dauxna naxîgû naxçex ga yema ucapu ga taxû ga nagu napegüxû. Rû nümagû nixî ga Pedru, rû Cuáû, rû Chaútiágu, rû Aúdré, rû Piripi, rû Tumachi, rû Baturumé, rû Mateu, rû Chaútiágu ga Arupéu nane, rû Chimáú ga Iporaáêçüüçü, rû Yuda ga Chaútiágu naêneê. ¹⁴ Rû guxûma ga nümagû rû guxûguma nangutaquêxegüxû na wüxigu nayumüxêgüxüçex namaã ga Ngechuchueneêgü, rû ngîmaã ga María ga Ngechuchu naê, rû ñuxre ga togû ga ngexügü. ¹⁵ Rû guxûma ga yema ngunexügügu rû nangutaquêxegüxû ga yema yaxôgüxû. Rû 120 nixî. Rû wüxi ga ngunexügu ga Pedru rû inachi ga norû ngâxûtanüwa, rû ñanagürü: ¹⁶ —Pa Chomüçügüx, marû ningu ga yema Tupanaãe i Üünexü nuxçuma Dabíxû muxû na naxûmatüãxüçex nachiga ga Yuda ga namaãrû cuèxruû ixîxû naxçex ga yema duûxügu ga Ngechuchuxû iyauxgüxû. ¹⁷ —Rû tatanüxüchirêx nixî ga Yuda, rû nüma rû ta taxrûû ñaã Tupanaãrû puracüwa napuracü ga noxrix. ¹⁸ —Natürü nüma ga Yuda rû bexma Ngechuchuxû ïnaxuaxû. Rû yemacêx ga âêxgacügü rû nüxü nanaxütanü. Natürü yixcama ga Yuda rû naxçex ïnicuèx ga yema chixexü ga naxüxü, rû yemacêx nanaæaguxêê ga yema díeru. Rû yemawena rû nügü nawêxnaxâ rû naítanüwa nügü narütáe. Rû yexguma duûxügu nadaexügügu rû inanago, rû niwãixpütüwe rû ïnayixü ga naúnüta. Rû yema díeru ga nataeguxêêxümaã ga âêxgacügü rû naxçex nataxe ga wüxi ga naãne. ¹⁹ —Rû nüxü nacuáçhigagü ga guxûma ga Yerucharéúçêãx, rû yemacêx Achédamagu nanaxüéga ga yema naãne. Rû ngêma nixî i “Nagüchitaû” ñaxüchiga. ²⁰ —Rû Wiyaegüarû poperawa yemachiga nanaxümatü ga Dabí, rû ñanagürü: “Yixrûma rû ngêma natá ya napata, rû taxüema nagu pe”, ñanagürü. Rû toxnamana i ngêma poperawa rû ñanagürü ta: “Rû name nixî na togue naxüxü i ngêma norû puracü”, ñanagürü. ²¹⁻²² —Rû nuã tatanüwa nangêxmagü i ñuxre i yatügü ga guxüguma tüxü ümüçügüxü ga yexguma tatanüwa nanuxmagu ga Cori ga Ngechuchu. Rû nümagü rû tawe narüxî ga noxritama Cuáû Ngechuchuxû ïbaixêêgu rû ñuxmata yema ngunexü ga daxügüxü ga naãnewa naxüxgu. Rû name nixî i ngêmatanüwa na nayaxuxü i wüxi i Yudachicüüxü na tamüçü yîxüçex rû tarüû nüxü yaxuxüçex i ñuxácü wena na namaxüxü ya Ngechuchu. ²³ Rû yemawena rû nüxü naxunetagü ga taxre ga yatügü. Rû wüxi nixî ga Yúche ga Yuchugu âegaxü ga Bachabámaã naxugüxü. Rû Matía nixî ga to. ²⁴⁻²⁵ Rû ñaãçü nayumüxêgü: —Pa Corix, cuma nüxü cucuèx i guxûma i duûxügüarû maxü. ¡Rû ñuxma rû toxü nawêx i ngêxürüüxü i cuçcêx mexü i ñaã taxrewa na cunamuxüçex rû nüma na naxüãxüçex i ñaã puracü ga Yuda itáxü ga yexguma norû poxcuwa naxüxgu! —ñanagürügü. ²⁶ Rû wüxi ga díeru ga cuèxruû ngîxü nañanagügü na yemawa nüxü nacuèxgüxüçex ga ngêxürüüxü ga yema taxre tá na ixüçuxü. Rû Matíagu nangu na yangucuchixüçex. Rû yexgumatama rû yema 11 ga duûxügu ga Ngechuchu imügüxütanügu naxâ ga Matía.

2

Ínangu ga Tupanaãe i Üünexü

¹ Rû nawa nangu ga yema Yudiügüarû peta ga Pêtecóstege âegaxü. Rû yema ngunexügu rû guxûma ga yema yaxôgüxü rû wüxi ga nachicawa

nangutaquēxegū. ² Rū ngūrūāchi daxūwa ne naxū ga wūxi ga naga űoma wūxi ya buanecū ya taxūchicū icuxcugurū, rū guxūne ga guma ī ga nawa nayexmagūnegu nayaxūga. ³ Rū naxcēx nangox ga űūxema ga űoma naconūgūraūxū. Rū yema űūxema rū nūgūna nixīgū, rū wūxichigū ga yema yaxōgūxūna ninguchigū. ⁴ Rū guxūma ga yema yexmagūxū rū Tupanaāxē ga űūnēxū nūxna nangu. Rū yema Naāē ī űūnēxū yadexagūxēēxūācūma inanaxūgū ga to ga nagawachigū na yadexagūxū. ⁵ Rū yema ngunēxūgūgu rū yema petacēx Yerucharēūwa nayexmagū ga muxūma ga toxnamana ne īxū ga Yudīugū ga Tupanaga īnūēxū ga guxū ga togū ga nachīūānēwa ne īxū. ⁶ Rū yexguma nūxū naxīnūēgu ga űuxācū na yadexagūxū ga yema yaxōgūxū, rū nangutaquēxegū ga muxūma ga yema duūxūgū ga toxnamana ne īxū. Rū űaűaixāchiāēgū yerū yema yaxōgūxū rū wūxichigū ga yema togū ga duūxūgūgawachigū nidexagū. ⁷ Rū yema na porācū űaűaixāchiāēgūxūcēx, rū nūgūmaā rū űanagūrūgū: —ĶTama ēxna Garirēaanecūāx yixīgūxū ī guxū ī űāā duūxūgū ī tagawa idexagūxū? ⁸ —ĶRū űuxācū ēxna ī nūxū ixīnūēxū ī wūxichigū ī yixema ī taga ī nawa iyaēxūwa na yadexagūxū? ⁹⁻¹¹ —Yixema tixīgū ī Pārtīaanecūāx, rū Médiāanecūāx, rū Eraūānecūāx, rū Mechopotāmiāānecūāx, rū Yudēaanecūāx, rū Capadochiaānecūāx, rū Pōtuanecūāx, rū Áchiaarū naānecūāx, rū Pirīquiaanecūāx, rū Paūpīriaanecūāx, rū Equituarū naānecūāx, rū Dībiaarū naānecūāx ī Chirenecūāx. Rū tatanūwa nangēxma ta ī duūxūgū ī Crētaanēwa rū Arābiaarū naānēwa ne īxū. Rū űuxre ī yixema rū Dumacūāx ī Yudīugū tixīgū. Rū nuā tatanūwa nangēxma ta ī Dumacūāx ī tama Yudīugū ixīgūxū natūrū tacūmagu īxū. Rū guxāma rū nūxū taxīnūē na wūxichigū ī tagawachigū na yadexagūxū ī űāā ngūxūgū. Rū tagawa tamaā nūxū nixugūē ī űuxācū na namēxēchixū ya Tupana —űanagūrūgū. ¹² Rū guxūma porācū űaűaixāchiāēgū, rū tama nūxū nacūēxgū ga űuxācū na yīxū ga yema. Rū nūgūna nacagūē, rū űanagūrūgū: —ĶTacūchiga nixī ī guxūma ī űāā? — űanagūrūgū. ¹³ Natūrū ga togū rū nūxū nacugūēcūraxū, rū űanagūrūgū: —Nangāxēmare rū ngēmacēx nixī ī ngēmaācū yadexagūxū —űanagūrūgū.

Pedruarū dexa

¹⁴ Rū yexguma inachi ga Pedru namaā ga yema 11 ga namūcūgū, rū tagaācūma űanagūrū: —Pa Yudīugū ī nuxma Yerucharēūgu naxīānēxū rū Pa Nuācūāxgūx, Ķrū dūcax, meā iperūxīnūē ī űāā tá pemaā nūxū chixuxū! ¹⁵ —Rū űāā chomūcūgū rū tama nangāxē ī pema nagu perūxīnūēxūrū, erū pēxmamatama nixī rū ngexwacēx 9 arū orawa nangu. ¹⁶ —Natūrū űāā űuxma nūxū pedauxū nixī ga yema Tupanaārū orearū uruū ga Yoē marū nūxū ixuchigaxū ga yexguma űaxgux:

¹⁷ “Rū űanagūrū ya Tupana: ‘Ngēma nawa iyacuāxū ī ngunēxūgūgu rū guxū ī duūxūgūtanūwa tá chanamu ī Chauāē ī űūnēxū, rū penēgū rū pexacūgū rū tá chauchigagu nidexagū. Rū choma rū tá chayangoxetūxēē ī perū ngextūxūxūgū rū tá nūxū nadaugū ī ngēma tá nūxū chawéxū. Rū perū yaguāxgūmaā tá chidexa ī nanēgūwa. ¹⁸ Rū chorū duūxūgūtanūwa tá chanamu ī Chauāē ī űūnēxū ī ngēma ngunēxūgūgu, rū tá chauchigagu nidexagū. ¹⁹ Rū naānetūwewa tá ichanawēx ī mexūgū ī taguma nūxū idauxū. Rū űoma ī naānēwa tá ichanawēx ī cuēxruūgū ī nagū, rū űūxema, rū taemaxū. ²⁰ Rū űēxcū rū tá nixoxma rū tauemacū rū tá nagūrū nāduema naxūpa na wenaxārū nūma naxūxū ya Cori. Rū ngēma ngunēxū ī nagu nūma naxūxū, rū wūxi ī ngunēxū ī mexēchixū

tá nixī. ²¹ Rū guxāma ya yixema Corina çaxe na tüxü nangüxëëxücëx, rü tá tamaxë' ”,

ñanagürü ga yema orewa. ²² Rū ñanagürü ga Pedru: —Pa Duüxügü Pa Yudiügüx, jiperüxñinë i ñaã ore! Rū pema rü meãma nüxü pecuëx rü Ngechuchu ga Nacharetüçüax rü guma nixī ga wüxi ga yatü ga Tupana pepëxewa nüxü yaxucü na Nanexüchi yixü. Rū yemacëx ga Tupana rü norü poramaã nüxü nanaxüxëë ga muxüma ga mexügü rü cuëxruügü ga noxri taguma nüxü idauxü. ²³ —Rü Tupana pexna nanamu ga guma Ngechuchu na pecaducëx nayuxücëx yerü yemaäcü nanaxüxçauü ga Tupana, rü yemaäcü nagu narüxñnü ga noxri tauta naxüxgux ga naãne. Rū pema penamu ga yatügü ga tama yaxögüxü na yayauxgüäxücëx rü curuchawa na yapotagüäxücëx. Rü yemaäcü penayuxëë. ²⁴ —Rü woo nayuchirëx natürü tama yexma nayacuëx, yerü Tupana wena nanamaxëë rü ñanadaxëë. Rü yemaäcü ga yema yu rü taxuacüma marü nüxü narüporamaëëcha. ²⁵ —Yerü ga äëxgacü ga Dabí rü Ngechuchuchigagu nidexa, rü ñanagürü:

“Guxüguma nachauxütagu ya Cori ya Tupana rü choxü narüngüxëë na taxucëxma chaxoegaäëxücëx. ²⁶ Rü yemacëx marü chataãë rü taäëxü ga oremaã chidexa. Rü choma nüxü chacuëx na mexü tá choxü üpetüxü i ngëxguma chayuxgux. ²⁷ Erü cuma täütama yuexüchicawa choxü cutëx, rü täütama cunaxwëxe na yayixixü i chaxune i choma ya Cune ya Üüncü na chiixü. ²⁸ Marü choxü nüxü cucuëxëë i ñuxäcü tá chanayaxu i maxü i taguma güxü, rü tá poraäcü choxü cutaäëxëë, erü chomaã tá icurüxäüx”,

ñanagürü ga Dabí. ²⁹ Rū ñanagürü ga Pedru: —Pa Chaueneëgüx, rü aixcüma pemaã nüxü chixu na nayuxü ga nuxcümaäcü ga torü äëxgacü ga Dabí, rü marü inatëx, rü ñuxma rü ta tatanüwa nangëxma i naxmaxü. ³⁰ —Natürü nüma ga Dabí rü wüxi ga Tupanaärü orearü uruü nixī. Rū yemacëx nüxü nacuëx rü wüxi ga nataa tá nixī i äëxgacü ya Cristuxü ingucuchicü, yerü ga Tupana rü yemaäcü namaã inaxuneta. ³¹ —Rü yemacëx nuxcümaxüchima ga Dabí rü ñoma marü nüxü nadauxuchixürü nüxü nixu rü Cristu rü tá yuwa ñarüda rü täütama naxmaxüwa nangëxmaëcha rü täütama niyixi i naxüne. ³² —Rü ñuxma ya Tupana rü marü wena nanamaxëë ga guma Ngechuchu, rü guxāma ga toma rü nüxü tadaugü na wena namaxüxü, rü ngëmacëx pemaã nüxü tixuchiga. ³³ —Rü Tupana rü daxügüxü ga naãnewa nanaga na norü tügüncüwawa yanatoxücëx. Rü Tanatü ya Tupana rü marü nüxna nanamu ga Naãe i Üünexü ga nuxcüma nüxü yaxuxü rü tá nuã na namuãxü. Rü ñuxma ya yima Ngechuchu rü nüma totanüwa nanamu i ngëma Naãe i Üünexü. Rü ngëma Naãe nuã üxü nixī i ñuxma nüxü pedauxü rü nüxü pexñnüxü. ³⁴⁻³⁵ —Rü taguma daxüwa naxü ga Dabí, natürü nümatama rü ñanagürü:

“Tupana rü chorü Cori ya Cristumaã nüxü nixu rü ñanagürü: ‘jRü chorü tügüncüwawa rüto ñuxmatáta cuxmëxwa chanangëxmagüxëë i curü uwanügü!’ ”

ñanagürü. ³⁶ Rū ñanagürü ga Pedru: —Name nixī i guxāma i pema i Yudiügü na nüxü pecuëxgüxü rü guma Ngechuchu ga curuchawa peyapotacü, rü Tupana rü marü perü Cori ya Cristuxü nayaxixëë —ñanagürü ga Pedru. ³⁷ Rū yexguma yemaxü naxñnüëgu ga yema duüxügü ga yéma yexmagüxü, rü poraäcü nanaxixächiaëgü. Rū Pedruna nacagüe, rü yema togü ga Pedrumücügüna rü ta nacagüe, rü ñanagürügü: —jRü facü tá taxüxü i ñuxmax, Pa Toeneëgüx? —ñanagürügü. ³⁸ Rū Pedru nanangäxü, rü ñanagürü: —jNüxü

perūxoe i pecūma i chixexū rŭ Tupanacēx pedaügŭe rŭ Ngechuchuégagu ípebaiŭ na pexū nŭxū nangechaŭxŭcèx i perŭ pecadugŭ ya Tupana! Rŭ Tupana tá pexna nanamu i Naãe i Ūñexŭ. ³⁹—Rŭ ñaã Tupanaãrŭ uneta, rŭ pexcèx nixŭ, rŭ pexacügŭcèx, rŭ guxŭ i duŭxŭgŭ i yaxŭtwa ngēxmagŭxŭcèx nixŭ. Erŭ guxŭ i duŭxŭgŭ i tórŭ Cori ya Tupana nŭgŭxŭtawana naxcèx çaxŭcèx nixŭ i ngēma uneta —ñanagŭrŭ ga Pedru. ⁴⁰ Rŭ yema oremaã rŭ muxŭma ga to ga oremaã nayaxucuxègŭ ga Pedru, rŭ ñanagŭrŭ: —¡Nŭxna pixŭgachi i ngēma duŭxŭgŭ i chixexŭ ŭgŭxŭ na pema rŭ ta tama chixexŭ pexŭgŭxŭcèx! —ñanagŭrŭ. ⁴¹ Rŭ yema duŭxŭgŭ ga naga ñnŭexŭ ga yema ore ga Pedru namaã nŭxŭ íxŭxŭ, rŭ ínabaiŭ. Rŭ yema ngunexŭgu rŭ poraãcŭ nayexera ga na yamuxŭ ga yema yaxŭgŭxŭ. Rŭ 3,000 ga duŭxŭgŭ nixŭ ga Ngechuchuaxŭ yaxŭgŭxŭ ga yexguma. ⁴² Rŭ yema yexwacèx yaxŭgŭxŭ rŭ guxŭguma inarŭxŭñŭe ga yema ngŭexŭgŭ ga Ngechuchu imugŭxŭñrŭ ngxèètae. Rŭ meã nŭgŭmaã nangaugŭ ga norŭ yemaxŭgŭ. Rŭ guxŭguma nayumŭxègŭxŭ rŭ chibŭcèx nangutaquèxegŭxŭ.

Yema yaxŭgŭxŭ rŭ aixcŭma nŭgŭ nangechaxŭgŭ

⁴³ Rŭ yema ngŭexŭgŭ ga Ngechuchu imugŭxŭ rŭ nanaxŭgŭ ga muxŭma ga mexŭgŭ ga Tupanaãrŭ poramaã naxŭgŭxŭ. Rŭ yexguma yemaxŭ nadaugŭgu ga togŭ ga duŭxŭgŭ, rŭ poraãcŭ nañaxŭchŭiãgŭ ga guxŭma. ⁴⁴ Rŭ guxŭma ga yema yaxŭgŭxŭ, rŭ wŭxigu narŭxŭñŭe. Rŭ meã nŭgŭmaã nangaugŭ ga norŭ yemaxŭgŭ. ⁴⁵ Rŭ namaã nataxegŭxŭ ga norŭ naãnegŭ rŭ guxŭma ga togŭ ga norŭ yemaxŭgŭ. Rŭ nŭgŭmaã ngŭxŭ nitoyegŭxŭ ga yema díeru yexgumarŭñ na ñuxre natŭmawèxexŭ ga norŭ ònatanŭ ga wŭxichigŭ. ⁴⁶ Rŭ guxŭ ga ngunexŭgu tupauga ga taxŭnewa nangutaquèxegŭxŭ, rŭ chibŭcèx nangutaquèxegŭxŭ ga napatagŭwa, rŭ taãeãcŭma nŭgŭmaã nachibŭexŭ. ⁴⁷ Rŭ guxŭguma Tupanaxŭ nicuèxŭñgŭxŭ. Rŭ guxŭma ga yema ñanecŭñax rŭ nŭxŭ nangechaŭgŭ ga yema yaxŭgŭxŭ. Rŭ wŭxichigŭ ga ngunexŭgu rŭ nimuètanŭ ga duŭxŭgŭ ga yaxŭgŭxŭ, yerŭ nŭma ga Cori ga Ngechuchu rŭ nŭxŭ narŭngŭxèe na nayauxgŭãxŭcèx ga norŭ maxŭ i taguma gŭxŭ.

3

Naxcèx nitaane ga wŭxi ga yatŭ ga chixeparacŭ

¹ Rŭ wŭxi ga ngunexŭgu ga Pedru rŭ Cuáñ rŭ tomaèxpŭxarŭ oragu ga yáuanecŭ rŭ tupauga ga taxŭnewa naxŭ, yerŭ yema nixŭ ga yumŭxèarŭ ora. ² Rŭ yema guma tupauga ga taxŭnewa nayexma ga wŭxi ga yatŭ ga norŭ bucŭmatama chixeparacŭ. Rŭ guxŭ ga ngunexŭgu rŭ natanŭxŭgŭ rŭ guma tupauga ga taxŭneãrŭ ñax ga Mexèchixŭgu ãgaxŭgu nayamugŭxŭ, na díerucèx ínacãŭxŭcèx nŭxna ga duŭxŭgŭ ga guma tupauga ga taxŭnegu chocuxŭxŭ. ³ Rŭ yexguma Pedru rŭ Cuáñxŭ nadèuxgux ga tupauga ga taxŭnegu na nachocuxŭ, rŭ guma chixeparacŭ rŭ nŭxŭ nawémèx rŭ díerucèx nŭxna naca. ⁴ Rŭ Pedru rŭ Cuáñ meãma nŭxŭ narŭdaunŭ, rŭ Pedru rŭ ñanagŭrŭ nŭxŭ: —¡Toxŭ nadawenŭ! —ñanagŭrŭ. ⁵ Rŭ nŭma ga yatŭ rŭ nŭxŭ nadawenŭ, yerŭ nŭma nŭxŭ nacuèxgu rŭ chŭ ñacŭ nŭxna naxŭgŭ. ⁶ Natŭrŭ ga Pedru rŭ ñanagŭrŭ nŭxŭ: —Choxŭ nataxuma i díeru. Natŭrŭ ngēma choxŭ ngèxmaxŭ tá cuxna chaxã. Rŭ naegagu ya Ngechuchu ya Cristu ya Nacharétucŭñax cuxŭ chamu, rŭ ñinachi rŭ íxŭ! —ñanagŭrŭ. ⁷ Rŭ yema ñaxguwena ga Pedru, rŭ norŭ tŭgŭnemèxègu nayayauxãchi, rŭ inanachixèe, rŭ yexgumatama napora ga namèxtŭxŭgŭwa rŭ nacutŭgŭwa. ⁸ Rŭ nayuxnagŭ rŭ inachi, rŭ inanaxŭgŭ na iyaxŭxŭ. Rŭ nŭmatama iyaxŭãcŭma Pedru rŭ

Cuáŭtwe tupauca ga taxŭnegu naxŭcu. Rŭ nanayuxnagŭane rŭ Tupanaxŭ nicuèxŭŭ. ⁹ Rŭ guxŭma ga duŭxŭgŭ nŭxŭ nadaugŭ ga na íyaxŭxŭ, rŭ Tupanaxŭ na yacuèxŭŭxŭ. ¹⁰ Rŭ poraècŭ naŭaixächiàègŭ ga duŭxŭgŭ naxcèx ga yema nŭxŭ ngupetŭxŭ ga guma yatŭ. Yerŭ nŭxŭ nacuèxgŭ ga na guma yŭxŭ ga tupauca ga taxŭneàrŭ íàx ga Mexèchixŭgŭ àgaxŭwa rŭtooxŭchirécŭ rŭ yéma díerucèx ícacŭ.

Tupaucàwawa yexmaxŭ ga chopetŭchica ga Charomólarŭ Ūpetŭchicagu àégaxŭwa nidexa ga Pedru

¹¹ Rŭ guma chixeparachirécŭ ga marŭ naxcèx yataanecŭ, rŭ tama Pedru rŭ Cuáŭna nixŭgachichaŭ. Rŭ guma tupauca ga taxŭnecŭwawa nayexma ga wŭxi ga chopetŭchica ga “Charomólarŭ Ūpetŭchicagu” àégaxŭ. Rŭ yema chopetŭchicawa rŭ Pedru rŭ Cuáŭcèx naxŭtaquèxe ga guxŭma ga duŭxŭgŭ yerŭ poraècŭ naŭaixächiàègŭ. ¹² Rŭ yexguma Pedru nŭxŭ dèuxgŭ ga yema duŭxŭgŭ ga yéma naxcèx Ítaquèxegŭxŭ, rŭ ñanagŭrŭ nŭxŭ: —Pa Chautanŭxŭgŭ i Yudíugŭx, ¿Tŭxcŭŭ peŭaixächie namaã i ngèma ñaã yatŭmaã ngupetŭxŭ? ¿Rŭ tŭxcŭŭ toxŭ perŭdaunŭ ñoma torŭ poramaã rŭ torŭ mexŭmaã tanamexèèxŭrŭŭ? ¹³ —Nuxcŭmaŭgŭcŭ ga tórŭ oxigŭ ga Abráŭ rŭ Ichaá rŭ Acobu rŭ togŭ ga tórŭ oxigŭ rŭ nŭxŭ nayaxògŭ ga Tupana. Rŭ yimatama Tupana nixŭ ya ñuxma Ngechuchuxŭ taxèècŭ, na guxŭàrŭ yexera yŭxŭcèx. Rŭ gumatama Ngechuchu ya Tupanaàrŭ ngŭxèèruŭ íxícŭ nixŭ ga pema àèxgacŭ ga Piratuxŭtawa penagagŭcŭ. Rŭ yexguma nŭxŭ yangèxchaŭgu ga Piratu, rŭ pema rŭ tama penaxwèxegŭ ga na yangéaxŭ. ¹⁴ —Pema rŭ tama penaxwèxe ga na ínguxuchixŭ ga guma ŭnecŭ ga aixcŭma mecŭ ga Ngechuchu, natŭrŭ naxcèx ípeca na pexcèx ínguxuchixèèàxŭcèx ga wŭxi ga máètaxŭ. ¹⁵ —Rŭ yemaàcŭ pematama peyamèxgŭ ga guma Ngechuchu ya tŭxŭ maxèèècŭ. Natŭrŭ ga Tupana rŭ wena nanamaxèè. Rŭ toma nixŭ ga nŭxŭ tadaugŭxŭ ga wena na namaxŭxŭ. ¹⁶ —Rŭ ñaã yatŭ ga chixeparachirèxŭ i pema nŭxŭ pedauxŭ rŭ nŭxŭ pecuáxŭ rŭ marŭ naxcèx nitaane erŭ Ngechuchuaxŭ nayaxò. Rŭ ngèma Ngechuchuaxŭ na yaxòòxŭcèx nixŭ i naxcèx yataanexŭ ngèma ñuxma guxŭma i pema nŭxŭ pedauxŭrŭŭ. ¹⁷ —Rŭ dŭcax i ñuxma Pa Chaueneègŭx, rŭ yexguma pema rŭ wŭxigu perŭ àèxgacŭgŭmaà peyamèxgŭgu ga Ngechuchu, rŭ tama nŭxŭ pecuèxgŭ ga facŭ na pexŭèxŭ. ¹⁸ —Natŭrŭ ga Tupana rŭ yemaàcŭ nayanguxèè ga yema uneta ga nuxcŭma nŭmatama nŭxŭ yaxuxŭ nawa ga guxŭma ga norŭ orearŭ uruŭgŭ. Yerŭ yema norŭ ore ga ŭmatŭxŭwa rŭ ñanagŭrŭ:

“Cristu rŭ tá ngŭxŭ ninge”,

ñanagŭrŭ. ¹⁹⁻²⁰ —Rŭ ngèmacèx, Pa Chaueneègŭx, rŭ name nixŭ i nŭxŭ perŭxoe i pecŭma i chixèŭ, rŭ Tupanacèx pedaugŭ, rŭ nŭxŭ peyaxògŭ na nŭma pexŭ ínapíaxŭcèx i perŭ pecadugŭ. Rŭ ngèxguma i nŭma rŭ tá pexŭ nataàègŭxèè, rŭ tá nŭma nanamu ya Ngechuchu ga noxritama naàne íxŭgŭgu pexcèx nŭxŭ naxunetacŭ na perŭ àèxgacŭ ya Cristu na yŭxŭcèx. ²¹ —Natŭrŭ i ñuxma rŭ Tupana nanaxwèxe i daxŭguxŭ i naànegu na naxŭxŭŭ ya Ngechuchu ñuxmatáta nŭma ya Tupana wena namexèèègŭ i guxŭma i ñoma i naànewa ngèxmaxŭ. Yerŭ yemaàcŭ nixŭ ga nŭxŭ yaxuxŭ ga Tupana nawa ga nuxcŭmaŭgŭxŭ ga norŭ orearŭ uruŭgŭ ga íxŭnèxŭ. ²² —Rŭ Moíché rŭ tórŭ oxigŭmaã nŭxŭ nixu rŭ ñanagŭrŭ:

“Rŭ perŭ Cori ya Tupana rŭ petanŭwa tá nŭxŭ naxuneta i wŭxi i norŭ orearŭ uruŭ i chauxrŭŭ íxŭxŭ. Rŭ name nixŭ na naga pexŭnŭèxŭ i guxŭma i

ngēma pemaā nūxū yaxuxū. ²³ Rū texé ya tatanūwa tama naga ĩnūxē i ngēma orearū uruū, rū tá tūxū ĩnatēxūchi i tatanūwa”,
 űanagūrū ga Moiché. ²⁴ –Rū Chamue rū guxūma ga togū ga Tupanaārū orearū uruūgū ga naweama ūgūxū rū ta nūxū nixugūe ga űacū tá na ūpetūxū i űomaūcūū. ²⁵ –Rū nūxcūmaxūchima ga Tupana rū tōrū ōxi ga Abráūmaā nūxū nixu rū űanagūrū:
 “Rū wūxi i cutaa tá nixī i nūxū rūngūxēēxū i guxūma i duūxūgū i űoma i naānecūāx”,
 űanagūrū. Rū yemaācū ta Tupana inaxuneta nawa ga nūxcūmaūgūxū ga norū orearū uruūgū. Rū pemaā nūxū chixu i űūxma, rū pexcēx nixī ga yema unetagū ga nūxcūmaūgūxū ga orearū uruūgūwa tōrū ōxigūmaā nūxū yaxuxū ga Tupana. ²⁶ –Rū pemaā nūxū chixu Pa Chautanūxūgū i Yudūgūx, rū yexguma Tupana wena namaxēēgu ga Nane ga Ngechuchu rū petanūwaxira nanamu na pexū nangūxēēxūcēx, erū nanaxwēxe i wūxichigū i pema na nūxū perūxoexū i pecūmagū i chixexū –űanagūrū ga Pedru.

4

Āēxgacūgūpēxewa nayexmagū ga Pedru rū Cuáū

¹ Rū yexguma duūxūgūmaā ĩyadexagūgu ga Pedru rū Cuáū, rū yexgu-mayane yēma nangugū ga guma tupauca ga taxūneārū purichīaarū āēxgacū, rū paigū, rū Chaduchēugū. ² Rū Pedru rū Cuáūmaā nanuē ga paigū yerū duūxūgūxū nangūxēē ga na marū wena namaxūxū ga Ngechuchu, rū naxrūū tá ta wena namaxēxū i guxūma i duūxūgū i marū yuexū. ³ Rū ĩnanayauxū, rū poxcupataūgu nanawocu űūxmata moxūācū, yerū marū nayāuane. ⁴ Natūrū muxūma ga yema duūxūgū ga nūxū ĩnūxū ga yema Tupanaārū ore rū nayaxōgū. Rū 5000 wa nangu ga yatūxūxica ixugūgu. ⁵ Rū moxūācū Yerucharéūwa nangutaquēxegū ga Yudūgūarū āēxgacūgū namaā ga naerugū, rū ngūxēēruūgū ga ore ga mugūwa ngūxēētaegūxū. ⁶ Rū yēma nayexma ta ga Aná ga paigūeru ixīcū, rū Caipá, rū Cuáū, rū Areyáūdru, rū guxūma ga yema togū ga paigū ga paigūerutanūxū ixīgūxū. ⁷ Rū nanamu na naxūtawa nagagūāxūcēx ga Pedru rū Cuáū. Rū yexma norū ngāxūtanūgu nanachigūxēē rū nūxna nacagū, rū űanagūrūgū: –¿Texé pexū tamu, rū texé pexna tanaxā i pora na penamexēēxūcēx i űaā yatū? –űanagūrūgū. ⁸⁻⁹ Rū Pedruwa nayexma ga Tupanaāē ga Ūūnexū rū nanaporaxēē. Rū yemacēx ga Pedru rū nanangāxū, rū űanagūrū: –Pa ĩāneārū Āēxgacūgūx, rū Pa Yudūgūarū Āēxgacūgūerugūx, rū űūxma toxna naxcēx peca naxcēx ga norū mexēē i űaā chixeparachirēxū erū nūxū pecuāxchaū ga űūxācū na namexū. ¹⁰ –Rū űūxma tá pemaā nūxū tixu na nūxū pecuāxūcēx i guxāma i pema rū nūxū nacuēxgūxūcēx i guxūma i tatanūxūgū i Yudūgu. Rū űaā yatū i űūxma pepēxewa ngēxmaū rū Ngechuchu ya Cristu ya Nacharētucūāx nixī ga namexēēcū. Rū guma nixī ga pema curuchawa peyapotacū rū peyuxēēcū. Natūrū ga Tupana rū wena nanamaxēē. ¹¹ –Rū gumatama Ngechuchu nixī ga pema nūxū pexoecū. Natūrū ga Tupana rū nayamucuchi na guxūarū āēgacū yixīxūcēx. ¹² –Rū yima Ngechuchuxicatama nixī ya tōrū maxēēruū, erū yixicatama nixī ga Tupana nūxū unetacū i űoma i naanewa na tūxū namaxēēxūcēx –űanagūrū ga Pedru. ¹³ Rū yexguma yema āēxgacūgū nūxū daugūgu ga űūxācū tama muūēācūma na yadexagūxū ga Pedru rū Cuáū, rū nabāixāchiāēgū, yerū nūxū nicuēxāchitanū ga tama meā poperaxū na yacuāxū rū puracūtanūxūmare yixīgūxū. Rū aixcūma nūxū

nicuèxāchitanū ga Ngechucharū ngúexūgū na yixīgūxū. ¹⁴ Rū ñuxūchi nūxū nadaugū ta ga guma yatū ga rümeçū ga Pedru rü Cuáūxūtagu na nachixū. Rū yemacèx ga yema àèxgacūgū rü taxuacūma ñuxū ñanagürügüéga nachiga ga yema ngupetūxū. ¹⁵ Rū yexguma ga yema àèxgacūgū rü Ínanamuxū ga yema ínangutaquèxegūxūwa, rü nūxīcatama nūgūmaā nidexagū. ¹⁶ Rū ñanagürügü: —¿Tacū tá namaā ixūexū i ñāa yatūgū? Erū guxūma i Yerucharéçūāx i duūxūgū rü nūxū nacuèxgū i ngēma mexū i taxū i naxūgūxū, rü taxuacūma itayacux. ¹⁷ —Natürū ngēma na tama yexeraācū duūxūgūtanūwa nanguchigaxūcèx i ngēma ngupetūxū, ¡rū ngīxā tanamuūèxèè na ñuxmawena rü taxūemaāma ngēma Ngechuchichigagu yadexagūxūcèx! —ñanagürügü. ¹⁸ Rū wenaxārū Pedru rü Cuáūcèx nacagū, rü nūxna naxāga na tama Ngechuchichigamaā yadexagūxūcèx, rü bai i texéxū na nangúexèèxūcèx i nachiga. ¹⁹ Natürū ga Pedru rü Cuáū rü nanangāxūgū, rü ñanagürügü: —¡Nagu perūxīnūē i pematama! ¿Rū namexū i Tupanapèxewa na pega taxīnūèxū rü èxna Tupanaga taxīnūèxū? ²⁰ —Erū toma rü taxuacūma nūxū tarūxoe na nūxū tixuxū ga yema nūxū tadaugūxū rü nūxū taxīnūèxū —ñanagürügü. ²¹ Rū yexguma ga yema àèxgacūgū rü nayaxāxūnegū rü yemaācū ínayamugū, yerū nataxuma ga țacūcèx na napoxcūeāxū rü duūxūgūxū namuūè, yerū guxūma ga duūxūgū rü Tupanaxū nicuèxūgū naxcèx ga yema nūxū ngupetūxū ga guma yatū ga chixeparaw rümeçū. ²² Rū guma yatū ga yemaācū Tupanaārū poramaā naxcèx itaanecū, rü 40 arū yexera nixī ga norū taunecū.

Yema yaxōgūxū rü Tupanaarū ngūxèècèx ínacagū

²³ Rū yexguma marū ínamuxūāxgu, rü Pedru rü Cuáū rü namūcūgū íyexmagūxūwa naxī. Rū namaā nūxū nixugūe ga guxūma ga yema ore ga Yudiūgūarū àèxgacūgū rü paigūarū àèxgacūgū namaā nūxū ixuxū. ²⁴ Rū yexguma Pedru rü Cuáūxū naxīnūègu ga namūcūgū, rü guxūma wūxigu nayumūxègū rü Tupanamaā nidexagū rü ñanagürügü: —Pa Corix, cuma cunaxū ga daxūguxū ga naāne rü ñoma ga naāne, rü taxū i taxtū, rü guxūma i țacū i nawa ngèxmaxū. ²⁵ —Rū cumatama nixī ga nuxcūma Cuāē i Üünexūxū cumuxū na curū ngūxèerū ga Dabiwa yanadexaxūcèx rü ñaxūcèx:

“¿Tūxcūū ínipuræ i ñoma i naānecūāx i duūxūgū i tama yaxōgūxū? ¿Rū tūxcūū ngēma natūcèxmamare íxīgūxūgu narūxīnūē i guxū i nachīūānecūāx? ²⁶ —Nūmagū i nachīūānegūarū àèxgacūgū rü Tupanamaā nanuē, rü nūgūmaā nangutaquèxegū na wūxigu nūgūmaā nagu naxīnūèxūcèx na ñuxācū tá nūxū na nayexeragūxūcèx ya Cori ya Tupana rü Nane ya nūxū naxunetacū ya Cristu”,

ñanagürū. ²⁷ —Rū aixcūma nixī ga ñoma ga ñānewa ga àèxgacūgū ga Erode rü Piratu ga nangutaquèxegūxū namaā ga to ga nachīūānegūcūāx rü totanūxū ga Yudiūgū, na chixexū naxūgūxūcèx namaā ya curū ngūxèerū ya üunecū ya Ngechuchu ya Cristuxū nūxū cuxunetacū. ²⁸ —Rū yemaācū ga nūmagū rü nayanguxèè ga guxūma ga yema cuma nuxcūmama nagu curūxīnūxū rü nūxū cuxunetaxū rü tá na yanguxū. ²⁹ —¡Rū dūcax, Pa Corix, cuma nūxū cucuèx na ñuxācū toxū naxāxūnegūxū! Toma nixī i curū ngūxèerūgū rü tanaxwèxe na toxū cuporaaxèèxū na tama tamuūēācūma nūxū tixuxūcèx i curū ore. ³⁰ —¡Rū curū poramaā namexèè i duūxūgū i ídāaweexū! ¡Rū duūxūgūxū nawèx i cuèxruūgū i curū poramaā cuxūxū i naegagu ya curū ngūxèerū ya üunecū ya Ngechuchu! —ñanagürügü. ³¹ Rū yexguma yumūxèwa nūxū nachauegu, rü guma ípata ga nawa nangutaquèxegūne rü naxīāxāchi. Rū Tupanaāē i

Ūünexŭ rŭ nŭxna nangu ga guxŭma. Rŭ tama namuđĕăcŭma nŭxŭ nixugŭe ga Tupanaărŭ ore.

Yema yaxŏgŭxŭlărŭ yemaxŭgŭ rŭ guxŭlărŭ nixŭ

³² Rŭ namu ga yema yaxŏgŭxŭ. Rŭ guxŭma rŭ wŭxigu narŭxŭnŭe. Rŭ taxuŭma nagu narŭxŭnŭ ga noxrŭxicatama na yŭxŭ ga norŭ yemaxŭgŭ, natŭrŭ guxŭma ga namŭcŭgŭmaă nangau. ³³ Rŭ yema ngŭexŭgŭ ga Ngechuchu imugŭxŭ na Tupa-naărŭ puracŭ naxŭgŭxŭcĕx, rŭ Tupanaărŭ poramaă nŭxŭ nixugŭe ga űuxăcŭ wena na namaxŭxŭ ga Cori ga Ngechuchu. Rŭ Tupana rŭ poraăcŭ nŭxŭ narŭngŭxĕĕ ga guxŭma ga yema yaxŏgŭxŭ. ³⁴⁻³⁵ Rŭ natanŭwa rŭ nataxuma ga wŭxi ga nŭxŭ nataxuxŭ, yerŭ guxŭma ga yema nŭxŭ yexmaxŭ ga naănegŭ rŭ ĕxna űpatagŭ, rŭ namaă nataxegŭ. Rŭ yema đĕru ga ngŭxŭ nayauxgŭcŭ rŭ yĕma ngŭxŭ nangegŭ, rŭ yema ngŭexŭgŭ ga Ngechuchu imugŭxŭna ngŭxŭ nayaxăgŭ. Rŭ űuxŭchi nŭgŭ ngŭxŭ ninuŭxŭ ga űuxrechigŭ nŭxŭ nataxuxŭ ga wŭxichigŭ. ³⁶ Rŭ nayexma ga wŭxi ga yatŭ ga Lebŭtanŭxŭ ga Chiprecŭăx ga Yŭhegu Ăegacŭ. Rŭ yema ngŭexŭgŭ ga Ngechuchu imugŭxŭ na Tupanaărŭ puracŭ naxŭgŭxŭcĕx rŭ Bernabĕmaă nanaxugŭ. Rŭ ngĕma naega, rŭ: "Taăĕĕruŭ", űaxŭchiga nixŭ. ³⁷ Rŭ nŭma ga Bernabĕ rŭ nŭxŭ nayexma ga wŭxi ga naăne, rŭ namaă nataxe. Rŭ yema ngŭexŭgŭ ga Ngechuchu imugŭxŭxtawa ngŭxŭ nana ga yema đĕru.

5

Ananŭ rŭ Chacŭraarŭ pecaduchiga

¹ Rŭ nayexma ga wŭxi ga yatŭ ga Ananiăgu Ăegaxŭ rŭ Chacŭra ga namĕx. Rŭ nŭmagŭ rŭ namaă nataxegŭ ga wŭxi ga norŭ naăne. ² Natŭrŭ nŭma ga Ananŭ rŭ namĕxmaă wŭxigu nagu narŭxŭnŭe na nŭgŭxŭ ngŭxne nayauxgŭxŭ ga űuxre ga yema naănetanŭ. Rŭ űuxŭchi yema ngŭexŭgŭ ga Ngechuchu imugŭxŭxtawa ngŭxŭ nangegŭ ga yema nŭxŭ űyaxŭcŭ. ³ Rŭ yexguma ga Pedru rŭ űanagŭrŭ nŭxŭ: —Pa Ananiăx, űtŭxcŭŭ ngoxo i Chatanăga cuxŭnŭ rŭ Tupanaăe i Ūünexŭmaă quidora, rŭ cugŭxŭ ngŭxne cuyaxu i űuxre i ngĕma curŭ naănetanŭ? ⁴ —Ķĕxna yexguma tauta namaă cutaxegu, rŭ tama ĕxna cuxrŭ yŭxŭ ga yema naăne? ĶRŭ yexguma namaă cutaxegu, tama ĕxna cuxrŭ yŭxŭ ga yema đĕru na ngŭxŭ cuguxĕĕxĕcĕx i ngĕma cuma cunaxwĕxĕđăcŭma? ĶTŭxcŭŭ i cunaxŭxŭ i űăă? Tama yatŭgŭmaăxŭca quidora, natŭrŭ Tupanamaă rŭ ta nixŭ i quidoraxŭ —űanagŭrŭ ga Pedru. ⁵ Rŭ yexguma yema orexŭ naxŭnŭgu ga Ananiă, rŭ yuxŭma inayangu. Rŭ poraăcŭxŭchima namuđĕ ga guxŭma ga yema duŭxŭgŭ ga yexguma yemaxŭ nacuăchigagŭgu. ⁶ Rŭ űuxre ga yĕma yexmagŭxŭ ga ngextŭxŭxŭgŭ rŭ nanayauxgŭ ga naxŭne, rŭ nananuquegŭ, rŭ inayatĕxgŭ. ⁷ Rŭ tomaĕxpŭx ga ora ngupetŭxgu rŭ űngu ga namĕx. Rŭ yexma ixŭcu natŭrŭ tama nŭxŭ icuĕx ga űacŭ na ngupetŭxŭ. ⁸ Rŭ Pedru ngŭxna naca, rŭ űanagŭrŭ: —ĶYema natanŭ ga ipexunetaxŭgu yŭxŭ ga namaă petaxegŭxŭ ga perŭ naăne? —űanagŭrŭ. Rŭ ngŭma rŭ: —Ngŭ, ngĕxgumaĕxpŭxgu nixŭ —ngŭgŭrŭgŭ. ⁹ Rŭ Pedru rŭ űanagŭrŭ ngŭxŭ: —ĶTŭxcŭŭ pegŭmaă ngĕmaăcŭ wŭxigu perŭxŭnŭe na namaă pidoraexŭcĕx i Tupanaăe i Ūünexŭ? ĶĐŭcĕx, ngĕma cutexŭ űyatĕxgŭxŭ rŭ marŭ űnangugŭ, rŭ űŭxma rŭ cuxŭnŭ rŭ tă ta ngĕma nangegŭ —űanagŭrŭ. ¹⁰ Rŭ yexgumatama yuxŭcŭma Pedrupĕxegu iyangu. Rŭ yexguma nachocŭxgu ga yema ngextŭxŭxŭgŭ, rŭ yuxŭcŭma ngŭxŭ inyangaugŭ. Rŭ ngŭxŭ nayauxgŭ, rŭ ngŭtĕxđtagutama ngŭxŭ

nayatəxgū. ¹¹ Rū yexguma nūxū nacuəxgūgu ga yema ngupetūxū, rū guxūma ga yema yaxōgūxū rū yema togū ga duūxūgū rū ta poraācūxūchima namuūē.

Tupanaārū poramaā nanaxūgū ga muxūma ga mexūgū

¹² Rū yema ngúexūgū ga Ngechuchu imugūxū, rū duūxūgūpēxewa nanaxūgū ga muxūma ga mexūgū ga Tupanaārū poramaā naxūgūxū. Rū inanawēxgū ga muxūma ga cuəxruūgū. Rū guxūma ga yema yaxōgūxū rū guxūguma naxītaquēxegūxū nagu ga yema tupauca ga taxūnewa yexmaxū ga chopetūchica ga Charomóūārū Ūpetūchicagu āegaxū. ¹³ Rū yema togū ga duūxūgū ga tama yaxōgūxū rū namuūē na yema yaxōgūxūtanūgu naxāgūxū, natūrū poraācū yema yaxōgūxūxū nangechaūgū. ¹⁴ Rū nimuētānūāma ga yema yaxōgūxū yerū muxūma ga duūxūgū ga yatūxūgū rū ngexūgū rū Coriaxū nayaxōgūetanū. ¹⁵ Rū nūma ga duūxūgū rū itamūgūgu nayamugūxū ga idaaweexū naxchāpenūūmaā rū norū caruūgūmaā na yexguma Pedru yēma ūpetūxgu, rū naxchipetamare nūxū na nachixūcəx. ¹⁶ Rū yexgumarū ta rū yēma naxītaquēxegūxū ga muxūma ga duūxūgū ga Yerucharēūārū ngaicamana imugūne ga iānewa ne lūxū. Rū yēma naxcəx nanagagūxū ga yema idaaweexū rū yema ngoxoāxgūxū. Rū guxūma naxcəx nitaanegū.

Pedru rū Cuāūwe ningēxūtanū ga paigū

¹⁷ Rū yexguma ga guma paigūeru rū guxūma ga yema natanūxūgū ga Chaduchēugū rū poraācū nixāūxāchigū naxcəx ga yema mexūgū ga naxūgūxū ga yema ngúexūgū ga Ngechuchu imugūxū. ¹⁸ Rū yemacəx norū purichiaūgūxū namu na inayauxūāxūcəx ga yema ngúexūgū. Rū iāneārū poxcupataūgu nanapoxcue. ¹⁹ Natūrū Coriarū oreatū ngerūū ga daxūcūāx naxcəx nayawāxna ga yema poxcupataūārū iāxgū ga chūtacū. Rū inanamuxū, rū űnanagūrū nūxū: ²⁰ —iNgema tupauca ya taxūnewa pexī, rū guxū i duūxūgūmaā nūxū pixu na űnūācū Tupana inaxāxū i ngexwacaxūxū i maxū! —űnanagūrū. ²¹ Rū yexguma ga yema ngúexūgū ga Ngechuchu imugūxū rū naga naxīnūē ga yema ore. Rū moxūācū ga pəxmamaxūchi rū tupauca ga taxūnewa naxī, rū duūxūgūxū nangúexēē. Rū yoxni ga guma paigūeru rū natanūxūgū, rū nanangutaquēxexēē ga guxūma ga yema togū ga āēxgacūgū ga āēxgacūgūtūcumūwa ūgūxū. Rū poxcupataūwa nanamugū ga purichiaūgu na yagagūāxūcəx ga yema ngúexūgū ga Ngechuchu imugūxū. ²²⁻²³ Rū yexguma poxcupataūwa nangugūga ga yema purichiaūgu, rū taxuxūxūma inayangaugū. Rū nayawoegu, rū nūxū nayarūxugūē, rū űnanagūrūgū: —Yima poxcupataū rū narūwāxta, rū meāma nataichirēx, rū purichiaūgu nūxna nadaugū i naāxwa. Natūrū ngəxguma tayawāxnagu, rū taxuxūxūma itayangaugū i aixepewa —űnanagūrūgū. ²⁴ Rū yexguma yema orexū naxīnūēgu ga yema paigūeru rū yema togū ga paigū ga āēxgacūgū ixīgūxū rū yema tupauca ga taxūneārū purichiaūgarū āēxgacū rū guxūma nabaixāchiāēgū yerū tama nūxū nacuəxgū ga ngextā tá na nanguxū ga guxūma ga yema rū űnūācū tá na iyanaxoxēēgūāxū. ²⁵ Rū yexguma yemagu inaxīnūēyane rū yēma nangu ga wūxi ga yatū, rū namaā nūxū nixu, rū űnanagūrū: —Ngēma yatūgū i pepoxcuechirēxū, rū tupauca ya taxūnewa nangəxmagū, rū inanangúexēē i duūxūgū —űnanagūrū. ²⁶ Rū yēma naxī ga tupauca ga taxūneārū purichiaūgarū āēxgacū wūxigu namaā ga norū purichiaūgu na yagagūāxūcəx. Natūrū namuūē na duūxūgū nutamaā yamuxūtanūxū, rū yemacəx meāmare yema ngúexūgūxū nigagū. ²⁷ Rū yexguma namaā inangugūgu, rū yema āēxgacūgūpēxewa nanagagū. Rū yema paigūeru rū

namaã nidexa rŭ ñanagŭrŭ nŭxŭ: ²⁸ –Marŭ poraãcŭ pexna tanachŭxu na tama ngĕma Ngechuchuĕgamaã penangŭexĕxŭcĕx. Natŭrŭ i pema rŭ guxŭne ya Yerucharĕŭwa penangŭexĕi i duŭxŭgŭ, rŭ ñŭxŭchi toxna penaxuxchaŭ ga na togagu nayuxŭ ga yema Ngechuchu –ñanagŭrŭ. ²⁹ Rŭ Pedru rŭ namŭcŭgŭmaã nanangãxŭgŭ, rŭ ñanagŭrŭgŭ: –Narŭmemaĕ nixŭ na Tupana ga taxŭnŭĕxŭ rŭ tama i yatŭgŭga. ³⁰ –Guma Tupana ga nuxcŭmaŭgŭxŭ ga tŏrŭ oxigŭ nŭxŭ yaxŏgŭcŭ, rŭ guma nixŭ ga wena namaxĕĕcŭ ga Ngechuchu ga pema peyamãcŭ ga yexguma curuchawa peyapotagŭgu. ³¹ –Natŭrŭ Tupana rŭ nanataxĕĕãma, rŭ nŭgŭarŭ tŭgŭnecŭwawa nanatoxĕĕ. Rŭ tŏrŭ cuĕxrŭŭ rŭ maxĕxĕrŭŭ nayangucuchixĕĕ na tatanŭxŭgŭ i Yudiŭgŭxŭ nangŭxĕĕxŭcĕx na nŭxŭ naxoexŭcĕx i norŭ chixexŭgŭ, rŭ Tupana nŭxŭ nŭxŭ nangechaŭxŭcĕx i norŭ pecadugŭ. ³² –Rŭ toma nŭxŭ tacuĕ na aixcŭma yŭxŭ i guxŭma i ngĕma pemaã nŭxŭ tixuxŭ erŭ tomatama nŭxŭ tadaugŭ. Rŭ ngĕxgumarŭŭ ta i Tupanaãi i Ŭŭnĕxŭ i Tupana tŭxna ãxŭ ya yŭxema naga ŭnŭĕxĕ, rŭ nŭxŭ nacuĕx na aixcŭma yŭxŭ –ñanagŭrŭgŭ. ³³ Rŭ yexguma yemaxŭ naxŭnŭĕgu ga yema ãĕxgacŭgŭ, rŭ poraãcŭxŭchima nanuĕ, rŭ nanadaixchaŭ. ³⁴ Natŭrŭ yema ãĕxgacŭgŭtanŭwa nayexma ga wŭxi ga Parichĕu ga Gamariĕ ga naega. Rŭ nŭma rŭ meãma nanangŭexĕĕ ga Tupanaãrŭ mugŭ. Rŭ guxŭma ga duŭxŭgŭ rŭ nŭxŭ nangechaŭgŭ. Rŭ nŭma ga Gamariĕ inachi rŭ nanamu na paxaãchi ŭnamuxŭãxŭcĕx ga yema ngŭexŭgŭ ga Ngechuchu imugŭxŭ. ³⁵ Rŭ ñŭxŭchi namŭcŭgŭ ga ãĕxgacŭgŭmaã nŭxŭ nixu rŭ ñanagŭrŭ: –Pa Chautanŭxŭx, ŭpexuãĕgŭ na tacŭ tã namaã pexŭexŭ i ñãã yatŭgŭ! ³⁶ –Rŭ nŭxna pecuĕxãchie ga ŭpa ga ñŭxãcŭ ãĕxgacŭxŭ nŭgŭ ningucuchixĕĕchaŭ ga Teudã. Rŭ nŭgŭtama nixu na wŭxi ga tacŭ na yŭxŭ. Rŭ maneca 400 naguxŭ ga yatŭgŭ nawe narŭxŭ. Natŭrŭ churaragŭ nayamĕxgŭ, rŭ nayu. Rŭ guxŭma ga yema nawe rŭxŭxŭ rŭ nangŭãchi, rŭ yexma nayarŭxo ga guxŭma. ³⁷ –Rŭ yixcŭra ŭnangu ga to ga yexguma tachiŭãneãrŭ ãĕxgacŭ duŭxŭgŭxŭ ixugŭgu, rŭ yema nixŭ ga Yuda ga Garirĕaanecŭãx ga ãĕxgacŭxŭ nŭgŭ ingucuchixĕĕchaŭxŭ. Rŭ nayaxucŭxĕgŭ ga duŭxŭgŭ rŭ nawe narŭxŭ ga ñuxre. Natŭrŭ yemaxŭ rŭ ta nimĕxgŭ rŭ nayu. Rŭ guxŭma ga yema nawe rŭxŭxŭ rŭ nangŭãchi. ³⁸ –Rŭ ngĕmacĕx i ñŭxma rŭ pexŭ chaxucŭxĕ na peyangĕxgŭxŭ i ñãã yatŭgŭ, rŭ tama penapoxcuexŭ. Erŭ ngĕxguma nagagutama yixŭgu i ngĕma nŭma naxŭgŭxŭ, rŭ tã inayarŭxo. ³⁹ –Natŭrŭ ngĕxguma Tupanaãrŭ yixŭgu i ñãã naxŭgŭxŭ, rŭ taxuacŭma ipeyanaxoxĕĕ. ŭRŭ pexuãĕgŭ na tama ngŭrŭãchi Tupanamaã yŭxŭ i penuĕxŭ! –ñanagŭrŭ. Rŭ guxŭma ga yema ãĕxgacŭgŭ rŭ naga naxŭnŭĕ ga yema norŭ ucŭxĕ. ⁴⁰ Rŭ ñŭxŭchi nanachocuxĕĕ ga yema ngŭexŭgŭ ga Ngechuchu imugŭxŭ. Rŭ nayacŭaixgŭ. Rŭ nŭxna naxãga na tama Ngechuchhiga yadexagŭxŭcĕx. Rŭ yemawena rŭ nayangĕxgŭ. ⁴¹ Rŭ yema ãĕxgacŭgŭna ŭnixŭ ga yema ngŭexŭgŭ. Rŭ nataãĕgŭ yerŭ woetama Tupana nanaxwĕxe ga yemaãcŭ Ngechuchucĕx ngŭxŭ na yangĕgŭxŭ. ⁴² Rŭ guxŭ ga ngunĕxŭgu tupauca ga taxŭnĕwa rŭ ŭpatagŭwa, rŭ nanangŭexĕĕãma, rŭ nŭxŭ nixugŭetanŭ ga ore ga mexŭ ga Ngechuchu ya Cristuchiga.

6

Yema ngŭexŭgŭ ga Ngechuchu imugŭxŭ rŭ nŭxŭ naxuneta ga 7 ga yatŭgŭ na nŭxŭ nangŭxĕĕgŭxŭcĕx ga Tupanaãrŭ puracŭwa

¹ Rŭ yexgumaãcŭŭ rŭ yexeraãcŭ nimuchigŭ ga yema duŭxŭgŭ ga yaxŏgŭxŭ. Rŭ natanŭwa nayexmagŭ ga Yudiŭgŭchirĕx ga Griĕguanewa ne

ix̄l rū Griégugawa idexagūx̄l. Rū nayexma ta ga yaxōgūx̄l ga Yudiúgu ga Yerucharéucūāx̄ ga woetama nagawa idexagūx̄l. Rū yema yaxōgūx̄l ga Griégugawa idexagūx̄l rū nidexagüecha nachigagu ga yema yaxōgūx̄l ga Yerucharéucūāx̄gū ix̄gūx̄l, rū ñanagürügü: –Totanüwa yutegüxe rū tama meā òna tūxna naxāgūx̄l i ngēxguma òna inaxāgūx̄l xgu i wūxichigü i ngunēxgu –ñanagürügü. ² Rū yexguma ga yema 12 ga ngūexūgü ga Ngechuchu imugūx̄l rū guxūma ga yema yaxōgūx̄l nangutaquēxēgū, rū ñanagürügü nūx̄l: –Tama name na ítanangéx̄l i Tupanaärü orearü uchiga i tomax na ònamaā itacuāx̄cèx. ³ –Rū ngēmacèx, Pa Tomücügüx, rū ¡Naxcèx pedèux i petanüwa ya 7 ya yatügü ya guxāma nūx̄l ngechaücü, rū meā naāèx̄l cuácü, rū aixcūma Tupanaāē i Üünex̄l nawa ngēxmacü! Rū toma tá nūxna tanaxā i ngēma puracü na nūmagü ònamaā inacuèxgūx̄cèx. ⁴ –Rū ngēxguma i toma rū yumūxēwa rū Tupanaärü orearü uchigawaxicatama tá tapuracü –ñanagürügü. ⁵ Rū yexguma ga guxūma ga yema duixūgü rü: –Ngü –ñanagürügü naxcèx ga yema ore. Rū nūx̄l naxunetagü ga Etébaü ga meā yaxōcü rū aixcūma Tupanaāē i Üünex̄l nawa yexmacü, rū Piripi, rū Pócoro, rū Nicanúru, rū Timú rū Paruménu, rū Nicuráchi ga Aütioquiacūāx̄ ga tauta Ngechuchuax̄l yaxōgü Yudiúgücūma yaxucü. ⁶ Rū yema ngūexūgü ga Ngechuchu imugūx̄l tawa nanagagü. Rū nūmagü naxmēxma nūx̄l yangōgüācūma naxcèx nayumūxēgü. ⁷ Rū yema Tupanaärü ore rū yexeraācü nixūchigü. Rū poraācü nimuētanü ga yema yaxōgūx̄l ga Yerucharéwa. Rū woo muxūchixūma ga Yudiúgüarü paigü rū ta Ngechuchuax̄l nayaxōgü.

Etébaüx̄l niyauxgü

⁸ Rū Etébaü nix̄l ga wūxi ga yatü ga Tupana poraācü nūx̄l rüngūx̄cècü rū naporaxēcü na duixūgütanüwa naxūāx̄cèx ga mexūgü ga taxūgü rū cuèxruügü ga Tupanaärü poramaā naxūx̄l. ⁹ Rū nayexma ga wūxi ga ngutaquēxepataü ga Yudiúgüarü ga Ingūxūx̄lärü Ngutaquēxepataügu āegane. Rū gumawa nangutaquēxegü ga duixūgü ga ūpaacü corigümēxēwa yexmagūx̄l. Rū ñuxre ga guma ngutaquēxepataücūāx̄ rū wūxigu namaā ga ñuxre ga Chireneānecūāx̄, rū Aleyadríaanecūāx̄, rū Chirichíaanecūāx̄, rū Áchiaarü nañecūāx̄, rū inanaxūgüe ga Etébaümaā na iyaporagatanücüx̄l. ¹⁰ Natürü taxuacūma Etébaüx̄l narüyexeragü, yerü nūma ga Etébaü rū nidexa namaā ga yema cuèx ga Tupanaāē i Üünex̄l nūxna āx̄l. ¹¹ Rū yexguma ga yema duixūgü rū togūax̄l nanaxūtanügü na Etébaüchiga dorax̄l yaxugūx̄cèx. Rū ñanagürügü ga yema idoraegūx̄l: –Toma nūx̄l tax̄nūēgu, rū Moíchéchiga rū Tupanachigamaā chixex̄l ga ore nixugü ga Etébaü –ñanagürügü. ¹² Rū yemaācü nananuēxē ga duixūgü rū Yudiúgüarü āēxgacügüerugü rū ngūexēruügü ga ore ga mugüwa ngūxēētaegūx̄l. Rū yemacèx Etébaücèx nibuxmü, rū nayayauxgü, rū āēxgacügüerugü ingutaquēxegūx̄l tawa nanagagü. ¹³ Rū naxcèx nadaugü ta ga yatügü ga dorax̄l ixugüemarex̄l rū yema rū ñanagürügü: –Ñā yatü rū guxūguma chixexūmaā nidexa i nachigagu ya daa tupauca ya taxūne, rū nachigagu i Tupanaärü mugü. ¹⁴ –Rū toma rū nūx̄l tax̄nūē rü:

“Yima Ngechuchu ya Nacharétucūāx̄ rū tá nanangutaüx̄cè ga daa tupauca, rū tá inayanaxoxē i nacūmagü ga Moiché tūx̄l ngūexēx̄l”, –ñanagürügü. ¹⁵ Rū yexguma Etébaüx̄l nadaunüga ga guxūma ga yema āēxgacügü ga yéma rütogūx̄l, rū nūx̄l nadaugü ga nachametü rū wūxi ga daxū-cūāx̄ ga orearü ngeruūchametürüü na yīx̄l.

7

Etébaŭrū ore

¹ Rū nūma ga paigūeru, rū Etébaŭna naca rū űanagŭrū: —¿Aixcūma yīŭxŭ i űaā ore i nŭxŭ yaxugŭxŭ? —űanagŭrū. ² Rū Etébaŭ nanangāxŭ, rū űanagŭrū: —Pa Chautanŭxŭ Pa Āēxgacŭgŭx, űChoxŭ űperŭxŭnŭē! Guma Tupana ya mexēchicŭ, rū nuxcūmaŭcŭ ga tŭrŭ űoxi ga Abrāŭcēx nangox ga yexguma Mechopotāmiāārŭ naānegu naxāchiŭgu ga yexguma tauta Arāŭārŭ naānewa naxŭxgu na yexma yaxāchiŭxŭcēx. ³ —Rū Tupana rū űanagŭrū nŭxŭ:

“űNŭxna ixŭ i cuchīŭāne rū cutanŭxŭ, rū ngēma choma tá cuxŭ nŭxŭ chadauxēēxŭ i naānewa naxŭ!”

űanagŭrū. ⁴ —Rū yexguma inaxŭxŭ ga Abrāŭ nawa ga yema Cadéucŭŭxŭrŭ naāne ga ngextá noxri inaxāchiŭxŭwa, rū Arāŭārŭ naānegu nayaxāchiŭ. Rū yexguma nanatŭ yuxguwena, rū űoma ga naāne i űuxma nagu pexāchiŭxŭwa naxŭ, yerŭ yemaācŭ Tupana nūma nanaga. ⁵ —Natŭrŭ yexguma rū ta taxŭma ga noxrŭxŭchi ga naāne nŭxna naxā ga Tupana i űoma i naānewa, rū bai ga űraxŭ ga noxrŭxŭchi ga naāne. Natŭrŭ Abrāŭmaā inaxuneta ga yixcama tá nŭxna na naxāxŭ ga űoma i naāne na noxrŭxŭchi yīŭxŭcēx, rū yixcama marŭ nayuxguwena rū nanegŭarŭ na yīŭxŭcēx. Rū yemaācŭ Abrāŭmaā inaxuneta ga woo na nangexacŭxŭ ga yexguma. ⁶ —Rū űanagŭrŭ Abrāŭxŭ ga Tupana:

“Rū yixcama i cutaagŭ rū tá to i nachīŭāne i tama noxrŭ ixŭxŭwa nangēxmagŭ. Rū ngēma nachīŭānecŭŭxŭ i duŭxŭgŭ rū norŭ duŭxŭgŭxŭ tá nayaxŭgŭxēē. Rū 400 ya taunecŭ rū ngēma duŭxŭgŭ rū tá chixri namaā nachopetŭ i cutaagŭ. ⁷ Natŭrŭ choma tá chanapoxcue i ngēma nachīŭānecŭŭxŭ i norŭ duŭxŭgŭxŭ yaxŭgŭxēēxŭ. Rū ngēmawena i cutaagŭ rū tá inachoxŭ nawa i ngēma naāne, rū nuā űaā i naānewa tá choxŭ nicuēxŭgŭ,”

űanagŭrŭ ga Tupana. ⁸ —Rū yexguma Tupana rū Abrāŭ rū nŭgŭmaā nanamexēē, rū űanagŭrŭ ga Tupana:

“Choma rū tá cuxŭ charŭngŭxēē ega cuma rū guxŭma i cutanŭxŭgŭ űpewiŭchēxmŭpēxechiraŭgu. Rū ngēma tá nixŭ i cuēxrŭŭ i yigŭmaā imexēēxŭ,”

űanagŭrŭ ga Tupana. Rū nabu ga wŭxi ga nane ga Abrāŭ, rū Ichaágu nanaxŭéga. Rū yexguma 8 ga norŭ ngunexŭwa nanguxgu ga Ichaá, rū nŭmatama ga Abrāŭ rū inanawiechēxmŭpēxechiraŭ. Rū yexguma marŭ nayēxgu ga Ichaá rū nabu ga nane ga Acobu, rū nŭmatama ga Ichaá rū inanawiechēxmŭpēxechiraŭ. Rū yixcama marŭ nayēxgu ga Acobu rū nŭxŭ nayexma ga 12 ga nanegŭ. Rū nŭmatama ga Acobu rū inanawiechēxmŭpēxechiraŭ ga guxŭma ga yema 12 ga nanegŭ. Rū yema 12 ga nanegŭ nixŭ ga yema 12 ga nuxcūmaŭgŭxŭ ga tŭrŭ űoxigŭ. ⁹⁻¹⁰ —Rū yema 12 ga Acobu nanegŭ ga tŭrŭ űoxigŭ ixŭgŭxŭtanŭwa rū wŭxi rū Yŭche nixŭ ga naega. Natŭrŭ naēneēgŭ ga guma Yŭche rū nixāxŭachie, rū yemacēx Equituarŭ naānewa ixŭ ga taxetanŭxŭxŭ Yŭchemaā nataxegŭ na Equituarŭ naānewa nagagŭāxŭcēx. Natŭrŭ Tupana rū Yŭchemaā nayexma, rū nŭxŭ narŭngŭxēē na tama pecadu naxŭxŭcēx ga yexguma guxchaxŭwa nayexmagu. Rū nŭxna nanaxā ga cuēx, rū Yŭchexŭ narŭngŭxēē ga meā na nayaxāxŭcēx ga Equituaneārŭ āēxgacŭ ga Faraŭ. Rū yemacēx ga Faraŭ rū āēxgacŭxŭ nayangucuchixēē. Rū nūma ga Yŭche nixŭ ga āēxgacŭ ga Faraŭpatawa rū guxŭma ga yema nachīŭānewa. Rū Faraŭxŭcatama nixŭ ga Yŭchearŭ yexera

na ãëxgacü yīxū ga yema naãnewa. ¹¹ —Rü yexgumaücüü nayexma ga taiya ga guxū ga Equituarü naãnewa rü Canaãrū naãnewa. Rü poraãcü taiya nüxū nangux ga duūxūgü. Rü yemacèx ga yema nuxcūmaūgūxū ga tórü oxigü rü düxwa taxuacūma nüxū inayangaugü ga nabü ga Canaãrū naãnewa. ¹² —Natürü yexguma nüxū nacuáchigaxgu ga Acobu ga na nayexmaxū ga nabü ga Equituanewa, rü yéma nanamugü ga nanegü ga guma tórü oxigü ixīgücü. Rü yema nixī ga nawa inaxūgūxū ga noxrima nabüçèx Equituanewa na naxīxū. ¹³ —Rü yixcama marü naguxgu ga yema nabü rü wenaxārū Equituanewa naxī nawa ga nabü. Rü yexguma wenaxārū yéma naxīxgu ga naëneëgü, rü nügü nixu ga Yúche namaã. Rü yexguma nüxū nacuèx ga Faraū ga ngextáçūāx na yīxū ga Yúche. ¹⁴ —Rü yixcamaxūra ga Yúche rü tümacèx nangema ga nanatü rü guxūma ga natanūxū. Rü maneca 75wa nangu ga yema duūxūgü ga Yúchetanūxū. ¹⁵ —Rü yemaãcü Equituanewa naxū ga Acobu na yexma yaxāchiūxūcèx. Rü yexma nayu ga nümax. Rü yexma nayue ta ga nanegü ga tórü oxigü. ¹⁶ —Rü yexguma nayuxgu ga Acobu, rü Chiquéūwa nanangegü ga naxūne na yexma yatèxgūāxūcèx nagu ga yema naxmaxū ga Abráū diērumaã naxcèx taxexū ga Amü nanegūxūtawa ga Chiquéūwa. ¹⁷ —Rü düxwa nawa nangu na Equituanewa inanguxūxūcèx ga tatanūxū ga yexgumarūü ga Tupana Abráūmaã ixu-netaxū. Rü yexguma rü marü poraãcü nimu ga tatanūxū ga Equituanewa. ¹⁸ —Rü yexguma ningucuchi ga to ga Equituanearū ãëxgacü ga tama Yúchechigaxū cuáxū. ¹⁹ —Rü yema ãëxgacü rü tatanūxūxū nawomūxëë rü chixri tümamaã naxūpetü ga guxema nuxcūmaūgūxe ga tórü oxigü. Rü tüxū namu na yexwaca buexe ga tümaxácūgūxū íawogūxū na tayuexūcèx. ²⁰ —Rü yexgumaücüü nabu ga Moiché, rü Tupanaãxū nangúchaū. Rü tomaëxpūx ga tauemacü nüxna tadaugü ga tümapatawa ga naë rü nanatü. ²¹ —Rü yexguma düxwa ítanatèxgūgu, rü Faraūxácü inayaxu, rü ngīnexū inayaxëë. ²² —Rü yemaãcü Moichéxū nanguxëëgü ga guxūma ga Equituanecūāxārū cuèx. Rü nüma ga Moiché rü wūxi ga ãëxgacü ga poracü nixī, rü norü dexawa rü ta napora. ²³ —Rü yexguma 40 ga norü taunecūwa nanguxgu ga Moiché rü nagu narūxīnū ga natanūxūgü ga Yudiūgūtanūgu na naxūāneāxū. ²⁴ —Rü nüxū nadau ga wūxi ga Equituanecūāx ga wūxi ga Yudiūxū na naçuaxixū. Rü yemacèx ga Moiché rü yema Yudiúétūwa ínayuxu, rü yema Equituanecūāxū nimèx rü nanayuxëë. ²⁵ —Rü nüma ga Moiché nagu ruxīnūgu rü chi natanūxūgü ga Yudiūgü rü chi nüxū nacuèxgü na Tupana yéma namuxū na ínanguxūxëēāxūcèx. Natürü tama nüxū nacuèxgūéga ga yema natanūxūgü. ²⁶ —Rü moxūācü ga Moiché rü nüxū nadau ga to ga taxre ga Yudiūgü ga nügü yexma dèixū, rü nüxna nachogúchaū. Rü ñanagürü nüxū:

“Pema rü pegütanūxūgü pixīgü. ¿Rü tüxcüū pegü pedai i pemax?” ñanagürü. ²⁷ —Rü yexguma ga yema namücūxū ícuaxixū rü Moichéxū natèxnetā, rü ñanagürü nüxū:

“¿Texé cuxū tamu na toeru quiūxūcèx rü tomaã icucuáxūcèx? ²⁸ —¿Éxna choxū quimáxchaū ta, ga íne quimáxū ga Equituanecūāxruū?” ñanagürü. ²⁹ —Rü yexguma yemaxū naxīnūgu ga Moiché, rü ñiña ga yema naãnewa. Rü Madiáūñewa naxū. Rü yema nachíñane ga tama noxru íxixūgu nayaxāchiū. Rü yexma naxāmèx rü nabu ga taxre ga nanegü. ³⁰ —Rü 40 ga taunecūguwena ga dauxchitawa ga Chinañ ga mèxpūneārū ngaicamana, rü wūxi ga naixètāxácü ga yéma iyauraxūwa Moichéçèx nangox ga wūxi ga

Tupanaārū orearū ngeruū ga daxūcūāx. ³¹—Rū naḥaixāchiāē ga Moīché ga yexguma nūxū nadēuxgu. Rū naxcēx nixū rū nūxna nangaicama na meā nūxū nadauxūcēx. Rū yexguma Moīchémaā nidxa ga Cori ga Tupana, rū ḥanagūrū nūxū:

³²“Choma nixī i curū oxiguarū Tupana chiixū rū Abráū rū Ichaá rū Acobuarū Tupana chiixū”,

ḥanagūrū. Rū yexguma ga Moīché rū inanaxūgū ga norū muūmaā na yaduruxū. Rū namuū ga yexma na nadawenūxū. ³³—Rū yexguma ga Cori ga Tupana rū ḥanagūrū nūxū:

“¡Inacuaixū i curū chapatu erū ḥaā naāne i nagu cuchixū rū naxūūne, erū chanuxma! ³⁴ Choma rū ngóxūwama nūxū chadau i ḥuxācū poraācū ngūxū na yangegūxū i chorū duūxūgū i Equituanewa. Rū nūxū chaxīnū i na naxauxēxū. Rū ngēmacēx nūma chaxū i ḥchananguxūxēēxūcēx. ¡Nuā naxū na Equituanewa cuxū chamuxūcēx!”, ḥanagūrū. ³⁵—Rū woo ga noxri ga nūmagū ga natanūxūgū rū guma Moīchéxū naxoe ga yexguma ḥagūgu:

“¿Rū texé cuxū tamu na toeru quiixūcēx rū tomaā icucuáxūcēx?” ḥagūgu, natūrū ga Tupana rū yēma nanamuāma na yema duūxūgūxū inanguxūxēēxūcēx rū norū āēxgacū na yīixūcēx. Rū yemaācū Moīchéxū namu ga Tupana ga yexguma naxūtawa namuāxgu ga yema norū orearū ngeruū ga yema naīxētaxacū ga iyauraxūwa naxcēx ngóxū. ³⁶—Rū Moīché nixī ga Equituarū naānewa inagaxūxū ga nuxcūmaūgūxū ga tórū oxigū. Rū Equituanewa, rū Dauchiūxū ga Taxtūwa, rū dauxchitawa ga ngextá taxúema íxāpataxūwa inanawēx ga cuēxruūgū, rū nanaxū ga mexū ga taxūgū ga Tupanaārū poramaā naxūxū. Rū yemaācū 40 ga taunecū nūxū na rū-ngūxēē ga yema duūxūgū. ³⁷—Rū nūmatama ga Moīché nixī ga tatanūxūgū ga Yudíugūmaā ḥaxū:

“Tupana rū yixcūra tá pexcēx nūxū naxuneta i petanūwa i wūxi i norū orearū uruū ga yexgumarūū ga choxū na naxunetaxūrūū”,

ḥanagūrū. ³⁸—Rū nūmatama ga Moīché nixī ga nuxcūmaūgūxū ga tórū oxigūmaā nangutaquēxēxū ga yema naāne ga ngextá taxúema íxāpataxūwa. Rū tórū oxigūmaā nayexma ga Chinaī ga mēxpūnewa ga yexguma namaā yadeaxgu ga Tupanaārū orearū ngeruū ga daxūcūāx. Rū nūmatama ga Moīché nixī ga nayauxāxū ga Tupanaārū ore i maxēxēēruū na nūxī tūxna naxāāxūcēx. ³⁹—Natūrū ga tórū oxigū rū tama naga naxīnūēchaū ga guma Moīché. Rū inatēxūchigūama, rū Equituaneguama narūxīnūāēgū. ⁴⁰—

Rū tórū oxigū rū Moīchéeneē ga Arāūxū ḥanagūrūgū: “¡Rū toxcēx naxū i tupanachicūnēxāgū na nawe tarūxūxūcēx! Erū tama nūxū tacuēxgū i tacū nūxū na ūpetūxū i ngēma Moīché ga Equituanewa tūxū yagagūxū”, ḥanagūrūgū. ⁴¹—Rū yexguma nanaxūgū ga wūxi ga wocaxacūchicūnēxā norū tupanaxū. Rū ḥuxūchi naxcēx nanadai ga ḥuxre ga carnerugū na yemamaā nūxū yacuēxūūgūxūcēx. Rū wūxi ga peta naxcēx naxūgū ga yema wocaxacūchicūnēxā ga nūmatama naxūgūxū. ⁴²—Rū yemacēx ga Tupana rū nūxna nixūgachi ga yema duūxūgū. Rū inanaxogū na woramacuri rū ūēxcū rū taugemacūmaā natupanaāxēēāxūcēx. Yerū yemaācū Tupanaārū orearū uruūgūarū poperagu naxūmatū, rū ḥanagūrū:

“Pema, Pa Yudíugūx, ¿Chauxcēx yīixū ga penadēixū ga carnerugū ga yexguma

40 ga taunecū dauxchitawa ga ngextá taxúema íxāpataxūwa peyexmagūgu? ⁴³ Tama aixcūma chauxcēx nixī yerū ga pema rū ngextá

İpexİxŭwa rŭ İpenangeexŭ ga napata ga perŭ tupananeta ga Moro rŭ İpenangeexŭ ga perŭ tupananeta ga Refããrŭ woramacurichicŭnèxã. Rŭ yemaãcŭ pegŭmaã İpenangeexŭ ga yema tupananetachicŭnèxãgŭ ga pematama pexŭgŭxŭ na nŭxŭ picuèxŭŭgŭxŭcèx. Rŭ ngēmacèx i ñuxma rŭ perŭ naãnewa tá pexŭ İchawoxŭ rŭ yaxŭwa i Babiró-niããrŭ yexerawa tá pexŭ chamugŭ”,

ñanagŭrŭ ga Tupana ga yema orewa. ⁴⁴—Rŭ yema naãne ga ngextã taxúema İxãpataxŭwa rŭ tórŭ oxigŭ nŭxŭ nayexma ga wŭxi ga İpata ga naxchirunaxcèx ga naga namaã nanguxŭgŭne ga Tupanaãrŭ mugŭ ga nŭtagu ũmatŭxŭ. Rŭ guma İpata ga naxchirunaxcèx nixŭ ga nŭxŭ naweãcŭma Tupana Moİchéxŭ naxŭxèxene. ⁴⁵—Rŭ yexguma nayuxguwena ga Moİché, rŭ Yochué ningucuchi ga ãëxgacŭ na yİxŭ. Rŭ tórŭ oxigŭ rŭ nuã tórŭ naãnewa nanangegŭ ga guma İpata ga naxchirunaxcèx ga yexguma Yochuémaã napugŭãgu ga ñã naãne nŭxna ga yema duŭxŭgŭ ga Tupana İwoxŭxŭ napèxewa ga tórŭ oxigŭ. Rŭ nŭma nayexma ga guma İpata rŭ ñuxmata Dabí İngucuchigu ga ãëxgacŭ na yİxŭ. ⁴⁶—Rŭ guma ãëxgacŭ ga Dabí rŭ Tupana rŭ poraãcŭ namaã nataãe, rŭ nŭxŭ narŭngŭxèe. Rŭ nŭma ga Dabí rŭ Tupana naxcèx naca na naxŭãxŭcèx ga wŭxi ga tupauca ga taxŭne ga nawa Tupanaxŭ na yacuèxŭŭgŭxŭcèx ga tatanŭxŭgŭ ga Acobutaagŭ. ⁴⁷—Natŭrŭ Dabí nane ga Charumóu nixŭ ga naxŭcŭ ga guma tupauca ga Tupanacèx İxŭxŭne. ⁴⁸—Natŭrŭ ya Tupana ya tacŭxŭchima rŭ tama duŭxŭgŭ ũxŭne ya tupaucagŭmaã naxãpata. Rŭ yemacèx ga Tupana rŭ nuxcŭmaŭcŭ ga norŭ orearŭ uruŭwa rŭ ñanagŭrŭ:

⁴⁹⁻⁵⁰ “Choma nixŭ ya ãëxgacŭ ya tacŭxŭchima, rŭ daxŭguxŭ i naãne nixŭ i chorŭ toxmaxwèxeruŭ İxŭxŭ rŭ ñoma i naãne nixŭ i chorŭ chicutŭruŭ İxŭxŭ. ¿Rŭ ñuxŭcŭrŭwa i naga perŭxŭnŭèxŭ tá na penaxŭxŭ ya wŭxi ya tupauca ya chaugu mexŭne?”

ñanagŭrŭ ga Cori ya Tupana. Rŭ ñanagŭrŭ ta ga Tupana:

“¿Tama èxna choma yİxŭ İchanaxŭxŭ ga guxŭma i tacŭ i ngèxmaxŭ? ¿Rŭ ñuxãcŭ chi penaxŭxŭ i wŭxi i nachica i naga charŭngŭxŭ?”

ñanagŭrŭ ga norŭ orewa. ⁵¹ Rŭ ñanagŭrŭ ga Etébaŭ: —Dŭcèx Pa ãëxgacŭgŭx, pema rŭ guxŭguma nŭxŭ pexoe i Tupanaãrŭ ore, rŭ tama İperŭxŭnŭèchaŭ. Rŭ peãewa rŭ tama peyaxögŭchaŭ. Rŭ pema rŭ guxŭguma Tupanaãe i ũnèxŭmaã penuèecha. Yema nuxcŭmaŭgŭxŭ ga perŭ oxigŭrŭŭtama pixŭgŭ i pemax. ⁵²—Rŭ perŭ oxigŭ rŭ chixeãcŭma namaã nachopetŭ ga guxŭma ga Tupanaãrŭ orearŭ uruŭgŭ. Rŭ nanadai ga yema orearŭ uruŭgŭ ga nŭxŭ İxuchigagŭxŭ ga na nŭma naxŭxŭ tá ga guma mecŭ ya Ngechuchu. Rŭ yexguma İnanguxgu ga guma Ngechuchu rŭ pema Piratuna penamu rŭ penayuxèe. ⁵³—Rŭ woo pema rŭ Tupanaãrŭ orearŭ ngeruŭgŭ ga daxŭcŭãxŭtawa penayaxu ga Tupanaãrŭ ore, natŭrŭ tama naga pexŭnŭe —ñanagŭrŭ ga Etébaŭ.

Nayu ga Etébaŭ

⁵⁴ Rŭ yexguma nŭxŭ naxŭnŭègu ga yema ore, rŭ nanuèxŭchiana ga yema duŭxŭgŭ. Rŭ norŭ nŭmaã Etébaŭcèx nixŭxchapŭtagŭ. ⁵⁵ Natŭrŭ ga Etébaŭ rŭ aicŭma Tupanaãe i ũnèxŭ nawa nayexma. Rŭ daxŭ nadawenŭ, rŭ nŭxŭ nadau na ñuxãcŭ namexèchixŭ ga Tupana. Rŭ nŭxŭ nadau ga Ngechuchu ga Tupanaãrŭ tŭgŭneguama chicŭ. ⁵⁶ Rŭ yexguma rŭ ñanagŭrŭ: —Nŭxŭ chadau i na yangoxnaãchixŭ i naãnetŭwe, rŭ nŭxŭ chadau ya Cristu

ya Tupana Nane ya duñxũxũ ixĩcũ ya Tupanaãrũ tügũneguama chicũ — ñanagũrũ ga Etébaũ. ⁵⁷ Natürũ nümagũ rũ nügũ narütütamachixegũ, rũ tagaãcũ aixta naxüeãcũma nüxna nayuxgũ. ⁵⁸ Rũ ñanagaxũchigũ ga ñanewa, rũ nutagũmaã ñanamuxũchigũ. Rũ yéma nayexma ga wũxi ga ngextũxũxũ ga Chaurugu ägegaxũ. Rũ yemaxũ nanawotanũ ga norũ gáuxũchirugũ ga ñacuxuchigũxũ ga yema duñxũgũ ga Etébaũxũ imèxgũxũ. ⁵⁹ Rũ yexguma nutamaã ñamuxũchigũãguyane, rũ nayumũxè ga Etébaũ rũ ñanagũrũ: —Pa Cori Pa Ngechuchux, ¡Nayaxu i chauãé! —ñanagũrũ. ⁶⁰ Rũ yemawena rũ ñacaxãpũxũ, rũ tagaãcũ aixta naxũ, rũ ñanagũrũ: —Pa Cori Pa Tupanax, ¡Tãxũ i ñaã pecaducèx cunapoxcuxèx i ñaã duñxũgũ! —ñanagũrũ. Rũ yexguma yema ñaxguwena rũ nayu.

8

Chauru rũ guxema yaxögũxewe ningèchigũ na tüxũ napoxcuxèxèx

¹ Rũ Chauru rũ norũ me nixĩ ga Etébaũxũ na yamèxgũxũ. Rũ yematama ngunexũgu rũ norũ uwanũgũ rũ ñanaxũgũe ga na poraãcũ nawe yangèxũtanũxũ ga yema yaxögũxũ ga Yerucharéũwa yexmagũxũ. Rũ dũxwa ga guxũma rũ Yudeaanegu rũ Chamárianegu nügũ nawoone. Rũ yema ngüexũgũ ga Ngechuchu imugũxũxĩcatama ñayaxũgũ ga Yerucharéũwa. ² Rũ ñuxre ga yatũgũ ga meãma Tupanaãxũ yaxögũxũ rũ nanayauxgũ ga Etébaũxũne, rũ ñanatèxgũ rũ poraãcũ naxcèx naxauxe. ³ R yexguma ga Chauru rũ chixri tũmamaã naxũpetũ ga guxema yaxögũxè. Rũ tũmapatagu nixũcuchigũ na tüxũ ñayauxũxũcèx. Rũ yéma tüxũ ñatũxũ ga yatũgũ rũ ngexegũ, rũ ñuxũchi poxcupataũgu tüxũ nawocu.

Chamáriawa nüxũ nixuchiga ga Tupanaãrũ ore i mexũ

⁴ Rũ yema yaxögũxũ ga Chauruchaxwa ibuxmũxũ ga Yerucharéũwa, rũ guxũwama ga ngextã ñaxĩxũwa rũ nüxũ nixuchigagũ ga ñuxãcũ Ngechuchu tüxũ na maxèxèèxũ. ⁵ Rũ Piripi nixĩ ga wũxi ga yema orexũ ixuchigacũ. Rũ nüma rũ ñane ga Chamáriawa naxũ, rũ yéma ñanaxũgũ ga Cristuchigaxũ na yaxuxũ. ⁶ Rũ yema duñxũgũ ga Chamáriacũãx, rũ Piripicèx nangutaquèxegũ. Rũ guxũma meãma ñarũxĩnũè ga yema ore ga namaã nüxũ yaxuxũ, yerũ nüxũ nadaugũ ga yema mexũgũ ga taxũgũ ga Tupanaãrũ poramaã naxũxũ ga Piripi. ⁷ Rũ muxèma ga duñxègũ ga ngoxogũ tũmawa yexmaxè rũ tũmacèx nitaanegũ. Rũ yema ngoxogũ rũ tagaãcũ aita naxüeãcũma tũmawa ñachoxũ. Rũ yexgumarũ ta rũ muxèma ga nawãixãchigũxè rũ chixeparagũxè rũ tũmacèx nitaanegũ. ⁸ Rũ yemacèx poraãcũ nataãègũ ga guxũma ga duñxũgũ ga guma ñane ga Chamáriawa. ⁹ Natürũ guma ñanewa nayexma ga wũxi ga yatũ ga Chimáũgu ägegaxũ ga ñuxre ga tauncècũ norũ yuũmaã duñxũgũxũ womũxèèxũ ga guma ñanewa. Rũ nügũ nixu ga na wũxi ga tacũxũ cuãxũ na yĩxũ. ¹⁰ Rũ guxũma meãma nüxũ ñarũxĩnũè woo ga buxũgũ rũ yaxũgũ. Rũ ñanagũrũgũ: —Ñaã yatũ rũ aixcũma nüxũ nangèxma i Tupanaãrũ pora i taxũ —ñanagũrũgũ. ¹¹ Rũ naga naxĩnũè ga duñxũgũ, yerũ mucũma ga tauncècũ rũ norũ yuũmaã nanawomũxèè. ¹² Rũ Piripi rũ yema duñxũgũmaã nüxũ nixu ga ore ga mexũ ga Ngechuchu ga Cristuchiga, rũ ñuxãcũ na äèxgacũ yĩxũ ya Tupana. Rũ yexguma yema ore yaxögũga ga duñxũgũ, rũ Piripi ñanabaiũxèè ga yatũxũ rũ ngexũgũ. ¹³ Rũ nümatama ga Chimáũ rũ ta nayaxõ, rũ ñabaie. Rũ ñanaxũgũ ga Piripixũ na naxũmũcũxũ. Rũ yexguma nüxũ nadèuxgu ga yema cuèxruũgũ rũ mexũgũ ga taxũ ga Tupanaãrũ poramaã naxũxũ

ga Piripi, rü poraãcũ nabaixãchiãe ga Chimáũ. ¹⁴ Rü yema Ngechucharũ ngũexũgũ ga Yerucharéũwa yexmagũxũ rü nüxũ naxĩnũechiga ga meã na nayauxgũãxũ ga Tupanaãrũ ore ga Chamáriawa. Rü yemacèx yéma nana-mugũ ga Pedru rü Cuáũ. ¹⁵ Rü yexguma Chamáriawa nangugũga ga Pedru rü Cuáũ, rü naxcèx nayumũxègũ ga yema yexwaca yaxõgũxũ ga duũxũgũ, na nayauxgũãxcèx ga Tupanaãe i Üünexũ. ¹⁶ Yerũ yexguma noxri yaxõgũãgu ga yema duũxũgũ rü Piripi marũ inanabaiũxèemare naegagu ga Cori ga Ngechuchu, natürũ taxuxũnata nangu ga Tupanaãe i Üünexũ. ¹⁷ Rü yemacèx ga Pedru rü Cuáũ naxmèxmaã nüxũ ningõgũgũ ga yema yaxõgũxũ, rü yexguma nanayauxgũ ga Tupanaãe i Üünexũ. ¹⁸⁻¹⁹ Rü nüxũ nadau ga Chimáũ ga na duũxũgũna nanguxũ ga Tupanaãe i Üünexũ ga yexguma Pedru rü Cuáũ naxmèxmaã yema duũxũgũxũ yangõgũgũgu. Rü yemacèx dièru Pedru rü Cuáũna ngĩxũ naxãxchaũ ga Chimáũ rü ñanagürũ nüxũ: —jChoxna rü ta penaxã i ngẽma pora, na yíxema tüxũ chingõgũxe rü ta tüxna nanguxũcèx i Tupanaãe i Üünexũ! —ñanagürũ. ²⁰ Rü yexguma ga Pedru rü ñanagürũ nüxũ: —jCuxrũũtama iyanataxux i curũ dièru, erũ ngĩmaã naxcèx cutaxechaũ i Naãe i Üünexũ i Tupana tüxna mumarexũ! ²¹ Cuma rü taxucürũwama cunayaxu i ngẽma pora, erũ curũ maxũ rü tama name i Tupanapèxewa. ²² jNüxũ rüxo i ngẽma curũ chixexũ, rü Tupanana naxcèx naca na cuxũ nüxũ nangechaũxũcèx! Rü hexmana tá cuxũ nüxũ nangechaũ i ngẽma chixexũ i cuãẽwa nagu curũxĩnũxũ. ²³ Erũ nüxũ chacuèx rü poraãcũ cunuãewèxe, rü ngẽma curũ chixexũ rü cumaã inacuèx rü ñoma cupoxcuxürũ cuxũ nixixèe —ñanagürũ. ²⁴ Rü Chimáũ nanangãxũ, rü ñanagürũ: —jPema Tupanana chauxcèx peãa na tama choxũ nangupetũxũcèx i ngẽma nüxũ pixuxũ! —ñanagürũ. ²⁵ Rü Pedru rü Cuáũ rü yema Chamárianecũãx ga duũxũgũmaã nüxũ nixugũe ga Cori ga Ngechuchuchiga, rü namaã nüxũ nixugũe ga Tupanaãrũ ore. Rü yemawena rü Yerucharéũcèx nawoegu. Rü namawa rü muxũne ga Chamárianewa yexmane ga ñanexãcũgũwa rü nüxũ nixuetanũ ga Tupanaãrũ ore i mexũ.

Piripi rü namagu nüxũ nangau ga wüxi ga ãèxgacũ ga Etióipianecũãx

²⁶ Rü yemawena, rü Tupanaãrũ orearũ ngeruũ ga daxũcũãx rü Piripimaã nüxũ nixu, rü ñanagürũ: —jRü paxa inaxũãchi rü ñane ya Gachawaama naxũ nawa i ngẽma nama i Yerucharéũwa ne daxũ rü Gachawa iyarũgoxũ! —ñanagürũ. Rü ngẽma nixĩ i nama i dauxchitawa i ngextá taxúema íxãpataxũwa dapetũxũ. ²⁷ Rü inaxũãchi ga Piripi rü yema namawa naxũ. Rü yexma nügũ nangau namaã ga wüxi ga yatũ ga Etióipianenanguxũ ga guxcũma ga yema ãèxgacũarũ dièru. Rü ñeãcũ Yerucharéũwa naxũ na Tupanaxũ yanacuèxũxũcèx. ²⁸ Rü nachiũñanecèx nataegu, rü norũ autu ga cowaru itúchigũnewa narũto. Rü nawa ningúchigũ ga yema ore ga Tupanaãrũ orearũ uruũ ga Ichaxía ùmatũxũ. ²⁹ Rü Tupanaãe i Üünexũ rü Piripixũ ñanagürũ: —jPaxa naxcèx ixũ i ngẽma autu! —ñanagürũ. ³⁰ Rü paxa yema autcèx niña ga Piripi. Rü yexguma naxũtawa nanguxgu rü nüxũ naxĩnũ ga na Tupanaãrũ orearũ uruũ ga Ichaxía ùmatũxũ ga orewa nangũxũ ga yema ãèxgacũ. Rü yexguma ga Piripi rü nüxna naca rü ñanagürũ nüxũ: —jNüxũ cucuáxũ i ñacũchiga na yĩxũ i ngẽma nawa cungúxũ? —ñanagürũ. ³¹ Rü nüma ga ãèxgacũ ga Etióipianecũãx rü nanangãxũ, rü ñanagürũ: —jNüxũcürũwa i nüxũ chacuáxũ ega taxúema chomaã inanguxũxèegux? —ñanagürũ. Rü

Piripicèx naca na naxīnagūxūcèx, rŭ naxūtawa na natoxūcèx. ³² Rŭ yema nawa yangūchigūxū ga Tupanaārŭ ore ga ūmatūxū, rŭ ñanagŭrŭ:

“Rŭ ñoma wūxi i carneru i norŭ mèxwa nagagūxūrŭfācū nayagagū. Rŭ wūxi i carneruxacū i ngēma yayoxtèxagūxūpèxewa tama aita ūxūrŭŭ nachianemare, rŭ taxu ñanagŭrŭ. ³³ Rŭ yexguma duūxūgŭ poraācū chixri namaā chopetūgu rŭ taxūema naetŭwa tachogŭ. ¿Rŭ texé tá meā nachiga tidexa ga yema duūxūgŭ ga yemaācū poraācūxūchima chixexū ūgūxū? Yerŭ nayamèxgŭ na nataxuxūcèx i norŭ maxū i ñoma i naānewa”,

ñanagŭrŭ ga yema ore ga nawa nangūxū. ³⁴ Rŭ Piripina naca ga yema āèxgacū ga Etiōpaa necūāx, rŭ ñanagŭrŭ: —¿Chomaā nūxū ixu! ¿Rŭ texéchigagu nixī ga yadexaxū ga yema Tupanaārŭ orearŭ uruŭ? ¿Nūgūchigagutama Rŭ ēxna toguechigagu? —ñanagŭrŭ. ³⁵ Rŭ yexguma nanangāxū ga Piripi. Rŭ yematama ore ga ūmatūxūmaā inanaxūgŭ na namaā nūxū yaxuxū ga ore i mexū ga Ngechuchuchiga. ³⁶ Rŭ yixcamaxūra ga yexguma inaxīyane, rŭ dexá íyexmaxūwa nangugŭ. Rŭ ñanagŭrŭ ga yema āèxgacū: —Nuā nangèxma i dexá. ¿Rŭ tama ēxna inamexū na nuā choxū ícubaixèēxŭ? —ñanagŭrŭ.

³⁷ Rŭ ñanagŭrŭ ga Piripi: —Ngèxguma aixcūma meāma cuyaxōxgux, rŭ marŭ name i na cuxū íchabaixèēxŭ —ñanagŭrŭ. Rŭ nanangāxū ga yema āèxgacū, rŭ ñanagŭrŭ: —Ngēmāācū chayaxō na Ngechuchu ya Cristu yīxŭ ya Tupana Nane —ñanagŭrŭ. ³⁸ Rŭ yexguma ínayachaxāchixèē ga norŭ autu, rŭ wūxigu dexāchiūwa nachoŭ. Rŭ Piripi ínanabaixèē ga yema āèxgacū. ³⁹ Rŭ yexguma dexáwa ínachoōchigu, rŭ Tupanaāē i Ūnèxŭ rŭ Piripixŭ niga. Rŭ yema āèxgacū rŭ marŭ tama wena Piripixŭ nadau. Natŭrŭ taāēācū namagu nixū. ⁴⁰ Natŭrŭ Achotowa nayangox ga Piripi. Rŭ yema íānewa inaxūāchi, rŭ nūxū nixuchigŭ ga ore i mexū ga guxūma ga íānewa ñuxmata Checharéaarŭ naānewa nangu.

9

Ngechuchuaxū nayaxō ga Chauru

¹⁻² Rŭ yoxni ga Chauru rŭ daimaā nayaxāxūnechigūama ga yema duūxūgŭ ga Cori ga Ngechuchuaxū yaxōgūxū. Rŭ yemacèx paigŭeruxūtawa naxū, rŭ naxcèx nūxna naca ga popera ga nūxna āgaxŭ na Yudíngŭarŭ ngutaquèxepataŭgŭ ga Damacuwa yexmagūnegu yaxūcuchigūxūcèx rŭ yexma tūmacèx nadauxūcèx ga guxema yaxōgūxe ga yatŭxe rŭ ngexegŭ na Yerucharéŭwa tūxŭ nagagūxūcèx rŭ yexma tūxŭ yapoxcuxūcèx. ³ Natŭrŭ yexguma marŭ Damacuxŭ yangaicagu, rŭ ngŭrŭāchi meāma nūxŭ nabáxi ga wūxi ga omŭ ga poraxŭ ga daxūwa íbáxixŭ. ⁴ Rŭ ñaxtūanegu nayangu ga Chauru, rŭ nūxŭ naxīnŭ ga wūxi ga naga ga nūxna çagūxŭ ga ñaxŭ: —Pa Chauru Pa Chaurux, ¿tŭxcūŭ i chowe quingèchigūxŭ? —ñaxŭ. ⁵ Rŭ Chauru nanangāxŭ, rŭ ñanagŭrŭ: —¿Rŭ texé quixī, Pa Corix? —ñanagŭrŭ. Rŭ nūma ga Cori rŭ nanangāxŭ rŭ ñanagŭrŭ: —Choma nixī i Ngechuchu, rŭ chorŭ duūxūgŭ nixī i ngēma nawe quingèchigūxŭ. ⁶ ¿Rŭ inachi, rŭ ngema Damacuarŭ íānewa naxŭ! Rŭ ngema rŭ wūxi ya yatŭ tá cumaā nūxŭ nixu na tacŭ tá cuxūxŭ —ñanagŭrŭ. ⁷ Rŭ yema yatŭgŭ ga Chauruxŭ íxūmŭcŭgŭxŭ, rŭ inayanguāgŭ, yerŭ nūxŭ naxīnŭē ga yema ore natŭrŭ taxūxūma nadaugŭ. ⁸ Rŭ ñuxūchi inachi ga Chauru ga ñaxtūanewa ga íyanguxūwa, rŭ nidauchixetŭ, natŭrŭ taxūma nadau yerŭ nixoxetŭ. Rŭ yemacèx ga namŭcŭgŭ, rŭ nachacūgu nayayauxāchi, rŭ yemaācū

Damacuwa nanagagū. ⁹ Rū tomaēxpūx ga ngunexūgu, rū nangexetū, rū tama nachibū, rū tama naxaxe. ¹⁰ Rū Damacuwa nayexma ga wūxi ga yatū ga Ngechuchuaxū yaxōxū ga Ananīā ga naega. Rū Cori ya Ngechuchu naxcēx nangōx, rū űnanagūrū nūxū: —Pa Ananīāx —űnanagūrū. Rū nūma ga Ananīā nanangāxū, rū űnanagūrū: —¿Tacū? Pa Corix —űnanagūrū. ¹¹⁻¹² Rū nūma ga Cori nanangāxū, rū űnanagūrū: —¿Dūcēx, ngēma itamū i Meā i Wēxūgu āegaxūwa naxū! ¿Rū ngema Yudapatama naxcēx Inaca i wūxi i yatū i Tarsucūāx i Chaurugu āegaxū! Rū nūma rū ngema Inayumūxē rū nangōxetū rū marū cuxū nadau, Pa Ananīāx, na ngēxma cuxūcuxū rū naxētūgu quingōgūxū na wena yadauchixūcēx —űnanagūrū ga Cori ga Tupana. ¹³ Rū yexguma yemaxū naxīnūgu ga Ananīā, rū űnanagūrū: —Pa Corix, muxūma i duūxūgū chomaā nūxū nixu i ngēma yatūchiga na űuxre i chixexū naxūxū namaā i curū duūxūgū i Yerucharēūwa. ¹⁴ Rū űuxma rū paigūarū āēxgacūgūarū mumaā nūma naxū na Inayauxūāxūcēx i guxūma i duūxūgū i cuēgagu yumūxēgūxū —űnanagūrū. ¹⁵ Natūrū nūma ga Cori rū űnanagūrū nūxū: —¿Ngema naxū! Erū choma chanayaxu i ngēma yatū na choxū yaxuchigaxūcēx namaā i togū i nachiūānecūāxgū i duūxūgū rū norū āēxgacūgū, rū ngema Iraēcūāxgū. ¹⁶ Rū choma tā nūxū nūxū chadauxēē i űuxre i ngūxū i tá yangexū i chauxcēx —űnanagūrū ga Cori. ¹⁷ Rū guma Ipata ga Chauru nawa yexmanewa naxū ga Ananīā. Rū nagu naxūcu, rū nūxū inpingōgū, rū űnanagūrū nūxū: —Pa Chaueneē Pa Chaurux, nūma ya Cori ya Ngechuchu ga guma namawa cuxcēx ngōcū ga yexguma nūma cuxūxgu, rū nūma choxū namu na wenaxārū quidauchixūcēx, rū cuxna nanguxūcēx i Naāē i Ūnuxū —űnanagūrū. ¹⁸ Rū yexgumatama rū űnoma tacūchicutēxerū naxētūwa Inayi, rū yexguma wenaxārū meā nidauchixetū. Rū yexguma inachi ga Chauru, rū Ananīā Inanabaixēē. ¹⁹ Rū yemawena nachibū, rū wenaxārū napora. Rū űuxre ga ngunexūgu yexma Damacugu narūxāūx namaā ga yema yaxōgūxū ga yexma āchiūgūxū.

Chauru rū Damacuwa nūxū nixu ga Ngechuchuchiga

²⁰ Rū yexguma inanaxūgū ga Chauru ga ngutaquēxepataūgūwa nūxū na yaxuchigaxū na Ngechuchu yīxū ya Tupana Nane. ²¹ Rū guxūma ga yema nūxū inūexū rū poraācū nabaixāchiāēgū, rū űnanagūrūgū: —¿Tama ēxna űnā yatū yīxū ga Yerucharēūwa İyayauxūgūxū ga guxūma ga duūxūgū ga Ngechuchuaxū yaxōgūxū? ¿Rū tama ēxna űnāatama yīxū ga yema nūma ūxū na Inayauxūāxūcēx rū űuxūchi paigūarū āēxgacūxūttawa nagagūāxūcēx i duūxūgū i yaxōgūxū? —űnanagūrūgū. ²² Natūrū ga Chauru rū guxū ga ngunexūgu yexeraācū tama namuūācūma nūxū nixuchigaama ga ore ga Ngechuchuchiga. Rū inananangeēxgūxēē ga Yudiūgū ga Damacuwa yexmagūxū, yerū meāma nanangōxēē na Cristu yīxū ga Ngechuchu.

Chauru rū Yudiūgū- chaxwa niña

²³ Rū marū muxūma ga ngunexūgū ngupetūguwena rū yema Yudiūgū rū wūxigu nūgūmaā nagu narūxīnūē na Chauruxū yamēxgūxūcēx. ²⁴ Natūrū nūma ga Chauru rū nūxū nacuāchiga ga na yamēxgūchāūāxū. Rū yema Yudiūgū rū ngunecū rū chūtacū rū guma İāneārū pōxeguxūārū İāxgūgu Chauruxū nanēīxgūxū na yamēxgūāxūcēx. ²⁵ Natūrū ga Chauruarū ngūexūgū rū chūtacū rū wūxi ga pexchi ga tacūgu guma İāneārū pōxeguxūtapūxētūwa İnanāchūxūetaūgūama, rū yemaācū niña ga Chauru.

Yerucharéŭwa nayexma ga Chauru

26 Rŭ yexguma Yerucharéŭwa nanguxgu ga Chauru, rŭ yema yaxŏgŭxŭmaã nangutaquẽxechaŭ. Natŭrŭ yema yaxŏgŭxŭ rŭ nŭxŭ namuẽ, yerŭ nŭma nŭxŭ nacuẽxgŭgu rŭ tama aixcŭma Ngechuchuaxŭ nayaxŏ. 27 Natŭrŭ Bernabé rŭ yema nguẽxŭgŭ ga Ngechuchu imugŭxŭtanŭwa nanagaama. Rŭ yema nguẽxŭgŭmaã nŭxŭ nixu ga ñuxãcŭ Cori ya Ngechuchuxŭ na nadauxŭ ga Chauru ga namawa, rŭ ñuxãcŭ Cori namaã na idexaxŭ. Rŭ nŭxŭ nixu ta ga ñuxãcŭ Damacuwa rŭ tama namuẽãcŭma nŭxŭ na yaxuxŭ ga Ngechuchuchiga. 28 Rŭ yemaãcŭ ga Chauru rŭ Yerucharéŭgu narŭãŭx. Rŭ yema nguẽxŭgŭ ga Tupana imugŭxŭtanŭgu naxã. Rŭ tama namuẽãcŭma Cori ya Ngechuchuchigaxŭ nixuchigŭ. 29 Rŭ yema Yudŭgŭ ga Griégugawa idexagŭxŭmaã nidexaxŭ ga Chauru, rŭ Ngechuchuchigagu nŭgŭmaã nayaporagaexŭ. Natŭrŭ ga nŭmagŭ rŭ naxcẽx nadaugŭama ga ñuxãcŭ tá na yamẽxgŭãxŭ. 30 Rŭ yexguma nŭxŭ yacuẽxãchitanŭgu ga yema togŭ ga yaxŏgŭxŭ, rŭ Checharéawa Chauruxŭ nagagŭ. Rŭ yexguma yema nangugŭgu rŭ wŭxi ga wapurugu nayamuẽgŭ rŭ Tarsuwa naxŭ. 31 Rŭ yexguma rŭ meãma nŭxŭ naxŭpetŭ ga yema yaxŏgŭxŭ ga guxŭma ga Yudeaanewa, rŭ Gariréaanewa rŭ Chamáriaanewa. Rŭ yexeraãcŭ meã nayaxŏgŭetanŭ rŭ aixcŭma Tupana naxwẽxẽãcŭma meã namaxẽ. Rŭ Tupanaãe i Ŭnẽxŭãrŭ ngŭxẽẽmaã nimuẽtanŭãma ga yema yaxŏgŭxŭ.

Eneã rŭ narŭme

32 Rŭ yexguma Pedru yema yaxŏgŭxŭtanŭgu ixŭãgŭchigŭxgu, rŭ yema Didágu ãchiũgŭxŭ ga yaxŏgŭxŭtanŭwa rŭ ta nangu. 33 Rŭ yexma nŭxŭ nayangau ga wŭxi ga yatŭ ga Eneã ga naega ga 8 ga taunecŭ norŭ pechicagu cacŭ, yerŭ nanawãixãchi. 34 Rŭ Pedru ñanagŭrŭ nŭxŭ: —Pa Eneãx, Ngechuchu ya Cristu cuxŭ narŭmexẽẽ. ¡Inachi rŭ namexẽẽ i cuxchapenŭxŭ! — ñanagŭrŭ. Rŭ yexgumatama inachi. 35 Rŭ guxŭma ga yema Didáçũãxgŭ rŭ Charunacũãxgŭ rŭ nŭxŭ nadaugŭ ga na inachixŭ ga guma yatŭ, rŭ nŭxŭ narŭxŏe ga nacŭmagŭ ga chixexŭ, rŭ Cori ya Ngechuchuwe narŭxŭ.

Wena imaxŭ ga Dorca

36 Rŭ yexgumaãcŭu ga ñãne ga Yopewa rŭ iyexma ga wŭxi ga Tupanaãxŭ yaxŏxcŭ ga ngecŭ ga Tabita ga ngŭega. Rŭ ngẽma naega i Griégugawa rŭ Dorca ñaxŭchiga nixŭ. Rŭ ngŭma rŭ wŭxi ga mecŭ iyixŭ ga ngŭrŭ ŭwa, rŭ guxŭguma nŭxŭ irũngŭxẽẽ ga yema duũxŭgŭ ga tacŭ nŭxŭ taxuxŭ. 37 Rŭ yexgumaãcŭu iyãdaawe ga Dorca, rŭ iyu, rŭ ngŭmũcŭgŭ nanamexẽẽ ga ngŭĩne. Rŭ ĩpataarŭ daxŭchiũwa yexmaxŭ ga ucapugu nanaxŭgŭ ga ngŭĩne. 38 Rŭ Yopearŭ ngaicamana nayexma ga guma ñãne ga Didá ga Pedru nawa yexmane. Rŭ yema yaxŏgŭxŭ ga Yopecũãx rŭ nŭxŭ nacuẽxgŭ ga Didáwa na nayexmaxŭ ga Pedru. Rŭ naxcẽx yema nanamugŭ ga taxre ga yatŭ ñaxŭmaã: —¡Rŭ paxa toxcẽx nuã naxŭ! —ñaxŭmaã. 39 Rŭ yexguma ga Pedru rŭ nawe narŭxŭ. Rŭ yexguma ñanguxgu, rŭ yema ucapu ga yema yueta nawa yexmaxŭwa nanagagŭ. Rŭ guxŭma ga yutegŭxŭ rŭ Pedruxŭ ñachomaẽguãchi, rŭ naxauxe, rŭ nŭxŭ nayawégŭ ga yema naxchirugŭ ga Tabita nŭxŭ ixŭũxŭ ga yexguma namaũxgu. 40 Rŭ Pedru rŭ dũxẽtŭwa nanamugŭ ga guxŭma. Rŭ inacaxãpũxŭ, rŭ nayumũxẽ. Rŭ ñuxŭchi ngŭxcẽx nadauegu ga yema yuxcŭ, rŭ ñanagŭrŭ: —Pa Tabitax, ¡Írŭda! —ñanagŭrŭ. Rŭ yexguma rŭ iyadauchixetŭ, rŭ Pedruxŭ idau, rŭ ĩrŭto. 41 Rŭ yexguma ngŭmxẽxgu nayayauxãchi, rŭ ngŭxŭ inachixẽẽ. Rŭ ñuxŭchi naxcẽx naca ga

yema yaxōgūxū rŭ yema yutegūxū, rŭ maxūxcū nūxū ngīxū nawēx. ⁴² Rŭ guxūma ga yema duūxūgū ga Yopewa yexmagūxū rŭ nūxū nacuáchigagū ga yema. Rŭ Cori ga Ngechuchuaxū nayaxōgū ga muxūma. ⁴³ Rŭ muxūma ga ngunexū Yopegu narūxāūx ga Pedru napatagu ga Chimáu ga naxchēxmūārū paxēewa puracūxū.

10

Pedru rŭ Cornériuchiga

¹ Rŭ ĩāne ga Checharéawa nayexma ga wūxi ga yatū ga Cornériugu āegacū. Rŭ 100 ga Itáriaanecūāx ga churaragūarū capitāū nixī. ² Rŭ nūma nixī ga wūxi ga yatū ga meāma Tupanaāxū yaxōcū. Rŭ wūxigu namēxmaā rŭ naxācūgūmaā Tupanaxū nangechaūgū. Rŭ mucūma ga norū dīferumaā nūxū narūngūxēē ga duūxūgū ga Yudīugū ga ſacū nūxū taxuxū. Rŭ guxūguma nayumūxē rŭ Tupanamaā nidexa. ³ Rŭ wūxi ga ngunexū ga yexguma tomaēxpūxarū orawa nanguxchaūgu ga yáuanecū, rŭ nangoxetū. Rŭ meāma nūxū nadau ga wūxi ga Tupanaārū orearū ngeruū ga daxūcūāx ga yema ucapu ga nawa nayexmaxūgu ūcuxū. Rŭ űanagūrū nūxū: —Pa Cornériux —űanagūrū. ⁴ Natūrū nūma ga Cornériu rŭ meāma nūxū nadawenū, rŭ poraācū namuūācūma nūxna naca, rŭ űanagūrū: —ĭſacū cunaxwēxe, Pa Corix? —űanagūrū. Rŭ nanangāxū ga yema orearū ngeruū ga daxūcūāx, rŭ űanagūrū: —Curū yumūxēgū rŭ Tupana marū cuxū nūxū naxīnū, rŭ cumaā nataāē na űuxācū nūxū curūngūxēēxū i duūxūgū i ſacū nūxū taxuxū. ⁵ —ĭRŭ chanaxwēxe i Yopewa cunamugū i űuxre i yatūgū na naxcēx yacagūxūcēx i wūxi i yatū i Chimáu i Pedrugu āegaxū! ⁶ —Rŭ to i Chimáu i naxchēxmūārū paxēewa puracūxūpatawa nangēxma rŭ ngēxma nape. Rŭ yima napata rŭ taxtū i taxūcutūwa nangēxma —űanagūrū. ⁷ Rŭ yexguma nūxna iyanatauxgu ga yema orearū ngeruū ga namaā yēma idexaxū, rŭ Cornériu rŭ naxcēx naca ga taxre ga norū puracūtanūxū rŭ wūxi ga churara ga meā naga ĩnūxū ga meā Tupanaāxū yaxōxū. ⁸ Rŭ namaā nūxū nixu ga guxūma ga yema nūxū nadauxū, rŭ űuxūchi Yopewa nanamugū. ⁹ Rŭ moxūācū ga yexguma namagu naxīyane rŭ marū Yopexū yangaicagūgu ga yema duūxūgū ga Cornériu yēma mugūxū, rŭ Pedru rŭ daxū naxī ga ĩpataētūwa na yēma nayumūxēxūcēx. Rŭ tocuchiarū oragu nixī ga yexguma. ¹⁰ Rŭ nataiya, rŭ nūxū naxĭxēga ga na nachībūxū. Rŭ yexguma norū ōna ĩnaxūgūyane, rŭ nangoxetū ga Pedru. ¹¹ Rŭ nūxū nadau ga na yangoxnaxū ga naānetūwe, rŭ yēma ĩnarūxī ga wūxi ga naxchiru ga űoma wūxi ga taxū ga naxchápenūūrū ĩxīxū. Rŭ norū āgūmūcūpēxewa naxātūxū rŭ yemaācū ĩnarūchūxūe űuxmata űaxtūanewa nangu. ¹² Rŭ yemagu ĩnarūchūxūewetaxū ga nagūxūraūxū ga naēxūgū, rŭ āxtapegū, rŭ werīgū. Rŭ yema naxchápenūūwa nayexma ta ga ſacū ga tama nangōxgūxū ga Yudiugū. ¹³ Rŭ Pedru nūxū naxīnū ga Tupanaga ga nūxū űaxū: —Pa Pedrux ĩnachi, rŭ ta imēx, rŭ nangōx! —űaxū. ¹⁴ Rŭ Pedru nanangāxū rŭ űanagūrū: —Taxucūrūwa nixī, Pa Corix, erū taguma chanangōx i ſacū i toxcēx āūāchixū —űanagūrū. ¹⁵ Rŭ yexguma ga yema Tupanaga, rŭ wenaxārū űanagūrū: —Ngēma choma chamexēēxū rŭ tama name i āūāchi nūxū cuwogū —űanagūrū. ¹⁶ Rŭ tomaēxpūxūcūna yemaācū nangupetū. Rŭ yexguma wenaxārū daxū nachūxnagū ga yema naxchápenūū namaā ga guxūma ga nawa yexmagūxū. ¹⁷ Rŭ poraācū nagu narūxīnū ga Pedru ga ſacūchiga na yīxū ga yema nūxū nadauxū ga yexguma nangoxetūgu. Rŭ yemagu ĩnaxīnūyane, rŭ guma ĩpataēxwa nangugū ga yema yatūgū ga Cornériu yēma mugūxū ga naxcēx ĩcaetanūxū ga Chimāūpata. ¹⁸ Rŭ

yéma naxcèx ínacagü rü aixcúma yexma nape ga wüxi ga yatü ga Chimáu ga Pedrugu äegaxü. ¹⁹ Rü Pedru nagu írúxínüyane ga yema nüxü nadauxü ga yexguma nangoxetügu, rü Tupanaäe i Üünexü rü ñanagürü nüxü: —Ngéägü nixi i tomaèxpüx i yatügü i cuxcèx daugüxü. ²⁰ —¡Inachi, rü írúxí, rü tama cux-oeagaäéäcúma nawe rüxü! Erü choma nixi i núma chanamugüxü —ñanagürü. ²¹ Rü yexguma naxcèx ínarüxi ga Pedru, rü ñanagürü nüxü ga yema yatügü: —Choma nixi i chauxcèx pedaugüxü. ¿Rü ñacüwa nuä pexi? —ñanagürü. ²² Rü nümagü nanangäxügü, rü ñanagürügü: —Capitáü ya Cornériuxütawa ne taxí rü núma nixi i nuä toxü namugüxü. Rü wüxi ya yatü ya mecü nixi, rü Tupanaxü nangechaü. Rü guxüma i Yudiügü nüxü nangechaü i númax. Rü wüxi ga Tupanaärü orearü ngeruü ga daxüçüax nanamu na cuxcèx toxü yacaxèxüçèx ga Cornériu rü napatawa cuxüxüçèx rü nüxü na naxínüxüçèx i curü ore —ñanagürügü. ²³ Rü yexguma nanachocuxèe ga Pedru, rü yexma nanapegüxèe ga yema chütaxügu. Rü moxüäcü inaxiächi rü nawe narüxü ga Pedru. Rü ínayaxümücügü ga ñuxre ga Yopecüax ga yaxögüxü. ²⁴ Rü moxüäcü Checharéawa nangugü ga ngextá Cornériu ínanguxèexüwa namaä ga guxüma ga natanüxügü rü namücügü ga nüxü nangechaügüxü ga nüxna naxuxü. ²⁵ Rü yexguma Cornériupatawa nanguxgu ga Pedru, rü íäxtüwa naxcèx naxü ga Cornériu, rü Pedrupèxegu nayacaxäpüxü, rü nüxü nicuèxüü. ²⁶ Natürü ga Pedru rü inanachixèe rü ñanagürü: —¡Nachi! Rü choma rü ta cuxrüü duüxümare chixi rü tama Tupana chixi —ñanagürü. ²⁷ Rü nügümaä yadexagüäcúma wüxigu nichocu. Rü Pedru yéma namaä inayarüxü ga muxüma ga duüxügü ga yexma ngutaquèxegüxü. ²⁸ Rü yexguma ga Pedru rü ñanagürü nüxü ga yema duüxügü ga yexma ngutaquèxegüxü: —Pema nüxü pecuèx i toma i Yudiügücèx rü nangèxma i torü mugü i toxna nachuxuxü na pemaä tangutaquèxegüxü, rü pepatagu na tachocuxü. Natürü Tupana choxü nangoxetüxèe rü choxü nüxü nadauxèe na tama namexü na ngémaäcü nagu na charüxínüxü pemaä. ²⁹ Rü ngèmacèx tama chaxoöcüma núma chaxü i ngèxguma chauxcèx pengemagu. Rü ñuxma rü chanaxwèxe i chomaä nüxü pixu na ñacüçèx chauxcèx pengemaxü —ñanagürü. ³⁰ Rü Cornériu nanangäxü, rü ñanagürü: —Marü ägümücü i ngunexü nangupetü ga ñuxgumaäcü ga tomaèxpüxarü oragu ga yáuanecü, rü nuä chopatawa chayümüxè erü guxügüma ngémaäcü chanaxü. Rü yexguma chayümüxègu rü changoxetü, rü chauxcèx nangox ga wüxi ga yatü ga iyaurachirucüxü. ³¹ —Rü ñanagürü choxü:

“Pa Cornériux, Tupana marü nüxü naxínü i curü yumüxè rü cumaä nataäe na ñuxäcü nüxü curüngüxèèxü i duüxügü i ñacü nüxü taxuxü. ³² —¡Rü Yopewa namugü i ñuxre i yatügü na naxcèx yacagüxüçèx i Chimáu i Pedrugu äegaxü! Rü to i Chimáu i naxchèxmüärü paxèewa puracüxüpatagu pexü. Rü yima napata rü taxtü i taxücutüwa nangèxma”, ñanagürü choxü. ³³ Rü yemacèx rü yexgumatama paxa cuxcèx yéma chanamugü, rü cuma rü mexü toxcèx cuxü erü núma cuxü. Rü ñuxma i guxäma i toma rü Tupanapèxewa tangèxmagü. Rü nüxü taxínüèchaü i guxüma i ngéma ore i Cori namaä núma cuxü muxü na tomaä nüxü quixuxüçèx —ñanagürü ga Cornériu.

Pedru rü Cornériupatawa nüxü nixu ga Ngechuchuchiga

³⁴ Rü yexguma inanaxügü ga Pedru ga na yadexaxü, rü ñanagürü: —Ñuxma waxi nixi i nüxü chacuáxü na Tupanacèx nawüxiguxü i guxüma i duüxügü erü núma rü aixcúma guxäxüma nangechaü. ³⁵ —Rü núma rü

wūxichigū i nachiūānēwa nanade i ngēma duūxūgū i nūxū ngechaūgūxū rū mexū ūgūxū. ³⁶—Rū nūma ga Tupana rū Yudiūgūtanūwaxīra nanamu ga norū ore rū marū nūxū nixu na tūxū nūxū nangechaūxū i tórū pecadugū i ngēxguma Cristu ya guxāārū Cori ixīcūaxū yaxōgūgu. ³⁷—Pema rū meāma nūxū pecuēu na ƭacū ngupetūxū ga guxūwama ga Yudiūgūarū naānēwa. Rū noxri ga Cuáu rū nūxū nixu na Tupana naxwēxēxū na ínabaiūxū ga duūxūgū. Rū yemawena ga Ngechuchu rū Garirēaanēwa inanaxūgū ga duūxūgūmaā nūxū na yaxuxū ga ore i mexū. ³⁸—Rū pema nūxū pecuēx ga ñuxācū Tupana na naporaxēēxū ga Ngechuchu ya Nacharētucūāx yerū nūxna nanaxā ga Naāe i Ūūnexū. Rū nūma ga Ngechuchu rū mexū naxū ga yema íyaxūgūxūdwa, rū nanameēxēē ga guxūma ga yema duūxūgū ga ngoxoāxgūxū. Rū yemaācū nanaxū yerū Tupana nūxū narūngūxēē. ³⁹—Rū toma nixī ga nūxū tadaugūxū rū nūxū tixuchigaxū i guxūma ga naxūxū ga Ngechuchu ga Yudeāanēwa rū Yerucharéūarū íānēwa. Rū yemawena rū nayamēxgū ga duruchawa nayapotagū. ⁴⁰—Natūrū ga Tupana rū tomaēxpūx ga ngunexū ngupetūgu rū wena nanamaxēē rū toxcēx nanangoxēē. ⁴¹—Natūrū tama guxū ga duūxūgūcēx nangox. Rū toxcēxicatama nangox ga toma ga ūpamama Tupana toxū dexe na nūxū tixuxūcēx i Ngechuchuchiga. Rū yexguma marū yuwa ínadaxguwena rū namaā tachibūe rū namaā taxaxegū. ⁴²—Rū nūmatama ga Ngechuchu toxū nimugū na duūxūgūmaā nūxū tixuxūcēx na Tupana marū āēxgacūxū yangucuchixēēxū na guxū i duūxūgūarū ngugūruū na yīxūcēx. Rū nūma ya Ngechuchu nixī i tórū maxūxū nangugūxū, rū nūma tá nixī i guxū i duūxūgū i maxēxū rū yuēxūxū yacagūxū naxcēx i norū maxūchiga. ⁴³—Rū ūpamamatama guxūma ga Tupanaārū orearū uruūgū rū Ngechuchuchiga nidexagū, rū ñanagūrūgū:
 “Rū nūma tá nūxū nūxū nangechaū i norū pecadugū i guxūma i duūxūgū i nūxū yaxōgūxū”,
 ñanagūrūgū.

Tupanaāe i Ūūnexū rū yema duūxūgū ga tama Yudiūgū ixīgūxūtanūwa nangu

⁴⁴ Rū yexguma íyadexayane ga Pedru, rū Tupanaāe i Ūūnexū nūxna nangu ga guxūma ga yema yēma írūxīnūēxū ga yema ore. ⁴⁵ Rū yema yaxōgūxū ga Yudiūgū ga Pedrumaā yēma íxū, rū poraācū nabaixāchiāēgū yerū Tupanaāe i Ūūnexū rū nūxna rū ta nangu ga yema duūxūgū ga tama Yudiūgū ixīgūxū. ⁴⁶ Rū nūxū naxīnūē ga to ga nagawachigū na yadexagūxū, rū Tupanaxū na yacuēxūūgūxū. ⁴⁷ Rū yexguma ga Pedru rū ñanagūrū: —¿Éxna nangēxmaxū i texē na nūxna nachuxuxū i na ínabaiūxū i ñāā duūxūgū i marū taxrūū Tupanaāe i Ūūnexū nūxna nguxū? —ñanagūrū. ⁴⁸ Rū nanamu na Ngechuchu ya Cristuégagu na ínabaiūxū ga yema duūxūgū ga yexwaca yaxōgūxū. Rū yexguma Pedruxū nacēēxūgū na yexma naxāūxūcēx ga ñuxre ga ngunexū.

11

Pedru rū Yerucharéūwa yexmagūxū ga yaxōgūxūmaā nūxū nixu ga ƭacū na ngupetūxū ga Checharéawa

¹ Rū yema ngūēxūgū ga Ngechuchu imugūxū rū yema yaxōgūxū ga Yudeāagūxū, rū nūxū nacuāchigagū na yema tama Yudiūgū ixīgūxū rū ta nayauxgūāxū ga Tupanaārū ore. ² Natūrū yexguma Yerucharéūwa nanguxgu ga Pedru, rū ñuxre ga Yudiūgū ga yaxōgūxū rū Pedruxū nixugūe. ³ Rū ñanagūrūgū: —¿Rū tūxcūū natanūwa cuxū i ngēma tama Yudiūgū ixīgūxū, rū

namaã cuchibũ? —ñanagŭrũgũ. ⁴ Rũ Pedru meãma namaã nũxũ nixu ga guxũma ga ãacũ na ngupetũxũ, rũ ñanagŭrũ nũxũ: ⁵ —Choma rũ Yopearũ ããnewa chayexma, rũ yexguma íchayumũxẽyane, rũ changoxetũ. Rũ nũxũ chadau ga wũxi ga naxchãpenũũrũũ íxĩxũ ga norũ ãgũmũcũpẽxewa ãtũxũxũ ga írũchũxũxũxũ ñũxmata chauxũtawa ngxũ. ⁶ —Rũ meãma nũxũ chadawenũ na nũxũ chadauxũcẽx na ãacũ yexmaxũ ga aixepewa. Rũ nũxũ chadau ga naxũnagũ ga íxãgũmũcũparaxũ rũ naẽxũgũ ga idũraexũ, rũ ãxtapegũ rũ werigũ. Rũ yema naxchãpenũũwa nayexma ta ga ãacũ ga tama ingõxũ, erũ taxcẽx i yixema i Yudĩugũ rũ naxãũãchi. ⁷ —Rũ nũxũ chaxĩnũ ta ga Tupanaga ga choxũ ñaxũ:

“¡Inachi! Pa Pedruz. ¡Rũ ta imèx, rũ nangõx!” ñaxũ. ⁸ —Natũrũ choma chanangãxũ, rũ ñacharũgũ:

“Taxucũrũwa nixĩ, Pa Corix, erũ taguma chanangõx i ãacũ i toxcẽx ãũãchixũ”, ñacharũgũ. ⁹ —Rũ yexguma wenaxãrũ ñanagŭrũ choxũ ga yema Tupanaga ga daxũwa inaxũxũ:

“Ngẽma choma i Tupana chamexẽẽxũ, rũ tama name i ãũãchi nũxũ cuwogũ”, ñanagŭrũ. ¹⁰ —Rũ tomaẽxpũxcũna yemaãcũ nangupetũ, rũ yexguma wenaxãrũ daxũ nachũxnagũ ga yema naxchãpenũũ namaã ga guxũma ga nawa yexmagũxũ. ¹¹ —Rũ yexgumatama guma í ga nawa chayexmanewa nangugũ ga tomaẽxpũx ga yatũgũ ga Checharẽawa ne mugũxũ ga chauxcẽx daugũxũ. ¹² —Rũ Tupanaãẽ i Ûũnexũ choxũ namu na nawe charũxũxũcẽx woo tama Yudĩugũ na yixĩgũxũ ga yema duũxũgũ. Rũ chomaã ta yema naxĩ ga ñãã 6 ga yaxõgũxũ. Rũ napatawa tangugũ ga guma yatũ ga Cornériu, rũ yexma tachocu. ¹³ —Rũ tomaã nũxũ nixu ga ñũxãcũ na napatawa nũxũ nadauxũ ga Tupanaãrũ orearũ ngerũũ ga daxũcũãx ga yexma chixũ ga ñaxũ nũxũ:

“¡Yopewa namugũ i yatũgũ na naxcẽx yacagũxũcẽx i Chimãũ i Pedrugu ãegaxũ! ¹⁴ —Rũ nũma tá cumaã nũxũ nixu na ñũxãcũ tá cuma rũ guxũ i cupatagugũxũmaã penayaxuxũ i perũ maxũ i taguma gũxũ”, ñanagŭrũ nũxũ. ¹⁵ —Rũ yexguma ichanaxũgũgu ga na chidexaxũ, rũ nũxna nangu ga Tupanaãẽ i Ûũnexũ, yexgumarũũ ga noxri tũxna nanguxgurũũ. ¹⁶ —Rũ yexguma ga choma rũ nũxna chacuẽxãchi ga Cori ya Ngechucharũ ore ga yexguma ñaxgu:

“Rũ aixcũma nixĩ ga Cuãũ ga dexãwamare ínabaiũxẽẽãxũ, natũrũ i pema rũ Tupanaãẽ i Ûũnexũ tá pexna nangu”, ñaxgu. ¹⁷ —Rũ pema nũxũ pecuèx na ñũxãcũ Tupana tũxna nanguxẽẽxũ ga Naãẽ i Ûũnexũ i yixema na Cori ya Ngechuchu ya Cristuaxũ yaxõgũxũ. Rũ ñũxma na taxrũũ Tupana yema duũxũgũna nanguxẽẽxũ ga Naãẽ i Ûũnexũ, ¿rũ ñũxũcũrũwa i choma i nũxũ chaxoxũ na naga chaxĩnũxũ ya Tupana? —ñanagŭrũ ga Pedru. ¹⁸ Rũ yexguma yema orexũ naxĩnũẽgu ga yema yaxõgũxũ ga Yerucharẽũcũãx, rũ nachianegũmare. Rũ Tupanaxũ nicuèxũũgũ. Rũ ñanagŭrũgũ: —Rũ ngẽmawa nũxũ tacuèx na Tupana tũxũ dexũ ya yixema woo tama Yudĩugũ íxĩgũxe. Rũ ngẽxguma nũxũ tarũxoegu i tũmaãrũ chixexũ rũ Tupanacẽx tadaugũgu, rũ nũma tũxna nanaxã i maxũ i taguma gũxũ —ñanagŭrũgũ.

Yaxõgũxũ ga Aũtioquíawa yexmagũxũchiga

¹⁹ Rũ yexguma Etẽbaũxũ yamèxgũguwena, rũ norũ uwanũgũ porãcũ nawe ningẽxũtanũ ga yema yaxõgũxũ. Rũ yemacẽx nũgũ nawoone. Rũ Penĩchiawa, rũ Chiprewa rũ Aũtioquíawa nabuxmũ. Rũ yema nũxũ nixugũe ga ore

ga mexŭ ga Ngechuchuchiga. Natŭrŭ Yudiŭgŭmaãxŭcatama nŭxŭ nixugŭe ga yema ore rŭ tama ga togŭmaã. ²⁰ Natŭrŭ yema Aŭtioquiawa nangugŭ ta ga űuxre ga togŭ ga yaxŭgŭxŭ ga Chŭperecŭãx, rŭ Chire necŭãx. Rŭ nŭmagŭ rŭ yema tama Yudiŭgŭ ixŭgŭxŭmaã rŭ ta nŭxŭ nixugŭe ga ore i mexŭ i Cori ya Ngechuchuchiga. ²¹ Rŭ Tupana nŭxŭ narŭngŭxŭe, rŭ nanaporaexŭe. Rŭ yemacŭx muxŭma ga yema duŭxŭgŭ rŭ nŭxŭ narŭxoe ga nŭxcŭmaŭxŭ ga nacŭmagŭ, rŭ Cori ya Ngechuchaxŭ nayaxŭgŭ. ²² Rŭ yexguma yemaxŭ nacuáchigagŭgu ga yema yaxŭgŭxŭ ga Yerucharéŭwa yexmagŭxŭ, rŭ Aŭtioquiawa nanamugŭ ga Bernabé. ²³ Rŭ yexguma yema nangugŭ ga Bernabé, rŭ nŭxŭ nadau ga űuxácŭ Tupana nŭxŭ na rŭngŭxŭeŭxŭ ga yema yaxŭgŭxŭ ga Aŭtioquiácŭãx, rŭ poraácŭ namaã nataãe. Rŭ nayaxucŭxŭgŭ ga guxŭma na meãma Cori ya Ngechuchuwe naxŭmaxŭcŭc, rŭ taguma nŭxŭ naxoexŭcŭc. ²⁴ Yerŭ nŭma ga Bernabé rŭ wŭxi ga yatŭ ga mecŭ nixŭ. Rŭ aixcŭma Tupanaãe i űŭnexŭ rŭ nawa nayexma, rŭ napora ga norŭ ōwa. Rŭ yemacŭx muxŭchixŭma ga duŭxŭgŭ rŭ Cori ya Ngechuchucŭx naxŭ rŭ nŭxŭ nayaxŭgŭ. ²⁵ Rŭ yemawena ga Bernabé rŭ Tarsuwa naxŭ na Chaurucŭx yadauxŭcŭc. ²⁶ Rŭ yexguma nŭxŭ iyangauxgu, rŭ Aŭtioquiawa nanaga. Rŭ wŭxi ga tauncŭ wŭxiwa yema nayexmagŭ namaã ga yema yaxŭgŭxŭ. Rŭ nanangŭexŭe ga muxŭchixŭma ga duŭxŭgŭ. Rŭ Aŭtioquiawa nixŭ ga inaxŭgŭxŭ ga duŭxŭgŭ na Cristutanŭxŭmaã na naxugŭãxŭ ga yema yaxŭgŭxŭ. ²⁷ Rŭ yexgumaŭcŭŭ Yerucharéŭwa ne naxŭ ga űuxre ga Tupanaãrŭ orearŭ uruŭgŭ rŭ Aŭtioquiawa naxŭ. ²⁸ Rŭ natanŭwa nayexma ga wŭxi ga orearŭ uruŭ ga Agabu ga naega. Rŭ nanangutaquŭexŭe ga yema yaxŭgŭxŭ ga Aŭtioquiawa yexmagŭxŭ. Rŭ yema ngutaquŭexewa rŭ inachi ga Agabu rŭ Tupanaãe i űŭnexŭ nanamu ga na yadexaxŭ, rŭ űanagŭrŭ: — Wŭxi i taiya i taxŭ tá íngu i guxŭ i űaã nachŭãnewa —űanagŭrŭ. Rŭ aixcŭma íngu ga yema taiya ga yexguma Caudiu ãxgacŭ ixŭxgu. ²⁹ Rŭ yexguma ga yema yaxŭgŭxŭ ga Aŭtioquiawa yexmagŭxŭ, rŭ marŭ wŭxigu nagu narŭxŭnŭe na yema ngŭxŭ namugŭxŭcŭc ga dŭeru na nŭxŭ nangŭxŭeŭgŭxŭcŭc ga yema yaxŭgŭxŭ ga Yudeaanegu áchŭŭgŭxŭ. Rŭ wŭxichigŭ ngŭxŭ inaxŭ ga dŭeru yexgumarŭŭ ga űuxre ga nŭxŭ yemacŭ. ³⁰ Rŭ yemaãcŭ nanaxŭgŭ, rŭ Bernabé rŭ Chaurumaã yema ngŭxŭ namugŭ ga yema dŭeru naxcŭc ga yema yaxŭgŭxŭãrŭ ãxgacŭgŭ ga Yudeanewa yexmagŭxŭ.

12

Ãxgacŭ ga Erobe rŭ Chaŭtiáguxŭ nimèx rŭ Pedruxŭ napoxcu

¹ Rŭ yexgumaŭcŭŭ inanaxŭgŭ ga ãxgacŭ ga Erobe ga na ínayauxŭãxŭ ga űuxre ga yaxŭgŭxŭ ga Yerucharéŭcŭãx na napoxcuexŭcŭc. ² Rŭ norŭ churaragŭxŭ namu na taramaã Chaŭtiágŭ ga Cuáŭŭeŭxŭ yamèxgŭxŭcŭc. ³ Rŭ yexguma nŭxŭ nadèuxgu ga Erobe ga norŭ me na yŭxŭ ga Yudiŭgŭ ga yema na naxŭxŭ, rŭ norŭ churaragŭxŭ namu na Pedruxŭ rŭ ta yayauxgŭxŭcŭc. Rŭ yema nangupetŭ ga Yudiŭgŭarŭ peta ga űpetŭchigagu ga yexguma pãŭ ga ngearŭ puxŭeŭrŭãxŭ nangŭxŭgŭ. ⁴ Rŭ yexguma Pedruxŭ yayauxgŭgu, rŭ poxcupataŭgu nayatŭxcuchi. Rŭ űuxŭchi ga Erobe rŭ nanamu ga ágŭmŭcŭtŭcumŭ ga norŭ churaragŭ na nŭxna nadaugŭxŭcŭc. Rŭ wŭxitŭcumŭwachigŭ rŭ nayexma ga ágŭmŭcŭ ga churaragŭ. Rŭ yemaãcŭ nanaxŭ ga Erobe, yerŭ nagu narŭxŭnŭ ga yema petawena guxŭ ga

duūxūgūpēxewa na nagaāxūcēx na yamēxgūāxūcēx. ⁵ Rū yemaācū ga Pedru rū poxcupataūwa nayexma rū churaragū rū meāma nūxna nadaugū. Natūrū ga yema yaxōgūxū ga Yerucharéūcūāx rū poraācū nayumūxēgū, rū Tupanana naxcēx nacagū.

Tupana rū Pedruxū īnanguxuchixēē ga poxcupataūwa

⁶ Rū yematama ga chūtaxūgu naxūpa ga yema ngunexū ga Erode duūxūgūpēxewa nagaxchaūxū, rū taxre ga churaragūarū ngāxūwa nape ga Pedru. Rū taxre ga cadenamaā ninēixgūchacūū. Rū togū ga churaragū ga dauxūtaexū nūxna nadaugū ga poxcupataūārū īāx. ⁷ Rū ngūrūāchi yema poxcupataūwa nangox ga wūxi ga orearū ngeruū ga daxūcūāx ga Coriarū. Rū poraācū nangōone ga guma poxcupataūwa. Rū yema orearū ngeruū Pedruxū nacūxagū, rū nanabaixāchixēē. Rū űanagūrū: —jPaxama Íruda! — űanagūrū. Rū yexgumatama īniwēgū ga guma cadena ga Pedru namaā īnēixgūchacūūcū. ⁸ Rū Pedruxū űanagūrū ga yema orearū ngeruū: —jRū icūxcuchichiru rū nacuaixcu i curū chapatu! — űanagūrū. Rū yemaācū nanaxū ga Pedru. Rū űanagūrū ta: —jRū icūxcuchi i curū gāuxūchiru, rū chowe rūxū! — űanagūrū. ⁹ Rū nawe narūxū ga Pedru. Rū tama nūxū nacūxē ga aixcūma na yīxū ga yema orearū ngeruū namaā ūxū. Rū naxcēx rū nangoxetūmare. ¹⁰ Rū nūxū nachopetū ga nūxīraūxū ga dauxūtaexū, rū űūxūchi ga yema to ga dauxūtaexū. Rū yexguma nawa nangugūga ga yema īāx ga áchumenēānaxcēx ga ítamūwaama ūxū, rū nūēchama niwāxna. Rū īnachoxū. Rū yexguma marū wūxi ga ítamū inaxīxgu, rū nūxna inayarūtaxu ga yema orearū ngeruū. ¹¹ Rū yexguma nūxū nicūēxāchi ga Pedru, rū nūgūmaā űanagūrū: —űuxma waxi i nūxū chacuāxū na aixcūma Cori ya Tupana nūma namuxū i norū orearū ngeruū na Erodemēxēwa choxū napuxū, rū nawa choxū īnanguxuchixēēxū i guxūma i ngēma chomaā naxūgūchaūxū i ngēma Yudiūgu i tama yaxōgūxū — űanagūrū. ¹² Rū yexguma yemaāxū yacūēxāchigu ga Pedru, rū ngīpatawa naxū ga wūxi ga ngecū ga Mariagu āegacū. Rū ngīma iyixī ga Cuāū Marcu naē. Rū yēma nangutaquēxegū ga muxūma ga duūxūgū ga yēma yumūxēgūxū. ¹³ Rū īāxtūarū poxeguxūārū īāxwa, rū: —Tu tu tu — űanagūrū ga Pedru. Rū wūxi ga pacū ga Rode ga ngīega īiyadau. ¹⁴ Rū yexguma nagawa nūxū nacūēxgu ga na Pedru yīxū, rū ngūrū taāēmaā rū īiyaűamare na nūxū yanaxūxū ga na Pedru yīxū ga īāxtūarū īāxgu chicū. Rū tama iyawāxna ga īāx. ¹⁵ Rū yema yexmagūxū rū: —Cungēāēmare — űanagūrūgū ngīxū. Natūrū ngīma rū: —Aixcūma nixī — ngīgūrūgū. Rū yexguma űanagūrūgū: —Maneca tama nūma nixī. Rū norū dauruū i daxūcūāxmare nixī — űanagūrūgū. ¹⁶ Natūrū ga Pedru rū yoxni īāxwa: —Tu tu tu — űanagūrūama. Rū yexguma naxcē x yawāxnaāgu rū nūxū nadaugūga ga Pedru na yīxū, rū nabaixāchiāēgū. ¹⁷ Natūrū nūma naxunagūmēxē, rū naxmēxmaā nayanachianexēēgū. Rū namaā nūxū nixu na űuxācū Cori īnanguxuchixēēxū ga poxcupataūwa. Rū űanagūrū ta: — jChaūtiāgumaā rū ngēma togū i yaxōgūxūmaā nūxū pixu i ngēma ore! — űanagūrū. Rū yexguma inaxūāchi, rū toxnamana naxū. ¹⁸ Rū yexguma yangunegu, rū yema churaragū ga poxcupataūwa dauxūtaegūxū rū poraācū nanaxīxāchiāēgū yerū tama nūxū nacūēxgū ga űacu na ngupetūxū namaā ga Pedru. ¹⁹ Rū yemacēx ga Erode rū yema churaragūxū namu na Pedrucēx yadaugūxūcēx. Rū yexguma taxuxūma iyangaugūgu, rū Erode rū yema churaragūgutama nananguxēē na nayuexūcēx. Rū yemawena ga Erode rū inaxūxū ga Yudeaanewa, rū Checharēagu nayaxāchiū.

Nayu ga Erode

²⁰ Rū Erode rū namaã nanu ga Tirucūãxgŭ rū Chi-dãucūãxgŭ. Natürŭ ga yema Tirucūãxgŭ rū Chidãucūãxgŭ rū naxcèx nadaugŭ na ñuxãcŭ Erodexŭ nangŭxmŭxèëgŭxŭ, yerŭ Erodechŭñãnewa nixŭ ga nayauxgŭãxŭ ga nabŭ. Rū yemacèx wŭxi ga Erodearŭ duŭxŭ ga ãëxgacŭ ga Batumaã naxãmŭcŭgŭ na nŭxŭ nangŭxèëxŭcèx na Erodemaã yadexagŭxŭcèx. ²¹ Rū Erode rū namaã inaxuneta ga wŭxi ga ngunexŭ na namaã yadexaxŭcèx. Rū yexguma yema ngunexŭ ga nagu inaxunetaxŭwa nanguxgŭ, rū yema Tirucūãx rū Chidãucūãx rū Erodexŭtawa nangugŭ. Rū nicŭxcuchi ga Erode ga norŭ ãëxgacŭchiru, rū norŭ tochicaxŭwa narŭto, rū duŭxŭgŭmaã nŭxŭ nixu ga norŭ ore. ²² Rū yexguma ga guxŭma ga yema duŭxŭgŭ rū tagaãcŭ ñanagŭrŭgŭ: —Ñãã ãëxgacŭ rū tama duŭxŭãrŭ dexarŭñ nixŭ i norŭ dexa, natürŭ ñoma Tupanaãrŭ dexarŭñ nixŭ —ñanagŭrŭgŭ. ²³ Rū Erode rū yema duŭxŭgŭarŭ oremaã nataãë, rū tama Tupanaxŭ nicuèxŭñchaŭ ga ñuxãcŭ Tupana nŭxŭ narŭngŭxèëxŭ. Rū yemacèx wŭxi ga Tupanaãrŭ orearŭ ngeruŭ ga daxŭcŭãx rū yexgumatama Erodexŭ niãaawexèë. Rū õxmigŭ nanangŭx, rū yemamaã nayu. ²⁴ Natürŭ yema yaxŭgŭxŭ rū yexeraãcŭ guxŭwama nŭxŭ nixugŭe ga Cori ga Tupanaãrŭ ore. Rū muxŭchixŭ ga duŭxŭgŭ nŭxŭ nayaxŭgŭ. ²⁵ Rū yexguma marŭ yanguxèëãgu ga norŭ puracŭ ga Chauru rū Bernabé, rū Ínachoŭŭ ga Yerucharéŭwa, rū wenaxãrŭ Aŭtioquiacèx nawoegu. Rū nayagagŭ ga Cuáŭ Marcu.

13*Bernabé rū Chauru rū inanaxŭgŭe ga to ga nachŭñãnewa na nangegŭãxŭ ga Tupanaãrŭ ore*

¹ Rū yema yaxŭgŭxŭ ga Aŭtioquãwa yexmagŭxŭtanŭwa rū nayexma ga ñuxre ga yatŭgŭ ga Tupanaãrŭ orearŭ uruŭgŭ, rū ñuxre ga yatŭgŭ ga Tupanaãrŭ orewa nguxèëtaegŭxŭ. Rū yematanŭwa nayexma ga Bernabé, rū Chimáŭ ga Waxwegu ãegaxŭ, rū Dúchiu ga Chirenecŭãx, rū Manaë ga wŭxigu ãëxgacŭ ga Erodemaã yaexŭ, rū Chauru. ² Rū wŭxi ga ngunexŭ ga yexguma Coricèx ínangutaquèxegŭgu rū tama nachibŭeãcŭma Ínayumŭxègŭguyane, rū Tupanaãë i Ũñexŭ rū ñanagŭrŭ nŭxŭ: —¡Choxna penamugŭ i Chauru rū Bernabé na naxŭgŭãxŭcèx i ngèma puracŭ i choma nawa chanamugŭchaŭxŭ! —ñanagŭrŭ. ³ Rū yexguma nŭxŭ nachauegu ga tama nachibŭeãcŭma na nayumŭxègŭxŭ, rū Chauru rū Bernabééŭgu naxŭmèxgŭ ga yema yaxŭgŭxŭ, rū ñuxŭchi inanamuãchitanŭ na naxŭgŭãxŭcèx ga Tupanaãrŭ puracŭ.

Chiprewa naxŭ ga Bernabé rū Chauru

⁴⁻⁵ Rū Tupanaãë i Ũñexŭ rū inanamuãchitanŭ ga Bernabé rū Chauru. Rū ñãne ga Cheúchiawa naxŭ, rū gumaãrŭ türewa inaxŭãchi, rū capaxŭ ga Chiprewa naxŭ. Rū Cuáŭ Marcu nawe narŭxŭ na nŭxŭ nangŭxèëxŭcèx. Rū yexguma Charamína ga ñãneãrŭ türewa nangugŭgu, rū inanaxŭgŭe ga nŭxŭ na yaxugŭxŭ ga Tupanaãrŭ ore ga Yudiŭgŭarŭ ngutaquèxepataŭgŭwa. ⁶ Rū guxŭgu nixŭãgŭtanŭ ga yema capaxŭwa ñuxmata Papu ga ñãnewa nangugŭ. Rū yema namaã inayarŭxŭ ga wŭxi ga Yudiŭ ga yuŭxŭ ga Barechúgu ãegaxŭ. Rū nŭma rū wŭxi ga idoratèxãxŭ nixŭ yerŭ nügŭ yaxuxgŭ rū aixcŭma Tupanaãrŭ orearŭ uruŭ nixŭ. ⁷ Rū nayexma ga yema capaxŭãrŭ ãëxgacŭ ga Chérquiu Paurugu ãegaxŭ. Rū nŭma nixŭ ga wŭxi ga yatŭ ga meã naãèxŭ cuácŭ. Rū yema yuŭxŭ rū guma ãëxgacŭarŭ ngŭxèëruŭ nixŭ.

Rü nüma ga ãëxgacü rü norü duüxügüxü namu na Chauru rü Bernabécëx yacagüxücëx, yerü nüxü naxínüchaü ga Tupanaärü ore. ⁸ Natürü yema yuüxü ga Griëgugawa Erimínugu äëgaxü, rü Chauru rü Bernabéna nayanuxü na Tupanaärü orexü yaxugüxü. Yerü tama nanaxwèxe na yaxõõxü ga guma ãëxgacü. ⁹⁻¹⁰ Natürü ga Chauru ga Paurugu ta äëgaxü, rü aixcüma Tupanaãë i Üünexü nawa nayexma. Rü nüma ga Pauru rü meäma nüxü nadawenü ga yema yuüxü, rü ñanagürü nüxü: —Pa Idoatëxáxü Pa ngoxo Nanex, cuma rü chixexüxicatama cuxüxchaü, rü naxchi cuxai i guxüma i mexü. ¿Ñuxgura tá ta i nüxü curüxoxü na ícuyatóxëxü i Cori ya Tupanaärü ore i aixcüma ixíxü? ¹¹ —Ñuxmatátama cuxü napoxcu ya Cori ya Tupana. Rü tá cungexetü, rü ñuxre i ngunexügu rü táütama nüxü cudau ya üëxcü —ñanagürü. Rü yexgumatama naxcëx naxëänexüchi ga yema yuüxü, rü naxmëxmaã nadaugü na texë naxmëxgu yayauxächixücëx rü namaã ítixüxücëx. ¹² Rü yexguma yemaxü nadëuxgu ga yema capaxüärü ãëxgacü rü nayaxõ ga Tupanaärü ore, yerü namaã nabaixächiiãë ga yema Pauru rü Bernabé nüxü nguxëëxü ga Cori ya Tupanachiga.

Pauru rü Bernabé rü Pichídiaanewa yexmane ga ñãne ga Aütioquíawa nangugü

¹³ Rü Papuwa inaxíachi ga Pauru namücügümaã rü nixáü ga taxtü ga taxüwa. Rü Pérupe ga ñãnewa nangugü ga Paüpiriaanewa. Natürü yema nüxna naxo ga Cuáü Marcu, rü Yerucharéücëx nataegu. ¹⁴ Rü Pérupewa inaxíachi ga Pauru rü Bernabé rü ñãne ga Aütioquíawa nangugü ga Pichídiaanewa. Rü yéma rü ngüxchigaarü ngunexügu rü Yudíugüarü ngutaquëxepatáügu nachocu, rü yéma narütogü natanüwa ga yema íngutaquëxegüxü. ¹⁵ Rü yema ngutaquëxewa rü nüxü nadaumatügu ga Tupanaärü mugü ga Moíché úmatüxü rü yema ore ga Tupanaärü orearü uruügu úmatüxü. Rü yemawena, rü guma ngutaquëxepatáüärü ãëxgacügü, rü Bernabé rü Pauruna nacagü, rü ñanagürügü: —Pa Toeneëgüx, ngëxguma pexü nangëxmagu i perü ore i taãëëëruü i toxcëx rü marü name i ñuxma tomaã nüxü pixu —ñanagürügü. ¹⁶ Rü yexguma inachi ga Pauru, rü naxunagümëxë na iyanachianexücëx ga duüxügü. Rü yexguma duüxügümaã nidexa, rü ñanagürü: —Pa Duüxügü Pa Chautanüxügüx rü Guxáma i Pema i To i Nachiüãnecüãx Ixígüxex ya Tupanaxü Ngechaügüxe, rü jiperüxíñüë! ¹⁷ —Yima törü Tupana i yixema i Yudíugü, rü tüxü nade ga nuxcümatügüxe ga törü oxigü na tüxü nangüxëëxücëx. Rü poraãcü tüxü nimuxëë ga yexguma woo to ga nachiüãne ga Equituanewa tayexmagügu. Rü yemaãcü wüxi ga taxü ga nachiüãne tüxü nixígüxëë. Rü ñuxüchi yemawena, rü norü poramaã tüxü ínagaxü ga yema naãnewa. ¹⁸ —Rü dauxchitawa ga ngextá taxüema íxãpataxüwa tüxü nagagü. Rü yéma 40 ga taunecü Tupana yaxna tûmamaã naxínü ga guxema törü oxigü. ¹⁹ —Rü Tupana nanadai ga yema 7 ga ãëxgacügü ga Canaããnecüãxgü guxüma ga norü duüxügümaãchigü. Rü yemaãcü nanaxü na törü oxigüna naxããxücëx ga yema naãne na tûmaärügüxüchi yííxücëx. ²⁰ —Rü 450 ga taunecü rü yemaãcü tüxü narüngüxëë. Rü yemawena rü tüxna nanamu ga togü ga ãëxgacügü ga daruügu ñuxmata Tupanaärü orearü uruü ga Chamue ingucuchix. ²¹ —Rü yexguma ga duüxügü rü Tupanana naxcëx nacagü ga wüxi ga ãëxgacü ga rei na namaã inacuíxücëx. Rü Tupana rü nüxna nanamu ga Chau ga Chiche nane ga Beyamítaa ixícü. Rü nüma nüxna nadau ga duüxügü ga 40 ga taunecügu. ²² Rü yemawena ga Tupana rü

inanatèxuchi ga Chaú, rü Dabíxü naxuneta na guma norü ãëxgacü yíxüçèx. Rü Dabíxü nixuchiga ga Tupana, rü ñanagürü:

“Nüxü chadau rü Dabí ya Ichaí nane rü wüxi ya yatü ya poraãcü choxü ngúchaücü nixí. Rü nüma tá nanaxü i guxüma i ngëma choma chanaxwèxexü”,

ñanagürü ga Tupana. ²³ Rü nuxcüma ga Tupana rü marü inaxuneta rü wüxi i Dabítaa tá nixí i Cristu ixíxü, rü tá nanamaxèxèë i Yudiügü. Rü Ngechuchu nixí ga guma maxèxèëruü ga tórü oxigümaã nüxü yaxucü ga Tupana. ²⁴ Natürü naxüpa ga Ngechuchu na ínguxü, rü Cuáü ga baiüxèëruü rü guxüma ga Yudiügümaã nüxü nixuchiga ga ore i mexü rü ñanagürü:

“Rü name nixí i nüxü perüxoe i pecüma i chixexü, rü Tupanacèx pedaugü, rü ípebaiü”, ñanagürü. ²⁵ Rü yexguma marü yangaícaxgu ga tá na nayuxü ga Cuáü, rü ñanagürü:

“Rü tama choma nixí i ngëma pema nagu perüxínüëxü i Cristu chíxü. Natürü chowema ne naxü i nüma ya aixcüma Cristu ixícü. Rü choma rü napèxewa taxuwama chame, rü bai i norü chapatucunüärü wëgüwaxüra chame erü nüma rü wüxi i ãëxgacü i tacüxüchima nixí”, ñanagürü ga Cuáü.

²⁶ Rü ñanagürü ga Pauru, —Pa Chautanüxügü i Abráütaagüx, rü Guxāma i Pema i To i Nachiüñanecüäx i Tupanaxü Ngechaügüxex, rü pexcèx nixí i ñaa ore i tüxü maxèxèëxü. ²⁷ —Rü aixcüma yema Yerucharéüçüäxgü ga duüxügü rü yema norü ãëxgacügü rü tama nüxü nacüëxgü ga Tupana Nane na yíxü ga Ngechuchu. Rü tama meã nüxü nacüëxgü ga tacüchiga na yíxü ga yema ore ga nuxcümaügüxü ga Tupanaärü orearü uruügü ümatüxü i ñuxma perü ngutaquèxepataüwa nüxü pedamatügüxü i wüxichigü i ngüxchigaarü ngunexügu. Rü yemaãcü nümagütama ga yema duüxügü ga Ngechuchxü imëxgüxü rü yexguma yamëxgüägu rü nayanguxèë ga yema ore ga nuxcüma ümatüxü. ²⁸ —Rü woo taxuüma ga tacü ga chixexü nawa inayangaugü na nayuxèëäxüçèx, natürü Piratuna naxcèx nacagü na yamaãxüçèx. ²⁹ —Rü níngu ga guxüma ga yema ore ga Tupanaärü orearü uruügü ümatüxü ga Ngechuchuchiga ga ñuxäcü tá na nayuxü. Rü yemawena rü nanayauxgü ga naxüne ga curuchawa, rü wüxi ga naxmaxügu nayanaxücuchigü. ³⁰ —Natürü ga Tupana rü wena nanamaxèë ga woo marü na nayuxü. ³¹ —Rü nüma ga Ngechuchu rü muxüma ga ngunexü naxcèx nangox ga yema duüxügü ga nawe rüxíxü ga yexguma Gariréaanewa ne naxüxgu rü Yerucharéüwa naxüxgu. Rü ngëma duüxügü nixí i ñuxma i guxü i duüxügümaã nüxü ixugüxü i nachiga. ³²⁻³³ Rü ngëmaãcü i toma rü nüma tangugü na pemaã nüxü tixuxüçèx i ngëma ore i aixcüma mexü. Rü dücax, rü yema uneta ga nuxcümaügüxü ga tórü oxigümaã nüxü yaxuxü ga Tupana, rü taxcèx nayanguxèë ga yexguma Ngechuchuxü wena namaxèëgu. Rü wiyaegüpanewa i norü taxre i capíturuwa rü ngëmachiga nüxü nixu i ngëxguma:

“Cuma nixí i Chaune, rü choma nixí i Cunatü chíxü”, ñaxgu. ³⁴ —Rü Tupana rü nuxcüma rü marü nüxü nixu ga wena tá na namaxèëäxü ga Ngechuchu na tama yayixixüçèx ga naxüne. Rü norü orewa rü ñanagürü:

“Rü choma tá pexcèx chayanguxèë ga yema unetagü i üünegüxü i aixcüma ixígüxü ga nuxcüma Dabímaã nüxü chixuxü”,

ñanagürü. ³⁵ —Rü ngëmácèx toxnamana i Tupanaärü orewa rü ñanagürü ta:

“Tama cunaxwèxe na yayixixü i naxüne ya Cune ya üünecü,”

ñanagürü. ³⁶ —Rü yexguma namaüxgu ga Dabí, rü nüxü narüngüxèë ga norü duüxügü, yexgumarüü ga ñuxäcü Tupana namuxü. Natürü ñuxüchi

nayu, rü nanatü rü naëxüttagu natèx ga naxüne, rü niyixi. ³⁷ —Natürü guma Tupana wena namaxëëcü ga Ngechuchu rü tama niyixi ga naxüne. ³⁸ —Rü ñuxmax, Pa Chaueneëgüx, rü chanaxwèxe i nüxü pecuèx rü yimatama Ngechuchugagu Tupana tüxü nüxü nangechaü i törü pecadügü ngëxgumarüü i pemaã nüxü tixuxürüü. ³⁹ —Rü ñuxma ya guxäma ya yixema nüxü yaxögüxe, rü Ngechuchugagu Tupana tüxü nüxü nangechaü i guxüma ga yema pecadügü ga noxri taxucürüwa tüxü nüxü nangechaüxü ga yexguma nagu taxixgu ga yema mugü ga Moïché ümatüxü. ⁴⁰ —Rü pexuäëgü na tama pegu nanguxücèx i ngëma poxcu i Tupanaärü orearü uruügü nüxü ixuchigaxü ga yexguma ñagügu:

⁴¹ “Rü dücax, Pa Duüxgü i Tupanaärü Orexü Cugüexüx, rü tá peñaixächie rü tá peyue erü pema pemaxëyane rü tá chanaxü i tacü i taxü. Rü pema rü täütäma peyaxögü i woo texé pemaã nüxü ixuxgu”, ñanagürü. Rü yexma nayacuèxëë ga Pauru ga norü ore. ⁴² Rü yexguma guma ngutaquëxepataüwa ínachoxügu ga Pauru rü namücügü, rü yema duüxügü ga tama Yudiügü ixigüxü rü nüxü nacèèxüügü na to ga ngüxchigaarü ngunexügu rü wenaxärü yematama orexü namaã yaxuxücèx. ⁴³ Rü yexguma marü nüxü nachauegu ga na nangutaquëxegüxü, rü Pauru rü Bernabéwe narüxi ga muxüma ga Yudiügü rü müxüma ga togü ga duüxügü ga tama Yudiügü ixigüxü natürü Yudiügürüü yaxögüxü. Rü Pauru rü Bernabé rü namaã nidexagü rü nayaxucuxëgü na guxüguma nagu naxinüëëchaxücèx ga ñuxäcü Tupana nüxü ngechaüäcüma na nadexü. ⁴⁴ Rü yema to ga ngüxchigaarü ngunexügu, rü wixgutaèx guxüma ga yema ñäneçüäx nangutaquëxegü na inaxinüëxücèx ga Tupanaärü ore. ⁴⁵ Natürü nayexma ga ñuxre ga Yudiügü ga tama ngutaquëxegu chocuxü. Rü yexguma nüxü nadaugügu ga na namuxüchixü ga duüxügü ga Paurucèx ngutaquëxegüxü rü poraäcü nixäüxächie. Rü inanaxügüe ga na Pauruxü nachoxügagüxü rü namaã naguxchigagüxü. ⁴⁶ Natürü ga Pauru rü Bernabé rü tama namuëëäcüma yema Yudiügüxü nangäxügü, rü ñanagürügü: —Tupana nanaxwèxe na pemaãxira nüxü tixuxü i norü ore. Natürü ñuxma na nüxü pexoexü i ngëma ore rü tama na penayauxgüchaüxü i maxü i taguma gúxü, rü ngëmacèx i ñuxmax i toma rü tá ngëma tama Yudiügü ixigüxütanüwa taxí. ⁴⁷ —Yerü yemaäcü toxü namu ga Cori, rü ñanagürü:

“Duüxügü i tama Yudiügü ixigüxüärü ngóonexëëruü marü cuxü chixixëë, na guxüwama i ñoma i naänewa cunangexücèx i chorü ore i maxëxëëruü”, ñanagürü. ⁴⁸ Rü yexguma yema orexü naxinüëgu ga yema duüxügü ga tama Yudiügü ixigüxü, rü nataäëgü rü ñanagürügü: —Rü namexëchi nixí i ñaã Cori ya Tupanaärü ore —ñanagürügü. Rü nayaxögü ga guxüma ga yema duüxügü ga Tupana marü nüxü unetaxü na nayauxgüäxücèx i maxü i taguma gúxü. ⁴⁹ Rü yemaäcü guxüwama ga yema naänewa nanguchigü ga Cori ya Tupanaärü ore. ⁵⁰ Natürü yema Yudiügü ga tama Ngechuchuaxü yaxögüchaüxü, rü chixexümaã nayaxucuxëgü ga ñuxre ga ngexügü ga mexügü ga Tupanaxü ngechaügüxü rü guma ñäneärü äëxgacügü na Pauru rü Bernabéxü ínawoxüxücèx. Rü yemacèx ínawoxü ga yema naänewa. ⁵¹ Rü yexguma ga Pauru rü Bernabé rü inapagücutü ga norü üxaxücutü na yemawa nüxü yacuèxächitanüxücèx ga norü chixexü ga yema ñäneçüäxgü ga duüxügü. Rü ñuxüchi ga Pauru rü Bernabé rü ñäne ga Icíniüwa naxí. ⁵² Natürü yema yaxögüxü ga guma ñäne ga nawa ínachoxünewa yexmagüxü rü poraäcü Tupanamaã nataäëgü, rü Naäe i Üünexü rü aixcüma nawa nayexma.

14

Pauru rŭ Bernabé rŭ ĩāne ga Ićúniŭwa nayexmagŭ

¹ Rŭ Ićúniŭwa rŭ wŭxigu Yudiŭgŭarŭ ngutaquēxepataŭgu nachocu ga Pauru rŭ Bernabé. Rŭ meāma nŭxŭ nixuchiga ga Tupanaārŭ ore rŭ yemaācŭ nayaxōgŭ ga muxŭma ga duŭxŭgŭ ga Yudiŭgŭ rŭ yema tama Yudiŭgŭ ixīgŭxŭ rŭ ta. ² Natŭrŭ yema Yudiŭgŭ ga tama Ngechuchuaxŭ yaxōgŭxŭ, rŭ chixexŭmaā nayaxucxēgŭ ga yema tama Yudiŭgŭ ixīgŭxŭ na yema yaxōgŭxŭchi naxaieŭcēx. ³ Rŭ yemacēx muxŭma ga ngunexŭ yexma narŭcho ga Pauru rŭ Bernabé, rŭ tama namuŭēācŭma nŭxŭ nixuchiga ga Cori ya Tupanaārŭ ore. Rŭ yema duŭxŭgŭmaā nŭxŭ nixu na űuxācŭ Tupana poraācŭ tŭxŭ nangechaŭxŭ. Rŭ nŭma ga Cori rŭ yema duŭxŭgŭxŭ nŭxŭ nadauxēē na namaā nataāēxŭ ga yema ore. Rŭ yemacēx Pauru rŭ Bernabéxŭ narŭngŭxēē na inawēxgŭāxŭcēx ga cuēxruŭgŭ rŭ na naxŭgŭāxŭcēx ga mexŭgŭ ga Tupanaārŭ poramaā naxŭgŭxŭ. ⁴ Natŭrŭ ga guma ĩāneŭāx ga duŭxŭgŭ rŭ nitoye. Rŭ nŭmaxŭ rŭ yema Yudiŭgŭwaama naxŭgŭ rŭ togŭ rŭ Pauru rŭ Bernabéwaama naxŭgŭ. ⁵ Rŭ yexguma ga yema Yudiŭgŭ, rŭ yema duŭxŭgŭ ga tama Yudiŭgŭ ixīgŭxŭ, rŭ guma ĩāneārŭ āēxgacŭgŭmaā wŭxigu nagu narŭxŭnŭē na Pauruxŭ rŭ Bernabéxŭ yayauxgŭxŭ na nutamaā ĩnamuxŭchigŭāxŭcēx. ⁶⁻⁷ Natŭrŭ yexguma nŭxŭ nacuāchigagŭgu ga Pauru rŭ Bernabé, rŭ nibuxmŭ. Rŭ Dicóniŭānewa yexmane ga ĩānegŭ ga Listra rŭ Derbewa naxŭ. Rŭ guma ĩānegŭwa rŭ guxŭma ga yema naānewa ipeagŭxŭ ga duŭxŭgŭmaā rŭ ta nŭxŭ nixuchigagŭ ga ore i mexŭ.

Nutagŭmaā Pauruxŭ ĩnamuxŭchigŭ ga Listrawa

⁸⁻⁹ Rŭ yema Listrawa nayexma ga wŭxi ga yatŭ ga ĩnapogŭcutŭxŭ norŭ bucŭmatama. Rŭ yema narŭto rŭ inarŭxŭnŭ ga yema Pauru nŭxŭ ixuxŭ ga ore. Rŭ Pauru rŭ meāma nŭxŭ nadawenŭ, rŭ nŭxŭ nadau ga na nŭxŭ nayexmaxŭ ga norŭ ō na naxcēx yataanexŭcēx. ¹⁰ Rŭ yexguma ga Pauru rŭ tagaācŭ űanagŭrŭ nŭxŭ: —ĭnachi, rŭ meāma ĩnangacutŭ! —űanagŭrŭ. Rŭ yexguma ĩnayuxnagŭ ga guma yatŭ, rŭ ĩnanaxŭgŭ ga na iyaxŭxŭ. ¹¹ Rŭ yexguma yema muxŭma ga duŭxŭgŭ nŭxŭ daugŭgu ga yema na naxŭxŭ ga Pauru, rŭ tagaācŭ yema Dicóniŭgawa nidexagŭ, rŭ űanagŭrŭgŭ: —Tupanagŭ i naduŭxŭgŭraŭxŭ ĩnarŭxŭgŭ, rŭ tatanŭwa nangugŭ —űanagŭrŭgŭ. ¹² Rŭ Bernabé rŭ tupana ga Chéumaā nanaxŭégagŭ. Rŭ Pauru rŭ Érememaā nanaxŭégagŭ yerŭ nŭma nixŭ ga yadexaxŭ. ¹³ Rŭ guma ĩāne ĩxŭcuxŭwa nayexma ga tupana ga Chéuarŭ tupauca ga taxŭne. Rŭ guma tupaucaarŭ pai rŭ yema nanagagŭ ga wocagŭ ga iyatŭxŭ ga putŭramaā ngēxāēgŭxŭ. Rŭ nŭma ga pai rŭ ga duŭxŭgŭ rŭ nanadaixchaŭ ga yema wocagŭ naxcēx ga Pauru rŭ Bernabé na yemamaā nŭxŭ yacuēxŭgŭxŭcēx. ¹⁴ Natŭrŭ yexguma nŭxŭ yacuēxāchitanŭgu ga Bernabé rŭ Pauru, rŭ norŭ gāuxŭchirugu nagaŭgŭe na yema duŭxŭgŭ nŭxŭ cuēxgŭxŭcēx na tama namexŭ ga yema naxcēx naxŭechaŭxŭ. Rŭ yema muxŭma ga duŭxŭgŭtanŭwa nabuxmŭ, rŭ űaxŭmaā aita naxŭe: ¹⁵ —Pa Yatŭgŭx, ŭtŭxcŭŭ toxcēx penaxŭ i ngēma? Toma rŭ pexrŭŭ duŭxŭgŭmare tixŭgŭ. Rŭ nuā taxŭ na pemaā nŭxŭ tayarŭxŭxŭcēx na nŭxŭ perŭxoēxŭcēx i ngēma chixexŭgŭ i taxuwama mexŭ rŭ naxcēx pedagŭxŭcēx ya Tupana ya maxŭcŭ ga naxŭcŭ ga daxŭgŭxŭ i naāne, rŭ űoma i naāne, rŭ taxtŭ i taxŭ, rŭ guxŭma i nawa ngēxmaxŭ. ¹⁶ —Rŭ nuxcŭmayerŭ nixŭ ga Tupana ga yaxna namaā naxŭnŭxŭ ga duŭxŭgŭ ga woo nŭmagŭ nanaxwēxegŭxŭ naxŭgŭgu. ¹⁷ —Natŭrŭ nŭma ga Tupana rŭ taguma nŭxŭ

narūchau na duūxūgūxū nangūxēēxū. Rū yemaācū tūxū nūxū nacuēxēē na Tupana yīxū i nūmax. Rū nūmatama nixī i nūma namuāxū ya pucū rū meā pexū nayaexēxēāxū i penetūgū. Rū nūma nixī i pexna naxāāxū i pewemū na ngēmaācū petaāēgūxūcēx —ñanagūrūgū ga Pauru rū Bernabē.¹⁸ Natūrū woo yema orexū namaā na yaxugūxū rū poraācū nūxū naguxcha ga Pauru rū Bernabē ga nūxna na nachogūxū ga duūxūgū ga tama naxcēx na nadaīāxūcēx ga yema wocagū na yemamaā nūxū yacuēxūūgūxūcēx. Rū dūxwa yemacēx tama naxcēx nanadai.¹⁹ Natūrū yexgumayane rū ínangugū ga ñuxre ga Yudiūgū ga Aūtioquíawa rū Icūniūwa ne Īxū. Rū chixexūmaā nayaxucuxēgū ga yema muxūma ga duūxūgū na tama Pauru rū Bernabēga naxīnūēxūcēx, rū namaā nanuēxūcēx. Rū yemacēx ga yema duūxūgū rū nutamaā Pauruxū ínamuxūchigū, rū íāneārū Īpemawa nanatūchigūgū, yerū nūma nūxū nacuēxūgū rū marū nayu.²⁰ Natūrū yexguma yema yaxōgūxū naxūtawa ngutaquēxegu, rū inachi ga Pauru, rū wenaxārū nagu naxūcu ga guma íāne. Rū moxūācū inaxūāchi ga yēma, rū Bernabēmaā Derbewa naxū.²¹ Rū guma íānewa nūxū nixugūe ga ore ga mexū. Rū nanangūxēē ga duūxūgū, rū muxūma Tupanaāxū nayaxōgū. Rū yemawena rū wenaxārū naxcēx nawoegu ga Listra, rū Icūniū, rū Aūtioquía.²² Rū guma íānegūwa rū yema yaxōgūxūxū nixucuxēgū, rū nūxū nanangūchaūxēēgū na guxūguma meā na yaxōgūāxūcēx. Rū namaā nūxū nixugūe, rū ñanagūrūgū: —Ngēma Tupana āēxgacū íxīxūwa na íxūcuxūcēx, rū tanaxwēxe na muēxpūxcūna guxchaxūgūmaā yaxna íxīnūēxū i ñoma i naānewa —ñanagūrūgū.²³ Rū Pauru rū Bernabē rū wūxichigū ga íānewa rū nūxū nixunetatanū ga ñuxre ga yatūgū na yaxōgūxūārū āēxgacūgū yixīgūxūcēx. Rū tama nachibūeācūma naxcēx nayumūxēgū. Rū yemawena rū yima Cori ya Tupana ga nūxū yaxōgūācūna nanaxuaxūgū na guxūguma namaā inaxāūxūcēx rū meā nūxna nadauxūcēx ga yema yaxōgūxūārū āēxgacūgū.

Pauru rū Bernabē rū naxcēx nawoegu ga Aūtioquía ga Chíríaanewa yexmane

²⁴ Rū Pichídiaanewa nichopetū, rū Paūpíríaanewa nangugū.²⁵ Rū Pérupe ga íānewa nūxū nixugūe ga Tupanaārū ore, rū ñuxūchi Atária ga íānewa naxī.²⁶ Rū yēma rū wūxi ga wapurugu nichoū na Aūtioquíacēx nawoeguxūcēx. Rū guma íāne ga Aūtioquíawa nixī ga noxri duūxūgū Tupanana namugūxū ga Pauru rū Bernabē na naxūgūāxūcēx ga yema puracū ga ñuxma marū yanguxēēgūxū.²⁷ Rū yexguma ínangugūga ga Pauru rū Bernabē, rū nanangutaquēxēē ga guxūma ga yema duūxūgū ga yaxōgūxū. Rū namaā nūxū nixugūgū ga guxūma ga ñuxācū Tupana poraācū nūxū na rūngūxēēxū. Rū yexgumarū ta rū namaā nūxū nixugūgū ga ñuxācū na yaxōgūāxū ga yema duūxūgū ga tama Yudiūgū íxīgūxū, yerū Tupana nūxū nanatauxchaxēē na yaxōgūāxūcēx.²⁸ Rū muxūma ga ngunexūgu yema yaxōgūxūtanūwa nayexmagū ga Pauru rū Bernabē.

15

Yerucharéūwa nangutaquēxegū

¹ Rū yexgumaācū rū nayexma ga ñuxre ga duūxūgū ga Yudéaanewa ne Īxū ga Aūtioquíawa ngugūxū. Rū nūmagū ínanaxūgūe ga tūxū na nangūxēēxū ga guxema yaxōgūe ga Aūtioquíacūāx, rū ñanagūrūgū: —Ngēxguma tama pegū ípewiūchēxmūpēxechiraūgu yema Moiché tūxū muxūrū rū taxuacūma pexū nangēxma i maxū i taguma gūxū —ñanagūrūgū.² Natūrū ga Pauru rū

Bernabé rü tama norü me nixī ga yema, rü yemacèx poraãcū nügü namaã nachoxūgagü ga yema duūxūgü ga Yudéaanewa ne İxū. Rū dūxwa Pauru rü Bernabé rü ñuxre ga togü ga Aūtioquiacūāx ga yaxōgūxūxū naxunetagü na Yerucharéuwa naxīxūcèx na yema ngüexūgü ga Ngechuchu imugūxū rü yema yaxōgūxūārū āēxgacūgūmaã yamexēēgūāxūcèx ga yemachiga. ³ Rū yemaãcū ga yema yaxōgūxū ga Aūtioquiacūāx rü Yerucharéuwa nanamugü ga yema yatügu na naxcèx íyacagūxūcèx rü yamexēēgūāxūcèx ga yema ore. Rū Peníchiaanewa rü Chamáriaanewa nachopetü ga Pauru rü Bernabé. Rū yéma rü duūxūgūmaã nūxū nixugüe ga ñuxácü yema tama Yudiügu ixīgūxū rü nūxū na naxoexū ga nuxcūmaūxū ga nacūmagü na Tupanawe naxīxūcèx. Rū yema oremaã poraãcū nanataāēxēēgü ga guxūma ga yema yaxōgūxū. ⁴ Rū Yerucharéuwa nangugü ga Pauru rü Bernabé. Rū guxūma ga yema yaxōgūxū rü yema ngüexūgü ga Ngechuchu imugūxū rü yema yaxōgūxūārū āēxgacūgü rü meãma nanayauxgü. Rū Pauru rü Bernabé namaã nūxū nixugūgü ga guxūma ga ñuxácü Tupana poraãcū nūxū na rüngūxēēxū na duūxūgūmaã nūxū yaxugūxūcèx ga ore i mexū. ⁵ Natürü ñuxre ga Parichéugü ga Ngechuchuaxū yaxōgūxū, rü inachigü, rü ñanagürügü: —Name nixī na nügü ínawīüchēmüpēxechiraūgūxū i ngēma tama Yudiügu ixīgūxū i ngexwaca yaxōgūxū. Rū name nixī na naga naxīnūēxū i ngēma mugü ga Moíché ümatūxū —ñanagürügü. ⁶ Rū yexguma nangutaquexegü ga yema ngüexūgü ga Ngechuchu imugūxū rü yema yaxōgūxūārū āēxgacūgü na namexēēgūāxūcèx ga yema ore. ⁷ Rū yixcama marü ñuxgumama nügūmaã yéma yaporagatanücüügu, rü inachi ga Pedru, rü ñanagürü nūxū: —Pa Chaueneēgūx, pema nūxū pecuèx ga na ūpamama Tupana choxū yaxuxū ga petanūwa na yema duūxūgü i tama Yudiügu ixīgūxūmaã nūxū chixuxūcèx i norü ore i mexū i maxēxēēruū, na nūmagü rü ta Ngechuchuaxū yaxōgūāxūcèx. ⁸ —Rü yima Tupana ya guxāāēxū cuácü rü tūxū nūxū nadauxēē na nadeāxū i ngēma duūxūgü i tama Yudiügu ixīgūxū, yerü nūxna nanamu ga Naãe i Üünexū yema tūxna namuāxürüū. ⁹ —Rü Tupanapēxewa rü yixema i Yudiügu rü namaã tawūxigu i ngēma duūxūgü i tama Yudiügu ixīgūxū. Yerü nūmagü rü ta Tupana nūxū nūxū nangechaū ga norü pecadugü ga yexguma nūxū yaxōgūāgu. ¹⁰ —¿Rü tūxcūū tama namaã petaãe i ñuxma i ngēma Tupana ūxū? ¿Rü tūxcūū ngēma ngexwacèx yaxōgūxūxū penaxūxēēchaū i ngēma Moíchéarü mugü i guxchaxū ga tóru oxigü rü taxuacūma naga taxīnūēxū rü woo yixemagü rü ta taxuacūma inguxēēxū? ¹¹ —Rü tama ngēma mugü nixī i tūxū maxēxēēxū. Natürü yixema rü tayaxōgü na tóru Cori ya Ngechuchu tamaã mecūmaxūgagu yīxū na tūxna naxāmareāxū i maxū i taguma gūxū. Rū ngēxgumarūū ta nixī i naxcèx i nūmagü i tama Yudiügu ixīgūxū —ñanagürü ga Pedru. ¹² Rū inanaxūgü ga Bernabé rü Pauru na yadexagūxū. Rū guxūma ga yema duūxūgü rü inarūchianegü rü inarūxīnūēmare. Rū Bernabé rü Pauru rü namaã nūxū nixugüe ga ñuxácü Tupana na nūxū rüngūxēēgūxū na naxūgūāxūcèx ga mexū ga taxūgü ga Tupanaārū poramaã naxūgūxū natanūwa ga yema duūxūgü ga tama Yudiügu ixīgūxū. ¹³ Rū yexguma Bernabé rü Pauru igüegagügu, rü nūxīxārū nidexa ga Chaūtiágu, rü ñanagürü: —Pa Chaueneēgūx, ¡choxū iperūxīnūē! ¹⁴ —Pedru i Chimáru rü tamaã nūxū nixu na ñuxácü Tupana inaxūgūxū ga nūxū na nangūxēēxū ga yema duūxūgü i tama Yudiügu ixīgūxū. Rū tamaã nūxū nixu ta na ñuxácü Tupana yema duūxūgūtanūwa nadeāxū ga ñuxre ga duūxūgü na noxrü yixīgūxūcèx. ¹⁵ —Rü ngēma Pedru nūxū ixuxū rü nawūxigu namaã ga

yema ore ga nuxcūmaũgũxũ ga orearũ uruũgũ ūmatũxũ ga ñaxũ:

¹⁶ “Rũ ngēmawena rũ tá chataegu, rũ tá nũxũ charũngũxēē i Dabítaagũ i Yudiũgũ. Rũ woo nawoonemare i ñuxmax, natũrũ wena táxaru wũxiwa chanaxixēē, rũ tá íchanadagũxēē na noxrirũ naporaexũcex. ¹⁷ Rũ ngēmaãcũ tá nũxũ charũngũxēē na ngēma duũxũgũ i tama Yudiũgũ ixĩgũxũ rũ chauxcex nadaugũxũcex, wũxigu namaã i guxũma i chorũ duũxũgũ i Yudiũgũ i choma chadexũ. ¹⁸ Rũ yemaãcũ nũxũ nixu ga nũma ga Cori ya Tupana ga nuxcũmama tũxũ nũxũ cuẽxēēcũ ga yema”, ñanagũrũ ga yema ore ga nuxcũma ūmatũxũ. ¹⁹ Rũ ñanagũrũ ga Chaũtiãgu: — Rũ ngēmacex, Pa Chaueneẽgũx, rũ chauxcex rũ tama name na guxũ i Moíchẽ ūmatũxũ i mugũmaã nũxũ ichixewexũ i ngēma duũxũgũ i tama Yudiũgũ ixĩgũxũ i nũxũ rũxoexũ i nuxcũmaũxũ i nacũmagũ na Tupanawe naxĩxũcex. ²⁰ —Rũ narũmemaẽ nixĩ i naxcex tanaxũmatũ i popera, rũ ngēmawa namaã nũxũ tixu:

- (1) Rũ tama name na nangõxgũãxũ i ngēma naxũnagũmachi i togũ norũ tupananetachicũnẽxãgũcex dẽjxũ.
- (2) Rũ tama name na naĩ i ngemaã rũ ẽxna naĩ ya yatũmaã inapexũ.
- (3) Rũ tama name na nangõxgũãxũ i namachi i ngēma naẽxũ rũ ẽxna naxũna i wẽxnaãxũ rũ ẽxna natũgu nguxũ.
- (4) Rũ tama name na nangõxgũãxũ ya nagũ.

Rũ ngẽxĩcatama nixĩ i inaxwẽxexũ na naxcex naxũmatũxũ. ²¹ —Erũ guxũne ya ñãnewa nangẽxma ya Yudiũgũarũ ngutaquẽxepataũ i ngextã nuxcũmama guxũ i ngũxchigaarũ ngunexũgu nawa ínangúe rũ nũxũ nixuchigagũ i guxũma i ngēma mugũ ga Moíchẽ ūmatũxũ —ñanagũrũ ga Chaũtiãgu.

Popera ga yema duũxũgũ ga tama Yudiũgũ ixĩgũxũcex ūmatũxũ

²² Rũ yema ore rũ norũ me nixĩ ga yema ngũexũgũ ga Ngechuchu imugũxũ, rũ yema yaxõgũxũarũ ãẽxgacũgũ, rũ guxũma ga yema yaxõgũxũ. Rũ nũgũmaã ñanagũrũgũ: —;Ngĩxã tatanũwa tanade ya taxre ya yatũgũ na Aũtioquíawa namugũxũcex namaã ya Pauru rũ Bernabé! —ñanagũrũgũ. Rũ nũxũ naxunetagũ ga Yuda ga Barsabãgu ãegaxũ rũ Chira. Rũ nũmagũ ga Yuda rũ Chira rũ ãẽxgacũgũ nixĩ ga natanũwa ga yema yaxõgũxũ ga Yerucharẽũwa yexmagũxũ. ²³ Rũ namaã yema nanamugũ ga popera, rũ ñãa nixĩ ga yema ore ga nagu naxũmatũgũxũ:

“Pa Toeneẽgũ i Tama Yudiũgũ Ixĩgũxe i Aũtioquíagu rũ Chírĩaanegu rũ Chirĩchĩaanegu Achiũgũxe, rũ toma i peeneẽgũ i Ngechuchu toxũ imugũxe rũ toma i yaxõgũxũarũ ãẽxgacũgũ ixĩgũxex, rũ pexũ tarũmoxẽgũ. ²⁴ Rũ nũxũ tacuãchigagũ rũ ñuxre ga duũxũgũ ga nũma ne íxũ rũ woo tama toma yema tanamugũ natũrũ nũmagũ rũ yema naxĩ rũ Moíchẽarũ mugũmaã pexũ nachixewegũ rũ yemaãcũ pexũ ínatũxēē. ²⁵ Rũ yemacex guxãma ga toma rũ wũxigu nagu tarũxĩnũe na totanũwa nũxũ taxunetaxũ ga taxre ga taeneẽgũ na pexcex ngema tanamugũxũcex namaã i taeneẽgũ i nũxũ ingechaũgũxũ i Bernabé rũ Pauru. ²⁶ Rũ nũmagũ i Bernabé rũ Pauru nixĩ ga poraãcũ ãcũmaxũwa nayexmagũxũ naxcex ga tórũ Cori ya Ngechuchu ya Cristu. ²⁷ Rũ ñuxma rũ pexcex ngema tanamugũ i Yuda rũ Chira na nũmagũxũchi pemaã nũxũ yaxugũxũcex rũ pemaã nangõxẽgũãxũcex i guxũma i torũ ore. ²⁸⁻²⁹ Erũ Tupanaãe i Ūnẽxũcex name, rũ toxcex rũ ta name na tama muxũma i mugũ pexna taxãgũxũ. Rũ ñãa ãgũmũcũ i mugũxicatama nixĩ i pexũ tamuxũ:

- (1) Rũ tama name na penangõxũ i naxũnagũmachi i togũ norũ tupananetachicũnẽxãgũcex dẽjxũ.

(2) Rū tama name na penangōxū i namachi i ngēma naxūnagū i wēxnaāxū.

(3) Rū tama name na penangōxū ya nagū.

(4) Rū tama name na naī i ngemaā rū ēxna naī ya yatūmaā ipepexū.

Rū mexū tā pexūgū ega penaxauregu i ngēma mugū. Rū nuāma pexna”, űanagūrū ga yema ore ga naxūmatūgūxū. ³⁰ Rū natanūxūxū namoxēgūguwena, rū inaxīāchi ga yema yēma mugūxū, rū Aūtioquīawa naxī. Rū yexguma yēma nangugūgu rū nanangutaquēxexēē ga guxūma ga yema yaxōgūxū ga duūxūgū, rū nūxna nanaxāgū ga yema popera. ³¹ Rū yexguma nūxū nadaumatūgūgu, rū poraācū nataāēgū namaā ga yema ucūxēgū ga nūxna naxāgūxū. ³² Rū Yuda rū Chira rū Tupanaārū orearū uruūgū na yixīgūxū, rū muxūma ga oremaā nayaxucūxēgū ga yema yaxōgūxū, rū nūxū narūngūxēē na yexeraācū yaxōgūāxūcēx. ³³ Rū marū űuxre ga ngunexū yēma nayexmagūguwena, rū inixī. Rū yema yaxōgūxū ga Aūtioquīacūāx, rū taāēacūma Yuda rū Chiraxū narūmoxēgū rū meāma inayamugū na naxcēx nawoeguxūcēx ga yema Yerucharēūcūāx ga noxri natanūwa namugūxū. ³⁴ Natūrū ga Chira rū naga narūxīnū na yexma Aūtioquīagu naxāxū, rū yemacēx Yudaxicatama Yerucharēūcēx nataegu. ³⁵ Rū Pauru rū Bernabé rū ta yexma narūcho. Rū wūxigu namaā ga muxūma ga togū, rū nanangūexēē ga duūxūgū, rū namaā nūxū nixugūgū ga Cori ya Tupanaārū ore i mexū.

Pauru rū wenaxārū inaxūāchi ga to ga nachīūānegūwa na nangeaxū ga Tupanaārū ore

³⁶ Rū yexguma marū űuxre ga ngunexū ngupetūgu, rū űanagūrū ga Pauru Bernabéxū: —;Ngīxā wenaxārū natanūgu tanaxīāne i ngēma yaxōgūxū i guxūne ya īāne ga ngextā nūxū īixuchigaxūwa ga Cori ya Tupanaārū ore na nūxū idauxūcēx na űuxācū nūxū īnangupetūgūxū! —űanagūrū. ³⁷ Rū Bernabé rū nayagaxchaū ta ga Cuāū Marcu. ³⁸ Natūrū ga Pauru rū tama nanaxwēxe ga na yagaāxū, yerū Paūpīriawa nūxna naxo ga noxri, rū tama īnayaxūmūcū ga yema puracūwa. ³⁹ Rū poraācū nūgūmaā niporagatanūcūū naxcēx ga yema, rū dūxwa nūgūna nixīgū. Rū Bernabé nayaga ga Marcu, rū Chiprearū capaxūwa naxū. ⁴⁰ Rū yoxni ga Pauru rū Chiraxū niga. Rū yema Aūtioquīacūāx ga yaxōgūxū rū naxcēx nayumūxēgū na Tupana nūxū rūngūxēēgūxūcēx. Rū yexguma inaxīāchi. ⁴¹ Rū Chīriaanewa rū Chīrīchiaanewa nachopetū, rū yēma Tupanaārū oremaā nanataāēxēēgū ga yema yaxōgūxū.

16

Pauru rū Chirawe narūxū ga Timutéu

¹ Rū Derbewa rū Listrawa nangugū ga Pauru rū Chira. Rū yēma nayexma ga wūxi ga yaxōcū ga Timutéugu āegacū. Rū naē rū wūxi ga Yudiū ga yaxōxcū iyixī. Rū nanatū rū wūxi ga Griégu tixī. ² Rū guxūma ga yema yaxōgūxū ga Listracūāxgū rū Icūniūcūāxgū rū nūxū nixugūe na mea maxūcū yixīxū ga nūma ga Timutéu. ³ Rū Pauru rū nanaxwēxe na Timutéu īyaxūmūcūxū. Natūrū naxūpa ga na yagaāxū rū īnanawiechēxmūpēxechiraū, yerū yemaācū nanaxwēxegū ga yema Yudiūgu ga yema naānewa yexmagūxū. Yerū guxūma nūxū nacūēxgū ga na Griégu tīxū ga nanatū. ⁴ Rū guxūnema ga guma īānegū ga nawa nachopetūnewa, rū duūxūgūmaā nūxū nixugūetanū ga yema ucūxē ga yema Yerucharēūcūāx ga ngūexūgū ga Ngechuchu imugūxū rū yema yaxōgūxūārū āēxgacūgū nūxū ixugūxū. ⁵ Rū yemaācū yexeraācū meā

nayaxōgū ga guxūma ga yema yaxōgūxū, rü guxū ga ngunexū rü yexeraācū nimuētānū ga yema yexwacēx yaxōgūxū.

Pauru nangoxetū rü wūxi ga yatū ga Machedóniācūāxū nadau

⁶ Rū Áchiaanewa naxīxchaū na yéma nūxū yaxugūxūcēx ga ore i mexū. Natürū Tupanaāē i Ūūnexū rü nūxna nanachuxu ga yema. Rū yemacēx Píríquiaanewa rü Gárataanewaama nachopetū. ⁷ Rū Míchiaarū naānewa nangugū, rü yéma nagu narūxīnūē ga na Bitíniāārū naānewa naxīxū. Natürū yéma rü ta Tupanaāē i Ūūnexū nūxna nanachuxu ga na yéma naxīxū. ⁸ Rū yemacēx Míchiaanewa nachopetūmare rü īāne ga Tróawa nangugū. ⁹ Rū yema chūtaxūgu rü Pauru nangoxetū rü nūxū nadau ga wūxi ga yatū ga Machedóniācūāxū ga napēxegu chicū. Rū nūxū nacēxū, űaxūmaā: —[Machedóniāwa naxū, rü toxū rüngūxēē! —űaxūmaā. ¹⁰ Rū yexguma yemaxū nadēuxgu ga Pauru, rü yexgumatama togū tamexēēgū na Machedóniāwa taxīxūcēx. Yerū nūxū tacūxgū rü aixcūmaxūchi nixī ga Tupana toxcēx çaxū na yema duūxūgūmaā nūxū tixuxūcēx ga ore i mexū.

Piripuwa nayexmagū ga Pauru ru Chira

¹¹ Rū Tróaarū türewa itaxīāchi, rü capaxū ga Chamotáchiucēx wēxgu taxī. Rū moxūācū Neāporiwa tangugū. ¹² Rū yéma rü dauxchitagu taxī rü Piripuwa tangugū. Rū guma nixī ya Dumacūāxgūārū īāne ga Machedóniāānegu naxūgūne. Rū guma nixī ya guxūne ya īāneārū tamaēne ga yéma. Rū yéma tayexmagū ga űuxre ga ngunexūgū. ¹³ Rū ngūxchigaarū ngunexūgu, rü guma īāne iyacuāxūwa taxī ga natūpechinūwa, yerū nagu tarūxīnūēgu rü yéma nayexma ga Yudīugūārū yumūxēchica. Rū yéma tarūtogū, rü namaā tidexagū ga űuxre ga ngexūgū ga yéma ngutaquēxegūxū, rü namaā nūxū tixugū ga Tupanaārū ore. ¹⁴ Rū yéma iyexma ga wūxi ga ngecū ga Díría ga ngīega ga Tupanaxū icuēxūūxcū. Rū Tiatíra ga īāneçūāx iyixī. Rū dauxracharaxū ga naxchirumaā itaxe yerū yema nixī ga ngírū puracū. Rū ngīma rü meāma yéma irūxīnū, yerū nūma ga Cori ya Tupana rü ngīxū nanangūchaūxēē na meā inaxīnūxūcēx ga yema ore ga Pauru nūxū ixuxū. ¹⁵ Rū yemawena rü űūxūchi líbaie wūxigu namaā ga guxūma ga ngītanūxūgū. Rū yixcama rü toxū icēēxū űaxūmaā: —Ngēxguma pema choxū pedēuxgu na aixcūma nūxū chayaxōxū ya Cori ya Tupana, rü marū name ega chopatagu peyapegūgu —ngīgūrūgū. Rū yéma toxū ixīxēē. ¹⁶ Rū wūxi ga ngunexūgu ga yexguma yumūxēwa taxīxgu ga tomāx, rü yexma ngīxū tayangau ga wūxi ga pacū ga corigūxūtaxū ixīcū ga ngoxoāxcū. Rū yema pacū rü wūxi ga çacūxū cuēxcū iyixī, rü duūxūgūmaā nūxū iyaxu ga çacū tá yixcūra na ngupetūxū. Rū yemacēx ga duūxūgū rü dīerumaā ngīxū nanaxūtanū na nūxū yaxūxūcēx na çacū tá na ngupetūxū. Rū yemaācū poraācū dīeruxū itū naxcēx ga ngírū corigū. ¹⁷ Rū ngīma towe ingē ga toma rü Pauru, rü tagaācū ngīgūrūgū: —űāā yatūgū rü Tupana ya tacūxūchimaārū duūxūgū nixī, rü pemaā nūxū nixu na űuxācū tá penayaxuxū i maxū i taguma gūxū —ngīgūrūgū. ¹⁸ Rū yemaācū iyixī ga muxūma ga ngunexūgu. Rū dūxwa nūxū nawēxtūmūxū ga Pauru, rü ngīxcēx nadauegu, rü űanagūrū nūxū ga yema ngoxo ga ngīwa yexmaxū: —Ngechuchu ya Cristuēgagu cuxū chamu, na ngīwa icuxūxūxūcēx —űanagūrū. Rū yexgumatama ngīwa ínaxūxū ga yema ngoxo. ¹⁹ Rū yexguma nūxū nadaugūgu ga ngírū corigū ga marū tama ngīgagu dīeru ngīxū na nayauxgūxū, rü Pauru rü Chiraxū ínayauxū, rü āēxgacūgūārū ngutaquēxechicawa nanagagū.

20 Rū āēxgacūgūna nanaxuaxū ga yema ngīrū corigū, rū ñanagūrūgū: —Ñāā Yudiūgū rū tōrū īānewa nanachixēāēxēēgū i duūxūgū. 21 —Rū tūxū nangūexēē na naxaurexūcēx i nacūmagū i tūxna chūxuxū i yixema i Dumacūāxgū —ñanagūrūgū. 22 Rū yexguma ga guxūma ga yema īānecūāx, rū Pauru rū Chirana nayxugū. Rū yema āēxgacūgū nanamu na īnacūxūāxūcēx rū ngexchiruxūma naīxmenēxāmaā yaçuaixgūāxūcēx. 23 Rū yexguma marū poraācū yaçuaixgūāguwena, rū poxcupataūgu nanawocu. Rū nūxna naxāga ga yema poxcupataūārū dauruū na meāma nūxna nadauxūcēx. 24 Rū yexguma yemaxū naxīnūgu ga yema dauruū, rū poxcupataūārū aixepexguxūchixū ga ucapugu nanawocu, rū meāma nayachotaparagū. 25 Natūrū ngāxūcūūgu rū nayumūxēgū ga Pauru rū Chira, rū nawiyaegū, rū Tupanaxū nicuēxūūgū. Rū yema togū ga poxcuexū rū nūxū naxīnūē. 26 Rū ngūrūāchi poraācū naxīāxāchiana, rū īnyangogūtānūāchi ga guma poxcupataūārū caxtagū. Rū yexgumatama niwāxnagū ga guxūma ga īāxgū ga guma poxcupataū. Rū guxūma ga yema poxcuexūārū cadenaparagū rū niwēgū. 27 Rū pewa nabaixāchi ga yema poxcupataūārū dauruū. Rū yexguma nūxū nadēuxgu ga na yawāxnagūxū ga īāxgū ga guma poxcupataū rū nanayaxu ga norū tara na nūgū yamāxūcēx, yerū nūma nūxū nacūēxgu rū marū nibuxmū ga yema poxcuexū. 28 Natūrū tagaācū aixta naxū ga Pauru, rū ñanagūrū nūxū: —īTāxū i cugū quimāxū! Rū guxāma i toma rū tanuxmagū —ñanagūrū. 29 Rū yexguma ga yema poxcupataūārū dauruū rū naxcēx īnaca ga wūxi ga omū, rū inañāchiācūma yema duūxūgū īpoxcuexūgu nayangaxi, rū yaduruxācūma Pauru rū Chirapēxegu nayacaxāpūxū. 30 Rū yexguma īāxtūwa Pauru rū Chiraxū nagagū, rū ñanagūrū nūxū: —Pa Corigūx, īTācū tā chaxūxū i choma na choxū nangēxmaxūcēx i maxū i taguma gūxū? —ñanagūrū. 31 Rū nūmagū rū nanangāxūgū rū ñanagūrūgū nūxū: —īNūxū yaxō ya Cori ya Ngechuchu, rū tā cuxū nangēxma i maxū i taguma gūxū i cuma rū guxū i cupatacūāx! —ñanagūrūgū. 32 Rū namaā rū guxūma ga yema napatacūāxgūmaā rū ta nūxū nixugūe ga Cori ya Tupanaārū ore. 33 Rū yematama oragu ga chūtacū, rū nūma ga yema poxcupataūārū dauruū nayayauxgū ga norū oxrigū ga Pauru rū Chira. Rū yemawena rū ñuxūchi īnabaie ga nūma wūxigu tūmamaā ga naxmēx rū naxacūgū. 34 Rū ñuxūchi ga nūma ga poxcupataūārū dauruū rū napatawa Pauruxū rū Chiraxū nagagū. Rū ōna nūxna naxā rū nataāē ga nūma rū guxūma ga napatacūāxgū ta, yerū Tupanaāxū nayaxōgū. 35 Rū moxūācū pēxmama rū yema īānēārū āēxgacūgū rū yema poxcupataūārū dauruūxūtawa nanamugū ga purichīagū na namaā nūxū yanaxugūxūcēx na Pauru rū Chiraxū īnamuxūxū. 36 Rū yexguma ga yema poxcupataūārū dauruū rū ñanagūrū Pauruxū: —Rū ngēma āēxgacūgū rū nuā nanamugū i ore na pexū īchamuxūxūcēx. īRū ēcū īpechoxū, rū meā īpixī! —ñanagūrū. 37 Natūrū ga Pauru rū ñanagūrū nūxū ga yema purichīagū: —Marū chixri tomaā nachopetū i toma i Dumacūāxūchigū na tixīgūxū, rū tama toxna nacaxiraācūma toxū niçuaixgū ga napēxewa ga guxūma ga duūxūgū, rū ñuxūchi poxcupataūārū toxū nawocu. Rū ñuxma rū cūācūma toxū īnamuxūchāū. Rū tāitāma ngēmaācū nixī. īRū ēcū nūmatama nūma naxī i āēxgacūgū na nūmatama toxū īyamuxūxūcēx! —ñanagūrū ga Pauru. 38 Rū yexguma ga yema purichīagū rū āēxgacūgūmaā nūxū nayarūxugūe ga yema ore. Rū poraācū nabaixāchiāēgū ga yema āēxgacūgū ga yexguma nūxū naxīnūēgu ga na Dumacūāxūchi yixīgūxū. 39 Rū yēma naxī, rū Pauru rū Chirana nayacagū na nūxū nūxū nangechaūgūxūcēx naxcēx ga yema namaā naxūgūxū. Rū

ínanamuxŭ, rŭ nŭxŭ nacèèxŭgŭ na nawa ínachoxŭxŭcèx ga guma ìāne. ⁴⁰ Rŭ yexguma poxcupataŭwa ínachoxŭgu ga Pauru rŭ Chira, rŭ Díriapatawa naxŭ. Rŭ yema yaxŭgŭxŭmaā nangutaquèxegŭ, rŭ nayaxucŭxègŭ, rŭ Tupanaārŭ oremaā nanataēèxègŭ. Rŭ ñŭxŭchi yemawena rŭ inaxŭīchi.

17

Pauru rŭ Chiramaā nanuē ga duŭxŭgŭ ga Techarónicawa

¹ Rŭ ìānegŭ ga Aŭfīpori rŭ Aporóniāwa nachopetŭ ga Pauru rŭ Chira, rŭ ìāne ga Techarónicawa nangugŭ. Rŭ yéma nayexma ga wŭxi ga ngutaquèxepataŭ ga Yudiŭgŭarŭ. ² Rŭ guma ngutaquèxepataŭwa naxŭxŭ ga Pauru, yerŭ woetama yema nixŭ ga nacŭma. Rŭ tomaēxpŭx ga ngŭxchigaarŭ ngunexŭgu rŭ Tupanaārŭ ore ga ũmatŭxŭchiga yema Yudiŭgŭmaā yéma nidexa. ³ Rŭ meāma naxcèx nanangoxèè ga yema ore, rŭ namaā nŭxŭ nixu ga tacŭcèx na nayuxŭ ga Cristu rŭ tŭxcŭŭ wena na namaxŭxŭ. Rŭ ñanagŭrŭ: —Rŭ yima Cristu rŭ Ngechuchu nixŭ, rŭ nachiga nixŭ i pemaā nŭxŭ chixuxŭ —ñanagŭrŭ ga Pauru. ⁴ Rŭ ñuxre ga yéma yexmagŭxŭ ga Yudiŭgŭ rŭ nayaxŭgŭ, rŭ Pauru rŭ Chiratanŭgu naxāgŭ. Rŭ yexgumarŭŭ ta Ngechuchuaxŭ nayaxŭgŭ ga muxŭma ga Griégugŭ ga noxri Yudiŭgŭrŭŭ yaxŭgŭxŭ. Rŭ muxŭma ga ngexŭgŭ ga dŭerŭaxgŭxŭ rŭ ta nayaxŭgŭ. ⁵ Rŭ yemacèx ga yema Yudiŭgŭ ga tama yaxŭgŭxŭ, rŭ nanuē rŭ nixāŭxāchigŭ yerŭ muxŭma ga duŭxŭgŭ nŭxŭ nayaxŭgŭ ga Pauru rŭ Chiraarŭ ore. Rŭ norŭ numaā nanaxŭtaquèxexèè ga ñuxre ga yatŭgŭ ga chixexŭgŭ ga taxuwama mexŭ. Rŭ yemaxŭ namugŭ na nanuèxèèaxŭ ga yema ìānecŭŭax ga duŭxŭgŭ. Rŭ Yachāŭpatawa nabuxmŭ ga yema chixexŭ ga duŭxŭgŭ na Pauru rŭ Chiracèx nadaugŭxŭcèx, yerŭ yema muxŭma ga duŭxŭgŭpèxewa nanagagŭchaŭ. ⁶ Natŭrŭ yexguma tama yexma nŭxŭ yangaugŭgu, rŭ Yachāŭxŭ niyauxgŭ, rŭ ñuxre ga yaxŭgŭxŭxŭ rŭ ta ìnayauxŭ. Rŭ nayagauxŭtanŭ, rŭ guma ìānèarŭ āèxgacŭgŭpèxewa nanagagŭ. Rŭ tagaācŭ ñanagŭrŭgŭ: —Ngēma Pauru rŭ Chira i guxŭ i naānewa duŭxŭgŭxŭ chixexèègŭxŭ, rŭ nŭma rŭ ta nangugŭ. ⁷ —Rŭ Yachāŭ nixŭ ga nayaxuxŭ ga napatawa. Rŭ guxŭma i nŭmagŭ i ngēma yatŭgŭ rŭ tama naga naxŭnŭèchaŭ i tŭrŭ āèxgacŭ ya Dumacŭŭxārŭ mugŭ, erŭ nŭxŭ nixugŭe rŭ nangèxma i to i āèxgacŭ i Ngechuchu —ñanagŭrŭgŭ ga yema chixexŭ ga duŭxŭgŭ. ⁸ Rŭ yexguma nŭxŭ naxŭnŭègu ga yema oregŭ, rŭ poraācŭ nanuē ga yema muxŭma ga duŭxŭgŭ rŭ yema ìānèarŭ āèxgacŭgŭ ta. ⁹ Natŭrŭ ga Yachāŭ rŭ namŭcŭgŭ rŭ dŭerŭmaā nŭgŭ naxŭtanŭgŭ, rŭ yemacèx nayangèxgŭ.

Pauru rŭ Chira rŭ Beréawa nayexmagŭ

¹⁰ Rŭ yematama ga chŭtaxŭgu rŭ yema yaxŭgŭxŭ ga Techarónicacŭŭax rŭ ìāne ga Beréawa nanamugŭ ga Pauru rŭ Chira. Rŭ yexguma yéma nangugŭgu, rŭ Yudiŭgŭarŭ ngutaquèxepataŭwa naxŭ. ¹¹ Rŭ yema Yudiŭgŭ ga Beréacŭŭax, rŭ yema togŭ ga Yudiŭgŭ ga Techarónicawa yexmagŭxŭārŭ yexera narŭmemaègŭ. Rŭ norŭ ngŭchaŭmaā meāma nanayauxgŭ ga yema ore. Rŭ guxŭ ga ngunexŭgu rŭ Tupanaārŭ ore ga ũmatŭxŭwa nangŭe na meā nŭxŭ nacŭèxgŭxŭcèx ngoxi aixcŭma yŭxŭ ga yema ore ga Pauru rŭ Chira namaā nŭxŭ ixuxŭ. ¹² Rŭ muxŭma ga yema Beréacŭŭax ga Yudiŭgŭ rŭ Ngechuchuaxŭ nayaxŭgŭ. Rŭ yexgumarŭŭ ta muxŭma ga Griégugŭ ga Yatŭxŭgŭ rŭ ngexŭgŭ ga āèxgacŭgŭ namèx ixŭgŭxŭ, rŭ nayaxŭgŭ. ¹³ Natŭrŭ yexguma yema Yudiŭgŭ ga Techarónicacŭŭax nŭxŭ cuāchigagŭgu ga na Beréawa rŭ ta nŭxŭ na yaxuxŭ ga Tupanaārŭ ore ga Pauru, rŭ yéma naxŭ, rŭ nananuèxèè ga

yema iānecūāx ga duūxūgū na Paurumaā chixri nachopetūxūcēx. ¹⁴ Natūrū yexguma yemaxū nacuāchigagūga ga yema yaxōgūxū, rū paxama Pauruxū inaxūxūēēgū ga guma iānewa. Rū űuxre ga yema yaxōgūxū rū Pauruxū inixūmūcūgū. Rū dauxchitagu naxī rū űuxmata taxtūpechinūwa nangugū. Natūrū ga Chira rū Timutéu rū Beréagu narūchooma. ¹⁵ Rū yema duūxūgū ga Pauruxū iixūmūcūgūxū, rū wapurugu inayaxūmūcūgū űuxmata iāne ga Atenawa nangugū, rū űuxūchi Beréacēx nawoegu. Rū Pauru rū yema duūxūgūxū yēma namuga na paxa naxūtawa naxīxūcēx ga Chira rū Timutéu.

Atenawa nayexma ga Pauru

¹⁶ Rū yexguma Pauru rū Atenawa Chira rū Timutéuxū nanguxēēgu, rū tama nataāēcūraxū yerū nūxū nadau ga guma iānewa ga na poraācū naxchicūnēxāmaāmare na natupanaāxgūxū. ¹⁷ Rū yemacēx ga Pauru rū Yudiūgūarū ngutaquēxepataūwa Cristuchigaxū nixu namaā ga yema Yudiūgū rū yema togū ga tama Yudiūgū ixīgūxū ga Tupanaxū icuēxūūgūxū. Rū guxū ga ngunexūgu ga iāneārū plaza ga taxūwa rū ta Cristuchigaxū nixu namaā ga yema duūxūgū ga yēma āmūcūwa ixd.. ¹⁸ Rū nayexmagū ta ga űuxre ga yatūgū ga Epicūriūgūarū nguxēētaewa ngūexū, rū togū ga Etóicugūarū nguxēētaewa ngūexū. Rū nūmagū rū inanaxūgūe ga Paurumaā na yaporagatanūcūūxū. Rū űuxre ga nūmagū rū űanagūrūgū: —¿Rū tacū nixī i nūxū yaxuxū i űāa yatū i idexaechamarexū? —űanagūrūgū. Rū togū nanangāxūgū, rū űanagūrūgū: —Maneca wūxi i to i nachīūānecūāxārū tupanagūarū orearū uruū nixī —űanagūrūgū. Rū yemaācū nidexagū ga yema duūxūgū, yerū Pauru rū nūxū nixu ga ore ga mexū ga Ngechuchuchiga ga nuxācū wena na namaxūxū. ¹⁹ Rū dūxwa norū āēxgacūgūarū ngutaquēxechica ga Areópagu āegaxūwa nanagagū. Rū yēma nūxna nacagū, rū űanagūrūgū nūxū: —Toma nūxū tacuāxchaū na tacū rū nguxēētae i ngexwacaxūxū yīxū i ngēma namaā cunguxēētaexū. ²⁰ Erū toxcēx rū wūxi i taguma nūxū taxīnūēxū nixī i ngēma ore, rū nūxū tacuāxchaū na tacūchiga yīxū i ngēma nūxū quixuxū —űanagūrūgū. ²¹ Rū yemaācū nidexagū, yerū guxūma ga Atenacūāxgū rū yema to ga nachīūānecūāxgū ga yexma āchiūgūxū, rū woetama yexicagu narūxīnūē ga na nūxū yaxuxūcēx rū nūxū naxīnūēxūcēx ga yexwacaxūxū ga oregū. ²² Rū yemacēx ga Pauru rū inachi norū ngāxūtanūwa ga yema duūxūgū ga yema Areópaguwa ngutaquēxegūxū, rū űanagūrū: —Pa Atenacūāxgūxū, nūxū chadau na poraācū perū tupanagū perūxīnūēxū. ²³ —Erū ngēxguma perū ngutaquēxechicagūwa chixūpetūchigūgu, rū nūxū chadau i naxchicūnēxāgū i nūxū picuēxūūgūxū. Rū wūxi i nachicawa namaā charūxū i wūxi i yumūxēchica, rū ngēxma naxūmatū i naega i űaxū: “Tupana ya tama nūxū icuācū”, űaxū. Rū yima Tupana ya tama nūxū pecuāācūma nūxū picuēxūūgūcū nixī ya choma pemaā nūxū chixuchigacū. ²⁴ —Rū guma Tupana ga naxūcū ga guxūma ga naānegū rū guxūma i nawa ngēxmaxū, rū nūma nixī i norū yora yīxū i daxūgūxū i naāne rū űoma i naāne. Rū ngēmācēx nūma rū tama duūxūgū űūne ya tupaucagūga naxāchiū. ²⁵ —Rū nūmatama ya Tupana rū taxucēxma nanaxwēxe i duūxūgūarū ngūxēē na namaxūxūcēx i nūmax, erū taxūma nūxū nataxu. Rū nūmatama guxāna nanaxā i maxū, rū tūxna nanaxā ya buanecū ya namaā ingūātanūcūūcū. Rū nūmatama tūxna nanaxā i guxūma. ²⁶ —Nūma rū wūxi ga duūxūwatama nanaxū ga guxūma ga duūxūgū na guxū i naānewa nangēxmagūxūcēx. Rū nūma inaxuneta i űuxgu tá na nabuxū i duūxūgū rū ngexta tá naxāchiūxū i wūxichigū. ²⁷⁻²⁸ —Rū yemaācū nanaxū na naxcēx nadaugūxūcēx ga duūxūgū rū űoma ēānexūwa

tacūcèx idaugūxūrūū nūxū iyangaugūxūcèx. Natūrū nūma ya Tupana rū woetama guxūguma tūxna nangaicamachirèx, erū nagagu nixī i imaxèxū rū ixīāxtanūcūūxū rū ingèxmaxū, ngèxgumarūū i ñuxre i perū poperaarū ūmatūxūgū naxūmatūxūrūū, rū ñanagūrūgū:

“Rū Tupanaxācū tixīgū”, ñanagūrūgū. ²⁹ –Rū ñuxma na Tupanaxācūgū ixīgūxū, rū tama name i nagu tarūxīnūē rū Tupana rū wūxi i naxchicūnèxā i uirumūwa rū ěxna dīērumūwa rū ěxna nutawa ixūxūrūū nixī. Erū guxūma i ngēma naxchicūnèxāgū rū nūmatama i duūxūgū nagu naxīnūēxūācūma nanaxūgū. ³⁰ –Rū nuxcūma ga duūxūgū rū naēchitamare inatūē, natūrū nūma ga Tupana rū namaā yaxna naxīnū. Natūrū i ñuxma ya Tupana rū nanamu i duūxūgū i guxūwama na naxcèx nadaugūxū rū nūxū naxoexū i nacūma i chixexūgū. ³¹ Yerū nūma ga Tupana rū marū nūxū naxuneta i wūxi i ngunexū i nagu tá aixcūma guxū i ñoma i naānecūāx i duūxūgūna naçaxū i norū maxūchiga. Rū marū nūxū naxuneta ya wūxi ya yatū ya Ngechuchu, rū yima tá nixī ya duūxūgūna çacū. Rū Tupana rū guxāxūma nūxū nacūēxēē ga yema ga yexguma Ngechuchuxū wena namaxēēgu –ñanagūrū ga Pauru. ³² Rū yexguma yema wena na namaxēūchigaxū naxīnūēgu ga duūxūgū, rū ñuxre ga nūmagū rū Pauruxū nacugūē. Natūrū ga togū rū ñanagūrūgū: –Rū wenagu táxarū cuxū itarūxīnūē i ngēmachiga –ñanagūrūgū. ³³ Rū yexguma ga Pauru rū inaxūxū ga natanūwa. ³⁴ Natūrū ñuxre ga duūxūgū rū Pauruwe narūxī, rū Ngechuchuxū nayaxōgū. Rū natanūwa nayexma ga Diunīchiu ga wūxi ga Areópagutanūxū, rū wūxi ga ngecū ga Dāmari ga ngēga. Rū ñuxre ga togū rū ta nayaxōgū.

18

Corñtiuwa nayexma ga Pauru

¹ Rū yemawena rū inaxūāchi ga Pauru ga Atenawa, rū iāne ga Corñtiuwa naxū. ² Rū yēma namaā inayarūxū ga wūxi ga yatū ga Aqūru ga Pōtuanecūāx ga yexwacèx Dumawa ga Itāriaanewa ne ūxū namèx ga Prisilamaāx. Rū yēma Corñtiuwa nayexma yerū Dumacūāxgūarū āēxgacū ga Cāudiū nanamu ga na inachoxūxūcèx ga guxūma ga Yudiūgū ga Dumawa. Rū Pauru rū naxūtagu nanaxūāne. ³ Rū yexma nape rū naxchirunaxcèx ga dūxenūārū ūwa nūgūmaā napuracūē yerū woetama yema nixī ga norū puracū ga Pauru rū Aqūru rū Prisila. ⁴ Rū guxū ga ngūxchigaarū ngunexūgu rū Yudiūgūarū ngutaquēxepataūwa naxūūxū ga Pauru, rū duūxūgūmaā nidexaxū, rū nayaxucūxègūxū. Rū yexgumarūū ta nayaxucūxègūxū ga yema duūxūgū ga tama Yudiūgū ixīgūxū. ⁵ Rū yixcamaxūra inangugū ga Chira rū Timutēu ga Machedoniāwa ne īxū. Rū yexguma inanaxūgū ga Pauru ga aixcūma poraācū nūxū na yaxuxū ga Tupanaārū ore. Rū meāma Yudiūgūxū nangūēxē na Ngechuchu rū Tupana Nane ya Cristu na yīxū. ⁶ Natūrū nūmagū ga yema Yudiūgū rū inanaxūgūē ga Paurumaā na nanūēxū, rū namaā naguxchigagūxū. Rū yexguma inapamūchiru ga Pauru, yerū yema nixī ga wūxi ga cuèxruū naxcèx ga yema duūxūgū na yemawa nūxū yacūēxāchitanūxūcèx ga norū chixexū. Rū ñanagūrū nūxū: –Pegagu tátama nixī i na ipeyarūtauxexū, rū marū tama chaugagu tá nixī. Rū ñomaūcūū i choma rū tá ngēma tama Yudiūgū ixīgūxūtanūwa chaxū –ñanagūrū ga Pauru. ⁷ Rū inaxūxū ga guma ngutaquēxepataūwa. Rū yēma nayexma ga wūxi ga yatū ga Tīchiu ga Yuchugu āegaxū. Rū nūma rū Tupanaxū nangechaū rū yexma ngutaquēxepataūcūwagu naxāpata. Rū yemaxūtawa

naxū ga Pauru, rü yexma nape. ⁸ Rü Cripu ga ngutaquēxepataūārū āēxgacū rü namēx rü guxūma ga naxācūgū rü Cori ya Ngechuchuaxū nayaxōgū. Rü yexgumarū ta rü muxūma ga Corītiucūāxgū rü nayaxōgū ga yexguma nūxū naxīnūēgu ga yema ore, rü űuxūchi Pauru ínanabaiūxēē. ⁹ Rü wūxi ga chūtaxū rü nangoxetū ga Pauru. Rü Cori ya Tupana namaā nidexa, rü űanagūrū: —¡Rū tāxū i cumuūxū! ¡Rū nūxū íxuama i chorū ore! ¡Rū tāxū i curūchianexū! ¹⁰ —Erū choma rü chacuxūtagu, rü taxūetáma chixexū cumaā taxū. Erū daa íānewa rü choxū nangēxma i muxūma i chorū duūxūgū —ñanagūrū ga Tupana. ¹¹ Rü wūxi ga taunecūarū ngāxū Corītiuwa nayexma ga Pauru. Rü yéma yema duūxūgūtanūwa namaā nangūxēētae ga Tupanaārū ore. ¹² Natūrū yexguma Acayaaneārū āēxgacū yixīgu ga Gariōū, rü yema Yudiūgū rü wūxigu Pauruxū niyauxgū, rü āēxgacūpēxewa nana-gagū. ¹³ Rü űanagūrūgū nūxū ga guma āēxgacū: —Ñāā yatū rü duūxūgūxū naxucuxē na Tupanaxū yacuēxūgūxūcēx rü tama naga na naxīnūēxūcēx i tachiūāneārū mugū —ñanagūrūgū. ¹⁴ Rü Pauru marū nachonagūchaū, natūrū nūma ga āēxgacū ga Gariōū rü yema Yudiūgūxū nangāxū, rü űanagūrū: —Rü ngēxguma chi wūxi i taxū i chixexū naxūxgu, rü ēxna namāetagu, rü ngēxguma chi nixī i choma i pexū ichaxīnūxū, Pa Yudiūgūx. ¹⁵ —Natūrū ngēma pecūmachiga rü perū mugūchiga rü perū nguxēētaechiga na yīxū, rü choma rü tama nūxū chachuáxchaū i ngēma. ¡Rū pematama penamexēēx! Rü choma rü tama ngēmachigaarū āēxgacū chixīxchaū —ñanagūrū. ¹⁶ Rü yexguma ínanawoxū ga yéma. ¹⁷ Rü yexguma guxūma ga yema duūxūgū rü Yudiūgūarū ngutaquēxepataūārū āēxgacū ga Chótenegu āegaxūxū yexma niyauxgū. Rü yexmatama āēxgacū ga Gariōūpēxegu nanaçuaixgū. Natūrū nūma ga Gariōū rü taxu űanagūrūama.

Pauru rü Aūtioquíaçèx nataegu, rü űuxūchi wenaxārū inaxūāchi na norū tomaēxpūxūcūna to ga nachiiānegūwa nangeaxū ga Tupanaārū ore

¹⁸ Rü yemawena rü muxūma ga ngunexū yéma Corītiuwa nayexma ga Pauru. Rü yixcama nūxū narūmoxē ga yema yaxōgūxū rü nūxna inaxūāchi. Rü íāne ga Chēcreawa naxū namaā ga Prisila rü Aquiru. Rü Chēcreawa nūgū nidūpūxūeru ga Pauru yerū marū nayanguxēē ga wūxi ga uneta ga Tupanamaā nūxū yaxuxū. [Rū woetama yema nixī ga nacūmagū ga Yudiūgū ga yexguma yanguxēēgūāxgu ga wūxi ga uneta ga Tupanamaā nūxū yaxuxū.] Rü űuxūchi Chēcreaarū türewa rü wūxi ga wapu-rugu nichoū na Chíríaanewa naxīxūcēx. ¹⁹ Rü yexguma Epéchiuwa nangugūgu, rü Pauru nūxna nixūgachi ga Prisila rü Aquiru, rü Yudiūgūarū ngutaquēxepataūwa naxū. Rü yéma namaā nidexa ga yema Yudiūgū ga guma ngutaquēxepataūwa ngutaquēxegūxūxū. ²⁰ Rü yema Yudiūgū, rü muxūma ga ngunexūgū nūxū nacēēxūgū ga yexma na naxāūxūcēx, natūrū ga nūma rü tama nanaxwēxe. ²¹ Rü yemacēx nūxū narūmoxēāma, rü űanagūrū nūxū: —Rü ngēxguma Tupana naxwēxegu, rü wena táxarū pexcēx chataegu —ñanagūrū. Rü yemawena rü Epéchiuarū türewa nayarūxūe, rü inaxūāchi. ²² Rü Checharéaarū türewa nangu, rü yéma ínaxūe. Rü űuxūchi Yerucharéūwa naxū na nūxū yanamoxēxūcēx ga guxūma ga yema yaxōgūxū. Rü űuxūchi Aūtioquíaawa naxū. ²³ Rü yexguma marū űuxre ga ngunexū yéma Aūtioquíaawa nayexmagū, rü wenaxārū inaxūāchi ga Pauru na wūxichigū ga íāne ga Gárataanewa rü Fríyíaanewa yexmagūnewa íyadauxūcēx rü yataāēxēēgūāxūcēx ga guxūma ga yema yaxōgūxū ga guma íānegūwa yexmagūxū.

Aporu rü Epéchiuwa nüxü nixu ga Tupanaärü ore

²⁴ Rü yexgumañcüü rü Epéchiuwa nangu ga wüxi ga Yudiú ga Aporugu äegaxü. Rü nüma rü ñäne ga Aleyádríacüâx nixí, rü nüxü natauxcha ga duñxügüpéxewa na yadexaxü. Rü meäma nüxü nacuèx ga Tupanaärü ore i ümatüxü. ²⁵ Rü nüma meä nüxü nacuèx ga Cuáü ga baiüxëëruñärü nguxëëtae ga Cori ga Ngechuchuchiga, rü nüxü nacuèx na ñuxäcü Cuáü duñxügüxü íbaiüxëëxü. Natürü yexicaxütama nacuèx ga Ngechuchuchiga. Natürü poraäcü nataäëäcüma nidexa rü aixcüma nanangüexëë ga duñxügü. ²⁶ Rü nüma ga Aporu rü tama namuñäcüma inanaxügü ga na yadexaxü ga Yudiúgüarü ngutaquëxepataüwa. Natürü yexguma Aporuxü naxínüëgu ga Prisila rü Aquiru, rü napatawa nanagäü na yexeraäcü namaä inanguxüxëëäxüçèx ga Ngechuchuchiga. ²⁷ Rü yexguma Acayaanewa naxüxchaügu ga Aporu, rü yema yaxögüxü ga Epéchiucüâx nüxü narüngüxëëgü. Rü popera yéma namugü naxçèx ga yema yaxögüxü ga Acayacüâx na meä Aporuxü nayauxgüxüçèx. Rü yexguma Acayawa nanguxgu ga Aporu rü poraäcü nüxü narüngüxëë ga yema duñxügü ga Tupanaärü ngechaügagu Ngechuchuxü yaxögüxü. ²⁸ Rü guxü ga duñxügüpéxewa nüxü nüxü nacuèxëë ga poraäcü na inatüexü ga yema Yudiúgü ga tama Ngechuchuxü cuáxchaügüxü. Rü nümagü ga Yudiúgü rü taxucürüwama ñuxü ñanagürügü, yerü ga Aporu rü Tupanaärü ore ga ümatüxüwa meäma nüxü nanawëx ga na Ngechuchu rü aixcüma Tupana Nane ya Cristu na yíixü.

19

Epéchiuwa nayexma ga Pauru

¹ Rü yexguma Corñtiuwa nayexmayane ga Aporu, rü Pauru rü naxpüxanegu idaxü ga namawa nixüpetü, rü Epéchiuwa nangu. Rü yexma nüxü nayangau ga ñuxre ga yaxögüxü. ² Rü nüxna naca, rü ñanagürü nüxü: —¿Marü penayaxuxü i Tupanaäë i Üünexü ga yexguma peyaxögügu? —ñanagürü. Rü nümagü nanangäxü, rü ñanagürügü: —Tama. Tagama nüxü taxínüëchiga na tacü yíixü i Tupanaäë i Üünexü —ñanagürügü. ³ Rü yexguma ga Pauru rü nüxna naca rü ñanagürü nüxü: —¿Texéaxü peyaxögüxü ga yexguma ípebaiügu? —ñanagürü. Rü nümagü nanangäxü, rü ñanagürügü: —Toma nüxü tayaxö ga yema Cuáü ga baiüxëëruñärü nguxëëtae —ñanagürügü. ⁴ Rü yexguma ga Pauru rü ñanagürü nüxü: —Cuáü inanabaiüxëë ga yema duñxügü ga nüxü rüxoexü ga nacüma ga chixexü rü Tupanacèx daugüxü. Natürü yema duñxügümaä nüxü nixu ta na nüxü yaxögüäxüçèx ga Ngechuchu ga naweama äcü —ñanagürü ga Pauru. ⁵ Rü yexguma yemaxü naxínüëgu ga yema duñxügü rü ínabaiü naegagu ga Cori ya Ngechuchu. ⁶ Rü yexguma Pauru rü yema yaxögüxüçëtügu naxümëxgu, rü nüxna nangu ga Tupanaäë i Üünexü, rü to ga nagawachigü nidexagü, rü nüxü nixugüe ga Tupanaärü ore. ⁷ Rü maneca 12 ga yatü nixígü ga yema duñxügü. ⁸ Rü tomaëxpüx ga tauemacü yéma nayexma ga Pauru. Rü Yudiúgüarü ngutaquëxepataüwa naxüüxü rü tama namuñäcüma nüxü nixuuxü ga Tupanaärü ore. Rü nanangüexëë na ñuxäcü äëxgacü na yíixü ya Tupana, rü nüxü nanangüchaüxëë na Ngechuchuxü yaxögüäxüçèx. ⁹ Natürü nayexma ga ñuxre ga duñxügü ga tama nüxü cuëxgüchaüxü rü tama yaxögüchaüxü. Rü nümagü inanaxügüe ga na yema muxüma ga duñxügüpéxewa chixexü yaxugüexü nachigagu ga Cori ga Ngechuchu.

Rū yemacèx nūxna nixūgachi ga Pauru, rū toxnamana nanagagū ga yema yaxōgūxū. Rū guxū ga ngunexūgu namaā nūxū nixuchiga ga ore nawa ga wūxi ga ngutaquēxepataū ga Tiranuārū ngūepataū ga naega. ¹⁰ Rū yemaācū nanaxū ga taxre ga tauncē, rū yemaācū guxūma ga Áchiacūāxgū ga Yudiūgū rū Griégugū rū nūxū naxīnūē ga Cori ya Tupanaārū ore. ¹¹ Rū Tupana Pauruxū narūngūxēē ga na naxūāxū ga taxūgū ga mexūgū ga Tupanaārū poramaā naxūxū. ¹² Rū èixrūxū ga norū dechugū ga Pauru rū naxchirugū rū duūxūgū rū yema idaaweexūxūtawa nanangegū. Rū yexguma yema idaaweexū nūxū ingōgūgūgu ga yema naxchiru rū ēxna dechu, rū naxcèx nitaanegū. Rū yema duūxūgū ga ngoxoāxgūxū rū ta naxcèx nitaanegū. ¹³ Natūrū nayexma ga ñuxre ga Yudiūgū ga iānegūwachigū ixiētānūxū rū ngoxogūarū woxūwa puracūexū. Rū nūxū naxūgū na Cori ya Ngechuchuégagu na ínawoxūāxū ga ngoxogū nawa ga yema duūxūgū ga ngoxoāxgūxū. Rū ñanagūrūgū: —Ngechuchu ya Pauru nūxū ixuchigacūégagu pexū tamu na ípechoxūxūcèx —ñanagūrūgū ga yema Yudiūgū. ¹⁴ Rū yema 7 ga yema ūgūxū, rū wūxi ga Yudiūgūarū paigūarū āēxgacū ga Echebagu āegaxū nanegū nixīgū. ¹⁵ Natūrū wūxi ga ngunexūgu ga yexguma wūxi ga ngoxoxū ínatēxūchigūchaūgu, rū yema ngoxo nanangāxū, rū ñanagūrū: —Nūxū chacuèx ya Ngechuchu, rū nūxū chacuèx ya Pauru na texé yīxū. ¿Natūrū i pema rū texégū pixīgū? —ñanagūrū. ¹⁶ Rū yexguma ga yema yatū ga ngoxoāxū rū yema duūxūgū ga ínatēxūchigūchaūxūna nayuxu, rū nūxū narūporamaē ga guxūma, rū ínanagāuūxūne. Rū yemaācū ngexchiruxūma rū napíexūma nibuxmū ga guma íwa. ¹⁷ Rū guxūma ga Yudiūgū rū Griégugū ga Epéchiuwa yexmagūxū rū nūxū nacuáchiga ga yema. Rū poraācū namuūē ga guxūma. Rū yemaācū yexeraācū natchiga ga Cori ga Ngechuchu ga yéma. ¹⁸ Rū muxūma ga yema yaxōgūxū rū yéma ningugūetanū, rū guxū ga duūxūgūpēxewa nūxū nixugūechigū ga nūma rū ta na nayuūechiréxū, natūrū tá nūxū na naxoexū ga yema. ¹⁹ Rū muxūma ga yema iyuūechiréxū, rū yéma nanana ga norū poperagū ga yuūpane ga nawa nangūexū, rū guxāpēxewa ínanagu. Rū yexguma nangugūgūāgu ga natanū ga yema poperagū, rū maneca 50,000 tachinū ga dīeru ga tatanūxūwa nangu. ²⁰ Rū yemaācū ga Cori ya Tupanaārū ore, rū yexeraācū nixūchigū, rū yexeraācū duūxūgū nūxū nadau na ñuxācū naporaxū ga yema ore. ²¹ Rū yemawena ga Pauru, rū nagu narūxīnū ga Machedóniāānewa rū Acayaanewaxīra na naxūxū, rū yéma ñuxūchi Yerucharéūwa na naxūxū. Yerū yema ñanagūrū: —Rū ngema Yerucharéūwa tá chaxū, rū yixcama rū Dumawa rū tá ta chaxū —ñanagūrū. ²² Rū yemacèx nūgūpēxegu Machedóniāānewa nanamugū ga taxre ga norū ngūxēeruū ga Timutéu rū Eratu. Natūrū nūma ga Pauru rū ñuxre ga ngunexū Áchiagar narūxāūx.

Nanuē ga duūxūgū ga Epéchiuwa

²³ Rū yexgumaūcūū rū Epéchiuwa rū nanaxīxāchitanūāē ga duūxūgū, rū poraācū nanuē nachigagu ga Cori ya Tupanaārū ore. ²⁴ Rū yemaācū naxūpetū nagagu ga wūxi ga yatū ga dīerumūwa puracūxū ga Demétriuu āegaxū. Rū nūma rū ínanaxūxū ga norū tupana ga Atemíchaarū tupaucachicūnēxāgū ga dīerumūnaxcèx. Rū nayexma ga muxūma ga norū puracūtanūxū ga yemawa puracūexū. Rū guxūma poraācū meā nūxū naxātanū ga yema puracū. ²⁵ Rū nūma ga Demétriu rū nanangutaquēxēē ga

guxūma ga puracūtanūxū ga yemawa puracūexū, rū ñanagūrū nūxū: — Pa Chomūcūgūx, meā nūxū pecuēxgū na ñaā tórū dīerumūārū puracūga na ngīxū iyaxuxū i tórū dīeru. ²⁶ Rū marū nūxū pedaugū i ngēma Pauru rū nūxū pexīnūē na ñuxācū yaxucūxēgūāxū i duūxūgū, rū ñuxācū namaā nūxū yaxuxū na tama aixcūma tupanagū yīxū i ngēma tupanagū i yixema ixūgūxū. Rū ngēmaācū muxūma i duūxūgūxū nūxū narūxoexēē na tama tórū tupanagūaxū yaxōgūāxūcēx. Rū tama nūma Epēchiuwaxicatama ngēxū nawagū natūrū wixguxūchi taēx guxū i Áchiaanewa ngēmaācū chixri nayaxucūxēgū i duūxūgū. ²⁷ Rū pema nūxū pecuēx rū tórū puracūcēx rū naxāūcūma i ngēma. Rū wūxi i chixexū ta nixī i naxcēx i tórū tupana i Atemíchaarū tupauca ya taxūne. Rū ñuxma rū muxūma i duūxūgū rū ngīxū nangechaū i Atemícha i guxū i Áchiaanewa rū guxū i naānewa. Natūrū ngēma Pauruarū ucūxēgagu rū dūxwa taxuxūtama ngīxū nangechaū i duūxūgū, rū ngēmaācū dūxwa inaārūxo tá ta i tórū puracū —ñanagūrū ga Demétriu. ²⁸ Rū yexguma yemaxū naxīnūēgu, rū poraācū nanuē, rū tagaācū ñanagūrūgū: —¡Namaxū i Epēchiucūāxgūarū tupana i Atemícha! —ñanagūrūgū. ²⁹ Rū guxūma ga yema iānecūāxgū rū poraācū yexma ínatūēāē. Rū ínanayauxū ga Gayu rū Aritárcu ga Machedóniānecūāxgū ga Paurumūcūgū, rū guma i ga iānēarū ngutaquēxepataūwa nanagauxūtanū. ³⁰ Rū Pauru rū ta yexma naxūcuchaū na yema duūxūgūmaā yadexaxūcēx, natūrū yema yaxōgūxū nūxna nanachuxu ga yexma na naxūcuxū. ³¹ Rū yema Áchiaaneārū āēxgacūgūtanūwa rū nayexma ga ñuxre ga Paurumūcūgū ixīgūxū. Rū nūmagū rū ta Pauruxūtawa namugagū na tama yema ngutaquēxechicagu naxūcuxūcēx. ³² Rū yoxni ga duūxūgū ga yema íngutaquēxegūxūwa, rū nūmaxū rū wūxi ga oremaā aita naxūe, rū togū ga to ga oremaā aita naxūe. Yerū poraācū nanaxīxāchiāēgū ga guxūma ga yema duūxūgū ga yéma ngutaquēxegūxū. Rū muxūma rū tama nūxū nacuēxgū ga ſacūcēx na nangutaquēxegūxū. ³³ Natūrū yéma nayexma ga wūxi ga Yudíu ga Areyáūdrugu āegaxū. Rū yema togū ga Yudíugū rū namaā nūxū nixu ga ſacūcēx na nangutaquēxexū. Rū duūxūgūpēxewa nanamugū na yadexaxūcēx rū naētūwa nachogūxūcēx ga yema Yudíugū ga yéma yexmagūxū. Rū nūma ga Areyáūdru rū naxunagūmēxē na iyanachianegūxūcēx ga duūxūgū, na namaā yadexaxūcēx. ³⁴ Natūrū yexguma nūxū yacuēxāchitanūgu ga Aré rū Yudíu na yīxū, rū guxūma ga yema duūxūgū rū wūxigu tagaācū aita naxūe. Rū taxre ga ora ninge ga na tagaācū ñagūxū: —¡Namaxū i Epēchiucūāxgūarū tupana i Atemícha! —ñagūxū. ³⁵ Rū dūxwa yema iānēarū āēxgacū nanachiāchixēē ga yema muxūma ga duūxūgū, rū ñanagūrū nūxū: —Pa Epēchiucūāxgūx, guxūma i duūxūgū nūxū nacuēx na Atemíchaarū tupauca ya taxūnēarū daurū na ixīgūxū. Rū guxūma nūxū nacuēx na nūma tūxū nangēxmaxū i Atemíchachicūnēxā i daxūwa rūnguxū. ³⁶ —Rū ñuxma na guxūma nūxū na cuáxū na aixcūma yīxū i ngēma, rū name nixī na pechiāchixū, rū taxūma i chixexū pexūexū. ³⁷ —Erū ñaā yatūgū i nuā pegagūxū, rū taxūma i chixexū ngīmaā naxūgū i tórū tupana, rū tama chixexū nixugūe ngīchigagu. ³⁸ —Rū ngēxguma chi Demétriu rū ngēma namūcūgū i namaā napuracūexū rū nūxū nangēxmagu i ſacū i tama norū me ixīxū, rū nangēxma i ngutaquēxechicagū i ngextā āēxgacūgū duūxūgūxū ícagūxūwa. Rū name nixī na ngēma āēxgacūgūpēxewa namexēāxū i ſacū i tama norū me ixīxū. ³⁹ —Rū ngēxguma nangēxmagu i ſacū i to i perū guxchaxūgū, rū name nixī i iānēarū āēxgacūgūarū ngutaquēxewa penamexēē i ngēma.

40 —Erü ñuxma rü taxãücümamaxügü rü ngürüächi ãëxgacü ya tacü ya Dumawa ngëxmacü rü tüxna tá naxcëx naca i ngëma ñuxma ngupetüxü. Erü aixcüma taxumaãma tanangãxülega i ãëxgacü, ega tüxna nacaxgu naxcëx i ñaã ngutaquëxe i nawa pexãügatanüxü —ñanagürü. 41 Rü yexguma marü yema ñaxguwena, rü ínayamugü ga yema duüxügü.

20

Machedóniãñewa rü Griégugüchiüñewa naxü ga Pauru

1 Rü yexguma marü nangupetügu ga yema na íyacuxcuxü ga duüxügü, rü Pauru naxcëx nangema ga yema yaxögüxü na yaxucuxëgüãxücëx. Rü yexguma marü namaã nüxü nachaugu, rü nüxü narümoxë, rü inaxüächi ga Machedóniãñewa na naxüxü. 2 Rü yexguma yema nañewa yaxüpetügu, rü taãëxü ga oremaã nayaxucuxëgü ga yema yaxögüxü ga wüxichigü ga ñanewa yexmagüxü. Rü yemaãcü Griégugüchiüñewa nangu. 3 Rü yema nayexma ga tomaëxpüx ga tauemacü. Rü yexguma marü inaxüächichaügu ga Chíríaanewa na naxüxü, rü tama wapurugu nixü yerü nüxü nacuáchiga ga na ñuxre ga Yudíugü yamëxgüchaüxü. Rü yemacëx nagu narüxínü ga dauxchitagu na nataeguxü, rü wenaxârü Machedóniãñewa na naxüpetüxü. 4 Rü ínayaxümcügü ga Chópate ga Beréacüãx ga Píru nane, rü Aritárcu rü Següdu ga Techarónicacüãxgü, rü Gayu ga Derbecüãx, rü Timutéu, rü Tíquicu, rü Turuquínu ga Áchíaanecüãxgü. 5 Rü yema yatügü rü nüxíra topëxegu naxãgü, rü Tróawa toxü nayarünguxëgü. 6 Rü nawena ga yema Yudiugüarü peta ga üpetüchiga ga pãu ga ngearü puxëëruüãxü nagu nangögüxü, rü wapurugu Piripuwa itaxíächi. Rü wüximëëxpüx ga ngunexü ngupetügu, rü Tróagu nüxü tayangaugü ga yema topëxegu ägüxü. Rü yexma tarücho ga 7 ga ngunexü.

Tróagu nanaxüãne ga Pauru

7 Rü yema yüxüarü ngunexügu rü tangutaquëxegü namaã ga yema yaxögüxü na tanangöxücëx ga pãu ga bücuxü yema Ngechuchu toxü ngüxëëxürü. Rü yema yaxögüxümaã nidexa ga Pauru. Rü nanamëëë ga norü dexa ñuxmata ngãxücüwa nangu, yerü moxüãcü inaxüächichaü. 8-9 Rü daxüwa ga guma ípataarü tomaëxpüxchiüwa yexmaxü ga ucapuwa tangutaquëxegü. Rü namu ga omü ga yema naígüxü. Rü nayexma ga wüxi ga ngextüxücü ga Eutícugu ägegacü. Rü yema wüxi ga yema ucaputapüxarü íaxwa narüto. Natürü ga Pauruarü dexa, rü poraãcü namëx. Rü yemacëx ga guma ngextüxücü rü poraãcü nayaxta, rü düxwa nipeächi rü yema íaxwa narüngu, rü ñaxtüanegu nangu. Rü yema yucüma nanayauxgü. 10 Rü ínarüxí ga Pauru, rü nayanawüxüchi ga guma ngextüxücü, rü duüxügüxü ñanagürü: —¡Tãxü i pebaixächixü, erü namaxü nixí! —ñanagürü. 11 Rü yexguma wenaxârü daxü naxí, rü inanabücu ga yema pãu, rü nanangöx. Rü wenaxârü nidexa ñuxmata yangune, rü yexguma inaxüächi. 12 Rü guma ngextüxücü rü maxücü napatawa nanagagü. Rü yemacëx poraãcü nataãëgü ga guxüma ga nümagü.

Tróawa inaxüächi ga Pauru rü Miretuwa naxü

13 Rü yexguma ga Pauru rü ñanagürü: —Dauxchitagu tá chixü ñuxmatáta íãne ya Achüwa changu na ngëma pexü chixüexüçëx —ñanagürü. Rü yemacëx ga toma rü wapurugu tichoü rü yoxni napëxegu taxí ñuxmata Achüwa tangugü. 14 Rü yexguma Achugu Paurumaã togü tayangauxgu, rü yema

toxŭ nixŭe. Rŭ tachopetŭ ga yéma űuxmata Miterénewa tangugŭ. ¹⁵ Rŭ yéma itaxīāchi rŭ moxŭācŭ Quīuarŭ toxmēxtawa tachopetŭ. Rŭ yemaārŭ moxŭācŭ Chamowa tangugŭ. Rŭ yemaārŭ moxŭācŭama Miretuwa tangugŭ. ¹⁶ Rŭ yemaācŭ itixī yerŭ ga Pauru rŭ tama Áchiaanegu nanuxcŭchaŭ. Yerŭ nanaxwēxe ga paxa Yerucharéŭwa na nanguxŭ naxcēx ga Pētecōstearŭ ngunexŭ. Rŭ yemacēx naga narŭxīnŭ na tama Epéchiugu iyadauxŭ.

Yaxōgŭxŭārŭ āēxgacŭgŭ ga Epéchiucŭāxmaā nidexa ga Pauru

¹⁷ Natŭrŭ yexguma Miretuwa tangugŭgu rŭ Epéchiuwa naxcēx namuga ga Pauru na naxŭtawa naxīxŭcēx ga yema yaxōgŭxŭārŭ āēxgacŭgŭ ga Epéchiucŭāx. ¹⁸ Rŭ yexguma Pauruxŭtawa nangugŭgu, rŭ űanagŭrŭ nŭxŭ: — Pema meā nŭxŭ pecuēxgŭ ga űuxācŭ pepēxewa na chamaxŭxŭ ga guxŭgu ga yexguma noxritama nuā Áchiaanewa chaxŭxgu. ¹⁹ Rŭ guxŭguma ga yexguma petanŭwa chayexmagu, rŭ meāma chanaxŭ ga Cori ya Tupanaārŭ puracŭ, taguma chaugŭ chicuēxŭācŭma. Rŭ woo muēxpŭxcŭna poraācŭ changechaŭgu, nagagu ga yema chixexŭ ga chomaā naxŭgŭchaŭxŭ ga Yudīugŭ, natŭrŭ naētŭwa chanaxŭama ga yema puracŭ. ²⁰ Rŭ taguma íchayachaxŭchi ga pemaā nŭxŭ na chixuxŭ ga guxŭma ga yema ore ga perŭ mexŭcēx ixīxŭ. Rŭ guxŭ ga duŭxŭgŭpēxewa, rŭ pepatagŭwa rŭ ta pexŭ changŭexēē ga yema ore. ²¹ Rŭ Yudīugŭmaā rŭ yema tama Yudīugŭ ixīgŭxŭmaā nŭxŭ chixu na namexŭ ga na nŭxŭ naxoexŭcēx ga norŭ chixexŭgŭ rŭ Tupanaga naxīnŭēxŭcēx, rŭ nŭxŭ na yaxōgŭāxŭcēx ga tŭrŭ Cori ya Ngechuchu. ²² Rŭ űuxma rŭ Yerucharéŭwa chaxŭ erŭ Tupanaāē i Ūūnexŭ rŭ ngema choxŭ namu. Natŭrŭ tama nŭxŭ chacuēx na űacŭ tá choxŭ ūpetŭxŭ i ngema. ²³ Rŭ ngēma nŭxŭ chacuāxŭ nixī i duŭxŭgŭ tá choxŭ napoxcu rŭ guxchaxŭgŭ tá choxŭ naxŭpetŭ i Yerucharéŭwa. Rŭ ngēxicatama nixī i chomaā nŭxŭ yaxuxŭ i Tupanaāē i Ūūnexŭ i guxŭne ya űāne i ngextā íchixŭgŭxŭwa. ²⁴ Natŭrŭ tama ngēma āūcŭmaxŭgu charŭxŭnŭ erŭ nŭētama nixī ega woo chayuxgu. Natŭrŭ ngēma chanaxwēxexŭ nixī na taāēācŭma chapuracŭamaxŭ na meā chayanguxēēxŭcēx i ngēma puracŭ ga tŭrŭ Cori ya Ngechuchu choxna āxŭ rŭ nŭxŭ chixuxŭcēx i norŭ ore i mexŭ na űuxācŭ Tupana tŭxŭ ngechaŭxŭ. ²⁵ Rŭ űuxma rŭ marŭ nŭxŭ chacuēx rŭ tagutāma wena choxŭ pedaugŭ i pema ga marŭ pemaā nŭxŭ chixuxe na űuxācŭ āēxgacŭ na yīxŭ ya Tupana. ²⁶ Rŭ ngēmacēx i űoma i ngunexŭgu rŭ pemaā nŭxŭ chixu rŭ marŭ tama chaugagu nixī ega texē petanŭwa iyarŭtauxgu. ²⁷ Erŭ marŭ meāma pemaā nŭxŭ chixu i guxŭma i ngēma Tupana pexŭ naxwēxexŭ, rŭ taxŭma ichicŭx. ²⁸ Rŭ ngēmacēx i űuxma rŭ penaxwēxe na pexuāēgŭxŭ rŭ meā nŭxna pedaugŭxŭ i guxŭma i yaxōgŭxŭ i petanŭwa ngēxmagŭxŭ. Erŭ ngēma nixī i Tupanaāē i Ūūnexŭ naga pexŭ mugŭxŭ na nŭxna pedaugŭxŭcēx i ngēma Tupanaārŭ duŭxŭgŭ i yaxōgŭxŭ i Ngechuchu nagŭmaātama naxcēx taxexŭ. ²⁹ Choma nŭxŭ chacuēx rŭ ngēxguma íchixŭxgu, rŭ chowena tá pexcēx nuā naxī i togŭ i duŭxŭgŭ. Rŭ tá nanachixexēēchaŭ i ngēma yaxōgŭxŭ űoma airugŭ i idŭraexŭ i carnerugŭxŭ ngīachixēēxŭrŭrŭ. ³⁰ Rŭ woo petanŭwatātama nangēxmagŭ i nŭmaxŭ i tá doramaremaā nangŭexēēxŭ i ngēma yaxōgŭxŭ na nŭgŭwe naxīxēēāxŭcēx. ³¹ űPegŭna pedaugŭ, rŭ nŭxna pecuēācŭma na űuxācŭ tomaēxpŭxŭ ga taunecŭgu rŭ ngunecŭ rŭ chŭtacŭ rŭ taguma íchayachaxŭchixŭ ga pexcēx chaxauxācŭma na pexŭ chixucŭxēgŭxŭ ga wŭxichigŭ! ³² Rŭ űuxmax, Pa Chaueneēgŭx, rŭ Tupanana pexŭ chamugŭ. Rŭ chanaxwēxe i naga pexŭnŭe i norŭ ore i tŭxŭ nŭxŭ cuēxēēxŭ na űuxācŭ poraācŭ tŭxŭ

nangechaũxũ. Erũ ngẽma norũ ore tá pexũ naporaexẽẽ na tórũ Coricèx pemaxẽxũcèx rũ pexũ nangẽxmaxũcèx i pechica namaã i guxũma i duũxũgũ i Tupana dexũ. ³³ Choma rũ taxuguma chaugũcèx chanaxwèxe ga texéarũ díeru rũ texéchiru. ³⁴ Rũ pematama rũ meã nüxũ pecuèx ga ñuxãcũ daa choxmèxmaã na chapuracũxũ naxcèx ga yema choxũ rũ chomũcũgũaxũ taxuxũ. ³⁵ Rũ guxũguma meã pexũ changũexẽẽ na ngẽmaãcũ pepuracũexũ na nüxũ perũngũxèexũcèx i ngẽma duũxũgũ i nüxũ nataxuxũ. Rũ name nixĩ na nüxna pecuèxãchiexũ i Cori ya Ngechucharũ ore ga nümatama ñaxũ:

“Rũ narũmemaẽ nixĩ i pema na toguena penaxãxũ rũ tama i tũma pexna tanaxãxũ”, ñaxũ. ³⁶ Rũ yexguma yema ñaxguwena ga Pauru, rũ inacaxãpũxũ namaã ga guxũma, rũ nayumũxẽ. ³⁷ Rũ guxũma poraãcũ naxauxe, rũ Pauruna nanẽxãchigũ, rũ nüxũ nachũxgũ. ³⁸ Yerũ poraãcũ nangechaũẽ naxcèx ga yema ore ga namaã nüxũ yaxuxũ ga:

“Marũ tagutãma wena choxũ pedaugũ” ñaxũ. Rũ nümagũ ínayaxũmũcũgũ ñuxmata wapuruwa nangu.

21

Yerucharéũwa naxũ ga Pauru

¹ Rũ yexguma nüxna itaxĩãchi ga yema yaxõgũxũ, rũ wapuru gu tichoũ. Rũ capaxũ ga Coscèx noxtacũma tixaũ. Rũ moxũãcũ rũ Rodawa taxĩ. Rũ yéma itaxĩãchi, rũ Pátarawa tangugũ. ² Rũ yexma nüxũ tayangau ga wũxi ga wapuru ga Peníchiawa ùxũne. Rũ nagu tichoũ, rũ itaxĩãchi. ³ Rũ yixcamaxũra nüxũ tadaugũ ga Chipre. Rũ torũ toxwecũwawaama naxũ, rũ nüxũ tachopetũ. Rũ itañaxwetaxũ ñuxmata Chíríaanewa tangugũ. Rũ Tiruwa ítachoũ, yerũ yéma nixĩ ga ínauũãcũxũ ga guma wapuru. ⁴ Rũ yexma nüxũ tayangau ga yémacũãx ga yaxõgũxũ, rũ 7 ga ngunexũ yéma natanũwa tayexmagũ. Rũ Tupanaãe i Úünexũ nayadexagũxèẽ ga yema yaxõgũxũ, rũ Pauruxũ ñanagũrũgũ: —¡Tãxũ i Yerucharéũwa cuxũxũ! —ñanagũrũgũ. ⁵ Natürũ yexguma nangupetũgu ga yema 7 ga ngunexũgũ, rũ itaxĩãchi. Rũ yema yaxõgũxũ rũ towe narũxĩ. Rũ naxmèxmaãchigũ rũ naxãcũgũmaãchigũ toxũ ínixũmũcũgũ ga guxũma ñuxmata guma ñanechipenũwa tangugũ. Rũ yexma naxnũcũgu tacaxgũãpũxũ, rũ tayumũxègũ. ⁶ Rũ yexguma ga toma rũ nüxũ tarũmoxègũ, rũ tichoũ ga wapuruwa. Rũ nümagũ rũ napatacèx nawoegu. ⁷ Rũ toma rũ Tiruwa itaxĩãchi rũ Turemáidawa tangugũ. Rũ yéma ítachoũ, yerũ yexma nayacuèx ga wapuru gu na taxĩxũ. Rũ nüxũ tarũmoxègũ ga yema yaxõgũxũ ga yéma yexmagũxũ, rũ wũxi ga ngunexũ natanũgu tarũcho. ⁸ Rũ moxũãcũ itaxĩãchi ga yéma, rũ Checharéawa tangugũ. Rũ Piripi ga Tupanaãrũ orearũ uruũpatawa taxĩ. Rũ nüma rũ yema 7 ga ngũxèeruũgũ ga tupaucana daugũxũtanũxũ nixĩ. Rũ yexma naxũtagu tapegũ. ⁹ Rũ nüma nüxũ iyexma ga ágũmũcũ ga naxãcũgũ ga taguma ixãtecũ ga Tupanaãrũ orexũ ixugũecũ. ¹⁰ Rũ yexguma marũ ñuxre ga ngunexũ yéma tayexmagũgu, rũ Yudéaanewa ne naxũ ga wũxi ga Tupanaãrũ orearũ uruũ ga Agabugu ãegaxũ. ¹¹ Rũ yexguma toxũtawa nanguxgũ ga Agabu, rũ nanayaxu ga Pauruarũ goyexũ. Rũ namaã nügũ ninèxgũcutũ, rũ nügũ nináimèx, rũ ñanagũrũ: —Tupanaãe i Úünexũ marũ chomaã nidexa rũ ñanagũrũ:

“Rũ ñaãcũ tá nayanèxgũ i Yudũgũ i Yerucharéũwa i ñaã goyexũãrũ yora. Rũ ngẽma duũxũgũ i tama Yudũgũ ixĩgũxũna tá nanamugũ”, ñanagũrũ. ¹² Rũ yexguma yema orexũ taxĩnũègu, rũ toma rũ yema Checharéacũãxgũmaã Pauruxũ tacèexũgũ ga tama Yerucharéũwa na naxũxũcèx. ¹³ Natürũ nüma

ga Pauru rü toxŭ nangãxŭ rü ñanagŭrŭ: —¿Tŭxcŭŭ pexauxe rü choxŭ pengechaŭxëe? Choma rü íchamemare na chinãixŭ. Rŭ ngëxgumarŭŭ ta rü marŭ íchame na Yerucharëŭgu chayuxŭ naxcëx ya Cori ya Ngechuchu — ñanagŭrŭ. ¹⁴ Rŭ yexguma marŭ taxuacŭma tanachuxugu, rŭ tachianemare, rŭ ñatarŭgŭ: —¡Ëcŭ yangu i Cori ya Tupanaãrŭ ngŭchaŭ! —ñatarŭgŭgŭ. ¹⁵ Rŭ yemawena rŭ togŭ tamexëëgŭ, rŭ Yerucharëŭwa taxŭ. ¹⁶ Rŭ towe narŭxŭ ga ñuxre ga yaxŭgŭxŭ ga Checharëacŭŭxgŭ, rŭ Machŭŭpatawa toxŭ nagagŭ. Rŭ nŭma nixŭ ga wŭxi ga Chŭperecŭŭxgŭ ga ŭpamama woetama yaxŭxŭ. Rŭ naxŭtagu tapegŭxŭ.

Chaŭtiáguxŭtagu nanaxŭãne ga Pauru

¹⁷ Rŭ yexguma Yerucharëŭwa tangugŭgu, rŭ yema yaxŭgŭxŭ rŭ taãëacŭma toxŭ nayauxgŭ. ¹⁸ Rŭ moxŭŭacŭ ga Pauru rŭ tomaã Chaŭtiáguxŭtagu nanaxŭãne. Rŭ yema nangutaquëxegŭ ga guxŭma ga yaxŭgŭxŭãrŭ ãëxgacŭgŭ. ¹⁹ Rŭ nŭxŭ narŭmoxë ga Pauru, rŭ ñuxŭchi meãma namaã nŭxŭ nixu ga guxŭma ga yema Tupana ŭxŭ ga yexguma yema tama Yudŭgŭ i xŭgŭxŭmaã nŭxŭ yaxuxgu ga Tupanaãrŭ ore. ²⁰ Rŭ yexguma Paururŭ orexŭ naxŭnŭëgu ga nŭmagŭ, rŭ Tupanaxŭ nicuëxŭŭgŭ. Rŭ ñanagŭrŭgŭ Pauruxŭ: —Dŭcëx, Pa Toeneëx, cuma nŭxŭ cucuëx rŭ nangëxma i muxŭchixŭ i Yudŭgŭ i yaxŭgŭxŭ. Rŭ guxŭma i nŭmagŭ rŭ nanaxwëxegŭ na nagu naxŭxŭ i ngëma mugŭ ga Moŭché ŭmatŭxŭ. ²¹ Natŭrŭ ga togŭ ga tama yaxŭgŭxŭ rŭ marŭ namaã nŭxŭ nixugŭgŭ na cuma rŭ cunangŭxëëxŭ i guxŭma i Yudŭgŭ i togŭ i nachŭŭãnewa ngëxmagŭxŭ, na tama naga naxŭnŭëxŭcëx i ngëma mugŭ ga Moŭché ŭmatŭxŭ. Rŭ marŭ namaã nŭxŭ nixugŭgŭ na cunangŭxëëxŭ na tama tŭxŭ ñawiŭtchëxmŭpëxechiraŭxŭcëx ya nanegŭ, rŭ na tama naga naxŭnŭëxŭcëx i tacŭmagŭ ga Moŭché tŭxŭ muxŭ. ²² ¿Tacŭ tá ixŭëxŭ i ñuxmax? Erŭ ngëma Yudŭgŭ i yaxŭgŭxŭ rŭ aixcŭma tá nŭxŭ nacuëxgŭ na marŭ nuã cunguxŭ. ²³ ¡Rŭ ngëmacëx name nixŭ na cunaxŭxŭ i ngëma tá cumaã nŭxŭ tixuxŭ! Nuã totanŭwa nangëxma i ãgŭmŭcŭ i yatŭgŭ i yanguxëëchaŭxŭ i wŭxi i uneta i Tupanamaã nŭxŭ yaxuxŭ. ²⁴ ¡Ngema tupauca ya taxŭnewa nagagŭ, rŭ wŭxiyu namaã yanguxëë i ngëma tacŭma ga Moŭché tŭxna ãxŭ, rŭ Tupanapëxewa pegŭ peyamexëëgŭ! ¡Rŭ nŭxŭ naxŭtanŭ i ñuxregu nŭxŭ naxŭtanŭ na yadŭpŭxŭerugŭxŭcëx i ngëma yatŭgŭ na ngëmaacŭ yanguxëëgŭãxŭcëx i norŭ unetagŭ! Rŭ ngëmawa rŭ guxŭma i ngëma Yudŭgŭ rŭ tá nŭxŭ nacuëxgŭ na aixcŭma cuma rŭ ta naga cuxŭnŭxŭxŭ i ngëma mugŭ ga Moŭché ŭmatŭxŭ rŭ tama aixcŭma na yŭxŭ ga yema ore ga cuchiga ga nŭxŭ yaxugŭëxŭ. ²⁵ Rŭ ñuxŭchi ngëma yaxŭgŭxŭ i tama Yudŭgŭ ixŭgŭxŭ, rŭ marŭ naxcëx tanaxŭmatŭ ga torŭ ore na tama nangŭxgŭãxŭcëx i tacŭ i namachi i marŭ togŭ norŭ tupananetachicŭnëxãgŭxŭ namaã icuëxŭŭgŭxŭ, rŭ tama na nangŭxgŭãxŭcëx ya nagŭ, rŭ tama nangŭxgŭãxŭcëx i naëxŭgŭ rŭ ëxna naxŭnagŭ i wëxnaãxŭ, rŭ tama naŭ i ngëmaã rŭ ëxna naŭ ya yatŭmaã inapexŭcëx —ñanagŭrŭgŭ.

Tupauca ga taxŭnewa Pauruxŭ niyauxgŭ

²⁶ Rŭ yexguma ga Pauru rŭ yema tupauca ga taxŭnewa nanagagŭ ga yema ãgŭmŭcŭ ga yatŭgŭ. Rŭ moxŭŭacŭ rŭ Tupanapëxewa nŭgŭ namexëë ga Pauru wŭxiyu namaã ga yema yatŭgŭ. Rŭ ñuxŭchi guma tupauca ga taxŭnewa namaã naxŭcu na paimaã nŭxŭ yaxuxŭcëx na 7 ga ngunexŭgu tá yŭxŭ na yanguxëëgŭãxŭ ga yema norŭ uneta ga Tupanamaã nŭxŭ yaxugŭxŭ, rŭ yemawena rŭ tá na inaxãmaregŭãxŭ ga norŭ ãmaregŭ ga Tupanaxŭ namaã

yacuèxùŭgùxù ga wùxichigù. ²⁷ Rù yexguma marù nagùxchaŭgu ga yema 7 ga ngunexù, rù ñuxre ga Yudiŭgù ga Áchiaanecŭâxgù rù Pauruxù nadaugù ga tupauca ga taxùnewa. Rù yema Yudiŭgù rù duŭxùgùxù nanuèxèè na Pauruxù yayauxgùxùcèx. Rù yemacèx Pauruna nayuxgù. ²⁸ Rù tagaâcù aita naxùe ñaxùmaâ: —Pa Tomücügù Pa Yudiŭgùx, ¡Paxa toxù perungùxèèx! Ñâ nixì i ngèma yatù i guxùwama yangùxèèchigùxù i duŭxùgù na taxchi naxaieŭcèx i yixema i Yudiŭgù, rù naxchi na naxaieŭcèx i ngèma mugù ga Moìché ùmatùxù rù daa tupauca ya taxùne. Rù naetùwa i ñuxmax rù nuxa daa tupauca ya taxùnegu nanamucu i ñuxre i duŭxùgù i tama tacùmagu ìxù, rù ngèmaâcù nanaxùxaxèè i ñâ nachica i üunexù —ñanagùrügù. ²⁹ Rù yema ñanagùrügù yerù ũpaacù Yerucharèŭwa Paurumaâ nùxù nadaugù ga Turuquínu ga wùxi ga Epèchiucŭâx ga tama Yudiŭ ìxìxù. Rù nùxù nacuèxgùgu rù Pauru marù yexma nanaxùcuxèè ga tupauca ga taxùnegu. ³⁰ Rù guxùma ga yema ìanecŭâxgù rù poraâcù nanuè. Rù tupauca ga taxùnecèx nibuxmù, rù Pauruxù niyauxgù, rù tupaucaarù ìâxtùwa nanatùchigügù. Rù yexguma paxa nanawâxtagù ga guma tupauca ga taxùneârù ìâxgù. ³¹ Rù yexguma Pauruxù yamèxgùchaŭgu ga duŭxùgù, rù Dumacŭâx ga churaragùarù âèxgacùxùtawa nanguchiga ga ore na guxùwama ga Yerucharèŭwa rù na nanuèxù ga duŭxùgù. ³² Rù yexgumatama ga guma churaragùarù âèxgacù rù nanangataquèxèè ga yema norù capitâŭgù namaâ ga norù churaragù, rù paxa yema duŭxùgù ìyexmagùxùtwa naxì. Rù yexguma guma âèxgacùxù rù yema churaragùxù nadaugùgu ga duŭxùgù, rù ìnayachaxâchigù ga na Pauruxù yamèxgùxù. ³³ Rù yexguma ga guma âèxgacù rù Paurucèx nixù rù nayayaxu. Rù nanamu na taxre ga cadenamaâ na yanèxgùâxùcèx. Rù nùxna naca na texè yìixù, rù tacù naxùxù. ³⁴ Natùrù yema muxùma ga duŭxùgù rù toxica ga oremaâ aita naxùe ga wùxichigù. Rù yexguma taxuacùma meâ nùxù nacuèxgu ga tacùcèx na nanuèxù, rù guma âèxgacù rù nanamu na churaragùpatawa Pauruxù nagagùxù. ³⁵⁻³⁶ Rù yexguma churaragùpataarù toxònewa nanguxgu ga Pauru, rù churaragù nayangetaŭgù naxchaxwa ga yema muxùma ga duŭxùgù, yerù nanuèxùchi rù nawe nicaetanù rù ñanagùrügù: —¡Yamèxùchi! —ñanagùrügù.

Pauru rù duŭxùgùpèxewa nügùètùwa nidexa

³⁷ Rù yexguma marù churaragùpatagu yamucuchigùchaŭgu rù Pauru rù Griégugawa guma âèxgacùna naca rù ñanagùrù: —¿Cuxù namexù na cumaâ nùxù chixuxù i wùxi i ore? —ñanagùrù. Rù nùma ga âèxgacù nanangâxù rù ñanagùrù: —Èxna nùxù cucuèx na Griégugawa quidexaxù. ³⁸ ¿Tama èxna cuma yìixù i Equitucŭâx ga ũpaxùra rù duŭxùgùxù cunuèxèèxù na âèxgacùmaâ nügù nadèjxùcèx rù dauxchitawa ga taxùema ìxâpataxùtwa cunagagùxù ga 4000 ga yatùgù ga máètaxùgù? —ñanagùrù. ³⁹ Rù yexguma ga Pauru rù nanangâxù, rù ñanagùrù: —Choma rù Yudiŭ chixì, rù Tarsucŭâx chixì. Rù Chirìchiaanewa rù yima nixì ya wùxi ya ìâne ya taxùchine. Rù ngèxguma curù me yixùgu, rù cuxna chaca na duŭxùgùmaâ chidexaxùcèx —ñanagùrù. ⁴⁰ Rù yexguma ga guma âèxgacù rù: —Ngù —ñanagùrù. Rù nùma ga Pauru, rù churaragùpataarù toxònegu nachinagù, rù naxunagùmèxè na nachìachixùcèx ga duŭxùgù. Rù yexguma nachìachiegu, rù Yudiŭgawa nidexa, rù ñanagùrù nùxù:

22

1—Pa Chautanùxùgùx, ¡rù choxù iperùxìnüè i ngèma ñuxma tá pemaâ nùxù

chixuxŭ na chaugŕētŭwa chidexaxŭcŕx! —ñanagŭrŭ. ² Rŭ yexguma nŭxŭ naxŭnŭĕgu ga na Yudiŭgawa namaā yadexaxŭ, rŭ yexeraācŭ inayarŭchianegŭ. Rŭ yexguma namaā yadexagu ga Pauru, rŭ ñanagŭrŭ: ³—Choma rŭ Yudiŭ chixŭ, rŭ Chirŭchiaaneārŭ ŭāne ga Tarsugu chabu. Natŭrŭ doma ŭāne ya Yerucharŕtŭwa chaya, rŭ Gamaniŕu nixŭ ga chorŭ nguxŕĕrŭ. Rŭ meāma nawa changux ga guxŭma ga mugŭ ga nuxcŭmaŭgŭxŭ ga tŕrŭ oxigŭ nagu ŭxŭ. Rŭ guxŭguma naxcŕx chadau na guxŭma i chorŭ ngŭchaŭmaā Tupanaŭxŭ chapuracŭxŭ, ngŕxgumarŭŭ i guxŭma i pema i ñuxmax. ⁴—Rŭ choma ga ŭpa rŭ poraācŭ nawe chingŕchigŭ ga yema Ngechuchuaxŭ yaxŕgŭxŭ na chanadŕjŭcŕx. Rŭ ŭchanayauxŭ, rŭ chanapoxcue ga muxŭma ga yema yaxŕgŭxŭ ga yatŭxŭgŭ rŭ ngexŭgŭ. ⁵—Rŭ nŭma ya paigŕeru rŭ guxŭma i tupauca ya taxŭneārŭ āŕxgacŭgŭerugŭ rŭ nŭxŭ nacuŕxgŭ na aixcŭma yŭxŭ i ñāā chorŭ ore. Yerŭ nŭmagŭ rŭ choxna nanaxŭgŭ ga popera na choxŭ nangŭxŕĕgŭxŭcŕx ga tatanŭxŭgŭ ga Yudiŭgŭ ga Damacuwa yexmagŭxŭ. Rŭ yema Damacuwa chaxŭ na naxcŕx chayadauxŭ-cŕx ga yema Ngechuchuaxŭ yaxŕgŭxŭ, rŭ nuā Yerucharŕtŭwa na chanagagŭxŭcŕx rŭ nuxā chayapox-cuexŭcŕx.

Pauru nŭxŭ nixu na ñuxācŭ Ngechuchuaxŭ yaxŕŕxŭ

⁶—Natŭrŭ yexguma namagu chixŭyane rŭ marŭ chingaicaxgu ga Damacuwa na changuxŭ, rŭ meāma tocuchigu nixŭ ga yexguma. Rŭ ngŭrŭāchi wŭxi ga omŭ ga poraxŭ ga daxŭwa ne baxixŭ rŭ choxŭ nabaxi. ⁷—Rŭ ñaxtŭānegu chayangu, rŭ nŭxŭ chaxŭnŭ ga wŭxi ga naga ga ñaxŭ choxŭ: “Pa Chaurux, ŭtŭxcŭŭ i chowe quingŕchigŭxŭ?” ñaxŭ. ⁸—Rŭ yexguma ga choma rŭ chanangāxŭ, rŭ ñacharŭgŭ:

“ŭRŭ texŕ quixŭ Pa Corix?” ñacharŭgŭ. Rŭ nŭma ga yema naga rŭ choxŭ nangāxŭ, rŭ ñanagŭrŭ:

“Choma nixŭ i Ngechuchu ya Nacharŕtŭcŭāx, rŭ chorŭ duŭxŭgŭ nixŭ i ngŕma nawe quingŕchigŭxŭ”, ñanagŭrŭ choxŭ. ⁹—Rŭ yema chomŭcŭgŭ rŭ nŭxŭ nadaugŭ ga yema omŭ, rŭ nabaixāchiāĕgŭ, natŭrŭ tama nŭxŭ naxŭnŭĕ ga yema naga ga chomaā idexaxŭ. ¹⁰—Rŭ nŭxna chaca, rŭ ñacharŭgŭ ga chomax:

“ŭRŭ ŭacŭ tá chaxŭxŭ, Pa Corix?” ñacharŭgŭ. Rŭ yexguma ñanagŭrŭ choxŭ ga Cori:

“ŭŭrŭda, rŭ inachi, rŭ Damacuwa naxŭ, rŭ ngema tá cumaā nŭxŭ nixu ya wŭxi ya yatŭ na ŭacŭ tá cuxŭxŭ!” ñanagŭrŭ ga nŭma ga Cori. ¹¹—Rŭ yexguma ga choma rŭ chixoxetŭ yema omŭĕmamaā, rŭ yemacŕx ga yema chomŭcŭgŭ rŭ choxmŕxgu yangŭgŭācŭma choxŭ nigagŭ, rŭ yemaācŭ Damacuwa changu. ¹²—Rŭ yema nayexma ga wŭxi ga yatŭ ga Ananŭgu āĕgacŭ. Rŭ nŭma nixŭ ga wŭxi ga yatŭ ga aixcŭma Tupanaga ŭnŭcŭ, rŭ nŭma rŭ meāma nayanguxĕĕ ga yema mugŭ ga Moŭchĕ ŭmatŭxŭ. Rŭ guxŭma ga Yudiŭgŭ ga Damacuwa yexmagŭxŭ, rŭ meā nachiga nidexagŭ. ¹³—Rŭ nŭma ga Ananŭ rŭ choxŭ ŭnayadau. Rŭ yexguma chauxŭtawa nanguxgu rŭ ñanagŭrŭ choxŭ:

“Pa Chaueneĕ Pa Chaurux, ŭwenaxārŭ ingŕoxnaxŕtŭ!” ñanagŭrŭ. Rŭ yexgumatama wenaxārŭ chingŕoxnaxŕtŭ rŭ meāma nŭxŭ chadau. ¹⁴—Rŭ yexguma ñanagŭrŭ ta:

“Yima Tupana ya nuxcŭmaŭgŭxŭ ga tŕrŭ oxigŭārŭ Tupana cuxŭ naxuneta na nŭxŭ cucuāxŭcŕx i norŭ ngŭchaŭ, rŭ na nŭxŭ cudaduxŭcŕx ya yima Cristu ya mecŭ, rŭ naāxwatama nŭxŭ cuxŭnŭxŭcŕx i naga. ¹⁵—Erŭ cuma tá nixŭ i guxŭ i duŭxŭgŭmaā nŭxŭ quixuchigaxŭ ga ñuxācŭ na Tupanaxŭ cudaduxŭ

rü cumaã yadexaxũ. ¹⁶ —¡Rü ñuxma rü marü taxuũma ícunanguxẽẽ! ¡Rü írũda rü ínabaie! ¡Rü Cori ya Ngechuchuégagu naxcèx ínaca na cuxũ nüxũ nangechaũxcèx i curü pecadugü!” ñanagürü choxũ.

Pauru nüxũ nixu na ñuxãcü Tupana namuxũ na yema tama Yudiugü ixĩgũxũtanüwa naxũxcèx

¹⁷⁻¹⁸ —Rü yexguma Yerucharéücèx chataeguxgu, rü tupauca ga taxũnawa chaxũ na yéma chayumüxèxècèx. Rü changoxetü, rü nüxũ chadau ga Cori ya Tupana. Rü ñanagürü choxũ:

“¡Napaxaãẽ, rü inaxũãchi i nuã Yerucharéüwa, erü duũxũgü rü tãütáma naga naxĩnüẽ i ngẽma ore i chauchiga nüxũ quixuxũ!” ñanagürü. ¹⁹ —Rü choma chanangãxũ, rü ñacharügü:

“Pa Corix, nüma i duũxũgü rü nüxũ nacuèxgü ga choma na yĩxũ ga guxũne ga ngutaquèxepataũgüwa chaxũxũ rü íchanayauxũxũ rü chanapoxcuexũ rü chayacuaixgũxũ ga yema cuxũ yaxõgũxũ. ²⁰ —Rü yexguma yamèxgüãgu ga guma curü duũcü ga Etébaũ ga curü orearü uruũ, rü chomatama yéma chayexma, rü chorü me nixĩ ga na yamèxgüãxũ. Rü choma nixĩ ga nüxna chadauxũ ga naxchiru ga yema yamèxgũxũ”, ñacharügü nüxũ. ²¹ —Natürü nüma ga Cori rü ñanagürü choxũ:

“¡Rü paxa cugü namexèẽ rü inaxũãchi! Erü yaxũguxũ i nachiũñanegüwa i ngẽma duũxũgü i tama Yudiugü ixĩgũxũtanüwa tá cuxũ chamu” —ñanagürü.

Churaragüarü ãëxgacümeñëwa nayexma ga Pauru

²² Rü yexguma Pauru yema ñaxgu rü yexma nayacuèxèẽgü ga na meã nüxũ inaxĩnüxũ ga yema duũxũgü. Rü yexguma aita naxüeãcüma ñanagürügü: —¡Noxtacüma peyamá! Rü name nixĩ i na nayuxũ rü ngèxma na yanaxoxũ —ñanagürügü. ²³ Rü yexguma aita naxüegu, rü norü gáuxũchirumaã nibuatanücüü, rü ãtèxeanexũ daxũ niwogũtanücüü. ²⁴ Rü yexguma yemaxũ nadèuxgu ga churaragüarü ãëxgacü, rü nanamu ga churaragüpatagu na yamucuchigüãxũcèx ga Pauru. Rü nanamu na poraãcü naçuaixgüãxũcèx na yadexaxũcèx na nüxũ nacuáxũcèx ga tüxcüü yĩxũ na yemaãcü nachigamaã aita naxüexũ ga duũxũgü. ²⁵ Rü yexguma marü yanèixgüãgu na naçuaixgüãxũcèx, rü Pauru nüxna naca ga yema capitáũ ga yéma yexmaxũ, rü ñanagürü: —¿Éxna pexmèxwa nangèxma na penaçuaixxũ i wüxi i Dumacũãx ega tama nüxna pecaxiragu? —ñanagürü. ²⁶ Rü yexguma yemaxũ naxĩnügu ga capitáũ, rü guma churaragüarü ãëxgacüxũtawá naxũ, rü namaã nüxũ nixu, rü ñanagürü: —¿Tacü tá cuxü? Erü ñaã yatü rü Dumacũãx nixĩ —ñanagürü. ²⁷ Rü yexguma ga guma churaragüarü ãëxgacü, rü Paurucèx nixũ, rü nüxna naca rü ñanagürü nüxũ: —¿Aixcüma yĩxũ na Dumacũãx quĩxũ i cumax? —ñanagürü. Rü nüma ga Pauru nanangãxũ, rü: —Ngũ —ñanagürü. ²⁸ Rü yexguma ga guma churaragüarü ãëxgacü rü nanangãxũ, rü ñanagürü: —Choma rü poraãcü choxũ naxãtanü na Dumacũãx chaugü chixĩxèèxũ —ñanagürü. Rü yexguma nachonagü ga Pauru, rü ñanagürü: —Natürü i choma rü woetama chorü bucüma Dumacũãx chixĩ —ñanagürü. ²⁹ Rü yexgumatama nüxna nixĩgachi ga yema Pauruxũ çuaixgüchaũxũ. Rü nümatama ga yema churaragüarü ãëxgacü rü ta namuũ ga yexguma nüxũ nacuèxgu ga Dumacũãx na yĩxũ ga Pauru, yerü marü cadenamaã nayanèixchirèx.

Yudiugüarü ãëxgacügütücumüpèxewa nayexma ga Pauru

³⁰ Rū yema churaraguarū āēxgacū meāma nūxū nacuāxchaū ga tūxcūū na ínaxuaxūgūāxū ga yema Yudiūgū. Rū yemacèx ga moxūācū rū nanamu na nangutaquēxegūxūcèx ga paigūarū āēxgacūgū rū guxūma ga yema āēxgacūgūtūcumū ga Yudiūgūarū. Rū nayawēgū ga Pauruarū cadena rū yēma āēxgacūgūpēxewa nanagagū.

23

¹ Rū Pauru meāma nūxū nadawenū ga yema āēxgacūgū, rū űanagūrū nūxū: —Pa Chautanūxūgūx, chomatama nūxū chachuèx rū guxūguma meā chamaxū ga Tupanapēxewa űuxmata űoma i ngunexūwa nangu —űanagūrū. ² Rū yexguma ga yema paigūeru ga Ananīā rū nanamu ga yema Pauruarū ngaicamana yexmagūxū na naāxwa tayamēxgūxūcèx. ³ Rū yexguma ga Pauru rū űanagūrū nūxū: —Tupana tá cuxū napéax, Pa Āēxgacūx. Cuma rū dūxētūwaxīca cume natūrū aixepena rū nachixe i curū maxū. Rū űuxma rū ngema curūto na Moīché űmatūxū i mugū nūxū ixuxūācūma choxna cuçaxūcèx. Natūrū wūxi i chixexū cuxū erū cumatama rū tama naga cuxīnū i ngēma Tupana tūxū muxū erū cunamu na choxū napéaxūcèx —űanagūrū ga Pauru. ⁴ Rū yexguma ga yema yexmagūxū rū űanagūrūgū: —ĶTūxcūū i ngēmaācū űacu namaā quixugūxū i paigūeru ya Tupana nūxū unetacū? —űanagūrūgū. ⁵ Rū Pauru nanangāxū, rū űanagūrū: —Tama nūxū chachuèx, Pa Chautanūxūgūx, na paigūeru yīixū. Erū Tupanaārū ore i űmatūxūwa nūxū tadau rū űanagūrū:

“ĶTama curū āēxgacūmaā chixexū quixugū!”

űanagūrū. ⁶ Rū yexguma nūxū nacuèxgu ga Pauru ga na Chaduchéugū yīixū ga togū, rū na Parichéugū yīixū ga togū, rū yema āēxgacūgūpēxewa tagaācūma űanagūrū: —Pa Chautanūxūgūx, choma rū Parichéu chixī, rū Parichéu nane chixī. Rū ngēmacèx choxna pecagū i űuxmax, erū chayaxō i wena tá na namaxēxū i yuexū —űanagūrū. ⁷ Rū yexguma yema űaxgu ga Pauru, rū yema Parichéugū rū Chaduchéugū rū inanaxūgūe ga nūgūmaā na iyaporagaexū, rū yexma nūgū nitoye ga yema ngutaquēxewa. ⁸ Erū ngēma Chaduchéugū naga rūxīnūēgu rū tama wena namaxē i ngēma yuexū, rū nataxuma i orearū ngeruūgū i daxūcūāx, rū nataxuma i naāēgū —űanagūrūgū. Natūrū ngēma Parichéugū rū nayaxōgū na nangēmaxū i guxūma i ngēma. ⁹ Rū yemacèx guxūma aita naxūe. Rū űuxūchi űuxre ga ngūexēeruūgū ga Moīchéarū mugūwa nguxēētaegūxū ga Parichéugūtūcumūwa űgūxū rū inachigū, rū űanagūrūgū: —Toxcèx rū taxūma i chixexū naxū i űaā yatū. Bexmana wūxi i űacu rū naāē namaā nidexa rū ēxna wūxi i orearū ngeruū i daxūcūāx —űanagūrūgū. ¹⁰ Rū yexeraācū norū numaā nanaxīxāchīāēgū ga yema duūxūgū. Rū yemacèx naxoegaāe ga guma churaraguarū āēxgacū ga na Paurugu naxagūgūchaūxū. Rū norū churaragūxū namu na yēma duūxūgūtanūwa Pauruxū napugūxūcèx rū wena churaragūpatawa na nagagūāxūcèx. ¹¹ Rū moxūācūarū chūtaxūgu Paurucèx nangox ga Cori ga Tupana, rū űanagūrū nūxū: —ĶRū nataāē! Rū ngēxgumarūū i nūma Yerucharéūwa choxū na quixuchigaxū, rū ngēxgumarūū tā ta nixī i Dumawa na choxū quixuchigaxū —űanagūrū ga Tupana.

Yudiūgū naxcèx nadaugū na űuxācū Pauruxū yamēxgūchaūxū

¹² Rū moxūācū, rū űuxre ga Yudiūgū rū nūgūmaā inaxunetagū ga tāūtāma na nachībūexū rū naxaxegūxū űuxmatāta Pauruxū yamēxgū. Rū űanagūrūgū:

–Tachixēxūgugū tá ega tacū ingōxgūgu naxūpa na yamáxū i Pauru –ñanagürügū. ¹³ Rū 40 arū yexera ga yatūgū nixī ga yema nūgūmaā ixunetagūxū. ¹⁴ Rū paigūarū āēxgacūgūtanūwa rū Yudiūgūarū āēxgacūgūgūtanūwa naxī, rū ñanagürügū nūxū: –Marū togūmaā itaxuneta rū tachixēxūgugū tá ega tacū tangōxgūgu naxūpa na tayamáxū i Pauru. ¹⁵ Rū name nixī i pema rū ngēma togū i pexrū āēxgacūgūtūcumūwa ūgūxū, rū churaragūarū āēxgacūna naxcēx peyacagū i ñuxma na moxū wena pepēxewa nagagūāxūcēx i Pauru. ¡Rū namaā nūxū pixu na penaxwēxegūnetaxū na meā nūxū pecuáxchaūxū i nachiga! Rū toma rū tá marū ítamemare na namagu tayamáxūcēx naxūpa na ínanguxū –ñanagürügū. ¹⁶ Natürū ngīne ga Paurueyēx rū nūxū nacuáchiga ga Pauruxū na yamēxgūchaūxū, rū yemacēx churaragūpatawa naxū na Paurumaā nūxū yanaxuxūcēx. ¹⁷ Rū Pauru naxcēx naca ga wūxi ga capitáū, rū ñanagürū nūxū: –¡Curū āēxgacūxūtawa naga i ñaā ngextūxūxū, erū nūxū nangēxma i ore i namaā nūxū yaxuxchaūxū! –ñanagürū. ¹⁸ Rū yema capitáū rū āēxgacūxūtawa nanaga ga yema ngextūxūxū. Rū ñanagürū nūxū: –Ngēma poxcuxū i Pauru rū chauxcēx naca, rū choxna naca na nuā cuxūtawa chanagaxūcēx i ñaā ngextūxūxū, erū nūxū nangēxma i ore i cumaā nūxū yaxuxchaūxū –ñanagürū. ¹⁹ Rū naxmēxgu yayaxāchiācūma toxnamana nanaga ga āēxgacū, rū yēma nūxna naca rū ñanagürū: –¡Tacū yīxū i ngēma chomaā nūxū quixuxchaūxū? –ñanagürū. ²⁰ Rū nūma ga ngextūxūxū nanangāxū, rū ñanagürū: –Ngēma Yudiūgū, rū nūgūmaā ínaxunetagū na cuxna naxcēx nacagūxūcēx na moxū Yudiūgūarū āēxgacūgūtūcumūpēxewa na cunagaxūcēx i Pauru. Rū tá cumaā nūxū nixugū na meā nūxū nacuēxgūchaūxū i nachiga. ²¹ –¡Natürū tāūtama nūxū cuyaxō! Erū 40 arū yexera i yatūgū rū marū nūgūmaā ínaxunetagū, rū ñanagürügū:

“Tachixēxūgugū tá ega tacū ingōxgūgu rū ēxna ixaxegūgu naxūpa na yamáxū i Pauru”, ñanagürügū. Rū ñuxma rū marū ínamemare, rū namagu nananēixgū, rū curū orexícatama nixī i ñuxma ínanguxēēgūxū –ñanagürū. ²² Rū yexguma ga āēxgacū rū ínayamu ga yema ngextūxūxū, rū nūxna naxāga na taxūemaā nūxū yaxuxūcēx ga na namaā nūxū yaxuxū ga yemachiga.

Āēxgacū ga Perixūtawa Pauruxū namu

²³ Rū yexguma ga guma āēxgacū rū taxre ga norū capitáūcēx naca, rū ñanagürū nūxū: –¡Penamexēē i 200 i churaragū i nacutūmaāmare íxīxū, rū 70 i churaragū i cowarutagu íxū, rū 200 i churaragū i wocaxemaā íxāxnexū na 9 arū oragu i chūtacū Checharéawa naxīxūcēx! ²⁴ –¡Rū ngēxgumarūū ta penamexēē i ñuxre i cowarugū i Paurucēx na tórū āēxgacū i Perixūtawa naxūxūcēx rū na taxūma nūxū ūpetūxūcēx i namawa! –ñanagürū. ²⁵ Rū yema capitáūgūmaā yēma nanamu ga wūxi ga popera ga ñaxū:

²⁶ “Choma i Cláudiu Díchiu, rū cuxū charūmoxē Pa Āēxgacū ya Mecūxūchi Pa Perix. ²⁷ Rū yima yatū ya cuxcēx ngēma chanamucū, rū Yudiūgū nayayauxgū rū wixguxūchi taēx nayamēxgū. Natürū yexguma nūxū chacuáchigagu na Dumacūāx na yīxū, rū yēma chaxū chorū churaragūmaā, rū nūxna chanapu. ²⁸ Rū nūxū chacuáxchaū ga tacū ga chixexūmaā na ínaxuaxūgūāxū, rū yemacēx Yudiūgūarū āēxgacūgūtūcumūpēxewa chanaga. ²⁹ Rū yexguma nūxū chacuēx ga na Yudiūgūarū muchigacēxmare na ínaxuaxūgūāxū. Natürū taxūma ga chixexū naxū na tūxcūū yamáxūcēx rū napoxcuxūcēx. ³⁰ Natürū yexguma nūxū chacuáchigagu ga na nūgūmaā ínaxunetaxū ga Yudiūgū

ga na yamèxgüãxüçèx, rü yexgumatama nagu charüxînú na cuxütawa chanamuxü. Rü yema ínaxuaxüğüxü, rü namaã tá nüxü chixu na cuxütawa naxîxü rü cumaã nüxü na yanaxugüxüçèx na ñacüçèx ínaxuaxüğüãxü,

ñanagürü. ³¹ Rü yema chütaxügu inaxîãchi ga yema churaragü, yexgumarüü ga norü ãëxgacü na namuxürüü. Rü Pauruxü nigagü ñuxmata Aütípatiwa nangugü. ³² Rü moxüãcü rü nawoegu ga yema churaragü ga nacutümaãmare íxîxü rü naxpataüwa naxî. Rü yema churaragü ga cowarutagu íxü, rü Paurumaã inaxîãma. ³³ Rü yexguma Checharéawa nangugügu, rü ãëxgacü ga Perina nanaxã ga yema popera, rü Pauruxü rü ta inamugü. ³⁴ Rü yexguma nüxü nadaumatügu ga popera ga ãëxgacü ga Peri, rü Pauruna naca ga ngextãüãx na yîxü. Rü yexguma nüxü nacüexgu ga na Chirichianecüãx yîxü, rü ñanagürü nüxü: ³⁵ –Cuxü tá icharüxînú i ngëxguma ínangugügu i ngëma cuxü íxuaxüğüxü –ñanagürü. Rü yexguma nanamu ga churaragü na wüxi ga ucapu ga ãëxgacü ga Erodepatawa yexmaxüwa nüxna na nadaugüxüçèx.

24

Pauru rü ãëxgacü ga Peripëxewa nügüétüwa nidexa

¹ Rü wüximëëxpüx ga ngunexü ngupetügu, rü Yerucharéüwa ne naxü ga paigüeru ga Ananiã, namaã ga ñuxre ga Yudiügarü ãëxgacügerugü rü wüxi ga yatü ga meãma dexaxü cuãxü ga Téturu ga naega. Rü nümagü rü ãëxgacü ga Perixütawa naxî na namaã nüxü yanaxugüxüçèx ga tüxcüü Pauruxü na ínaxuaxüğüxü. ² Rü yexguma Pauruxü yéma nagagügu, rü inanaxügu ga Téturu ga nüxü na yaxuxü, rü ñanagürü:

–Moxëxüchima i cuma Pa ãëxgacü Pa Perix, erü cugagu nixî i meãma toxü naxüpetüxü i nuã. Rü cugagu nixî i nuã i ñoma i nachüãnewa na toxü nangëxmaxü i muxüma i mexügu. ³ Rü moxë cuxna taxã erü guxüwama rü guxüguma cuxütawa tanayauxgü i guxüma i ngëma mexügu Pa ãëxgacüxüchima, Pa Perix. ⁴ Natürü tama yexeraãcü cuxü chachixewechaü. Rü ngëmacèx cuxna chaca na paxaãchi meã toxü icurüxînúxü. ⁵ Rü ñuxma rü wüxi i orexü cumaã chixuxchaü. Rü marü nüxü tadau i ñaã yatü rü wüxi i ñaaweanerüü na yîxü, erü chixexümaã nayauxcuxëgü i Yudiügu i guxü i naãnewa na nügü yatoyexüçèx. Rü nüma nixî i norü ãëxgacü i ngëma duüxügu i nüxü yaxöğüxü i Ngechuchu i Nacharétucüãx. ⁶ Rü toma tayauxgü i ñaã yatü ga yexguma tupauca ga taxüne naxüxaxëëchaügu. Rü torü mugü tomaã nüxü íxuxüãcüma nüxna tacagüchaü. ⁷ Natürü ínangu ga churaragüarü ãëxgacü ga Díchiu, rü muxüma ga norü churaragümaã toxna nanapu. Rü toma i ínaxuaxüğüxe, rü toxü namu na cuxütawa taxüxüçèx. ⁸ Rü ñuxma rü marü name i cumatama nüxna cuca i ngëma Pauru na nüxü cucüãxüçèx na aixcüma yîxü i guxüma i ngëma naxèx ítanaxuaxüğüxü i tomax –ñanagürü. ⁹ Rü yema togü ga Yudiügu rü ta, rü ñanagürügu: –Rü aixcüma nixî i ngëma ore –ñanagürügu. ¹⁰ Rü yexguma ga guma ãëxgacü ga Peri rü naxmëxmaã Pauruxü naxuneta na yadexaxüçèx. Rü yexguma ga Pauru, rü ñanagürü: –Chorü taãëmaã cupëxewa chaugüçèx chidexa, erü nüxü chacuëx na mucüma ga taunecü ñoma i nachüãneärü ãëxgacü quiüxü. ¹¹ Marü name i cumatama naxèx ícuca, erü 12 i ngunexüxícata nangu-petü ga na Yerucharéüwa changuxü na Tupanaxü chayarücuëxüüxüçèx. ¹² Rü bai ga tupauca ga taxünewa, rü bai ga ngutaquëxepataüğüwa, rü bai ga ngürüanewamare ga íãnewa choxü nadaugü ga Yudiügu ga na texémaã

íchiporagacūūxū, rŭ na chananuēxēēxū ga duūxūgŭ. ¹³ Rŭ ñuxma i ñaā duūxūgŭ i choxū íxuaxūgūxū, rŭ bai i wūxiwaxūra cuxcēx nanangoxēēgŭ na aixcūma yīxū i ngēma naxcēx choxū ínaxuaxūgūxū. ¹⁴ Natŭrŭ cumaā nūxū chixu, rŭ nuxcūmaūgūxū ga chorŭ oxigŭarŭ Tupanaāxū nixī i chapuracūxū ngēxgumarū i choxū na nanaxwēxexū ya Ngechuchu ya Cristu ya nūxū chayaxōcū. Rŭ ngēma nixī i nūmagŭ i Yudiŭgŭ naxugŭāgu rŭ na:

“Tomare i ore”, ñagūxū. Rŭ aixcūma nūxū chayaxō i guxūma i Tupanaārŭ mugŭ ga Moīché ūmatūxū rŭ guxūma i Tupanaārŭ ore ga nuxcūmaūgūxū ga norŭ orearŭ uruūgŭ ūmatūgūxū. ¹⁵ Rŭ choma rŭ ta yema nuxcūmaūgūxūrŭ Tupanaāxū chayaxō. Rŭ naxrŭū chayaxō rŭ tá wena na namaxēxū i ngēma yuexū i mexūgŭ rŭ chixexūgŭ. ¹⁶ Rŭ ngēmacēx nixī i guxūguma meā chaugūna chadaaxŭ na chauāēwatama nūxū chacuāxūcēx na chamexū i Tupanapēxewa rŭ duūxūgŭpēxewa. ¹⁷ Rŭ dŭcax, Pa Āēxgacūx, rŭ ñuxre ga taunecŭ togŭ ga nachīūānegu chixūgŭ, rŭ dŭxwaxarŭ chauchiūānecēx wena chataegu na nuā chanangexūcēx ga dīeru ga namaā nūxū charūngūxēēchaūxū i chautanūxūgŭ i Yudiŭgŭ i nūxū nataxuxū, rŭ nuā Tupanana chanaxāxūcēx i chorŭ āmaregŭ. ¹⁸⁻¹⁹ Rŭ yema ngunexūgu rŭ tupauca ya taxūnewa Tupanana íchanaxā ga chorŭ āmaregŭ, nawena na chaugŭ chamexēēxū ga Tupanapēxewa. Rŭ tama muxŭ ga duūxūgŭmaā chayexma, rŭ tama chananuēxēē ga duūxūgŭ ga yexguma ñuxre ga Yudiŭgŭ ga Áchiaanecŭāx choxū daugŭgu ga yēma tupauca ya taxūnewa. Rŭ ngēmagŭ chí nixī i ñuxma nuā íxū na choxū ínaxuaxūgūxūcēx ega ŭacŭ nūxū ngēxmagu i chauchiga. ²⁰ Rŭ ngēxguma tama ŭacŭ nūxū ngēxmagu ga yema tupauca ya taxūnewa choxū daugūxū, jŭrŭ ēcŭ ñaā ñuxma nuxmagūxū cumaā nūxū ixugŭ na ŭacŭ ga chixexūxū chowa nadaugūxū ga yexguma Yudiŭgŭarŭ āēxgacŭgŭtŭcumŭpēxewa chayexmagu! ²¹ Rŭ ñaxūxīcatama nixī ga chorŭ ore ga tagaācŭ namaā chachonagūxū ga yexguma yema āēxgacŭgŭpēxewa chayexmagu:

“Rŭ ñuxma rŭ choxna pecagŭ erŭ choma chayaxō i wena tá na namaxēxū i yuexū”, ñacharŭgŭ ga yexguma —ñanagŭrŭ ga Pauru. ²² Natŭrŭ ga Peri rŭ meā nūxū nacuēx ga yema Cristuaxū yaxōchiga. Rŭ yemacēx ga yexguma Pauruarŭ orexū naxīnŭgu, rŭ ínayachaxāchi ga na nŭxna naçaxū, rŭ ñanagŭrŭ Yudiŭgūxū: —Ngēxguma churaragŭarŭ āēxgacŭ i Díchiu nŭma ŭxgu, rŭ tá meāma nūxū chacuēx i ngēma naxcēx ípenaxuaxūxū —ñanagŭrŭ. ²³ Rŭ yexguma ga Peri rŭ norŭ capitāūxū namu ga na Pauruna nadauxūcēx. Natŭrŭ tama nanapoxcuxūchi, rŭ tama nanachuxu ga na naxūtagu naxīāneāxū ga namŭcŭgŭ, rŭ nūxū na nangūxēēgūxū. ²⁴ Rŭ ñuxre ga ngunexū marŭ ngupetŭgu rŭ wena yēma naxū ga Peri ngīmaā ga naxmēx ga Drusíla ga Yudiŭ íxīcŭ. Rŭ Paurucēx nayacaxēē, rŭ nūxū naxīnŭ ga yema ore ga Pauru namaā nūxū ixuxŭ ga Cristuaxū na yaxōxūchiga. ²⁵ Natŭrŭ yexguma Pauru meāma namaā nūxū ixuxgu na ñuxācŭ Tupana naxwēxexū na meā imaxūxū rŭ ñuxācŭ nanaxwēxexū na tŭrŭ maxūmaā meā icuāxū rŭ ñuxācŭ tá tŭxna naçaxū i tŭrŭ maxūchiga, rŭ poraācŭ nabaixāchiāē ga Peri. Rŭ dŭxwa ñanagŭrŭ nūxū: —jĒcŭ íixŭ i ñuxmax! Rŭ ngēxguma ñuxguacŭ icharŭāŭxmaregu, rŭ wena táxarŭ cuxcēx changema —ñanagŭrŭ. ²⁶ Yerŭ Peri ínananguxēē na Pauru chí dīeru nŭxna íxāxū na yangēāxūcēx, rŭ yemacēx muēxpŭxcŭna naxcēx nangemaxŭ, rŭ namaā nidexaxū. ²⁷ Rŭ taxre ga taunecŭ yemaācŭ nixīgŭ. Rŭ ínanguxuchi ga Peri ga na āēxgacŭ yīxū, rŭ nachicŭi ningucuchi ga Pŭrchiu ga Festu. Natŭrŭ nŭma ga Peri, rŭ

Yudíugümaã nügü namecümamaxēēchaŭ, rü yemacèx tama ínananguxuchixēē ga Pauru.

25

Āëxgacü ga Festupëxewa nayexma ga Pauru

¹ Rü Checharéawa nangu ga Festu na yéma āëxgacüxü yaxücuxütcèx. Rü marü tomaëxpüx ga ngunexü yéma nayexmagu, rü wenaxârü ínaxüâchi, rü Yerucharéüwa naxü. ² Rü yéma Yerucharéüwa rü yema paigüarü āëxgacügü rü Yudíugüarü āëxgacügü rü Pauruxü ínaxuaxüügü Festupëxewa. ³ Rü naxcèx ínacagü ga Yerucharéüwa Pauruxü na namuxütcèx. Yerü númagü rü nagu narüíntüē na namagu yacuxéüügüâxü na yexma yamèxgüâxütcèx. ⁴ Natürü ga Festu rü nanangâxü, rü ñanagürü: —Checharéagu napoxcu i Pauru, rü choma rü tá paxa ngema Checharéawa chaxü. ⁵ Rü ngēmacèx name nixí i perü āëxgacügü rü chowe narüxí i Checharéawa, rü ngēxguma tacü rü chixexü naxüxgu i ngēma yatü, rü ngema tá nixí i chomaã nüxü pixugüxü —ñanagürü. ⁶ Rü maneca 8 rü éxna 10 ga ngunexü Yerucharéüwa nayexma ga Festu, rü ñuxüchi Checharéacèx nataegu. Rü yexguma ínanguxguarü moxüâcü rü yema nachica ga ngextá duüxüügüna ínaçaxüwa naxü, rü yéma nayarüto norü tochicaxüwa. Rü Paurucèx nangema na yéma napëxewa nagagüâxütcèx. ⁷ Rü yexguma yexma yaxücuxgu ga Pauru, rü yema Yudíugü ga Yerucharéüwa ne íxü, rü naxcèx naxí. Rü muxüma ga chixexügümaã ínanaxuaxüügü. Natürü taxuwama nüxü nüxü nadauxēē na aixcüma yíixü ga yema naxcèx ínaxuaxüügüâxü. ⁸ Rü yexguma ga Pauru rü nanangâxü, rü ñanagürü: —Pa Āëxgacüx, taxuüma ga chixexü namaã chixugü ga yema muügü ga Moiché úmatüxü, rü bai ga tupauca ya taxünnemaã, rü bai ga āëxgacü ya Chécharumaã —ñanagürü. ⁹ Natürü núma ga Festu rü Yudíugümaã nügü namecümamaxēēchaŭ, rü yemacèx Pauruna naca, rü ñanagürü nüxü: —¿Cunaxwèxexü na Yerucharéüwa cuxüxü na ngema cuxna chaçaxütcèx naxcèx i guxüma i ngēma naxcèx cuxü ínaxuaxüügüxü? —ñanagürü. ¹⁰ Rü yexguma ga Pauru rü nanangâxü, rü ñanagürü: —Choma rü cupëxewa changëxma na choxna cuçaxütcèx, erü cuma nixí i cuxü naxunetaxü i āëxgacü ya tacü ya Chécharu na āëxgacü quiíxü i núma. Rü ngēmacèx chanaxwèxe i nuã choxna cuca. Erü taxuüma i chixexü chaxü i Yudíugümaã, ngëxgumarüü i cuma meãma nüxü cucuèx. ¹¹ Ngëxguma chi tacü i chixexü chaxüxgu rü marü name na naxcèx choxü yamèxgüxü, rü marü name i na chayuxü. Natürü ngëxguma nataxüxguma i tacü i aixcüma ixíxü i ngēma naxcèx choxü ínaxuaxüügüxü, rü taxuacüma texé Yudíugüna choxü tamu. Rü naxcèx íchaca na númatama ya āëxgacü ya tacü ya Chécharu choxna naçaxütcèx —ñanagürü ga Pauru. ¹² Rü yexguma ga Festu rü norü ucuxëruüügü ga āëxgacügümaã nidexa, rü ñuxüchi ñanagürü Pauruxü: —Marü naxcèx ícuca na āëxgacü ya tacü ya Chécharu cuxna çaxütcèx. Ēcü, ñuxma rü naxütawa tá cuxü chamu —ñanagürü.

Āëxgacü ga Agripapëxewa nayexma ga Pauru

¹³ Rü ñuxre ga ngunexü ngupetügu, rü Checharéawa nangugü ga Yudíugüarü āëxgacü ga Agripa rü naëyèx ga Bereniche, na Festuxü yanamoxëgüxütcèx. ¹⁴ Rü marü ñuxre ga ngunexü yéma nayexmagügu, rü Agripamaã nüxü nixu ga Festu ga Pauruchiga, rü ñanagürü: —Nuã nangëxma i wüxi i yatü i poxcuxü ga Peri tama ínguxuchixēēxü. ¹⁵ —Rü yexguma choma Yerucharéüwa chayexmagu, rü paigüarü āëxgacügü rü

Yudiūgūarū āēxgacūgūerugū rū inanaxuaxūgū, rū naxcèx ínacagū na namaā chanaxueguxūcèx rū na yamèxgūāxūcèx. ¹⁶ —Rū choma chanangāxū, rū tama tocūma nixī i toma i Dumacūāxgū i na tayamāxū i wūxi i duūxū ega tama nūgūétūwa yadexaxíragu napèxewa i ngēma ínaxuaxūgūxū. ¹⁷ —Rū yemacèx ga yexguma nūma nangugū ga yema Yudiūgū, rū yexgumaārū moxūācū rū chorū tochicaxūwa chitocuchi na nūxna chaçaxūcèx nachiga ga yema, rū yéma naxcèx changema ga yema yatū. ¹⁸ —Natūrū ga yema Yudiūgū ga ínaxuaxūgūxū, rū taxuūma ga ſacū ga chixexū ga choma íchananguxēēxūxū nixugū. ¹⁹ —Natūrū norū Tupanachiga rū wūxi ga yatū ga Ngechuchuchiga nixī ga yema nagu yadexagūxū. Rū nūma ga Yudiūgū nūxū nixugū ga na nayuxū ga yema Ngechuchu, natūrū Pauru nūxū ixuxgu rū marū wena namaxū. ²⁰ —Rū yexguma ga choma ga tama na nūxū chacuáxū ga űuxācū tá chanamexēēxū ga yema guxchaxū, rū yemacèx nūxna chaca ga Pauru ngoxi nanaxwèxe ga Yerucharéūwa na naxūxū, na yéma nūxna chaçaxūcèx. ²¹ —Natūrū nūma ga Pauru naxcèx ínaca ga na āēxgacū ya tacū ya Chécharupèxewa naxūxū na nūmatama ya Chécharu nūxna çaxūcèx. Rū yemacèx chanamu na meā nūxna nadaugūxūcèx űuxmata choma āēxgacū ya Chécharuxūtawa chanamux —ñanagūrū. ²² Rū yexguma ga Agripa rū ñanagūrū Festuxū: —Choma rū ta nūxū chaxīnūchaū i norū ore i ngēma yatū —ñanagūrū. Rū Festu nanangāxū rū ñanagūrū: —Moxū tátama nūxū cuxīnū —ñanagūrū. ²³ Rū moxūācū yema ucapu ga āēxgacūgū íngutaquēxegūxūwa nangugū ga Agripa rū Bereniche rū poraācū nangèxāēgū. Rū namaā ínangugū ta ga churaragūarū āēxgacūgū rū yema íānecūāxgū ga corigūxūchi ixīgūxū. Rū űuxūchi Paurucèx nangema ga Festu na yema āēxgacūgūpèxewa nagagūāxūcèx. ²⁴ Rū ñanagūrū ga Festu: —Pa Āēxgacū Pa Agripax, rū Pa Guxāma i Pema ya Nuxmagūxe, ñāā nixī i ngēma yatū i nachigamaā yadexagūxū i guxūma i Yudiūgū. Rū chopèxewa inanaxuaxūgū ga Yerucharéūwa rū nūma rū ta. Rū guxūguma tagaācūma choxna naxcèx nacagū na nayuxū. ²⁵ —Natūrū i choma rū taxuūma i ſacū i chixexū i naxūxū nawa chadau na naxcèx yamāxū. Natūrū nūma ga Pauru rū naxcèx ínaca na āēxgacū ya tacū ya Chécharu nūxna çaxū, rū ngēmacèx nagu charūxīnū na ngema chanamuxū. ²⁶ —Natūrū taxuūma i ore i aixcūma ixīxū i nachiga choxū nangèxma na chorū āēxgacū ya Chécharucèx chanaxūmatūxūcèx. Rū ngēmacèx chanamu na nuā pepèxewa nagagūāxūcèx, rū cuxcèx türū nixī, Pa Āēxgacū Pa Agripax, na nūxna cuçaxūcèx, na nūxū chacuáxūcèx i ſacū tá na chaxūmatūxū naxcèx ya āēxgacū ya Chécharu. ²⁷ —Erū chauxcèx rū tama name na ngextá namuxū i wūxi i poxcuxū ega tama naxūmatūxíragu nachiga na ſacūcèx ínaxuaxūgūāxū.

26

Pauru rū āēxgacū ga Agripapèxewa nūgūétūwa nidexa

¹ Rū yexguma ga Agripa rū ñanagūrū Pauruxū: —Marū name i űuxma i cugūétūwa quidexa —ñanagūrū. Rū yexguma naxunagūmèxē ga Pauru, rū inanaxūgū ga nūgūétūwa na yadexaxū, rū ñanagūrū: ² —Chataāē, Pa Āēxgacū Pa Agripax, erū cupèxewa chidexa i űuxma na chaugūétūwa chachogūxūcèx i guxūma i ngēma choxū na ínaxuaxūgūxū i ngēma chautanūxū i Yudiūgū. ³ —Rū yexeraācū chataāē erū cuma nūxū cucuèx i guxūma i tocūma i toma i Yudiūgū, rū guxūma i Moiché űumatūxū i mugū i naxcèx yadexagūxū i chautanūxūgū. Rū ngēmacèx cuxna chaca na meā choxū icurūxīnūxūcèx.

Pauruarū maxū naxūpa ga Ngechuchuaxūl na yaxōōxūl

⁴—Rū guxūma i ngēma chautanūxūgū i Yudīugū rū nūxūl nacuēxgū ga űuxācū na chamaxūxūl ga natanūwa ga chauchiūānēwa rū Yerucharēūwa ga yexguma changextūxūūragu. ⁵—Rū ngēxguma chauchigaxū yaxugūechaūgu, rū nūma nūxūl nacuēxgū ga choma rū woetama Parichēu na chiixūl. Rū toma i Yudīugū i Parichēugū na tixīgūxūl, rū toma nixī i guxūma i totanūxūl i Yudīugūarū yexera na poraācū tanaxaurexūl i ngēma tocūma. ⁶—Rū űuxma i ngēma chautanūxūgū i Yudīugū rū nuā pepēxewa choxū nagagū erū chayaxō na Cristugagu nangēxmaxūl i maxūl i taguma gūxūl, yema Tupana nuxcūmaūgūxūl ga torū oxīgūmaā inaxunetaxūrūl. ⁷—Rū guxūma i totanūxūgū i Yudīugū rū īnananguxēēgū na nūxūl nadaugūxūl rū tā na yanguxūl i ngēma uneta. Rū ngēmacēx Tupanaxūl nicuēxūgū rū guxūguma i ngunecū rū chūtacū rū Tupanaāxūl napuracūe. Rū choma rū ta īchananguxēē na nūxūl chadauxū rū tā na yanguxūl i ngēma uneta, rū ngēmacēx nixī, Pa Āēxgacūx, i űuxma i choxūl inaxuaxūgūxūl i ngēma chautanūxūgū i Yudīugū. ⁸—¿Rū tūxcūl tama peyaxōgū na Tupana wena namaxēxēxūl i ngēma yuexūl?

Pauru rū nūxūl nixu ga űuxācū yema yaxōgūxūlwe na yangēchigūxūl

⁹—Rū choma nagu charūxīnūgu ga noxri rū name ga muxūma ga chixexūl namaā na chaxūxūl ga yema Ngechuchu ya Nacharētucūāxāxūl yaxōgūxūl. ¹⁰—Rū yemacēx nawe chingēchigū ga Yerucharēūwa. Rū paigūarū āēxgacūgūxūl tawa naxcēx īchaca ga popera na chanapoxcuexūcēx ga yema yaxōgūxūl. Rū yexma chanapoxcue ga muxūma. Rū yexguma chautanūxūl ga Yudīugūl nadaixgu ga yema yaxōgūxūl, rū choma rū chorū me nixī. ¹¹—Rū muēxpūxcūna rū chanapoxcuexūl na nūxūl naxoexūcēx ga yema na yaxōgūāxūl. Rū yemaācū chanaxūl ga guxūnema ga ngutaquēxepataūgūwa. Rū poraācū naxchī chaxaxichī ga yema yaxōgūxūl, rū yemacēx nawe chingēchigū űuxmata to ga nachīūānēgune ga īānēgūwa.

Pauru rū wenaxārū nūxūl nixu ga űuxācū na yaxōōxūl ga noxrix

¹² Rū űanagūrū ga Pauru: —Rū yema yaxōgūxūxūl na chapoxcuexūcēx nixī ga Damacuwa chaxūxūl. Rū yemacēx ga paigūarū āēxgacūgū rū choxūl namugū rū choxna nanaxāgū ga popera ga nawa choxna naxāgagūxūl na chanapoxcuexūcēx ga yema yaxōgūxūl. ¹³—Rū yexguma namagu taxīyane, Pa Āēxgacūx, rū yexguma meāma tocuchiwa nanguxgu, rū nūxūl chadau ga wūxi ga omū ga daxūwa ne űxūl ga űēxcūarū yexera ixīxūl ga choxūl baxixūl rū yema chomūcūgūxūl rū ta baxixūl. ¹⁴—Rū guxāma ga toma rū űaxtūānēgu tayayi. Rū choma rū nūxūl chaxīnū ga wūxi ga naga ga Yudīugawa choxūl űaxūl: “Pa Chauru Pa Chaurux, ¿tūxcūl i chowe quingēchigūxūl? Poraācū cugūtama cuchixexēē űoma wūxi i űacūl i āmaguxūgu cucuxgūxūrūl”, űanagūrūl choxūl. ¹⁵—Rū choma chanangāxūl, rū űacharūgū:

“¿Texé quixī, Pa Corix?” űacharūgū. Rū nūma ga Cori rū űanagūrūl choxūl:

“Choma nixī i Ngechuchu rū chorūl duūxūgūl nixī i ngēma nawe quingēchigūxūl. ¹⁶—¿Naturūl īrūda rū inachi! Rū marūl cuxcēx changox i űuxmax, erūl cuxūl chamuxchaūl na choxūl cupuracūxūcēx rū nūxūl quixuchigaxūcēx i ngēma űuxma na choxūl cudauxūl rū ngēma yixcūra tā chauxūtawā nūxūl cudauxūl. ¹⁷—Rū cuxna tā chadau i natanūwa i cutanūxūgūl i Yudīugūl rū ngēma tama Yudīugūl ixīgūxūl i űuxma tā natanūwa cuxūl chamuxūl. ¹⁸—Rū ngema cuxūl chamu na ngēma duūxūgūxūl choxūl cucuēxēxūcēx rū nūxūl naxoexūcēx i nacūma i chixexūgūl rū chauga

naxīnūēxūcēx. Rū ngema tá cuxū na Chatanámēxēwa ícunanguxūđēxūcēx i ngēma duūđūgū na chowe naxīxūcēx rū choxū yaxōgūāxūcēx na choma rū nūxū nūxū changechaūxūcēx i norū pecadugū, rū nūxū nangēxmaxūcēx i nachica namaā i guxūma i chorū duūđūgū i ūnēgūxū”, ñanagūrū choxū ga Cori.

Pauru rū naga naxīnū ga yema Ngechuchu namaā nūxū ixuxū

19 –Rū yemacēx ga chomax, Pa Āēxgacū Pa Agripax, rū naga chaxīnū ga yema ore ga Ngechuchu chomaā nūxū ixuxū ga yexguma choxū nabaxixgu ga yema omū ga daxūwa ne ūxū. 20 –Natūrū noxri rū Damacucūāxgūmaā nūxū chixuchiga ga Tupanaārū ore. Rū yixcama ga Yerucharēucūāxgūmaā, rū yemawena rū guxū ga Yudéaanewa, rū ñuxūchi yema tama Yudiugū ixīgūxūmaā nūxū chixu. Rū ñacharūgū:

“¡Nūxū perūxoe i pecūma i chixexūgū, rū Tupanacēx pedaugū, rū meā pemaxē na duūđūgū nūxū daugūxūcēx na aixcūma peyaxōgūxū!” ñacharūgū.

21 –Rū yemacēxtama nixī ga tupauca ya taxūnegu choxū yayauxgūxū rū choxū yamēxgūchaūxū ga chautanūxūgū i Yudiugū. 22-23 –Natūrū Tupana choxū narūngūxēē rū ngēmacēx taguma íchayachaxāchi na guxūma i duūđūgūmaā nūxū chixuxū rū woo buxū rū yaxū. Rū namaā nūxū chixu ga yema ore ga nuxcūmaūgūxū ga Tupanaārū orearū uruūgū rū Moíché nūxū ixugūxū na ñuxācū tá nūxū nangupetūxū ga Cristu rū ñuxācū tá na nayuxū, natūrū yemawena rū nūma tá yīxū ga nūxīra yuwa ínadaxū. Rū namaā nūxū chixu ta ga yema nuxcūmaūgūxūārū ore ga ñaxū:

“Rū Cristu rū tatanūxū i Yudiugūmaā rū ngēma to i duūđūgū i tama Yudiugū ixīgūxūmaā tá naxunagūāxū i ore i tūxū maxēxēxū”, ñaxū. Rū yemachigaxūxīcatama nixī ga namaā chixuxū –ñanagūrū ga Pauru.

Pauru rū Agripaxū nanangúchaūxēē na yaxōđūxūcēx

24 Rū yexguma yemaācū nūgūétūwa yadeaxgu ga Pauru, rū ñanagūrū ga Festu tagaācūma: –Cungēāēmare Pa Paurux. Rū ngēma na yeūcūrū cungūechaūxū, rū dūxwa nawa cungēāē –ñanagūrū. 25 Natūrū ga Pauru rū nanangāxū, rū ñanagūrū: –Tama changēāē Pa Āēxgacūxūchi, Pa Festux. Erū ñāā ore i nūxū chixuxū, rū aixcūmaxūchima nixī. 26 –Rū daa āēxgacū ya Agripa rū meāma nūxū nacuēx i guxūma i ngēma pemaā nūxū chixuxū. Rū ngēmacēx tama chamuūācūma chorū taāēmaā napēxewa nūxū chixu, erū nūxū chacuēx na nūma rū ta nūxū nacuāxū i űacūchiga na yīxū i guxūma i ñāā ore. Erū tama ngextāmare cūācū naxūpetū i ngēma. 27 –¿Cuyaxōxū, Pa Agripax, i ngēma Tupanaārū orearū uruūgū nūxū ixuxū? Choma nūxū chacuēx rū cuyaxō –ñanagūrū ga Pauru. 28 Rū Pauruxū nangāxū ga Agripa, rū ñanagūrū: –¿Ēxna cuma nagu curūxīnūgu rū ngēmaācū noxre i curū oremaā na choxū cuyaxōxēēxū? –ñanagūrū. 29 Rū ñanagūrū ga Pauru: –Woo noxre i oremaā rū woo muxū i oremaā rū Tupana nanaxwēxe na cuyaxōxū. Rū tama i cuxicatama, natūrū guxūma i ñāā nuā choxū ínūēxū rū ta, rū Tupana nanaxwēxe na chauxrūđū yixīgūxū, natūrū tama chauxrūđū daa cadenagūmaā na yanēixgūxū –ñanagūrū ga Pauru. 30 Rū yexguma ínachigū ga Agripa, rū Festu, rū Bereniche, rū guxūma ga yema namaā yēma rutogūxū. 31 Rū yexguma ga nūmagū rū noxrwama naxī na yēma nūgūmaā Pauruchiga yadexagūxūcēx. Rū ñanagūrūgū: –Rū ngēma yatū, rū taxuūma i chixexū naxū na naxcēx yamáxū rū ēxna naxcēx napoxcuxū –ñanagūrūgū. 32 Rū

Festuxū ñanagūrū ga Agripa: —Ngēxguma chi tama nūmatama naxcèx ínacaxgu na Chécharu nūxna çaxūcèx, rü chi ítananguxuchixēē —ñanagūrū.

27

Pauruxū Dumawa namugū

¹ Rū yema āēxgacūgū rü düxwa nagu narūxīnūē na norū āēxgacū ga Chécharu ga Itáriaanewa yexmacūxūtawa na toxū namugūxū. Rū norū churaragūrū capitāna nanamu ga Pauru namaā ga ñuxre ga togū ga poxcuexū na Chécharuxūtawa nagagūāxūcèx. Rū guma capitāñ rü Yúriu nixī ga naega, rü norū churaragūtūcumū rü Chécharuarū Dauruūgū nixī ga naega. ² Rū nagu tichoñ ga wūxi ga wapuru ga buanecūmaā ixūxūne ga Adamíchiuwa ne ūxūne ga Áchiaarū Iānegūwa ūxchaxūne. Rū towe ta nixūe ga Arítarcu ga Machedóniānecūñax ga Techarónicawa ne ūxū. ³ Rū moxūācū rü Chidāūārū tūrewa tangugū. Rū Paurumaā namecūma ga capitāñ ga Yúriu. Rū ínanaxūexēē na yēmacūñax ga namūcūgūxūtagu naxūāneāxūcèx ga Pauru, na nūmagū nūxū nangūxēēgūxūcèx. ⁴ Rū yēma itaxīāchi. Rū Chiprearū capaxūārū tocūwaguama taxī, naxchaxwa ga buanecū, yerū towaama nabu. ⁵ Rū yēma Chiprewa tixāñ ga taxtū rü Chiríchiaanecutūwa tarūyicu. Rū yemacutūgu taxī, rü Paūpíriaanewa tachopetū rü ñuxmata Díchiaanewa yexmane ga Iāne ga Mírawa tangugū. ⁶ Rū yema capitāñ yexma nūxū nayangau ga wūxi ga wapuru ga Aleyādríawa ne ūxūne ga Itáriaanewa ūxūne. Rū gumagu toxū nichoūxēē, rü tomaā inaxūāchi. ⁷ Natūrū írarūwatama itíñaxwetaxū ga muxūma ga ngunexūgu, rü guxchaācūma Guíduarū toxmèxtawa tangugū. Natūrū towaama nabuema ga buanecū, rü yemacèx capaxū ga Chamonaārū toxmèxtawa tachopetū rü capaxū ga Crétaxū ítachoeguāchi. ⁸ Rū guxchaācūma nacutūgu taxī ga yema capaxū, rü wūxi ga nachica ga Mexū ga Tūregu āegaxūwa tangugū. Rū Iāne ga Dácheaarū ngaicamana nayexma. ⁹ Natūrū marū poraācū namagu tanuxcū ga na itaxīxū, rü marū naxāicūma ga na itaxīāmaxū yerū marū nawa nangu ga guma tauemacūgū ga nagu nagāuanecū. Rū yemacèx ga Pauru rü nayaxucūxē ga duūxūgū, rü ñanagūrū: ¹⁰ —Pa Chomūcūgūx, nūxū chacuèx i ngēxguma chi ixīāmagu, rü tá naxāicūma. Rū daa wapuru rü tá inayarūtaxu namaā i guxūma i naācu. Rū ngūrūāchi i yixema rü tá ta tayue —ñanagūrū. ¹¹ Natūrū yema churaragūrū capitāñ rü yexeraācū guma wapuruarū yoragaama naxīnū, rü marinerugūrū capitāñgaama naxīnū, rü tama aixcūma Pauruga naxīnū. ¹² Natūrū yema tūre rü tama name ga yēma na tanangupetūxēēxū ga gāuanexū. Rū yemacèx wixguxūchi guxūma ga duūxūgū nagu narūxīnūē rü narūmemaē nixī ga na itaxīāchixū ga yēma. Rū nanaxwēxegū ga chi Cueníchewa na tangugūxū na yēma tanangupetūxēēxū ga gāuanexū, yerū yema nixī ga wūxi ga Crétaarū tūre ga mexū ga tama poraācū buanecū ga taxū nawa nguxū.

Taxtūarū ngāxūtūgu nūxū naxū ga buanecū ga tacū

¹³ Rū inanaxūgū ga na meāma topēxewaama nabuxū ga buanecū, rü yemacèx ga nūmagū ga marinerugū rü nūxū nacūxgūgu rü chi meā ítangugū ga yema itaxīxūwa. Rū yemacèx itaxīāchi, rü nacutūarū ngaicamagu taxī ga yema Crétaarū capaxū. ¹⁴⁻¹⁵ Rū natūrū ngūrūāchi yixcamaxūra rü wūxi ga buanecū ga taxūchicū ga capaxūārū tocūwawa ne ūxcū ngāxūtūwaama nanacue ga guma wapuru. Rū taxuacūma itixūtañ nawaama ga buanecū. Rū yemacèx düxwa ítayachaxāchi ga na tanatochinūxū, rü toxū ínicuetañ. ¹⁶ Rū wūxi ga capaxūācū ga Caudagu āegaxūārū tocūwawaama tachopetū

³⁵ Rū yexguma marū yema ñaxgu, rū nanayaxu ga wūxi ga pāū, rū Tupanana moxē naxā napēxewa ga guxūma. Rū inanabūcu ga yema pāū, rū inanaxūgū ga na nangōōxū. ³⁶ Rū yexguma nataāēgū ga guxūma, rū nūmagū rū ta nachibūe. ³⁷ Rū 276 tixīgū ga guxāma ga toma ga guma wapurugu iḵē. ³⁸ Rū yexguma marū nangāxēgu, rū ínanawoū ga yema trigu ga wapuru namaā āācuxū na nangūnagūāchixūraxūcēx ga guma wapuru.

Inangu ga guma wapuru

³⁹ Rū yexguma yangunegu, rū yema marinerugū tama nūxū nacuāane ga yéma. Natürü nūxū nadaugū ga wūxi ga axcuchixū ga naxnūcūpechinūāxū, rū nagu narūxīnūē ga yéma na yanangaixēēgūāxū ga wapuru. ⁴⁰ Rū yexguma nanadaū ga norū ngaxūxū ga aūclagū, rū yéma nanawogū. Rū nayawēgū ga norū toxchinūxūārū nējrxuūgū, rū inananga ga yema napēxewa ūxū ga naxchirutachinū ga namaā iticuetaūxū. Rū itanaxūgū ga nūxū na tingaicaxū ga yema naxnūcūpechinū. ⁴¹ Natürü wūxi ga naxnūcūarū nuxtamaxūwa tayarūngaixtaū. Rū yéma naxnūcūwa nayarūwápēxe ga guma wapuru rū marū tama yéma itaxīāchi. Rū yoxni ga nacinūwa, rū yuape nayapuxēē. ⁴² Rū yema churaragū rū nagu narūxīnūē ga na nadaīāxū ga yema poxcuexū na taxuūma íñaxūcēx ga yexguma naxānacūwa nangugūgu. ⁴³⁻⁴⁴ Natürü yema norū capitāū ga churaragū, rū Pauruxū namaxēēchaū, rū yemacēx tama nanaxwēxe ga na nadaīāxū ga yema poxcuexū. Natürü nanamu na yema íxānūxū rū nūxīra ínayuxgūxū na naxānacūwa nawēxgūxūcēx, rū yema togū rū mūrapewagūgu rū ēxna yema wapurutūchigūgu meā na ínachoūxūcēx. Rū yemaācū guxāma meāma naxānacūwa tangugū.

28

Capaxū ga Márta wa nayexma ga Pauru

¹ Rū yexguma meāma naxānacūwa tangugūgu ga guxāma rū yexguma nūxū tacuēxgū na Márta na yīixū ga naega ga yema capaxū. ² Rū yema yémacūāxgū ga duūxūgū rū meāma toxū nayauxgū ga guxāma. Rū nanangixtagū ga wūxi ga ūxū ga taxūne. Rū toxcēx nacagū ga guxāma na yéma togū tanaixūgūxūcēx, yerū napu rū nagāuane. ³ Rū Pauru nanadetaquēxe ga ñuxre ga naīchacūūgū, rū ūxūxetūwa nayawocu. Natürü yexguma yéma yawocuāgu, rū ūxūarū naīēmāxūchaxwa inayago ga wūxi ga āxtape. Rū Paurumēxēwa nayuxu, rū yéma nayarūtuāchi. ⁴ Rū yexguma yema yémacūāxgū nūxū daugūgu ga yema āxtape ga Paurumēxēwa na natuxū, rū nūgūmaā ñanagūrūgū: —Ñāñ yatū rū maneca wūxi i máētāxū nixī. Rū woo taxtūwa yuwa na yañaxū, natürü Tupana tama nanamaxēēchaū —ñanagūrūgū. ⁵ Natürü guma ūxūxetūgu nanamaxū ga yema āxtape, rū taxuūma nūxū naxūpetū ga Pauru. ⁶ Natürü guxūma ga yema duūxūgū rū ínananguxēēgū rū ngoxi tá nachamé rū ēxna nayux. Rū marū nuxcūūrāma ga yema nūxū na nadaunūxū rū taxuūma nūxū na ūpetūxū, rū dūxwa togu narūxīnūē rū inanaxūgūe ga na ñagūxū: —Maneca wūxi ya tupana nixī —ñagūxū. ⁷ Rū yema nachicaarū ngaicamana nayexma ga norū naāne ga yema capaxūārū āēxgacū ga Púbiru ga naega. Rū nūma meāma toxū nayaxu, rū yexma toxū napegūxēē ga tomaēxpūx ga ngunexū. Rū tomaā namecūmaxūchi. ⁸ Rū guxema Púbiru nanatū rū ngūrūcarewa tayexma, yerū tixaxūne rū taduū. Rū yéma tūmaxūtawa nangu ga Pauru, rū tūmamaā nayumūxē, rū tūmaētūgu naxūxmēx, rū tūxū narūmexēē. ⁹ Rū yexguma yemaxū nadaugūgu, rū Paurucēx yéma naxī ta

ga guxūma ga togū ga idaaweexū ga yema capaxūcūāx, rū narūmeē. ¹⁰ Rū nūmagū rū muxūma toxna naxāmaregū. Rū yexguma itaxīāchigu, rū toxna nananagū ga guxūma ga tanaxwēxexū ga torū namawaū ga ōna.

Dumawa nangu ga Pauru

¹¹ Rū tomaēxpūx ga tauemacū yéma capaxūwa tayexmagū. Rū űuxūchi nagu tichoū ga wūxi ga wapuru ga yema capaxūwa gáuanexū ngupetūxēxene. Rū Aleyādrīacūāx nixī ga guma wapuru. Rū napēxeraūwa nayexmagū ga taxre ga norū tupanachicūnēxāgū ga Catu rū Porugu āegagūxū. ¹² Rū Chiracūchaarū tūrewa tangugū, rū tomaēxpūx ga ngunexū yéma tayexmagū. ¹³ Rū yéma itaxīāchi, rū nacutūarū ngaicamagu taxī űuxmata Dequūwa tangugū. Rū moxūācū inangu ga wūxi ga buanecū ga itaxīxūwaama bucū rū toxū inicuetaū. Rū yemaārū moxūācūama rū Puteriwa tangugū. ¹⁴⁻¹⁵ Rū yexma nūxū tayangau ga űuxre ga duūxūgū ga yaxōgūxū. Rū toxna naxu na wūxi ga yūxū yexma naxūtagu tarūchoxūcēx. Rū marū wūxi ga yūxū ngupetūgu rū itaxīāchi na namagu Dumawa taxīxūcēx. Rū marū toxū nacuāchigagū ga yema yaxōgūxū ga Dumagugūxū. Rū yema nama ga Ápiugu āegaxūgu naxī na yexma toxū yangaugūxūcēx. Rū űuxre rū yema nachica ga Tomaēxpūx ga Taxepataūgu āegaxūwa toxū nayarūnguxēēgū Rū togū rū nachopetū űuxmata yema nachica ga Ápiuarū Ngūēchicagu āegaxūwa nangugū. Rū yexguma Pauru nūxū dēuxgu ga yema yaxōgūxū, rū Tupanana moxē naxā rū porācū nataāē. Rū yemaācū Dumawa tangugū. ¹⁶ Rū yexguma Dumawa tangugūgu rū wūxi ga ĩpatawa nananguxēēgū ga Pauru nūxīca namaā ga wūxi ga churara ga nūxna dauxū.

Dumawa nayexma ga Pauru

¹⁷ Rū tomaēxpūx ga ngunexū marū yéma nayexmagu, rū Pauru naxcēx nangema ga yema Yudiugūarū āēxgacūgū ga Dumawa yexmagūxū. Rū yexguma nangutaquēxegūgu, rū űanagūrū ga Pauru nūxū: —Choma, Pa Chaueneēgūx, rū taxuūma i chixexū chaxū namaā i tatanūxūgū, rū bai i nuxcūmaūgūxū i tórū oxigūcūmagūmaā. Natūrū Yerucharēūgu choxū niyaxūgū ga tatanūxūgū, rū Dumacūāx ga churaragūna choxū namugū. ¹⁸ Rū yexguma marū choxna nacagūegu ga Dumacūāxgū, rū choxū ningēxgūchaū, yerū taxuūma ga űacū ga chixexū chowa nadaugū na choxū yamēxgūxūcēx. ¹⁹ Natūrū yema tatanūxūgū ga Yudiugū rū nayamuētanū na tama choxū yangēxgūxūcēx, rū yemacēx dūxwa naxcēx íchaca na nūmatama ya āēxgacū ya Chēcharu choxna çaxūcēx. Natūrū tama tatanūxūgūxū na íchaxuaxūxūcēx nixī ga yemacēx íchaçaxū. ²⁰ Rū ngēmacēx nixī i pexcēx nuā changemaxū na pexū chadauxūcēx rū pemaā chidexaxūcēx. Pema nūxū pecuēx rū yixema i Yudiugū rū ĩtananguxēē i na ĩnanguxū ya Cristu. Rū yima Cristucēx nixī i choma i űuxma i daa cadenamaā chināixū —ñanagūrū. ²¹ Rū nūmagū nanangāxūgū, rū űanagūrūgū: —Toma rū taxuūma i popera i Yudéawa ne muxū i cuchigagu ũmatūxū tayauxgū. Rū ngēma taeneēgū i ngēma ne ĩxū rū nūma ngugūxū rū bai i wūxi i nūxū ĩxuxū i űacū rū ore i chixexū i cuchiga. ²² Rū cuxūtawa nūxū taxīnūēchaū rū űuxū űacuxū i cumax? Erū nūxū tacuēxgū rū guxūwama i Yudiugū rū chixri nachiga nidexagū i ngēma ore i ngexwacaxūxū i Ngechuchuchiga —ñanagūrūgū. ²³ Rū yexguma Pauru-maā ĩnaxunetagu ga wūxi ga ngunexū, rū napatawa naxī ga muxūma ga duūxūgū. Rū Pauru namaā nūxū nixu ga Tupanaārū ore ga űuxācū āēxgacū na yīixū ya Tupana. Rū pēxmama ĩnanaxūgū, rū űuxmata nachūtaxū rū nūxū nanangūchaūxēē ga yema duūxūgū na Ngechuchuxūxū yaxōgūāxūcēx.

Rū yemacèx Moĩché ūmatūxŭ ga mugūwa rū nuxcūmaŭgūxŭ ga Tupanaārū orearū uruŭgū ūmatūxŭ ga orewa namaā nūxŭ nixu ga Ngechuchuchiga. ²⁴ Rū nūmaxŭ rū nayaxōgū ga yema Pauru namaā nūxŭ ixuxŭ natūrū ga togū rū tama nayaxōgū. ²⁵ Rū yexguma tama wūxigu naxīnūēgu ga yema duŭxŭgū, rū inanaxūgū ga na íyaxīxŭ. Rū yemacèx ga Pauru rū ñanagūrū nūxŭ: — Meā perū oxigūmaā nìdexa ga Tupanaāē i Ūñexŭ ga yexguma Ichaxíaxŭ yadexaxēēgu rū ñaxgu:

²⁶ “¹Rū ngema naxŭ, rū ngēma duŭxŭgūmaā nūxŭ yarūxu rū ñacurūgū tá nūxŭ: ‘Rū woo nūxŭ pexīnūēgu rū tāūtāma aixcūma nūxŭ pecuèxgū. Rū woo nūxŭ perūdaunūgu rū tāūtāma aixcūma peyaxōgū. ²⁷ Rū ngēmaācū pixīgū i ñuxmax, erū tama choxŭ pecuáxchaŭ i pemax. Rū tama nūxŭ pexīnūē i chorū ore erū tama nūxŭ pexīnūēchaŭ. Rū tama nūxŭ peyaxōgū i ngēma choma pexŭ nūxŭ chadauxēēxŭ erū tama nūxŭ peyaxōgūchaŭ. Rū tama peāēwa chaugu perūxīnūē erū tama nūxŭ perūxoechaŭ i pecūma i chixexŭgū rū tama chauxcèx pedaugūchaŭ na choma pexŭ chamaxēxēēxŭcèx!’ ”

ñanagūrū ga Tupanaāē i Ūñexŭ. ²⁸ Rū ñanagūrū ta ga Pauru: —Rū name nixī i pema rū ta nūxŭ pecuèx rū ñuxma rū marū inaxūgū na ngēma tama Yudíugū ixīgūxŭtanūwa naxunagūxŭ i ñāā Tupanaārū ore i tūxŭ maxēxēēxŭ. Rū nūmagū tá nixī i aixcūma inaxīnūēxŭ —ñanagūrū. ²⁹ Rū yexguma Pauru yema ñaxgu, rū ínixī ga yema Yudíugū, rū poraācū nūgūmaā ínìporagatanūcū. ³⁰ Rū taxre ga tauncū ga mecū yēma nayexma ga Pauru nawa ga guma ī ga naxūtānūne ga nāgu na napexŭcèx. Rū yēma meāma nanayaxuxŭ ga guxŭma ga duŭxŭgū ga naxŭtāwa íyadaugūxŭxŭ. ³¹ Rū nūxŭ nixuchiga ga ñuxācū āēxgacū na yīxŭ ga Tupana. Rū taxŭema nūxna tanachuxu na nangŭexēēāxŭ ga Cori ya Ngechuchu ya Cristuchiga. Rū taxŭema naxcèx tanachixewe.

POPERA GA DUMAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rŭ nŭxŭ narŭmoxē ga yema yaxŏgŭxŭ ga Dumaārŭ ŭānēwa yexmagŭxŭ

¹ Pa Chaueneēgŭx, choma i Pauru nixŭ i pexcēx chanaxŭmatŭxŭ i űāā popera. Rŭ choma nixŭ i Ngechuchu ya Cristuarŭ duŭxŭ chŭxŭ. Rŭ choma nixŭ ga Tupana choxŭ yaxuxŭ na choxŭ yamuxŭcēx na duŭxŭgŭmaā nŭxŭ chixuxŭcēx i norŭ ore i mexŭ i tŭxŭ maxēxēēxŭ. ² Rŭ nuxcŭmaxŭchima Tupana nanamu ga norŭ orearŭ uruŭgŭ na naxŭmatŭgŭāxŭcēx ga norŭ ore i mexŭ. Rŭ yemaācŭ tŭxŭ nŭxŭ nacuēxēē ga űāā ore i mexŭ. ³ Rŭ űāā ore i mexŭ rŭ tŏrŭ Cori ya Ngechuchu ya Cristuchiga nixŭ. Rŭ nŭma rŭ woo Tupana Nane na yŭxŭ, natŭrŭ duŭxŭgŭrŭŭ nabu ga yexguma űoma ga naānēwa nanguxgu. Rŭ nuxcŭmaŭcŭ ga āēxgacŭ ga Dabŭtaā nixŭ. ⁴ Natŭrŭ nŭmatama ya Ngechuchu rŭ ŭūnecŭ nixŭ. Rŭ yexguma yuwa űnadaxgu rŭ Tupana tŭxŭ nŭxŭ nadauxēē na aixcŭma Nanexŭchi na yŭxŭ. Rŭ nŭxna nanaxā ga guxŭma ga pora. ⁵ Rŭ Ngechuchu ga Cristugagu nixŭ ga chomaā namecŭmaxŭ rŭ choxŭ naxunetaxŭ ga Tupana na norŭ puracŭ chaxŭxŭcēx. Rŭ yemacēx Ngechuchuēgagu choxŭ namu na guxŭ i nachŭŭānēwa nŭxŭ chixuxŭcēx i norŭ ore na yaxŏgŭāxŭcēx i duŭxŭgŭ rŭ Tupanaga naxŭnēxŭcēx. ⁶⁻⁷ Rŭ pema rŭ ta, Pa Dumacŭāxgŭx, rŭ ngēma duŭxŭgŭtanŭwa pengēxmagŭ yerŭ Tupanaāxŭ peyaxŏgŭ rŭ naga pexŭnŭē. Rŭ nŭma rŭ pexŭ nangechaŭ rŭ marŭ pexŭ naxuneta na Ngechuchu ya Cristuarŭ duŭxŭgŭ pixŭgŭxŭcēx rŭ ngēma norŭ duŭxŭgŭtanŭxŭ na pexŭgŭxŭcēx. Rŭ űŭxmax, Pa Chaueneēgŭ i Dumacŭāxgŭx, rŭ chanaxwēxe i nŭma ya Tanatŭ ya Tupana rŭ tŏrŭ Cori ya Ngechuchu ya Cristu pemaā namecŭmagŭ rŭ pexŭ narŭngŭxŭēēgŭ na meā pexŭ naxŭpetŭxŭcēx rŭ aixcŭma petaāēgŭxŭcēx.

Pauru rŭ nŭxŭ nangŭchaŭ na űyadauāxŭ ga yema yaxŏgŭxŭ ga Dumawa yexmagŭxŭ

⁸ Rŭ űŭxma rŭ Ngechuchu ya Cristuēgagu Tupana moxē chaxā pexcēx, erŭ guxŭwama i guxŭ i naānēwa rŭ duŭxŭgŭ nŭxŭ nixugŭgŭ na aixcŭma Cristuaxŭ peyaxŏgŭxŭ rŭ Tupanacēx pemaxēxŭ. ⁹ Rŭ nŭma ya Tupana choxŭ nadau rŭ nŭxŭ nacuēx na aixcŭma guxŭguma pexcēx chayumŭxēxŭ. Rŭ yimaāxŭ nixŭ i guxŭma i chorŭ ngŭchaŭmaā chapuracŭxŭ rŭ nŭxŭ chixuxŭ i norŭ ore i mexŭ i Nanechiga. ¹⁰ Rŭ guxŭguma nŭxna chaca na choxŭ ngēma namuxŭcēx rŭ ngēmaācŭ dŭxwa pexŭ űchayadauxŭcēx ega norŭ ngŭchaŭ yixŭgu. ¹¹ Erŭ aixcŭma choxŭ nangŭchaŭ na pexŭ chadauxŭ na pemaā nŭxŭ chixuxŭcēx i Tupanaārŭ ore na aixcŭma meā peyaxŏgŭxŭcēx rŭ yexeraācŭ peporaexŭcēx. ¹² Rŭ ngēxguma ngēmaācŭ wŭxiwa űngēxmagŭgu, rŭ tā wŭxichigŭ yigŭ tataāēgŭxēē rŭ yigŭaxŭ tanangŭchaŭxēē. Erŭ choma rŭ tā nŭxŭ chadau na űuxācŭ tŏrŭ Coriaxŭ peyaxŏgŭxŭ rŭ pema rŭ tā ta nŭxŭ pedau na űuxācŭ chayaxŏxŭ. ¹³ Pa Chaueneēgŭx, chanaxwēxe i nŭxŭ pecuēx na muēxpŭxcŭna pexŭ űchayadauxchaŭxŭ, natŭrŭ űŭxmarŭta rŭ choxŭ naguxcha. Natŭrŭ ngēma petanŭwa chaxŭxchaŭ, erŭ chanaxwēxe na pemaā nŭxŭ chixuxŭ i Tupanaārŭ ore yema toxnamana yexmagŭxŭ ga duŭxŭgŭmaā nŭxŭ chixuxŭrŭŭ. Erŭ chanaxwēxe i ngēma duŭxŭgŭrŭŭ meā peyaxŏgŭ na ngēmaācŭ Cristuwe naxŭxŭcēx i ngēma petanŭxŭgŭ i űŭxma

tama yaxōgūxū. ¹⁴ Rū aixcūma ngēma changuxchañ erū nūmatama ya Tupana choxū namu na guxū i duñxūgūmaā nūxū na chixuxūcēx i norū ore. Rū nanaxwēxe i duñxūgū i meā poperaxū icuáxūmaā nūxū na chixuxū rū duñxūgū i tama poperaxū icuáxūmaā ta nūxū chixuxū i ngēma norū ore. Rū ngēxumarūū ta nanaxwēxe na ngēma duñxūgū i cuēx nūxū ngēmaxūmaā nūxū na chixuxū rū ngēma duñxūgū i taxuguma rūxññēxūmaā nūxū na chixuxū. ¹⁵ Rū ngēmacēx, Pa Chaueneēgū i Dumagu Āchiñgūxū, rū choma rū marū íchamemare na petanūwa na chaxūxū, na pemaā rū ta nūxū chixuxūcēx i Tupanaārū ore i mexū.

Tupanaārū ore rū napora

¹⁶ Rū taxucēma naxcēx chaxāne i ngēma ore i mexū. Erū ngēma ore rū napora, rū ngēmamaā nixī i napuracūxū ya Tupana na guxāma ya yixema Cristuaxū yaxōgūxe rū tūxū nangēmaxūcēx i maxū i taguma gūxū. Rū ngēma maxū, rū Yudiñgūcēxirachirēx nixī, natūrū i ñuxma rū guxūma i ngēma tama Yudiñgū ixīgūxūcēx rū ta nixī. ¹⁷ Rū ngēma norū orewa nixī i tamaā nūxū yaxuxū ya Tupana na tōrū ògaguxicatama yīxū na napēxewa imexū. Erū norū ore i ūmatūxūwa rū ñanagūrū:

“Rū yīxema tūmaārū ògagu Tupanapēxewa mexē, rū tá tūxū nangēxma i maxū
i taguma gūxū”,
ñanagūrū.

Nagagutama nixī i duñxūgū inapoxcuexū

¹⁸ Rū nūxū tadaugū na Tupana daxūguxū i nañnewa ne namuxū i norū poxcu i āñcūmaxū naxcēx i guxūma i ngēma duñxūgū i tama naga ññūēxū rū chixexū ūgūxū rū ngēma norū chixexūmaā togūaxū naguxchaxēēgūxū na tama nūxū nacūēgūxūcēx i ngēma ore i aixcūma ixīxū. ¹⁹ Rū ngēma duñxūgū i chixexū ūgūxū rū meā nūxū nacūēgūchirēx na ñuxācū yīxū ya Tupana yerū nūmatama ga Tupana rū marū nūxū nūxū nadauxēē ga yema. ²⁰ Rū woo tama nūxū idaugūga ya Tupana, natūrū guxūma i tacū i naxūxūwa nixī i nūxū idaugūxū. Rū yexguma noxri naāne naxūxgumama nixī ga meāma duñxūgūxū nūxū nadauxēēxū na aixcūma Tupana na yīxū rū guxūguma na naporaxū. Rū ngēmacēx i ngēma duñxūgū i chixexū ūgūxū, rū taxucūrūwama tacūmaā nūgū inapoxūgū i Tupanapēxewa. ²¹ Yerū woo nūxū nacūēgūchirēx na ñuxācū yīxū ga Tupana, natūrū tama nanayauxgūchañ na norū Tupana yīxūcēx, rū bai na moxē nūxna naxāgūxū. Natūrū yema ore ga taxuwama mexūguama narūxññē, rū yemaācū naēchitamare namaxē rū yexeraācū chixexūgu narūxññē. ²²⁻²³ Rū nūgū yaxugūegu rū duñxūgū i nūxū icuáxū nixīgū natūrū taxuguma narūxññē. Yerū nūxna nixīgachitanū ga Tanatū ya Tupana ya mexēchicū ya taguma yucū, na nawe naxīxūcēx ga norū naxchicūñēxāgūmare ga duñxūgū i yuxwēxēxūchicūñēxāmare ixīgūxū rū werīgūchicūñēxāmare ixīgūxū rū naēxūgūchicūñēxāmare ixīgūxū rū āxtapegūchicūñēxāmare ixīgūxū. ²⁴ Rū yemacēx ga Tupana rū dūxwa yemawa nanawogū ga yema duñxūgū na naxūgūāxūcēx ga guxūma ga yema chixexū ga nūxū ngūchañgūxū rū nūgūmaā na naxūgūāxūcēx ga naxūñēārū ngūchañgū i āne tūxna āxū. ²⁵ Rū yemaācū nūxna nixīgachi ga guma aixcūmaxūchi Tupana ixīcū na nawe naxīxūcēx ga norū tupanagū ga tama aixcūma ixīgūxū. Rū yema Tupana ūxūpēxewa nayumūēgū rū yemaxū nicūēxūñgū, natūrū tama nūxū nicūēxūñgū ga Tanatū ya Tupana ga naxūcū rū inaxwēxecū na guxūguma nūxū icūēxūñgūxū. Rū ngēmaācū yixī. ²⁶ Rū yemacēx ga Tupana rū dūxwa

yemawa nanawogü ga yema duũxügü na naxügüãxücèx ga naxũneãrũ ngúchaũ i ãne tũxna ãxũ. Rũ èixrũũ ga ngexügü rü naxrũũ ngexügümaãtama nangëãëgü rü tama yatügümaã. ²⁷ Rũ yexgumarũũ ta ga yatügü rü naxrũũ yatũxũmaãtama nangëãëgü, rü tama ngexügümaã. Rũ yema naxũneãrũ ngúchaũ ga chixexügü rü nüxũ napora na naxrũũ yatũxũmaã namaxëxũ. Rũ yemaãcũ ga yema yatügü rü nügümaã nanaxügü ga yema naxũneãrũ ngúchaũ i ãne tũxna ãxũ, rü düxwa yemagagu niãaawee rü naturaxũnegü. ²⁸ Rũ yema na tama Tupanaxũ nacuèxgüchaũxũ, rü yemacèx ga nüma ga Tupana rü düxwa yemawa nanawogü ga yema duũxügü na norũ chixexügü na naxĩnũèechaxücèx rü na naxügüãxücèx ga yema chixexũ. ²⁹ Rũ düxwa ga yema duũxügü rü guxũraũxũ ga chixexũ naxügü ga Tupanapèxewa. Rũ tama aixcũma meã naxmèxmaã rü natemaã namaxë. Rũ naxaũ rü nügünaxĩcatama nananugúchaũ i guxũma i ãacu. Rũ toguãxũ nachixexëëgüchaũ. Rũ nixãũxãchixewèxegü, rü namáëtagü, rü nanuwèxexè, rü nawomũxëewèxegü, rü naxũneãrũ ngúchaũ nüxũ napora, rü naxoregütèèxgü. ³⁰ Rũ chixexũmaã toguãxũ nixugüe, rü Tupanachi naxaie, rü toguãxmaã naguxchigagü. Rũ nügüga naxĩnũëgu rü togüarũ yexera nixĩgü, rü nügü nicuèxũügü. Rũ naxcèx nadaugü na yexera chixexũ naxügüxũ. Rũ tama nanatüga rü naëga naxĩnũëchaũ. ³¹ Rũ tama inarũxĩnũëchaũ. Rũ tama aixcũma nayanguxëë i ngëma nüxũ yaxugüxũ. Rũ taxúexũma nangechaũgü. Rũ tama togüaxũ nüxũ nangechaũ i ãacu rü guxchaxũ. Rũ tama toguãx nüxũ tangechaũtümüügü. ³² Rũ nümagü i ngëma duũxügü rü meãma nüxũ nacuèxgüchirëx rü Tupana rü marũ namaã nanaxuegu na noxtacũma nayuxexũ i ngëma duũx-ügü i ngëmaãcũ maxëxũ. Natürü woo meãma nüxũ nacuèxgüchirëx i guxũma i ngëma, natürü nanaxügüama i ngëma chixexũ, rü nataãëgü ega togü naxũxgu.

2

Ngëxguma Tupana duũxügüxũ poxcugu, rü tama chixexũ naxũ, erü ngëma duũxügü rü norũ chixexũgagutama nanapoxcue

¹ Rũ ngëmacèx, Pa Duũxũx, rü woo texé quixĩgu rü taxuacũma Tupanapèxewa cugëtüwa cuchogü, ega togüxũ quixuechagu. Erü ngëxguma togüxũ quixuechagu na nachixexũ rü cugütama cupoxcu, erü cuma na cumücüxũ quixuechaxũ rü cuma rü ta cunaxũ i ngëma chixexũ i cumücüxũ naxcèx quixuechaxũ. ² Rũ nüxũ tacuèx rü Tupana tá nanapoxcue i ngëma duũxügü i namücügüxũ ixugüechaxũ. Rũ ngëxguma napoxcueãgu, rü tama chixexũ naxũ ya Tupana, erü ngëma duũxügü rü norũ chixexũgagutama nixĩ i napoxcueãxũ. ³ Rũ dücax, Pa Duũxũx, rü ngëxguma togüxũ quixuechagu, natürü cuma rü ta cunaxũxgu i ngëmatama chixexũ i nüma naxũxũ, ¿rü ñuxücürüwa tá i nagu curüxĩnũxũ na Tupanachaxwa iquicüxũ na tama cuxũ napoxcuxücèx? ⁴ ¿Rü tũxcüũ tama nagu curüxĩnũ i ngëma mexũ i Tupana cuxcèx üxũ? Nüma rü poraãcüxüchi cumaã namecũma rü yaxna cumaã naxĩnũ rü tama paxa curü chixexücèx cuxũ napoxcuchaũ. ¿Rü ñuxma rü tũxcüũ nüxũ cuxo? ¿Tama èxna nüxũ cucuèx na Tupana ngëmaãcũ cumaã mecümaxũ na nüxũ curüxoxcèx i curü chixexũ rü naxcèx na cumaxũxücèx ya Tupana? ⁵ Natürü cuma rü tama Tupanaxũ cucuãxchaũ rü tama nüxũ curüxoxchaũ i curü chixexũ. Rũ ngëmaãcũ cugüçextama cunayexeraxëë i curü poxcu i tá cuyaxuxũ i ngëma ngunexũ i nagu Tupana napoxcuxexũ i ngëma chixexũ ügüxũ. Rũ ngëma ngunexũgu rü Tupana tá aixcũma ngëma

duŭxŭgŭmaā nanaxuegu na űuxācŭ tá na napoxcueāxŭ. ⁶ Rŭ ngēxguma tá nixŭ i Tupana nŭxŭ yaxŭgŭtanŭxŭ i wŭxichigŭ i duŭxŭ naxcēx i ngēma naxŭgŭxŭ. ⁷ Rŭ maxŭ i taguma gŭxŭmaā Tupana tá tŭxŭ nanaxŭtanŭ ya yŭxema guxŭguma mexŭ taxŭgŭācŭma naxcēx daugŭxe na Tupana tŭmamaā taāēxŭ rŭ naxcēx daugŭxe na aixcŭma Tupanaxŭtawa tangugŭxŭ. ⁸ Natŭrŭ Tupana tá tŭmamaā nanu rŭ tá tŭxŭ napoxcu ya yŭxema tŭgŭgŭxicatama rŭxŭnŭēxē rŭ tama naga űnŭēchaŭxē i ore i aixcŭma ixŭxŭ rŭ naxcēx daugŭxe na ngēma chixexŭ taxŭgŭxŭ. ⁹ Rŭ guxŭma i ngēma duŭxŭgŭ i chixexŭ ŭgŭxŭ rŭ tá ngŭxŭ ningegŭ rŭ poraācŭ tá chixexŭ nŭxŭ naxŭpetŭ. Rŭ ngēma Yudiŭgŭ i chixexŭ ŭgŭxŭxŭira tá nixŭ i Tupana inapoxcuexŭ. Rŭ ngēmawena rŭ tá nanapoxcue i guxŭma i ngēma togŭ i duŭxŭgŭ i chixexŭ ŭgŭxŭ. ¹⁰ Natŭrŭ ngēma duŭxŭgŭ i mexŭ ŭgŭxŭ, rŭ Tupana tá namaā nataāē, rŭ tá nanatachigaxēē, rŭ tá nanataāēxēē. Rŭ ngēma Yudiŭgŭ i mexŭ ŭgŭxŭcēxira tá nixŭ i ngēma. Rŭ ngēxgumarŭŭ i guxŭma i togŭ i duŭxŭgŭ i mexŭ ŭgŭxŭcēx rŭ tá ta nixŭ. ¹¹ Erŭ Tupanapēxewa rŭ nawŭxigu i ngēma duŭxŭgŭ i Yudiŭgŭ ixŭgŭxŭ rŭ ngēma togŭ i duŭxŭgŭ i tama Yudiŭgŭ ixŭgŭxŭ. Rŭ guxŭma ya texē ya chixexŭ ŭgŭxe rŭ tá tanayaxu i tŭmaārŭ poxcu, natŭrŭ guxŭma ya texē ya mexŭ ŭgŭxe rŭ tá Tupana tŭmamaā nataāē. ¹² Rŭ guxŭma i duŭxŭgŭ i pecadu ŭgŭxŭ i tama nŭxŭ cuēxŭgŭxŭ i ngēma mugŭ ga Moŭché ŭmatŭxŭ, rŭ tá inayarŭtauxe. Rŭ ngēxgumarŭŭ ta i guxŭma i ngēma pecaduāxgŭxŭ i nŭxŭ cuēxŭgŭxŭ i ngēma mugŭ ga Moŭché ŭmatŭxŭ, rŭ ngēma mugŭ nŭxŭ ixuxŭācŭma Tupana tá nanapoxcue. ¹³ Erŭ Tupanapēxewa rŭ taxuwama name i ngēma duŭxŭgŭ i nŭxŭ űnŭēmarexŭ natŭrŭ tama nagu maxēxŭ i norŭ mugŭ. Natŭrŭ ngēma duŭxŭgŭ i Tupanaārŭ mugŭga űnŭēxŭ nixŭ i aixcŭma Tupanapēxewa imexŭ. ¹⁴ Dŭcēx, i ngēma duŭxŭgŭ i tama Yudiŭgŭ ixŭgŭxŭ. Nŭmagŭ rŭ tama nŭxŭ nacuēxŭ i Tupanaārŭ mugŭ. Natŭrŭ ngēxguma nŭēchamatama naxŭgŭmareāgu i ngēma Tupana tŭxŭ muxŭ, rŭ tŭxŭ nŭxŭ nadauxēē na nŭxŭ nacuēxŭgŭxŭ i űacŭ na yŭxŭ i mexŭ rŭ űacŭ na yŭxŭ i chixexŭ, woo tama nŭxŭ na nacuēxŭchirēxŭ i Tupanaārŭ mugŭ. ¹⁵ Erŭ nacŭmagŭwatama nixŭ i tŭxŭ nŭxŭ nadauxēēxŭ na nŭxŭ nacuēxŭgŭxŭ na űacŭ yŭxŭ i mexŭ rŭ űacŭ na yŭxŭ i chixexŭ. Rŭ ngēma duŭxŭgŭ rŭ ngēxguma chixexŭ naxŭgŭgu, rŭ naāēwatama nixŭ i nŭxŭ nacuēxŭgŭxŭ na nachixexŭ i ngēma naxŭgŭxŭ. Rŭ ngēxgumarŭŭ ta i ngēxguma mexŭ naxŭgŭgu, rŭ naāēwatama nixŭ i nŭxŭ nacuēxŭgŭxŭ na namexŭ i ngēma naxŭgŭxŭ. ¹⁶ Rŭ ngēma ngunexŭ i nagu Tupana Cristuxŭ namuxŭ na guxŭ i duŭxŭgŭxŭ yacagŭxŭcēx i norŭ maxŭchiga, rŭ ngēma duŭxŭgŭ i tama Tupanaārŭ mugŭxŭ cuēxŭgŭxŭ rŭ naāēwa tátama nixŭ i nŭxŭ nacuēxŭgŭxŭ na chixexŭ naxŭgŭxŭ rŭ ēxna mexŭ naxŭgŭxŭ. Rŭ ngēxguma tá nixŭ i nangōxŭ i guxŭma i ngēma chixexŭ i cŭācŭma naxŭgŭxŭ i duŭxŭgŭ, rŭ ngēma chixexŭ i nŭxŭcatama nagu naxŭnŭēxŭ. Rŭ Tupanaārŭ ore i pemaā nŭxŭ chixuxŭ nixŭ i tŭxŭ nŭxŭ cuēxēēxŭ i ngēma.

Yudiŭgŭchiga rŭ mugŭ ga Moŭché ŭmatŭxŭchiga

¹⁷ Natŭrŭ pema Pa Chaueneēgŭ i Yudiŭgŭ, rŭ űaperŭgŭgŭ:

“Toma rŭ Yudiŭgŭ tixŭgŭ rŭ meāma nŭxŭ tacuēx i Tupanaārŭ mugŭ ga Moŭché ŭmatŭxŭ”, űaperŭgŭgŭ. Rŭ ngēmaācŭ nagu perŭxŭnŭē na Tupanapēxewa pimexŭ erŭ meāma nŭxŭ pecuēx i ngēma Tupanaārŭ mugŭ ga Moŭché ŭmatŭxŭ. Rŭ ngēmaācŭ Tupanamaā pegŭ picuēxŭŭgŭ erŭ nagu perŭxŭnŭē na Tupana pexŭ nangechaŭxŭ erŭ Yudiŭgŭ pixŭgŭ. ¹⁸ Rŭ nŭxŭ pixu na meāma nŭxŭ pecuāxŭ i űacŭ nixŭ i Tupanaārŭ ngŭchaŭ rŭ űacŭ nixŭ

i mexŭ rŭ Ƨacŭ nixŭ i chixexŭ. Rŭ Tupanaārŭ mugŭwa naxcèx pengŭe na naxcèx pedauxŭ i ngēma aixcŭma mexŭ ixŭxŭ. ¹⁹ Rŭ pema rŭ ñaperŭgŭgŭ:

“Toma rŭ meāma nŭxŭ tacuèx na tanaxucuxèxŭ i ngēma togŭ i duŭxŭgŭ i tama Tupanaxŭ cuèxgŭxŭ. Rŭ meāma nŭxŭ tacuèx na itayanawèxächixèèxŭ i ngēma togŭ i chixexŭwa ngēxmagŭxŭ”, ñaperŭgŭgŭ. ²⁰ Rŭ pema nagu perŭxŭnŭègu rŭ nŭxŭ pecuèx na ñuxácŭ penaxucuxèxŭ i ngēma togŭ i duŭxŭgŭ i tama Tupanaxŭ cuèxgŭxŭ rŭ ñuxácŭ penangŭexèèxŭ i ngēma duŭxŭgŭ i ngexwacèx yaxôgŭxŭ. Rŭ ngēmaācŭ nagu perŭxŭnŭè na togŭarŭ ucuxèruŭgŭ pixŭgŭxŭ, erŭ Tupanaārŭ mugŭwa pengŭe rŭ ngēmacèx meāma nŭxŭ pecuèx i Ƨacŭ nixŭ i mexŭ rŭ Ƨacŭ nixŭ i ore i aixcŭma ixŭxŭ. ²¹ Rŭ dŭcax, Pa Chaueneègŭ i Yudŭgŭx, pema na togŭxŭ pengŭexèèxŭ, Ƨrŭ tŭxcŭtŭ tama pegŭtama pengŭexèè? Pema nŭxŭ pixu na tama namexŭ na ingŭxŭ, Ƨrŭ tŭxcŭtŭ i pema ipengŭèxŭ? ²² Rŭ pema nŭxŭ pixu na tama namexŭ na naŭ i ngēmaā ipexŭ, Ƨrŭ tŭxcŭtŭ i pema i ngēmaācŭ pemaxèxŭ? Rŭ pema na naxchi pexaixŭ i togŭarŭ tupanagŭnetachicŭnèxāgŭ, Ƨrŭ tŭxcŭtŭ i naxcèx pengŭèxŭ i norŭ tupaucagŭarŭ ngēmaxŭgŭ? ²³ Pema nŭxŭ pixu na namexŭ i Tupanaārŭ mugŭ i ũmatŭxŭ, rŭ petaāè erŭ meā nŭxŭ pecuèxgŭ i ngēma mugŭ. Natŭrŭ Tupanamaā chixexŭ pexŭe, erŭ tama naga pexŭnŭè i ngēma pexŭ namuxŭ i norŭ mugŭwa. ²⁴ Rŭ ngēmacèx i Tupanaārŭ ore i ũmatŭxŭwa rŭ ñanagŭrŭ: “Rŭ pegagu nixŭ na chixri Tupanachiga yadexagŭxŭ i ngēma duŭxŭgŭ i tama Yudŭgŭ ixŭgŭxŭ”,

ñanagŭrŭ. ²⁵ Pema rŭ pegŭ ipewiechèxmŭpèxechiraŭgŭ na Tupanaārŭ duŭxŭgŭ pixŭgŭxŭcèx. Rŭ name nixŭ na penaxŭxŭ i ngēma, ega aixcŭma naga pexŭnŭègu i Tupanaārŭ mugŭ. Natŭrŭ ngèxguma chi tama naga pexŭnŭègu i Tupanaārŭ mugŭ, rŭ woo Yudŭgŭ pixŭgŭgŭ, natŭrŭ Tupanapèxewa rŭ taxuwama pexŭ name i ngēma na pegŭ ipewiechèxmŭpèxechiraŭgŭxŭ. ²⁶ Rŭ ngēma togŭ i duŭxŭgŭ i tama nŭgŭ iwiechèxmŭpèxechiraŭgŭxŭ, rŭ woo tama ngēma naxŭgŭgŭ, natŭrŭ Tupanaārŭ duŭxŭgŭ tá nixŭgŭ ega naga naxŭnŭègu i norŭ mugŭ. ²⁷ Rŭ dŭcax, Pa Chaueneègŭ i Yudŭgŭx, rŭ ngēma duŭxŭgŭ i tama iwiechèxmŭpèxechiraŭgŭxŭ natŭrŭ naga inŭèxŭ i Tupanaārŭ mugŭ, rŭ ngēma duŭxŭ rŭ tá Tupana-pèxewa pexŭ nixu na ñuxácŭ pechixexŭ. Rŭ ngēmaācŭ tá pexŭ naxŭpetŭ erŭ tama naga pexŭnŭè i Tupanaārŭ mugŭ i woohirèx na nŭxŭ pecuáxŭ i ngēma mugŭ, rŭ woohirèx na ipewiechèxmŭpèxechiraŭgŭxŭ. ²⁸ Rŭ dŭcax, rŭ tama ngēma na Yudŭxacŭgŭ pixŭgŭxŭcèx nixŭ na aixcŭma Tupanaxácŭgŭ pixŭgŭxŭ. Rŭ tama ngēma na ipewiechèxmŭpèxechiraŭgŭxŭcèx nixŭ na Tupanaārŭ duŭxŭgŭ pixŭgŭxŭ. ²⁹ Erŭ yixema aixcŭma tŭmaārŭ maxŭnewa Tupanaga inŭèxŭ tixŭ ya aixcŭma Tupanaxácŭ ixŭxè. Rŭ ngèxguma aixcŭma taāèwa yaxôxgu nixŭ i aixcŭma Tupanaārŭ ixŭxŭ. Rŭ Tupanaāè i ũnèxŭ nixŭ i tŭxŭ rŭngŭxèèxŭ na yaxôxŭcèx, rŭ tama ngēma mugŭ ga Moiché ũmatŭxŭgŭ nixŭ. Rŭ yixema aixcŭma Tupanaārŭ ixŭxè, rŭ Tupana rŭ tŭmamaā nataāè woo duŭxŭgŭ tama tŭmamaā taāègŭgŭ.

3

¹ ƧRŭ ñuxma rŭ Ƨacŭwa tŭxŭ namexŭ na Yudŭgŭ ixŭgŭxŭ? ƧRŭ Ƨacŭwa namexŭ na iwiechèxmŭpèxechiraŭgŭxŭ? ² Rŭ poraācŭxŭchima tŭxŭ name na Yudŭgŭ ixŭgŭxŭ. Yerŭ nŭma ga Tupana rŭ tŭxnaxŭchi nixŭ ega naxāāxŭ ga norŭ mugŭ i ũmatŭxŭ. ³ ƧRŭ Ƨacŭ tá ngupetŭxŭ i ñuxma ega ñuxre i tatanŭxŭ i Yudŭgŭ rŭ tama meā yanguxèègŭāgu i ngēma Tupana tŭxŭ muxŭ? ƧRŭ pexcèx rŭ ngēmacèx tātŭtama yanguxèèāxŭ ya Tupana i ngēma tamaā

inaxunetaxū? ⁴ Rū tama ngēmaācū nixī. Erū woo guxū i duūxūgū rū yadoratēəxgūgu, natūrū Tupana rū taguma nidora rū guxūguma nayanguxēē i ngēma nūma tamaā inaxunetaxū. Rū yemacəx norū ore ga Dabī ūmatūxūwa rū űanagūrū:

“Cumax, Pa Tupanax, rū aixcūma nixī i curū ore i nūxū quixuxū. Rū ngēxguma cuxū tangugūgūgu rū nūxū tadaugū na aixcūma cumexū”, űanagūrū. ⁵ Natūrū duūxūgū rū űnatūe erū űanagūrūgū:

“Rū nūetama nixī na chixexū ixūgūxū erū ngēmaācū yexeraācū nangox na namecūmaxū ya Tupana”, űanagūrūgū. Rū űanagūrūgū ta:

“Rū ngēxguma chi tórū chixexūgagu yexeraācū nangoxgu na aixcūma namecūmaxū ya Tupana, rū maneca tama name ega tórū chixexūcəx tūxū napoxcuegu”, űanagūrūgū. ⁶ Natūrū ngēma űaxūgu na naxīnūəxū i duūxūgū rū poraācū űnatūe, erū tama ngēmaācū nixī. Erū ngēxguma chi tama namexgu ya Tupana, űrū űuxācū chi i meā duūxūgūxū yacagūxū i naāneārū guxgu? ⁷ Natūrū i duūxūgū rū űanagūrūgū:

“Rū ngēxguma chi chorū chixexūgagu yexeraācū nangoxgu na űuxācū aixcūma namexū ya Tupana, űrū tūxcūū yīxū i choxna naçaxū naxcəx i chorū chixexū rū choxū napoxcuxū naxcəx i ngēma?” űanagūrūgū. ⁸ Natūrū ngēma űaxūgu na naxīnūəxū i duūxūgū rū poraācū űnatūe. Erū ngēxguma chi aixcūma yixūgu i ngēma nagu naxīnūəxū i duūxūgū, rū chi narūmemaē nixī na yexeraācū chixexū naxūgūxū na yexeraācū mexū na űnguxuchixūcəx. Rū dūcax, Pa Chaueneəgūx, nangəxma i chixexū i duūxūgū i choxū űgagūmarexū i nūxū ixugūəxū na ngēma yīxū i chorū nguxēətae i duūxūgūxū namaā changūexēəxū. Natūrū ngēma duūxūgū i ngēma űagūxū rū nagagu tātama napoxcue.

Guxāma i yixema rū taxūetūxūgū

⁹ űRū űuxācū nixī i űuxmax? űPəxcəx rū yixema i Yudīugū rū togū i duūxūgūarū yexera Tupanapəxewa imexū? Pemaā nūxū chixu rū tama ngēmaācū nixī. Erū guxūma i duūxūgū i Yudīugū ixūgūxū rū guxūma i duūxūgū i tama Yudīugū ixūgūxū, rū naxūetūxūgū. ¹⁰ Erū Tupanaārū ore i ūmatūxūwa rū űanagūrū:

“Rū tataxuma ya texé ya aixcūma Tupanapəxewa mexē, rū bai ya wūxie. ¹¹ Rū tataxuma ya texé ya aixcūma nūxū cuāxe i Tupanaārū ore na űuxācū nanaxwəxəxū na naxcəx imaxəxū. Rū tataxuma ya texé ya aixcūma Tupanacəx dauxe. ¹² Rū guxāma űtatūe, rū guxāma űtayarūtauxe rū chixexū taxūgū i Tupanapəxewa. Rū tataxuma ya texé ya aixcūma mexū űechaxe, rū bai ya wūxie. ¹³ Rū tūmaāx rū wūxi i yuetamaxū i ingenaxūrūū nixī erū ngema űtanaxūxūxēē i nagūxūraūxū i dexa i chixexū. Rū tūmaārū conūmaā rū poraācū tidora. Rū ngēma tūmaārū dexa rū űoma āxtapeguchatarūū nixī erū togūxū naxchixēē. ¹⁴ Rū chixexū i ore i duūxūgūāēwa ngūxūmaāxīcatama tidexagū. ¹⁵ Rū űtamemare na duūxəxū timáxū. ¹⁶ Rū ngextá űtaxūxūwa rū togūxū tachixexēē rū tanangechaūxēē rū chixexūgu tanayixēē. ¹⁷ Rū tama nūxū tacuəx na űuxācū togū i duūxūgūxū tangechaūgūxū rū meā natanūwa tamaxəxū. ¹⁸ Rū tama nūxū tacuāxchaū na Tupanaxū tamuūəxū”,

űanagūrū i ngēma ore i ūmatūxūwa. ¹⁹ Rū nūxū tacuəx rū ngema poxcu i Tupanaārū mugūwa nūxū yaxuxū rū naxcəx nixī i ngema Yudīugū ga natanūwa nanguxū ga yema mugū. Rū woo ngema tama Yudīugū ixūgūxū i duūxūgūcəx rū ta nixī i ngema poxcu. Erū taxūema aixcūma naga taxīnū

i ngēma mugū. Rū ngēmacèx taxucūrūwa texé Tupanapewa tūgū ítapoxū i ngēxguma Tupana tūxū icagūgu i tūmaārū pecaduchiga. ²⁰ Rū űuxma na taxúema aixcūma naga ĩnūèxū i ngēma mugū, rū ngēmacèx taxucūrūwama texé tūgū tixu na ngēma mugū taxaurexūgagu Tupanapēxewa tamexū. Erū ngēma mugū tūxū nūxū cuèxēèxū nixī na poraācū ipecaduāxgūxū.

Tóru ōgagu nixī i Tupana tūxna naxāxū i maxū

²¹⁻²² Rū űuxma na taxucūrūwama Tupanapēxewa tūxū yamexēèxū i ngēma mugū, rū ngēmacèx ya Tupana rū tūxū nūxū nacuèxēè na űuxācū yīxū i tūxū yamexēèxū na napēxewa imexūcèx. Rū pemaā nūxū chixu rū Ngechuchu ya Cristuaxū na yaxōgūxūgagu nixī i tūxū yamexēèxū ya Tupana na aixcūma napēxewa imexūcèx. Rū yema mugū ga Moiché ūmatūxū rū yema ore ga nūxcūmaūgūxū ga orearū uruūgū ūmatūxū rū tūxū nūxū nacuèxēè i ngēma. Rū yema mexū ga Tupana taxcèx ūxū ga yexguma nūma namuāgu ga Nane na tóru pecadu naxūtanūxūcèx, rū guxū i duūxūgū i yaxōgūxūcèx nixī, erū Tupanapēxewa rū nawūxigu i guxūma i ngēma duūxūgū. ²³ Rū guxāma tīpecaduāxgū rū nūxna tayaxūgūgu ya Tupana ya tūxū maxēxēècū. ²⁴ Natūrū ga Tupana rū poraācū tamaā namecūma rū yemacèx tūxū nangetanūācūma tūxū nimexēègū na napēxewa imexūcèx. Rū űuxma rū tūxū nangēxma i maxū i taguma gūxū, yerū Ngechuchu ya Cristu rū marū tūxū nanaxūtanū ga tóru pecadugū. ²⁵⁻²⁶ Rū Tupana rū aixcūma nūma nanamu ga Cristu na nayuxūcèx rū yemaācū tóru pecadu naxūtanūxūcèx na Tupana tūxū nūxū rūngūmaxūcèx i ngēxguma aixcūma Cristuaxū yaxōgūgu. Rū yemaācū nanaxū ga Tupana na tūxū nūxū nadauxēèxūcèx na űuxācū nūma nūgūcèx tūxū yamexēèxū na aixcūma napēxewa imexūcèx. Rū nūxcūma ga Tupana rū yaxna namaā naxīnū ga duūxūgū ga yexguma chixexū naxūegu, rū tama paxa nanapoxcue. Rū űuxma rū ta tūxū nanawēx na űuxācū aixcūma namexū i ngēma nūma naxūxū erū tūxū ĩnanapi i tóru pecadugū. Rū ngēmaācū tūxū nūxū nadauxēè na űuxma rū ta aixcūmacū yīxū i ngēxguma tūxū yaxuxgu na napēxewa marū timexū ya guxāma ya yīxema Ngechuchuaxū yaxōgūxe. ²⁷ Rū ngēmacèx i űuxma rū taxucūrūwama yīgū ticuèxūgū rū nūxū tixu na yixematama yīgū imexēègūxū i napēxewa. Erū taxucūrūwama texé tūgū tamexēè i Tupanapēxewa. Rū tama ngēma na naxaurexūcèx i ngēma mugū nixī i imexū, rū tama ngēma na mexū ixūgūxūcèx nixī i imexū. Natūrū Tupanapēxewa time i űuxma, erū Cristuaxū tayaxōgū. ²⁸ Rū yixema nūxū tacuèx rū ngēxguma Cristuaxū yaxōgūgu nixī i Tupanapēxewa imexū, rū tama ngēma mugū na ĩxaregūxūcèx nixī i napēxewa imexū. ²⁹ ¿Ēxna pexcèx rū Tupana rū Yudīgūarū Tupanaxīcatama yīxū? ¿Rū tama ēxna i ngēma togū i duūxūgūarū Tupana rū ta yīxū? Ngēmaācūx, ngēma togū i duūxūgū i tama Yudīgū ixīgūxūārū Tupana ta nixī. ³⁰ Rū nūxū tacuèxgū na nangēxmaxū ya wūxitama ya Tanatū ya Tupana. Rū guxūma i duūxūgū i Cristuaxū yaxōgūxū, rū nūma ya Tupana rū nayamexēè na napēxewa yamexūcèx. Rū ngēmaācū i nūma ya Tupana rū Yudīgūxū nimexēè i ngēxguma yaxōgūāgu. Rū ngēxgumarū ta nayamexēè i guxūma i togū i duūxūgū i ngēxguma Cristuaxū yaxōgūāgu. ³¹ Rū űuxma na Cristuaxū yaxōgūxū, rū bexmana nagu perūxīnūè na ngēmaācū ĩyanaxoxēèxū i ngēma mugū. Natūrū tama ngēmaācū nixī. Erū űuxma na Cristuaxū yaxōgūxū rū aixcūma tayanguxēè i ngēma Tupana tūxū muxū.

4

Abrául rü Tupanaãxıl nayaxõ rü yemacèx Tupana nüxıl nixu na namexıl

¹ ¿Rü ñuxma rü ñuxıl ñagıxıl tá i nachiga ga nuxcúmaılcü ga tórü oxı ga Abrául? ¿Rü ñuxácü nixı ga nüxıl naxıpetüxıl ga Tupanapèxewa? ¿Rü tüxcüıl yııxıl ga Tupana nüxıl ixuxıl ga Abrául rü mecü na yııxıl? ²⁻³ Rü dücax, yexguma chi wüxi ga norü puracü ga mexüçèx Tupanapèxewa namexgu ga Abrául, rü yexguma chi waxı nixı ga nüxıl nayexmaxıl ga tacüçèx nügü na yacuèxüxıl. Natürü taxucèxma Tupanapèxewa nügü nicuèxüıl ga Abrául, erü Tupanaärü ore i ümatüxıtwa rü ñanagürü:

“Abrául rü Tupanaãxıl nayaxõ, rü yemacèx Tupana nanayaxu rü nüxıl nixu na namexıl”,

ñanagürü i ngèma ore. ⁴ Rü ngèxguma texé wüxi i puracü üxgu rü tüxıl naxütanügu rü woetama tümaärü natanü nixı rü tama ämare nixı i ngèma.

⁵ Natürü tama ngèmaäcü nixı i ngèxguma Tupanaãxıl yaxõxgu. Erü ngèxguma yaxõxgu, rü tama tacü rü puracü i mexüçèx nixı i Tupanapèxewa imexıl, natürü Tupanapèxewa time erü tayaxõ. Rü ngèmaäcü Tupana tüxıl nayaxu ya yıxema yaxõxè woo taxuıma i tacü rü puracü i mexıl taxıxgu na ngèmacèx Tupana tüxıl rüngılçèxıl. ⁶ Rü nuxcúmaılcü ga äèxgacü ga Dabı rü ta tümachiga nidexa ga guxema duıxè ga yaxõxè. Rü nüxıl nixu ga na tataäèxıl ga guxema duıxè yerü Tupanapèxewa tame, woo tama tacü rü mexıl taxıxgu na yemaäcü Tupanapèxewa tamexüçèx. ⁷ Rü nüma ga Dabı rü ñanagürü:

“Rü tataäègü ya yıxema duıxègü ya Tupana tümaärü chixexügüxıl ngechaıxè rü tümaärü pecadugüxıl iyanangümaxè. ⁸ Rü tataäè ya yıxema duıxè ya Tupana tama tüxıl nagu naxınüxè i tümaärü pecadu”,

ñanagürü ga Dabı. ⁹ Rü dücax, çpecèx rü ngèma taäè rü ngèma duıxügü i Yudıügü ixıgüxüçèxıcatama yııxıl, rü èxna ngèma togü i duıxügüçèx ta yııxıl? Düçèx, rü marü pemaä nüxıl tixu rü Tupanapèxewa name ga Abrául yerü nayaxõ. Rü yemacèx Tupana nanayaxu. ¹⁰ ¿Natürü ñuxgu nixı ga

nayauxãxıl? ¿Èxna marü ínawiechèxmüpèxechıraıguwena, rü èxna naxıpa ga na ínawiechèxmüpèxechıraıxıl? Rü pemaä nüxıl chixu rü naxıpa nixı ga na Tupana nayaxuxıl ga Abrául. ¹¹ Rü Tupana nayaxuxguwena nixı ga ínawiechèxmüpèxechıraıxıl ga Abrául. Rü yema nixı ga norü cuèxruıl ga nawa nüxıl nacuáxıl na aixcúma Tupana marü nayaxuxıl rü nüxıl nadauxıl na namexıl yerü nüxıl nayaxõ. Rü ngèmacèx i ñuxma ya Abrául rü tümanatü yııxıl ya guxãma ya yıxema yaxõgüxe woo tama ítawiechèxmüpèxechıraıgügu. Rü ngèmaäcü ya Tupana rü tüxıl nayaxu ya guxãma ya yıxema yaxõgüxe, rü tüxıl nadau na timexıl erü tayaxõgü. ¹² Rü ngèxgumarüıl ta ya Abrául rü tümanatü nixı ya guxãma ya yıxema íwiechèxmüpèxechıraıgüxe rü Abráulrüıl yaxõgüxe.

Natürü tama ngèma na tügü ítawiechèxmüpèxechıraıgüxüçèx nixı i tümanatü yııxıl. Natürü tümanatü nixı erü tayaxõgü yexgumarüıl ga na yaxõxıl ga nüma ga tanatü ga Abrául naxıpa ga na ínawiechèxmüpèxechıraıxıl.

Abrául rü Tupanaãxıl nayaxõ rü yemacèx Tupana nayanguxèè ga norü uneta ga Abráulmaä nüxıl yaxuxıl

¹³ Rü Tupana rü Abráulmaä inaxuneta na nüma ya Abrául rü guxıma i naxrüıl yaxõgüxıl rü tá na nayauxgüãxıl i ñoma i naäne na noxrü yııxüçèx. Natürü tama yema na mugü naxaurexüçèx nixı ga Tupana yemaäcü Abráulmaä ixunetaxıl. Natürü yemaäcü namaä inaxuneta yerü Abrául

nayaxō, rü yemacèx Tupanapèxewa name. ¹⁴ Natürü ngēxguma chi ngēma duñxūgü i mugü auregüxcèxicatama yixīgu i ngēma Tupanaärü uneta, rü natücèxmamare chi nixī i ngēma na yaxōgüxū, rü chi ngēma Tupanaärü uneta rü taxuwama name. ¹⁵ Nüxū tacuèx rü ngēma mugü ga Moiché ümatüxū rü poxwama tüxū naga erü taxüema aixcüma meã tayanguxēē. Natürü yexguma chi natauḡguma ga yema mugü rü tatau chima na texé chixri yanguxēxū. ¹⁶ Rü yexguma Tupana Abráümaã ixunetagu na nüxū tá nangüxēēxū, rü Abráüärü ògagu nixī ga namaã inaxunetaxū. Rü ngēmacèx i guxāma i yixema na Abráürüü yaxōgüxū rü taxcèx ta nixī ga yema Tupanaärü uneta ga Abráümaã nüxū yaxuxū. Rü ngēmawa nüxū tacuèx rü tama yixema mugü auregüxcèxicatama nixī i ngēma Tupanaärü uneta, natürü guxāma ya yixema Abráürüü Tupanaäxū yaxōgüxcèx ta nixī. Rü ñuxma rü guxāma i yixema na Abráürüü meã yaxōgüxū rü Abráüxácügu tixīgu rü nüma rü tanatü nixī i Tupanapèxewa yerü nüxīra nayaxō. ¹⁷ Rü Tupanaärü ore i ümatüxūwa rü Abráüchigaxū nixu rü ñanagürü:

“Rü muxūma i duñxūgünatü tá cuxū chixīxēē”,
ñanagürü. Rü Abráü rü Tupanaäxū nayaxō, rü yemacèx Tupana nayanguxēē ga norü uneta ga namaã nüxū yaxuxū. Rü yima Tupana nixī ya wena namaxēxēēcü i yuexū. Rü yimafama nixī ya naxücü i ngēma woo ñuxma taxuxū. ¹⁸ Rü nüma ga Abráü rü aixcüma nayaxō ga yexguma Tupana nüxū ñaxgu:

“Rü tá namuxūchi i cutaagü”,
ñaxgu. Rü woo ga Abráü ga marü yaguãxūchichirèx na yīxū rü na nangex-acüxū, natürü nayaxōōma ga yema Tupanaärü uneta rü meã ñnananguxēē na wüxi ga nane tá nüxū yexmaxū. Rü yemaäcü ningu na muxūma i duñxūgünatü yīxū, yema Tupana namaã nüxū ixuxürüü. ¹⁹ Rü Abráü rü wixguxuchi 100 ga taunecü nüxū nayexma ga yexguma. Natürü tama inayarümaächichi ga na yaxōōxū woo nüxū na nacuáxū ga paxa tá na nayuexū ga nüma rü namèx ga Chara rü marü poraäcü nangupetüarü taunecüãḡgüxū ga na naxāxácüḡgüxcèx. ²⁰ Rü yemaäcü ga Abráü rü nayaxōōma na nüxū tá nayexmaxū ga wüxi ga nane yema Tupana namaã ixunetaxürüü. Rü tama nagu narüxīnū na Tupana ngürüächichi nawomüxēēxū. Natürü yexeraäcü Tupanaäxū nayaxōōma, rü nüxū nicuèxüü. ²¹ Rü aixcümaxūchi nayaxō na naporaxū ya Tupana na yanguxēēãxūcèx i guxūma i ngēma norü uneta. ²² Rü yemacèx ga Tupana rü nüxū nixu na napèxewa namexū ga Abráü. Yerü Tupana nüxū nadau ga ñuxäcü aixcüma nüxū na yaxōōxū. ²³ Rü tama Abráüchigaxicatama nixī ga naxümatüxū ga Tupanaärü ore ga ñaxū:

“Rü Tupana rü nüxū nixu na napèxewa namexū ga Abráü, yerü nüxū nadau ga ñuxäcü aixcüma nüxū na yaxōōxū”,
ñaxū. ²⁴ Natürü guxāma i yixema na yaxōgüxūchiga ta nixī i ngēma ore. Erü Tupana rü tórü ògagu tüxū nade na napèxewa imexü i yixema i nüxū na yaxōgüxū ya yima yuwa tórü Cori ya Ngechuchuxū írüdaxēēcü. ²⁵ Rü Ngechuchuxū nixī ga namuxū ga Tupana na tórü pecaducèx nayuxütcèx. Rü ñuxūchi nüma ga Tupana rü wenaxärü Ngechuchuxū ñarüdaxēē na nagagu imexütcèx i Tupanapèxewa.

5

¹ Rū ñuxma rū Tupanapēxewa time erū tayaxōgū. Rū ngēmacèx marū tama Tupanamaā taxuwanūāxgū i ñuxmax, erū tórū Cori ya Ngechuchu ya Cristu rū marū tamaā nanangūxmūxēē ya Tupana. ² Rū Cristugagu nixī na tamaā namecūmaxū ya Tupana i ñuxmax erū tayaxōgū. Rū nūxū tacuèx rū guxūgutāma tamaā namecūma. Rū tataāēgū erū nūxū tacuèx na tūxū tá nangēxmaxū i tachica i mexū i Tupanaxūtawa. ³ Rū ngēxgumarūū ta tataāēgū i woo ngūxū ingegūgu. Erū nūxū tacuèx rū ngēma ngūxū rū tūxū narūngūxēē na yexeraācū iporaexū rū yaxna namaā ixīnūēxūcèx. ⁴ Rū ngēxguma yaxna namaā ixīnūēgu rū Tupana rū tamaā nataāē. Rū ngēma na tamaā nataāēxū rū ngēmacèx meā itananguxēē na tūxū tá nangēxmaxū i tachica i mexū i Tupanaxūtawa. ⁵ Rū ñuxma na ínanguxēēxū na tūxū tá nangēxmaxū i tachica i Tupanaxūtawa, rū ngēmacèx taxucēxma tangechaūgū. Erū Tupana rū poraācū tūxū nangechaū. Rū ngēma Naāē i Ūñexū i tūxna namuxū nixī i tūxū nūxū cuèxēēxū i ngēma. ⁶ Rū yexguma taxucūrūwama yigūtama imaxēxēēgu, rū nawa nangu na Tupana yanguxēēxū ga yema norū uneta. Rū yexguma nixī ga ñoma ga naānewa namūāxū ga Cristu na pecaduāxgūxūcèx nayuxūcèx. ⁷ Rū tama natauxcha na wūxie rū to i duūxūcèx tayuxū, woo wūxi i duūxū i mexūcèx yixīgu. Rū woo tangēxmagu ya texé ya naxcèx yuchaūchirēxe i wūxi i duūxū i aixcūma mexēchixū, natūrū tama tūxū natauxcha i ngēma. ⁸ Natūrū Tupana tūxū nūxū nadauxēē na ñuxācū tūxū nangechaūxū yerū yexguma ipecaduāxgūgu nixī ga taxcèx nayuxū ga Cristu. ⁹ Rū ñuxma rū Tupanapewa time yerū taxcèx nayu ga Cristu. Rū ngēmacèx meāma nūxū tacuèx rū nūma rū aixcūma tá tūxū ínanguxūxēē na tama tūxū napoxcuexūcèx ya Tupana. ¹⁰ Rū yexguma norū uwanūgū ixīgūgu, rū nūmatama ga Tupana rū nūgūmaā tūxū narūngūxmūxēē ga yexguma nayuxgu ga Nane. Rū ñuxma na marū namaā irūngūxmūxēē, rū yexeraācū nūxū tacuèx na tūxū nangēxmaxū i maxū i taguma gūxū nagagu na namaxūxū i nūmax. ¹¹ Rū tama ngēxīcatama nixī. Natūrū i ñuxma rū tórū Cori ya Ngechuchu ya Cristugagu rū Tupanamaā tataāēgū, yerū Cristugagu nixī ga Tupana ga tamaā nangūxmūxū.

Adáūchiga rū Cristuchiga

¹² Rū nūxiraxūcū ga yatū ga Adáūgagu nixī ga guxūma ga duūxūgūwa nanguxū ga pecadu. Rū pecadugagu ínangu i yu. Rū yemaācū guxūma ga duūxūgūwa naxūe na nayuxū, yerū guxūma nipecađuāx. ¹³ Rū naxūpa na Tupana Moīchéna naxāxū ga yema mugū ga naxūmatūxū, rū duūxūgū rū chixexū naxūgūeche, rū yemacèx nayue. Natūrū yema mugū rū tauta nayexma ga yexguma, rū yemacèx taxucūrūwa texé nūxū tixu ga yema duūxūgū ga na chixri naga naxīnūēxū ga yema mugū. ¹⁴ Rū yema duūxūgū ga Adáūwena buexū rū tama Adáūrūū nanangōx ga yema orīx ga Tupana nūxna chuxuxū. Natūrū chixexū naxūgū, rū yemacèx nayue. Rū yemaācū nixī ñuxmata Tupana Moīchéna naxā ga yema mugū ga naxūmatūxū. Rū Adáūwa inaxūgū na nayuxū ga duūxūgū, natūrū Cristuwa inaxūgū na nayuxū i maxū i taguma gūxū. ¹⁵ Natūrū yema chixexū ga Adáū ūxū rū taxuacū nagu tanangu i ngēma āmare ga Tupana tūxna āxū, erū tama namaā nawūxigu. Rū aixcūma nixī ga wūxi ga yatūarū chixexūgagu na nayuxū i guxūma i duūxūgū. Natūrū tama yemaācū tamaā nanaxū ga Tupana. Yerū nūma rū tūxū nangetanūācūma nūma nanamu ga Nane ya Ngechuchu ya Cristu na tórū pecaducèx nayuxūcèx. Rū yemaācū guma Cristugagu Tupana nanamaxēxēē i muxūma i duūxūgū. ¹⁶ Rū yema pecadu ga Adáū ūxū rū taxuacūma nagu tanangu ga yema āmare ga Tupana tūxna āxū. Yerū wūxitama

ga Adáũrũ pecadugagu, rũ Tupana nũxũ nixu rũ tá nayu naxcèx ga yema. Natürũ Ngechuchu ya Cristugagu rũ Tupana nũxũ nixu na napèxewa imexũ rũ nüxna ñinguxũxũ i guxũma i tórũ pecadugũ. ¹⁷ Rũ guxũma i duũxũgũ nayue yerũ wũxitama ga yatũ ga Adáũ rũ pecadu naxũ. Natürũ tama yemaãcũ tamaã nanaxũ ga Tupana, yerũ ga nüma rũ poraãcũ tamaã namecũma rũ tũxũ nangetanũãcũma tũxũ narũngũxèẽ. Rũ ngẽmacèx i ñuxma rũ guxũma i ngẽma duũxũgũ i Tupana nũxũ ixuxũ na napèxewa yamexũ, rũ nümatama ya Tupana rũ Nane ya Ngechuchu ya Cristugagu nanamaxèxèẽ na namaã wũxigu ãẽxgacũgũ yixĩgũxũcèx. ¹⁸ Rũ yema Adáũrũ chixexũ rũ poxcuwa nanagagũ ga guxũma ga duũxũgũ. Natürũ yema mexũ ga Ngechuchu ya Cristu ùxũ rũ pecaduwa ñnananguxũxèẽ i guxũma i duũxũgũ i yaxõgũxũ, rũ nüxna nanaxã i maxũ i taguma gũxũ. ¹⁹ Rũ guma nüxĩraũcũ ga yatũ ga Adáũ rũ tama Tupanaga naxĩnũ. Rũ yemaãcũ wũxitama ga yatũgagu rũ muxũma ga duũxũgũ rũ nipecaduãx. Natürũ ñnangu ga guma yatũ ga Ngechuchu, rũ meã Tupanaga naxĩnũ. Rũ gumagagu rũ muxũma i duũxũgũ rũ tá nime i Tupanapèxewa. ²⁰ Rũ Tupana rũ Moĩchéna nanaxã ga norũ mugũ na duũxũgũxũ nũxũ nacuẽxèxũcèx na ñuxãcũ poraãcũ pecadu naxũgũxũ. Natürũ yexguma yexeraãcũ pecadu naxũgũga duũxũgũ, rũ yexeraãcũ Tupanaãxũ nangechaũtũmũũgũ. ²¹ Rũ ñuxma woo pecadugagu na iyuexũ, natürũ Tupanaãxũ tangechaũtũmũũgũ i guxũguma. Rũ ngẽmaãcũ pecaduwa tũxũ ñanguxũxèẽ na napèxewa imexũcèx rũ tórũ Cori ya Ngechuchu ya Cristugagu tũxũ nangẽxmaxũcèx i maxũ i taguma gũxũ.

6

Ñuxma rũ tama pecadu ixũgũxũcèx nixĩ i imaxèxũ, natürũ Cristucèx nixĩ i imaxèxũ

¹ Rũ ñuxma na Tupanaãxũ ingechaũtũmũũgũxũ, ¿rũ ñuxãcũ tá imaxèxũ i ñuxmax? ¿Rũ pexcèx rũ namexũ na pecadu ixũgũechaxũ na yexeraãcũ Tupanaãxũ ingechaũtũmũũgũxũcèx? ² Rũ dũcax, tama ngẽmaãcũ nixĩ. Erũ ñuxma pecaduchaxwa rũ ñoma iyuexũrũ tixĩgũ, erũ marũ tama naga taxĩnũẽ. Rũ ngẽmacèx tama name i yeũcürũ pecadu taxũgũecha. ³ ¿Tama èxna nũxũ pecuèx na ñacũcèx yĩxũ na ñibaiũxũ? Rũ ñtabaiũ na ngẽmaãcũ duũxũgũxũ nawèxũcèx na aixcũma Ngechuchu ya Cristuarũ duũxũgũ na ixĩgũxũ. Rũ yexguma ñibaiũgu, rũ nüma nayuxũrũ yexma nayu ga tacũma ga nuxcũmaũxũ. ⁴ Rũ yexguma ñibaiũgu, rũ Cristu yuxũrũ yexma nayu ga tacũma ga nuxcũmaũxũ, rũ Cristu ñtaxũrũ inatèx ga yema tacũma ga nuxcũmaũxũ. Rũ yemaãcũ naxũpetũ na wena imaxèxũcèx rũ tũxũ nangẽxmaxũcèx i maxũ i ngexwacaxũxũ, yexgumarũũ ga Ngechuchu na yuwa ñrdaxũ rũ wena namaxũxũ ga yexguma Nanatũ ga Tupana norũ poramaã ñnadaxèẽgu. ⁵ Rũ ñuxma na Cristumaã wũxigu nayuxũ ga tacũma ga nuxcũmaũxũ, rũ nüxũ tacuèx na aixcũma Cristumaã tũxũ nangẽxmaxũ i maxũ i ngexwacaxũxũ. ⁶ Rũ nüxũ tacuèx rũ yema tórũ maxũ ga nuxcũmaũxũ rũ Cristumaã wũxigu curuchagu nayu na yexma yanaxoxũcèx ga yema tacũma ga chixexũ. Rũ ñuxma rũ tama pecadutũwa tangẽxmagũ, rũ ngẽmacèx marũ tama naga taxĩnũẽ. ⁷ Erũ yĩxema yũxe rũ marũ tama pecadutũwa tangẽxma na yeũcürũ pecadu taxũechaxũcèx. ⁸ Rũ ñuxma na Cristumaã nayuxũ ga tórũ maxũ ga nuxcũmaũxũ, rũ nüxũ tacuèx na Cristurũ tũxũ nangẽxmaxũ i maxũ i ngexwacaxũxũ. ⁹ Rũ nüxũ tacuèx rũ ñuxma na yuwa ñnadaxũ ya Cristu, rũ tagutãma wena nayu. Yerũ nüma rũ marũ yuxũ narũyexera. ¹⁰ Rũ

yexguma nayuxgu ga Cristu rü pecaducèx nixī ga nayuxū, rü noxtacūma yexma wūxicana ningutanū ga guxūma ga duūxūgūarū pecadugū. Natürū ñuxma na namaxūxū, rü Tupanacèx nixī i namaxūxū na Tupanaārū ngúchaū naxūxūcèx. ¹¹ Rū ngēxgumarūū ta i pema rü name nixī i pegūgu perūxīnūē na marū peyuexū pecaduchaxwa rü Tupanacèx pemaxèxū, erū Ngechuchu ya Cristuarū duūxūgū pixīgū. ¹² Rū ngēmacèx rü tama name i pecadutūwa pegū pengēxmagūxèē na pemaā inacuaūxūcèx. Rū tama name i penaxūchica i pecadu na pexeneārū ngúchaūgū i chixexū pexū naxūxèēxūcèx. ¹³ Rū tama name i pecaduna penaxāgū i pexene na ngēmamaā chixexū pexūgūxūcèx. Rū name nixī i Tupanana pegū pexāgū, erū ñoma duūxūgū i yuexū rü wena maxèxūrūū pixīgū. Rū ngēmacèx name nixī i Tupanana penaxāgū i pexene na ngēmamaā mexū pexūgūxūcèx. ¹⁴ Rū ñuxma rü tāūtāma pecadutūwa pengēxmagū na pemaā inacuaūxūcèx. Rū yexguma yema mugū ga Moiché ūmatūxūwe perūxīxgu, rü pemaā inacueū ga pecadu. Natürū i ñuxma rü Cristugagu Tupana pemaā namecūma, rü nūma nixī i pemaā inacuaūxū i ñuxmax.

Ngēxguma wūxi i corimēxēwa yigū ingēxmagūxèēgu, rü ngēmaga nixī i ixīnūēxū

¹⁵ Rū ñuxma na tama yema Moiché ūmatūxū ga mugūtūūwa ingēxmagūxū, rü ñuxma na Tupana rü Cristugagu tamaā mecūmaxū, ¿rū ñuxacū tá imaxèxū? ¿Rū pexcèx namexū na yeūcūrū pecadu ixūgūechaxū? Rū dūcax, tama name na ngēmaācū imaxèxū. ¹⁶ Rū pema nūxū pecueū rü ngēxguma wūxi i corimēxēwa pegū pengēxmagūxèēgu na naga pexīnūēxūcèx rü ngēma tá nixī i perū cori ixīxū, rü pema rü norū duūxūgū tá pixīgū i ngēma cori i naga pexīnūēxū. Rū ñuxma rü pema tá nūxū pedaugū ngoxī ngēxūrūūxū perū me yixī na ngēmaga pexīnūēxūcèx. Rū ngēxguma pecadu i yuwa tūxū gagūxū perū me yixīgu, rü ngēma tá nixī i pemaā icuaū. Rū ngēxguma perū me yixīgu na Tupanaga na pexīnūēxū, rü yimaga tá pexīnūē na napēxewa pimecxūcèx. ¹⁷ Natürū Tupanana moxē chaxā, yerū woo pecaduga na pexīnūēchirèxū, natürū i ñuxma rü aixcūma naga pexīnūē i ngēma nguxèētae i marū peyaxuxū i Cristuchiga. ¹⁸ Rū ñuxma rü Tupanaārū duūxūgū pixīgū erū nūma rü chixexūna pexū ínanguxūxèē na tama pecadu pexūgūechaxūcèx. Rū ngēmaācū pexū narūngūxèē na napēxewa pimecxūcèx rü meā naxcèx pemaxèxūcèx. ¹⁹ Rū ñoma i naānecūāx i duūxūgūmaā chidexarūū nixī i tauxchaxū i oremaā pemaā chidexaxū i ñuxmax, erū pema rü woetama taguma nūxū pexīnūē i ñaā ore, rü ngūrūāchi tāūtāma nūxū pecueū i tacūchiga na yīxū i ngēma pemaā nūxū chixuxū. Rū dūcax, rü nuxcūma rü ipenaxā ga pexene na namaā penaxūgūxūcèx ga nagūxūraūxū ga chixexū. Natürū i ñuxma rü name nixī i Tupanana pegū pexā na aixcūma napēxewa pexūūnegūxūcèx rü naxcèxicatama pemaxèxūcèx. ²⁰ Rū yexguma pecadutūwa peyexmagūgu, rü taxucūrūwama Tupanapēxewa mexū pexūgū ga yexguma. ²¹ ¿Natürū tacūwa pexū namexū ga yema chixexū i ñuxma rü wūxi i āne pexna āxū? Yerū yema chixexū rü yuwamare pexū nagagū, rü tama i maxūwa. ²² Natürū marū tama pecadutūūwa pengēxmagū i ñuxmax, erū marū nūxna ípengūū rü marū Tupanaārū duūxūgū pixīgū. Rū ngēma waxi nixī i poraācū pexū mexū erū ngēmagagu penayaxu i maxū i Tupanapēxewa ūūnèx rü ngēmawena tá penayaxu i maxū i taguma gūxū. ²³ Rū ngēma natanū na pecadu ixūxū, rü yu nixī. Natürū yīxema tórū Cori ya Ngechuchuaxū yaxōgūxe, rü Tupana tūxna nanaxāmare i maxū i taguma gūxū.

7

Wūxi i ngecū rū ngēxguma nayutegu rū marū tama ngītemēxēwa ingēxma. Rū ñuxma na taxcēx nayuxū ya Cristu, rū marū tama yema Moiché ūmatūxū ga mugūtūūwa tangēxmagū

¹ Pa Chaueneēgūx, rū pema na nagu pexīxū i ngēma mugū, rū nūxū pecuēx rū ngēxguma tamaļxguxicatama nixī na ngēma mugūtūūwa tangēxmaxū ya wūxichigū ya duūxē. ² Rū dūcax, rū wūxi i ngecū i ātecū rū ngītemēxēwa ingēxma ega namaxyane ya ngīte, erū ngēma ñanagūrū i ore i mugū. Natūrū ngēxguma nayuxgu ya ngīte, rū marū tama ngītemēxēwa ingēxma. Rū yema mugū ga ngītemēxēwa ngīxū yexmaxēēxū ga noxri rū marū tama ngīmaā inacuēx. ³ Rū ngēmaācū i ngēxguma namaxyane ya ngīte rū to i yatūmaā inapexgu, rū pecadu ixū. Natūrū ngēxguma marū nayuxgu ya ngīte, rū marū nūxna ūnguxuchi i ngēma mugū ga ngītemēxēwa ngīxū yexmaxēēxū ga noxrix. Rū ngēxguma wenaxārū naxātegu rū taxuūma i chixexū ixū. ⁴ Rū ngēxgumarūū ta i pemax, Pa Chaueneēgūx, rū marū tama yema Moiché ūmatūxū ga mugūtūūwa pengēxmagū yerū nūma ga Cristu rū pexcēx nayu. Rū ngēmacēx i ñuxma rū Cristu ga yuwa írūdacuārū pixīgū. Rū ngēmaācū nanaxū ya Tupana na naxcēx imaxēxūcēx, rū norū ngūchaū ixūgūxūcēx. ⁵ Rū yexguma nuxcūmaūxū ga tacūmawe rūxīxgu rū poraācū tanaxū ga taxūneārū ngūchaūgū woo yema mugū tūxna na nachuxuxū ga yema. Natūrū yexguma nūxū icuēxgu na nachuxuxū ga yema pecadu ga ixūxū, rū yexeraācū tanaxūxchaū. Rū yemaācū ga yema tōrū pecadugū rū yuwa tūxū nagagū. ⁶ Natūrū i ñuxma rū marū tama ngēma mugūtūūwa tangēxmagū, erū Tupana rū marū nūxna tūxū ūnguxūxēē. Rū ngēmacēx i ñuxma rū ñoma duūxūgū i iyuxūrūū tixīgū i napēxewa i ngēma mugū, erū marū tama tamaā inacuēx. Rū ngēmacēx tama nagu taxī i ngēma nuxcūma ūmatūxū ga mugū, erū marū nūxna itanguxū na Tupanaārū ngūchaū ixūgūxūcēx rū naxcēx na imaxēxūcēx namaā i tōrū maxū i ngexwacaxūxū i Naāē i Ūūnexū tūxna āxū.

Ngēma pecadu i chowa ngēxmaxū rū chomaā inacuēx

⁷ ¿Rū ñuxū ñagūxū tá i ñuxmax? ¿Rū pexcēx rū yema mugū yīxū ga tūxū pecaduāxēēxū? ¿Rū dūcax, tama name i ngēmaācū nagu tarūxīnūē! Natūrū yexguma chi yema mugū rū tama choxū nūxū nacuēxēēgu, rū tāū chima nūxū chacuēx na pecadutūwa chayexmaxū. Rū dūcax, rū yexguma chi yema mugū rū tāū chima choxū nūxū cuēxēēgu na wūxi i pecadu yīxū na toguāxārū ngēmaxūcēx chixauxāchixū, rū tāū chima nūxū chacuēx na pecadu yīxū i ngēma. ⁸ Natūrū yexguma yema mugū choxū nguxēēgu na nachixexū na toguāxārū ngēmaxū choxū ngūchaūxū, rū yexguma ga pecadu rū nayoxniē na yexeraācū choxū na nangūchaūxēēāxū. Rū ngēmaācū nūxū tadau rū ngēxguma chi natauxgu i ngēma mugū, rū tāū chima nūxū tacuēxgū na ñuxācū wūxi i chixexūchixū na yīxū i ngēma pecadu. ⁹⁻¹⁰ Rū noxri tauta yema mugūxū chacuēxgu, rū choma nagu charūxīnūgu rū chame. Natūrū yexguma yema mugūxū chacuēxgu, rū nūxū chicuēxāchi na chixexū chaxūxū rū ngēma chixexūcēx rū tá na chayuxū. Rū yemaācū ga yema mugū ga Tupana Moichéna āxū na duūxūgūxū namaxēēēxūcēx, rū choxū nayuxēēāma. ¹¹ Rū nūma ga pecadu rū nayoxniē namaā ga yema mugū. Yerū yexguma yema mugū choxū nguxēēgu na ñuxācū nachixexū ga yema pecadu, rū yexeraācū choxū nangūchaū ga yema pecadu. Rū yemaācū ga yema pecadu rū choxū nawomūxēē rū nayoxniē namaā ga yema mugū rū yuwa choxū

naga. ¹² Natürü yema mugü rü aixcüma naxüüne i Tupanapëxewa. Rü guxüma i ngëma Tupana tamaã nüxü ixuxü rü naxüüne rü aixcüma name rü tüxü narüngüxëe. ¹³ ¿Natürü ñuxäcü nixi i ngëma i ñuxmax? ¿Éxna pexcèx rü yema mugü yixü ga yuwa choxü gaxü? Rü dücax, rü tama ngëmaäcü nixi. Erü ngëma pecadu nixi i Tupanaärü mugümaã yoxniëxü na yuwa choxü nagaxüçex. Rü ngëmaäcü nüxü tacuëx na ñuxäcü poraäcü nachixexü i pecadu. Rü yexguma yema mugü choxü nguxëëgu na ñuxäcü poraäcü nachixexü ga yema pecadu, rü yexeraäcü choxü nangüchaü ga yema chixexü rü yexeraäcü chanaxüama ga pecadu. ¹⁴ Nüxü tacuëx i ngëma mugü rü Tupanaäe i Üünexüwa ne naxü. Natürü choma rü duüxümare chixi, rü ngëmacèx nixi i chomaã inacuáxü i ngëma pecadu i chaxüxü. ¹⁵ Rü tama nüxü chacuëx na tacü choxü üpetüxü erü tama chanaxü i ngëma mexü i chanaxwëxexü na chaxüxü, natürü ngëma chixexü i tama chanaxwëxexü na chaxüxü rü ngëmaãma nixi i chaxüxü. ¹⁶ Natürü i ñuxma na chanaxüxü i ngëma tama chanaxwëxechirëxü na chaxüxü, rü ngëmawa nüxü chicuëxächi na namexü i ngëma mugü. ¹⁷ Rü ngëmacèx i ñuxma rü tama chauechama nixi i chanaxüxü i ngëma chixexü. Natürü ngëma pecadu i chowa ngëxmaxü nixi i chomaã icuáxü, rü ngëma nixi i chixexü choxü üxëëxü. ¹⁸ Rü choma nüxü chacuëx rü wüxi i pecaduäxü i duüxümare chixi, rü ngëmacèx chowa rü nataxuma i tacü i mexü. Erü woo chanaxwëxe na mexü chaxüxü, natürü tama chomaã nanguxü na chanaxüxü. ¹⁹ Erü ngëma mexü i chanaxwëxexü na chaxüxü, rü tama chanaxü. Natürü chanaxüama i ngëma chixexü i tama chanaxwëxexü na chanaxüxü. ²⁰ Rü ngëxguma chi chanaxüamagu i ngëma chixexü i tama chanaxwëxexü na chaxüxü, rü meãma nangox na tama chauechama chanaxüxü. Natürü ngëma pecadu i chowa ngëxmaxü nixi i chomaã icuáxü rü chixexü choxü üxëëxü. ²¹ Rü ngëmaäcü nüxü chadau i ñuxäcü na chiüxü. Rü ngëxguma mexü chaxüxchaügu rü choxü natauxcha na chixexüãma chaxüxü. ²² Choma rü chauäëwa rü chorü me nixi i Tupanaärü mugü, rü naga chaxiñchaü. ²³ Natürü ñaã chaxune i ñoma i naãnecüäx ixixüwa, rü nangëxma i tacü i tama naxüxchaüxü i ngëma chauäë naxwëxexü. Rü ngëma pecadu i chowa ngëxmaxü nixi i chomaã icuáxü rü chixexü choxü üxëëxü. ²⁴⁻²⁵ Rü ngëmaäcü i choma rü chauäëwa chayanguxëëchaü i Tupanaärü mugü, natürü ñoma i naãnecüäx i chaxune rü nanaxüxchaü i ngëma nanaxwëxexü i pecadu. Rü taxucèxma chataäe i chomax. ¿Rü texe tá nüxna choxü itanguxuchixëe i ñaã pecadu i chowa ngëxmaxü rü yuwa choxü gaxchaüxü? Rü Tupanana moxë chaxä erü törü Cori ya Ngechuchu ya Cristu rü tá choxü nüxna Inanguxuchixëe.

8

Tupanaäe i Üünexü naxwëxexüäcüma tamaxë

¹ Rü ñuxma ya Tupana rü marü taxucèxma nanapoxcue i ngëma duüxügu i Ngechuchu ya Cristuarü duüxügu ixigüxü. ² Erü Tupanaäe i Üünexü i Ngechuchu ya Cristugagu tüxü maxëxëëxü, rü nüxna tüxü inanguxüxëe i pecadu na tama yuwa tüxü nagagüxüçex. ³ Rü yema taxüneaärü ngüchaügu rü marü nüxü narüyexera ga yema mugü ga Moiché umatüxü. Rü yemacèx ga yema mugü rü taxucürüwa mexü tüxü naxüxëe. Natürü nüma ga Tupana rü marü nanaxü ga yema taxucürüwa naxüxü ga yema mugü. Yerü ga Tupana rü ñoma ga naãnewa nanamu ga Nanexüchi. Rü woo taxüne i pecaduäxürü nixi ga naxüne, natürü nüma ga Nane rü taguma napecaduäx.

Rū nūma ga Nane rū tórū pecaducèx nayu, rū yemaáčü inayanaxoxèë ga norū pora ga yema pecadu ga taxūnewa yexmaxū. ⁴ Rū yemaáčü nanaxū ga Tupana na tūxū na natauxchaxūcèx na yanguxèëxū i ngēma tūxū namuxū i ngēma mugū. Erū ñuxma rū tama ñoma i taxūne naxwèxexūācūma tamaxè, natürū Tupanaāë i Üünexū naxwèxexūācūma nixī i imaxèxū. ⁵ Rū yixema tūmaxūne naxwèxexūācūma maxèxè, rū naxcèx tadaugū i ngēma ñoma i naānecūāx naxwèxexū. Natürū yixema Tupanaāë i Üünexū naxwèxexūācūma maxèxè, rū ngēma Tupanaāë i Üünexū naxwèxexū nixī i naxcèx tadaugūxū. ⁶ Rū yixema Tupanaāë i Üünexū naxwèxexūcèx daugūxe rū tataāëgū, rū tá tūxū nangèxma i tūmaārū maxū i taguma gūxū. Natürū yixema tūmaxūne naxwèxexūcèx daugūxe rū ngēma rū tá yuwa tūxū nagagū. ⁷ Rū yixema tūmaxūne naxwèxexūcèx daugūxe rū Tupanamaā tarūxuwānūgū. Rū tama Tupanaga taxīnūēchaū erū taxucūrūwama naga taxīnūë. ⁸ Rū ngēmācèx ya yixema tūmaxūneārū ngūchaūwe rūxīxè, rū taxucūrūwa Tupanaārū ngūchaū taxūgū. ⁹ Natürū ngèxguma aixcūma pewa nangèxmagu i Tupanaāë i Üünexū rū tama pexeneārū ngūchaū pexū, natürū Naāë i Üünexūārū ngūchaū nixī i pexūxū. Rū yixema tama tūxū nangèxmaxè i Tupanaāë i Üünexū i Cristu tūxna āxū, rū tama Cristuarū duūxū tixī. ¹⁰ Natürū ngèxguma pewa namaxūxgu ya Cristu, rū peāxè rū namaxū erū Cristugagu Tupana pexū nūxū inayarūngūma i perū pecadugu. Rū woo i pexene rū pecadugagu tá nayuama, natürū peāxè rū Cristugagu tá namaxū, erū Tupana pexū nadau na pimexū. ¹¹ Rū ngèxguma pewa namaūxgu i Naāë ya yima Tupana ga Ngechuchu ya Cristuxū írūdaxèëcū, rū nūmatātama ya yima Cristuxū írūdaxèëcū tá wena namamaxèë i pexene i yuxwèxexū, rū Naāë i Üünexū i pewa maxūxū tá nixī i naxūxū i ngēma. ¹² Rū ngēmācèx, Pa Chaueneëgūx, rū tanaxwèxe i Tupanaārū ngūchaū taxū, rū tama tanaxwèxe i taxūne i pecaduāxūārū ngūchaū taxū. ¹³ Erū ngèxguma chi pexeneārū ngūchaū pexūxgu rū tá ipeyarūtauxe. Natürū ngèxguma Tupanaāë i Üünexūārū ngūxèēmaā ipeyanaxoxèëgu i ngēma pexene ūxchaūxū, rū aixcūma tá pexū nangèxma i maxū i taguma gūxū. ¹⁴ Erū guxāma ya yixema Tupanaāë i Üünexū tūmamaā icuāxe, rū aixcūma Tupanaxācūgū tixīgū. ¹⁵ Yerū tama penayauxgū ga wūxi ga naāxè ga pecaduwa pexū gagūxū rū ngemagagu wenaxarū Tupanaarū poxcèx pemuēë. Natürū yema Naāxè ga peyauxgūxū rū Tupanaāxè i Üünexū i naxacūgū pexū ixīgūxèëxū nixī. Rū ngēmatama Naāë i Üünexū nixī i tūxū rūngūxèëxū na tama imuēëxūcèx na Tupanana ingaicamagūxū rū:

“Pa Chaunatūx”, ñagūxū nūxū. ¹⁶ Rū ngēmatama Naāë i Üünexū nixī i aixcūma tūxū nūxū cuèxèëxū na Tupanaxācūgū na ixīgūxū. ¹⁷ Rū ñuxma na Tupanaxācūgū ixīgūxū i yixema, rū nūxū tacuèx rū daxūguxū i naānewa tá tanayaxu i ngēma mexūgū i Tupana tūxna āxchaūxū. Rū ngēmaáčü Cristumaā tá tūxū nangèxma i tachica i mexū i Tupanaxūtawa, erū Cristurū ngūxū tingegū na yixcūra wūxigu namaā mexūwa ingèxmagūxūcèx.

Ngēma mexū i yixcūra tá nūxū idauxūchiga

¹⁸ Rū dūcax, choma nagu charūxīnū rū ngēma ngūxū i ñuxma ñoma i naānewa ingegūxū, rū taxūma nixī i ngèxguma nagu nanguxgu i ngēma mexū i yixcūra tá nūxū idauxū i ngèxguma Cristumaā ingèxmagūgū i daxūguxū i naānewa. ¹⁹ Rū ñuxma rū guxūma i tacū i Tupana ūxū rū taxū i norū ngūchaūmaā inananguxèëgū i ngēma ngunexū i nagu tá nataeguxū ya Cristu

na Tupana guxūpēxewa naxācūgūxū iwéxū. ²⁰ Rū nūxū tacuèxgū rū yexguma pecadu naxūxgu ga guma nūxīraūcū ga yatū rū yexguma nixī ga nachixexū ga guxūma ga yema Tupana ūxū. Rū tama yema Tupana ūxūārū ngúchaū nixī ga yema, natūrū yemaācū nūxū naxūpetū yerū ga Tupana rū yemaācū inaxuneta ga yexguma pecadu naxūxgu ga guma yatū. Natūrū i űuxma rū guxūma ga yema Tupana ūxū rū ínananguxēē na ngēma chixexūwa ínanguxūxūcèx. ²¹ Erū ngēma ngunexū i Tupana tá nagu nadexū i naxācūgū na naxūtawa nangēxmagūxūcèx, rū ngēxguma tá ta nixī i chixexūwa ínanguxūxūcèx i guxūma ga yema nūmatama naxūxū. Rū ngēmaācū wenaxārū noxrirūū tá name i guxūma. ²² Rū nūxū tacuèx rū űaa naane rū guxūma i nawa ngexmaxū rū űoma wūxi i nge i íxracūchaxūcūrūxū poraācū ngūxū ninge űuxmatáta nawa nangu i ngema ngunexū i nagu Tupana wena nangexwacaxūxūcèx i guxūma. ²³ Rū tama űaa naanexīcatama nixī i ngūxū ingexū i űuxma, natūrū yixema i tūxū ngexmaxū i Tupanaāxē i Ūñexū rū ta ngūxū tingegū űxmatáta nawa nangu na Tanatū tūxū dexū rū ngexwacaūxū i taxūnegū tūxna āxū. Rū woo tūxū nangexma i Naāxē i Ūñexū ya Tupana tūxna muxū na norū ūgū yixīxūcèx i ngema mexūgū i Tupana tá tūxna naxāxū i dauxūguxū i naanewa, natūrū tanaxwèxe na ngemaxūchi ingugūxū. ²⁴ Cristu tūxna nanaxā i maxū i taguma gūxū, natūrū ítananguxēēgūmare na naxū-tawa ingugūxū na nayauxgūxūcèx i ngēma maxū. Natūrū nūxū tacuèx rū ngēxguma chi marū nūxū idaugūgu i ngēma írūnguxēēgūxū, rū taxucèxma tūxūcū ítananguxēēgū. Erū ngēma marū nūxū idauxū, rū taxucèxma ítananguxēē. ²⁵ Natūrū ngēxguma tauta nūxū idaugūgu i ngēma írūnguxēēgūxū, rū tanaxwèxe i meā ítananguxēēgūecha űuxmatáta nūxū idaugū. Rū ngēmaācū nixī i Cristuxū írūnguxēēgūxū. ²⁶ Rū Tupanaāē rū tūxū narūngūxēē ta na iporaexūcèx i ngēxguma ituraegu i tórū ōwa. Rū yixema rū tama nūxū tacuèx na űuxācū Tupanamaā idexagūxū rū űacūcèx iyumūxēgūxū. Natūrū Naāē i Ūñexū rū naxauxācūma ore i tama nūxū icuáxūmaā Tupanamaā nidexa rū taxcèx nayumūxē. ²⁷ Rū Tupana ya meā tūxū cuácū rū nūxū nacuèx na űuxū űaxūchiga yīxū i ngēma Naāē i Ūñexū nūxū ixuxū. Erū ngēma Naāē i Ūñexū rū Tupana naxwèxexūācūma Tupanaxū nacèxū tūmacèx ya yixema Tupanaārū duūxūgū ixīgūxe.

Cristu rū tūxū naporaexēēāma na taxūma i guxchaxūgū tūxū narū- yexer-axūcèx

²⁸ Rū nūxū tacuèx rū tūmaārū mexūcèx nixī i Tupana ínanguxēēxū i guxūma i ngēma tūxū ūpetūxū ya yixema nūxū ngechaūgūxe ga nūma nanaxwèxexūācūma tūxū nadexe. ²⁹ Rū woetama nuxcūmama ga Tupana rū marū tūxū nacuèx na tēxēgū tá tixīgūxū ya yixema noxrū ixīgūxe. Rū noxrī-tama naāne íxūgūgumama tūxū nade na Nanerūū timexū i napēxewa, rū yima Nane rū tūmamaā nayaxūcèx rū tūmamaā inacuáxūcèx ya guxāma ya yixema naēneēgū ixīgūxe. ³⁰ Rū guxema noxri naāne íxūgūgumama Tupana tūxū dexe, rū tūmacèx naca na noxrū tixīgūxūcèx. Rū guxema tūmacèx naçaxe, rū nūgūcèx tūxū nímexēēgū. Rū guxema nūgūcèx tūxū yamexēēgūxe, rū daxūwa tá tūxū nagagū na guxūgutāma naxūtawa tangēxmagūxūcèx. ³¹ ;Rū űuxū űagūxū tá i űuxma i ngēmachiga? Rū ngēxguma Tupana taētūwa chogūgu, ;rū tēxē tá tūxū rüyexeraxū? ³² Yerū nūma ga Tupana rū tama tūxna nayanuxū ga Nanexūchi. Natūrū taxcèx inanamu ga Nane na taxcèx nayuxūcèx i guxāma i yixema. Rū űuxma na yemaācū taxcèx inamuāxū ga Nane, ;rū taux ēxna

tūxna naxāāxū i guxūma i tacū i inaxwēxexū na naxcēx imaxēxūlcēx? ³³ Rū Tupana tūxū nade rū tūxū nixu na napēxewa imexū. Rū ngēmacēx ĵrū texé tá napēxewa tūxū tixugū na ichixexū? Erū Tupanatama nixī ya tūxū ixucū na tūxū nataxūma i chixexū. ³⁴ ĴRū texé tá poxcuwa tūxū tamugū i űuxma? ĴPexcēx rū Cristu tá yīxū? Dūcēx, taxucūrūwama ngēmaācū nixī yerū Cristu nixī ga taxcēx yucū na tūxū namaxēxēxūlcēx. Rū tama ngēxīcatama taxcēx naxū, natūrū wenaxārū inarūda. Rū űuxma rū Tupanaxūtawa nangēxma rū ngema āēxgacū nixī. Rū ngema taétūwa nachogū rū Tupanaxū taxcēx nacēxū. ³⁵ ĴRū űuxma rū tacū tá Cristuna tūxū ixīgachixēēxū na tama tūxū nangechaūxūlcēx? Rū woo ngūxū ingegūgu, rū ēxna guxchaxūgū tūxū ngēxmagu, rū ēxna duūxūgū Cristugagu taxchi aiegu, rū ēxna itaiyaegu, rū ēxna ingexchirugūgu, rū ēxna āūcūmaxūwa ingēxmagūgu, rū ēxna duūxūgū tūxū daxchaūgu, natūrū woo guxūma i ngēma tūxū űepetūgu, natūrū ya Cristu rū tāūtāma nūxū narūchau na tūxū nangechaūxū. ³⁶ Natūrū guxūguma āūcūmaxūwa tangēxmagū, ngēma Tupanaārū ore i űmatūxū nūxū ixuxūrū. Erū ngēma ore rū űnanagūrū:

“Rū cugagu duūxūgū toxū nadaixchaū rū duūxūgūpēxewa rū űnoma carnerugū i daiwa ixūrū tixīgū”,

űnanagūrū i ngēma ore. ³⁷ Natūrū woo guxūma i ngēma tūxū na ngupetūxū, rū Ngechuchu ya Cristu ya tūxū ngechaūcū, rū tūxū naporaexēēāma na taxūma i guxchaxūgū tūxū narūyexeraxūlcēx, rū bai i tacū. ³⁸⁻³⁹ Rū ngēmacēx aixcūma chayaxō na taxucūrūwama tacū Tupanana tūxū ixīgachixēēxū na ngēmaācū tama tūxū nangechaūxūlcēx. Rū woo iyuxgu rū woo imaxēgu, natūrū Tupana tá tūxū nangechaūēcha. Rū taxucūrūwama Tupanana tūxū nixīgachixēē i tacū i norū norearū ngeruūgū, rū ēxna tacū rū ngoxogū rū ēxna tacū i to i poraxū. Rū bai i tacū i űuxma tūxū űepetūxū, rū bai i tacū i yixcūra tá ngēxmaxū, rū bai i tacū i daxūwa ngēxmaxū, rū bai i tacū i naānetūūwa ngēxmaxū, rū bai i tacū i to i Tupana űxū, rū taxucūrūwama Tupanana tūxū nixīgachixēē na tama tūxū nangechaūxūlcēx. Rū ngēmaācū nixī i tūxū nangechaūxū ya Tupana nagagu ya tōrū Cori ya Ngechuchu ya Cristu.

9

Tupana rū nanade i Yudiūgū na norū duūxūgū na yixīgūxūlcēx

¹ Dūcēx, Pa Chaueneēgūx, rū pemaā tá nūxū chixu i wūxi i ore. Rū ngēma ore i pemaā tá nūxū chixuxū rū aixcūma nixī erū Cristuarū duūxū chixī. Rū tama chidora. Rū chauāēwatama nūxū chacuēx na aixcūma na yīxū i ngēma ore erū Tupanaāē i űūnēxū nixī i chauāēmaā icuāxū. ² Rū poraācū changechaū, rū choxū nangūēcha i chauāēwa, erū tama nayaxōgū i chautanūxūgū i Yudiūgū. ³ Rū aixcūma pemaā nūxū chixu rū guxūguma ngēma chautanūxūgu charūxīnū, rū poraācū chanaxwēxē na Cristuaxū yaxōgūāxū. Rū choma rū aixcūma íchamemare na poxcuwa choxū namuxū ya Tupana rū Cristuna choxū yaxūgachixēēxū ega ngēmaācū chi nūxū chayaxōgūxēēgu rū chanamaxēxēēgu i ngēma chautanūxūgū i Yudiūgū. ⁴ Rū nūmagū rū chauxrū Yudiūgū nixīgū. Rū Tupana rū nuxcūmaxūchima namaā inaxuneta na naxācūgū yixīgūxūlcēx. Rū norū oxīgū rū nūxū nadaugu na űuxācū namēxēchixū ga Tupana ga yexguma naxcēx nangoxgux. Rū Tupana rū norū oxīgūmaā inaxuneta rū űnanagūrū nūxū:

“Rū ngēxguma chauga pexīnūēgu rū tá pexū charūngūxēē”,

ñanagürü nüxü. Rū Tupana rū nüxna nanaxã ga yema mugü ga Moïché ümatüxü. Rū nanangüexëë na ñuxácü nüxü yacuëxüügüxcëx. Rū meãma namaã inaxuneta na Cristu rū naxcëx núma tá namuãxü na namaxëxëëãxüxcëx rū nüxna na naxããxüxcëx i maxü i taguma gúxü. ⁵ Rū yema nuxcümaügüxü ga tóru oxigütaa nixígü i ngëma Yudiügü, rū ngëmacëx naxcëx ta nixí ga yema uneta ga tóru oxigümaã nüxü yaxuxü ga Tupana. Rū ngëma Yudiügütanüxüwatama nixí ga nabuxü ga Cristu na Tupanaxüchi ixícü ya guxüetüwa ngëxmacü. Rū tanaxwëxe i guxüguma nüxü ticuëxüügü. Rū ngëmaãcü yí. ⁶ Rū ñuxma rū woo tama guxü i Yudiügü na yaxögüxü, natürü taxucürüwama texë nüxü tixu na Tupana rū tama yanguxëëãxü i ngëma norü uneta. Erü ngëma Yudiügü rū tama aixcüma guxüma Tupanaärü duüxügü nixígü. ⁷ Rū tama guxüma i duüxügü i Abráütaagü ixígüxü, rū aixcüma Abráütanüxü nixígü i Tupanapëxewa. Yerü ga Tupana rū Abráümaã nüxü nixu, rū ñanagürü:

“Rü cune ya Ichaátanüxügü tá nixí i aixcüma cutanüxügü ixígüxü i chopëxewa”,

ñanagürü. Rū yemaãcü namaã inaxuneta woo na nayexmaxü ga togü ga Abráüxãcügü. ⁸ Rū ngëmawa meãma nüxü tacuëx rū tama ngëma na Abráütaa tixígüxüxcëx nixí i Tupanaxãcügü tixígüxü. Natürü yíxema aixcüma Tupanaärü uneta nüxü ixuxürüüácüma yaxögüxe waxi tixí ya aixcüma Abráütaa ixígüxe i Tupanapëxewa. ⁹ Yerü naxüpa ga na nabuxü ga Abráü nane, rū yema Tupanaärü uneta ga Abráümaã nüxü yaxuxü, rū ñanagürü:

“Rü naí ya taunecüarü ñuxgumaãcü tá wena nuã chaxü, rū cuxmëx i Chara rū tá ixãxãcü i ngëxguma”,

ñanagürü. ¹⁰ Natürü tama Abráümaãxícatama nixí ga yemaãcü yadexaxü ga Tupana. Yerü tóru oxí ga Ichaá namëx ga Rebecamaã rū ta nidexa ga Tupana. Rū ngëma rū ngíteaxü ixãxãcü rū nataxreëxpüx ga ngëne. ¹¹⁻¹³ Natürü yëxguma tautá nabuegu rū taxuüma ga mexü rū ëxna chixexü naxüegu ga yema ngënegü, rū Rebecamaã nidexa ga Tupana, rū ñanagürü:

“Rü ngëma nüxíra buxü i cune, rū ngëma wixweama buxüärü duüxü tá nixí”, ñanagürü ngíxü. Rū yema dexa rū namaã nawüxigu i Tupanaärü ore i ümatüxü i ñaxü:

“Marü chanayaxu ya Acobu, natürü nüxü chaxo ya Echaú”,

ñaxü. Rū yemaãcü ga Tupana rū ngëmaã nanangoxëë na namëxwa nangëxmaxü na tüxü nayaxuxü ya yíxema woetama nüxü ngúchaüxë na tümacëx naçaxü tama nagu naxíñüácüma i tacü rū mexü rū ëxna tacü rū chixexü na taxüxü. ¹⁴ ¿Rü ñuxü ñagüxü i ñuxmax? ¿Pëxcëx rū Tupana rū chixexü naxüxü ga yëxguma tama Acobuxü nangechaüxürü nüxü na nangechaügu ga Echaú? Rū dücax, tama chixexü naxü. ¹⁵ Yerü norü orewa rū Tupana rū Moïchéxü ñanagürü:

“Rü ngëxguma chi texëmaã chamecümachaügu, rū tümamaã tá chamecüma. Rū choxü tá tangechaütümüü ya yíxema choxü ngechaütümüüchaüxë”,

ñanagürü. ¹⁶ Rū ngëmaãcü tama ngëma tümatama tanaxwëxëxügagu rū ëxna ngëma taxüxügagu nixí i Tupana tüxü yaxuxü ya texë. Natürü tüxü nayaxu erü nüxü tangechaütümüü. ¹⁷ Rū yëxgumarü ta ga Tupana rū norü ore i ümatüxüwa rū ñanagürü nüxü ga Equituaneärü ãëxgacü:

“Rü ãëxgacüxü cuxü chingucuchixëë na cuwa duüxügüxü nüxü chadauxëëxüxcëx i ñuxácü na chaporaxü. Rū ngëmaãcü chanaxü

na guxū i duūxūgū i guxū i naānewa ngēxmagūxū, nūxū na cuáxūcèx i chauchiga”,

ñanagürü. ¹⁸ Rū ngēmaācū ya Tupana rü nūxū tangechaütümū ya yixema nūxū ngechaütümūtchauxē. Rū ngēxguma tūxū nataiāchiarū maxūāxēēchaūgu rü tūxū nanataiāchiarū maxūāxēē ya yixema tama nūxū cuāxchauxē. ¹⁹ Natürü bexmana tá ñacurügü choxū:

“Rū ngēxguma chi ngēmaācū yixīgu ya Tupana, ¿rū tūxcūū nūxū nixu na tagagu yīxū na chixexū ixīgūxū rü tama naga ixīnūēxū? ¿Rū texé tapora na itayanaxoxēēxūcèx i Tupanaārü ngūchaū?” ñacurügü tá. ²⁰ Natürü Pa Duūxūx, ¿texé quixī i cuma rü ngēmacèx ngēmaācū Tupanaxū cuyaxūgaxū? ¿Cuxcèx rü ēxna wūxi i tūxū i waixūmūwa ūxū rü namexū i ngēma norū ūruūmaā na ñaxū?

“¿Rū tūxcūū ngēmaācū choxū cuxū na ngēmaācū chixīxūcèx i ñuxmax?” ñaxū. ²¹ Rū ngēma tūxūārū ūruū rü waixūmūwa nanaxū i tacū i nūma naxūxchauxū. Rū ngēxguma nanaxwēxegu, rü ngēma waixūmūwa nanaxū i wūxi i tūxū na norū meruū yīxūcèx. Rū ngēxguma nanaxwēxegu, rü ngēmatama waixūmūwa nanaxū i wūxi i tūxū na norū guxchirechixū yīxūcèx. ²² Rū ngēxgumarūūtama nixī i naxūāxū ya Tupana. Erū tūxū nanawéxchaū na ñuxācū naporaxū i nūma rü ñuxācū napoxcueāxū i ngēma duūxūgū i chixexū ūgūxū, natürü poraācū yaxna namaā naxīnū i ngēma duūxūgū, rü tama paxa nanapoxcūe i ngēma ímemaregūxū na napoxcuxū.

²³ Natürü ga Tupana rü inanawéxchaū na ñuxācū poraācū tamaā namecūmaxū i yixema na yaxōgūxū. Rū ngēmacèx nixī i nūxū ingechaütümūgūxū, rü nuxcūmamatama tūxū nadexū na naxūtawa ingēxmagūxūcèx i daxūgūxū i naānewa i ngextá ínamexēchixūwa. ²⁴ Rū ngēmaācū i yixema na Yudíugū ixīgūxū, rü tatanūwa Tupana tūxū nidexechi ya ñuxre na norū duūxūgū tixīgūxūcèx. Rū ngēxgumarūū ta i ngēma tama Yudíugū ixīgūxūtanūwa rü nayadexechi i togū. ²⁵ Rū ngēmacèx rü Tupanaārü ore ga Ochéa ūmatūxūwa rü ñanagürü:

“Rū ngēma duūxūgū i tama chorū duūxūgūchirēx ixīgūxū, rü: ‘Pema rü chorū duūxūgū pixīgū i ñuxmax’, ñacharügü tá nūxū. Rū ngēma duūxūgū i tama Yudíugürū nūxū changechaūchirēxū, rü: ‘Pexū changechaū i ñuxmax’, ñacharügü tá nūxū. ²⁶ Rū noxri ga Tupana rü yema duūxūgū ga tama Yudíugū ixīgūxūmaā nūxū nixu, rü ñanagürü nūxū: ‘Pema rü tama chorū duūxūgū pixīgū’, ñanagürü ñaxū. Natürü yematama nachica ga ngextá nūxū iyemañaxūwa, rü wenaxarū yema duūxūgū ga tama Yudíugū ixīgūxūmaā nidexa ga Tupana ya Maxēxēruū, rü ñanagürü nūxū: ‘Pema rü chaucacügü tá pixīgū’, ñanagürü nūxū”.

Rü yema nixī ga Tupanaārü ore ga Ochéa ūmatūxū. ²⁷⁻²⁸ Rū Yudíugūchiga rü ta nidexa i Tupanaārü ore, yerū nuxcūmaācū ga norū orearū uruū ga Ichaxía rü ñanagürü:

“Rü woc namuxūchichirēx i Yudíugū yima naxnūcū ya taxtūpechinūwa yimacürūū, natürü noxre tátama nixī i aixcūma nayauxgūxū i maxū i taguma gūxū. Rū paxa tá ínangu ya tórū Cori na napoxcueāxūcèx i guxūma i ngēma tama noxrū ixīgūxū”,

ñanagürü ga Ichaxía. ²⁹ Rū nūmatama ga Ichaxía, rü ñanagürü ga ūpa:

“Rū ngēxguma chi nūma ya tórū Cori ya guxū i naāneārū yora rü tāū chima iyaxūgūxēēagu i ñuxre i tatanūxūgū i Yudíugū, rü chi itayarūxoxochi,

yexgumarūl ga na iyanaxogūxūl ga guma ĩānegū ga Chodoma rū Gomora namaā ga guxūma ga yema duūxūgū ga yēma yexmagūxūl”, ñanagūrū ga Ichaxía.

Yudíugū rū tama nayaxōgūchaūl i ore i mexūl i Cristuchiga

³⁰ ¿Rū ñuxū ñagūxūl i ñuxmax? Rū pemaā nūxū chixu rū ngēma duūxūgū i tama Yudíugū ixīgūxūl ga tama Tupanacēx daugūxūl ga noxrix, rū ngēmatama duūxūgū nixī i ñuxma Tupanapēxewa imexūl yerū nayaxōgū. ³¹ Natūrū yema Yudíugū ga nagu ĩxchaūxūl ga yema Moīchéarū mugū na Tupanapēxewa yamexūcēx, rū inatūe. ³² ¿Rū ñuxācū inatūe? Dūcēx, inatūe yerū yema mugūguama naxī na Tupanapēxewa yamexūcēx, rū tama Ngechuchuauxl nayaxōgūchaūl. Rū yemaācū ga Ngechuchu rū yema duūxūgūcēx rū wūxi ga guxchaxūl nixī. ³³ Rū ngēmachiga nixī i Tupanaārū ore i ūmatūxūl i ñaxūl: “Choma rū Yudíugūtānūwa chanamu ya Cristu. Rū nūma rū ngēma Yudíugūcēx rū wūxi i guxchaxūl tá nixī erū ngēxguma tama nūxū yaxōgūāgu rū tá inayarūtauxe. Natūrū ngēma duūxūgū i nūxū yaxōgūxūl, rū aixcūma tá namaxē”, ñanagūrū.

10

¹ Pa Chaueneēgūx, rū ngēma poraācū chanaxwēxexūl rū chorū yumūxēwa Tupanana naxcēx chaçaxūl, rū ngēma nixī na guxūma i chautanūxūgū i Yudíugū na yaxōgūxūl rū ngēmaācū aixcūma Tupanaārū na yixīgūxūcēx. ² Rū aixcūma pemaā nūxū chixu, rū nūmagū i Yudíugū rū aixcūma poraācū Tupanagu narūxīnūē rū nanaxūgūchaūl i Tupanaārū ngūchaūl. Natūrū inatūe erū tama Cristuaxūl nayaxōgūchaūl na ngēmaācū Tupanapēxewa yamexūcēx. ³ Rū woo Tupana ñoma ga naānewa nanamu ga Cristu na gumagagu Tupanapēxewa yamexūcēx i duūxūgū, natūrū nūmagū i Yudíugū rū tama nūxū nacūxgūchaūl i ngēma. Rū nūgūtama nimeēgūchaūl, rū ngēmacēx nagu naxīāma i ngēma mugū ga Moīché ūmatūxūl rū tama Cristuaxūl nayaxōgūchaūl na nagagu Tupanapēxewa yamexūcēx. ⁴ Natūrū nūma ga Cristu rū nayan-guxēē ga yema mugū rū yemaācū inayanaxoxēē na tama tamaā inacūāxūcēx i ngēma mugū. Rū yemaācū nanaxū ga Cristu na guxūma i duūxūgū i nūxū yaxōgūxūl rū aixcūma Tupanapēxewa yamexūcēx. ⁵ Rū Moīché nanaxūmatū nachiga na ñuxācū Tupanapēxewa tamexūl ya wūxie ega naga taxīnūgu i ngēma mugū, rū ñanagūrū: “Tupana pexū namu na guxūgutāma meā peyanguxēēxūl i guxūma i ngēma mugū erū ngēxguma naga pexīnūēgu i guxūma i ngēma mugū rū tá pemaxē. Natūrū ngēxguma tama naga pexīnūēgu i wūxitama i ngēma mugū, rū tāūtāma pemaxē”, ñanagūrū. ⁶ Natūrū ñuxma rū Tupanapēxewa time ega Cristuaxūl yaxōgūgu. Rū ngēmacēx taxucēxma i cuāēwa rū ñacurūgū: “¿Texē tá daxūgūxūl i naānewa taxū na Cristucēx tayaçaxūl na nuā naxūxūcēx rū tūxū yanangūxēēxūcēx na imexūcēx i Tupanapēxewa?” ñacurūgū. ⁷ Rū taxucēxma cuāēwa ñacurūgū: “¿Rū texē tá yuexūtānūwa taxū na ngēxma Cristucēx tayadauxūcēx na nuā tanagaxūcēx?” ñacurūgū. ⁸ Erū tama ngēmaācū nixī i Cristucēx idaaxūl, yerū yema ore ga Moīché ūmatūxūl rū ñanagūrū: “Rū marū cuxūtawa nangēxma i Tupanaārū ore. Rū cuēxwa nangēxma na nūxūl quixuxūcēx. Rū cuāēwa nangēxma na nagu curūxīnūxūcēx”,

ñanagürü. Rū ñuxma Pa Chaueneëgüx, rü pemaã nüxü chixu rü ngēmatama ore nixī i guxūwama duūxūgūmaã nüxü tixuxü. Rū ngēma ore nixī i pexü nüxü cuèxëëxü na ñuxäcü pexü nangëxmaxü i maxü ega aixcüma peyaxögügu. ⁹ Erü ngëxguma cuëxmaã nüxü quixuxgu na curü Cori yīixü ya Ngechuchu, rü ngëxguma cuäëwa cuyaxōxgu na yuwa Tupana ínadxëëxü, rü tá cuxü nangëxma i maxü i taguma gúxü. ¹⁰ Erü taäëwa tayaxögü na ngēmaäcü Tupanapëxewa imexü. Rü taëxmaã nüxü tixu na Ngechuchu rü törü Cori yīixü, rü ngēmaäcü tanayaxu i maxü i taguma gúxü. ¹¹ Rū Tupanaärü ore i ümatüxüwa rü ñanagürü:

“Rü guxāma ya yīxema ya Ngechuchuxü yaxōxë, rü nüma ya Ngechuchu rü taxütāma tüxü narümaächixiëë erü tá nayanguxëë i guxüma i ngema tümamaã inaxunetaxü”,

ñanagürü. ¹² Rū Tupanapëxewa rü guxüma i duūxügü rü nawüxigu. Rū woo Yudiügü yixīgu rü éxna woo tama Yudiügü yixīgu, natürü Tupanapëxewa rü nawüxigu i guxüma i duūxügü. Erü nüma ya törü Cori, rü guxāärü Cori nixī. Rū nüma rü aixcüma tüxü namaxëxëë ya guxāma ya texé ya nüxna çaxe na tüxü namaxëxëëxüçëx. ¹³ Erü Tupanaärü ore i ümatüxüwa rü ñanagürü:

“Rü guxāma ya texé ya törü Corina çaxe na tüxna naxāxüçëx i maxü, rü tá tanayaxu i tümäärü maxü i taguma gúxü”,

ñanagürü. ¹⁴ ¿Natürü ñuxäcü tá törü Corina naxçëx tacagü, ega tama nüxü tayaxögügu? ¿Rü ñuxäcü tá nüxü tayaxögü, ega taguma nüxü taxīnüëgu i nachiga? ¿Rü ñuxäcü tá nüxü taxīnüë i norü ore, ega taguma texé tümamaã nüxü ixuxgu? ¹⁵ ¿Rü ñuxäcü tá texé nüxü tixu i Cristuchiga ega taxüema tüxü nüxü yarüxuxëëgu? Rū ngëmacëx nixī i Tupanaärü ore i ümatüxü i ñaxü:

“Rü wüxi i taäë nixī na ínangugüxü i Tupanaärü orearü uruügü na duūxügūmaã nüxü yaxugüxüçëx i Tanatüarü ore i mexü i Cristuchiga”, ñaxü. ¹⁶ Natürü tama guxüma i duūxügü naga naxīnüë i ngēma ore i mexü. Rū Ichaxía nüxü ixuxürüü nixī. Yerü ga nüma rü ñanagürü:

“Pa Corix, noxretama nixī i ngēma duūxügü i toxü yaxögüxü i ngēma ore i nüxü tixuxü”,

ñanagürü. ¹⁷ Rū dücax, rü ngēma na Cristuchigaxü naxīnüëxüwa nixī i ne naxüxü na yaxögüäxü i duūxügü. Rü ngēma nüxü naxīnüëxü, rü ore i mexü i Cristuchiga nixī. ¹⁸ Natürü i ñuxma rü pexna chaca, ¿éxna pexçëx rü ngēma Yudiügü rü taguma nüxü naxīnüë i ngēma ore i mexü i Cristuchiga? Düçëx, ngēmaäcü marü nüxü naxīnüë. Erü Tupanaärü ore i ümatüxüwa rü ñanagürü:

“Rü ngēma Tupanaärü orearü uruügü, rü guxüwama i ñoma i naänewa rü nüxü nixugüë i norü ore. Rü ngextá ínangëxmagüxüwa i Yudiügü, rü ngema rü ta nüxü nixugügü”,

ñanagürü i ngēma ore. ¹⁹ Natürü wena pexna chaca, ¿rü ngēma Yudiügü rü tama éxna nüxü nicuëxächitanü na Cristugagu yīixü na Tupana nadexü i duūxügü i ñuxmax? Rū ngēmaäcü nüxü nacuëxgü. Yerü Tupanaärü ore ga Moiché ümatüxüwa rü ñanagürü:

“Düçëx, Pa Yudiügüx, choma rü tá chanamaxëxëë i ngēma duūxügü i tama Yudiügü ixīgüxü, rü ngëmacëx i pema rü tá pixäüxächigü. Rü ngëxguma chanamaxëxëëgu i ngēma togü i duūxügü i tama choxü cuëxgüchirëxü, rü pema i Yudiügü rü tá penuë erü nüxü charüngüxëë i ngēma togü”, ñanagürü. ²⁰ Rū yemawena ga Ichaxía, rü tama namuü ga yema Yudiügümaã nüxü na yaxuxü ga yema Tupanaärü ore ga ñaxü:

“Rü ngēma duūxūgū i tama Yudiūgū ixīgūxū i tama chauxcēx daugūxū, rü choxū tá inayangaugū. Rü choma rü tá chaugū changoxēē naxcēx i ngēma duūxūgū i tama chauxcēx icagūchiréxū”,
ñaxū. ²¹ Rü Tupana rü Ichaxíawa Yudiūgūchiga nidexa rü ñanagürü:
“Rü guxū i ngunexūgu rü nüxna chaxuecha i ngēma duūxūgū i tama chauga inūēchaūxū rü chomaā nuēxū. Natürü tama choxū inarūxinūēchaū”,
ñanagürü.

11

Nangēxma i ñuxre i Yudiūgū i Tupana dexū na aixcūma noxrü yixīgūxūlcēx

¹ Ñuxma pexna chaca rü, ¿pexcēx ēxna ya Tupana rü marü nüxū naxo i norü duūxūgū i Yudiūgū? Tama nixī i nüxū naxoxū. Erü choma i Pauru rü Yudiū chixī. Rü Abráütanūxū chixī, rü Abráütaa ya Beyamitanūxū chixī. ² Rü nuxcūmamata Tupana Yudiūgūmaā inaxuneta na norü duūxūgū yixīgūxūlcēx, rü ñuxma rü tama Yudiūgūxū naxo. ¿Tama ēxna nüxū pecuēx na ñuxū ñaxū ga Tupanaārü orearü uruū ga Ería? Rü Tupanaārü orewa nüxū tadaugū rü Ería rü Tupanapēxewa poraācü yema Yudiūgūxū nixugū. ³ Rü ñanagürü ga Ería:

“Pa Corix, ngēma Yudiūgū rü marü nanadai i curü orearü uruūgū. Rü nagu napogūe i ngēma nachicagū i ngextá duūxūgū cuxū ficuēxūūgūxūwa. Rü chaxicataama íchayaxūāchi. Rü choxū rü ta nimēxgūchaū”,

ñanagürü ga Ería. ⁴ Natürü Tupana nanangāxū, rü ñanagürü:

“Dücēx, choma rü marü choxū nangēxma i 7000 i yatūgū i chaugūxū chidexechixū. Rü nūmagū rü taguma nüxū nicuēxūūgū i ngēma tupanane-tachicūnēxā i Baá”,

ñanagürü. ⁵ Rü ngēxgumarūū ta nixī i ñuxmax. Rü woo muxūma i Yudiūgū tama nayaxōgū, natürü nangēxma i ñuxre i Tupana namaā mecūmaxūgagu dexū. ⁶ Rü ñuxma na Tupana tūxū ngechaūxūgagu tūxū nadexū, rü taxucūrūwama texé nüxū tixu na řacū rü mexū na ixūgūxūgagu na yixīxū. Erü ngēxguma chi řacū rü mexū ixūgūxūgagu yixgu na tūxū nadexū, rü natūcēxmamare chi nixī na nüxū ingechaūtūmūxūgūxū. ⁷ ¿Rü ñuxācü yīxū i ñuxmax? Rü ngēma rūmumaēxū i Yudiūgū rü tama nüxū inayangaugū i ngēma maxū i naxcēx nadaugūxū. Natürü ngēma noxretama i Yudiūgū i Tupana dexū, rü ngemagū nixī i nüxū iyangaugūxū. Rü guxūma ga yema togū ga Yudiūgū rü Tupana ínanawogū yerü tama naga naxīnūe. ⁸ Rü ngēmachiga nixī i Tupanaārü ore i ūmatūxū i ñaxū:

“Tupanatama ngēma duūxūgūaxū nanaguxchaxēē. Rü ngēmacēx woo nüxū nadaugūgu i ngēma ore i aixcūma ixīxū, rü tama nüxū nacuēxgūēga. Rü woo nüxū naxīnūēgu i ngēma ore, rü tama nayaxōgū. Rü ñuxma rü ta ngēmaācü nixī”,

ñanagürü. ⁹ Rü Dabí rü ta rü ñanagürü:

“Rü ngēma duūxūgū rü norü petacēx naxūgūxū i ōnagūgagu rü norü muxūma i ngēmāxūgūgagu rü chixexūgu tá nayi rü ngēmacēx tá napoxcue. ¹⁰ Rü naāēwa rü tāūtāma nüxū nacuēxgū, rü guxchaxūgū tá nüxū nangēxma. Rü ñoma wūxi i duūxū i řacū i yaxū ípaxixūrūū tá nixīgū namaā i norü guxchaxūgū”,

ñanagürü.

Tupana nanamaxēxēē i ngēma tama Yudiūgū ixīgūxū

11 Rū pexna chaca, rū ñuxma na Cristuxū naxoexū i ngēma Yudiūgū, ħrū pexcèx ēxna rū ngēmacèx ya Tupana rū tá nūxū naxoxochixū? Tama nūxū naxo. Natürū ñuxma na tama Cristuaxū yaxōgūāxū i ngēma Yudiūgū, rū ngēmacèx ya Tupana rū nūxū narūngūxēē rū nanamaxēxēē i ngēma tama Yudiūgū ixīgūxū. Rū ngēmaācū nanaxū ya Tupana na yaxāūxāchiexūcèx i ngēma Yudiūgū, rū Cristuaxū na yaxōgūāxūcèx. 12 Rū yema na inatūexū ga yema Yudiūgū, rū yemagagu muxūma ga togu ga duūxūgū nanayauxgu ga Tupanaārū ngūxēē i taxū. Rū yema na noxretama ga Yudiūgū nayaxōgūxū, rū yemagagu Tupana nanamaxēxēē ga yema tama Yudiūgū ixīgūxū. Natürū ngēxguma tá Tupanacèx nawoeguxgu i guxūma i Yudiūgū, rū Tupana rū tá yexeraācū nūxū narūngūxēē i guxūma i ngēma duūxūgū i tama Yudiūgū ixīgūxū. 13-14 Rū ñuxma Pa Duūxūgū i Tama Yudiūgū Ixīgūxū, rū choxū nangēxma i wūxi i ore i pemaā nūxū chixuxchaūxū. Rū dūcax, petanūwa nixī i choxū namuxū ya Tupana na pemaā nūxū chixuxcèx i norū ore. Rū ñuxma rū aixcūma meā chayanguxēē i ngēma puracū, erū chanaxwèxe na pexū nadaugūxū i ngēma chautanūxū i Yudiūgū na ñuxācū Tupana pexū na rūngūxēēxū. Rū ngēmaācū tá nixāūxāchie i ñuxre i nūmagū, rū tá Cristuaxū nayaxōgū, rū ngēmaācū tá nanayauxgu i maxū i taguma gūxū. 15 Nūxū tacuèx rū ngēma Yudiūgū rū tama Cristuaxū nayaxōgūchaū i ñuxmax. Rū ngēmacèx ya Tupana rū nanade i ngēma togu i duūxūgū i tama Yudiūgū ixīgūxū. Natürū ñuxma na ngēmaācū yīixū, ħrū ñuxācū tá nixī i ngēxguma Cristuaxū yaxōgūāgu i ngēma Yudiūgū, rū wena Tupana nadexgu? Rū wūxi i mexēchixū tá nixī naxcèx i ngēma Yudiūgū. Erū ñoma wūxi i duūxū i yuxū rū wenaxārū maxūxūrū tā nixīgū. 16 Rū Tupana rū wena tá nanade i ngēma Yudiūgū i ngēxguma yaxōgūāgu. Rū ngēmaācū tá nixī, yerū nuxcūmaūcū ga nanatū ga Abraū rū Tupanaārū duūxū nixī. Rū ngēmacèx i nataagu i Yudiūgū rū Tupanaārū duūxūgū ta nixīgū. Rū ñoma wūxi i pāū i Tupanana ixāxūrū tā nixī. Erū ngēxguma ngēma pāūwa íraxū Tupanaārū yixīgu, rū ngēmawa nūxū tacuèx na guxūma i ngēma pāū rū noxrū na yīixū. Rū ngēma wūxi i nanetū i Tupanana ixāxūrū tā nixī. Rū ngēxguma ngēma nanetūchumèxā rū Tupanaārū yixīgu, rū ngēmawa nūxū tacuèx na guxūma i ngēma nanetū rū noxrū na yīixū. Rū ngēmaācū tá nixī i ngēma Yudiūgūmaā nangupetūxū, erū wūxi i ngunexūgu rū guxūma i nūmagū rū Tupanacèx tá nawoegu. 17 Tupana nūxū naxo ga yema Yudiūgū ga tama yaxōgūchaūxū. Rū ñoma wūxi i orīxchacūū i idaexūrū nixī ga yema Yudiūgūxū naxoxū. Natürū nachicūū Tupana pexū nade woo tama Yudiūgū na pixīgūxū. Rū wūxi i naīxnecūcūāx i orīxchacūū rū orīx i toxūwa yarūñaxcuchixūrū pixīgū. Rū ñuxma i pema rū ta pexū nangēxma i pechica i natanūwa i ngēma duūxūgū i Tupanaārū ixīgūxū. Rū Tupana rū pexū narūngūxēē rū pexū rū ta namaxēxēē. 18 Natürū pema i tama Yudiūgū na pixīgūxū, rū tama name i pegū picuèxūū rū nūxū pixu na ngēma Yudiūgūarū yexera pixīgūxū. Rū ngēxguma chi ngēmaācū pegū picuèxūūgūchaūgu, rū name nixī i nūxna pecuèxāchie na tama petanūwa ne naxūxū ga Cristu ya pexū maxēxēēcū, natürū Yudiūgūtanūwa nixī ga ne naxūxū. Rū ngēma Yudiūgūgagu nixī i Tupana pexū dexū rū pexū namaxēxēēxū i ñuxmax. 19 Natürū bexmana tá ñaperūgūgū:

“Tupana rū marū nūxū naxo ga yema Yudiūgū rū yemacèx nachicūū tūxū nade”, ñaperūgūgū tá. 20 Ngēmaācū aixcūma nixī ga Tupana nūxū oxū ga yema Yudiūgū yerū tama nayaxōgū. Rū ngēma na peyaxōgūxūcèxicatama nixī i nachicūū Tupana pexū dexū i ñuxmax. Rū ngēmacèx tama name i

pegü picuèxüügü. ¡Natürü pexuãëgü na tama yema Yudíugüxü üpetüxürüü pexü üpetüxücèx! ²¹ Yerü yema Yudíugü ga noxri Tupanaärü ixíügüxü, rü Tupana nüxü naxo yerü tama nayaxögü. Rü yexguma yemaãcü Tupana nüxü oxgu ga yema duüxügü rü pexü rü tá ta naxo ega tãütáma peyaxögüechagu. ²² Dücèx, na ñuxãcü namecümãxü ya Tupana. Natürü tüxü napoxcu ta ega tama aixcüma yaxögügu. Rü nanapoxcue ga yema duüxügü ga chixexügu yixü, natürü pemaã rü namecüma. Natürü penaxwèxe i guxüguma nüma nanaxwèxexüãcüma pemaxè rü peyaxögü na guxüguma pemaã namecümaèchaxüçèx. Erü ngèxguma tama nüma nanaxwèxexüãcüma pemaxègu rü tama peyaxögüechagu, rü tãütáma pemaã namecüma. Rü pexü rü tá ta naxo, rü tá pexü inawogü. ²³ Natürü ngèxguma yaxögüãgu i ngèma Yudíugü i ñuxma maxèxü, rü woo Tupana na nüxü oxü ga noxri, natürü wena táxarü nanade erü nüxü nangèxma i pora na wenaxärü nadeãxücèx ega aixcüma yaxögüãgu. ²⁴ Rü pema na tama Yudíugü na pixíügüxü, rü tama Tupanaärü duüxügü pixígu ga noxrix. Natürü Tupana pexü nade na noxrü pixíügüçèx. Rü ñuxma na yemaãcü Tupana pexü dexü, rü ngèxguma yaxögüãgu i ngèma Yudíugü, rü Tupana rü pexü nadexüärü yexera tá nüxü natauxcha na nadeãxü i ngèma Yudíugü, yerü woetama norü duüxügüchirèx nixígu ga noxrix.

Wüxi i ngunexü rü guxüma i Yudíugü tá nanayauxgü i maxü i taguma gúxü

²⁵ Pa Chaueneëgü i Yaxögüxüx, nangèxma i wüxi i ore ga noxri tama duüxügüxü nüxü nacuèxèèxü ga Tupana. Natürü chanaxwèxe i nüxü pecuèx i ngèma ore na tama nagu perüxñüèxücèx na duüxügü i nüxü cuèxüchixü pixíügüxü, rü pexicatama Tupana pexü dexü. Rü dücax, noxretama nixí i ngèma Yudíugü i aixcüma yaxögüxü. Rü ngèmaãcü tá nixí ñuxmatáta yaxögüã i guxüma i ngèma togü i duüxügü i Tupana dexü. ²⁶ Natürü ngèmawena rü guxütáma i Yudíugü rü tá ta nayaxögü, rü tá nanayauxgü i maxü i taguma gúxü. Erü Tupanaärü ore i ümatüxüwa rü ñanagürü:

“Yíma Cristu ya ínanguxüxèècü, rü Yudíugütanüwatama ne naxü. Rü nüma rü tá Yudíugüxü chixexüwa ínanguxüxèè. ²⁷ Rü aixcüma norü pecaduwa tá íchananguxüxèè i ngèma Yudíugü. Rü ngèxguma tá nixí na aixcüma chayanguxèèxü i ngèma chorü uneta ga üpaxüchima Abráümaã nüxü chixuxü”,

ñanagürü ga Tupana. ²⁸ Natürü i ñuxma ya Tupana rü Yudíugüxü nadau na norü uwanügü yíxü erü tama nayaxögü i ngèma ore i mexü. Natürü ngèmaãcü naxüpetü na pexü natauxchaxüçèx na peyaxögüxü i pema i tama Yudíugü na pixíügüxü. Natürü nüma ya Tupana rü ñuxma rü ta ngèma Yudíugüxü nangechaü yerü nuxcümaügüxü ga norü oxigümaã inaxuneta na nüxü tá nangüxèèxü. ²⁹ Rü ngèxguma Tupana rü tacü i mexümaã inaxunetagu, rü aixcüma nayanguxèè i ngèma, rü taguma nüxü inayarüngüma. Rü ngèxgumarüü ta i ngèxguma texèçèx nacaxgu, rü taguma nüxü inayarüngüma i ngèma. ³⁰ Rü pema na tama Yudíugü pixíügüxü, rü üpa rü tama Tupanaga pexíñüè. Natürü ñuxma na tama naga naxíñüèxü i Yudíugü, rü ngèmacèx Tupanaãxü pengechaütümüügü erü peyaxögü i pemax. ³¹ Rü ngèma pexü ngupetüxürüü nixí i ngèma Yudíugüxü nangu-petüxü. Nümagü rü tama Tupanaga naxíñüè i ñuxmax, natürü ngèmaãcü nüxü nangupetü na Tupanaãxü pengechaütümüügüçèx, rü nümagü rü ta Tupanaãxü nangechaütümüügüçèx i ñuxmax. ³² Yerü nüma ga Tupana rü guxüma ga duüxügümaã nanaxuegu na chixexüwa nangèxmagüxü nagagu

ga norū pecadugū. Natürü yemaäcū namaā nanaxuegu ga Tupana na nūxū nangechaütümüügūxūcēx i guxūma i duūxūgū. ³³ Rū namexēchi ya tórū Tupana, rū poraäcūxūchima tūxū narūngūxēē. Rū nūma rū nūxū nacuēxūchi erū guxūxūma nacuēx. Rū yixema rū taxucürūwama nūxū tacuēx i tūxcūü yīxū i tūxū nadexū, rū taxucürūwama nūxū tacuēx i guxūma i ngēma naxūxū i nūmax. ³⁴ ¿Erū texé i tatanūwa nūxū tacuēx i guxūma i ngēma tórū Cori nagu rūxīnūxū? ¿Rū texé nūxū tacuēx na tórū Corixū taxucūxēxū? ³⁵ ¿Rū texé tūxira tacū rū āmare tórū Corina taxā, na yixcama nūxū tacūmaā tūxū nataeguxēēäxūcēx? ³⁶ Erū guxūma i tacū ingēxmaxū rū Tupanaxūtawa ne naxī. Rū nūma nixī ga naxūāxū ga guxūma na noxru yīxūcēx. Rū name nixī i guxūguma nūxū ticuēxūügu rū tanataxēē. Rū ngēmaäcū yīi.

12

Pexū chacēxū na pegūtama Tupanana pexāgūxū na wūxi i āmare i maxūxū na pixīgūxūcēx

¹ Rū dūcax, Pa Chaueneēgūx, ñuxācū Tupana poraäcūxūchima tamaā namecūma. Rū ngēmacēx pexū chacēxū na pegūtama Tupanana pexāgūxū na wūxi i āmare i maxūxū na pixīgūxūcēx. Rū ngēma āmare nixī i aixcūma napēxewa üunexū rū namaā nataāēxū. Rū ngēmaäcū nixī ya Tupana i nanaxwēxexū na nūxū picuēxūüguxū. ² Rū tama name i ñoma i naānecūāx i duūxūgūcūmagu pexī. Natürü name nixī i Tupanana pegū pexāgū na nūma pexū naxūchicūüxūcēx rū ngexwacaxūxū i peāē pexū ngēxmaxūcēx rū ngēmaäcū naxcēxicatama pemaxēxūcēx. Rū ngēmaäcū tā nūxū pecuēx i tacū nixī i Tupana pexū naxwēxexū na penaxūxū, rū tacū nixī i aixcūma mexū i napēxewa, rū tacū nixī i namaā nataāēxū. ³ Rū Tupana ya chomaā mecūmacū, rū choxū namu na pemaā nūxū chixuxūcēx i guxāma i pema na tama namexū na texé i petanūwa tūgū írūtaxū rū tūgūgu tarūxīnūxū na togūarū yexera tīxū. Natürü name nixī na wūxichigū meā tūgū ngugūarū maxūāxū rū tūgūgu rūxīnūxū na ñuxācū Tupana tūxna naxāxū i tūmaārū cuēx wūxigu namaā i tūmaārū ō. ⁴ Rū dūcax, rū taxūnewa nangēxma i taeru rū tachacūügu rū taparagū rū muxūma i to i taxūneārū ngēmaxūgū. Rū wūxichigū i ngēma taxūneārū ngēmaxūgū rū nūxū nangēxma i noxrutama puracū. ⁵ Rū ngēxgumarūü ta i yixema na yaxōgūxū, rū woo na imuxū natürü wūxitama i duūxūgū tixīgū, erū Cristuarū duūxūgū tixīgū. Rū ngēmacēx i guxāma i yixema rū yigūmūcūgū tixīgū, erū woetama wūxitama i duūxūgū tixīgū. ⁶ Rū wūxichigū i yixema, rū Tupana tūxna nanaxā i tórū cuēx i nūma nanaxwēxexū na tūxū nangēxmaxū. Rū tanaxwēxe i meāma nagu taxī i ngēma cuēx i Tupana tūxna āxū. Rū ngēxguma tūxna naxāāgu i tórū cuēx na norū orearū uruū ixīgūxūcēx, rū name nixī i ngēma ō i tūxū ngēxmaxūmaā tanaxū i ngēma puracū. ⁷ Rū ngēxguma tūxna naxāāgu i tórū cuēx na togūxū rūngūxēēgūxūcēx, rū name nixī i meāma tanaxū i ngēma. Rū ngēxguma texēna naxāāgu i tūmaārū cuēx na togūxū tangūexēēxūcēx, rū name nixī i meāma tanaxū i ngēma. ⁸ Rū yixema nūxū cuāxe na Tupanaārū oremaā togūxū tataāēxēēxū, rū name nixī i meāma tanaxū i ngēma. Rū yixema nūxū cuāxe na togūmaā tangauxū i tūmaārū ngēmaxū, rū name nixī i tūmaārū ngūchaūmaā tanaxū i ngēma. Rū yixema āngacū ixixē rū name nixī i meāma tayanxūēē i ngēma puracū. Rū yixema nūxū cuāxe na togū tūxū ngechaütümüügūxū, rū name nixī i taāēacūma tanaxū i ngēma.

Ñuxăcū nanaxwêxe na namaxêxū i duixūgū i Cristuaxū yaxōgūxū

⁹ Rū name nixī i aixcūma meāma pegū pengechaūgū i wūxichigū. ;Rū nūxū pexo i guxūma i tacū i chixexū ixīxū! ;Rū nagu pexī i ngēma aixcūma mexū ixīxū! ¹⁰ Rū name nixī i wūxichigū pegū pengechaūgū, ñoma pegūeneēxūchixū pengechaūxūrū. Rū name nixī i naxcêx pedaūgū na ñuxăcū peeneēgūxū petaxêxū rū ñuxăcū pegū perūngūxêxū. ¹¹ Rū tama name i cuxo ega tacū rū puracū cuxū namuxgu ya tōrū Cori. Natūrū name nixī i curū ngūchaūmā cunaxū i norū puracū. ¹² Rū name nixī i petaāgū erū ipenanguxêē na Tupanaxūtawa pengugūxū. Rū ngēxguma tacū rū ngūxū pexū ngupetūgu, rū name nixī i yaxna namaā pexīnūē. ;Rū tama name i nūxū perūchaue na peyumūxēgūxū! ¹³ Rū ngēxguma nūxū pedēuxgu na tacū nūxū taxuxū i ngēma togū i yaxōgūxū, rū name nixī i nūxū perūngūxêē. ;Rū meā penayaxu i ngēma duixūgū i pexūtagu naxīnēxū! ¹⁴ Rū ngēxguma chi texē chixri pemaā ūpetūgu, rū name nixī i tūmacêx peyumūxēgū na meā tūxū naxūpetūxūcêx. Rū ngēmaācū name nixī i Tupanana tūmacêx peca na tūxū nangūxêēxūcêx rū tama tūxū napoxcuxūcêx. ¹⁵ ;Rū wūxigu tūmamaā petaāgū ya yīxema taāgūxē! ;Rū wūxigu tūmamaā pexauxe ya yīxema ngechaūgūxe rū auxexe! ¹⁶ ;Rū meā pegū pengechaūgū i wūxichigū! ;Rū tama pegū picuēxūgū! ;Rū namaā pegū pewūxiguxêē i ngēma tama nūgū icuēxūgūxū! ;Rū tama pegūgu perūxīnūē na togārū yexera nūxū cuēxūchigūxū na pixīgūxū! ¹⁷ Rū ngēxguma texē chixexū pemaā ūxgux, ;rū tāūtama chixexūmaā pexūtānū! Natūrū name nixī i naxcêx pedau na mexū pexūxū i guxū i duixūgūpēxewa. ¹⁸ ;Rū naxcêx pedau na guxūma i duixūgūmaā meā pemaxēxū rū namaā na iperūngūxmūxūcêx i guxūguma! ¹⁹ Pa Chaueneēgū ya Pexū Changechaūgūxe, tama name i pegūtama pexūtānū ega texē tacū rū chixexū pemaā ūxgu. Natūrū name nixī i Tupanamēxēgu penaxū i ngēma na nūma napoxcūxūcêx. Erū Tupanaārū ore i ūmatūxūwa rū ñanagūrū:

“Rū choxmēxwa nangēxma na duixūgūxū chapoxcuxū i norū chixexūcêx.

Rū choma tá nūxū chanaxūtānū i ngēma duixū i chixexū ūxū”,
ñanagūrū ya tōrū Cori. ²⁰ Rū ngēxguma tacū rū chixexū cumaā naxūxgu i togū, rū tama name i chixexūmaā cunataeguxêē. Natūrū name nixī i nagu quixū i Tupanaārū ore i ñaxū,

“Rū ngēxguma curū uwanū taiyēxgu, ;rū nachibūxêē! Rū ngēxguma yaṭawaxgu, ;rū naxaxexêē! Erū ngēxguma ngēmaācū cunaxūxgu, rū poraācū tá cunaxānēxêē”,

ñaxū. ²¹ Rū ngēxguma togū chixexū cumaā ūxgux, rū name nixī i cuxuāē na tama chixexūgu cunguxūcêx. Rū name nixī na mexū cuxūxū namaā i ngēma duixū. Rū ngēmaācū tá icuyanaxoxêē i ngēma chixexū i cumaā naxūxchaūxū.

13

¹ Rū name nixī i guxūma i duixūgū rū meā nōrū āēxgacūga naxīnūē. Erū Tupana nixī ya nūxū unetacū i guxūma i āēxgacūgū. Erū nataxuma i āēxgacū i tama Tupana ingucuchixēxū. ² Rū ngēmacêx, texē ya tama tūmaārū āēxgacūga ñnūchaūxē, rū Tupanaga nixī i tama taxīnūxū. Rū yīxema tama naga ñnūēchaūxē, rū tá tapoxcūe. ³ Erū ngēma āēxgacūgū rū tama ngēma mexū ūgūxūārū poxcuruū nixī, natūrū ngēma chixexū ūgūxūārū poxcuruū nixī. Rū ngēxguma cunaxwēxegu na tama nūxū cumuūxū i wūxi i āēxgacū, rū name nixī i meā cumaxū. Rū nūma i āēxgacū rū tá cumaā nataāē.

⁴ Erū nūma i āēxgacū rū Tupanaārū ngūxêēruū nixī rū ngēmacêx nanamu

na cuxū nangūxēxūcēx. Natürü ngēxguma chixri cumaūxgu, rü ngēxguma tá waxi nixī i nüxū cumuūxū. Erü nüma i āēxgacū rü tama natüçēxma nixī na nüxū nangēxmaxū i pora na cuxū napoxcuxū. Erü woetama Tupana nanamu na napoxcuāxūcēx i ngēma duūxū i chixri maxūxū. ⁵ Rü ngēmacēx name nixī i naga cuxīnū i curū āēxgacūgū. Rü tama ngēma poxcuxū na cumuūxūcēxicatama nixī i namexū na naga cuxīnūxū, natürü name nixī i naga cuxīnū erü marū nüxū cucuēx na namexū i ngēma. ⁶ Rü ngēmacēx name nixī i meā nüxū penaxūtanū i ngēma dīeru i perū āēxgacūgūcēx ixīxū i ngēma nūmagū naga naxunetaxūēxpūx na nüxū penaxūtanūxūcēx. Erü ngēma āēxgacūgū rü Tupanaāxū nixī i napuracūexū i ngēxguma naxūāgu i ngēma puracū na pemaā inacuāxū. ⁷ Rü wūxichigū i ngēma āēxgacūgū, rü name nixī i nüxna penaxā i ngēma nüxna ūxū. ¡Rü nüxū penaxūtanū i ngēma dīeru i perū āēxgacūgū naga unetaxūēxpūx na nüxū penaxūtanūxū! ¡Rü penaxūx i ngēma īāneārū puracū i perū āēxgacūgū pexū muxū na penaxūxūcēx! ¡Rü nüxū pengechaūgū rü naga pexīnūē i ngēma perū āēxgacūgū! Erü ngēmaācū nixī i namexū na penaxūxū. ⁸ Rü tama name i texēaxū ſacū pengetanū. Natürü nangēxma i wūxitama i ngetanū i taguma tūxū ingutanūxū. Rü ngēma nixī na yigū ingechaūgūxū. Rü ngēmacēx ya yīxema aixcūma tūmamūcūxū ngechaūxē rü marū tayanguxēē i guxūma i ngēma Tupana tūxū muxū. ⁹ Rü űanagürü i Tupanaārū mugū:

“¡Rü tāūtáma nai i ngemaā icupe! ¡Rü tāūtáma cumáēta! ¡Rü tāūtáma cunggīx!

¡Rü tāūtáma toguāxārū ngēmaxū cuxū nangūchaū!”

űanagürü. Natürü ngēma mugū rü guxūma i togū i Tupanaārū mugūmaā rü wūxigu nanu naga i norū ore i űaxū:

“¡Rü nüxū nangechaū i cumūcū na cugūtama cungechaūxürüü!”

űaxū. ¹⁰ Rü yīxema tūmamūcūxū ngechaūxē, rü taxuūma i chixexū namaā taxū. Rü ngēmacēx i ngēxguma tamūcūxū ingechaūgu, rü aixcūma tayanguxēē i Tupanaārū mugū. ¹¹ Rü name nixī i tanaxū i guxūma i ngēma, erü űomaūcū rü nangēxma i muxūma i guxchaxūgū. Rü name nixī i pegū ípemexēē rü paxa penaxū i tórū Coriarū puracū. Erü űuxma rü noxri yaxōgūguarū yexera ningaicamachigū i ngēma ngunexū i naga tá taxcē nataeguxū ya tórū Cori. ¹² Rü woo na naporaxū i Chataná i űoma i naānewa i űuxmax, natürü paxa tá nagux i ngēma, rü paxa tá ínangu ya Cristu na nügūxūtawa tūxū nagagūxūcēx. Rü ngēmacēx name nixī i nüxū tarūxoe i guxūma i chixexū ixūgūxū. Rü űuxma na nüxū icuāxū i Tupanaārū ore, ¡rū ngīxā yigūna tadaugū na tama naga iyixūcēx i ſacū rü chixexūgū! ¡Rü ngīxā meā tamaxē na ngēmaācū nüxū rüyexeragūxūcēx i guxūma i chixexū! ¹³ ¡Rü ngīxā mexū taxūgū rü meā tamaxē! Erü aixcūma Cristuarū duūxūgū tixīgū, rü tanaxwēxē i nüma nanaxwēxexūācūma tamaxē. Rü tama name na ingāxēxū rü na naxūgūxū i petagū i chixexū i duūxūgū nawa āūgatanūxū. Rü tama name i tingēāēmare rü ēxna to i chixexū taxūgū, rü bai na yigū ichoxūgagūxū, rü bai i togūchi ixaie xū naxcēx i norū ngēmaxūgū. ¹⁴ Natürü name nixī i nacūmagu pexī ya tórū Cori ya Ngechuchu ya Cristu, rü nüxna naxcēx peca na pexū nangūxēxūcēx na meā naxcēx pemaxēxūcēx. Rü tama name i naxcēx pedaugū na űuxācū pexeneārū ngūchaū na pexūgūxū.

14

Tama name i nüxū quixu i cueneē i yaxōxū

¹ Rū ngēxguma petanūgu naxāxchaŭgu i wūxi i peeneē i tama perūū meā Tupanaārū orexū cuāxū, rū name nixī i meā penayaxu. Natūrū tama name i namaā pegū pechoxūga naxcēx i nacūmagū i nagu yaxūxū i Tupanapēxewa. ² Rū dūcax, nangēxma i űuxre i taeneēgū i nagu rūxīnūēxū na namexū na guxūraūxū i ōna nangōxgūxū. Natūrū nangēxma i togū i taeneēgū i tama aixcūma meā Tupanaārū orexū cuēxgūxū i tama namachi ngōxgūchaūxū. Rū nūmagū nūxū nacuēxgūgu rū Tupanapēxewa nachuxu na űacu rū namachi nangōxgūxū, rū ngēmacēx nixī i nabū rū orixgūxicatama nangōxgūxū. ³ Rū ngēxguma tangēxmagu ya texé ya namachi ngōxē, rū tama name i nūxū taxoox i ngēma togū i duūxūgū i tama namachi ngōxgūxū. Rū ngēxgumarūū ta ya yixema tama namachi ngōxē, rū tama name na nūxū tixuxū i ngēma duūxūgū i namachi ngōxgūxū, erū nūmagū rū ta Tupanaārū duūxūgū nixīgū. ⁴ űRū texé quixī i cuma rū ngēmacēx nūxū quixu i to i coriarū duūxūgū? Rū dūcax, pemaā nūxū chixu rū ngēma norū cori tá nixī i nangugūxū rū ngoxi mexū naxūx i ngēma norū duūxū, rū ēxna tama. Rū ngēma duūxū rū Tupanapēxewa rū tá name, erū nūma ya tōrū Cori ya Cristu rū nūxū nangēxma i pora na nūgūcēx namexēēāxū i ngēma duūxū. ⁵ Rū dūcax, nangēxma i űuxre i duūxūgū i nagu rūxīnūēxū na ngūxchigaarū ngunexū rū togū i ngunexūārū yexera namexū na nagu Tupanaxū yacuēxūūgūxū. Rū nangēxma i togū i duūxūgū i nagu rūxīnūēxū na guxūma i ngunexūgū rū nawūxiguxū i Tupanapēxewa. Natūrū wūxichigū i yixema rū tanaxwēxe i meā taāēwa nūxū tacuēx na aixcūma Tupanapēxewa namexū i ngēma taxūxū rū tixōxū. ⁶ Rū yixema duūxē ya űacu rū ngunexū Tupanacēx īxūxūchixe, rū ngēmaācū tanaxū na ngēma ngunexūgū tōrū Corixū ticuēxūūxūcēx. Rū yixema namachi ngōxē, rū ngēmaācū tanangōx na tōrū Corixū ticuēxūūxūcēx, rū Tupanana moxē taxā naxcēx i ngēma tangōxū. Rū yixema tama namachi ngōxē, rū ngēmaācū tanaxū na tōrū Corixū ticuēxūūxūcēx, rū tūma rū ta Tupanana moxē taxā naxcēx i ngēma nabū i tangōxū. ⁷ Rū űuxma na űoma i naānema imaxēxū, rū taxūema tūgūcēxtama tamaxū rū ēxna tūgūcēxtama tayu. ⁸ Erū űuxma na imaxēxū, rū tōrū Coriarū ngūchaū na ixūgūūcēx nixī i imaxēxū. Rū ngēxguma iyuegu, rū ngēma rū ta tōrū Corimēxēwa nangēxma. Rū ngēmaācū nūxū tadau rū woo imaxēgu rū ēxna woo iyuegu, rū tōrū Coriarū duūxūgū tixīgū, rū namēxwa tangēxmagū. ⁹ Rū yemacēx nixī ga nayuxū ga Cristu rū wenaxārū namaxūxū na tūmaārū Cori yīūxūcēx ga guxāma ga guxema yaxōgūxe ga marū yuexe rū guxāma ya yixema yaxōgūxe ya űuxma rū ta maxēxē. ¹⁰ Rū ngēmacēx Pa Chaueneēx, űrū tūxcūū i nūxū quixuxū i cueneē i yaxōxū? Rū cumax, Pa To i Chaueneēx, űrū tūxcūū i nūxū cuxoxū i cueneē? Erū guxātāma i yixema rū Tupanapēxewa tá tangugū na nūma tūxū nangugūxūcēx rū ngoxi ime rū ēxna tama. ¹¹ Erū Tupanaārū ore i űumatūxūwa rū űanagūrū ya tōrū Cori:

“Ngēma aixcūma na chamaxūxūrūū tá ta nixī i aixcūma guxūtāma i duūxūgū chopēxegu caxāpūxūgūxū, rū guxūtāma choxū icuēxūūgūxū”, űanagūrū. ¹² Rū ngēmaācū nūxū tacuēx na wūxichigū i yixema rū aixcūma tá Tupanapēxewa na ingugūxū na namaā nūxū ixuxūcēx na űuxācū imaxēxū rū űacu na ixūxū.

Tama name i chixexūgu cunanguxēē i cueneē i yaxōxū

¹³ Rū ngēmacēx nixī, Pa Chaueneēgūx, i tama namexū na tamūcūgūxū ix-uechaū. Natūrū narūmemaē nixī i nūxū perūxoe i guxūma i űacu i peeneēgūxū pecadugu yixēēxū rū ēxna norū ōxū chixexēēxū. ¹⁴ Choma nūxū chacuēx rū

nataxuma i ðna i Tupanapēxewa chixexū. Rū aixcūmaxūchi nūxū chacuèx i ngēma erū tórū Cori ya Ngechuchu ya Cristuarū duūxū chixī, rū nūma choxū nūxū nacuèxēē i ngēma. Natūrū ngēxguma chi texé nagu rūxīnūgu na tama Tupanapēxewa namexū i ñacū rū ðna na tangōxū, rū name nixī i noxtacūma tama na tanangōxū ega nagu tarūxīnūgu na tama namexū i ngēma. ¹⁵ Rū ngēxguma ngēma cungōxūcēx tūmaāēwa cunanguxēēgu ya cueneē, rū cumaā nūxū chixu rū tama aixcūma tūxū cungechaū. Rū tama name i ngēma cungōxūgagu chixexūgu tūxū cunguxēē rū tūxū icuyarūtauxēē ya yīxema cueneē ya Cristu tūmacēx yuxe. ¹⁶ Rū ngēmacēx, woo cuxcēx namexgu i ngēma cuxūxū, natūrū tama name na cunaxūamaxū ega ngēmacēx togū tá cuxū ixuxgu na pecadu yīxū i ngēma cuxūxū. ¹⁷ Rū ngēma Tupanapēxewa na imexūcēx rū tama ñacū rū ðna na ingōxū rū ēxna ñacū rū axexū na ixaxūgagu nixī. Natūrū napēxewa na imexūcēx rū tanaxwēxe i Naāē i Üñexūārū ngūxēēmaā meā tayanguxēē i ngēma Tupana naxwēxexū rū yigūmaā itarūngūxmūē rū aixcūma tataāēgū napēxewa ya Tupana. ¹⁸ Rū yīxema ngēmaācū Cristucēx maxūxē, rū Tupana rū tūmamaā nataāē, rū guxūma i duūxūgū rū ta tūmamaā nataāēgū. ¹⁹ Rū ngēmacēx, jngīxā naxcēx tadaugū i guxūma i nacūma i mexū i yigūmaā tūxū rūngūxmūēxēēxū! jRū ngīxā yigū tarūngūxēē na yexeraācū iyaexūcēx i tórū ðwa rū Tupanaārū orewa! ²⁰ Rū tama name i ñacū rū ðna na cungōxūgagu icuyanax-oxēē i Tupanaārū puracū i cueneēārū maxūwa. Rū aixcūma nixī i guxūma i ðnagū i namexū i Tupanapēxewa. Natūrū wūxi i chixexū nixī ega ngēma ðna i ingōxūgagu chixexūgu nayixēēgu i taeneēgū. ²¹ Rū ngēmacēx tama name i cunangōx i namachi, rū ēxna cuyaxaxū ya binu, rū ēxna cunaxū i ñacū i to, ega ngēmagagu chixexūgu cunanguxēēgu i cueneē i yaxōxū. ²² Rū ngēxguma cuma nagu curūxīnūgu na namexū na cunangōxū i ngēxūrūxūmare i ðna, rū Tupanapēxewa rū name nixī i cuxicatama nūxū cucuèx i ngēma. Rū tataāē ya yīxema tūmaāēwa nūxū cuāxe na Tupanapēxewa namexū i ngēma taxūxū. ²³ Natūrū ngēxguma wūxie nagu rūxīnūgu na tama namexū i Tupanapēxewa na ñacū rū ðna na tangōxū, rū pemaā nūxū chixu rū chixexū taxū ega tanangōxomagu, erū tūmaāēwa nagu tarūxīnū na tama aixcūma namexū i ngēma taxūxū. Rū guxūma i ngēma tūmaāēwa nagu tarūxīnūxū na nachixexū rū aixcūma pecadu taxū ega tanaxūmagu.

15

Name nixī i cumūcūxū cutaāxēxēē

¹ Rū yixema na iporaexū i tórū ðwa, rū name nixī i nūxū tarūngūxēē i ngēma tamūcūgū i turaexū i norū ðwa. Rū tama name i yigūguxicatama tarūxīnūē rū tóxrūcēxicatama tadaugū. ² Natūrū wūxichigū i yixema rū name nixī i taeneēāxū tanangūchaūxēē na ngēmaācū nūxū rūngūxēēxūcēx na yexeraācū yaxōxūcēx. ³ Yerū woo ga Cristu rū tama noxrūtama ngūchaū naxū. Natūrū nayanguxēē ga yema Tupanaārū ore ga ñaxū:

“Pa Chaunatūx, rū ngēma duūxūgū i cumaā guxchigagūxū, rū chomaā nixī i naguxchigagūxū”,

ñaxū. ⁴ Rū guxūma ga yema nuxcūma ūmatūxū ga Tupanaārū orewa, rū naxūmatū na tūxū nanguxēēxūcēx na taguma nūxū rūxoexū ega woo ñacū rū guxchaxū tūxū ūpetūgu. Rū yema Tupanaārū ore rū naxūmatū na tūxū nataāēxēēxūcēx rū tūxū nūxū nacuèxēēxūcēx na aixcūma Tupanaārū ixīgūxū.

⁵ Rū Tupana nixī ya tūxū rūngūxēēcū na yaxna namaā ixīnūxūcēx i guxūma

i guxchaxūgū. Rū nūma nixī i tūxū nataāēxēēxū. Rū chanaxwae i nūma ya Tupana pexū narūngūxēē na aixcūma ngēma Cristu pexū naxwaxēūācūma pemaxēxū. ⁶ Rū chanaxwēxe na ngēmaācū pemaxēxū na guxāma i pema rū wūxigu nūxū picuēxūūgūxūcēx ya Tupana ya Nanatū ya tōrū Cori ya Ngechuchu ya Cristu.

Duūxūgū i tama Yudiūgū ixīgūxūmaā nūxū nixu i ore i mexū

⁷ Rū ngēmacēx, yema Cristu pexū na dexūrūū rū name nixī i wūxichigū meā pegū peyaxu na ngēmaācū Tupanaxū yacuēxūūgūxūcēx i duūxūgū. ⁸ Rū pemaā nūxū chixu rū Cristu nūma naxū na Yudiūgūxū yanangūxēēxūcēx, na yemaācū yanguxēēāxūcēx ga yema uneta ga nuxcūmaūgūxū ga tōrū oxigūmaā nūxū yaxuxū ga Tupana. Rū yemaācū ga Cristu rū tūxū nūxū nadauxēē na aixcūmacū na yīxū ya Tupana rū aixcūma yanguxēēāxū i ngēma norū uneta. ⁹ Rū yexgumarūū ta ga Cristu rū nūma naxū naxcēx i ngēma duūxūgū i tama Yudiūgū ixīgūxū na nūmagū rū ta Tupanaxū yacuēxūūgūxūcēx naxcēx na poraācū Tupanaāxū nangechaūtūmūgūxū. Rū yemachiga nixī ga yema Tupanaārū ore ga Dabī ūmatūxū ga űaxū:

“Rū ngēmacēx guxū i nachīūānecūāx i duūxūgūpēxewa tā cuxū chicuēxūū.

Rū tā chorū wiyaewa cuxū chataxēē”,

űaxū. ¹⁰ Rū toxnamana i Tupanaārū ore i ūmatūxūwa rū űanagūrū:

“Pa Duūxūgū i Tama Yudiūgū Ixīgūxū, rū name nixī i pema rū wūxigu chorū duūxūgū i Yudiūgūmaā petaāēgū”,

űanagūrū. ¹¹ Rū toxnamana, rū űanagūrū ta:

“Pa Duūxūgū i Tama Yudiūgū Ixīgūxū, rū name nixī i nūxū picuēxūūgū ya tōrū Cori. Rū Pa Guxūma i Nachīūānecūāx i Duūxūgūx, rū name nixī i penataxēē”,

űanagūrū. ¹² Rū Ichaxīa rū ta nanaxūmatū rū űanagūrū:

“Rū Dabī nanatū ya Ichaīwa tā ne naxū i wūxi i nataa i tā Cristu ixīxū. Rū nūma tā nixī i norū āēxgacū yīxū i guxūma i ngēma duūxūgū i tama Yudiūgū ixīgūxū. Rū ngēma duūxūgū rū tā aixcūma nūxū nayaxōgū rū tā ínananguxēēgū na yimagagu Tupana nūxū rūngūxēēgūxū”,

űanagūrū. ¹³ Rū űuxma i pema na nūxū peyaxōgūxū rū chanaxwēxe i poraācū pexū nataāēxēē ya yima Tupana ya pexū rūngūxēēcū na meā Cristuxū ípenanguxēēgūxūcēx. Rū ngēmaācū i Tupanaāē i Ūūnexū rū tā pexū naporaexēē na yexeraācū Cristuxū ípenanguxēēgūxūcēx. ¹⁴ Pa Chaueneēgūx, meāma nūxū chacuēx na guxū i duūxūgūmaā pemecūmaxū, rū aixcūma Tupanaxū na pecuāxū, rū aixcūma meāma pegū pixucuxēgūxū. ¹⁵ Natūrū űaā poperawa rū meāma pexcēx chanaxūmatū i űuxre i Tupanaārū ucuxēgū, erū tama chanaxwēxe i nūxū ipeyarūngūmaē. Rū tama chamuū na pexcēx chanaxūmatūxū i ngēmachiga yerū Tupana nixī ga choxū mucū na pemaā nūxū chixuxūcēx. ¹⁶ Rū nūma nixī ga choxū namuxū na Ngechuchu ya Cristuarū puracū chaxūxūcēx i natanūwa i ngēma duūxūgū i tama Yudiūgū ixīgūxū. Rū ngēma puracū ga nawa choxū namuxū nixī na ngēma duūxūgūmaā nūxū chixuxū i ore i mexū na Tupanaxūtawa chanagagūxūcēx, na wūxi i āmare i Tupana namaā taāēxū i ngēma duūxūgū i Naāē i Ūūnexū imexēēgūxū.

¹⁷ Rū űuxma na Ngechuchu ya Cristuarū duūxū na chīxū, rū ngēmacēx chataāē namaā i ngēma puracū i Tupanaāxū chaxūxū. ¹⁸⁻¹⁹ Rū űuxma rū yema Cristu chorū maxūwa ūxūchigaxūxīcatama nixī i chixuxū. Rū nūma nixī ga choxū nangūxēēxū na Tupanaxūtawa chanagagūxūcēx ga yema duūxūgū i tama Yudiūgū ixīgūxū, na nūmagū rū ta Tupanaga naxīnūxūcēx.

Rü yemaãcü chorü oremaã, rü chorü puracümaã, rü cuèxruũgü ga taxü ga Tupana üxümaã, rü Naãe i Üünexüãrü poramaã Tupanaxütawa chanagagü ga yema duũxügü. Rü yemaãcü Yerucharéüwa rü guxüwama ñuxmata lliricuarü naãnewa meãma chayanguxëe na nüxü chixuxü ga yema ore i tüxü maxëxëxü i Cristuchiga. ²⁰ Rü yemaãcü chapuracü na nüxü chixuxütcëx ga Tupanaãrü ore i mexü ga ngextä taguma ñuxgu Cristuchigaxü ínaxínüëxüwa ga duũxügü. Yerü tama chanaxwëxe ga marü togü nüxü íxuxüwa rü duũxügü marü nüxü ícuáxüwa nüxü na chixuxü ga yema ore. ²¹ Rü yemachiga nixü ga Tupanaãrü ore ga Ichaxía ümatüxü ga ñaxü:

“Rü yíxema taguma Cristuchigaxü cuèxgüxe, rü taguma nachigaxü ínüëxë, rü tá nüxü tacuëxgü i nachiga”,
ñaxü.

Pauru rü Dumawa naxüxchaü

²² Rü yema toxnamana na chapuracüxütcëx nixü ga taxucürüwa petanüwa chaxüxü woo muëxpüxcünachirëx yëma chaxüxchaü. ²³ Natürü ñuxma na marü chanaguxëëxü i ngëma puracü i toxnamana, rü nagu charüxínü na petanüwa chaxüxü. Yerü ñuxgumamatama nixü ga nagu charüxínüëchaxü na petanüwa chaxüxchaü. ²⁴ Rü ngëxguma Españawa chaxüxgu, rü nagu charüxínü na woe pexütagu íchidaxü. Rü nagu charüxínü na ñuxre i ngunexü ngëxma petanügu charüxüxü. Rü wüxi i chorü taãe tá nixü i ngëma. Rü ngëmawena rü chanaxwëxe i choxü perüngüxëe na Españawa chaxüxütcëx. ²⁵ Natürü i ñuxma rü Yerucharéüwa tá chaxü, na ngëma chanangexütcëx i ñuxre i diëru naxcëx i taeneëgü i ngëma ngëxmagüxü. ²⁶ Erü ngëma taeneëgü i yaxögüxü i Machedoniãanewa rü Acayaanewa ngëxmagüxü, rü norü ngüchataãa nagu narüxínüe na ngixü nanutaquëxegüxü i ñuxre i diëru na ngëmaãcü nüxü nangüxëëgüxütcëx i taeneëgü i nüxü nataxuxü i Yerucharéüwa ngëxmagüxü. ²⁷ Rü ngëma taeneëgü i Machedoniãcüãx rü Acayacüãx rü norü me nixü na ngëmaãcü naxügüãxü. Rü ngëma duũxügü rü aixcüma nüxü nangëxma i norü ngetanü i taeneëgü i Yudiügütanüwa. Erü ngëma taeneëgü i Yudiügügagu nixü i ngëma togü i duũxügütanüwa nanguxü i Tupanaãrü ore. Rü ñuxma rü name nixü i ngëma togü i duũxügü rü norü ngëmaxümaã taeneëgü i Yudiügü i yaxögüxüxü narüngüxëëgü. ²⁸ Rü ngëxguma chanaguxëëgu i ngëma puracü, rü ngëxguma taeneëgü i Yudiügüna marü ngixü chaxäxgu i ngëma diëru, rü Españawa tá chaxü. Rü ngëxguma ngëma chaxüxgu, rü tá woe pexütagu íchidau. ²⁹ Rü nüxü chacuëx rü ngëxguma petanüwa changuxgu, rü wüxigu tá tataãëgü, erü nüma ya Cristu tá tüxü nataãëxëe i ngëxguma ngëmaãcü wüxiwa ingëxmagügu. ³⁰ Pa Chaueneëgüx, tórü Cori ya Ngechuchu ya Cristuéguga, rü ngëma na Naãëãrü ngüxëëmaã choxü pengechaüxügagu pexü chacëëxü na Tupanana chauxcëx peçaxü i perü yumüxëwa. Rü ngëmaãcü tá choxü perüngüxëe nawa i ñaã puracü i Tupana choxna äxü. ³¹ ¡Rü Tupanana peça na choxü ínapoxüxütcëx nüxna i ngëma Yudiügü i Yudeaanewa ngëxmagüxü i tama yaxögüxü! ¡Rü nüxna peça naxcëx i ngëma taeneëgü i yaxögüxü i Yerucharéüwa ngëxmagüxü, na taãëãcüna nayaxgüãxütcëx i ngëma diëru i ngëma naxcëx changëxü! ³² Rü ngëmaãcü ngëxguma Tupana naxwëxegu, rü taãëãcüma petanüwa tá changu, na wüxigu pemaã chataãëxütcëx. ³³ Rü chanaxwëxe na pemaã inaxüxü ya Tupana ya tüxü taãëxëëcü. Rü ngëmaãcü yíi.

16

Pauru rü nüxü narümoxë ga yema duüxügu ga yaxöguü ga Dumawa yexmagüü

1 Rü ñuxma na petanüwa naxüxchaüü i taeyëx i Febe, rü pemaã ngüxü chixu rü wüxi i taeyëx i mecü iyixü. Erü ngüma rü nüxü irüngüxëë i ngëma yaxöguü i Chëcréaarü ñanewa ngëxmagüü. 2 Rü chanaxwëxe i meã ngüxü peyaxu, naegagu ya törü Cori ya Ngechuchu, erü ngëma nixü i mexü na penaxüü namaã i guxüma i yaxöguü. Rü chanaxwëxe i guxüma i tacü i ngüxü taxuxüwa rü ngüxü perüngüxëë, erü ngüma rü poraãcü togüü irüngüxëë, rü choxü rü ta irüngüxëë. 3 Rü nüxü perümoxëgü i Prisila rü Aquiru! Rü nümagü rü chomücgü nixü i Ngechuchu ya Cristuarü puracüwa. 4 Rü nümagü rü äücumaxüwa nichocu na chauëtüwa nachogüexüxcëx, na tama chayuxüxcëx ga chomax. Rü ngëmacëx moxë nüxna chaxã. Rü tama chaxicatama moxë naxcëx nüxna chaxã, natürü moxë nüxna naxägü ta i guxüma i taeneëgü i yaxöguü i tama Yudiügü ixüguü. 5 Rü nüxü perümoxëgü ta i guxüma i taeneëgü i Aquirupatawa ngutaquëxegüüü! Rü ngëxgumarüü ta nüxü perümoxëgü ya chomücü ya nüxü changechaücü ya Epenëtu! Rü nüma nixü ga nüxüra Cristuaxü yaxöüxü ga Ächiaanewa. 6 Rü ngüxü perümoxëgü i María ga poraãcü petanüwa Tupanaãxü puracü! 7 Rü nüxü perümoxëgü i chautanüxügü i Äüdrünicu rü Yüniã ga wüxigu chomaã poxcuexü! Rü nümagü nixü i yatügü i aixcüma Tupana imugüxü i guxüma i yaxöguü nüxü ngechaügüü. Rü nümagü rü nüxüra chauxüpa Cristuaxü nayaxögu. 8 Rü nüxü perümoxëgü ya Äüpriätu ya chomücü ya nüxü changechaücü ya chauxrüü törü Coriaxü yaxöcü! 9 Rü nüxü perümoxëgü ya Urubãnu ya tomücü ixücü i Cristuarü puracüwa! Rü ngëxgumarüü ta nüxü perümoxëgü ya Estaqui ya nüxü changechaücü! 10 Rü nüxü perümoxëgü ya Apere ya aixcüma tüxü nüxü dauxëëcü na ñuxãcü Cristuaxü yaxöüxü! Rü ngëxgumarüü ta nüxü perümoxëgü i Aritüburutanüxügü! 11 Rü nüxü perümoxëgü i chautanüxü i Erüdiü! Rü ngëxgumarüü ta nüxü perümoxëgü i Narsichutanüxü i törü Coriaxü yaxöguü! 12 Rü ngüxü perümoxëgü i Trifena rü Trifocha! Rü ngümagü rü törü Coriaxü ipuracü. Rü ngëxgumarüü ta ngüxü perümoxëgü i taeyëx i Péchida i ngüxü ingechaügücü! Rü ngüma rü marü poraãcü törü Coriaxü ipuracü. 13 Rü nüxü perümoxëgü ya Rufu ya aixcüma meã törü Coriaxü yaxöcü! Rü ngëxgumarüü ta ngüxü perümoxëgü i naë ga chauerüü chomaã ixücü! 14 Rü nüxü perümoxëgü i Achücritu, rü Peregüte, rü Erme, rü Patroba, rü Erma, rü guxüma i togü i taeneëgü i natanüwa ngëxmagüü! 15 Rü nüxü perümoxëgü ta i Firöru, rü Yüria, rü Neréu, rü naeyëx, rü Oripa, rü guxüma i togü i taeneëgü i yaxöguü i natanüwa ngëxmagüü! 16 Rü chanaxwëxe i pegü pengechaügüäcüma pegü perümoxëgü i wüxichigü. Rü guxüma i ngëma yaxöguü i toxnamana ngëxmagüü, rü pexü narümoxëgü. 17 Pa Chaueneëgüx, pexü chacëëxü na pegüna pedaugüxüxcëx nüxna i ngëma duüxügü i pexü itoyechaüxü rü chixexügu pexü yixëëgüchaüxü. Erü ngëma duüxügüarü ngüxëëtae rü tama namaã nawüxigu i ngëma ngüxëëtae ga noxri peyaxgüxü ga yexguma noxri peyaxögu. Rü name nixü i noxtacüma nüxna pixigachi i ngëma duüxügü rü tama natanügu pexägü. 18 Erü ngëma duüxügü rü tama törü Cori ya Ngechuchu ya Cristuarü ngüchaü naxügü, natürü noxrütama ngüchaü nixü i naxüguü. Rü ore i tauxchaxügümaã nayaxucüxëgü i duüxügü, rü ngëmaäcü nanawomüxëëgü i ngëma duüxügü i tama

meã nüxŭ cuèxgüxŭ. ¹⁹ Rü guxŭma i duŭxŭgü nüxŭ nacuèxgü na aixcüma meã Tupanaga pexĩnüèxŭ i pemax. Rü ngëmacèx pemaã chataãe i chomax. Rü chanaxwèxe na meã nüxŭ pecuáxŭ i tacü nixĩ i mexŭ i Tupanapëxewa na penaxüxcèx i ngëma. Natürü ngëma Tupanapëxewa chixexŭ, rü jñuxna pixígachi na tama nagu peyixüxcèx! ²⁰ Rü ngëxguma ngëmaãcü meã pemaxëgu rü nüma ya Tanatü ya Tupana ya tüxŭ taãèxëcü rü tá pexŭ naporaexëe na aixcüma nüxŭ perüyexeraxüxcèx i Chataná. Rü chanaxwèxe i tórü Cori ya Ngechuchu ya Cristu pemaã inarüxãŭx rü pexŭ narüngŭxëe. ²¹ Rü pexŭ narümoxë ya Timutéu ya chomücü ixĩcü i Tupanaärü puracüwa. Rü ngëxgumarüŭ ta pexŭ narümoxëgü i chautanüxŭgü i Dúchiu, rü Yachóŭ rü Sochipatru. ²² Rü choma i Téchiu na chanaxümatüxŭ i ñaã popera, rü choma rü ta pexŭ charümoxë naegagu ya tórü Cori. ²³ Rü pexŭ narümoxë ta ya Gayu ya napatawa changëxmacü. Rü nüma rü inanaxã ya daa napata na nawa nangutaquëxëgüxüxcèx i guxŭma i yaxögüxŭ. Rü ngëxgumarüŭ ta pexŭ narümoxëgü i Eratu i daa ñãneärü dīeruarü dauruŭ ixĩxŭ, rü taeneë i Cuarto. ²⁴ Rü chanaxwèxe i tórü Cori ya Ngechuchu ya Cristu pexŭ narüngŭxëe i guxãma i pemax. Rü ngëmaãcü yĩ.

Pauru rü Tupanaxŭ yacuèxüŭãcüma nanaguxëe i norü popera

²⁵⁻²⁶ jRü ñüxmax, rü ngĩxã nüxŭ ticuèxüŭgü ya Tanatü ya Tupana! Rü nüma nüxŭ nangëxma i pora na pexŭ naporaexëèxüxcèx na meã peyaxögüamaxüxcèx i ngëma norü ore i tüxŭ maxëxëèxŭ tamaã nüxŭ ixuxŭrüŭ. Rü ngëma nixĩ i ore i guxŭwama nüxŭ chixuxŭ rü namaã changüexëètaexŭ i Ngechuchu ya Cristuchiga. Rü ngëmatama ore i Cristuchiga rü taxchaxwa naxëxŭgu ga noxrix, natürü i ñüxma ya Tupana rü marü tüxŭ nüxŭ nacuèxëe i ngëma. Rü nuxcüma tauta naãne üxgu rü Tupanaxĩcatama nüxŭ nacuèx ga yema, natürü i ñüxma rü norü orearü uruŭgü ümatüxŭ ga orewa taxcèx nanangoxëe. Rü ngëma ore rü namaã nawüxigu ga yema ore ga nuxcüma nüxŭ yaxuxŭ ga Tupana ya guxŭguma maxëchacü. Rü ñüxma ya Tupana rü guxŭwama nanamugü i norü orearü uruŭgü na guxŭ i duŭxŭgümaã nüxŭ na yaxugüexüxcèx i ngëma ore i Cristuchiga na nüxŭ yaxögüãxüxcèx rü naga na naxĩnüèxüxcèx. ²⁷ Rü nüma ya Tupana rü nüxĩcatama nixĩ i Tupana yĩxŭ, rü nüxĩcatama nixĩ i guxŭxŭ nacuáxŭ. jRü ñüxmax, rü ngĩxã guxŭguma nüxŭ ticuèxüŭgü, erü Nane ya Ngechuchu ya Cristu rü poraãcü tüxŭ narüngŭxëe! Rü ngëmaãcü yĩ.
Rü nüma pexna,
Pauru

NŪXĪRAŪXŪ GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rŭ nŭxŭ narŭmoxē ga yema yaxŏgŭxŭ ga Corĭtiuarŭ ĩānewa yex-magŭxŭ

¹⁻² Pa Chaueneēgŭ i Corĭtiucŭāxgŭx, choma i Pauru nixĭ i Tupana yax-uxŭ norŭ ngŭchaxŭmaā na Ngechuchu ya Cristu norŭ puracŭwa choxŭ namuxŭcēx. Rŭ choma rŭ namaā i taeneē i Chŏtene nixĭ i pexŭ tarŭmŏxēgŭxŭ rŭ pexcēx tanaxŭmatŭxŭ i űaā popera. Pa Chaueneēgŭ ya Tupanaārŭ Ixĭgŭxex, pema rŭ marŭ Tupanapēxewa pixŭŭne yerŭ Ngechuchu ya Cristu marŭ pexŭ nixŭŭnēxēē. Rŭ Tupana rŭ marŭ pexŭ nade na norŭ duŭxŭgŭ pixĭgŭxŭcēx wŭxigu namaā i guxŭma i ngēma duŭxŭgŭ i guxŭwama tŏrŭ Cori ya Ngechuchu ya Cristuxŭ icuēxŭŭgŭxŭ. Rŭ nŭma ya Ngechuchu ya tŏrŭ Cori ixĭcŭ, rŭ ngēma duŭxŭgŭarŭ Cori ta nixĭ. ³ Rŭ chanaxwēxe ya Tanatŭ ya Tupana rŭ tŏrŭ Cori ya Ngechuchu ya Cristu norŭ ngechaxŭgagu poraācŭ pexŭ narŭngŭxēē rŭ pexŭ nataāēxēē.

Tupana tŭxŭ narŭngŭxēē erŭ Cristuarŭ duŭxŭgŭ tixĭgŭ

⁴ Rŭ taguma nŭxŭ charŭchau na Tupanana moxē pexcēx chaxāxŭ. Rŭ moxē nŭxna chaxā naxcēx i ngema ngŭxēē i Ngechuchu ya Cristugagu Tupana pexna āmarexŭ. ⁵ Yerŭ Cristugagu Tupana pexna nanamu ga Naāxē i Ūŭnexŭ na pemaxā inaxāŭxŭcēx. Rŭ pexna nanaxā ga norŭ ore, rŭ naētŭ pexŭ nanatauxchaxēē na nŭxŭ pecuāxŭcēx na űuxŭ űaxŭchiga yixĭxŭ. ⁶ Rŭ yemaācŭ yexguma nŭxŭ pexĭnŭēgŭ ga yema ore ga Cristuchiga rŭ aixcŭma peyaxŏgŭ. ⁷ Rŭ ngēmacēx i űuxma na ĩpenanguxēēxŭ na wena tāxarŭ nŭma naxŭxŭ ya tŏrŭ Cori ya Ngechuchu ya Cristu, rŭ Tupana pexna nanaxā i taxŭ i cuēx na taxuŭma pexŭ taxuxŭcēx na naxcēx pemaxēxŭ. ⁸ Rŭ ngēmaācŭ tá pexna nadau ya Tupana űuxmatáta nagŭ i naāne, rŭ guxŭgutáma pexŭ naporaexēē na aixcŭma peyaxŏgŭamaxŭcēx rŭ naxcēx pemaxēxŭcēx, na taxŭema chixexŭmaā pexŭ ixugŭxŭcēx i ngēxguma wenaxārŭ nŭma naxŭxgu ya tŏrŭ Cori ya Ngechuchu ya Cristu. ⁹ Rŭ Tupana rŭ guxŭguma nayanguxēē i norŭ uneta. Rŭ nŭma nixĭ ga pexŭ nadexŭ na aixcŭma Nane ya tŏrŭ Cori ya Ngechuchu ya Cristumŭcŭgŭ pixĭgŭxŭcēx.

Nŭgŭ nitoye ga yema yaxŏgŭxŭ

¹⁰ Pa Chaueneēgŭx, tŏrŭ Cori ya Ngechuchu ya Cristuégagu pexŭ chacēēxŭ na wŭxigu pegŭmaā perŭxĭnŭēxŭ rŭ tama pegŭ pitoyexŭcēx. Rŭ name nixĭ i aixcŭma pegŭ pengechaŭgŭ rŭ aixcŭma wŭxigutama perŭxĭnŭē i peāewa. ¹¹ Pa Chaueneēgŭx, pemaā nŭxŭ chixu i ngēma ore, yerŭ Croetanŭxŭtanŭwa nŭxŭ chacuāchiga ga pegŭmaā na penuēxŭ, rŭ tama aixcŭma wŭxigu na perŭxĭnŭēxŭ. ¹² Rŭ pemaā nŭxŭ chixu i ngēma erŭ űuxre i pema rŭ űaperŭgŭgŭ:

“Choma rŭ Pauruwe charŭxŭ”, űaperŭgŭgŭ. Rŭ togue rŭ:

“Choma rŭ Aporuwe charŭxŭ”, űaperŭgŭgŭ. Rŭ togue rŭ:

“Choma rŭ Pedruwe charŭxŭ”, űaperŭgŭgŭ. Rŭ togue rŭ:

“Choma rŭ Cristuwe charŭxŭ”, űaperŭgŭgŭ. ¹³ ¿Rŭ űuxācŭ nixĭ i ngēma?

¿Pexcēx rŭ Cristu rŭ marŭ niyauxye? ¿Ēxna pema nŭxŭ pecuēxgu rŭ choma

i Pauru chiixū ga curuchawa pexcèx chipotaxū rü chayuxū? ¿Rü êxna pema nūxū pecuèxgu rü chauégagu yiixū ga ípebaiūxū? ¹⁴ Rü Tupanana moxè chaxā, yerū taxúema pexū íchabaiūxèè ga pemax. Rü Crispu rü Gayuxicatama nixī ga íchabaiūxèèxū. ¹⁵ Rü ngēmacèx taxucürüwa texé tūgū tixu na chauégagu itabaixū. ¹⁶ Rü yemāācū aixcūma íchanabaiūxèè ga Estéfananūxūgū ta, natürü chauxcèx rü taxúema ga togue tūxū íchabaiūxèè. ¹⁷ Yerū nūma ga Cristu rü tama choxū namu ga duūxūgūxū na íchabaiūxèèxūcèx, natürü choxū namu na duūxūgūmaā nūxū chixuxūcèx i norū ore i mexū i tūxū maxèxèèxū. Rü nanaxwèxe i tauxchaxū i oremaā nūxū chixu i ngēma ore. Erū ngèxguma chi ñoma nūxū cuèxūchixürü nūxū chixuxgu i ngēma ore, rü ngürüāchi i duūxūgū rü tá chauguama narūxīnūè rü tá nūxū inayarūngūmaē na Cristu yiixū ga tūxū maxèxèècū ga yexguma curuchagu nayuxgux.

Cristuwa nixī ga Tupana inawéxū ga norū pora rü norū cuèx

¹⁸ Rü ngēma ore na ñuxācū tórü pecaducèx curuchagu nayuxū ga Cristu, rü wūxi i natücèxmamare nixī naxcèx i ngēma duūxūgū i poxcuwa íxū. Natürü yixema na Tupana tūxū maxèxèèxū, rü nūxū tacuèx na ngēma ore rü Tupanaārū pora yiixū. ¹⁹ Erū norū ore i umatūxūwa rü ñanagürü ga Tupana: “Rü tá ichayanaxoxèè i guxūma i norū cuèx i ngēma duūxūgū i nūxū cuèxūchigūxū. Rü tá nūxū chaxo i ngēma duūxūgūarū cuèx”, ñanagürü. ²⁰ Rü ñuxmax, Pa Chaueneēgūx, ¿Tupanapèxewa rü tacūwa namexū i ngēma duūxūgū i poraācū nūxū cuèxūchixū? ¿Rü tacūwa namexū i ngēma duūxūgū i Moiché umatūxū i mugūwa nguxèētaegūxū? ¿Rü tacūwa namexū i ngēma duūxūgū i meā nūxū cuèxgūxū i ñoma i naāneārū cuāchigagu na yadexagūxū? Erū guxūma i ngēma cuèx i duūxūgū nagu rūxīnūèxū rü Tupanacèx rü taxuwama name. ²¹ Natürü nūma ya Tupana ya guxūxūma cuācū, rü tama nanaxwèxe na ñoma i naānecūāx i duūxūgūarū cuāgagu na yiixū i naxūtawa nangugūxū i nūmagū. Natürü nanaxwèxe na ngēma norū ore i mexūgagu na yiixū i namaxèxèèāxū i ngēma duūxūgū i yaxōgūxū woo togūcèx rü natücèxmamare yixīgu i ngēma ore. ²² Ngēma Yudiūgū rü nūxū nadaugūchaū i cuèxruūgū i Tupanaārū poramaā úxū. Rü ngēma Griégugū rü naxcèx nadaugū i ñoma i naāneārū cuèx. ²³ Natürü ngēma ore i toma nūxū tixuxū, rü Cristu ga curuchawa ipotacūchiga nixī. Rü ngēma ore rü naāēwa nangux i ngēma Yudiūgū. Rü ngēma duūxūgū i tama Yudiūgū ixīgūxūcèx rü wūxi i natücèxmamare nixī. ²⁴ Natürü ngēma duūxūgū i Tupana dexū i Yudiūgū rü êxna tama Yudiūgū ixīgūxū rü ngēma duūxūgūcèx Tupana inanawéx i norū pora rü norū cuèx ga yexguma pecaducèx nayuxgu ga Cristu. ²⁵ Rü yema Tupana úxū ga yexguma nayuxgu ga Cristu rü muxūma i duūxūgūcèx rü wūxi i ngēāemare nixī. Natürü ngēma Tupana nagu rūxīnūxū rü guxūma i ñoma i naānecūāx i duūxūgūarū cuèxarū yexera nixī. Rü yexguma curuchagu nayuxgu ga Cristu rü muxūma ga duūxūgūcèx rü natura ga Tupana ga yexguma. Natürü yexguma nixī ga inawéāxū ga ñuxācū guxū i duūxūgūarū yexera na naporaxūchixū. ²⁶ Pa Chaueneēgūx, name nixī i nagu perūxīnūè na ñuxācū Tupana pexū dexū na norū duūxūgū pixīgūxūcèx. Rü noxretama pixīgū na nūxū pecuèxūchixū ega duūxūgū pexū ngugūgu, rü noxretama pixīgū na āēxgacūgū pixīgūxū, rü noxretama pixīgū i ngēma itaarū dīeruāxūtanūxū pixīgūxū. Natürü woo ngēma na pixīgūgu rü Tupana rü pexū nade na norū duūxūgū pixīgūxūcèx. ²⁷ Rü Tupana nanade ga yema duūxūgū ga togū ga duūxūgū nūxū ixuxgu rü taxūma icuāxū.

Rū yemaācū nanaxū ga Tupana na naxāneēxēēāxūcēx i ngēma duūxūgū i nūxū icuēxūchixū. Rū Tupana nanade ga yema duūxūgū ga togū nūxū ixuxgu rū turaexū. Rū yemaācū nanaxū ga Tupana na naxāneēxēēāxūcēx i ngēma duūxūgū i poraexū. ²⁸ Rū Tupana nanade ga yema duūxūgū ga togū nūxū oexū, rū ņoma i naānēwa taxuūma ixīgūxū. Rū yemaācū Tupana nanaxāneēxēē i ngēma duūxūgū i ņoma i naanēwa norū ngemaxūgūmaā nūgū icuēxūūgūxū. ²⁹ Rū ngēmacēx taxucūrūwama texé tūgū ticuēxūū i Tupanapēxewa. ³⁰ Rū nūmatama ga Tupana nixī ga Ngechuchu ya Cristuarū duūxūgūxū pexū yaxīgūxēēxū. Rū tatanūwa nanamu ga Cristu na nūma tūxna naxāāxūcēx i cuēx i aixcūma ixīxū, rū pecaduwa tūxū ņanguxūxēēxūcēx. Rū nūma ya Cristu nixī i tūxū namaxēxēēxū rū tūxū yamexēēgūxū na aixcūma ixūūnexūcēx napēxewa ya Tupana. ³¹ Rū ngēmacēx i Tupanaārū ore i ūmatūxūwa rū ņanagūrū:
 “Rū ngēxguma texé tūgū icuēxūūchaūgu rū name nixī i tōrū Corixū ticuēxūū”,
 ņanagūrū.

2

Cristu ga curuchawa ipotacūchiga

¹ Pa Chaueneēgūx, yexguma noxri petanūwa chaxūxgu na pemaā nūxū chixuxūcēx ga Tupanaārū ore i aixcūma ixīxū i Cristuchiga, rū tama ņoma nūxū cuēxūchixūrūūācūma pemaā chidexa, rū tama ore ga guxchaxūmaā nixī ga pemaā nūxū chixuxū. ² Yerū yexguma petanūwa chayexmagu, rū Cristuchigaxūūxīcatama nixī ga pemaā chixuxū. Rū taxuūma ga tačū ga togu charūxīnū. Rū yemaācū Ngechuchu ya Cristu ga curuchawa ipotacūgucicatama nixī ga charūxīnūxū. ³ Rū yexguma petanūwa changuxgu rū nūxū chadau ga taxū ga guxchaxūgū ga petanūwa, rū yemacēx poraācū chaxoegaāē rū Tupanapewa chorū muūmaā chidurux. ⁴ Rū yexguma pemaā chideaxgu rū pemaā nūxū chixuxgu ga Tupanaārū ore, rū tama ņoma nūxū cuēxūchixūrūūācūma pemaā nūxū chixu na yemaācū pexū chanangūchaūxēēxū na peyaxōgūxūcēx. Natūrū Tupanaāē i Ūūnexūārū ngūxēēmaā rū Tupanaārū poramaā nixī ga pexū chanangūchaūxēēxū. ⁵ Rū yemaācū Tupanaārū poramaā pemaā nūxū chixu ga yema ore na Tupana-gagu yīxū na nūxū peyaxōgūxū, rū tama ņoma i naānecūāx i duūxūgūarū cuāgaga na yīxū.

Tupana rū Naāē i Ūūnexūwa nūgū tūxū nacuēxēē

⁶ Natūrū pemaā nūxū chixu, rū ngēxguma natanūwa changēxmagu i ngēma duūxūgū i marū meāma yaxōgūxū, rū ngēxguma nixī i chanangūxēēxū i ngēma aixcūma Tupanaārū cuēx i ūūnexū. Natūrū ngēma cuēx rū tama ņoma i naānēwa ne naxū, rū bai i ņoma i naānēārū āēxgacūgū i paxa tá iyarūxoxūwa ne naxū. ⁷ Natūrū ngēma cuēx rū Tupanawa nixī i ne naxūxū. Rū ngēma cuēx nixī ga noxri tauta naāne ūxgu Tupanaxīcatama nūxū cuāxū ga na ņuxācū tá tūxna naxāāxū i maxū i taguma gūxū. ⁸ Natūrū yema Tupana nagu rūxīnūxū, rū taxuūma ga ņoma ga naānecūāx ga āēxgacū nūxū nacuēx. Yerū yexguma chi aixcūma nūxū nacuēxgūgu ga yema Tupana nagu rūxīnūxū rū tāū chima curuchawa nayapotagū ga guma mecū ya tōrū Cori. ⁹ Rū ngemachiga nixī i Tupanaārū ore i ūmatūxūwa i ņaxū:

“Rū ngēma duūxūgū i Tupanaxū ngechaūgūxūcēx, rū nūma nanamexēē i tačū i taxūema nūxū dauxū, rū taguma texé nūxū ņnūxū, rū bai i texé nagu rūxīnūxū”,

ñaxũ. ¹⁰ Rũ ngẽma Tupana mexẽxũ naxcèx i ngẽma duũxũgũ i nũxũ ngechaũgũxũ, rũ ñuxma rũ tũxũ nũxũ nacuèxèè i ngẽma, yerũ núma nanamu ga Naãe i Ûünexũ na taxcèx nangoxèèãxũcèx. Rũ ngẽma Naãe i Ûünexũ rũ guxũxũma nacuèx, rũ èjrxũxũ i ngẽma Tupanaxĩcatama nũxũ cuáxũ rũ ta nũxũ nacuèx. ¹¹ Rũ duũxũgũtanũwa rũ çtexé nũxũ tacuèx na çacũgu naxĩnũxũ i wũxi ya yatũ? Rũ naãèxĩcatama nixĩ i nũxũ cuáxũ i ngẽma nagu naxĩnũxũ i ngẽma yatũ. Rũ ngẽxgumarũĩ ta Tupanaãe i Ûünexũxĩcatama nixĩ i nũxũ cuáxũ na çacũgu naxĩnũxũ ya Tupana. ¹² Rũ yixema rũ tama ñoma i naãnecũãx i naãe nixĩ ga iyaxugũxũ. Natürũ tanayauxgũ i ngema Naãe i Ûünexũ ga Tupana taxcèx núma muxũ na aixcũma nũxũ icuáxũcèx i guxũma i ngẽma mexũgũ ga Tupana norũ ngechaũmaã tũxna ãmarexũ. ¹³ Rũ ñuxma na pemaã nũxũ tixuxũ i ngẽmachiga, rũ Tupanaãe i Ûünexũ toxna ãxũ i oremaã nixĩ i pemaã nũxũ tixuxũ. Rũ tama ore i torũ cuèxwa tayaxuxũmaã nixĩ i pemaã nũxũ tixuxũ. Rũ ngẽmaãcũ nũxũ tixu i Tupanaãe i Ûünexũãrũ ore namaã i ngẽma duũxũgũ i aixcũma Tupanaãe nawa ngẽxmagũxũ. ¹⁴ Rũ texé ya tama Tupanaãe i Ûünexũ tũmawa ngẽxmaxè, rũ taxucürũwa tanayaxu i ngẽma Tupanaãe i Ûünexũ tũxũ nguxèèxũ, erũ tũmacèx ya yixema duũxè rũ natũcèxmamare nixĩ. Rũ tama nũxũ tacuèxèga erũ yixema Tupanaãe i Ûünexũ tũmawa ngẽxmaxèxĩcatama tixĩ ya nũxũ cuáxe na tanangugũxũ na ñuxũ ñaxũchiga yĩxũ i ngẽma Tupanaãe i Ûünexũ tũxũ nguxèèxũ. ¹⁵ Rũ yixema duũxè ya Tupanaãe i Ûünexũ tũmawa ngẽxmaxè, rũ meã tanangugũ i guxũma. Natürũ ngẽma togũ i duũxũgũ i tama Tupanaxũ cuèxgũxũ, rũ taxucürũwama tũmaãrũ maxũxũ nangugũ ya yixema duũxè ya aixcũma Tupanaãe tũmawa ngẽxmaxè. ¹⁶ Erũ Tupanaãrũ ore i umatũxũtwa rũ ñanagürũ:

“ÇTexé nũxũ tacuèx na çacũgu naxĩnũxũ ya tórũ Cori? ÇRũ texé nũxũ tacuèx na Tupanaxũ taxucũxèxũ?”

ñanagürũ. Natürũ yixema nixĩ i aixcũma nũxũ icuáxũ i ngẽma Cristu nagu rũxĩnũxũ.

3

Pauru rũ Apuru rũ wũxigu Tupanaãxĩ napuraciè

¹ Pa Chaueneègũx, yexguma noxri petanũwa changuxgu, rũ taxucürũwa ngẽma duũxũgũ i Tupanaãe nawa ngẽxmaxũmaã chidexaxũrũũãcũ pemaã chidexa. Natürũ ñoma i naãnecũãx i tama Tupanaxũ cuèxgũxũmaã chideaxgurũĩ nixĩ ga pemaã chidexaxũ. Yerũ pema rũ yexwacèx, peyaxõgũ ga yexguma, rũ yemacèx yexwacèx yaxõgũxũmaã chideaxũrũũãcũ pemaã nũxũ chixu ga Cristuchiga. ²⁻³ Rũ taxchaxũ ga oremaã pexũ changũxèè, ngẽxgumarũĩ i wũxi i õxchana ega noxri nabuxgu rũ naègũnenixũ ya taxchããcũ yaxaxũne nũxna taxã. Rũ yemaãcũ taxchaxũ ga oremaã pemaã nũxũ chixu ga Tupanaãrũ ore ga noxrix, yerũ taxucürũwa nũxũ pecuèxèga ga Tupanaãrũ ore ga guxchaxũ. Rũ ñuxma rũ ta tama nũxũ pecuèxèga i Tupanaãrũ ore i guxchaxũ, erũ ñoma tama yaxõgũxũ i duũxũgürũũtama pemaãè. Rũ dũcax, ngẽxguma ñuxma rũ ta pixãũxãchiwèxegu rũ pegũmaã penuègu, rũ ngẽmawa nangox na ngẽma tama yaxõgũxũrũũacũtama nagu perũxĩnũèxũ rũ ñoma i naãnecũãx rũũacũtama na pemaãxèxũ. ⁴ Rũ ngẽxguma petanũwa wũxie ñãgũgu rũ:

“Choma rũ Pauruwe charũxũ”, ñãgũgu, rũ toge rũ:

“Choma rū Aporuwe charūxū”, ñágūgu, rū ngēmawa nūxū tacuèx na ngēma duūxūgū i tama yaxōgūxūrūūācūma na pemaxēxū. ⁵ Rū ngēxguma meā nagu rūxīnūēgu, ¿rū tacū chixī i choma i Paurux? rū ¿tacū nixī i nūma i Aporux? Toma rū Tupanaārū duūxūgūmare tixīgū, rū togagu nixī ga nūxū peyaxōgūxū ga tōrū Cori ya Ngechuchu. Rū wūxichigū ga toma rū tanaxū ga yema puracū ga tōrū Cori toxna āxū. ⁶ Rū chauxūtawa nixī ga nūxū pexīnūēxū rū peyaxōgūxū ga Tupanaārū ore ga noxrix. Rū Aporu nixī ga pexū rūngūxēēcū na yexeraācū meā peyaxōgūxū ga yema ore. Natūrū Tupana nixī ga pexū maxēxēēcū. ⁷ Rū ngēmacēx woo yīxema tūxira duūxūgūmaā nūxū ixuxe i Tupanaārū ore rū woo yīxema wixwena yexeraācū duūxūgūxū ngūexēxē, rū taxuūma tixīgū. Natūrū Tupana nixī ya guxūma ūcū, erū nūma nixī i duūxūgūxū namaxēxēēxū. ⁸ Rū ngēmaācū ya yīxema tūxira duūxūgūmaā nūxū ixuxe i Tupanaārū ore, rū yīxema wixwena yexeraācū duūxūgūxū ngūexēxē rū tawūxigumare i ngēma puracūwa. Natūrū Tupana rū tá tūxū nanaxūtanū i tūmaārū puracū ya wūxichigū ngēxgumarūū na űuxācū tanaxūxū i ngema puracū. ⁹ Rū ngēmaācū i toma rū wūxigu Tupanaāxū tapuracūe. Rū ngēmaācū nixī i perū maxūwa napuracūxū ya Tupana na nūma nanaxwēxēxūācūma pixīgūxūcēx. ¹⁰ Rū choma nixī ga Tupana choxū muxū na chaxira pemaā nūxū chixuxūcēx ga Cristuchiga. Rū togū nixī ga chowena yexeraācū pexū ngūexēēxū. Natūrū guxāma ya texé ya naxūxe i ñāā puracū rū name nixī i taxuāē na meā tanaxūxūcēx. ¹¹ Rū ñāā puracū rū Ngechuchu ya Cristuwa nixī ga inaxūgūxū, rū ngēmacēx taxucūrūwama texé tayangucuchixēē i to i tūxū maxēxēēxū. ¹² Rū űuxma na norū puracū ixūxū i wūxichigū i yīxema, rū tanaxwēxe i taxuāē na aixcūma meā naxūxū i ngēma. Erū yīxema aixcūma meā naxūxe i norū puracū, rū ñoma wūxi i ĩpataarū ūruū i uirumū rū dīerumū rū nuta i mexēchixūmaā ūpataxūrūū tixī. Natūrū yīxema tama aixcūma meā naxūxe i ngēma Cristuarū puracū rū ñoma ĩpataarū ūruū i chixēxū i naī rū naīxātū rū dexnemenēxāmaremaā ūpataxūrūū tixī. ¹³ Natūrū ngēxguma naguxgu i naāne, rū tá nangox na űuxācū naxūāxū i Tupanaārū puracū i wūxichigū i duūxū. Erū ngēma ngunexūgu rū tá nangēxma ya ūxū ya taxūchine. Rū ñoma tacū ūxūwa iguxūrūū tá nixī i Tupana nūxū na ūxū i wūxichigū i duūxūārū puracū na nūxū nacūāxūcēx ngoxi aixcūma name rū ēxna tama. ¹⁴ Rū yīxema aixcūma meā naxūxe i Cristuarū puracū, rū yima ĩpata ya taixūne ya tama ūxūmaā ixaxūnerūū tá nixī i ngēma tūmaārū puracū. Rū tá Tupanaxūtawa tanayaxu i tūmaārū natanū naxcēx i ngēma taxūxū. ¹⁵ Natūrū yīxema tama aixcūma meā naxūxe i ngēma puracū, rū yima ĩpata ya tama taixūne ya ūxūmaā ixaxūnerūū tá nixī i ngēma tūmaārū puracū. Rū tá ngēxma inayarūxomare i guxūma i ngēma taxūxū. Rū tūxicatama tāūtama tixa ñoma wūxi i duūxū i ūxūemawa iyagoxūrūū. ¹⁶ ¿Tama ēxna nūxū pecuèx i pema rū Tupanapata na pixīgūxū, rū ngema Naāe ya Tupana rū pewa na namaxūxū? ¹⁷ Rū ngēxguma texé pexū chixetanūxēēgu, rū Tupana tá tūxū napoxcu, erū Tupanapata ya nawa namaxūne rū naxūūne. Rū pematama nixī ya yima Tupanapata na pixīgūxū. ¹⁸ Tama name i texé tūgūtama tawomūxēē. Rū ngēxguma petanūwa texé tūgūgu rūxīnūgu na wūxi i duūxū i nūxū cuāxe na tīxū i ñoma i naānēwa, rū name nixī i ñoma taxuūma tacūāxūrūū tūgū tixīxēē. Rū ngēxguma tá nixī i wūxi i duūxū i aixcūma nūxū cuāxe tá tīxū. ¹⁹ Erū ñoma i naānēārū cuèx rū wūxi i ngēāēmare nixī i Tupanacēx. Erū Tupanaārū ore i ūmatūxūwa rū ñanagūrū: “Rū ngēma duūxūgū i nūgūgu rūxīnūēxū na nūxū cuèxūchigūxū yīxū, rū norū

cuèxgutama ínanatüexēē ya Tupana”,
 ñanagürü. ²⁰ Rū toxnamana i Tupanaarü orewa rü ñanagürü ta:
 “Tórü Cori ya Tupana rü nüxü nacuèx na taxuwama namexü i ngēma norü
 ínú i ngēma duüxügü i ñoma i naanewa cuèxwa ngugüxü”,
 ñanagürü. ²¹ Rū ngēmacèx tama name i texé tügü ticuèxüxü ega duüxügüarü
 cuèxwamare tarüxüxgu.. Erü Tupana rü marü pexna nanaxā i guxüma na
 pexrü yixüçèx. ²² Rū ngēmacèx i choma i Pauru, rü taeneē ya Aporu, rü
 taeneē ya Pedru, rü ñoma i naāne, rü torü maxü, rü torü yu, rü ñomatama
 i ngunexü, rü moxüärü ngunexü, rü guxüma i ngēma rü pexrü nixi. ²³ Rū
 pematama rü Cristuarü pixigü. Rū Cristu rü Tupanaärü nixi.

4

Yema ngüexüğü ga Ngechuchu imugüxüärü puracüchiga

¹ Rū ngēmacèx tanaxwèxe i tomaā nāgu perüxínüē na Cristuarü pu-
 racütanüxümare na tixigüxü. Rū nūma nixi i toxü namuxü na pexü
 tangüexèxüçèx ga yema ore ga noxri Tupanaxicatama nüxü cuāxü. ² Rū
 ngēxguma texé tacü rü puracü tüxna āxgu, rü name nixi i aixcüma tayanguxēē
 i ngēma puracü i tüxna taxāxü na ngēmaācü itanawèxüçèx na aixcüma wüxi
 i duüxü i mexü tixixü. ³ Rū ngēmacèx i ñuxma na meā chayanguxēēchaüxü
 i ngēma puracü i Tupana choxna āxü, rü taxucèxma chaugüçèx chaxoegaāē
 ega woo choxna pecagu rü ēxna tacü rü āēxgacügü choxna caxgu naxcèx i
 ngēma puracü i chaxüxü. Rū woo i chomatama rü taxuxüçèxma íchicuēē na
 ngextā chixri chanaxüxü i ngēma puracü. ⁴ Natürü ñuxma na chomatama
 nāgu charüxínüxü na nataxüma i chorü chixexü i Tupanapèxewa, rü tama
 ngēmacèx Tupana choxü nadau na changearü pecaduāxü. Erü nūmatama ya
 tórü Cori ya Tupana nixi i aixcüma choxü nacüaarü maxüāxü. ⁵ Rū ngēmacèx
 tama name na toxü pengugüarü maxüāxü naxüpa na nūma naxüxü ya tórü
 Cori. Natürü name nixi i nüxü ípenanguxēē, erü nūma tá nixi i nangoxēēāxü
 i guxüma i ngēma ñuxma icüxü rü guxüma i ngēma duüxügü naāēwa nāgu
 rüxínüēxü. Rū ngēxguma tá nixi ya Tupana i tümamaā nataāēxü ya wüxichigü
 ya yixema aixcüma mexü ügüxe. ⁶ Pa Chaueneēgüx, perü mexüçèx nixi i pe-
 maā nüxü tixuxü i ngēma ore na ngema Tupana naxwèxexüācüma pemaxèxü.
 Rū choma rü Aporu nixi i perü cuèxruüğü tixigüxü na towa pengüexü na Tu-
 panaärü ore pemaā nüxü ixuxrüüācü penaxüxü. Rū ngēmacèx tama name
 na wüxi i perü nguxēētaexümaā petaāēgüxü rü to rü nüxü pexoexü. ⁷ Rū
 ñuxma rü pexna chaca, ¿rü texé tixi ya yixema pemaā nüxü ixuxe na togüarü
 yexera pexü ixixèxè? ¿Erü guxüma i ngema cuèx i pexü ngēxmaxü rü Tupana
 pexna nanaxā? Rū ñuxma na nūma pexna naxāāxü i ngēma cuèx ¿rü tüxcütü
 pegü picuèxüüğü ñoma pematama perü poramaā penayaxuxürüü? ⁸ Rū
 pegügu perüxínüēgu rü aixcüma marü meāma Tupanaxü picuèxüchi rü marü
 pexü nangēxma i guxüma i tacü i penaxwèxexü na naxütawa pengugüxüçèx.
 Rū pegügu perüxínüēgu rü ñoma āēxgacügü i taxürüü pixigü rü taxüma
 toxütawa penaxwèxe i ñuxmax. ¡Chierü aixcüma Tupanapèxewa āēxgacügü
 pixigügu na toma rü ta wüxigu pemaā āēxgacügü na tixigüxüçèx! ⁹ Rū toma na
 Ngechuchu toxü imugüxü, rü chauxcèx rü wixwe toxü nawogü ya Tupana.
 Rū ñoma poxcuexü i yuewa íxürüü tixigü. Rū ñoma wüxi i tacü i nüxü
 nacugüexürüü tixigü i napèxewa i Tupanaärü orearü ngeruüğü i daxüçüāx,
 rü napèxewa i ñoma i naāneçüāx i duüxügü, rü napèxewa i guxüma i tacü
 i Tupana üxü. ¹⁰ Rū ñuxma na Cristuwe tarüxixü, rü ngēmacèx taxüma

icuáxū toxū nawogū i duūxūgū, natūrū i pema rū pegūgu perūxīnūēgu rū guxūxūma pecuēx i Cristuchiga. Toma nūxū tacuēx na duūxūgūpēxewa taturaexū, natūrū i pema rū pegūgu perūxīnūē na aixcūma peporaexū. Rū duūxūgū toxū naxo, natūrū pexū nangechaūgū. ¹¹ Rū űuxma rū ta tama inayacuēx na ngxūl tingegūxū, erū űuxma rū ta taiya toxū nangux, rū tītawae, rū tangexchiru. Rū duūxūgū rū chixri tomaā nachopetū, rū tangepata. ¹² Rū tipae na yeūcūrū toxmēxmaā tapuracūeechaxū. Rū duūxūgū rū űacū tomaā nixugūe, natūrū i toma rū mexū i oremaā tanangāxūgū. Rū towe ningēxūtanū, natūrū yaxna namaā taxīnūē. ¹³ Rū chixri tochiga nidezagū, natūrū i toma rū meā nachiga tidexagū. Rū űoma guxchirexū nadaugūxūrūl tomaā nixīgū, rū űoma duūxūgū i taxuwama mexūācū toxū nixīxēē. Rū űuxma rū ta ngemagutama tomaā naarūxīnūe. ¹⁴ Tama pexcēx chanaxūmatū i űaā popera na pexū chaxāneēxēxūcēx. Natūrū pexcēx chanaxūmatū na pexū chixucūxēgūxūcēx chauxacūgūxūchirūl, erū pexū changechaū. ¹⁵ Erū woo nangēxmagu i muxūma i perū ngxūēerūgū i Cristuchiga pexū ngūexēxūl, natūrū chaxicatama nixī i penatū chīxū ga Cristuxū na peyaxuxūwa. Yerū chauxūtawa nixī ga noxri ga penayaxuxū ga Ngechuchu ya Cristuarū ore i tūxū maxēxēxū. Rū ngēmacēx chaxicatama nixī i penatū chīxū i perū ōwa. ¹⁶ Rū ngēmacēx pexū chacēēxū na chauxrūxū meā pemaxēxū. ¹⁷ Rū ngēmacēx pexūtawa chanamu ya Timutéu ya poraācū nūxū changechaūcū ya chaune ixīcū i tōrū Coriarū orewa. Rū nūma rū aixcūma meā nayanguxēē i guxūma i ngēma nagu chanamuxū. Rū nūma tá pexna nūxū nacuēxāchixēē na űuxācū Ngechuchu ya Cristu naxwēxexūācūma meā chamaxūxū rū chanangūexēxū ga yema yaxōgūxū ga natanūgu chixūgūxū. ¹⁸ Rū űuxre i pemagū rū pegū picuēxūgū, erū nagu perūxīnūē na tagutāma pexūtawa íchayadauxū. ¹⁹ Natūrū ngēxguma nanaxwēxegu ya tōrū Cori, rū paxa tá ngema chaxū na pexū íchayadauxūcēx. Rū ngēxguma rū tá chomaxūchi nūxū chadau ngoxi ngēma duūxūgū i nūgū icuēxūgūxū nūxū nangēxma i Tupanaarū pora rū ēxna yadoragūmare. ²⁰ Erū Tupanaarū pora rū tama nūxū tixumare, natūrū nagu ítamaxē i ngema pora. ²¹ ¿Rū űuxma rū űacū ēxna nixī i penaxwēxexū i pema? ¿Penaxwēxe na pexū chingagūxū i ngēxguma ngēma changuxgu, rū ēxna penaxwēxe na pexū changechaūācūma rū pemaā chamecūmaācūma pexū na íchayadauxū?

5

Duūxūgū i chixri maxēxūchiga

¹ Rū duūxūgū nūxū nixugūgū rū wūxi i yatū i petanūwa rū naērūcūmaātama naxāmēx. Rū ngēma nixī i pecadu i poraācū chixexūchixūl, erū woo ngēma duūxūgū i tama yaxōgūxūtanūwa rū tama ngēmaācū naxūpetū. ² ¿Rū űuxācū i pema i ngēxguma i pegū picuēxūgūamaxū? Rū narūmemaē chi nixī na poraācū pengechaūgūxū. Rū ngēma yatū i ngēma chixexū xūl rū name nixī na ípenamuxūchixūl i petanūwa. ³ Rū woo tama petanūwa changēxmagu i chomax, natūrū guxūguma pegu charūxīnū. Rū űoma pexūtawa changēxmaxūrūl rū tōrū Cori ya Ngechuchu ya Cristuégagu pemaā nūxū chixu na űacū tá namaā pexūxūl i ngēma duūxū. ⁴ Rū name nixī i tōrū Cori ya Ngechuchu ya Cristuégagu pengutaquēxegū. Rū nūma ya tōrū Cori ya Ngechuchu rū tá napetanūga na pexū naporaxēēxūcēx. Rū choma rū tá pexna chacuēxāchi i chorū yumūxēwa. ⁵ Rū ngēma norū poxcu i tá nūxna pexāxūl i ngēma yatū, rū ngēma tá nixī na ípenamuxūchixūl i petanūwa na Chataná ngxūl nūxū

ingexēēxūcēx. Rū ngēmaācū tá inayarūxo i naxūneārū ngúchaū i chixexū, natūrū naāē rū tá namaxū i ngēxguma wena núma naxūxgu ya tórū Cori ya Ngechuchu. ⁶ ĴRū tama name i pema rū pegū picuēxūū naxcēx i ngēma pexūxū! ĴTama ēxna nūxū pecuēx i ngēma ore i ñaxū:

“Wūxi i Íraxū i pāūārū puxēēruū rū taxūma i pāūchara nipuxēē”, ñaxū?
⁷ Rū ngēmacēx name nixī i nūxū perūxoe i guxūma i nuxcūmaūxū i pecūma i pexū chixexēēxū. Rū ngēxguma ngēmaācū penaxūxgu, rū ñoma ngexwacaxūxū i pāū i ngearū puxēēruūāxū i Ūpetūchigaarū petawa ingōxūrūū tá pime. Rū ñuxma i pema rū aixcūma ngexwacaxūxū i duūxūgū pixīgū, yerū Cristu rū ñoma wūxi i carnerurūū marū tachicūū tórū pecaducēx nayu. ⁸ Rū ngēmacēx name nixī i nūxū tarūxoe i nuxcūmaūxū i tacūma i chixexūgū rū aixcūma Tupanagu tarūxīnūē rū meā naxcēx tamaxē, erū ngexwacaxūxū i norū duūxūgū tixīgū. ⁹ Nūxīraūxū ga chorū poperawa rū pemaā nūxū chixu na tama natanūgu pexāgūxū i ngēma duūxūgū i naī i ngemaā naxūneārū ngúchaū ūgūxū. ¹⁰ Natūrū yexguma yema ñachagu pexū, rū tama pemaā nūxū chixu na nūxna pixīgachitanūxūchixū i ngēma duūxūgū i tama yaxōgūxū i naī i ngemaā maxēmarexū, rū ēxna ngēma duūxūgū i guxūma i tacū nūgūna nugūchaūgūxū, rū ēxna ngītēēxgūxū, rū ēxna ngēma duūxūgū i tupananetachicūnēxāxū icuēxūgūxū. Erū ngēxguma chí naxchaxwa ípechoūxgu i ngēma duūxūgū, rū chí taxucūrūwa i ñoma i naānewa pengēxmagū. ¹¹ Natūrū yexguma pemaā nūxū chixuxgu na tama natanūgu pexāgūxū i ngēma duūxūgū i chixri maxēxū, rū nachiga chidexa i ngēma duūxūgū i nūgū ixugūxū na peeneēgū i yaxōgūxū na yixīgūxū natūrū naī i ngemaā maxēxū, rū ēxna aūexū, rū ēxna tupananetachicūnēxāxū icuēxūgūxū, rū ēxna oregūtēēxgūxū, rū ēxna ngāxēwēxegūxū, rū ēxna ngītēēxgūxū. Rū ngēma duūxūgū nixī i pemaā nūxū chixuxū na tama namexū na natanūgu pexāgūxū rū bai i namaā na pechibūexū. ¹²⁻¹³ Erū tama choxmēxwa nangēxma na nūxna chaçaxū i ngēma duūxūgū i tama Tupanaāxū yaxōgūxū. Rū Tupana tá nixī ya nūxna çacū i ngēma duūxūgū. Natūrū i pema rū pemēxwa nangēxma na nūxna peçaxū i ngēma peeneēgū i yaxōgūxū i tama meā maxēxū. Rū name nixī i petanūwa ípenamuxūchi i ngēma duūxū i chixri maxūxū.

6

Ngēxguma tacū rū guxchaxū tūxū ngēxmagu taeneēmaā, rū tama name i āēxgacūgū i tama yaxōgūxūpēxewa tayamexēē i ngēma

¹ Rū ngēxguma wūxie i pema pexū nangēxmagu i tacū rū guxchaxū i wūxi i peeneē i yaxōxūmaā, Ĵrū tūxcūū wūxi i āēxgacū i tama yaxōxūārū ngūxēēcēx ípeyaca na nūma pexū namexēēāxūcēx i ngēma perū guxchaxūgū? ĴRū tama ēxna inamexū i ngēma peeneēgū i yaxōgūxū na namexēēgūxū i ngēma perū guxchaxūgū? ² ĴTama ēxna nūxū pecuēx na yixima na yaxōgūxū tá yīixū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīixū i ñoma i naānecūāx i duūxūgūxū picagūxū, Ĵrū tūxcūū taxucūrūwa i pematama penamexēē i ngēma perū guxchaxūgū i Írachiréxū? ³ ĴTama ēxna nūxū pecuēx rū woo ngēma daxūcūāx i Tupanaārū orearū ngeruūgū, rū yixima tá yīixū i nūxū icagūxū? Rū ngēmacēx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmagūxū. ⁴ Rū ngēmacēx, ngēxguma tacū rū guxchaxū pexū ngēxmagu i ñoma i naānewa, Ĵrū tūxcūū i ngēma āēxgacūgū

i tama yaxōgūxūxtawa pegū ípeyaxuaxūgūxū na pexū namexēēgūāxūcèx i ngēma? ⁵ Rū pemaā nūxū chixu i ngēma ore na pexāneēxūcèx. ¿Ēxna tataxuma i petanūwa ya wūxie ya nūxū cuáxe na tanamexēēxū i ngēma guxchaxūgū i petanūwa ngēmaxū? ⁶ Rū tama pegūmaā penuēxīcatama, natūrū naētū rū āēxgacūgū i tama yaxōgūxūxtawa pexī na penamexēēxūcèx i ngēma perū guxchaxūgū. ⁷ Rū ngēma na pegūmaā penuēxū, rū ngēma rū poraācū chixexū nixī. ¿Rū tūxcūū tama yaxna namaā pexīnūē i ngēma guxchaxūgū i peeneē pemaā ūxū? ¿Rū tūxcūū tama namaā peporae ega texē perū tacūcèx ngīxgux? ⁸ Natūrū i pema rū poraācū chixexū pexūe, erū woo peeneēgū i yaxōgūxūāxū rū ta pengix. ⁹⁻¹⁰ ¿Tama ēxna nūxū pecuèx na ngēma duūxūgū i chixexū ūgūxū rū nataxuxūtāma i nachica i ngextá Tupana āēxgacū íyīxūwa? ¿Rū tama name i pegūtama pewomūxēēgū! Erū ngextá Tupana āēxgacū íyīxūwa rū nataxūtāma i nachica i ngēma duūxūgū i naī i ngēmaā ípexū, rū ngēma duūxūgū i tupananetachicūnēxāxū icuèxūūgūxū, rū ngēma duūxūgū i naxmēxēchita rū ēxna nateechita ngēāēxū, rū ngēma yatūgū i naxrūū yatūxūmaā ngēāēxū, rū ngēma ngītēēxgūxū, rū ngēma duūxūgū i nūgūnaxica nanuxūchixū i norū ngēmaxūgū, rū ngēma duūxūgū i ngāxewēxegūxū, rū ngēma duūxūgū i oregūtēēxgūxū, rū ngēma duūxūgū i womūxēēwēxegūxū. Rū guxūma i ngēmagū rū nataxūtāma i nachica i ngextá Tupana āēxgacū íyīxūwa. ¹¹ Rū yexgumarūtāma pixīgū ga űuxre ga pema ga űpax. Natūrū i űuxma ya Tupana rū marū pexū ínanapi i perū chixexū na noxrūxīcatama pixīgūxūcèx. Rū űuxma rū aixcūma napēxewa pime yerū Naāē i Ūūnexū rū tórū Cori ya Ngechuchu ya Cristuégagu marū perū pecaduna pexū inanguxūxēē.

Ñuxācū naxūine i taxūne

¹² Rū űuxre i pema rū űaperūgūgū:

“Rū marū name na chanaxūxū i ngēma chanaxwēxexū”, űaperūgūgū. Rū aixcūma nixī i ngēma, natūrū tama guxū i ngēma ixūgūxū rū tūxū name. Rū aixcūma nixī i Tupana choxū ínguxuchixēēxū na chanaxūxūcèx i ngēma chanaxwēxexū, natūrū tama name na tacū rū chixexūgu chaugū changuxēēxū na chomaā inacuáxūcèx. ¹³ Rū ngēxgumarūū ta rū űuxre i duūxūgū rū űanagūrūgū:

“Rū ōna rū taxūnecèx nixī, rū taxūne rū ōnacèx nixī”, űanagūrūgū. Rū aixcūma ngēmaācū nixī, natūrū ya Tupana rū tá inayanaxoxēē i guxūma i ngēma. Rū taxūne rū tama naī i ngēmaā namaā na ingēāmarexūcèx nixī. Erū taxūnemaā nixī i naxūxū i tórū Coriarū ngúchaū. Rū tórū Cori nixī ya taxūnexū maxēēcū. ¹⁴ Rū yema Tupana wena namaxēēxūrūū ga tórū Cori ya Ngechuchu, rū ngēxgumarūū tá ta norū poramaā wena tūxū namaxēēē. ¹⁵ ¿Rū tama ēxna nūxū pecuèx na ngēma pexene rū Cristuarū na yīxū? ¿Rū űuxācū i ngēma chaxune i Cristuarū ixīxū rū ngexū i ngēāēxūmaā inapexū? Taxucūrūwama ngēmaācū nixī. ¹⁶ ¿Rū ēxna tama nūxū pecuèx ega wūxi i ngexū i ngēāēxūmaā inapexgu ya wūxi ya yatū rū ngēma taxre i naxūne rū wūxitama i naxūne yīxū? Erū Tupanaārū ore i ūmatūxūwa rū űanagūrū: “Ngēma taxre i naxūne rū wūxitama i naxūne tá nixī”,

űanagūrū. ¹⁷ Natūrū ngēxguma wūxi i duūxū rū tórū Cori ya Cristuaxū yaxōxgu, rū ngēma naāē i ngēma duūxū rū Cristuāēmaā wūxigutama narūxīnūē. ¹⁸ Rū ngēmacèx name nixī na nūxū perūxoxēxū i pexeneārū ngúchaū na pexūxū. Rū guxūma i togū i pecadu i wūxi i duūxū ūxū rū tama naxūnexū nachixexēē. Natūrū ngēma na naī i ngēmaā nangēāēxū

rū ngēma waxi nixī i naxūnexū chixexēēxū. ¹⁹ ȷTama ēxna nūxū pecuèx i pexene rū Tupanaāē i Ūūnexūpata na yīxū? Rū pegu nixī i naxāchiūxū i ngēma Naāē i Ūūnexū i Tupana pexna muxū. Rū ngēmacèx i pema rū tama pegūarū yoratama pixīgū. ²⁰ Erū Tupana rū marū pexcèx nataxe rū poraācū nūxū petatanū. Rū ngēmacèx penaxwēxe i ngēma pexenemaā meā Tupanacèx pemaxē na ngēmaācū namaā penataxēēxū ya Tupana.

7

Ucuxēgū i āmèxchiga

¹ Rū űuxma rū tá pexū changāxū ga yema āmèxchiga ga choxna naxcèx pecaxū ga perū poperawa. Rū narūmemaē chi nixī i noxtacūma tama naxāmax ya yatū. ² Natūrū ngēma na naxūneārū ngūchaū na naxūgūmarexū i duūxūgū, rū narūmemaē nixī i wūxichigū ya yatū rū na naxāmaxū, rū wūxichigū i nge rū na naxātēxū. ³ Rū yima yatū ya āmacū rū taxucūrūwama naxmèxna nūgū ninuxū. Rū ngēma nge i ātecū rū taxucūrūwama ngītena ngīgū iyanuxū. ⁴ Erū ngēma nge i ātecū rū tama ngīgūxūneārū yoratama iyixī, erū ngīte nixī ya ngīxīneārū yora ixīcū. Rū ngēxumarūū ya ngīte rū tama nūgūxūneārū yora nixī, erū naxmèx iyixī i naxūneārū yora ixīcū. ⁵ Rū tama name i wūxi ya yatū rū namèxna nūgū ninuxū, rū ēxna wūxi i ngecū rū ngītena ngīgū iyanuxū, ega tama nūgūmaā namexēēāgu na űuxre i ngunexū tama nūgūmaā namaxēxū naxcèx na nayumūxēgūxū. Rū ngēmawena rū name nixī na wenaxārū noxrirūū nūgūmaā namaxēxū na tama Chatanā nūxna űnūxūcèx na chixexūgu nayixēēāxūcèx. ⁶ Rū guxūma i űnā ore i pemaā nūxū chixuxū i āmèxchiga rū ātechiga rū tama wūxi i mu nixī i ngēma. Natūrū pemaā nūxū chixumare na nūxū pecuāxūcèx na namexū i ngēmaācū na penaxūxū. ⁷ Rū chomatama nagu charūxīnū rū chierū name nixī ega choma chamaxūxūū namaxēgu i guxūma i duūxūgū. Natūrū Tupana rū wūxichigū i duūxūna nanaxā i nacūma na űuxācū namaxēxūcèx rū űuxācū nagu naxīnūxūcèx. Rū ngēmacèx tama guxāma tawūxigu. ⁸ Rū ngēma ngemèxgūxū rū ngetegūxū rū yutegūxū rū namaā nūxū chixu rū narūmemaē nixī i chauxrūū tama naxāmèx rū tama naxāte. ⁹ Natūrū ngēxguma wūxi i duūxū taxucūrūwa naxūneārū ngūchaūmaā naporagu, rū name nixī na naxāmaxū rū ēxna naxātēxū. Erū narūmemaē nixī i noxtacūma naxāmèx rū ēxna naxāte na tama ngema norū ngūchaūgagu dūxwa chixexūgu nangūxūcèx. ¹⁰ Natūrū yīxema marū āmaxē rū ātexe, rū tūmamaā nūxū chixu na tama namexū na tūmatēxū na itatāxū. Rū ngēma mu rū tōrū Coriarū mu nixī, rū tama choxrū nixī. ¹¹ Natūrū ngēxguma chi ngūrūāchi wūxi i ngexū natēxū itēxgu, rū name nixī i noxtacūma nangete rū ēxna wena natecèx nataegu. Rū ngēxumarūū ta ya yatū rū tama name i namēxū űnatēx. ¹² Rū űuxma rū choxū nangēxma i wūxi i ore i tūmacèx ya yīxema āmaxē ngīmaā i wūxi i nge i tama yaxōxcū. Rū ngēma ore rū choxrūtama nixī rū tama tōrū Coriarū nixī. Rū ngēxguma wūxi ya yatū ya ōcū ngīmaā āmaxgu i wūxi i nge i tama yaxōxcū, rū tama name i ngīxū űnatēx, ega ngīma rū aixcūma namaā naxātechaūgu. ¹³ Rū ngēxguma wūxi i nge i yaxōxcū ātegu namaā ya wūxi ya yatū ya tama yaxōcū, rū tama name i űnatēx ya yima ngīte ega nūma ya yima yatū rū aixcūma ngīmaā naxāmèxchaūgu. ¹⁴ Rū yima yatū ya tama yaxōcū, rū namèx i yaxōxcūgagu Tupana nūxū nacuèx. Rū ngēma ngecū i tama yaxōxcū, rū ngīte ya yaxōcūgagu Tupana ngīxū nacuèx. Erū ngēxguma chi tama ngēmaācū yixīgu, rū chi ngēma naxācūgū rū duūxūgū i

tama yaxōgūxūācūgūrūū tā nixīgū. Natūrū i űuxma ya naxācūgū rū marū Tupana tūxū nacuēx. ¹⁵ Natūrū ngēxguma yima yatū ya tama yaxōcū rū namēxū īnatāxchaūgu rū jnoxtacūma ngīxū īnatā! Rū ngēxgumarūū ega ngēma ngecū i tama yaxōcū rū ngītexū īnatāxchaūgu, rū jnoxtacūma ngītexū īnatā! Rū ngēxguma ya yima yatū ya yaxōcū rū marū name ega wena naxāmēxgu. Rū ngēma ngecū i yaxōcū rū marū name ega wena naxātegu. Erū Tupana pexū nade na pegū pengechaūgūxūcēx. ¹⁶ Rū ngēmacēx, Pa Ngecū i Tupanaāxū Yaxōxcūx, rū ngēxguma cute i tama yaxōxū cuxū ītāxchaūgu, namē nixī i tama cunachūxu, erū tama nūxū cucuēx ngoxi tā nūxū cuyaxōxēē i ngēma cute rū ēxna tama. Rū cumax, Pa Yatū ya Yaxōxcūx, rū ngēxguma cuxmēx i tama yaxōxū cuxū ītāxchaūgu, rū name nixī i tama cunachūxu, erū tama nūxū cucuēx ngoxi tā ngīxū cuyaxōxēē i ngēma cuxmēx rū ēxna tama. ¹⁷ Rū űuxma rū pemaā nūxū chixu rū nūma ga Tupana rū wūxichigū ga duūxēna nanaxā ga tūmaārū cuēx na tūmaārū maxūmaā itacuāxūcēx rū meā tanaxūxūcēx i ngēma puracū ga noxri tūxū yexmaxū ga tauta Tupana tūmacēx caxgu. Rū ngēma ngūxēētae nixī i namaā chanangūexēēxū i guxūma i yaxōgūxū i wūxichigū ya tupaucawa ngēxmagūxū. ¹⁸ Rū ngēxguma Tupana naxcēx caxgu i wūxi i duūxū i marū Yudiugūrūū īwiechēxmūpēxechiraūxū, rū nūētama nixī ega ngēmaācūtama yixīgu. Rū ngēxguma Tupana nayaxūgu i wūxi i duūxū i tama īwiechēxmūpēxechiraūxū, rū nūētama nixī ega ngēmaācūtama yixīgu. ¹⁹ Erū Tupanapēxewa rū nūētama nixī ega wūxi i duūxū rū īnawiechēxmūpēxechiraūgu rū ēxna tama. Erū ngēma Tupana aixcūma naxwēxexū nixī na naga naxīnūxū i wūxichigū i duūxū. ²⁰ Rū wūxichigū i duūxū rū name nixī i nawatama napuracū ga yema puracū ga nūxū yexmaxū ga yexguma Tupana noxri naxcēx caxgu. ²¹ Rū yexguma wūxi ga coriarū duūxū quixiyane Tupana cuxcēx caxgu, rū tama name i ngēmacēx cuxoegaāē. Natūrū ngēxguma cuxū natauxchagu na nūxna īcunguxuchixū i ngēma cori, rū marū name na īcunguxuchixū. ²² Rū cuma ga na cucoriāxyane cuxcēx naçaxū ga Tupana, rū name nixī i nūxna cucuēxāchi na Cori ya Cristu pecaduwa cuxū īnguxuchixēēxū. Rū cuma ga na cungearū coriāxyane cuxcēx naçaxū ga Tupana, rū name nixī i nūxna cucuēxāchi na tōrū Cori ya Cristuarū duūxū quīxū i űuxma na nūxū cupuracūxūcēx. ²³ Tupana rū marū pexcēx nataxe rū poraācū nūxū petatanū. jRū ngēmacēx i űuxma rū tāūtāma naga pexīnūē i ngēma duūxūgū i wenaxārū űoma i naāneārū chixexūwa pexū gagūchaūxū! ²⁴ Rū name nixī, Pa Chaueneēgūx, i wūxichigū i pema rū meā Tupanapēxewa penaxūama ga yema puracū ga noxri pexū yexmaxū ga yexguma Tupana pexcēx caxgu. ²⁵ Rū űuxma rū tā pemaā nūxū chixu i nachiga i ngēma duūxūgū i ngemēxgūxū rū ngetegūxū. Rū tōrū Cori ya Ngechuchu rū taxuūma i mu choxna naxā i ngēmachiga. Natūrū tā pemaā nūxū chixu i űuxācū nagu charūxīnū i ngēmachiga. Rū ngēma chorū ore rū aixcūma nixī erū choma nixī i wūxi i duūxū ga nūxū changechaūtūmūūācūma choxū nayaxuxū ga tōrū Cori. ²⁶ Natūrū ngēma űuxma nūxū idauxū i guxchaxūgūgagu rū chauxcēx rū chi name i tama nixāmēx i ngēma yatūgū i ngemēxgūxū. ²⁷ Rū ngēxguma marū cuxāmēxgu rū tama name i ngīxū īcutēx. Natūrū ngēxguma cungeēmēxgu rū name i tama cuxāmēx. ²⁸ Natūrū ngēxguma cuxāmēxgu rū tama pecadu nixī i ngēma. Rū ngēxguma wūxi i paxū ātegu rū tama pecadu nixī i ngēma. Natūrū ngēma ixāmēxgūxū rū ixātegūxū rū tā nayexera i norū guxchaxūgū i űoma i naānewa, rū ngēma nixī i tama chanaxwēxexū na nūxū nangupetūxū. ²⁹ Pa Chaueneēgūx, pemaā nūxū chixu

rū tama muxū i ngunexū tūxū nangēxma na naxūxūcēx i Tupanaārū puracū. Rū ngēmacēx ya yīxema ixāmēxgūxe rū name nixī i meā tanaxūgū i Tupanaārū puracū ñoma tangemēxgūxūrū. ³⁰ Rū yīxema ngexwaca yutanūgūxe rū yīxema peta ūgūxe rū yīxema itaxegūxe, rū tama name i ngēmacēx Tupanaārū puracū na itangēxgūxū. ³¹ Rū yīxema tūxū nangēxmaxē i tūmaārū ngēmaxūgū i ñoma i naānewa, rū tama name i ngēmacēx Tupanaārū puracū na itangēxgūxū. Erū ñoma i naāne i ñuxma nūxū idauxū rū paxa tā nagux. ³² Rū tama chanaxwēxe na ſacūcēx pexoegaāēgūxū. Rū ngēxguma wūxi i yatū ngemēxgu, rū Tupanaārū puracūgu narūxīnū rū nagu narūxīnū na ñuxācū Tupanaārū ngūchaū naxūxū. ³³⁻³⁴ Natūrū ngēxguma naxāmēxgu ya wūxi ya yatū, rū ñoma i naāneārū ngēmāxūgu narūxīnū rū nagu narūxīnū na ñuxācū namēxū nataāxēxū. Rū ngēmaācū muxūgū narūxīnū. Rū ngēxgumarūū ta nixī i ngexūgū. Rū ngēma ngexū i ngetexū rū Tupanaārū puracūgu narūxīnū, erū marū Tupanana nūgū naxā rū guxū i naxūnemaā rū naāēmaā naxcēx namaxū. Natūrū ngēma ngexū i ātexū rū ñoma i naāneārū ngēmāxūgu narūxīnū, rū nagu narūxīnū na ñuxācū natexū nataāxēxū. ³⁵ Rū perū mexūcēx nixī i pemaā nūxū chixuxū i ngēma, rū tama pexna na chanachuxuxūcēx nixī. Natūrū ngēma ñacharūgū na meā pemaxēxūcēx rū aīxcūma penaxūcēx i tōrū Coriārū puracū. ³⁶ Rū ngēxguma texē nagu rūxīnūgu na tūmaxācū rū marū na napaxū, rū tūmacēx namexgu na naxātexū, rū marū name i ngīxū taxūte ega aīxcūma tūmacēx namexgu. Rū ngēma na naxātexū i tūmaxācū rū tama pecadu nixī. ³⁷ Natūrū ngēxguma wūxi i yatū nūxū nangēxmagu i norū pacū rū tama nanaxwēxegu na ngīxū naxūtexū, rū ngēma rū ta marū name. Erū naxmēxwa ingēxma rū taxucēxma texē tanachixewe na ngīxū naxūtexūcēx. ³⁸ Rū ngēmawa nūxū tadau rū ngēma yatū i naxācū ngīxū ūtexū rū mexū naxū. Rū ngēma yatū i tama naxācū ngīxū ūtexū rū yexeraxū i mexū naxū. ³⁹ Rū wūxi i nge i ātecū rū ngītemēxēwa ingēxma i ngēxguma namaūxgu ya ngīte. Natūrū ngēxguma nayuxgu ya ngīte, rū marū name ega to i yatū i ngīma ngīxū ngūchaūxūmaā naxātegu. Natūrū inaxwēxe na wūxi ya yatū ya yaxōcūmaā naxātexū. ⁴⁰ Natūrū chauxcēx rū yexeraācū chi itaāē i ngēxguma chi tāū chima wena naxātegu. Rū ngēma ore rū choxrūtama nixī, natūrū nagu charūxīnū rū Tupanaāē i Ūīnexūārū īnū ta nixī.

8

Tupananetachicūnēxāgūna naxuaxūgūxū ga ōnachiga

¹ Ñuxma rū tā pemaā nūxū chixu i nachiga i ngēma ōnagū i ngēma duūxūgū i tama Ngechuchuauxū yaxōgūxū norū tupananetachicūnēxāgūna uaxūgūxū. Rū aīxcūma nixī i wūxichigū i yīxema i meāma nūxū icuāxū i ngēmachiga. Natūrū ngēma nūxū na icuāxūgagu rū ñuxguacū rū yigū namaā ticuēxūxū. Natūrū ngēma na yigū ingechaūxū rū tūxū narūngūxēē na yexeraācū meā yaxōgūchigūxū. ² Rū ngēxguma chi texē nagu rūxīnūgu na ſacūxū tacuāxū, rū name nixī i nūxna tacuēxāchi na ngēxguma rū ta tama aīxcūma nūxū tacuāxū i guxūma i ngēma cuēx i aīxcūma ixīxū. ³ Natūrū ngēxguma texē aīxcūma Tupanaxū ngechaūgu, rū Tupana rū tūxū nacuēx ya yīxema. ⁴ Rū ngēma na nangōxū i ngēma ōnagū i tupananetachicūnēxāgūna naxuaxūgūxū i duūxūgū, rū meāma nūxū tacuēx na taxuwama namexū i ngēma tupananetachicūnēxāgū erū tama aīxcūma Tupanaxūchi nixīgū. Erū wūxixicatama nixī ya aīxcūma Tupana ixīcū, rū nataxuma ya naī. ⁵ Rū woo duūxūgū nagu narūxīnūe rū nangexma i muxūma i tupanagū i ñoma i naanewa

rū dauxūguxū i naanewa, natūrū taxcèx rū tama ngemaācū nixī. ⁶ Erū yixema nūxū tacuèx na wūxitama yixīxū ya Tupana ya Tanatū ixīcū. Rū nūma ya Tanatū nixī i naxūāxū i guxūma i řacū i ngèxmaxū, rū naxcèx nixī i imaxèxū i yixemax. Rū ngèxgumarūū ta nangèxma i wūxitama ya tórū Cori ya Ngechuchu ya Cristu. Rū yimagagu nixī na nangèxmaxū i guxūma, rū yimagagu nixī i tūxū nangèxmaxū i maxū. ⁷ Natūrū tama guxūma i yaxōgūxū nūxū nacuèx na nangèxmaxū ya wūxitama ya Tupana rū wūxitama ya tórū Cori. Rū űuxre i nūmagū ga űpa rū nūxū nayapue na nūxū yaxōgūāxū i ngēma tupanetachicūnèxāgū, rū űuxma rū ta tama aixcūma nūxū nacuèxgū i ngēma mexū i Tupana nūxū naxwèxexū. Rū ngēmacèx nixī i űuxma i nagu naxīnūèxū na chixexū naxūgūxū i ngèxguma nangōxgūāgu i ngēma naxūnamachi i togū i duūxūgū norū tupanetachicūnèxāgūma uaxūgūxū na nūxū namaā yacuèxūūgūxūcèx. ⁸ Rū yixema nūxū tacuèx na tama řacū rū namachi na ingōxūgagu yīxū na Tupana tūxū dexū. Rū tāūtāma yexera time i napèxewa ega nangōxgūgu i ngēma namachi. Rū tāūtāma yexera tichixe i napèxewa ega tama nangōxgūgu. ⁹ Natūrū i pema i nūxū na pecuāxū na tama pecadu yīxū na nangōxū i ngēma namachi, řrū pexuāègū erū ngūrūāchi ngēma na pengōxūgagu chixexūgu tá penayixēē i ngēma peeneègū i tauta aixcūma meā nūxū cuèxgūxū na řacū yīxū i Tupana nūxū naxwèxexū! ¹⁰ Erū cuma na meā Tupanaxū cucuāxū, rū ngèxguma chi cunangōxgu i ngēma namachi i ngextā tupanetachicūnèxāgūxū iyacuèxūūgūxūwa, rū ngūrūāchi wūxi i cueneē i tauta meā Tupanaxū cuāxū tá cuxū nadau. Rū ngūrūāchi nūma rū tá ta nanangōx i ngēma namachi woo naāèwa nagu naxīnūgu na wūxi i chixexū yīxū na nangōxū i ngēma namachi. ¹¹ Rū ngēmaācū i cuma na meā Tupanaxū cucuāxū, rū tá icuyanatauxēē i ngēma cueneē i Cristu naxcèx yuxū i tauta meā Tupanaxū cuāxū. ¹² Rū ngēmacèx i ngèxguma chixexūgu cunanguxēèxgu i ngēma cueneē i tauta meā Tupanaxū cuāxū, rū Cristumaā rū ta chixexū cuxū. ¹³ Rū ngēmacèx i ngèxguma ngēma namachi i changōxūgagu chixexūgu chananguxēèxgu i chaueneē, rū narūmemaē nixī i noxtacūma taguma namachi changōx na tama pecadugu chananguxēèxūcèx i ngēma chaueneē.

9

Yixema Cristu tūxū muxē na nūxū tapuracūxūcèx, rū tūxna naxū i tūmaārū natanū

¹ Rū pemaā nūxū chixu rū tórū Coritama nixī ya choxū yaxucū rū choxū mucū na norū puracū chaxūxūcèx, rū ngēmacèx taxuūma i duūxūgūmèxèwa changèxma i űuxmax. Rū chomatama chauetūmaā tórū Cori ya Ngechuchuxū chadau, rū ngēma puracū i nūxū chaxūxūgagu nixī i peyaxōgūxū i pemax. ² Rū woo togū i duūxūgū tama choxū cuèxgūchaūgu na tórū Cori choxū muxū, natūrū i pema rū meāma nūxū pecuèx na nūma yīxū ga choxū namuxū. Yerū chauxūtawa nixī ga tórū Coriaxū peyaxōgūxū, rū ngēmawa nūxū pecuèx na aixcūma yīxū na nūma choxū namuxū. ³⁻⁴ Rū űaā nixī i chorū dexa i namaā chanangāxūxū i ngēma duūxūgū i chauchiga idexagūxū:

“ĴĒxna tama name na duūxūgū choxna naxāxū i chorū ðna rū chorū axexū naxcèx i chorū puracū? ⁵ ĴĒxna tama inamexū ta na wūxi i ngexū i yaxōxūmaā na chaxāmaxū na chayagaxūcèx ngèxgumarūū na naxāmaxū i Pedru, rū naēneègū ya tórū Cori, rū ngēma togū i yatūgū i Tupana

imugūxū? ⁶ ĶRū ěxna pema nagu perūxīnūēgu rū choma rū Bernabéxicatama i tama namexū na toxū perūngūxēēgūxū ngēma togū i orearū uruūgūxū na perūngūxēēgūxūrū? ⁷ ĶTacū rū duūxū i churarawa ūxū i nūgūxūltama naxūtanūxū i norū ōna? ĶRū tacū rū duūxū i orix itoxū i tama namūxū i norū o? ĶRū tacū rū duūxū i carnerugūna dauxū i tama nagūnenixū ne ixaxūxū?" Ngēma űacharūgū nūxū i ngēma duūxūgū i chauchiga idexagūxū. ⁸ ĶRū űuxma rū tāūtāma nagu perūxīnūē na chorū orexicatama yīxū i űaā nūxū chixuxū! Erū Tupanaārū ore ga Moīché ūmatūxūwa rū ta ngēma űanagūrū. ⁹ Erū ngēma ore rū űanagūrū:

"ĶRū ngēma woca i aruchuarū putēxewa puracūxū, rū tāūtāma cunawēxnagu na tama yima aruchua naxibūxūcēx!"

űanagūrū i ngēma ore. Rū nūxū tacūx na tama wocagūgu naxīnūxū ga Tupana ga yexguma yema űaxgu. ¹⁰ Natūrū pemaā nūxū chixu rū tagu nixī ga naxīnūxū ga yexguma yema űaxgu ga Tupana. Rū tachiga nixī ga naxūmatūxū ga yema ore. Erū yīxema aruchunecū ūxe rū yīxema norū oarū puxwa puracūxe, rū ngēxguma tapuracūeyane rū tanaxwēxegū na itananguxēēgūxū i ngēma norū o i tūxna ūxū. ¹¹ Rū toma rū wūxi ya nanetūchire ya itatoxūnerū tixīgū ga yexguma pemaā nūxū tixuxgu ga Tupanaārū ore. ĶRū űuxma rū tama ěxna i pexcēx namexū na toxna penaxāxū i tacū i toxū taxuxū? ¹² Rū ngēxguma ngēma togū i orearū uruūgū petanūwa nayauxgūgu i ngēma nūxū taxuxū, rū maneca toma rū yexera name nixī i petanūwa tanayaxu i ngēma toxū taxuxū. Natūrū i toma rū tama ngēmaācū tanaxū. Erū toma rū guxū i guxchaxūmaā taporae na tama pexū tanaguxchaxēēxūcēx na Cristuaxū peyaxōgūxū. ¹³ Pema nūxū pecūx rū guxūma i duūxūgū i tupauca ya taxūnewa puracūxū, rū ngēma ōna ya yima tupaucawa ngēxmaxūltama nangōxgū. Rū ngēma duūxūgū i tupaucagu Tupanacēx naxūnagū dējxū, rū nanade i űuxre i ngēma namachi norū ngōxruū. ¹⁴ Rū ngēxgumarū ta ya yīxema nūxū ixugūxe i ore i tūxū maxēxēēxū, rū tōrū Cori nūxū nixu rū name nixī i tanayauxtanū i ngema tūmaarū puracū. ¹⁵ Natūrū i choma rū taguma ngēmaācū chanaxū. Rū űuxma na pexcēx chanaxūmatūxū i űaā popera, rū tama tacū choxna pexāxūcēx nixī. Erū ngēma na taguma texēxūtawa tacūcēx íchaxaxū, rū wūxi i chorū taāē nixī. Rū narūmemaē chierū nixī na chayuxū naxūpa na texē choxna nayaxuxū i űaā taāē i choxū ngēxmaxū. ¹⁶ Rū űuxma na nūxū chixuxū i ngēma ore i tūxū maxēxēēxū, rū taguma ngēmacēx chaugū chicuēxū. Erū woetama ngēma nixī i chorū puracū ga Tupana choxna āxū, rū ngēmacēx taxacūrūwama chanangexrū. Erū poraācū chi chachixēxūgu i ngēxguma tāū chima nūxū chixuxgu. ¹⁷ Rū ngēxguma chi chaugagu chitama chanaxūxgu i ngēma puracū, rū nagu chi charūxīnū na choxū naxātanūxū. Natūrū ngēxguma Tupana choxū muxūācūma chanaxūxgu, rū chanaxūama erū woetama ngēma nixī i chorū puracū ga Tupana choxna āxū. ¹⁸ ĶRū űuxma rū tacū tā nixī i chorū natanū naxcēx i ngēma puracū i chaxūxū? Rū dūcax, rū chorū natanū nixī i ngēma taāē i chayaxuxū i ngēxguma ngetanūācūma nūxū chixuxgu i ngēma ore i tūxū maxēxēēxū. Rū ngēmaācū woo Tupanapēxewa name na petanūwa chanayaxuxū i chorū natanū na ngēmamaā chamaxūxūcēx, natūrū taguma texena naxcēx chaca. ¹⁹ Rū woo taxūxēmēxēwa changēxma i chomax, natūrū guxāmēxēwa chaugū changēxmaxēē, na ngēmaācū yexeraācū muxūma i duūxūgū xū charūngūxēēxūcēx na Cristuaxū yaxōgūāxūcēx. ²⁰ Rū ngēxguma chautanūxū i Yudīgūtanūwa changēxmagu, rū namaā chaugū chawūxiguēē na ngēmaācū nūxū charūngūxēēxūcēx na Cristuaxū yaxōgūāxūcēx. Rū woo tama yema

Moīché ūmatūxū ga mugūtūūwa changēxmagu, natūrū chayanguxēēāma i ngēma mugū na ngēmaācū Cristuxūtawa chanagagūxū i ngēma duūxūgū i űuxma rū ta nagu īxū i ngēma mugū ga Moīché ūmatūxū. ²¹ Rū ngēxguma natanūwa changēxmagu i ngēma duūxūgū i tama Yudiūgū īxīgūxū, rū ngēma duūxūgūmaā chaugū chawūxīguxēē na ngēmaācū nūxū charūngūxēēxūcēx na Cristuaxū yaxōgūāxūcēx. Natūrū taguma īchanangēx i Tupanaārū mugū erū guxūguma Cristuarū mugūtūūwa changēxma. ²² Rū ngēxguma natanūwa changēxmagu i ngēma duūxūgū i tama poraācū Cristuchigaxū cuēxgūxū, rū choma rū ta ngēma duūxūgūmaā chaugū chawūxīguxēē, na ngēmaācū nūxū charūngūxēēxūcēx na Cristuaxū yaxōgūāxūcēx. Rū ngēmaācū guxūma i duūxūgūrūū chaugū chixīxēē, rū nagūxūraūācūma naxcēx chadau na ngēmaācū dūxwa Tupanaxūtawa chanagagūxūcēx i űuxre i nūmagū. ²³ Rū ngēmaācū nixī i chapuracūxū na guxūwama nanguxūcēx i ngēma ore i tūxū maxēxēēxū. Erū chanaxwēxe na choma rū ta choxū nangēxmaxū i ngēma maxū i taguma gūxū, naxrūū i guxūma i ngēma duūxūgū i nūxū yaxōgūxū. ²⁴ Pema rū meāma nūxū pecuēx i wūxi i inūca i nawa īfaāchixū rū muxūma īnaxūāchi, natūrū wūxīxīcatama nixī i ngēma nūxīra īnguxū rū nayaxuxū i norū āmare. Rū name nixī i pegūna pedau na Tupana pexna naxāxūcēx i ngēma perū āmare. ²⁵ Guxūma i ngēma duūxūgū i nūgū ngūxēēxū naxcēx i wūxi i inūca na togegūxū naporamaexūcēx, rū meā nūgūna nadaugū na ngēmaācū nayauxgūāxūcēx i norū āmare i paxaāchirūū īxīxū. Natūrū yixema na yaxōgūxū rū yigūna tadaugū na meā naxūgūxūcēx rū meā īmaxēxūcēx na nayauxgūxūcēx i tōrū āmare i taguma gūxū. ²⁶ Rū ngēmacēx i choma rū tama űoma chauechitamare chīnaxūrūū chixī, rū tama űoma űacū i nūgū dēixū i ngūrūanegumare īdagūxūrūū chixī. ²⁷ Rū ngēmacēx meā chaugūmaā īchacuēx na taxūma i chaxoneārū ngūchaū chaxūxūcēx. Erū tama chanaxwēxe i mexūmaā togūxū changuxēēchirēxācūma chixexū chaxū rū ngemagagu tama chanayaxu i chorū āmare.

10

Nayaxucūxēgū na tama nūxū yacuēxūūgūxūcēx i tupananetachicūnēāgū

¹ Pa Chaueneēgūx, chanaxwēxe i nūxna pecuēxāchie ga űacū nūxū na ngu-petūxū ga yema nuxcūmaūgūxū ga tōrū oxīgū ga Moīchéwe rūxīxū. Rū pema nūxū pecuēx rū yexguma nawe naxīxgu rū wūxi ga caixanexū napēxegu nixū rū nayadūxū. Rū guxūma ga yema duūxūgū rū wūxīgu Moīchémaā natūūgu nixīxūtanū. Rū yexgumarūū ta Moīchémaā nawa nichoū ga yema Taxtū ga Dauchiūxū. ² Rū guxūma ga yema duūxūgū rū yexguma wūxīgu Moīchémaā yema caixanexūpechitatūūgu yaxīxūtanūgu rū yema Taxtū ga Dauchiūxūwa yachoūgu, rū yemaācū nūgū nangoxēēgū na Moīchéweama naxīxū. ³ Rū yexgumarūū ta ga guxūma ga yema duūxūgū nanangōxgū ga yema pāu ga daxūwa rūyīxū. ⁴ Rū guxūma ga yema duūxūgū nayax-xgū ga yema dexá ga Cristu nūxna āxū. Yerū Cristu rū yema duūxūgūxū īnixūmūcū ga yema īnaxīūwa, rū nūxna nanaxā ga yema dexá ga yax-xgūxū. ⁵ Natūrū narūmumaē ga yema duūxūgū ga tama Tupanaārū ngūchaū ūgūxū. Rū yemacēx ga yema duūxūgū rū yexma nayue rū yēma nawogū ga naxūnegū ga dauxchitawa ga taxūema īxāpataxūwa. ⁶ Rū guxūma ga yema nangupetū na tōrū cuēxruū yīxūcē rū tama tōrū oxīgūrūxū chixexūcēxama

idaugūxcēx. ⁷ Rū ngēmācēx tama name i nūxū picuēxūūgū i tacū rū tupanetachicūnēxāgū, yexgumarūū ga űuxre ga nūmagū naxūgūxūrūū. Erū Tupanaārū ore i űmatūxūwa rū tōrū oxīgūchigaxū nixu rū űanagūrū:

“Rū duūxūgū űnarūtogū na nachibūexūcēx rū na naxaxegūxcēx, rū ngēmawena rū inachigū na űyayūxexūcēx”,

űanagūrū i ngēma ore. ⁸ Rū tama name i yixema rū naī i ngemaā itape yexgumarūū ga űuxre ga nūmagū naxūgūxūrūū. Rū yemācēx wūxitama ga ngunexūgu rū nayue ga 23,000. ⁹ Rū tama name i nūxū taxū ya tōrū Cori na űuxācū yaxna tamaā naxīnūxū yexgumarūū ga űuxre ga nūmagū naxūgūxūrūū. Rū yemācēx nixī ga yema duūxūgūxū nangōxcuxū ga āxtapegū rū nayuexū. ¹⁰ Rū tama name i chixexū Tupanamaā pixugū yema űuxre ga nuxcūmaūgūxū ga tōrū oxīgūrūū. Rū yemācēx ga Tupanaārū orearū ngerūū ga daxūcūāx rū nanadai. ¹¹ Rū guxūma ga yema nuxcūmaxūgūxū ga duūxūgūxū ngupetūxū, rū űomāxūcūū rū tōrū cuēxruū nixī. Rū naxūmatū na ngēmawa nūxū icuāxūcēx na űuxācū Tupana naxwēxexū na imaxēxū i yixema i űomaūcūū. ¹² Rū ngēmācēx ya yixema tūgūgu rūxīnūxē na taporaxū i Tupanapēxewa, rū name nixī na meā tūgūna tadauxū na tama chixexūgu tanguxūcēx. ¹³ Rū űuxma rū ta taguma pexcēx űnangu i ngūchaxū i chixexū i taxucūrūwama namaā yaxna pexīnūxū. Rū name nixī i Tupanana perūyoū erū nūma rū aixcūma nayanguxēē i ngema tamaā inaxunetaxū rū taxūtāma nawa pexū nawogū i ngūchaxūgū i taxucūrūwama yaxna namaā pexīnūxū. Natūrū ngexguma tā ngūchaxūgū i chixexū pexcēx űnguxgu rū nūma rū tā pexū űnapoxū na tama nagu peyixūcēx. ¹⁴ Rū ngēmācēx, Pa Chauenēgū ya Pexū Changechaūgūxex, űrū nūxū perūxoe i ngema nacūmagū i tupanetachicūnēxāgūcēx naxūgūxū i ngema duūxūgū i tama yaxōgūxū!

¹⁵ Pemaā nūxū chixu i ngēma ore, erū chauxcēx rū duūxūgū i nūxū cuāxū pixīgū. Rū pema tātama nagu perūxīnūē i ngēma pemaā nūxū chixuxū. ¹⁶ Rū ngēxguma űna i űūnēxūcēx űngutaquēxegūgu, rū yaxaxgūgu ya yima binu ya űūnecū rū moxē naxcēx ixāgūgu, rū ngēmaācū yīgū tangoxēē na Cristu ya taxcēx nagū ibacūwe rūxīxū. Rū ngēxguma nangōxgūgu i ngēma pāū i űbūcuxū, rū ngēmaācū yīgū tangoxēē na Cristu ya taxcēx naxūne ixācūwe rūxīxū. ¹⁷ Rū woo na imuxū i yixema, natūrū wūxitama i pāū tangōxgū. Rū ngēmaācū nixī i wūxitama ixīgūxū erū wūxiwetama tarūxī. ¹⁸ űRū dūcax i ngēma Yudiūgū i nangōxgūxū i ngēma naxūnamachi i Tupanacēx nadējūxū! Rū ngēxguma wūxigu nūgūmaā nangōxgūāgu, rū guxūma i ngēma nangōxgūxū rū ngēmaācū nūgū nangoxēē na wūxigu Tupanawe naxīxū. ¹⁹ Rū űuxma na ngēma űnaxaxū, rū tama chanaxwēxe i nagu perūxīnūē na naxūūnēxū i ngēma namachi i ngēma duūxūgū i tama yaxōgūxū norū tupanetachicūnēxācēx dējūxū. Rū tama chanaxwēxe i nagu perūxīnūē na tacūwa namexū i ngēma norū tupanetachicūnēxāgū, erū nangearū maxūāx. ²⁰ Natūrū pemaā nūxū chixu rū ngēxguma ngēma duūxūgū i tama Tupanaxū cuēxgūxū, norū tupanetachicūnēxācēx nadaiāgu i tacū rū naxūna, rū tama Tupanacēx nixī i nadaiāxū, natūrū ngoxogūcēx nixī i nadaiāxū. Rū tama chanaxwēxe i ngoxogūtanūxūxū pegū pixīgūxēē. ²¹ Rū pema na peyaxaxgūxū ya yima binu ya tōrū Corixū namaā picuēxūūgūcū rū taxucūrūwama namaā pexāmūcū i ngēma duūxūgū i Chatanāwe rūxīxū. Rū pema na tōrū Coriarū mechawa penangōxū i ngēma űna i nūxū namaā picuēxūūgūxū rū taxucūrūwama ngēma duūxūgū i Chatanāwe rūxīxūārū mechawa peyachibūe. ²² űRū űuxū űapegūxū i űuxmax? űĒxna penanuxēēchaū ya tōrū Cori? űĒxna pexcēx rū nūxū

tarūporamaēgū i yixemax?

Name nixī i taeneēarū mexūc èx tadaugū rū tama i tóxrūtama

²³ Pema rū ñaperūgūgū:

“Marū name na tanaxūxū i ñacū i tanaxwèxegūxū”, ñaperūgūgū. Rū aixcūma nixī i ngēma, natūrū tama tūxū name i guxūma i ngēma ixūxchaūxū. Rū ngēmaācū Cristu tūxū ñanguxūxēē na naxūxūcèx i ngēma inaxwèxexū, natūrū tama guxūma i ngēma ixūxū tūxū narūngūxēē na yexeraācū meā yaxōgūamachigūxūcèx. ²⁴ Rū tama name nixī i tóxrūtama mexūcèx tadaugū, natūrū name nixī i togūarū mexūcèx tadaugū. ²⁵ Rū marū name i penangōx i nagūxūraūxū i namachi i namaā nataxegūxū, natūrū taxucèxma tūxcūū naxcèx ípeca ngoxi marū tupananetagūxū namaā yacuèxūxūgūxū i namachi yixī. ²⁶ Erū ñoma i naāne rū guxūma i nawa ngēxmaxū, rū tórū Cori ya Tupanaarū nixī. ²⁷ Rū ngēxguma chi wūxi i duūxū i tama yaxōxū pexna uxgu na naxūtawa peyachibūexūcèx, rū chi ngēma pexīxgu, rū marū name i penangōx i guxūma i ñna i pepēxegu yaxūxūchixū. Rū taxucèxma tūxcūū naxcèx pexoegaāē rū nūxna peca na ngextā ne naxūxū i ngēma namachi i pemaā nangōxū. ²⁸ Natūrū ngūrūāchi wūxie tá pemaā nūxū tixu rū ñatarūgū:

“Ñāā namachi rū tupananetachicūnèxācèx yamèxgūxū i naxūnawa ne ūxū nixī”, ñatarūgū. Rū ngēxguma i pema rū tama name na penangōxū i ngēma namachi na tama chixexūgu tūxū penguxēēxūcèx ya yixema pemaā nūxū ixuxe, rū tama ngēmacèx taxoegaāēxūcèx i tūmax. ²⁹ Rū tama pechiga nixī i chidexaxū i ngēxguma:

“Na tama taxoegaāēxūcèx”, ñachagu. Natūrū yixema pemaā nūxū ixuxechiga nixī i chidexaxū. Natūrū bexmana ngūrūāchi wūxi i yaxōxū tá cuxna naca rū ñanagūrū tá cuxū:

“¿Tūxcūū i togū naxcèx oegaāēxūgagu choxna cunachuxu na tama chanaxūxū i ñacū i chanaxwèxexū? ³⁰ Rū ngēxguma chi Tupanana moxē chaxāxgu naxcèx i ngēma ñna i changōxū, ¿rū tūxcūū i ngēma ñnacèx choxū quixu?” ñanagūrū. ³¹ Dūcèx, pemaā nūxū chixu rū name nixī i guxūma i ngēma pexūxūmaā Tupanaxū picuèxūxūgū. Rū ngexguma ñacū pengoxgūgu rū exna ñacū pixaxgūgu rū ēxna ñacū i to pexūgūgu, rū name nixī i ngēmamaā Tupanaxū picuèxūxūgū. ³² Rū tama name i penaxū i ñacū i togūxū chixexūgu yixēēxū, rū woo Yudiugū yixīgūgu rū ēxna tama Yudiugū yixīgūgu, rū ēxna yaxōgūxū yixīgūgu. ³³ Rū choma rū guxūwama guxūxūma chataāēxēēchaxū. Rū ngemacèx tama chanaxū i ngema chomatama namaā chataāēxēxū, natūrū chanaxū i ngema togū namaā taāxēxū na ngemaācū nūmagū rū ta nuxū nangūchaxū na yaxōgūāxū rū nayauxgūāxū i maxū i taguma gūxū.

11

¹ Rū name nixī i nagu pexī i chaucūma ngēxgumarūū i choma na Cristucūmagu chixūxūrūū.

Name nixī i ngexūgū rū mexū i nacūmagu naxī

² Pa Chaueneēgūx, pemaā chataāē erū guxūguma chaugu perūxīnūē rū nagu pexī ga yema nguxēētae ga pexū changūexēēxū. ³ Natūrū chanaxwèxe i nūxū pecuèx na Cristu rū wūxichigū i yatūeru na yīxū. Rū yatūxūgū rū naxmèxēru nixīgū ngēxgumarūū ya Tupana rū Cristueru na yīxū. ⁴ Rū ngēmacèx i ngēxguma wūxi ya yatū ngutaquēxewa yumūxēgu rū ēxna Tupanaarū orexū yaxuxgu, rū tama ñangèxūchipatēxegu, rū ngēma rū wūxi

i chixexū nixī i Cristupēxewa naxūxū. ⁵ Natūrū ngēxguma chi wūxi i ngecū ngutaquēxewa yumūxēgu rū ēxna Tupanaārū orexū yaxuxgu, rū chi tama ngīgū natūerugu, rū ngēma rū wūxi i chixexū nixī i ngītepēxewa naxūxū. Rū űoma ngīgū yadūeruxūrū iyixī. ⁶ Erū ngēxguma chi tama ngīgū natūeruchaūgu, rū narūmemaē nixī i noxtacūma ngīgū ibēixeru. Natūrū ngēxguma chi wūxi i ngīrū āne yixīgu i ngēma na ngīgū nabēixeruxū rū ēxna ngīgū yadūeruxū, rū narūmemaē nixī i ngīgū itūeru. ⁷ Natūrū yatūgū rū tama name na nūgū natūerugūxū. Yerū ga Tupana rū nūgūraūācū nanaxū ga yatū rū Tupanachipeta nixī. Rū yima yatūwa nixī i nangóxū na űuxācū namexēchixū ya Tupana. Rū ngēma ngecūwa nixī i nangóxū na űuxācū namexū ya yatū. ⁸ Yerū yexguma noxri Tupana naxūxgu ga yatū, rū tama ngecūwa nixī ga naxūāxū. Rū ngīma waxi nixī ga yatūwa ngīxū naxūxū. ⁹ Rū yatūcēx nixī ga Tupana ngīxū ūxū ga ngecū, rū tama ngecūcēx nixī ga Tupana naxūxū ga yatū. ¹⁰ Rū ngēmācēx name nixī i ngīgū itūeru na duūxūgūpēxewa rū Tupanaārū orearū ngeruūgū i daxūcūāxgūpēxewa nangóxūcēx na ngītemēxēwa nangēxmaxū. ¹¹ Natūrū Tupanapēxewa rū taxuūma nixī ya yatū ega natauxgu i ngecū. Rū ngēxgumarūū ta i ngecū rū taxuūma iyixī ega natauxguma ya yatū. ¹² Yerū yexguma noxri Tupana ngīxū ūxgu ga ngecū, rū yatūwa nixī ga ngīxū naxūxū. Rū ngēxgumarūū ta ya yatū rū ngecūwa nixī i nabuxū. Natūrū Tupana nixī ya naxūcū i guxūma i duūxūgū. ¹³ Rū pematama tá penangugū rū ngoxi name na wūxi i ngecū rū tama ngīgū natūeruācūma nayumūxēxū. ¹⁴ Rū woetama tórū bucūma nixī i nūxū na icuāxū na wūxi i āne yīixū na nūgū namēxyaexēxū i wūxi i yatūxū. ¹⁵ Natūrū ngecūcēx rū wūxi i mexēchixū nixī na namēxyaexū. Erū Tupana rū ngīxna nanaxā i ngīyae na ngēmamaā ngīgū natūeruxūcēx. ¹⁶ Natūrū ngēxguma chi texē ngēmāchiga tūgū choxūgagūgu, rū name nixī i nūxū tacuēx na ngēmatama yīixū i tacūma rū nacūma i guxūma i yaxōgūxū i guxūnema ya tupaucagūwa.

Duūxūgū rū chixri namaā inacuēxgū ga Coriarū ōna i ūūnexū

¹⁷ Rū űuxma i űāā popera i pexcēx chaxūmatūxūwa rū pemaā nūxū chixu rū nangēxma i wūxi i pecūma i chixexū i tama namaā chataāēxū. Erū chauxcēx i ngēma perū ngutaquēxegū rū pexū nachixexēē, rū tama aixcūma perū meruūgū nixī. ¹⁸ Erū duūxūgū chomaā nūxū nixugūgū rū ngēxguma tórū Coricēx pengutaquēxegūūxgu rū pegū pitoye. Rū ngāxūgu chayaxō na aixcūma yīixū i ngēma nūxū yaxugūgūxū. ¹⁹ Choma rū nūxū chacuēx na aixcūma woe tátama yīixū i pegū pitoyexū na ngēmawa nūxū icuāxūcēx na texégū tīixū ya yixema aixcūma Cristuarū duūxūgū ixīgūxe. ²⁰ Rū ngēma pegū na pitoyexūgagu nixī na tama aixcūma tórū Corixū picuēxūūgūācūma yīixū i penangōxū i tórū Coriarū ōna i ūūnexū i ngēxguma pengutaquēxegūūxgu. ²¹ Erū ngēxguma penangōxgu i ngēma ōna i ūūnexū rū wūxichigū rū peñuxāēgū na pexira na penayaxuxūcēx i ngēma ōna. Rū yoxni i ngēma togū rū ngēxma nataiyae, rū togū rū nayaxgū ya binu űuxmata nangāxē. ²² ¿Ēxna pengēchiūgū ecēx tama ngēma pechibūexū rū pexaxegūxū? ¿Tūxcūū nūxū pexoe i ngēma togū i yaxōgūxū rū penaxāneēxēē i ngēma yaxōgūxū i ngearū ngēmāxūāxgūxū? ¿Rū űacūxū tá pemaā chixu i űuxmax? ¿Pexcēx rū tá pemaā chataāēxū? Dūcēx, pemaā nūxū chixu rū tama pemaā chataāē naxcēx i ngēma pexūgūxū.

Tórū Coriarū ōna i ūūnexūchiga

²³ Rū ngema nguxēētae i pemaã nüxũ chixuxũ rü törü Corixũtatwatama chanayaxu. Rū yexguma törü Cori ga Ngechuchuxũ inaxuaxũgu, rü yematama chũtaxũgu rü nũma rü nanayaxu ga wũxi ga pãu. ²⁴ Rü Tupanana moxē naxã, rü yemawena rü inanabũcu, rü ñanagũrũ:

“Ñãã nixĩ i chaxune i pexcèx ichaxãũchiga. ¡Rü penangõ i ñãã pãu na ngẽmaãcũ peãẽwa choxna pecuèxãchiexũcèx!” ñanagũrũ. ²⁵ Rü yexgumarũũ ta ga chibũwena rü Ngechuchu nanayaxu ga wũxi ga pochuyu ga binuchiũmaã ããcuxũ, rü ñanagũrũ:

“Rü daa binu rü wũxi i cuèxruũ nixĩ na ngexwacèx Tupana duũxũgũmaã ixunetaxũ i maxũ i taguma gũxũchiga. Rü chaugũ ya pexcèx ibacũmaã nixĩ i Tupana pexũ nüxũ cuèxēèxũ i ngẽmachiga. Rü ngẽxguma ñuxguacũ daa binu pixaxgũgu rü ñuxma choma na chanaxũxũrũũ tá penaxũ na peãẽwa choxna pecuèxãchiexũcèx”, ñanagũrũ ga Ngechuchu. ²⁶ Rü guxũguma i ngẽxguma penangõxgu i ñãã pãu rü peyaxaxgũgu ya daa binu rü ngẽmawa tá duũxũgũxũ nüxũ picuèxēè na ñuxãcũ törü pecaducèx nayuxũ ga törü Cori. Rü ngẽmaãcũ tá penaxũ ñuxmatáta wena nataegu i nũmax.

Texegũcèx nixĩ i törü Coriarũ õna i üünexũ

²⁷ Natũrũ ngẽxguma chi texe tama tũgũ tamexēèarũ maxũxãcũma nangõxgu i Coriarũ pãu i üünexũ rü tayaxaxũxgu ya yima binu ya üünecũ, rü pecadu taxũ napewa ya törü Cori ya taxcèx yucũ rü nagũ ibacũ. ²⁸ Rü ngẽmacèx naxũpa na tanangõxũ i ngẽma pãu rü na tayaxaxũxũ ya yima binu, rü name nixĩ i wũxichigũ meã tũmaarũ maxũgu tarũxĩnũ ngoxi nataxuma i ñacũ rü chixexũ i tũmaãrũ maxũwa. ²⁹ Erũ ngẽxguma tama tũgũ tamaxēèarũ maxũãcũma tanangõxgu rü tayaxaxũxgu, rü tũgũtama poxcuwa taga. Erũ tama aixcũma tayaxõ na törü Corichiga yixĩxũ i ngema pãu rü yima binu.. ³⁰ Rü ngẽmacèx nixĩ i muxũchixe i petanũwa rü piãaaweexũ rü peturaexũ, rü ñuxre i togũ rü marũ nayuexũ. ³¹ Natũrũ ngẽxguma chi törũtama maxũgu rü ñĩnũegu naxũpa na nangõxũ i ngẽma Coriarũ õna, rü nũma rü taxucèx tũxũ napoxcue. ³² Natũrũ ngẽxguma törü Cori ñoma i törũ maxũwa tũxũ poxcugu, rü ngẽmaãcũ tũxũ inayarũwèxãchixēè na tama yixcũra naãneãrũ guxgu tũxũ napoxcuxũcèx wũxigu namaã i ngẽma duũxũgũ i tama yaxõgũxũ. ³³ Rü ngẽmacèx, Pa Chaueneègũx, ngẽxguma pengutaquèxegũgu na penangõxũcèx i ngẽma õna i üünexũ, name nixĩ i pegũ ipenanguxēè na guxãma wũxigu meã penangõxũcèx. ³⁴ Rü ngẽxguma chi texe taiyèxgu, rü name nixĩ i tũmapatawatama tachibũ na tama Tupana pexũ poxcuexũcèx naxcèx na chixexũ pexũexũ i perũ ngutaquèxegũwa. Rü ngẽma to i guxchaxũgũ i pexũ ngẽxmaxũ, rü choma tá chanamexēè i ngẽxguma petanũwa chaxũxgu.

12

Ngẽma cuèx i Tupanaãe i Üünexũ tũxna ãxũchiga

¹ Pa Chaueneègũx, chanaxwèxe i nüxũ pecuèx na ñuxãcũ yĩĩxũ i ngẽma cuèx rü ñuxacũ na yixĩxũ i ngema tauxcha i Tupanaãe i Üünexũ tũxna ãxũ. Rü ngẽmachiga nixĩ i pemaã nüxũ chixuxchaũxũ i ñuxmax. ² Rü pema meãma nüxũ pecuèx ga yexguma tauta Cristuaxũ peyaxõgũgu, rü pegũ tũxna pexãgũ ga tupananetachicũnèxãgũ ga tama idexaxũ. ³ Rü ngẽmacèx i ñuxma rü chanaxwèxe i meã nüxũ pecuèx rü taxucũrũwama texe ya Tupanaãe i Üünexũ tũmawa ngexmaxe rü chixri Ngechuchuhuga tidexa. Rü ngexgumarũxũ ta rü taxucũrũwama texe ngũrũmare tũechama rü:

“Ngechuchu rü tórü Cori nixī”, ñatarügü ega tama Tupanaaē i Üünexū tüxū muxgu na ngēmaācū tidexaxūcēx. ⁴ Rü nūma ya Tupana rü duūxūgūna nanaxā i naguxūraū i tauchagū. Natürü ngema Naāxē i Üünexū i nawa ne naxīxū i ngema tauchagū rü wūxitama nixī. ⁵ Nangēxma i nagúxūraūxū i Tupanaarū puracū, natürü yima tórü Cori ya tüxna naxācū i ngema puracūgū rü wūxitama nixī. ⁶ Rü Tupanaarū pora rü nagúxūraūācū nangox. Natürü wūxitama nixī ya yima Tanatū ya tawa gúxūraūācū nangoxēēcū i ngema norū puracū. ⁷ Rü ngema Naāē i Üünexū wūxixewachigū nanangoxēē i Tupanaarū pora i norū duūxūgūtanūwa na ngemaācū guxāarū ngūxēēruū yixīxūcēx. ⁸ Rü Naāē i Üünexū rü tümáxena rü nanaxā i tauxcha na ucūēxū tacuáxūcēx. Rü ngēmatama Naāē i Üünexū rü togeāxū rü nanatauxchaxēē na nūxū tacuáxū na mea tangúxēētaexū i Tupanaarū ore. ⁹ Rü toge rü ngēmatama Naāē i Üünexū tüxū nanatauxchaxēē na Tupanana tarūyoexūcēx. Rü toge rü tüxna nanaxā i pora na ngēmamaā naxcēx tayataanegūxēēxūcēx i ngēma idaaweexū. ¹⁰ Rü toge rü tüxna nanaxā i pora na tanaxūxūcēx i mexūgū i Tupanaarū poramaā ūxū. Rü toge rü tüxū nanatauxchaxēē na nūxū tixuxūcēx i Tupanaarū ore. Rü toge rü tüxna nanaxā i cuēx na nūxū tacuáxūcēx i ꜥacū yīxū i ngoxogūarū ixīxū rü ꜥacū yīxū i Tupanaaē i Üünexūārū ixīxū. Rü toge rü tüxna nanaxā i tauxcha na ngēma tama nūxū tacuáxū i nagawa tidexaxūcēx. Rü toge rü tüxna nanaxā i cuēx na tanangoxēēxūcēx na ꜥacūchiga yīxū na tidexaxū ya yīxema to i nagawa idexáxe. ¹¹ Rü guxūma i ngēma rü Tupanaaē i Üünexūtama nixī i naxūxū. Rü nūma nixī i wūxichigū i duūxūna naxāāxū i ngēma cuēx i nūma nanaxwēxexū na nūxna naxāāxū.

Guxāma i yaxōgūxū rü wūxitama i naxūnewa naxūgū

¹² Rü duūxūxūne rü woo muxūgu nixūye, natürü wūxitama i naxūne nixī. Rü ngexgumarūxū ta i ngema Cristuāxū yaxōgūxū rü woo namu, natürü wūxitama i naxūnewa naxūgū. ¹³ Rü yexguma libaiūgu rü Tupanaaē i Üünexū rü wūxitama i naxūne tüxū nixīgūxēē. Rü woo Yudiūgū na ixīgūxū, rü ēxna tama Yudiūgū na ixīgūxū, rü woo togūmēxēwa ingexmagūxū rü ēxna taxūxemēxēwa ingēxmagūxū, natürü wūxitama i naxūne tüxū nixīgūxēē i nūma i Naāē i Üünexū i nūxicatama ixīxū. Rü guxāma i yixema rü marū tüxna nangu i ngēma Naāē i Üünexū. ¹⁴ Wūxi i naxūne rü tama naxāmenāxamare, natürü muxūgu nixūye. ¹⁵ Rü ngēxguma chi yima nacutū ñaxgu:

“Rü ñuxma na tama naxmēx chiīxū, rü ngēmacēx tama ngēma naxūnewa changēxma”, ñaxgu, rü tama ngēmacēx nūxū narūxo na ngema naxūnewa nangexmaxū. ¹⁶ Rü ngēxguma chi yima naxpaxchinū ñaxgu:

“Rü ñuxma na tama naxētū chiīxū, rü ngēmacēx tama naxūnewa changēxma”, ñaxgu, rü tama ngēmacēx nūxū narūxo na ngema naxūnewa nangexmaxū. ¹⁷ Rü ngēxguma chi guxūma i naxūne rü naxētū yixīgu, ¿rū ꜥacūmaā chi i nūxū naxīnūxū i ngema naxūne? Rü ngēxguma chi guxūma i naxūne rü naxmachixē yixīgu, ¿rū ꜥacūmaā chi i nūxū nawāxixū? ¹⁸ Natürü Tupana ga naxūcū ga taxūne, rü ngexta nūma Ínanaxwēxexūwa nanangexmaxēē i taeru rü tachacūgū rü taparagū. ¹⁹ Rü ngēxguma chi nataxuxgu i norū ūyechigū i taxūne rü chi naxāmenēxāmare. ²⁰ Rü ngema naxūne rü woo muxūgu nixūye, natürü wūxitama i naxūne nixī. ²¹ Rü taxetū rü taxucūruwa taxmēxū ñanagūrū:

“Choma rū tama chacuxwēxe”, ñanagürü. Rū ngēxgumarüŭ ta i taeru rū taxucürüwa tacutügüŭ ñanagürü:

“Choma rū tama chapexwēxe”, ñanagürü. ²² Natürü ngēma yexeraäcū äücümaxŭ i taxūnewa, rū ngēma nixī i yexera nanaxwēxexŭ i taxūne. ²³ Rū ngēma taxūnewa yexeraäcū naxcēx ixānexŭ, rū ngēma nixī i yexera meā ixŭchiruxŭ. Rū ngēma taxūnewa ngēxmaxŭ i tama inaxwēxexŭ na nangóŭŭ, rū ngēma nixī i yexera meā idüxŭŭ. ²⁴ Natürü tama ngēmaäcū tanaxŭ namaā i ngēma taxūnewa ngēxmaxŭ i guxāxŭma iwéxŭ. Rū ngēmaäcū Tupana nanaxŭ i taxūne, na yexeraäcū nüxna idauxŭcēx i ngēma yexera naxcēx ixānexŭ. ²⁵ Rū ngēmaäcū Tupana nanaxŭ i taxūne na wüxichigü i norü ũye nügügu naxñüxŭcēx rū nügü nangŭxēēgŭxŭcēx. ²⁶ Rū ngēxguma chi wüxi i ngēma taxūnearŭ ũye nüxŭŭ nguxgux, rū guxŭma i ngēma togü i natanŭxŭgü rū ta nüxŭŭ nangŭx. Rū ngēxguma chi wüxi i ngēma taxūnearŭ ũye taāēxgu, rū guxŭma i ngēma togü i natanŭxŭgü rū ta nataāēgü. ²⁷ Rū ñuxma i wüxichigü i pema rū Cristuxūnearŭ ũye pixŭgü, rū ngēma naxŭnewa pexŭgü. ²⁸ Rū ngēmacēx ya Tupana rū nanaxwae na ñaacü nügü inanuxŭ i norü duŭxŭgü: Rū yixema tŭxira tŭxŭ naxunetaxŭ tixŭ ya norü puracŭwa tŭxŭ namugŭxe. Rū tŭxŭ naxuneta ya toguegü na nüxŭŭ tixugŭxŭcēx i norü ore. Rū tŭxŭ naxuneta ya toguegü na duŭxŭgüŭ tangŭxēēxŭcēx i norü ore, rū toguegü na tanaxŭgŭxŭcēx i mexŭgü i Tupanaärü poramaā taxŭgŭxŭ. Rū toguegü rū tŭxŭŭ nanatauxchaxēē na tanameexēēxŭcēx i idaaweexŭ, rū toguegü na nüxŭŭ tarŭngŭxēēgŭxŭcēx i ngēma taçü nüxŭŭ taxuxŭ, rū toguegü yaxŭgŭxŭärü āēxgacŭgü na tixŭgŭxŭcēx. Rū tŭxŭŭ nanatauxchaxēē ya toguegü na ngēma naga i tama nüxŭŭ tacuáxŭwa tidexagŭxŭcēx. ²⁹ Rū tama guxāma Tupana tŭxŭŭ imugŭxe tixŭgü, rū tama guxāma Tupanaärü orearü uruŭ tixŭgü. Rū tama guxāma norü orewa nguxēētaegŭxe tixŭgü, rū tama guxāma nüxŭŭ tacuēx na tanaxŭxŭ i mexŭgü i taxŭgü i Tupanaärü poramaā ŭxŭ. ³⁰ Rū tama guxāma nüxŭŭ tacuēx na tanameēxēēxŭ i duŭxŭgü i idaaweexŭ. Rū tama guxāma nüxŭŭ tacuēx na nawa tidexagŭxŭ i wüxi i naga i tama nüxŭŭ tacuáxŭ. Rū tama guxāma nüxŭŭ tacuēx na tanangŭxēēxŭ na taçüchiga yadexaxŭ i ngēma duŭxŭgü i tama nüxŭŭ nacuáxŭ i nagawa idexaxŭ. ³¹ Rū name nixī inaxcēx pedēux na Tupana pexna naxāxŭcēx i ngēma cuēx rū taxchagü i rümemaegŭxŭ.

Yigü na ingechaŭgŭxŭchiga

Natürü i ñuxma rū tá pexŭ changŭexēē i taçü nixī i guxŭma i ngēma pemaā nüxŭŭ chixuxŭärü yexera rümemaēxŭ.

13

¹ Rū woo togü i nagawa chideaxgu, rū woo Tupanaärü orearü ngeruŭgü i daxŭcŭāxgawa chideaxgu, natürü ñoma wüxi i taçü i āgaxŭrŭmāre chixŭ ega tama guxāxŭ changechaŭgü. ² Rū woo nüxŭŭ chacuēxgu na meā duŭxŭgŭmaā nüxŭŭ chixuxŭ i Tupanaärü ore, rū woo nüxŭŭ chacuēxgu i guxŭma i taçü i ēxŭguxŭ i Tupanachiga, rū woo choxŭŭ natauxchagu na chorü ōmaā chayaxŭgachixēēxŭ ya mexpŭnegü, natürü taxuwama chame ega tama guxāxŭ changechaŭgü. ³ Rū woo ngēma duŭxŭgü i ngearü dŭruāxgŭxŭŭ chayanuxgu i guxŭma i taçü i choxŭŭ ngēxmaxŭ, rū woo Tupanaärü oreçēx chaugü ichaxāxgu na ŭxŭwa choxŭŭ yagugŭxŭcēx, rū taxuwama choxŭŭ name i ngēma ega tama guxāxŭ changechaŭgü. ⁴ Rū yixema guxāxŭŭ ngechaŭxē, rū yaxna namaā taxŭñü, rū namaā tameçüma. Rū tama tixāxŭchixwēxe, rū tama

togūxū tūgū tarūyexera rū tama tūgū ticuèxūū. ⁵ Rū yíxema aixcūma guxāxū ngechaūxē, rū tama taguxchigawēxe, rū tama tūgūguxicatama tarūxīnū, rū tama tanuxwēxe, rū tama nagu tarūxīnūēcha ega texé chixexū tūmamaā ūxgu. ⁶ Rū tama namaā tataāē i chixexūgū, natūrū namaā tataāē i ngēma ore i aixcūma ixīxū. ⁷ Rū yíxema aixcūma guxāxū ngechaūxē, rū yaxna namaā taxīnū, rū guxūguma nūxū tayaxō, rū guxūguma mexūgu namaā tarūxīnū, rū taguma naxchi taxai woo ūacū tūmamaā naxūxgu i togū. ⁸ Rū ngēma yīgū na ingechaūxū rū tagutāma inayacuèx. Natūrū ngēma na nūxū ixuxū i Tupanaārū ore rū wūxi i ngunexūgu tā inayacuèx. Rū ngēma tama nūxū icuáxū i nagawa na idexaxū, rū tā ta inayacuèx. Rū ngēma űuxma nūxū icuáxū rū wūxi i ngunexūgu rū marū taxuwatāma tūxū name. ⁹ Erū ngēma tórū cuèx i űuxma tūxū ngēxmaxū, rū Tupanapēxewa rū naxíra. Rū ngēxgumarūū ta i ngēma norū orexū na ixuxū, rū wūxi i íramarexūtama nixī. ¹⁰ Rū guxūma i ngēma rū tā inayarūxo i ngēxguma Tupanapēxewa ingugūgu rū nūma tā guxūxūma tūxū nacuèxēēgu. ¹¹ Yexguma chabuxgu ga chomax, rū wūxi ga buxūrūū chidexa, rū buxū nagu rūxīnūxūgu charūxīnū, rū tama meā chauāēxū chacuèx. Natūrū yexguma marū chayēxgu, rū nūxū charūxo ga guxūma ga yema chorū bucūma. ¹² Rū ngēma űuxma nūxū idauxū i Tupanachiga, rū űoma wūxi i worua ya ūxachametūxewa yīgū idauxūrūū nixī na taxcèx naxēxū. Natūrū yixcūra rū tā aixcūma meā nūxūxūchi tadau ya Tupana. Rū űuxma rū írarūwatama nūxū chacuèx i Tupanachiga. Natūrū wūxi i ngunexūgu rū tā meā nūxū chacuèx i guxūma i nachiga, ngēma na Tupana meāma choxū cuáxūrūū. ¹³ Rū űuxma rū nangēxma i tomaēxpūx i nacūmagū i guxūgutāma ngexmaxū. Rū űaāgū nixī:

1 Rū Tupanaāxū tayaxōgū

2 Rū nūxū ítananguxēē na nataeguxū ya Cristu

3 Rū nūxū tacuèx na tamūcūxū ingechaūxū.

Natūrū ngēma tomaēxpūxtanūwa rū ngēma rūmemaexū nixī na guxāxū ingechaūxū.

14

Ngēma tama nūxū icuáxū i nagawa na idexaxūchiga

¹ Rū naxcèx pedēux na guxāxū pengechaūxū! Rū ngēxgumarūū ta name nixī i naxcèx pedau i ngema tauxchagū rū ngema cuèx i Naāē i Ūūnexūtwa ne íxū. Rū ngēma cuèx i yexeraācū penaxwaexū nixī na pexū natauxchaxū na nūxū pixuxū i Tupanaārū ore. ² Yíxema duūxē ya tama nūxū tacuáxū i nagawa idexaxe, rū Tupanamaā nixī i tidexaxū rū tama i duūxūgūmaā, erū taxūema nūxū tacuèx na űuxū űaxūchiga yīxū. Rū Tupanaāē i Ūūnexū nixī i tūxū idexaxēēxū, natūrū ngēma ore i nūxū tixuxū rū ēxūguxū nixī. ³ Naturū yíxema nūxū ixuxe i Tupanaārū ore rū ngema yaxōgūxūārū ngūxēeruxū tixī, erū yexeraācū cuèxa tanangugūxēē rū nūxū tanangūchaxūxēē i ngema ore rū tanataāēxēē i ngema yaxōgūxū i ngexguma guxchaxū nūxū ūpetūgu. ⁴ Rū yíxema duūxē ya tama nūxū tacuáxū i nagawa idexaxe, rū tūmacèxtama nixī i ngema na yexeraācū mea Tupanaāxū tayaxōxūcèx. Natūrū yíxema nūxū ixuxe i Tupanaārū ore rū nūxū tixu na yexeraācū Tupanaāxū yaxōgūāxūcèx i guxūma i yaxōgūxū. ⁵ Choma chierū chanaxwēxe na guxāma i pema rū ngēma tama nūxū pecuáxū i nagawa na pidexagūxū. Natūrū yexeraācū chanaxwēxe na duūxūgūmaā nūxū pixuxū i Tupanaārū ore. Erū ngēma to i nagawa na pidexagūxūārū yexera narūmemaē na togūmaā nūxū pixuxū i Tupanaārū ore.

Natürü ngēma to i nagawa na idexaxū, rü name ega ngēma yaxōgūxūmaā nūxū ixuxgu na ſacūchiga yīixū i ngēma dexa, na nūmagū rü ta yexeraācū meā Tupanaāxū yaxōgūāxūcēx. ⁶Rü ngēmacēx, Pa Chaueneēgūx, rü ngēxguma chi pexūtawa chaxūxgu, rü chi to i nagawa chideaxgu, ſrū ſacūwa chi pexū namexū i ngēma? Natürü ngēxguma chi pemaā nūxū chixuxgu i ngēma Tupana tūxū nūxū cuēxēēxū, rü ēxna ngēma chomatama nūxū chacuāxū na aixcūma yīixū, rü ēxna ngēma ēxūguxū i űuxma Tupana tūxū nūxū cuēxēēxū, rü ēxna ſacū rü to i nguxēētae i Tupanachiga, rü ngēma waxi nixī i pexū mexū. ⁷ſRü dūcax ngēma paxetarū i quena rü ēxna arpa! Rü ngēxguma tāu chima texé meā napaūxgu, rü tāu chima nūxū tacuēx na ſacūgu tanapaxūxū. ⁸Rü ngēma churaragū, rü ngēxguma norū uwanūgūmaā nūgū nadaixchaūgu, ſrū űuxācū tā nūgū namexēē na nūgū nadēixūcēx ega tama meā nangōfagu ya yima corneta ya dēixcēx naxcēx çaxūne? ⁹Rü ngēxgumarū i ta pexū nangupetū. Rü ngēxguma chi perū conūmaā nūxū pixuxgu i dexa i taxúema nūxū cuāxū, ſrū űuxācū tā nūxū tacuēx na űuxū űaxūchiga yīixū i ngēma nūxū pixuxū? Rü űoma ngūrūanewa pidexagūxūrū tā pixīgū. ¹⁰Rü aixcūma nixī i namuxū i nagagū i űoma i naānewa. Rü guxūma i ngēma nagagū rü name naxcēx i ngēma duūxūgū i nawa idexagūxū. ¹¹Natürü ngēxguma chi tama nūxū chacuēxgu i ngēma naga i to i duūxū chomaā nawa idexaxū, rü ngēma duūxūcēx rü űoma to i nachiūānecūāxūrū chixī, rü chauxcēx rü űoma to i nachiūānecūāx i duūxūrū nixī i nūmax. ¹²Choma nūxū chacuēx rü pema rü pexū nangūchaū na pexū nangēxmaxū i ngēma nacūmagū i Tupanaāē i Ūūnexū tūxna āxū. Natürü name nixī i naxcēx pedau na guxūārū yexera pexna naxāāxū i ngēma nacūmagū i namaā nūxū perūngūxēēx i guxūma i yaxōgūxū na yexeraācū meā Tupanaāxū yaxōgūāxūcēx. ¹³Rü ngēmacēx yīxema duūxē ya taxúema nūxū cuāxū i nagawa idexaxe, rü name nixī i Tupanana naxcēx taca na tūxna naxāāxūcēx i cuēx na togūmaā nūxū tixuxūcēx na űuxū űaxūchiga yīixū i ngēma nūxū tixuxū. ¹⁴Rü ngēxguma chi taxúema nūxū cuāxū i nagawa chayumūxēgu, rü chauāē nixī i ngēma yumūxēxū. Natürü chomatama rü taxuūma chacuēx na ſacūchiga yīixū i ngēma. ¹⁵ſRü űuxācū tā chayumūxēxū i űuxmax? Rü marū name nixī ega taxúema nūxū cuāxū i nagawa chayumūxēgu, natürü chanaxwēxe i guxāma nūxū cuāxū i nagawa rü ta chayumūxē. Rü marū name nixī ega taxúema nūxū cuāxū i nagawa chawiyae. ¹⁶Erū ngēxguma chi taxúema nūxū cuāxū i nagawa Tupanaxū quicuēxūūgu, rü yīxema duūxēgū ya ngema irūxīnūēxē, rü taxucūrūwa cumaā wūxigu Tupanaxū ticuēxūūgu, erū tama nūxū tacuēx na űuxū űaxūchiga yīixū i ngēma nūxū quixuxū. ¹⁷Rü woo ngēma curū yumūxē rü namexēchixgu, natürü yīxema duūxēgū ya ngema irūxīnūēxē rü taxuūma i mexū nawa tayaxu ega to i nagawa quideaxgu. ¹⁸Tupanana moxē chaxā, erū perū yexera taxúema nūxū cuāxū i nagawa chidexa. ¹⁹Natürü woo muxūma i ore i taxúema nūxū cuāxū i nagawa na chidexaxū, natürü ngēma yaxōgūxūārū ngutaquēxegūwa rü chauxcēx rü narūmemaē chi nixī ega woo noxre i ore i meāma nūxū icuāxūwa namaā nūxū chixuxgu i Tupanaārū ore na ngēmaācū ngēmamaā meā chanangūexēxūcēx. ²⁰Pa Chaueneēgūx, tama name i űoma buxūgūrū chixri nagu perūxīnūe i ngema ore i pemaā nūxū chixuxū. Rü narūmemaē nixī i űoma buxūgūrūxū pegū pixīgūxēē naxchēxwa i ngema chixexū, natürü ngema peru űnūwa rü penaxwēxe i duūxūgū i marū yaxūrūū meā nagu perūxīnūe rü nagu pexī i ngema ore i pemaā nūxū

chixuxū. ²¹ Tupanaārū ore ga nuxcūmaūxū ga norū orearū uruū ūmatūxū rū űanagūrū:

“Rū nuā tá chanamugū i to i nachiūānecūāx i duūxūgū na to i nagawa yadexagūxūcēx namaā i űaā Yudiūgū i tama yaxōgūxū. Natūrū woo ngēmaācū chanaxūxgu, rū tāūtāma chauga naxīnūē i ngēma Yudiūgū i tama irūxīnūēchaūxū”,

űanagūrū ga Tupana. ²² Rū ngēmacēx ngēma na taxūema nūxū cuāxū i nagawa idexaxū, rū wūxi i cuēxruū nixī naxcēx i ngēma duūxūgū i tama irūxīnūēchaūxū. Rū tama duūxūgū i marū yaxōgūxūcēx nixī i ngēma. Natūrū ngēma Tupanaārū orexū na ixuxū, rū duūxūgū i marū yaxōgūxūcēx nixī na yexeraācū meā Tupanaāxū yaxōgūāxūcēx. Rū tama duūxūgū i tama irūxīnūēchaūxūcēx nixī i ngēma. ²³ Rū ngēxguma chi pema i yaxōgūxe pengutaquēxegūgu, rū guxā chima to i nagawa pidexagūgu, űrū űuxū űaxū tá ega petanūgu naxūcuxgu i wūxi i duūxū i ngēma iyarūxīnūxū rū ēxna wūxi i duūxū i tauta yaxōxū? űTaux ēxna i nagu tá naxīnūxū na pexāūāēgūxū i pemax? ²⁴ Natūrū ngēxguma chi guxāma i pema nūxū pixuxgu i Tupanaārū ore, rū chi petanūgu naxūcuxgu i wūxi i duūxū i tama yaxōxū rū ēxna wūxi i duūxū i ngēma iyarūxīnūxū, rū tá nūxū naxīnū i ngēma Tupanaārū ore i nūxū pixuxū. Rū ngēmaācū tá nūxū nacuēx na nūma rū wūxi i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūxū. ²⁵ Rū ngēma chixexū i nūxīcatama nūxū nacuāxū rū tá naxcēx ínicuēx. Rū nūma rū ngēxma tá nacaxāpūxū, rū tá Tupanaxū nicuēxū. Rū tá nūxū nixu na aixcūma Tupana petanūwa nangēxmaxū.

Tama name i penaxīxāchiāxēgū i perū ngutaquewa, rū name i meamare penaxī

²⁶ Dūcēx, Pa Chaueneēgūx, űuxma tá pemaā nūxū chixu na űuxācū tá penaxūxū ega ngēxguma pengutaquēxegūgu. Rū űuxre i pema rū marū name na Tupanaārū wiyaeagu pewiyaeğūxū, rū toge rū tanguxēētaegūxū, rū toge rū nūxū tixuxū i ngēma ore i Tupana tūxū nūxū cuēxēxū, rū toge rū nawa tidexagūxū i naga i tama nūxū tacuēxgūxū, rū toge rū tanangoxēēgūxū i ngēma dexa i to i nagawa nūxū yaxugūxū. Natūrū guxūma i ngēma rū tanaxwēxe i yaxōgūxūārū ngūxēēcēx na yīxū, na yexeraācū yaxōgūāxūcēx rū meā Tupanaxū namaxēxūcēx. ²⁷ Rū ngēxguma to i naga i pema tama nūxū pecuāxūwa pidexagūgu, rū name nixī i taxre rū ēxna tomaēxpūxicatama tidexagū. Rū tanaxwēxe i wūxiexira tidexa i noxri rū yixcama ya toge. Rū ngēxguma chi texē to i nagawa ideaxgu, rū name nixī na tangēxmaxū ya wūxie ya nūxū ixuchigūxe na űacūchiga yīxū i ngēma ore i to i nagawa nūxū yaxuxū. ²⁸ Natūrū ngēxguma chi tatauxgu na texē nūxū ixuchigūxū na űacūchiga yīxū i ngēma ore i to i nagawa nūxū yaxuxū, rū narūmemaē nixī na noxtacūma tama to i nagawa pidexagū i perū ngutaquēxewa. Rū narūmemaē i wūxichigū tūxica Tupanamaāxīcatama bexma tidexa. ²⁹ Rū ngēxgumarūū ta ngēxguma pengutaquēxegūgu, rū name nixī i taxre rū ēxna tomaēxpūxicatama nūxū tixu i Tupanaārū ore. Rū ngēma togū i ngutaquēxetanūxū rū name nixī na meā nangugūāxū i ngēma ore. ³⁰ Natūrū ngēxguma chi íyadexayane i wūxi i duūxū, rū Tupana tūmamaā ideaxgu ya toge ya ngēma rūtoxe, rū name nixī na iyanachianexū i ngēma nūxīra idexaxū na tidexaxūcēx ya yīxema duūxē ya Tupana tūmamaā idexaxe. ³¹ Rū ngēmaācū guxāma i pema na Tupana pemaā idexaxū, rū name nixī i wūxichigū ípenanguxēē na pewa nanguxū na pidexagūxū i Tupanaārū ore. Rū ngēmaācū i ngēma togū i

ngutaquēxetanūxūgū rü tá Tupanachiga meã nangúe rü tá nataãēgū. ³² Rū ngēmaācū tanaxwēxe i meãma tūmaãēmaã itacuèx ya wūxichigū ya yixema Tupanaārū orexū ixuxe. ³³⁻³⁴ Erū perū ngutaquēxegūwa rü Tupana nanaxwēxe na meã penaxūxū i guxūma, rü tama nanaxwēxe na ngema pexãūgatanūxū rü pegū ípetūexēxū. Rū guxūma i togū i yaxōgūxūārū ngutaquēxegūwa rü marū nūxū nayapue na tama yadexagūxū i ngexūgū. Rū name nixī i pema rü ta ngēmaācū penaxū, erū nachuxu na yadexagūxū i ngexūgū i ngutaquēxegūwa. Rū name nixī na yatūgūga naxīnūxū i ngexūgū, ngēma Tupanaārū ore tūxū muxūrū. ³⁵ Rū ngēxguma chi tacūxū nacuáxchaūgu i wūxi i ngexū, rü name nixī i nachīūwatama natena naca i nachiga i ngēma. Erū wūxi i āne nixī ega ngutaquēxewa yadeaxgu i wūxi i ngexū. ³⁶ Pa Corītiucūāxgūx, name nixī na nūxna pecuēxāchiexū na tama pewaxira ne naxūxū i Tupanaārū ore. Rū tama pexicatama nixī i penayauxgūxū i ngēma. ³⁷ Rū ngēxguma chi texé tūgūgu rūxīnūgu na Tupanaārū orearū urūū tīxū rü ēxna tūgūgu tarūxīnūgu na Tupanaāē i Ūūnexū tūxna naxāxū i tacū rü cuèx, rü name nixī i nūxna tacuēxāchi na tōrū Coriarū ore yīixū i ñaã ore i pexcèx chaxūmatūxū. ³⁸ Natūrū ngēxguma chi texé tama nūxū cuáxchaūgu i ngēma pemaã nūxū chixuxū, rü name nixī i tama tūxū pecuáxchaū. ³⁹ Rū ngēmacèx, Pa Chaueneēgūx, rü Tupanana naxcèx peca i cuèx na meãma nūxū pixuxūcèx i norū ore! Rū tama penachuxu na to i nagawa yadexagūxū i duūxūgū! ⁴⁰ Rū perū ngutaquēxegūwa, rü name nixī na meã penaxūxū i guxūma. Rū tama name i ngēma pexãūgatanū rü pegū ípetūexēx.

15

Cristu na yuwa írudaxūchiga

¹ Rū ñuxmax, Pa Chaueneēgūx, rü chanaxwēxe i nūxna pecuēxāchie i ngēma Tupanaārū ore i tūxū maxēxēēxū ga pemaã nūxū chixuxū. Rū yematama ore nixī ga pema peyauxgūxū. Rū ñuxma rü ngēmatama oregagu nixī i meã peyaxōgūxū. ² Rū ngēma oregagu nixī i pexū nangēxmaxū i maxū i taguma gūxū, ega aixcūma guxūguma peyaxōgūmagu. Natūrū ngēxguma tama guxūguma peyaxōgūgu, rü natūcèxmamare nixī i ngēma perū ō. ³ Rū yexguma noxri petanūwa changuxgu, rü yema nūxira pexū changuxēēxū nixī ga yema chaxira togū choxū nguxēēxū na Cristu rü tōrū pecaducèx nayuxū, ngēma Tupanaārū ore i ūmatūxūwa nūxū yaxuxūrū. ⁴ Rū yexgumarūū ta pexū changūexēē na ñuxācū inatēxgūāxū, rü ñuxācū norū tomaēxpūx ga ngunexūgu rü wena na namaxūxū, ngēma Tupanaārū ore i ūmatūxūwa nūxū yaxuxūrū. ⁵ Rū yexgumarūū ta pexū changūexēē ga ñuxācū Pedrucèx na nangóxū ga Cristu, rü ñuxācū yixcūra rü norū ngūexūgū ga yamugūxūcèx na nangóxū. ⁶ Rū yemawena ga Cristu rü noxtacūma 500 arū yexera ga yaxōgūxūcèx nangox. Rū muxūma i ngēma duūxūgū rü ñuxma rü ta namaxē, natūrū nūmaxū rü marū nayue. ⁷ Rū yemawena rü Chaūtiāgucèx nangox, rü yixcama guxūma ga yema togū ga ngūexūgūcèx nangox. ⁸ Rū dūxwa chowa inayacuèx ga chauxcèx rü ta na nangóxū, woo ngūrūāchimare nixī ga yema, ngēxgumarūū i wūxi i buxū i tautama norū ngunexūwa nanguyane buxūrū. ⁹ Rū choma rü guxūma i ngēma togū i Tupana imugūxūttūūwa chaxū. Rū ngemacèx tama name i Tupana imuxūmaã choxū naxugūxū i duūxūgū, yerū nawe chingēchigū ga Tupanaārū duūxūgū rü poračū chixexū chaxū. ¹⁰ Natūrū ga Tupana rü chomaã namecūma, rü ngēmacèx i ñuxma rü choxū pedau na tacū chīixū rü ñuxācū na chīixū. Rū yema chomaã na namecūmaxū

rū tama natūcēxma nixī. Yerū choma rū guxū ga togū ga yamugūxūārū yexera chanaxū ga Tupanaārū puracū. Natūrū tama chauechama chanaxū ga yema puracū, natūrū Tupana ga chomaā mecūmacū rū chomaā puracūcū nixī ga naxūcū ga yema puracū na nūxū chixuxūcēx ga norū ore. ¹¹ Natūrū i űuxma rū nūētama nixī ega woo choma chixīgu rū ēxna togū yixīgu ga pemaā nūxū ixuxū ga yema ore. Yerū yema ore ga pemaā nūxū tixuxū, rū Tupanaārū ore i tūxū maxēēxū nixī, rū yema nixī ga pixōgūxū.

űuxācū wena tá namaxē i duūxūgū i yuexū

¹² Marū pemaā nūxū tixu na Cristu rū yuwa ínadaxū. ¿Rū tūxcūū űuxre i pema rū űaperūgūgū:

“Yuexū rū tagutāma wena namaxē”, űaperūgūgū? ¹³ Rū ngēxguma chi ngēma yuexū rū tagu chima wena namaxēgu rū yima Cristu rū tāū chima wena namaxū. ¹⁴ Rū yexguma chi Cristu tama wena maūxgu, rū ngēma ore i nūxū tixuxū i nachiga rū taxuwa chima name, rū natūcēxmamare chi nixī i perū ō. ¹⁵ Rū ngēxguma chi ngēmaācū yixīgu, rū toma i Tupanaārū orearū uruūgū rū doratēēxgūxū tixīgū. Erū nūxū tixu na Tupana Cristuxū wena maxēēxū. Rū ngēxguma chi tama aixcūma yixīgu na wena namaxēxū i yuexū, rū chi wūxi i doramare nixī na Tupana Cristuxū wena maxēēxū. ¹⁶ Rū ngēxguma chi ngēma yuexū rū tagu chima wena namaxēgu, rū ga Cristu rū chi ta tāū chima wena namaxū. ¹⁷ Rū yexguma chi Cristu tama wena maūxgu, rū natūcēxmamare chi nixī i peyaxōgūxū, rū űuxma rū chi ta perū pecadugagu ipeyarūtauxe. ¹⁸ Rū chi ngēmaācū yixīgu rū ngēma duūxūgū i Cristuaxū yaxōgūxū i marū yuexū, rū chi ta tāū chima nūxū nangēxma i maxū i taguma gūxū. ¹⁹ Rū ngēxguma chi űoma i maxūcēxicatama yixīgu na Cristuaxū yaxōgūxū, rū chi guxū i togū i duūxūgūarū yexera tangechaūtūmūgū. ²⁰ Natūrū aixcūmaxūchi nixī ga Cristu ga yuwa na ínadaxū. Natanūwa i guxūma i ngēma yuexū i yixcūra tá írūdagūxū, rū Cristu nixī ga namaā inaxūgūcū na ínadaxū, yerū nūma nixī ga nūxīra wena namaxūxū. ²¹ Rū yexgumarūū wūxi ga yatūgagu na nayuexū ga duūxūgū, rū ngēxgumarūū tá ta nixī na wūxi i yatūgagu wena namaxēxū i ngēma marū yuexū. ²² Rū ngema na Adāūgagu guxāma na yuexū, rū ngēxgumarūū ta Cristugagu tá namaxēxū i guxūma i duūxūgū i nūxū yaxōgūxū. ²³ Natūrū wūxichigū tá tūmawa nangu na wena tamaxūxū. Rū Cristu nixī ga nūxīra maxūcū. Rū ngēxguma wena nūma naxūxgu i nūmax, rū ngēxguma tá nixī i wena namaxēxū i ngēma duūxūgū i noxrū ixīgūxū. ²⁴ Rū ngēmawena tá nixī i nagūxū i naāne. Rū ngēxguma tá nixī ya Cristu i nūxū naporamaēxū i guxūma i norū uwanūgū. Rū ngēxguma tá nixī i Nanatū ya Tupanana naxāāxū i guxūma na nūma namaā inacuāxūcēx. ²⁵ Erū nūma ya Cristu rū āēxgacū tá nixī űuxmatāta nūxū naporamaē i guxūma i norū uwanūgū. ²⁶ Rū ngēma nawa iyacuāxū i norū uwanū i tá nūxū naporamaēxū, rū yu nixī. ²⁷ Yerū Tupana rū marū Cristumēxēwa nanayexmagūxēē ga guxūma. Natūrū woo Tupanaārū ore nūxū ixuxgu na Cristumēxēwa nangēxmagūxū i guxūma, natūrū nūmatama ya Tupana rū tama Cristumēxēwa nangēxma. Yerū nūma ga Tupana nixī ga Cristumēxēwa nayexmagūxēēāxū ga guxūma. ²⁸ Rū ngēxguma guxūma Cristumēxēwa ngēxmagūgu, rū űuxūchi nūmatama ya Cristu ya Tupana Nane rū tá Nanatūmēxēwa nūgū nangēxmaxēē. Yerū nūma ga Tupana nixī ga Cristumēxēwa nayexmagūxēēāxū ga guxūma. Rū ngēmaācū ya Tupana rū guxūmaā tá inacuēx. ²⁹ Rū nangēxma i űuxre i duūxūgū i petanūwa i Tupanaegagu yuexūchicūū íbaiūxū. ¿Rū tūxcūū ngēma

naxūgū? Rū ngēxguma chi tama wena namaxēgu i duūxūgū i yuexū, ģrū tūxcūū ngēma yuexūchicūū inabaiū? ³⁰ ģRū tūxcūū i toma rū guxūdguma āūcūmaxūwa tangēxmagū? ³¹ Pemaā nūxū chixu, Pa Chaueneēgūx, rū guxū i ngunexūgu rū āūcūmaxūwa changēxma, rū tama nūxū chacuēx i ſacū rū ngunexūgu Tupanaārū oregagu tá na chayuxū. Rū ngēma rū aixcūmaxūchi nixī, ngēxgumarūū na aixcūma yīxū na choxū nangēxmaxū i wūxi i taāē i taxū i űuxma na tōrū Cori ya Ngechuchu ya Cristuaxū peyaxōgūxū. ³² Choma rū nuā Epēchiuwa rū Tupanaārū orechigagu chorū uwanūmaā poraācū togū tachoxūgagū. Rū űoma naēxū i idūraexūmaā togū tadējxūrūū tixīgū. ģNatūrū ſacūwa choxū namexū ga yema ega chorū maxū i űoma i naānewa choxū ngēxmaxūcēxicatama yixīgu? Rū ngēxguma chi aixcūma yixīgu na tama wena namaxēxū i yuexū, rū marū name i űatarūgūgū:

“ĵNgīxā tachibūē rū taxaxegū, erū paxa tá tayue!” űatarūgūgū. ³³ ĵNatūrū tāūtāma nawe perūxī i ngēma duūxūgū i ngēmaācū chixri idexagūxū! Erū aixcūma nixī i ngēma ore i űaxū:

“Rū texē ya chixexū i duūxūmaā āmūcūxe, rū tūxū inayanaxoxēē i tūmacūmagū i mexū”, űaxū. ³⁴ Rū name nixī i meā pegūāēgu perūxīnūē rū nūxū perūxoe i ngēma perū chixexūgū. Rū wūxi i perū āne nixī na pemaā nūxū chixuxū rū űuxre i pema rū tama aixcūma Cristuarū duūxūgū pixīgūxū rū tama aixcūma Tupanaxū pecuēxgūxū.

űuxācū wena namaxē i yuexūgū

³⁵ Natūrū ngūrūāchi tá texe pexna taca rū űatarūgū pexū:

“Ĵűuxācū tá wena namaxēxū i yuexū? ĴRū naűuxraūxū i naxūnemaā tá ínadağūxū?” űatarūgū tá pexū. ³⁶ Pa Duūxū i Ngēāēmarexūx ĵrū dūcax! Rū ngēxguma wūxi ya nanetūchire itoxgu, rū nūma ya yima naxchire rū nayu na ngēmaācū naxūxūcēx i ngēma nanetū. ³⁷ Rū ngēma waixūmūgu itoxū, rū tama marū nanetū ixīxū nixī, natūrū naxchire nixī ya yima itoxūne woo triguchire rū ēxna ngexūrūūxūmare i to i nanetūchire yixīgu. ³⁸ Rū ngēxguma marū inatoxguwena, rū Tupana nixī i yanaxūēēcū ya yima nachire na nūma nanaxwēxexūācūma yīxūcēx i ngēma nanetū. ³⁹ Rū tama guxū i naxūnegū nawūxigu. Rū duūxēxūne rū nanatoraxū, rū naēxūgūxūne rū to nixī, rū werīgūxūne rū to nixī, rū choxnīgūxūne rū to nixī. ⁴⁰ Rū ngēxgumarūū ta nangēxma i naxūnegū i daxūgūxū i naānecūāx, rū nangēxma i naxūnegū i űoma i naānecūāx. Rū ngēma daxūgūxū i naānecūāx i naxūnegū rū nūxū nangēxma i noxrūtama mexū, rū ngēma űoma i naānecūāx i naxūnegū rū ta nūxū nangēxma i noxrūtama mexū. Natūrū tama nawūxigu i ngēma norū mewa. ⁴¹ Rū űēxcūarū yauracūū rū tama namaā nawūxigu i tauemacūarū yauracūū. Rū woramacurīgūarū yauracūū rū to nixī. Rū nūgūtanūwa ya woramacurīgū, rū tama nawūxigu i norū yauracūūwa. ⁴² Rū ngēxgumarūū tá ta naxūpetū namaā i naxūnegū i ngēma duūxūgū i yuexū. Erū ngēma naxūne i noxri nūxū ngēxmaxū rū iyarūxoxwēxexū nixī. Natūrū ngēma naxūne i tá nūxū ngēxmaxū i ngēxguma wena namaxēgu, rū ngēma rū tagūtāma inayarūxo. ⁴³ Rū ngēma naxūne i yuxū rū taxuwama name i ngēxguma inatēxgux. Natūrū ngēxguma wena namaūxgu rū tá namexēchi. Rū ngēma naxūne i űuxma turaxū rū ngēxguma wena namaūxgu rū tá napora. ⁴⁴ Rū itanatēx i ngēma naxūne i űoma i naānecūāx ixīxū. Natūrū ngēxguma ínadağgu, rū daxūcūāx i naxūne tá nixī. Rū űuxma na nangēxmaxū i naxūne i űoma i

naānecūāx rü ngēmawa nüxū tacuēx na nangēxmaxū ta i naxūne i daxūcūāx.

⁴⁵ Tupanaārū ore i ūmatūxūwa rü űanagūrū:

“Guma nüxīraūcū ga yatū ga Adāū rü nüxū nayexma ga űoma ga naānecūāx ga naxūne ga paxaāchi maxūxū”,

űanagūrū. Natūrū ya Cristu rü daxūcūāx nixī. Rū nūma nixī i tūxna naxāāxū

i maxū i taguma gūxū. ⁴⁶ Noxri rü tūxū nangēxma i űoma i naānecūāx i

taxūne. Natūrū yixcama rü Tupana tá tūxna nanaxā i to i taxūne i daxūcūāx

ixīxū. ⁴⁷ Guma nüxīraūcū ga yatū ga waixūmūwa ūcū, rü űoma ga naānecūāx

nixī. Natūrū tōrū Cori ya Cristu rü daxūgūxū i naānecūāx nixī. ⁴⁸ Rū ngēma

taxūnegū i űoma i naānewa tūxū ngēxmaxū, rü guma Adāūxūne ga waixūmūwa

ūcūrū nixīgū. Natūrū ngēma naxūnegū i daxūwa nüxū ngēxmaxū i duūxūgū,

rü Cristuxūnerū nixīgū. ⁴⁹ Rū űgēxgumarūū na Adāū ga waixūmūwa ūcūrū

na yīxū i taxūne, rü ngēxgumarūū tá ta Cristu ya daxūwa ngēxmacūrūū

nixī i taxūne i yixcūra. ⁵⁰ Rū dūcax, Pa Chaueneēgūx, pemaā nüxū chixu

rü űaā taxūne i namachinaxcēx rü naxchinēxānaxcēx, rü taxucūrūwa Tu-

panaxūtawa i ngextā taxūma iyarūxoxūwa nixūcu. ⁵¹ Natūrū chanaxwēxe

na nüxū pecuāxū i wūxi i ore i ēxūgūxū ga noxri Tupanaxīcatama nüxū cuāxū.

Rū dūcax, tāūtāma guxā tayue, natūrū guxāxūne rü tá naxūchicūū. ⁵² Rū

ngūrūāchimare wūxi i peāxētūgu tá nixī i ngēma na naxūchicūūxū i taxūne

i ngēxguma naāneārū gūxgūx naxāgagu ya corneta. Rū tá naxāga ya yima

corneta, rü ngēxguma i ngēma duūxūgū i yuexū rü tá inarūdagū na tagutāma

wena nayuexūcēx. Rū yixema na imaxēxū rü tá naxūchicūū i taxūnegū. ⁵³ Erū

ngēma taxūne i yuxwēxexū rü woetama tama taixū rü tá naxūchicūū. Rū wūxi

i ngexwacaxūxū i naxūne i aixcūma taixū rü tagutāma yuxū tá nixī. ⁵⁴ Rū

ngēxguma ngēmaācū naxūchicūūgu i taxūne i yuxwēxexū, rü tūxū nangēxmagu

i taxūne i ngexwacaxūxū i taguma yuxū, rü ngēxguma tá nixī i yangūxū i

Tupanaārū ore i ūmatūxū i űaxū:

“Marū inayarūxo na nayuexū i duūxūgū. Rū Tupana rü marū yuxū

narūyexera. ⁵⁵ Rū dūcax, Pa Yux, űngēxū i curū pora i namaā toxū

curūyexeraxū? űRū ngēxū i ngēma cuxne i namaā toxū cudējxū?”

űanagūrū i ngēma Tupanaārū ore. ⁵⁶ Rū ngēma naxne i yu, rü pecadu nixī.

Erū ngēma pecadu nixī i naporaxēēxū i ngēma yu na tūxū nadējxūcēx. Rū

ngēma mugū ga Moīché ūmatūxū nixī i naporaxēēxū i pecadu, erū woo

namexgu i ngēma mugū, natūrū taxucūrūwama texē aixcūma tayangūxēē.

⁵⁷ Natūrū name nixī i Tupanana moxē taxā yerū nōma nanamu ga tōrū Cori

ya Ngechuchu ya Cristu na ngēma yuxū tūxū naporamaēxēēxūcēx. ⁵⁸ Rū

ngēmacēx, Pa Chaueneēgū ya Pexū Changechaūgūxex, rü name nixī i meā

peyaxōgūama rü taguma ipenatēx i Tupanaārū ore. Rū name nixī i gūxūguma

meā penaxū i tōrū Coriarū puracū, erū pema nüxū pecuēx rü ngēma puracū

i nüxū pexūxū, rü tama natūcēxma nixī.

16

Togū i yaxōgūxūcēx inanutaque ga dīeru

¹ Rū űuxma tá pemaā nüxū chixu i nachiga i ngēma dīeru i penutaquēxexū na namaā nüxū perūngūxēēgūxūcēx i taeneēgū i yaxōgūxū i Yudēaanewa ngēxmagūxū. Rū ngēma yaxōgūxū i Gárataanewa ngēxmagūxū rü marū namaā nüxū chixu na ngīxū nanutaquēxegūxū i ngēma dīeru. Rū chanaxwēxe i pema rü ta ngēxgumarūū penaxū. ² Rū ngēma dīeru i perū puracūwa

ngixū peyaxucūwa rū guxcū i yūxūarū ngunexūgu rū tá ngixū pexā i ngēma dīeru i Tupanaarū ixīcū. Rū ngīmaā tá penguxū na tama ngēxguma ngēma changuxguama ngīxū na pedexūcēx. ³ Rū ngēxguma petanūwa changuxgu, rū tá chanaxūmatū i űuxre i poperagū naxcēx i taeneēgū i Yerucharēūwa ngēxmagūxū. Rū űuxūchi ngēma poperamaā tá Yerucharēūwa chanamagū i ngēma duūxūgū i pema nūxū pexunetaxū na ngēma ngixū nangegūxūcēx i ngēma dīeru i taeneēgūcēx ngīxū penetaquēxecū. ⁴ Rū ngēxguma chi choxū natauxchagu na ngēma Yerucharēūwa chaxūxū, rū nūmagū rū tá wūxigu chomaā ngēma naxī.

Pauru nagu narūxīnū na Corŷtiuwa naxūxū

⁵ Choma rū Machedonīānēwa tá chaxūpetū na íchayadauxūcēx i taeneēgū i ngēma ngēxmagūxū. Rū ngēmawena rū tá petanūwa changu na pexū íchayadauxūcēx. ⁶ Rū ngūrūāchi tá űuxre i ngunexūgū ngēxma petanūgu charūxāūx, rū bexmana ngūrūāchi ngēma petanūwa tá chanangupetūxēē ya mucū. Rū ngēxguma rū tá pexū natauxcha na choxū perūngūxēēgūxū na ngēma íchaxūxchaūxūwa chaxūxūcēx. ⁷ Erū tama chanaxwēxe i paxaāchimare pexū chadau. Natūrū petanūgu charūxāūxchaū i űuxre i ngunexū ega chi norū ngūchaxū yixīxgu ya tórū Cori. ⁸ Natūrū nuā Epēchiuarū īānēwa tá changēxma űuxmatáta Pētecōstearū ngunexūwa nangu. ⁹ Erū nuā rū tórū Cori poraācū choxū nanatauxchaxēē na nūxū chapuracūxūcēx rū nūxū yaxōgūāxūcēx i muxūma i duūxūgū woo namu i ngēma tama naxwēxegūxū na nuā chapuracūxū. ¹⁰ Rū ngēxguma chi Timutéu petanūwa nguxgu, rū chanaxwēxe i meāma penayaxu na petanūwa nataāēxūcēx. Erū nūma rū ta chauxrūū tórū Coriarū puracūwa napuracū. ¹¹ Rū ngēmācēx tama chanaxwēxe i texē petanūwa nūxū taxoe. Natūrū chanaxwēxe i nūxū perūngūxēē na taāēācūma nuā naxūxū na choxū íyadauxūcēx. Erū poraācū íchananguxēē na nuā nanguxūcēx namaā i ngēma togū i taeneēgū. ¹² Rū ngēma taeneē i Aporu rū poraācū nūxū chacēēxū na petanūwa íyadauxūcēx namaā i ngēma togū i taeneēgū. Natūrū tama ngēma naxūxchaū i űuxmax. Natūrū ngēxguma naxāchicagu rū tá ngēma naxū.

Pauru nūxū narūmoxē ga yema yaxōgūxū

¹³ ¡Rū pexuāēgū na taxūma i chixexūgu peyixūcēx! ¡Rū meāma peyaxōgūama woo űacū pexū űpetūgu! Rū name nixī i peporaeama rū taxucēxma pemuūē. ¹⁴ Rū guxūma i ngēma pexūxū, rū name nixī i pegū pengechaūgūācūma penaxū. ¹⁵ Rū dūcax, Pa Chaueneēgūx, pema nūxū pecuēx na Estēfanatanūxūgū yīxū ga nūxīra yaxōgūxū ga Acayaanēwa. Rū meāma nūxū pecuēxgū na űuxācū poraācū taeneēgū i yaxōgūxūxū na nangūxēēgūxū. ¹⁶ Rū chanaxwēxe i naga pexīnūē i ngēma duūxūgū i Estēfanatanūxūgūrūū ixīgūxū. Rū ngēxgumarūū ta chanaxwēxe i naga pexīnūē i guxūma i ngēma duūxūgū i űāā Tanatūarū puracūwa puracūexū rū ngūxēētaegūxū. ¹⁷⁻¹⁸ Rū űuxma na taxucūrūwama chauxūtawa pengēxmagūxū, rū wūxi ga chorū taāē nixī na nūma naxīxū ga taeneēgū ga Estēfana rū Fortunátu rū Acáicu. Rū yema taeneēgū ga nūma íxū rū pexū nixuchigagū rū yemaācū choxū nataāēxēēgū ga yema pexū na nataāēxēēgūxūrūū. Rū tanaxwēxe i naga pexīnūē rū nūxū pengechaū i ngēma duūxūgū i ngēmāgūrūū ixīgūxū. ¹⁹ Rū guxūma i taeneēgū i yaxōgūxū i Áchiaaneārū īānegūwa ngēxmagūxū, rū moxē pexcēx ngēma namugū. Rū Aquiru rū Prisila rū guxūma i ngēma yaxōgūxū i Aquirupatawa

ngutaquēxegūxū, rü moxē pexcèx ngema namugū naegagu ya tórü Cori.
²⁰ Rü guxūma i taeneēgū i núma ngēxmagūxū rü moxē pexcèx ngema namu. Rü chanaxwèxe i wüxichigū i pema rü pegū pengechaūgūācūma pegū perūmoxēgū. ²¹ Choma i Pauru rü choxmēxmaātama pexcèx chanaxūmatū i ñāā chorū moxē. ²² Rü ngēxguma chi texé tama tórü Cori ya Ngechuchu ya Cristuxū ngechaūgu, rü Tupana tá tūxū napoxcu. Rü paxa tá ínangu ya tórü Cori. ²³ Rü chanaxwèxe i tórü Cori ya Ngechuchu ya Cristu poraācū pexū narūngūxēē.. ²⁴ Rü guxāma i pema, rü poraācū pexū changechaūācūma pexū charūmoxē naegagu ya tórü Cori ya Ngechuchu ya Cristu.

Rü nuāma pexna,
 Pauru

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rū nūxū narūmoxē ga yema yaxōgūxū ga Corītiwa yexmagūxū

¹ Pa Chaueneēgū i Corītiucūāxgū i Tupanaāxū yaxōgūxū, rū Pa Chaueneēgū i Guxūma i Acayaanewa Ngēxmagūxū, choma i Pauru nixī i pexcēx chanaxūmatūxū i űāā popera wūxigu namaā i taeneē i Timutēu. Rū choma nixī i Tupana choxū yaxuxū na Ngechuchu ya Cristu choxū muxū na nūxū chixuxūcēx i norū ore. ² Rū tanaxwēxe na Tanatū ya Tupana rū tōrū Cori ya Ngechuchu ya Cristu pexna nanaxā i norū ngechaxū rū norū taāēxū.

Pauru rū ngūxū ninge

³ Rū toma rū nūxū ticuēxūūgū ya Tupana ya Nanatū ya tōrū Cori ya Ngechuchu ya Cristu. Erū nūma nixī ya Tanatū ya nūxū ingechaūtūmūūgūcū rū tōrū Tupana ya guxūguma tūxū taāēxēēcū. ⁴ Rū nūma ya Tupana rū toxū nataāēxēē i ngēxguma ngūxū tingexgu, na toma rū ta tanataāēxēēgūxūcēx i ngēma togū i duūxūgū i ngūxū ingegūxū. Rū ngēmaācū ngēma Tupana toxū na taāēxēēxūrūū toma rū ta tanataāēxēēgū i ngēma togū i duūxūgū. ⁵ Rū űuxma na Cristurūū poraācū ngūxū tingegūxū, rū ngēxgumarūū nūmatama poraācū toxū nataāēxēē. ⁶ Rū ngēmacēx, ngēxguma toma ngūxū tingegūxū, rū ngēmaācū toxū nangupetū na pema rū pexū nangēxmaxūcēx i perū taāē rū perū maxū i taguma gūxū. Rū ngēxguma Tupana toxū taāēxēēgu, rū ngēmaācū tomaā nanaxū na pema rū ta pexū nangēxmaxūcēx i perū taāē rū yaxna namaā pexīnūēxūcēx i ngēxguma ngēmatama ngūxū i toma tingegūxū pexū ngēxmagu. ⁷ Toma rū aixcūma tayaxōgū na pema rū tagutāma ipenatāxū i Tupanaārū ore. Erū nūxū tacuēx rū ngēma na toxrūū ngūxū pingegūxū, rū ngēxgumarūū tā ta toxrūū pexū nangēxma i ngēma taāē i Tupanawa ne űūxū. ⁸ Pa Chaueneēgūx, tanaxwēxe i nūxū pecuēx na űuxre ga guxchaxūgū toxū ngupetūxū ga Áchiaanewa. Rū yema na poraācū toxū naguxchaxū, rū dūxwa marū tama namaā taporae, rū nagu tarūxīnūē na marū tāūtāma tamaxēxū. ⁹ Rū nagu tarūxīnūē rū űoma yuwa taxīxūrūū tixīgū. Natūrū yemaācū toxū naxūpetū, erū Tupana ya yuexūxū írudagūxēēcū toxū nangūxēēchaū na nūxīcatama nūxū nangēxmaxū i pora na yuwa toxū ínanguxūxēēxūcēx, rū taxucūrūwama togūtama na ítanguxūxēēxū. ¹⁰ Rū Tupana rū toxū ínanguxūxēē nawa ga yema guxchaxū ga yuwa toxū gagūchaūxū. Rū ngēxgumarūū tā ta toxū ínanguxūxēē nawa i űāā taxū i guxchaxū i űuxma toxū ngēxmaxū. Rū aixcūma tayaxōgū na nūma rū guxūgutāma ngēmaācū toxū nangūxēēxū. ¹¹ Natūrū tanaxwēxe i pema rū perū yumūxēmaā toxū perūngūxēē. Rū ngēxguma chi ngēmaācū penaxūxgux, rū muxūma i duūxūgū rū tā Tupanana moxē naxāgū naxcēx i ngēma na űuxācū toxū nangūxēēxū.

Tūxūū tama Corītiwa naxū ga Pauru

¹² Nangēxma i űacū i toxū taāēxēēxū. Rū ngēma nixī na tođewa nūxū tacuāxū na űoma i naānewa rū aixcūma Tupana naxwēxexūācūma meā tamaxēxū. Rū pepēxewa nixī ga guxūārū yexera yemaācū tamaxēxū. Natūrū tama togagu nixī ga yema, yerū Tupana ya tomaā mecūmacū nixī ga toxū rūngūxēēcū na yemaācū pepēxewa tamaxēxūcēx. ¹³⁻¹⁴ Rū yema

poperagū ga pexcèx taxūmatūxūwa, rū nataxuma ga tacū ga icūxū. Natūrū yema toma tamaxēxūācūma nixī ga pexcèx tanaxūmatūxū na yemawa meā nūxū pecuāxūcèx na űuxācū tixīgūxū. Rū woo i űuxma rū tama aixcūma meā toxū na pecuāxū, natūrū chanaxwèxe i wūxi i ngunexūgu rū aixcūma meā toxū pecuèx. Rū ngēxguma meā toxū pecuèxgu rū pema rū tá tomaā petaāēgū i ngēxguma inanguxgu ya tōrū Cori ya Ngechuchu, rū ngēxgumarūū i toma rū tá ta pemaā tataāēgū. ¹⁵⁻¹⁶ Rū yemagu charūxīnūxūcèx nixī ga noxri ga pexūtawa na chaxūchaūxū na pexū íchayadauxūcèx rū yemaācū pexū na charūngūxēēxūcèx. Rū nagu charūxīnū ga Machedóniāānewa chaxūxgu na pexūtagu íchidauxū, rū yexguma Machedóniāānewa ne chaxūxgu rū wenaxārū pexūtagu íchidauxū. Rū yemaācū chanaxūxchaū, yerū nagu charūxīnū na yemawena choxū perūngūxēēxū na Yudeāanewa chaxūxūcèx. ¹⁷ Bexmana pema nagu perūxīnūēgu rū tama aixcūma chayanguxēēgaācūma nagu charūxīnū ga yema pexūtawa na chaxūegaxū. Ķēxna pema nagu perūxīnūēgu rū űoma wūxi i duūxū i tama Tupanaāxū yaxōxūrūūācūma chamaxū, rū “Ngū” űacharūgūchirēx woo tama chayanguxēēgagu i ngēma nūxū chixuxū? ¹⁸ Natūrū Tupana toxū nacuèx na aixcūma yīxū i ngēma torū ore ega pemaā itaxunetagu. ¹⁹ Erū yima Ngechuchu ya Cristu ya Tupana Nane ga guma Chiribānu rū Timutéu rū choma pemaā nūxū tixuchigacū, rū ore i aixcūma ixīxūxūxicatama nixu. Rū nūma rū aixcūma nayangūxū i ngēma nūxū yaxuxū. ²⁰ Rū Cristu nixī ya yima yanguxēēcū ga guxūma ga yema unetagū ga Tupana nuxcūmaxūchi nūxū ixuxū. Rū ngēmacèx ngēxguma Ngechuchuēgagu Tupanaxū icuēxūūgūgu, rū űatarūgūgū:

“Rū aixcūma nixī i ngēma”, űatarūgūgū. ²¹ Rū űuxma na Cristuarū duūxūgū ixīgūxū, rū Tupana nixī ya toxū poraexēēcū rū pexū poraexēēcū na taguma Cristuna ixīgachixūcèx. Rū nūmatama nixī ga tūxū nadexū na noxri ixīgūxūcèx. ²² Rū nūma ya Tupana rū naega tagu naxū erū tōrū yora nixī. Rū nūma rū tūxna nanamu i Naāē i Ūūnexū na wūxi i tōrū cuèxruū yīxūcèx, rū ngēmawa nūxū icuāxūcèx na yixcūra tá tūxna naxāāxū i muxūma i to i mexūgū. ²³ Pema nūxū pecuèx ga noxri rū Corītiuwa chaxūxchaū, natūrū tama yēma petanūwa chaxū yerū tama chanaxwèxe na pexū changechaūgūxēēxū. Rū yemacèx tama pexūtawa íchayadau, yerū tama pexū chingagūchaū. Rū Tupana nūxū nacuèx na aixcūma na yīxū ga yema. ²⁴ Rū tama tanaxwèxe na pexū tamuxū na űuxācū tá Tupanaāxū peyaxōgūxū. Erū pema rū marū aixcūma meāma peyaxōgū. Natūrū ngēma tanaxwèxexū nixī na pexū tarūngūxēēgūxū na yexeraācū petaāēgūxūcèx.

2

¹ Rū yemacèx nixī ga tama wena pexūtawa chaxūxū, yerū tama chanaxwèxe ga pexū na changechaūxēēxū. ² Erū ngēxguma chi pexū changechaūxēēgu, Ķrū texé tá choxū tataāēxēē? ĶRū űuxācū tá choxū petaāēxēē, ega pexū changechaūxēēgu? ³ Rū yemacèx nixī ga yemaācū pexcèx popera chaxūmatūxū na penamexēēgūxūcèx i perū guxchaxūgū naxūpa na pexūtawa chaxūxū. Yerū tama chanaxwèxe ga yexguma chi yēma chaxūxgu na choxū pengechaūxēēxū. Erū pema nixī i chanaxwèxexū na choxū petaāēxēēgūxū. Rū aixcūma nagu charūxīnū rū ngēxguma choma chataāēxgu rū pema rū tá ta petaāēgū. ⁴ Rū yexguma pexcèx chanaxūmatūgu ga yema popera, rū poraācū chanaxīxāchiāē, rū dūxwa yema chorū ngechaūmaā chaxaxu. Natūrū tama pexcèx chanaxūmatū na pexū

changechaũxēēxũcēx, natūrū pexcēx chanaxūmatū na nūxū pecuáxũcēx na ñuxácū poraácū pexū changechaũxū.

Pauru rū nūxū nūxū nangechaũ ga yema duũxū ga chixexū namaã iũxū

⁵ Rū yema yatū ga choxū ngechaũxēēxū, rū tama choxūĩcatama nixī ga nangechaũxēēxū, natūrū pexū rū ta nangechaũxēē. Natūrū tama chanangu-petūxēēchaxū na pexna chacaxū i ngemachiga.. ⁶ Rū yema poxcu ga nūxna pexāxū ga yema duũxū ga yexguma pengutaquēxegūgu, rū chauxcēx rū marū name na ngēĩcatama na yīxū. ⁷ Rū ngēmacēx i ñuxma rū chanaxwēxe i nūxū nūxū pengechaũ i norū chixexū rū nūxū perūngūxēē na tama yexeraxū i chixexūwa nagaāxũcēx i ngēma norū ngechaũ. ⁸ Rū ngēmacēx chanaxwēxe i wenaxārū noxrirū nūxū nūxū pedauxēē na aixcūma nūxū pengechaũxū. ⁹ Rū yemacēx nixī ga yemachiga marū pexcēx chanaxūmatūxū, yerū pexū chaxūxchaũ, rū nūxū chacuáxchaũ ngoxi marū aixcūma chauga pexīnūē. ¹⁰ Rū ñuxma pemaã nūxū chixu rū yīxema pema tūxū nūxū pengechaũxē i tūmaārū chixexū, rū choma rū tá ta tūxū nūxū changechaũ. Rū ngēxguma chi tacū rū chixexūxū tūxū changechaũgu, rū pegagu nixī i Cristupēxewa tūxū nūxū changechaũxū i ngēma. ¹¹ Rū ngēmaācū chanaxū na tama nayoxniēxũcēx i Chataná na chixexūgu tūxū nayixēēxũcēx. Erū yixema rū meāma nūxū tacuēx i nacūma i Chataná na ñuxácū chixexūgu tūxū nayixēēchaũxū.

Tróaarū iānēwa rū nanaxīxāchiāē ga Pauru

¹² Rū yexguma Tróaarū iānēwa changuxgu na nūxū chixuxũcēx ga Cristuarū ore, rū poraácū choxū natauxcha na yēma tórū Coriaxū chapuracūxū. ¹³ Natūrū tama aixcūma chataāē ga yēma, yerū tama yexma nūxū chayangu ga taeneē ga Titu. Rū yemacēx nūxū charūmoxē ga yēmacūāx ga duũxūgū, rū ichaxūāchi, rū Machedóniānēwa chaxū.

Cristu rū Paurumaã napora

¹⁴ Rū Tupanana moxē taxāgū erū norū duũxūgūxū toxū nixīgūxēē. Rū ñuxma na Cristuarū duũxūgū tixīgūxū, rū nūma ya Tupana rū guxūguma tomaã nanaxūpēxe. Rū nūma nixī i toxū namuxū na duũxūgūxū nūxū tacuēxēēxũcēx i norū ore. Rū ngēma norū ore rū guxūwama nangu rū guxūguma nipuema ñoma wūxi i pumara i yixichixūrū. ¹⁵ Rū ñuxma i toma i Cristugagu Tupanapēxewa na timexū, rū guxūwama tanguchigagū natanūwa i ngema yaxōgūxū rū ngema tama yaxōgūxū.. ¹⁶ Rū ngēma duũxūgū i tama yaxōgūxū rū nūxū nawēxtūmūxū i tohiga, erū ngema ore i nūxū tixuxū rū norū poxcuchigaxū namaã nixu. Natūrū ngēma yaxōgūxū rū namaã nataxēgū i tohiga erū ngema ore i nūxū tixuxū rū ore i namaxēēxū nixī. Rū ngēmacēx çtexēāxū natauxcha i ñaã puracū na nūxū tixuxū i ngēma ore? ¹⁷ Rū yīxema toxrū i xīgūxexicatama tixī ya tūxū natauxchaxe. Rū toma rū tama Tupanaārū oregu dīēru ngīxū tayaxu ngēma togū naxūgūxūrū. Natūrū Tupanapēxewa rū aixcūma meā nūxū tixu i ngēma norū ore, erū nūma toxū nimugū rū Cristuarū tixīgū.

3

Tupanaārū uneta i ngexwacaxūxūchiga

¹ Rū ñuxma na pemaã nūxū tixuxū na aixcūma Tupana yīxū ga toxū mucū, rū bexmana tá nagu perūxīnūē na wenaxārū togūētūwa tidexagūxū. Ķēxna penaxwēxe na wūxi i carta i cuēxruū pexū tawéxū na nawa nūxū pecuáxũcēx na aixcūma Tupanaārū orearū uruūgū tixīgūxū, rū ēxna penaxwēxe na

pexūtawa naxcèx itaçaxū i cartagū na ngēmawa duūxūgū toxū cuáxūcèx naxrūxū i ngema togū? ² Rū pemaā nūxū tixu rū tama tanaxwèxe i ÷acū rū carta na duūxūgū toxū cuáxūcèx, erū pematama nixī i ngēma cartarūū pixīgūxū, rū pewa nixī i nangóxū na aixcūma Tupana yīixū ga toxū mucū. Rū meāma toōēwa nūxū tacuèx i ngēma. Rū yema na naxūchicūūxū ga perū maxū, rū ngēmawa guxūma i duūxūgū nūxū nadau na aixcūma wūxi ga mexū ga puracū taxūxū ga petanūwa. ³ Rū ñuxma rū meāma nangox na pema rū ñoma wūxi i carta i Cristutama ūmatūxūrūū na pixīgūxū. Rū torū puracūgagu nixī i ngēma. Natūrū tama wūxi i carta i ÷acū rū ūmatūxūmaā ūmatūxū pixīgū, natūrū pema nixī i carta i Tupana ya Maxūcūāē i Ūūnexū ūmatūxū. Rū ngēma carta rū tama popera rū ēxna nutawa iwūcuchiūū nixī, natūrū perū maxūwa nixī i nangóxū i ngēma. ⁴ Rū ngēmācèx tama tamuixū na ngēmaācū togūcèxtama tidexagūxū, erū tayaxōgū na Cristugagu Tupana toxū dauxū na timexū. ⁵ Rū tama toxrūtama cuèxmaā nixī i tanaxūxū i ÷acū rū mexū. Natūrū guxūma i ngēma taxūxū rū Tupanaārū ngūxēēmaā nixī i tanaxūxū. ⁶ Rū Tupana rū toxū narūngūxēē na duūxūgūmaā nūxū tixuxū i ngēma ngexwacaxūxū i norū uneta na ñuxācū Cristugagu tá tūxna naxāāxū i maxū i taguma gūxū. Rū ngēma maxū rū tama yema mugū ga Moīché ūmatūxūgagu tanayaxu, natūrū tanayaxu erū Tupanaāē i Ūūnexū tūxna nanaxā. Rū yema mugū ga Moīché ūmatūxū rū yuwa tūxū nagagū, natūrū Tupanaāē i Ūūnexū rū tūxna nanaxā i maxū i taguma gūxū. ⁷ Rū yema mugū ga Moīchéna naxāxū ga Tupana, rū nutagu nixī ga naxūmatūxū. Rū yexguma Moīché nayauxgu ga yema mugū, rū porācū niyaurachiwecūxū. Rū yemacèx ga duūxūgū rū taxucūrūwama Moīchéchiwega narūdaunū. Natūrū yema norū yaurachiwecūū rū nixochigū. Natūrū ga yema mugū ga Moīché tūxna āxū i yuwa tūxū gagūxū, rū taxū ga yauracūūxūmaā ínangu. Rū yemaācū namexēchi ga yexguma ínanguxgu. ⁸ Natūrū yexeraācū namexēchi nixī i ngēma uneta i ngexwacaxūxū i Tupanaāē i Ūūnexū taxcèx ngoxēēxū. ⁹ Rū yemaācū woo namexēchi ga yema mugū ga yuwa tūxū gagūxū, natūrū yexeraācū namexēchi i ngēma uneta i ngexwacaxūxū i Tupanapēxewa tūxū mexēēxū. ¹⁰ Rū yema mugū ga noxri mexēchixū, rū ñuxma rū taxuwama name, ega namaā nūgū nangugūgu i ngēma Tupanaārū uneta i ngexwacaxūxū i yexeraācū mexēchixū. ¹¹ Rū yemaācū woo namexēchi ga yema mugū ga paxaāchi íxīxū, natūrū yexeraācū namexēchi i ngēma uneta i ngexwacaxūxū i guxūgutāma íxīxū. ¹² Rū toma aixcūma nūxū tacuèx na guxūgutāma yīixū i ngēma Tupanaārū uneta i ngexwacaxūxū i mexēchixū, rū ngēmācèx tama cuācūma duūxūgūmaā nūxū tixu. ¹³ Rū ngēmācèx tama duūxūgūchaxwa iticuxgū yema Moīché ūxūrūū. Yerū ga Moīché rū nūgū nidūxchiwe na tama nūxū nadaugūxūcèx ga yema Yudiūgū ga ñuxācū na yaxochigūxū ga norū yaurachiwecūū. ¹⁴ Natūrū ga yema duūxūgū ga Moīchéxū íxūmūcūgūxū rū ñoma yadūxgūchiwexūrūū nixīgū yerū tama nūxū nacuèxgūéga ga ÷acūchiga na yīixū ga yema mugū. Rū ñuxma rū ta i ngēma Yudiūgū rū tama nūxū nacuèxgūéga i ngēxguma nawa nangúegu i ngēma mugū. Erū nangēxma i ÷acū i ñoma yadūxgūchiwexūrūū nūxū naguxchaxēēxū na tama nūxū nacuèxgūxūcèx. Rū ñuxma rū ta tama nūxna ínanguéga i ngēma nacūma erū Cristuxicatama nixī ya yima nūxna ínanguxēēcū. ¹⁵ Rū ñuxma rū ta i ngēma Yudiūgū, rū ngēxguma nawa nangúegu i ngēma ore ga Moīché tūxna āxū, rū nangēxma i ÷acū i ñoma yadūxgūchiwexūrūū nūxū naguxchaxēēxū na tama nūxū nacuèxgūégaxūcèx na ÷acūchiga yīixū i ngēma ore. ¹⁶ Natūrū ngēxguma wūxi i duūxū nūxū

rūxoxgu i nacūma i chixexū, rū tōrū Coriaxū yaxōōgu, rū ngēxguma nixī i nūxna ínanguxū i ngēma nūxū naguxchaxēēxū. ¹⁷ Erū nūma ya tōrū Cori rū Naāē i Ūūnexū rū wūxitama nixī rū ngextá ínangēxmaxūwa i tōrū Coriāē i Ūūnexū, rū tūxū nanatauxchaxēē na Tupanana ingaicamagūxū. ¹⁸ Rū ngēmacēx guxāma i yixema na Cristuaxū yaxōgūxū rū ñoma wūxi i woruarū tawa nangóchipeta na ñuxácū namexēchixū ya tōrū Cori erū nataxuma i ñacū i tūxū idūxūxū naxchaxwa. Rū nūma ya tōrū Cori i Naāē i Ūūnexū íxīcū, rū guxūguma yexeraácū tūxū nimexēēchigū na naxrūí aixcūma ímexūcēx.

4

¹ Rū ngēmacēx taguma nūxū tarūchau i ñāā puracū, erū Tupana ya nūxū tangechaūtūmūcū nixī ga toxū mucū na tanaxūcēx i ñāā puracū na duūxūgūmaā nūxū tixuxūcēx i norū ore. ² Rū yemacēx nūxū tarūxoe ga guxūma ga ñacū ga chixexū i āne tūxna āxū i cuácū úxū. Rū tama tanawomūxēēácūma nixī i namaā nūxū tixuxū i ore rū tama tanaxūchicū i ngēma ore. Natūrū ngēma ore i aixcūma íxīxūcatama nixī i nūxū tixuxū. Rū ngēmaācū Tupanapēxewa tamaxē rū duūxūgūpēxewa togū itawēx na nūxū nacūēxgūcēx na ñuxácū tixīgūxū i tomax. ³ Rū ngēxguma chitexécēx naguxchagu i ngēma ore i mexū i nūxū tixuxū, rū ngēma duūxūgū i iyarūtauxexūcēxicatama nixī i naguxchaxū. ⁴ Erū nūmagū rū tama nayaxōgū. Rū ngēmacēx i ñoma i naāneārū āēxgacū i Chataná rū nūxū nanaguxchaxēē na tama nūxū nacūēxgūcēx na ñuxácū namexēchixū i norū ore ya Cristu ya Ūūnecū. Rū Cristuwa nixī i nangóxū na ñuxácū na yīxū ya Tupana. ⁵ Rū ngēxguma duūxūgūmaā nūxū tixuxgu i ngēma ore, rū tama tochigaxūtama tixugū. Natūrū nūxū tixu na Ngechuchu ya Cristu rū tōrū Cori yīxū, rū nūma tūxū na nangechaūxūgagu perū ngūxēēruūgū na tixīgūxū. ⁶ Erū nūmatama ya Tupana ga noxri naāne naxūxgux rū ēānexūwa nangoxēēcū ga ngóonexū, rū nūmatama nixī i ñuxma i tūxū yangoxnaāēxēēgūxū na ngēmawa nūxū ícuáxūcēx na ñuxácū namexēchixū i nūmax. Rū ngēma norū mexū rū Ngechuchu ya Cristuchiwewa nixī i nūxū idauxū.

Tayaxōgūama ega woo ngūxū íngēgūgu

⁷ Rū ngēma nūxū na ícuáxū na ñuxácū namexēchixū ya Tupana, rū ngēma cuēx rū wūxi i mexēchixū nixī. Natūrū ngēma cuēx i mexēchixū rū taxūne i maíraxūnaxcēxwa nangēxma, na nangóxūcēx na Tupanawa ne naxūxū i guxūma i pora rū tama i tawatama. ⁸ Rū guxūwama toxū nangēxma i guxchaxūgū, natūrū taguma nūxū tarūchau i ñāā puracū. Rū woo poraācū taxoegaāēgūgu, natūrū taguma ítanangēx. ⁹ Rū woo togū towe íngēxūtanūgu, natūrū ya Tupana rū taguma toxū ínawogū. Rū woo duūxūgū toxū napíxēēgu, natūrū tama ngēxma tayacuēxēē i ñāā puracū. ¹⁰ Rū guxūwama i ngextá ítaxīūwa rū ācūmaxūwa tangēxmagū, yexgumarū tū ga Ngechuchu na ācūmaxūwa nayexmaxūrū. Natūrū ngēmaācū toxū naxūpetū na duūxūgū nūxū daugūxūcēx na ñuxácū towa namaxūxū ya Ngechuchu. ¹¹ Rū ñuxma na tamaxēxū, rū guxū i ngunexūgu rū Ngechuchugagu ācūmaxūwa tangēxmagū. Natūrū ngēmaācū toxū naxūpetū na Ngechuchu inawéxūcēx i norū pora nawa i ñāā toxone i yuxwēxexū. ¹² Rū ngēmaācū Tupanaārū ore cēx ācūmaxūwa tangēxmagū, natūrū ngēmaācū toxū naxūpetū na pema rū pexū nangēxmaxūcēx i maxū i taguma gūxū.

¹³ Tupanaārū ore i ūmatūxūwa rū ñanagūrū:

“Nūxū chayaxō rū yemacēx Tupanachiga chidexa”,

ñanagürü. Rū ngëxgumarüütama tixîgü i toma na tayaxôgüxü rü Tupanachiga tidexagüxü. ¹⁴ Erü nüxü tacuèxgü rü Tupana ga yuwa ínadxëécü ga Ngechuchu ya törü Cori, rü yimatama Tupana tá nixî ya toxü Írüdagüxëécü, erü Ngechucharü duüxügü tixîgü. Rū ngëmaäcü wüxigu pemaã nügüxütawa tá toxü nagagü. ¹⁵ Rū guxüma ga yema toxü ngupetüxü rü perü mexüçex nixî na yexeraäcü yamuëtanüxüçex i ngëma duüxügü i Tupana nüxü rüngüxëégüxü. Rū ngëmaäcü tá düxwa namuxüchi i ngëma duüxügü i moxë Tupanana ägüxü rü nüxü icuëxüügüxü. ¹⁶ Rū ngëmacëx taguma nüxü tarüxoe na nüxü tixuxü i ngëma ore. Rū woo yayachigügu rü yaturachigügu i toxone, natürü toöëwa rü guxü i ngunexügu rü yexeraäcü tiporaetanü. ¹⁷ Erü ngëma ngüxü i toxü üpetüxü i ñaã torü maxüwa, rü ngëma rü wüxi i paxaächimare nixî rü paxa tá nangupetü. Natürü ngëmaäcü tá tanayaxu i wüxi i maxü i mexëchixü i tagutáma güxü i ñoma i naänecüāx i maxüärü yexeraxüchi ixixü. ¹⁸ Rū tama ngëma ñuxma nüxü idauxügu nixî itarüxínüëxü, natürü nagu tarüxínüë i ngëma ñuxma tama nüxü idauxü. Erü ngëma ñuxma nüxü idauxü rü tama natai, natürü ngëma ñuxma tama nüxü idauxü, rü guxügutáma nangëxmaëcha.

5

¹ Rū nüxü tacuèxgü ega ngëxguma iyanaxoxgu i ñaã toxone i paxaächi ñuxma toxü ngëxmaxü, rü daxüguxü i nañewa tá tanayaxu i wüxi i toxone i tagutáma iyarüxoxü i Tupanatama toxçex mexëëxü rü tama i duüxügü. ² Rū ngëmacëx i ñuxma i ñaã toxonewa tamaxëyane, rü tama aixcüma tataäëgü. Erü tanaxwëxe na paxa toxü nangëxmaxü i ngëma toxone i daxüguxü i nañewa ngëxmaxü. ³ Rū ngëma toxone i daxüguxü i nañewa tá toxü ngëxmaxü rü ñoma wüxi i naxchirurüü tá toxü nidüxü, na ngëmaäcü naxäxünexüçex i toöë. ⁴ Rū ñaã toxone i ñuxma toxü ngëxmaxüwa tamaxëyane, rü tanaxjächiäëgü rü tama aixcüma tataäëgü. Rū tama aixcüma ítanatáxchaü i toxone i ñoma i nañewa toxü ngëxmaxü, natürü tanaxwëxegü na tanayaxuxü i toxone i ngexwacaxüxü na ngëmaäcü ngëma maxü i ngexwacaxüxü iyanaxoxëëxüçex i toxone i ñuxma toxü ngëxmaxü. ⁵ Rü Tupana nixî ya toxü imexëécü naxçex i ngëma ngexwacaxüxü i maxü rü ngëma ngexwacaxüxü i toxone. Rü toxna nanamu ga Naã i Üünexü na ngëmawa nüxü tacuáxüçex na aixcüma tá tanayaxuxü i ngëma. ⁶ Rū ngëmacëx taxucëxma taxoegaäëgü. Erü nüxü tacuèx rü ñuxma ñaã toxonewa tamaxëyane, rü taxucürüwama törü Corixütawa tangëxmagü i daxüguxü i nañewa. ⁷ Rū woo tama nüxü tadaugügu ya yima törü Cori i ñuxmax, natürü tayaxôgü na wüxi i ngunexü rü tá nüxü tadaugüxü. Rū ngëma nixî i toxü poraxëëxü i ñaã torü maxüwa. ⁸ Rū ngëmacëx taxucëxma taxoegaäëgü ega tayuegu. Erü toxçex rü narümemaë nixî na nüxna ítachoxüxü i ñaã toxone, na törü Corixütawa tayangëxmagüxüçex. ⁹ Rū ngëmacëx, woo ñoma i toxonewa tangëxmagügu rü éxna tama nawa tangëxmagügu, rü tanaxwëxe na guxüguma törü Coriarü ngüchaü na taxüxü. Rū ngëmacëx naxçex tadaugü na tanaxüxü i ngëma nanaxwëxexü i nümax. ¹⁰ Erü guxütama i yixema rü Cristupëxewa tá tangügu na wüxichigü nayaxuxüçex i ngëma tüxna üxü. Rū nüma tá wüxichigüxü nangugüarü maxüāx. Rū ngëxgumarüü na ñuxäcü meã imaxëxü rü éxna chixri imaxëxü ga yexguma ñoma ga taxünewa iyexmagügu, rü ngëmaäcü tá tüxna nanaxā ya wüxichigü.

Cristu rü taxçex Tupanaxü narüngüxmüxëë

11 Rū ngēmacēx Tupanaārū orearū uwa tapuracūe rū tayaxucūxēgū i duūxūgū na yaxōgūāxūcēx. Erū toma rū aixcūma torū Corixū tamuūē. Rū Tupana toxū nacuēx na űuxācū yīixū i tōrū maxū, rū chierūna pema rū chi ta toxū pecuēxgux. 12 Rū tama tanaxwēxe i wenaxārū togūētūwa tidexagū, natūrū pexū tarūngūxēchaū na pexū nangēxmaxūcēx na tacūcēx tomaā petaāēgūxū na nūxū pecuāxūcēx na űuxācū penangāxūxū i ngēma duūxūgū i pepēxewa nūgū írūmegūnetaxū natūrū norū maxūwa rū tama ixaixcūmagūxū. 13 Rū woo duūxūgū toxū daugūgu na Tupanagu taxāūāēgūxū, rū nūētama nixī i ngēma erū nūmatama ya Tupana rū meāma toxū nacuēx. Natūrū i pema rū meāma toxū pecuēx na meāma toōēxū tacuāācūma pemaā nūxū tixuxū ga norū ore. 14 Rū Cristu ya poraācū toxū ngechaūcū nixī ya űuxma tomaā icuācū, erū tayaxō na nūma rū guxāārū pecaducēx nayuxū na yexma yanaxoxūcēx ga guxāārū chixexūgū. 15 Rū yemaācū guxūma ga duūxūgūcēx nayu ga Cristu, na ngēma duūxūgū i űuxma maxēxū, rū tama nūmatama nagu naxīnūēxūgu namaxēxūcēx, natūrū naxcēx na namaxēxūcēx ya yima naxcēx yucū rū wena írūdacū. 16 Rū ngēmacēx i toma rū tama űoma i naāncēūāx i duūxūgū nagu rūxīnūēxūrūū texēxū tangūgūarū maxūāx. Rū woo ga űpa rū űoma ga naāncēūāx ga duūxūgū nagu rūxīnūēxūrūū Cristuxū tangūgu, natūrū i űuxma rū tama ngēmaācū namaā nagu tarūxīnūē. 17 Rū ngēxguma texē Cristuaxū yaxōxgu, rū ngexwacaxūxū i duūxū tixī. Rū nuxcūmaūxū ga tūmacūma rū marū tūxna inayarūxo, rū ngexwacaxūxū i maxū tūxū nangēxma. 18 Rū guxūma i ngēma rū Tupana nixī ya naxūcū. Rū nūma nixī ga Cristugagu tamaā inangūxmūxū. Rū űuxma rū toxū namu na duūxūgūmaā nūxū tixuxū na namaā inangūxmūēxūcēx. 19 Yerū Tupana rū Cristugagu duūxūgūmaā nūgū narūngūxmūxūēē. Rū tama duūxūgūarū pecadugu naxīnūācūma nanaxū ga yema. Rū űuxma rū toxū namu na ngēmachigaxū duūxūgūmaā tixuxū. 20 Rū ngēmaācū Cristuarū orearū ngeruūgū tixīgū, rū towa nixī i Tupana pexū cēēxūxū na namaā iperūngūxmūēxūcēx. Rū ngēmacēx Cristuégagu pexū tacēēxūgū na Tupana-maā iperūngūxmūēxūcēx. 21 Cristu rū tagama pecadu naxū. Natūrū tagagu nixī ga Tupana ga űoma pecaduāxūrūūācūma namaā naxūāxū na yemaācū nagagu tūxū inangūxūxēēxūcēx nawa i tōrū chixexū na aixcūma napēxewa imexūcēx.

6

1 Rū űuxma na Tupanaārū ngūxēēruū tixīgūxū, rū pexū tacēēxū na tama nūxū pexoexūcēx ga yema pemaā na namecūmaxū ga yexguma nayuxgu ga Nane. 2 Erū Tupana rū norū ore i űmatūxūwa, rū űanagūrū: “Rū yema ngunexū ga nagu namexūgu na choxū peyaxuxū, rū yexguma nixī ga pexū chaxīnūxū. Rū yexguma pexna chanaxūāxūgu ga maxū i tagama gūxū, rū yexguma nixī ga pexū charūngūxēēxū”, űanagūrū. Rū űuxma nixī i ngēma ngunexū i nagu namexū na Tupanaxū peyaxuxū, rū űuxma nixī i ngēma ngunexū i pexna naxuaxūāxū i maxū i tagama gūxū. 3 Rū toma rū guxūguma naxcēx tadau na guxāpēxewa meā tamaxēxū na taxucēxma texē chixri torū puracūchiga idexaxūcēx. 4-5 Rū guxūwama duūxūgūxū nūxū tadauxēēchaū na aixcūma Tupanaārū duūxūgū tixīgūxū. Rū ngēmacēx yaxna namaā taxīnūē i ngēxguma woo ngūxū toxū ngupetūgu, rū ēxna facū toxū tauxgu, rū ēxna tacū rū guxchaxū toxū ngēxmagu, rū ēxna toxū yaçuaixgūgu, rū ēxna toxū napoxcuegu, rū ēxna naxīxāchiāētanūgu rū tomaā nanuēgu. Rū poraācūxūchima tapuracūe, rū

ñuxguacū rü tama tapee, rü ñuxguacū rü taiya toxū nangux. Natürü yaxna namaā taxīnūē i guxūma i ngēma. ⁶ Rü ngexgumarūxū ta duūxūgūxū nūxū tadauxēē na aixcūma namexū i torū maxū, erū aixcūma Tupanapēxewa meā tamaxē, rü meā Tupanaxū tacuèx, rü yaxna duūxūgūmaā taxīnūē, rü namaā tamēcūma. Rü nūxū nūxū tadauxēē na towa nangēxmaxū i Tupanaāē i Ūñexū rü aixcūma guxū i duūxūgūxū tangechaūxū. ⁷ Rü duūxūgūxū nūxū tadauxēē na aixcūma namexū i torū maxū, erū namaā nūxū tixu i ngēma ore i aixcūma ixīxū, rü itanawēx i Tupanaārū pora i towa ngēxmaxū. Rü ngēma toxne ixīxū rü ngēma nixī i torū maxū i aixcūma mexū i Tupanapēxewa. Rü ngēmamaā nixī i togū itapoxūxū i torū uwanūgūpēxewa. ⁸ Rü ñuxguacū i duūxūgū rü toxū nicuèxūūgū, rü ñuxguacū rü facū tomaā nixugūē. Rü ñuxguacū rü meā tochiga nidexagū, rü ñuxguacū rü chixri tochiga nidexagū. Rü woo aixcūmachirēx yixīgu i ngēma ore i nūxū tixuxū, natürü doratēēx toxū nawogūē. ⁹ Rü woo meā toxū nacuèxgūchirēxgu, natürü ñoma tama toxū nacuāxūrūū tomaā nixīgū i duūxūgū. Rü ñuxguacū rü wixgutaèx tayue, natürü naetūwa tamaxēāma. Rü toxū napoxcue, natürü tama toxū nadaixichi. ¹⁰ Rü woo tangechaūgūgu, natürü guxūguma tataēgūama. Rü woo ñoma i naānewa tama tamuārū ngēmaxūāxgūgu, natürü muxūma i duūxūna tanaxā i taxū i mexū erū togagu nanayaxu i maxū i taguma gūxū. Rü woo taxuūma toxū ngēxmēxgu i ñoma i naānewa, natürü daxū-guxū i naānewa rü toxū nangēxma i guxūma. ¹¹ Pa Chaueneēgū i Corŷtiucūāx, dūcax aixcūma pemaā nūxū tixu rü guxū i torū maxūnemaā pexū tangechaūgūxūchi. ¹² Rü toma rü tama pexū taxoe, natürü pema waxi nixī i tama petoxwēxexū. ¹³ Rü dūcax, Pa Chaueneēgū, rü ñoma wūxi i papā naxācūgūxū cēxūlxūrūū pexū chacēxū na choxū pengechaūgūxūcēx ngēma choma pexū changechaūxūrūū.

Tupana ya maxūcūpata tixīgū

¹⁴ ;Rü tāūtāma namaā pexāmūcū i ngēma duūxūgū i tama yaxōgūxū! Erū ngēxguma chi ngēmaācū penaxūxgu rü tāūtāma guxū wūxigu perūxīnūē. ;Rü ñuxācū nawūxiguxū i ngēma mexū namaā i ngēma chixexū? ;Rü ñuxācū nawūxigu i ngōonexū namaā i ēānēxū? ¹⁵ ;Rü ñuxācū nawūxiguxū ya Cristu namaā i Chataná? ;Rü ñuxācū nawūxiguxū i wūxi i duūxū i yaxōxū namaā i wūxi i duūxū i tama yaxōxū? ¹⁶ ;Rü ñuxācū Tupanapatawa nangēxmaxū i tupanetachicūnēxāgū? Erū yixema rü Tupana ya maxūcūpata tixīgū, rü tawa namaxū i nūmax. Rü Tupana rü pechiga nidexa ga yexguma ñaxgu: “Rü ngēma duūxūgūwa tá chamaxū, rü natanūgu tá chayarūxūūxū. Rü norū Tupana tá chixī, rü nūmagū rü tá chorū duūxūgū nixīgū”, ñaxgu. ¹⁷ Rü yemacēx ñanagūrū ta ga tōrū Cori: “;Rü ípechoxū i natanūwa i ngēma duūxūgū i tama chorū duūxūgū ixīgūxū! ;Rü tāxū i nūxū pingōgūxū i ngēma chopēxewa chixexū! Rü choma rü tá pexū chayaxu. ¹⁸ Rü choma rü Penatū tá chixī, rü pemagū rü tá chaūnegū rü chauxacūgū pixīgū”, ñanagūrū ya tōrū Cori ya Tupana ya guxūārū yexera poraxūchicū.

7

¹ Rü dūcax, Pa Chaueneēgū ya Pexū Changechaūgūxex, rü ngēma Tupanaārū unetagū i pemaā nūxū chixuxū, rü taxcēx nixīgū. Rü ngēmacēx tanaxwēxe na yigūna idaugūxū na tama taxūnemaā rü ēxna taāēmaā naxūxūcēx i ngēma Tupanapēxewa tama mexū. Rü tanaxwēxe i aixcūma Tupanaxū imuūēācūma nūxna yigū taxāgū rü naxcēxicatama tamaxē.

Pauru rū ngema Corŷtiucŷġxgŷmaā nataāxē

² Rū tanaxwēxe i toxŷ pengechaŷgŷ. Rū dŷcax ga toma rū taxŷxemaāma chixexŷ taxŷgŷ. Rū taxŷxexŷma chixexŷgu tanguxēē. Rū taxŷxexŷma tawomŷxēēgŷ. ³ Rū tama pexŷ chixuxŷcēx nixŷ i pemaā nŷxŷ chixuxŷ i ngēma. Yerŷ marŷ pemaā nŷxŷ chixu na ŷŷuxācŷ guxŷ ga chorŷ maxŷmaā pexŷ changechaŷŷ. Rū ngema pexŷ na changechaŷŷŷgagu rū ŷchamemare na petanŷwa chamaxŷŷŷ rū ēxna wŷxigu pemaā chayuxŷ. ⁴ Rū ŷŷxma rū taxucēxma pexŷ chaxāneācŷma pemaā chidexa erŷ poraācŷ pemaā chataāē. Rū woo ngŷxŷ na tingegŷxŷ, natŷrŷ aixcŷma choxŷ penangŷchaŷŷxēē rū choxŷ petaāēxēē. ⁵ Rū yexguma Machedōniāānewa tangugŷgucŷrŷwa rū taguma itarŷngŷgŷ. Yerŷ guxŷwama ga ngexta itaxŷŷwa rū nŷxŷ itayangau ga guxchaxŷgŷ. Rū duŷxŷgŷ rū toxŷ nanaguxchaxēē na tanaxŷxŷ i Tupanaarŷ puracŷ rū yemacēx poraācŷ taxoegaāxēgŷ. ⁶ Natŷrŷ ya Tupana ya tŷxŷ taāēxēēcŷ ya yŷxema ngechaŷgŷxe, rū toxŷ rū ta nataāēxēē ga yexguma toxŷtawa nanguxgu ga taeneē ga Titu. ⁷ Rū tama yema toxŷtawa na nanguxŷcēxicatama tataāēgŷ, natŷrŷ tataāēgŷ ta yerŷ ga pema rū poraācŷ nŷxŷ penangŷchaŷŷxēē rū penataāēxēē ga guma taeneē ga Titu. Rū nŷma ga Titu rū tomaā nŷxŷ nixu na ŷŷuxācŷ poraācŷ penaxwēxexŷ na toxŷ pedauxŷ. Rū tomaā nŷxŷ nixu na ŷŷuxācŷ naxcēx pengechaŷgŷxŷ ga yema chomaā pexŷŷ, rū na ŷŷuxācŷ chauxcēx pexoegaāēgŷxŷ. Rū gŷxŷma ga yema oremaā rū yexeraācŷ chataāē. ⁸ Choma nŷxŷ chacuēx rū yema popera ga pexcēx chaxŷmatŷxŷ rū pexŷ nangechaŷgŷxēē, natŷrŷ ŷŷxma rū marŷ tama naxcēx changechaŷ na chanaxŷmatŷxŷ ga yema popera. Rū noxri rū yemaācŷ naxcēx changechaŷ ga yexguma nŷxŷ chacuēxgu ga na pexŷ nangechaŷgŷxēēxŷ ga yema popera ga yexguma penayauxgu. ⁹ Natŷrŷ i ŷŷxma rū chataāē na pexcēx chanaxŷmatŷxŷ ga yema popera. Rū tama yema na pengechaŷgŷxŷcēx chataāē, natŷrŷ chataāē yerŷ yema perŷ ngechaŷgagu Tupanana pecuēxāchie rū penaxŷchicŷŷ ga perŷ maxŷ. Rū pema rū aixcŷma Tupanana pecuēxāchieācŷma namaā peporae ga yema ngechaŷ, rū yemaācŷ taxŷŷma ga chixexŷ pemaā taxŷ ga yexguma pexcēx tanaxŷmatŷgu ga yema popera. ¹⁰ Rū ngēma ngechaŷ i Tupana naxwēxexŷācŷma namaā iporaexŷ, rū name nixŷ, erŷ ngēma ngechaŷgagu naxŷchicŷŷ i tōrŷ maxŷ rū ngēmagagu tanayaxu i maxŷ i taguma gŷxŷ. Rū ngēmacēx taxucēxma naxcēx pixāŷxāchie i ngēma ngechaŷ. Natŷrŷ ngēma ngechaŷ i ŷŷoma i naānecŷġx i duŷxŷgŷ nŷxŷ ngēxmaxŷ rū taxuwama name erŷ yuwa nanaga. ¹¹ Rū yexguma yema poperamaā pexŷ changechaŷŷxēēgŷ, rū Tupana naxwēxexŷācŷma nixŷ ga namaā peporaexŷ ga yema ngechaŷ. jRū dŷcax i ŷŷxma i taēcŷ Tupana pemaā ŷxŷ i ngēma perŷ ngechaŷgagu! Yerŷ yema perŷ ngechaŷgagu rū aixcŷma nagu perŷxŷnŷē ga yema chixexŷ ga petanŷwa ŷpetŷxŷ, rū meāma chomaā nŷxŷ pixu ga yema. Rū yema perŷ ngechaŷgagu rū peāēwa nangux ga yema chixexŷ, rū poraācŷ Tupanaxŷ pemuēē. Rū yemacēx penaxwēxe na yēma chaxŷxŷ na pexŷ chayarŷngŷxēēxŷcēx yerŷ penamexēēgŷchaŷ ga yema chixexŷ. Rū yema perŷ ngechaŷgagu rū aixcŷma penaxucŷxē ga yema duŷxŷ ga chixexŷ ŷxŷ. Rū guxŷ ga yemawa rū ipenawēx na tama pegagu yŷŷxŷ ga yema chixexŷ ga ngu-petŷxŷ. ¹² Rū yemacēx, yexguma pexcēx chanaxŷmatŷgu ga yema popera, rū tama yema duŷxŷ ga chixexŷ ŷxŷgu charŷxŷnŷācŷma chanaxŷmatŷ, rū tama yema duŷxŷ ga namaā chixexŷ naxŷŷgu charŷxŷnŷācŷma chanaxŷmatŷ. Natŷrŷ chanaxŷmatŷ ga yema popera na yemawa Tupanapēxewa nŷxna pecuēxāchixŷcēx na ŷŷuxācŷ aixcŷma toxŷ pengechaŷgŷxŷ. ¹³ Rū yema na

toxū pengechaūgūxū, rū wūxi ga taāē nixī ga toxcèx. Natūrū yema taāēārū yexera nixī ga yema taāē ga toxū yexmaxū ga yexguma nūxū tadēuxgu ga Titu ga űuxācū taxū ga taāē petanūwa na nayaxuxū. Rū aixcūma guxāma ga pema nixī ga wenaxārū poraācū nūxū penangūchaūxēēxū. ¹⁴ Rū noxri tauta yēma naxūxgu ga Titu, rū namaā nūxū chixu na mexū i duūxūgū na pixīgūxū. Rū űuxma rū taxucēxma chaxāne, erū guxūma ga yema Titumaā nūxū chixuxū ga pechiga rū aixcūma ngēmaācū nixī, yexgumarūū na aixcūma yīxū ga guxūma ga yema Tupanaārū ore ga pemaā nūxū tixuxū. ¹⁵ Rū űuxma i Titu rū yexeraācū pexū nangechaū i ngēxguma nūxna nacuēxāchigu na űuxācū meā naga pexīnūēxū rū űuxācū nūxū pengechaūācūma meā penayaxuxū. ¹⁶ Rū choma rū ta poraācū pemaā chataāēxūchi, erū nūxū chacuēx na aixcūma peyanguxēēxū ga guxūma ga yema pemaā nūxū chixuxū.

8

Yema yaxōgūxū rū woo tama na namuārū dīeruāxgūxū, natūrū yema nūxū yexmacū ga dīerumaā meā togūxū narūngūxūxēēgū

¹ Rū űuxmax, Pa Chaueneēgūx, rū pemaā nūxū tixuxchaū na űuxācū Tupana namaā mecūmaxū i ngēma yaxōgūxū i Machedōniāāneārū iānegūwa ngēxmagūxū. ² Rū woo taxū ga guxchaxūgū nūxū na űpetūgūxū, natūrū nataāēgūama. Rū woo tama na namuārū dīeruāxgūxū, natūrū yema nūxū yexmacū ga dīerumaā meā togūxū narūngūxūxēēgū. ³ Rū choma nūxū chadau rū pemaā nūxū chixu rū nūmagū rū taāēācūma ngīxū inaxāgū ga guxcūma ga dīeru ga nūxū tauxchacū na ngīxū inaxāgūxū. Rū ngīetū yemaārū yexera taāēācūma ngīxū inaxāgū. ⁴ Rū poraācū toxū nacēxūgū na tama nūxna tanachūxuxūcèx na yemaācū yema togū ga taeneēgūxū nangūxēēgūxūcèx. ⁵ Rū yema nagu tarūxīnūēxūārū yexera ngīxū inaxāgū ga yema yaxōgūxū ga Machedōniāānecūāx. Yerū Tupananaxīra nūgū naxāgū rū yemawena toxna nūgū naxuaxūgū na toga naxīnūēxūcèx, yema Tupana naxwēxērūū. ⁶ Rū yemacèx Tituxū tacēēxū na wena petanūwa naxūxūcèx na ngīxū pinguxēēxūcèx ga yema dīeru ga marū pemaā ngīxū inaxūgūcū na ngīxū penutaquēxexū naxcèx i ngēma togū i taeneēgū i nūxū nataxuxū. ⁷ Pema rū guxūwama meā ipexī erū meā peyaxōgū, rū pexū natauxcha na meā nūxū pixuxū i Tupanaārū ore erū meā nūxū pecuēx na űacūchiga yīxū. Rū aixcūma togūxū perūngūxūēēchaū, rū yema pexū tangūxēēxūācūma pegū pengechaūgū. Rū űuxma rū ngēxgumarūū ta penaxwēx na aixcūma meā ipexīxū nawa i ngēma mexū i nacūma na dīeru ngīxū ipexāxū naxcèx i ngēma taeneēgū i nūxū nataxuxū. ⁸ Tama wūxi i mu nixī i ngēma pemaā nūxū chixuxū. Natūrū chanaxwēxemare na nūxū pecuāxū na űuxācū taāēācūma ngīxū inaxāgūxū ga togū ga yaxōgūxū. Rū pemaā nūxū chixu i ngēma na pema rū ta ngīxū ipexāgūxūcèx i ngēma dīeru i togū i taeneēgūārū ngūxēēcèx ixīcū, na ngēmaācū ipenawēxūcèx na aixcūma nūxū pengechaūgūxū. ⁹ Erū pema rū marū nūxū pecuēx na űuxācū tamaā namecūmaxū ga tōrū Cori ya Ngechuchu ya Cristu. Rū woo nūxū nayexma ga guxūma, natūrū űoma wūxi ga ngearū yemaxūāxūrūū pexcèx nūgū nixīxēē na ngēmaācū pexū nangēxmaxūcèx i muxūma i mexūgū. ¹⁰ Rū űuxma rū perū mexūcèx nixī i pemaā nūxū chixuxū i ngēma dīeruārū nutaquēxechiga. Rū taunecū ga ngupetūcūgutama nixī ga ipenaxūgūxū ga ngīxū na penutaquēxexū. Rū yema rū aixcūma perū ngūchaūmaā nixī ga penaxūxū. ¹¹ Rū űuxma rū yema noxri na meā ipenaxūgūxūrūū, rū name nixī i taāēācūma rū perū ngūchaūmaā

peyanguxēē rü ngēma dīeru i pexū ngēxmacūwa ngīxū ipexā naxcèx i ngēma peeneēgū i nūxū nataxuxū. ¹² Erū ngēxguma aixcūma wūxi ya duūxē tūmaārū ngūchaūmaā ngēma dīeru i tūxū ngēxmèxcūwa tūmaēneēcèx ngīxū itaxāxgu, rü Tupana rü taāēācūma ngīxū nayaxu. Erū nūma ya Tupana rü taguma tūxna ngīxcèx naca i ngēma tūxū taūxcū. ¹³ Rū ngēmacèx tama chanaxwèxe i ngēma togūxū na perūngūxēēxūngagu pexū nataxu i pemax. ¹⁴ Natūrū chanaxwèxe i guxāma tūxū nangēxma i tacū i tanaxwèxexū, erū tama name na texéaxū nataxuxū i tacū. Rū űuxma na pexū nangēxmaxū i perū dīeru, rü name nixī i nūxū perūngūxēēgū i ngēma taeneēgū i nūxū nataxuxū. Rū ngūrūāchi to i ngunexūgu i pema pexū nataxūgu, rü nūmagū rü tá nūxū nūxū nangēxma na pexū nangūxēēgūxcèx. Rū ngēmaācū tá guxātama tawūxigu.

¹⁵ Rū Tupanaārū ore i űmatūxūwa rü űnanagūrū:

“Guxema muxūma tūxū yexmaxē rü taxūlma tūxū ínayaxū. Rū guxema noxretama tūxū yexmaxē rü tama tūxū inayataxu”,
 űnanagūrū.

Titu rü namücügūchiga

¹⁶ Natūrū Tupanana moxē chaxā, erū nūma rü Tituxū nagu narūxīnūxēē na aixcūma pexū nangūxēēxūxcèx, ngēma choma pegu charūxīnūxūrū. ¹⁷ Rū nūma ga Titu rü: “Ngū” űnanagūrū na wena petanūwa chanamuxū. Yerū nūma rü woetama porāācū pegu narūxīnū. Rū ngēmacèx i űuxma rü wena petanūwa naxū, erū nūxū nangūchaū. ¹⁸ Rū Titumaā ngema tanamu i wūxi i taeneē i guxūma i yaxōgūxū nūxū ngechaūgūxū erū nūma rü aixcūma meā nūxū nixu i Tupanaārū ore i tūxū maxēxēxū. ¹⁹ Rū tama ngēmacèxicatama nixī. Erū guxūma i ngēma yaxōgūxū rü ngēma taeneēxū naxunetagu na toxū íyaxūmūcūxūxcèx rü toxū nangūxēēxūxcèx i ngēxguma Yerucharēuwa ngīxū tangexgu i ngēma dīeru, na ngēmaācū nūxū ticuēxūūgūxūxcèx ya tórū Cori, rü na guxāma nūxū dauxūxcèx na űuxācū taāēācūma yigū rūngūxēēgūxū.

²⁰ Rū ítayaga i ngēma taeneē, erū tama tanaxwèxe i texé toxū tixu i yixcama ngīxcèx i ngēma tacū i dīeru i taeneēgūxcèx ngīxū inutaquēxegūcū. ²¹ Erū tama Tupanapēxewaxicatama tanaxwèxe na meā tanaxūxū, natūrū guxū i duūxūgūpēxewa rü ta tanaxwèxe na meā tanaxūxū. ²² Rū Titumaā rü ngēma to i taeneēmaā petanūwa tanamu i wūxi i to i taeneē i toxū nūxū dauxēēxū na aixcūma nūxū nangūchaū na naxūāxū i Tupanaārū puracū. Rū űuxma rü yexeraācū petanūwa naxūchaū i nūmax, erū nūxū nacuèx na űuxācū pema rü taāēācūma togūxū na perūngūxēēgūchaūxū. ²³ Rū ngēxguma texé pexna caxgu na texe yīxū ya Titu, jrū tūmamaā nūxū pixu na nūma rü chomūcū ya wūxiwa chomaā pexcèx puracūcū na yīxū! Rū ngēma taxre i togū i namücūgū, rü ngēma nixī i yatūgū i guxūma i yaxōgūxū nūxū unetagūxū na Cristuarū puracū naxūgūxūxcèx. Rū nūmagū rü aixcūma norū maxūmaā Cristuxū nicuēxūūgū. ²⁴ Rū ngēmacèx chanaxwèxe i ngēma taeneēgūxū nūxū pedauxēē na aixcūma nūxū pengechaūgūxū, na guxūma i yaxōgūxū nūxū cuēxgūxūxcèx i ngēmachiga. Rū ngēmaācū guxūma i ngēma yaxōgūxū tá nūxū nacuēxgū na aixcūma yīxū i ngēma mexū i ore i pechiga namaā nūxū tixuxū.

9

Yema dīeru ga yema togū ga yaxōgūxūxcèx ngīxū inutaquēxegūchiga

¹ Rū taxucèxma tūxcūl pexcèx chanaxūmatū ngīchiga i ngēma dīeru i ngīxū penutaquēxegūcū naxcèx i ngēma taeneēgū i yaxōgūxū i Yudéanewa ngēxmagūxū. ² Erū marū nūxū chacuèx rü perū ngūchaūmaā ipenaxā i

ngēma dīēru. Rū guxūguma taāēācūma ngēma yaxōgūxū i Machedóniāānewa ngēmagūxūmaā nūxū chixu na űuxācū i pema i Acayaanewa ngēmagūxe rū naī ya taunecūgutama marū ípememarexū na ngīxū ípexāgūxū i ngēma dīēru. Rū yema rūmumaēxū ga yaxōgūxū ga Machedóniāānecūāx, rū yexguma nūxū naxīnūēgu na űuxācū taāēācūma togūcēx ngīxū na ípexāgūxū i perū dīēru, rū nūmagū rū tá inanaxūgū na ngīxū inaxāgūxū. ³ Natūrū i űuxma rū ngema petanūwa chanamugū i ngēma taeneēgū na nūxū nadaugūxūcēx, na aixcūma yīxū i ngēma nūxū chixuxū i pechiga. Rū chanaxwēxe na aixcūma ípememarexū na ngīxū ípexāxū i ngēma dīēru, ngēma taeneēgūmaā nūxū chixuxūrū. ⁴ Erū ngēxguma chi űuxre i taeneēgū i Machedóniāānecūāx rū ngūrūāchi chomaā petanūwa naxīxgu, rū tama chanaxwēxe na pexū na iyangauxū na tama aixcūma ípememarexū na ngīxū ípexāxū i ngēma dīēru. Rū toxū rū chi wūxi i ānexūchi nixī, erū marūchirēx namaā nūxū tixu na űuxācū aixcūma ípememarexū na ngīxū ípexāxū i ngēma dīēru. Rū maneca pexū rū chi ta wūxi i ānexūchi nixī. ⁵ Rū ngēmacēx nixī i chauxcēx namexū na naxcēx íchaçaxū i ngēma taeneēgū na nūxīra petanūwa naxīxūcēx rū nūmatama pexū yanangūxēēgūxūcēx na ngīxū penutaquēxegūxūcēx i ngēma dīēru ga űpamama ngīxū pixucū. Rū ngēmaācū aixcūma tá ímemeare i ngēma dīēru i ngēxguma ngema changuxgu. Rū togū tá nūxū nadaugū na aixcūma perū ngūchaūmaā yīxū na ngīxū ípexāgūxū rū tama aūācūma na yīxū. ⁶ Rū nūxna pecuēxāchie i ngema dexa i űaxū:

“Rū yīxema noxretama i nanetūchire itoxe, rū noxretama i norū o tayaxu.

Natūrū yīxema muxū i nanetūchire itoxe, rū muxūma i norū o tayaxu”, űaxū! ⁷ Rū wūxichigū tanaxwēxe na ngīxū itaxāxū i ngēma ngīgu tarūxīnūcū na űuxre ngīxū itaxāxchaūxū. Rū tama name i aūācūma ngīxū itaxā rū ēxna texē tūxū muācūma ngīxū itaxā. Erū Tupana rū nūxū nangeçau i ngēma duūxū i taāēācūma ngīxū ixāxū. ⁸ Rū Tupanamēxēwa nangēxma na poraācū pexna naxāāxūcēx i guxūma i mexū i pexū taxuxū, na guxūguma pexū nangēxmaxūcēx i ngēma penaxwēxexū rū naetū na pexū íyaxūxūcēx na togūxū namaā perūngūxēēgūxūcēx. ⁹ Tupanaārū ore i űmatūxūwa rū űanagūrū:

“Yīma yatū ya mecū rū norū ngūchaūmaā meā inanaxā nūxna i ngēma duūxūgū i taxuūma nūxū ngēxmaxū. Rū Tupana rū tá guxūgu nūxna nacūxāchi na űuxācū namecūmaxū i nūmax”,

űanagūrū. ¹⁰ Tupana nixī ya tūxna naxācū ya nanetūchire na inatoxūcēx, rū tūxna naxācū i ōna na nangōxūcēx. Rū nūma tá nixī i pexna naxāāxū ya guxūnema ya nanetūchire ya penaxwēxene na ípenatoxūcēx. Rū nūma tá nanaxūxēē rū nanayaxēē ya yīma nanetūchire. Rū tá nanamuxēē i norū o, na muxūchixū nawa peyaxuxūcēx na ngēmamaā togūxū perūngūxēēgūxūcēx.

¹¹ Rū ngēmaācū i pema rū tá pexū nangēxma i guxūma i mexū na taxūchaācūma nūxū perūngūxēēgūxūcēx i togū. Rū ngēxguma ngēma togū i taeneēgūxūtawa ngīxū tangegūgu i ngēma dīēru i naxcēx ngīxū ípexācū, rū nūmagū rū tá poraācū Tupanana moxē naxāgū ngīxcēx. ¹² Erū ngēxguma nūxna ngīxū taxāxgu i ngēma dīēru i nūxū ngīmaā perūngūxēēgūcū i ngēma taeneēgū, rū tama űacu i nūxū taxuxūcēxicatama ta nixī, natūrū naetū i nūmagū i taeneēgū rū perū āmaregagu tá poraācū Tupanana moxē naxāgū.

¹³ Rū nūmagū i ngēma taeneēgū rū tá Tupanaxū nicūxūūgū, erū ngēma perū āmaremaā tá nūxū nūxū pedauxēē na aixcūma naga pexīnūēxū i Cristuarū ore i mexū. Rū nūmagū rū tá Tupanana moxē naxāgū naxcēx i ngēma perū

āmare i perū ngúchaūmaā nūxna rü guxūma i yaxōgūxūna pexāgūxū. ¹⁴ Rü ngēxgumarūi i ngēma taeneēgü rü tá poraācü pexcēx nayumūxēgü, erü pexū nangechaūgü. Rü tá Tupanana moxē naxāgü naxcēx na űuxācü nūma ya Tupana poraācü pexū nangūxēēxū na yemaācü pexū natauxchaxūcēx na nūxū perūngūxēēgūxū. ¹⁵ Rü ngēmacēx i űuxma rü Tupanana moxē taxā, yerü tūxna nanamu ga Nane na tōrū āmare yīixcēx. Rü nataxuma i ore i nagu mexū na nūxū ixuxūcēx na űuxācü namaā itaāēgūxūchixū i ngēma āmare.

10

Pauruarü ore rü aixcūma nixī yerü Tupana nixī ga nūxna āgacī

¹ Rü űuxma rü yema Cristu yaxna tamaā naxīnūxūrūi rü tamaā namecūmaxūrūi, rü choma rü ta pemaā yaxna chaxīnūācūma rü pemaā chamecūmaācūma pexū chacēxū na chauga pexīnūēxūcēx. Erü nūmaxū i duūxūgü rü nūxū nixugū na pexū chamuūxū ega pexūtawa changēxmagu natürü ngēxguma pexna chaxaxūgu rü tama pexū chamuū. ² Natürü ngēxguma ngema petanūwa chaxūxgu, rü chierü natauxguma na űacūcēx namaā chaporagaxū rü na chanaxucūxēxū i ngēma duūxūgü i petanūwa toxū ixuxū na űoma tama yaxōgūxūrūi na tamaxēxū. Erü choma rü íchamemare na namaāxūchi na chidexaxū. ³ Rü aixcūma woo duūxūgü tixīgü natürü tama űoma i naanecūāxrxūxū togū tadai i ngēxguma ítanapoxūgu i Tupanaarū ore. ⁴⁻⁵ Erü ngēma toxne i namaā ítanapoxūxū i Tupanaarū ore rü tama űoma i naānecūāx namaā āxnexū nixī. Erü toma rü toxū nangēxma i Tupanaarū pora na ngēmamaā itayanaxoxēēxūcēx i Chatanāarū pora. Rü ngēmaācü itayanaxoxēē i guxūma i chixexū i ore i Tupanaxū namaā yaxugūgūxū i duūxūgü. Rü ngēmaācü itayanaxoxēē i guxūma i Tupanaarū uwanūgūarū ore i nūgū namaā yacuēxūgūācūma duūxūgūmaā nūxū yaxugūgūxū na tama Tupanaāxū yaxōgūāxūcēx. Rü guxūma i űacū i nagu naxīnūēxū i ngēma duūxūgü i chixexū, rü Cristuna tanaxuaxū na nūma namaā inacūāxūcēx. ⁶ Rü wūxicana marū meā Cristuga pexīnūēgu, rü toma rü ítamemare na tūxū tapoxcuexū ya guxāma ya texé ya tama naga īnūēxē i Cristuarū ore. ⁷ Pema rü norū dūxētūxūnewaxicatama nixī i penangugūxū i wūxi i duūxū. Natürü ngēxguma texé tūgū cuēxgu na Cristuarū duūxū tīixū, rü name nixī i nūxū tacuēx na toma rü ta tūmarūi Cristuarū duūxūgū tixīgūxū. ⁸ Rü woo írarūwa chanangupetūxēē na chaugū chicuēxūūxū namaā i ngēma na Tupana toxū muxū, natürü taxucēxma naxcēx chaxāne. Erü aixcūma Cori nixī ya toxū mucū na pexū tarūngūxēēgūxūcēx na yexeraācü meā peyaxōgūxūcēx. Rü tama űacū rü chixexūgu pexū na tayixēēxūcēx nixī i toxū namuxū. ⁹ Rü tama chanaxwēxe i nagu perūxīnūē na pexū íchabaixgūchaūxū namaā i ngēma poperagū i pexcēx chaxūmatūxū. ¹⁰ Erü nūmaxū i duūxūgü rü nūxū nixugū na chorū poperawaxicatama pexū íchabaixgūxū, natürü chomaxūchi pexūtawa changexmagu rü tama aixcūma nūxū chacuēx na űuācü mea chidexaxū na ngemaācü chauga pexū chaxīnūēxēēxūcēx, űaxūmaā choxū nixugūe. ¹¹ Natürü texe ya ngemaācü idexāxe rü tanaxwēxe i nagu tarūxīnū rü ngēma pexna tayaxūguācūma torū poperawa pemaā nūxū tixuxūrūi tátama tixīgū i ngēxguma petanūwa tangēxmagūgu. ¹² Toma rü tama tanaxwēxe i namaā togū tawūxīgūxēē rü ēxna nagu togū tangugū i ngēma duūxūgü i nūgūtama icuēxūgūxū. Nūmagū rü nūgūtama nawomūxēēgū, erü nūgūmaā nūgū nawūxīgūxēē rü nūgūtama nūgū nangugū. ¹³ Natürü toma rü tama togū namaā ticuēxūgū i ngēma yaxōgūxū i tama Tupana

toxmēxwa ngēxmagūxēēxū. Yerū Tupana nixī ga tomaā nūxū ixucū na ngextá nanaxwēxexū na tapuracūexū. Rū nūma nixī ga noxri Corŷtiuwa ga petanūwa toxū nangugūxēēxū na pemaā nūxū tixuxūcēx ga norū ore. ¹⁴ Rū yemaācū toxira nixī ga noxri petanūwa tangugūxū na pemaā nūxū tixuxūcēx ga yema Cristuarū ore. Rū ngēmacēx i ņūxma na petanūwa taxīxū, rū tama tanangupetūxēē ga yema Tupana tomaā nūxū ixuxū, yerū nūma nixī ga toxū namuxū na pexū tarūngūxēēgūxūcēx. ¹⁵ Rū ngemacēx tama togūarū puracūmaāmare nixī i togū ticuēxūūgūxū. Rū tama nūxū tachopetūchaū i ngēma Tupana tomaā nūxū ixuxū na pexū tangūxēēxū. Natūrū ngema pexū tanaxwaexū nixī na yexeraācū nūxū pecuáxū i Tupanaarū ore na ngemaācū yexera peyaxōgūxūcēx. ¹⁶ Rū ngēxguma marū petanūwa tangugūguwena rū tanaxwēxe i ngēma duūxūgū i perū yéamaxūra ngēxmagūxū i ngextá taguma texē nūxū íixuxūwa taxī na ngēmamaā rū ta nūxū tixuxūcēx i ore i mexū. Erū tama tanaxwēxe i togūarū puracūmaā togū ticuēxūūgū. ¹⁷ Erū Tupanaarū ore i ūmatūxūwa rū ņanagūrū:

“Rū ngēxguma texē tūgū icuēxūūchaūgu, rū name nixī i tōrū Corixū ticuēxūū, erū nūma nixī i tūxū nangūxēēxū”,
 ņanagūrū i ngēma ore. ¹⁸ Erū ngēma yatū i aixcūma Tupanapēxewa mexū rū tama nūgūtama nicuēxūū. Natūrū ngēma yatū i tōrū Cori nūxū icuēxūūxū nixī i aixcūma Tupanapēxewa mexū.

11

Pauru rū nūxū nixuchiga ga yema orearū uruūgūneta ga tama Tupana imugūxū

¹ Rū ņūxma i ngēma tá pemaā nūxū chixuxū, rū hexmana pexcēx rū wūxi i ngēāēmare nixī, natūrū chanaxwēxe i choxū iperūxīnūēmare rū yaxna chomaā pexīnūē. ² Erū Tupana pexū inuxūxūrūū pexū chinuxū. Erū chaugagū nixī i Cristuaxū peyaxōgūxū, rū marū Cristina pexū chaxuaxū na noxrūxicatama pixīgūxūcēx. Rū ngēmacēx chanaxwēxe i ngearū chixexūāē Cristuxū pexū chawēx ņoma wūxi i pacū i taguma yatūxū cuēxcūrūū. ³ Natūrū chaxoegaāē rū yema āxtape norū doramaā Ebaxū na womūxēēxūrūū, ngūrūāchi tā ta texē pexū tawomūxēē, na nūxū perūxoēxūcēx na Cristugu perūxīnūēxū rū naxcēxicatama na pemaxēxū. ⁴ Erū pema rū tauxchaācū nixī na pexū nawomūxēēgūxū. Rū ngēxguma ínangugūgu i duūxūgū i pemaā nūxū ixuxū i to i Ngechuchuchiga ya tama yima toma nūxū tixuchigacū, rū pema rū nūxū peyaxōgū i ngēma duūxūgū. Rū pema rū taēēacūma penayaxu i to i naāē i tama Tupanaāē i Ūūnexū ga marū peyaxuxū íxīxū. Rū peyaxōgū i to i ore i tama Tupanaarū ore i mexū ga noxri peyaxuxū íxīxū. ⁵ Dūcēx, rū woo nawe perūxīxgu i ngēma togū i orearū uruūgūneta, natūrū chauxcēx rū taxuwama choxū narūyexeragū. ⁶ Rū woo tama choxū nangēxmagu i tauxcha na duūxūgūpēxewa chidexaxū, natūrū aixcūma meā nūxū chacuēx i ngēma nachiga chidexaxū. Rū ngēma rū guxūma i torū puracūwa marū pexū nūxū tadauxēē i guxūguma. ⁷ ¿Pexcēx rū chixexū pemaā chaxū ga yexguma chaugū ícharūxīragu na pexū chataxēēxūcēx rū choxmēxmaā chapuracūgu na ngetanūācūma pemaā nūxū chixuxū ga Tupanaarū ore i tūxū maxēxēēxū? ⁸ Rū aixcūma yema togū ga yaxōgūxū choxna ngīxū āgūcū ga dīeru ngīxū chayaxu na yemamaā petanūwa chapuracūxūcēx rū pexū charūngūxēēxūcēx. ⁹ Rū yexguma petanūwa chayexmagu rū aixcūma choxū itaxu ga dīeru, natūrū taguma texēna ngīxcēx chaca. Rū taeneēgū ga

Machedóniãñewa ne ĭxŭl rŭ choxna ngŭxŭl naxãgŭ ga yema choxŭl taŭxcŭ. Rŭ yemaãcŭ tama pexŭtawa ngŭxcŭx ĭchaca ga yexguma. Rŭ ñuxma rŭ ta tagutãma tacŭcŭx pexna chaca. ¹⁰ Rŭ Cristu ya chowa ngexmacuẽgagu pemaã nŭxŭl chixu i ngema na aixcŭma ngetanũãcŭma petanũwa chapuracŭxŭl. Rŭ ngema rŭ chorŭ taãxẽ nixŭl. Rŭ taxucŭrũwa texe i guxŭl i Acãyaanewa choxna tanayaxu i ngema taãxẽ. ¹¹ ¿Rŭ tacŭcŭx yŭixŭl i ngẽmaãcŭ chidexaxŭl? ¿Ėxna pexcẽ rŭ tama pexŭl changechaŭxcŭx yŭixŭl i ngẽmaãcŭ chidexaxŭl? Dũcẽx, pemaã nŭxŭl chixu rŭ Tupana nŭxŭl nacuẽx na ñuxãcŭ aixcŭma pexŭl changechaŭxŭl. ¹² Natŭrŭ ngẽma na ngetanũãcŭma pemaã nŭxŭl chixuxŭl i ngẽma ore, rŭ ngẽmaãcŭ tá chanaxũecha na taxucŭrũwa chixri chauchiga yadexagũxcŭx i ngẽma togŭ i orearŭ uruũgũneta i nŭgŭ ixuxŭl na toxrũl naxũgũãxŭl i Tupanaãrŭ puracŭ. ¹³ Nũmagŭ rŭ aixcŭma orearŭ uruũgũneta nixŭgŭ, rŭ duŭxũgũxŭl nawomũxẽẽgŭ. Rŭ nũmagŭ rŭ togu nŭgŭ nicuxgŭ, rŭ nŭgŭ nixugŭ na Cristu yamugũxŭl. ¹⁴ Rŭ ngẽma rŭ taxucẽma namaã pebaĩãchiãẽgŭ. Erŭ woo i Chataná rŭ ta rŭ Tupanaãrŭ orearŭ ngeruũgŭ i daxũcũãx i yauracũxŭrũãcŭ nŭgŭ nangoxẽ. ¹⁵ Rŭ ngẽmacŭx woetama ngẽmaãcŭ nixŭgŭ i ngẽma duŭxũgŭ i Chatanáãxŭl puracũxŭl. Rŭ nũmagŭ rŭ duŭxũgŭ i mexŭl ũgũxŭgu nŭgŭ nicuxgŭ. Natŭrŭ ngẽma ngẽmaãcŭ ixŭgũxŭl, rŭ Tupana tá nanapoxcue naxcẽx i ngẽma chixexŭl i naxũgũxŭl.

Pauru rŭ yema puracŭ ga Ngechuchu nawa namuxũwa ngũxŭl ninge

¹⁶ Rŭ wena pemaã nŭxŭl chixu rŭ tama chanaxwẽxe i nagu perũxĩnũẽ na wũxi i ãũãẽxŭl chixŭl. Natŭrŭ ngẽxguma chi ngẽmaãcŭ chomaã nagu perũxĩnũẽgu, rŭ tama chanaxwẽxe i choxna penachuxu na ñoma wũxi i ãũãẽxŭrũl chaugũtũwa chidexaxŭl, na ngẽmaãcŭ choma rŭ ta ĩrarũwa chaugũtama chicuẽxũxũcŭx. ¹⁷ Rŭ ñuxma na chaugũtũwa chidexaxŭl rŭ ngẽma rŭ tama tórŭ Coriarŭ mu nixŭl. Natŭrŭ ñoma wũxi i ãũãẽxŭl nŭgŭ icuẽxũxŭrũl nixŭl chidexaxŭl. ¹⁸ Rŭ ñuxma na nangẽxmaxŭl i muxŭchixŭl i duŭxũgŭ i ñoma i naãnewa nŭgŭ icuẽxũgũxŭl, rŭ choma rŭ tá ta ĩrarũwa chaugũ chicuẽxũl. ¹⁹ Pema rŭ nagu perũxĩnũẽ rŭ nŭxŭl cuẽxũchigũxŭl pixŭgŭ. Natŭrŭ taãẽãcŭma yaxna namaã pexĩnũẽ i ngẽma duŭxũgŭ i tama naãẽxŭl icuãxŭl. ²⁰ Rŭ yaxna namaã pexĩnũẽ i ngẽma duŭxũgŭ i nŭgũxŭl pexŭl puracũxẽẽxŭl, rŭ ngẽma ngetanũãcŭma pexŭl puracũxẽẽmarexŭl, rŭ ngẽma pexŭl womũxẽẽgũxŭl, rŭ ngẽma chixri pexŭl yaxgũxŭl, rŭ ngẽma pemaã guxchigagũxŭl. ²¹ Rŭ woo wũxi i ãnẽxũchi nixŭl na pemaã nŭxŭl chixuxŭl, natŭrŭ chaucŭx rŭ tama aixcŭma pexŭl nŭxŭl tadauxẽẽ ga torŭ pora ga yexguma petanũwa tayexmagũgu. Natŭrŭ ñuxma na tama namũẽxŭl na nŭgŭ yacuẽxũgũxŭl i ngẽma togŭ i duŭxũgŭ, rŭ choma rŭ ta taxucẽma chamuŭl na chaugũtũwa chidexaxŭl woo pexcẽx rŭ taxuwama namexgu i ngẽma nŭxŭl chixuxŭl. ²² Nũmagŭ rŭ nŭgŭ yaxugũgu rŭ Yudũgu nixŭgŭ. Natŭrŭ choma rŭ ta Yudũu chixŭl. Rŭ nũmagŭ nŭgŭ yaxugũgu rŭ Iraẽtanũxũgŭ nixŭgŭ. Natŭrŭ choma rŭ ta rŭ Iraẽtanũxŭl chixŭl. Rŭ nũmagŭ rŭ nŭgŭ yaxugũgu rŭ Abrãũtanũxŭl nixŭgŭ. Natŭrŭ choma rŭ ta Abrãũtanũxŭl chixŭl. ²³ Nũmagŭ rŭ nŭgŭ yaxugũgu rŭ Cristuaxŭl napuracũe. Natŭrŭ choma rŭ norŭ yexera Cristuaxŭl chapuracũe. Rŭ ngẽma ñachagũrŭ pexŭl woo pema nagu perũxĩnũẽgu na ñoma wũxi i ãũãẽxŭrũl chidexaxŭl. Rŭ ngẽma duŭxũgũarŭ yexera poraãcŭ Tupanaãxŭl chapuracũe. Rŭ norŭ yexera chapoxcu, rŭ norŭ yexera choxŭl naçuaixgŭ ga duŭxũgŭ. Rŭ muẽxpũxcũma rŭ ãũcũmaxũchixũwa chayexma rŭ wixguxũchi taẽx choxŭl

nimèxgū. ²⁴ Rū 5 ĕxpūxcūna nixī ga 39 ga ɕuaximaā choxū napoxcugūxū ga chautanūxūgū ga Yudiūgū. ²⁵ Rū tomaĕxpūxcūna nixī ga naīmaā choxū naɕuaixgūxū, rū wūxicana ga nutamaā choxū inamuxūchigūxū. Rū tomaĕxpūxcūna nixī ga guma wapuru ga nagu chixūxūne rū chomaā inan-guxū. Rū wūxicana ga yexguma chomaā inanguxgu ga wapuru rū wūxi ga chūtaxū rū wūxi ga ngunexū chinge na taxū ga taxtūarū ngāxūttūgu mūrapewaētūgu chatunagūācūma chiwēxēxū. ²⁶ Rū poraācū nu ne chanaxū, rū poraācū ācūmaxūwa chayexma yerū natūgū ga ācūmaxūgu chixūgū, rū ngītēēxgūxū rū chixexū chomaā naxūgūchaū. Rū woo chautanūxūgū ga Yudiūgūtanūwa, rū woo yema duūxūgū ga tama Yudiūgū ixīgūxūtanūwa, rū woo īānegūwa, rū woo namagūwa, rū woo taxtū i taxūwa rū ācūmaxūwa chayexma. Rū yema duūxūgū ga chomūcūgūneta ixīgūxūtanūwa rū ta ācūmaxūwa chayexma. ²⁷ Rū poraācū chataarū puracūāx, rū muxūchixū ga guxchaxūgū choxū nangupetū. Rū muĕxpūxcūna rū tama chape, rū chataiya, rū chītawa. Rū muĕxpūxcūna rū tama chachibū, rū choxū nanadeyu, rū choxū nataxu ga chauxchiru. ²⁸ Rū naetūwa i guxūma i ngēma, rū guxū i ngunexūgu rū chaxoegaāē naxcēx i guxūma i ngēma yaxōgūxū i guxū i īānewa ngēmagūxū. ²⁹ Rū ngēxguma chi texé tama poragu, rū choxū rū ta nangux. Rū ngēxguma chi wūxie texéxū pecadugu nguxēēgu, rū chauāēwa nangux i ngēma. ³⁰ Natūrū ngēxguma chi chaugū chicuēxūūchaūgu, rū tá chaugū chicuēxūū naxcēx na duūxūgū choxū dauxū na taxuwama chamexū. ³¹ Rū Tupana ya tórū Cori ya Ngechuchu ya Cristunatū ya mecū na guxūguma nūxū icuēxūūgūxū, rū nūxū nacuēx na aixcūma yīixū i ngēma nūxū chixuxū. ³² Rū yexguma Damacuwa chayexmagu, rū guma īāneārū āēxgacū ga Are-taarū ngūxēēruū, rū norū churaragūxū namu na nūxna nadaugūxūcēx ga guma īāneārū poxeguxūārū īāxgū na choxū yayauxgūxūcēx ga yexguma chi yēma ichaxūūxgu. ³³ Natūrū yema īāneārū poxeguxūārū īāxācūwa rū wūxi ga pexchigu choxū inarūchūxūetaūgū ga chomūcūgū. Rū yemaācū chiña naxchaxwa ga yema āēxgacū.

12

Tórū Cori rū Pauruxū nangoxetūxēē rū nūxū nūxū nacuēxēē ga tacū ga ĕxūguxū

¹ Taxuwama name na texé tūgū icuēxūūxū. Natūrū tá pemaā nūxū chixuama na űuxācū tórū Cori choxū nangoxetūxēēxū rū űuxācū choxū nūxū na nacuēxēēxū ga tacū ga ĕxūguxū. ² Rū 14 ga taunecū marū nangupetū ga na Tupana daxūguxū ga naānewa ga nūma īnayexmaxūwa choxū nagaxū. Natūrū tama nūxū chacuēx rū chauāēwaxicatama nixī ga yēma choxū nagaxū, rū ĕxna guxū ga chaxunemaā yīixū ga yēma choxū nagaxū. Rū Tupanaxīcatama nūxū nacuēx i ngēma. ³⁻⁴ Rū aixcūma meāma nūxū chacuēx na daxūguxū ga naānewa choxū nagaxū ga Tupana, natūrū tama nūxū chacuēx rū guxū ga chaxunemaā yēma choxū naga rū ĕxna tama. Rū Tupanaxīcatama nixī ya nūxū cuácū i ngēma. Rū yēma nūxū chaxīnū ga ore ga ĕxūguxū i guxūma i duūxūgūna chūxuxū na nūxū yaxūgūxū. ⁵ Rū choma rū chi name na chaugū naxcēx chicuēxūūxū i ngēma, natūrū tāūtāma ngēmaācū chanaxū. Erū ngēma ngūxū na chingexūmaāxīcatama tá nixī i chaugū chicuēxūūxū. ⁶ Natūrū ngēxguma chi chaugū chicuēxūūchaūgu, rū tāū chima wūxi i ngēāēmare nixī i ngēma, erū aixcūma nixī i ngēma ore i nūxū chixuxū i chauchiga. Natūrū tama chaugū chicuēxūū na taxūema nagu rūxīnūxūcēx na ngēma chowa nūxū naxīnūēxū rū

nūxū nadaugūxūārū yexera chiīxū. ⁷ Natūrū tōrū Cori rū tama nanaxwēxe i poraācūxūchima chaugū namaā chicuēxūūxū ga yema ēxūguxū ga mexēchixū ga choxū nūxū nacuēxēēxū. Rū yemacēx chaxunewa nananguxēē ga wūxi ga choxū ngūxū űoma wūxi ya tuxu chaxunewa ingaxixūrū. Rū yema rū űoma wūxi ga Chatanāārū orearū ngeruūrū chauxūtawa nangu na choxū nachixewēxcēx na tama chaugū chicuēxūūxūcēx. ⁸ Rū tomaēxpūxcūna tōrū Corina chaca na choxū iyanaxoxēēāxūcēx ga yema choxū ngūxū. ⁹ Natūrū nūma ya tōrū Cori rū űanagūrū choxū:

“Rū cuma nūxū cucuēx na guxūguma cuxū changechaū, rū ngēxīcatama nixī i cunaxwēxexū. Rū ngēma duūxūgū i tama poraexūwa nixī i aixcūma chanangoxēēxū i űuxācū na chaporaxū”, űanagūrū choxū. Rū ngēmacēx chataāē ega tama chaporagu. Erū ngēxguma tama chaporagu rū ngēxguma nixī i chowa inawēāxū i norū pora ya Cristu. ¹⁰ Rū ngēma na Cristuxū na changechaūxūgagu nixī i yaxna namaā chaxīnūxū ega woo chaturagu rū woo űacū chomaā yaxugūegu i duūxūgū. Rū woo choxū natauxgu i chorū ngēmaxūgū, rū woo duūxūgū rū chowe yangēxūtanūgu, rū woo guxchaxūgū choxū ngēxmagu rū Cristucēx rū yaxna namaā chaxīnū i guxūma i ngēma. Erū ngēxguma chaturagu, rū ngēxguma nixī i yexeraācū Cristu choxū poraxēēxū.

Pauru rū naxcēx naxoegaāē ga yema yaxōgūxū ga Corűtiuwa yexmagūxū

¹¹ Maneca űoma wūxi i āūāēxūrū chidexa, erū ngēmaācū chaugū chicuēxū. Natūrū pegagutama nixī i dūxwa ngēmaācū chaugūētūwa chidexaxū, yerū pema chi nixī ga choxū picuēxūūgūxū, rū tama i chomax. Rū woo taxuwama chame i chomax, natūrū taxuwama choxū narūyexeragū i ngēma orearū uruūgūneta i nawe perūxīxū. ¹² Rū yexguma petanūwa chayexmagu, rū yaxna pemaā chaxīnūācūma pexū nūxū chadauxēē na aixcūma Cristu choxū muxū na nūxū chixuxūcēx ga norū ore. Rū cuēxruūgūmaā pexū nūxū chacuēxēē ga yema. Rū pexū nūxū chadauxēē ga taxū ga mexūgū ga Tupanaārū poramaā űxū. ¹³ Rū yexguma petanūwa chayexmagu rū pemaā chamecūma yema guxūma ga togū ga yaxōgūxūmaā na chamecūmaxūrūttama. Natūrū wūxiwaxicatama nixī ga íchatūxū yerū ga petanūwa rū tama ngīxū chayaxu ga dīeru yema togū ga yaxōgūxūtanūwa ngīxū chayaxuxūrū. Rū chanaxwēxe i choxū nūxū pengechaū i ngēma. ¹⁴ Rū űuxma rū marū íchamemare na norū tomaēxpūxcūna pexū íchayadauxū. Rū tāūtāma űacūcēx pexna chayaca. Erū tama perū ngēmaxūgūcēx petanūwa chaxū, natūrū pexcēxūchi nixī i ngēma chaxūxū. Pema rū chauxacūgū pixīgū i Tupanaārū orewa. Rū ngēma papā rū mamaārū puracū nixī na naxācūgūna naxāāxū i ngēma nūxū taxuxū. Rū tama naxācūgūarū puracū nixī na nanatūna rū naēna naxāgūāxū. ¹⁵ Rū choma rū íchamemare na chorū ngūchaūmaā pexcēx ichanaxāxū i guxūma i űacū i choxū ngēxmaxū rū woo chaugūtama rū ta na ichaxāxū na aixcūma meā peyaxōgūxūcēx. Natūrū chauxcēx rū ngēxguma yexeraācū pexū changechaūgu, rū pema rū yexeraācū nūxū perūxoetanū na choxū pengechaūxū. ¹⁶ Rū nūmaxū i duūxūgū i petanūwa, rū woo nūxū nacuēxū na taguma űacūcēx pexūtawa íchaxaxū, natūrū nūmagū rū nūxū nixugūama na pexū chawomūxēēācūma perū dīeru ngīxū chayaxuxū. ¹⁷ ¿Éxna pema nagu perūxīnūēgu rū yema duūxūgū ga petanūwa chamugūxūwa pexū chawomūxēē? ¹⁸ Rū Titumaā nūxū chixu na petanūwa íyadauxūcēx. Rū namaā yēma chanamu ga yema to ga taeneē. ¿Éxna pema nagu perūxīnūēgu ga Titu rū pexū yēma nayawomūxēē? ¿Tama

ēxna aixcūma yīxūl na chauxrūl meā na namaxūxūl rū chauxrūl mexūgu naxīnūxūl ga Titux? ¹⁹ Bexmana pema tá nagu perūxīnūē rū ngēmaācū tidexagū, erū togūētūwatama tachogūchaūl. Natūrū, Pa Chaueneēgū ya Pexū Tangechaūgūex, rū Tupanapēxewa rū Cristuégagu nixī i tidexagūxūl na yexeraācū meā Tupanaāxūl peyaxōgūxūcēx rū yexeraācū meā na pemaxēxūcēx. ²⁰ Erū chaxoegaāē rū ngēxguma wena pexū ichayadēuxgu, rū ngūrūāchi tama choma chanaxwēxexūācūma ípemaxē, rū ngēmacēx i pema rū tāūtāma chomaā petaāēgū. Rū chaxoegaāē erū ngūrūāchi tá pexū ichayangau na pegūchi ípexaieūl, rū pegūarū ngēmāxūcēx pixāūxāchigūxūl, rū pegūmaā penuēxūl, rū pegūguxicatama íperūxīnūēxūl, rū pexoregūtēēxgūxūl, rū toguāxūl pixuxūl, rū pegū picuēxūūgūxūl, rū chixexū ípexūēxūl rū ngēmaācū chixri ípemaxēxūl. ²¹ Rū chaxoegaāē rū ngēxguma wena petanūwa chaxūxgu, rū ngūrūāchi Tupana rū pegagu tá choxūl naxānēxēē. Rū ngūrūāchi ngechaūl tá choxna pexā, erū muxēma i petanūwa rū marū űuxgumama pecadu taxūgūēcha, rū tama nūxūl tarūxoechaūl na Tupanapēxewa chixexūl taxūgūxūl rū naī i ngemaāmare na tamaxēxūl rū guxūma i togū i chixexūl na taxūgūxūl.

13

Pauru nayaxucuxē ga yema yaxōgūxūl ga Corŭtiucūāx rū űuxūchi nūxūl narūmoxē

¹ űuxma rū norū tomaēxpūxcūna tá nixī na petanūwa chaxūxūl. Rū Tupanaārū ore rū tamaā nūxūl nixu rū ngēxguma texē chixexūl űuxgu rū taxre rū ēxna tomaēxpūx i duūxūgū nūxūl daugūgu rū nūxūl yaxugūgu na aixcūma yīxūl, rū aixcūma tá poxcu tūmamaā taxuegu ya yīxema chixexūl űxe. ² Rū ngēmacēx i pema i űpamamatama pecadu űgūēchaxe rū guxāma i pema ya chixri maxēxē, rū űuxma na woo pexna chayaxūguxūl rū wēnaxārū pexna nūxūl chacuēxāchixēē rū ngēxguma tá ngema chaxūxgu rū aixcūma tá chanamēxēē i guxūma i ngēma chixexūl i petanūwa ngēxmaxūl, rū tāūtāma chanangupetūxēēmare i ngēma. ³ Rū pema na naxcēx íperūdaunūxūl na Cristu chowa ídexaxūl, rū ngēxguma ngema chaxūxgu, rū ngēxguma tá nixī i nūxūl pedaxūl na aixcūma chowa na yadexaxūl ya Cristu. Rū nūma ya Cristu rū chowa tá pexū nūxūl nadauxēē na tama naturaxūl natūrū aixcūma yanguxēēāxūl i norū ore rū tūxūl napoxcūexūl ya yīxema chixexūl űgūxe. ⁴ Rū aixcūma nixī ga Cristu ga űoma wūxi ga duūxūl i turaxūrūl nūgū yaxīxēēxūl ga yexguma curuchawa yapotagu. Natūrū i űuxma rū Tupanaārū poragagu namaxūl. Rū ngēxgumarūl i toma na norū duūxūgū tixīgūxūl, rū taturae i toxonewa. Natūrū ngēma na norū duūxūgū tixīgūxūl, rū Tupanaārū poragagu tá tamaxē na pexū tarūngūxēēgūxūcēx. ⁵ Rū name nixī i pegūtama pengugū na nūxūl pecuāxūcēx ngoxi aixcūma meā peyaxōgū. Rū name nixī i pegū pengūgūarū maxūāx rū ngoxi Tupanapēxewa pime. ¿Tama ēxna nūxna pecuēxāchie na Ngechuchu ya Cristu rū pewa nangēxmaxūl ega aixcūma peyaxōgūgu? ⁶ Rū chierūna nūxūl pecuēxgu na toma rū tama orearū uruūgūnetamare na tixīgūxūl. ⁷ Rū Tupanana naxcēx taca na taxuūma i chixexūl na pexūgūxūcēx. Rū tama duūxūgūpēxewa togū ítarūtagūxūcēx nixī na ngēmaācū tayumūxēgūxūl. Natūrū Tupanana naxcēx taca i ngēma na aixcūma meā naxcēx pemaxēxūcēx woo duūxūgū nagu rūxīnūēgu na toma rū ítatūemarexūl. ⁸ Toma rū taxucūrūwama chixri nachiga tidexagū i Tupanaārū ore i aixcūma íxūl, erū toma rū naētūwa tachogū i ngēma ore. ⁹ Rū tá tataāēgū ega aixcūma peporaegu i perū maxūwa rū ngēmacēx

natauxgu i tacucèx pemaã na taporagaexũ. Rũ Tupanana tá naxcèx tacaama na pexũ naporaexèxũcèx i perũ maxũwa na dũxwa aixcũma mexũ i norũ duũxũgũ na pixĩgũxũcèx. ¹⁰ Rũ naxũpa na pexũ na íchayadauxũ nixĩ i pexcèx chanaxũmatũxũ i ñaã popera, na ngẽxguma ngema changuxgu rũ nataxuxũcèx i tacucèx pemaã na chaporagaxũ. Erũ tórũ Cori choxũ namu na pexũ charũngũxèxũcèx na yexeraãcũ meã peyaxõgũxũcèx, rũ tama chixexũ pemaã na chaxũxũcèx nixĩ i choxũ namuxũ. ¹¹ Rũ ñuxma na ichayacuèxèxũ i ñaã popera, Pa Chaueneẽgũx, rũ chanaxwèxe i meã pexũ naxũpetũ rũ naxcèx pedau na ñuxãcũ aixcũma meã Tupanacèx pemaxèxũ. Rũ name nixĩ i pegũ petaãèxèegũ rũ wũxigu perũxĩnũe rũ meã yaxna pegũmaã pexĩnũe rũ aixcũma pegũ pengechaũgũ. Rũ nũma ya Tupana ya tũxũ ngechaũcũ rũ tũxũ rũngũxmũexècũ, rũ guxũgutãma pemaã inarũxãũx. ¹² Rũ chanaxwèxe i wũxichigũ i pema rũ pegũ pengechaũgũãcũma pegũ perũmoxègũ. ¹³ Rũ guxũma i togũ i taeneẽgũ i yaxõgũxũ rũ pexũ narũmoxègũ. ¹⁴ Rũ ñuxma rũ chanaxwèxe i tórũ Cori ya Ngechuchu ya Cristu pexũ narũngũxèe, rũ Tanatũ ya Tupana rũ pexũ nangechaũ, rũ Naãe i Üunexũ rũ guxũguma pemaã inarũxãũx.

Rũ nuãma pexna,
Pauru

POPERA GA GÁRATAANEWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Gárataaneärü Ìanegüwa yexmagüxü

¹⁻² Pa Toeneëgü i Yaxögüxü i Gárataaneärü Ìanegüwa Ngëxmagüxüx, choma i Pauru rü namaã i guxüma i taeneëgü i nuã chauxütawa ngëxmagüxü nixi i pexcëx tanaxümatüxü i ñaã popera. Rü choxü nixi ga namugüxü ga Ngechuchu ya Cristu rü Tanatü ya Tupana. Rü aixcüma tama duüxügü nixi ga choxü unetagüxü na chanaxüxcëx i ñaã Tupanaärü puracü. Natürü Tanatü ya Tupana ga Ngechuchuxü írüdaxëecü rü nümatam ya Ngechuchu ya Cristu nixi ga choxü naxunetagüxü. ³Rü chanaxwëxe i Tanatü ya Tupana rü tóru Cori ya Ngechuchu ya Cristu poraäcü pexü narüngüxëe rü pexü nataäxëe. ⁴Rü nüma ga tóru Cori ya Ngechuchu rü nügü inaxã na tóru pecaducëx nayuxücëx na nüxna tüxü Ínanguxüxëxüxcëx i guxüma i ñoma i naãneärü chixexü. Rü yemaäcü nanaxü, yerü yema nixi ga Tanatü ya Tupanaärü ngüchaü. ⁵¡Namexëchi ya Tupana i guxüguma! Rü ngëmaäcü yií.

Nataxuma i to i ore i tüxü maxëxëxü

⁶ Rü yema na Cristuaxü pengechaütümüügüxcëx nixi ga pexna naxuxü ya Tupana na penayaxuxücëx i maxü i taguma güxü. Rü ñuxma rü poraäcü chabaixächiãe, erü paxaxüchi ipenaxügü na Tupana pixigachixü, na nawe perüxüxcëx i to i nguxëetae i nagu perüxüñüegü rü pexü maxëxëxü. ⁷Natürü tama aixcüma nangëxma i to i nguxëetae i nawa nayaxuxü i maxü i taguma güxü. Natürü nangëxma i ñuxre i duüxügü i pexü naguxchaxëechaüxü, rü nanaxüchicüügüchaü i ngëma nguxëetae i mexü ga pemaã nüxü chixuxü ga Cristuchiga. ⁸ Rü toma rü marü pexna tanaxã ga yema nguxëetae i aixcüma ixixü i Ngechuchuchiga. Rü ngëxguma chi texe pexü ngüxëegü i to i nguxëetae, rü name nixi i noxtacüma Tupana tüxü napoxcu. Rü woo choma chixigu, rü éxna tacü rü Tupanaärü orearü ngeruü i daxücdäx yixigu i pexü nguxëexü i to i nguxëetae, rü name nixi i noxtacüma Tupana tüxü napoxcu. ⁹ Rü ñuxma rü wena pemaã nüxü chixu ga yema noxri pemaã nüxü chixuxü. Rü ngëxguma chi texe pexü ngüxëegü i wüxi i to i nguxëetae i tama yema noxri peyaxürüü ixixü, rü name nixi i noxtacüma Tupana tüxü napoxcu. ¹⁰ Rü tama chomaã na petaäegüxcëx nixi i ngëma ñachaxü. Erü tama naxcëx chadau na duüxügü chomaã taäegüxü, natürü Tupana chomaã taäëxücëx nixi i chadauxü. Erü ngëxguma chi duüxügüxüxicatama chataäëxëechaügu, rü täu chima Cristuarü puracütanüxü chixi.

Ñuxäcü Pauruxü nayaxu ga Tupana na norü puracüwa namuäxücëx

¹¹ Natürü, Pa Chaueneëgüx, chanaxwëxe i nüxü pecuëx na ñaã ore i mexü i nüxü chixuxü, rü tama duüxügüäewa yiixü na ne naxüxü. ¹² Yerü tama wüxi ga duüxüxütawa naxcëx changux. Natürü Ngechuchu ya Cristutama nixi ga choxü nüxü cuëxëecü. ¹³ Pema rü marü nüxü pexüñüchiga na ñuxäcü chamaxüxü ga üpa ga yexguma Yudiugücümagu chixüxgu. Rü nüxü pexüñüchiga na ñuxäcü poraäcü nawe chingëchigüxü ga guxüma ga Tupanaärü duüxügü ga yaxögüxü rü ñuxäcü chixri namaã na chaxüpetüxü na yemaäcü nüxü nüxü charüxoxëëxücëx ga yema na

Ngechuchuaxū yaxōgūāxū. ¹⁴ Rū muxūma ga chautanūxūgū ga Yudíugū ga chorū nayaāxgūraūxūārū yexera nagu chixū ga yema Yudíugūcūma. Yerū norū yexera meāma chayanguxēē ga nacūmagū ga nuxcūmaūgūxū ga chorū oxigū nagu íxū. ¹⁵⁻¹⁶ Natūrū yexguma tautama chabuxgu, rū woetama Tupana choxū naxuneta na choxū namuxūcēx na chanaxūxūcēx i norū puracū. Rū nūma rū chauxcēx naca na noxrū chixíxūcēx yerū poraācū choxū nangechaū. Rū yexguma Tupana naxwēxegu, rū choxū nūxū nacuēxēē ga Nane ya Cristu. Rū yemaācū nanaxū na ngēma duūxūgū i tama Yudíugū ixīgūxūmaā nūxū chixuxūcēx na űuxācū Ngechuchugagu tūxū nangēxmaxū i maxū i taguma gūxū. Rū yexguma yemaācū Tupana choxū nūxū cuēxēēgu ga Nane, rū taxūenama chayaca. ¹⁷ Rū bai ga Yerucharēūwa na chaxūxū na nūxna chayaçaxūcēx ga yema togū ga ngúexūgū ga nūxíra Tupana imugūxū. Natūrū ga choma rū yexgumatama Arábiaanewa chaxū. Rū yemawena, rū Damacuarū űānecēx chataegu. ¹⁸ Rū tomaēxpūx ga taunecūguwena rū dūxwa Yerucharēūwa chaxū na Pedruxū chacuáxūcēx. Rū 15 ga ngunexūtama naxūtawa chayexma. ¹⁹ Rū yēma nūxū chadau ta ga Chaūtiāgu ga tórū Cori naēneē. Natūrū taxuūma ga togū ga ngúexūgū ga tórū Cori imugūxūxū chadau. ²⁰ Rū Tupana choxū nadau na aixcūma yīxū i ngēma ore i űuxma pexcē chaxūmatūxū. ²¹ Rū yemawena, rū Chíríiaanewa rū Chíríchíiaanewa chaxū. ²² Natūrū yema taeneēgū ga Cristuaxū yaxōgūxū ga Yudeaanewa yexmagūxū, rū taguma choxūxūchi nadaugū. ²³ Rū yema nūxū naxīnūēxū ga chauchiga rū űāāxīcatama nixī:

“Rū ngēma Pauru ga űpa tawe ingēchigūxū, rū űuxma rū duūxūgūmaā nūxū nixu i Tupanaārū ore i mexū, rū namaā nayaxucuxē na Cristuaxū yaxōgūāxūcēx. Rū ngēmaācū nanaxū i űuxma rū woo ga noxri rū inayanax-oxēēchaū ga yema ore”, űaxū. Rū yexicatama nixī ga chauchiga ga nūxū naxīnūēxū. ²⁴ Rū yexguma ga yema duūxūgū rū Tupanaxū nicuēxūūgū nagagu ga yema Tupana chomaā űxū.

2

Yema togū ga ngúexūgū ga Tupana imugūxū rū meā Pauruxū nayauxgū

¹ Rū 14 ga taunecūwena rū wenaxārū Yerucharēūwa chaxū namaā ga Bernabé. Rū Titu rū ta íchayaga. ² Rū yēma chaxū yerū Tupana choxū nūxū nacuēxēē ga na nanaxwēxexū na yēma chaxūxū. Rū yēma Yerucharēūwa, rū yema yaxōgūxūārū āēxgacūgūmaāxīcatama changutaquēxe. Rū meāma namaā nūxū chixu ga nachiga ga yema Tupanaārū ore i mexū ga nūxna chaxāxū ga yema duūxūgū i tama Yudiugū ixīgūxū. Rū yemaācū meāma namaā nūxū chixu na űuxācū na yīxū ga chorū nguxēētae, yerū tama chanaxwēxe na yixcūra rū choxū nūxū naxoexū rū ngēmaācū natūcēxmamare na yīxū i ngēma puracū i chaxūxū. ³ Rū yema yaxōgūxū, rū nūmagū rū ta norū me nixī ga yema chorū nguxēētae. Rū yemacēx rū woo tama Yudíu na yīxū ga Titu rū taguma na ínawiechēxmūpēxechiraūxū, natūrū yema āēxgacūgū rū tama nanamu na ínawiechēxmūpēxechiraūxūcēx. ⁴ Natūrū aixcūma nixī ga űuxre ga taeneēgūneta ixīgūxū ga bexmamare tatanūgu nachocuxū. Rū yemagū nixī ga naxwēxegūxū na inawiūchēxmūpēxechiraūxū i ngēma yaxōgūxū i tama Yudíugū ixīgūxū. Rū űuxma na Ngechuchu ya Cristuarū duūxūgū ixīgūxū, rū yema taeneēgūneta rū bexma tatanūgu nachocu na tūxū nangugūgūxūcēx na űuxācū Cristu nūxna tūxū ínguxūxēēxū ga yema mugū ga Moíché űmatūxū. Yerū nūmagū nanaxwēxegū na wenaxārū nagu ixīxū ga

yema mugū ga guxchaxū ga Moīché ūmatūxū. ⁵ Natūrū bai ga irarūwa naga na taxīnūēxū ga yema duūxūgū. Yerū tama tanaxwēxegū na texē pexū naxūchicūxū i ngēma ore i mexū i aixcūma ixīxū i tamaā nūxū ixuxū i űuxācū tūxū na nangēxmaxū i maxū i taguma gūxū ega Cristuaxū yaxōgūgu. ⁶ Natūrū yexguma yema yaxōgūxūārū āēxgacūgū ga Yerucherūwa yexmagūxū nūxū ĩnūēgu ga űuxācū na yīxū ga chorū nguxēētae, rū namaā nataāēgū rū taxūma ga űacu ga togū ga mugū choxna naxāgū na namaā changūexēētaexūcēx. Natūrū tama yema na āēxgacūgū yixīgūxūgu charūxīnū, erū nūxū chacuēx na Tupanapēxewa rū guxāma na wūxīgūxū. ⁷ Natūrū nūmagū ga yema āēxgacūgū, rū nūxū nicuēxāchīgū na choxū yīxū ga namuxū ga Tupana na yema duūxūgū ga tama Yudīgū ixīgūxūmaā nūxū chixuxūcēx ga norū ore i mexū, yexgumarūū ga Pedruxū na namuxūrūū ga Tupana na Yudīgūmaā nūxū yaxuxūcēx ga yema ore. ⁸ Rū gumatama Tupana ga Pedruxū mucū na Yudīgūmaā nūxū na yaxuxū ga ore i mexū, rū gumatama Tupana nixī ga choxū mucū na yema duūxūgū ga tama Yudīgū ixīgūxūmaā nūxū chixuxūcēx ga yema ore. ⁹ Rū yemacēx ga Chaūtiāgu rū Pedru rū Cuāū ga yaxōgūxūārū āēxgacūgū, rū nūxū nicuēxāchīgū na choxū naxunetaxū ga Tupana na chanaxūxūcēx i ngēma puracū. Rū yemacēx ga yema āēxgacūgū, rū tomēx niyaxūāchīgū ga choma rū Bernabē na toxū nūxū nadauxēgūxūcēx na aixcūma namūcūgū tixīgūxū i ngēma puracūwa. Rū nūmagū rū ta norū me nixī na ngēma duūxūgū i tama Yudīgū ixīgūxūtanūwa na tanaxūxū i Tupanaārū puracū rū nūmagū i Yudīgūtanūwa. ¹⁰ Rū toxna naxcēx naca na nūxū tarūngūxēēgūxūcēx ga yema yaxōgūxū ga ngearū dīēruāxgūxū. Rū yexicatama nixī ga toxna nūxū nacuēxāchixūēēxū. Rū choma rū ta ngēmatama nixī i guxūguma woetama meāma chaxūxū.

Paurū rū Aūtioquīawa Pedruxū naxucūxē

¹¹ Natūrū yixcūra ga yexguma Aūtioquīawa naxūxgu ga Pedru, rū noxtacūma nūxū nūxū chaxīnūxēē, yerū tama aixcūma name ga yema naxūxū namaā ga yema yaxōgūxū ga tama Yudīgū ixīgūxū. ¹² Yerū noxri rū yema duūxūgū ga tama Yudīgū ixīgūxūmaā nachibū ga Pedru. Natūrū yexguma yēma nangugūgu ga űuxre ga Yudīgū ga yaxōgūxū ga Chaūtiāgu yēma mugūxū, rū Pedru rū marū tama yema duūxūgū ga tama Yudīgū ga yēma ngugūxū ga nagu ĩxū ga yema nacūma na Tupanacēx ĩnawiechēxmūpēxehiraūgūxū. ¹³ Rū yema togū ga Yudīgū ga yaxōgūxū, rū yexguma nūxū nadaugūgu ga yema Pedru ūxū, rū nūmagū rū ta nanaxūgū ga yema chixexū rū naxcēx nawoeguchaū ga yema nuxcūmaūgūxū ga nacūmagū. Rū dūxwa ga Bernabē rū ta natanūgu naxā ga yema chixexū ūgūxū. ¹⁴ Natūrū yexguma nūxū chadēuxgu na tama Tupanaārū ore i mexū tūxū nguxēēxūācūma na namaxēxū ga yema yatūgū, rū guxū ga yaxōgūxūpēxewa Pedruxū nūxū chaxīnūxēē. Rū űacharūgū nūxū:

“Rū dūcax i cuma na Yudīchirēx quīxū, cuma rū tama aixcūma Yudīgūcūmagu quixū. ¿Rū űuxācū i űuxma i cunamuxū na Yudīgūcūmagu naxīxū i ngēma duūxūgū i tama Yudīgū ixīgūxū?” űacharūgū nūxū.

Yudīgū rū woo ngēma duūxūgū i tama Yudīgū ixīgūxū rū norū ōgagu nixī i nayauxgūāxū i maxū i taguma gūxū

¹⁵ Rū pemaā nūxū chixū rū toma rū aixcūma torū bucūmatama Yudīgū tixīgū rū Tupanaxū tacuēxgū. Rū ngēmaācū tama duūxūgū i tama Tupanaxū cuēxgūxū tixīgū. ¹⁶ Rū nūxū tacuēxgū rū yema nuxcūmaūgūxū ga mugū ga

Moíché ūmatūxū rú tama tūxū nimexēē i Tupanapēxewa, erū taxucūrūwama texé aixcūma naga taxīnūē i ngēma mugū. Natūrū i űuxma rú Tupana tūxū nadau na imexū ega Ngechuchu ya Cristuaxū yaxōgūgu. Rū yemacèx ga toma rú ta Ngechuchu ya Cristuaxū tayaxōgū na torū ōgagu Tupana toxū nadauxū na timexū. Erū nūxū tacuēxgū rú tama ngēma mugūgagu nixī na Tupanapēxewa tamexū ya wūxie, erū taxucūrūwama texé aixcūma naga taxīnū i ngēma mugū na ngēmaācū Tupanapēxewa tamexūcèx. ¹⁷ Rū űuxma i yixema rú Cristuaxū tayaxōgū, rú ngēmacèx nixī i Tupanapēxewa imexū. Natūrū ngēxguma chi wūxi i ngunexūgu rú yixema nagu rūxīnūēgu rú mugūgu na ixīxūgagu yixīgu na Tupanapēxewa imexū, rú maneca tá nagu tarūxīnūē na Cristu tūxū pecaduāxēēxū. Natūrū dūcax, rú tama ngēmaācū nixī erū Cristu rú tagutāma texēxū napecaduāxēē. ¹⁸ Choma rú marū nūxū charūxo na nagu charūxīnūxū na mugūgu chixūxūgagu Tupanapēxewa chamexū. Natūrū ngēxguma chi wenaxārū naxcèx chataegugu i ngēma nuxcūmaūgūxū i mugū rú chi nūxū charūxoxgu na Cristuaxū chayaxōxū, rú chi aixcūma wūxi i pecaduāxū chixī. ¹⁹ Yerū yexguma yema mugūwa changuxgu, rú dūxwa nūxū chicuēxāchi na tama yanguxū ga yema mugū na choxū namexēēxū Tupanapēxewa. Yerū taxucūrūwama aixcūma naga chaxīnū ga guxūma ga yema mugū. Rū ngēmacèx i űuxma rú Cristuaxū chayaxō na Tupanapēxewa chamexūcèx rú naxcèxicatama chamaxūxūcèx. Rū Cristu rú curuchagu nayu na iyanaxoxūcèx ga nuxcūmaūxū ga chorū maxū ga choxū yexmaxū ga yexguma yema mugūgu chixūxgu. ²⁰ Rū űuxma rú marū tama chaugūmaātama ichacuēx, natūrū Cristu nixī ya chomaā icuācū erū chowa namaxū. Rū űuxma rú Tupana Nane ya Cristuaxū chayaxōcūma nixī i chamaxūxū i űoma i naānewa. Rū nūma nixī ga choxū nangechaūxū, rú nūgū inaxāxū na chauxcèx nayuxūcèx. ²¹ Rū tama nūxū chaxoxchaū i ngēma mexū ga Tupana taxcèx ūxū ga yexguma nayuxgu ga Cristu. Yerū yexguma chi yema mugūgu ixīxūgagu Tupanapēxewa imexgu, rú natūcèxmamare chi nixī ga na nayuxū ga Cristu.

3

űuxma rú tama ngēma mugūgu taxī erū marū Cristuaxū tayaxōgū

¹ Pa Chaueneēgū i Gárataanecūāx, pema rú pengēāēgūmare. Rū yexguma petanūwa tayexmagūgu rú meāma guxāpēxewa pemaā nūxū tixu rú pexcèx tanangoxēē na űuxācū curuchagu taxcèx nayuxū ga Ngechuchu ya Cristu. ¿Rū texé pexū tawomūxēē i űuxma na tama naga pexīnūēxūcèx i ngēma ore i aixcūma ixīxū ga pemaā nūxū tixuxū? ² Rū wūxi i orecèx pexna chaca, rú ¿űuxācū yīxū ga penayaxuxū ga Tupanaāē i Ūūnexū? ¿Éxna pexcèx rú yema mugū na pinguxēēgūxūgagu yīxū ga penayaxuxū, rú éxna ngēma ore i mexū ga nūxū pexīnūēxū rú pixōgūxūgagu yīxū? ³ Pema rú pengēāēgūmare rú poraācū ípetūe. Noxri rú Cristuaxū peyaxōgū yerū Tupanaāē i Ūūnexū pewa napuracū. ¿Rū űuxācū i űuxma i nagu perūxīnūēxū na wenaxarū naxcèx pewoeguxū i ngema nuxcūmaxūxū i mugū i taguma maxū pexna āxū? ⁴ Pema rú poraācū Tupana pexū narūngūxēē. Rū chierū tama natūcèxmamare yixīgu ga yema, erū taxucūrūwa natūcèxmamare nixī. ⁵ Rū yexguma Tupana pexna namuxgu ga Naāē i Ūūnexū rú petanūwa naxūāgu ga taxū ga mexūgū ga norū poramaā naxūxū, rú ¿tacūgagu nixī ga naxūāxū ga yema? ¿Pexcèx rú mugū na pinguxēēxūgagu yīxū ga Tupana naxūxū ga yema? Tama yemagagu nixī. Tupana rú petanūwa nanaxū ga yema taxū ga mexūgū yerū nūxū peyaxōgū

ga norū ore ga nūxū pexīnūēxū. ⁶ Rū dūcax, pemaā nūxū chixu rū name nixī i nuxcūmaūcū ga torū oxī ga Abráūrū pīxīgū. Yerū Abráū rū Tupanaāxū nayaxō, rū yemacēx Tupana nūxū nadau ga na namexū. ⁷ Rū ngēmawa nūxū pedau rū ngēma duūxūgū i Tupanaāxū yaxōgūxū nixī i aixcūma Abráūtanūxū ixīgūxū i Tupanapēxewa. ⁸ Rū Tupanaārū ore i ūmatūxūwa rū nūxū nixu na űuxācū Tupanapēxewa tá na yamexū i ngēma duūxūgū i yaxōgūxū i woo tama Yudiūgū ixīgūxū. Rū yemaācū nūxū nixu naxūpa ga na nangupetūxū. Yerū Tupana rū nuxcūmamatama Abráūmaā nūxū nixu ga űaā ore i mexū i űaxū:

“Rū cugagu tá nūxū charūngūxēē i guxūma i nachīūānecūāx i duūxūgū”, űaxū. Rū yemaācū nūxū tacuēx rū Cristu rū Abráūtaa na yīxū. ⁹ Rū ngēmacēx i űuxma rū Tupana nanayaxu i guxūma i duūxūgū i yaxōgūxū, yexgumarū ga Abráū ga yaxōcūxū na nayaxuxūrū. ¹⁰ Natūrū chixexūwa nangēxmagū i guxūma i ngēma duūxūgū i nagu rūxīnūēxū na mugū yanguxēēgūxūgagu Tupanapēxewa yamexū. Erū Tupanaārū ore i ūmatūxūwa rū űanagūrū:

“Rū guxūma i duūxūgū i tama aixcūma yanguxēēgūxū i guxūma i ngēma mugū i ūmatūxū, rū chixexūwa nangēxmagū”, űanagūrū. Erū nūxū tacuēxgū na taxucūrūwama aixcūma texé yanguxēēxū i guxūma i ngēma mugū. ¹¹ Rū ngēmaācū meāma nangox na tama ngēma mugū tinguxēēxūcēx yīxū na texé Tupanapēxewa mexū. Erū Tupanaārū ore i ūmatūxūwa rū űanagūrū:

“Rū yīxema tūmaārū ōgagu Tupanapēxewa mexē, rū yīxema tá tixī ya aixcūma tūxū nangēxmaxē i maxū i taguma gūxū”, űanagūrū. ¹² Natūrū ngēxguma nagu rūxīnūēgū na mugū inguxēēxūcēx yīxū na Tupanapēxewa imexū, rū taxucēx chima tūxūcū tayaxōgū. Erū Tupanaārū orewa rū ngēmachiga naxūmatū, rū űanagūrū:

“Rū yīxema aixcūma meāma yanguxēēxē i guxūma i mugū, rū ngēmagagu tá tūxū nangēxma i tūmaārū maxū”, űanagūrū. Natūrū ngēma mugū rū dūxwa chixexūwa tūxū naga erū taxucūrūwama texé aixcūma meā tayanguxēē. ¹³ Natūrū ga Cristu rū nawa tūxū inanguxūxēē ga yema mugū ga chixexūwa tūxū yexmagūxēēxū. Rū taxcēx nixī ga chixexūwa nayexmaxū ga yexguma curuchagu nayuxgu. Erū Tupanaārū ore i ūmatūxūwa, rū űanagūrū:

“Rū guxāma ya yīxema wūxi i naīwa tūxū natuxēēgūācūma yūxe, rū chixexūwa tangēxma”, űanagūrū. ¹⁴ Rū yemaācū curuchagu nayu ga Ngechuchu ya Cristu na nūxū nangūxēēxūcēx i guxūma i ngēma duūxūgū i tama Yudiūgū ixīgūxū, yema Tupana Abráūmaā ixunetaxūrū. Rū taxcēx rū ta nayu ga Cristu na yīxema rū ta nūxū yaxōgūxūcēx rū nayauxgūxūcēx i Tupanaāē i Ūūnēxū i tamaā inaxunetaxū.

Tupanaārū uneta rū ngēma mugūarū yexera name

¹⁵ Pa Chaueneēgūx, űuxma rū tá pemaā nūxū chixu i wūxi i cuēxruū na űuxācū duūxūgū tacū nūgūmaā mexēēxū. Rū dūcax, ngēxguma chi wūxi ya yatū rū texēmaā tacūcēx inaxunetagu rū chi wūxi i poperagu meā naxūmatūāgu i ngēma, rū taxucūrūwa texé itayanaxoxēē rū ēxna tanaxūchicū i ngēma norū uneta. ¹⁶ Rū dūcax, rū yexgumarūūtama nixī ga nangupetūxū ga yexguma Tupana rū Abráūmaā rū Abráūtaamaā inaxunetagu. Rū Tupanaārū ore i ūmatūxūwa rū tama “Abráūtaagu” űanagūrū, yerū tama muxūma ga duūxūgūchiga nidexa. Natūrū yema ore rū “Abráūtaa”

ñanagürümare, yerü wüxitama ga duũxũchiga nixĩ ga yadexaxũ. Rũ yema rü Cristuchiga nixĩ. ¹⁷ Rũ ngẽmaãcü pemaã chanangoxẽẽ na Tupana rü Abráũmaã namexẽẽãxũ rü namaã inaxunetaxũ na Cristugagu tá yixũ i duũxũgũxũ nangũxẽẽxũ. Rũ ngẽmacèx i ñuxma rü yema Moiché ümatũxũ ga mugü ga 430 ga taunecü yema unetawena ínguxũ, rü taxucürüwama inayanaxoxẽẽ ga yema Tupanaãrũ uneta ga nüxĩra Abráũmaã nüxũ yaxuxũ. Rũ ngẽmacèx i ñuxma rü ta napora i ngẽma uneta. ¹⁸ Rũ ngẽxguma chi mugü inguxẽẽgũxũgagu yixĩgu na Tupana tũxũ rüngũxẽẽxũ, rü natücèxmamare chi nixĩ ga yema Tupanaãrũ uneta ga nüxĩra Abráũmaã nüxũ yaxuxũ. Natürü aixcũma nixĩ na ngetanüácũma Abráũxũ nangũxẽẽxũ ga Tupana, yerü yemaãcü marü namaã inaxuneta. ¹⁹ Rũ ñuxma rü ŷtacüwa namexũ ga yema mugü ga Moiché ümatũxũ? Rũ dücax, Tupana rü marü Abráũmaã inaxunetaguwena nixĩ ga duũxũgũna naxããxũ ga yema mugü, na yemaãcü duũxũgũxũ nüxũ nadauxẽẽxũcèx na ñuxãcü poraãcü pecadu naxüexũ. Rũ yemaãcü nixĩ ñuxmata ínangu ga guma Abráũtaa ya Cristu. Rũ gumachiga nixĩ ga Abráũmaã inaxunetaxũ ga Tupana ga noxrix. Rũ yexguma ínanguxgu ga yema mugü, rü Tupana rü daxũcũãx ga norü orearü ngeruũgũmaãxĩra nüxũ nixu. Rũ yemagü nixĩ ga nüxĩ Moichémaã nüxũ ixugũxũ, rü nũma ga Moiché rü duũxũgũmaã nüxũ nixu. ²⁰ Natürü yexguma Tupana Abráũmaã ixunetagu, rü nũmaxũchima ga Tupana nixĩ ga Abráũmaã nüxũ yaxuxũ ga yema norü uneta. Rũ tama togũmaãxĩra nüxũ nixu na yemagü nüxĩ Abráũmaã nüxũ ixugũxũcèx.

Tacücèx duũxũgũna nanaxã ga Tupana ga yema mugü

²¹ ¿Rũ ñuxü ñapegũxũ i ñuxmax? ¿Pexcèx èxna rü yema Moiché ümatũxũ ga mugü rü inayanaxoxẽẽ i Tupanaãrũ unetagu? Rũ dücax, tama ngẽmaãcü nixĩ. Yerü yexguma chi naporagu ga yema mugü na tũxna naxããxũ i maxũ i taguma gũxũ, rü chi Tupanapèxewa time i ngẽxguma meãma yanguxẽẽgu. ²² Natürü tama ngẽmaãcü nixĩ. Erü Tupanaãrũ ore i ümatũxũwa nüxũ tadau na guxũma i duũxũgü rü pecadutũtũwa nangèxmagũxũ. Rũ ngẽmacèx i ñuxma rü yíxema Ngechuchu ya Cristuaxũ yaxögũxexicatama tixĩ ya nayauxgũxe i ngẽma maxũ i aixcũma mexũ i Tupana tamaã ixunetaxũ. ²³ Rũ yexguma tauta ínanguxgu ga Cristu na nüxũ yaxögũxũcèx, rü mugütũtũwa tayexmagü rü tamaã inacuèx. Rũ yemaãcü tixĩgü rü ñuxmata Tupana taxcèx nangoxẽẽ ga Ngechuchu ya Cristu na nüxũ yaxögũxũcèx. ²⁴ Rũ yemaãcü ga yema mugü rü tamaã inacuèx ñuxmata Cristuxũtawa tũxũ nagagü na nüxũ yaxögũxũcèx rü ngẽmaãcü Tupanapèxewa imexũcèx. ²⁵ Natürü i ñuxma na marü núma nanguxũ ya Cristu na nüxũ yaxögũxũcèx, rü marü tama ngẽma mugütũtũwa tangèxmagü. Rũ ñuxma rü marü taxucèxma tixcũtũ tamaã inacuèx i ngẽma mugü. ²⁶ Rũ ñuxma na Ngechuchu ya Cristuaxũ peyaxögũxũ, rü Tupanaxãcügü pixĩgü i guxãma i pemax. ²⁷ Rũ ñuxma na Cristuégagu ípebaiũxũ, rü Cristuarü pixĩgü rü núma rü pemaã inacuèx na naxrüü pixĩgũxũcèx. ²⁸ Rũ ñuxma rü Tupanapèxewa rü nüetama nixĩ ega woo Yudiugü pixĩgũgu rü èxna tama. Rũ nüetama ega woo wüxi i coriarü duũxũgü pixĩgũgu rü èxna taxúxearü duũxũgü pixĩgũgu. Rũ nüetama ega woo piyatũgu rü èxna pingexgu. Erü ñuxma na Ngechuchu ya Cristuarü duũxũgü na pixĩgũxũ, rü wüxitama i duũxũ pixĩgü i guxãma i pemax. ²⁹ Rũ ñuxma na Cristuarü pixĩgũxũ, rü ngẽmacèx waxi nixĩ na aixcũma Abráũtaagü pixĩgũxũ. Rũ ngẽmacèx i pema rü tá ta penayaxu i guxũma ga yema Abráũmaã inaxunetaxũ ga Tupana.

4

1 Rū dūcax, ngēxguma wūxi i buxū yunatūgu, rū ngēma buxū rū tama ngēxgumatama nanayaxu i nanatūarū ngēmamaxūgū. Rū woo guxūma i nanatūarū ngēmamaxūarū yora yixīgu, natūrū ngēxūrūūxū i nanatūarū puracūtanūxūrūūmare nixī űuxmata nayèx. 2 Rū ngēmacèx nangēxma i ngēma buxūarū daurū i namaā icuáxū rū nūxū nūxna dauxū i ngēma nanatūarū ngēmamaxūgū űuxmata nawa nangu ya yima taunecū ya noxri nanatū nagu unetacū na ngēma buxū rū nūgūmaā inacuáxūcèx. 3 Rū yexgumarūū nixī ga tamaā nangupetūxū ga noxrix. Yerū yexguma tauta Cristuxū icuèxgu, rū natūūwa tayexmagū ga yema naāēgū i chixexūgū i űoma i naānemaā icuèxgūxū. 4 Natūrū yexguma nawa nanguxgu ga yema ngunexū ga inaxunetaxū ga Tupana, rū nūma nanamu ga Nane. Rū duūxūgūrūū wūxi ga ngewa naba ga guma Nane. Rū yema Moīché űmatūxū ga mugūtūūwa nayexma ga yexguma nabuxgu. 5 Rū yemaācū nūma nangu ga Tupana Nane na tūxū inanguxūxēēxūcèx i guxāma i yixema ga noxri mugūtūūwa na iyexmagūxū. Rū yemaācū tūxū narūngūxēē ga nūma ga Tupana Nane na Nanatū ya Tupanamaā tūxū yaxuxūcèx na aixcūma naxācūgūxūchi ixīgūxū. 6 Rū Tupana pexna nanamu ga Naāē i Ūūnexū na pexū nūxū nadauxēēxūcèx na aixcūma naxācūgūxūchi pixīgūxū. Rū ngēmacèx i űuxma rū marū name i “Pa Chaunatūx”, űaperūgū nūxū ya Tupana. 7 Rū ngēmacèx i űuxma rū Tupanaxācūxūchi quixī, rū tama wūxi i norū duūxūmare quixī. Rū űuxma na naxācūxūchi quixī, rū norū ngūchaū nixī na cuxna naxāāxū i guxūma i tacū i noxrū ixīxū.

Paurū rū yema yaxōgūxūcèx naxoegaāē

8 Rū űpa ga yexguma tauta Tupanaxū pecuèxgu, rū perū tupanane-tagūtūūwa peyexmagū rū nūxū picuèxūūgū ga yema tama aixcūma Tupana ixīgūxū. 9 Natūrū i űuxma na Tupanaxū pecuáxū rū nūma rū na pexū nacuáxū, rū űtūxcūū wena naxcèx pewoeguchaū i ngēma naāēgū i chixexūgū i űoma i naānemaā icuèxgūxū? űRū tūxcūū penaxwèxe na wena natūūwa pegū pengēxmagūxēēxū, i ngēma naāēgū i tama aixcūma poraxū i natūcèxmare ixīgūxū? 10 Rū dūcax i pemax, rū űuxma rū ta ngēma nuxcūmaūgūxū i Yudiūgūcūmagu pexīāma woo Cristuaxū na peyaxōgūxū. Erū penaxaure i űuxre i ngunexūgū rū űuxre ya tauemacūgū rū űuxre ya taunecūgū rū űuxre i petagū, erū nagu perūxīnūē na ngēmaācū Tupanaxēwewa tá pimexū. 11 Rū ngēmacèx poraācū chaxoegaāē, erū ngūrūāchi natūcèxmare tā nixī ga yema puracū ga petanūwa chaxūxū. 12 Pa Chaueneēgū, pexū chacèxū na chauxrūū nūxū perūxoexū na nagu pexīxū i ngēma Yudiūgūarū mugū. Erū űuxma na Cristuwe charūxūxū rū marū nūxū charūxo na nagu chixūxū ga yema mugū ga űpa tama nagu pexīxū. Rū dūcax, yexguma noxri petanūwa chayexmagu rū tama choxū pexo, rū ngēmacèx chanaxwèxe i űuxma rū ta chauga pexīnūē. 13 Rū pema rū marū nūxū pecuèx rū yexguma noxri pemaā nūxū chixuxgu ga Tupanaārū ore i mexū, rū yema na chīdaawexūgagu nixī ga petanūgu charūxūāxū rū pemaā nūxū chixuxū ga Tupanaārū ore. 14 Rū yema daawe ga choxū yexmaxū, rū woo pexcèx rū wūxi ga wèxtūmūū nixī, natūrū tama choxū pexo rū tama choxū īpetēxūchi. Natūrū meāma choxū peyaxūgū űoma wūxi ga Tupanaārū orearū ngerūū i daxūcūāx chīxūrūū. Rū űoma Ngechuchu ya Cristu chīxūrūū, meāma choxū peyaxūgū. 15 űNatūrū tacū ēxna nangupetū namaā ga yema perū taāē ga noxri pexū yexmaxū? Erū pemaā nūxū chixu rū noxri petanūwa chayexmagu rū poraācū chomaā

petaãëgü. Rü yexguma chi pexü natauxchagu, rü pemaã nanguxügu, rü chi pexetü peyaxu na choxna penaxãxücëx, yerü yemaãcü poraãcü chomaã petaãëgü ga yexguma. ¹⁶ ¿Natürü tacü pexü naxüpetü i ñuxmax? ¿Pexcëx rü êxna perü uwanü chixi yerü pemaã nüxü chixu ga Tupanaãrü ore i aixcüma ixixü? ¹⁷ Rü ngëma duüxügu i pexü ngüexëëxü na Yudiugücümüga na pexixücëx, rü pegu narüñnënetä, tama aixcüma tacü rü mexücëx nadaugü. Erü nümagü rü toxna pexü nixigachixëëchaü na ngëmaãcü naga pexinüëxücëx. ¹⁸ Rü ngëma togü rü marü name na pegu naxinüëxü, natürü nanaxwëxe na perü mexücëx nadaugüxü i guxüguma. Rü tama name na petanüwa changëxmaguxicatama perü mexücëx na nadaugüxü i ngëma togü. ¹⁹ Pa Chauacügüx, wenaxãrü ñoma wüxi i mama ngixãcümaã nguxnecacürüü poraãcü pexcëx ngüxü chinge na aixcüma meã Cristuaxü peyaxögüxücëx rü aixcüma naxcëx na pemaxëxücëx. Rü ngëmaãcü tá chixi ñuxmatáta Cristu naxwëxëxürüü pixigü i perü maxüwa. ²⁰ Rü chierü ñuxmatama pexütawa changëxmagu na pemaã chidexaxüchixücëx, rü tama ñuxmarüü pexcëx chanaxümatümarexücëx. Erü ñuxma rü tama nüxü chacuëx na tacügu pemaã charüxinüxü.

Ore i cuëxrüü i Abráüxütaxü ga Agáchiga rü namëxüchi ga Charachiga

²¹ Rü pema na ngëma Moiché ümatüxü i mugütüüwa pegü pengëxmagüxëëchaüxü, rü chanaxwëxe i chomaã nüxü pixu ngoxi aixcüma nüxü pecuá na ñuxü ñaxü i ngëma mugü. ²² Erü ngëma mugüwa nüxü tadau rü Abráü rü nüxü nayexma ga taxre ga nane. Rü wüxi ga nane rü naxütaxü ga Agáwa nüxü nayexma, rü naí ga nane rü namëxüchi ga Charawa nüxü nayexma. ²³ Rü guma nane ga naxütaxüwa nüxü yexmacü, rü nabu yerü yema nixi ga norü ngüchaü ga Abráü. Natürü guma nane ga namëxüchiwa nüxü yexmacü, rü nabu yerü yemaãcü inaxuneta ga Tupana. ²⁴⁻²⁵ Rü pemaã nüxü chixu i ngëma ore erü ngëmawa nangëxma i tacü i aixcüma ixixü i pexcëx changoxëëchaüxü. Rü yema taxre ga ngexügu rü taxre i cuëxrüügü nixigü na ngëmawa nüxü icuáxücëx na ñuxãcü Tupana duüxügüxü rüngüxëëxü na naxütawa nangugüxücëx. Rü yema nüxüraüxü ga norü ngüxëë nixi ga yexguma Chinaíarü mëxpünewa Moichéna naxãägu ga norü mugü na naga naxinüëxücëx ga duüxügü. Rü yema mugü ga Moichéna naxãxü ga Chinaíwa rü Agá iyixi ga norü cuëxrüü. Rü yema nge ga Agá rü naxütaxü iyixi ga Abráü rü yemacëx ga ngixãcügu rü ngixrüütama togütüüwa nayexmagü rü tama ínanguxü. Rü yemaãcü ga yema nge rü wüxi i cuëxrüü iyixi nachiga i ngëma Yudiugü i ñuxma maxëxü rü ngëma mugüwe rüxixü. Erü nümagü rü ñuxma rü ta natüüwa nangëxmagü i ngëma mugü ga Moiché yaxuxü ga mëxpüne ga Chinaí ga Arabíaanewa ngëxmanewa. Rü ñuxma rü ta ngëma mugüga naxi rü tama nüxü narüxoe. ²⁶⁻²⁸ Natürü yema nge ga Abráü namëxüchi rü tama Agárüü iyixi. Rü ngíne ga Ichaá rü nabu yerü Tupanaãxü nayaxö ga Abráü ga yexguma Tupana namaã nüxü ixuxgu rü tá na nüxü nayexmaxü ga wüxi ga nane. Rü ñuxma Pa Chaueneëgüx, yixema rü ta tayaxö i ngëma Tupana tamaã ixunetaxü. Rü ngëmacëx i ñuxma rü tama ngëma nuxcümaügüxü i mugütüüwa tangëxmagü. Rü ngëmaãcü Abráü namëxüchixacügürüü tixigü. Rü ngëmaãcü nüxü tadau na aixcüma Tupana yanguxëëxü i norü ore ga Abráü namëxüchichiga ümatüxü i ñaxü:

“¡Nataãë, Pa Ngecü i Ngexacücü! ¡Rü curü taãëmaã rüxáixnaxü woo tagu-machirëx na cuxãxãcüxü! Erü tá cuxãxãcü, rü ngëma ngexü i cuxütaxü

i cuteaxū āxācūxūārū yexera tá cuxū nangēxma i cuxacūgū”,
 ñaxū. ²⁹ Natürü guma Abráū nane ga naxūtaxūwa nūxū yexmacū, rü
 chixri namaxū namaā ga guma Abráū nane ga Tupanaārū unetagagu bucū.
 Rü ngēxgumarūū ta i ñuxma rü yixema i Tupanaāē i Üünexūgagu tūxū
 na nangēxmaxū i maxū, rü chixri tamaā nachopetū i ngēma Yudiūgū i
 naxwēxegūxū na nagu ixīxū i ngēma mugū ga Moīché ūmatūxū. ³⁰ ¿Natürü
 ñuxū ñaxū i Tupanaārū ore i ūmatūxūwa? Rü dūcax, ngēmawa Abráūmaā
 nūxū nixu ga na ngīxū ínátāxūcēx ga naxūtaxū ngīnemaā, yerū taxucūrūwama
 yema ngīnemaā nayayauxye ga norū yemaxū ga namēxwaxūchixūcū ga
 naneārū tá ixīxū. ³¹ Rü ngēmaācū, Pa Chaueneēgūx, rü nūxū tadau rü tama
 Abráū naxūtaxūxācūgūrūū tixīgū, erū tama ngēma mugūtūūwa tangēxmagū.
 Natürü Abráū namēxūchixacūgūrūū tixīgū, erū Tupanaārū unetagagu tūxū
 nangēxma i tórū maxū.

5

Meā pegūna pedaugū na tama wena ngēma mugūtūūwa pengēxmagūxūcēx

¹ Rü ñuxma ya Cristu rü marū tūxū ínanguxūxēē na tama ngēma
 mugūtūūwa ingēxmagūxūcēx. Rü ngēmacēx name nixī i pegūna pedaugū na
 tama wena natūūwa pegū pengēxmagūxēēxūcēx i ngēma mugū. ² ¡Rü choxū
 iperūxīnūē! Rü choma i Pauru rü pemaā nūxū chixu, rü ngēxguma chi nagu
 pexīxgu na pegū ípewiechēxmūpēxechiraūxū na ngēmaācū penayaxuxūcēx i
 perū maxū, rü ngēxguma ya Cristu rü chi taxuwama pexū name. ³ Rü wena
 pemaā nūxū chixu rü ngēxūrūū i yatū i nūgū íwiechēxmūpēxechiraūchaūxū
 na ngēmaācū Tupanapēxewa namēxūcēx, rü name nixī i nūxna nacūēxāchi
 na taxucūrūwa ngēmaācū na nayauxāxū i norū maxū ega tama aixcūma naga
 naxīnūgū i guxūma i togū i mugū. ⁴ Rü guxāma i pema i nagu rūxīnūēxē na
 Tupanapēxewa pimexū ega nagu pexīxgu i ngēma mugū, rü pemaā nūxū
 chixu rü marū Cristuna pixīgachi i ngēxgumax. Rü ngēxgumarūū ta pegū
 nūxna peyaxūxēē i ngēma ngechaū ga noxri Tupana namaā pexū ngechaūxū.
⁵ Natürü Tupanaāē i Üünexū nixī i tūxū rüngūxēēxū na yaxōgūxūcēx. Rü
 ngēmacēx nixī i ínanguxēēxū na Cristugagu Tupanapēxewa imexū. ⁶ Rü
 ngēmacēx i ñuxma na Ngechuchu ya Cristuarū duūxūgū ixīgūxū, rü nūētama
 nixī ega woo íwiechēxmūpēxechiraūgu rü ēxna tama, erū naga ngēma nixī
 i Tupanapēxewa tūxū mexēēxū. Rü ngēma Tupana naxwēxexū i ñuxma
 nixī na aixcūma yaxōgūxū rü ngēmaācū yigū na ingechaūgūxū. ⁷ Pema
 rü meāma ipenaxūgū na Cristuwe perūixīxū. ¿Rü texē ēxna pexū nūxū
 taxoox na tama naga pexīnūēxūcēx i norū ore i aixcūma ixīxū? ⁸ Rü pemaā
 nūxū chixu, rü tama Tupana ga noxri pexcēx cacū nixī ya yima pexū
 nūxū oócū. ⁹ Rü name nixī i nūxna pecuēxāchie rü wūxitama i duūxū i
 chixexū ūxū, rü nanachixexēē i guxūma i togū i natanūxūgū, ñoma wūxi
 i íraxū i pāūārū puxēerūū rü wūxi i taxū i pāūchara ipuxēēxūrūū nixī.
¹⁰ Choma rü chayaxō na tórū Cori tá pexū rüngūxēēxū na choma nagu
 charūxīnūxūrūū nagu perūxīnūēxūcēx. Natürü Tupana tá nanapoxcu i
 ngēma duūxū i pexū chixeāēxēēxū, rü nūētama nixī ega woo texē tixīgū. ¹¹ Rü
 nūmaxū i duūxūgū rü chauchiga nidexagū, rü nūxū nixugūe na choma rü
 duūxūgūxū changūxēēēxū na nūgū ínawiūchēxmūpēxechiraūxūcēx rü mugū
 na yanguxēēgūxūcēx na ngēmaācū nūxū nangēxmaxūcēx i maxū i taguma
 gūxū. Natürü, Pa Chaueneēgūx, rü ngēxguma chi ngēmaācū duūxūgūxū

changúexēēgu, rü tãu chima chowe ningēxūtanū i Yudiūgu, erü tãu chima naãēwa nangux i ngēma ore i nüxū chixuxū nachiga ya Cristu ga curuchagu taxcēx yucū. ¹² Natürü ngēma duūxūgū i pexū chixēāēgūxū rü pexū ucuxēgūxū na pegū ípewiūchēxmüpēxechiraūxūcēx, rü ŷtūxcūū ēxna i nümagū i tãu noxtacūma nügū yacaugüpūxūcharexegūxū ta? ¹³ Natürü pemax, Pa Chaueneēgūx, rü Tupana pexcēx naca na ngēma mugūna ípenguxūxūcēx. Natürü ñuxma na nüxna ípenguxūxū, rü tama name i ngēmacēx pexeneärü ngúchaū pexūgū. Natürü name nixī na pegū pengechaūgūxū rü ngēmaācū pegū perūngūxēēgūxū i wūxichigū. ¹⁴ Erü guxūma i Tupanaärü mugū rü wūxi i muwatama nangox rü ñanagürü:

“¡Rü nüxū nangechaū i cumūcū na cugūtama cungechaūxūrū!”
ñanagürü. ¹⁵ Natürü name nixī i pexuāēgū erü ngēxguma chi pegūmaā penuēgu rü pegūchi pexaiegu, rü ngürüāchi tá pegū pewoone rü tá ipeyanaxoxēē i Tupanaärü ore i pewa ngēxmaū.

Ngēma taxūneärü ngúchaū rü tama Tupanaāē i Üünexūārü ngúchaūmaā nawūxigu

¹⁶ Pemaā nüxū chixu, rü name nixī i Tupanaāē i Üünexū naxwēxēūācūma pemaxē. Rü ngēxguma ngēmaācū pemaxēgu, rü tãūtama pexeneärü ngúchaū pexūgū. ¹⁷ Erü ngēma taxūneärü ngúchaū rü tama Tupanaāē i Üünexūārü ngúchaūmaā nawūxigu. Rü ngēma Tupanaāxē i Üünexūārü ngúchaū rü tama taxūneärü ngúchaūmaā nawūxigu. Erü ngēma taxre i ngúchaūgū, rü nügūchi naxaie erü wūxichigū i ngēma rü tamaā inacuáxchaū. Rü ngēmacēx i pema rü taxucürüwa penaxū i ngēma pematama penaxwēxēū. ¹⁸ Natürü ngēxguma Tupanaāē i Üünexū pemaā icuēxgux, rü marü tama ngēma nuxcūmaūgūxū i mugütūūwa pengēxmagū. ¹⁹ Rü meāma nangox na ñuxācū namaxēxū i ngēma duūxūgū i naxūneärü ngúchaū ūgūxū, rü naī i ngemaā maxēxū, rü airugürūūmare ixīgūxū. Rü tama naxāneē na ŷacū rü chixexū naxūgūxū. ²⁰ Rü tupananetachicūnēxāgūxū nicuēxūūgū, rü togūchi naxaie norü ngēmaxūgūcēx, rü nanuxwēxegū, rü duūxūgūxū naxucuxēgū na to i nguxēētaegu naxīxūcēx, rü ngēmaācū nayatoye i duūxūgū na tama wūxigu naxīnūēxūcēx. ²¹ Rü togūarü ngēmaxūgūcēx nixāūxāchigū, rü nangāxēwēxegū, rü peta naxūgūecha, rü nanaxūgū i muxūma i togū i chixexūgū i ngēxgumarūū ixīxū. Rü ngēmacēx, wena pemaā nüxū chixu rü guxūma i ngēma duūxūgū i ngēmaācū maxēxū, rü nataxūtama i nachica i ngextá Tupana āēxgacū íyīxūūwa. ²² Natürü ngēxguma Tupanaāē i Üünexū tamaā icuēxgu, rü nūma nixī i tūxū nangūxēēxū na yigū ingechaūgūxūcēx, rü itaāēgūxūcēx, rü meā yigūmaā imaxēxūcēx, rü yaxna namaā ixīnūēxūcēx i togū, rü togūmaā imecūmagūxūcēx, rü togūxū rüngūxēēgūxūcēx, rü aixcūma yanguxēēxūcēx i ngēma nüxū ixuxū. ²³ Rü ngēxgumarūū ta Naāē i Üünexū tūxū narūngūxēē na tama chixexūmaā nataeguxēēxūcēx ega togū chixexū tamaā ūxgux. Rü tūxū narūngūxēē na meāma yigūnatama idauxūcēx na tama chixexūgu iyixūcēx. Rü nataxuma i mugū i nachuxuxū na naxūxū i ngēma mexūgū. ²⁴ Rü ngēma duūxūgū i aixcūma Ngechuchu ya Cristuarü duūxūgū ixīgūxū, rü marü nüxū narūxoe ga yema nuxcūmaūxū ga norū maxū ga chixexū, rü yema naxūneärü ngúchaūgū ga chixexū, rü guxūma ga ŷacū ga to ga ngúchaū ga tama mexū. ²⁵ Rü ñuxma na Tupanaāē i Üünexū tūxna naxāxū

i tórü maxũ, rü name nixĩ i nüma tórü maxũmaã na inacuáxũ. ²⁶ Rü tama name i yigũ Ítarũta rü togũmaã tanuãe, rü bai na ƣacũcèx ixãũxachixũ.

6

Name nixĩ i guxãma i pema rü pegũ perũngũxèegũ i wũxichigũ

¹ Pa Chaueneëgũx, ngèxguma chi texéxũ pedèuxgu na ƣacũ rü chixexũgu tanguxũ, rü pema na Tupanaãe i Üünexũ naxwèxexũãcũma na pemaxéxũ, rü name nixĩ i tũxũ pengechaũãcũma tũxũ perũngũxèe na itayaruwèxãchixũcèx. ¡Natürũ pexuãëgũ i wũxichigũ, na tama pema rü ta nagu peyixũcèx i ngèma chixexũ! ² ¡Rü pegũ perũngũxèegũ i ngèxguma texé petanũwa guxchaxũgũ tũxũ ngèxmagu! Erũ ngèxguma ngèmaãcũ pegũ perũngũxèegũ, rü ngèmaãcũ tá peyanguxèe i ngèma Cristu pexũ muxũ. ³ Rü ngèxguma texé nagu rüxĩnũgu na wũxi i ƣacũ tixĩxũ, rü tũgũtama tawomũxèe, erũ Tupanapèxewa rü taxuũmachirèx tixĩ. ⁴ Rü ngèmacèx i wũxichigũ, rü name nixĩ i tũgũarũ maxũtama tangugũ. Rü ngèxguma namexgu i tũmaãrũ maxũ, rü tũgũmaã tátama tataãe, rü taxucèxma tũxcũũ togũarũ maxũtwa tũgũ tangugũarũ maxũãx. ⁵ Erũ tanaxwèxe ya wũxichigũ na tũmaãrũ maxũnatama tadauxũ i Tupanapèxewa. ⁶ Rü yixema nayaxuxe i nguxèëtae i Tupanaãrũ orewa rü name nixĩ na tũmaãrũ nguxèeruũmaã tangauxũ i gũxũ i tũmaãrũ ngèmaxũgũ. ⁷ ¡Rü pexuãëgũ na tama ípetũexũcèx i perũ maxũtwa! Erũ taxucũrũwa texé Tupanaxũ tawomũxèe. Rü yixema chixexũ úxe, rü chixexũ tá tayaxu. Rü yixema mexũ úxe, rü mexũ tá nixĩ i tayaxuxũ. ⁸ Rü yixema tũmaxũneãrũ ngũchaũ úxe, rü ngèma tũmaxũneãrũ ngũchaũ rü tá yuwa tũxũ naga. Natürũ yixema Tupanaãe i Üünexũarũ ngũchaũ úxe, rü ngèma Tupanaãe i Üünexũtwa tá tanayaxu i maxũ i taguma gũxũ. ⁹ Rü ngèmacèx tama name na nüxũ rũchauexũ na mexũ ixüexũ. Erũ ngèxguma chi tama nüxũ rũchauegu, rü düxwa mexũ tá tayaxu i Tupanaxũtawa. ¹⁰ Rü ngèmacèx ngèxguma tũxũ nangèxmagu na ƣacũmaã togũxũ rũngũxèexũ, rü name nixĩ i guxãxũma tarũngũxèe. Natürũ yexera tanaxwèxegũ na nüxũ rũngũxèegũxũ i ngèma taeneëgũ rü taeyèxgũ i yaxõgũxũ.

Pauru rü nüxũ narũmoxè ga yema yaxõgũxũ, rü nayaxucũxègũ

¹¹ Rü nuã tá ichanaxũgũ na chomaxũchima choxmèxmaã pexcèx chanaxũmatũxũ i ñãã popera. ¡Rü dücax, nüxũ pedèux i ngèma choma chaxũmatũxũ na ñũxãcũ natamatũxũ! ¹² Rü ngèma Yudiugũ i pexũ ngũexèexũ na pegũ ípewiechèxmũpèxechiraũgũxũcèx, rü ngèmaãcũ pexũ namu erũ nanataãèxèegũchaũ i ngèma togũ i Yudiugũ na tama naxchi naxaixũcèx nagagu na Ngechuchu ya Cristu ga curuchagu yucũaxũ na yaxõgũãxũ. ¹³ Erũ woo i nümagũ na ínawiũchèxmũpèxechiraũxũ, rü tama nayanguxèe i guxũma i mugũ. Natürũ nümagũ rü nanaxwèxegũ na pegũ ípewiũchèxmũpèxechiraũxũ, na yixcama nügũ yacũxũgũxũcèx rü togũ i Yudiugũmaã nüxũ na yaxuxũcèx na pema rü ta naxrũũ nagu pexĩxũ i ngèma nuxcũmaũgũxũ i mugũ. ¹⁴ Natürũ i choma rü chaugũ chicuèxũũ erũ nüxũ chayaxõ ya tórü Cori ya Ngechuchu ya Cristu ga curuchagu yucũ. Rü ngèmacèxicatama nixĩ i chaugũ chicuèxũũxũ. Rü ñũxma na Cristu ga curuchagu yucũaxũ chayaxõxũ, rü marũ tama nagu charũxĩnũ i ñoma i naãne rü norũ ngèmaxũgũ. Rü ngèxgumarũũ ta i ñoma i naãne rü marũ tama choxũ nacuãxchaũ. ¹⁵ Erũ ngèxguma Ngechuchu ya Cristuarũ duũxũgũ ixĩgũgu, rü Tupanapèxewa rü taxuũma nixĩ i ngèma na íwiewchèxmũpèxechiraũxũ rü

ēxna tama. Natürü ngēma aixcūma napēxewa mexŭ nixī na naxūchicüüxŭ i tórü maxŭ na ngexwacaxŭxŭ i duŭxŭgü ixīgüxcèx. ¹⁶ Rŭ Tupanana naxcèx chaca na pexŭ nataāēxēēgüxcèx rŭ nüxŭ pengechaŭtümüügüxcèx i guxāma i pema i aixcūma yanguxēēgüxe i ngēma pemañ nüxŭ chixuxŭ, rŭ guxāma ya yíxema aixcūma Tupanaārŭ duŭxŭgü ixīgüxe. ¹⁷ Rŭ ñuxmawena rŭ tama chanaxwèxe na texé tacü rŭ guxchaxŭgü choxna āxŭ. Erü choma rŭ aixcūma tórü Cori ya Ngechucharŭ duŭxŭ chixī. Rŭ ngēma chorü oxrigüchica i chowa ngēmagŭxŭwa nüxŭ pecuèx na aixcūma yīxŭ i ngēma. ¹⁸ Pa Chaueneēgŭx, chanaxwèxe i tórü Cori ya Ngechuchu ya Cristu pexŭ narüngŭxēē i guxāma i pemax. Rŭ ngēmaäcü yīi.

Rŭ nuāma pexna,
Pauru

POPERA GA EPÉCHIUWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Epéchiuarü iānewa yexmagüxü

¹ Pa Chaueneëgü ya Epéchiuwa Ngëxmagüxe, choma i Pauru nixi i pexcëx chanaxümatüxü i ñaā popera. Rü choma i Pauru chixi i Tupana choxü yaxuxü na Ngechuchu ya Cristu choxü muxüçëx na duüxügümaā nüxü chixuxüçëx i norü ore. Rü pexcëx chanaxümatü i guxāma i pema ya Epéchiuarü iānewa ngëxmagüxe rü Tupanaārü duüxügü ixigüxe rü Ngechuchu ya Cristuaxü yaxögüxe. ² Rü chanaxwëxe i pexü narüngüxëë rü pexü nataāëxëë ya Tanatü ya Tupana rü törü Cori ya Ngechuchu ya Cristu.

Tupana rü poraäcü tüxü narüngüxëë erü Cristuarü duüxügü tixigü

³ Rü name nixi i nüxü ticuëxüügü ya Tanatü ya Tupana ya törü Cori ya Ngechuchu ya Cristunatü ixicü. Erü nüma ya Tupana rü Cristugagu tüxna nanaxā i naguxüraüxü i ngüxëëgü i üünexü i dauxügüxü i naanewa taxcëx ne namugüxü. ⁴⁻⁵ Rü tautama naāne üxgu, rü Cristugagu Tupana tüxü nade na napëxewa ixüünegüxüçëx rü na nataxuxüçëx i törü chixexü i napëxewa. Rü Tupana rü poraäcü tüxü nangechaü. Rü yemacëx nuxcümamatama tüxü naxuneta na naxäcügüxü tüxü nadexüçëx Ngechuchugagu. Rü yemaäcü nanaxü yerü yema nixi ga norü ngüchaü. ⁶ Rü ngëmacëx name nixi i guxüguma nüxü ticuëxüügü ya Tupana. Erü nüma rü poraäcüxüchima tamaā namecüma rü poraäcü tüxü narüngüxëë ga yexguma taxcëx nüma namuāxgu ga Nane ya nüxü nangechaüxüchicü. ⁷ Rü Tupana rü poraäcü tüxü nangechaü, rü yemacëx nanamu ga Nane na taxcëx nayuxü rü nagü inabaxü na yemaäcü tüxü ínanguxüxëëçëx rü tüxü nüxü nangechaüxüçëx ga törü pecadugü. ⁸ Rü Tupana tüxü nüxü nadauxëë na ñuxäcü poraäcü tüxü nangechaüxü ga yexguma tüxna naxāāxgu ga guxüma ga törü cuëx na taāëxü icuáxüçëx rü tüxü natauxchaxüçëx i norü ore. ⁹ Rü tüxü nüxü nacuëxëë ga norü ngüchaü ga noxri nüxicatama nüxü nacuáxü. Rü yema norü ngüchaü ga nuxcümáxüchima Cristumaā nagu naxinüxü ga Tupana, rü yema nixi ga ñoma ga naānewa na namuāxü na tüxü yamaxëxëxüçëx. ¹⁰ Rü yema nagu naxinüxü nixi na Cristumëxëwa nangëxmaxëëxü i guxüma i daxügüxü i naānewa ngëxmaxü rü guxüma i ñoma i naānewa ngëxmaxü. Rü ngëmaäcü tá nanaxü ya Tupana i ngëxguma nawa nanguxgu na yanguxëëxü. ¹¹ Yerü naxüpa ga ñoma ga naane naxüxü ga Tupana, rü woetama tomaā nanaxuegu na Cristugagu tanayauxgüxüçëx i ngëma maxü i taguma güxü i nüma toxna naxāxchaüxü na aixcüma naxcëx tamaxëxüçëx. Rü aixcüma yemaäcü nanaxü yerü yema nixi ga norü ngüchaü ga Tupana ya guxüma ücü, ngëma nüma nagu naxinüxüäcüma. ¹² Rü yemaäcü Tupana tomaā nanaxuegu na toma i toxira Cristuaxü yaxögüxe naxcëx tamaxëxüçëx rü nüxü ticuëxüügüçëx naxcëx i norü pora i üünexü. ¹³ Rü yexgumarü ta ga pema i Epéchiucüāxgü, rü yexguma nüxü pexinüëgu ga yema ore i aixcüma ixixü i tüxü maxëxëëxü, rü yexguma Cristuaxü peyaxögügu, rü namüçügü pixigü. Rü Tupana ga tamaā ixunetacü na tüxna namuāxüçëx i Naāë i Üünexü, rü marü pexna nanamu i ngëma Naāë na nüxü pecuáxüçëx na aixcüma norü duüxügü pixigüxü. ¹⁴ Rü ngema Naāë i Üünexü ga Tupana tüxna muxü, rü

ngemaawa nixī i nūxū icuáxū na aixcūma Tupana tá tūxna naxāxū i guxūma i ngema tamaā inaxunetaxū. Rū ngēxguma wena nūma naxūxgu ya Cristu na nūgūxūttawa tūxū nagagūxūcēx rū aixcūma tá tanayaxu i guxūma i ngema Tupana tomaā nūxū ixuxū. Rū ngēmacēx name nixī na nūxū icuēxūūgūxū ya Tanatū ya Tupana ya ūxūnecū.

Pauru rū yaxōgūxūcēx nayumūxē.

¹⁵⁻¹⁶ Rū ngēmacēx, űuxma na nūxū chacuáxū na aixcūma tórū Cori ya Ngechuchuaxū peyaxōgūxū rū na aixcūma nūxū pengechaūgūxū i guxūma i ngēma togū i Tupanaārū ixīgūxū, rū ngēmacēx taguma nūxū charūchau na pexcēx moxē nūxna chaxāxū rū pexna chacuēxāchixū i chorū yumūxēwa. ¹⁷ Rū ngēxguma namaā chideaxgu ya Tanatū ya Tupana ya mexēchicū ya Nanatū ya tórū Cori ya Ngechuchu ya Cristu, rū naxcēx nūxna chaca na pexna naxāāxūcēx i ngēma cuēx i Naāē i Ūūnexūtwa ne ūxū. Rū ngēma Naāē i Ūūnexū tá nixī i pexcēx nangōxēēxū i Tupanaārū ore i mexū na yexeraācū nūxū pecuáxūcēx ya Tupana. ¹⁸ Rū Tupanana naxcēx chaca na nūmatama pexū yangōxnaāēxēēxūcēx, na nūxū pecuáxūcēx na űacū yīīxū i ngēma īpenangūxēēxū i naxcēx pexū nadexū. Rū nūxna naxcēx chaca na pexū nūxū nacuēxēēxūcēx na űuxācū namexēchixū i ngēma maxū i taguma gūxū i nūma norū duūxūgūcēx namexēēxū i daxūguxū i naānewa. ¹⁹⁻²⁰ Rū ngēxgumarūū ta rū nūxna naxcēx chaca na pexū nūxū nacuēxēēxūcēx na űuxācū nataxūchixū i norū pora i tawa ngēxmaxū rū namaā tūxū nangūxēēxū i yixema na yaxōgūxū. Rū ngēmatama pora i taxūmaā nixī ga napuracūxū ga Tupana ya yexguma yuwa Cristuxū īnadaxēēgu rū daxūguxū ga naānewa nagaāxgu rū nūgūarū tūgūnecūwawa yanatōxēēāgu na guxāārū āēxgacū yīīxūcēx. ²¹ Rū yemaācū guxūētūwa nanayexmaxēē. Rū ngēmacēx i űuxma rū Cristumēxēwa nangēxmagū i guxūma i daxūguxū i naānecūāx i āēxgacūgū rū guxūma i űoma i naānecūāx i āēxgacūgū. Rū ngēmaācū naxmēxwa nangēxmagū i guxūma i pora i űuxma ngēxmagūxū rū guxūma i pora i tá ngēxmagūxū. Rū ngēmaācū i nūma rū guxū i āēxgacūgūarū āēxgacū tá nixī i guxūguma. ²² Rū yemaācū ga Tupana rū marū Cristumēxēwa nanayexmagūxēē ga guxūma. Rū yexgumarūū ta Cristuxū ningucuchixēē na guxūma i yaxōgūxūlērū na yīīxūcēx. ²³ Rū űuxma rū guxūma i yaxōgūxū rū wūxigu Cristuarū nixīgū. Rū nūma nixī i tawa nangēxmaxū i guxāma i yixema i nūxū na yaxōgūxū. Rū ngēxgumarūū ta nūma nixī i nangēxmaxēēāxū i guxūma i űacū i ngēxmaxū i guxūwama.

2

Tamaxē erū Tupana tūxū nangechaū

¹ Rū űpa ga pema rū perū pecadugagu rū perū chixexūgagu űoma peyuexūrūū pixīgū. ² Yerū ga pema rū nagu pexī ga yema chixexū i űoma i naānecūāx i duūxūgū nagu īxū. Rū pema rū naga pexīnūē ga Chatanā i ngoxogūarū āēxgacū ixīxū. Rū nūma nixī i nūxū nangūchaūxēēāxū na chixexū naxūgūxūcēx i guxūma i ngēma duūxūgū i tama Tupanaga īnūēxū. ³ Rū guxāma ga yixema rū yemaācū chixri tamaxē ga űpa. Rū tanaxū ga tōxrūtama ngūchaū, rū nagu taxī ga yema taxūne naxwēxexū rū yema taāē naxwēxexū. Rū yemagayu yema togū ga duūxūgū ga chixexū ūgūxūrūū nawa taxūgū i ngēma poxcu i āūcūmaxūchixū i Tupana mexēēxū. ⁴ Natūrū ga Tupana rū poraācū nūxū tangechaūttūmūūgū rū poraācū tūxū nangechaū.

5 Rū yemacèx, woo tórū pecadugagu ñoma iyuexürüü tixīgü, natürü ga Tupana rü tüxna nanaxā ga maxü ga yexguma Cristuxü ínadaxēēgu. Rū ñuxma rü pexü nangēxma i maxü i taguma gúxü, erü Tupana pemaā namecūma. 6 Rū yema na Ngechuchu ya Cristuxü wena namaxēēxürüü rü tüxü rü ta namaxēēxē ga Tupana. Rū yemaācü nanaxü na yixema ru ta Cristumücügü ixīgüxcèx, rü namaā āēxgacügü ixīgüxcèx i daxüguxü i naānewa. 7 Rū yemaācü nanaxü ga Tupana na guxügutáma duüxügüxü nawéaxüxcèx na ñuxācü Cristugagu poraācü tüxü nangechaüxü rü tamaā namecūmaxü. 8 Rū yemaācü pemaā namecūma ga Tupana. Rū yemacèx penayaxu ga maxü i taguma gúxü yerü peyaxōgü. Rū ngēma maxü rü taxucürüwama pegünatama penaxā, natürü Tupana nixi ga pexna naxāmarecü ga yema. 9 Rū tama facü i mexü i pexüügagu nixi i pexü nangēxmaxü i ngēma maxü, natürü Tupana nixi ya pexna naxāmarecü na ngēmaācü taxüema tügü icuèxüüxcèx. 10 Rū Tupana nixi ga tüxü maxēxēēcü. Rū ñuxma rü tüxü nangēxma i ngēma maxü yerü Ngechuchu ya Cristu tórü pecaducèx nayu. Rū Tupana tüxna nanaxā i ngēma maxü na meā imaxēxüxcèx rü mexü ixügüxcèx. Rū yemaācü tüxü narüngüxēē ga Tupana yerü woetama nuxcūmaxüchima marü yemagu narüxínü.

Cristu nixi ya yigümaā tüxü rüngüxmüxēēcü

11-12 Rū ngēmacèx i pema na tama Yudiügü pixīgüxü, rü name nixi i nüxna pecuèxāchie na tama toxrüü na pixīgüxü ga noxri rü tama Tupanaxü na pecuèxgüxü. Rū yema na tama toxrüü pixīgüxü rü yemacèx ga toma ga Yudiügü i togü na ítawiechēxmüpēxechiraügüxü, rü nüxü tixügüe na pema rü tama Tupanapēxewa na pimexü yerü tama toxrüü pegü ípewiechēxmüpēxechiraügü. Rū yexguma ga pema rü tama Cristuxü pecuèxgü, yerü tama Tupanaärü duüxügü i Yudiügütanüxü pixīgü. Rū tama nüxü pecuèxgü ga Tupana núma na namuxü ga Nane na duüxügüarü pecaducèx nayuxüxcèx na nüxna naxāāxcèx i maxü i taguma gúxü. Rū woo ga yema mexügü ga Yudiügümaā inaxunetaxü ga Tupana, rü taxucürüwa penayaxu. Yerü ñoma ga naānewa rü pemaxēmare, rü tama nüxü pecuèx ga facü chi pexü na úpetüxü ga yexguma chi peyuegu yerü tama Tupanaxü pecuèx. 13 Natürü woo ga noxri rü tama Tupanaxü na pecuáxü, natürü i ñuxma rü nügüxütawa pexü nagagü. Rū Ngechuchu ya Cristuarü duüxügü pixīgü yerü pexcèx nayu rü nagü inanaba. 14-15 Rū ñuxma rü Cristu nixi ya tüxü rüngüxmüxēēcü. Rü noxri ga toma ga Yudiügü rü pexchi taxaie yerü tama toxrüü Yudiügü pixīgü. Natürü i ñuxma rü Cristu marü yigümaā tüxü narüngüxmüxēē. Rū yemaācü wüxítama i duüxügüxü tüxü nixīgüxēē rü inyanaxoxēē na yigüarü uwanü ixīgüxü. Rū yexguma nayuxgu ga Cristu rü tüxü ínanguxüxēē na tama natüüwa iyexmagüxcèx ga yema nuxcūmaügüxü ga mugü ga toma ga Yudiügü nagu taxíxü. Rü wüxítama i duüxügü i ngexwacaxüxü tüxü nixīgüxēē i toma i Yudiügü na tixīgüxü rü pema i tama Yudiügü na pixīgüxü. Rū yemaācü nanaxü na guxāma i yixema rü norü duüxügü na ixīgüxcèx. Rū yemaācü yigümaā tüxü inarüngüxmüxēē. 16 Rū yexguma curuchagu nayuxgu ga Cristu, rü inyanaxoxēē ga yigüchi na íxaixü. Rū yemaācü ga Cristu rü Tupanamaā tüxü inarüngüx-müxēē, rü wüxítama i duüxügüxü tüxü nixīgüxēē. 17 Rū yexguma Cristu núma üxgu, rü taxcèx núma nanange ga ore ga mexü ga marü yigümaā rü Tupanamaā na rüngüxmüxēü. Rū yema ore rü toxcèx nixi i toma i Yudiügü ga toxira Tupanaxü na tacuáxü. Rū yema ore rü pexcèx rü ta nixi ga woo tama Tupanaxü na pecuèxgüxü

ga noxrix. ¹⁸ Rū űuxma rū guxāma i yixema rū Cristugagu tūxđ natauxcha na Tanatū ya Tupanana ingaicamagūxđ. Rū ngēmatama Naāē i Ūūnexđ nixđ i tūxđ rūngūxēēxđ na nūxna ingaicamagūxđcēx ya Tanatū ya Tupana. ¹⁹ Rū ngēmacēx i pema rū woo tama Tupanaxđ pecuēxgū ga noxrix, rū woo tama norū duūxđgū pixđgū ga yexguma, natūrū tama ngēmaācū pixđgū i űuxmax. Erū űuxma rū natanūxđ pixđgū i guxđma i ngēma duūxđgū i Tupanaārū ixđgūxđ. Rū aixcūma Tupanaxācūgūxūchi pixđgū i űuxmax. ²⁰⁻²² Guxāma i pema rū wūxi ya ĩpata ya mexūne ya Tupana nawa maxūne pixđgū. Rū ngēma cementu i ladriyu naētūgu nugūxđ, rū ngēma rū Tupanaārū ngūexđgū ga imugūxđ rū norū orearū uruđgū nixđ. Rū yima ladriyu ya nūxirama cementuētūwa ixūcuchicū rū Cristu nixđ. Rū ngēma inanaxūgū na naxūāxđ ya guxūnema ya yima ĩ. Rū dūxwa ningu na wūxi ya tupauca ya taxđne ya Cristugagu ūūnene na yĳxđ. Rū ngēmaācū i pema na Cristuarū pixđgūxđ rū wūxigu tomaā peyanguxēē ya wūxi ya tupauca ya taxđne i ngextā Tupanaāē i Ūūnexđ ĩmaxūxđwa.

3

Tupana rū Pauruxđ namu na ore i mexūxđ yaxuxđ namaā ga yema duūxđgū ga tama Yudđgū ixđgūxđ

¹ Rū űuxma na yemaācū Tupana pexđ rūngūxēēxđ, rū choma i Pauru rū pexcēx chayumūxē. Rū pemaā nūxđ chixu rū nūma poxcupataūwa changēxma erū Ngechuchu ya Cristuarū duūxđ chixđ. Rū nuxma chapoxcu erū guxđwama nūxđ chixuchiga na pema rū ta pexđ nangēxmaxđ i pechica i Tupanaxūtawa woo na tama Yudđgū pixđgūxđ. ² Rū maneca marū nūxđ pecuāchiga na űuxācū Tupana choxđ nangechaūācūma choxđ muxđ na pexđ charūngūxēēxđcēx rū pemaā nūxđ chixuxđcēx i norū ore i mexđ. ³ Rū Tupana chomaā nanangoxēē rū choxđ nūxđ nacuēxēē ga yema ore ga pechiga ga noxri nūxcatama nūxđ nacuāxđ. Rū yemachiga nixđ ga ĩrarūwa marū pexcēx chanaxūmatūxđ ga noxrix. ⁴ Rū yexguma pexcēx chanaxūmatūgu rū pemaā nūxđ chixu ga yema noxri ēxđguxđ ga ore i űuxācū Tupana rū Cristugagu duūxđgūxđ namaxēxēēxđ. Rū ngēxguma meā nawa pengūegu i ngēma popera rū tá nūxđ pecuēx na aixcūma yĳxđ ga yema ore ga noxri ēxđguxđ ga nachiga pexcēx chaxūmatūxđ. ⁵ Rū yema nixđ ga ore ga ēxđguxđ ga Tupana taxūexđma meā nūxđ nacuēxēēxđ ga noxrix. Natūrū i űuxma rū ngēma Naāē i Ūūnexđ rū marū nanangoxēē i ngēma ore naxcēx i Tupanaārū duūxđgū i ūūnexđ i yamugūxđ rū norū orearū uruđgū. ⁶ Rū űuxma rū tá pemaā nūxđ chixu i űuxācū na yĳxđ i ngēma ore ga noxri ēxđguxđ. Rū dūcax, woo tama Yudđgū pixđgū natūrū i űuxma rū pexcēx rū ta nixđ i ngēma maxđ i taguma gūxđ ga noxri Tupana tomaā ixunetaxđ. Rū űuxma i pema rū ta norū duūxđgū pixđgū. Rū pexcēx nixđ i guxđma i ngēma Tupanaārū unetagū ga noxri tomaā nūxđ yaxuxđ. Rū ngēmaācū i űuxma rū Ngechuchu ya Cristugagu pexđ nangēxma i guxđma i ngēma mexđgū erū peyaxōgū i norū ore i tūxđ maxēxēēxđ. ⁷ Rū woo taxuwama chame na chanaxūxđcēx i norū puracū, natūrū ya Tupana rū choxđ namuāma rū choxđ naporaxēē na nūxđ chixuxđcēx i ngēma norū ore i mexđ. ⁸ Rū chaugūcēx i Tupanapēxewa rū choma nixđ i guxđ i norū duūxđgūarū űaxtūwaama chaxūxđ. Rū woo ngēmaācū chixđ, natūrū Tupana choxđ nangechađ rū choxna nanaxā i ngēma puracū i mexđ na ngēma tama Yudđgū ixđgūxđmaā nūxđ na chixuxđcēx i norū ore i mexđ na űuxācū namexēchixđ rū taguma iyagūxđ ga yema

taxcèx naxùxū ga Cristu. ⁹ Rū nūma ga Tupana ya guxūārū ūruū ixīcū, rū choxū namu na guxū i duūxūgūxū nūxū chacuèxēēxūcèx na ñuxācū yīixū i ngēma norū ngūchaū ga nuxcūma èxūguxū ga noxri nūxīcatama nūxū nacuáxū. Rū ngēma norū ngūchaū nixī i Cristugagu tūxū na namaxēxēēxū. ¹⁰ Rū yemaācū choxū namu ga Tupana na ngēma duūxūgū i tama Yudīgū ixīgūmaā nūxū chixuxūcèx i ore i mexū na yaxōgūāxūcèx. Rū nūma ya Tupana nanaxwēxe na yaxōgūāxū na ngēmaācū guxūma i āēxgacūgū i daxūcūāx nūxū nadaugūxūcèx na ñuxācū nūxū nacuèxūchixū ga Tupana ga yexguma duūxūgūaxū natauxchaxēēāgu na naxūtawa nangugūxūcèx. ¹¹ Rū yemaācū nūxū nanatauxchaxēē ga Tupana yerū woetama nuxcūmaxūchima guxūguma nagu narūxīnū na tōrū Cori ya Ngechuchu ya Cristugagu tā na namaxēxēēāxū i duūxūgū. Rū yemaācū nayanguxēē. ¹² Rū ñuxma na Cristuarū duūxūgū ixīgūxū rū nūxū na yaxōgūxū, rū tūxū natauxcha na Tupanana ingaicamagūxū rū taxucèxma nūxū na imuūēxū. ¹³ Rū ngēmacèx i ñuxma na pexcèx ngūxū chingexū rū pexū chacèèxū na tama chauxcèx pexoegaāēgūxūcèx. Erū ngēma ngūxū na chingexū i ñuxma rū perū meruū nixī i ngēma.

Cristu rū poraācū tūxū nangechaū

¹⁴ Rū ngēmacèx, ngēxguma nagu charūxīnūgu na ñuxācū Tanatū ya Tupana taxcèx namexēēxū na naxācūgū ixīgūxūcèx, rū napēxegu chacaxāpūxū na nūxū chicuèxūxūcèx. ¹⁵ Rū nūma nixī i Nanatū yīixū i guxūma i norū duūxūgū i ñoma i naānewa rū daxūguxū i naānewa ngēxmagūxū. ¹⁶ Rū Tanatū ya guxūguma poraācū tamaā mecūmacūna chaca na Naāē i Ūnēxūārū ngūxēēmaā pexū naporaexēēxūcèx na aixcūma peporaexūcèx i perū maxūwa. ¹⁷⁻¹⁸ Rū ngēxgumarūū ta nūxna naxcèx chaca na perū ōgagu pewa namaxūxūcèx ya Cristu. Rū ngēxguma ngēmaācū perū maxūwa peporaegu rū pexū nangēxmagu i ngēma ngechaū i aixcūma ixīxū, rū tā wūxigu guxūma i yaxōgūxūmaā nūxū pecuèx na ñuxācū nataxūchixū i norū ngechaū i namaā ticūxū nangechaūxū ya Cristu. ¹⁹ Rū woo tama yanguxgu i tōrū cuèx na nūxū icuáxūcèx na nañuxraūxū i ngēma ngechaū i namaā Cristu tūxū ngechaūxū, natūrū Tupanana naxcèx chaca na pexcèx nangoxēēāxūcèx na ñuxācū na yīixū i ngēma ngechaū na aixcūma pewa nangēxmaxū i guxūma i Tupanacūmagū. ²⁰ Rū ñuxma rū name nixī i guxāma i yixema rū nūxū ticuèxūgū ya Tupana. Erū nūma rū nūxū nangēxma i pora na naxūāxū i guxūma i ngēma naxcèx íçaxū rū èxna nagu rūxīnūēxūārū yexeraxūchi. Rū ngēma norū pora i tawa ngēxmaxūmaā nixī i naxūāxū i guxūma i ngēma. ²¹ Rū ñuxma rū name nixī i guxūma i norū duūxūgū i yaxōgūxū rū guxūgutāma Tupanaxū nicuèxūgū naxcèx i ngēma Ngechuchu ya Cristu ūxū. Rū ngēmaācū yīi.

4

Tupanaāē i Ūnēxū rū wūxigutama tūxū narūxīnūēxēē

¹ Rū ñuxma na ngēmaācū Tupana tūxū rüngūxēēxū, rū choma i Cristugagu na chapoxcuxū, rū pexū chacèèxū na Tupana naxwèxexūācūma meā pemaxèxū. Rū name nixī i ngēmaācū pemaxè erū pexū nixī ga nadexū ga Tupana, rū norū duūxūgū pixīgū i ñuxmax. ² Rū tama name i pegū picuèxūxūgū. Rū name nixī i guxūguma pemecūmagū rū yaxna namaā pexīnūē i togū rū nūxū pengechaūgū. ³ Rū chanaxwae i wūxigu perūxīnūē

rū ñoma wūxitama i duūxūrūū pixīgū erū pewa nangēxma i Tupanaāē i Ūūnexū. Rū name nixī i naxcèx pedau na guxūlguma pegū pengechaūgūxū rū ngēmaācū taguma tacūcèx pegū pitoyexū. ⁴ Erū yixema na Cristuarū duūxūgū ixīgūxū, rū ñoma wūxitama i duūxūrūū tixīgū. Rū ngēxgumarūū ta wūxitama nixī i Naāē i Ūūnexū i guxāwama maxūxū. Rū ngēxgumarūū ta Tupana pexū nade na guxāma ípenanguxēēgūxūcèx i wūxitama i maxū i taguma gūxū. ⁵ Rū wūxitama nixī ya tórū Cori, rū wūxiaxūtama nixī i yaxōgūxū rū wūxicèxicatama nixī ga íbaiūxū ga guxāma. ⁶ Rū wūxitama nixī ya Tupana ya guxānatū ixīcū. Rū nūma rū guxāētūwama nangēxma rū guxāwama namaxū. Rū nūma rū guxāxū narūngūxēē na tanaxūxūcèx i norū puracū. ⁷ Natūrū wūxichigū i yixema rū tanayaxu i ngēma nacūma rū ngēma cuèx i Cristu tūxna āmarechaūxū na naxūgūxūcèx i norū puracū. ⁸ Rū ngēmacèx i Tupanaārū ore i ūmatūxūwa rū ñanagūrū:

“Rū yexguma daxūgūxū ga naānewa naxūxgu, rū yéma tūxū nagagū ga guxema marū tūxū ínangūxūxēē nawa ga tūmaarū chixexū. Rū norū duūxūgūna nanaxā ga cuèx na ngemamaā Tupanaarū puracū naxūgūxūcèx”,

ñanagūrū i ngēma ore. ⁹ Rū ñuxma Pa Chaueneēgūx, rū pexna chaca, rū ūtacūchiga nixī i ngēma ore i ñaxū, “Daxūwa naxū”, ñaxū? Rū dūcax, ngēmawa nūxū tacuèx ga noxri rū ñoma ga naānegu na ínaxūxū ga nūmax. ¹⁰ Rū gumatama Cristu ga ñoma ga naānegu írūxīcū, rū gumatama nixī ga daxūgūxū i naāne i Tupana íngēxmaxūwa ūxcū na guxāētūwa nangēxmaxūcèx rū guxūwama nangēxmaxūcèx. ¹¹ Rū nūmatama nixī ga guxema norū duūxēgūna naxāāxū ga tūmaarū cuèx rū tūmaarū puracū. Rū tūxū naxuneta ga ñuxre na toxnamana norū orexū tayarūxugūxūcèx. Rū toguēgū rū tūxna nanaxā ga cuèx na duūxūgūmaā nūxū tixuxūcèx i ngema norū ore i tūxū nūxū nacuèxēēxū. Rū toguēgū rū tūxna nanaxā ga cuèx na duūxūgūaxū tanangūchaūxēēxū i Tupanaarū ore na yaxōgūāxūcèx. Rū toguēgū rū tūxna nanaxā ga cuèx na ngema yaxōgūxūarū dauruxūgū tixīgūxūcèx. Rū toguēgū rū tūxna nanaxā ga cuèx na norū oremaā tangūxēētaēgūxūcèx. ¹² Rū yemaācū norū duūxēgūna nanaxā ga tūmaarū puracū rū tūmamaā inanan-guxūxēē na ngēma yaxōgūxūxū tarūngūxēēgūxūcèx na ngēmaācū guxūma i ngēma yaxōgūxū rū yexeraācū nūxū yacuāetanūxūcèx i norū ore. ¹³ Rū Cristu nanaxwēxe na ngēma norū orewa íyaetanūxū i guxāma i yixema ñuxmatáta wūxigu aixcūma meā yaxōgū rū meā nūxū icuèxgū ya Tupana Nane. Rū ngēmaācū tá dūxwa nawa tangugū na aixcūma Tupana naxwēxexūācūma ixīgūxū, rū tá tīyaetanū i norū orewa ñuxmatáta ñoma Cristu ya aixcūma mexēchicūrūū ixīgū. ¹⁴ Rū tāūtáma ñoma buxūgūrūū tixīgū i tórū maxūwa. Erū ngēma buxūgū rū tauxchaācū toguama narūxīnūē. Rū ngēxguma tacū rū to i ngūxēētaexū naxīnūēgu rū ngēmawe narūxī ñuxmata naga naxīnūē i ngēma duūxūgū i chixexū i norū doramaā nawomūxēēgūxū rū nachix-exēēgūchaūxū. Natūrū i yixema rū tama name na ngēxgumarūū ixīgūxū. ¹⁵ Rū name nixī i yigū ingechaūgūācūma nagu taxī i ngēma ore i aixcūma ixīxū, na ngēmaācū yexeraācū naxrūū ixīgūxūcèx ya Cristu ya guxūma i yaxōgūxūārū āēxgacū ixīcū. ¹⁶ Rū taeru ya Cristuwa nixī i ne naxūxū i tórū pora na naxcèx ímaxūxūcèx. Rū guxāma i yixema rū wūxigu naxmēxwa tangēxmagū. Rū ngēxguma Cristugagu meā wūxigu ípuracūegu rū yigū rūngūxēēgu rū guxūma meāma inixū. Rū ngēmaācū yigū ingechaūgūācūma norū orewa tīyaetanū na dūxwa nūma nanaxwēxexūācūma ixīgūxūcèx.

Maxū i ngexwacaxūxū i Cristugagu tūxū ngēxmaxū

¹⁷ Rū űuxma rū Cristuégagu pexū chaxucuxē na tama nagu pexīxū i ngēma chixexū ga noxri nagu pexīxū ga yexguma tauta Cristuaxū peyaxōgūgu. Rū tama name i nagu pexī i nacūmagū i ngēma duūxūgū i tama Tupanaxū cuēxgūxū i naēchitamare maxēxū. ¹⁸ Erū Chatana rū nanatoōēgū i ngēma duūxūgū, rū ngēmacēx chixexūguxicatama narāxīnūē. Rū nagagugūtama nīxī nataxuma i maxū i taguma gūxū i Tupanawa ne űxū, erū tama nūxū nacuēxgūchaū. ¹⁹ Rū tama naxāneē na űacū rū chixexū na naxūgūxū, rū ngēmacēx nagu naxī rū nūxū namepua i guxūraūxū i chixexūgū na naxūgūxū. ²⁰ Natūrū i pema rū tama ngēmaācū na pemaxēxūcēx nīxī i Cristuaxū peyaxōgūxū. ²¹ Yerū pema rū marū meā nūxū pexīnūē ga Cristuchiga. Rū toxūtawa naxcēx pengūe, rū nūxū pecuēx i norū ore i aixcūma ixīxū na űuxācū Ngechuchu naxwēxexūācūma na pemaxēxū. ²² Rū ngēmacēx name nīxī i nūxū perūxoe i ngēma nuxcūmaūxū i pecūmagū ga űpa nagu pexīxū. Yerū yema nuxcūmaūxū ga perū maxū rū nachixexūchi. Rū pexū napora rū pexū nawomūxēēgū na nagu pexīxūcēx ga yema pexeneārū ngūchaūgū i tama mexū. Natūrū i űuxma rū name nīxī i nūxū perūxoe i guxūma i ngēma. ²³ Rū ngēmacēx i űuxma na Cristuarū duūxūgū pixīgūxū rū name nīxī na Tupanaguxicatama perūxīnūēxū. Rū name nīxī i Tupanana pegū pexāgū na Naāē i űūnexū pewa puracūxūcēx rū na nangexwacaxūxēēāxūcēx i peāē. ²⁴ Rū name nīxī i penayaxu i ngexwacaxūxū i pecūma i Tupana norū ngūchaūmaā pexcēx mexēēxū. Rū ngēma nacūma i ngexwacaxūxū rū perū maxū i mexūwa tá nangox i ngēxguma nagu pexīxgu i ngēma ore i aixcūma ixīxū rū tama nawe perūxīxgu i pexeneārū ngūchaū. ²⁵ Rū ngēmacēx i űuxma na Cristuarū pixīgūxū rū tama name na pidoratēēxgūxū. Natūrū name nīxī i wūxichigū rū tūmamūcūmaā aixcūmaxū tixu. Erū guxāma i yixema rū yigūtanūxū i yaxōgūxū tixīgū. ²⁶ Rū ngēxguma texē űacū peāēwa nguxēēgu rū ipegūna pedaugū na tama pecadu pexūxūcēx! Rū tama name i nagu perūxīnūēēcha natūrū name nīxī i paxa ngēmatama i ngunexūgu nūxū ipeyarūngūma i ngēma naxūpa na yanaxūcuxū ya űēxcū. ²⁷ Rū pegūna pedaugū na tama penaxūchicaxūcēx i Chataná na ngēmaācū nayoxnīēxūcēx rū pemaā inacuāxūcēx. ²⁸ Rū ngēxguma texē petanūwa ngītēxgu ga űpa, rū name nīxī i nūxū tarūxo i ngēma. Rū name nīxī i tūmamēxēmaā meā tapuracū na ngēmaācū tūxū nangēxmaxūcēx i tūmaārū ngēmaxū na űoguāx ya tūxū nataxūémaā tangauxūcēx. ²⁹ Rū tama name i chixexū i oremaā pidexagū. Rū name nīxī i ore i mexūmaā pidexagū na ngēmaācū ngēma duūxūgū i pexū inūēxūxū perūngūxēēgūxūcēx na yexeraācū Tupanaga naxīnūēxūcēx rū nataāēgūxūcēx. ³⁰ Rū pexuāēgū na tama penangechaūxēēxūcēx i Tupanaāē i űūnexū! Erū ngēma Naāē i űūnexū nīxī i Tupana pexna muxū na nūxū pecuāxūcēx na aixcūma norū duūxūgū pixīgūxū űuxmatāta ngēma ngunexū i nagu pexcēx nūma naxūxū ya Cristu. ³¹ Rū nūxū perūxoe na nagu perūxīnūēēchaxū ega texē űacū rū chixexū pemaā űxgux! Rū ngēxgumarūū ta name nīxī na nūxū perūxoexū na aigu perūxīnūēxū, rū ēxna penuēxū, rū ēxna pegū na pengaexū, rū ēxna peguxchigawēxegūxū. Rū ngēmaācū name nīxī na nūxū perūxoexū i guxūma i ngēma chixexū i dexagū. ³² Rū name nīxī i pegū perūngūxēēgū rū pegūmaā pemecūmagū, rū pegūxūl pengechaūtūmūgū i wūxichigū. Rū ngēxguma petanūwa texē űacū rū chixexū pemaā űxgux, rū name nīxī i pegūxūl nūxū pengechaūgū i wūxichigū yema na Cristugagu Tupana pexū nūxū nangechaūxūrūū.

5

Name nixī i meā namaxē i Tupanaxācūgū

¹ Rū űuxma rū Tupanaxācūgū ya pexū nangechaūgūxe pixīgū. Rū ngēmācèx name nixī i naxcèx pedau na naxrūū meā pemaxēxū rū naxrūū pimexū.

² Rū name nixī i pegū pengechaūgū yema Cristu tūxū na ngechaūxūrūū. Rū nūma rū taxcèx nūgū inaxā rū taxcèx nayu. Rū yemaācū Tupanaxū nataāēxēē yerū yemaācū tūxū namaxēxēē.

³ Rū űuxma rū Tupanaārū duūxūgū pixīgū. Rū ngēmācèx tama name i naī i ngemaā rū ēxna naī ya yatūmaā na ipexxū. Rū tama name na pexeneārū ngūchaūwe perūxīxū rū ēxna pegūna penanugūchaūxū i űacū i ngēmāxūgū. Rū ngēmācèx name nixī i nūxū perūxoe i guxūma i ngēma chixexūgū, rū bai i nachiga na pidexagūmarexū.

⁴ Rū tama name i űacū rū ore i āūāchixūxū pixu, rū bai i űacū rū ngeāēxūmare pixu, rū bai i texēxū pecugūcūraxū. Erū ngēma ore i chixexūgū rū taxuwama name. Rū narūmemaē nixī i Tupanana moxē pexāgū.

⁵ Rū aixcūma pemaā nūxū chixu rū ngēxguma texē naī i ngemaā rū ēxna naī ya yatūmaā ipexgu, rū ēxna tūmaxūneārū ngūchaū taxūxgu, rū taxucūrūwama taxāchica i ngextā tōrū Cori ya Cristu rū Tanatū ya Tupana āēxgacū űixīxūwa. Rū ngēxgumarūū ta taxucūrūwama texē ngēma taxāchica ega tūgūna tananugūchaūxgu i űacū rū ngēmāxūgū. Erū yīxema ngēma nacūma tūxū ngēxmaxē rū dūxwa namaā tatupanaāx i ngēma nacūma i chixexū.

⁶ Rū tama naga pexīnūē ega texē űacū rū ore i ngēāēmarexūmaā pexū womūxēēchaūgu na penaxūxūcèx i ngēma chixexūgū! Erū ngēma chixexūgūgagu nixī i Tupana tá poraācū napoxcuexū i ngēma duūxūgū i tama naga űnūxū.

⁷ Rū ngēmācèx tama name i ngēma duūxūgūmaā pexāmūcūgū na pema rū ta tama penaxūxūcèx i ngēma chixexūgū.

⁸ Rū űpa ga pema rū ēānexūwa peyexmagū, yerū tama Tupanaxū pecuèx rū chixri pemaxē. Natūrū i űuxma na Tupanaxū pecuāxū rū tōrū Coriarū duūxūgū na pixīgūxū, rū ngōonexūwa pengēxmagū. Rū ngēmācèx name nixī i duūxūgū i ngōonexūwa ngēxmagūxūrūū meā na pemaxēxū.

⁹ Erū ngēxguma ngōonexūwa ingēxmagu, rū mexū taxūgū, rū nagu taxī i ore i aixcūma ixīxū, rū meā tamaxē.

¹⁰ Rū ngēmācèx name nixī i naxcèx pedau na nagu pexīxū i ngēma maxū i tōrū Cori namaā taāēxū.

¹¹ Rū tama name i pema rū ta penaxū i ngēma chixexūgū i taxuwama mexū i ngēma togū i duūxūgū i ēānexūwa ngēxmagūxū űgūxū. Natūrū narūmemaē nixī i penangoxēē na nachixexū i ngēma naxūgūxū.

¹² Erū ngēma chixexū i cūācūma naxūgūxū i ngēma yatūgū rū ngexūgū, rū woo nachiga idexagūmaregu rū wūxi i ānexūchi nixī.

¹³ Natūrū ngēxguma ngōonexū nagu baxigu i űacū rū chixexūgū rū meā tá nangox na űuxācū nachixexū.

¹⁴ Erū guxūma i űacū i ngēxmaxū, rū ngēxguma ngōonexūwa nangēxmagu, rū meāma nangox na űuxācū yīixū. Rū ngēmācèx i Tupanaārū orewa rū űnanagūrū:

“űNabaixāchi i cuma na cupexū! űRū írūda i cuma na icuyarūtaxuxū! űRū nagu rūxīnū na űuxācū nachixexū i ngēma curū pecadugū! Rū Cristu tá cuxcèx nanangōonexēē rū tá cuxū narūngūxēē na Tupanaxū cu-cuāxūcèx”,

űnanagūrū i ngēma ore.

¹⁵ Rū ngēmācèx name nixī i pexuāēgū rū meā pemaxē. Rū tama name i ngēma duūxūgū i tama Tupanaārū orexū cuēxgūxūrūūācūma na pemaxēxū, natūrū name na duūxūgū i meā Tupanaga űnūxūrūū meā na pemaxēxū.

¹⁶ Rū űuxma na Tupana pexū yatauxchaāchixēēxū rū űpexaxāēgū na nūxū pepuracūexū rū penaxūxū i ngēma nūma nanaxwēxexū! Erū űnomaūcūū i duūxūgū rū poraācū chixexū naxūgū.

¹⁷ Rū űuxma na ngēmaācū

namaxēxū i togū i duūxūgū, rū tama name na naxrūū pixīgūxū. Rū tama name i duūxūgū i ngēāēmarexūrūū pixīgū. Natūrū name nixī i Tupanaārū orewa pengūe na nūxū pecuáxūcēx i tacū na yīxū i tórū Cori pexū naxwēxexū na penaxūxū. ¹⁸ Rū tama name i tacū rū axexū i ngūchixáxūmaā pengāxē, erū ngēma rū chixexū tūxū naxūxēē i ngēxguma ngēmaācū imaxēgu. Natūrū name nixī i Tupanaāē i Ūnēxūna pegū pexāgū na pewa nangēxmaxūcēx rū pemaā inacuáxūcēx. ¹⁹ Rū name nixī i Tupanaārū orechigagu rū norū wiyægūgu pegūmaā pidexagū rū pegūmaā nūxū pixu. Rū name nixī i nagūxūraūxū i norū wiyægūgu pewiyægū, na ngēmaācū guxūne ya perū maxūnemaā tórū Corixū picuēxūūgūxūcēx. ²⁰ Rū name nixī i guxūguma tórū Cori ya Ngechuchu ya Cristuégagu moxē nūxna pexāgū ya Tanatū ya Tupana naxcēx i guxūma.

Ūnācū meā nūgūmaā namaxē i wūxi ya ĩpatacūāx i Cristuaxū yaxōgūxū

²¹ Rū űuxma na Cristumēxēwa pengēxmagūxū, rū name nixī i pegūga pexīnūē i wūxichigū, erū Cristuxū pengechaūgū rū naga pexīnūē. ²² Rū pemax, Pa Ngexūgūx, rū ngēma tórū Cori naxwēxexūrūū rū name nixī na petega pexīnūēxū. ²³ Erū nūma ya yatū rū namēxēru nixī, ngēxgumarūū ya Cristu na guxūma i yaxōgūxūru na yīxū. Rū nūmagū i yaxōgūxū rū Cristuxūne nixīgū rū nūma ya Cristu nixī i norū maxēxēēruū yīxū. ²⁴ Rū ngēxgumarūū na Cristuga naxīnūēxū i ngēma yaxōgūxū, rū ngēxgumarūū ta i ngexūgū rū name nixī na guxūguma natega naxīnūēxū. ²⁵ Rū name nixī i namēxū nangechaū ya yatū, yema Cristu guxāma ga yaxōgūxexū na nangechaūxūrūū. Rū yema na tūxū nangechaūxūcēx nixī ga nayuxū ga Cristu. ²⁶ Rū yemaācū nanaxū ga Cristu na nūgūxū tūxū nadexūcēx rū tūxū yaxūūnēxēxūcēx i guxāma i yixema na yaxōgūxū. Rū norū oremaā rū ngēma dexá i nawa ĩbaiūxūmaā tūxū nimexēē na aixcūma napēxewa imexūcēx. ²⁷ Rū yemaācū tūxū nimexēē na nūgūtama tūxū nawēxūcēx na aixcūma guxūwama imexū rū na nataxuxūma i tacū i tórū chixexū rū bai i ĩrarūwa i ngēxguma napēxewa ingugūgu. Erū tūxū nade na ixūūnegūxūcēx rū guxūwama imexūcēx i napēxewa. ²⁸ Rū yema Cristu tūxū na ngechaūxūrūū, rū wūxichigū ya yatū rū nanaxwēxe na namēxū nangechaūxū űoma nūgūxūnēxū na nangechaūxūrūūtama. Rū yixema tūmamēxū ngechaūxē rū tūgūtama nixī i tangechaūxū. ²⁹ Erū tataxuma ya texē ya tūmaxūnechitama aixe, natūrū tanaxūwemū rū meāma nūxna tadau ngēma Cristu guxūma i yaxōgūxūna dauxūrūū. ³⁰ Rū guxāma i yixema na yaxōgūxū rū Cristutanūxū tixīgū rū ngēmaācū wūxigu namūcūgū tixīgū. Rū nūma nixī i tūxna nadauxū. ³¹ Rū ngēmacēx i Tupanaārū ore i ūmatūxūwa rū űanagūrū:

“Rū wūxichigū ya yatū rū nanatūna rū naēna tá nixūgachi na namēxmaā inaxūxūcēx. Rū ngēma taxre rū wūxi tátama nixīgū”,

űanagūrū i ngēma ore. ³² Rū ngēma ore i yatūchiga rū namēxchiga rū wūxi i ore i aixcūma mexū nixī. Natūrū űuxma na pemaā nūxū chixuxū i ngēma rū Cristuchiga rū yaxōgūxūchiga nixī i chidexaxū. ³³ Natūrū ngēma ore rū pechiga ta nixī. Rū ngēmacēx i wūxichigū i pema i yatūgū rū name nixī i pemēxū na pengechaūxū ngēma pegūtama na pengechaūxūrūū. Rū ngēxgumarūū ta i pema i ngexūgū rū penaxwēxe i petega pexīnūē.

6

¹ Pa Buxūgūx, űuxma na Cristuarū pixīgūxū, rū name nixī i penatūga

rü peega pexīnūē, erū ngēma nixī i aixcūma mexū. ²⁻³ Yerū yema mugū ga Tupana Moīchéna āxūtanūwa rü yema mu ga nūxīra wūxi ga unetamaā Tupana nūxū ixuxū, rü űnanagūrū:

“¡Rü tūxū nangechaū rü tūxū rüngūxēē ya cunatū rü cue na aixcūma cutaāēxūcēx rü namāxūcēx i curū maxū i űnoma i naānewa!” űnanagūrū. ⁴ Rü pemax, Pa Papāgū rü Pa Mamāgūx, rü tama name i penangamare rü penanuēxēē i pexacūgū. Rü name nixī i meā penayaēxēē, rü peyaxucūxēgū rü penangūxēē na meā tōrū Coriaxū yaxōgūāxūcēx. ⁵ Rü pemagū, Pa Duūxūgū ya Ixāārū Coriāxgūe, rü name nixī i meā naga pexīnūē i perū corigū i űnoma i naānewa. Rü penaxwēxe i nūxū pengechaūgūācūma rü nūxū pemuēācūma meā naga pexīnūē űnoma Cristuaxū pepuracūexūrū. ⁶ Rü tama name ega perū corigū pexū dawenūguxicatama meā nūxū pepuracūe na ngēmaācū pemaā nataāēxūcēx. Natūrū űnuxma na Cristuarū duūxūgū pixīgūxū, rü name nixī i guxūma i perū ngūchaūmaā penaxū i ngēma Tupana pexū naxwēxexū. ⁷ Rü ngēma puracū i perū cori pexna āxū, rü name nixī i petaāēācūma penaxū, űnoma tōrū Cori ya Ngechuchuaxū pepuracūexūrū. Erū aixcūma nūxū nixī i pepuracūexū rü tama i duūxūgūaxū. ⁸ Rü name nixī i ngēmaācū meā pepuracūe, erū nūxū pecuēx rü wūxichigū i duūxū rü woo wūxi i coriarū duūxū yixīgu rü ēxna taxūxearū yixīgu, natūrū tōrū Cori ya Ngechuchu tá nūxū nanaxūtanū naxcēx i ngēma mexū i naxūxū. ⁹ Rü pemax, Pa Corigūx, rü name nixī i ngēxgumarū ta meā namaā pemaxē i perū duūxūgū. Rü tama name i tacū rü chixexūmaā penaxāūxūne. Rü nūxna pecuēāchie na pema rü ta perū duūxūgūrū tōrū Cori ya daxūgucūmēxēwa na pengēxmagūxū. Rü aixcūma guxāma i yixema rü tawūxigu i napēxewa ya tōrū Cori ya Cristu.

Cristuarū duūxūgiarū poxūruū i Tupana nūxna āxū na nūgū namaā inapoxūgūxūcēx naxchaxwa i Chataná

¹⁰ Rü űnuxma na tōrū Corimūcūgū pixīgūxū, Pa Chaueneēgūx, rü name nixī i pegū peporaēxēē na penayaxuxūcēx i ngema pora i nawa ne ūxū. Erū nūma rü naporaxūchi. ¹¹ ¡Rü pegū panaxū i guxūma i ngema poxūruūgū i Tupana pexna āxū na ngēmamaā pegū īpepoxūxūcēx i ngēxguma Chataná pexū womūxēēchaūgu! ¹² Erū tama duūxūgū i taxrū āmachixū rü āchinaxāxūmaā nixī i yigū idaixū. Natūrū ngēma namaā yigū idaixū nixī i Chatanáārū duūxūgū i ngoxogū i chixexūgū i poraxū. Rü nūmagū rü namuxūchi rü tūxū narūporamaēgūchaū. Rü tama nūxū tadaugū erū naāēgū nixī, natūrū guxūwama nangēxmagū i űnoma i naānewa. Rü namaā inacuēx i űnoma i naāne i chixexū. ¹³ Rü ngēmacēx name nixī i penayauxgū i guxūma i ngēma poxūruūgū i Tupana pexna āxū, na ngēmaācū pegū īpepoxūxūcēx i ngēxguma ngēma naāēgū pexū nachixexēēchaūgu. Rü ngēmaācū tāūtāma nūxū penguxū i ngēma naāēgū i chixexū rü tá nūxū perūporamaēgū. ¹⁴ Rü ngēmacēx name nixī i mea pegūna pedaugū na tama perū uwanūmēxēgu peyixūcēx. Rü penaxwae na pixaixcūmagūxū na taxuwama nachixexūcēx i perū maxū. ¹⁵ Rü name nixī i guxūguma īpememaregū na nūxū peyarūxugūexūcēx i ngema ore i ngūxmūxēeruxū. ¹⁶ Rü ngema guxūarū yexera ixīxū nixī na aixcūma Cristuaxū peyaxōgūxū na ngēmaācū pegū īpepoxūxūcēx nūxna i Chatanáne i ācūmaxū i namaā tūxū nachixexēēchaūxū. ¹⁷ Rü name nixī i penayaxu i ngema maxū i taguma gūxū na ngemamaā pegū īpepoxūxūcēx űnoma wūxi i churara i napatēxemaā nūgū īpoxūxūrūxū. Rü ngema Tupanaarū Ore i Naāē i Ūūnexū pexna āxū, rü ngema nixī i pexne ixīxū. ¹⁸ Rü tama name i

nūxū perūchaue na peyumūxēgūxū. Natūrū name nixī i guxūguma Tupanaāē i Ūūnexūārū ngūxēēmaā Tupanaxū pecèxū. Rū penaxwae i pexuāē na taguma nūxū perūxoexūcèx. Rū ngemaācū name nixī i naxcèx peyumūxēgū i guxūma i Tupanaarū duūxūgū. ¹⁹Rū ngēxgumarūū ta chanaxwèxe i chauxcèx peyumūxēgū na Tupana choxū rüngūxēēxūcèx rü choxna naxāāxūcèx i ngēma ore i nūma nanaxwèxexū na nūxū chixuxū. Rū chanaxwèxe i Tupanana naxcèx peca na choxū naporaxēēxūcèx na tama chamuūācūma nūxū chixuxūcèx rü mea chanangoxēēxūcèx i ngema norū ore i Cristuchiga ga noxri exūguxū i ñuxma maxū tūxna āxū. ²⁰Rū ngēma orexū na chixuxūcèx nixī ga Tupana nūgūchicūū choxū inamuxū. Rū ngēmagagu nixī i chapoxcuxū i ñuxmax. Rū chanaxwèxe i chauxcèx peyumūxēgū na tama chamuūācūma meāma nūma nanaxwèxexūācūma nūxū chixuxūcèx i ngēma norū ore.

Pauru nanaguxēē ga norū popera rü wenaxārū yema duūxūgūxū narūmoxē

²¹Rū taeneē ya nūxū ingechaūcū ya Tiquicu, rü chauxrūū aixcūma meāma napuracū i tórū Coriarū puracūwa. Rū nūma tá pemaā nūxū nixu i guxūma i chauchiga na ñuxācū choxū naxūpetūxū i nuā. ²²Rū ngēmacèx nixī i pexūtawa chanamuxū, na pemaā nūxū yaxuxūcèx na ñuxācū toxū naxūpetūxū, na ngēmaācū pexū nataāēxēēxūcèx. ²³Pa Toeneēgū i Yaxōgūxūx, chanaxwèxe i Tanatū ya Tupana rü tórū Cori ya Ngechuchu ya Cristu pexū narū-ngūxēēgū i guxāma i pema na meā pegūmaā pemaxēxūcèx, rü aixcūma petaāēgūxūcèx, rü pegū pengechaūgūxūcèx rü meā peyaxōgūxūcèx. ²⁴Rū chanaxwèxe i Tanatū ya Tupana nūxū narūngūxēē i guxūma i ngēma duūxūgū i aixcūmaxūchi tórū Cori ya Ngechuchu ya Cristuxū ngechaūgūxū. Rū ngēmaācū yīi.

Rü nuāma pexna,
Pauru

POPERA GA PIRIPUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxŏgŭxŭ ga Piripuwa yexmagŭxŭ

¹ Pa Toeneēgŭ ya Piripuwa Ngēxmagŭxex, choma i Pauru rü namaā i taeneē i Timutéu nixŭ i pexcèx tanaxŭmatŭxŭ i ñaā popera. Rü toma rü Ngechuchu ya Cristuarŭ puracŭtanŭxŭ tixŭgŭ. Rü pexcèx tanaxŭmatŭ i pema i yaxŏgŭxŭārŭ āēxgacŭgŭ na pixŭgŭxŭ, rü pema i tupaucawa ngŭxēētaeruŭgŭ na pixŭgŭxŭ, rü guxāma i pema i Ngechuchu ya Cristuaxŭ yaxŏgŭxe. ² Rü chanaxwèxe i Tanatŭ ya Tupana rü tŏrŭ Cori ya Ngechuchu ya Cristu poraācŭ pexŭ narŭngŭxēē rü pexŭ nataāēxē.

Pauru rü yema yaxŏgŭxŭcèx nayumŭxē

³ Rü guxŭguma i ngēxguma pexna chacuèxāchigu rü Tupanana moxē chaxā i pexcèx. ⁴ Rü ngēxguma chayumŭxēgux, rü guxŭguma chataāēācŭma pexcèx chayumŭxē i guxāma i pemax. ⁵ Erŭ pema rü noxritama Tupanaārŭ orexŭ pexŭnŭēgumama rü poraācŭ choxŭ perŭngŭxēē na nüxŭ chixuxŭcèx i norŭ ore i mexŭ. Rü ñuxma rü ta choxŭ perŭngŭxēēgŭecha. ⁶ Rü Tupana rü marŭ inanaxŭgŭ i wŭxi i mexŭ i puracŭ i perŭ maxŭwa. Rü nüxŭ chacuèx rü nŭma rü guxŭgutāma nanaxŭecha i ngēma puracŭ ñuxmatāta yanguxēēā i ngēxguma ínanguxgu ya Ngechuchu ya Cristu. ⁷ Rü aixcŭma name na ngēmaācŭ pemaā nagu charŭxŭnŭxŭ, erŭ poraācŭ pexŭ changechaŭ rü aixcŭma Tupana wāixgu tŭxŭ narŭngŭxēē i guxāma i yixema. Rü woo ñuxma na chapoxcuxŭ rü ēxna ega āēxgacŭgŭpēxewa choxŭ nagagŭgu, rü Tupana choxŭ narŭngŭxēē i ngēxguma norŭ ore i mexŭtŭwa chideaxgu rü namaā nüxŭ chixuxgu i āēxgacŭgŭ na aixcŭma yŭxŭ i ngēma orewa nüxŭ iyarŭngauxŭ i tŏrŭ maxŭ i taguma gŭxŭ. Rü nüxŭ chacuèx rü ngēma choxŭ nangŭxēēxŭācŭma, rü pexŭ rü ta narŭngŭxēē. ⁸ Rü Tupana nüxŭ nacuèx na ñuxācŭ poraācŭ pexŭ chadauxchaŭxŭ rü pexŭ na changechaŭxŭ i guxāma i pemax, ngēma Ngechuchu ya Cristu pexŭ na ngechaŭxŭrŭ. ⁹ Rü chorŭ yumŭxēwa naxcèx íchaca na yexeraācŭ pegŭ pengechaŭgŭxŭcèx rü Tupanaxŭ pengechaŭgŭxŭcèx. Rü naxcèx íchaca na yexeraācŭ nüxŭ pecuáxŭcèx i guxŭma i Tupanachiga rü yexeraācŭ nüxŭ pecuáxŭcèx na ñuxācŭ nanaxwèxexŭ na naxcèx pemaxēxŭ. ¹⁰ Rü ngēmaācŭ pexcèx chayumŭxē erŭ chanaxwèxe na meā penangugŭxŭ i tacŭ nixŭ i aixcŭma mexŭ i Tupanapēxewa na penaxŭxŭcèx i ngēma. Rü chanaxwèxe na aixcŭma namexŭ i perŭ maxŭ na taxucèxma tacŭcèx Tupana pexna çaxŭcèx i ngēxguma ínanguxgu ya Cristu. ¹¹ Rü naxcèx íchaca na Ngechuchu ya Cristu pexŭ narŭngŭxēēxŭ na aixcŭma namexŭcèx i perŭ maxŭ rü aixcŭma penaxŭxŭcèx i ngēma Tupanapēxewa mexŭ na ngēmaācŭ meā pemaxēācŭma Tupanaxŭ picuèxŭgŭxŭcèx.

Chauxcèx rü Cristuarŭ ngŭchaŭ na chaxŭxŭcèx nixŭ i chamaxŭxŭ

¹² Pa Chaueneēgŭx, rü chanaxwèxe i nüxŭ pecuèx rü guxŭma i ngēma choxŭ ŭpetŭxŭ, rü aixcŭma ngēmaācŭ choxŭ naxŭpetŭ na yexeraācŭ nat-achixagŭxŭcèx i Tupanaārŭ ore i mexŭ. ¹³ Rü ñuxma i nŭma rü guxŭma i churaragŭ i āēxgacŭpataarŭ dauruŭgŭ rü guxŭma i togŭ rü ta nüxŭ nacuèxgu na chapoxcuxŭ naxcèx na Cristuarŭ duŭxŭ chiŭxŭ. ¹⁴ Rü ñuxma

na chapoxcuxū rū muxūma i taeneēgū i yaxōgūxū rū tama namuūēācūma nūxū nangūchaū na nūxū yaxugūexū i Tupanaārū ore i mexū. Rū yexeraācū tōrū Coriaxū nayaxōgū. ¹⁵ Rū aixcūma nixī i űuxre i duūxūgū rū togūxū na yaxāūxāchixēēxūcēxmāre nūxū nixugūexū i Cristuchiga, erū togūxū narūyexerachaū. Natūrū nangēxma i togū i duūxūgū i aixcūma mexūgu naxīnūēācūma meā nūxū ixugūexū i ngēma ore. ¹⁶ Rū űuxre i duūxūgū rū Cristuchigaxū nixugūe erū choxū nangechaūgū rū nūxū nacuēxgū na Tupana nuxma choxū muxū na íchanapoxūxūcēx i norū ore i mexū. ¹⁷ Natūrū nangēxma i togū i noxrūtama ngūchaūcēx daugūxū rū ngēmacēx nūxū ixugūexū i ngēma ore. Rū nūmagū rū tama mexūgu narūxīnūē, natūrū naxcēx nadaugū na yexeraācū choxū naguxchaxēēgūāxū i űuxma na chapoxcuxū. ¹⁸⁻¹⁹ Natūrū nūetama nixī ega woo ngēmaācū yixīgu. Erū woo mexū i norū ngūchaūmaā yixīgu rū ēxna tama, natūrū Cristuchigaxū nixugūe. Rū ngēma rū wūxi i taāē nixī i chauxcēx. Rū guxūgutāma chataāēēcha erū nūxū chacuēx rū guxūma i ngēma rū chorū mexūcēx tá nixī erū chauxcēx peyumūxēgū rū choxū narūngūxēē i Tupanaāē i Ūūnexū i Ngechuchu ya Cristuxū rūngūxēēxū. ²⁰ Rū ngēma poraācū chanaxwēxexū nixī na taguma űacū rū chixexū chaxūxū na taxucēxma chaugūcēx chaxānēxūcēx. Rū chanaxwēxe i guxūguma íchamemare na guxāpēxewa tama chamuūācūma Cristuchigaxū chixuxū. Rū űuxma na chamaxūxū rū woo chayūxgu rū chanaxwae i guxūguma aixrūgumarūūtama chaugagu Cristuxū nicuēxūūgū i duūxūgū. ²¹ Erū chauxcēx rū Cristuarū ngūchaū na chaxūxūcēx nixī i na chamaxūxū. Natūrū ngēxguma chayūxgux rū ngēma rū ta name, erū Cristuxūtawa tá changēxma i ngēxguma. ²² Natūrū tama nūxū chacuēx i űacū nixī i rūmemaēxū i chauxcēx, ngēma na chayūxū rū ēxna na chamaxūxū.. Erū űuxma na chamaxūxū rū choxū natauxcha na chanaxūxū i tōrū Coriarū puracū. ²³ Rū ngēmacēx tama nūxū chacuēx na űacū yīxū i chauxcēx rūmemaēxū i ngēma taxrewa. Erū űuxguacū rū chanaxwēxe na chayuxū na Cristuxūtawa changēxmaxūcēx. Rū ngēma nixī i aixcūma yexera rūmemaēxū i chauxcēx. ²⁴ Natūrū i pexcēx rū nāgu charūxīnū rū narūmemaē nixī na űoma i chaxunemaātama na chamaxūxū na ngēmaācū pexū charūngūxēēxūcēx. ²⁵ Rū űuxma na aixcūma meā nūxū chacuēx na pechoxwēxexū, rū ngēmawa nūxū chacuēx na tāūtāma paxa chayuxū. Rū ngēmaācū tá chamaxāma na pexū charūngūxēēxūcēx na yexeraācū Cristucēx pemaxēxūcēx rū yexeraācū taāēācūma nūxū peyaxōgūxūcēx. ²⁶ Rū ngēmaācū wena táxarū petanūwa changēxma. Rū ngēxguma wena choxū pedaugūgu rū aixcūma tá petaāēgū erū tá pexū nangēxma na űacūcēx Ngechuchu ya Cristuxū picuēxūūgūxū. ²⁷ Rū ngēma guxūārū yexera rūmemaēxū nixī na naxcēx pedauxū na meā pemaxēxū, ngēma Cristuarū ore pemaā nūxū ixuxūrū. Rū ngēxguma petanūwa chaxūxgu rū ēxna woo tama ngēma chaxūxgu, natūrū nūxū chaxīnūchaū na guxāma wūxigu pegū peporaexēēxū na taguma nūxū perūchaxūcēx na aixcūma peyaxōgūxū, rū ngēmaācū Tupanaāxū pepuracūexū na yexeraācū yaxūchigūxūcēx i norū ore i mexū. ²⁸ Rū ngēmacēx penaxwēxe i tama taxēxū pemuūēācūma nūxū pixugūama i ngēma ore. Rū ngēma na tama nūxū pemuūēxū rū ngēma rū wūxi i cuēxruū tá nixī nūxū i perū uwanūgū. Rū ngēmawa tá nūxū nacuēxgū na poxcuwa tá naxīxū i nūmagū natūrū pema rū tá maxūwa na pexīxū. Rū Tupana tá nixī ya pexū rūngūxēēcū na tama nūxū pemuūēxūcēx i ngēma perū uwanūgū. ²⁹ Rū Tupanaga nixī na Cristuaxū peyaxōgūxū. Rū ngēxgumarūūt ta naga nixī na Cristucēx ngūxū pingēgūxū. Rū

ngēma rū wūxi i ngūxēē nixī i pexna naxāxū ya Tupana. ³⁰ Pema rū choma rū wūxigu Tupanaārū puracūwa tangēxmagū, rū tanaxūama i ngēma puracū ega woo texé tūxū naguxchaxēēgux. Rū ūpa rū marū choxū pedau na űuxācū meā chanaxūxū i ngēma puracū, rū űuxma rū ta nūxū picuāchiga na űuxācū chanaxūamaxū woo namu i chorū guxchaxūgū.

2

Cristu rū űoma taxuūma yīxūrūū nūgū nixīxēē rū yemacēx ga Tupana rū guxūārū āēxgacūxū nayaxīxēē

¹ Rū dūcax, Pa Chaueneēgūx, rū űuxma na Cristuarū duūxūgū pixīgūxū, ĵrū aixcūma yīxū i nūma pexū nataāēxēēxū? ĵRū aixcūma yīxū i petaāēgūxū erū nūma pexū nangechaū? ĵRū aixcūma yīxū i Tupanaāē i Ūūnexū pexūtawa ngēxmaxū? ĵRū aixcūma yīxū i pegū pengechaūgūxū rū pegūxū pengechaūtūmūūgūxū? ² Rū ngēxguma chi ngēmaācū yixīgu, rū chanaxwēxe i guxāma wūxigu perūxīnūē, rū aixcūma guxāma pegū pengechaūgū, rū aixcūma guxāma űoma wūxitama piūxūrūū na yīxū i peāē, rū guxāma wūxitama i ngūchaūcēx pedau. Rū ngēxguma ngēmaācū pemaxēgu rū wūxi i chorū taāē tá nixī. ³ Rū tama name na togūarū yexera pegū pixīgūxēēxū rū pegū picuēxūūgūxū. Natūrū narūmemae nixī i nagu perūxīnūēxū na ngema togū rū perū yexera nūxū nacuēgūxū. ⁴ ĵRū tama pegūguxicatama perūxīnūē, natūrū pegū peporaexēē na togūxū perūngūxēēgūxūcēx! ⁵ Rū name nixī ga yema Ngechuchu ya Cristu nagu rūxīnūxūgu na perūxīnūēxū i pemax. ⁶ Yerū nūma rū woo ga Tupanaxūchi na yīxū, natūrū tama nūgū nicuēxūxū na Tupana yixīxū. ⁷⁻⁸ Rū yemacēx yēma nanatēx ga norū mexūgū ga daxūgūxū ga naānewa. Rū wūxi i duūxū i togūaxū puracūxūrūū nūgū nixīxēē. Rū űoma wūxi i duūxūrūū űoma ga naānegu nabu. Rū yexguma marū duūxū yixīgu ga nūmax, rū űoma taxuūma yīxūrūū nūgū nixīxēē. Rū Tupanaga naxīnū, rū yemaācū curuchagu nayu woo wūxi ga ānexūchi na yīxū ga yema. ⁹ Rū yemacēx ga Tupana rū guxūētūwa nanangexmaxēē rū nayangucuchixēē na guxūma i āēxgacūgūētūwa nangēxmaxūcēx. ¹⁰ Rū yemaācū nanaxū ga Tupana na Ngechuchupēxegu tacaxāpūxūgūxūcēx rū nūxū ticuēxūūgūxūcēx ya guxāma ya texé ya daxūgūxū i naānewa ngēxmagūxe, rū guxāma i űoma i naānewa ngēxmagūxe, rū guxāma ya texé ya marū yuexe. ¹¹ Rū yemaācū Tupana āēxgacūxū nayaxīxēē na guxāma nūxū ixuxūcēx na tōrū Cori yīxū ya Ngechuchu ya Cristu rū ngēmaācū nūxū icuēxūūgūxūcēx ya Tanatū ya Tupana.

Cristuarū duūxūgū rū űoma omūgūrūū nixīgū i natanūwa i ngēma duūxūgū i tama yaxōgūxū

¹² Rū űuxma na nūxū pecuāxū na űuxācū Nanatūga naxīnūxū ga Cristu, rū chanaxwēxe i chauga pexīnūē, Pa Chaueneēgū ya Pexū Changechaūgūxe. Rū yēma petanūwa chayexmagu chauga na pexīnūēxūārū yexera chanaxwēxe i chauga pexīnūē i űuxma na tama petanūwa changēxmaxū. Rū chanaxwēxe i Tupanaxū pemuētēācūma naxcēx pedaugūama i perū maxū i taguma gūxū. ¹³ Erū Tupana nixī ya perū maxūwa puracūcū na mexūgu perūxīnūēxūcēx. Rū nūma nixī i pexū nangūxēēxū na naga pexīnūēxūcēx rū peyanguxēēxūcēx i ngema norū ngūchaxū. ¹⁴ ĵRū guxūma i ngema Tupanacēx pexūxūwa rū tama name i oōcū penaxū rū pegū naxcēx pechoxūgagū! ¹⁵⁻¹⁶ Rū name i ngēmaācū meā pemaxē na taxūema tacū rū chixexūxū pewa iyangauxūcēx.

Rū penaxwèxe i mexŭ i Tupanaxācūgū pixīgū i natanūwa i ngēma duŭxūgū i chixexŭ rū chixeaēgūmarexŭ. Rū ngēxguma ngēma duŭxūgūmaā nūxŭ pixugūyane i ngēma ore i mexŭ i tūxŭ maxēxēēxŭ, rū yoxni natanūwa rū ņōma woramacurīgū ya ēānēxŭwa ibāixgūcūrūŭ tā pixīgū. Rū ngēmaācū i ngēxguma wena nūma naxūxgu ya Cristu rū poraācū tā pemaā chataāē erū tā nūxŭ chadou na tama natūcēxmamare yīixŭ ga yema puracū ga petanūwa chaxūxŭ. ¹⁷ Rū ngēma ņuxma na meā peyaxōgūxŭ, rū ngēma nixī i perū āmare i Tupanana pexāxŭ. Rū ngēma na meā yanguxūcēx i ngēma perū āmare i Tupanapēxewa, rū choma rū ichamemare na Tupanacēx ichanaxāxŭ i chorū maxŭ rū chayuxŭ. Rū ngēmacēx woo chayuxgu rū wūxi i taāē tā nixī i chauxcēx. Rū chanaxwèxe i pemagū rū ta ngēmacēx wūxigu chomaā petaāēgū. ¹⁸ Rū ngēmacēx ega ngēma ore i mexūcēx chayuxgux, rū tama name na pengechaŭgūxŭ natūrū chanaxwèxe na wūxigu chomaā petaāēgūxŭ.

Timutéu rū Epaporu- dītuchiga

¹⁹ Rū ngēxguma tōrū Cori ya Ngechuchu naxwèxegu rū paxa petanūwa chanamuega ya taeneē ya Timutéu na pexŭ na iyadauxūcēx rū chataāēxūcēx i ngēxguma nūma nangeāgu i pechiga. ²⁰ Rū aixcūma nataxuma i to i chorū ngūxēēruŭ i choma nagu charūxīnūxŭgū rūxīnūxŭ, rū Timutéuxicatama nixī. Rū nataxuma i to i naxrūŭ aixcūma pegu rūxīnūxŭ rū pexŭ rūngūxēēchaŭxŭ. ²¹ Erū guxūma i togū rū naxcēx nadaugū i noxrūtama ngūchaŭgū, rū tama aixcūma nagu narūxīnūē i ngēma Ngechuchu ya Cristuarū ngūchaŭ. ²² Natūrū i pema rū marū nūxŭ pecuē na ņūxācū meā namaxūxŭ i Timutéu, rū ņūxācū choxŭ nangūxēēxŭ i Tupanaārū orearū uchigawa, ņōma wūxi i buxŭ i nanatūxŭ rūngūxēēxŭrūŭ. ²³ Rū ngēmacēx i ngēxguma nūxŭ chacuēxgu na ņūxācū tā choxŭ na naxūpetūxŭ i nūma, rū ņūxūchi ngēma petanūwa chanamuxchaŭ i Timutéu na pexŭ iyadauxūcēx. ²⁴ Rū ngēxgumarūŭ ta nagu charūxīnū rū tōrū Cori rū aixcūma tā choxŭ narūngūxēē na chomatama ngēma petanūwa ichayadauxūcēx. ²⁵ Rū ngēxgumarūŭ ta chauxcēx name nixī i ngēma petanūwa chanamuxŭ i taeneē i Epaporudītu. Rū nūma nixī ga pematama chauxcēx nūma penamuxŭ na choxŭ nangūxēēxūcēx. Rū nūma rū chomūcū nixī i Tupanaārū puracūwa, rū poraācū choxŭ narūngūxēē i Tupanaārū orearū uwa. ²⁶ Rū poraācū nūxŭ nangūchaŭ na pexŭ iyadauxŭ i guxāma i pemax. Rū poraācū naxoegaāē, yerū pema rū nūxŭ pecuāchiga ga na yadaawexŭ ga nūmax. ²⁷ Rū aixcūma nixī ga na yadaawexŭ, rū wixguxūchi taēx nayu. Natūrū Tupanaāxŭ nangechaŭtūmūŭ rū choma rū ta nūxŭ changechaŭtūmūŭ, rū yemacēx naxcēx nayataanēxēē na tama yexeraācū changechaŭxūcēx. ²⁸ Rū ngēmacēx rū yexeraācū chanaxwèxe na paxa petanūwa chanamuxŭ i Epaporudītu, na pema rū petaāēgūxūcēx i ngēxguma wena nūxŭ pedaugūgu. Rū ngēxguma i choma rū tā ta chataāē i ngēxguma nūxŭ chacuēxgu na petanūwa nangēxmaxŭ na pexŭ nangūxēēxūcēx. ²⁹ Rū chanaxwèxe i tōrū Coriēgagu petaāēgūācūma meā penayaxu erū peeneē nixī. Rū name nixī i nūxŭ pengechaŭgū i guxūma i ngēma duŭxūgū i Epaporudīturūŭ ixīgūxŭ. ³⁰ Yerū nūma ga Epaporudītu rū yema na poraācū nawa napuracūxŭ ga Cristuarū puracū, rū yemacēx wixguxūchi taēx nayu. Rū āncūmaxŭta nūgū nayexmaxēē na pechicūŭ choxŭ nangūxēēxūcēx.

3

Ngēma na Cristuxŭ icuāxŭ rū ngēma nixī i guxŭārū yexera rūmemaēxŭ

1 Rū ñuxma Pa Chaueneëgüx, rü chanaxwëxe i petaãëgü erü tórü Coriarü duüxügü pixigü. Rü yema ore ga noxri pexcëx chaxümatüxü rü tama choxü nawëxtümüü na wena pexcëx chanaxümatüxü erü aixcüma pexü name i ngëma ore. 2 jRü pegüna pedëux nüxna i ngëma duüxügü i chixiri maxëxü rü chixexümaã pexü ixucuxëgüxü! Rü nümagü nixi i nüxü yaxugüexü rü ngëxguma tama yigü iwiechëxmüpëxechiraügu, rü taxucürüwama Tupanapëxewa time. 3 Natürü yixema aixcüma Tupanapëxewa imexë, rü yixema tixigü. Rü Tupanaxü ticuëxüügü i Naãë i Üünexüãrü ngüxëemaã. Rü tataãëgü erü Ngechuchu ya Cristuarü duüxügü tixigü. Rü tama tayaxögü na ngëma yigü iwiechëxmüpëxechiraüxüxcëx Tupanapëxewa imexü. 4 Rü choma chi waxi nixi i guxü i togüarü yexera chayaxöxü i ngëma wiechëxmüpëxechiraüchiga. Rü tataxu chima ya togue ya texë chauxrüü yaxöxë i ngëmachiga. 5 Yerü yexguma 8 ga ngunexü chauëtü yixigü ga na chabuxü, rü choxü ínawiechëxmüpëxechiraügü, erü Yudíu chixi. Rü Beyamítanüxü chixi. Rü chaunatü rü chaué rü Yudíugü tixigü, rü ngëmacëx i choma rü Yudíuxüchi chixi. Rü choma rü Parichéuchirëx chixi, rü pema nüxü pecuëx rü ngëma Parichëgü rü meãma nanaxaure i Tupanaãrü mugü ga Moíché ümatüxü. 6 Rü yema na meã chayanguxëëchaüxüxcëx ga yema mugü ga Moíché ümatüxü, rü yemacëx nawe chingëchigü ga yema duüxügü ga Ngechuchuaxü yaxögüxü. Rü yema na aixcüma meã chanaxaurexüxcëx ga yema mugü ga Moíché ümatüxü, rü yemacëx taxucürüwama texë chauchi-gaxü tixu ga tama na chaxaurexü. 7 Natürü guxüma ga yema üpa chauxcëx mexü, rü ñuxma rü taxuwama choxü name erü marü íchanatëx na Cristuaxüxícatama chayaxöxüxcëx. 8 Rü ñuxma na Ngechuchu ya Cristu ya chorü Corixü na chacuáxü, rü chauxcëx rü guxüma ga yema üpa nagu chixüxü rü taxuwama name, erü ngëma na Cristuxü na chacuáxü rü guxüãrü yexera narümemaë. Rü guxüma ga yema mugü ga noxri nagu chixüxü rü marü nüxü charüxo na Cristuwe charüxüxüxcëx. Rü chauxcëx rü ñoma guxchirerüü nixi ga yema üpa nagu chixüxü ega Cristumaã nügü chananguxgü. 9 Rü yemaãcü nüxü charüxo ga guxüma nagagu ga yema na Cristuarü duüxü na chiixüxcëx. Rü ñuxma rü Tupanapëxewa chame erü Cristuaxü chayaxö. Rü tama ngëma na chamecümaxüxcëx rü ëxna mugü chaxaurexüxcëx nixi na chamexü i napëxewa. Natürü ngëma na Cristuaxü chayaxöxüxcëx nixi i nügüxcëx choxü namexëëxü ya Tupana. 10-11 Rü ngëma ñuxma chanaxwëxexü nixi na aixcüma Cristuxü chacuáxü rü chowa na nangëxmaxü i ngëma pora ga wena Cristuxü írúdxëëxü i ñuxma nüxü ngëxmaxü. Rü yema ngüxü na yangexü ga nüma rü na nayuxü rü ngëxgumarüütama chanaxwëxe i íchamemare na naxcëx ngüxü chingexü rü naxcëx chayuxü na yixcama choma rü ta yuwa ícharüdxüxcëx.

Pauru naxcëx nadau na Cristucëx namaxüxü ñuxmatáta Tupanax-ütawa nangu

12 Rü ñuxma na ngëma ñachaxü pemaã rü tama chanaxwëxe i nagu perüxñüë na guxüxü chacuáxü i Cristuchiga, rü ëxna guxüwama na chamexü. Natürü guxü i ngunexügu rü naxcëx chadauama na Ngechuchu ya Cristuarü ngüchaü na chaxüxüxcëx, yerü yemacëx nixi ga nüma ga chauxcëx nadauxü ga noxrix. 13 Pa Chaueneëgüx, pemaã nüxü chixu rü chomatama meãma nüxü chacuëx rü ñuxma rü ta tautama nawa changu i ngëma naxcëx chadauxü. Natürü i ñuxma rü marü nüxü icharüngüma i guxüma ga yema noxri nagu chixüxü. Rü ñuxma rü chaugü chaporaxëë na aixcüma Cristucëx na chamaxüxü na nawa changuxüxcëx i ngëma maxü i chopëxewaama

ngēxmaxŭ. ¹⁴ Rū ngēmacèx i ñuxma rü naxcèx chadau na aixcūma Cristucèx chamaxŭxŭ ñuxmatáta Tupanaxŭtawa changu. Erü chanayauxchaŭ i ngēma āmare i nūma daxŭguxŭ i naānewa naxcèx taxcèx nangemaxŭ i yixema na Ngechuchu ya Cristuarü duŭxŭgŭ ixŭgŭxŭ. ¹⁵ Rū guxāma i yixema na aixcūma Cristuaxŭ yaxŭgŭxŭ, rü name nixŭ i ngēmaācü nagu tarŭxŭnŭē. Natŭrŭ ngēxguma chi texē i petanŭwa toguama tarŭxŭnŭgu, rü Tupana tá tŭxŭ nŭxŭ nacuèxēē i ngēma nūma nanaxwèxexŭ na nŭxŭ tacuáxŭ. ¹⁶ Rū ngēma inaxwèxexŭ nixŭ na aixcūma naga ixŭnŭēēchaxŭ rü meāma nagu ixŭxŭ i ngēma ore i marŭ nŭxŭ icuáxŭ. ¹⁷ Pa Chaueneēgŭx, chanaxwèxe i chauxrŭŭ nagu pexŭ i ngēma pexŭ nŭxŭ chadauxēēxŭ na namexŭ. ¡Rŭ penangugŭ na ñuxācü meā namaxēxŭ i ngēma togŭ i duŭxŭgŭ i toma tamaxēxŭācüma maxēxŭ! ¹⁸ Rŭ marŭ muēxpŭxcūna pemaā nŭxŭ chixu, rü ñuxma rŭ changechaŭācüma rŭ chaxauxācüma wena pemaā nŭxŭ chixu rŭ nangēxma i muxŭma i duŭxŭgŭ i Cristuarŭ uwanŭrŭūācüma maxēxŭ. Rŭ nŭmagŭ rŭ tama nŭxŭ nacuèxgŭchaŭ na Cristu curuchagu naxcèx yuxŭ. ¹⁹ Natŭrŭ ngēma duŭxŭgŭ rŭ tá dŭxwa Tupana nanapoxcue. Rŭ ngēma naxŭneārŭ ngŭchaŭ nixŭ i namaā natupanaāxŭ. Rŭ woo nŭxŭ nacuèxchirēx na wŭxi i āne na yŭxŭ i ngēma chixexŭ natŭrŭ namaā nataēgŭama. Rŭ ñoma i naāneārŭ ngēmaxŭguxicatama narŭxŭnŭē. ²⁰ Natŭrŭ i yixema rŭ daxŭguxŭ i naānewa tŭxŭ nangēxma i tachica. Rŭ itananguxēē na daxŭguxŭ i naānewa taxcèx ne naxŭxŭ ya tŭrŭ Cori ya Ngechuchu ya Cristu ya tŭrŭ Maxēxēerŭŭ. ²¹ Rŭ ñaā taxŭne i yuxwèxexŭ rŭ nūma ya Cristu tá nanaxŭchicŭŭ na naxŭne i mexēchixŭrŭŭ yŭxŭcèx. Rŭ ngēma norŭ pora i namaā guxŭtŭwa nangēxmaxŭ, rŭ ngēmamaātama tá nanaxŭchicŭŭ i taxŭne na noxrŭrŭŭ yŭxŭcèx.

4

Ñuxma na tŭrŭ Coriarŭ ixŭgŭxŭ rŭ name nixŭ na guxŭguma namaā itaēgŭxŭ

¹ Pa Chaueneēgŭx, rŭ pexŭ changechaxŭ rŭ poraācü pexŭ íchayadauxchaxŭ. Rŭ ngēma pemaā nŭxŭ chixuxŭrŭŭ chanaxwèxe i meā tŭrŭ Coricèx pemaxē erŭ pema nixŭ i chorŭ taāē rŭ chorŭ āmare i Tupana choxna āxŭ pixŭgŭxŭ. ² Rŭ nŭxŭ chacèxŭ i taeyèxgŭ i Ebódia rŭ Chitique na nŭgŭmaā nangŭxmŭēxŭcèx, erŭ nŭmagŭ rŭ tŭrŭ Corixacŭgŭ nixŭgŭ. ³ Rŭ cumax, Pa Chomŭcü ya Mecŭ i Wŭxigu Tupanaārŭ Puracŭwa Chomaā Puracŭcŭx, rŭ cuxna naxcèx chaca na nŭxŭ curŭngŭxēēxŭcèx i ngēma taxre i taeyèxgŭ, erŭ nŭmagŭ rŭ wŭxigu chomaā rŭ Cremetemaā rŭ ngēma togŭ i chomŭcŭgŭ i Tupanaārŭ poperawa marŭ ngoxégagŭxŭmaā napuracŭe i Tupanaārŭ orearŭ uwa. ⁴ Rŭ ñuxma na tŭrŭ Coriarŭ pixŭgŭxŭ, Pa Chaueneēgŭx, rŭ name nixŭ i guxŭguma namaā petaāēgŭ. Rŭ wena pemaā nŭxŭ chixu, rŭ ¡petaāēgŭ! ⁵ Rŭ chanaxwèxe i meā pemaxē na guxŭma i duŭxŭgŭ pexŭ nacuèxgŭxŭcèx na aixcūma mexŭ i duŭxŭgŭ na pixŭgŭxŭ. ¡Rŭ nŭxna pecuēxāchie na tŭrŭ Cori rŭ paxa tá nataeguxŭ na nūma naxŭxŭ! ⁶ ¡Rŭ taxucèxma penaxŭxāchiāēgŭ! ¡Rŭ Tupana-maā nŭxŭ pixu i perŭ yumŭxēwa i guxŭma i tacŭ i pexŭ ngupetŭxŭ! ¡Rŭ naxcèx ípeca rŭ moxē nŭxna pexā! ⁷ Rŭ ngēmaācü i nūma ya Tupana rŭ tá pexŭ nataāēxēē namaā i wŭxi i taāē i mexēchixŭ i guxŭma i taāē i nŭxŭ icuáxŭārŭ yexera mexēchixŭ. Rŭ ñuxma na Ngechuchu ya Cristuarŭ duŭxŭgŭ pixŭgŭxŭ, rŭ ngēma taāē i Tupana pexna āxŭ rŭ tá nŭxna pexŭ ínapoxŭ i ngēma chixexŭ i nagu perŭxŭnŭēchaxŭ.

Name nixŭ i nagu tarŭxŭnŭē i guxŭma i tacŭ i aixcūma mexŭ ixŭxŭ

⁸ Rū ñuxma Pa Chaueneëgũx, rü name nixĩ i nagu perũxĩnũe i guxũma i ngẽma ore i aixcũma ixĩxũ, rü guxũma i ngẽma nacũma i taxucũrũwama texẽ chixri nachiga idexaxũ. Rũ name nixĩ i nagu perũxĩnũe i guxũma i ngẽma ore i aixcũma meã iwẽxũ rü guxũma i ngẽma Tupanapẽxewa mexũ, rü guxũma i ngẽma mexũ i duũxũgũ namaã taãẽxũ, rü guxũma i ngẽma mexũ i Tupanaxũ naxcẽx icuẽxũũxũgũxũ. Rũ name nixĩ i ngẽmagu perũxĩnũe. ⁹ Rũ chanaxwẽxe i aixcũma penaxũ i ngẽma pexũ changũxẽẽxũ, rü ngẽma pexũ namaã chixucuxẽgũxũ, rü ngẽma chauxũtawã nũxũ pexĩnũexũ, rü ngẽma chauxũtawã nũxũ pedauxũ na chanaxũxũ. Rũ ngẽxguma ngẽmaãcũ pemaxẽgu rü pemaã tá inarũxãũx ya Tupana ya tamaã irũngũxmũcũ rü tũxũ taãẽxẽcũ.

Yema PiripucũĀx ga yaxõgũxũ rü dũerumaã Pauruxũ narũngũxẽẽgũ

¹⁰ Rũ ñuxma na chorũ Coriarũ chiĩxũ, rü porããcũ chataãe erũ wenaxãrũ choxna pecuẽxãchie rü choxũ perũngũxẽẽ. Rũ choma nũxũ chacuẽx rü pema rü guxũguma choxũ perũngũxẽẽchaũ, natũrũ taguma pexũ natauxcha ga na penaxũxũ ga yema. ¹¹ Rũ tama ngẽma na řacũ choxũ taxuxũcẽx nixĩ i pemaã nũxũ chixuxũ i ngẽmachiga. Erũ choma rü marũ chomaã nixũ na namaã chataãẽxũ i ngẽma choxũ ngẽxmaxũ. ¹² Rũ nũxũ chacuẽx na ñuxãcũ na yĩxũ ega guxũ choxũ tauxgux, rü nũxũ chacuẽx na ñuxãcũ na yĩxũ ega choxũ namuxũchixgu. Rũ marũ chomaã nixũ na namaã chataãẽxũ i ngẽma choxũ ngẽxmaxũ woo changaxpũtũwegu, rü ẽxna woo chataiyaxgu, rü ẽxna woo choxũ namuxũchixgu rü ẽxna woo choxũ natauxguma. ¹³ Rũ Cristu nixĩ ya choxũ poraxẽẽcũ, rü ngẽmacẽx chomaã nanguxũ na chanaxũxũ i guxũma i ngẽma Tupana naxwẽxexũ na chanaxũxũ. ¹⁴ Natũrũ ga pema rü wũxi ga mexũ choxũ pexũgũ ga yexguma guxchaxũwa chayexmagu rü choxũ perũngũxẽẽ. ¹⁵ Rũ pema, Pa Yaxõgũxũ i PiripucũĀx, rü meãma nũxũ pecuẽx rü yexguma noxri Machedõniããnewa nũxũ chixuxgu ga Tupanaãrũ ore, rü yexguma yẽma řchaxũxũgu, rü pexicatama nixĩ ga ãmare choxna pexãxũ naxcẽx ga yema ngũxẽẽ ga chauxũtawã peyaxuxũ. ¹⁶ Rũ yexguma Techarõnicaarũ iãnewa chayexmayane, rü pema rü yẽma chauxcẽx penamugũ ga perũ ãmare na choxũ perũngũxẽẽgũxũcẽx. Rũ tama nixĩ ga yexgumarĩca choxũ perũngũxẽẽxũ. ¹⁷ Rũ woo perũ ãmaremaã chataãe, natũrũ yexeraãcũ chataãe erũ ngẽma choxũ na perũngũxẽẽgũxũcẽx rü Tupana tá ãmare pexna naxã. ¹⁸ Rũ ñuxma rü marũ choxũ nangẽxma i guxũma i řacũ i chanaxwẽxexũ, rü aixcũma ngẽmaãrũ yexera choxũ nangẽxma. Rũ ñuxma na Epaporudĩtu nũma nangexũ i perũ ãmare, rü taxuũma choxũ nataxu. Rũ ngẽma perũ ãmare i chauxcẽx nũma pemuxũ, rü Tupanapẽxewa rü ñoma wũxi i pumara i yixixũrũxũ nixĩ, rü nũma rü porããcũ namaã nataãe. ¹⁹ Rũ ngẽmacẽx ya chorũ Tupana rü norũ ngẽmaxũgũ i mexẽchixũwa tá pexna nanaxã i guxũma i řacũ i pexũ taxuxũ. Rũ ngẽmaãcũ tá nanaxũ erũ Ngechuchu ya Cristuarũ duũxũgũ pixĩgũ. ²⁰ Rũ name nixĩ i guxũguma nũxũ ticuẽxũgũ ya Tanatũ ya Tupana. Rũ ngẽmaãcũ yĩ.

Pauru nanaguxẽẽ ga norũ popera rü wenaxãrũ yema duũxũgũxũ narũmoxẽ

²¹ Rũ chanaxwẽxe i chauẽgagu nũxũ perũmoxẽgũ i guxũma i taeneẽgũ i Ngechuchu ya Cristuaxũ yaxõgũxũ. Rũ ngẽxgumarũũ ta pexũ narũmoxẽgũ i ngẽma taeneẽgũ i chauxũtawã ngẽxmagũxũ. ²² Rũ ngẽxgumarũũ ta pexũ narũmoxẽgũ i guxũma i taeneẽgũ i nũma Dumawa ngẽxmagũxũ. Rũ ngẽma yexera pexũ rũmoxẽgũxũ rü ngẽma nixĩ i taeneẽgũ i Dumaãrũ ãẽxgacũ ya

tacūxŭ-tawa puracüexŭ. ²³ Rŭ chanaxwèxe i tórü Cori ya Ngechuchu ya Cristu pexŭ narüngŭxēē i guxāma i pemax. Rŭ ngēmaācŭ yīi.

Rŭ nuāma pexna,
Pauru

POPERA GA COROCHAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corochawa yexmagŭxŭ

1-2 Pa Chaueneēgŭ ya Corochaarŭ Īnewa Ngēxmagŭxex, choma i Pauru rü wŭxigu namaā i taeneē i Timutéu nixŭ i pexcēx tanaxŭmatŭxŭ i űāa popera. Rü choxŭ nixŭ ga Tupana ga inamuāchixŭ na guxŭwama nüxŭ chixuchigŭxŭcēx i Ngechuchu ya Cristuarŭ ore. Rü pexcēx chanaxŭmatŭ i guxāma i pema ya chaueneēgŭ ya aixcŭma Tupanaarŭ duŭxŭgŭ ixŭgŭxe ya Cristuaxŭ yaxōgŭxe. Rü chanaxwēxe i Tanatŭ ya Tupana pexŭ narŭngŭxēē na meā pegŭmaā pemaxēxŭcēx rü petaāēgŭxŭcēx.

Pauru rü yema yaxōgŭxŭcēx nayumŭxē

3 Rü guxŭguma i ngēxguma pexcēx tayumŭxēgŭgu, rü moxē nüxna taxā ya Tupana ya Nanatŭ ya tŕrŭ Cori ya Ngechuchu ya Cristu. 4 Rü ngēmaācŭ tanaxŭ erŭ marŭ nüxŭ tacuāchiga na űuxācŭ aixcŭma meā Ngechuchu ya Cristuaxŭ peyaxōgŭxŭ, rü aixcŭma nüxŭ pengechaŭgŭxŭ i guxŭma i ngēma duŭxŭgŭ i Tupanaarŭ ixŭgŭxŭ. 5 Rü nüxŭ tacuēxgŭ na ngēmaācŭ meā Tupanapēxewa pemaxēxŭ erŭ penayauxgŭchaŭ i ngēma mexŭgŭ i Tupana pexŭ namaā nguxŭxŭ i daxŭguxŭ i naānewa. Rü űuxma rü meā ĩpenanguxēē na penayauxgŭxŭcēx i ngēma mexŭgŭ yerŭ marŭ nüxŭ pexŭnŭē ga Tupanaarŭ ore i mexŭ i aixcŭma ixŭxŭ. 6 Rü ngēmatama ore i mexŭ ga pexŭtawa nguxŭ, rü guxŭwama nangu i űuxmax. Rü guxŭwama ningŭchigŭ rü duŭxŭgŭarŭ maxŭxŭ naxŭchicŭŭ, yema perŭ maxŭxŭ na naxŭchicŭŭxŭrŭŭ ga yexguma nüxŭ pexŭnŭēgu rü nüxŭ pecuēxgŭgu na űuxācŭ Tupana aixcŭma pexŭ na ngechaŭxŭ rü pexŭ rŭngŭxēēchaŭxŭ. 7 Rü ngēma ore i mexŭ nixŭ ga pexŭ nangŭxēēxŭ ga Epāparu ya tomŭcŭ ya nüxŭ tangechaŭgŭcŭ ya wŭxigu tomaā Tupanaarŭ orewa puracŭcŭ. Nŭma rü Cristuarŭ puracŭtanŭxŭ ya mecŭ nixŭ, rü nŭma nixŭ i tochicŭŭ pexŭ nangŭxēēxŭ. 8 Rü nŭma ya Epāparu nixŭ i tomaā nüxŭ yaxuxŭ i pechiga na űuxācŭ Tupanaāē i Ūnēxŭarŭ ngŭxēēmaā choxŭ pengechaŭgŭxŭ. 9 Rü ngēmacēx i toma ga noxritama pexŭ tacuāchigagu, rü taguma nüxŭ itayarŭngŭmaē na pexcēx tayumŭxēgŭxŭ. Rü guxŭguma Tupanana naxcēx tacagŭ na meā pexŭ nüxŭ nacuēxēēxŭcēx i ngēma nŭma nanaxwēxexŭ na penaxŭxŭ. Rü nüxna naxcēx tacagŭ na pexna naxāāxŭcēx i nagŭxŭraŭxŭ i cuēx i Naāē i Ūnēxŭwa ne ŭxŭ. 10 Rü nüxna naxcēx tacagŭ na meā tŕrŭ Cori naxwēxexŭācŭma na pemaxēxŭcēx rü guxŭguma penaxŭxŭcēx i ngēma nŭma nanaxwēxexŭ. Rü nüxna naxcēx tacagŭ na pexŭ natauxchaxēēāxŭcēx na togŭxŭ perŭngŭxēēgŭxŭcēx rŭ guxŭ i ngunexŭgu yexeraācŭ Tupanaxŭ pecuāxŭcēx. 11 Rü nüxna naxcēx tacagŭ na norŭ pora i mexēchixŭmaā pexŭ naporaexēēxŭcēx, na namaā peporaexŭcēx i guxŭma i guxchaxŭgŭ rü yaxna namaā pexŭnŭēxŭcēx. 12 Rü űuxŭchi tanaxwēxe i taāēācŭma Tanatŭ ya Tupanana moxē pexā, erŭ nŭma pexŭ nimexēēgŭ na pema rŭ ta penayauxgŭxŭcēx i ngēma mexŭgŭ i naxŭtawa ngēxmagŭxŭ i nŭma tā nüxna naxāxŭ i ngēma duŭxŭgŭ i noxrrŭ ixŭgŭxŭ. 13 Yerŭ nŭma ga Tupana rü marŭ Chatanāmēxēwa tŭxŭ ĩnanguxŭxēē rü Nane ya nüxŭ nangechaŭcŭmēxēwa tŭxŭ nangēxmagŭxēē. 14 Rü guma Nanegagu nixŭ ga tŭxŭ namaxēēxŭ rü tŭxŭ nüxŭ nangechaŭxŭ ga tŕrŭ pecadugŭ.

Rü yexguma pecaducèx nayuxgu ga Cristu rü Tupana nügümaã nanangüxmüëxëë ga duïxügü

¹⁵ Taguma texé Tupanaxü tadau, natürü nüma rü núma nanamu ga Nane na duïxügü nüxü daugüxücèx rü nüxü nacuèxgüxücèx na ñuxácü na yïixü i nüma ya Tupana. Rü naxüpa ga guxüma ga tacü i ñuxma ngèxmaxü, rü nüxïra marü nayexma ga Tupana Nane. ¹⁶ Rü Nanexü nixï ga namuxü ga Tupana na naxüäxücèx ga guxüma i tacü i ñuxma ngèxmaxü i daxüguxü i naãnewa rü ñoma i naãnewa, rü guxüma i ngëma nüxü idauxü rü ngëma tama nüxü idauxü. Rü yemaäcü nanaxü ga guxüma ga norü orearü ngeruügü i daxücüñaxârü äëxgacügü rü guxüma ga ngoxogüarü äëxgacügü. Rü yemaäcü nanaxü ga guxüma na nüxü yacuèxüñgüxücèx. ¹⁷ Rü naxüpa i guxüma i tacü i ñuxma ngèxmaxü, rü Cristu rü marü nüxïra nayexma. Rü nagagu nixï i meã inanuxü i guxüma erü nüma nixï i namaã inacuaãxü. ¹⁸ Rü nüma ya Cristu rü naëru nixï i guxüma i ngëma yaxögüxü. Rü nüma nixï ga naxüäxü rü nüxna naxãäxü ga maxü. Rü nüma nixï ga nüxïra yuwa inadaxü na guxütärü äëxgacü yïixücèx. ¹⁹ Rü Cristu rü Tupanaxüchi nixï, yerü yemaäcü nanaxwëxe ga Tupana. ²⁰ Rü Tupana rü ñoma ga naãnewa nanamu ga Cristu na curuchagu pecaducèx nayuxücèx. Rü yemaäcü nixï ga Tupana nügümaã nangüxmüëxëëxü ga guxüma i ñoma i naãnewa ngèxmaxü rü guxüma i daxüguxü i naãnewa ngèxmaxü. Rü yemaäcü nanaxü ga Tupana yerü yemaäcü nanaxwëxe. ²¹ Rü pema ga üpa rü tama Tupanamücügü pixigü yerü naxchi pexaie nagagu ga perü chixexü ga nagu perüxïñüexü rü pexüxü. ²² Natürü i ñuxma ya Tupana rü nügümaã pexü narüngüxmüëxëë na namücügü i mexü pixigüxücèx. Rü yemaäcü nanaxü ga Tupana ga yexguma Cristu duïxüxü ixïxgu rü curuchawa ngüxü yangexgu rü yexma nayuxgu. Rü yemaäcü nayu ga Cristu na nügüxütawa pexü nagagüxücèx rü napëxewa pimexücèx rü nataxuxücèx i perü chixexü. ²³ Natürü ngema na pengugüxücèx, rü penaxwëxe na guxüguma mea peyaxögüxü rü meã naga pexïñüexü rü taguma nüxü perüxoexü i ngëma norü ore i mexü ga marü nüxü pexïñüexü. Rü ngematama ore nixï i ñuxma nüxü yaxugüexü i güxü i naanewa.

Tupana rü Pauruxü namu na guxüma ga yaxögüxüxü nangüxëëxücèx

²⁴ Rü ñuxma na woo pexcèx ngüxü chingexü rü chataãë erü nüxü chacuèx rü ñaã chaxunemaã choma rü ta chayanguxëë ga yema ngüxü ga Cristu ingexü naxcèx i norü duïxügü i yaxögüxü. ²⁵ Rü ñuxma ya Tupana rü choxü namu na nüxü charüngüxëëxücèx i guxüma i ngëma norü duïxügü i yaxögüxü. Rü perü mexcèx nixï i choxü namuxü na guxüwama meã nüxü chixuxücèx i norü ore. ²⁶⁻²⁷ Rü ngëma Tupanaärü ore rü ñanagürü:

“Rü Cristu rü pewa nangëxma i ñuxmax, rü nagagüxïtama nixï i pexü nangëxmaxü i pechica i daxüguxü i naãnewa i ngextá inamexëchixütwa”, ñanagürü. Rü yema nuxcümañgüxü ga duïxügü rü tama nüxü nacuèxgü ga yemachiga, natürü ñuxma ya Tupana rü norü duïxügüxü nüxü nacuèxëë. Erü nüma ya Tupana rü norü duïxügüxü nüxü nadauxëëchañ na ñuxácü poraäcü pexü nangechañxü rü pexü nangüxëëxü i guxäma i pema i pema i tama Yüdüügü ixigüxe. Rü ñuxma i pema na woo tama Yüdüügü pixigüxü, natürü pema rü ta pexü nangëxma i pechica i daxüguxü i naãnewa erü Cristuaxü peyaxögü. ²⁸ Rü ñuxma i toma rü Cristuchigaxü nixï i tixuxü. Rü ngema ore i Tupanaärü cuèx nawa ngexmaxümaã nixï i guxüma i

duŭxŭgŭxŭ tixucuxĕgŭxŭ rŭ tanangŭexĕĕxŭ na ngemaĕcŭ ngearŭ chix-exŭĕxŭ Cristuxŭtawa tagagŭxŭ. ²⁹ Rŭ ngĕmatama puracŭ nixŭ i nawa poraĕcŭxŭchima chapuracŭamaxŭ woo ŭacŭ rŭ guxchaxŭ chauxcĕx ĩnguxgu. Rŭ guxŭma i ngĕma pora i Cristu choxna ĕxŭ i chowa ngĕxmaxŭ nixŭ i choxŭ poraxĕĕxŭ na chanaxŭamaxŭcĕx i ngĕma puracŭ.

2

¹ Pa Chaueneĕgŭx, chanaxwĕxe i nŭxŭ pecuĕx na űuxĕcŭ poraĕcŭ pexcĕx chapuracŭxŭ. Rŭ ngĕxgumarŭŭ ta chanaxwĕxe i nŭxŭ pecuĕx na űuxĕcŭ poraĕcŭ chapuracŭxŭ naxcĕx i ngĕma taeneĕgŭ i Laodichĕaarŭ ĩnĕwa ngĕxmagŭxŭ rŭ guxŭma i petanŭxŭgŭ i taguma choxŭ daugŭxŭ. ² Rŭ ngĕmaĕcŭ poraĕcŭxŭchima chapuracŭ na nŭxŭ rŭ ta chanangŭchaŭxĕĕxŭcĕx. Erŭ chanaxwĕxe i guxŭma aixcŭma nŭgŭ nangechaŭgŭ rŭ nŭxŭ nangĕĕma i ngĕma mexŭ i cuĕx i aixcŭma ĩxŭxŭ. Rŭ ngĕmaĕcŭ tĕ meĕma nŭxŭ nacuĕxgŭ ga yema noxri Tupanaxŭcatama nŭxŭ cuĕxŭ. Rŭ yima rŭ Cristutama nixŭ. ³ Rŭ nŭma nixŭ i nŭxŭ nangĕĕmaxŭ i guxŭma i cuĕx i aixcŭma mexŭ. Rŭ nŭma nixŭ i taxcĕx nangoxĕĕĕxŭ i Tupanachiga. ⁴ Rŭ pemaĕ nŭxŭ chixu i ngĕma ore erŭ tama chanaxwĕxe na texĕ pexŭ womŭxĕĕgŭxŭ namaĕ i ŭacŭ rŭ ore i chixexŭwa pexŭ gagŭxŭ. ⁵ Rŭ woo na tama ngema petanŭwa changĕĕmaxŭ, natŭrŭ chauĕĕwa rŭ poraĕcŭ pegu charŭxŭnŭ. Rŭ wŭxi i chorŭ taĕĕ nixŭ na nŭxŭ chacuĕxŭ na űuxĕcŭ meĕ pegŭ ipinuxŭ na meĕ pegŭmaĕ ipecuĕxŭcĕx rŭ űuxĕcŭ tama nŭxŭ perŭxoĕxŭ na Cristuaxŭ peyaxŭgŭxŭ.

űuxma na Cristuarŭ ĩxŭgŭxŭ rŭ ngexwacaxŭxŭ i maxŭ tŭxŭ nangĕĕma

⁶ Rŭ pema ga noxri rŭ meĕma tŕrŭ Cori ya Ngechuchu ya Cristuxŭ peyaxŭgŭ. Rŭ űuxma rŭ yema noxri meĕma na penayauxgŭxŭrŭŭ rŭ name nixŭ i guxŭguma nŭxna penaxĕ i perŭ maxŭ na nŭma pexŭ namaĕ ĩnacuĕxŭcĕx. ⁷ Rŭ wŭxi i nanetŭ nanaxwĕxe i naxchŭmĕĕx na nataixŭcĕx rŭ na namaxŭcĕx. Rŭ ngĕxgumarŭŭ ta i pema rŭ penaxwĕxe na meĕ Cristuna peyaxŭgŭxŭ na meĕ nawa piyaetanŭxŭcĕx rŭ meĕ naxcĕx pemaxĕxŭcĕx rŭ meĕ nŭxŭ peyaxŭgŭamaxŭcĕx yema noxri Epĕparu pexŭ ngŭexĕĕgurŭŭ. Rŭ name nixŭ i guxŭguma Tupanana moxĕ pexĕ. ⁸⁻⁹ Rŭ naxcĕx pexuĕĕgŭ i ngĕma duŭxŭgŭ i pexŭ womŭxĕĕgŭchaŭxŭ! Rŭ tama name i nŭxŭ ĩperŭxŭnŭĕ i ngĕma norŭ ore i tama aixcŭma ĩxŭxŭ rŭ taxuwama mexŭ. Erŭ ngĕma duŭxŭgŭ rŭ pexŭ nangŭexĕĕchaŭ na nagu pexŭxŭcĕx i ngĕma nacŭmagŭ ga nŭcŭmaŭgŭxŭ ga duŭxŭgŭ nagu ĩxŭ. Rŭ űoma i naĕneĕrŭ ngŭxĕĕtaĕgŭ nixŭ i ĩnaxŭnŭĕxŭ. Rŭ tama aixcŭma Cristuchiga nixŭ i ngĕma pexŭ nangŭexĕĕxŭ. Rŭ name nixŭ i nŭxna pixŭgachi i guxŭma i ngĕma ngŭxĕĕtaerŭgŭ i chixexŭgŭ rŭ Cristuwe perŭxŭ. Erŭ Cristu rŭ Tupanaxŭchi nixŭ rŭ guxŭma i Tupanaĕrŭ pora rŭ Cristuwa nangĕĕma. ¹⁰ Rŭ űuxmax, rŭ Tupanaĕrŭ maxŭ rŭ norŭ pora rŭ aixcŭma pewa nangĕĕma erŭ namĕxwa pengĕxmagŭ ya Cristu ya namaĕ ĩcuĕcŭ i guxŭma i daxŭcŭĕĕxĕrŭ ĕĕxgacŭgŭ rŭ guxŭma i ngoxogŭarŭ ĕĕxgacŭgŭ. ¹¹ Rŭ ngĕma Yudŭgŭ rŭ nŭgŭ ĩnawiechĕxmŭpĕxechiraŭgŭ na Tupanapĕxewa yamexŭcĕx. Natŭrŭ ngĕxguma Cristuaxŭ yaxŭgŭgŭ rŭ tama ngĕmaĕcŭ tamaĕ nanaxŭ ya Cristu na ĩmexŭcĕx. Erŭ nŭma ya Cristu rŭ tŕrŭ maxŭwa napuracŭ rŭ tŭxŭ ĩnangŭxŭxĕĕ nawa i taxŭneĕrŭ ngŭchaŭgŭ. Rŭ ngĕmaĕcŭ nixŭ i tŭxŭ yamexĕĕxŭ na Tupanapĕxewa ĩmexŭcĕx. ¹² Rŭ yexguma ĩpĕbaiŭgŭ, rŭ Cristu na ĩtĕxŭrŭŭ yexma natĕx ga yema nŭcŭmaŭxŭ ga perŭ maxŭ. Rŭ yema Cristu na ĩrŭdaxŭrŭŭ rŭ pema rŭ ta penayaxu i maxŭ i ngexwacaxŭxŭ, yerŭ peyaxŭgŭ na Tupana norŭ poramaĕ Cristuxŭ

írudaxēēxū. ¹³ Rū ūpa ga pema rū tama aixcūma pexū nayexma ga maxū i taguma gūxū yerū pepecaduāxgū rū pexeneārū ngúchaū pexūgū. Natūrū i űuxma rū Cristuxū namaxēēxūrūū pexū namaxēēē ya Tupana erū Cristuarū duūxūgū pixīgū. Rū Tupana rū marū Cristugagu tūxū nūxū nangechaū ga guxūma ga tórū pecadugū. ¹⁴ Rū noxri rū tachixe yerū tama aixcūma naga taxīnūē ga yema mugū ga Moiché tūxna āxū, rū tórū pecadugū rū yuwa tūxū nagagū. Natūrū ga Cristu rū curuchagu tórū pecaducèx nayu, rū yemaācū Tupana tūxū nayangutanūxēē ga yema tórū pecadugū. ¹⁵ Rū yexguma curuchagu nayuxgu ga Cristu, rū yexguma nixī ga Chatanáxū naporamaēxū ga Tupana. Rū yexguma nixī ga guxū ga duūxūgūpēxewa Chatanáxū naxānexēēxū űoma wūxi i churaragūarū āēxgacū i norū uwanū i nūxū naporamaēxūxū naxānexēēxūrūū.

Name nixī i naxcèx tadaugū i ngēma mexūgū i daxūguxū i naānewa ngēxmagūxū

¹⁶ Rū űuxma rū taxucèxma tūxcūū pexū nixu i ngēma Yudiūgū ega woo tama naxrūū penaxūxgux. Nūmagū rū űuxre i ōnagūxicatama nangōxgū, rū űuxre i axeūxīcatama nixaxgū, rū űuxre i petaarū ngunexūgū naxauregū na ngēmaācū Tupanaxū yacuēxūūgūxūcèx. Rū nangēxma i norū peta i gucū ya taunecūgu Tupanacèx naxauregūxū rū togū i petagū i gucū ya tauemacūgu naxauregūxū. Rū nūxū nangēxma i nacūmagū na űuxācū ngūxchigarū ngunexūgū naxauregūxū. ¹⁷ Rū aixcūma yema nuxcūmaūgūxū ga Yudiūgū rū nanaxauregū ga yema nacūmagū yerū ga Cristu rū tauta űnangu ga yexguma. Natūrū i űuxma rū marū űnangu ya Cristu rū tórū pecaducèx nayu. Rū űuxma rū name nixī na naga ixīnūēxū rū tama nagu ixīxū i ngēma nuxcūmaūgūxū i nacūmagū. ¹⁸ Rū tāūtāma naga pexīnūē i ngēma duūxūgū i nūxū ixugūxū na ipeyarūtauxexū ega tama daxūcūāx i orearū ngeruūgūxū picuēxūūgūgu! Nūmagū rū tama nūgū nicuēxūūgūneta rū nūgū nixugū na yangoxetūgūxū. Rū noxrūtama cuēxmaāmare nūgū nicuēxūūgū. ¹⁹ Natūrū i nūmagū rū tama aixcūma naga naxīnūē ya yima taeru ixīcū ya Cristu ya tūxū poraexēēcū rū tūxū űyaetanūxēēcū i tórū ōwa i guxāma i yixema i norū duūxūgū ixīgūxe. Rū nūma ya Cristu nixī i wūxigu tūxū naxīnūēxēēxū i wūxichigū i yixema ngēma Tupana naxwèxexūrūū. ²⁰ Rū yexguma nayuxgu ga Cristu rū yexma nayu ga nuxcūmaūxū ga perū maxū, rū yexma nayarūxo ga guxūma ga nuxcūmaūgūxū ga pecūmagū i űoma i naānecūāx i duūxūgū nagu rūxīnūēxū. Rū ngēmacèx i űuxmax ű rū tūxcūū nixī i űoma i naānecūāx maxēxūrūū nagu pemaxēxū i pemax, rū tūxcūū nixī i ngēma Yudiūgūcūmagu pexīxū? ²¹ Rū nūmagū i Yudiūgū rū nūxū nixugūe rū űnagūrūgū:

“Tama name i nūxū quingōgū i ngēā, rū tama name i cunangōx i yea, rū tama name i cunayaxu i ngēma”, űnagūrūgū. ²² Natūrū guxūma i ngēma nacūmagū rū paxa tā inayarūxo erū duūxūgūarū nixīgū. Rū ngēma pexū namuxū rū duūxūgūarū mugūmare nixī. Rū ngēma pexū nangūexēēxū rū duūxūgūarū ngūxēētaemare nixī. ²³ Rū guxūma i ngēma pexū namuxū rū pexcèx namexcūraxū erū pexū naxucuxēgū na űacū pexauregūxūcèx, rū tama pegū picuēxūūgūxūcèx, rū meā pexenemaā ipecuēxgūxūcèx. Natūrū guxūma i ngēma mugū rū tama aixcūma pexū narūngūxēē na nūxū perūxoexūcèx i pexeneārū ngúchaūgū.

3

¹ Rū űuxma i pemax, rū Cristu wena maxūxūrūū rū pexū nangēxma i maxū

i ngexwacaxūxū. Rū ngēmacēx name nixī i naxcēx pedau i ngēma mexūgū i daxūguxū i naānewa ngēxmaxū i ngextá Cristu rū Tupanaārū tūgūnecūwawa írūtoxūwa rū namaā āēxgacū iyīxūwa. ² Rū name nixī i guxūguma nagu perūxīnūē i ngēma daxūguxū i naānewa ngēxmaxū i ngemaxūgū rū tama i ngēma űoma i naānewa ngēxmaxū. ³ Yerū yexguma nayuxgu ga Cristu rū yexma nayu ta ga nuxcūmaūxū ga perū maxū. Rū űuxma rū pexū nangēxma i perū maxū i ngexwacaxūxū erū Cristutanūxū pixīgū rū Tupanamēxēwa pengēxmagū. ⁴ Rū nūmatama ya Cristu nixī i pexū namaxēxēxū. Rū ngēxguma wena nūma nangoxgu, rū namaā tá pengōe, rū naxrūū tá pimexēchi.

Marū nūxū tarūxo i nuxcūmaūxū i tacūma i chixexūgū rū tanayaxu i ngexwacaxūxū i tōrū maxū

⁵ Rū űuxma rū name nixī i nūxū perūxoe i guxūma i űoma i naāneārū chixexū i pewa ngēxmaxū. Rū tama name i pemēxna naī i ngemaā pemaxē, rū tama name i petena naī ya yatūmaā pemaxē. Rū tama name i penaxū i pexeneārū ngūchaū rū bai i nagu perūxīnūēmare. Rū tama name i pexū nangūchaū i tacū rū to i chixexūgū. Rū tama name i pegūnaxīcatama penanuxchīgūchaū i guxūma i ngēmaxūgū, erū yīxema ngēma nacūma tūxū ngēxmaxē rū dūxwa namaā tatupanaāx. ⁶ Rū guxūma i ngēma chixexūgūcēx tá nixī i Tupana napoxcuexū i ngēma duūxūgū i ngēmaācū maxēxū rū tama naga Inūēchaūxū. ⁷ Rū pema ga űpa rū penaxū ga yema chixexūgū, rū yemaācū pemaxē. ⁸ Natūrū i űuxma rū name nixī i nūxū perūxoe i guxūma i ngēma na pegūchi pexaīexū, rū pegūmaā penuēxū, rū chixri pemaxēxū, rū pegūmaā peguxchīgagūxū, rū guxūma i ngēma chixexū i dexa i nūxū pixuxū. ⁹ Rū tama name i pegūmaā pidorae, erū marū īpenatēx ga nuxcūmaūxū ga pecūma rū guxūma ga yema chixexūgū ga űpa pexūgūxū. ¹⁰ Rū űuxma rū marū penayaxu i ngexwacaxūxū i perū maxū rū ngexwacaxūxū i duūxūgū pixīgū. Rū guxū i ngunexūgu rū Tupana pexū ningexwacaxūxēchīgū na yexeraācū pimexūcēx naxrūū rū yexeraācū nūxū na pecuēxgūxūcēx ya Tanatū ya Tupana ya maxū tūxna ācū. ¹¹ Rū űuxma rū Tupanacēx rū nūetama nixī ega Yudū quixīgu rū ēxna tama. Rū nūetama nixī ega ícuwiechēx-mūpēxechiraūgu rū ēxna tama. Rū nūetama nixī ega tacū rū nachīdānecūāx i duūxū quixīgu, rū ēxna tacū rū duūxū quixīgu. Rū nūetama nixī ega wūxi i coriarū duūxū quixīgu, rū ēxna taxūxearūma duūxū quixīgu. Erū űuxma rū ngēma guxūārū yexera aīxcūma tūxū mexū nixī na Cristu rū guxūārū āēxgacū yīxū rū guxāwama nangēxmaxū. ¹² Rū űuxma ya Tupana rū pexū nangechaū i pema rū pexū nadei na noxrū pixīgūxūcēx. Rū ngēmacēx name nixī i guxūguma pexū nangechaūtūmūgū i togū, rū namaā pemecūmagū, rū tauxchaācūma nūxna penaxā, rū taguma napēxewa pegū picuēxūgū. Rū ngēxguma woo tacū pemaā naxūxgux rū name nixī i yaxna namaā pexīnūē. ¹³ Rū name nixī i wūxichīgū i pema na pegūmaā yaxna pexīnūēxū. Rū ngēxguma chi texē tacū pemaā űxgux, rū name nixī i pegūxū nūxū pengechaūgū i ngēma. Rū yexgumarūū ga tōrū Cori na pexū nūxū ngechaūxūrūū, rū name nixī i togūaxū nūxū pengechaūgū. ¹⁴ Rū guxūārū yexera mexū nixī na pegū pengechaūgūxū. Erū ngēxguma aīxcūma pegū pengechaūgūgu rū aīxcūma wūxigu tā perūxīnūē, rū meā pegūmaā tá pemaxē. ¹⁵ Rū name nixī na pemaā inacūāxū i ngēma taāē i Cristu pexna āxū na ngēmaācū aīxcūma pegū pengechaūgūxūcēx. Yerū yemacēx nixī ga Tupana pexū dexū na wūxitama i duūxūgū pixīgūxūcēx rū meā wūxigu perūxīnūēxūcēx. Rū name nixī i moxē nūxna pexāgū ya Tupana. ¹⁶ Rū

name nixī i guxūguma peāēwa nangēxma i Cristuarū ore rū taāēācūma naga pexīnūē. Rū name nixī i meā peāēxū pecuāācūma namaā pegū pengúexēē rū pegū pixucuxēgū na ngēmaācū pegūaxū penangúchaūxēēxūcēx. Rū name nixī i aixcūma Tupanana moxē pexāgūācūma nagu pewiyaegū i nagúxūraūxū i norū wiyaeğū. ¹⁷ Rū guxūma i ngēma pexūxū rū nūxū pixuxū rū name nixī i tórū Cori ya Ngechuchuégagu penaxū. Rū name nixī i ngēmaācū Ngechuchuégagu Tanatū ya Tupanana moxē pexāgū.

Tupana nanaxwēxe na meā namaxēxū i duūxūgū i Cristuaxū yaxōgūxū

¹⁸ Pa Ngexūgū i Ātegūxūx, rū name nixī i petega pexīnūē. Erū woetama ngēma nixī i mexū na penaxūxū erū tórū Cori ya Cristuarū duūxūgū pixīgū. ¹⁹ Pa Yatūgū i Āmaxgūxūx, rū name nixī i ngīxū pengechaūgū i pemēxgū. Rū tama name na ngīmaā pechixecūmagūxū. ²⁰ Pa Buxūgūx, rū name nixī i guxūwama penatū rū peega pexīnūē, erū ngēma nixī i namaā nataāēxū ya tórū Cori. ²¹ Pa Papāgūx, rū tama name i penanuēxēē i pexacūgū. Erū ngēxguma ngēmaācū penaxūxgux rū ngūrūāchi tá nūxū nawēxtūmū i ngēma namaā nūxū pixuxū. ²² Pa Duūxūgūx i Ixāārū Coriāxgūxūx, rū name nixī i guxūwama naga pexīnūē i perū corīgū i űoma i naānewa pemaā icuēxgūxū. Rū tama name i pexū nadaugūguxicatama meā pepuracūe na ngēmaācū penataāēxēēxūcēx. Natūrū name nixī i mexū i perū ngúchaūmaā guxūguma meā pepuracūe erū tórū Corixū pemuūē. ²³ Rū guxūma i ngēma perū puracū i pexūxūwa rū name nixī i perū ngúchaūmaā penaxū űoma tórū Cori ya Cristuaxū pepuracūexūrū rū tama i duūxūgūaxū. ²⁴ Rū marū nūxū pecuēx rū daxūgūxū i naānewa rū tórū Cori ya Cristu tá pexna nanaxā i perū āmare i maxū i taguma gūxū. Erū yima Cristu ya aixcūma perū Cori ixīcūaxū nixī i pepuracūexū. ²⁵ Natūrū yīxema chixexū űxe rū tá ta tanayaxu i tūmaārū natanū naxcēx i ngēma chixexū i taxūxū, rū aixcūma Tupana tá tūxū napoxcu. Erū Tupanapēxewa rū guxūma i duūxūgū rū nawūxīgu, rū taxucūrūwama texē Tupanachēxwa tiña ega chixexū taxūxgux.

4

¹ Rū pemax, Pa Corīgūx, rū name nixī i perū duūxūgūmaā pemecūmagūxū, rū tama penawomūxēēxū. ¡Rū nūxna pecuēxāchie na pema rū ta pexū nangēxmaxū ya perū Cori ya daxūgucū! ² ¡Rū guxūguma peyumūxēgū, rū pexuāēgū na tama chixexūgu peyixūcēx! ¡Rū Tupanana moxē pexāgū! ³ ¡Rū toxcēx rū ta peyumūxēgū na Tupana toxū natauxchaxēēxūcēx na nūxū tixūxūcēx i norū ore i mexū, rū meāma duūxūgūmaā nūxū tixūxūcēx i ngēma ore ga noxri tama nūxū nacuēxgūxū i Cristuchiga! Rū ngēma orecēx nixī i űuxma ichapoxcuxū. ⁴ Rū chanaxwēxe i chauxcēx peyumūxēgū na meā duūxūgūcēx chanangoxēēxū i ngēma ore, erū ngēma nixī i mexū na chanaxūxū. ⁵ ¡Rū meā pemaxē napēxewa i ngēma duūxūgū i tama yaxōgūxū! ¡Rū űuxma na pexū natauxchaxū, rū yoxni paxa penaxūx i Tupanaārū puracū! ¡Rū taxū i perūchomarexū! ⁶ Rū ngexguma togū i duūxūgūmaā pidexagūgu, rū name nixī i penataāēxēē namaā i ngema dexa i namaā nūxū pixuxū. ¡Rū ngemaācū meā penangaxū i ngema pexna cēxū nachiga i perū ōl.

Pauru nanaguxēē ga norū popera rū wenaxārū yema duūxūgūxū narūmoxē

⁷ Rū nūma ya taeneē ya Tíquicu ya nūxū ingechaūgūcū rū aixcūma choxū narūngūxēē rū wūxīgu chomaā Cori ya Tupanacēx napuracū. Rū nūma tá pemaā nūxū nixu i chauchiga. ⁸ Rū űuxma rū petanūwa chanamu na pexū

nataãẽxẽxũcèx rü pemaã nüxũ yaxuxũcèx na ñuxãcü toxũ nangupetũxũ i tomãx. ⁹ Rü Tíquicumaã petanũwa chanamu i Onéchimü ya taeneẽ ya nüxũ ingechaũgücü ya aixcüma meã Tupanaãrũ puracü ücü. Rü nüma rü petanũxũ nixĩ. Rü nümagü tá nixĩ i pemaã nüxũ yaxugũxũ na ñacü ngupetũxũ i núma. ¹⁰ Rü pexũ narümoxẽ i Aritácu i wüxigu chomaã poxcuxũ. Rü ngëxgumarũü ta pexũ narümoxẽ i Marcu i Bernabéeneẽ ixixũ. Rü marü pemaã nüxũ chixu i Marcuchiga na meã penayauxgũxũcèx i ngëxguma petanũwa nanguxgu. ¹¹ Rü ngëxgumarũü ta pexũ narümoxẽ ya taeneẽ ya Ngechuchu ya Ixaixcümacügu äegacü. Rü ngëma tomaẽxpũx i yatügu rü ngëxĩcatama nixĩ i Yudíugü i yaxögũxũ i wüxigu chomaã puracüxũ i Tupanaãrũ puracüwa. Rü nümagü rü poraãcü choxũ nataãẽxẽgü. ¹² Rü ngëxgumarũü ta pexũ narümoxẽ i Epáparu. Rü nüma rü petanũxũ nixĩ, rü aixcüma nanaxü i Cristuarü puracü. Rü nüma rü norü yumüxẽwa rü guxũguma Tupanaxũ nacèxũ pexcèx na aixcüma meã pemaxẽxũcèx rü peyaxögüamaxũcèx rü aixcüma penaxũxũcèx i ngëma Tupana naxwèxexũ. ¹³ Rü choma rü marü nüxũ chadau rü pemaã nüxũ chixu i ñuxãcü Epáparu poraãcü pexcèx napuracü rü naxcèx napuracü i ngëma taeneẽgü i Laodichéaarü ñanewa rü Iráporiarü ñanewa ngëxmagũxũ. ¹⁴ Rü Luca ya duturu ixĩcü ya nüxũ ingechaũgücü, rü pexũ narümoxẽ. Rü ngëxgumarũü ta pexũ narümoxẽ i Dema. ¹⁵ ¡Rü chauégagu nüxũ perümoxẽgü i taeneẽgü i Laodichéawa ngëxmagũxũ! ¡Rü ngëxgumarũü ta nüxũ perümoxẽgü i Nifa rü guxũma i taeneẽgü i yaxögũxũ i napatawa ngutaquëxegũxũ! ¹⁶ Rü ngëxguma marü nüxũ pedaumatüguwena i ñaã popera, rü chanaxwèxe i Laodichéawa penamu na ngemacũãx i taeneẽgü rü ta nüxũ nadaumatügũxũcèx. Rü ngëxgumarũü ta i ngëma popera i Laodichéawa chamuxũ, rü ngëxguma pexũtawa nanguxgu rü chanaxwèxe i nüxũ pedaumatügü. ¹⁷ Rü chanaxwèxe i Ariquípumaã nüxũ pixu, rü ñapegügü nüxũ:

“¡Rü meã napuracü rü yanguxẽẽ i ngëma puracü i tórü Cori cuxna ãxũ!” ñapegügü nüxũ. ¹⁸ Choma i Pauru rü choxmëxmaãtama pexcèx chanaxümatü i ñaã chorü moxẽ. ¡Rü nüxna pecuèxãchie na chapoxcuxũ! Rü chanaxwèxe i Tupana pexũ narüngũxẽẽ.

Rü nuãma pexna,
Pauru

NŪXĪRAŪXŪ GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Techarónicawa yexmagŭxŭ

¹ Pa Toeneēgŭ i Techarónicawa Ngēxmagŭxŭ i Tanatŭ ya Tupana rŭ Tórŭ Cori ya Ngechuchu ya Cristuarŭ Duŭxŭgŭ Ixŭgŭxŭx, choma i Pauru rŭ namaā i taeneē i Chiribānu rŭ Timutéu nixŭ i pexcēx tanaxŭmatŭxŭ i ñaā popera. Rŭ tanaxwēxe i Tanatŭ ya Tupana rŭ tórŭ Cori ya Ngechuchu ya Cristu pexŭ narŭngŭxēē rŭ pexŭ nataāēxēē.

Meāma nayaxōgŭ ga yema Techarónicawa yexmagŭxŭ rŭ yemaācŭ wŭxi ga cuēxruŭl ga mexŭ nixŭgŭ

² Rŭ torŭ yumŭxēwa rŭ guxŭguma pexna tacuēxāchigŭ, rŭ pexcēx Tupanana moxē taxā. ³ Rŭ guxŭguma i ngēxguma Tanatŭ ya Tupanaāā tidexagŭgu, rŭ taguma nüxŭ itayarŭngŭmaē na ñuxācŭ meā peyaxōgŭācŭma penaxŭxŭ i Tupanaārŭ puracŭ, rŭ ñuxācŭ nüxŭ pengechaŭgŭācŭma togŭxŭ perŭngŭxēēxŭ. Rŭ taguma nüxŭ itayarŭngŭmaē na ñuxācŭ aixcŭma meā ipenangŭxēēxŭ ya tórŭ Cori ya Ngechuchu ya Cristu rŭ ngēmacēx yaxna namaā pexŭnŭē i ngēma ngŭxŭ i ñuxma pingexŭ. ⁴ Pa Chaueneēgŭx, Tupana pexŭ nangechaŭ, rŭ nüxŭ tacuēx rŭ nŭmatama nixŭ ga pexŭ nadexŭ. ⁵ Rŭ yexguma pemaā nüxŭ tixuxgu ga Tupanaārŭ ore i tŭxŭ maxēxēēxŭ, rŭ tama toechama tidexagŭmare, yerŭ Tupanaāē i Ūñexŭ toxŭ narŭngŭxēē na norŭ poramaā pemaā nüxŭ tixuxŭ. Rŭ meā nüxŭ tacuāācŭma pemaā nüxŭ tixu ga yema ore yerŭ toēwatama nüxŭ tacuēx na aixcŭma yŭxŭ. Rŭ pematama nüxŭ pecuēx ga ñuxācŭ meā pepēxewa na tamaxēxŭ ga yexguma na yemaācŭ pexŭ tarŭngŭxēēgŭxŭcēx. ⁶ Rŭ pema rŭ meāma penaxŭgŭ ga yema pexŭ tangŭxēēxŭ rŭ yema tŭxŭ nangŭxēēxŭ ga tórŭ Cori ya Ngechuchu. Rŭ Tupanaāē i Ūñexŭ pexŭ taāēxēēācŭma penayauxgŭ ga yema ore ga woo yemacēx poraācŭ ngŭxŭ na pingegŭxŭ. ⁷ Rŭ yemaācŭ ga pema rŭ wŭxi ga cuēxruŭl ga mexŭ pixŭgŭ naxcēx ga guxŭma ga yema yaxōgŭxŭ ga Machedóniāānewa rŭ Acayaanewa yexmagŭxŭ. ⁸ Rŭ yema na peyaxōgŭxŭgagu rŭ tórŭ Cori ya Ngechuchuarŭ ore rŭ guxŭwama ninguchigŭ. Rŭ ngēmacēx i ñuxma rŭ Machedóniāānewa rŭ Acayaanewa rŭ guxŭwama nüxŭ nacuēxgŭ na ñuxācŭ meā Tupanaāxŭ peyaxōgŭxŭ. Rŭ ngēmacēx marŭ taxucēxma tŭxcŭi i toma rŭ namaā nüxŭ tixu i ngēma ore i mexŭ i pechiga. ⁹ Erŭ nŭmagŭtama i ngēma duŭxŭgŭ rŭ marŭ nüxŭ nixugŭgŭ ga ñuxācŭ ga pema rŭ meā toxŭ na peyauxgŭxŭ ga yexguma petanŭwa taxŭxgu. Rŭ nüxŭ nixugŭgŭ ta ga ñuxācŭ nüxŭ na perŭxoexŭ ga perŭ tupananetachicŭnēxāgŭ na Tupanaxŭchi ya maxŭcŭ rŭ ixaixcŭmacŭwe perŭxŭcēx rŭ nüxŭ pepuracŭxŭcēx. ¹⁰ Rŭ nüxŭ nixugŭgŭ ta na ñuxācŭ aixcŭma ipenangŭxēēxŭ na wenaxārŭ daxŭwa ne naxŭxŭ ya Ngechuchu ya Tupana Nane ga yuwa ínadaxēēācŭ. Rŭ yima Ngechuchu nixŭ ya tŭxŭ íngŭxŭxēēcŭ nüxna i ngēma poxcu i āucŭmaxŭ tá íngŭxŭ.

2

Pauruarü puracü ga Techarónicawa

¹ Pa Chaueneëgüx, rü pematama nüxü pecuèx rü tama natüçèxmare nixi na pexütawa taxixü. ² Rü pema nüxü pecuèx rü naxüpa ga pexütawa na tangugüxü rü chixri tomaã nachopetü ga Pirípucüãxgü rü tomaã naguxchigagü. Natürü Tupana toxü narüngüxëë na pemaã nüxü tixuxüçèx ga norü ore i tüxü maxëxëxü. Rü yemacèx tama tamuüëãcuma pemaã nüxü tixu ga yema ore woo ga torü uwanügü rü poraãcü toxü na naguxchaxëëgüãxü. ³ Rü yexguma pemaã nüxü tixuxgu ga yema ore, rü tama itatüëãcuma pemaã nüxü tixu. Rü tama chixexü pemaã taxügüchaüãcuma rü tama pexü tawomüxëëgüchaüãcuma pemaã nüxü tixu ga yema ore. ⁴ Yerü Tupana nixi ga toxü unetacü rü toxü mucü na pemaã nüxü tixuxüçèx ga norü ore i mexü i tüxü maxëxëxü. Rü yemacèx Tupana naxwëxexüãcuma pemaã nüxü tixu ga yema ore. Rü tama duüxügüxümare na tataãëxëëgüxüçèx pemaã nüxü tixu, natürü nüxü tixu na Tupanaxü tataãëxëëgüxüçèx. Rü nüma ya Tupana nixi i tüxü nacuáxü rü tüxü nadauxü rü nangugüãxü i ngëma nagu rüxüñüxü. ⁵ Rü pema nüxü pecuèx rü taguma pepëxewa pexü ticuèxüügü na toga pexüñüxüçèx, rü taguma pexü tawomüxëëgü na ngixü tayauxgüxüçèx ga perü dïeru. Rü Tupana nixi ya toxü daucü na taguma yemaãcü na tanaxüxü. ⁶ Rü taguma naxcèx tadaugü na duüxügü toxü icuèxüügüxüçèx, rü woo i pema rü bai i togü i duüxügü. ⁷ Rü woo Cristutama toxü namu na yaxögüxüãrü ãëxgacügü na tixigüxü natürü tama ñoma wüxi ga ãëxgacürüü pepewa tixigü. Natürü meãmare pemaã itacuèx, ñoma wüxi i mamá i ngixäcügüna meã dëuxcürüü pemaã tixigü. ⁸ Rü poraãcü pexü tangechaü, rü yemacèx pemaã nüxü tixu ga Tupanaãrü ore. Rü tama yemaxicatama pexna taxäxchaü ga yexguma. Natürü marü itamemare ta ga pexcèx na tayuexü, yerü poraãcü pexü tangechaü. ⁹ Pa Chaueneëgüx, pema nüxü pecuèx ga ñuxäcü poraãcü na tapuracüexü na torü ñnacèx tataxegüxüçèx. Rü ngunecü rü woo chütacü tapuracü na taxúeaxüma wüxi ga guxchaxü tixigüxüçèx ga yexguma petanüwa tayexmagügu rü pemaã nüxü tixuxgu ga Tupanaãrü ore. ¹⁰ Pa Duüxügü i Tupanaãxü Yaxögüxü, pema nixi ga toxü pedaugüxü rü Tupana rü ta toxü nadau ga ñuxäcü meã na tamaxëxü ga petanüwa, rü ñuxäcü taxüma ga chixexü na taxüxü ga yexguma. ¹¹ Rü pema nüxü pecuèx ta ga ñuxäcü pexü na tanangüchaüxëxü. Rü yexguma pengexhaügügu, rü pexü tataãëxëëgü ñoma wüxi i papá i naxäcügüxü taãëxëëgüxüãrü. ¹² Rü ñuxma na Tupanaãrü pixigüxü, rü pexü taxucüxëgü na meã naxcèx pemaxëxü. Rü nüma nixi i pexcèx nangemaxü na ngextá ãëxgacü iyixüwa pengugüxüçèx na ngema mexüwa pengëxmagüxüçèx. ¹³ Rü ngëmacèx guxüguma pexcèx Tupanaana moxë taxá, yerü yexguma noxri nüxü pexüñüëgu ga yema norü ore ga pemaã nüxü tixuxü, rü meã penayauxgü, yerü nüxü pecuèxgü rü aixcuma Tupanaãrü ore nixi rü tama duüxügüãrü oremare nixi. Rü yema ore nixi ga naxüchicüüxü ga perü maxü ga yexguma peyaxögügu. ¹⁴ Pa Chaueneëgüx, nüxü tacuèx na ñuxäcü ngüxü pingegüxü yerü petanüxügütama pexchi naxaie rü chixri pemaã nachopetü. Natürü yemaãcütama nüxü nangupetü ga Tupanaãrü duüxügü ga Ngechuchu ya Cristuaxü yaxögüxü ga Yudeaanewa yexmagüxü. Yerü natanüxügütama ga Yudügü rü chixri namaã nachopetü. ¹⁵ Rü yema Yudügü nixi ga tóru Cori ga Ngechuchuxü imëxgüxü, yexgumarü ga norü oxigü rü nuxcumaügüxü ga Tupanaãrü orearü uruügüxü na nadëixürü. Rü yema Yudügü nixi ga towe ingëxütanüxü. Rü Tupanaãrü

rū guxū i duūxūgūmaā narūxuwānūgū. ¹⁶ Rū ngēxguma ngēma duūxūgū i tama Yudiūgū ixīgūxūmaā nūxū tixuxchaūgu i Tupanaārū ore na nūmagū rū ta nūxū nangēxmagūxūcēx i maxū, rū ngēma Yudiūgū rū toxna nanachūxu. Rū ngēmaācū i ngēma Yudiūgū rū poraācūxūchima chixexū naxūgū. Rū ngēmācēx i űuxma rū dūxwa marū nūxna nangu i ngēma Tupanaārū poxcu i āucūmaxūchixū.

Pauru rū nūxū nangūchaū na wenaxārū natanūwa naxūxū ga yema yaxōgūxū ga Techarónicawa

yexmagūxū

¹⁷ Pa Chaueneēgūx, yexguma pexna ítxīxguwena, rū woo tama pexūtawa na tayexmagūechaxū, natūrū guxūguma pegu tarūxīnūē, rū poraācū toxū nangūchaū na pexūtawa taxīxū na wenaxārū pexū ítayadaugūxūcēx. ¹⁸ Rū aixcūma ngēma taxīxchaū. Rū chomatama i muēxpūxcūna rū chanaxwēxe na ngēma pexūtawa taēx chaxūūxūdegaxū natūrū ngoxo i Chataná rū guxūguma toxū nanaguxchaxēē na tama ngēma taxīxūcēx. ¹⁹ Natūrū pexū ítayadaugūchaūāma erū ngēxguma wenaxārū nūma naxūxgu ya tórū Cori ya Ngechuchu ya Cristu rū ¿tēcūcēx tá nixī i Tupanapēxewa tataāēgūxū i tomāx? Rū aixcūma pewa tá nixī i ítananguxēēxū na tomaā nataāēxū ya Tupana. Rū pema tá nixī i torū taāē pixīgūxū. Rū pegagu tá nixī i aixcūma togūmaātama tataāēgūxū i napēxewa. ²⁰ Rū ngēmāācū pegagu nixī i togūmaātama tataāēgūxū, rū pema nixī i torū taāē pixīgūxū.

3

¹ Rū yema na taxuacūma űuxācū wenaxārū petanūwa na chaxūxū, rū dūxwa nāgu charūxīnū na Atenagutama na charīxāxūxū. ²⁻³ Rū pexūtawa chanamu ga taeneē ga Timutéu na pexū íyadauxūcēx. Erū nūma nixī i Tupanaārū puracūtanūxū i wūxigu namaā tapuracūexū na tanaxunagūxūcēx i ngēma ore i mexū i Cristuchiga. Rū ngēma petanūwa chanamu na pexū nangūxēēxūcēx na yexeraācū peyaxōgūxūcēx rū aixcūma petaāēgūxūcēx rū ngēmaācū taguma texē i petanūwa nūxū rūxoxūcēx ega űacū rū guxchaxū pexū ngēxmagu. Erū pematama marū nūxū pecuēx na guxāma i yixema na yaxōgūxū rū ngūxū tá tingegū. ⁴ Rū yexguma petanūwa tayexmagūgu rū marū pemaā nūxū tixu na ngūxū tá pexū űpetūxū. Rū pema marū nūxū pecuēx na aixcūma yemaācū pexū nangupetūxū. ⁵ Rū yemācēx ga yexguma marū tama namaā chaporagu ga yema tama paxa pechigaxū na chacuáxū, rū yemācēx dūxwa Timutéuxū yēma petanūwa chamu na pexna yaçaxūcēx ngoxi meā ípeyaxōgūama i Tupanaārū ore. Yerū chaxoegaāē rū bexmana ngoxo i Chataná rū chixexūgu pexū nayixēē, rū chi ngēmaācū yixīgu, rū natūcēxmamare chi nixī ga pemaā nūxū tixuxū ga Tupanaārū ore. ⁶ Natūrū űuxma na ínanguxū i Timutéu na petanūwa ne naxūxū, rū mexū i ore i pechiga ngēma ne nange. Rū tomaā nūxū nixu na űuxācū meā peyaxōgūxū, rū űuxācū guxāma meā pegū pengechaūgūxū. Rū tomaā nūxū nixu ta na űuxācū guxūguma toxū pengechaūgūācūma togu perūxīnūēxū, rū űuxācū poraācū wena toxū pedaugūchaūxū rū ngexgumarūxū ta i toma rū toxū nangūchaū na wena pexū tadaugūchaūxū. ⁷ Rū ngēmācēx, Pa Chaueneēgūx, rū woo guxchaxū toxū na ngēxmaxū rū ngūxū na tingegūxū, rū poraācū toxū nataāēxēē i ngēma pexū na tacuāchigaxū na meā ípemaxēxū rū meā peyaxōgūamaxū. ⁸ Rū űuxma na nūxū tacuāchigaxū na aixcūma meā tórū Coriāxū peyaxōgūamaxū, rū poraācū tataāēgū. ⁹ ¿Rū űuxācū tá Tupanana

moxē taxā naxcēx i ngēma taāē i taxū i toxna pexāxū? Erū aixcūma pegagu nixī i toxū nangēxmaxū i wūxi i taāē i taxū i napēxewa. ¹⁰ Rū ngunecū rū chūtacū rū tayumūxēgū, rū Tupanana naxcēx tacagū na petanūwa toxū nawoeguxēēxūcēx na wena pexū tadaugūxūcēx rū pexū tarūngūxēēgūxūcēx na yexeraācū nūxū peyaxōgūxūcēx. ¹¹ Rū poraācū tanaxwēxegū na Tanatū ya Tupana rū tōrū Cori ya Ngechuchu ya Cristu toxū natauxchaxēēxū na wena petanūwa itayadaugūxūcēx. ¹² Rū tanaxwēxegū na tōrū Cori ya Ngechuchu pexū rūngūxēēxū na yexeraācū pegū pengechaūgūxūcēx rū guxū i duūxūgūxū na pengechaūgūxūcēx, ngēxgumarūū i toma rū poraācū pexū na tangechaūgūxūrūū. ¹³ Rū tanaxwēxegū na tōrū Cori ya Ngechuchu pexū rūngūxēēxū na peāēwa rū aixcūma meā peyaxōgūxūcēx rū norū duūxūgū i aixcūma mexūgū na pixīgūxūcēx rū na nataxuxūcēx i perū pecadugū i napēxewa ya Tanatū ya Tupana i ngēxguma wena nūma naxūxgu ya tōrū Cori ya Ngechuchu ya Cristu yamaā i guxūma i norū duūxūgū. Rū tanaxwēxe na ngēmaācū yīxū.

4

Maxū i Tupanaxū taāēxēēxūchiga

¹ Rū űuxma Pa Chaueneēgūx, rū tōrū Cori ya Ngechuchuēgagu pexū tacēēxū rū pexū tamu na guxūguma Tupanacēx meā pemaxēxū yema pexū tangūxēēxūrūū rū űuxma marū penaxūxūrūū. ² Pema rū marū nūxū pecuēx ga yema torū ucuxēgū ga tōrū Cori ya Ngechuchu toxū muxū na pexū tangūxēēxūcēx. ³ Rū Tupana nanaxwēxe na aixcūma namexū i perū maxū rū naxcēxicatama na pemaxēxū. Rū tama name i chixri pemaxē i napēxewa rū to i ngexūgūmaā pengēāēgūmare. ⁴ Rū wūxichigū tanaxwēxe na aixcūma tūmamēxū tangechaūxū, rū ngīmaāxīcatama na tamaxūxū. ⁵ Rū tama name i ngīxū na pecuāxchaūmarexūcēx ngīmaā pexāmēx i wūxi i nge erū ngēmaācū namaxē i ngēma duūxūgū i tama Tupanaāxū yaxōgūxū. ⁶ Rū tama name i texē ngīmaā tamaxū i naxmēx ya tūmaēneē. Erū yexgumarūū ga marū pemaā nūxū tixuxūrūū, rū Tupana tá poraācū tūxū napoxcu ya guxāma ya yīxema ngēmaācū maxēxē. ⁷ Erū Tupana tūxū nade na meā imaxēxūcēx rū tama chixexū ixūgūxūcēx. ⁸ Rū ngēmacēx ega texē tama naga űnūgu i űāā nguxēētaegū, rū pemaā nūxū chixu rū tama wūxi i duūxūga nixī i ngēma nūxū taxoxū, natūrū Tupanagatama nixī i nūxū taxoxū. Rū guma nixī ga pexna namucū ga Naāē i Ūūnēxū. ⁹ Rū ngēma na pegū pengechaūgūxūchiga, rū taxucēxma pexcēx chanaxūmatū i poperawa. Yerū Tupanatama marū pexū nangūxēē i ngēma na űuxācū aixcūma pegū pengechaūgūxū. ¹⁰ Rū aixcūma nixī i guxūguma meā nūxū pengechaūgūxū i guxūma i taeneēgū i Machedóniānēwa ngēxmagūxū. Natūrū, Pa Toeneēgūx, pexū tacēēxūgū na yexeraācū meā nūxū pengechaūgūxūcēx. ¹¹ ¡Rū meā pegū pengechaūgū, rū pexrūtama maxūgu perūxūnūē, rū tama i togārū maxūgu! ¡Rū pematama naxcēx pepuracū i perū ngēmaxūgū yema marū pemaā nūxū tixuxūrūū! ¹² Rū ngēxguma ngēmaācū pemaxēgu, rū ngēma duūxūgū i tama yaxōgūxū rū tá pexū nangechaūgū, rū taxuūtāma pexū nataxu.

űuxācū tá nixī i ngēxguma nataegugu ya tōrū Cori

¹³ Pa Chaueneēgūx, rū űuxma rū tá pexū nūxū chacuēxēē i ngexta tá naxīxū i ngema yaxōgūxū i yuexū na ngemaācū tama pengechaūgūxūcēx naxrūxū i ngema tama nūxū cuēxgūxū na wena tá namaxēxū i ngema yuexū.

14 Erü yixema na yaxōgūxū na nayuxū rü wena namaxūxū ga Ngechuchu, rü ngēxgumarūū ta tayaxōgū na Tupana tá ínadagūxēēxū i guxūma i ngēma Ngechuchuxū yaxōgūācūma yuexū. 15 Rū ngēmacēx pemaā nūxū tixu i ngēma ore ga tōrū Cori ya Ngechuchu namaā nguxēētaexū. Rū ngēxguma wena nūma naxūxgu ya tōrū Cori ya Ngechuchu rü yixema na imaxēxū i ñoma i naānewa rü tāūtama yixira napēxe taxī i ngēma yuexū. 16 Erü nūmatama ya Cori ya Ngechuchu rü daxūwa tá inarūxī, rü tá nangēxma i wūxi i naga i taxū i daxūwa inaxūxū i tūxū muxū, rü tá nūxū taxīnūē i Tupanaārū orearū ngeruūgūarū āēxgacū i tagaācū daxūwa icagūxū, rü tá yacuegūxū ya Tupanaārū corneta. Rū ngēxguma i ngēma yuexū i Cristuaxū yaxōgūxū rü tá ínarūdagū. 17 Rū ngēmawena i yixema na imaxēxū rü Tupana tá wūxigu caixanexūgu tūxū nigagū namaā i ngēma duūxūgū i yuwa írūdagūxū. Rū ngēmaācū tá daxūgu tōrū Cori ya Ngechuchuxū tayangaugū na guxūgutáma naxūtawa ingēxmagūxūcēx. 18 Rū ngēmacēx chanaxwēxe i ñāā oremaā pegū petaāēxēēgū.

5

1 Natūrū, Pa Chaueneēgūx, rü ngēma norū ngunexū rü tauncē i tá nagu nangupetūxū i ngēma pemaā nūxū chixuxū, rü taxucēxma pexcēx chanaxūmatū i ngēmachiga. 2 Erü pematama meā nūxū pecuēx rü ngēma ngunexū i taxūema nagu ínanguxēēxūgu tá nixī i ínanguxū ya tōrū Cori ya Ngechuchu. Rū ñoma wūxi i ngītēxáxū i ngūrūāchi chūtacū ínguxūrūū tá nixī. 3 Rū ngēxguma duūxūgū nagu írūxīnūēgu na guxūma na mexū rü taxūma na nūxū ūpetūxū, rü ngēma ngunexūgūgu rü tá ngūrūāchi nagux i guxūma. Rū ñoma wūxi i ngecū i āxācūcū rü ngūrūāchi ngīxācūmaā ngūxnecacūrūū tá nixī na taxūema naxchaxwa íñaxū i ngēma. 4 Natūrū pemax, Pa Chaueneēgūx, rü marū meāma nūxū pecuēx i Cristuarū nguchiga. Rū ngēmacēx taxucēxma ngūrūāchi pexū ínayabaixgū ya Cori ya Ngechuchu ñoma wūxi i ngītēxáxū tūxū íbaixgūxūrūū. 5 Erü guxāma i pema rü Tupanaārū duūxūgū pixīgū, rü ngēmacēx ngóonexūwa pengēxmagū rü meāma nūxū pecuēx na ñuxācū meā pemaxēxū. Rū yixema rü tama Chatanáārū duūxūgū tixīgū, rü ngēmacēx tama ēānexūwa tangēxmagū rü tama tanaxū i ngēma chixexū i ēānexūwa ūxū. 6 Rū ngēmacēx tama name i taechita tamaxēmare naxrūū i ngēma duūxūgū i tama yaxōgūxū. Rū name nixī i taxuāēgū, rü meā taāēgu tarūxīnūē. 7 Erü ngēma duūxūgū i naēchitamare maxēxū rü ñoma duūxūgū i chūtacū peexūrūū nixīgū. Rū ngēma duūxūgū i axegūxū rü chūtacū nixī i nūgū nangāxēēēxū. 8 Natūrū i yixema rü ngóonexūwa tangēxmagū, rü ngēmacēx tanaxwēxe i guxūguma taxuāēgū. Rū name nixī i aixcūma meā Tupanaāxū tayaxōgū, rü yigū tangechaūgū, rü meā ítananguxēē na Tupana tūxna naxāxūcēx i ngēma maxū i taguma gūxū. Rū ngēxguma ngēmaācū imaxēgu, rü ngēmaācū tá yigū ítapoxū i ngēxguma Chataná chixexūgu tūxū yixēēchaūgu. 9 Erü Tupana rü tama tūxū nade na tūxū napoxcuxūcēx, natūrū tūxū nade na tōrū Cori ya Ngechuchu ya Cristugagu nayauxgūxūcēx i maxū i taguma gūxū. 10 Rū Ngechuchu ya Cristu rü taxcēx nayu na wūxigu namaā imaxēxūcēx i daxūgūxū i naānewa. Rū nūetama ega woo marū iyuyane ínanguxgu rü ēxna imaxēyane ínanguxgu, erū daxūgūxū i naānewa rü wūxiwa tá namaā tamaxē. 11 Rū ngēmacēx, Pa Chaueneēgūx, rü name nixī i wūxichīgū pegū petaāēxēēgū rü pegū peporaexēē i perū ōwa ngēxgumarūū i ñuxma na marū ípenaxūgūxū.

Pauru rü nayaxucūxēgū ga yema yaxōgūxū

12 Pa Chaueneēgūx, pexū tacèxūgū na nūxū pengechaūgūxūcèx i ngēma taeneēgū i petanūwa puracūexū rū pemaā icuèxgūxū rū pexū ngúexēēxū i Cori ya Ngechucharū ore. 13 Rū name nixī i namaā petaāēgū rū aixcūma meā nūxū pengechaūgū i ngēma taeneēgū, erū nūmagū nixī i pexū nangūxēēgūxū. Rū name nixī i pegū pengechaūgūācūma pemaxē. 14 Rū pemaā nūxū tixu ta na penaxucūxēgūxū i ngēma duūxūgū i oexū i tama pura-cūechaūxū. ¡Rū nūxū penangūchaūxēēgū i ngēma duūxūgū i marū nūxū rūxoechaūxū na yaxōgūāxū! ¡Rū nūxū perūngūxēēgū i ngēma duūxūgū i turaexū i norū ōwa! ¡Rū name nixī i yaxna namaā pexīnūē i guxūma i ngēma taeneēgū! 15 Rū ngēxguma texé chixexū pemaā ūxgu, rū tama name i chixexūmaā penataeguxēē. ¡Natūrū name nixī i naxcèx pedau na guxūguma mexū pexūgūxū i pegūtānūwa rū ngema togūtānūwa rū ta! 16 Rū name nixī i guxūguma petaāēgū. 17 ¡Rū guxūguma peyumūxēgū! 18 ¡Rū woo tacū pexū ngupetūgu, rū Tupanana moxē pexāgū! Erū ngēmaācū nanaxwèxe ya Tupana na pemaxēxū i pema i Ngechuchu ya Cristuarū duūxūgū na pixīgūxū. 19 Rū tama name i nūxū pexoe i Tupanaāē i Ūūnexū. 20 Rū tama name i nūxū pexoe i Tupanaārū ore ega texéwa pemaā yadeaxgu ya Tupana. 21 Natūrū name nixī i meāma penangugū i guxūma i oregū na nūxū pecuáxūcèx rū ngoxi aixcūma yīīxū i ngēma ore rū ēxna tama. ¡Rū ngēma ore i aixcūma mexūxīcatama pixōgū! 22 ¡Rū nūxna pixīgachi i nagūxūraūxū i chixexūgū! 23 Rū chanaxwèxe i nūmatama ya Tupana ya tūxū taāēxēēcū pexū imexēē na aixcūma napēxewa pimexūcèx. Rū chanaxwèxe i guxūwama pexna nadau i peāēwa rū pexenewa na nataxūcèx i tacū i perū chixexū i ngēxguma wenaxārū nūma naxūxgu ya tórū Cori ya Ngechuchu ya Cristu. 24 Rū nūma ya Tupana ya pexū decū rū nixaixcūma na yanguxēēāxū i guxūma i ngēma tamaā inaxunetaxū.

Pauru rū wenaxāri yema duūxūgūxū narūmoxē rū naxcēx ínaca na Cori ya Ngechuchu ya Cristu meā nūxū rūngūxēēxū ga

yema yaxōgūxū

25 Pa Chaueneēgūx, ¡Toxcèx peyumūxēgū! 26 Rū chanaxwèxe i chauégagu nūxū perūmoxēgū i guxūma i taeneēgū. 27 Rū Cori ya Ngechuchuégagu pexū chamu na guxū i taeneēgūpēxewa na nūxū pedaumatūxū i ñāā popera i pexcèx ngema chamuxū. 28 Rū chanaxwèxe i tórū Cori ya Ngechuchu ya Cristu pexū narūngūxēē i guxūma i pemax.

Rū nuāma pexna,
Pauru

NORÜ TAXRE GA POPERA GA TECHARÓNICAWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Techarónicawa yexmagüxü

¹ Pa Techarónicawa Ngëxmagüxü i Toeneëgü i Yaxögüxü i Tanatü ya Tupana rü törü Cori ya Ngechuchu ya Cristuarü Duüxügü Ixigüxüx, choma i Pauru rü taeneë i Chiribánu rü Timutéu nixi i pexcëx tanaxumatüxü i ñaã popera. ² Rü tanaxwëxe i Tanatü ya Tupana rü törü Cori ya Ngechuchu ya Cristu pexü narüngüxëë rü pexü nataäxëë.

Ngëma chixexü ügüxü rü Tupana tá nanapoxcue i ngëxguma wenaxäru núma naxüxgu ya Cristu

³ Pa Toeneëgüx, rü guxüguma pexcëx Tupanana moxë taxã, erü name nixi na ngëmaäcü tanaxüxü. Erü guxüguma yexeraäcü peyaxögüetanü rü yexeraäcü pegü pingechaügüetanü. ⁴ Rü ngëmacëx tomatama taäëäcüma pechigaxü tixu natanüwachigü i ngëma duüxügü i Tupanaäxü yaxögüxü. Rü namaä nüxü tixu na ñuxäcü meä peyaxögüxü, rü ñuxäcü namaä peporaexü i guxüma i ngëma guxchaxügü rü ngüxügü i pexü ngupetüxü. ⁵ Rü ngëma guxchaxügü i pexü ngupetüxüwa nüxü tacuëx na aixcümacü yüxü ya Tupana, erü pexü nangugü na aixcüma pimexü na pichocuxücëx i ngextá núma äëxgacü iyüxüwa. Rü ngëma na pichocuxücëx nixi i ngüxü pingegüxü i ñuxmax. ⁶ Rü aixcüma name nixi na Tupana napoxcuexü i ngëma duüxügü i ngüxü pexü ingegüxëëxü. ⁷ Natürü i pema i ñuxma ngüxü ingegüxë rü name nixi i wüxigu tomaä pexü inarüngüxëë ya Tupana. Rü ngëma rü tá nanaxü ya Tupana i ngëxguma üxüemagu daxüwa ne naxüxgu ya törü Cori ya Ngechuchu ya Cristu wüxigu namaä i norü orearü ngeruügü i poraexü. ⁸ Rü aixcüma núma tá naxü i núma ya törü Cori ya Ngechuchu na napoxcueäxücëx i ngëma duüxügü i tama Tupanaxü cuáxchaügüxü rü tama naga ñnüëxü i ngëma ore i mexü i törü Cori ya Ngechuchu ya Cristuchiga. ⁹ Rü ngëma duüxügü rü wüxi i poxcu i taguma güxügu tá napoxcue erü törü Cori ya Ngechuchuarü yaxüwa tá nawogü. Rü ngëma rü tagutäma nüxü nadaugü na ñuxäcü namexëchixü rü naporaxü ya törü Cori ya Ngechuchu. ¹⁰ Rü ngëmaäcü tá ngëma duüxügümaä nangupetü i ngëxguma törü Cori ya Ngechuchu núma üxgu. Rü núma tá nangu na nóru duüxügü nüxü icuëxüügüxücëx, rü tá nahäixächiaëgü rü nataäëgü erü tá nüxü nadaugü na ñuxäcü namexëchixü i nümax. Rü pema rü tá ta wüxigu namaä pengëxmagü, yerü peyaxögü ga yema Tupanaäru ore ga pemaä nüxü tixuxü. ¹¹ Rü ngëmacëx guxüguma pexcëx tayumüxëgü. Rü Tupanana taca na núma pexü nadauxü na aixcüma mexü i norü duüxügü pixigüxü i ñuxma na pexü nadexü. Rü ngëxgumarüü ta nüxna taca na nümatama norü poramaä yanguxëäxücëx i guxüma i ngëma mexü i peäëwa nagu perüxñüëxü rü guxüma i ngëma puracügü i mexü i perü ögagu pexüxü. ¹² Rü ngëxguma Tupana ngëmaäcü pexü rüngüxëëgu, rü perü maxü i mexügagu rü guxüma i duüxügü tá nüxü nicuëxüügü ya törü Cori ya Ngechuchu ya Cristu. Rü nümatama ya törü Cori rü tá pemaä nataäë erü núma rü wüxigu Tanatü ya Tupanamaä pexü nangechaügü.

2

Pauru rü nanangoxëë i ñuxäcü tá na yïxü i ngëxguma ínanguxgu ya Cori ya Ngechuchu

¹⁻² Rü ñuxma Pa Chaueneëgüx, rü pemaã nüxü chixuxchaü i nachiga na ñuxäcü tá na yïxü i ngëxguma tórü Cori ya Ngechuchu ya Cristu wena núma üxgu rü tüxü nangutaquëxexëëgügu na wüxiwa namaã ingëxmagüxüçëx. Rü pemaã nüxü tixu na tama ngürüächi togumare perüxïñüëxü rü paxa payaxögüxü i ñacü rü ore i tama toma pemaã nüxü tixuxü. Erü tama tanaxwëxe na pebaixächiaëgüxü ega texë pemaã idoraegu rü pemaã nüxü ixuxgu na marü ínanguxü ya tórü Cori ya Ngechuchu. Rü ngëxguma texë pemaã nüxü ixuxgu na nagu taxänegüxü na Cristu rü marü ínanguxü, rü tama name i tümaga pexïñüë. Rü woo pemaã nüxü tixugügügu na tanayauxgüxü i wüxi i torü popera i nüxü ixuxü na marü ínanguxü ya tórü Cori ya Ngechuchu, jrü täütáma tüxü peyaxögü! ³ jrü täütáma naga pexïñüë i ngëma duüxügü i ngëmaäcü pexü womüxëëgüchaüxü! Erü naxüpa na Ngechuchu núma üxü rü tá ínangu i ngëma yatü i Tupanaärü uwanü ixïxü, rü tá nananuëxëë i muxüma i duüxügü i yaxögüchiréxü. Natürü ngëma yatü rü Tupana marü namaã nanaxuegu rü tá napoxcu. ⁴ Rü ngëma Tupanaärü uwanü rü tá Tupanamaã rü guxüma i ngëma Tupanaärü ixïxümaã narüxuwänü. Rü tá naxchi naxai i guxüma i ñacü i mexü i duüxügü Tupanaxü namaã icüëxüügüxü. Rü Tupanaärü tupaucu ya taxüñewa tá nayarüto ñoma Tupana yïxüdrüü. Rü tá nügü nixu na Tupana yïxü. ⁵ ¿Tama ëxna nüxna pecuëxächie ga yexguma petanüwa chayexmagu rü marü meãma pemaã nüxü chixu nachiga ga yema? ⁶ Rü pema marü nüxü pecuëx na tüxcüü yïxü i tauta núma naxüxü i ngëma Tupanaärü uwanü. Tauta núma naxü, erü tauta nawa nangu i ngema ngunexü i nagu nua naxüxü. ⁷ Rü ngëma chixexü i Tupanaärü uwanü üxü, rü marü cüäcü inaxügü. Natürü nümatama i Tupanaärü uwanü rü täütáma nangox ñuxmatáta ngëma norü chogürüü nüxü ingë. ⁸ Rü ngëxguma tá nixi i ínanguxü i ngëma Tupanaärü uwanü. Natürü núma ya tórü Cori ya Ngechuchu rü wüxi i “cue” ñaxümaã tá nayamëx. Rü ngëxguma ínanguxgu ya tórü Cori ya Ngechuchu rü ngëma norü yaxracüüxümaã tá inayanaxoxëë i ngëma norü uwanü. ⁹ Rü ngëma Tupanamaã rüxuwänüãxü, rü ngëxguma ínanguxgu rü tá nüxü nangëxma i Chatanáärü pora rü ngëmacëx tá naporaxüchi. Rü tá nanaxü i nagüxüraüxü i cuëxruügü i Chatanáärü poramaã naxüxü i namaã duüxügüxü nawomüxëëxü. ¹⁰ Rü nagüxüraüxü i chixexü tá naxü na nawomüxëëxüçëx i ngëma duüxügü i Tupana tá poxcuexü. Rü ngëmaäcü tá nüxü naxüpetü i ngëma duüxügü, yerü tama nanayauxgüchaü rü tama nüxü nangechaü i ngëma Tupanaärü ore i aixcüma ixïxü i tüxü maxëxëëxü. ¹¹ Rü ngëmacëx ya Tupana rü nanangexrü i ngëma duüxügü na poraäcü ínatüexüçëx rü yaxögüãxüçëx i ngëma ore i doramare ixïxü. ¹² Rü ngëmacëx düxwa Tupana tá namaã nanaxuegu na napoxcuexü i guxüma i ngema duüxügü i tama yaxögüchaüxü i norü ore rü namaã taäëgüxü i ngëma chixexü na naxügüxü.

Tupana tüxü nade na tüxü nangëxmaxüçëx i maxü i taguma güxü

¹³ Natürü, Pa Chaueneëgüx i Tórü Cori ya Ngechuchu Pexü Ngechaügüxex, rü guxüguma Tupanana moxë pexçëx taxã yerü nüma ga Tupana rü noxri-tama naãne ixügügumama pexü nade na pexira penayauxgüxüçëx i maxü i taguma güxü ga yexguma pexü nangüxëëgu ga Naãe i pexü üñexëëxü rü

peyaōgūgu ga yema ore i aixcūma ixīxū. ¹⁴ Rū yemacèx Tupana pexcèx naca ga yexguma pemaā nūxū tixuxgu ga norū ore i mexū i tūxū maxēxēxū. Erū nūma nanaxwèxe na pexū nangēxmaxūcèx i pechica i tórū Cori ya Ngechuchu ya Cristuxūtawa i ngextá inamexēchixūwa. ¹⁵ Rū ngēmacèx, Pa Chaueneēgūx, rū chanaxwèxe i meā peyaōgūama rū tama nūxū ipeyarūngūmaē ga yema ore ga tomatama pexū tangūxēxū rū yema ore ga poperagu pexcèx taxūmatūxū. ¹⁶⁻¹⁷ Rū chanaxwèxe i tórū Cori ya Ngechuchu ya Cristu rū Tanatū ya Tupana pexū nataāēxēgū rū pexū narūngūxēē na guxūguma mexū i oremaā pidexagūxūcèx rū mexū pexūgūxūcèx. Rū yima Tanatū ya Tupana nixī ya tamaā namecūmaācūma tūxū ngechaūcū rū guxūguma tūxū taāēxēcū rū tamaā ixunetacū na wūxi i ngunexū tá naxūtawa ingēxmagūxū.

3

Pauru naxcèx ínaca na naxcèx nayumūxēgūxū

¹ Rū nūxma Pa Chaueneēgūx, rū chanaxwèxe na toxcèx peyumūxēgūxū na paxa guxūwama nanguxūcèx i tórū Cori ya Ngechuchuarū ore i mexū, rū duūxūgū norū ngūchaūmaā na nayauxgūxūcèx ga yema pema na pe-nayauxgūxūrū. ² Rū toxcèx peyumūxēgū ta na tama ſacū rū chixexū tomaā naxūgūxūcèx i ngēma duūxūgū i chixexūgū! Erū tama guxūma i duūxūgū nayaxōgū. ³ Natūrū tórū Cori ya Ngechuchu rū aixcūma nayanguxēē i ngēma tamaā inaxunetaxū. Rū nūma tá pexū naporaexēē rū pexna nadau na tama chixexūgu peyixūcèx. ⁴ Rū tórū Cori ya Ngechuchu toxū nūxū nacūxēē na aixcūma penaxūxū i ngēma pexū tamuxū rū tagutáma nūxū perūxoexū na ngēmaācū penaxūxū. ⁵ Rū tanaxwèxe i tórū Cori ya Ngechuchu pexū narūngūxēē na aixcūma pegū pengechaūgūxūcèx, ngēma Tupana tūxū ngechaūxūrū. Rū naxcèx itaca na pexū naporaexēxūcèx na Cristurūt namaā peporaexūcèx i ngēma ngūxūgū i ngēxguma pexcèx ínguxgu.

Name nixī na ipuracūexū i wūxichigū

⁶ Pa Chaueneēgūx, tórū Cori ya Ngechuchu ya Cristuégagu pexū tamu na tama namaā pixāmūcūgūxūcèx i ſacū i taeneē i tama puracūchaūxū rū tama ngēma pexū tangūxēēācūma maxūxū. ⁷ Erū pema rū marū nūxū pecuèx na nūxācū tá pemaxēxū na toxrūl penaxūxūcèx. Yerū toma ga yexguma petanūwa tayexmagūgu rū torū ōnacèx tapuracūe, rū tama yexma tarūchomare. ⁸ Rū toma rū taguma texéarū ōna ngetanūācūma tangōx. Natūrū ngunecū rū chūtacū rū torū ōnacèx tapuracūe na tama wūxi ga guxchaxū pexū tixīgūxūcèx. ⁹ Rū woochirēx Tupanapēxewa rū name nixī ga perū ngūxēcèx na itaçaxū, natūrū tama yemaācū tanaxū. Rū torū ōnacèx tapuracūe yerū pexū nūxū tadauxēēchaū na nūxācū meā imaxūxū. ¹⁰ Yerū yexguma petanūwa tayexmagūgu, rū pemaā nūxū tixu rū yīxema tama puracūchaūxē, rū noxtacūma ngexrūma nixī na tachibūxū. ¹¹ Rū pexcèx tanaxūmatū i ngēmachiga, erū marū nūxū taxīnūē na petanūwa nangēxmaxū i nūxre i duūxūgū i oexū rū tama puracūechaūxū rū toguechigagumare rīxīnūēxū. ¹² Rū tórū Cori ya Ngechuchu ya Cristuégagu tanamu na meāmare ínapuracūexūcèx i ngēma duūxūgū na nūmatama norū ōnacèx nataxegūxūcèx. ¹³ Pa Chaueneēgūx, ſtama nūxū perūchau na mexū pexūexū! ¹⁴ Rū ngēxguma texé tama naga ínūgu i nāā ore i poperawa pemaā nūxū tixuxū ſrū marū tūxū pecuèx na texé tīxū! Rū tama name i tūmamaā pexāmūcū na taxānexūcèx i

tūmax. ¹⁵ Natürü tãütáma namaã perüxuanü! Rū name nixĩ i ñoma peeneëxũ pexucuxëxũácüma meã tũxũ pexucuxëmare.

Pauru rü naxcèx ínaca na Cori ya Ngechuchu nüxũ rüngũxëëxũ ga yema yaxõgũxũ

¹⁶ Rū chanaxwèxe i nümatama ya tórü Cori ya taãearü yora pexũ narüngũxëë na guxũguma i guxũwama petaãëgũxũcèx. Rū chanaxwèxe na nüma rü petanüwa na nangëxmaxũ i guxãma i pemax. ¹⁷ Choma i Pauru rü choxmëxmaãtama pexcèx chanaxümatü i ñaã chorü moxë. Rū ngëmaãcü nixĩ i chaugü nagu chawüégaxũ i guxũma i chorü popera. Rū ngëmaãcü nixĩ i chanaxümatüxũ. ¹⁸ Rū nüma ya tórü Cori ya Ngechuchu ya Cristu rü pexna naxãã i ngema norü ngechaxũ i guxãma i pemax!

Rü nuãma pexna,
Pauru

NÜXĪRAÜXÜ GA POPERA GA TIMUTÉUCAḶ NAXÜMATÜXÜ GA PAURU

Timutéuxü narümoxë ga Pauru

1-2 Pa Timutéux, choma i Pauru nixi i cuxcëx chanaxümatüxü i ñaã popera. Rü choxü nixi ga yamuxü ga Ngechuchu ya Cristu na norü puracü chaxüxcëx, yerü yemaäcü nanaxwëxe ga Tupana ya tüxü maxëxëcü rü tórü Cori ya Ngechuchu ya Cristu ya ínangüxëgücü. Rü cuma Pa Timutéux, rü chaune quixi i Tupanaârü orewa yerü chauxütawa nixi ga cunayaxuxü ga Tupanaârü ore ga noxrix. Rü chanaxwëxe ya Tanatü ya Tupana rü tórü Cori ya Ngechuchu ya Cristu rü cuxna nanaxä i norü ngechaxü rü norü mecüma rü norü taãe.

Timutéuxü naxucuxë ga Pauru nachiga ga yema ngüxëetaegü ga tama aixcüma ixüü

³ Yexguma cuxna ichaxüächigu na Machedóniãñewa na chaxüxcëx rü cumaã nüxü chixu na Epéchiuarü íãnegu na curüxãüxü na ícuyachaxächigüxëxëcëx i ngema duüxügü i doramaãmare ngëma ngüxëetaegüxü. ⁴ Rü chanaxwëxe i ngëma duüxügümaã nüxü quixu na nüxü naxoexüçëx na namaã nangüxëëãxü i ngëma nacümagü ga nuxcümaügüxü ga duüxügü nagu íxü. Erü guxüma i ngëma oregü rü doramare nixi, rü ngëmagagu düxwa nügümaa nanuë i duüxügü. Rü ngëma oregü rü tama aixcüma nüxü narüngüxëë i duüxügü na meã Tupanaãxü yaxögüãxüçëx. ⁵ Natürü Tupana nanaxwëxe i tórü maxüñewa na ingearü pecaduãxgüxü, rü na mexügu rüxüñëxü, rü aixcüma meã na yaxögüxü. Rü nüma tüxü namu na ngëmaäcü imaxëäcüma yigü na ingechaügüxü. ⁶ Natürü ñuxre i duüxügü rü marü nüxna nixigachi i Tupanaârü ore na nawe naxüxcëx i ngëma ore i taxuwama mexü i nuëwa nagagümarexü. ⁷ Erü nümagü tüxü nangüxëëchaü i ngëma mugü ga Moiché tüxna äxü, natürü tama nüxü nacüxgü i tacüchiga na yüüxü i ngëma tamaã nüxü yaxugüexü rü tüxü nangüxëëxü woo nüma nagu naxüñëgu rü meãma nüxü nacüxgü. ⁸ Rü nüxü tacüx rü ngëma mugü ga Moiché tüxna äxü rü tüxü name ega Tupana naxwëxexüãcüma naga ixüñëgu. ⁹⁻¹⁰ Natürü nüxü tacüxgü rü guxüma i ngema mugü rü duüxügü i chixexü ügüxüçëx nixi. Rü ngëma nixi i ngëma duüxügü i tama irüxüñëchaüxü, rü ngëma tama norü äëxgacüga ñüxëxü, rü ngëma chixexü ügüxü, rü ngëma pecaduãxgüxü, rü ngëma tama Tupanaga ñüxëxü, rü ngëma nanatüxü rü naëxü imëxgüxü, rü guxüma i ngëma máëtagüxü, rü ngëma naxüñëârü ngüchaüwe rüxüxü, rü ngëma yatügü rü ngëxügü i naxrüü yatüxü rü ngëxümaã ngëäëgüxü, rü ngëma duüxëgümaã taxëgüxü, rü ngëma idoratëxgüxü, rü ngëma äëxgacügümaã idoragüxü, rü guxüma i ngëma naxügüxü i tacü rü chixexü i yatöxyepexü i ngema ngüxëëtae i mexü. ¹¹ Rü ngëma ngüxëëtae i mexü rü Tupanaarü orewa nangexma, rü ngemagu nixi i nüxü iyarüñgauxü i ngema maxü i taguma güxü. Rü ngemaarü uruxü nixi ya Tupana ya mecümaxüchicü i choxü namuxü.

Pauru rü Tupanana moxë naxä yerü nüxü nüxü nangechaü ga norü chixëxügü

12 Rû moxê nüxna chaxâ ya Ngechuchu ya Cristu ya tórü Cori erü nüma choxü naporaxêê rû choxü nangugü na wüxi i mexü i norü duüxü chixixü. Rû ngêmacêx choxü naxuneta na nüxü chapuracüxü. 13 Üpa ga choma rû chixri nachiga chidexa ga Cristu, rû naxchi chaxai ga yema duüxügü ga nüxü yaxögüxü. Rû nawe chingechigü rû namaâ chixexü chixügü. Natürü woo yemaâcü na chamaxüxü, rû Tupanaâxü changechaütümüxü yerü tama aixcüma nüxü chacuêx ga tacü na chaxüxü, yerü tauta Cristuaxü chayaxô. 14 Rû yemaâcü ga tórü Cori ya Ngechuchu rû poraâcüxüchima chomaâ namecüma yerü choxü narüngüxêê na nüxü chayaxôxücêx rû nagagu nüxü changechaüxücêx i guxüma i duüxügü. 15 Rû pemaâ nüxü chixuxchaü i wüxi i ore i aixcümaxüchi ixixü i inaxwêxegüxü na guxâma nüxü cuáxü. Rû Ngechuchu ya Cristu rû ñoma ga naânewa nangu na namaxêxêêxücêx i pecaduâxgüxü. Rû natanüwa rû choma nixi ga guxüârü yexera na chixexü chaxüxü. 16 Natürü Tupana choxü nüxü nangechaü ga yema chorü chixexü na chowa duüxügüxü nüxü nadauxêêxücêx ga ñuxâcü nüma ga Ngechuchu ya Cristu yaxna chomaâ na naxinüxü ga woo guxü ga pecaduâxgüxüârü yexera chixecü na chiixü. Rû ngêmaâcü wüxi i cuêxruü chixi naxcêx i guxüma i duüxügü na nümagü rû ta nüxü nangêxmaxücêx i maxü i taguma gúxü. 17 Rû ñuxma tanaxwêxe i guxügutâma nüxü ticuêxüügü rû tanataxêêgü ya yima nüxicatama Tupana ixicü. Rû woo tama nüxü tadaugü i ñuxma natürü guxüguma tórü Âêxgacü nixi rû tagutâma nayu. Rû ngêmaâcü yîi. 18-19 Pa Chaune, Pa Timutéux, ñaâ nixi i chorü ore i cumaâ nüxü chixuxü. Rû üpa ga yexguma Tupana yadexaxêegu ga ñuxre ga taeneêgü, rû nüxü nixügü na cuma rû tá mexü i Tupanaârü orearü uruü quiixü. Rû ñuxma chanaxwêxe i yemagü nüxü ixuxürüü meâ cuyanguxêê i ngêma puracü i mexü i Tupana nawa cuxü muxü. Rû chanaxwêxe na aixcüma cuyaxôxü rû cuâêwa cumatama nüxü cucuáxü na aixcüma namexü i ngêma puracü i ícuxüxü. Ñuxre i duüxügü rû nüxü nacuêxgüchirêx i tacü nixi i mexü na naxügüâxü, natürü chixexüâma naxügü. Rû ngêmacêx düxwa nüxü narüxoe na Cristuaxü yaxögüâxü. 20 Rû yemaâcü nüxü naxüpetü ga Imenêü rü Areyâüdrü. Rû düxwa choma Chatanána chanawogü ga yema taxre na Chataná ngüxü nüxü ingexêêgüxücêx na ngêmawa nüxü nacuêxgüxücêx na tama namexü na chixri Tupanachiga yadexagüxü.

2

Name nixi i guxüma i duüxügüçêx tayumüxêgü

1 Rû ñuxma rû tá pemaâ nüxü chixu na ñuxâcü namexü na peyumüxêgüxü. Rû pexü chamu na guxüma i duüxügüçêxira peyumüxêgüxü. ¡Rû Tupanana naxcêx peca na nüxü nangüxêêxücêx rû nüxü nüxü nangechaüxücêx i norü pecadugü! ¡Rû moxê nüxna pexâ ya Tupana naxcêx i guxüma i norü ngüxêê i guxü i duüxügüna naxâxü! 2 Rû ngêxgumarüü ta name nixi i naxcêx peyumüxê i guxüma i nachiüânegüarü âêxgacügü i tacügü rû guxüma i ngêmatüüwa ngêxmagüxü i âêxgacügü na ngêmaâcü itaâêgüxücêx rû tüxü nangêxmaxücêx i wüxi i maxü i mexü i Tupanapêxewa rû guxü i duüxügüpêxewa. 3 Rû ngêma nixi i namaâ nataâêxü ya yima Tupana ya tüxü maxêxêêcü. 4 Erü nüma nanaxwêxe na guxâma tüxü nangêxmaxü i maxü i taguma gúxü rû guxâma nüxü cuáxü i ngêma ore i aixcüma ixixü. 5 Rû nüma ya Tupana rû wüxitama nixi. Rû ngêxgumarüü ta wüxitama nixi i taétüwa chogüxü na Tupanaxütawa tüxü nangugüxücêx.

Rü nüma nixī ya Ngechuchu ya Cristu ya Tupana Nane ga duūxūxū ixīcū.
⁶ Rü nüma ga Ngechuchu rü nügū inaxā rü nayu na guxū i duūxūgūaxū
 naxūtanūāxūcēx na Tupanaxūtawa nangugūxūcēx. Rü yexguma Ngechuchu
 yuxgu nixī ga Tupana yanguxēēxū ga yema ūpaacū duūxūgūmaā nüxū
 yaxuxū na űuxācū tā namaxēēēāxū. ⁷ Rü Tupana choxū naxuneta na
 norū orearū ngeruū chīxūcēx. Rü choxū namu na chanangūexēēxūcēx i
 ngēma duūxūgū i tama Yudūgū ixīgūxū na nümagū rü ta yaxōgūāxūcēx rü
 nüxū nacuēxgūxūcēx i ngēma ore i aixcūma ixīxū. Rü ngēma pemaā nüxū
 chixuxū, rü aixcūma nixī, rü tama chidora. ⁸ Rü űuxma chanaxwēxe i
 guxūdwama nayumūxēgū i yatūgū. Rü chanaxwēxe i ngearū pecaduāxācūma
 naxugūmēxē rü ngēmaācū tama texēmaā nanuēācūma rü tama űacūchiga
 nügū nachoxūgagūācūma nayumūxēgū. ⁹ Rü chanaxwēxe i ngexūgū rü
 meamare ūxū i naxchirugu nicuxgū, rü meamare nügū namexēēyaegū, rü
 tama poraācū nügū nangēxāēgū uirumaā rü meruxūgūmaā rü naxchiru i
 tatanūxūmaā. ¹⁰ Natūrū narūmemaē nixī i meāmare Tupanacēx namaxē, rü
 mexū i puracū naxūgū, erū ngēmaācū nanaxwēxegū na namaxēxū i ngēma
 ngexūgū i aixcūma Tupanaaxū yaxōgūxū. ¹¹ Rü chanaxwēxe i ngexūgū rü
 meā inaxīnūē i ucuxēgū. Rü tama name na nachoxūgawēxegūxū. ¹² Erū
 ngexūgūna rü chanachuxu na yatūgūxū nangūexēēxū, rü yatūarū āēxgacū na
 yīxū. Rü name nixī i inarūxīnūēmare i perū ngutaquēxegūwa. ¹³ Yerū Tupana
 rü Adāūxūxīra naxū rü yixcama ga Ebaxū. ¹⁴ Rü Chataná rü tama Adāūxū
 nawomūxēē, natūrū yema ngecūxū nixī ga nawomūxēēxū. Rü yemaācū
 pecadugu ingu ga yema ngecū. ¹⁵ Rü yemacēx Tupana nüxū nixu rü tā
 poraācū nüxū nangux i ngēma ngexūgū i ngēxguma naxīraxacūgū. Natūrū
 nixi i ngecū rü tā inayaxu i maxū i taguma gūxū ega meā ngīxācūgūmaā
 inacuēxgu, rü mexūgu naxīnūācūma yaxōōgu, rü guxūguma duūxūgūxū
 nangechaūgu rü meā Tupanapēxewa namaxēgu.

3

Yaxōgūxūārū āēxgacūgūchiga

¹ Rü pemaā nüxū chixuxchaū i wūxi i ore i aixcūma ixīxū. Rü ngēxguma
 chi texē naxwēxegu na yaxōgūxūārū āēxgacū tīxū, rü mexū i puracū nixī
 i naxcēx tadauxū. ² Rü yīxema yaxōgūxūārū āēxgacū rü tanaxwēxe na
 aixcūma mecū tīxū na taxūema tūmachiga chixri idexaxūcēx. Rü tanaxwēxe i
 wūxixicatama tixī ya tūmamēx, rü aixcūma meā tamaxū rü mexūguxicatama
 tarūxīnū na guxū i duūxūgū tūxū ngechaūgūxūcēx. Rü tanaxwēxe i
 guxūguma meā duūxūgūxū tayaxu i tūmapatawa, rü mexū i ngūexēēruū tixī.
³ Rü tama name i wūxi i ngāxwēxexū rü nuwēxexū tīxū, rü tama name i
 tūmaārū dīerugama rūxīnūxē tīxū. Natūrū name nixī i guxū i duūxūgūmaā
 yaxna taxīnū rü namaā tamecūma. ⁴ Rü tanaxwēxe i meāma tūmachiūmaā
 itacuēx, rü tūmaxācūgū rü meā tūmaga naxīnūē, rü tūxū nangechaūgū. ⁵ Erū
 ngēxguma chi tama tūmachiūmaā meā itacuēxgu rü űūxācū i guxūma i
 Tupanaāxū yaxōgūxūmaā meā itacuāxū? ⁶ Rü yīxema ngema yaxōgūxūmaā
 icuāixē rü tama name na ngexwacēx yaxōxē tīxū, erū ngūrūāchi tā tūgū
 ticuēxū. Rü ngēmagagu dūxwa nagu tangu i ngēma poxcu i Chatanáxū namaā
 napoxcuxū ya Tupana. ⁷ Rü tanaxwēxe i woo i ngēma duūxūgū i tama
 yaxōgūxū rü tūxū nangechaūgū na taxūema chixri tūmachiga idexagūxūcēx
 rü tama Chataná chixexūgu tūxū na nguxēēxūcēx.

Yatügü i diácunügü i tupaucawa ngüxêetaegüxüchiga

⁸ Rü ngëxgumarüü ta i ngëma yatügü i tupaucawa ngüxêetaegüxü ixigüxü rü nanaxwëxe i mexüguxicatama rüxîñüëxü nixigü. Rü nanaxwëxe i aixcüma nayanguxêëgü i ngëma nüxü yaxugüexü. Rü tama nanaxwëxe i ngäxêechagüxü nixigü rü êxna norü dîerugama rüxîñüëxü nixigü. ⁹ Rü name nixî i meäma nüxü nacüëxgü i guxüma i Tupanaârü ore, na nüxü nacüëxgüxcëx na facüxcëx na yaxögüäxü. Rü nanaxwëxe i nügüäewatama nüxü nacüëxgü na norü maxü rü aixcüma yamexü i Tupanapëxewa. ¹⁰ Rü tanaxwëxe i to i puracüwa nüxü taxügüxira i noxrix. Rü ngëxguma marü taguma chixexü naxügügu, rü marü name i tupaucawaarü ngüxêëruü tayaxigüxêë. ¹¹ Rü ngëma yatügü i tupaucawa ngüxêetaegüxü ixigüxü rü tanaxwëxe i naxmëxgü rü ta mexüguxicatama narüxîñüë. Rü tama name i oregütëëxgüxü nixigü, natürü tanaxwëxe i meä namaxë rü aixcüma nayanguxêëgü i ngëma nüxü yaxugüxü. ¹² Rü ngëma yatügü i tupaucawa ngüxêetaegüxü ixigüxü rü tanaxwëxe i wüxixicatama tixî ya naxmëx. Rü tanaxwëxe i meäma napatacüäxgümaä inacuëx, rü naxäcügü rü meä naga naxîñüë. ¹³ Rü ngëma yatügü i tupaucawa ngüxêetaegüxü, rü ngëxguma meäma naxügüägu i norü puracü i tupaucawa rü guxüma i duüxügü tá nüxü nangechaügü. Rü ñuxüchi i nümagütama i ngëma yatügü rü tá yexeraäcü nüxü natauxcha na nüxü yaxugüexü i ñuxäcü Tupana nanaxwëxexü i Ngechuchu ya Cristuaxü na yaxögüäxü i duüxügü.

Aixcüma nixî i ngëma ore i Tupana tüxü nüxü cuëxêëxü i Cristuchiga

¹⁴⁻¹⁵ Rü choma chanaxwëxe i paxa ngëma chaxü na cuxü ichayadauxüxcëx. Natürü ngürüächi tama paxa ngëma chaxü, rü ngëmacëx cuxcëx chanaxümatü i ñaä popera na nüxü cucuáxüxcëx i ñuxäcü tá cugümaä icucuáxü napewa i ngëma duüxgü i Tupanaxü yaxögüxü. Erü nümagü nixî i Tupana ya maxücüarü duüxügü yixigüxü rü nüxü yaxugügüxü rü ínapoxügüaxü i norü ore i aixcüma ixîxü. ¹⁶ Rü yixema nüxü tacuëx rü aixcüma namexëchi i ngëma ore ga noxri êxüguxü i ñuxma Tupana tüxü nüxü cuëxêëxü i Cristuchiga. Rü nüma ga Cristu rü duüxügüxü nügü nawëx ga yexguma ñoma ga naänewa nayexmagu. Rü Naäë i Üünexü nüxü nixu na mecü yixü. Rü Tupanaârü orearü ngeruügü i daxücüäx nüxü nadaugü. Rü guxü i nachüñänegüwa rü duüxügü nüxü nixugüë i nachiga, rü guxüwama duüxügü nüxü nayaxögü. Rü Nanatü rü wenaxârü daxüguxü i naänewa nanaga i ngextá ínamexëchixüwa.

4

Duüxügü i nüxü rüxoexü na yaxögüäxüchiga

¹ Tupanaäë i Üünexü rü nüxü nixu rü ngëxguma yangaicagu na nagüxchaüxü i naäne rü nümaxü i duüxügü rü tá nüxü narüxoe na yaxögüäxü i Tupanaârü ore i mexü. Rü tá nawe narüxî i duüxügü i doramare i orexü ixügüxü i Chatanáârü nguxêetae nangüxêëxü. ² Rü ngëma yaxögüxü rü tá nüxü inarüxîñüë i ngëma duüxügü i meä maxënetaxü rü idoratëëxgüxü. Rü ngëma duüxügü rü yeücürü nanaxügü i ngëma chixexü rü düxwa namaä nixü na chixexüguxicatama naxîñüëxü. ³ Rü ngëma duüxügü rü nanachüxu na iyangigüxü i duüxügü. Rü nanachüxu na duüxügü nangögüxü i ñuxre i ðnagü rü woochirëx Tupana nanaxü i guxüma i ðnagü na moxë naxcëx inaxägüäcüma nangögüäxüxcëx i norü duüxügü i yaxögüxü rü nüxü

cuèxgùxü i norü ore i aixcüma ixüü. ⁴⁻⁵ Natürü guxüma i Tupana üxü rü name. Rü taxuacüma nüxü taxo ega Tupanana moxë naxcëx ixäxiraäcüma nayauxgu. Erü Tupanaärü ore rü ngëma yumüxë rü nanaxüünexëë i ngëma òna i Tupanapëxewa, rü ngëmacëx name nixü na nangöxü.

Wüxi i mexü i Ngechuchuya Cristuarü ngüxëëruü rü mexümaã nanguxëëtae

⁶ Rü ngëxguma ngëma cumaã nüxü chixuxü i oremaã cunangüexëëgu i taeneë i yaxögüxü, rü ngëxguma nawa cüngüechagu i ngëma ore i marü quixöxü, rü ngëxguma nagu quixüechagu i ngëma mexü i nguxëëtae i marü nagu quixüxü, rü ngëxguma tá nixü i wüxi i mexü i Ngechuchuya Cristuarü ngüxëëruü quüüxü. ⁷ Rü tama name na naga cuxünxü i ñoma i naänecüäxärü dexagümare i tama aixcüma ixüü. Natürü name nixü i guxüguma cügü cuporaxëë na yexeraäcü Tupanaxü cungechaüxüçëx rü nawe curüxüxüçëx rü naxcëx cumaxüxüçëx. ⁸ Rü wüxi i mexü nixü na naporaxëëxü rü yaxüxcüxëëxü i taxüna na aixcüma naporaxüçëx. Natürü ngëmaärü yexera narümemae nixü na yigü iporaxëëxü na Tupanaxü ingechaüxüçëx erü ngëma rü guxüwama tüxü name i ñoma i naänewa rü daxüguxü i naänewa rü ta. ⁹ Rü aixcüma nixü i ngëma ore i cumaã nüxü chixuxü, rü name nixü i guxäma tayaxögü. ¹⁰ Rü ngëmacëx nixü i ipuracüexü rü yigü iporaexëëxü na nüxü ixuxüçëx i ngëma ore i mexü, erü nüxü tayaxögü ya törü Tupana ya maxücü ya guxäärü maxëxëëruü ixüü. Erü nüma nixü i namaxëxëäxü i ngëma duüxügü i nüxü yaxögüxü. ¹¹ Rü chanaxwëxe i cunangüexëë i ngëma ore rü duüxügüxü cumu na naga naxünxüçëx. ¹² Meã cügüna nadau na taxüema cuxü naxoxüçëx naxcëx i ngëma na cüngextüxüxü! Rü name nixü i wüxi i mexü i cuëxruü quixü naxcëx i guxüma i ngëma yaxögüxü. Rü ngëmacëx cunaxwëxe i mexü i oremaã quidexa, rü meã duüxügüpëxewa cumaxü, rü aixcüma nüxü cungechaü i guxüma i duüxügü, rü meã Tupanaäxü cuyaxö, rü napëxewa meã cumaxü. ¹³ Rü chanaxwëxe i ngutaquëxewa rü guxü i duüxügüpëxewa nüxü cudaumatü i Tupanaärü ore, rü duüxügümaã nüxü quixu na ñuxü ñaxüchiga yüüxü. Rü chanaxwëxe i ngëmaäcü cunangüexëë rü nüxü cunangüchaüxëë i ngëma taeneëgü ñuxmatáta ngëma changu i chomax. ¹⁴ Rü ngëmacëx name nixü i aixcüma namaã cupuracü i ngëma cuëx ga Tupana cuxna äxü ga yexguma norü puracüçëx cuxü naxunetagu rü yema yaxögüxüärü äëxgacügü cuxü yangögüäcüma cumaã nüxü yaxuxgu na cuxna naxäaxü ga yema cuëx. ¹⁵ Meã naxü i guxüma i ngëma cumaã nüxü chixuxü, na ngëmaäcü guxü i duüxügü nüxü daugüxüçëx na ñuxäcü guxü i ngunexügu yexeraäcü meã Tupanacëx na cumaxüxü! ¹⁶ Inaxuäë na ñuxäcü meã cügüna cudauxü rü ñuxäcü meã cunangüexëëxü i ngëma togü! Erü ngëxguma meã cunaxüxgu i guxüma, rü tá cunayaxu i maxü i taguma gúxü rü ngëma togü i cuxü irüxünxüçëx rü tá ta nüxü curüngüxëë na nümagü rü ta nayauxgüäxüçëx i ngëma maxü.

5

Ñuxäcü nixü i namexü na nüxü ingechaüxü i ngëma yaxögüxü

¹ Taguma name i cunanga i wüxi i yatü i cuxü rüyamaëxü. Rü narümemae nixü i meãma cunaxucüxë ñoma cunatürüü. Rü ngëma cüngextüxüçügü rü name nixü i meãma namaã quidexa ñoma cueneëgüxüchirüü. ² Rü yixëma yaguäxgü ya ngexegü rü name nixü i meãma tümamaã quidexa cuexüchirüü. Rü ngëxgumarüü ta i paxügü rü name nixü i meãma namaã quidexamare wüxi i cueyëxüchirüü, rü tama name i chixexügu namaã

curüxñü. ³ ¶Tüxü rüngüxëê ya yíxema yutegüxe ega aixcüma tacü tüxü tauxgu! ⁴ Natürü ngëxguma chi wüxi i yutecü ngixü nangëxmagu i ngixácügü rü êxna ngítaagü, rü name nixi i nümagü ngixü narüngüxëêgü rü ngixna nanaxã i tacü i ngixü taxuxü. Erü Tupana nanaxwëxe na ngítanüxüüira ngixna daugüxü na ngëmaácü yangutanüxëêgüãxücëx ga yema naë na nayaexëêxü. ⁵ Natürü yíxema yutexe ya tüxica irüxãüxë rü tüxü nataxüxe i tümatanüxü, rü Tupanaxütawaxicatama ítananguxëê i tümaärü ngüxëê rü guxüguma woo chütacü rü ngunecü rü tayumüxë na tüxü nangüxëêxücëx ya Tupana. ⁶ Natürü yíxema yutexe ya tümaärü ngüchaüguxicatama rüxñüxë, rü Tupanapëxewa rü ñoma tayuxürüü tixi. ⁷ Rü ngëma nixi i ore i tá cunangüxëêxü i ngëma yaxögüxü na nügüna nadaugüxücëx na taxuüma i chixexü naxügüxücëx rü taxüema nachiga chixri idexagüxücëx. ⁸ Erü ngëxguma chi wüxie rü tama meã nüxna tadëuxgu i tümapatacüãxgü rü tümaë rü tümanatü, rü maneca tama aixcüma meã Tupanaãxü tayaxö. Rü wüxi i tama yaxöxüärü yexera chixecü tixi. ⁹ Rü ngëxguma chi wüxi i ngexü i yutexü naxcëx ícaxgu na ngëma yaxögüxü ngixü rüngüxëêgüxücëx rü tanaxwëxe i 60 ya taunecüarü yexera ngixü nangëxma rü wüxitama nixi ga ngíte ga ngixü yexmacü ga noxrix. ¹⁰ Rü tanaxwëxe i guxüma i duüxügü ngixü nacüexgü na wüxi i mexü üxcü na yixü. Rü name i meã ngixácüxü yaexëcü iyixi, rü meã ngípatawa duüxügüxü yaxucü iyixi, rü yaxögüxüärü ngüxëeruü iyixi, rü ñaweexüärü ngüxëeruü iyixi. Rü ngëmaácü tanaxwëxe i guxüraüxü i mexü na naxüxü. ¹¹ Natürü tama tanaxwëxe i yaxögüxüärü puracü nixi i ngixna na nadaugüxü i wüxi i yutecü ega tama 60 wa nanguxgu ya ngürü taunecü. Erü wüxi i yutecü i pacü, rü ngëxguma ngürü ngüchaü Cristuna ngixü ixügachixëêgu, rü tá inaxwëxe na wena naxätexü. ¹² Rü duüxügü tá chixri ngíchiga nidexagü, erü tama aixcüma iyanguxëê ga yema Cristumaã inaxunetaxü ga noxrix. ¹³ Rü ngüma rü düxwa ngextã iyaxáuchigümare, rü náí ya í rü nagu iyarüxãüx, rü düxwa tama ipuracüchaü. Rü tama ngëmaxícatama ixü, natürü düxwa ixoregütèx, rü iyangëxmachigü nawa i ngëma dexa i tama mexü i togüchiga, rü guxüwama nüxü iyaxu i ngëma ore i tama mexü. ¹⁴ Rü ngëmacëx chanaxwëxe i ngëma yutegüxü i pacügü na wenaxärü naxätëgüxü, rü naxãxácügüxü, rü mexü i napataarü dauruügü na yixigüxü. Rü ngëmaácü i ngëma duüxügü i ngixchi aiexü, rü taxucürüwa chixri ngíchiga nidexagü. ¹⁵ Cumaã nüxü chixu i ñaã ore, erü ñuxre i yutecü rü marü nüxü irüxoe i ore i mexü rü Chatanáwe irüxi. ¹⁶ Rü ngëxguma chi wüxi i ngecü i yaxöxcü rü ngixü nangëxmagu i ngítanüxü i yutecü, rü name nixi i ngixü irüngüxëê. Rü ngëmaácü táütama togü i yaxögüxüärü puracü tá nixi na ngixna na nadaugüxü. Rü ngëxguma tá nüxü natauxcha i ngëma togü i yaxögüxü na ngixü nangüxëêgüxü i ngëma yutecü i aixcüma ngixü natauxcüma i ngítanüxügü i ngixü rüngüxëêgüxü. ¹⁷ Rü ngëma yaxögüxüärü äexgacügü i aixcüma meãma ngëma yaxögüxümaã icuáxü, rü name nixi i ngëma yaxögüxü aixcüma nüxü nangechaügü rü namaã nataãëgü. Rü guxüärü yexera tanaxwëxe i nüxü nangechaügü rü nüxü narüngüxëêgü i ngëma Tupanaarü orexü ixugüxü rü nangüxëêxü. ¹⁸ Erü Tupanaärü orewa rü ñanagürü:

“Tama name i nüxna taxaü i ngëma taxüna i puracüxü”,
ñanagürü. Rü ñanagürü ta:

“Wüxi i puracütanüxü rü tanaxwëxe i nüxü na naxütanüxü i norü puracü”,
ñanagürü i ngëma Tupanaärü orewa. ¹⁹ Rü ngëxguma chi texé nüxü ixuxgu na

chixexũ naxũxũ i wũxi i yaxõgũxũãrũ ãẽxgacũ, rũ tãũtãma tũxũ icuxĩnũ ega natauxguma i taxre rũ õxna tomaẽxpũx i togũ i duũxũgũ i nũxũ daugũxũ na aixcũma chixexũ naxũxũ. ²⁰ Natũrũ ngẽma yaxõgũxũãrũ ãẽxgacũgũ i aixcũma pecadugu maxẽxũ, rũ name nixĩ i guxũ i yaxõgũxũpẽxewa cunaxucuxẽ, na guxũma i ngẽma togũ i yaxõgũxũãrũ ãẽxgacũgũ rũ ta namuũẽxũcẽx na naxũgũãxũ i tacũ rũ chixexũ. ²¹ Rũ ñuxma Tupanapẽxewa rũ tórũ Cori ya Ngechuchu ya Cristupẽxewa rũ ngẽma daxũcũãx i orearũ ngeruũgũ i Tupana nũxũ ngechaũgũxũpẽxewa, rũ cuxũ chamu na naga cuxĩnũxũ i ñãã ore i cumaã nũxũ chixuxũ. Rũ chanaxwẽxe i ngẽma cumaã nũxũ chixuxũrũ meã cunaxucuxẽ i guxũma i ngẽma yaxõgũxũ rũ nuẽtama ega woo texẽ tixĩgu. ²² Rũ ngexguma texexũ quingucuchixẽchaũgu na ngema yaxõgũxũãrũ ãẽxgacũ tixĩxũcẽx, jũ taxũ i cuũuxãẽxũ na namaã cuyumũẽxũ i wũxi i duũxũ i tama nũxũ cucuãxũ i norũ maxũ! Natũrũ name nixĩ i noxri rũ meã nagu curũxĩnũ i ngẽma erũ ngũrũãchi tá wũxi i duũxũ i pecadu uechaxũ quingucuchixẽẽ, rũ cugagu tá nixĩ erũ tama icuxuãẽ. jRũ meã cugũna nadau na tama pecadugu cunguxũcẽx! ²³ Rũ ngẽma na cunguxnecaũxũ i ñuxguacũ, rũ name nixĩ i irarũwa binune cuyaxaxũ, rũ tama i dexãxícata. ²⁴ Rũ nangẽxma i duũxũgũarũ pecadugũ i noxtacũma ngõxũ naxũpa na Tupana nũxna çaxũ. Natũrũ nangẽxma i to i pecadugũ i duũxũgũarũ rũ tãũtãma nangox ñuxmatãta naãneãrũ guxwa nanguxgu rũ Tupana tũxna icagũgu. ²⁵ Rũ ngẽxgumarũ i ta nangẽxma i duũxũgũarũ puracũgũ i mexũ i Tupanacẽx naxũgũxũ i ñuxma marũ nũxũ idauxũ. Rũ nangẽxma ta i puracũgũ i mexũ i ñuxma tama nũxũ idauxũ natũrũ yixcũra tá nũxũ idaugũamaxũ.

6

¹ Guxãma ya yixema yaxõgũxe rũ ixããrũ coriãxẽ, rũ tanaxwẽxe i tũmaãrũ corixũ tangechaũ na ngẽmaãcũ taxucũrũwa texẽ Tupanachiga rũ tórũ nguxẽẽtaechiga chixri idexaxũcẽx. ² Rũ ngẽxguma chi wũxi ya duũxẽ ya Tupanaãxũ yaxõxẽ rũ wũxi i cori i tũmarũũ yaxõxũmaã tacoriãxgu, rũ tama tanaxwẽxe i ngẽma na tũmaẽneẽ yĩxũcẽx nũxũ tarũxo na nũxũ tangechaũxũ i tũmaãrũ cori. Natũrũ tanaxwẽxe i yexeraãcũ meã nũxũ tapuracũ erũ tũmaãrũ cori i nũxũ tarũngũxẽẽxũ i tũmarũũ yaxõxũ nixĩ rũ tũmaẽneẽ i Tupana nũxũ ngechaũxũ nixĩ. Pa Timutẽux, chanaxwẽxe i meãma cunangũexẽẽ i ngẽma ore i cumaã nũxũ chixuxũ, rũ guxũma i yaxõgũxũpẽxewa nũxũ quixu.

Tupanaãrũ ore rũ aixcũma tũxũ name

³ Rũ cumaã nũxũ chixu rũ nangẽxma i duũxũgũ i namaã nguxẽẽtaegũxũ i ngẽma nguxẽẽtae i tama namaã wũxiguxũ i tórũ nguxẽẽtae, rũ tama namaã wũxiguxũ i tórũ Cori ya Ngechuchu ya Cristuarũ nguxẽẽtae i mexũ, rũ tama namaã wũxiguxũ i ngẽma nguxẽẽtae i Tupanaãrũ orewa ngõxũ. ⁴ Rũ cumaã nũxũ chixu rũ yixema ngẽmaãcũ nguxẽẽtaexe rũ tũgũ ticuẽxũ rũ taxuũma tacuẽx. Rũ ngẽmacẽx ngẽxũrũũxũmare i dexa rũ naxcẽx tachoxũgawẽxe, rũ tama texẽga taxĩnũchaũ, rũ dũxwa ñoma tidãawexũrũũ tixĩ namaã i ngẽma tũmacũma. Rũ ngẽmagagu rũ taxãũxãchiwẽxe, rũ tanuxwẽxe, rũ togũmaã taguxchiga, rũ taxũxeaxũma tayaxõ. ⁵ Rũ ngẽmaãcũ i ngẽma duũxũgũ i chixẽãgũxũ, rũ nũgũmaã nanuẽẽcha, rũ tama nũxũ nacuẽxgũ i ngẽma ore i aixcũma ixĩxũ, rũ nagu narũxĩnũẽ rũ Tupanaãrũ orewa nixĩ i diẽru ngĩxũ nayauxgũxũ. ⁶ Rũ aixcũma nixĩ i Tupanaãrũ orewa nũxũ iyarũngauxũ i taxũma i mexũ, natũrũ ngẽma mexũ rũ tũmacẽxícata nixĩ ya yixema namaã taãgũxe i ngẽma marũ tũxũ ngẽxmaxũ. ⁷ Rũ yixema rũ yexguma noxri

ixíraegu, rü ngearü yemaxüãxëmaã tabue i ñoma i naãnewa. Rü ngëxguma iyuxgu rü taxucürüwa tayange i tórü ngëmaxügü. ⁸ Natürü ngëxguma tüxü nangëxmagu i taxchiru rü tórü òna rü name nixí i ngëmamaátama tataãëgü. ⁹ Natürü ngëma duüxügü i dïëruãxgüchaüxü, rü tama yaxna namaã naxínüë i ngëxguma ngëma dïëruarü ngüchaü nüxü poragu. Rü ngëmacëx nagu nayí i muxüma i ngüchaügü i taxuwama mexü i chixexüwa nagagüxü, rü ngëmacëx düxwa i ngëma duüxügü rü poraãcü nachixe rü norü guxümaãma inayarütauxe. ¹⁰ Erü ngëma na dïëruaguama rüxínüxü rü ngëma nixí i guxüma i chixexügüarü ügü. Rü nangëxma i ñuxre i duüxügü i dïëruaguama rüxínüëxü rü ngëmacëx Tupanana nixígachi. Rü ngëmaãcü nügünatama guxchaxü naxägü rü nügüütama ngechaü nanguxëëgü..

Tupanaãxü yaxögüamaxüchiga

¹¹ Natürü cumax, Pa Timutéux, rü wüxi ya yatü ya Tupanaxü yaxöcü quixí. ¡Rü ngëmacëx nüxna ixügachi i guxüma i ngëma chixexü! ¡Rü meã Tupanapëxewa namaxü, rü norü ngüchaü naxü, rü meã nüxü yaxö, rü nüxü nangechaü i duüxügü, rü yaxna namaã naxínü! Rü tama name i cügü quicuëxüxü. ¹² ¡Cügü naporaxëë na meã cuyaxöðmaxüçëx rü cunaxüamaxüçëx i Tupanaärü puracü ega wooñacü rü guxchaxü cuxü üpetügux! ¡Rü cügüna nadau na ngëmaãcü taguma cuxna iyanaxoxüçëx i ngëma maxü i taguma gúxü! Yerü yema maxüçëx nixí ga noxri Tupana cuxü yaxuxü ga yexguma muxüma ga duüxügüpëxewa nüxü quixuxgu na ñuxäcü Ngechuchu ya Cristuaxü na cuyaxöxü. ¹³⁻¹⁴ Rü ñuxma Pa Timutéux, rü napëxewa ya Tupana ya guxäxüma maxëxëëcü, rü napëxewa ya Ngechuchu ya Cristu ga äëxgacü ga Piratumaã nüxü ixücü ga ñuxäcü Nanatü ya Tupanaãxü na yaxöðxü, rü cuxü chamu na naga cuxínüxü i ngëma ore i cumaã nüxü chixuxü. Rü tama chanaxwëxe i cunaxüchicüü i ngëma ore, na taxüema texéñacüçëx cuxü oregüxüçëx rü chixri cuchiga idexaxüçëx. Rü chanaxwëxe i ngëmaãcü meã cunaxü ñuxmatáta ínangu ya tórü Cori ya Ngechuchu ya Cristu. ¹⁵ Erü ngëma ngunexü i Tupana nagu naxwëxexügu rü tá Cristuxü nangoxëë. Erü nüxícatama Tupana nixí, rü nüma nixí i aixcüma mecü yíixü rü guxüetüwama nangëxmaxü. Rü guxü i äëxgacügüarü Äëxgacü yíixü, rü guxü i corigüarü Cori yíixü. ¹⁶ Rü nüxícatama nixí na taguma nayuxü. Erü nüma rü poraãcü ínangónexüwa namaxü, rü taxucürüwa texé ngëma ngónexüna tangaicama. Taguma wüxi i duüxü nüxü nadau, rü taxuacüma texé nüxü tadau. Nüma rü guxügüma naporaxüchi rü taguma inayarüxo na Äëxgacü yíixü. Rü ngëmacëx tanaxwëxe i guxäma nüxü ticuëxüñgüëcha. Rü ngëmaãcü yíi. ¹⁷ Rü yixema muarü dïëruáxe i ñoma i naãnewa, ¡rü tùmamaã nüxü pixu na tama ngëmamaã tügü ticuëxüñgüxüçëx rü tama nagu tarüxínüëxüçëx na ngëma tumaärü dïëruwa nüxü itayangaugüxü i tumaärü maxü! Erü ngëma dïëru rü paxa tá nagux. Natürü narümemae nixí i Tupanaga taxínü, erü yimawa nixí i nüxü itayangaugüxü i tumaärü maxü. Rü nüma nixí i poraãcü tüxna naxäãxü i guxüma iñacü i inaxwëxexü na itaãëgüxüçëx. ¹⁸ ¡rü namaã nüxü ixu i ngëma muarü dïëruãxgüxü, rü name na ngëmamaã mexü naxügüxü rü togü i duüxügüxü nangüxëëgüxü! Rü ngëmaãcü tá namu i ngëma mexügü i naxügüxü i Tupanapëxewa. Rü tanaxwëxe i númagü i muarü dïëruãxgüxü rü na inamemaregüxü na togüna naxäãxü rü namaã nangauxü i ngëma norü ngëmaxügü. ¹⁹ Rü ngëmaãcü tá nüxü nangëxma i norü mexügü i daxüguxü i naãnewa, rü tá nanayaugü i ngëma maxü i aixcüma ixíxü.

Pauru rü Timutéuxü namu, rü yemaãcü inayacuxẽẽ ga norü popera

²⁰ Pa Timutéux, jmeã namaã nangúexẽẽtae i guxũma i ngẽma ore i cuxũ chamuxũ! Rũ tama name na icurũxĩnũxũ i ñoma i naãnecũãxãrũ dex-agũmare i taxuwama mexũ rü ngẽma ore i doramare ixĩxũ i duũxũgũ nüxũ ixugũgũnetaxũ na ore i nawa nüxũ icuáxũ yĩxũ. ²¹ Erũ ñuxre i nũmagũ i ngẽma noxrõtama cuẽxgu ãxũ, rü dũxwa ngẽmagagu Tupanana nixĩgachi. Rũ chanaxwẽxe i Tupana meã pexũ narũngũxẽẽ.

Rũ nuãma pexna,
Pauru

NORÜ TAXRE GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxë ga Pauru

¹ Pa Timutéux, choma i Pauru nixi i cuxcëx chanaxümatüxü i ñaã popera. Rü choxü nixi ga namuxü ga Ngechuchu ya Cristu, yerü yemaäcü nanaxwëxe ga Tupana. Rü nüma choxü namu na nüxü chixuxüçëx na ñuxäcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxögügu. ² Cuxü changechaü, Pa Chaune, Pa Timutéux. Rü chanaxwëxe ya Tanatü ya Tupana rü Ngechuchu ya Cristu ya törü Cori na cuxü nangüxëëgüxü rü nüxü cungechaütümüügüxü rü cuxü nataäxëëgüxü.

Tama name i taxäne na Cristuchigaxü ixixü

³ Guxüguma i chütacü rü nguncü rü cuxna chacuëxächixü i chorü yumüxëwa, rü poraäcü cuxcëx moxë Tupanana chaxã. Rü nüxü nixi i chapuracüxü i mexü i chauäëmaã, yexgumarüü ga nuxcümaügüxü ga chorü oxigü naxügüürüü. ⁴ Choma rü nüxna chacuëxächi na ñuxäcü poraäcü chauxcëx cungechaüxü rü chauxcëx cuxaxuxü ga yexguma cuxna íchixüxgu. Rü wenaxäru cuxü chadauxchaü na aixcüma chataäxüçëx. ⁵ Erü nüxna chacuëxächi na ñuxäcü aixcüma Tupanaäxü cuyaxöxü. Rü curü noxë ga Loída rü cue ga Euníchia rü tüma rü woetama tüxira Tupanaäxü tayaxögü rü nüxü chacuëx i ñuxma rü cuma rü ta aixcüma cuyaxöxü. ⁶ Rü ngëmacëx cumaã nüxü chixu na cugü cuporaxëëxü na yexeraäcü cunaxüamaxüçëx i ngëma Tupanaärü puracü ga naxcëx cuxna naxãäxü ga cuëx ga yexguma noxri cuxü chingögüäcüma cumaã chayumüxëgu. ⁷ Yerü Tupana rü tama tüxna nanamu ga naãe i tüxü muëëxü. Natürü tüxna nanamu ga Naãe i Üünexü na tüxü naporaxëëxüçëx na aixcüma duüxügüxü ingechaügüxüçëx rü meã yigümaã icuáxüçëx. ⁸ Rü tama chanaxwëxe na cuxänexü na nüxü quixuxü i nachiga ya törü Cori. Rü ngëxgumarüü ta tama chanaxwëxe i chauxcëx cuxäne i ngëma na chapoxcuxü naxcëx i Tupanaärü ore. Rü name nixi i yaxna namaã cuxinü i ngëma ngüxü i cuxcëx ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë. ⁹⁻¹⁰ Rü Tupana tüxü namaxëë rü tüxü nade na naxcëxícata ma imaxëxüçëx. Natürü tama tacü rü mexü na ixixüügagu nixi ga yemaäcü tamaã namecümaxü ga Tupana. Natürü yemaäcü tüxü narüngüxëë yerü woetama yema nixi ga nanaxwëxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaücü, rü yexguma ínanguxgu ga törü maxëëëruü ga Ngechuchu ya Cristu, rü yexguma nixi ga Tupana tüxü nüxü dauxëëxü na ñuxäcü poraäcü tüxü nangechaüxü. Rü nüma ga Cristu nixi ga iyanaxoxëëäxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuëxëë na yixema rü ta tüxü nangëxmaxü i ngëma maxü i taguma gúxü ega nüxü yaxöxgu. ¹¹ Rü Tupana choxü ningucuchixëë na nüxü chixuxüçëx i ngëma norü ore i mexü. Rü choxü namu na ngëma oremaã chanangüxëëxüçëx i duüxügü i guxüwama. ¹² Rü ngëmacëx nixi i poraäcü ngüxü chingexü rü chapoxcuxü i ñuxmax. Natürü tama naxcëx chaxäne i ngëma, erü choma nüxü chacuëx na texéaxü chayaxöxü. Rü nüxü chacuëx na naporaxü i nüma na nüxna nadauxüçëx i ngëma puracü i choxna naxäxü

rü namaã inacuáxcèx i chauãe i guxũgutáma ñuxmatáta ngẽma ngunexũ i nagu wena núma naxũxũ. ¹³ Rü chanaxwẽxe i meãma nagu quixũ i ngẽma ngxẽẽtae i mexũ ga chauxũtawá naxcèx cungũxũ. Rü name nixĩ i meã nüxũ cuyaxõõma ya Ngechuchu ya Cristu rü meã nüxũ cungechaũ i guxũma i duũxũgũ, erũ Cristuarũ duũxũ quixĩ. ¹⁴ Rü name nixĩ i Tupanaãe i Üünexũ i tawá maxũũãrũ ngũxẽẽmaã ícunapoxũ i ngẽma ngxẽẽtae i mexũ i Tupana cuxna ãxũ. ¹⁵ Cuma marũ nüxũ cucuẽ rü guxũma ga yema yaxõgũxũ ga Áchiaarũ naãnewa ne íxũ rü marũ choxna naxĩgũ. Rü yematanũwa nayexma ga Figueru rü Ermóquene. ¹⁶ Onesíferu rü muẽxpũxcũna choxũ nataãexẽẽ, rü tama chauxcèx naxãne i ngẽma na chapoxcuxũ. Rü ngẽmacèx chanaxwẽxe i tórũ Coriaxũ nangechaũtũmũũgũ i guxũma i natanũxũgũ. ¹⁷ Rü yexguma noxritama Dumawa nanguxgu ga nümax, rü chauxcèx nadauecha rü ñuxmata choxũ iyangu. ¹⁸ Cuma meãma nüxũ cucuẽ ga ñuxãcũ tũxũ na nangũxẽẽxũ ga Onesíferu ga Epẽchiuarũ íãnewa. Rü ngẽmacèx chorũ yumũxẽwa naxcèx íchaca na Tupanaãxũ nangechaũtũmũũxũcèx i ngẽxguma wena ñoma i naãnewa naxũxgu ya tórũ Cori ya Ngechuchu.

2

Ngechuchu ya Cristuarũ puracũtanũxũ i mexũchiga

¹ Rü ñuxma, Pa Chaune, Pa Timutéux, ¡rũ cugũ naporaxẽẽ namaã i ngẽma pora i Ngechuchu ya Cristu cuxna ãxũ! ² Yema ore ga chauxũtawá nüxũ cuxĩnũxũ ga yexguma muxũma ga duũxũgũpẽxewa nüxũ chixuxgu, rü chanaxwẽxe i ñuxma cuxi ngẽma oremaã cunangũxẽẽ i togũ i yatũgũ i meã naãẽxũ cuẽxgũxũ na nüxĩ togũxũ nangũxẽẽxũcèx namaã i ngẽma ore. ³ Rü tama name i naxcèx cumuũ na Ngechuchu ya Cristuarũ ore-gagu ngũxũ quingexũ. Natürũ name i namaã cupora ñoma wũxi i mexũ i norũ churararũ. ⁴ Rü wũxi i duũxũ i churarawa ngẽxmaxũ, rü taxucürũwama to i puracũ i tama churaraarũ íxĩũgu narũxĩnũ. Natürũ ngẽma norũ ãẽxgacũ nagu namuxũ i puracũgu nixĩ i naxĩnũxũ na ngẽmaãcũ norũ ãẽxgacũxũ nataãexẽẽxũcèx. ⁵ Rü ngẽxgumarũũ ta wũxi i duũxũ i wũxi i ínũcawa nügũ ingucuchixẽẽxũ, rü taxuacũma nanayaxu i norũ ãmare ega chixri naxĩnũcèxwèxegu rü tama ngẽma ínũcaarũ ãẽxgacũga naxĩnũgu. ⁶ Rü texé ya naãnewa puracũxe rü name nixĩ i tũxira tanayaxu i tũmanetũarũ o. ⁷ ¡Rũ guxũguma nagu rũxĩnũ i ñaã ore i cumaã nüxũ chixuxũ! Rü nüma ya Cori ya Ngechuchu tá cumaã inanangũxũxẽẽ i guxũma na nüma nanaxwèxexũãcũma cunaxũxũcèx i ngẽma puracũ. ⁸ ¡Rũ nüxna nacuẽxãchi ya Ngechuchu ya Cristu ya Dabítanũxũ ga guma yuwa írudacũ! Rü yimachiga nixĩ i ngẽma ore i mexũ i duũxũgũmaã nüxũ chixuxũ. ⁹ Rü ngẽma oregagu nixĩ i ngũxũ na chingexũ rü ñoma wũxi i máetaxũrũ nüma poxcupataũwa cadenamaã chichotaxũ. Natürũ Tupanaãrũ ore i mexũ, rü guxũwama nanguama rü taxucürũwama texé tayachota. ¹⁰ Rü ngẽmacèx yaxna namaã chaxĩnũ i ngẽma ngũxũ i chingexũ naxcèx i ngẽma duũxũgũ i Tupana dexũ. Erũ chanaxwẽxe i nümagũ rü ta Ngechuchu ya Cristuaxũ nayaxõgũ, rü ngẽmaãcũ na nayauxgũãxũcèx i maxũ i mexũ i taguma gũxũ. ¹¹ Rü pemaã nüxũ chixuxchaũ i wũxi i ore i aixcũma íxĩxũ. Rü ngẽxguma Cristu yuxũrũ norũ orexè yuegu, rü naxrũũ tá ta wena tamaxè na nüma ínangẽxmaxũwa íngẽxmagũxũcèx. ¹² Rü ngẽxguma ñoma i naãnewa yaxna namaã íxĩnũegu ega ngũxũ íngexgu, rü daxũguxũ i naãnewa rü wũxigu namaã ãẽxgacũ tá tixĩgũ. Rü ngẽxguma tama Cristuxũ icuáxchaũgu i ñoma i naãnewa, rü nüma

rü täütáma tüxü nacuáxchaü i daxüguxü i nañnewa. ¹³ Natürü woo ñuxguacü i yixema rü tama aixcüma naxüxgu i ngéma Tupanamaã ixunetaxü, natürü nüma ya Tupana rü guxüguma nayanguxéë i ngéma tamaã inaxunetaxü, erü taxuacüma nügütama nawomüxéë.

Wüxi i mexü i puracütanüxü i Tupana namaã taãxüchiga

¹⁴ Rü ngéma yaxögüxü i cuxütawa ngëxmagüxü, rü name nixi i Tupanaegagu nüxna nüxü cucuêxächixéë na tama nuxcümaügüxü i ore i taxuwama mexüçex nügümaã na yaporagatanücüxüçex. Erü ngéma rü wüxi i chixexü nixi, rü nanachixéãëxéë i ngéma duüxügü i nüxü ñnüëxü. ¹⁵ ¡Rü cugü naporaxéë na meã cunaxüxü i Tupanaärü puracü na tamaã nataãxüçex i ngëxguma napëxewa cunguxgux rü ngemaãcü taxucëxma cuxãnexüçex i ngëxguma nüma cuxna nacaxgu naxcëx i curü puracüchiga! ¡Rü ngëmacëx name i aixcüma meã namaã cüngüxéëtae i ngéma ore i mexü i aixcüma ixixü! ¹⁶ ¡Rü nüxü rüxo i ñoma i naãneçüãxârü dexagümare i taxuwama mexü! Erü ngéma duüxügü i ngéma dexagümaregu ñxü, rü guxüguma yexeraãcü chixëngu nayi. ¹⁷ Rü ngéma norü ngxéëtae i ngéma duüxügü, rü ñoma wüxi i ñaaweane i tüxü íyimachixéëxürüü nixi. Rü yema nixi ga nüxü ngupetüxü ga Imenéu rü Firetu. ¹⁸ Yerü nidoragümare ga nüxü na yaxugüexü rü marü na nangupetüxü i yuetaarü dachiga. Rü yemaãcü nanawomüxéëgü ga ñuxre ga duüxügü na tama noxrirüü yaxögüãxüçex i Tupanaärü ore. ¹⁹ Natürü Tupanaärü ore rü taguma inayarüxo rü taguma naxüchicüü. Rü ngéma norü orewa rü ñanagürü:

“Törü Cori ya Tupana nüxü nacuëx i texé tixi ya norü duüxügü ixigüxe. Rü guxâma ya yixema nüxü ixuxe na Ngechuchu ya Cristu rü tümaärü Cori yixü, rü name nixi i nüxna tixigachi i guxüma i chixexü”,

ñanagürü i ngéma norü orewa. ²⁰ Wüxi i duüxü i diëruãxüchixü rü napatawa nangëxma i poratu i uirunaxcëx rü diërumünaxcëx. Rü nangëxma ta i poratu i nañnaxcëx rü waixümunaxcëx. Rü ngéma poratu i uirunaxcëx rü diërumünaxcëx rü mexü i norü ñnacëx nixi. Natürü ngéma poratu i nañnaxcëx rü waixümunaxcëx rü guxchirechixü nixi. ²¹ Rü ngëxguma wüxi i yaxöxü naxwëxegu na aixcüma mexü i Tupanaärü puracütanüxü na yixü, rü name nixi i nüxna nixügachi i guxüma i chixexü. Rü ngëxguma tá nixi i Tupanapëxewa aixcüma naxüünexü na naxüãxüçex i nagüxüraüxü i puracü i Tupana namaã nüxü ixuxü. ²² ¡Nüxü rüxo i guxüma i ngéma chixexü i ngextüxüçügü nagu rüñnüëxü! ¡Rü meã Tupanapëxewa namaxü rü aixcüma nüxü yaxö! ¡Rü nüxü nangechaü i guxüma i duüxügü, rü täxü i namaã cunuxü! ¡Rü ngémaãcü namaxü wüxigu namaã i guxüma i ngéma duüxügü i aixcüma Tupanacëx maxëxü rü ngemaãcü yumüxëgüxü! ²³ Rü tama name i naxcëx icurüxñnü i ngéma dexagü i taxuwama mexü. Erü ngéma dexagügagu rü düxwa nügüchi naxaie i duüxügü. ²⁴ Rü wüxi i Tupanaärü puracütanüxü rü tama name na texemaã nüçex nadauxü. Rü narümemae nixi na guxâma namecümäxü. Rü nanaxwëxe i yaxna namaã naxñnüãcüma meã duüxügüxü nangüxéë i Tupanaärü ore. ²⁵⁻²⁶ Rü wüxi i Tupanaärü puracütanüxü rü name na yaxna namaã naxñnüãcüma meã nayaxucüxëgüãxü i ngéma duüxügü i tama irüñnüëchaüxü. Rü name i ngémaãcü inanguxéë na Tupana nüxü rüngüxéëxü i ngéma duüxügü na nüxü naxoëxüçex i norü chixexü rü nüxü nacuëxgüxüçex i ngéma ore i aixcüma ixixü. Erü Tupana nanaxwëxe na naxuãëgüxü i ngéma duüxügü rü nawa inanguxüxü i ngéma chixexü i ngoxo i Chataná nagu nayixéëxü na noxrütama ngüchaü namaã naxüxüçex.

3

Nuxácü tá nixí i duixügücüma i ngëxguma nagúxchaügu i naâne

1 Rú chanaxwëxe i núxü cucuëx rü ngëxguma nagúxchaügu i naâne rü tá nangëxma i äücümáxügü rü guxchaxügü naxcëx i duixügü. 2 Rú duixügü rü tá nügüguxicatama narüxínüë, rü norü díëruyama tá narüxínüë. Rú tá nügü nicuëxüxügü, rü ngëmaäcü tãütáma núxü nacuëxgüchaü i togü i duixügü i tama naxrüü taarü díëruâxgüxü. Rú chixri Tupanachiga tá nidexagü, rü tãütáma nanatüga rü naëga naxínüëchaü. Rú tãütáma moxë inaxä i ngëxguma Tupana núxü rüngüxëëgu, rü ngëmaäcü tãütáma núxü nacuëxgüchaü i Tupanaärü ore. 3 Rú tãütáma nagu narüxínüë i togü i duixügüxü na nangechaügüxü, rü tãütáma núxü nangechaütümüügü. Rú tá naxoregütèëxgü, rü tãütáma nügü naporaëxë na yaxna namaã naxínüëxüçëx i naxünearü ngüchaügü. Rú tá nichixecüma, rü tá naxchi naxaie i guxüma i ngema mexü. 4 Rú duixügüechitawëxëgüxü tá nixígü, rü nuëwëxëü tá nixígü, rü nügü icuëxüügüxü tá nixígü. Rú tá norü ngüchaüçëxama nadaagü, rü tãütáma Tupanaxü nacuëxgüchaü. 5 Rú tá nügü nayaxögüxüchinëtaxëë natürü ngëma norü chixëxü i naxügüxüwa tá nangoxoma na tama aixcüma yaxögüãxü i ngëma ore i mexü. Rú ngëma duixügü i ngëmaäcü maxëxü, rü tama name na namaã cuxãmüçüxü rü natanügu cuxãxü. 6-7 Erü ngëma duixügütanüwa nangëxmagü i nümaxü i ípatagu ichocuetanüxü. Rú norü ngüxëëtaemaã nayawomüxëëgü i ngëma ngëxügü i ngema ngëxmagüxü i tama naãëxü icuáxü rü chixri maxëxü. Rú ngëma ngëxügü, rü norü ngüchaügütama chixëxüwa nanagagü, rü ngëmacëx woo guxügüma nangúë natürü taguma aixcüma núxü nacuëxgü i ngëma ore i aixcüma ixixü. 8 Rú ngëma duixügü i chixëxümaã ngüxëëtaëgüxü, rü chixëxüguxicatama narüxínüë, rü tama aixcüma nayaxögü i Tupanaärü ore. Rú naxchi naxaie i ngëma ore i aixcüma ixixü, naxrüü ga yema yuüxügü ga Yane rü Yáubre ga tama Moíchëga ínüëchaüxü. 9 Natürü tãütáma muxü i duixügü núxü nayaxögü. Erü guxüwama i duixügü rü tá núxü nicuëxächitanü na wüxi i duixügü i chixëxügü rüxínüëxü rü ngeãëmarexü yixígüxü naxrüxü ga yema taxre ga tama Moíchëga ínüëchaüxü.

Ucuxëmaã inyacuëxëë ga Pauru na Timutéumaã yadexaxü

10-11 Natürü cumax, Pa Timutéux, marü núxü cucuëx ga ñuxácü meã na chanangüexëëxü ga duixügü, rü ñuxácü meã chamaxüxü, rü ñuxácü nagu charüxínüxü rü meã chayaxöxü, rü ñuxácü yaxna namaã chaxínüxü ga duixügü rü núxü changechaüxü. Rú cuma núxü cucuëx ga ñuxácü na chaugü chaporaxëëxü na yaxna namaã chaxínüxü i guxchaxügü. Yerü ga duixügü rü chowe ningexütanü na choxü yamëxgüxüçëx. Rú cuma rü núxü cucuëx ga íacü choxü na úpetüxü ga Aütioquiawa rü Içünüwa rü Listrawa, rü ñuxácü chowe na yangëxütanüxü rü poraãcü ngüxü chingëxü. Natürü tórü Cori ya Tupana choxü ínapoxü na tama choxü yamëxgüxüçëx. 12 Rú aixcüma cumaã núxü chixü rü guxãma ya yíxema naxwëxëgü na Ngechuchu ya Cristucëx tamaxëxü, rü togü tá tümachi naxaie rü chixri tá tümamaã nachopetü. 13 Natürü ngëma duixügü i chixëcümagüxü rü ngëma duixügü i idoratëëxgüxü rü yexeraxü i chixëxügü tá nayi. Erü Chatana marü nayawomüxëëgü, rü ngëmacëx nüxü togüxü nawomüxëëgü. 14 Natürü i cuma rü name nixí i guxügüma meã nagu quixü i guxüma i ngëma ore i marü cungüxü. Erü cumatama rü núxü cucuëx na aixcüma yíixü i ngëma ore, rü

nüxü cucuèx na texégü tixīgüxü ga guxema namaã cuxü nguxëëgüxe. ¹⁵ Rü cuma nüxü cucuèx rü cubuxgumamatama nawa cungux i ngëma Tupanaärü ore i iünexü. Rü ngëmawa cunayaxu i cuèx na nüxü cucuáxüçèx i ñuxäcü tüxü na nangëxmaxü i maxü i taguma güxü ega Ngechuchu ya Cristuaxü yaxögügu. ¹⁶ Rü guxüma i Tupanaärü ore i umatüxü rü nügüäewatama nanayaxu ya Tupana. Rü ngëma ore rü name na duüxügüxü namaã ingüxëëxü, rü namaã yaxucuxëgüxü rü namaã iyanawëxächixëëgüxü, rü namaã nangüxëëxü na meã Tupanapëxewa namaxëxüçèx. ¹⁷ Rü ngëmaäcü i ngëma ore rü tüxü narüngüxëë ya yixema Tupanaärü ixixë, na meã nüxü tacuáxüçèx i ngëma Tupana naxwëxexü rü itamemarexü na tanaxüxü i nagüxüraüxü i puracü i Tupana tümamaã nüxü ixuxü.

4

¹⁻² Rü nüma ya Ngechuchu ya Cristu ya núma tá ücü na nüxü yacagüxüçèx i ngëma duüxügü i maxëxü rü ngëma marü yuechirëxü, rü yimapëxewa rü Tupanapëxewa cuxü chamu na nüxü quixuxüçèx i ngëma ore i mexü. Rü ngëxguma cuxü yatauxchaächigu rü woo cuxü naguxchagu, rü chanaxwëxe i nüxü quixuama i ngëma ore. Rü ngëmaäcü chanaxwëxe na icuyanawëxächixëëgüxü rü meã cuyaxucuxëgüxü rü nüxü cunangücháxëëxü i duüxügü. Rü name nixi i yaxna namaã cuxinüäcüma meã cunangüxëë. ³ Erü yixcüra i duüxügü rü täütáma nüxü naxinüëchaü i ngëma nguxëëtae i mexü. Erü ngëma duüxügü rü nichixecüma. Rü ngëmacèx naxcèx nadaugü i norü ngüxëëruügü i nüma nanaxwëxëgüxüäcüma nangüxëëxü. ⁴ Rü täütáma nüxü naxinüëchaü i Tupanaärü ore i aixcüma ixixü. Erü ngëma ore i doramare ixixüguama tá narüxinüë. ⁵ ¡Natürü cuma rü meã cügüna nadau, rü ínaxuäë, rü namaã napora ega ngüxü cuxü üpetügu! ¡Rü nüxü ixuama i ore i mexü i tüxü maxëxëëxü, rü meã yanguxëë i ngëma puracü i Tupana cuxna äxü! ⁶ Täütáma muxü i ngunexü ñoma i naänewa changëxma erü marü choxü ningaica na Tupanaärü puracü chaxüxügagu chayuxü rü choxü na yamëxgüxü i duüxügü. ⁷ Rü choma rü marü chayanguxëë i ngëma puracü i Tupana choxna äxü. Rü ñuxma na nagüxü i ngëma puracü rü taguma nüxü charüxo na chayaxöxü. ⁸ Rü ñuxma rü marü Tupana choxü namaã nanguxü i ngëma ämare i mexëchixü ya törü Cori ya Ngechuchu ya äëxgacü ya mecü tá choxna äxü i ngëxguma wenaxärü ñoma i naänewa naxüxgu. Rü täütáma chaxica choxna nanaxä i ngëma ämare, natürü tá tüxna nanaxä ya guxäma ya yixema tümäärü ngücháümaã ínanguxëëgüxe na wenaxärü núma naxüxü.

Timutéuxü naxucuxë ga Pauru

⁹ Cumaã nüxü chixu rü chanaxwëxe i paxa nuã cuxü, rü choxü ícuyadau. ¹⁰ Dema rü ñoma i naänëärü ngëmaxügu naxinüxügagu choxna nixü rü ñane ga Techarónicawa naxü. Rü Crechéüte rü Gáraaanewa naxü, rü Titu i Darumáchiaanewa. ¹¹ Rü Lucaxicatama nixi i ñuxma chauxütawa ngëxmaxü. Rü chanaxwëxe i naxcèx cudau i Marcu na nuã cunagaxüçèx. Erü nüma rü chauxcèx name na choxü na nangüxëëxü i ñaã puracüwa. ¹² Rü Tíquicu rü ñane ya Epéchiuwa chanamu. ¹³ ¡Ngëxguma nuã cuxüxgu rü nuã nange i chorü gáxüxchiru ga ñane i Tróawa ngëxmaxü ga Carpupatawa chatáxü! Rü chanaxwëxe i nuã cunana i chorü poperagü. Rü guxüärü yexera chanaxwëxe na nua cunanaxü i chorü poperagü i idixgüpütaxü. ¹⁴ Areyáüdrü i cobrenaxcèx i buetarearü üwa puracüxü rü poraäcü chixri chomaã naxüpetü.

Natürü Tupana nüxü nacuèx i ñuxãcü tá na napoxcuãxü naxcèx ga yema chixexü ga chomaã naxüxü. ¹⁵ ¡Meã cugüna nadau na tama chixexü cumaã naxüxüçèx! Erü poraãcüxüchima naxchi naxai i Tupanaärü ore i mexü. ¹⁶ Yexguma noxrixüchima ãëxgacügüpëxewa chaugütüwa chideaxgu rü taxüema choxü tarüngüxëë. Guxüma choxna nibuxmü. Natürü tama chanaxwèxe ya Tupana rü nagu narüxînü i ngëma. ¹⁷ Natürü tórü Cori choxü naporaxëë rü choxü narüngüxëë na choxü natauxchaxüçèx na nüxü chixuxüçèx ga norü ore i mexü i tüxü maxëxëëxü. Rü yemaãcü guxüma ga yema duüxügü ga tama yaxögüxü ga yéma yexmagüxü rü nüxü naxînüë ga yema ore. Rü yemaãcü tórü Cori ya Ngechuchu choxü inanguxuchixëë ga yexguma taxü ga ãücümaxüwa chayexmagu. ¹⁸ Rü nüma ya tórü Cori tá choxü inanguxuchixëë nawa i guxüma i chixexügü. Rü tá choxna nadau na ngextá ãëxgacü iyîxüwa choxü nagaxüçèx. Rü name i guxüguma nüxü ticuèxüügü. Rü ngëmaãcü yîi.

Pauru rü wenaxârü Timutéuxü narümoxë rü naxcèx ínaca na Cori ya Ngechuchu ya Cristu nüxü rüngüxëëxü

¹⁹ Chanaxwèxe i chauégagu nüxü curümoxë i Prisila, rü Aquiru, rü Onechéperutanüxügü. ²⁰ Eratu rü îâne i Corîtiugu narüxãüx. Rü Turuquínu rü idaaawexüma îâne i Miretuwa chanatëx. ²¹ Rü naxüpa i gáuanexü rü chanaxwèxe i nuã cuxü. Rü cuxü narümoxëgü i Eubúru, rü Prudëte, rü Linu, rü Cúdia, rü guxüma i taeneëgü i yaxögüxü. ²² Rü chanaxwèxe i tórü Cori ya Ngechuchu ya Cristu cumaã nangëxma, rü Tupana pexü narüngüxëë ya guxâma i pemax.

Rü nuãma pexna,
Pauru

POPERA GA TITUCAX NAXÜMATÜXÜ GA PAURU

Tituxü narümoxë ga Pauru

¹⁻² Pa Titux, choma i Pauru i Tupanaârü puracütanüxü nixi i cuxcèx chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duüxügü i Tupana dexümaã nüxü chixuxüçèx i norü ore na Tupanaãxü yaxögüãxüçèx rü nüxü nacüëxgüxüçèx i ngëma norü ore i aixcüma ixixü i tüxü rüngüxëëxü na naxcèx imaxëxüçèx. Rü ngëmaãcü Tupanaãxü tayaxögü rü naxcèx tamaxëchaü erü tanayauxgüchaü i ngëma maxü i taguma güxü. Rü ngëma maxü i taguma güxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³ Rü ñuxma rü marü nawa nangu na Tupana tüxü nüxü cuëxëëxü i ngëma norü ore i mexü i tüxü maxëxëëxü. Rü ngëmacèx nümatama ya Tupana ya törü maxëxëëruü choxü namu na nüxü chixuxüçèx i ngëma norü ore. ⁴ Pa Titux, cuma rü chaune quixi i Tupanaârü orewa yerü chauxütawa cunayaxu ga Tupanaârü ore ga noxri rü ñuxma rü chauxrüü cuyaxö. Rü chanaxwëxe i cuxü narüngüxëëgü rü cuxü nataãxëëgü ya Tanatü ya Tupana rü Ngechuchu ya Cristu ya törü maxëxëëruü.

Tituarü puracü ga yexguma Crétawa nayexmagu

⁵ Rü yexguma Crétaarü capaxügu cuxü chamüxgux, rü cumaã nüxü chixu na yema yaxögüxütanüwa cunaxüxü ga yema puracü ga tama chinguxëëxü ga yexguma cuxna yéma chataegugu. Rü yemacèx cumaã nüxü chixu na wüxichigü ya ñanewa rü nüxü cuxunetaxü i tupaucaarü äëxgacügü na ngema yaxögüxümaã inacuëxgüxüçèx, yema cuxü chamuxüruü. ⁶ Rü wüxi i äëxgacü i yaxögüxüârü, rü name i meã namaxü na taxüema chixri nachiga idexagüxüçèx. Rü name i wüxitama tixi ya namèx. Rü naxãcügü rü name na yaxögüãxü rü meã namaxëxü na taxüema nüxü ixuxüçèx na chixri namaxëxü rü tama nanatüga naxinüëxü. ⁷ Erü yixema yaxögüxüârü äëxgacü ixixë, rü Tupanaârü puracü nixi i taxüxü. Rü ngëmacèx tanaxwëxe i aixcüma meã tamaxü. Rü tama name i wüxi i yatü i chixecümaxü tixi rü chixexügu rüxinüxü tixi. Rü tama name na tangãxüxü, rü nuxèx tadauxü, rü togü i duüxügüxü tawomüxëëxü norü dïerucèx. ⁸ Natürü narümemae na guxügüma meã duüxügüxü tayaxuxü i tümapatawa, rü aixcüma nüxü tangechaü i ngëma duüxügü i meã maxëxü. Rü tanaxwëxe i wüxi i yatü i aixcüma tümãëxü cuáxe tixi, rü guxügüma duüxügümaä mecümaxë tixi, rü aixcüma Tupanacèx maxüxë tixi, rü guxügüma meã tümãmaä icuáxe tixi. ⁹ Rü yixema yaxögüxüârü äëxgacü ixixë rü name i nagu tixü i ngëma ore i aixcüma ixixü ga tümamaã nüxü ixuxü na tümã rü ta togüxü tangüexëëxüçèx i ngëma ore i mexü, na ngëmaãcü nüxü tanangüchaüxëëxüçèx rü nüxü tayaxögüxëëxüçèx i ngëma duüxügü i noxri tama yaxögüchaüxü. ¹⁰ Erü nangëxma i muxüma i yaxögüchirëxü i tama aixcüma irüxinüëchaüxü. Rü ngëma guxüârü yexera tama irüxinüëchaüxü nixi i ngëma Yudiügü i yaxögüchirëxü i ñuxma naxwëxegüxü na nuxcümaügüxü i nacümaawe naxixü i ngëma yaxögüxü. Rü nümagü rü ore i taxuwama mexüxü nixugügü, rü ngëmaãcü duüxügüxü nawomüxëëgü. ¹¹ Natürü ngëma duüxügü i ngëmaãcü chixri nguxëëtaegüxü, rü chanaxwëxe i noxtacüma icuyanangeëxgüxëë. Erü muxüma i duüxügüxü

nachixexēgü rü ñuxmata ñuxre ya İpatawachigü rü nanachixexēē i guxüma i duñxügü na tama aixcüma Tupanaaxü yaxögüaxüxcèx. Rü ngēma ore i taxuwama mexümaā duñxügüxü nangüexēē na ngēmaācü tüxü nawomüxēgüācüma ngixü nayauxgüxcèx i dīeru. ¹² Rü wüxi ga yematama capaxüçāx ga norü tupanaärü orearü uruü nixi ga natanüxügüxütama ixuxü rü ñaxü:

“Rü ñaā Cretacüāx i duñxügü rü guxüguma doratèxgüxü nixigü, rü ñoma naēxügürüü nidürae, rü nitaanü, rü nixoxochi”, ñaxü. ¹³⁻¹⁴ Rü aixcüma nixi ga yema ore ga nüxü yaxuxü ga yema yatü. Rü ngēmacèx chanaxwèxe i poraācü cuyaxucuxègü i ngēma yaxögüxü na aixcüma meā yaxögüāxüxcèx, rü tama nagu naxiüxcèx i ngēma Yudiügücüma. Rü chanaxwèxe i namaā nüxü quixu na tama naga naxiñüxcèx ega çacü namuāxgu i ngēma duñxügü i tama nüxü cuèxgüchaüxü i ore i aixcüma ixixü. ¹⁵ Rü yixema aixcüma Tupanapèxewa mexè rü guxüwama tame. Natürü yixema tama aixcüma Tupanapèxewa mexè, rü taxucürüwa çacü rü nacüma i nagu tixüxümaā tügü tamexēē. Rü woo tümaāewa nagu tarüxüñüxüwa rü tachixe erü ngēma nacüma i nagu tixüxümaā Tupanapèxewa tügü tamexēēchaü. ¹⁶ Rü ngēma duñxügü i ngēmagu rüxüñüxcèx rü nügü yaxugügügu rü Tupanaxü nacüèx, natürü ngēma nümagü naxügüxüwa nüxü tacuèx na tama aixcüma yixü na Tupanaxü nacüèxgüxü. Rü nümagü rü Tupanapèxewa nichixe, rü tama naga naxiñü, rü taxuwama nime na çacü rü mexü naxügüxü.

2

Nguxēētae i aixcüma mexü

¹ Natürü i cuma, Pa Titux, rü name i guxügutáma ngēma mexü i nguxēētaemaā cunangüexēē rü taguma nüxna quixügachi. ² ;Rü meā yaxucuxègü i ngēma yatügü i yaguāxgü na aixcüma meā naāexü nacuaācüma namaxèxcèx, rü taguma nadauxcüraxüwèxegüxcèx, rü guxüguma meā nagu na naxiñüxcèx! ;Rü nangüexēē na aixcüma meā Tupanaaxü yaxögüāxüxcèx, rü guxü i duñxügüxü nangechaügüxcèx, rü yaxna namaā naxiñüxcèx ega woo çacü rü guxchaxü nüxü üpetügux! ³ Rü ngèxgumarüü ta chanaxwèxe i meā cuyaxucuxègü i ngēma ngexügü i yaguāxgü na meā Tupanapèxewa namaxèxcèx. Rü tama name na yaxoregütèxgüxü, rü nangāxèwèxegüxü. Rü name nixi i guxü i duñxügüpèxewa rü meā namaxè. ⁴⁻⁵ Rü ngēma ngexügü i yaguāxgü rü name nixi i meā na nangüexèēaxü i ngēma ngexügü i paxügü na aixcüma natexü rü naxäcügüxü nangechaügüxcèx, rü meā naāexü nacüèxgüxcèx, rü mexügüxicatama na naxiñüxcèx, rü meā napatana nadaugüxcèx, rü guxü i duñxügümaā namecümagüxcèx, rü aixcüma natega naxiñüxcèx na taxüma chixri Tupanaärü orechiga idexagüxcèx. ⁶ ;Rü ngèxgumarüü ta meāma yaxucuxègü i ngēma ngexügüxcèx na aixcüma meā naāexü nacuaācüma namaxèxcèx rü tama nadauxcüraxüwèxegüxcèx! ⁷ ;Rü cumatama rü name nixi i meā napèxewa cumaxü i guxüwama na ngēmaācü wüxi i norü cuèxruü i mexü quixüxcèx! Rü ngèxguma cunangüexèēgu, rü cunaxwèxe i mexügu curüxüñüxcèx cunangüexèē rü tama ünücaācüma namaā nüxü quixu i ngēma ore. ⁸ Rü ngèxguma ngēmaācü meā cunangüexèēgu i ngēma ore i mexü, rü taxüetama texè chixri natchiga tidexa. Rü ngēmaācü ya yixema chixri tachiga idexagüchaüxè rü tá taxāneē erü taxucürüwa çacü rü chixexüxü tixugü i tachiga. ⁹ ;Rü meāma yaxucuxègü i ngēma duñxügü i coriāxgüxü! ;Rü namaā nüxü ixu na guxüguma meā

norü coriga naxĩnũexũcèx, rü norü corimaã namecũmagũxũcèx, rü taguma norü corixũ nachoxũgagũxũcèx! ¹⁰ Rü tama name i norü coriaxũ nangĩxgũ, natürü nanaxwèxe i aixcũma meãma norü corimaã namaxè rü taguma nanawomũxèègũ. Rü ngèxguma ngèmaãcũ namaxègu, rü guxũma i togü i duũxũgũ tá nüxũ nadaugü na ñuxãcũ aixcũma namexèchixũ i ngèma ore i duũxũgũxũ namaã ingüexèèxũ nachiga ya Tupana ya tórü maxèxèèruũ. ¹¹ Tupana rü poraãcũxũchima tamaã namecũma, rü yemacèx núma nanamu ga Nane na guxũma i duũxũgũaxũ nangèxmaxũcèx i maxũ i taguma gũxũ ega nüxũ yaxõgũãgu. ¹² Rü ngèma na Tupana tamaã mecũmaxũwa nüxũ tacuèx na namexũ na nüxũ rüxoexũ i ñoma i naãneçũãxãrũ ngũchaũgũ rü guxũma i to i chixexũgũ i napèxewa ixũxũ. Rü ngèma Tupana taxcèx üxũ tüxũ nanguxèè na meã yigũmaã icuèxgũãcũma togü i duũxũgũpèxewa rü Tupanapèxewa meã imaxèxũ i ñoma i naãnewa. ¹³ Rü tüxũ nanguxèè ta na guxũguma meã ínanguxèègũxũcèx na nataeguxũ ya Ngechuchu ya Cristu ya tórü maxèxèèruũ ya tórü Tupana ya tacü ixĩcũ. Erü Tanatü ya Tupana rü tamaã inaxuneta na wena tá nataeguxũ ya Ngechuchu, rü wüxi i taãè tá nixĩ i ngèxguma ínanguxgu. ¹⁴ Rü núma ga Ngechuchu rü taxcèx nayu na tüxũ ínanguxũxèèxũcèx nawa i guxũma i chixexũ, rü tüxũ yamexèègũxũcèx na aixcũma norü duũxũgũ i mexũ ixĩgũxũcèx rü aixcũma naxcèx idaugũxũcèx na guxũguma mexũ ixũgũxũcèx. ¹⁵ Rü ngèma ore tá nixĩ i duũxũgũxũ namaã cungüexèèxũ rü nüxũ cunangũchaũxèèxũ na Tupanacèx namaxèxũcèx. Rü ngèma oremaã tá aixcũma cuyaxucuxègũ i duũxũgũ erü Tupanatama nixĩ ya cuxũ mucü na ngèmaãcũ cunaxũxũ. Rü tama name na texè cuxũ oxũ.

3

Ñuxãcũ name na namaxèxũ i ngèma yaxõgũxũ

¹ Rü ngèma yaxõgũxũ i duũxũgũ, ¡rü namaã nüxũ ixu na nachixũdanearuã ãèxgacũgũga naxĩnũexũ rü guxũma i ngema togü i ãèxgacũgũga naxĩnũexũcèx! ¡Rü yaxucuxègũ na ínamemaregũxũcèx na naxũgũãxũcèx i guxũma i mexũ i puracũgũ i ãèxgacũgũ unagũxũ! ² Rü tama name i texèchiga chixri nidexagü rü texèmaã nanuè. Natürü name nixĩ i guxũ i duũxũgũmaã namecũmagü rü aixcũma guxũ i duũxũgũxũ nangechaũgü rü tama nügü nicuèxũxũgü. ³ Rü name nixĩ i yaxna namaã taxĩnũè i ngèma tama yaxõgũxũ, yerü yixema rü ta ga ùpa rü chixri tamaxè, rü tama Tupanaga taxĩnũè. Rü itayarũtauxe rü tórü ngũchaũ tüxũ napora. Rü chixexũgu rüxĩnũèãcũma tamaxè rü taxãũxãchiwèxègü. Rü naxchi taxaie ga togü, rü núma rü ta taxchi naxaie. ⁴ Natürü yexguma Tupana ya tórü maxèxèèruũ tüxũ nüxũ dauxèègu i norü ngechaxũ naxcèx i guxũma i duũxũgü, rü núma rü tüxũ namaxèxèè. ⁵ Rü yema na tüxũ namaxèxèèxũ rü tama tacü rü mexũ na ixũgũxũgagu nixĩ, natürü tüxũ namaxèxèè yerü nüxũ tangechaũtũmũgü. Rü Naãè i Üünexũ i tüxũ ngexwacaxũxèèxũãrũ poramaã Tupana tüxũ inayanaxoxèè ga tórü pecadu na ngexwacaxũxũ i duũxũgü ixĩgũxũcèx. ⁶ Rü Ngechuchu ya Cristu ya tórü Maxèxèèruũgagu nixĩ ga Tupana ga guxũma ga norü ngũchaũmaã tüxna namuãxũ ga Naãè i Üünexũ. ⁷ Rü yemaãcũ tamaã namecũma rü tüxũ narũngũxèè ga Tupana na aixcũma imexũcèx i napèxewa, rü na nayauxgũxũcèx i ngèma írnguxèègũxũ i maxũ i taguma gũxũ. ⁸ Rü guxũma i ngèma marü cumaã nüxũ chixuxũ rü aixcũma nixĩ. Rü ngèmacèx chanaxwèxe i guxũguma nüxũ quixu i ngèma ore na aixcũma mexũ naxũgũxũcèx i ngèma duũxũgü i Tupanaãxũ yaxõgũxũ. Erü ngèma

ore rü guxŭwama name i guxăcèx. ⁹ ¡Natürü nüxna ixŭgachi i ngēma dexagü i taxuwama mexŭ i duŭxŭgü nawa nügü choxŭgagüxŭ rü ngēma oregü i nuxcŭmaŭgüxŭ i duŭxŭgüchigamare ixŭgüxŭ! ¡Rü nüxna ixŭgachi i ngēma nügü ngaexŭ! ¡Rü tama name na natanŭgu cuxăxŭ i ngēma duŭxŭgü i nügümaă nüxŭ rünuētanŭcŭxŭ nachiga i ngēma mugü ga Moïché ŭmatŭxŭ! Erü guxŭma i ngēma na nüxŭ rünuētanŭcŭxŭ rü taxuwama name, rü natŭcèxmamare nixŭ. ¹⁰ Rü ngēxguma chi wŭxie i petanŭwa rü chixexŭ i ngxŭētaemaă ngēma yaxŭgŭxŭxŭ titoyegu, rü name nixŭ i tŭmamaă nüxŭ quixu na tama ngexŭ tawagŭxŭcèx. Rü ngēxguma tanaxŭamagu, rü name nixŭ na wena tŭmamaă nüxŭ quixuxŭ. Rü ngēxguma tama cuga taxŭnŭchaŭgu rü tanaxŭamagu i ngēma chixexŭ rü name nixŭ i noxtacŭma tŭxŭ ícumuxŭchi natanŭwa i ngēma yaxŭgŭxŭ. ¹¹ Erü ngēma chixri na tamaxŭxŭwa rü tá nangox na tachixŭeăxŭ ya yixema duŭxŭ rü tŭmaărü pecadugagu tá nixŭ na tapoxcuxŭ.

Tituxŭ naxucuxŭ ga Pauru

¹² Rü ngēxguma cuxŭtawa chanamuxgu i Artema rü ěxna Tíquicu, rü chanaxwèxe i paxa Nicaporíchiuwa cuxŭ na choxŭ ícuyadauxŭcèx. Erü ngema tá nixŭ i chanangupetŭxŭxŭ ya yima tauemacŭgü ya nagu nagáuanecŭ. ¹³ Rü guxŭma i cuxŭ taxchaxŭmaă chanaxwèxe i nüxŭ curŭngŭxŭxŭ i âĕxgacŭ i Chena i Dumacŭăxgŭarŭ mugŭxŭ cuăxŭ rü Aporu na paxa núma naxŭxŭcèx. Rü chanaxwèxe i nüxna cunaxă i ngēma nanaxwèxexŭ i norŭ namawaŭ na taxuŭma nüxŭ taxuxŭcèx. ¹⁴ Rü ngēma taeneĕgü i yaxŭgŭxŭ, rü name nixŭ i naxcèx nangúe na mexŭ naxŭgŭxŭ rü togŭxŭ nangŭxŭĕĕgŭxŭ ega ŭacŭ nüxŭ taxŭgux. Rü ngēmaăcŭ i ngēma togŭ rü tá nayaxŭgŭ.

Pauru rü wenaxărü Tituxŭ narŭmoxŭ rü naxcèx ínaca na Tupana nüxŭ rŭngŭxŭĕĕxŭcèx

¹⁵ Rü guxŭma i taeneĕgü i nuă chauxŭtawa ngēxmagŭxŭ rü cuxŭ narŭmoxĕgü. Rü ngēxgumarŭŭ ta i choma rü chanaxwèxe i nüxŭ curŭmoxŭ i taeneĕgü i yaxŭgŭxŭ i cuxŭtawa ngēxmagŭxŭ. Rü chanaxwèxe i Tupana pexŭ narŭngŭxŭxŭ i guxăma i pemax.

Rü nuăma cuxna,
Pauru

POPERA GA FILEMÚŦCAX NAXŦMATŦXŦ GA PAURŦ

Pauru rŦ nŦxŦ narŦmoxŦ ga FilemŦ

¹ Pa ToeneŦ i FilemŦ i ToxrŦxŦ TupanaarŦ PuracŦwa PuracŦxex, choma i Pauru rŦ taeneŦ i TimutŦumaŦ cuxcŦx tanaxŦmatŦ i ŦaŦ popera. RŦ choma rŦ nuxa chapoxcu nagagu na nŦxŦ chixuxŦ i Ngechuchu ya CristuarŦ ore. ² RŦ ŦaŦ popera i cuxcŦx taxŦmatŦxŦ, rŦ naxcŦx ta nixŦ i ngŦma taeneŦgŦ i cupatawa ngutaquŦxegŦxŦ rŦ ngxŦcŦx ta nixŦ i taeyŦx i Ápia rŦ naxcŦx ta nixŦ i taeneŦ i Ariquepu i taxrŦxŦ TupanaarŦ puracŦwa puracŦxŦ. ³ RŦ chanaxwŦxe i TanatŦ ya Tupana rŦ tŦrŦ Cori ya Ngechuchu ya Cristu pexŦ narŦngŦxŦŦ rŦ pexŦ nataŦŦxŦŦ.

FilemŦ rŦ aixcŦma NgechuchuaxŦ nayaxŦ rŦ yema yaxŦgŦxŦxŦ nangechaŦ

⁴ RŦ guxŦguma i ngŦxguma cuxna chacuŦxŦchigu i chorŦ yumŦxŦwa, rŦ Tupanana moxŦ chaxŦ cuxcŦx. ⁵ ErŦ nŦxŦ chacuŦchiga na ŦuxŦcŦ nŦxŦ cuyaxŦxŦ ya tŦrŦ Cori ya Ngechuchu rŦ ŦuxŦcŦ nŦxŦ na cungechaŦxŦ i guxŦma i duŦxŦgŦ i TupanaarŦ ixŦgŦxŦ. ⁶ RŦ Tupanana naxcŦx chaca na cuxŦ nangŦxŦŦxŦcŦx na duŦxŦgŦmaŦ nŦxŦ quixuxŦcŦx na ŦuxŦcŦ CristuaxŦ yaxŦgŦxŦ i yixemax, erŦ chanaxwŦxe na meŦ nŦxŦ cucuŦxŦ na ŦuxŦcŦ Ngechuchu ya Cristugagu poraŦcŦ tŦxŦ nangŦxŦŦxŦ ya Tupana. ⁷ RŦ choma rŦ poraŦcŦ chataŦŦxŦchi na ŦuxŦcŦ nŦxŦ cungechaŦxŦ i ngŦma yaxŦgŦxŦ. ErŦ cugagu nixŦ, Pa ChaueneŦx, na nataŦŦgŦxŦ i ngŦma togŦ i yaxŦgŦxŦ.

Pauru rŦ FilemŦnaca na mea OnŦchimuxŦ nayaxuxŦcŦx

⁸⁻⁹ RŦ ngŦmacŦx nangŦxma i wŦxi i ngŦxŦŦ i cuxŦtawaw naxcŦx ŦchacaxchaŦxŦ. RŦ dŦcax, Cristu nixŦ ya choxŦ mucŦ rŦ ngŦmacŦx choxŦ nangŦxma i pora na cuxŦ chamuxŦ na cunaxŦxŦcŦx i ngŦma ngŦxŦŦ i mexŦ i tŦ cumaŦ nŦxŦ chixuxŦ. NatŦrŦ tama ngŦmaŦcŦ cuxŦ chamuxchaŦ erŦ cuxŦ changechaŦ, rŦ ngŦmacŦx chauxcŦx narŦmemaŦ nixŦ na cuxŦ chacŦŦxŦmarexŦ naxcŦx i ngŦma. RŦ choma i Pauru rŦ marŦ chaya rŦ Ŧuxma rŦ chapoxcu Ngechuchu ya CristucŦx. ¹⁰ RŦ ngŦmacŦx cuxna naxcŦx chacaxchaŦ i wŦxi i ngŦxŦŦ naxcŦx i OnŦchimu i nuŦ poxcupataŦwa chauxŦtawaw CristuxŦ yaxuxŦ. RŦ ngŦmacŦx i Ŧuxma rŦ TupanaarŦ orewa rŦ chaune nixŦ. ¹¹ RŦ Ŧpa ga OnŦchimu rŦ wŦxi ga curŦ duŦxŦ ga taxuwama cuxŦ mexŦ nixŦ. NatŦrŦ i Ŧuxma rŦ cuxŦ rŦ choxŦ rŦ ta name. ¹² RŦ Ŧuxma rŦ cuxcŦx chanataeguxŦŦ i nŦma i OnŦchimu. RŦ chanaxwŦxe i meŦ canayaxu, Ŧoma choxŦ cuyaxuxŦrŦŦ. ¹³ ChierŦ chanaxwŦxe na nuxma chauxŦtagu naxŦxŦ, rŦ na cuchicŦŦ choxŦ nangŦxŦŦxŦcŦx i Ŧuxma na chapoxcuxŦ naxcŦx i TupanaarŦ ore i mexŦ. ¹⁴ NatŦrŦ tama chanaxŦxchaŦ i ŦacŦ i tauta “NgŦ” ŦacuxŦ choxŦ. ErŦ ngŦma ngŦxŦŦ i cuxna naxcŦx chaŦaxŦ, rŦ chanaxwŦxe na curŦ ngŦchaŦtama yŦixŦ i ngŦma rŦ tama i chorŦ mugagu na yŦixŦ. ¹⁵ RŦ bexmana Tupana nanaxwŦxe na paxaŦchi cuxna yaxŦxŦ ga OnŦchimu na yixcama rŦ wenaxarŦ cuxcŦx nataeguxŦcŦx rŦ ngŦmaŦcŦ guxŦgutama cuxŦtawaw nangŦxmaxŦcŦx. ¹⁶ NatŦrŦ i Ŧuxma rŦ tama ngŦxŦrŦŦxŦmare i curŦ duŦxŦrŦŦ nixŦ, erŦ wŦxi i curŦ duŦxŦarŦ yexera nixŦ i Ŧuxmax, erŦ taeneŦ i nŦxŦ ingechaŦxŦ nixŦ. RŦ aixcŦma poraŦcŦ

nũxũ changechaũ i chomax, natũrũ chanawae i cuma rũ yexeraãcũ nũxũ cungechaũ. Erũ ñuxma rũ tama wũxi i curũ dũũxũmare nixĩ, natũrũ wũxi i cueneẽ i tũrũ Coriaxũ yaxõxũ nixĩ i ñuxmax. ¹⁷ Rũ ngẽmacẽx, rũ ngẽxguma choxũ cudẽuxgu na aixcũma cueneẽ chiĩxũ, rũ chanaxwẽxe i meã cunayaxu i Onẽchimu, ñoma choxũ cuyaxuxũrũ. ¹⁸ Rũ ngẽxguma ñacũ rũ chixexũ cumaã naxũxgu rũ ẽxna ñacũ cuxũ nangetanũgu, rũ chanaxwẽxe i chomaã nũxũ quixu na ñuxre yiĩxũ, na cuxũ chanaxũtanũxcẽx. ¹⁹ Rũ chomatama i Pauru rũ choxmẽxmaãxũchi chanaxũmatũ i ñãã popera. Rũ aixcũma chomatama tá cuxũ chanaxũtanũ. Rũ tãũtãma cuxna nũxũ chacuẽxãchixẽẽ na ñuxãcũ choxũ cunangetanũxũ i curũ maxũ i taguma gũxũ i chaugagu Tupanaxũtawa cuyaxuxũ. ²⁰ Rũ ngẽmaãcũ, Pa Chaueneẽx, rũ chanaxwẽxe i tũrũ Corigagu chaucẽx cunaxũ i ngẽma ngũxẽẽ. Rũ chanaxwẽxe i choxũ cutaãẽxẽẽ, erũ chaueneẽ i Cristuaxũ yaxõxũ quixĩ. ²¹ Rũ cuxcẽx chanaxũmatũ i ñãã popera erũ nũxũ chacuẽx na aixcũma chauga cuxĩnũxũ rũ tá cunaxũxũ i ngẽma cuxna naxcẽx chaçaxũãrũ yexera. ²² Rũ ngẽxgumarũũ ta chanaxwẽxe na chaucẽx cunamexẽẽxũ i wũxi i nachica i ngextã tá nawa changuxũ. Erũ íchananguxẽẽ na Tupana tá nangãxũxũ i perũ yumũxẽgũ, rũ tá choxũ nangũxẽẽxũ na pexũ íchayadauxũcẽx.

Pauru rũ wenaxãrũ Filemũũxũ narũmoxẽ rũ naxcẽx ínaca na Cori ya Ngechuchu ya Cristu nũxũ rũngũxẽẽxũ

²³ Rũ moxẽ cuxcẽx ngema namu i Epáparu. Rũ nũma rũ wũxigu chomaã napoxcu naxcẽx ya Ngechuchu ya Cristu. ²⁴ Rũ ngẽxgumarũũ ta moxẽ cuxcẽx ngema namugũ i Marcu, rũ Aritárcu, rũ Dema rũ Luca. Rũ nũmagũ rũ chomũcũgũ nixĩgũ i Tupanaãrũ puracũwa. ²⁵ Rũ chanaxwẽxe i tũrũ Cori ya Ngechuchu ya Cristu pexũ narũngũxẽẽ i guxãma i pemax.

Rũ nuãma cuxna,
Pauru

POPERA GA YUDÍUGÜ GA YAXŌGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcúma ga Tupana rü muëxpüxcúma na nagúxüraüxüãcúma norü orearü uruüğüwa tórü oxigúmaã nidexa, rü namaã nüxü nixu ga tacü nüxü na nanaxwëxexü. ² Natürü i ñomaüccüü ya Tupana rü Nanewatama nixi i tamaã yadexaxü rü tüxü nüxü nacuëxëëxü na ñuxácü tüxü nangüxëëchaüxü. Rü gumaxü nixi ga namuxü na naxüãxüccëx ga ñoma ga naãne rü daxüguxü ga naãne rü üëxcü rü tauemacü rü woramacurigü rü ëxtagü. Rü ñuxüchi guma Nanena nanana ga guxüma ga yema na noxrü yixüccëx. ³ Rü Nanewa nixi i nüxü idauxü na ñuxácü namexëchixü i nüma ya Tupana. Rü nüma ya Nane rü Nanatü ya Tupanarütama nixi. Rü ñuxma na guxüärü äëxgacü yixü ya Nane, rü guxümaãma inacuëx rü norü ore i poraxümaã nanamu i guxüma na nüma nanaxwëxexüãcúma na yixüccëx. Rü nüma ya Nane nixi ga taxcëx nayuxü na nüxü rüxoëxüccëx ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüarü tügü necüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruüğü i daxü- cüãxëtüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruüğü i daxüccüãxärü yexera nixi rü naëtüwa nangëxma yerü yemaãcü nanaxuegu ga Nanatü. ⁵ Rü ngëmaãcü nixi i ñuxma yerü ga Tupana rü taguma wüxi ga norü orearü ngeruüxü ñanagürü:
“Cuma nixi i Chaune. Rü ñuxma chanangoxëë na aixcúma Chaune quixü”, ñanagürü. Rü taguma wüxi ga norü orearü ngeruüchiga ñanagürü:
“Choma nixi i Nanatü chixü rü nüma rü Chaune nixi”, ñanagürü. ⁶ Natürü yexguma ñoma ga naãnewa namuãgu ga Nane ya guxüëtüwa ngëxmacü, rü ñanagürü ga Tupana:
“Chanaxwëxe i guxüma i chorü orearü ngeruüğü i daxüccüãx rü nüxü nicuëxüüğü ya Chaune”, ñanagürü. ⁷ Rü yexguma norü orearü ngeruüğü ga daxüccüãxchiga yadeaxgu ga Tupana, rü ñanagürü:

“Choma chanaxwëxexüãcúma chanamu i ngëma chorü orearü ngeruüğü i chorü ngüxëëruüğü ixigüxü. Rü ngëxguma chanaxwëxegu rü ñoma buanecü rü ñoma üxüemarüü chayaxigüxëë, rü chanaporaexëë na naxügüãxüccëx i chorü ngüchaü”, ñanagürü. ⁸ Natürü yexguma Nanechiga yadeaxgu ga Tupana rü ñanagürü:

“Cuma rü chauxrüü Tupana quixi. Rü guxügutáma äëxgacü quixi. Rü aixcúma meã guxümaã icucuëx erü aixcúmacü quixi. ⁹ Rü nüxü cungechaü i guxüma i ngëma nacúma i mexü natürü naxchi cuxai i guxüma i ngëma nacúma i chixexü. Rü ngëmacëx i choma na Cumatü ya Tupana chixü rü guxüëtüwa cuxü changëxmaxëë rü guxüärü yexera cuxü chataãëxëë”, ñanagürü. ¹⁰ Rü yexgumarüü ta Nanexü ñanagürü ga Tupana:

“Cuma rü guxüärü Cori quixi. Rü noxrüarü ügügumama ga yexguma natauxgutama ga ñoma ga naãne, rü cuma nixi ga cunaxüxü. Rü cumatama nixi ga cunaxüxü ga üëxcü rü tauemacü rü guxüma

ga ětagü. ¹¹ Rū guxūma i ngēma rü tá nagux, natürü i cuma rü guxūgutáma cungēxmaēcha. Rū guxūma i ngēma rü ñoma naxchirurūü tá nangaue. ¹² Rū ñoma wūxi i naxchiru i ngauxü i ngema itēxmarexūrūü tá ícunawogü i ñoma i naāne rü guxūma i daxūwa nüxü idauxü. Rū to i ngexwacaxūxūmaā tá cunaxūchicüü, ñoma wūxi i naxchiru i ngauxü i ngexwacaxūxūmaā ixūchicüüxūrūü. Natürü i cuma rü tá cunaxējrxūgumaraxūēcha rü tagutáma cuyu”,

ñanagürü ga Tupana. ¹³ Rū Tupana rü ñanagürü nüxü:

“¡Nuā chauxūtawa rüto ñuxmatáta nüxü cuxü charüporamaēxēē i guxūma i curü uwanügü!”

ñanagürü. Natürü ga Tupana rü taguma yema ñanagürü nüxü ga ngēxūrūüxü ga norü orearü ngeruügü ga daxūcūāx. ¹⁴ Rū guxūma i Tupanaārü orearü ngeruügü i daxūcūāx rü naāēgü i Tupanaāxü puracüexü nixigü. Rū nūma ya Tupana rü nūma nanamugü na nüxü yanangūxēēgüxcēx i guxūma i ngēma duūxgü i Tupana naxwēxexü na nayauxgüāxü i maxü i taguma gúxü.

2

Tama name i nüxü taxoe i ngēma maxü i Tupana tüxna uaxüxü

¹ Rū ñuxma na nüxü icuáxü na guxūma i Tupanaārü orearü ngeruügü i daxūcūāxārü yexera yīxü ya Nane, rü ngēmacēx name na yexeraäcü meā naga ixīnūēxü i ngēma ore i nachiga ixīxü. Erü tama tanaxwēxe na nüxü rüxoexü na yaxōgüxü. ² Rū yexguma tauta Nane ya Cristuxü nūma namuxgu ga Tupana, rü norü orearü ngeruügü ga daxūcūāxgüwa duūxgümaā nüxü nixu ga norü mugü na naga naxīnūēxüxcēx. Rū yema mugü rü aixcūma napora yerü guxūma ga yema duūxgü ga tama naga īnūēxü, rü yema mugü nüxü ixuxūācūma Tupana nanapoxcue. ³ Rū yexguma yemaäcü napoxcueāgu ga yema duūxgü ga tama naga īnūēxü, ¿rū ñuxūcūrūwa i yixema i naxchaxwa ibuxmüxü na tama tüxü napoxcuexüxcēx ega nüxü ixoegu i ngēma maxü i mexēchixü i ñuxma Cristugagu tüxna naxuaxūxü? Rū dūcax, nūmatama ya tórü Cori nixī ga nüxīra naxunagüāxü ga yema maxü, rü ñuxūchi yixcama nixī ga yema nüxü īnūēxü ga nüxī meā tüxü nüxü nacuēxēēxü na aixcūma yīxü i tüxü nangēxmaxü i ngēma maxü ega nüxü yaxōgügu ya Cristu. ⁴ Rū nūmatama ga Tupana rü ta taxcēx nanangoxēē na aixcūma yīxü i Cristugagu tüxü nangēxmaxü i ngēma maxü. Yerü nūma ga Tupana rü Naāē i Üünexūwa tüxü nanawēx ga naguxūraxūxü ga taxü ga mexügü rü cuēxruxügü ga norü poramaā naxūxü yema nūma nanaxwēxexüācūma. Rū yemaäcü nixī ga wenaxārü tüxü nüxü nadauxēēxü na aixcūma yīxü na Cristugagu tüxü nangēxmaxü i ngēma maxü.

Tupana rü ñoma ga naānewa nanamu ga Ngechuchu ya Cristu na taxrüü duūxüxü yīxüxcēx

⁵ Rū ñuxma rü guxūma i ngēma mexügü i Cristugagu tüxü ngēxmaxü i pemaā nüxü tixuchigaxü, rü Tupana rü taguma daxūcūāx ga norü orearü ngeruügüna naxāga na namaā inacuēxgüxcēx. Natürü duūxgüxü nixī ga namuxü na namaā inacuēxgüxcēx ga guxūma ga yema mexügü. ⁶ Erü Tupanaārü ore i ūmatūxūwa rü ñanagürü:

“Pa Tupanax, ¿rū tacü nixī i duūxgü rü ngēmacēx nagu curüxīnūxü? ¿Rū tacüwa name rü ngēmacēx nüxü cungechaūxü? ⁷ Rū paxaāchi curü orearü ngeruü ga daxūcūāxgütūüwa cunayexmagüxēē ga duūxgü,

natürü i ñuxma rü aixcüma namaã cutaãe rü nüxü quicuèxüxü. ⁸ Rü naxmèxwa cunangèxmaxèe i guxüma ga yema cuxüxü”,
 ñanagürü i ngèma orewa. Rü yemaäcü nixi ga Tupana ga duüxügümèxèwa nayexmagüxèèäxü i guxüma i ñoma i naãnewa ngèxmaxü. Rü nataxuma i tacü i ñoma i naãnewa i tama naxmèxwa nangèxmaxèèxü. Natürü woo na ngèmaäcü yixü, rü ñuxma rü ta tauta nüxü tadau na duüxügümèxèwa nangèxmaxü i guxüma i ñoma i naãnewa ngèxmaxü. ⁹ Natürü nüxü tadau ya Ngechuchu ya aixcüma guxümaäma icuäcü. Rü yexguma Tupana ñoma ga naãnewa namuxgu rü paxaächi norü orearü ngeruü ga daxüçüäxgüarü ñaxtüwaama nanaxüxèe. Natürü i ñuxma ya Tupana rü poraäcü Ngechuchuxü nataxèe rü äëxgacü ya tacü nayaxixèe yerü ngüxü ninge rü guxüma ga duüxügücèx nayu yerü yemaäcü nanaxwèxe ga Tupana yerü tüxü nangechaü rü tüxü narüngüxèèchaü. ¹⁰ Yerü ga Tupana rü nanaxwèxe na guxüma i naxäcügü nüxü nangèxmaxüçèx i nachica i mexü i naxütawa. Rü yemacèx ñoma ga naãnewa nanamu ga Ngechuchu ya Cristu na ngüxü yangexüçèx rü taxcèx nayuxüçèx na aixcümäxüchi tüxü nangèxmaxüçèx i maxü i taguma gúxü. Rü name nixi na yemaäcü naxüäxü ga Tupana yerü nümatama nixi ga naxüäxü ga guxüma rü namèxwa nangèxma na nüma nanaxwèxexüäcüma namaã inacuäxüçèx. ¹¹ Rü Ngechuchu nixi ya tüxü imexèègücü na Tupanapèxewa ixüünegüxüçèx. Rü ñuxma i nüma ya Ngechuchu ya tüxü imexèègücü rü guxäma i yixema na tüxü yaxüünexèègüxü rü wüxitama nixi ya Tanatü. Rü ngèmacèx nixi i nüma ya Ngechuchu ya Tupana Nane, rü tama taxcèx naxänexü na naëneëgümaä tüxü naxuxü. ¹² Erü Tupanaärü ore i ümatüxüwa rü ñanagürü ga Nane:

“Rü chaueneëgüxü tá nüxü chacuèxèe i cuchiga, Pa Chaunatüx. Rü norü ngutaquèxegüwa rü tá cuxcèx chawiyae na ngèmaäcü cuxü chicuèxüxüçèx”,
 ñanagürü. ¹³ Rü toxnamana i Tupanaärü ore i ümatüxüwa rü ñanagürü ta ga Nane:

“Cuxü chayaxö, Pa Chaunatüx, erü nüxü chacuèx rü tá choxü curüngüxèe”,
 ñanagürü. Rü ñanagürü ta:

“Rü daxe chixi, Pa Chaunatüx, namaã i cuxacügü i chaueneëgü i choxna cumugüxü”,

ñanagürü. ¹⁴ Rü nüma ga Ngechuchu rü woo Tupana na yixixü natürü duüxürüxüäcü ñoma ga naanewa naxü na taxrüxü naxämachixüçèx rü naxägüxüçèx na tachicüü nayuxüçèx rü yemaäcü yanaxoxèèäxüçèx ga Chatanáarü pora ga namaã tüxü iyanatauxèèxchaüxü. ¹⁵ Rü yemaäcü nanaxü ga Ngechuchu na Chatanámxèxèwa tüxü inangüxüxèèxüçèx ya guxäma ya yixema noxri naxcèx muüxèe ga na tayuxü. ¹⁶ Rü yemacèx ñoma ga naãnewa nangu ga Ngechuchu na taxcèx nayuxüçèx i guxäma i yixema na Abráürüü yaxögüxü. Rü tama daxüçüäx i orearü ngeruügücèx nayu, natürü taxcèx nixi ga numa naxüxü rü nayuxü. ¹⁷ Rü nüma ga Ngechuchu rü nanaxwèxe na yixema i naëneëgü ixigüxürüütama nügü na yaxixèèxü na yemaäcü aixcüma mecümacü ya nüxü ingechaütümüügücü ya törü chogürüü yixüçèx i Tupanapèxewa. Rü yemacèx nixi ga nügü inaxäxü rü nayuxü na yemaäcü Tupana duüxügüaxü nüxü ngechaüxüçèx i norü pecadugü. ¹⁸ Rü yema nümatama ngüxü na yangexü ga yexguma Chataná nüxna ñnügu, rü ngèmacèx i ñuxma rü nüxü natauxcha na tüxü nangüxèèxü ya yixema Chataná tüxna ñnüxè.

3

Ngechuchu rü Moïchéxü narüyexera

¹ Rü ñuxma Pa Chaueneëgü ya Tupanapëxewa Üünegüxe, rü pexü nixi ya Tupana inadexü na norü duüxügü pixigüxcëx. Rü ngëmacëx name nixi i aixcüma meã nagu perüxñüë ya Ngechuchu ya Cristu ya Tupana núma namucü. Rü núma ya Ngechuchu nixi i tóru chogüruü i Tupanapëxewa tüxü ixüünexëcëcü. Rü yimaãxü nixi i yaxögüxü. ² Rü Tupana rü marü Ngechuchuxü naxuneta na naxüãxcëcëx ga yema puracü ga Tupana nüxna äxü. Rü núma ga Ngechuchu rü aixcüma Nanatüga naxñü rü nayanguxëë ga yema puracü yexgumarüü ga Moïché meãma na naxüxü ga yema puracü ga Tupana nüxna äxü na nüxna nadauxcëcëx ga Tupanaärü duüxügü ga Yudiügü. ³ Rü woo ga noxri rü Moïchéxü nitaëgacüüxëë ga Tupana, natürü i ñuxma rü Moïchéarü yexera Ngechuchuxü nixi i yataëgacüüxëëxü. Rü wüxi ya İpata ya ngexwacëx ixüxünerüü nixi, erü woo ngëma İpatamaã tataãë, natürü ngëma yexeraäcü nüxü icuëxüüxü nixi i ngëma İpataarü üruü. ⁴ Rü guxüñema ya İ rü nüxü nangëxma i norü üruü. Natürü guxüma i tacü i ngëxmaxü, rü Tupana nixi ya naxücü. ⁵ Rü Moïché rü wüxi ga Tupanaärü duüxü ga aixcüma mexü nixi yerü meã nüxna nadau ga Tupanaärü duüxügü ga Yudiügü, yema Tupana namaã nüxü ixuxürüü. Rü núma ga Moïché nixi ga yema duüxügümaã nüxü yaxuxü ga ñuxäcü Tupana tá yixcüra nüxü na rüngüxëëxü. ⁶ Natürü núma ya Ngechuchu rü Moïchéarü yexera nixi erü Tupana Nanexüchi nixi. Rü núma nixi i nüxna nadauxü i guxüma i ngëma Tupanaärü duüxügü ixigüxü. Rü yixema rü ta Tupanaärü duüxügü üxigü ega aixcüma Ngechuchuaxü yaxögügu rü taguma nüxü rüxoegu. Rü Tupana nanaxwëxe na guxügüma Ngechuchumaã itaëgüxü erü nüxü tacuëx na wüxi i ngunexü rü tá taxcëx nataeguxü na wüxiwa namaã ingëxmagüxcëx.

Tupanaärü duüxügü rü tá inarüngüë

⁷⁻⁸ Rü ngëmacëx i Tupanaärü ore i ümatüxüwa rü ñanagürü i Naãë i Üünexü: “Rü ñuxma na nüxü pexñüëxü i ngëma Tupana pemaã nüxü ixuxü, rü tama name na nüxü pexoexü, yexgumarüü ga na naxügüãxü ga yema duüxügü ga Tupanaxü ügüxü rü tama naga İñüëxü ga yexguma Moïchéwe naxixgu ga yema naãne ga ngextá taxüema İxãpataxüwa”.

⁹ Rü yemacëx ga Tupana rü ñanagürü:

“Rü yéma nixi ga chixexü naxügüxü ga nuxcümaügüxü ga perü oxigü yerü choxü naxügü yerü tama choxü nayaxögüchaü. Rü yemaäcü nanaxügü woo 40 ga tauncëgu nüxü na nadaugüxü ga yema mexügü ga üünexü ga napëxewa chaxüxü. ¹⁰ Rü yemacëx namaã chanu ga yema duüxügü, rü ñacharügü nüxü: ‘Pema rü guxügüma chixexügüxicatama perüxñüëëcha, rü taguma penaxüxchaü i ngëma chanaxwëxexü na penaxüxü’, ñacharügü nüxü. ¹¹ Rü yemacëx nixi ga namaã chanuxü ga yema duüxügü, rü aixcümaxüchi namaã nüxü chixu na täütáma yema naãne ga noxri namaã ichaxunetaxüwa nangüxüxü na ngëxma nangüëxüxcëx”,

ñanagürü ga Tupana. ¹² Rü ñuxma Pa Chaueneëgüx, rü name nixi i pegüna pedaugü na tama ngürüächi pechixearü maxüãxcëcëx, rü ngëmagagu na nüxü perüxoexü na Tupana ya maxücüaxü na peyaxögüxü. ¹³ Natürü ñuxma pexü natauxchagu, rü name nixi na wüxichigü pegüaxü penangüchaüxëëxü i guxü i ngunexügu na taxüema i petanüwa Tupanaxü taxoxcëx nagagu

i ngēma pecadu i pexū womūxēēchaūxū. ¹⁴ Rū ngema na Cristuxūtawa nayauxgūxūcēx i maxū i taguma gūxū, rū tanaxwae na guxūguma aixcūma yaxōgūechaxū. Rū ngēxguma noxrirūūtama guxūguma meā nūxū yaxōgūechagu rū tama nūxū rūxoegu, rū tá namaā tūxū nangēxma i tachica i daxūguxū i naānewa. ¹⁵ Natūrū űuxma nixī i namexū na meāma yaxōgūxū. Rū ngēmacēx i Tupanaārū ore i űmatūxūwa rū űanagūrū:

“Rū űuxma na nūxū pexīnūēxū i ngēma Tupana pemaā nūxū ixuxū, rū tama name na nūxū pexoexū, yexgumarūū ga yema duūxūgū ga tama Tupanaga űnūēxū ga yexguma Moīchéwe naxīxgu ga yema naāne ga ngextá taxūema íxāpataxūwa”,

űanagūrū. ¹⁶ űRū texégū tixī ga guxema nūxū űnūēxē ga yema Tupana tūmamaā nūxū ixuxū, rū űuxūchi tama Tupanaga űnūēxē? Rū pemaā nūxū chixu rū yemagū nixī ga yema duūxūgū ga Moīché Equituanewa ínguxūxēēxū. ¹⁷ űRū texēmaā nixī ga nanuxū ga Tupana ga 40 ga taunecūgu? Rū pemaā nūxū chixu rū namaā nanu ga yema duūxūgū ga chixexū űgūxū. Rū yemacēx yema nachica ga ngextá taxūema íxāpataxūgu nayue. ¹⁸ űRū texégūmaā nixī ga aixcūmaxūchi inaxunetaxū ga Tupana na tāūtama yema naānewa nangugūxū na yexma nangūēxūcēx? Rū pemaā nūxū chixu, rū yemagū nixī ga yema duūxūgū ga tama naga űnūēxū. ¹⁹ Rū ngēmawa nūxū tacuēx na taxucūrūwama yema naāne ga noxri Tupana namaā ixunetaxūwa nangugūxū ga yema duūxūgū, yerū tama nūxū nayaxōgū.

4

¹ Rū ngēmacēx i űuxma na Tupana tamaā ixunetaxū na nūgūxūtawa tá tūxū yachocuxēēxū na ngēxma rūngūēxūcēx, rū tanaxwēxe i taxuāēgū, na tama ngūrūāchi wūxie i tatanūwa tama ngēxma taxūcuxū. ² Erū űuxma i yixema rū marū nūxū taxīnūē i Tupanaārū ore i mexū, yexgumarūū ga yema nuxcūmaūgūxū ga duūxūgū nūxū na naxīnūēxū. Natūrū nūmagū ga yema duūxūgū rū taxuwama nūxū name ga nūxū na naxīnūēxū ga yema ore yerū tama yema naga űnūēxūrūū aixcūma nūxū nayaxōgū. ³⁻⁴ Natūrū i yixema na yaxōgūxū, rū tá aixcūma Tupanaxūtawa tichocu na ngēxma rūngūēxūcēx. Rū wūxiwa i Tupanaārū ore i űmatūxūwa rū ngūxchigaarū ngunexūchigaxū nixu, rū űanagūrū:

“Rū 6 ga ngunexūgu nixī ga naguxēēāxū ga norū puracū ga Tupana. Rū yexguma norū 7 ga ngunexūwa nanguxgu rū guxūma ga norū puracūna narūngū”,

űanagūrū. Rū nuxcūma ga Tupana rū nanaxwēxe na nangūēxū ta ga yema nuxcūmaūgūxū ga tōrū oxigū ga Moīchéwe rūxīxū. Natūrū ga nūmagū rū tama nūxū nayaxōgūchaū rū tama naga naxīnūē. Rū yemacēx ga Tupana rū norū ore i űmatūxūwa rū űanagūrū:

“Yema duūxūgū rū tama choxū nayaxōgū rū yemacēx namaā chanu rū aixcūmaxūchi namaā nūxū chixu na tāūtama yema naāne ga namaā ichaxunetaxūwa nangugūxū na ngēxma nangūēxūcēx”,

űanagūrū. ⁵⁻⁶ Rū yemaācū ga yema duūxūgū ga nūxīra nūxū űnūēxū ga Tupanaārū ore i mexū, rū tama nawa nichocu ga yema nachica ga Tupana namaā nūxū ixuxū, yerū tama naga naxīnūē. Rū ngēmacēx nixī i Tupanaārū ore i űmatūxūwa i űaxū:

“Ngēma duūxūgū i tama chauga űnūēxū rū tāūtama ngēma nachica i namaā ichaxunetaxūwa nichocu na ngēxma nangūēxūcēx”,

ñaxũ. Natürü ñuxma rü ta nangëxma i nachica i tümacèx ya yíxema ngëxma Tupanaxütagu chocuchaũxë na ngëxma tarüngüëxücëx. ⁷⁻⁸Rü ngëma nachica i ngextá nagu nangüëxũ i duũxügü rü tama yema naãne ga nuxcúmaügüxũ ga tórü oxigüxácügü tümäärü äëxgacü ga Yochuémaã tayauxgüxũ nixĩ. Yerü yexguma chi yema naãne yixügu, rü Tupana rü tãu chima wenaxãrũ nüxũ naxuneta ga to ga ngunexũ na nagu naxütawa yachocuxücëx na ngëxma nangüëxücëx i duũxügü. Rü yemacèx ga Tupana rü wenaxãrũ nüxũ naxuneta i wüxi i to i ngunexũ na naxütawa yachocuxücëx i duũxügü na ngëxma nangüëxücëx. Rü ngëma ngunexũ rü ñuxma nixĩ. Rü yemacèx ga Tupana rü mucüma ga taunecü ga Moïchéwena rü Dabímaã nüxũ nixu ga yema norü ore ga úmatüxũ i ñaxũ:

“Rü ñuxma na nüxũ pexĩnüëxũ i ngëma Tupana pemaã nüxũ ixuxũ, rü tama name na nüxũ pexoëxũ”,

ñaxũ. Rü yematama nixĩ ga ore ga marüchirëx pemaã nüxũ chixuxũ. ⁹Rü ngëmacèx i ñuxma rü ta nangëxma i wüxi i nachica i üünexũ i nagu tá aixcüma nangüëxũ i ngëma Tupanaãrũ duũxügü ixügüxũ. ¹⁰Rü yíxema Tupanaxütawa ichocuxe na ngëxma tarüngüëxücëx, rü nüxna tarüngüë i guxüma i tümäärü puracügü yexgumarüü ga Tupana rü nüxna na nangüxũ ga norü puracügü ga yexguma naãne naxüxguwena. ¹¹Rü ngëmacèx name na meã yaxöögüxũ rü naga ixĩnüëxũ na ichocuxücëx i ngextá Tupana tüxũ írüngüëxëëxüwa. Erü tama tanaxwëxe na texé ngürüãchi yema nuxcúmaügüxũ ga duũxügü ga tama Tupanaãrũ ñnüëxürüü norü orexũ na taxoxũ. ¹²Erü Tupanaãrũ ore rü namaxũ rü naporaxüchi. Rü wüxi i tara i guxücüwawa meã waixmaguxüãrũ yexera nixĩ na natéxũ. Erü ngëma ore rü tawa nixücu ñuxmata taãëwa nangu, rü ñuxmata nawa nangu i ngëma wüxichigü nagu rüxĩnüxũ. Rü ngëmaãcü meãma nanangoxëëãma i guxüma i ngëma yixicatama nagu rüxĩnüxũ rü tüxũ ngüchaũxũ. ¹³Rü nataxütãma i tacü i Tupana üxũ i tá naxchaxwa nügü icüxũ erü napëxewa rü guxüma meã nangox. Rü guxüxũ nadau rü guxüxũ nacuëx ya yima tá tüxna cacü na namaã nüxũ ixuxücëx i tórü maxüchiga.

Ngechuchu rü mecüxüchi ya tórü ngüxëëruũ nixĩ i Tupanapëxewa

¹⁴Ngechuchu ya Tupana Nane rü mecüxüchi ya tórü ngüxëëruũ nixĩ i Nanatüpëxewa. Rü ñuxma rü daxügüxũ i naãnewa i Nanatüxütawa nangëxma na ngema taétüwa nachogüxücëx. Rü ngëmacèx tanaxwëxe i guxügüma nüxũ tayaxöögüecha rü taguma nüxũ tarüxoe. ¹⁵Rü nüma ya Ngechuchu rü aixcüma nüxũ nacuëx na tüxũ nangüxëëxũ erü nüxũ nacuëx na ñuxãcü tüxũ naguxchaxũ i ngëxguma Chataná tüxna ñnügu rü pecadugu tüxũ nanguxëëchaügu, yerü nüxna rü ta naxĩnü ga Chataná, ngëma tüxna na naxĩnüxürüü. Natürü nüma ga Ngechuchu rü taguma chixexũ naxü. ¹⁶Rü ñuxma na tüxũ nangëxmaxũ ya tórü ngüxëëruũ ya Ngechuchu, rü name nixĩ i tama imuëãcüma nüxna tangaicamagü ya tórü äëxgacü ya Tupana ya tüxũ ngechaücü. Rü tanaxwëxe na ngëmaãcü nüxna ingaicamagüxũ na nüxũ ingechaütümüügüxücëx rü tüxũ nangechaüãcüma tüxũ nangüxëëxücëx i ngëxguma guxchaxügü tüxna ngaicamagu.

5

¹Nuxcüma ga Tupana rü Moïchémaã nüxũ nixu na Arãü yixücëx ga Yudiügüarü paigüeru ixicü na guma duũxügüëtüwa chogüxücëx ga Tupanapëxewa. Rü guxüma ga yema Arãüwena ügüxũ ga paigüeru rü duũxügütanüwa nüxũ naxunetagu na yema duũxügüarü ngüxëëruũ yixücëx

ga Tupanapēxewa rü Tupanana naxāāxūcēx ga āmaregü rü Tupanacēx nadaiāxūcēx ga naxūnagü na yemaācü nüxū nüxū nangechaūxūcēx ga norü pecadugü. ² Natürü ngēma paigüeru rü guxūma i duūxūgürüūttama nixī na pecadugu nanguxū. Rū ngēmacēx nüxū nacuēx na űuxācü yaxna namaā naxīnūxū i duūxūgü i ngēxguma naēchitamare pecadu naxūegu rü tama aixcūma Tupanawe naxīxgu. ³ Rū ngēma paigüeru rü tama ngēma duūxūgüaru pecaducēxicatama nixī i nadaiāxū i naxūnagü, natürü nanaxwēxe i noxrūtama pecaducēx rü ta na nadaiāxū i naxūnagü na ngēmaācü Tupana nüxū nüxū nangechaūxūcēx i ngēma pecadugü. ⁴ Rū taxūema tūgūtama tingucuchixēē na paigüeru tiixūcēx. Natürü Tupana nixī ya tūxū unetacü rü tūxna naxācü i ngēma puracü na paigüaru āēxgacü tiixūcēx, yexgumarūū ga Tupana rü Arāxū na yangucuchixēēxūrūū na paigüeru yiixūcēx. ⁵ Rū yexgumarūū ga Ngechuchu rü tama nūgūtama ningucuchixēē na Tupanapēxewa tōrū ngūxēēruū i paigüeru yiixūcēx. Natürü Tupana nixī ga yangucuchixēēcü. Yerü Tupanataama nixī ga nüxū űacü:

“Cuma nixī i Chaune. Rū űuxma chanangoxēē na Chaune quiixū”,

űacü. ⁶ Rū toxnamana i Tupanaārū ore i űmatūxūwa rü űanagürü ta:

“Cuma nixī i guxūgutāma duūxūgüaru ngūxēēruū i paigüeru quiixū, guma pai ga Melquisederūū”,

űanagürü. ⁷ Rū yexguma Cristu űoma ga naānewa maūxgu, rü porācü nayumūxē rü tagaācü rü naxauxācü Tupanana naca na nüxū nangūxēēxūcēx na naga naxīnūxūcēx. Rū yemaācü nanaxū ga Cristu, yerü Tupana rü napora na nüxū nangūxēēxūcēx na tama yuxū namūxūcēx. Rū Tupana rü Cristuxū naxīnū yerü nūma ga Cristu rü aixcūma Tupanaga naxīnū. ⁸ Rū nūma ga Cristu rü woo Tupana Nane na yiixū, natürü ngūxū ninge naxcēx na Tupanaga naxīnūxū. ⁹ Rū yemaācü nūgū inaxā rü curuchagu nayu na tūmaārū maxēxēēruū yiixūcēx ya guxāma ya yīxema naga űnūēxē. ¹⁰ Rū Nanexū nixī ga naxunetaxū ga Tupana na guxūgutāma nūgūpēxewa tōrū ngūxēēruū i paigüeru yiixūcēx yexgumarūū ga pai ga Melquisedē ga norü yumūxēwa nuxcūmaūcü ga tōrū oxī ga Abrāucēx Tupanana cacü na guma Abrāuxū nangūxēēxūcēx ga Tupana.

Wūxi i āucūmaxūchixū nixī na nüxū rūxoexū na yaxōgūxū

¹¹ Rū űuxma rü toxū nangēxma i muxūchixūma i ore i Cristuchiga ixīxū i pemaā nüxū tixuxchaūxū. Natürü naguxchaxūchi na meāma pemaā tanangoxēēxū i ngēma, erü pema rü tama pexū natauxcha na nüxū pecuáxū.

¹² Rū marū űuxgumama nüxū na pecuáxū i Tupanaārū orechiga, rü pema rü chi marū namaā pengūxēētae. Natürü i pema rü űuxma rü ta penaxwēxe na wena pemaā tanangoxēēxū i ngēma Tupanaārū ore i tauxchaxū i nawa inaxūgūxū na Tupanachigaxū icuáxū. Rū ngēmaācü i pema, rü űoma űxchana i naēgūnenixūwa maixūrūūttama pixīgū. Erü tama nüxū pecuēxgūēga i guxūma i ngēma Tupanaārū ore i yexeraācü tamaā nüxū ixuxū i Cristuchiga na űuxācü Tupana naxwēxexū na naga pexīnūēxū. ¹³ Rū yīxema yaxōxē ya tama nüxū cuēxégaxe na űuxācü Tupanacēx tamaxūxū, rü wūxi i űxchana i maixūrūū tixī. Rū ngēmaācü pixīgū i pemax. ¹⁴ Natürü yīxema yaxōxē ya tūmamaā yaxūxe na tanangugūxū na tacū yiixū i nguxēētae i mexū rü ēxna chixexū, rü aixcūma nüxū tacuēx na űuxācü Tupanacēx tamaxūxū. Rū yīxema rü űoma wūxi i duūxū i yaxū i namachimaā āwemūxūrūū tixī. Natürü i pema rü tama ngēmaācü pixīgū.

6

¹ Rû ngêmacêx name nixî i yexeraâcü tingúeetanü na aixcüma meã nüxü icuáxüçêx i Cristuchiga. Rû tanaxwêxe na nüxü ichopetüxü ga yema ore ga nawa inaxügüxü na Cristuchigaxü icuáxü. Rû täütäma yeüçürü yema ore ga nawa inaxügüxüçhiga tidexagüecha. Rû taxucêxma tüxcüü wena pemaã nüxü tixu na nüxü perüxoexüçêx na nagu pexîxü i ngêma mugü ga Moiché ümatüxü i tama tüxü maxêxêxü. Rû ngêxgumarüü ta taxucêxma tüxcüü wena pemaã nüxü tixu i nachiga na ñuxâcü Tupanaãxü yaxôgüxü.

² Rû ngêxgumarüü ta taxucêxma tüxcüü wena pexü tangüexêê na ñuxâcü Tupanacêx íbaiüxü rû ñuxâcü duüxügüxü ingôgüâcüma namaã iyumüxêxü. Rû ngêxgumarüü ta taxucêxma tüxcüü wena pexü tangüexêê na ñuxâcü tá wena namaxêxü i duüxügü i yuexü rû ñuxâcü naãneârü guxgu rû Tupana tá wüxichigü i duüxügüna çaxü na ñuxâcü namaxêxü i ñoma i naãnewa.

³ Rû ngêmacêx i ñuxma rû ngêxguma Tupana tama tüxna nachuxgu rû tanaxwêxe i yexeraâcü tingúeetanü na aixcüma guxüma i Cristuchigaxü icuáxüçêx rû nüxü na icuáxüçêx na aixcüma ngêma nüma nanaxwêxexüâcüma meã naxcêx na imaxêxü.

⁴⁻⁵ Natürü ngêxguma chi wüxie Cristuxü yaxuxgu, rû chi meãma Tupanaxü tacuêxgu, rû chi Naãê i Üünexüxü tayauxgu, rû chi nüxü tacuêxgu na ñuxâcü namexü i Tupanaârü ore rû ñuxâcü na namexü i daxügüxü i naãne, rû name nixî i taxuãê.

⁶ Erü ngêxguma chi ngêmaâcü meã tayaxôxgu i noxrix rû ñuxüchi Cristuxü ítatêxüçixgu, rû marü taxucürüwama texê wemaxârü Tupanacêx tüxü tataeguxêê. Erü ngêxguma ngêmaâcü ítanatêxüçixgu ya Tupana Nane, rû ñoma wena curuchawa tayapotaxürüü tayaxîxêê, erü guxü i duüxügüpêxewa âne nüxü tingexêê.

⁷ Rû dücax, wüxi i naãne i pucü nagu ngxüxü rû meãma nanetü nawa nayae tümacêx ya yíxema nagu üanexê, rû Tupanaarü ngüxêêgagu nixî i ngema.

⁸ Natürü ngêxguma ngêma naãne rû tuxu rû natüanegü i chixexü nawa yaegu, rû Tupana rû tá chixexü namaã naxuegu rû üxüwa tá nigu i guxüma i nawa yaexü. Rû ngêxgumarüü tá tixî ya yíxema Cristuxü ítáxe.

Ítananguxêê na nayauxgüxü i maxü i taguma güxü rû ngêmacêx tama nüxü tarüxo na yaxôgüxü

⁹ Natürü, Pa Chaueneêgü ya Pexü Tangechaügüxe, rû woo ngêmaâcü pemaã tidexagügu, natürü aixcüma nüxü tacuêx na tama ngêma duüxügü i nüxü rüxoexürüü pixîgüxü. Erü pema rû pexü nangêxma i maxü i taguma güxü, rû Tupana rû tá aixcüma poraâcü pexü narüngüxêê na naxcêx pemaxêxüçêx.

¹⁰ Erü nüma ya Tupana rû aixcümacü nixî. Rû nüma rû täütäma nüxü inayarüngüma ga yema mexü ga pexüxü rû ñuxâcü taeneêgü i yaxôgüxüxü na pengechaügüxü ga yexguma nüxü perüngüxêêgügu, ngêma ñuxma ípenaxüxürüütama.

¹¹ Rû ñuxma rû tanaxwêxe i wüxichigü i pema rû ngêmaâcü noxrirüü mexü i perü ngüchaümaã nüxü perüngüxêêgüecha i taeneêgü ñuxmatáta wena nüma naxü ya Cristu. Rû tanaxwêxe na ngêmaâcü pemaxêxü na düxwa aixcüma Cristuxütawa pengügüxü ngêma ípenanguxêêxürüü.

¹² Rû tama tanaxwêxe na nüxü perüxoetanüçüxü na Cristuwe perüxîxü. Natürü tanaxwêxe i naxrüü pixîgü i ngêma duüxügü i guxüguma meã yaxôgüâcüma Cristuwe rüxîamaxü rû nayauxgüxü i guxüma i ngêma mexügü ga Tupana namaã ixunetaxü.

¹³ Rû dücax, yexguma tórü oxî ga Abráümaã inaxunetagu ga Tupana rû nügüêgagutama inaxuneta, yerü

tataxuma ga texé ga norū yexera ixīxē na tūmaegagu inaxunetaxūcēx. ¹⁴ Rū yemacēx ga Tupana rū Abráūxū űnanagūrū: “Rū aixcūmaxūchi tá poraācū cuxū charūngūxēē. Rū tá cuxū nangēxma i muxūchixūtama i cutaagū”, űnanagūrū. ¹⁵ Rū Abráū rū meāma ínananguxēē ga guma nane ga Tupana namaā ixunetacū. Rū yemacēx nabu ga guma nane ga Ichaā ga Tupana namaā nūxū ixucū. ¹⁶ Rū ngēxguma duūxūgū tacūcēx ixunetagu, rū to i norū yexera ixīxūegagu inaxunetagu. Rū wūxicana tacūcēx ngēmaācū inaxunetagu, rū nūxū tacuēx rū aixcūma tá nanaxūgū i ngēma naxcēx inaxunetagūxū, rū marū taxucūrūwama yeūcūrū nachiga nidexagūecha. ¹⁷ Rū yemacēx ga Tupana rū yexguma inaxunetagu namaā ga yema duūxūgū ga nayauxgūxū tá ga yema ngūxēē ga Tupana nūxna āxchaūxū, rū nūgūégagutama inaxuneta, yerū nanaxwēxe na meāma nūxū nacuēxgūxū na aixcūma tá yanguxēēxū rū tagutāma naxūchicūūāxū ga yema namaā inaxunetaxū. ¹⁸ Rū nūxū tacuēx rū ngēxguma tacūcēx nūgūégagu inaxunetagu ya Tupana, rū taxucūrūwama tūxū nawomūxēē rū nanaxūchicūū i ngēma. Rū űuxma i guxāma i yixema na Tupanacēx ibuxmūxū na tūxū nangūxēēxūcēx rū tūxū namaxēxēxūcēx, rū nūma ya Tupana rū nūgūégagu tamaā inaxuneta na ngēmaācū tá tūxū nangūxēēxū. Rū ngēmaācū tūxū nanangūchaūxēē rū tūxū narūngūxēē na nūxū icuāxūcēx na aixcūma tá nayauxgūxū i ngēma maxū i taguma gūxū i tamaā inaxunetaxū. ¹⁹ Rū űuxma na ínanguxēēxū na aixcūma tá nayauxū i ngēma maxū i taguma gūxū, rū taxucēxma taxoegaāēgū, erū nūxū tacuēx na aixcūma daxūgūxū i naānewa i Tupana íngēxmaxūwa tá ingūxū. ²⁰ Rū ngēma nangēxma ya Ngechuchu i űuxma yerū nūxīra yexma naxūcu na Tupanapēxewa taētūwa nachogūxūcēx. Rū ngēmaācū guxūguma tōrū ngūxēēruū i paigūeru nixī, guma Melquisedé ga Tupanapēxewa Abráūētūwa chogūcūrū.

7

Ngechuchu rū guma nuxcūmaīlcū ga pai ga Melquisedérūītama nixī

¹ Rū guma Melquisedé rū íāne ga Charéūārū āēxgacū nixī ga yexguma namaūxgu ga Abráū. Rū nūma ga Melquisedé, rū duūxūgūarū pai nixī ga Tupanapēxewa. Rū yexguma Abráū rū to ga nachīīāneārū āēxgacūgūmaā nūgū nadaixgu rū nūxū nayexeragu, rū Melquisedé rū namawa Abráūpēxegu nayangu ga yexguma Abráū napatacēx taegugu. Rū nūma ga Melquisedé rū Tupanaégagu Abráūmaā mexū naxuegu. ² Rū Abráū rū nūxū nayexma ga guxūma ga yemaxūgū ga yema āēxgacūgū ga namaā nūgū nadēxūna napuxūxū. Rū yemawa ínanaxūxūchi ga yema Tupanana űxū, rū Melquisedéna nanaxā. Rū ngēma naega i Melquisedé rū Āēxgacū ya Ixaixcūmacū űaxūchiga nixī. Rū norū íāne ga Charéū rū Taāxēēruū űaxūchiga nixī. Rū ngēmacēx i naega i Melquisedé rū Āēxgacū ya Taāxēēruū űaxūchiga ta nixī. ³ Rū Tupanaārū ore ga nuxcūma űmatūxūwa rū tama nūxū nixu na texé tīxū ga nanatū rū naē rū norū oxigū ga Melquisedé. Rū ngēxgumarūū ta tama nūxū nixu i norū buxchiga rū norū yuxchiga. Rū ngēmacēx Tupana Nanerūū guxūguma duūxūgūarū ngūxēēruū ya pai nixī i Tupanapēxewa. ⁴ Rū űuxma rū name nixī i nagu perūxīnūē na űuxācū aixcūma āēxgacū ya tacū yīxū ga Melquisedé. Yerū nuxcūmaīlcū ga tōrū oxi ga Abráū rū Melquisedéna nanaxā ga yema Tupanana űxū ga natanūwa ga yema yemaxūgū ga togū ga āēxgacūgūna napuxūxū. Rū ngēmawa nūxū tacuēx na Tupanapēxewa

tóru ɔxi ga Abráũārũ yexeracũ yĩĩxũ ga Melquisedé. ⁵ Rũ ñuxma i Yudiũgũ, rũ guxũma i norũ ngẽmaxũwa ínanaxũxũchigũ i ngẽma Tupanana ùxũ, rũ ñuxũchi norũ paigũna nanaxã yerũ yemaãcũ nixĩ ga namuãxũ ga yema mugũ ga Moĩché ùmatũxũ. Natũrũ guxũma i ngẽma paigũ rũ Lebítaagũ nixĩgũ. Rũ nũma ga Lebĩ rũ guxũma i Yudiũgũrũ Abráũtaa nixĩ. Rũ ngẽmaãcũ i ngẽma Yudiũgũ rũ norũ paigũna nanaxã i ngẽma Tupanana ùxũ, woo natanũxũgũ i Yudiũgũ na yĩĩxũ i ngẽma paigũ. ⁶ Natũrũ ga Melquisedé rũ woo tama Lebítaa nixĩ, natũrũ Abráũmẽxẽwa nanayaxu ga yema Tupanana ùxũ. Rũ nũxũ tacuèx na Abráũ yĩĩxũ ga noxri nayaxucũ ga Tupanaãrũ uneta. Rũ Melquisedé rũ Tupanana naca na Abráũmaã mexũ naxueguxũcèx. ⁷ Rũ guxãma meãma nũxũ tacuèx rũ ngẽxguma texé toguècèx Tupanana caxgu na tũxũ nangũxẽxũcèx, rũ Tupanapẽxewa rũ yĩxema nũxna çaxe rũ ngẽma togũ i naxcèx ítaçaxũārũ yexera tixĩ. Rũ ngẽmaãcũ nũxũ tacuèx na Abráũārũ yexera yĩĩxũ ga Melquisedé i Tupanapẽxewa. ⁸ Rũ ñuxma i nuã tatanũwa rũ ngẽma paigũ i ngĩxũ yauxgũxũ i ngẽma dĩeru i Tupanana ùcũ, rũ duũxũgũmare nixĩgũ rũ tá nayue. Natũrũ ngẽxguma Melquisedéchiga yadexagu i Tupanaãrũ ore, rũ ñoma namaxũxũrũ nixĩ i nachiga yadexaxũ. Rũ ngẽmawa nũxũ tacuèx na Cristu ya guxũguma maxũcũrũ na yĩĩxũ ga Melquisedé. ⁹⁻¹⁰ Rũ Abráũtaa ga Lebĩ, rũ guxũma i paigũ i Lebítaagũ ixĩgũxũ i ñuxma ngĩxũ yauxgũxũ i ngẽma dĩeru i Tupanana ùcũ, rũ nũmagũ rũ ta Abráũmaã Melquisedéna nanaxãgũ ga yema Tupanana ùxũ. Yerũ nũma ga Lebĩ rũ guxũma ga nataagũ i ñuxma Yudiũgũarũ paigũ ixĩgũxũ, rũ woo ga na tauta nabuexũ ga yexguma, natũrũ marũ Abráũxũnewa nayexmagũ ga yexguma Melquisedé namawa Abráũpẽxegu yanguxgu. Rũ ngẽmawa nũxũ tacuèx na guxũma i ngẽma paigũarũ yexera yĩĩxũ ya Melquisedé. ¹¹ Rũ nuxcũmaũgũxũ ga tóru ɔxigũ ga Yudiũgũ, rũ Lebítaagũ ga paigũmẽxẽwa nixĩ ga nayauxgũãxũ ga Tupanaãrũ mugũ. Natũrũ pemaã nũxũ chixu rũ yexguma chi yema paigũ aixcũma yema Yudiũgũxũ imexẽẽgũgu ga Tupanapẽxewa, rũ taxucèx chima Tupana nũxũ naxuneta ga naĩ ga pai ga Melquisedérũ ixĩcũ ga tama Lebítaa ga Arãũrũ ixĩcũ. Rũ yemacèx ga Tupana rũ nũxũ naxuneta ga Nane ga Ngechuchu na tóru chogũrũ ya pai yĩĩxũcèx. ¹² Rũ yemacèx ga Tupana rũ yema Yudiũgũarũ paigũchicũxũ nayangucuchixẽẽ ga Cristu. Rũ nũma nixĩ i ñuxma i aixcũma Tupanapẽxewa tũxũ yamexẽẽgũxũ. Rũ guxũma ga Lebítaa rũ paigũ nixĩgũ yerũ yemaãcũ nixĩ ga naxueguxũ nawa ga yema mugũ ga Moĩché ùmatũxũ. Natũrũ nũma ga Cristu rũ marũ nanaxũchicũũ ga guxũma ga yema. ¹³⁻¹⁴ Erũ meãma nũxũ tacuèx rũ nũma ya tóru Cori ya Ngechuchu ya yima nachiga idexagũcũ rũ tama Lebítaa nixĩ erũ nũma rũ Yudátaa nixĩ. Rũ nũxũ tacuèx rũ taxuũma ga Yudátaa rũ pai nixĩ, yerũ ga Moĩché rũ yexguma yema paigũchiga yadeaxgu rũ taxuũma ga Yudátaaxũ naxuneta na pai yĩĩxũcèx. ¹⁵ Rũ ngẽmaãcũ meã nangox na Tupana iyanaxoxẽẽxũ ga guxũma ga yema mugũ ga Moĩché ùmatũxũ ga paigũchiga. Yerũ nũma ga Tupana rũ nũxũ naxuneta ga wũxi ga pai ga yexwacaxũcũ ga tama Lebítaa ixĩcũ. Rũ nũma nixĩ i tóru Cori yĩĩxũ ya Melquisedérũ ixĩcũ, erũ guxũma i ngẽma togũ i paigũarũ yexera nixĩ. ¹⁶ Rũ guxũma ga yema togũ ga paigũ rũ nangucu yerũ Lebítaa nixĩgũ. Natũrũ nũma ga Cristu rũ paixũ ningucuchi yerũ poramaã yuwa ínarũda rũ guxũguma namaxẽcha na tũxũ nangũxẽxũcèx. ¹⁷ Rũ ngẽmacèx i Tupanaãrũ ore i ùmatũxũwa rũ tóru Corichiga ñanagũrũ:

“Cuma rũ guxũgutãma duũxũgũarũ ngũxẽẽruũ ya pai quixĩ Melquisedérũ”,

ñanagürü. ¹⁸⁻¹⁹ Rū yemacèx ga Tupana rü ñoma ga nañewa nanamu ga Nane, yerü yema mugü ga paigüchiga naxümatüxü ga Moiché rü tama poraäcü tüxü narüngüxëe yerü tama aixcüma tüxü nimexëëgü ga Tupanapëxewa. Rū yemacèx Nanexü namu ga Tupana na tórü pecaducèx nayuxüçèx na ngëmaäcü tüxü nangëxmaxüçèx i maxü i taguma güxü rü aixcüma Tupanamüçëgü ixigüxüçèx. ²⁰⁻²¹ Rū yexguma Tupana yema togü ga paigüxü ngucuxëëgu, rü nanangucuxëëmare. Natürü yexguma Cristuxü yangucuchixëëgu na tórü ngüxëëruü ya pai yïxüçèx, rü nügüéagutama inaxuneta. Rū yemacèx ga yexguma Cristuxü yangucuchixëëgu rü ñanagürü:

“Choma i Cori ya Tupana rü marü cuxü chaxuneta na guxügutáma duüxügüarü ngüxëëruü ya pai quiüxüçèx. Rū ngëma rü tagutáma chanaxüchicüü erü chaugüéagagu ichaxuneta”,

ñanagürü. ²² Rū ñuxma na yemaäcü nügüéagutama inaxunetaxü ga Tupana, rü nüxü tacuèx na aixcümaxüchima yema paigüarü yexera na yïxü ya Cristu erü guxügutáma Tupanapëxewa tüxü narüngüxëe. ²³ Rū yema togü ga paigü rü namuxüchi, yerü niyuetanü. Rū yemacèx taxucürüwama guxüguma paigü nixigü. ²⁴ Natürü ñuxma na tórü ngüxëëruü ya paixü yangucuchixü ya Ngechuchu, rü ngëmacèx marü taxucèxma texé ya togue tingucuchi, erü nüma ya Ngechuchu rü tagutáma nayu. ²⁵ Rū ngëmacèx nixi i ñuxma i nüxü natauxchaxü na aixcüma tüxü namaxëxëxü ya guxáma ya yixema norü ngüxëemaä Tupanaxütawa ngugüxe. Erü nüma ya Ngechuchu rü guxüguma namaxëcha na tümaëtüwa nachogüxüçèx. ²⁶ Rū ngëmaäcü ya Ngechuchu, rü nüxücatama nixi i pai ya tórü ngüxëëruü yïxü i Tupanapëxewa. Erü nüma rü aixcüma naxüüne, rü nataxuma i chixexü i nawa, rü nangearü pecaduäx yerü taguma taxrüü pecadu naxü. Rū ñuxma rü guxüëtüwa nangëxma i daxüguxü i nañewa i Tupana íngëxmaxüwa. ²⁷ Rū Ngechuchu rü tama ngëma togü i paigüerurüü nixi. Erü nümagü rü nanaxwëxe na guxü i ngunexügu Tupanacèx naxüñagü nadëixü na ngëmaäcü Tupana nüxü nüxü ngechaüxüçèx i noxrütama pecadugü rü guxü i duüxügüarü pecadugü ta. Natürü nüma ga Ngechuchu rü yexguma nügü inaxäxgu, rü wüxicanatama pecaducèx nayu. Rū ngëma rü guxügutama name i Tupanapëxewa. ²⁸ Rū yema mugü ga Moiché ümatüxü, rü duüxügümarexü naxuneta na paigüerugü yixigüxüçèx. Natürü nümagü rü ta nipecaduäxgü. Natürü yemawena ga Tupana rü nügüéagagu Nanexü naxuneta na tórü ngüxëëruü yïxüçèx. Rū yima Nane rü guxüguma mecüxüchi ya tórü Maxëxëëruü nixi. Rū nüma rü guxüguma tüxü narüngüxëe i Tupanapëxewa.

8

Ngechuchu nixi ya tórü ngüxëëruü i Tupanapëxewa

¹ Rū ngëma pemaä nüxü tixuxchaüxü i ñuxma nixi na tüxü nangëxmaxü ya tórü ngüxëëruü ya mexëchicü i Tupanaxütawa. Rū nüma rü Tupana Nane ya Cristu nixi. Rū daxüguxü i nañewa i Tupanaärü tügü necüwawa narüto erü guxüärü äëxgacü nixi. ² Rū ngëma daxüguxü i nañewa i ngëma nachica i üünexü ga Tupana üxüwa nixi i taxcèx inaçaxü. Rū tama ngëma Yudiügüarü paigürü wüxi ya ípata ya duüxügü üxünewa Tupanana taxcèx ínaç. ³ Rū guxüma i ngëma Yudiügüarü paigüerü rü nangucu na Tupanana naxägüäxüçèx i ämaregü rü naxcèx nadaiäxüçèx i naxüñagü na Tupana nüxü nüxü ngechaüxüçèx i duüxügüarü pecadugü. Rū yemacèx ga Ngechuchu rü Tupanana nügü naxámare na duüxügüarü pecaducèx nayuxüçèx. ⁴ Rū

ñuxma i nūma ya Ngechuchu rü daxūguxū i naānewa nangēxma na ngema tórū ngūxēeruū ya pai yīixūcēx i Tupanapēxewa. Rü ngēmacēx tama ñoma i naānewa nixī i pai yīixū. Natürü ngēxguma chi ñoma i naānewa nangēxmagu rü tātū chima pai nixī erū ñoma i naānewa nangēxmagū i ngēma Yudiūgiarū paigū i Tupanana āmare āgūxū yema Moichéarū mugū nūxū ixuxūrūū.⁵ Natürü ngēma puracū i ñoma i naānewa naxūgūxū i ngēma Yudiūgiarū paigū, rü naxcēx nadauxūtaegūmare i ngēma Ngechuchu daxūguxū i naānewa ūxū. Rü ngēma nachica i nawa Tupanacēx napuracūxū i ngēma paigū, rü nanaxūchicūnēxgūmare i ngēma nachica i Ngechuchu nawa ngēxmaxū. Rü meāma nūxū tacuēx i ngēma, yerū yexguma Moiché naxūxchaūgu ga Tupanapata, rü Tupana rü ñanagürü nūxū:

“jDūcēx, meā nangugū i ngēma cuēxruū ga cuxū chawéxū ga mēxpūne ga Chinaŵa! Rü chanaxwēxe i ngēmaācū na cunaxūxū”,

ñanagürü.⁶ Natürü nūma ya tórū ngūxēeruū ya Cristu rü daxūguxū i naānewa nangēxma, rü ngema aixcūmaxūchi Tupanapēxewa taétūwa nachogū. Rü ngēma Yudiūgiarū paigū rü nagu naxīāma ga yema nuxcūmaūxū ga uneta ga Moiché ūmatūxū. Natürü nūma ya Tupana rü marū tūxna nanaxā i wūxi i ngexwacaxūxū i uneta erū tamaā nūxū nixu na Cristu yīixū ya aixcūma tórū ngūxēeruū ixīcū. Rü nūma rü nayu na Tupanapēxewa tūxū yamexēēxūcēx, rü ngema Tupanaxūtawa nangēxma i ñuxma na taétūwa nachogūxūcēx. Rü ngēmaācū nūxū tadau na Tupanaārū uneta i ngexwacaxūxū rü yema nuxcūmaūxū ga unetaarū yexera yīixū na namexū.⁷ Yerū yexguma chi yema nūxīraūxū ga uneta ga Moiché ūmatūxū rü aixcūma namexgu na duūxūgūxū namaxēxēxūcēx, rü marū taxucēx chima tanaxwēxe i to i ngexwacaxūxū i Tupanaārū uneta.⁸ Natürü nūma ga Tupana rü nūxū nadau na tama aixcūma napēxewa duūxūgūxū yamexēēxū ga yema nūxīraūxū ga uneta ga Moichéna naxāxū. Rü yemacēx ga Tupana rü ñanagürü:

“Wūxi i ngunexū rü wena táxarū guxūma i chorū duūxūgūmaā ichaxuneta.

⁹ Natürü ngēma chorū uneta i ngexwacaxūxū, rü tāūtāma namaā nawūxigu ga yema nūxīraūxū ga chorū uneta ga nuxcūmaūgūxū ga perū oxigūmaā nūxū chixuxū ga yexguma nūxū charūngūxēēgu na ínaxoxūxūcēx ga Equitarū naānewa. Yerū nūmagū ga yema duūxūgū rü tama chauga naxīnūē rü tama nayangūxēē ga yema nūxīraūxū ga chorū uneta, rü yemacēx íchanawogū.¹⁰ Natürü ngēxguma nawa nanguxgu na wena namaā ichaxunetaxū, rü ñaācū tá nixī i guxūma i Yudiūgūmaā ichaxunetaxū: ‘Rü tá meāma ngēma duūxūgūxū nūxū chacuēxēē i chorū mugū na aixcūma naāēwa nangēxmagūxūcēx. Rü choma rü tá norū Tupana chixī, rü nūmagū rü tá chorū duūxūgū nixīgū’.¹¹ Rü guxūma i ngēma duūxūgū i choxū yaxōgūxū, rü aixcūma tá choxū nacuēxgū. Rü ngēmacēx taxucēxtama tūxcūl nūgūmaā nūxū nixugūgū i chauchiga na ngēmaācū choxū nacuēxgūxūcēx. Erū guxūma i chorū duūxūgū rü aixcūma tá meā choxū nacuēxgū woo buxū rü ēxna yaxū.¹² Rü tá nūxū nūxū changechaū i norū chixexūgū, rü tá nūxū ichayarūngūmaxūchi i norū pecadugū”,

ñanagürü ga Tupana.¹³ Rü dūcax, ñuxma na Tupana ngexwacaxūxū i unetachiga idexaxū, rü ngēmawa nūxū tacuēx na yema nūxīraūxū ga uneta rü marū nangupetūchaūxū. Rü nūxū tacuēx rü guxūma i ngēma marū ngupetūchaūxū, rü paxa tá inayarūxo. Rü ngēmaācū i ngēma Yudiūgiarū paigū, rü marū inayarūxoxchaū na Tupanapēxewa duūxūgūxū nangūxēēxū.

Erü nüma ya Tupana rü marü Cristuxü ningucuchixêê na törü ngüxêêruü yïxüçêx i napêxewa.

9

Tupanapata ga duïxülgü üxünechiga rü Tupanapata ya daxüguxü i nañewa ngêxmanechiga

¹ Rü yexguma nuxcüma Moïchémaã yadeaxgu rü nüxna naxããgu ga yema nüxiraüxü ga uneta, rü Tupana namaã nüxü nixu na ñuxãcü nanaxwêxexü na nüxü yacuèxüügüxü. Rü yexgumarüü ta namaã nüxü nixu na ñuxãcü nanaxwêxexü na naxcêx naxüãxü ga wüxi ga ïpata ga naxchirunaxcêx na yéma nüxü yacuèxüügüxüçêx ga paigü. ² Rü guma ïpata ga naxchirunaxcêx rü nitüyemachiã. Rü yema naxmachiã ga nüxira nawa ixücuxü, rü “Nachica i Üünexü” nixi ga naega. Rü yéma nayexma ga werachica rü mecha ga pãu ga üünexü nagu nuxü. ³ Rü yema to ga naxmachiã ga yema tüyemachiãxüçêxwena üxü rü “Nachica i Üünexüchixü” nixi ga naega. ⁴ Rü yéma nayexma ga yema mecha ga uirunaxcêx ga ngextá nawa yagugüãxü ga pumara ga yixixü ga yexguma yaguxgu. Rü yéma nayexma ta ga yema baú ga Tupanaärü mugü nagu namaã nanguxüügüxü. Rü yema baú rü guxüwama uirumaã natüxüne. Rü yematama baúarü aixepewa nayexma ga wüxi ga tüxüxãcü ga uirunaxcêx ga yema pãu ga daxüwa rüyixümaã äãcuxü. Rü yexgumarüü ta yema baúarü aixepewa nayexma ga Arãüarü caxüruü ga rüxüüne, rü guma nutagü ga Tupanaärü mugü nagu ümatügücü. ⁵ Rü yema baúétüwa nayexmagü ga yema taxre ga daxüçüãxchicünêxãgü ga ixãpxêxatüxü. Rü naxpêxatügümaã nayadüxétügü ga yema baúãtaü. Rü yema daxüçüãxchicünêxãgüarü ngãxüwa nixi ga nügü nangoxêêxüxü ga Tupana. Natürü taxucêxma tüxçüü yexeraãcü nüxü tixu i ngêmachiga. ⁶ Rü wüxicana yemaãcü na namexêêgüãxü ga guxüma ga yema, rü ñuxüchi ga paigü rü guxüguma yema nüxiraüxü ga naxmachiãgu nachocuxü na yéma Tupana namaã nüxü ixuxüãcüma nüxü yacuèxüügüxüçêx. ⁷ Natürü yema to ga naxmachiãwa rü yema paigüarü äëxgacüxicatama nixi ga yexma ücuxü. Rü tama guxüguma yexma naxücu, natürü wüxicanatama yexma naxücu ga wüxichigü ga tauncügu. Rü yexguma yexma naxüçuxgu rü yéma nanange ga naxünaü rü guma nagümaã yema baüxü namaxcütü. Rü yemaãcü ga yema paigüarü äëxgacü rü inanaxã ga guma nagü na noxrütama pecadu rü guxüma ga duüxügüarü pecaduxü iyanangümaxüçêx ga Tupana. ⁸ Natürü yema paigüarü äëxgacüxicatama nixi ga yema Nachica ga Üünexüchixügu ücuxü ga Tupana iyexmaxüwa. Rü ngêmaãcü Tupanaãe i Üünexü tüxü nüxü nacüèxêê na taxucürüwama yexma Tupana iyexmaxügu nachocuxü ga guxüma ga duüxüçü yerü yexguma nagu naxixgu ga yema mugü ga Moïché ümatüxü rü nachuxu ga yema. ⁹ Rü guxüma i ngêma pemaã nüxü chixuchigaxü, rü wüxi i cuêxruü nixi i taxcêx i yixema na ñuxma imaxêxü. Rü ngêmawa nüxü tadau rü yema ãmaregü ga Tupanana naxãgüxü rü yema naxünaü ga Tupanacêx nadëixü rü taxucürüwama yema duüxügüxü nimexêê na aixcüma Tupanapêxewa yamexüçêx. ¹⁰ Rü yema nuxcümaüügüxü ga mugü ga ðnagüchiga rü axetügüchiga rü nacümagüchiga ixixü, rü yema duüxügüarü düëtüxüñecëxicatama nixigü. Rü yemacêx tama yema duüxügüxü nimexêê na aixcüma Tupanapêxewa yamexüçêx. Rü woo napora ga yema mugü ga noxrix, natürü yexguma ínanguxgu ga Cristu rü marü yexma nayacuèx na duüxügümaã naporaxü. ¹¹ Natürü i ñuxma rü marü ínangu ya Cristu. Rü

nūma nixī i aixcūma tórū ngūxēeruū yīixū i Tupanapēxewa, rū nagagu nixī i nangēxmaxū i maxū i taguma gūxū. Rū ngēma nachica i ngextā taétūwa ínachogūxūwa rū aixcūma naxūūne erū tama guma ípata ga naxchirunaxcēx ga duūxūgūmare ūxūnerūū nixī erū daxūguxū i naānewa nangēxma. ¹² Rū Cristu rū marū daxūguxū i naānegu naxūcu i ngextā Tupana íngēxmaxūwa. Rū taxucēma tūxcūū wūxichigū ya taunecūgu ngēxma naxūcu, erū marū guxūguma ngema nangēxmaēcha. Rū yexguma yexma naxūcuxgu, rū tama yēma nanange ga chibugūgū rū wocaxacūgūgū na Tupanana naxāāxūcēx. Natūrū nūma ga Cristu rū nagūtama inaxā na yemaācū naxūtanūāxūcēx ga tórū pecadugū rū tūxū nangēxmaxūcēx i maxū i taguma gūxū. ¹³ Rū yema mugū ga Moīché ūmatūxū rū ñanagūrū:

“Ngēxguma texé yuetaxū íngōgūgu, rū taxucūrūwama Tupanapata ya naxchirunaxcēxgu taxūcu”,

ñanagūrū. Rū yemacēx ga yema Yudíugū, rū yexguma wūxi ga yuetaxū yangōgūgūgu rū nanaxwēxegū ga na norū paixūtawa nagaāxū ga wūxi ga woca na yema pai Tupanacēx yamāxūcēx rū na yaguāxūcēx na yemaācū ga guma tanimaca rū dexāgu nagūāxūcēx na yema duūxūgūxū namaā namaxcuxūcēx na yemaācū nūxna ínayixūcēx ga norū chixexū. Natūrū yema rū duūxūgūarū dūxētūxūnewaxicatama nanamexēē rū tama norū maxūxū namexēē. ¹⁴ Natūrū nagū ya Cristu rū yema naxūnagūgūarū yexera name erū tórū maxū namexēē na aixcūma Tupanapēxewa ímexūcēx. Rū Cristu rū woo Tupana Nane na yīixū rū na nataxūyū erū norū chixexū, natūrū Tupanana nūgū naxā rū tórū pecaducēx nayu yerū Naāē i Ūūnexū nanaporaxēē. Rū yemaācū curuchagu nanabaxēē ga nagū. Rū ñuxma ya yima nagū rū ningu na tūxū namexēēxūcēx i Tupanapēxewa. Rū ngēmacēx taxucēma tanaxwēxe na nagu íxīxū ga yema mugū ga Moīché ūmatūxū ga tama tūxna naxāxū i maxū i taguma gūxū. Rū ñuxma na Cristugagu Tupanapēxewa ímexū, rū nūma ya Cristu rū tūxū narūngūxēē na naxūxūcēx i ngēma Tupana ya maxūcū tūxū naxwēxexū. ¹⁵ Rū ñuxma na tórū pecaducēx nayuxū ga Ngechuchu ya Cristu, rū nūma nixī i tórū ngūxēeruū i Tupanapēxewa, ngēma Tupanaārū uneta i ngexwacaxūxū nūxū íxuxūrūū. Rū ñuxma i yixema na Tupana tūxū dexū, rū tūxū nangēxma i maxū i taguma gūxū ega yima Naneāxū yaxōgūgu. Rū ngēxgumarūū ta i gūxūma i Tupanaārū duūxūgū ga nuxcūma yaxōgūxū, rū nūxū nangēxma i maxū i taguma gūxū yerū Cristu nayu na norū pecaduna ínanguxūxēēāxūcēx. ¹⁶ Rū ngēxguma nayuxchaūgu i wūxi i duūxū, rū wūxi i poperagu nanaxūmatū na texé tá nayaxuxū i norū ngēmaxūgū. Natūrū ngēxguma namaūxgu i ngēma duūxū, rū taxucūrūwama texé tanayaxu i norū ngēmaxūgū. ¹⁷ Rū ngēmacēx i ngēma popera rū tama napora i ngēxguma namaūxgu i ngēma duūxū. Rū ngēxguma nayuxguxicatama nixī i naporaxū. ¹⁸ Rū nūma ga Cristu rū norū yumaā nixī ga Tupanapēxewa tūxū yamexēēgūxū. Yerū ga Moīché rū nūxū nixu rū yexguma texé pecaduāxgu rū tanaxwēxe na tūmaārū paixūtawa tanagaxū ga wūxi ga naxūna na tūmaegagu nayuxēēāxūcēx rū inabaāxūcēx ga nagū na Tupana tūxū nūxū ngechaūxūcēx ga tūmaārū pecadu. ¹⁹ Rū Moīché rū gūxūma ga duūxūgūpēxewa nūxū nixu ga gūxūma ga Tupanaārū mugū. Rū yemawena nanayaxu ga wocaxacūgūgū rū chibuxacūgūgū, rū dexāmaā nanaxūēū. Rū ñuxūchi nanayaxu ga wūxi ga naīxchacūūxacū rū ñuxre ga tūēxmū ga dauxūne, rū yema naīxchacūūgu nanabagūmū. Rū yemamaā guma nagūwa nanacūe rū ñuxūchi nanamaxcūetū ga yema popera

ga Tupanaārū mugū nawa yexmaxū. Rū yexgumarūū ta nayamaxcutanū ga guxūma ga duūxūgū. ²⁰ Rū űuxūchi ga Moīché rū űanagūrū nūxū ga duūxūgū: “Tupana rū marū inaxuneta na pexū tá nangūxēēxū. Rū daa nagūmaā pexū chimaxcutanū i űuxma erū ngēmaācū nixī i choxū namuxū na ngēmawa nūxū pecuāxūcēx na aixcūma tá pexū nangūxēēxū”, űanagūrū. ²¹ Rū űuxūchi ga Moīché rū guma nagūmaā nanamaxcutēū ga guma űpata ga naxchirunaxcēx ga nawa Tupanaxū yacuēxūūgūne. Rū yexgumarūū ta nayamaxcutanū ga guxūma ga yemaxūgū ga namaā Tupanaxū yacuēxūūgūū ga guma űpataarū aixepewa yexmagūxū. ²² Rū nūxū tacuēx rū yema duūxūgū ga yexguma pecadu naxūgūgu rū Tupanapēxewa nūgū yamexēēgūchaūgu, rū norū paigūxūltawa nanaga ga wūxi ga naxūna na nūxū yamaāxūcēx rū inabagūxēēxūcēx na Tupana tama napoxcuexūcēx. Natūrū űuxma ya Tupana rū tūxū nūxū nangechaū i tōrū chixexū yerū tōrū pecaducēx nayu ga Ngechuchu rū nagū inanaba. Rū yexguma chi tāū chima nayuxgu rū nagū inabaāgu, rū taxucūrūwa chima Tupana tūxū nūxū nangechaū i tōrū pecadugū.

Cristu rū nayu na iyanaxoxēēxūcēx i pecadu

²³ Rū yemacēx ga Tupana rū nuxcūmaxūchima Moīchémaā nūxū nixu na paigū duūxūgūarū pecaducēx nadēixū ga naxūnagū rū inabaāxū ga nagū na yemaācū Tupana tama napoxcuexūcēx ga duūxūgū. Natūrū i űuxma i yixema na Tupana tūxū dexū, rū tūxū nangēxma i tachica i daxūguxū i naānewa yerū Nane ya Cristutama tōrū pecaducēx nayu rū inanaba ga nagū. Rū yima nagū rū Tupanapēxewa rū poraācū ngēma naxūnagūgūarū yexera narūporamaē. ²⁴ Rū ngēmacēx i űuxma rū taxucēxma tūxcūū guma űpata ga naxchirunaxcēx ga duūxūgū űxūnegu naxūcu ya Cristu na ngema taētūwa nachogūxūcēx. Erū nūma ya Cristu rū marū Tupanaxūtawaxūchi nangu i daxūguxū i naānewa. Rū ngema Nanatūpēxewa nangēxma i űuxma na ngēma taētūwa nachogūxūcēx. ²⁵ Rū ngēmacēx i űuxma rū taxucēxma tūxcūū guxūguma Nanatūna nūgū naxāēcha na ngēmaācū taxcēx nayuuuxūcēx. Rū yema Yudiūgūarū paigūarū āēxgacūgū rū gūcū ga taunecūgūgu guma űpata ga űūnenegu nachocuxū na yēma Tupanana naxāgūāxūcēx ga guma naxūnagūgū. ²⁶ Natūrū ya Cristu, rū taxucēxma tūxcūū gūcū ya taunecūgūgu Tupanana nūgū naxāēcha, erū ngēxguma chi ngēmaācū yixūgu rū chi noxri naāne ixūgūgumama rū chi marū muēxpūxcūna taxcēx nayu. Natūrū űomaūcūū ga Cristu rū marū űoma ga naānewa nangu na wūxicanatama nūgū inaxāxūcēx rū pecaducēx nayuxūcēx. ²⁷⁻²⁸ Rū ngēma na wūxicanatama nayuxū i duūxūgū naxūpa na Tupanapēxewa nangugūxū, rū yexgumarūūtama ga Cristu rū wūxicanatama nūgū inaxā rū nayu na iyanaxoxēēxūcēx i muxūma i duūxūgūarū pecadugū. Natūrū wena taxarū nūma naxū. Rū ngēxguma wena nūma naxūxgu rū tama pecaduarū oxēēwa tá nūma naxū. Natūrū tá nūma naxū na namaxēēxūcēx i guxūma i ngēma duūxūgū i aixcūma űnanguxēēgūxū.

10

¹ Rū yema mugū ga Moīché űmatūxū rū űrarūwatama yema duūxūgūcēx nanangoxēē ga űacū tá na naxūxū ga Cristu. Natūrū ga yema mugū rū tama aixcūma Cristurūū napora, yerū taxucūrūwama Tupanapēxewa nayamexēē ga yema duūxūgū woo gūcū ga taunecūgūgu Tupanapēxewa nanadaiixū ga naxūnagū na yemaācū Tupanana nangaicmagūxūcēx. Rū yemaācū ga yema mugū rū taxucūrūwama Cristurūū nanamaxēēxē ga yema duūxūgū.

2 Rū yexguma chi yema mugū aixcūma yema duūxūgūxū imexēēgu ga Tupanapēxewa, rū tāū chima nagu narūxīnūēēcha na yapedacuāxū, rū chi nūxū narūxoe na naxūnagū Tupanacēx nadēixū. 3 Natūrū woo gūcū ga taunecūgūgu Tupanacēx naxūnagū nadēixū ga duūxūgū, rū tama norū pecadu inayarūxoxēē. Rū yema rū norū pecaduarū cuēxāchixēēruūmare nixī. 4 Yerū guma nagū ga yema wocagū rū chibuarū rū tama napora na iyanaxoxēēāxūcēx ga pecadugū. 5 Rū yemacēx ga Cristu ga yexguma űoma ga naānewa naxūchaūgu, rū Nanatūxū űanagūrū:

“Tama cunaxwēxe na naxūnagū cuxcēx nadēixū i duūxūgū na naxūtanūgūāxūcēx i norū pecadugū. Natūrū cunamexēē i űaā chaxune na ngēmamaā chanaxūtanūxūcēx i pecadu. 6 Rū tama namaā cutaāē i ngēma naxūnagū i cuxna naxāmaregūxū rū cuxcēx nadēixū rū yagugūxū na naxūtanūgūāxūcēx i norū pecadugū. 7 Rū yemacēx rū űacharūgū: ‘Dūcēx, Pa Chaunatūx, daxe chixī, rū nuā cupēxewa changēxma na chanaxūxūcēx i curū ngūchaū rū na chayuxūcēx, ngēma curū űrewa chauchiga naxūmatūxūrū’, űacharūgū”.

8 Rū yemaācū ga Cristu rū nūxū nixu na Tupana rū tama aixcūma namaā nataāēxū ga yema na naxcēx nadaiāxū ga naxūnagū rū naxcēx yagugūāxū na naxūtanūgūāxūcēx ga norū pecadugū woo yema mugū ga Moīchē űmatūxūwa rū duūxūgūxū namu na naxūgūāxū ga guxūma ga yema. 9 Rū yemawena ga Cristu, rū űanagūrū ta:

“Dūcēx, Pa Chaunatūx, daxe chixī, rū nuā cupēxewa changēxma na chanaxūxūcēx i curū ngūchaū rū duūxūgūarū pecaducēx na chayuxūcēx”,

űanagūrū. Rū yemawa nūxū tacuēx na Tupana rū marū iyanaxoxēēāxū na naxūnagū naxcēx nadēixū, yerū Nanexū ningucuchixēē na pecaducēx nayuxū. 10 Rū űuxma na Ngechuchu ya Cristu naxūxū ga yema Tupanaārū ngūchaū, rū ngēmacēx nixī i űuxma i Tupanapēxewa ixūūnexū i yixema. Yerū nūma ga Cristu rū Tupanana nūgū naxā na wūxicanatama guxāārū pecaducēx nayuxū. 11 Rū guxūma i Yudiūgūarū paigū rū wūxichigū i ngunexūgu rū tupaucawa nangēxmagūxū na Tupanana naxāgūāxūcēx i naxūnagū i naxcēx nadaiixū. Rū guxūguma yemaācū nanaxūgūxū natūrū taguma aixcūma inayarūxo ga norū pecadugū woo yemaācū na naxūgūxūāxū. 12 Natūrū nūma ga Ngechuchu ya Cristu rū wūxicanatama Tupanana nūgū naxā na guxāārū pecaducēx nayuxūcēx. Rū yemawena rū űuxūchi daxūwa naxū rū Tupanaārū tūgūnecūwawa nayarūto, erū guxāārū āēxgacū nixī i űuxmax. 13 Rū ngēma nixī i nangēxmaxū űuxmatāta ya Tupana rū guxūma i norū uwanūgūxū nūxū nayexeraxēē. 14 Rū nūma ga Ngechuchu ya Cristu rū wūxicanatama Tupanana nūgū naxā rū nayu na guxūguma Tupanapēxewa timexcēx ya yixema Tupanacēx tūxū yaxūūnexēēgūxe. Rū ngēmacēx i űuxma rū taxucēxma tūxcūwēna nūgū inaxā rū nayu, yerū wūxicanatama guxūma ningutanūxēē. 15-16 Rū Tupanaāē i Ūūnexū rū tūxū nūxū nacūxēē na aixcūma yīxū i ngēma, yerū nūma ga Tupana rū űanagūrū:

“Ngēxguma nawa nanguxgu na wena ngēma Yudiūgūmaā ichaxunetaxū, rū wūxi i ngexwacaxūxū i uneta tá nūxna chaxā. Rū tá meā ngēma duūxūgūxū nūxū chacuēxēē i chorū mugū na aixcūma naāēwa nangēxmagūxūcēx rū guxūguma naga naxīnūēxūcēx. 17 Rū tá nūxū ichayarūngūmaxūchi i ngēma duūxūgūarū pecadugū rū ngēma chixexū i naxūgūxū. Rū tagutāma wena nūxna chacuēxāchi”,

ñanagürü. ¹⁸ Rū ngēmaācū nūxū tacuèx rū ngēxguma Tupana duūxūgūaxū nūxū ngechaūgu i norū pecadugū, rū marū taxucèxma tūxcūū nanaxwèxe na wena tacū i naxūnagū nūxna naxāgūxū naxcèx i pecadu.

Name nixī i Tupanana tangaicamagū

¹⁹⁻²⁰ Rū ngēmacèx i ñuxma, Pa Chaueneēgū, rū taxucèxma tūxcūū tamuūē na Tupana ingēxmaxūwa ichocuxū na namaāxūchi idexagūxūcèx. Rū nuxcūmaxūchima rū paigūarū āēxgacūxicatama yexma naxūcu nagu ga guma ĩpata ga naxchirunaxcèx ga Tupana nawa yexmane. Rū taxucūrwama ngexerūxūxemare yexma taxūcu. Natürū nūma ga Ngechuchu ya Cristu rū marū inayanaxoxēē ga guxūma ga yema ga yexguma curuchagu nayuxgu rū nagū inabaāgu na Tupana ingēxmaxūwa tūxū yachocuxēēxūcèx rū namaāxūchi idexagūxūcèx. Rū woo taxucūrwama Tupanana tangaicamagū ga noxrix, natürū nūma ga Cristu rū nayu na tūxū namaxēxēxūcèx. Rū nagagu nixī i ñuxma i Tupanaxūtawa ingugūxū. ²¹ Rū nūma nixī i Tupanapēxewa tūxū nangūxēēxū i guxāma i yixema i Tupanaārū duūxūgū ixīgūxe. ²² Rū ñuxma na tūxū nangēxmaxū ya tórū ngūxēēruū i Tupanapēxewa, rū tanaxwèxe i ngearū chixexūācūma Tupanana tangaicamagū na namaāxūchi idexagūxūcèx. Rū tanaxwèxe i aixcūma tayaxōgū na nūma rū tá meā tūxū nayaxuxū yerū Cristu rū taxcèx nayu na tūxū iyanaxoxēēāxūcèx i tórū chixexū rū yemacèx marū naegagu ĩtabaiū. ²³ Rū tanaxwèxe i aixcūma meā Cristuaxū tayaxōgūecha yerū nagūmaā tūxū inayanaxoxēē ga tórū chixexū. Rū ngēmacèx ĩtananguxēē na wena taxarū nūma naxūxū na Nanatūxūtawa tūxū nagagūxū. Rū taguma tanaxwèxe na nūxū rūxoexū na yaxōgūxū, rū bai i ĩrarūwa. Erū Tupana ga tamaā ixunetacū na tūxū nangūxēēxū, rū aixcūmaxūchi tá nayanguxēē i guxūma ga yema tamaā nūxū yaxuxū. ²⁴ Rū ñuxma na ngēmaācū tūxū nangūxēēxū ya Tupana, rū name nixī i guxūguma naxcèx tadaugū na ñuxācū wūxichigū yigū rūngūxēēgūxū na yexeraācū yigū ingechaūgūxūcèx rū mexū ixūgūxūcèx. ²⁵ Rū name nixī i guxūguma tórū ngutaquēxegūwa na ĩngugūxū. Erū nūmaxū rū marū nūxū narūxoe na ngutaquēxewa naxīxū, rū tama tanaxwèxe na ngēxgumarūū ixīgūxū. Rū ngēmacèx name nixī i yigūaxū tanagūchaūxēē na ingutaquēxegūxū. Rū ñuxma na nūxū icuāxū na marū yangaicaxū ya tórū Cori, rū yexeraācū tanaxwèxe na yigūaxū nangūchaūxēēxū. ²⁶ Natürū ngēxguma chi texé Cristuaxū yaxōchirēxgu ga noxrix rū ñuxūchi noxtacūma nūxū tarūxoxgu, rū marū nataxuma na ñuxācū namexēēxū i ngēma tūmaārū pecadu i Tupanapēxewa. ²⁷ Erū ngēxguma chi ngēmaācū noxtacūma Cristuxū tarūxoxgu, rū aixcūmaxūchi tá tanayaxu i ngēma poxcu i āūcūmaxū i Tupana tá tūxū namaā poxcuxū rū yima ūxū ya ĩyaurane ya nawa tá ĩnaguxūne i ngēma Tupanamaā rūxuwantūgūxū. Rū ngēxīcatama nixī i tūxū ĩnanguxēēxū ya yixema Cristuxū rūxoxe. ²⁸ Rū nūxū tacuèx rū yexguma texé tama Moīchéarū mugūga ĩnūgu rū nayexmagu ga taxre rū ēxna tomaēxpūx ga duūxūgū ga tūxū daugūxū rū tūxū ixugūexū na aixcūma tama naga taxīnūxū, rū āēxgacūgū rū noxtacūma tūxū nimèxgū rū tama nūxū tangechaūtūmūūgū. ²⁹ Natürū Tupana rū aixcūma yexeraācū tá nanapoxcue i ngēma duūxūgū i tama Nanega ĩnūexū rū yima nagū ya pecaduarū piruūxū oexū rū Naāē i Ūūnexū i nūxū ngechaūxūmaā guxchigagūxū.

³⁰ Rū meāma nūxū tacuèx rū Tupana rū tama natūcèxma ñanagürü:

“Choma tá nixī i namaā nūxū chacuāxū na tacū tá namaā chaxūxū i guxūma i ngēma chixexū ūgūxū. Rū aixcūma tá chanapoxcu”,

ñanagürü. Rû yexgumarüü ta ñanagürü:

“Choma tátama nixî i nüxna chaçaxü i wüxichigü i chorü duüxügü i norü maxüchiga”,

ñanagürü. ³¹ Rû dücax, rû aixcüma namaxü ya Tupana, rû ngëmacèx ega tama naga ixînüëgu rû wüxi i äücümaxüchixü nixî na namëxgu inguxü na tüxü napoxcuxüçèx. ³² Rû dücax, name nixî i nüxna pecuëxächie ga ñuxäcü na yîixü ga yexguma noxri Cristuxü peyauxgu. Rû yexguma ga pema rü yema na peyaxögüxügagu rû poraäcü guxchaxügü pexü nangupetü, natürü tama Cristuxü perüxoe rû bai ga irarüwa. ³³ Rû ñuxre ga pema rü duüxügü pemaä naguxchigagü rû guxäpëxewa pexü niçuaixgü. Rû toguäx ga pema rü pegü ipeyaxägu na yema pemüçügürüü ngüxü pingegüxüçèx. ³⁴ Rû pema rü pexü nangehaütümüügü ga yema petanüxügü ga yaxögüxü ga poxcupataüwa yexmagüxü. Rû taäëäcüma yaxna namaä pexînüë ga yema tama yaxögüxü ga pexna napuxüxü ga perü yemaxügü. Rû tama naxcèx pexoegaäë, yerü meäma nüxü pecuèx rû daxüguxü i naänewa pexü nangëxma i ngëma perü ngëmaxügüarü yexera ixîxü, erü tagutäma nagux. ³⁵ Rû ngëmacèx i ñuxmax, rü tama name na nüxü perüxoexü na Cristuaxü peyaxögüxü woo tacü pexü üpetügu. Erü marü nüxü pecuèx rü Tupana rû aixcümaxüchi tá pexna nanaxä i perü ämare i maxü i taguma güxü, erü Cristuaxü peyaxögü. ³⁶ Rû ngëma guxchaxügü i pexü ngupetüxü, rü name nixî i yaxna namaä pexînüë na penaxüxüçèx i Tupanaärü ngüchaü rü penayaxuxüçèx i ngëma ämare i pemaä inaxunetaxü. ³⁷ Erü Tupanaärü ore i ümatüxüwa rü ñanagürü:

“Paxaxüchi tá wenaxärü numa naxü ya Cristu. Rû aixcüma täütäma nuxcü ñnangu. ³⁸ Natürü yixema tumaärü ögagu chopëxewa mexë, rü name nixî i guxüguma tayaxöðcüma chauxcèx tamaxü. Natürü ngëxguma nüxü tarüxoaxgu na tayaxöxü, rü choma rü täütäma tûmamaä chataäë”,

ñanagürü. ³⁹ Natürü i yixema rü tama ngëma duüxügü i nüxü rüxoexü i Tupana tá poxcuexürüü tixigü. Erü yixema rü ngëma yaxögüxütanüxü tixigü, rü ngëmacèx tüxü nangëxma i maxü i taguma güxü.

11

Törü öchiga

¹ Rû ñuxma rü törü ögagu nixî i nüxü icuáxü na aixcüma tá nayauxgüxü i guxüma i ngëma irünguxëëgüxü ga Tupana tamaä ixunetaxü. Rû ngëma törü ögagu nixî i nüxü icuáxü na aixcüma Tupana tá yanguxëëxü i ngëma norü uneta i ñuxma tauta nüxü idauxü. ² Rû ñuxre ga nuxcümaügüxü ga törü oxigü rü Tupanaäxü nayaxögü, rü yemacèx ga Tupana rü namaä nataäë. ³ Rû ngëma törü ögagu nixî i nüxü icuáxü na aixcüma yîixü na Tupana rü norü oremaämare nangoxëëäxü ga ñoma ga naäne rü üëxcü rü tauemacü rü woramacurigü rü äxtagü. Rû yemaäcü ga Tupana, rü ngürüwa nanangoxëëmare ga guxüma i ngëma ñuxma nüxü idauxü. ⁴ Rû guma nuxcümaücü ga Abé rü Tupanaäxü nayaxö. Rû yemacèx Tupanaga naxînü rü nüxna nanaxä ga wüxi ga naxüna ga Tupanacèx yamáxü. Natürü ga naëneë ga Caï rü tama Tupanaga naxînü rü tama nüxna nanaxä ga yema ämare ga Tupana nüxü naxwëxexü. Rû yemacèx ga Tupana rü woo tama Caïmaä nataäë, natürü Abémaä nataäë rü nüxü nixu na mecü yîixü yerü nayaxö rü naga naxînü. Rû ngëmacèx i ñuxmax na woo nayuxü ga Abé, natürü wüxi i törü cuëxruü nixî. Erü nawa nixî i nüxü icuáxü na Tupana naxwëxexü na yaxögüxü rü naga ixînüëxü. ⁵ Rû Enó rü ta Tupanaäxü nayaxö rü naga naxînü. Rû

yemacèx nixī ga namaxācūtama yagaāxū na tama nayuxūcèx. Rū namūcūgū rū taguma nūxū inayangaugū, yerū Tupana nayaga. Rū Tupanaārū ore i ūmatūxūwa nūxū nixu rū yexguma tauta yagaāgu, ga Enó rū nanaxū ga yema Tupana naxwèxexū. ⁶ Natūrū taxuacūma Tupana tamaā nataāe ega tama nūxū yaxōgūgu. Rū yīxema namaā āmūcūchaūxē, rū tanaxwèxe na tayaxōxū na aixcūmaxūchi nangēxmaxū i nūma rū aixcūma tūxū nangūxēēxū ya yīxema naxcèx daugūxe rū naga īnūēxē. ⁷ Rū yexguma Noemaā yadeaxgu ga Tupana, rū nūma ga Noē rū nayaxō rū naga naxīnū. Rū Tupana rū namaā nūxū nixu rū tá na īnanguxēēāxū ga mucū ga taxūchicū ga taguma duūxūgū nūxū daucū rū tá guxūwama inanguanexēēcū. Rū namaā nūxū nixu ga na naxūāxūcèx ga wūxi ga wapuru ga taxūne na tama nayuxūcèx ga nūma rū namèx rū nanegū rū naneāxgū. Rū Tupanaga naxīnū ga Noē, rū nanaxū ga guma wapuru, rū yemaācū tama nayue ga nūma rū napatacūāx. Rū yemaācū Tupanaāxū nayaxō. Natūrū yema togū ga duūxūgū rū tama nayaxōgū, rū yemacèx Tupana nanapoxcue. Natūrū nūma ga Tupana rū Noexū nixu na napēxewa namexū, yerū nūxū nayaxō. ⁸ Rū guma tórū oxī ga Abrátū, rū Tupanaāxū nayaxō. Rū yemacèx nixī ga naga naxīnūxū rū nūxna yaxūxū ga nanatūchiūāne na nawa naxūxūcèx ga yema naāne ga Tupana tá nūxna āxū na noxrūxūchi yīxūcèx. Rū yemaācū nanaxū ga yexguma Tupana namuxgu. Rū nanatūchiūānēwa inaxūāchi ga Abrátū woo tama nūxū na nacūāxū ga ngextá tá na naxūxū. ⁹ Rū yexguma nawa nanguxgu ga yema naāne ga Tupana namaā ixunetaxū, rū űoma yexma naxūāneāxūrūūmare īpata ga naxchirunaxcèxmaāmare naxāchiū. Rū yexgumarūūtama nixīgū ga nane ga Ichaá rū nataa ga Acobu, yerū yexguma nayaegu rū Abrátūrū űoma yexma naxīāneāxūrūūmare nixīgū ga yema naānēwa. Rū yemaācū nixīgū ga guxūma ga nūmagū ga na woo Tupana rū namaā inaxunetaxū ga na noxrūxūchi yīxūcèx ga yema naāne. ¹⁰ Rū yemaācū ga Abrátū, rū woo űoma yexma naxūāneāxūrūūmare yēma nayexma, natūrū Tupanaāxū nayaxōchigūama, yerū nūxū nacūex na Tupana tá daxūguxū i naānēwa na nagaxū nawa ya yima īāne ya nūmatama naxūxūne ya tagutāma iyarūxoxūne. ¹¹ Rū yexgumarūūtama iyixī ga Abrátū namèx ga Chara. Rū woo ga na taguma naxāxācūchiréxū yerū marū iyaxūchi, natūrū ixāxācū yerū iyaxōōma na Tupana rū aixcūma tá yanguxēēāxū ga yema norū uneta ga tá na naxāxācūxū. ¹² Rū yemaācū ga Abrátū rū woo marū yaguāxūchi na yīxū, natūrū dūxwa nūxū nayexma ga wūxi ga nane, rū gumāwa ne naxī ga muxūma ga nataagū. Rū űuxma rū űoma ēhtagūrū namuxūchi, rū űoma naxnūcū ya taxuacūma yaxugūcūrū nixīgū, yerū yemaācū Abrátūmaā inaxuneta ga Tupana. ¹³ Natūrū nūmagū ga Abrátū rū Ichaá rū Acobu rū nayue, rū yemacèx tama nūxū nadaugū ga guxūma ga nataagū i űuxma ngēxmagūxū, rū tama namaā inacuēxgū ga yema naāne ga noxri Abrátūmaā nūxū yaxuxū ga Tupana. Natūrū Tupanaāxū nayaxōgūama, rū yemacèx nūxū nacūēxgū rū Tupana rū tá aixcūma na yanguxēēāxū ga yema norū uneta ga namaā nūxū yaxuxū. Rū nataāēgū yerū nūxū nacūēxgū na tāūtāma guxūguma űoma ga naānēwa na nayexmagūechaxū, rū yemacèx nūxū nixugūe na to i nachīūānecūāxrūūmare yixīgūxū ga űoma ga naānēwa. ¹⁴ Rū nūmagū rū yema oremaā meāma tūxū nūxū nacūēxē na tama űoma ga naāneguxicatama naxīnūēxū natūrū īnanguxēēgūāxū i to i nachīca i daxūguxū i naānēwa ngēxmaxū. ¹⁵ Rū nūmagū rū yexguma chí nanaxwèxegūgu ga naxcèx na nawoeguxū ga yema naāne ga noxri nawa ne naxīxū, rū tāū chima nūxū naguxcha rū chí naxcèx nawoegu.

¹⁶ Natürü ga nūmagü rü nüxū nangúchaūgū i ngēma naāne i mexēchixū i daxūwa ngēxmaxū i Tupanaxūtawa. Rū yemacēx nixī ga Tupana ga tama naxānexū na nūgū yaxuxū na norū Tupana yīxū. Yerū nūma ga Tupana rü naxcēx nanamexēē ga wūxi ga īāne ya daxūguxū i naānewa ngēxmane. ¹⁷⁻¹⁸ Rū Tupana ga noxri rü Abrāūmaā nüxū nixu rü űanagūrū:

“Cune ya Ichaāwa tá cuxū nangēxma i muxūchixūtama i cutaagū”, űanagūrū. Rū Abrāū rü nayaxō na Tupana rü aixcūmaxūchi tá na yan-guxēēaxū ga yema namaā inaxunetaxū. Rū yemacēx ga yexguma Tupana nüxū űxgu rü Ichaācēx nüxna nacaxgu na naxcēx yamaāxūcēx, rü nūma ga Abrāū rü tama nanachuxu. Rū inamemare na Tupanacēx yamaāxū ga guma nane ga nūgūmaā wūxicacū. ¹⁹ Yerū nūma ga Abrāū rü nayaxō na Tupanaāxū natauxchaxū na wena namaxēxēēaxū i yuexū. Rū yemacēx ga Abrāū rü inamemare na Tupanacēx nanexū yamāxū yerū nayaxō na Tupana rü wena tá namaxēēaxū. Rū aixcūmaxūchi yemaācū Abrāūcēx nanaxū ga Tupana, yerū woo űoma marū nayuxūrū nixī ga nane, natūrū ga Tupana rü maxūcū nüxna nanamu. Rū yema rü wūxi ga tōrū cuēxruū nixī na űuxācū aixcūma yaxōōxū ga Abrāū. ²⁰ Rū guma Ichaā rü ta Tupanaāxū nayaxō. Rū yemacēx ga yexguma marū nayēxgu, rü nayumūxē rü Tupanana naca na nane gū ga Acobu rü Echaūxū nangūxēēxūcēx. Rū yemaācū nayumūxē yerū aixcūma nayaxō na Tupana tá yanguxēēxū ga yema nüxna naxcēx naçaxū. ²¹ Rū guma Acobu rü ta Tupanaāxū nayaxō. Rū yemacēx ga yexguma marū nayēxgu rü nayuxchaūgu, rü norū caxūxūmaā nūgū inachixēē rü Tupanaxū nicūexūū. Rū nayumūxē rü Tupanana naca na nataagū ga Yūche nanegūxū nangūxēēxūcēx. Rū yemaācū nayumūxē yerū aixcūma nayaxō na Tupana tá yanguxēēxū ga yema Abrāūmaā inaxunetaxū. ²² Rū guma Yūche rü ta Tupanaāxū nayaxō. Rū yemacēx ga yexguma nayuxchaūgu, rü natanūxūgūmaā nüxū nixu rü űanagūrū:

“Tataagū rü yixcūra rü tá inachoxū i nuā Equituanewa na nawa naxīxūcēx i ngēma naāne ga Tupana tōrū űxi ga Abrāūmaā nüxū ixuxū. Rū ngēxguma ngēma naxīxgu, rü chanaxwēxe ya chauxchinēxāgū rü ta ngema nanana na ngēxma yatēxgūāxūcēx”,

űanagūrū. ²³ Rū yemawena rü mucūma ga taunecūgū rü nimu ga yema duūxūgū ga Equituanewa. Rū yema nachīāneārū āēxgacū, rü tama nanaxwēxe na yexeraācū yamuētanūxū, rü yemacēx nanamu na tūxū nadēixūcēx ga guxāma ga buxe ga iyatūxe ga yexwacēx ibuetanūxē. Natūrū nanatū rü naē ga guma tōrū űxi ga Moīché, rü aixcūma Tupanaāxū tayaxōgū. Rū yemacēx ga yexguma noxri nabuxgu ga Moīché, rü tomaēxpūx ga tauemacūgu itayacūxgu, yerū nüxū tadaugū na namexēchixū rü tama naxcēx tamūē ga yema Equituanearū āēxgacūārū ore ga woo na naxunagūāxū ga na buxe tūxū nadēixū. ²⁴⁻²⁵ Rū Moīché rü ta Tupanaāxū nayaxō. Rū yemacēx ga yexguma marū nayēxgu rü tama nanaxwēxe na nūgū yaxuxū na Equituanearū āēxgacūxacū ngīne na yīxū, yerū naxcēx rü narūmemaē na natanūxūgū ga Yudiūgūmaā wūxigu ngūxū yangexū. Rū tama nanaxwēxe na űacū ga űoma ga naāneārū chixexūmaā nūgū na nataāēxēēxū, yerū nüxū nacūex rü yema taāē rü paxaāchiruūmare nixī. ²⁶ Rū yexgumarūū na daxūguxū ga naānena na yaxūxū ga Cristu na ngūxū yangexūcēx, rü yexgumarūū ta nixī ga Moīché ga āēxgacūpatana na yaxūxū, yerū naxcēx rü narūmemaē na natanūxūgū ga Yudiūgūmaā wūxigu ngūxū yangexū. Natūrū taxucēxma yema ngūxūgu narūxīnū, yerū nüxū nacūex rü tá wūxi

i ngunexūgu Tupanaxūtawa na nayauxāxū i norū natanū. ²⁷⁻²⁸ Rū yema na yaxōōxūcēx nixī ga Tupanaga naxīnūxū ga Moīché. Rū yemacēx ga yexguma Tupana namuxgu ga na naxūāxū ga ūpetūchiga, rū nayanguxēē ga yema Tupana namuxū. Rū nūma ga Moīché rū guxūma ga natanūxūgū ga Yudiūgūxū namu na wūxichigū ga Īpatawa yamāāxūcēx ga wūxi ga carnerux-acū na yemagūmaā namaxcūāxūcēx ga naāxpatagū. Rū űnanagūrū nūxū:

“űNoma i chūtaxūgu rū tā Tupana nūma Equituanewa nanamu i wūxi i norū orearū ngeruū i daxūcūāx rū tā nanadai ya yima nūxira bucū ya Equituanecūāxgū nane i wūxichigū ya Īpatawa. Natūrū ngēxguma yima nagūmaā penamaxcuxgu i perū ĩāxpata, rū tāūtāma pechiūgu naxūcu”, űnanagūrū. Rū yemaācū ga Moīché rū Tupanaga naxīnū yerū nūxū nayaxō. Rū yemacēx ga yema orearū ngeruū ga daxūcūāx rū taxuūma ga Yudiūgūnēxū nimēx. Rū yema na yaxōōxūcēx nixī ga ĩnaxūxūxū ga Equituarū naānēwa, rū tama naxcēx namuūxū na guma Equituanēārū āēxgacū tā namaā nanuxū. Rū taguma nūxū narūxo ga Tupanawe na naxūxū, yerū Tupana ya ēxūgucūarū ngūchaū naxū. ²⁹ Rū yema duūxūgū ga Moīchéwe rūxīxū rū ta nayaxōgū. Rū yemacēx ga yexguma yema Taxtū ga Dauchiūxūwa nangugūgu, rū yema dexā rū nūgūna nixīgachi, rū nipaaneāchi, rū yēma nichoū. Natūrū yexguma yema Equituanecūāx ga churragū ga nawe ngēgūxū nawe ichoūgu, rū yexma nayiama, yerū wenaxārū nūgūna naxī ga yema dexā. ³⁰ Rū yexguma guma ĩāne ga Yericūwa nangugūgu ga yema duūxūgū, rū taxucūrūwama nichocu, yerū guxūwama naxāxtapūx. Natūrū Tupanaāxū nayaxōgū, rū yemacēx Tupanaga naxīnūē rū 7 ga ngunexū nūxū ĩnichoeguāchitanūcūū, yema Tupana namaā nūxū ĩxuxūrū. Natūrū yexguma norū 7 ga ngunexūwa nanguxgu, rū nūēchama niwēxgūtapūx, rū yemaācū nichocu. ³¹ Natūrū yema nge ga Yericūcūāx ga Raā, rū woo chixri imaxū ga noxrix, natūrū yexguma yēma nangugūgu ga yema taxre ga Yudiūgū ga hexma ngugūtaewa yēma ĩxū, rū ngūma iyixī ga nūxū nangūxēēxū. Rū yemacēx tama yema togū ga Yericūcūāx ga tama Tupanaga ĩnūēxūrūē iyu, yerū Tupanaāxū iyaxō. ³² Rū űnuxma rū tacū i togū i duūxūgūchigaxū tā pemaā chixuxū? Rū changechica na pemaā nūxū chixuxūcēx i nachiga ga yema nuxcūmaūgūxū ga āēxgacūgū ga Yedeū rū Barā rū Chaūchoū rū Yetē rū Dabī rū Chamue, rū guxūma ga nuxcūmaūgūxū ga Tupanaārū orearū uruūgū. ³³ Rū yema na yaxōōgūāxūcēx nixī ga Tupana nūxū rūngūxēēxū. Rū yemaācū to ga nachīūānēgūarū āēxgacūgūxū narūporamaēgū, rū meāma norū duūxūgūmaā ĩnacuēxgū rū aixcūma nanayauxgū ga yema Tupana namaā ĩxunetaxū. Rū yemacēx ga yexguma woo aitanūgu yatēxcuchigūāgu, rū taxuūma namaā naxū ga aigū yerū Tupana nūxna nadau. ³⁴ Rū yexguma norū uwanūgū ūxūxetūwa yawocuxgu, rū taxuūma nūxū naxūpetū rū tama nixae, yerū Tupanaāxū nayaxōgū rū nūma rū nūxna nadau. Rū yexguma togū taramaā nadaixchaūgu, rū Tupana nūxū narūngūxēē na taxuūma nūxū ūpetūxūcēx. Rū yexguma naturaegu rū norū uwanūgū nadaixchaūgu, rū Tupana nanaporaēē. Rū yexguma to ga nachīūānēārū churragūmaā nūgū nadaixgu, rū yema togū ga churragūxū narūyexeragū. ³⁵ Rū nayexma ga ngēxūgū ga yuexacūxū, natūrū yema naxācūgū rū wenaxārū ĩnarūdagū yerū Tupanaāxū nayaxōgū. Natūrū nayexma ga togū ga poraācū ngūxū ĩngēgūxū yerū norū uwanūgū yemaācū namaā nachopetū na Tupanaxū ĩnatēxgūxūcēx. Natūrū ga nūmagū rū tama Tupanaxū ĩnatēxgū rū yemacēx nayue, yerū naxcēx rū narūmemaē nixī na wena namaxēxū rū nayauxgūāxū

i ngēma maxū i taguma gúxū. ³⁶ Rū nayexma ta ga ñuxre ga togū ga yaxōgūxū ga duūxūgū nūxū cugūxū, rū yaçuaixgūxū, rū cadenamaā yanēixgūxū, rū poxcupataūgu nawocuxū. ³⁷ Rū ñuxre ga nūmagū rū nutamaā inanamuxūchigū rū yemaācū nanadaí. Rū togū rū nayawāixyegū rū nayue. Rū ñuxre ga togū rū ngūxū nūxū ningexēēgū na Tupanaxū inatēxgūxūcēx. Rū tōgū rū taramaā nanadaí. Rū ñuxre ga nūmagū rū nu ne nanaxīmare rū carneruchēxmūđ rū chibuchēxmūđmaāmare nixāxchiru. Rū taxuūma nūxū nayexma, rū nanaxīxāchiāēgū yerū norū uwanūgū rū chixri namaā nachopetū. ³⁸ Rū ñoma ga naānecūāx rū naxchi naxaie, natūrū Tupana rū nūxū nangechaū. Rū ñoma ga naānewa rū norū uwanūgūchaxwa nu ne nanaxīmare ga taxūema íxāpataxūwa. Rū nūrūānegu nipexūtanūmare yerū nangepatagū. ³⁹ Rū guxūma ga yema nuxcūmaūgūxū ga duūxūgū woo norū ōgagu Tupana namaā na taāēxū, natūrū taxuūma ga yema duūxūgū rū nūxū nadau ga yema mexūgū ga Tupana namaā nūxū ixuxū. ⁴⁰ Rū yemaācū namaā nangupetū ga yema duūxūgū, yerū ga Tupana rū tagu narūxīnū rū tama nanaxwēxe na nūxīra nūxīca yamexēēgūāxū, natūrū nanaxwēxe na tamaā wūxigu yamexēēgūāxū. Rū ñuxma i yixema na yaxōgūxū, rū yema nuxcūmaūgūxū ga duūxūgūrūđ Tupanaārū duūxūgū tixīgū, yerū Nane ya Ngechuchu rū guxācēxma nayu. Rū wūxi i ngunexū rū tá taxcēx nūma naxū na nūgūxūtawa tūxū nagagūxūcēx na ngēma ingēxmagūēchaxūcēx.

12

Name nixī i Ngechuchucūmagu taxī

¹ Rū ñuxma na nūxū icuáxū na ñuxācū aixcūma Tupanaāxū yaxōgūāxū ga guxūma ga yema nuxcūmaūgūxū ga duūxūgū, rū ngēma rū wūxi i tōrū cuēxruū nixī na ñuxācū Tupana naxwēxexū na naxcēx imaxēxū. Rū ngēmacēx i ñuxmax, jrū ngīxā nūxū tarūxoe i guxūma i ngēma pecadu i tūxū ítūexēēxū rū tūxū naguchaxēēxū na meā yaxōgūxū! jrū ngīxā paxa naxcēx tadaugū na meā Tupanacēx imaxēxū rū guxūguma aixcūma naxūxū i ngēma tūxū nanaxwēxexū! ² Rū name nixī i tanangugū na ñuxācū namaxūxū ga Ngechuchu rū nagu taxī i nacūma. Yerū nūma nixī ga nuxcūma nagu naxīnūxū na ñuxācū tōrū ōgagu tá tūxū namaxēxēēxū rū nūma nixī i tūxū nangūxēēxū na aixcūma meā yaxōgūēchaxūcēx na ngēmaācū naxūtawa ingūgūxūcēx. Rū nūma rū tama nūgū nachuxu na curuchawa ngūxū yangexū, rū tama nagu narūxīnū ga yema āne na yangexū, natūrū nataāēxūchi yerū nūxū nacūēx na yemawena rū tá muxūma i duūxūgū nayauxgūxū i maxū i taguma gúxū. Rū ñuxma rū Tupanaārū tūgūnecūwawa narūto na ngēma guxāārū āēxgacū yīixūcēx. ³ Rū name nixī i penangugū rū nagu perūxīnūē na ñuxācū ga Ngechuchu rū yaxna namaā naxīnūxū ga yema ngūxū ga nūxū yangexēēgūxū ga yema duūxūgū ga pecaduāxgūxū. Rū nūma ga Ngechuchu rū yemaācū yema ngūxūmaā yaxna naxīnū na pema rū tama nūxū perūçhaxūcēx rū tama nūxū perūxoexūcēx na nūxū peyaxōgūxū. ⁴ Rū ñuxma i pema na peyaxōgūxū, rū ngūxū pingegū erū pecaduxū perūxoe. Natūrū taxūema ga petanūwa rū yemacēx Cristurūđ yuwa tangu. ⁵ Rū name nixī i nūxna pecuēxāchē i norū ore ya Tupana i namaā pexū yaxucūxēgūxū i ñuxma na naxācūgū pixīgūxū. Erū ngēma norū ore i ūmatūxūtawa rū ñanagūrū: “Pa Chaunex, jrāxū i nūxū cuxoxū i ngēxguma cuxū icharūwēxāchixēēgū! jrū tāxū i cuyarūmaxāchixū i ngēxguma cuxū chaxucūxēgū! ⁶ Erū nūma ya Cori ya Tupana rū tūxū inayarūwēxāchixēē ya yixema tūxū

nangechaũxê. Rũ tüxna nanaçuaixca ya yíxema naxãcüxũ tüxũ nayaxúxe, na ngêmaãcü tüxũ nanguxêẽxũcêx na ñuxãcü nanaxwêxexũ na naxcêx tamaxũxũ”, ñanagürü. ⁷ Rũ ngêmacêx i pemax, rũ name nixĩ na yaxna namaã pexĩnũẽxũ i ngêxguma Tupana pexna naçuaixcagu. Erũ ngêxguma ngêmaãcü pe-maã yixĩgu, rũ pexũ nüxũ nacuêxêẽ na aixcüma naxãcügũ pixĩgũxũ. Erũ guxũma i papá rũ inayanawêxãchixiêẽ i ngêma aixcüma naxãcügũ ixĩgũxũ. ⁸ Natürü ngêxguma chi Tupana tama pexũ iyarüwêxãchixiêẽgu, naxãcügũxũ iyanawêxãchixiêẽxũrũ, rũ ngêmawa tá nüxũ pecuêx na tama aixcüma naxãcügũ pixĩgũxũ, rũ ngenatũxũ pixĩgũxũ. ⁹ Rũ wüxichigü i yixema ga yexguma ibuegu, rũ tanatũgü rũ tüxũ taxucuxêgü, rũ yixema rũ tũmaga taxĩnũ rũ tüxũ tangechaũgü. Rũ ngêmacêx i ñuxma rũ yexeraãcü tanaxwêxe na naga ixĩnũẽxũ ya Tanatü ya daxũgucü na ngêmaãcü nayauxũcêx i maxũ i taguma gúxũ. ¹⁰ Rũ tanatũgü rũ wüxi i paxaãchicêxmare tüxũ taxucuxêgü na tũma tanaxwêxegũxũãcüma imaxêxũcêx. Natürü ya Tupana rũ aixcüma tórü mexũcêx nixĩ i tüxũ iyanawêxãchixiêẽxũ na naxrũũ ixũunegũxũcêx. ¹¹ Rũ aixcüma tama tataãêgü i ngêxguma Tupana tüxũ iyarüwêxãchixiêẽgu, erũ tüxũ nangux. Natürü ngêmawena i ngêxguma naga ixĩnũẽgu rũ yanguxêẽgu i ngêma tamaã nüxũ yaxuxũ, rũ aixcüma tataãêgü.

Naxãcüma na tama Tupanaga ixĩnũẽxũ

¹² Rũ ngêmacêx i ñuxma na ngũxũ pingegũxũ rũ pipaexũ na Tupanawe perũixũ, rũ name nixĩ i pegü peporaexêẽãma na noxrĩrũũtama meã peyaxõgũxũcêx. ¹³ Rũ name nixĩ i naxcêx pedaugü na Tupana pexũ naxwêxexũãcüma aixcüma meã pemaxêxũ, na yíxema ñuxma tama meã yaxõgũxe rũ meã tayaxõgũxũcêx. ¹⁴ ¡Rũ naxcêx pedêux na guxũ i duũxũgũmaã pemecũmaxũ! Rũ ngêxgumarũũ ta name nixĩ i naxcêx pedau na Tupanapêxewa naxũunexũ i perũ maxũ. Erũ yíxema tama Tupanapêxewa üunexê rũ tãütãma tórü Corixũ tadau. ¹⁵ ¡Rũ pegüna pedaugü na taxúema nüxũ oxũcêx i ngêma ngũxêẽ i Tupana tüxũ nangechaũãcüma tüxna ãxũ! Erũ tama tanaxwêxe na texê petanüwa Cristuchi aixũ rũ ngêmaãcü togũxũ chixexũmaã taxucuxêxũ na Cristuna tixũgachixũcêx. ¹⁶ Rũ tama name i texê i petanüwa rũ naĩ i ngemaã na itapexũ. Rũ tama name na texê tũmaãrũ ngêmaxũcêx Tupanaxũ na oxũ. Rũ yemaãcü nanaxũ ga guma nuxcümaũcü ga Acobueneê ga Echaũ. Yerũ yexguma nataiyagu rũ wüxi ga õnacêx nüxũ naxo ga guxũma ga yema nüxna üxũ ga nanatü chi nüxna ãxũ. ¹⁷ Rũ pema nüxũ pecuêx rũ yemawena ga yexguma nayauxchaũãgu ga yema noxri nüxna üxũ, rũ marũ taxucürüwama nanayaxu, yerũ marũ naêneê ga rübumaêcüna tanaxã ga nanatü. Rũ nüma ga Echaũ rũ woo poraãcü naxaxu, natürü marũ taxucürüwama ñuxãcü nanayaxu. Rũ ngêmawa nüxũ tacuêx na ñuxãcü naxãcümaxũ na tórü ngêmaxũcêx Tupanaxũ ixoxũ. ¹⁸⁻²¹ Rũ nuxcüma ga tórü oxigü ga Moichêwe rüxixũ, rũ nüxũ naxĩnũẽ ga Tupanaga ga yexguma nüxũ yangaicagũgu ga guma mèxpũne ga Chinaĩgu ãegane. Rũ nüxũ nadaugü ga na yayauraxũ ga guma mèxpũne rũ poraãcü naxêanexũ rũ poraãcü buanecü ixũxũ rũ yabêjbxêxanexũ rũ yaduruanexũ. Rũ poraãcü namuũẽ ga yema duũxũgü, yerũ nüxũ naxĩnũẽ ga wüxi ga corneta ga tagane rũ Tupana ga tagaãcü yéma ñacü:

“Ngêxguma chi wüxie i petanüwa daa mèxpũnewa üxgu ¡rũ noxtacũma nutamaã tüxũ ípemuxũchiãcüma tüxũ pimã! Rũ woo wüxi i pexũna yixĩgu

jrū ngēxgumarūū ta īpenamuxūchiācūma peyamá!”
 ñanagūrū. Rū yexguma yadeaxgu ga Tupana, rū poraācū namuūē ga yema duūxūgū. Rū norū muūmaā Tupanaxū nacēēxūgū na īyachaxāchixūcēx ga namaā na yadexaxū. Rū yema na poraācū naxāūcūmaxūchixū ga yema nūxū nadaugūxū, rū yemacēx nixī ga nūmatama ga Moīché ga ñaxū:
 “Chorū muūmaā chidurux i ñuxmax”,
 ñaxū. Rū yemaācū nixī ga namaā nangupetūxū ga yema duūxūgū ga Moīchémaā nayauxgūxū ga yema nūxīraūxū ga Tupanaārū mugū. Natūrū i pemax, Pa Chaueneēgūx, rū tama yemaācū pexū naxūpetū ga yexguma penayauxgūga ga Tupanaārū ore i ngexwacaxūxū i Cristuchiga ixīxū. ²² Rū ñuxma i pema rū taxucēxma pemuūē, yerū ga Cristu rū taxcēx nayu na Tupana ya guxūguma maxūcūxūxtawa tūxū nagagūxūcēx, na guxūguma norū īāne ya daxūgune ya Yerucharēūga āeganewa ingēxmagūxūcēx. Rū ngema tá tangutaquēxegū namaā i ngēma muxūchixūma i norū orearū ngeruūgū i daxūcūāx na wūxigu namaā Tupanaxū icuēxūūgūxūcēx. ²³ Rū ñuxma i pemax, rū marū natanūxūgū pixīgū i guxūma i ngēma togū i duūxūgū i Tupanaārū poperawa ngoxēgagūxū. Rū marū naxcēx pexī ya Tupana ya yima guxānatāma cacū. Rū marū natanūwaama pexūgū i guxūma ga yema duūxūgū ga mecūmagūxū ga yuexū ga Tupana imexēēgūxū. ²⁴ Rū marū naxcēx pexī ya Ngechuchu ga taxcēx yucū na tūxū namaxēxēēxūcēx, ngēma Tupanaārū uneta i ngexwacaxūxū tamaā nūxū ixuxūrūū. Rū nagūmaā pexū iyanaxoxēē ga perū chixexūgū na aixcūma Tupanapēxewa pimexūcēx. Rū yexguma nūxcūmaxūcū ga Abēgū inabaxēē ga naeneē rū Tupana rū poxcu naxuegu. Natūrū yexguma Cristugū ibaxgu rū Tupana rū duūxūgūmaā nanaxuegu i maxū i taguma gūxū. ²⁵ Rū ngēmacēx name nixī i pexuāēgū na tama nūxū pexoexūcēx ya yima Tupana ya ñuxma tamaā idexacū. Rū dūcax yema nuxcūmaūgūxū ga tōrū oxīgū ga Moīchéwe rūxixū rū taxucūrūwa Tupanachaxwa nibuxmū na tama napoxcueāxūcēx ga yexguma Tupanaxū naxoegu rū tama naga naxīnūēgu ga yexguma Moīchéwa Tupana yaxucūxēgūga. Rū yema na taxucūrūwa Tupanachaxwa yabuxmūxū ga nūmagū, rū yexeraācū tūxū naguxcha i yixema na naxchaxwa ibuxmūxū ega tama naga ixīnūēgu i ñuxma na Cristuwa tūxū yaxucūxēgūxū i nūma ya Tupana i daxūgūxū i naānewa ngēxmacū. ²⁶ Rū yexguma Moīchéwe naxīxgu ga tōrū oxīgū, rū Tupana rū nagamaā nayaduruxanexēē. Natūrū i ñuxma rū ñanagūrū:

“Wena táxarū chayaduruxanexēē. Natūrū ngēxguma ngēmaācū chanaxūxgu rū tāūtāma ñoma i naānexīca chiduruxēē, natūrū ūēxcū rū woramacurīgū rū ēxtagū rū tá ta chayaduruxgūxēē”,

ñanagūrū. ²⁷ Rū yema na:

“Wena táxarū chayaduruxanexēē”, ñaxū, rū ngēmawa nūxū tacuēx rū guxūma ga yema naxūxū i tama guxūgucēx ixīxū, rū Tupana tá inayanaxoxēē na ngēma guxūgucēx ixīxūxīcatama na īyaxūgūxūcēx. ²⁸ Rū ngēma na tōrū āēxgacū na yīxū ya Tupana, rū guxūgucēx nixī, rū tagutāma inayarūxo na noxrū ixīgūxū. Rū ngēmacēx name nixī na Tupanana moxē ixāgūxū, rū nūxū ingechaūgūācūma rū nūxū imuūēācūma nūxū icuēxūūgūxū, ngēma nūma nanaxwēxūrūū. ²⁹ Erū tōrū Tupana, rū ñoma wūxi ya ūxūrūū aixcūma inayanaxoxēē i guxūma i tōrū chixexū.

Ñuxăcŭ Tupanaxŭ tataăxêxê

¹ Rŭ ñuxma rŭ tama name na nŭxŭ perŭchăuxêxŭ na wŭxichigŭ pegŭ pengechăŭgŭxŭ ñoma peeneêxŭ pengechăŭxŭrŭrŭ. ² Tama name na nŭxŭ ipayarŭngŭmaêxŭ na meăma penayaxuxŭ i ngêma duŭxŭgŭ i pepatawa ngugŭxŭ. Erŭ nŭxŭ tacuêx rŭ nŭmaxŭ ga yemaăcŭ naxŭgŭxŭ rŭ ñuxguacŭ rŭ tama nŭxŭ nacuaăcŭma bexma Tupanaărŭ orearŭ ngeruŭgŭ i daxŭcŭăxŭ meă nayauxgŭ. ³ Rŭ name nixŭ i nŭxna pecuêxăchie i ngêma duŭxŭgŭ i poxcuexŭ, ñoma pema rŭ ta naxrŭŭ pepoxcuexŭrŭrŭ. Rŭ ngêxgumarŭŭ ta name nixŭ nŭxna pecuêxăchie i ngêma duŭxŭgŭ i togŭ ngŭxŭ nŭxŭ ingexêêgŭxŭ, erŭ ngŭrŭăchi tá ta ngêmaăcŭ pexŭ nangupetŭ. ⁴ Rŭ ngêma yatŭgŭ i âmaxŭ rŭ name nixŭ i meă naxmêxmaă namaxê rŭ tŭxŭ nangechăŭgŭ. Rŭ ngêxgumarŭŭ ta i ngexŭgŭ, rŭ name nixŭ i meă natemaă namaxê rŭ nŭxŭ nangechăŭgŭ. Erŭ Tupana rŭ aixcŭma tá nŭxna naca rŭ tá nanapoxcŭe i ngêma duŭxŭgŭ i naŭ i ngemaă rŭ êxna naŭ ya yatŭmaă ipexŭ. Rŭ ngêxgumarŭŭ tá ta tŭxŭ napoxcŭe ya guxăma ya yŭxema ngemêxăcŭma rŭ ngeteăcŭma tŭgŭmaă maxêmarexe. ⁵ Rŭ tama name na dŭêruguama perŭxŭnŭêxŭ. Rŭ name nixŭ i namaă petaăêgŭ i ngêma marŭ pexŭ ngêxmaxŭ. Yerŭ Tupana rŭ ñanagŭrŭ:

“Tagutăma cuxna chixŭ, rŭ tagutăma cuxŭ ŭchatêx”,

ñanagŭrŭ. ⁶ Rŭ ñuxma na nŭxŭ icuăxŭ na ngêmaăcŭ tamaă inaxăŭxŭ, rŭ ngêmacêx tama taxăne na ñagŭxŭ:

“Nŭma ya Cori nixŭ i choxŭ rŭngŭxêêcŭ. Rŭ ngêmacêx taxucêxma chamuŭ.

Erŭ taxucŭrŭwama texê tacŭ rŭ chixexŭ chomaă taxŭ”,

ñagŭxŭ. ⁷ Rŭ name nixŭ i nŭxna pecuêxăchie ga yema perŭ dauruŭgŭ ga noxri pemaă icuăxŭ rŭ pemaă nŭxŭ ixugŭxŭ ga Tupanaărŭ ore. Rŭ name nixŭ i nagu perŭxŭnŭê ga na ñuxăcŭ meă namaxêxŭ pepêxewa rŭ ñuxăcŭ meă yaxôgŭăcŭma nayuxêxŭ. Rŭ name nixŭ ga nŭma yaxôgŭăxŭrŭŭ meă peyaxôgŭ i pemax. ⁸ Rŭ nŭma ya Ngechuchu ya Cristu rŭ guxŭdŭguma nayanguxêê i ngêma tamaă nŭxŭ yaxuxŭ. Rŭ nuxcŭma rŭ nayanguxêê ga norŭ ore, rŭ ñuxma rŭ ta nayanguxêê. Rŭ guxŭgutăma ngêmaăcŭ nixŭ. Rŭ ngêmacêx tanaxwêxe na aixcŭma nŭxŭ yaxôgŭxŭ. ⁹ Rŭ tama name i peyaxôgŭ i ngêma nguxêêtaegŭ i tama toma pexŭ namaă tangŭexêêxŭ i tama Tupanaărŭ ixŭgŭxŭ. Rŭ nuxcŭma rŭ nagu taxŭ ga yema mugŭ ga Moŭché ŭmatŭxŭ ga tŭxna nachŭxuxŭ na tacŭ ixŭxŭ rŭ tacŭ ingôxŭ. Natŭrŭ yema mugŭ rŭ taguma tŭxŭ naporaexêê ga na Tupanacêx imaxêxŭ. Rŭ ngêmacêx tanaxwêxe na Tupana ya tŭxŭ ngechăŭcŭwa nayaxuxŭ i tŭrŭ pora na aixcŭma naxcêx imaxêxŭcêx.

¹⁰ Rŭ ngêma duŭxŭgŭ i Moŭchéarŭ mugŭgu ŭxŭ, rŭ Tupanacêx naxŭna nadai na tama napoxcŭeăxŭcêx naxcêx i norŭ pecadu. Natŭrŭ tama nŭxŭ nayaxôgŭ ya Cristu ga tŭrŭ pecaducêx yucŭ. Rŭ ngêmacêx taxucŭrŭwama taxrŭŭ nanayauxgŭ i ngêma ngŭxêê i Cristu nŭxna uaxŭxŭ.

¹¹ Rŭ ngêma duŭxŭgŭarŭ paigŭarŭ âêxgacŭ, rŭ tupaucawa nanange ya nagŭ i naxŭnagŭ na Tupanana naxăaxŭcêx na tama Tupana napoxcuexŭcêx i ngêma duŭxŭgŭ. Natŭrŭ naxŭnegŭ i ngêma naxŭnagŭ, rŭ ŭăneărŭ ŭpemawa nayanagugŭ. ¹² Rŭ yexgumarŭŭ ta ga Ngechuchu rŭ ŭăneărŭ ŭpemawa ngŭxŭ ninge rŭ nayu na nagŭmaătama Tupanacêx yaxŭnêgŭxêêăxŭcêx i duŭxŭgŭ.

¹³ Rŭ ngêmacêx i yixema, rŭ name nixŭ i nŭxna tixŭgachi i ngêma mugŭ ga Moŭché ŭmatŭxŭ, rŭ name nixŭ i Ngechuchucêx taxŭ. Rŭ woo duŭxŭgŭ tŭxŭ cugêgu, yema Ngechuchuxŭ na nacugŭexŭrŭrŭ, rŭ name nixŭ i naxrŭŭ yaxna namaă taxŭnŭê. ¹⁴ Erŭ yixema na yaxôgŭxŭ, rŭ tăŭtăma ñoma i naăne i paxa tá gŭxŭwa tangêxmagŭêcha. Erŭ daxŭguxŭ i naănewa

tūxū nangēxma i tachica. Rū ngema tá nixī i ingugūxū na guxūgutáma Tupanamaā ingēxmagūechaxūcēx. ¹⁵ Rū ngēmacēx tanaxwēxe i Ngechuchu ya Cristuégagu guxūguma Tupanaxū ticuēxūūgū. Rū ngēma na taēxmaā nūxū icuēxūūgūxū, rū ngēma nixī i āmare i mexū i nūxna ixāxū. ¹⁶ ¡Rū tāxū i nūxū ipeyarūngūmaēxū na togūxū perūngūxēēxū rū namaā pengaxū i perū ngēmaxūgū! Erū ngēma nixī i āmare i Tupanana pexāxū i aixcūma namaā nataāēxū. ¹⁷ ¡Rū naga pexīnūē i ngēma perū dauruūgū i pemaā icuēxgūxū, rū penaxūx i ngēma pemaā nūxū yaxuxū! Erū nūmagū rū Tupanapēxewa pexna nadaugū na meā pemaxēxūcēx erū nūxū nacuēxgū na Tupana tá nūxna çaxū i nachiga na ñuxācū pexna nadaugūxū. Rū name nixī i meā namaā pemaxē i ngēma perū dauruūgū na wūxi i taāē na yīxūcēx i ngēma norū puracū rū tama wūxi i norū guxchaxū na yīxūcēx. Erū ngēxguma chi wūxi i norū guxchaxū yixīgu i ngēma norū puracū na pexna nadauxū, rū pema rū chi taxuūma i mexū nawa peyaxu i ngēma norū puracū. ¹⁸ Rū name i toxcēx peyumūxēgū. Erū toōēwa nūxū tacuēx na aixcūma meā tayanguxēēxū i ngēma puracū i Tupana toxna āxū rū tanaxwēxe na guxūguma ngēmaācū tanaxūxū. ¹⁹ Rū ngēma guxūārū yexera pexna naxcēx chaçaxū nixī na peyumūxēgūxū na Tupana paxa pexcēx choxū taeguxēēxūcēx.

Yema duūxūgūxū narūmoxē rū naxcēx ínaca na Tupana nūxū rūngūxēēxū

²⁰⁻²¹ Rū ñuxma chanaxwēxe i poraācū pexū narūngūxēē ya Tupana ya tórū taāēxēēruū rū tórū ngūxmūēxēēruū ixīcū. Rū nūma nixī ga yuwa ínadaēēāxū ga tórū Cori ya Ngechuchu ya Cristu ya guxūma i yaxōgūxūārū dauruū ya guxāārū yexera ixīcū. Rū ñuxma na curuchagu taxcēx nabaāxū ga guma nagū ga tūxū nūxū cuēxēēcū na ñuxācū guxūguma tūxū nangechaūxū ya Tupana, rū chanaxwēxe na nūma ya Tupana pexū yamexēēgūxū rū pexū nangūxēēxū na aixcūma guxūma i perū maxūwa pimexūcēx. Rū ngēxgumarūū ta chanaxwēxe na Ngechuchu ya Cristuwa tūxū nangūxēēxūcēx ya Tupana na nūma nanaxwēxexūācūma ixīgūxūcēx. Rū ñuxma tanaxwēxe i guxūguma yima Cristuxū ticuēxūūgū. Rū ngēmaācū yī. ²² Pa Chaueneēgūx, pexū chacēēxū na yaxna namaā pexīnūēxū i ñāā noxretama i ore i pexū namaā chataāēxēēxū rū pexū namaā chaxucūxēxū. ²³ Rū chanaxwēxe na nūxū pecuāxū rū taeneē ya Timutéu rū marū ínanguxuchi ga na napoxcuxū. Rū ngēxguma paxa nuā chauxūtawa nanguxgu, rū tá ngema petanūwa chanaga i ngēxguma pexū íchayadēuxgu. ²⁴ ¡Rū nūxū perūmoxēgū i guxūma i ngēma perū dauruūgū i pemaā icuāxū! ¡Rū ngēxgumarūū ta nūxū perūmoxēgū i guxūma i togū i taeneēgū i yaxōgūxū! Rū taeneēgū i Itárianewa ngēxmagūxū rū ta pexū narūmoxēgū. ²⁵ ¡Rū Tupana poraācū pexū rūngūxēēxū i guxāma i pemax! Rū ngēmaācū yī.

Rū nuāma pexna.

TUPANAARŪ ORE GA CHAŪTIÁGU ŪMATŪXŪ

Chaŭtiágu nüxŭ narŭmoxê ga natanŭxŭlgŭ ga Yudiugŭ ga yaxôgŭxŭ

¹ Pa Chautanŭxŭgŭ i Yudiugŭ i Ngechuchuaxŭ Yaxôgŭxŭ i Guxŭ i Nañnewa Ngêxmagŭxŭx, choma i Chaŭtiágu pexŭ charŭmoxê. Rŭ choma nixŭ i Tanatŭ ya Tupana rŭ tórŭ Cori ya Ngechuchu ya Cristuaxŭ chapuracŭxŭ.

Ngêma cuèx i aixcŭma Tupanawa ne ŭxŭchiga

² Pa Chaueneègŭ i Yaxôgŭxŭx, name nixŭ na petaaègŭxŭ i ngêxguma nagŭxŭraŭxŭ i guxchaxŭgŭ pexcèx ínguxgu. ³ Erŭ pema nüxŭ pecuèx rŭ ngêxguma meã peyaxôgŭamagu ega woo tacŭ rŭ guxchaxŭ pexŭ ŭpetŭgu rŭ wŭxi i mexŭ nixŭ i ngêma. Erŭ ngêmaacŭ nixŭ ya Tupana i pexŭ naporaexêèxŭ na yexeraacŭ meã nüxŭ peyaxôgŭxŭcèx. ⁴ Rŭ name nixŭ na peporaexŭ na aixcŭma Tupanapêxewa pimexŭcèx, rŭ naxcèxicatama pemaxêxŭcèx, rŭ taxuwama nachixexŭcèx i perŭ maxŭ. ⁵ Ngêxguma chi wŭxie i petanŭwa tama meã nüxŭ cuèxgu na tacŭ tŭxŭ nanaxwèxexŭ ya Tupana, rŭ name nixŭ i nüxna naxcèx taca i cuèx, rŭ nüma tá guxŭma i norŭ ngŭchaŭmaã tŭxna nanaxã. Erŭ Tupana meãma guxŭ i duŭxŭgŭna nanaxã i cuèx, rŭ tama nayanuxŭ, rŭ taxŭexŭma nanga. ⁶ Natŭrŭ ngêxguma naxcèx ítacaxgu rŭ tanaxwèxe na aixcŭma tayaxôxŭ rŭ tá na tanayaxuxŭ i ngêma naxcèx ítacaxŭ. Rŭ tama name na nagu tarŭxŭnŭxŭ rŭ tãtŭtama tanayaxuxŭ. Erŭ yŭxema tama meã yaxôxê, rŭ ñoma taxtŭarŭ yuape i buanecŭmaã guxŭwama cuexŭrŭi tixŭ i tŭmaãrŭ maxŭwa. ⁷⁻⁸ Rŭ yŭxema duŭxê ya ñuxma meã yaxôxê rŭ moxŭ rŭ tama meã yaxôxê, rŭ taxucŭrŭwama nagu tarŭxŭnŭ na tacŭ Tupanaxŭtawa tayaxuxŭ. Erŭ yŭxema duŭxê ya ngêmaacŭ yaxôxê, rŭ tŭmaãrŭ maxŭwa rŭ tama aixcŭma wŭxigutama tarŭxŭnŭ. ⁹ Rŭ yŭxema yaxôxê ya tama muãrŭ dŭŭruãxê, rŭ name nixŭ i tataãè erŭ Tupanaxãcŭ tixŭ rŭ tŭmamaã nataãè. ¹⁰ Rŭ yŭxema yaxôxê ya muãrŭ dŭŭruãxê rŭ name nixŭ i tataãèama ega woo wŭxi i ngunexŭ tŭxŭ natauxgu i tŭmaãrŭ dŭŭru. Erŭ ngêma dŭŭruãxŭ i duŭxŭgŭ, rŭ ñoma putŭrachacurŭŭ tama natai. ¹¹ Rŭ ngêxguma nangunagŭgu ya ŭèxcŭ rŭ poraãcŭ nanguxetŭgu, rŭ narŭñexê i ngêma putŭra rŭ narŭngu i nachacu, rŭ ngêxma nagux na namexŭ. Rŭ ngêxgumarŭŭ tá ta nayu i ngêma dŭŭruãxŭchixŭ rŭ ngêxma tá nayarŭxo i norŭ guxŭma.

Tupana tŭxŭ naxŭ, natŭrŭ tama chixexŭgu tŭxŭ nanguxêèxŭcèx

¹² Rŭ nataãè ya yima yatŭ ya meãma yaxôomacŭ i ngêxguma Tupana nüxŭ ŭxgu. Erŭ ngêxguma ngêmaacŭ yaxna namaã naxŭnŭãmagu, rŭ Tupana tá namaã nataãè rŭ tá nüxna nanaxã i norŭ ãmare i mexŭ i taguma gŭxŭ. Rŭ ngêma nixŭ i ãmare i Tupana tŭmamaã ixunetaxŭ ya yŭxema nüxŭ ngechaŭgŭxe. ¹³ Natŭrŭ ngêxguma texe ñnŭ i chixexŭ tŭmacèx ínguxgu na chixexŭ taxŭxŭcèx rŭ tama name i nagu narŭxŭnŭ na Tupana tŭmaãewa ínanguxêèxŭ i ngema ñnŭ i chixexŭ. Erŭ ya Tupana rŭ taguma naãewa nangu na chixexŭ naxŭxŭ, rŭ ngexgumarŭxŭ ta taguma chixexŭ i ñnŭ texeãewa nanguxêè na chixexŭ taxŭxŭcèx. ¹⁴ Natŭrŭ ngêma chixexŭ i tŭmatama nagu tarŭxŭnŭxŭ nixŭ i chixexŭgu tŭxŭ nguxêèxŭ. ¹⁵ Rŭ ngêma chixexŭ i tŭmatama nagu tarŭxŭnŭxŭ nixŭ i tŭxŭ pecaduãxêèxŭ. Rŭ ngêma pecadugagu tá nixŭ i dŭxwa itayarŭtaxuxŭ. ¹⁶ Pa Chaueneègŭ ya Pexŭ Changechaŭgŭxex, tama name i pegŭtama pe-womŭxêègŭ. ¹⁷ Erŭ guxŭma i ngêma aixcŭma mexŭ i tŭxŭ ngêxmaxŭ, rŭ

naxūtawa ne naxū ya Tupana ya daxūgucū ga naxūcū ga üèxcū rü tauemacū rü woramacurigū rü èxtagū. Rū nūma rü guxūguma nanaxèixrūgumaraxū rü taguma naxūchicū. ¹⁸ Rū nūma nixī ga tūxna naxāāxū ga norū ore i aixcūma ixixū na ngēmaācū tūxū nangēxmaxūcèx i maxū i taguma gūxū. Rū yemaācū nanaxū yerū nanaxwèxe na yixira nūxū na yaxōgūxū, rü yixcama i togū.

Nūxācū aixcūma Tupanaāxū tayaxō

¹⁹ Pa Chaueneēgū ya Pexū Changechaūgūxex, rü ngēxguma texé pemaā nūxū ixuxgu i Tupanaārū ore, rü name nixī i meā iperūxīnūē. Rū tama name i tūxū pechoxūgagū. ²⁰ Erū ngēxguma nanuxgu i wūxi i duūxū, rü tama Tupanaārū ngūchaū naxū. ²¹ Rū ngēmacèx name nixī i nūxū perūxoe i guxūma i ngēma chixexūgū i guxūwama ngēxmagūxū. ¡Rū meā penayaxu i ngēma ore i Tupana pexna āxū! Erū ngēmawa pexū nangēxma i maxū i taguma gūxū. ²² Rū tama name i iperūxīnūēmare i ngēma ore, natūrū name nixī i penaxū i ngēma pemaā nūxū yaxuxū. Erū ngēxguma iperūxīnūēmaregu rü tama penaxūxgu, rü pegūtama pewomūxēēgūmare. ²³ Erū yīxema irūxīnūmarexe i Tupanaārū ore natūrū tama naxūxe i ngēma nūxū yaxuxū, rü wūxi i yatū i daucūwa nūgū dauchametūxūrū tixī. ²⁴ Erū nūgū nadauchametū, natūrū ngēxguma yaxūgachigu rü marū nūxū inayarūngūma na nañuxchametūraūxū i noxrix. ²⁵ Natūrū yīxema guxūguma meā nūxū daumatūxe rü naga īnūxē i ngēma ore i aixcūma ixixū i pecaduwa tūxū īnguxuchixēēxū, rü Tupana rü tá aixcūma guxūwama tūxū narūngūxēē. Erū tama ngēma orexū taxīnūmare, natūrū tanaxū i ngēma tūmamaā nūxū yaxuxū. ²⁶ Rū ngēxguma chi wūxie nagu rūxīnūgu na meāma Tupanaxū tacuáxū natūrū tama nūxna tadēuxgu ya tūmaārū conū i tūmaārū orewa, rü tūgūtama tawomūxēē, rü tama aixcūma Tupanaāxū tayaxō. ²⁷ Natūrū ngēma nacūma i Tanatū ya Tupanapēxewa aixcūma ūūnexū, rü ngēma nixī na nūxū tarūngūxēēxū i tacutagū rü yutegūxū rü tūgūna tadauxū na tama ñoma i naāneārū chixexūgu taxūcuxū.

2

Name nixī i guxū i duūxūgūxū tangechaū

¹ Pa Chaueneēgūx, pema rü nūxū peyaxōgū ya tórū Cori ya Ngechuchu ya Cristu ya mexēchicū. Rū ngēmacèx tama name na chixriācū penayaxuxū i ñuxre i duūxūgū rü meā penayaxuxū i togū. ² Rū ngēxguma chi perū ngutaquēxegu naxūcuxgu i wūxi i yatū i uirumaā aneraāxū rü mexchiruxū, rü ngēxgumarū chi ta ngēxma naxūcuxgu i wūxi i yatū i ngearū dīeruāxū rü wēxachiruxū, rü name nixī i guxūxūma wūxigu meā peyaxu. ³ Natūrū tama name ega meā penayauxgu i ngēma mexchiruxū rü:

“¡Nuā mexū i naxmēxwēxewa rütol!” ñapegūxū nūxū, natūrū ngēma wēxachiruxū rü:

“¡Cuma rü ngēxmatama nachī, rü èxna yea ñatūanewa rütol!” ñapegūxū nūxū. ⁴ Rū ngēxguma tama wūxigu meā penayauxgu i ngēma taxre, rü pewatama nangox na tama aixcūma guxāxū pengechaūgūxū rü chixexū i duūxūgū pixīgūxū ega ngēmaācū chixri penayauxgu i duūxūgū. ⁵ Pa Chaueneēgū ya Pexū Changechaūgūxex, ¡Iperūxīnūē i ñāā ore! Tupana tūxū nade ya yīxema ngearū dīeruāxgūxe i ñoma i naānewa na meā nūxū tayaxōgūxūcèx. Erū nanaxwèxe i tanayauxgu i ngēma maxū i taguma gūxū i tūmamaā inaxunetaxū ya yīxema nūxū ngechaūgūxe. ⁶ Natūrū pema rü chixri penayaxu i ngēma duūxūgū i ngearū dīeruāxgūxū rü meā penayaxu

i ngēma duūxūgū i dīeruāxgūxū. ¿Taux ēxna ngēma dīeruāxgūxū yīxū i ngēma chixri pemaā maxēxū rü āēxgacūgūxūtawa pexū íyaxuaxūgūxū? ⁷ Rū ngēma dīeruāxgūxū nixī i chixexū namaā ixugūexū ya Cristu ya perū Cori ya mexēchicū. ⁸ Tupanaārū orewa nangēxma i norū mu i guxū i mugūarū yexeraxū i ñaxū:

“¡Nūxū nangechaū i cumūcū ngēma na cugūtama cungechaūxūrū!” ñaxū. Rū ngēxguma aixcūma naga pexīnūēgu i ngēma mu, rü mexū nixī i pexūxū. ⁹ Natūrū ngēxguma meā penayauxgu i wūxi i yatū i mexchiruxū rü chixri penayauxgu i ngēma wēxachiruxū, rü pecadu pexū. Rū Tupanapēxewa pechixexūgu erū tama naga pexīnūē i ngēma pexū namuxū. ¹⁰ Erū ngēxguma chi texē naga ĩnūgu i guxūma i Tupanaārū mugū natūrū chi wūxiwatama ítatūxgu na tama naga taxīnūxū, rü chi ñoma guxūma i Tupanaārū mugūga tama taxīnūxūrū tachixexūgu. ¹¹ Erū nūmatama ya Tupana ga ñacū:

“¡Tāūtama naī i nge i ātecūmaā cungeāē!” ñacū, rü ñanagūrū ta:

“¡Tāūtama cumáēta!”

ñanagūrū. Rū ngēxguma chi tama naī i nge i ātecūmaā cungeāēxgu, natūrū cumáētagu, rü tama aixcūma meā naga cuxīnū i ngēma Tupana tūxū muxū. ¹² Rū ngēmacèx name nixī na meā pidexagūxū rü meā pemaxēxū. Erū Tupana tá pexna naca i perū maxūchiga ngoxi Cristu pexū muxūācūma pemaxē rü ēxna tama. Rū ngēma Cristu tūxū muxū nixī na yigū ngechaūgūxū. ¹³ Erū guxāma ya yīxema tama tūmamūcūgū tūxū ngechaūtūmūūgūxe, rü Tupana rü tāūtama nūxū tangechaūtūmūūgūācūma tūxna naca i tūmaārū maxūchiga. Natūrū yīxema tūmamūcūgū tūxū ngechaūtūmūūgūxe, rü tāūtama tamuūē i ngēxguma Tupana tūxna caxgu, erū nūxū tangechaūtūmūūgūācūma tá tūxna naca.

Ega aixcūma yaxōgūgu, rü tanaxwēxe i mexū taxūgū rü nūxū tarūngūxēē i togū

¹⁴ Pa Chaueneēgūx, ¿Tacūwa namexū ega wūxie:

“Choma rü Tupanaāxū chayaxō”, ñagūgu, natūrū tama mexū taxūxgu? ¿Pexcèx rü Tupana tá tūxū maxēēxū ega ngēmaācū tayaxōxgu? ¹⁵⁻¹⁶ Rū ngēxguma chi wūxi i taeneē rü ēxna taeyèx i yaxōxū rü nangexchirugu rü nangewemūgu, rü chi wūxie i pema rü ñapegūgu:

“¡Mexū cuxū ūpetū, rü icūxcuchi na tama cuxū nadeyuxūcèx, rü meā nachībū!” ñapegūgu, rü ¿tacūwa name i ngēma ega tama nūxna penaxāxgu i ngēma nūxū taxuxū? ¹⁷ Rū ngēxguma yaxōmaregu natūrū tama mexū ixūxgu, rü tama togūxū rūngūxēēgu, rü ¿tacūwa namexū i ngēmaācū na yaxōxū? ¹⁸ Erū ngēxguma cuyaxōmaregu natūrū tama mexū cuxūxgu, rü ngūrūāchi tá wūxie ñatarūgū cuxū:

“Cuma rü cuyaxōmare natūrū taxuxūma i mexū cuxū Natūrū choma rü chayōx rü naétū mexū chaxū. ¿Rū ñuxācū tá nūxū chacuāxū na cuyaxōxū ega tama mexū cuxūxgu? Natūrū choma rü chorū ū i mexūmaā tá cuxū chanawē na aixcūma chayaxōxū”, ñatarūgū tá cuxū. ¹⁹ Cuma cuyaxō na nangēmaxū ya wūxitama ya Tupana. Marū name. Natūrū ngoxogū rü ta ngēmaācū nayaxōgū, rü poraācū niduxruxe erū Tupanaxū namuūē. ²⁰ Pa Yatū ya tama Meā Nagu Rūxīnūcūx, cuma rü tama nūxū cucuèx i ngēxguma cuyaxōmaregu rü tama mexū cuxūxgu, rü taxuwama name i ngēmaācū na cuyaxōxū. ²¹ Tupana nūxū ixuxgu rü nuxcūmaūcū ga tōrū oxī ga Abráū rü wūxi ga yatū ga mecū nixī. Yerū mexū naxū rü Tupanaga naxīnū ga

yexguma namaã nüxü yaxuxgu na naxcèx yamáãxücèx ga nane ga Ichaá.
²² Rü ngēmawa nüxü tacuèx rü tama nayaxōmare ga Abráü, natürü mexü naxü ta. Rü yema naxüxüwa tüxü nüxü nacuèxëë na aixcüma Tupanaãxü yaxōōxü.

²³ Rü yemaãcü ningu ga yema ore ga ümatüxü ga ñaxü:

“Abráü rü Tupanaãxü nayaxō rü yemacèx Tupana nüxü nixu na mecü yïixü yerü nüxü nayaxō. Rü nüxü nixu ta na namücü yïixü ga Abráü”.

²⁴ Rü ngēmawa nüxü tadau na Tupana namaã taãëxü ya yima yatü ya mexü ücü rü tama yaxōmarecü. ²⁵ Rü yemaãcü ta ngīmaã nangupetü ga nuxcüma ga Raá. Rü Tupana ngīmaã nataãë yerü mexü ixü ga yexguma meã nayauxāgu ga ngīpatawa ga yema orearü ngeruügu ga Yudügu. Rü ngīgagu namaxë ga yema orearü ngeruügu yerü to ga namagu iyamugü ga yexguma norü uwanügu nadaixchaügu. Rü woo ga ngīma rü chixri na namaxüxü ga noxrix, natürü mexü ixü yerü iyaxō, rü yemacèx Tupana ngīmaã nataãë. ²⁶ Rü wüxi i naxüne rü taxuwama name rü nayumare ega natauxguma i naãë. Rü ngëxgumarüü ta nixü na taxuwama namexü na yaxōmarexü ega taxuüma i mexü ixüxgux.

3

Törü conüchiga

¹ Pa Chaueneëgüx, tama name i muxëma i pema rü nguxëëtaexügu pegü pixüguëechaü. Erü pema nüxü pecuèx na yixema i nguxëëtaexügu na ixüguü, rü guxü i duüxüguarü yexera tá tüxna naca ya Tupana törü maxüchiga rü törü puracüchiga. ² Guxāma i yixema rü muëxpüxcüna chixexü taxüe. Yima yatü ya taguma chixexüxü ixücü rü aixcüma mecü nixü, erü nüxü nacuèx na ñuxäcü guxüwama nügüna nadauxü na tama chixexü naxüxücèx. ³ Rü ngëma na taga naxüxücèx i wüxi i cowaru, rü tanaxwëxe na naxütüxünäguxü na ngëmaãcü yixema inaxwëxexüläcüma meã iyaxüxücèx. ⁴ ¡Dücèx nagu perüxinüë ya wapurugü ya buanecüarü poramaã ixüxüne! Rü woo nitaxüchi rü buanecü ya taxüchicümaã inicuegü, natürü iracü ya quiyamaã nanatoxchinü i norü toxpëxerü, rü ngextá nüma ínanaxwëxexüwa nanaxüxëë. ⁵⁻⁶ Rü ngëxgumarüü ta nixü ya törü conü rü woo na naxirachirëxü, natürü namuxüchi i norü ore. Rü wüxitama i üxüarü yauraxü i iraxüwa inaxügu na yaxaxü i taxüma i naãë. Rü törü conü rü ñoma wüxi ya üxürü nixü. Rü taxünewa rü wüxi i taxü i chixexü nixü ya yima törü conü erü nanachixexëë i guxüma i törü maxü. Rü ngëma Tupana ngoxogüxü ípoxcuexüguene ya üxüemawa ne naxü i ngëma chixexü i namaã yadexaxü ya törü conü. Rü ngëma chixexümaã nanachixexëë i guxüma i törü maxü. ⁷ Duüxügu rü nüxü nacuèx na íyapuxëëaxü rü nüxna nachogüxü i nagüxüraüxü i naëxügu i idüraexü, rü werigü, rü äxtapegü, rü choxnigü. ⁸ Natürü taxüema nüxü tacuèx na nüxna tachogüxü ya tümaärü conü. Erü wüxi i chixexü i taxü i taxucürüwama texë iyarüxoxëëxü nixü. Rü ngëma norü dexa rü üürüü tüxü nayuxëë. ⁹ Rü yima törü conümaã nüxü ticuèxüü ya Tanatü ya Tupana, rü yimamaãtama chixexü namaã tixugüe ta i duüxügu i Tupana nügüäcü üxü. ¹⁰ Rü ngëma taëxmaã, rü meã duüxügüchiga tidexagü, natürü ngëmatama taëxmaã rü namaã taguxchigagü ta. Pa Chaueneëgüx, tama name na ngëmaãcü yïixü. ¹¹ Wüxi i dexáarü chuxchuxüwatama rü taxuacüma inaxüxü i dexá i mexü rü dexá i chixexü. ¹² Pa Chaueneëgüx, wüxi i iguera rü taxuacüma orübuarü omaã naxo, rü wüxi i uba rü taxuacüma

igueraarü omaã naxo. Rü ngëxgumarüü ta wüxi i dexáarü chuchxuxü i yucürachiüxüwa, rü taxuacüma ínaxüxü i dexá i mexü.

Ngëma cuèx i aixcüma íxüü

¹³ Ngëxguma chi petanüwa nangëxmagu i wüxi i duüxü i nüxü cuáxü rü meã naãëxü cuáxü, rü name nixí na meã namaxüxü rü mexü na naxüxü rü tama nügü yacuëxüüxü na ngëmaãcü pexü nüxü nadauxëëxüçëx na aixcüma wüxi i duüxü i nüxü cuáxü yíüxü. ¹⁴ Natürü ngëxguma chi pixáüxãchiwëxëgü rü togüchi pexaiegu rü norü yexera pegü pixíxëëchaüü, rü taxuacüma pegügu perüxínüë na mexügü rü nüxü cuëxgüxü pixíxüxü. Rü wüxi i dora i taxü nixí i ngëma ega ngëmaãcü pixíxüxü. ¹⁵ Erü ngëma na íxãüxãchiwëxëgüxü rü duüxügüchi na íxaixü rü norü yexera yigü na íxíxüxëëchaüü, rü tama Tupanawa ne naxü, natürü ñoma i naãnecüãxwa rü ngoxo i Chatanáwa nixí i ne naxüxü. ¹⁶ Erü ngextá äüxãchi ítaxüwa rü duüxügü nügü írüyexeraxëëchaüüwa, rü ngema rü taxuüma meã inixü rü nagüxüraüxü i chixexü nangëxma. ¹⁷ Natürü guxáma ya yíxema aixcüma tüxü nangëxmaxë i ngëma cuèx i Tupanawa ne üxü, rü aixcüma meã tamaxë rü guxámaã tamecümagü, rü meã duüxëxü tayauxgü i tümapatawa, rü meã itarüxínüë i tümamücüarü ucuxë, rü guxü i duüxügü tüxü nangechaütümüügü, rü guxámaãma tügü tawüxiguxëëgü, rü tixaixcümagü, rü mexü taxügü. ¹⁸ Rü yíxema naxcëx daugüxe na duüxügü nügümaã írüngüxmüëxü, rü wüxi i mexü taxügü. Erü ngëmawa tá nüxü tadaugü na aixcüma meã Tupanacëx namaxëxü i ngëma duüxügü.

4

Duüxügü i ñoma i naãneärü ngúchaüçëx daugüxüchiga

¹ ¿Tüxcüü pegümaã penuë rü pegü pedai? Pegümaã penuë erü pexü nangëxma i ngëma perü ngúchaüü i chixexügü. ² Pema pexü nangúchaü i ngëma pexü taxuxü natürü taxuacüma pexü nanguxü, rü ngëmacëx peyamëx i togü. Rü norü ngëmaxüçëx pixáüxãchie natürü taxuacüma pexü nanguxüega, rü ngëmacëx pegümaã penuë, rü pegü pedai. Rü tama penayauxgü i ngëma penaxwëxëxü erü tama Tupanana naxcëx peca. ³ Rü ngëxguma naxcëx ípëcaxgu, rü tama penayaxu, erü naxcëx ípëca i ngëma tama Tupana pexü naxwëxëxü. Rü ngëma pematama penaxwëxëxü nixí i naxcëx ípëcaxü na namaã pegütama petaãëxëëmárexcëx. ⁴ Pa Duüxügü i Chixri Maxëxüx, ¿Tama ëxna nüxü pecuëx rü ngëxguma ñoma i naãnexü pengechaüü rü Tupanamaã perüxüwanüxü? Erü texë ya ñoma i naãnexü ngechaüxë rü Tupanamaã tarüxüwanü. ⁵ Rü tama natüçëxma nixí i ngëma Tupanaärü ore i ñaxü: “Ngëma Naãë i Üünëxü i Tupana tüxna muxü rü tüxü ninuxü erü noxrü tixí rü tüxü nangechaü”, ñaxü. ⁶ Natürü Tupana rü tüxü narüngüxëë na namaã iporaëxüçëx i guxüma i ñoma i naãneärü ngúchaü i chixexü. Rü ngëmacëx norü orewa rü ñanagürü: “Tupana rü tümamaã nanu ya yíxema tügü icuëxüxügüxe, natürü tüxü narüngüxëë ya yíxema tama tügü icuëxüxügüxe”, ñanagürü. ⁷ Pa Chaueneëgüx, ¡Meã Tupanaga pexínüë! ¡Rü nüxü pexoó i ngoxo i Chataná! Rü nüma rü tá pexna ñiña. ⁸ ¡Tupanana pengaicamagü! Rü nüma rü tá ta pexna nangaicama. Rü pemax, Pa Pëcaduãxgüxüx, ¡nüxü perüxoe i pecüma i chixexü! Rü pemax, i Tupanawe rüxíxchaüxë natürü ñoma i naãnewe rü ta rüxíxchaüxë, ¡penamëxëëx i perü maxü na Tupanacëxicatama

pemaxëxücèx! ⁹ ¡Pegümaã pengechaũgü rü pexauxe erü pipecaduãx! Rü texé ya ñoma i naãneãrü taãëwa cugüxe, rü name nixĩ i tügümaã taxauxe. Rü texé ya tümacüma i chixexümaã taãxexë, rü name nixĩ i Tupanapëxewa tügümaã tangechaũ. ¹⁰ Rü name nixĩ i Cori ya Tupanapëxegu pecaxãpüpügü rü namaã nüxü pixu na taxuwama pimexü. Rü ngëxguma i nüma rü tá pexü nicuëxüü rü pexü nataxëë.

Tama name i chixexügu cueneëmaã curüxĩnü

¹¹ Pa Chaueneëgüx, ¡Tãxü i chixexümaã pegü pixugüxü! Erü yíxema chixexümaã tümãneëchigagu idexãxe rü ëxna chixexümaã nüxü dawenüxë, rü chixe nüxü tawogü ta i Tupanaãrü ore. Rü ngëxguma chixexügu Tupanaãrü oremaã curüxĩnügu, rü Tupanaãrü orearü yexera cugü quixĩxëëchaũ erü tama aixcüma naga cuxĩnü. ¹² Tupanaxĩcatama nixĩ ya tũxna naxãcü i norü mugü rü ñuxüchi tá tũxna çacü rü ngoxi naga ixĩnüë i ngëma norü ore. Rü nümatama nixĩ i nüxü nangëxmaxü i pora na tũxü namaxëxëëxü rü ëxna tũxü nayuxëëxü. ¿Natürü texé quixü i cumax rü ngëmacëx cunangugüxü na ñuxãcü namaxüxü i cumücü?

Taxüema nüxü tacuëx na ñacü tá tũxü ngupetüxü i moxüãrü ngunexügu

¹³ ¡Choxü iperüxĩnüë i pema na ñapegügüxü:

“Ñuxma rü ëxna moxü tá ná i ñãnewa taxĩ, rü wüxi ya taunecü tá ngëxma tayayaxu, rü tá ngëma tataxegü na mucü i diëru ngĩxü iyaxuxücèx”, ñaperügügü! ¹⁴ Pema rü tama nüxü pecuëx na ñacü tá pexü üpetüxü i moxü. ¿Ñacü nixĩ i perü maxü? Perü maxü rü ñoma wüxi i cherena i paxaãchi nüxü idaaxü rü ngëxgumatama ngupetüxürüü tá inayarüxo. ¹⁵ Rü narümemaë nixĩ na ñapegügüxü:

“Ngëxguma chi nanaxwëxegu ya Cori ya Tupana na imaxëxü, rü chi tanaxü i ñãa puracü i nagu rüxĩnüëxü”, ñapegügüxü. ¹⁶ Natürü i pema rü pegü picuëxüügüchaũ. Rü guxüma i ngëma rü tama name. ¹⁷ Yíxema nüxü cuãxe na ñuxãcü Tupanapëxewa meã tamaxüxü, natürü tama naxüxe, rü pecadu taxü.

5

Ucuxë i diëruãxgüxüçëx

¹ Pa Duüxügu i Diëruãxgüxüx, ¡perüxĩnüë i ñãa ore! ¡Pexauxe rü aita pexüë erü chixexü tá pexü naxüpetü! ² Perü ngëmaxüügü rü marü nangaue, rü ngëma pexchiru i mexëchixü rü nawe nanangöümü. ³ Perü uiru rü perü diëru rü ngëxma naxãütanü rü ngëxma nangaue. Rü ngëma norü aütanü rü wüxi i perü cuëxruü tá nixĩ na pema rü tá ta ipeyarütauxexü ñoma ñacü üxüwa ixaxürüü. Tupana ngĩxü nadau i perü diëru i ngĩmaã penguüxcü, rü ngëmacëx tá pexü napoxcu i naãneãrü guxgu. ⁴ Rü yema perü puracütanüxü ga tama meã nüxü penaxütanüxü, rü ñuxma rü ngĩxcëx nidexagü ga yema diëru ga tama nüxna ngĩxü pexãcü. Rü Tupana ya guxããrü Cori rü ngëma duüxügüxü naxĩnü na ngĩxcëx yadexagüxü ga yema diëru ga nüxü ngĩxü pengetanücü ga peanewa na napuracüxëxëx. ⁵ Rü ñoma i naãnewa rü pegü pengëxãëgü rü pemepata rü pemuãrü ngëmaxüãxgü rü petaãëgü rü meã pechibüë. Natürü nawa tá nangu na ngëmacëx Tupana tá pexü poxcuëxü. ⁶ Rü pema penapoxcure rü penadai i ngëma duüxügü i taxüüma i chixexü pemaã üchirëxü. Rü nümagü rü pexü narüturamaëgü, rü taxuacüma nügü inapoxügü.

Tanaxwèxe i tayumüxê rü meã ítananguxêẽ ya Cori ya Tupana

⁷ Rû ñuxma Pa Chaueneëgüx, rü name nixí i meã ípenanguxêẽ ñuxmatata ínangu ya Cori ya Tupana. Rû ñucax, yixema naãnewa puracüxe rü meã ítananguxêẽ ya pucü na naxügxüxcèx i túmanetü. Rû ñuxüchi ñuxre ya tauemacü ítananguxêẽ na nayaxü i túmanetüarü o, rü ngëxguma rü tá tayabuxgü. ⁸ Rû pema rü ta penaxwèxe na meã ípenanguxêẽxü na ínanguxü ya Cori ya Tupana. ¡Rü petaãëgü, rü táxü i nüxü perüçhauexü na ípenanguxêẽxü! Erü marü ningaica na ínanguxü ya tóru Cori. ⁹ Pa Chaueneëgüx, name nixí i nüxü perüxoe na pegüchigaxü pixuechaü na tama ngëmacèx pexna naçaxüxcèx ya Tupana. Erü marü ningaica na ínanguxü na duüxügüxü yacagüxüxcèx i norü maxüchiga. ¹⁰ Pa Chaueneëgüx, name nixí i nüxna pecuèxãchie ga yema nuxcümaügüxü ga Tupanaarü orearü uruügü ga na ñuxäcü yaxna namaã naxínüèxü ga yexguma ngüxü yangegügu. Rü name nixí i pema rü ta ngëxgumarüü yaxna namaã pexínüèãma rü Tupanacèx pemaxëãma ega ngüxü pingegügu. ¹¹ Rû yixema nüxü tacuèx na nataãëgüxü ga yema duüxügü ga meã Tupanacèx maxëãmaxü ga yexguma ngüxü nüxü üpetügu. Rû pema nüxü pecuèx ga ñuxäcü meã namaxama ga guma Yox ga yexguma ngüxü nüxü üpetügu. Rû nüxü pecuèx ga yixcama ga na ñuxäcü tóru Cori ya Tupana poraãcü nüxü rüngüxêèxü. Erü nüma ya tóru Cori ya Tupana rü namecümaxüchi rü poraãcü nüxü tangechaütümüügü. ¹² Rû guxüãrü yexera, Pa Chaueneëgüx, rü ngëxguma ñacücèx ipexunetagu, rü tama name i Tupanaegagu ipexuneta, rü èxna ñoma i naãnegagu ipexuneta, rü èxna ñacü i to i naegagu ipexuneta. Natürü ngëxguma aixcüma yixígu i wüxi i ore ¡rü noxtacüma: “Ngü” ñapegü! Rû ngëxguma tama aixcüma yixígu i wüxi i ore ¡rü noxtacüma: “Tama” ñapegü! Rû ngëxguma ya Tupana rü täütáma pexü napoxcue naxcèx i ngëma perü uneta. ¹³ Rû ngëxguma wüxie i petanüwa naxixãchiãëgu, rü name nixí na tayumüxèxü. Rû ngëxguma wüxie taãëgu, rü name nixí na tawiyaexü rü Tupanaxü ticuèxüxü. ¹⁴ Rû ngëxguma wüxie i petanüwa idaawexgu, rü name nixí i naxcèx peyaca i yaxögüxüãrü äëxgacügü na túmacèx nayumüxëgüxüxcèx rü Cori ya Tupanaegagu chixümaã tüxü yangögügüxüxcèx. ¹⁵ Rû ngëxguma aixcüma Tupanaãxü yaxögüãcüma nayumüxëgügu, rü tá túmacèx nitaane, rü nüma ya Cori ya Tupana tá tüxü ínarüdxëè nawa i túmaãrü daawe. Rû ngëxguma chi ñacü rü pecadu taxüxgu, rü Tupana tá tüxü nüxü nangechaü. ¹⁶ Rû ngëmacèx name nixí i pegümaã nüxü pixu i perü pecadugü rü pegücèx peyumüxëgü i wüxiechigü na pexcèx yataanegüxüxcèx. Rû yima mecü ya yatüarü yumüxë rü aixcüma napora erü Tupana nanangãxü. ¹⁷ Tupanaarü orearü uruü ga Eria nixí ga wüxi ga yatü ga taxrüü ixícü. Natürü yexguma nüma guxü ga norü ngüchãmaã nayumüxëgu na tama napuxüxcèx, rü tomaëxpüx ga taunecüarü ngãxügu rü tama napu ga yema naãnewa. ¹⁸ Natürü yemawena rü wenaxãrü nayumüxë ga Eria rü pucücèx ínaca. Rû wenaxãrü napu. Rû narüxü ga guxüma ga nanetügü. ¹⁹ Pa Chaueneëgüx, ngëxguma chi texé petanüwa Tupanana ixügachigu, rü tangëxmagu ya wüxie ya tüxü taeguxëxë na wenaxãrü Tupanawe tarüxüxcèx, rü mexü taxü. ²⁰ Erü ngëxguma texé Tupanacèx nataeguxëëgu i wüxi i duüxü nüxna i norü chixexü, rü túmagagu Tupana tá nanamaxëè i ngëma duüxü, rü tá nüxü nüxü nangechaü i norü pecadugü.

Rü nüãma pexna,
Chaütiágu

NÜXĪRAÜXÜ GA POPERA GA PEDRU ÜMATÜXÜ

Pedru nüxü narümoxë ga yema yaxôgüxü ga to ga nachiiänegu woonexü

¹ Pa Chaueneëgüx, choma i Pedru nixi i pexcëx chanaxümatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxüçëx i norü ore. Rü pexcëx chanaxümatü i pema na perü naãnena to i nachiiänegü penawoonexü i Pötuanewa rü Gáratanaewa rü Capadochiaanewa rü Áchiaanewa rü Bitíniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümaxüchima nagu naxinüxü. Rü nanamu ga Naãë i Üünexü na pexü yamexëëgüxüçëx na aixcüma napëxewa pixüünegüxüçëx rü Ngechuchu ya Cristuga na pexinüëxüçëx rü nagümaã na piyaxgüxüçëx na nataxuxüçëx i perü chixexügü. Rü chanaxwëxe i Tanatü ya Tupana poraäcü pexü narüngüxëë rü pexü nataãëxëë.

Ítananguxëë na wena tá imaxëxü

³ Rü ngixã nüxü ticuëxüügü ya Tupana ya tóru Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tuxna nanaxã ga maxü ga yexwacaxüxü, yerü poraäcü nüxü tangechaütümügü. Rü ngëmacëx i ñuxma i yixema rü ta ítananguxëë na wena tá imaxëxü. ⁴ Rü pema rü wüxi i ngunexügu rü aixcüma tá penayauxgü i guxüma i ngëma mexügü i Tupana tá pexna äxü i ñuxma daxüguxü i naãnegu pexü namaã nanguxüxü. Rü ngëma tá pexna naxãxü rü tagutãma inayarüxo, rü tagutãma naxãüãchi, rü tagutãma nangau. ⁵ Rü ñuxma na Tupanaãxü peyaxôgüxü rü nüma rü norü poramaã tá pexna nadau ñuxmatáta aixcüma penayauxgü i ngëma maxü i taguma gúxü i tá pexna naxãxü i ngëxguma naguxgu i naãne. ⁶ Rü ngëmacëx name nixi i poraäcü petaãëgü, rü nüetama nixi ega woo ñuxma ñaã perü maxüwa rü paxaxãchi muxüma i guxchaxügü pexü üpetügu. ⁷ Erü ngëmaäcü nixi i pexü naxüxü ya Tupana na nüxü nacuáxüçëx rü ngoxi aixcüma peyaxôgü rü ëxna tama. Rü ngëxguma peyaxôgüamagu ega woo guxchaxügü pexcëx ínguxgu, rü ngëma perü ô rü wüxi i uiruarü yexera nixi na namexü erü ngëma uiru rü woo namexëchi natürü düxwa nangau. Rü ngëma uiru rü üxümaã nüxü taxü na nüxü icuáxüçëx rü ngoxi aixcüma uiruxüchi yiixü. Rü ngëxgumarüü ta nixi i perü ô na guxchaxügümaã Tupana nüxü üxü na nüxü nacuáxüçëx rü ngoxi aixcüma nüxü peyaxôgü na yixcama pexü yacuëxüxüçëx rü mexü i pechica pexna naxãxüçëx rü pemaã nataãëxüçëx i ngëxguma wena nüma naxüxgu ya Ngechuchu ya Cristu. ⁸⁻⁹ Pema rü Ngechuchu ya Cristuxü pengechaügü woo taguma nüxü na pedaugüxü. Rü ñuxma rü ta woo tama nüxü pedaugü, natürü nüxü peyaxôgü, rü poraäcü petaãëgü. Rü ngëma perü taãëmaã rü taxuacüma nüxü pixuéga na ñuxäcü petaãëgüxüchixü, erü marü penayauxgü i perü maxü i taguma gúxü. Rü ngëmacëx nixi i nüxü peyaxôgüxü. ¹⁰ Rü nuxcümaxüchima ga Tupanaärü orearü uruügü, rü nüxü nixugüe ga na ñuxäcü tá Tupana pexü narüngüxëëxü. Rü nümagü rü poraäcü nangüe rü naxcëx nadaugü i ngëma maxü i taguma gúxü. ¹¹ Rü nümagü ga yema orearü uruügü rü Tupanaärü poperawa nangüe na nüxü nacuëxgüxüçëx na ñuxäcü tá na yiixü rü ñuxguacü tá na nangôxü ga guma Maxëxëëruü ga Cristu. Rü Cristuãë i

Üünexũ ga yema orearũ uruũgũwa yexmaxũ, rũ nüxũ nüxũ nacuèxèẽ ga na Cristu rũ tá ngúxũ yangexũ rũ tá nayuxũ rũ yixcama rũ wena tá na namaxũxũ rũ ñuxũchi daxũguxũ i naãnewa tá na naxũxũ na guxũãrũ ãëxgacũ yĩxũcèx. ¹² Natürũ Tupana rũ yema nuxcũmaũgũxũ ga orearũ uruũgũxũ nüxũ nacuèxèẽ na tãũtama nũmagũ nüxũ nadaugũxũ ga guma Maxèxèerũ ga naxcèx nadaugũcũ, natürũ pema tá yĩxũ na nüxũ pedaugũxũ. Rũ dücax, Pa Chaueneëgũx, gumatama Maxèxèerũchiga nixĩ ga perũ orearũ uruũgũ pemaã nüxũ ixugũgũxũ ga yexguma Tupanaãe i Üünexũ ga daxũwa ne muxũ yadexagũxèëgu. Rũ guxũma i ngẽma ore i yima Maxèxèerũchiga, rũ woo Tupanaãrũ orearũ ngerũgũ i daxũcũãx rũ nüxũ nangũchaũgũ na yexeraãcũ nüxũ nacuèxgũxũ.

Tupana rũ taxcèx naca na napèxewa naxüünexũcèx i tóru maxũ

¹³ Rũ ñuxma na Cristuarũ duũxũgũ pixĩgũxũ, rũ penaxwèxe na pexuãëgũxũ rũ ípememarexũ na penaxũxũ i norũ ngúchaũ. Rũ name nixĩ i aixcũma meã ípenanguxèẽ i guxũma i ngẽma mexũgũ i Tupana tá pexna ãxũ i ngèxguma Ngechuchu ya Cristu núma ũxgu. ¹⁴ Rũ ñuxma na Tupanaxãcũgũ pixĩgũxũ, rũ penaxwèxe na aixcũma naga pexĩnũxũ. Rũ tama name i nagu pexĩ ga yema nuxcũmaũxũ ga perũ ngúchaũ ga ũpa nagu pexĩxũ ga yexguma tauta Tupanaxũ pecuèxgu. ¹⁵ Natürũ penaxwèxe i aixcũma meã pemaxè na Tupanapèxewa naxüünexũcèx i perũ maxũ. Erũ nüma ya Tupana ya pexũ decũ, rũ naxüüne. ¹⁶ Rũ norũ ore i ũmatũxũwa rũ ñanagürũ:

“Chanaxwèxe i chauxrũxũ pixüüne, erũ choma rũ chaxüüne”, ñanagürũ. ¹⁷ Rũ pema na “Pa Tonatũx” ñapegũxũ nüxũ ya Tupana, rũ ñuxma na ñoma i naãnewa pemaxèxũ rũ name nixĩ i guxũguma nüxũ pemuðe. Erũ nüma rũ aixcũmaxũchi nanangugũ i wũxichigũ i duũxũgũarũ maxũ na ñuxãcũ yĩxũ. Rũ tüxũ napoxcu ya guxãma ya texé ya chixexũ ũgũxe, rũ nüetama nixĩ erũ woo texé tixĩgu, erũ napèxewa rũ nawũxigumare i guxũma i duũxũgũ. ¹⁸⁻¹⁹ Rũ Tupana rũ marũ pexũ ínanguxũxèẽ nawa ga yema nuxcũmaũxũ ga perũ maxũ ga taxuwama mexũ ga perũ oxigũxũtawa peyaxuxũ. Rũ yema na nawa pexũ ínanguxũxèẽxũcèx rũ pexna naxããxũcèx i maxũ i ngexwacaxũxũ, rũ poraãcũ nüxũ naxãtanũ. Yerũ tama uiru rũ èxna dñeru i ngauxwèxexũmaã nanaxũtanũ, natürũ Cristugũ ya mexèchicũmaã nixĩ ga naxũtanũãxũ. Yerũ nüma ga Cristu rũ ñoma wũxi i carneru i taxuwama nañuxraũxũ i Tupanacèx imãxũrũxũ pexcèx nayu na pexũ naxũtanũxũcèx. ²⁰ Rũ nüma ga Tupana rũ woetama nuxcũmaxũchima tauta naãne ixũgũgu, rũ marũ Cristuxũ naxuneta na pexcèx nayuxũcèx. Natürũ ñomaũcũũ nixĩ ga nangóxũ ga guma Cristu na pexũ nangũxèẽxũcèx. ²¹ Rũ ñuxma rũ Cristugagu nixĩ i nüxũ peyaxõgũxũ ya Tupana ga yuwa Cristuxũ írudaxèècũ rũ daxũwa nagacũ. Rũ ngẽmacèx nixĩ i ñuxma i Tupanaãxũ peyaxõgũxũ rũ ípenanguxèëgũxũ na daxũwa pexũ nagagũxũcèx. ²² Rũ ñuxma na naga pexĩnũxũ i Tupanaãrũ ore i aixcũma ixĩxũ rũ pexũ natauxcha na pegũ pengechaũgũxũ erũ Tupana rũ marũ pexũ inayanaxoxèẽ i perũ chixexũgũ. Rũ ngẽmacèx penaxwèxe i aixcũma guxũ i perũ ngúchaũmaã pegũ pengechaũgũ. ²³ Rũ ñuxma i pema rũ marũ penayauxgũ i ngexwacaxũxũ i perũ maxũ. Rũ ngẽmacèx ñoma ngexwacèx pebuxũrũxũ pixĩgũ. Natürũ ngẽma maxũ rũ tama penatũ rũ pee ya yewèxèxewa nixĩ i penayauxũ. Natürũ Tupanaãrũ ore i maxũxũ i taguma iyarũxoxũwa nixĩ i penayauxũ. ²⁴ Erũ Tupanaãrũ ore i ũmatũxũwa rũ ñanagürũ:

“Guxūma i duūxūgū rū ñoma wūxi i natüanerüūmare nixī. Rū guxūma i norū mexū, rū wūxi i nanetüchacurüūmare nixī. Rū ngēma natüane rū nayu, rū nachacu rū narūngu. Rū ngēxgumarüū ta nixī i duūxūgū na tama nataixū i norū maxū i ñoma i nañewa. ²⁵ Natürü tórü Coriarü ore rü tagama inayarüxo”,

ñanagürü i Tupanaärü orewa. Rū ngēma Tupanaärü ore i mexū nixī ga pemañ nūxū yaxugūxū.

2

¹ Rū ngēmacèx name nixī i nūxū perüxoe i guxūma i chixexūgū, rū ngēma na pidoratèexgūxū, rū ngēma na togüpèxewa meañ na pemaxēnetaxū rü ngēma na pixāūxāchiwèxegūxū, rū ngēma na pexoregütèexgūxū. ²⁻³ Rū ngēxguma chi aixcūma nūxū picuèxāchitanūgu na ñuxācū namecūmaxūchixū ya tórü Cori, rü ñoma wūxi i ðxchana i ngexwacèx buxū i naēgūnenixū nūxū ngūchaūxūrū penaxwèxe i poraācū pexū nangūchaū i norū ore na ngēmawa peporaexūcèx rü meañ peyaexūcèx i perü ðwa na ngēmaācū guxūwama namexūcèx i perü maxū i tagama gūxū.

Cristu nixī ya nuta ya maxūcū

⁴ Rū ñuxma rü name nixī i tórü Corina pengaicamagū. Erü nūma ya tórü Cori nixī ya yima nuta ya maxūcū ya Tupana nayaxucū na namañ inaxūgūāxūcèx ya napata. Rū woo duūxūgū nūxū oexū, natürü yima nixī ya Tupana nayaxucū erü naxcèx rü namexēchi. ⁵ Rū ngēxgumarüū ta i pemax, rü Tupana pexū nade na napataarü nutagū ya maxēcū pixīgūxūcèx. Rū pema nixī i Tupanaärü ngūxēēruūgū i üünexū i Ngechuchu ya Cristuégagu Tupanana āmare pexāgūxū. Rū ngēma āmare i nūxna pexāgūxū i namañ nataāxū rü ngema nixī i perü maxū i mexū i napèxewa. ⁶ Rū Tupana rü norū ore i ümatūxūwa rü Cristuchigaxū nixu rü ñanagürü:

“Ñuxma na ichanaxūgūxū ya chopata, rü yima nuta ya nūxīra chayaxūcuchicū, rü yima nixī ya nuta ya mexēchicū ya chomatama chanayaxucū na chopata namañ ichaxūgūxūcèx. Rū yima nuta rü chaunchiga nixī. Rū yixema nūxū yaxōxē, rü aixcūma tá tanayaxu i ngēma maxū i tagama gūxū i tūmamañ ichaxunetaxū”,

ñanagürü. ⁷ Rū pema na nūxū peyaxōgūxū, rü Cristu rü pexcèx rü guxūwama name rü naporaxūchi. Natürü ngēma tama yaxōgūxūcèx, rü taxuwama name. Rū ngēmacèx ya Tupana rü norū ore i ümatūxūwa rü ñanagürü:

“Yima nuta ya ñpataarü üruūgū nūxū ocū, rü chauxcèx rü gucū ya nutaarü yexera namexēchi. Rū ngēmacèx yimaētüwa nixī ichanaxūgūxū ya chopata”,

ñanagürü. ⁸ Rū Tupanaärü ore rü ñanagürü ta:

“Guxūma i ngēma tama yaxōgūxū rü tama irūxñnūēchaūxū rü yima nutaga tá nayarūpucutūgū”,

ñanagürü. Rū ngēmaācū i guxūma i ngēma tama yaxōgūxū rü tá chixexūgu nayi erü tama Tupanaga naxñnūēchaū rü tama Cristuaxū nayaxōgūchaū. Rū ngēmacèx Tupana tá nanapoxcue yema nūma nūxū yaxuxūrū. ⁹ Natürü pema nixī i duūxūgū i tórü āēxgacū ya Tupana pexū dexū na norū ngūxēēruūgū pixīgūxūcèx. Rū pema nixī i duūxūgū i napèxewa ixüünexū erü nūmatama ya Tupana rü norū duūxūgūxū pexū nixīgūxēē na nūxū pixuxūcèx i norū ore i aixcūma mexēchixū. Rū nūmatama ya Tupana nixī ga chixexūwa pexū inanguxūxēēxū na norū ngōonexū i mexēchixūgu pechocuxūcèx. ¹⁰ Rū

ŭpa ga pema rŭ tama Tupanaärŭ duŭxŭgŭ pixŭgŭ, natŭrŭ i ñuxma rŭ aixcŭma norŭ duŭxŭgŭ pixŭgŭ. Rŭ ŭpa rŭ taxúeaxŭma pengechaŭtŭmŭgŭ, natŭrŭ i ñuxma rŭ Tupanaäxŭ pengechaŭtŭmŭgŭ.

Ñuxma na Tupanaärŭ duŭxŭgŭ pixŭgŭxŭ, rŭ name nixŭ i meã naxcèx pemaxè

11 Pa Chaueneëgŭ ya Pexŭ Changechaŭgŭxex, rŭ ñuxma na Tupanaärŭ duŭxŭgŭ pixŭgŭxŭ, rŭ tama ñoma i naänecŭäx pixŭgŭ. Rŭ ngèmacèx pexŭ chacèexŭ na nüxŭ perŭxoexŭcèx i guxŭma i ngèma ngúchaŭgŭ i chixexŭ i ñoma i naänecŭäx nagu ixŭ. Erŭ ngèma ngúchaŭgŭ i chixexŭ rŭ taäexŭ chixexŭgŭ nanguxèèchaŭ. 12 Rŭ name nixŭ i meã pemaxè napèxewa i ngèma duŭxŭgŭ i tama Tupanaxŭ cuèxgŭxŭ. Rŭ ngèxguma woo poraäcŭ chixri pechiga yadexagŭgŭ i nŭmagŭ, rŭ tá nüxŭ nadaugŭ na ñuxäcŭ mexŭ pexŭgŭxŭ, rŭ tá Tupanaxŭ nicuèxŭgŭ i ngèxguma Cristu wena núma ŭxgu. 13 Rŭ name nixŭ na tórŭ Cori ya Ngechuchugagu tŭmaga pexŭnŭèxŭ ya guxäma ya yixema perŭ äèxgacŭgŭ ixŭgŭxe. Rŭ ngèmaäcŭ name nixŭ i meã naga pexŭnŭè ya äèxgacŭ ya tacŭ ya Dumawa ngèxmacŭ, erŭ núma nixŭ i guxŭ i togŭ i äèxgacŭgŭétŭwa nangèxmaxŭ. 14 Rŭ ngèxgumarŭŭ ta name nixŭ i naga pexŭnŭè i ngèma togŭ i äèxgacŭgŭ i petanŭwa namugŭxŭ ya yima äèxgacŭ ya tacŭ na napoxcŭeäxŭcèx i ngèma chixexŭ ŭgŭxŭ rŭ namaã nataäègŭxŭcèx i ngèma mexŭ ŭgŭxŭ. 15 Erŭ Tupana nanaxwèxe na mexŭ pexŭgŭxŭ na ngèmaäcŭ ipeyanangeèxgŭxèèxŭcèx i ngèma duŭxŭgŭ i tama Tupanaärŭ orexŭ cuáxchaŭgŭxŭ rŭ chixri ngèma orchiga idexagŭxŭ. 16 Rŭ ñuxma na Cristu pexŭ ingŭxŭxèèxŭ, rŭ name nixŭ i duŭxŭgŭ i aixcŭma ingŭxŭxŭrŭäcŭ meã pemaxè. Natŭrŭ ñuxma na ípengŭxŭxŭ rŭ tama name na ngèmamaã pegŭ ípepoxŭxŭ na tacŭ rŭ chixexŭ pexŭgŭxŭcèx. Erŭ ñuxma na Tupanaärŭ duŭxŭgŭ pixŭgŭxŭ, rŭ name nixŭ i norŭ ngúchaŭxŭcatama pexŭgŭ. 17 Rŭ name nixŭ i meã penayauxgŭ i guxŭma i duŭxŭgŭ. ¡Rŭ nüxŭ pengechaŭ i taeneëgŭ i yaxŭgŭxŭ! ¡Rŭ nüxŭ pemuŭè ya Tupana! ¡Rŭ naga pexŭnŭè ya äèxgacŭ ya tacŭ ya Dumacŭäx!

Tanaxwèxe i Cristurŭŭ yaxna namaã taxŭnŭè i ngèxguma ngŭxŭ ingegŭgu

18 Pa Duŭxŭgŭ i Coriäxgŭxŭx, ¡rŭ nüxŭ pengechaŭgŭ rŭ naga pexŭnŭè i perŭ corigŭ! Rŭ tama name i ngèma perŭ corigŭ i pemaã mecŭmaxŭxŭcatama pengechaŭgŭ, natŭrŭ name nixŭ i nüxŭ pengechaŭgŭ ta i ngèma perŭ corigŭ i chixecŭmaxŭ. 19 Erŭ Tupana rŭ pemaã nataäè ega nüxŭ na pengechaŭgŭxŭcèx yaxna namaã pexŭnŭègu i ngèxguma texè natŭcèxmamare chixexŭ pemaã ŭxgu rŭ ngŭxŭ pexŭ tingexèègu. 20 Natŭrŭ ¿tacŭwa pexŭ namexŭ ega yaxna namaã pexŭnŭègu i ngèxguma wŭxi i perŭ chixexŭcèx pepoxcŭegu? Natŭrŭ ngèxguma tacŭ rŭ mexŭ i pexŭxŭgagu ngŭxŭ pingegŭgu rŭ yaxna namaã pexŭnŭègu, rŭ ngèma waxi nixŭ i Tupanapèxewa mexŭ. 21 Rŭ ngèma na mexŭ pexŭxŭgagu ngŭxŭ pingegŭxŭcèx nixŭ i Tupana pexŭ dexŭ. Yerŭ ga Cristu rŭ ta pexcèx ngŭxŭ ninge. Rŭ yemaäcŭ pexŭ nüxŭ nadauxèè na ñuxäcŭ núma nanaxwèxexŭ na naxrŭŭ yaxna namaã pexŭnŭèxŭ i ngèma ngŭxŭ. 22 Núma ga Cristu rŭ taguma pecadu naxŭ, rŭ taguma texèxŭ nawomŭxèè. 23 Rŭ yexguma duŭxŭgŭ chixexŭ namaã ixugŭegu, rŭ núma rŭ taxuŭma ga chixexŭmaã nanangäxŭ. Rŭ yexguma ngŭxŭ nüxŭ yangxèègŭgu, rŭ núma rŭ tama tacŭ rŭ chixexŭmaã nanaxäxŭne. Natŭrŭ Tupanamaã nüxŭ nixu na núma namaã namexèèäxŭcèx ga yema duŭxŭgŭ ga chixri namaã chopetŭxŭ. Yerŭ nüxŭ nacuèx rŭ Tupana rŭ aixcŭma meã nanangugŭ i guxŭma i duŭxŭgŭarŭ

maxü. ²⁴ Rü nümatama ga Cristu rü nügüxüñegu nayange ga tórü pecadugü ga yexguma curuchagu nayuxgu. Rü yemaäcü nanaxü na nüxü rüxoexüćex i tórü chixexü na naxćexicatama imaxexüćex. Nüma rü pexćex nanapix na yemaäcü pexü nameexexüćex. ²⁵ Rü pema ga üpa rü ñoma carnerugü i nu ne naximarexürüü pixigü. Natürü i ñuxma rü marü Cristucex pewoegu. Rü nüma nixi i perü dauruü yixü, rü nüma nixi i pexna nadauxü.

3

Ñuxäcü Tupana nanaxwexe na namaxexü i ngëma ixämaxü rü ixätexü

¹⁻² Rü pemax, Pa Ngexügüx, rü name nixi i petega pexinüe na ngëma pete i tama yaxöxü nüxü dauxüćex i perü maxü i mexü i Tupanapëxewa rü duüxüğüpëxewa rü ngëmacex na yaxöxüćex woo taxuüma i Tupanaärü orexü namaä pixugu. ³ Rü ngëma na aixcüma pimexüćex, rü tama name i nagu perüxinüe na ñuxäcü pegü pemexëyæxüchixü, rü ãxna uirunaxćex i ngëxæruümaä pengëxæägüxü, rü ãxna tatanüxüchixü i naxchirugu na picuxgüxü. ⁴ Natürü name nixi i perü maxüwa pegü pimexëägü rü guxüma i duüxüğümaä pimecümagü rü taguma texémaä penuäägü, erü ngëma nixi i perü mexü i taguma iyarüxoxü i aixcüma mexü i Tupanapëxewa. ⁵ Rü yemaäcü norü maxü i mexümaä nixi ga nügü yangëxæägüxü ga yema nüxcümaügüxü ga ngexügü ga Tupanapëxewa ixüünexü. Rü nümagü rü Tupanaärü nayaxögü rü natega naxinüe. ⁶ Rü yemaäcü ta iyixi ga Chara ga ngite ga Abräüga na naxinüxü, rü ngirü corimaä naxuaxü. Rü pemagü rü tá ta ngirüü pixigü ega mexü pexügügu. Rü ñuxüchi taxucëxtáma tüxcüü petecex pemuüe. ⁷ Rü ngëxgumarüü ta i pemax, Pa Yatügüx, rü name nixi i meä pemexü pengechaügü rü aixcüma yaxna ngïmaä pexinüe, erü ngïma rü irüturamae. Rü name nixi i ngïmaä petaäägü erü Tupana rü pexna naxäxürüü ngïxna nanaxä i ngëma maxü i taguma güxü. Rü name nixi i ngëmaäcü meä ngïmaä pemaxë na Tupana nüxü ñnuxüćex i perü yumüxëgü.

Yixema mexü ügüxe ya ngüxü ingegüxechiga

⁸ Rü ngëmaäcü chanaxwexe i guxäma i pema rü pegüxü pengechaütümüügü rü wüxigu perüxinüe, rü aixcüma nüxü pengechaügü i guxüma i taeneägü i yaxögüxü. Rü chanaxwexe i aixcüma pemecümagü rü guxämaä pegü pewüxigüxëe. ⁹ Rü ngëxguma texé chixexü pemaä üxgu, rü tama name i pema rü ta chixexü tümamaä pexü. Rü ngëxguma texé pemaä guxchigagu, rü tama name i pema rü ta tümamaä peguxchiga. Natürü narümemaë nixi i mexü i oremaä tüxü pengäxüga rü tüxü perüngüxëe, erü Tupana pexü nadei na pexü nangüxëexüćex. ¹⁰ Erü Tupanaärü ore i ümatüxüwa rü ñnagürü:

“Ngëxguma texé taäeäcüma maxchaügu, rü name nixi i nüxna tadau ya tümäärü conü na tama chixexü i oremaä yadeaxüćex. Rü ngëxgumarüü ta name nixi i nüxna tadau i tümäx na tama doraxü yaxuxüćex. ¹¹ Rü name nixi i nüxna tayaxü i guxüma i chixexügü, rü mexü taxü. Rü ngëxgumarüü ta name nixi i guxüguma naxćex tadau na togümaä tataäexü. ¹² Erü tórü Cori rü tüxna nadau ya yixema aixcüma imexë, rü nüxü naxinüe i tümäärü yumüxë. Natürü tümamaä nanu ya yixema chixexü ügüxe”;

ñnagürü i ngëma Tupanaärü ore. ¹³ ¿Rü texé tá chixexü pemaä üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxüćex ngüxü pingegügu, rü name nixi i petaäägü.

¡Rü taxucèxma texéxü pemuðê, rü taxucèxma tacücèx pexoegaãêgü! ¹⁵ Rü name nixî i perü Corixü peyaxîxêê ya Cristu rü aixcüma naga pexînüê, rü guxülguma ípememare na meã penangãxüxcèx i guxüma i duüxügü i pexna çaxü na tüxcüü Cristuaxü peyaxôgüxü. ¹⁶ Natürü name nixî i nüxü pengechaüácüma penangãxü rü tama pegügu perüxînüêácüma na norü yexera pixîgüxü. Rü name nixî i meã pemaxê na taxucèxma pexoegaãêxüxcèx. Rü ngêxguma ngêmaãcü pemaxêgu rü tá naxãneê i ngêma duüxügü i chixri pechiga idexagüxü na ñuxãcü Cristucèx pemaxêxü. ¹⁷ Yixema rü ngüxü tingegü ega chixexü ixügügu. Natürü narümemaê nixî na mexü ixügüxcèx ngüxü na ingegüxü, ega ngêmaãcü Tupana naxwêxegu. ¹⁸ Yerü nümatama ga Cristu rü ngüxü ninge, rü wüxicanatama guxãârü pecaducèx nayu. Rü woo na mecü yîixü rü taxcèx nayu i yixema i chixexü i duüxügü ixîgüxü. Rü yemaãcü nanaxü na Tupanaxütawa tüxü nagagüxcèx. Rü woo nayu ga naxüne, natürü ga naãê rü tama nayu. ¹⁹ Rü yexguma naxüne yuxgu rü naãê rü natanüwa naxü ga yema naãêgü ga Tupana poxcuexü, rü orexü namaã nayarüxu. ²⁰ Rü yema naãêgü ga yexma poxcuexü, rü yema nixî ga naãêgü ga yema duüxügü ga Noë maxütu tama ixînüêchaüxü woo Tupana yaxna namaã naxînü ga yexguma Noë naxüyane ga guma wapuru. Rü 8 ga duüxügüxícatama nixî ga guma wapurugu ichoüxü, rü yema nixî ga guma mucü ga taxüchicüarü dexáétüwa maxêxü. ²¹ Rü yema dexá rü wüxi ga cuèxruü nixî. Erü ngêxguma dexáwa íbaiegu, rü duüxügüxü nüxü tacuèxêê na Ngechuchu ya Cristu wena maxüxügagu yîixü i tüxü nangêxmaxü i maxü i taguma gúxü. Rü tama taxüneârü düxétüwa na imexüxcèx nixî i íbaixêxü, natürü ítabaie yerü marü Tupana naxcèx taca na tüxü iyanaxoxêêaxüxcèx ga tóru pecadugü na aixcüma napêxewa imexüxcèx rü aixcüma mexügu rüxînüêxüxcèx. ²² Rü nüma ga Ngechuchu ya Cristu, rü daxüguxü i naãnewa naxü, rü ñuxma rü Tupanaârü tügünecüwawa nangêxma. Rü ñuxma rü namêxwa nangêxmagü i guxüma i Tupanaârü orearü ngeruügü i daxücüãx rü guxüma i ãêxgacügu i daxücüãx.

4

Tanaxwêxe i ngêma cuèx i Tupana tüxna äxümaã nüxü tarüngüxêê i taeneêgü

¹⁻² Rü ngêmacèx name nixî na ípememarexü na ngüxü pingegüxü yexgumarüü ga Cristu na ngüxü yangexü. Erü yixema ngüxü ingexe rü marü nüxü tarüxo i tümaârü pecadu na guxülguma meã Tupana naxwêxexüácüma tamaxüxcèx, rü tama i tümaxüne naxwêxexüácüma na tamaxüxcèx. ³ Üpa ga pemax, rü mucüma ga tauncü penaxüecha i ngêma chixexü i ñuxma i ngêma duüxügü i tama Tupanaxü cuèxgüxü ügüxü. Rü yexguma ga pema rü pecadu pexügüácüma pemaxê, rü penaxü ga pexeneârü ngüchaü, rü pengãxê, rü peta ga nawa pexãüगतanüxü pexügü, rü tacü i nguchièxgüxü poraãcü pixaxcugü, rü tupananetachicünèxãgüxü picuèxüügü i woo Tupana na pexna nachuxuxü i ngêma. ⁴ Rü yema duüxügü ga namaã pexãmücügüxü ga yexguma chixri pemaxêgu, rü ñuxma rü poraãcü nagu narüxînüê na tacücèx tama natanügu pexãgüxü rü tama nawe perüxîxü i ngêxguma norü chixexü naxügügu. Rü ngêmacèx nixî i ñuxma i chixri pechiga yadexagüxü. ⁵ Natürü nümagü rü tá ta Cristupêxewa nangugü na namaã nüxü yagüxüxcèx na ñuxãcü namaxêxü. Rü nüma ya Cristu rü ínamemare na nüxna yacachigüxcèx i guxüma i duüxügü i maxêxü rü yuexü. ⁶ Rü ngêmacèx ya Tupana rü naxüpa na nayuexü i duüxügü rü marü nüxna nanaxuaxü i maxü i taguma gúxü. Erü

nanaxwêxe na naxrûl guxûguma mexûwa namaxêêchaxû ega woo ñoma i naânewa nayuegu i naxûnegû. ⁷ Rû marû ningaica na nagûxû i ñoma i naâne rû guxûma i ñacû i nawa ngêxmaxû. Rû ngêmacêx name nixî na îpexuâêxû rû meâ peâê ta îpexûgûxû rû guxûguma peyumûxêgûxû. ⁸ Rû guxûârû yexera i ngêma pexû chanaxwêxexû nixî na aixcûma pegû pengechaûgûxû i wûxichigû. Erû ngêxguma aixcûma yigû ingechaûgûgu rû ngêmaâcû inayarûxo i muxûma i pecadugû. ⁹ ¶Rû meâ pegû peyaxugû i wûxichigû i pechiûwa! Rû tama name i tûmamaâ penuâêâcûma tûxû peyaxu. ¹⁰ Rû wûxichigû i pemax, rû Tupana pexna nanaxâ i perû cuêx. Rû ngêma perû cuêxmaâ rû name nixî i wûxichigû pegû perûngûxêêgû, na aixcûma Tupanaârû ngûxêêrû i mexû na pixîgûxûcêx rû meâ namaâ pepuracûexûcêx i guxûma i ngêma cuê i Tupana pexna âxû. ¹¹ Rû ngêxguma texé nûxû îuxugu i ore, rû name nixî i aixcûma Tupanaârû orexû tixu. Rû ngêxguma texé togûxû rûngûxêêgu, rû name nixî i Tupana tûxna âxû i poramaâ tanaxû. Rû guxûma i ngêma pexûxû rû name nixî i meâma penaxû na ngêmaâcû Ngechuchu ya Cristugagu Tupanaxû picuêxûgûxûcêx. Erû nûma ya Tupana rû guxûguma namexêchi rû naporaxûchi. Rû ngêmaâcû yîl.

Ngêxguma Cristuaxû yaxôxgu rû ngûxû tinge

¹² Pa Chaueneêgû ya Pexû Changechaûgûxex, ñuxma na taxû i guxchaxûgû i perû nguxêêrû pexcêx ínguxû, ¶rû tâxû i pebaixâchiâêgûxû, ñoma ñacû i taguma nûxû pedaxû ngupetûxûrû! ¹³ Natûrû narûmemaê nixî na petaâêgûamaxû, yerû yema Cristu ngûxû na ingexûrûl nixî i ngûxû na pingegûxû i ñuxmax na petaâêgûxûcêx i ngêxguma wena nûma naxûxgu i nûmax. ¹⁴ Rû ngêxguma Cristuaxû na peyaxôgûxûgagu texé pemaâ guxchigagu, rû wûxi i perû taâê nixî i ngêma. Erû ngêmaâcû nûxû pecuêx na Tupanaâê i Ûunexû rû pewa na nangêxmaxû. ¹⁵ Rû ngêxguma chi ngûxû pingegûgu, rû name nixî na wûxi i mexû na pexûgûxûgagu na yîxû rû tama wûxi i chixexûgagu na yîxû, ngêxgumarûl i máeta rû êxna ngîtêêx rû êxna togûarû guxchaxûwa na pegû pengêxmagûxêêxû. ¹⁶ Natûrû ngêxguma texé Cristuaxû tayaxôxûgagu ngûxû tingexgu, rû taxucêxma tûxcûl ngêmacêx taxâne. Rû name i ngêmacêx Tupanaxû ticuêxûl. ¹⁷ Rû ñuxma rû marû nawa nangu na Tupana ngûxû tûxû ingexêêxû na ngêmaâcû tûxû îyanawêxâchixêêxûcêx i yixema na naxâcûgû îxîgûxû. Rû ngêxguma ngêmaâcû tamaâ inaxûgûâgu, rû ¿ñuxâcû tá nûxû naxûpetû i ngêma duûxûgû i tama Tupanaârû ore i mexûga înuêchaxû? ¹⁸ Erû Tupanaârû ore i ûmatûxûwa rû ñanagûrû:

“Ngêma duûxûgû i mexû ûgûxû rû guxchaâcûma nanayauxgû i maxû i taguma gûxû. Rû ñuxma na ngêmaâcû yîlû, ¿rû ñuxâcû tá nûxû nangupetûxû i ngêma duûxûgû i chixexû ûgûxû rû pecaduâxgûxû?” ñanagûrû. ¹⁹ Rû ngêmacêx ya yixema Tupana naxwêxexûâcûma ngûxû ingegûxe, rû name nixî na mexû taxûgûêchaxû rû Tupana ya tûxû ûcûmêxêgu na tanaxûxû i tûmaâê na nûxna tûxû nadauxûcêx. Erû nûma ya Tupana rû mecû nixî rû taguma texêxû nawomûxêê.

5

Ucuxêgû naxcêx i ngêma yaxôgûxû

¹ Rû ñuxmax, Pa Yaxôgûxûârû Âêxgacûgûx, rû pexna chanaxâxchaû i wûxi i ucuxê i mexû, erû choma rû ta pexrûl yaxôgûxûârû âêxgacû chixî. Rû

chomaxüchima nixi ga nüxü chadauxü ga ñuxäcü ngüxü na yangexü ga Cristu. Rü choma rü tá ta pexrüü choxü nangëxma i chauchica i mexü i ngëxguma wena núma naxüxgu. ² Rü chanaxwëxe i nüxna pedau rü nüxü perüngüxëe i guxüma i Tupanaärü duüxügü i pemëxwa ngëxmagüxü. Rü name i mexü i perü ngüchaümaä Tupana naxwëxexüäcüma penaxü i ngëma puracü, rü tama texë pexü muxguxica penaxü rü ëxna diëracëx penaxü. ³ Rü tama name i namaä penuëäcüma rü penangaäcüma penamu i ngëma duüxügü. Natürü chanaxwëxe i mexü i perü maxü nüxü pewëx na ñuxäcü Tupana naxwëxexü na namaxëxü. ⁴ Rü ngëxguma wena núma naxüxgu ya törü Daurüxüchi ya Cristu, rü pema rü tá penayauxgü i wüxi i perü ämare i ngëxcuerüü i mexëchixü i taguma ngauxü. ⁵ Rü ngëxgumarüü ta i pemax, Pa Ngextüxücügüx, rü name nixi i naga pexinüe i ngëma perü äëxgacügü i Tupanaärü puracüwa puracëxü. Rü guxäma i pema i yaxögüxü, rü name nixi i wüxichigü pegü perüngüxëe rü taguma pegügu perüxüñüe na pemücügüarü yexera pixigüxü. Erü Tupanaärü ore i ümatüxüwa rü ñanagürü:

“Tupana rü tama norü me nixi i ngëma duüxügü i nügü icuëxüxügüxü. Natürü nüxü narüngüxëe rü namaä namecüma i ngëma duüxügü i tama nügü icuëxüxügüxü”,

ñanagürü i ngëma ore. ⁶ Rü ngëmacëx tama name i pegü picuëxüxü. Rü narümemae i Tupanamëxë ya poranetüxüwa pegü pengëxmagüxëe na nüma pexü yacuëxüxügüxücëx i ngëxguma nawa nanguxgu na ngëmaäcü pemaä naxüäxü. ⁷ Rü name nixi i Tupanamëxëgu penaxü i guxüma i perü oegaäëgü, erü nüma ya Tupana rü guxüguma pegu narüxüñü rü aixcüma pexna nadau. ⁸ Rü name nixi i guxüguma pegüna pedaugü rü ipexuäëgü, erü perü uwanü i Chataná rü doma wüxi ya ai ya idüraxüchicürüü nanañaäne rü tümacëx nadau na texëxü tá nachixexëëxü. ⁹ ¡Rü peporaemëx rü peyaxögüamëx i ngëxguma tacü rü chixexü pemaä naxüxchaügu! Erü nüxü pecuëx rü guxüma i taeneëgü i guxüwama ngëxmagüxü rü pexrüü ngëmatama ngüxü ningegü. ¹⁰ Natürü ngëxguma paxaxächi ñoma i naänewa ngüxü pingegüguwena, rü Tupana rü tá pexü nimexëe na aixcüma napëxewa pimexüçëx, rü tá pexü narüngüxëe na taguma nüxü perüxoexüçëx, rü tá pexü naporaexëe na aixcüma perü maxüwa peporaexüçëx. Rü daatama Tupana nixi ya tüxna naxäcü i guxüma i mexü i tüxü ngëxmaxü, rü tüxü deicü na naxütawa tüxü nangëxmaxüçëx i tachica i mexü i taguma güxü, erü Ngechuchu ya Cristuarü duüxügü tixigü. ¹¹ Rü name nixi i guxüguma nüxü ticuëxüügü ya Tupana, erü nüma nixi i guxüärü äëxgacü yixü i guxüguma. Rü ngëmaäcü yii.

Pedru rü yema yaxögüxüxü narümoxë

¹² Taeneë ya Chiribánu ya meä yaxöcümaä petanüwa chanamu i ñaä nuxmarexü i popera na pexü chixucuxëgüxücëx rü pemaä nüxü chixuxüçëx na ngëma pexü nangechaüxügagu yixü ya Tupana i aixcüma pexü nangüxëëxü. Rü ñuxma na ngëmaäcü pexü nangechaüxü, rü name nixi i guxüguma naxçëx pemaxë. ¹³ Rü pexü narümoxëgü i guxüma i taeneëgü i yaxögüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëerüü i Marcu ya chaunerüü ixicü. ¹⁴ Rü chanaxwëxe i wüxichigü i pema rü pegü pengechaügüäcüma pegü perümoxëgü. Rü ngëxgumarüü ta chanaxwëxe na aixcüma petaäëgüxü i guxäma i pema na Ngechuchu ya Cristuarü duüxügü pixigüxü. Rü ngëmaäcü yii.

Rü nüma pexna,
Pedru

NORÜ TAXRE GA POPERA GA PEDRU ÜMATÜXÜ

Pedru nüxü narümoxë ga yema yaxögüxü

¹ Pa Chaueneëgüx, choma i Chimáü i Pedru nixi i pexcëx chanaxümatüxü i ñaã popera. Rü choma rü Ngechuchu ya Cristuarü ngüxëeruü chixi, rü nüma nixi ga choxü namuxü na nüxü chixuxüçëx i norü ore. Rü pexcëx chanaxümatü i pema na toxrüü aixcüma peyaxögüxü, erü törü Tupana rü törü Maxëxëeruü ya Ngechuchu ya Cristu rü aixcüma nimexëchi. ² Rü ñuxma na Tanatü ya Tupanaxü pecuáxü rü törü Cori ya Ngechuchuxü pecuáxü, rü chanaxwëxe i nümagü aixcüma pemaã namecüma rü aixcüma pexü nataãxëë.

Yaxögüxüçümacüchiga

³ Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwëxëxü na aixcüma meã naxcëx imaxëxüçëx. Rü yemaãcü nanaxü ga yexguma tüxü nüxü nacuëxëëgu ga guma törü Cori ya mexëchicü ga norü poramaã tüxü decü. ⁴ Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexüçëx rü nüxna pixigachixüçëx i guxüma i chixexügü i duüxügüaruü ngüchaü i chixexügagu ñoma i naãnewa ngëxmaxü. ⁵ Rü ngëmacëx penaxwëxëgü na pegü peporaexëëxü na yexeracü peyaxögüxü rü meã togüpëxewa pemaxëxü. Rü ñuxuchi name na meãma nüxü pecuáxü na tacü yixü i Tupana pexü naxwëxëxü. ⁶ Rü ngëxgumarüü ta penaxwëxëgü na meã pegümaã ipecuáxü na tama chixexügu peyixüçëx. Rü ñuxuchi name na yaxna pegümaã pexinüëxü. Rü ngëxgumarüü ta name na aixcüma Tupanaxü pengechaügüxü. ⁷ Rü ñuxuchi penaxwëxëgü na pegü pengechaügüxü ya guxãma i pemax. Rü ngëxgumarüü ta name na guxüma i duüxügüxü pengechaügüxü. ⁸ Rü ngëxguma aixcüma ngëma pexü chaxucuxëxüãcüma pemaxëgu, rü täütãma natüçëxma nixi i perü maxü, rü täütãma natüçëxma nixi na nüxü pecuáxü ya törü Cori ya Ngechuchu ya Cristu. ⁹ Natürü yixema tama ngëma pexü chaxucuxëxüãcüma maxüxë, rü ñoma tangexetüxürüü tixi. Rü ñoma wüxi i duüxü i tama nagu rüxünüxü i ngëma yixcüra tá nüxü ngupetüxürüü tixi, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pepadugü. ¹⁰ Rü ngëmacëx, Pa Chaueneëgüx, name nixi na yexeraãcü meã Tupanacëx pemaxëxü na ngëmaãcü ipenawëxüçëx na aixcüma Tupanaãrü duüxügü ya pexcëx naçaxe rü pexü dexe na pixigüxü. Rü ngëxguma ngëmaãcü pemaxëgu rü tagutãma chixexügu peyi rü tagutãma Tupanaxü ipetëx. ¹¹ Rü ngëmaãcü ya Tupana, rü tá meã pexcëx nayawãxna i ñax na tauxchaãcü pichocuxüçëx i ngextã guxügütãma ãëxgacü iyixüwa ya törü Cori ya Ngechuchu ya Cristu ya törü Maxëxëeruü. ¹² Rü ngëmacëx woo marü nüxü na pecuáxü rü nagu na pexixü i ngëma ore i aixcüma ixixü, natürü guxügütãma pexna nüxü chacuëxãchixëëëcha ga yema pexü namaã chaxucuxëxü. ¹³ Erü ñuxma na chamaxüxü i chomax, rü nagu charüxinü na namexü na pexna nüxü chacuëxãchixëëxü i ngëma ore i namaã pexü chixucuxëgüxü, na ngëmaãcü pexü changüxchaüxëëxüçëx na meã Tupanacëx pemaxëxü. ¹⁴ Rü pemaã nüxü chixu i ngëma, erü törü Cori ya Ngechuchu ya Cristu choxü nüxü nacuëxëë na paxa tá chayuxü. ¹⁵ Rü ñoma rü ta na chamaxüxü, rü meã pexü chixucuxëgü na ngëxguma chayuxguwena

rü guxüguma nüxna pecuëxächixüxcèx i ngëma chorü ucuxëgü na ñuxäcü Tupana naxwëxexü na pemaxëxü.

Pedru rü namücügü rü aixcüma Cristuxü nadaugü ga na ñuxäcü namexëchixü

¹⁶ Rü yexguma pexü tangüexëëgu na ñuxäcü naporaxü ya tórü Cori ya Ngechuchu ya Cristu rü ñuxäcü tá wena na nataegoxü, rü tama tomatama togüäewa tayaxuxü i ore nixi. Yerü tomatama toxetümaä nüxü tadau na ñuxäcü namexëchixü i nüma ya tórü Cori. ¹⁷ Rü nüxü tadau ga yexguma Tanatü ya Tupana nüxü icuëxüügu. Rü nüxü taxinüë ga yexguma gumatama Tanatü ya Tupana ya Mexëchicü ñaxgu:

“Daa nixi ya Chaune ya nüxü changechaüxüchicü. Rü choma rü poraäcü namaä chataäëxüchi”,

ñaxgu. ¹⁸ Rü aixcüma tomaxüchima nüxü taxinüë ga yema Tupanaga ga daxüguxü ga naänewa inaxüxü, yerü tomatama rü tórü Corimaä tayexmagü nawa ga guma mëxpüne ga ünene ga yexguma yema ngupetügu. ¹⁹ Rü yemaäcü nüxü tadau na aixcüma yixü ga yema ore ga nuxcümaügüxü ga Tupanaärü orearü uruügü nüxü ixugügüxü. Yerü yema nüxü yaxügüxürüütama nixi ga nüxü tadauxü. Rü name nixi i pema rü ta aixcüma meä nagu perüxinüë i ngëma ore, erü wüxi i omü i íraxetüxü i ëänexüwa ibaxixürüü nixi. Rü ngëma ore rü tá pexü nüxü nacuëxëë i Tupanachiga ñuxmatáta ínangu ya tórü Cori ya Ngechuchu ya Cristu ya yima woramacuri ya ngunetüxü ngócürüü ixicü. Rü ngëxguma ínanguxgu i nüma rü aixcüma tá meä pexü nüxü nacuëxëë i guxüma i nachiga. ²⁰ Natürü chanaxwëxe na guxüärü yexera nüxü pecuáxü i ñaä ore i tá pemaä nüxü chixuxü. Rü dücax, taxüema tüechamatama nüxü tacuëx i tacüchiga na yixü i Tupanaärü ore i ümatüxü, ega Tupanaäë i Ünexü tama tüxü rüngüxëëgu. ²¹ Yerü taxüüma ga Tupanaärü orearü uruü rü nüëchamatama nügüäëwa nanayaxu ga yema ore ga nüxü yaxugügüxü. Natürü yexguma yema orexü yaxugügügu, rü Naäë i Ünexü nixi ga yadexagüxëëxü.

2

Doramaä duüxügüxü ngüxëëxüchiga

¹ Natürü nuxcüma rü nayexma ta ga Tupanaärü orearü uruügüneta ixigüxü ga Yudiügütanüwa. Rü ngëxgumarüü tá ta petanüwa nangëxma i duüxügü i ngüxëëruügüneta ixigüxü. Rü nümagü rü tá doramaä nanaxüchicüü i Tupanaärü ore, rü ngëmaäcü tá pexü nangüxëë i ore i dora ixixü na pexü nawomüxëëgüxüxcèx. Rü nümagü rü täütáma naga naxinüëchaü ya yima tórü Cori ya Ngechuchu ya Cristu ya norü Maxëxëëruüchirëx ixicü. Rü ngëmagagu ya Tupana rü ngürüächü tá nanapoxcue i ngëma duüxügü i ngëmaäcü maxëxü, rü tá inayanaxoxëë. ² Rü nümagü rü tá nüxü nixugü na tama wüxi i chixexü yixü ega woo taxüneärü ngüchaü ixüxgu. Rü muxüma i togü i duüxügü rü tá nawe narüxi i ngëma chixexü i naxügüxüwa. Rü ngëma chixri pexü ngüxëëxügagu rü muxüma i togü i duüxügü rü tá chixri nachiga nidexagü i Tupanaärü ore i mexü i aixcüma ixixü. ³ Rü nümagü i ngëma duüxügü i chixexü rü tá nügüna nananugüchaü i guxüma. Rü ngëmacèx tá pemaä nüxü nixu i ore i chixexü ixixü na ngëmaäcü pexü nawomüxëëgüxüxcèx rü pexü ngixü nayauxgüxüxcèx i perü diëru. Natürü tá napoxcue i ngëma duüxügü, rü täütáma nibuxmü. Erü Tupana rü woetama nuxcü mama nanamexëë i ngëma poxcu. ⁴ Yerü ga Tupana rü tama nüxü

nüxü nangechaü ga norü orearü ngeruüğü ga daxüçüâx ga pecadu ügüxü. Rü yemacëx inaxëânexüwa i ngoxogüxü inapoxcuexüwa nanawogü. Rü cade-namaâ nayanëixgü na ngëma nangëxmagüxüçëx ñuxmatáta nawa nangu i ngëma ngunexü i nagu Tupana nüxna çaxü i guxüma i duüxügü. ⁵ Rü yexgumarüü ta ga Tupana rü tama nüxü nüxü nangechaü ga yema nuxcümaügüxü ga duüxügü ga chixexü ügüxü. Rü yemacëx mucü ga taxüchicü naxcëx yëma nanamu na gumamaâ nadaiäxüçëx ga yema duüxügü ga chixexü ügüxü. Natürü ga Tupana rü Noexü nadau ga na meâma duüxügüxü yaxucüxëgüxü na nüxü naxoexüçëx ga norü chixexügü. Rü yemacëx ga Tupana rü Noexü namaxëë namaâ ga 7 ga natanüxügü. Natürü nanadai ga guxüma ga yema togü ga duüxügü. ⁶ Rü Tupana rü yexgumarüü ta inayanaxoxëë ga guma ïänegü ga Chodoma rü Gomora ga poraäcü chixri duüxügü nawa maxëne. Rü inanagu ga guma ïänegü ñuxmata norü tanimacaxicatama íyaxü. Rü yemaäcü nanaxü na guma ïänegü rü wüxi ga cuëxruü na yixüçëx nüxü ga yema duüxügü ga chixexü ga yemawena maxëxü. ⁷ Natürü ga Chodomawa rü Tupana nanamaxëë ga Lox ga wüxi ga yatü ga mecü ixicü ga poraäcü ngechaücü ga yexguma nüxü nadëuxgu ga ñuxäcü chixri na namaxëxü ga yema duüxügü ga natanüwa nayexmaxü. ⁸ Rü guxü ga ngunexügu rü nüma ga Lox ga meâ maxücü rü poraäcü naäëwa nangux ga yexguma nüxü nadëuxgu rü nüxü naxinügu ga yema chixexügü ga naxügüxü ga yema duüxügü ga natanüwa nayexmaxü. ⁹ Rü yema Loxü na namaxëëxü rü ga Tupana, rü nüxü natauxcha na tüxü inanguxüxëëxü i ngëxguma Chataná tüxna ïnügu ya yixema meâ maxëxë. Rü ngëxgumarüü ta ya yixema chixexü ügüxe, rü nüxü natauxcha na poxcuwa tüxü nangëxmagüxëëxü ñuxmatáta nawa nangu i ngëma ngunexü i nagu guxüma i duüxügüxü yacagüxü. ¹⁰⁻¹¹ Rü Tupana rü aixcüma tá nanapoxcue i ngëma duüxügü i naxüñëarü ngúchaügu íxü i tama naga ïnüëchaüxü ya tóru Cori. Rü ngëma duüxügü rü taxüégama naxinüëchaü, rü nadauxcüxaxüwëxëgü rü nügüguxicatama narüxinüë. Rü tama namuüë na namaâ naguxchigagüxü i ngëma äëxgacügü i daxüçüâx i Tupanatüüwa ngëxmagüxü. Rü ngëmaäcü namaxë i ngëma duüxügü. Natürü woo Tupanaärü orearü ngeruüğü i daxüçüâx i ngëma duüxügüxü rüyexeraxüchichirëxü, rü namuüë na ngëmaäcü namaâ naguxchigagüxü i ngëma äëxgacügü i daxüçüâx i Tupanatüüwa ngëxmagüxü. ¹²⁻¹³ Rü ngëma nguxëëruüguneta, rü ñoma naëxügürüü nixigü, rü naëxügürüü taxuüma nacüëxgü. Rü ngëma naxünegü naxwëxexü nixi i naxügüxü. Rü nabue na ñoma naëxügü i yayauxgüxü rü nadëixü rü yixigüxüçëx. Rü chixri nachiga nidexagü i ngëma tama nüxü nacüëxgüxü. Natürü ngëma chixexü i naxügüxügagu tá inayarütauxe, rü ngëmaäcü ngüxü tá ningegü nagagu i ngëma ngüxü i toguäxü yangexëëgüxü. Rü nümagü rü namaâ nataäëgü i ngëma chixexü i ngunecütama naxügüxü. Rü ngëxguma pemaâ nachibüëgu, rü wüxi i chixexüchixü rü äñëxüchi nixigü erü ngema rü ta nanaxügü i norü chixexügü i namaâ pexü nawomüxëëgüchaüxü. ¹⁴ Rü ngëma duüxügü rü taxuacüma wüxi ya ngeäxü nadaugümare, erü naäëwa rü nagu narüxinüë na nüxü tangüchaüxü. Rü tama nüxü ninguéga na pecadu naxügüëchaxü. Rü naxcëx nadaugü na ñuxäcü chixexügu tüxü nayixëëxü ya yixema duüxëgü ya turæearü maxüäxgüxe. Rü nüxü nicüëxüchi na ñuxäcü tacü nügüna nanugëxü. Natürü Tupana rü marü namaâ nanaxuegu na napoxcueäxü. ¹⁵ Rü ngëma duüxügü rü tama nagu naxi i ngëma Tupana nüxü naxwëxexü, rü ngëmacëx inayarütauxe. Rü nagu naxi ga yema chixexü ga nagu yaxüxü ga

nuxcūmaũxũ ga Tupanaãrũ orearũ uruũ ga Baráũ ga Beú nane ga chixexũ üxũ na yemaãcü diêru ngĩxũ nayaxuxũcèx. ¹⁶ Rũ noxrũtama buru ga woo taguma idexachirèxcũ, rũ wũxi ga duũxũrũũ namaã iyadexa rũ inanga naxcèx ga yema chixexũ ga naxũxchaũxũ. Rũ yemaãcü Baráũ ìyachaxãchixèè na tama naxũãxũcèx ga yema chixexũ ga naxũxchaũxũ. ¹⁷ Rũ ngẽma duũxũgũ rũ taxuwama nime ñoma wũxi i puchu i ngearũ dexáãxũrũũ. Rũ ñoma wũxi i caixanexũ i buanecũ icuexũrũũmare nixĩ na taxuwama yamexũ. Natũrũ Tupana rũ marũ nanamexèè i wũxi i nachica i èãnexũchixũ i ngextá guxũgutáma ìnapoxcũeãxũwa i ngẽma duũxũgũ. ¹⁸ Rũ ngẽmaãcü tá nanapoxcũe i ngẽma duũxũgũ, erũ nügũ yacuèxũũgũãcũma chixri nìdexagũ i ore i taxuwama mexũmaã. Rũ tũxũ nixucũxègũ na tũmaxũnearũ ngũchaũgu na taxĩxũcèx ya yixema marũ ngexwacèx ngẽmaxũ rũxoechirèxe. ¹⁹ Rũ tũmamaã nüxũ nixu rũ ngẽxguma nawe tarũxĩxgu rũ tá tũxũ ìnanguxũxèè na taxuũmèxèwa tangèxmagũxũcèx rũ tũma tanaxwèxexũãcũma tamaxèxũcèx. Natũrũ ngẽma duũxũgũ i ngẽmaãcü chixri idexagũxũ, rũ nümagũtama rũ norũ chixexũtũũwa nangèxmagũ. Erũ guxũma i duũxũgũ, rũ ngẽma nüxũ rüyexeramaèxũtũũwa nügũ nangèxmagũxèè. ²⁰ Rũ guxãma ya yixema marũ tóru Cori ya Ngechuchu ya Cristu ya tóru Maxèxèerũũxũ cuèxgũxe, rũ marũ nawa ìtanguxũ i ñoma i naãneãrũ chixexũgũ. Natũrũ ngẽxguma chi wenaxãrũ naxcèx tawoegugu i ngẽma chixexũ i nawa ìtanguxũchirèxũ, rũ tũmaãrũ me yixĩgu na wena ngẽma chixexũtũũwa tangèxmagũxũ, rũ aixcũma noxriarũ yexera tichixe. ²¹ Erũ ngẽxguma chi nüxũ tacuèxgũguwena nüxũ tarũxoeгу i ngẽma ore i mexũ ga noxri tayauxgũxũ, rũ narũmemaè chi nixĩ ga noxtacũma tãũ chima nüxũ na tacuèxgũxũ i ngẽma maxũ i aixcũma mexũ. ²² Tupanaãrũ ore i ùmatũxũwa rũ ñanagũrũ:

“Ngẽma airu i nügũ oxgũxũ, rũ wenaxãrũ naxcèx nataegu i norũ oxũ na yaweaxũcèx. Rũ ngẽma cuchi i norũ yora meãma aiyachirèxũ, rũ ngèxgumatama wenaxãrũ norũ aiyanecèx nataegu”, ñanagũrũ i ngẽma orewa. Rũ ngèxgumarũ nixĩ i ngẽma duũxũgũ i marũ Tupanaãrũ orexũ cuèxgũchirèxũ rũ ñuxũchi wenaxãrũ naxcèx woeguxũ i norũ chixexũgũ ga noxri nawa ìnanguxũchirèxũ.

3

Tóru Coriarũ taeguchiga

¹ Pa Chaueneègũ ya Pexũ Changechaũgũxex, ñaã nixĩ i ngẽma norũ taxre i popera i pexcèx chaxũmatũxũ. Rũ yema nüxĩraũxũ ga poperawa pemaã nüxũ chixuxũrũũ, rũ wena pexũ chixucũxègũ rũ pexna nüxũ chacuèxãchixèè na aixcũma meã Tupanaãrũ oregu perũxĩnũèxũcèx. ² Rũ chanaxwèxe i nüxna pecuèxãchie i ngẽma ore ga nuxcūmaũgũxũ ga Tupanaãrũ orearũ uruũgũ ga ixũũnèxũ nüxũ ixugũgũxũ. Rũ ngèxgumarũ ta chanaxwèxe i nüxna pecuèxãchie i ngẽma tóru Cori ya Ngechuchu ya tóru Maxèxèerũũãrũ mugũ ga pexũ nangũxèèxũ ga norũ orearũ uruũgũ ga nüma pexũtawa namugũxũ. ³⁻⁴ Natũrũ chanaxwèxe i guxũãrũ yexera nagu perũxĩnũè i ñaã ore i pemaã tá nüxũ chixuxũ. Rũ dũcax, rũ ngèxguma nagũxchaũgu i ñoma i naãne, rũ tá ìnangugũ i duũxũgũ i chixexũ i nagu ìxũ i naxũneãrũ ngũchaũgũ. Rũ nümagũ rũ tá nacugũèacũma ñanagũrũgũ:

“Dũcèx, Cristu inaxuneta na wena núma naxũegaxũ. ¿Rũ ñacũ namaã nangupetũ i ñuxma na tama ìnanguxũ? Rũ marũ dũxwa nayue ga tóru oxigũ ga yaxògũxũ, natũrũ noxri naãne ùxgumama rũ nanangèxgumarũèchatama

i guxūma”, ñanagürügü tá. ⁵⁻⁶ Natürü ngēma duūxūgü i ngēmaācü idexagūxū rü tama nüxū nacuèxgüchaū ga yema ngupetūxū ga yexguma Tupana ñoma ga nañewa namuāgu ga guma mucū ga tacū ga iyanaxoxēēcü ga guxūma ga tacū ga ñoma ga nañewa yexmaxū. Rü nuxcūmaxūchima naxūpa ga guma mucū rü woetama nayexma ga ñoma ga nañe rü guxūma i daxūwa nüxū idauxū ga Tupana ngoxēēxū ga yexguma namuāgu na nangóxūcēx. Rü yemaācü dexāchiūwa nangox ga ñoma ga nañe rü dexáarū ngāxūtūchiūwa nayexma, yerü yemaācü nanamu ga Tupana. ⁷ Natürü ngēma ñuxma ngēxmaxū i daxūwa nüxū idauxū rü ñoma i nañe rü Tupana namaā nanguxū na yixcama üxūwa yaxaxūcēx, yerü yemaācü namaā nanaxuegu. Rü ngēma ñoma i nañe rü ngēma daxūwa nüxū idauxū, rü yima üxū ya Tupana nüxū ixuxūnewa tá nixi i aixcūma ínaguāxū i ngēma ngunexū i nagu naxunetaxūgu na napoxcueāxū rü chixexūwa nawogūāxū i ngēma duūxūgü i tama naga íñüēchaūxū. ⁸ Rü ñuxmax, Pa Chaueneēgü ya Pexū Changechaūgūxex, tama chanaxwēxe i nüxū ipeyarüngūmaē na wūxitama i ngunexū rü tórü Coricēx rü 1000 ya taunecürū yīxū. Rü ngēxgumarū ta, 1000 ya taunecū rü tórü Coricēx rü wūxitama i ngunexürū yīxū. ⁹ Rü ñuxre i duūxūgü rü nagu narūxñüē na tāūtama paxa ínanguxū ya tórü Cori yema tamaā inaxunetaxürū. Natürü nüma ya tórü Cori rü tama nanuxcüāē na yanguxēēāxū i ngēma norū uneta, natürü nüma rü tamaā yaxna naxñūmare. Erü nüma rü tama nanaxwēxe na texé iyarütaxuxū, natürü nanaxwēxe na guxāma nüxū rüxoexū i tūmacūma i chixexū. ¹⁰ Natürü ngēma ngunexū i tórü Cori nagu ínguxū, rü taxūema nagu ínanguxēēxūgu tá nixi. Erü ngürūāchimare tá ínangu ñoma wūxi i ngítēxáxū ínguxürū. Rü ñuxūchi guxūma i tacū i daxūguxū i nañewa ngēxmagūxū rü tá tagaācü niwāíxgü rü ngēmaācü tá inayarūtauxe. Rü yima üēxcū rü tauemacū rü woramacurígü rü ētagū rü tá nixae rü ngēxma tá nayarūxogū. Rü ngēxgumarū tá ta i ñoma i nañe rü tá nixa namaā i guxūma i tacū i nawa ngēxmagūxū. ¹¹ Rü ñuxma na ngēmaācü tá namaā nangupetūxū i guxūma i tacū i ngēxmaxū, rü yexeraācü penaxwēxe na aixcūma Tupanapēxewa pixūñexū rü nüma nanaxwēxexūlācūma na pemaxēxū. ¹² Rü name nixi i meā ípenanguxēē i ngēma ngunexū i nagu tá ínanguxū ya tórü Cori ya Tupana. ¡Rü paxa guxūwama nüxū pixu i norū ore rü aixcūma naxcēx pemaxē na ngēmaācü ípenanguxēēxūcēx! Rü ngēma ngunexūgu rü guxūma i daxūwa nüxū idauxū rü tá nixa rü tá inachaxichigü. Rü ñoma i nañe rü üēxcū rü tauemacū rü ētagū rü yima üxūmaā tá inachaxichigü. ¹³ Natürü yixema na yaxōgūxū rü ítananguxēē i ngēma ngexwacaxūxū i daxūguxū i nañe rü ngexwacaxūxū i ñoma i nañe ga Tupana tamaā ixunetaxū. Rü ngema rü guxūtáma name, rü yixema rü tá ta aixcūma time. ¹⁴ Rü ngēmacēx, Pa Chaueneēgü ya Pexū Changechaūgūxex, rü ñuxma na ípenanguxēēxū i ngēma, rü name nixi i aixcūma meā pemaxē rü aixcūma pegü pengechaūgü na taxuwama nachixexūcēx i perū maxū rü aixcūma petaāēgūxūcēx i ngēxguma wena nüma naxūxgu. ¹⁵ Rü name nixi i nüxna pecuēxāchie na yaxna tamaā naxñūxū ya tórü Cori, erü nanaxwēxe na tūxū nangēxmaxū i tórü maxū i taguma gūxū. Rü ngēmatama pexcēx chanaxūmatūxürū ta nixi ga pexcēx naxūmatūāxū ga taeneē ya nüxū ingechaūgücü ya Pauru ga yexguma Tupana naporaxēēācūma pexcēx naxūmatūāgu. ¹⁶ Rü guxūma ga norū poperawa rü ñāā pexcēx chaxūmatūxūchiga nanaxūmatū ga Pauru. Natürü yema pexcēx naxūmatūxūwa rü nangēxma i ñuxre i ore i guxchaxū na nüxū icuāxū na tacūchiga yīxū. Rü ngēma duūxūgü i tama aixcūma Tupanaxū cuēgūxū

rü tama aixcûma yaxõgûxû, rü nanaxüchicüügü i ngẽma ore ngẽxgumarûü na guxûma i Tupanaârü ore i ümatûxû naxüchicüügûxûrûü. Natürü ngẽma chixexû na naxügûxûgagu rü nügü tátama inayarütauxexêê. ¹⁷ Rü ngẽmacèx, Pa Chaueneëgü ya Pexû Changechaügûxex, rü ñuxma na nüxû pecuáxû i tacü tá na ngupetûxû, rü name nixî i pexuãëgü na tama pexû nawomûxêëgûxücèx i ngẽma chixexû i duûxûgü rü tama nüxû perüxoexücèx na meã peyaxõgûxû. ¹⁸ Rü ngẽmacèx, Pa Chaueneëgûx, penaxwèxe na pegü peporaexêêxû na wüxichigü i ngunexû yexeraãcü tórü Cori ya Ngechuchu ya Cristu ya tórü Maxêêëruûxû pecuáxücèx rü yexeraãcü nüxû picuáetanûxücèx na ñuxãcü aixcûma pexû nangechaûxû. ¡Rü ngẽmacèx rü guxûgutâma rü ngîxâ nüxû ticuèüügü! Rü ngẽmaãcü yî.

Rü nuãma pexna,
Pedru

NÜXĨRA ÜXÜ GA POPERA GA CUÁŮ ÜMATÜXÜ

Ore i tüxü maxêxüchiga

¹ Pexcêx tanaxümatü nachiga ya Tupana Nane ya Cristu ya yima woetama marü nüxra yexmacü ga yexguma noxritama tauta naâne üxgu. Rü nüma rü Ore i Maxêxêruü nixi i naega erü nüma nixi i tamaã nüxü yaxuxü i Tupanachiga rü tüxü namaxêxêxü. Rü toma ga norü ngüexügü na tixügüxü, rü nüxü taxĩnüê rü toxetümaã nüxü tadaugü rü tomêxmaã nüxü tingögügü. ² Rü yima Maxêxêruü ya Cristu rü toxü nügü nawêx. Rü nüxü tadaugü rü duüxügümaã nüxü tixu na ñuxäcü yĩxü. Rü ñuxma rü pemaã rü ta nüxü tüxüchiga ya yima Cristu ya tüxna naxäcü i maxü i taguma güxü. Rü noxri rü Nanatüxtawa nayexma, natürü ñoma ga naãnewa nangu rü toxcêx nangox. ³ Rü yema toma nüxü tadaugüxü rü nüxü taxĩnüêxü rü pemaã nüxü tixu na tomücügü pixügüxücêx, ngêxgumarüü i toma na Tanatü ya Tupana rü Nane ya Ngechuchu ya Cristumücügü tixügüxü. ⁴ Rü ngêmacêx pexcêx tanaxümatü i ñaã ore na wüxigu aixcümäxüchi itaãêgüxücêx.

Ñoma ngóonexürüü name ya Tupana

⁵ Rü ñaã nixi ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa rü nataxuma i chixexü i ñoma êänexürüü ixixü, rü bai i íraxü. ⁶ Rü ngêxguma chi:

“Tanatü ya Tupanamücügü tixügü”, ñagügu, natürü chixri imaxêgu, rü tidoraemare erü tama aixcüma meã tamaxê. ⁷ Rü ngêxguma chi Tupanarüü ngóonexüwa imaxêgu, rü yigümücügü tixügü i yixema, rü Tupana Nane ya Ngechuchu rü nagümaã tüxü inayanatauxêê i guxüma i tórü chixexü. ⁸ Ngêxguma chi nüxü ixuxgu rü:

“Changearü pecaduãx”, ñagügu, rü yigütama tawomüxêê, rü tidoraemare. ⁹ Natürü ngêxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxêê i guxüma i tórü chixexü, erü nüma rü mecü nixi rü taguma tüxü nawomüxêê. ¹⁰ Natürü ngêxguma chi:

“Tangearü pecaduãxgü”, ñagügu, rü doratêêx nüxü tawogü ya Tupana rü tama aixcüma tawa nangêxma i norü ore.

2

Cristu rü tórü chogüruü nixi

¹ Pa Chauxacügüx, pexcêx chanaxümatü i ñaã ore na tama chixexü pexügüxücêx. Natürü ngêxguma chi wüxie chixexü üxgu, rü nangêxma ya tümaêtüwa chogücü nüxna ya Tanatü ya Tupana na tama tüxü napoxcuxücêx. Rü yima nixi ya Ngechuchu ya Cristu ya aixcüma mecü ixicü. ² Rü guma Ngechuchu ya Cristu rü nügü inaxä rü nayu na naxütanüãxücêx ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngêxguma chi naga ixĩnüêgu i ngêma tüxü namuxü ya Tupana, rü nüxü tacuêx na aixcüma nüxü icuáxü. ⁴ Rü ngêxguma chi wüxie:

“Choma rü Tupanaxü chacuêx”, ñagügu, natürü tama naga taxĩnügu i ngêma tüxü namuxü ya Tupana, rü wüxi i doratêxäxü tixi. ⁵ Natürü yixema

naga ĩnũxẽ i ngẽma tũxũ namuxũ ya Tupana, rũ aixcũmaxũchi Tupanaxũ tangechaũ. Rũ ngẽmawa nũxũ tacuẽxgũ na aixcũma Tupanaãrũ duũxũgũ ixĩgũxũ. ⁶ Rũ yĩxema:

“Tupanaãrũ duũxũ chixĩ”, ñagũxe, rũ name nixĩ na meã tamaxũxũ yema Ngechucha ya Cristu meã maxũxũrũ.

Tupanaãrũ mu i ngexwacaxũxũchiga

⁷ Pa Chaueneẽgũx, tama wũxi i ngexwacaxũxũ i Tupanaãrũ mu nixĩ i pexcẽx chaxũmatũxũ. Natũrũ ñaãtama noxriarũ ũgũgumama pexũ yexmaxũ ga mu nixĩ. Rũ ñaãtama nixĩ i Tupanaãrũ mu ga nuxcũmaũxũ ga marũ nũxũ pexĩnũẽxũ. ⁸ Natũrũ ñaã Tupanaãrũ mu i pexcẽx chaxũmatũxũ rũ guxũguma nangexwacaxũ. Rũ ngẽxguma naga pexĩnũẽgu i ñaã Tupanaãrũ mu na pegũ pengechaũgũxũ, rũ tama eãnexũwatama pemaxẽ, natũrũ Cristurũ ngẽma ngõonexũ i aixcũma ixĩxũwa pengẽxmagũ. ⁹ Rũ ngẽxguma chi wũxie:

“Choma rũ ngẽma ngõonexũwa changẽxma”, ñagũgu, natũrũ tũmaẽneẽchi taxaixgu, rũ eãnexũwatama tangẽxma. ¹⁰ Yĩxema tũmaẽneẽxũ ngechaũxẽ rũ ngõonexũwa tamaxũ, rũ taxucẽxma tũxcũũ pecadu taxũ. ¹¹ Natũrũ yĩxema tũmaẽneẽchi aixe, rũ eãnexũwatama tamaxũ, rũ eãnexũgu tixũ. Rũ tama nũxũ tacuẽx na ngextã taxũxũ, erũ tũmacẽx naxẽãne. ¹² Pa Chauxacũgũx, pexcẽx chanaxũmatũ erũ Cristugagu Tupana marũ pexũ nũxũ nangechaũ i perũ pecadugũ. ¹³ Pa Papãgũx, pexcẽx chanaxũmatũ i ñaã ore erũ nũxũ pecuẽxgũ ya Tanatũ ya Tupana ga noxriarũ ũgũgumama yexmacũ. Pa Ngextũxũcũgũx, pexcẽx chanaxũmatũ erũ marũ nũxũ perũyexera i ngẽma ngoxo i Chataná i chixexũãrũ ũrũ. ¹⁴ Pa Buxũgũx, pexcẽx chanaxũmatũ erũ marũ nũxũ pecuẽxgũ ya Tanatũ ya Tupana. Pa Papãgũx, pexcẽx chanaxũmatũ erũ marũ nũxũ pecuẽxgũ ya Tanatũ ya Tupana ga noxriarũ ũgũgumama yexmacũ. Pa Ngextũxũcũgũx, pexcẽx chanaxũmatũ erũ peporae, rũ guxũguma peãẽwa nangẽxma i Tupanaãrũ ore, rũ marũ nũxũ perũyexera i ngẽma ngoxo i Chataná i chixexũãrũ ũrũ. ¹⁵ ;Tãxũ i pexũ nangũchaũxũ i ñoma i naãne rũ norũ ngẽmaxũgũ! Ngẽxguma chi texẽaxũ nangũchaũgu i ñoma i naãne rũ tama Tanatũ ya Tupanaxũ tangechaũ. ¹⁶ Erũ guxũma i ngũchaũgũ i ñoma i naãnewa ngẽxmaxũ rũ ñoma i naãneãrũtama nixĩ rũ tama Tupanaãrũ nixĩ. Rũ ngẽma ngũchaũgũ rũ ngẽma nixĩ i taxũneãrũ ngũchaũgũ, rũ taxetũarũ ngũchaũgũ, rũ yigũ na icuẽxũgũxũ tórũ ngẽmaxũgũmaã. ¹⁷ Natũrũ ñoma i naãne rũ guxũma i ngũchaũgũ i nawa ngẽxmaxũ rũ tá nagux. Natũrũ yĩxema Tupanaga ĩnũxẽ rũ guxũgutãma tamaxũ.

Ore i aixcũma ixĩxũchiga rũ ore i dora ixĩxũchiga

¹⁸ Pa Chauxacũgũx, paxa tá nagux i ñoma i naãne. Pema rũ marũ nũxũ pexĩnũchiga rũ tá ĩnangu i wũxi i Cristuarũ uwanũ, natũrũ marũ ĩnangugũ i muxũma. Rũ ngẽmawa nũxũ tacuẽx na marũ nagũxchaũxũ i ñoma i naãne. ¹⁹ Rũ ngẽma Cristuarũ uwanũgũ rũ tatanũwatama nangẽxmagũchirẽx, natũrũ tama aixcũma tatanũxũ nixĩgũ, erũ ngẽxguma chi tatanũxũ yixĩgũgu rũ tatanũgu chitama narũcho. Natũrũ marũ tatanũwa ĩnachoũ na meãma nũxũ icuãxũcẽx na tama aixcũma tatanũxũ yixĩgũxũ. ²⁰ Natũrũ pema rũ Cristu marũ pexna nanamu i Naã i Ũnẽxũ, rũ ngẽmacẽx meãma nũxũ pecuẽx i Tupanaãrũ ore. ²¹ Rũ ñuxma rũ tama nixĩ na tama nũxũ pecuãxũcẽx na pexcẽx chaxũmatũxũ. Natũrũ pexcẽx chanaxũmatũ erũ marũ meãma nũxũ pecuẽx i ngẽma ore i aixcũma ixĩxũ. Rũ nũxũ pecuẽx rũ ngẽma ore i aixcũma ixĩxũwa rũ nataxuma i dora. ²² ;Texẽ tĩxũ ya yĩxema idoratẽxãxe? Yĩxema:

“Ngechuchu rü tama aixcüma Cristu ya Tupana Nane nixí”, ñagüxe, tixí ya idoratèxáxe. Yíxema tixí ya Cristuarü uwanü, erü tama nüxü tacuáxchaü ya Tanatü ya Tupana rü Nane ya Ngechuchu. ²³ Guxâma ya yíxema tama nüxü cuáxchaüxé ya Tupana Nane ya Ngechuchu, rü tama nüxü tacuáxchaü ta ya Tanatü ya Tupana. Natürü yíxema Ngechuchuauxü yaxóxé, rü Tanatü ya Tupanaâxü rü ta tayaxó. ²⁴ Rü ngêmacèx name nixí i peyaxögüama i ngêma ore ga noxri nüxü pexínüèxü. Rü ngêxguma peyaxögüamagu i ngêma ore ga noxri nüxü pexínüèxü, rü aixcüma norü duüxügü pixígü ya Tanatü ya Tupana rü Nane ya Ngechuchu. ²⁵ Rü nûmatama ya Ngechuchu ya Cristu nixí i tamaâ inaxunetaxü na tûxna naxââxücèx i maxü i taguma gúxü. ²⁶ Nangêxma i duüxügü i chixexüwa pexü gagüchaüxü. Rü ngêmachiga nixí i pexcèx chanaxümatüxü i ñaâ ore. ²⁷ Natürü pema rü marü Cristu pexna nanamu i Naâe i Üünexü, rü guxüguma pewa nangêxma. Rü ngêmacèx tama penaxwèxe i to i perü ngüxèèxü erü nûmatama i Naâe i Üünexü rü pexü nangüxèèe i guxüma. Rü norü nguxèèetae rü aixcüma nixí rü tama dora nixí. Rü ngêmacèx name nixí na guxüguma Cristuaxü peyaxögüxü, ngêma Naâe i Üünexü pexü ngüxèèxüâcüma. ²⁸ Rü ñuxmax, Pa Chauzacügüx, rü name nixí na meâma Cristuaxü peyaxögüxü na tama nüxü imuüèxücèx, rü tama ixâneèxücèx napèxewa i ngêxguma wena nuâ naxüxgu. ²⁹ Pema nüxü pecuèx na Cristu rü aixcüma mecü yíixü. Rü ngêxgumarüü ta name nixí na nüxü pecuáxü na guxüma i duüxügü i mexü ügüxü rü Tupanaxâcügu na yixígüxü.

3

Tupanaxâcügüchiga

¹ ¡Dücèx, Pa Chaueneègüx, ñuxâcü poraâcü tüxü nangechaü ya Tanatü ya Tupana! Rü ngêmacèx nixí i naxâcügümaâ tüxü naxuxü i nûmax. Rü aixcüma naxâcügü tixígü. Rü ngêmacèx ñoma i naâneçüâx i duüxügü rü tama tüxü nacuáxchaü erü Tupanaxü rü ta tama nacuáxchaügü. ² Pa Chaueneègü ya Pexü Changechaügüxe, ñuxma rü marü Tupanaxâcügü tixígü woo tama tüxü nüxü nacuèxèe na ñuxâcü tá ixígüxü i yíxcüra. Natürü nüxü tacuèxgü na Ngechuchurüü tá ixígüxü i ngêxguma nangoxgu, erü tá nüxü tadaugü na ñuxâcü yíixü i nûmax. ³ Rü guxâma ya yíxema yaxóxé na Ngechuchurüü tá tiixü, rü tügüna tadau na Ngechuchu ya Cristurüü aixcüma Tupanapèxewa tamexü. ⁴ Natürü guxâma ya yíxema pecadu üxe, rü Tupanamaâ chixexü taxü. Erü ngêxguma tama Tupanaga taxínügu, rü tapecaduâx. ⁵ Pema nüxü pecuèx rü Ngechuchu ya Cristu rü ñoma ga naânewa naxü na iyanaxoxèèâxücèx i tóru pecadugü. Rü nûma rü taguma pecadu naxü. ⁶ Rü ngêmacèx guxâma ya yíxema aixcüma nüxü yaxögüxe, rü tama pecadu taxügüecha. Natürü guxâma ya yíxema pecadu üechaxe, rü ngêmaâcü tamaxé erü taguma Cristuxü tadau, rü taguma nüxü tacuèx. ⁷ Pa Chauzacügüx, ¡tâxü i naga pexínüèxü i ngêma duüxügü i pexü iyarütauxexèèchaüxü! Yíxema mexü üxe rü aixcüma mecü tixí, ngêxgumarüü ya Cristu na aixcüma mecü yíixürrüü. ⁸ Natürü yíxema pecadu üechaxe rü ngêmawa tüxü tacuèx na Chatanáârü duüxü tiixü, erü nûma i Chataná rü noxriarü ügügumama pecadu naxüecha. Rü yemacèx ga Tupana Nane rü ñoma ga naânewa naxü na iyanaxoxèèâxücèx ga yema Chataná üxü. ⁹ Rü yíxema Tupanaxâcü ixíxé rü tama pecadu taxüecha, erü naxâcüxüchi tixí. Rü taxuacüma pecadu taxüecha erü Tupana nixí ya tûmanatü. ¹⁰ Yíxema

chixexũ úxe rü tũmaẽneẽchi aixe, rü tama Tupanaxãcü tixĩ. Rũ ngẽmawa nüxũ tacuèx na texè tixĩgũxũ ya Tupanaxãcügũ rü texè tixĩgũxũ ya Chatanáãcügũ.

Name nixĩ na yigũ ingechaũgũxũ

¹¹ Rũ yexguma noxritama pexũ tangúexẽẽgu, rü pemaã nüxũ tixu na guxãma yigũ ingechaxũgũxũ. ¹² Rũ tama tanaxwèxe na Caĩrũ nõgoxo i Chatanáãcü ixĩgũxũ. Yerũ nüma rü naẽneèxũ nimèx. ¿Rũ ñacucèx nixĩ ga yamaãxũ? Nayamèx yerũ yema nüma naxũxũ rü tama name, rü yema naẽneè ùxũ rü name. ¹³ Pa Chaueneègũx, ñtãxũ i pebaixãchiãẽgũxũ ega pexchi naxaiegu i ñoma i naãnecũãx i duũxũgũ! ¹⁴ Yixema rü marũ nüxna ñtangũxũ i ngẽma yu rü ñuxma rü marũ maxũwama tangẽxmagũ. Nüxũ tacuèxgũ i ngẽma erũ nüxũ tangechaũgũ i taeneègũ. Yixema tama tũmaẽneèxũ ngechaũxè rü yuwatama tangẽxma. ¹⁵ Rũ yixema tũmaẽneèchi aixe rü wũxi i máetaxũrũ tixĩ. Rũ pema nüxũ pecuèxgũ i wũxi i máetaxũ rü nüxũ nataxuma i norũ maxũ i taguma gũxũ. ¹⁶ Rũ Ngechuchu ya Cristu rü tórũ pecaducèx nayu, rü yemaãcü tũxũ nüxũ nadauxèè i ngẽma ngechaũ i aixcũma ixĩxũ. Rũ ngẽxgumarũ ta i yixema, rü tanaxwèxe na ñimemarexũ na nüxũ rüngũxèèxũ i taeneègũ woo ngemagu iyuxgu. ¹⁷ Natürũ ngẽxguma chi wũxi i yatũãxũ nangẽxmagu i muxũma i norũ ngẽmaxũgũ, rü chi nüxũ nadèuxgu i namücü na nüxũ nataxuxũ, rü taxuacũma:

“Choma rü Tupanaxũ changechaũ”, ñnagürũ, ega tama nüxũ nangũxèègu i namücü. ¹⁸ Pa Chauacũgũx, tama name i taèxmaã rü tórũ oremaãxcatama nüxũ tangechaũ i taeneè. Natürũ tanaxwèxe i tórũ maxũmaã rü tórũ ü i mexũmaã nüxũ tangechaũ.

Tama taxãneè na Tupanana ingaicamagũxũ

¹⁹⁻²⁰ Rũ ngẽxguma aixcũma yigũ ingechaũgũgũ, rü nüxũ tacuèx na aixcũma naga ixĩnũèxũ i ngẽma ore i aixcũma ixĩxũ, rü Tupanapèxewa rü aixcũma naxãcügũ ixĩgũxũ, woo ngẽxguma taãèwa nagu rüxĩnũgũ:

“Tama Tupanaxãcü chixĩ”, ñagũgu. Erũ nüxũ tacuèx rü Tupana nixĩ i taãèãrũ yexera, rü nüma nüxũ nacuèx i guxũma. ²¹ Pa Chaueneègũ ya Pexũ Changechaũgũxex, ngẽxguma taãèwa nüxũ icuèxgu na Tupanaxãcüxũchi ixĩgũxũ, rü tama taxãneè na nüxna ingaicamagũxũ ya Tanatũ ya Tupana. ²² Rũ nüma tá tũxna nanaxã i guxũma i ñacu i naxcèx ñicaxũ erũ naga taxĩnũè i ngẽma tũxũ namuxũ rü tanaxũ i ngẽma nüma namaã nataãèxũ. ²³ Rũ nüma tũxũ namu na Nane ya Ngechuchu ya Cristuaxũ yaxõgũxũ rü yigũ ingechaũgũxũ, yema nüma tũxũ namuxũãcü. ²⁴ Rũ yixema naga ñnũèxè i ngẽma Tupana tũxũ muxũ, rü aixcũma Tupanaãrũ duũxũgũ tixĩgũ rü nüma ya Tupana rü aixcũma tũmawa namaxũ. Rũ ñuxma rü nüxũ tacuèx na aixcũma Tupanaãrũ duũxũgũ ixĩgũxũ rü tawa namaxũxũ, erũ Naãè i Üünexũ ga tũxna namuxũ tũxũ nüxũ nacuèxèè.

4

Yixema tũxũ nangẽxmaxè i Tupanaãè i Üünexũ rü yixema tũxũ nangẽxmaxè i Cristuarũ uwanũãè

¹ Pa Chaueneègũ ya Pexũ Changechaũgũxex, ñtãxũ i nüxũ peyaxõgũxũ i guxũma i orearũ uruũgũ i nügũ ixugũgũxũ na aixcũma Tupanaãrũ orearũ uruũgũ yixĩgũxũ! Natürũ name nixĩ i penangugũ i norũ ore na nüxũ pecuãxũcèx ngoxita aixcũma Tupanaãè yĩxũ i nawa idexaxũ rü èxna tama. Erũ ñoma i naãnewa rü guxũwama nangẽxma i muxũma i idoratèèxgũxũ i nügũ ixugũxũ na Tupanaãrũ orearũ uruũgũ yixĩgũxũ. ² Rũ tá pemaã nüxũ

chixu na ñuxácü tá nüxü pecuáxü na texé tíxü ya yíxema aixcüma Tupanaãê tûmawa ngêxmaxê. Rú dúcax, guxüma i orearü uruügü i nüxü ixugüxü na Tupana duüxüxü yaxixêêxü ya Ngechuchu ya Cristu, rü ngêma nixí i aixcüma Tupanaãê nawa idexaxü. ³ Natürü guxüma i ngêma orearü uruügü i tama nüxü ixugüxü na Tupana duüxüxü yaxixêêxü ga Ngechuchu, rü ngêma rü tama nüxü nangêxma i Tupanaãê i Üünexü. Natürü Cristuarü uwanüãê nixí i nawa ngêxmaxü. Marü nüxü pexínüê na íngunguxcháüxü i Cristuarü uwanü, natürü ñuxma rü marü ñoma i naãnewa nangêxma. ⁴ Pa Chauxacügüx, pema rü Tupanaxácügü pixígü. Rú marü nüxü perüyexera i ngêma tama aixcüma Tupanaärü orearü uruügü ixígüxü. Erü ngêma Tupanaãê i Üünexü i peãêwa ngêxmaxü rü nüxü narüyexera i ngêma Cristuarü uwanüãê i ñoma i naãneçüãxgüwa ngêxmaxü. ⁵ Rú nüma i Cristuarü uwanüärü duüxügü rü ñoma i naãneçüãxgü nixí. Rú ngêmacêx ñoma i naãneçigagu nidexagü. Rú ñoma i naãneçüãx i duüxügü rü nüxü inarüxínüê. ⁶ Natürü i yixema rü Tupanaxácügü tixígü. Rú yíxema Tupanaxü cuáxe rü tüxü itarüxínü. Natürü yíxema tama Tupanaxü cuáxe rü tama tüxü itarüxínü. Rú ngêmwawa nüxü tacuêxgü na texé tixígüxü ya aixcüma Tupanaärü duüxügü ixígüxe rü texé tixígüxü ya Cristuarü uwanüärü duüxügü ixígüxe.

Tupana tüxü nangechail

⁷ Pa Chaueneêgü ya Pexü Changechaügüxex, name nixí na yigü ingechaügüxü, erü Tupana nixí ya tüxü ngüxêêcü na yigü ingechaügüxü. Rú guxâma ya yíxema tûmaêneêxü ngechaüxê rü Tupanaxácü tixígü rü Tupanaxü tacuêx. ⁸ Yíxema tama tûmaêneêxü ngechaüxê rü tama Tupanaxü tacuêx, erü Tupana nixí ya tüxü ngüxêêcü na yigü ingechaügüxü. ⁹ Tupana rü ñoma ga naãnewa nanamu ga Nane ya nügümaa wüxicacü na yimagagu tüxü nangêxmaxüçêx i maxü i taguma güxü. Rú yemawa Tupana tüxü nüxü nadauxêê na ñuxácü tüxü nangechaüxü. ¹⁰ Rú woo Tupanaxü tangechaügü, natürü ngêma ngechail i guxüärü yexera ixíxü nixí na nüma tüxü nangechaüxü rü ñoma ga naãnewa na namuáxü ga Nane na taxcêx nayuxüçêx rü naxütanüáxüçêx ga tóru pepadugü. ¹¹ Pa Chaueneêgü ya Pexü Changechaügüxex, yexguma yemaácü tüxü nangechaügü ga Tupana, rü ngêmacêx name nixí i yixema rü ta yigü tangechaügü. ¹² Taguma texé Tupanaxü tadau. Natürü ngêxguma aixcüma yigü ingechaügügu, rü Tupana rü tawa namaxü rü norü ngechail rü aixcümaxüchi tóru maxüwa nangox. ¹³ Rú nüma rü marü tüxna nanamu ga Naãê i Üünexü. Rú ngêmwawa nüxü tacuêx na aixcüma norü duüxügü ixígüxü rü nüma rü tawa na namaxüxü. ¹⁴ Rú tomatama nüxü tadaugü rü nüxü tixuchigagü na Tanatü ya Tupana núma namuxü ga Nane na guxüma i duüxügüxü namaxêêêxüçêx. ¹⁵ Rú yíxema yaxóxê rü nüxü ixuchigaxe na Tupana Nane yíxü ya Ngechuchu, rü aixcüma Tupanaärü duüxü tixí, rü Tupana rü tûmawa namaxü. ¹⁶ Rú yixema nüxü tacuêxgü rü tayaxögü na Tupana rü poraácü tüxü nangechaüxü, erü nüma nixí i aixcüma guxâxü nangechaüxü. Rú yíxema aixcüma tûmaêneêxü ngechaüxê, rü Tupanaärü duüxü tixí, rü nüma ya Tupana rü aixcüma tûmawa namaxü. ¹⁷ Rú ngêxguma aixcüma Tupanaxü ingechaügügu, rü tóru maxüwa nangox i ngêma, rü täütáma nüxü tamuüê i ngêma ngunexü i nagu tüxü yacagüxügu naxcêx i tóru maxü. Erü woo ñoma i naãnewa tangêxmaxü, natürü napêxewa rü Cristurüü tixígü. ¹⁸ Rú ngêxguma aixcüma Tupanaxü ingechaügügu, rü nüxü tacuêx na täütáma tüxü napoxcuexü, rü ngêmacêx taxucêxma nüxü tamuüê. Natürü ngêxguma chi nüxü imuüêgu, rü nüxü

tacuèx na tama aixcūma nūxū ingechaūgūxū. ¹⁹ Rū yixema rū Tupanaxū tangechaūgū, yerū nūxīra tūxū nangechaū ga nūmax. ²⁰ Ngēxguma chi texe:

“Choma rū Tupanaxū changechaū”, ñagūgu, natūrū tūmaēneēchi taxaixgu, rū tidora. Erū ngēxguma tama nūxū tangechaūgu i tūmaēneē i nūxū tadauxū çrū ñuxūcūrūwa tá nūxū tangechaū ya Tupana ya tama nūxū tadaucū? ²¹ Rū Ngechuchu ya Cristu tūxū namu rū ñanagūrū:

“Yixema Tupanaxū ngechaūxē, rū name nixī na tūmaēneēxū rū ta tangechaūxū”, ñanagūrū.

5

Nūxū tarūyexera i ñoma i naāneārū ngūchaūgū

¹ Ngechuchu rū Tupana Nane ya Cristu nixī. Rū guxāma ya yixema nūxū yaxōxē, rū Tupanaxācū tixīgū. Rū yixema Tanatū ya Tupanaxū ngechaūxē, rū nūxū tangechaū ta i guxūma i naxācūgū. ² Rū ngēxguma Tupanaxū ingechaūgūgu rū naxūxgu i ngēma nūma tūxū namuxū, rū nūxū tacuèx na aixcūma nūxū ingechaūgūxū i ngēma naxācūgū ixīgūxū. ³ Rū ngēxguma aixcūma Tupanaxū ingechaūgūgu rū naga taxīnūē i ngēma tūxū namuxū. Rū ngēma tūxū namuxū rū tama naguxcha na naga ixīnūēxū. ⁴ Erū guxāma ya aixcūma Tupanaxācū ixīxē, rū tama ñoma i naāneārū ngūchaū i chixexūgu tarūxīnū. Rū yixema rū tayaxōgū, rū ngēmacèx tama name i ñoma i naāneārū ngūchaū i chixexūgu tarūxīnūē. ⁵ Rū yixema yaxōxē na Tupana Nane yīxū ya Ngechuchu, rū yixema tixī ya tama ñoma i naāneārū ngūchaū i chixexūgu rūxīnūxē.

Ore i Tupana Nanechiga

⁶ Rū nūxū tacuèx na aixcūma Tupana Nane yīxū ya Ngechuchu. Yerū yexguma ñoma ga naānewa nayexmagu rū dexāwa ínabaiegu, rū nūmatama ga Tupana nūxū nixu na Nanexūchi yīxū. Rū yexguma curuchagu nayuxgu rū nagū inabaāgu ga Ngechuchu, rū Tupana rū wenaxārū inanawéx na aixcūma Nane na yīxū. Rū ngēxgumarūū ta i ngēma Naāē i Ūñexū i taguma idoraxū, rū tūxū nūxū nacuèxēē na aixcūmaxūchi Tupana Nane na yīxū. ⁷ Rū ngēmaācū tūxū nangēxma i tomaēxpūx i cuèxruūgū i tūxū nūxū cuèxēēxū na aixcūma Tupana Nane yīxū ya Ngechuchu. ⁸ Rū ngēma norū wūxi nixī i Naāē i Ūñexū, rū ngēma norū taxre nixī ga yema Tupanaga ga yexguma Ngechuchu dexāwa íbaiegu, rū ngēma norū tomaēxpūx nixī ga yema Tupana ūxū ga yexguma curuchagu nagū inabaāgu ga Ngechuchu. Rū guxūma i ngēma tomaēxpūx, rū wūxigu nūxū nixu na aixcūma Tupana Nane yīxū ya Ngechuchu. ⁹ Nūxū tayaxōgū i duūxūgū ega tacūxū tamaā yaxugūgu. Natūrū Tupanaārū ore nixī i yexeraācū aixcūmaxūchi ixīxū. Rū Tupana nixī ya tamaā nūxū ixucū na Ngechuchu rū Nane yīxū. ¹⁰ Rū yixema nūxū yaxōxē ya Tupana Nane rū nūxū tacuèx na aixcūma yīxū i ngēma ore i Tupana nūxū ixuxū i Nanechiga. Natūrū yixema tama Tupanaāxū yaxōxē rū doratèx nūxū tawogū ya Tupana erū tama tayaxō i ngēma ore i Tupana nūxū ixuxū i Nanechiga. ¹¹ Rū ñāā nixī i norū ore ya Tupana i tamaā nūxū yaxuxū, rū ñanagūrū:

“Chomatama marū pexna chanaxā i maxū i taguma gūxū. Rū ñāā maxū rū Chaunegagu pexū nangēxma”,

ñanagūrū. ¹² Yixema nūxū yaxōxē ya Tupana Nane rū tūxū nangēxma i ngēma maxū i taguma gūxū. Natūrū yixema tama nūxū yaxōxē ya yima Tupana Nane rū tama tūxū nangēxma i ngēma maxū.

Cuáŭ rü ñuxre ga norü ucuxêmaã inayacuèxêê ga norü popera

13 Pa Chaueneêgüx ya Tupana Naneãxü Yaxôgüxex, pexcêx chanaxümatü i ñãã ore na nüxü pecuáxüçêx na pexü nangêxmaxü i ngêma maxü i taguma gúxü. 14 Rü ngêmacêx tama taxãneê na nüxna ingaicamagüxü ya Tupana. Rü nüxü tacuêxgü ega tacücêx nüxna icaxgu, rü nüma tüxü naxínü i ngêxguma norü ngúchaü yixígu i ngêma naxcêx nüxna icaxü. 15 Rü ngêxguma nüxü icuêxgu na nüma tüxü naxínüxü i ngêxguma tacücêx nüxna icaxgu, rü nüxü tacuêx ta na tüxna naxããxü i ngêma naxcêx nüxna icaxü. 16 Rü ngêxguma chi texé nüxü dèuxgu i tümaêneê na pecadu naxüxü, rü name nixí na naxcêx tayumüxexü ega tama pecadu i iyanatauxêêxü yixígu. Rü Tupana tá nana-maxêê i ngêma tümaêneê ega tama pecadu i iyanatauxêêxü yixígu. Nangêxma i pecadu i tüxü iyarütauxêêxü. Rü ngêxguma ngêma pecaduwe naxüãmagu i wüxi i peeneê, rü tama pemaã nüxü chixu na naxcêx peyumüxêgüxü. 17 Guxüma i chixexü i ixüxü, rü pecadu nixí. Natürü nangêxma i pecadu i tama tüxü iyarütauxêêxü. 18 Rü nüxü tacuêx, rü yíxema Tupanaxãcü ixíxê, rü tama pecadu taxüecha, erü nüma ya Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxü pecaduãxêêchaüxü. 19 Nüxü tacuêxgü na Tupanaxãcügü ixígüxü, natürü guxüma i ñoma i naãnecüãx rü ngoxo i Chatanámxêêwa nangêxmagü. 20 Rü nüxü tacuêx ta na ñoma ga naãnewa nanguxü ga Tupana Nane, rü tüxna nanaxã ga cuèx na nüxü icuêxgüxüçêx ya yima aixcümáxüchi Tupana ixícü. Rü norü duüxügü tixígü ya yima aixcümáxüchi Tupana ixícü, erü Nane ya Ngechuchu ya Cristuarü duüxügü tixígü. Rü nüma ya Tupana Nane nixí i aixcümáxüchi Tupana yíxü rü tüxna naxããxü i maxü i taguma gúxü. 21 Pa Chauacügüx, ¡Pegüna pedaugü na tama nüxü peyaxôgüxüçêx i tupanachicügü! Rü ngêxícatama nixí i chorü ore i pemaã nüxü chixuxü.

Rü nuãma pexna,
Cuáŭ

NORŮ TAXRE GA POPERA GA CUÁŮ ŮMATŮXŮ

CuáŮärü moxë

¹ Pa Chaueneëgü i Yaxögüxe ya Tupana Pexü Dexex, pexcëx chanaxümatü i choma i CuáŮ i yaxögüxüärü äëxgacü na chíxü. Choma rü aixcüma pexü changechaŮ. Rü tama i chaxica, natürü guxüma i ngëma nüxü cuëxgüxü i Tupanaärü ore i aixcüma ixixü, rü ngëxgumarüü ta pexü nangechaügü. ² Pexü tangechaŮ erü toxrüü nüxü pecuëxgü i ngëma ore i aixcüma ixixü i guxügutáma tawa ngëxmaxü. ³ Rü nüma ya Tanatü ya Tupana rü Nane ya Ngechuchu ya Cristu rü poraäcü tá pexü narüngüxëëgü rü nüxü pengechaŮtümüügü rü pexü nataäëxëëgü, erü nüxü pecuëx i ngëma ore i aixcüma ixixü rü pegü pengechaügü. ⁴ Rü poraäcü chataäë ga yexguma nüxü chadëuxgu na ñuxäcü ñuxre i petanüxüügü rü aixcüma meä naga na naxinüëxü i ngëma ore i aixcüma ixixü, yema Tanatü ya Tupana tüxü muxürüü. ⁵ Rü ñuxmax, Pa Chaueneëgü ya Pexü Changechaügüxex, rü pexna nüxü chacuëxächixëë na namexü na yigü ingechaügüxü. Rü ngëma rü tama wüxi i ngëxwacaxüxü i Tupanaärü mu nixi. Natürü yematama nixi ga mu ga noxriarü ügügumama Tupana tüxna äxü. ⁶ Ngëxguma Tupanaxü ingechaügügu, rü tanaxü i guxüma i ngëma tüxü namuxü. Erü nüma rü noxriarü ügügumama tamaä nüxü nixu na yigü ingechaügüxüxcëx i wüxichigü.

Orearü uruügü i womüxëëruüchiga

⁷ Guxüwama i ñoma i naänewa rü nanaxiäne i muxüma i womüxëëruüügü ixigüxü. Rü nüxü nixuchigagü na tama Tupana duüxüxü yaxixëëxü ga Ngechuchu ya Cristu. Rü ngëma ngëmaäcü idexaxü, rü wüxi i womüxëëruü nixi, rü Cristuarü uwanü nixi. ⁸ ¡pexuäëgü na taxüema pexü womüxëëgüxüxcëx rü na tama natüxcëxma yixüxcëx i tóru puracü! ¡Natürü meä peyaxögüama na aixcüma penayaxuxüxcëx i guxüma i ngëma Tupana pexna äxchaüxü! ⁹ Rü yixema nangupetüxëëxë ga yema Cristu tüxü ngüxëëxü, rü tama aixcüma Tupanaxü tacuëx. Natürü yixema tama nüxna íchoxüxcë ga yema Cristu tüxü ngüxëëxü, rü aixcüma nüxü tacuëx ya Tanatü ya Tupana rü Nane ya Ngechuchu. ¹⁰ Rü ngëxguma chí wüxi i duüxü petanüwa nguxgu rü tama yema Cristu tüxü ngüxëëxümaä pexü nangüxëëgü, rü ¡täütáma penayaxu i pechiüwa rü bai i nüxü perümoxëgü! ¹¹ Erü ngëxguma wüxie tümachiüwa nayauxgu, rü tananaäëraxü rü natanüxü tügü tixixëë nawa i ngëma norü chixexü.

CuáŮärü ore ga nawa iyacuáxü

¹² Choxü nangëxma i muxüma i to i ore i pemaä nüxü chixuxchaüxü. Natürü tama chanaxwëxe na ñaä poperawa pemaä nüxü chixuxü, erü paxa tá petanüwa íchayadauxchaŮ na chomatama pemaäxüchi nüxü chixuxüxcëx na ngëmaäcü wüxigu aixcüma itaäëgüxüxcëx. ¹³ Rü ngëma nuä natanüwa changëxmaxü i yaxögüxü i peeneëgü ixigüxü i Tupana dexü, rü pexü narümoxëgü. Rü ngëxícatama nixi i chorü ore i pemaä nüxü chixuxü.

Rü nuäma pexna,
CuáŮ

NORŨ TOMAËXPŨX GA POPERA GA CUÁŨ ŨMATŨXŨ

CuáŨ rŭ Gayumaã nataãẽ

¹ Pa Chaueneẽ, Pa Gayu i Aixcũma Cuxũ Changechaũxẽx, rŭ cuxcẽx chanaxũmatũ i choma i CuáŨ i yaxõgũxũãrũ ãẽxgacũ na chiĩxũ. ² Pa Chaueneẽx, Tupanana chaca na meã cuxna nadauxũcẽx i curũ maxũwa rŭ cuxunewa, ngẽma curũ õwa cuxna na nadauxũrũ. ³ Rũ poraãcũ chataãẽ ga yexguma nũma naxĩxgu ga ñuxre ga taeneẽgũ, rŭ chomaã nũxũ yaxugũga ga cuchiga na ñuxãcũ meã cuyaxõxũ i Tupanaãrũ ore i aixcũma ixĩxũ, rŭ guxũguma meã naga na cuxĩnũxũ. ⁴ Rũ guxũguma chataãẽxũchi i ngẽxguma nũxũ chaxĩnũgu na ñuxãcũ Tupanaãrũ ore nũxũ ixuxũãcũma meã namaxẽxũ i chauxacũgũ. Rũ aixcũma nataxuma i to i taãẽ i ngẽmaãrũ yexera ixĩxũ. ⁵ Pa Chaueneẽ i Cuxũ Changechaũxẽx, mexũ cuxũ erũ nũxũ curũngũxẽẽ i ngẽma togũ i taeneẽgũ i toxnamana ne ãxũ i cuxũtawa ngugũxũ. ⁶ Rũ nũmagũ rŭ nuã nangugũ, rŭ torũ ngutaquẽxepataũwa nũxũ nixugũe na ñuxãcũ nũxũ cungechaũxũ rŭ namaã cumecũmaxũ. Rũ chanaxwẽxe i nũxũ curũngũxẽẽ i ngẽma taeneẽgũ i ngẽxguma wena cuxũtawa nangugũgu. Rũ ngẽxguma cuxna iyaxĩxgu rŭ ñũxna naxã i tacũ i nũxũ taxuxũ i norũ namawaũ! Erũ Tupanaãrũ me nixĩ na ngẽmaãcũ nũxũ rũngũxẽẽxũ i norũ orearũ uruũgũ. ⁷⁻⁸ Rũ nũmagũ, rŭ Ngechuchu ya Cristuarũ puracũ nixĩ i naxũgũxũ, rŭ ngẽmacẽx norũ oremaã nanaxĩãne. Natũrũ tama nanayauxgũ i ngẽma tama yaxõgũxũãrũ ngũxẽẽ, rŭ ngẽmacẽx name nixĩ i yixema na nũxũ rũngũxẽẽgũxũ na ngẽmaãcũ yixema rŭ ta wũxigu namaã naxũgũxũcẽx i Tupanaãrũ puracũ.

Diõtepe rŭ chixexũ naxũ natũrũ Demẽtriu rŭ mexũ naxũ

⁹ Choma rŭ marũ chanaxũmatũ i wũxi i popera naxcẽx i ngẽma tupaucatanũũgũ i curũ ããnewa ngẽxmagũxũ. Natũrũ nũma i Diõtepe rŭ tama naga naxĩnũchaũ i ngẽma nũxũ tixuxũ, erũ nanaxwẽxe na nũmatama namuãxũ i ngẽma tupaucatanũxũ. ¹⁰ Rũ ngẽxguma ngẽma chaxũxgu rŭ tá nũxũ chaxõregũ erũ tochiga i chixexũmaã inayarũdexanexũ. Rũ woo tomaã na ngexũ nawagũxũ, rŭ naetũwa to i chixexũ naxũ, erũ tama nanayauxchaũ i ngẽma taeneẽgũ i ngẽma ngugũxũ. Rũ nanachũxu na texẽ nayaxuxũ i ngẽma taeneẽgũ. Rũ yixema nayauxchaũxẽ, rŭ ngutaquẽxepataũwa tũxũ ãnawoxũ. ¹¹ Pa Chaueneẽ i Cuxũ Changechaũxẽx, jTãxũ i nũxũ cuyadauxũxũ i ngẽma togũ i chixexũ ũgũxũ! Natũrũ name nixĩ i nũxũ cuyadauxũ i ngẽma mexũ ũgũxũ. Erũ yixema guxũguma mexũ ũxe rŭ Tupanaxãcũ tixĩ. Natũrũ yixema chixexũ ũechaxe rŭ tama Tupanaxũ tacuẽx. ¹² Guxũma i duũxũgũ nũxũ ixuxgu i Demẽtriu rŭ wũxi ya mecũ nixĩ. Rũ toma rŭ ta nũxũ tacuẽx na meã naga naxĩnũxũ i Tupanaãrũ ore i aixcũma ixĩxũ. Rũ ngẽmacẽx rŭ ta nũxũ tixu na aixcũma mecũ yĩxũ. Rũ cuma nũxũ cucuẽx na aixcũma na yĩxũ i ngẽma nũxũ tixuxũ.

CuáŨãrũ ore ga nawa iyacuãxũ

¹³ Choma choxũ nangẽxmachirẽx i muxũma i chorũ ore i cumaã nũxũ chixuxchaũxũ, natũrũ tama ñãã poperagu cuxcẽx chanaxũmatũchaũ. ¹⁴ Erũ choma rŭ paxa ngẽma chaxũxchaũ, rŭ ngẽxguma rŭ meã tá yigũmaã tidexagũ.

¹⁵ ¡Meã cuxŧ naxŧpetŧ rŧ tãxŧ i cuxoegaãẽxŧ! Tamŧcŧgŧ i númacŧãx rŧ moxẽ cuxcèx ngema namugŧ. Rŧ chanaxwèxe i nüxŧ curŧmoxẽ i wŧxichigŧ i tamŧcŧgŧ i ngema ngèxmagŧxŧ. Rŧ ngèxĩcatama nixĩ i chorŧ ore i cumaã nüxŧ chixuxŧ.

Rŧ nuãma cuxna,
Cuáŧ

POPERA GA YUDA ÜMATÜXÜ

Yema yaxōgūxūxū narūmoxē ga Yuda

¹ Pa Yaxōgūxū i Guxūwama Ngēxmagūxūx, choma i Yuda nixī i pexcēx chanaxūmatūxū i ñaā popera. Rū choma nixī i Chaūtiágueneē chiixū, rū Ngechuchu ya Cristuarū duūxū chixi. Rū pexcēx chanaxūmatū i pema na Tanatū ya Tupana pexū dexū rū pexū ngechaūxū rū Ngechuchu ya Cristu pexna dauxū. ² Rū pexcēx chayumūxē na guxūguma Tupanaāxū pengechaūtūmūgūxūcēx, rū pexū nataāxēgēgūxūcēx, rū pexū nangechaūxūcēx.

Duūxūgū i doramaā ngūxēētaegūxūchiga

³ Pa Chaueneēgū ya Pexū Changechaūgūxex, noxri rū poraācū choxū nangūchaū na pexcēx chanaxūmatūxū nachiga i ngēma maxū i taguma gūxū i tūxū ngēxmaxū. Natūrū ñuxma na petanūgu nachocuxū i ñuxre i duūxūgū i íyatoxēēgūchaūxū i Tupanaārū ore, rū ngēmacēx chanaxwēxe na pexcēx chanaxūmatūxū na pexū chaxucūxēxūcēx rū ípenapoxūxūcēx i ngēma ore i aixcūma íxixū ga nuxcūma wūxicanatama Tupana norū duūxūgūna āxū. ⁴ Rū ngēma duūxūgū i pexū nawomūxēēācūma petanūgu chocuxū nixī i pexū ngūxēēxū rū ñaxū:

“Tupana rū namecūmaxūchi rū ngēmacēx tāūtāma pexū napoxcue ega woo chixri pemaxēgu”, ñaxū. Rū ngēxgumarūū ta tama nūxū nacuēxgūchaū ya tórū Cori ya Ngechuchu ya Cristu ya tórū yora íxīcū. Natūrū ngēma duūxūgū i ngēmaācū maxēxū, rū woetama nuxcūmama Tupanaārū ore i ūmatūxūwa rū marū nūxū nixu na Tupana tá napoxcuxū. ⁵ Rū woo na marū nūxū pecuáxū natūrū pexna nūxū chacuēxāchixēēchaū na ñuxācū namaā nangupetūxū ga yema nuxcūmaūgūxū ga Yudūgū ga Moíchéwe rūxixū. Rū tórū Cori ya Tupana rū poraācū nūxū narūngūxēē na Equituanewa ínanguxūxūcēx, natūrū yixcama rū nanadai ga yema tama naga ínūēchaūxū. ⁶ Rū ngēxgumarūū ta pexna nūxū chacuēxāchixēē na ñuxācū namaā nangupetūxū ga yema daxūcūāx ga orearū ngeruūgū ga noxri íxūūnechirēxū natūrū yixcama nagatama pecadu ūgūxū. Rū yemacēx ga Tupana rū ēānēxūma nanawogū, rū ngēma nanapoxcue ñuxmatāta nawa nangu i ngēma ngunexū i nagu tūxū yacagūxū. ⁷ Rū yexgumarūū ta nūxū nangupetū ga guma íānegū ga Chodoma rū Gomora rū guma íānegū ga norū ngaicamagugūne. Yerū guma íānegūāxgū, rū poraācū chixri nūgūmaā namaxē, rū yemacēx ga Tupana rū ūxūmaā ínanagu. Rū yemaācū inayanaxoxēē ga guma íānegū na yemawa tūxū nūxū nacuēxēēxūcēx na nangēxmaxū i wūxi i poxcu naxcēx i guxūma i ngēma chixexū ūgūxū. ⁸ Natūrū woo ngēmaxū na nacuēxgūxū i ngēma idoraexū i petanūgu chocuxū, natūrū norū chixexūgu narūxīnūēāma. Rū poraācū chixri nūgūmaā namaxē, rū tama tórū Cori ya Tupanaga naxīnūēchaū, rū chixri Tupanaārū orearū ngeruūgū i daxūcūāxchigagu nidexagū. ⁹ Rū ngēma duūxūgū rū naēchitamare nidexagū rū tama Tupanaārū orearū ngeruū ga Miguérerūū nūgūna nadau i norū orewa. Rū guma Miguére rū woo guxū i Tupanaārū orearū ngeruūgū i daxūcūāxārū āēxgacū na yīixū, natūrū tama ngoxo ga Chatanāmaā naguxchiga ga yexguma Moíchéxūncēx yēma nūgūmaā yaporagatanūcūxgu, na nūxū nacuēxgūxūcēx na texearū tá yīixū ga Moíchéxūne. Natūrū nūma ga Miguére rū ínanagūrūmare:

“Cori ya Tupana tá cuxü nanga”, ñanagürümare. ¹⁰ Natürü ngëma duüxügü i doramaã i petanügu chocuxü, rü tama Tupanaxü nacüxgüäcuma chixri nachiga nidexagü, rü chixri norü orearü ngeruügü i daxücläxchiga nidexagü. Rü ñoma naëxügürüü naxünearü ngüchaüwemare narüxi, rü ngëmaäcü namaxë. Natürü ngëma chixexü i naxügüxcëx, rü Tupana tá nanapoxcue. ¹¹ Rü wüxi i ngechaüxüchi nixi naxcëx i ngëma duüxügü erü ngëmaäcü namaxë. Rü Cai ga naëneëxü imáxürüü nixigü. Rü äëxgacü ga Baráürüü dïerucëx chixexü naxügü. Rü Corërüü tama Tupanaga naxinüëchaü, rü ngëmacëx Tupana tá nanapoxcue. ¹² Rü ngëxguma tupaucawa tóru Coriarü ðnacëx pengutaquëxëgügu, rü wüxi i añexüchi nixigü. Erü narücutanüxü, rü poraäcü nachibüe rü naxaxegü, rü nügüguxicatama narüxinüë. Rü ñoma caixanexü i ngearü pucüäxü i paanexüëtüwa üpetüxü natürü tama nanetüxü ixaiyagüxürüü taxuwama nime. Rü ngëma nanetügü i ngëxguma norü owa nanguxgu rü tama ixoxürüü nixigü. Rü ñoma naigü i guxüma i naxchümëxämaã napuxü rü yuxuchixürüü taxuwama nime i ngëma duüxügü. ¹³ Rü ñoma yuape i taxü i norü chixixü i äüächixü naxänacüwa yataxürüü nixigü, erü poraäcü chixexü naxügü. Rü ñoma woramacurigü ya nu ne naxïmarecürüü nixigü. Natürü Tupana rü marü namaã nanaxuegu na ngëma waanexüchixüwa guxügutáma nawogüäxü. ¹⁴⁻¹⁵ Rü nuxcümaäcü ga Enó ga Adáütaa ixicü rü ngëma duüxügüchiga nidexa ga yexguma Tupana yadexaxëëgu, rü ñanagürü: “Rü nüxü chadau ya Cori ya Tupana na muxüchixü i norü orearü ngeruügü i daxücläxmaã núma ücü na duüxügüna naçaxüxcëx i norü maxüchiga rü napoxcueäxüxcëx i guxüma i ngëma duüxügü i chixexü ügüxü rü namaã guxchigagüxü”, ñanagürü. ¹⁶ Rü ngëma duüxügü rü ñacüxcëx idexagüwëxexüchixü nixigü, rü toguäxü ixuxwëxëgüxüchixü nixigü. Rü noxrütama ngüchaüxcëx daugüxü nixigü. Rü nügü icuëxüügüxü nixigü. Rü nümaxü meã tümachiga nidexagünetä ya duüxëgü, na tümaxütawa ñacü na nayauxgüxüxcëxmare.

Yuda nayaxucüxëgü ga yema yaxögüxü

¹⁷ Pa Chaueneëgü ya Pexü Changechaügüxex, jñuxna pecuëxächie ga yema ore ga pemaã nüxü yaxugügüxü ga tóru Cori ya Ngechuchu ya Cristuarü ngüxügü ga imugüxü! ¹⁸ Rü nümagü rü ñanagürügü pexü: “Ngëxguma nagüxchaügu i naäne rü tá nangëxma i duüxügü i tá nüxü cugüexü i Tupanaärü ore rü noxrütama ngüchaü i chixexügumare maxëxü”, ñanagürügü pexü. ¹⁹ Rü ngëma duüxügü nixi i pexü itoyexü na tama wüxigu perüxinüëxüxcëx rü tama meã peyaxögüxüxcëx. Rü nümagü rü naxünearü ngüchaüwe narüxi, rü tama nawa nangëxma i Tupanaãe i Üünexü. ²⁰ Natürü pema, Pa Chaueneëgü ya Pexü Changechaügüxex, jrü pegü perüngüxëëx na guxüguma yexeraäcü nagu pexixü rü peyaxögüxü i ngëma ore i üünexü i marü peyaxgüxü! jrü guxüguma Tupanaãe i Üünexüärü ngüxëemaã peyumüxëgü! ²¹ jrü guxüguma nagu pexi i ngëma Tupanaärü ngechaxü! jrü meã ípenangüxëëx i ngëma ngunexü i nagu tá núma naxüxü ya tóru Cori ya Ngechuchu ya Cristu na nüxü ingechaütümüügüäcuma tüxna naxäaxüxcëx i maxü i taguma güxü! ²² jrü pexü nangechaütümüügü i ngëma tama aixcüma yaxögüxü, rü nüxü perüngüxëëgü na meã yaxögüäxüxcëx! ²³ Rü togü, jrü paxa norü pecaduwa ípenayaxuchi na namaxëxüxcëx rü tama yima üxü ya Tupana mexënegu yanatauxexüxcëx! Rü woo ngëma tama yaxögüchaüxü, jrü

pexũ nangechaũtũmũũgũ! ¡Natũrũ pegũna pedaũgũ na tama norũ chixexũgu peyixũcèx! Rũ ngẽma norũ chixexũ i pexcèx mexcũraxũxũ, ¡rũ nũxũ pexo!

Tupanaxũ yacuèxũũãcũma inayacuèxẽẽ ga norũ popera

²⁴⁻²⁵ Rũ yima wũxitama ya Tupana ya tórũ Maxẽẽẽruũ ixĩcũ, rũ nũxũ nangẽxma i pora na pexna nadauxũcèx na tama pecaũdugu peyixũcèx. Rũ nũxũ nangẽxma i pora na iyanaxoxẽẽãxũcèx i guxũma i perũ chixexũgũ na petaãẽgũãcũma nũgũpẽxewa pexũ nagagũxũcèx i ngextá ãẽxgacũ iyĩxũwa. Rũ ngẽmacèx tanaxwèxe i tórũ Cori ya Ngechuchu ya Cristuégagu Tupanaxũ ticuèxũũgũ, erũ nũma rũ guxũãrũ yexera name rũ napora, rũ guxũtũwa nangẽxma, rũ guxũmaã inacuèx. Rũ yemaãcũ nixĩ ga nuxcũmaxũchima, rũ ngẽmaãcũ nixĩ i ñuxmax, rũ guxũgutãma ngẽmaãcũ yĩĩ.

Rũ nuãma pexna,
Yuda

YEMA CUÁŪ NŪXŪ DAUXŪ I YIXCŪRA TÁ NGUPETŪXŪCHIGA

Ore ga Cuáŷxŷ nŷxŷ nacuèxèèxŷ ga Ngechuchu ga Cristu

¹ Ñãã nixŷ i ngèma ore ga Tupana Ngechuchu ya Cristuxŷ nŷxŷ cuèxèèxŷ na nŷxŷ norŷ duŷxŷgŷxŷ nŷxŷ nacuèxèèxŷcèx i ngèma paxa tá ngupetŷxŷ. Rŷ nŷma ga Ngechuchu ya Cristu nixŷ ga norŷ orearŷ ngeruŷ ga daxŷcŷŷxŷ namuxŷ na norŷ duŷcŷ ga Cuáŷmaã nŷxŷ na yaxuxŷcèx. ² Rŷ choma i Cuáŷ chixŷ ga aixcŷma meãma nŷxŷ chadauxŷ rŷ chanaxŷmatŷxŷ ga guxŷma ga yema Tupanaãrŷ ore ga Ngechuchu chauxcèx ngoxèèxŷ. ³ Rŷ tataãè ya yŷxema duŷxŷgŷpèxewa nawa ngŷxe i ñãã Tupanaãrŷ ore, rŷ ngèxgumarŷŷ ta tataãègŷ ya yŷxema nŷxŷ ìnŷèxè rŷ naga ìnŷèxè i ñãã ore i ŷmatŷxŷ, erŷ paxa tá ningŷ i ngèma nŷxŷ yaxuxŷ.

Cuáŷ nanaxŷmatŷ naxcèx ga yema 7 tŷcumŷ ga yaxŷgŷxŷ ga Áchiaanewa yexmagŷxŷ

⁴ Rŷ choma i Cuáŷ rŷ chanaxŷmatŷ i ñãã ore pexcèx i yaxŷgŷxe ya yima 7 ya ìãne ya Áchiaarŷ naãnewa ngèxmagŷnewa ngèxmagŷxe. Rŷ chanaxwèxe i pexŷ narŷngŷxŷèè rŷ pexŷ nataãèxèè ya yima Tupana ya woetama ngèxmaèchacŷ. Rŷ ngèxgumarŷŷ ta chanaxwèxe i pexŷ narŷngŷxŷèè rŷ pexŷ nataãèxèè i ngèma Naãè i ŷŷnèxŷ i naxŷtawane ŷxŷ i perŷ dauruŷ ixŷxŷ i pema i yaxŷgŷxe ya yima 7 ya ìãnewa na pengèxmagŷxŷ. ⁵ Rŷ ngèxgumarŷŷ ta chanaxwèxe na pexŷ nangŷxŷèèxŷ rŷ pexŷ nataãèxèèxŷ ya Ngechuchu ya Cristu ga aixcŷma meãma nŷxŷ ixucŷ ga Tupanaãrŷ ore ga ñoma ga naãnewa. Rŷ nŷma nixŷ ga nŷxŷra yuwa ìnadaxŷ. Rŷ nŷma rŷ guxŷma i ñoma i naãnewa ngèxmagŷxŷ i nachŷŷãneãrŷ àèxgacŷgŷarŷ àèxgacŷ nixŷ. Rŷ nŷma rŷ tŷxŷ nangechaŷ, rŷ nagŷmaã tŷxŷ inayanaxoxèè i tŷrŷ pecadugŷ. ⁶ Rŷ ñŷxma na guxŷãrŷ àèxgacŷ yŷxŷ i nŷmax, rŷ tŷxŷ naxŷchica i ngextã nŷma àèxgacŷ ìyŷxŷwa. Rŷ paigŷxŷ tŷxŷ nixŷgŷxŷèè na Nanatŷ ya Tupanaãxŷ ipuracŷèxŷcèx rŷ nŷxŷ icuèxŷŷgŷxŷcèx. Rŷ name nixŷ i guxŷgutãma Cristuxŷ ticuèxŷŷgŷ, erŷ nŷma rŷ guxŷgutãma guxŷãrŷ àèxgacŷ nixŷ. Rŷ ngèmaãcŷ yŷ. ⁷ ;Rŷ dŷcax, marŷ ningaica na chaixanèxŷgu ìnanguxŷ ya Cristu! Rŷ guxŷtãma i duŷxŷgŷ nŷxŷ nadau, rŷ woo ga yema nacanapacŷtŷŷgŷxŷ rŷ tá ta nŷxŷ nadaugŷ. Rŷ guxŷ i duŷxŷgŷ i guxŷ i nachŷŷãnecŷŷãx i tama yaxŷgŷxŷ rŷ norŷ muŷmaã rŷ norŷ ngechaŷmaã tá naxauxe i ngèxguma ìnanguxgu i nŷmax. Rŷ aixcŷma ngèmaãcŷ tá nixŷ. ⁸ Rŷ nŷma ya tŷrŷ Cori ya Tupana ya guxŷãrŷ àèxgacŷ ixŷcŷ ya woetama ngèxmaèchacŷ, rŷ ñanagŷrŷ:

“Chowa nixŷ ga ìnaxŷgŷxŷ ga guxŷma, rŷ nataxuma i tacŷ i chorŷ yexera ngèxmaèchaxŷ”, ñanagŷrŷ.

Cuáŷcèx nangŷxŷ ga Cristu ya mexèchicŷ

⁹ Rŷ choma i Cuáŷ na pexcèx chanaxŷmatŷxŷ i ñãã popera, rŷ peeneè chixŷ. Rŷ ngèma na Ngechuchuna na chaxŷxŷ rŷ chaxŷchica i ngextã nŷma àèxgacŷ ìyŷxŷwa. Rŷ Ngechuchucèx pexrŷŷ ngŷxŷ chinge, natŷrŷ nŷma pexŷ naporaxèèxŷrŷŷ choxŷ naporaxèè na yaxna namaã chaxŷnŷxŷcèx i guxŷma i ngèma ngŷxŷ i choxŷ ŷpetŷxŷ. Rŷ choma rŷ capaxŷ ga Pãtmugu chapoxcu naxcèx na nŷxŷ chixuxŷ ga Tupanaãrŷ ore ga Ngechuchuchiga.

10-11 Rû wûxi ga yûxûarû ngunexûgu rû Tupanaãe i Üünexû chomaã inacuèx, rû changoxetû rû choweama nûxû chaxînú ga wûxi ga naga ga tagaxû ga ñoma cornetagarûú ixîxû ga ñaxû choxtû:

“Chowa nixî ga inaxûgûxû ga guxûma, rû nataxuma i ñacû i chorû yexera ngêxmaèchaxû. Rû ñuxma chanaxwêxe na wûxi i poperagu cunaxûmatûxû i ngêma nûxû cudauxû. Rû ñuxûchi chanaxwêxe i ngêma yaxôgûxû ya yima 7 ya îâne ya Áchiaarû naãnewa ngêxmagûnewa ngêxmagûxûtanûwa cunamu. Rû yima 7 ya îâne nixî ya Epéchiu rû Esmira rû Pérgamu, rû Tiatíra rû Chardi rû Firadérfia rû Laodichéa”, ñanagûrû. ¹² Rû chaugû ichidau na nûxû chacuáxûcèx na ñacû yîixû ga yema chomaã idexaxû. Rû yexguma chaugû ichidèuxgu rû nûxû chadau ga 7 ga weraarû úruûgû ga uirunaxcèx ixîgûxû. ¹³ Rû yema 7 ga weraarû úruûgûarû ngâxûtanûwa nûxû chadau ga wûxi ga duûxû ga chauxcèx nangechuchu ga duûxûxû ixîcûraûxû. Rû wûxi ga naxchiru ga máxûmaã naxâxchiru. Rû wûxi ga goyexû ga uirunaxcèxmaã nigoyeremû. ¹⁴ Rû nayaè rû nachoxochi ñoma ñacû i choxochixûrûú. Rû naxétû rû ñoma úxûemarûú niyauracûú. ¹⁵ Rû nacutû rû ta niyauracûú ñoma cobrexûchi i meãma ípixûrûú. Rû yexguma yadexagu rû natagaxûchi ñoma taxû i dexá i chuxchuxû ágaxûrûú. ¹⁶ Rû norû tûgûnemèxêwa nûxû nayexma ga 7 ga woramacurígû. Rû naãxwa nayexma ga wûxi ga tara ga guxûcûwawa téxû. Rû nachiwe rû ñoma úèxcû poraãcû nguxetûgurûú nixî. ¹⁷ Rû yexguma nûxû chadèuxgu, rû napèxegu chayangu ñoma chayuxûrûú. Natûrû ga nûma rû norû tûgûnemèxêmaã choxtû ningôgû, rû ñanagûrû choxtû:

“¡Tãxû i cumuûxû! Choma nixî i chaxira chayexmaxû rû guxûgutáma changêxmaèchaxû. ¹⁸ Rû choma nixî i yuwa ícharûdaxû rû ñuxma rû chamaxû. Rû úpa rû chayû, natûrû i ñuxma rû marû guxûgutáma chamaxêcha. Rû choxmèxwa nangêxma na ñuxgu tá nayuxû i wûxichigû i duûxû. Rû ngêxgumarûú ta choma nixî i namaã ichacuáxû i ngêma nachica i ngextá ínangêxmagûxûwa i guxûma i duûxûgû i yuexû. ¹⁹ Rû ñuxma rû chanaxwêxe i cunaxûmatû i ngêma nûxû cudauxû. Rû ngêma nixî i ñuxma ngêma yaxôgûúmaã ngupetûxû, rû ngêma yixcûra tá ngupetûxû. ²⁰ Rû ñuxma rû tá cuxcèx chanangoxêê i ngêma èxûguxû i ngêma 7 i woramacurígû i chorû tûgûnemèxêwa nûxû cudauxûchiga rû ngêma 7 i weraarû úruûgû i uirunaxcèxchiga. Rû ngêma 7 i woramacurígû i nûxû cudauxû, rû ngêma àèxgacûgû i ngêma 7 tûcumû i yaxôgûxûtètuwa ngêxmagûxûchiga nixî. Rû ngêma 7 i weraarû úruûgû rû ngêma 7 tûcumû i yaxôgûxû i yima 7 ya îãnewa ngêxmagûxûchiga nixî”.

2

Ore ga yema 7 tûcumû ga yaxôgûxûcèx ûmatûxû Ore ga yema yaxôgûxû ga Epéchiuarû íãnewa yexmagûxûcèx ûmatûxû

¹ “Rû ñuxma chanaxwêxe i ngêma Epéchiuwa ngêxmagûxû i yaxôgûxûârû àèxgacûcèx cunaxûmatû, rû ñacurûgû nûxû: ‘Ñaa nixî i norû ore ya yima ngêma yaxôgûxûtanûgu yarûxûúúcû rû norû tûgûnemèxêmaã nûxna daucû i ngêma yaxôgûxûârû àèxgacûgû’.” ² Rû ñanagûrû i nûmax:

‘Choma nûxû chacuèx i guxûma i ngêma cuxûxû. Rû nûxû chacuèx na ñuxâcû poraãcû choxtû cupuracûxû rû ñuxâcû cunaxûamaxû i ngêma puracû woo ngêmacèx muxûma i guxchaxûgû cuxcèx ínguxgu. Rû nûxû chacuèx na tama curû me yîixû i ngêma duûxûgû i chixexû úgûxû. Rû ngêxgumarûú ta nûxû chacuèx na meã cunangugûarû maxûãxû i ngêma duûxûgû i nûgû

ixugüxü na Tupana imugüxü yixigüxü natürü tama aixcuma ixigüxü na Tupana yamugüxü. Rü cuma rü nüxü cucuëxama na idoratëëxmaregüxü yixigüxü. ³ Rü woo naguxcha i ngëma puracü i chauxcëx cuxüxü, natürü cunaxüama. Rü woo chaugagu poraäcü ngüxü na quingexü, natürü yaxna namaä cuxinü, rü tama nüxü curüchaw. ⁴ Natürü nangëxma i wüxi i cuxüxü i tama chorü me ixixü. Rü ngëma nixi na tama noxrirüü choxü cungechaxü i ñuxmax. ⁵ Rü ngëmacëx i ñuxma na ngëma chixexügu cunguxü, rü name nixi i nüxna cucuëxächi na ñuxäcü choxü cungechaxü ga noxrix. Rü name nixi i nüxü curüxo i curü chixexü rü noxrirüü choxü cungechaxücumä mexü cuxü. Natürü ngëxguma chi tama nüxü curüxoxgu i curü chixexü, rü paxa tá cuxü ichayadau, rü tá cuxü chaxo na tama ngëma togü i yaxögüxütanüwa cuxächicaxücëx. ⁶ Natürü nangëxma i wüxi i cuxüxü i chorü me ixixü. Rü ngëma nixi na naxchi cuxaixü i ngëma chixexü i naxügüxü i ngëma Nico-raitagü. Rü choma rü ta naxchi chaxai i ngëma chixexü i naxügüxü. ⁷ Rü yixema ächixexë rü name nixi i naga taxinü i ngëma Tupanaäe i Üünexü nüxü ixuxü namaä i ngëma yaxögüxütücumügü”. Rü ñanagürü:

“Yixema nüxü rüporamaëxë i chixexü rü tá tüxü nüxü chamuxnetaxëë i norü o i ngëma orix i tüxü maxëxëxü i Tupanaärü orixnecüwa ngëxmaxü”, ñanagürü i Naäe i Üünexü.

Ore ga yema yaxögüxü ga Esmiraarü ñanewa yexmagüxülcëx ümatüxü

⁸ Rü yema chomaä idexaxü rü ñanagürü ta:

“Chanaxwëxe i Esmirawa ngëxmagüxü i yaxögüxüärü äëxgacüçëx cunaxümatü, rü ñacurügü tá: ‘Ñaa nixi i norü ore ya yima nüxira yexmacü rü guxüguma ngëxmaëchacü ga paxaächi yucü rü wenaxarü maxücü’. ⁹ Rü ñanagürü i nümax:

‘Choma nüxü chacuëx i guxüma i ngëma cuxüxü. Rü nüxü chacuëx na ñuxäcü ngüxü quingexü. Rü nüxü chacuëx na cungearü diëruäxü i ñoma i naänewa, natürü daxüguxü i naänewa cuxü nangëxma i ngëma taguma güxü. Rü nüxü chacuëx na ñuxäcü chixri cuchiga yadexagüxü i ngëma duüxügü i nügü ixugüxü na Yudiügü yixigüxü. Natürü i nümagü rü aixcuma Chatanaärü duüxügümare nixigü. ¹⁰ jRü täxü i cumuüxü naxcëx i ngëma ngüxü i tá quingexü! Rü ngoxo i Chataná rü tá norü duüxügüxü namu na poxcupataügu pexü napoxcuëxüçëx i ñuxre i pema na ngëmaäcü pexü naxüxüçëx. Rü ñuxre i ngunexü tá ngüxü pingegü. Natürü woo ngëmaäcü ngüxü pingegügu rü chanaxwëxe i choxü cuyaxööma ñuxmatáta cuyux. Rü choma rü tá cuxna chanaxä i curü ämare i maxü i taguma güxü’. ¹¹ Rü yixema ächixexë rü name nixi i naga taxinü i ngëma Tupanaäe i Üünexü nüxü ixuxü namaä i ngëma yaxögüxütücumügü”. Rü ñanagürü:

“Yixema ñoma i naänewa nüxü rüporamaëxë i chixexü, rü täütáma Tupana ngoxogüxü ipoxcuëxüwa tüxü nawogü”, ñanagürü i Naäe i Üünexü.

Ore ga yema yaxögüxü ga Pérgamuärü ñanewa yexmagüxülcëx ümatüxü

¹² Rü yema chomaä idexaxü rü ñanagürü ta:

“Chanaxwëxe i Pérgamuwa ngëxmagüxü i yaxögüxüärü äëxgacüçëx cunaxümatü, rü ñacurügü tá: ‘Ñaa nixi i norü ore ya yima nüxü nangëxmacü i ngëma tara i guxüçüwawa téxü’. ¹³ Rü ñanagürü i nümax:

‘Choma nüxü chacuëx na yima ñane ya Chataná poraäcü namaä ícuáxünewa na cumaxüxü. Natürü woo ngëxma na cuxächixüxü, rü tama choxü ícutëx. Rü woo yexguma chorü orearü uruü ga mecü ga Atipaxü

yamèxgügu nagu ga guma ñâne ga nawa Chataná duñxügümaã ícuáxüne, rü tama nüxü curüxo na choxü cuyaxõomaxü. ¹⁴ Natürü nangëxma i ñuxre i ñacü i cuyüxü i tama chorü me ixixü. Rü ngëma nixi na cugüxütawa cunangëxmagüxëxü i ñuxre i curü duñxügü i tama nüxü rüxoechaüxü i ngëma nguxëetae ga nuxcuma Baráü Yudiügüarü äëxgacü ga Baráxü namaã ucuxëxü na chixexügu Yudiügüxü nayixëxütçex. Rü yema Yudiügü rü yema ucuxëgagu nawa naxi ga yema petagü ga togü ügüxü naxcëx ga norü tupananetachicünëxägü. Rü yexgumarüü ta yema ucuxëgagu nixi ga nai ga ngemaã namaxëxü ga Yudiügü. Rü ñuxma i ñuxre i curü duñxügü i Pérgamuwa ngëxmagüxü rü nagu naxi ga yema nuxcumaüxü ga nguxëetae ga chixexü, rü tama nüxü narüxoechaü. ¹⁵ Rü ngëxgumarüü ta ngëma cunangëxmagüxëe i ñuxre i duñxügü i tama nüxü rüxoechaüxü i ngëma Nicoraitagüarü nguxëetae i Baráüarü nguxëetaeruü chixexü. ¹⁶ Rü ngëmacëx chanaxwëxe i nüxü curüxo i ngëma chixexü. Rü ngëxguma chi tama nüxü curüxoogu, rü paxa tá ngëma cuxütawa chaxü rü ngëma tara i chauëxwa ngëxmaxümaã tá ngëma duñxügüxü chadai'. ¹⁷ Rü yixema ächixëxë rü name nixi i naga taxinü i ngëma Tupanaãe i Üünexü nüxü ixuxü namaã i ngëma yaxõgüxütücumügü". Rü ñanagürü:

"Yixema nüxü rüporamaëxë i chixexü rü tá tüxna chanaxã i päü i daxüçüäx. Rü tá tüxna chanaxã ya wüxi ya nuta ya chócü i wüxi i naëga i ngëxwacaxüxü nagu ümatüxü. Rü yixema nayaxuxëcatama tixi ya nüxü cuáxe i ngëma naéga", ñanagürü i Naãe i Üünexü.

Ore ga yema yaxõgüxü ga Tiatíraarü ñañewa yexmagüxüçex ümatüxü

¹⁸ Rü yema chomaã idexaxü rü ñanagürü ta:

"Chanaxwëxe i Tiatírawa ngëxmagüxü i yaxõgüxüarü äëxgacüçex cunaxümatü, rü ñacurügü tá: 'Ñañ nixi i norü ore ya yima Tupana Nane ya ñoma üxüemaruü iyauraxetüçüçü rü nacutügü rü ñoma cobre i meãma ípixürüü ixixüne'. ¹⁹ Rü ñanagürü i nümax:

'Choma nüxü chacuëx i guxüma i ngëma mexü i cuyüxü. Rü nüxü chacuëx na ñuxäcü cumüçügüxü cungechaüxü, rü ñuxäcü meãma choxü na cuyaxõxü, rü ñuxäcü nüxü na curüngüxëxü i ngëma togü i yaxõgüxü, rü ñuxäcü yaxna namaã cuxinüxü i guxchaxügü. Rü nüxü chacuëx i ñuxma na noxriarü yexera cunaxüxü i ngëma cuxü chanaxwëxexü. ²⁰ Natürü nangëxma i wüxi i cuyüxü i tama chorü me ixixü. Rü ngëma nixi na ngëma cunangëxmaxëëchaxü i ngëma ngëxü i Yechabé i nügü ixuxü na Tupanaarü orearü uruü na yixü, natürü norü nguxëetaemaã chorü duñxügüxü ngëma womüxëxü na chixri namaxëxüçex, rü nai i ngemaã inapegüxüçex, rü nangõxgüäxüçex i ngëma õnagü i togü norü tupananetachicünëxägüçex dëixü na ngëmamaã nüxü yacuëxüügüxüçex. ²¹ Rü choma rü marü ngixü íchanangüxëe rü yaxna ngümaã chaxinü na nüxü naxoxüçex i ngëma ngicüma i chixexü, natürü tama inaxwëxe na nüxü naxoxü rü ínatáaxü i ngëma ngürü chixexü i naxüxü. ²² Rü ñuxma i ngëma nge rü tá ngixü chidaawëxëe na ngürü ngürücarewa ngüxü yangëxüçex, rü ngëma duñxügü i ngümaã ipexü i ngëma nge rü nümagü rü tá ta ngüxü na yangëgüxüçex ega tama nüxü naxoegu i ngëma chixexü i ngümaã naxügüxü. ²³ Rü tá chanadai i ngüäçügü i ngëma nge. Rü ngëmawa tá nüxü nacuëxgü i guxüma i yaxõgüxü na aixcuma nüxü chacuáxü i ngëma naãewa nagu naxinüxü i wüxichigü i duñxü. Rü wüxichigü i pemax rü tá pexü chanaxütanü ngëma na ñuxäcü pemaxëxüäcuma rü

ñuxăcû penaxûxîăcûma. ²⁴⁻²⁵ Natürü pemağü i Tiatíracûăx i tama năgu îxê i ngêma ngexûărü nguxêetae i chixexû rü taguma nawa ngúexe i ngêma ore i togû naxugûgu rü Chatanăărü ore i êxûguxû îxîxû, rü pemaă nûxû chixu rü ngêma pexû chanaxwêxexû nixî na meă namaă penguxûgûxû rü năga pexîñûxû i ngêma chorü ore ñuxmatăta îchangu i chomax. Rû ngêxîcatama nixî i pexû chanaxwêxexû. ²⁶ Rû yîxema nûxû rûporamaêgûxe i ngêma chixexû rü naxûgûamaxê i ngêma tûxû chanaxwêxexû ñuxmatăta tayemare, rü tá chaugûxûtawa tûxû chaxûchica na wûxigu chomaă guxûărü âêxgacû tixîgûxûcêx. ²⁷ Rû yema Chaunatû âêxgacûxû choxû na îxîxêxûrûrû tá tûxna chanaxă i pora na guxû i nachîñanegûmaă taporaexûcêx. Rû ngêxguma ñoma i naăneçûăx i duûxûgû tama tûmaga îñûegu rü ñoma wûxi i tûxû ngîxû ipuxêxûrûrû tá namaă tixîgû rü poraăcû tá tanapoxcûe. ²⁸ Rû tá tûxna chanaxă ya yima woramacurî i ngêma nûxû idaucû. ²⁹ Rû yîxema âchixexê rû name nixî i năga taxîñû i ngêma Tupanaăe i Ûñexû nûxû îxuxû namaă i ngêma yaxôgûxûtûcumûgû” ñanagûrû.

3

Ore ga yema yaxôgûxû ga Chardiarû îănewa yexmagûxûcêx ûmatîxû

¹ Rû yema chomaă idexaxû rü ñanagûrû ta:

“Chanaxwêxe i Chardiara ngêxmagûxû i yaxôgûxûărü âêxgacûcêx cunaxûmatû, rü ñacurûgû tá: ‘Ñaa nixî i norû ore ya Tupana Nane ya Naăe i Ûñexû nawa ngêxmacû ya yima 7 ya woramacurî nûxû ngêxmacû’. Rû ñanagûrû i nûmax: ‘Choma nûxû chacuêx i guxûma i ngêma cuxûxû. Rû nûxû chacuêx ta rü woo guxûwama duûxûgû nûxû îxugûgu na Tupanacêx namaxêxû i ngêma yaxôgûxû i cuxûtawa ngêxmagûxû natürü tama aixcûma nixî i ngêma, erû ngêma yaxôgûxû rü tama aixcûma choxû nayaxôgû rü tama aixcûma chauxcêx namaxê. ² Rû name nixî i cubaixăchi rü cugû îquicûex rü cuyangûxêe i ngêma îraxû i mexû i cuxû îyaxûxû i marû iyarûoxchaîxû. Erû nûxû chadau rü ngêma cuxûxû rü tama Tupanapêxewa name. ³ jRû nûxna nacûxăchi ga yema nguxêetae ga mexû ga noxri nûxû cuxîñûxû rü cuyaxuxû, rü năgu îxû! jRû nûxû rûxo i ngêma chixexû i cuxûxû! Natürü ngêxguma tama nûxû curûoxoxgu i curû chixexû, rü ñoma wûxi i ngîtêxăxû i ngûrûăchi înguxûrûrû tá cuxûtawa chaxû. Rû tăñtăma nûxû cucûx na ñuxguacû yîîxû. ⁴ Natürü ngema Chardiara cuxû nangêxma i ñuxre i duûxûgû i mexû i tama ñoma i naăneărû chixexûmaă nûgû âñăchiarû maxûăxgûxû. Rû nûmagû rü tá cômûxûmaă nixăxchiru rü ngêmaăcû tá chomaă inaxî, erû nûmagû rü duûxûgû i mexû i chauxcêx maxêxû nixîgû. ⁵ Rû yîxema nûxû rûporamaêgûxe i chixexû, rü tá cômûxûmaă tixăxchiru. Rû tăñtăma nawa tûxû îchapiéga i ngêma chorû popera i năgu chayawûgûxû i ngêma duûxûgû i nûxû nangêxmarû i maxû i taguma gûxû. Rû Chaunatûpêxewa rü guxûma i norû orearûngerûgû i daxûcûăxgûpêxewa tá tûxû chixu na chorû duûxûgû tixîgûxû’. ⁶ Rû yîxema âchixexê rû name nixî i năga taxîñû i ngêma Tupanaăe i Ûñexû nûxû îxuxû namaă i ngêma yaxôgûxûtûcumûgû”.

Ore ga yema yaxôgûxû ga Firdêrfiarû îănewa yexmagûxûcêx ûmatîxû

⁷ Rû yema chomaă idexaxû rü ñanagûrû ta:

“Chanaxwêxe i Firdêrfiara ngêxmagûxû i yaxôgûxûărü âêxgacûcêx cunaxûmatû rü ñacurûgû tá: ‘Ñaa nixî i norû ore ya yima Ûñecû ya aixcûma Cristu îxîcû ya Dabîrûrû âêxgacû ya tacû îxîcû ya nûxû nangêxmacû i pora

na yawāxnaāxūcēx rü nawāxtaāxūcēx i daxūguxū i naāne. Rū ngēxguma texécēx yawāxnaāgu, rü taxucürüwama texé tūmachēxwa tanawāxta. Rū ngēxguma texéchēxwa nawāxtaāgu, rü taxucürüwa texé tūmacēx tayawāxna'.⁸ Rū ñanagürü i nümax:

'Choma nüxū chacuēx i guxūma i ngēma cuxūxū. Rū dücax, cuxū chanatauxchaxēē na togūmaā nüxū quixuxūcēx i chorū ore, rü taxucürüwama texé cuxna tanachuxu na cunaxūxūcēx i ngēma puracū. Rū choma nüxū chacuēx na tama aixcūma cuporaxūchixū, erū noxretama nixī i ngēma yaxōgūxū i cuxūtawa ngēxmagūxū. Natürü cuma rü naga cuxīnū i chorū ore, rü tama icuyacux na chorū duūxū quīxū. ⁹ Rū ngēmacēx i ngēma duūxūgū i Chatanāarū ixīgūxū i nügū ixugūxū na chorū duūxūgū yixīgūxū natürü tama aixcūma choxrū ixīgūxū, rü tá chanamu na cupēxegu nacaxāpūxūgūxūcēx na nüxū nacuēxūcēx na aixcūma cuxū changechaūxū. ¹⁰ Cuma rü meāma cuyanguxēē i ngēma cuxū chamuxū na aixcūma cuyaxōōmaxū naetūwa i ngēma guxchaxūgū i cuxū ngupetūxū. Rū ngēmacēx tá cuxū íchapoxū na tama cuxna nanguxūcēx i ngēma guxchaxū i taxū i ñoma i naānewa tá ínguxū na guxūma i ñoma i naānecūāx i duūxūgūxū naxūxūcēx. ¹¹ Rū paxa tá ngema cuxūtawa chaxū. Rū chanaxwēxe i ñuxma meā cumaxūxūrū meā cumaxecha, na taxūema cuxna napuxūcēx i ngēma curū āmare. ¹² Rū yixema nüxū rüporamaēgūxe i guxūma i chixexū, rü Chaunatū ya Tupanaxūtawa tá tūxū changēxmagūxū na tagutāma ngema ítachoxūxūcēx. Rū tūmagu tá chanaxūmatū i naega ya Chaunatū ya Tupana. Rū ngēxgumarū tá ta tūmagu chanaxūmatū i naega ya Tupanaarū íāne ya Yerucharēū ya ngexwacaxūne ya Tupanaxūtawa i daxūguxū i naānewa írūxīxūne. Rū ngēxgumarū tá ta tūmagu chanaxūmatū i chauéga i ngexwacaxūxū'. ¹³ Rū yixema āchixexē rü name nixī i naga taxīnū i ngēma Tupanaāē i Ūñexū nüxū ixuxū namaā i ngēma yaxōgūxūttūcumūgū".

Ore ga yema yaxōgūxū ga Laodichéawa yexmagūxūcēx ūmatūxū

¹⁴ Rū yema chomaā idexaxū rü ñanagürü ta:

"Chanaxwēxe i Laodichéawa ngēxmagūxū i yaxōgūxūārū āēxgacūcēx cunaxūmatū rü ñacurūgū tá: 'Naā nixī i norū ore ya yima aixcūma ixīcū ya aixcūma yanguxēēcū i ngēma nüxū yaxuxū rü ore i aixcūma ixīxūxūxīcatama ixucū. Rū nüma nixī ga inaxūgūāxū ga guxūma ga yema Tupana ūxū'. ¹⁵ Rū ñanagürü i nümax:

'Choma nüxū chacuēx i guxūma i ngēma cuxūxū. Rū nüxū chacuēx na tama wūxi i duūxū i chauxchi aixū quīxū, natürü tama wūxi i duūxū i aixcūma choxū ngechaūxū quixī. Rū chierū noxtacūma wūxi i duūxū i chauxchi aixū quixīgu rü ēxna noxtacūma wūxi i duūxū i aixcūma choxū ngechaūxū quixīgu. ¹⁶ Natürü ñuxma na írarūwatama choxū cungechaūxū, rü ngēmacēx tá cuxū íchatēx. Erū tama noxtacūma wūxi i duūxū i chauxchi aixū quixī rü tama noxtacūma wūxi i duūxū i aixcūma choxū ngechaūxū quixī. ¹⁷ Rū cuma cugū quixuxgu rü cumuārū dīēruāx, rü cumuārū ngēmaxūāx, rü meāma cuxū naxūpetū, rü taxuūma cuxū nataxu. Natürü i cuma rü tama nüxna cucuēxāchi na chopēxewa rü wūxi i taxuwama mexū quīxū, rü wūxi i ngechaūxūchi quīxū, rü wūxi i taxuūma cuxū ngēmaxē quīxū, rü ñoma wūxi i ngexetūxūrū quīxū, rü ñoma wūxi i ngexchiruxūrū quīxū. ¹⁸ Rū ñuxma rü cuxū chaxucuxē na chauxūtawa naxcēx cutaxexūcēx i uiru i marū ūxūwa iguxū i nüxīcatama ixīxū. Rū ngēmaācū tá

aixcūma cuxū nangēxma i curū ngēmāxū. Rū ngēxgumarūū ta cuxū chaxucuxē na chauxūtawa naxcēx cutaxexūcēx i cuxchiru i cómuxū na ngēmagu quicūxūcēx na taxúema cuxū dauxūcēx na cungechxiruxū. Rū ngēxgumarūū ta cuxū chaxucuxē na chauxūtawa naxcēx cutaxexūcēx i curū mēixētūxū na curūmexētūxūcēx na wena quidauchixūcēx. ¹⁹ Choma rū tūxū chaxucuxē rū tūxū ichayarūwēxāchixēē ya guxāma ya yíxema tūxū changechaūxē. Rū ngēmacēx name nixī i nūxū curūxo i cucūma i chixexū, rū aixcūma choxū cungechaū rū cunaxū i ngēma cuxū chanaxwēxexū. ²⁰ Rū dūcax, choma rū īāxwa tūmacēx chacagūecha. Rū ngēxguma chi texé choxū īnūgu rū chauxcēx tayawāxnagu, rū tá tūmaxūtāgu chaxūcu. Rū tūmamaā tá chachibū rū tūma i chomaā. ²¹ Rū yíxema nūxū rūporamaēgūe i chixexū, rū tá chaugūxūtawa tūxū charūtogūxēē na chomaā āēxgacū tixīgūxūcēx, yexgumarūū ga choma rū nūxū na charūporamaēxū ga chixexū, rū űuxūchi Chaunatūxūtawa na chayarūtōxūrūū na namaā āēxgacū chiīxūcēx'. ²² Rū yíxema āchixēxē rū name nixī i naga taxīnū i ngēma Tupanaāē i Ūūnexū nūxū ixuxū namaā i ngēma yaxōgūxūtūcumūgū", űanagūrū ga yema chomaā idexaxū.

4

Tupanaxū nataxēēgū i daxūguxū i naānewa

¹ Rū yemawena ga choma ga Cuāū rū nūxū chadau ga wūxi ga īāx ga iwāxnaxū ga daxūguxū ga naānewa. Rū yema naga ga nacornetagaraūxū ga noxri nūxū chaxīnūxū ga chomaā idexaxū, rū űanagūrū choxū:

"īNuxā naxīnagū! Rū tá cuxū nūxū chadauxēē i ngēma yixcūra tá ngu-petūxū", űanagūrū. ² Rū yexgumatama ga choma rū Tupanaāē i Ūūnexū rū chauāēmaā inacuēx, rū daxūwa nanaga. Rū yēma daxūguxū ga naānewa nūxū chadau ga wūxi ga tochicaxū ga mexēchixū ga yēma Tupana nawa rūtōxū. ³ Rū guma yema tochicaxūwa rūtōcū, rū űoma nuta ya mexēchicū ya yasperūū nixī na namexū rū űoma nuta ya cornalīnarūū nixī na namexū. Rū yema tochicaxūētūwa nayexma ga wūxi ga chirapa ga űoma nuta ga esmerádarūū mexēchicū. ⁴ Rū yema tochicaxūcūwawa nayexmagū ga 24 ga togū ga tochicaxūgū ga nūxū īnumaēgūāchixū. Rū yema tochicaxūgūwa narūtogū ga 24 ga āēxgacūgū ga yaxōgūxūtārū ixīgūxū. Rū cómuxūmaā nixāxchiru rū uirunaxcēx nixī ga norū ngēxcuerūgū. ⁵ Rū yema nachica ga Tupana írūtōxūwa īnaxūxū ga bēixbēxanexū rū duruanexū rū nagagū. Rū yema tochicaxūpēxewa nayexma ga 7 ga omūgū ga yēma naīgūxū. Rū yema omūgū nixī ga Tupanaāē i Ūūnexū ga yema 7 ga yaxōgūxūtūcumūmaā icuáxū. ⁶ Rū yema Tupanaārū tochicaxūpēxewa rū űoma dexāētūwarūū ixixūmaā nachaxu rū nichipetū woruarūū. Rū yema tochicaxūxū īnachomaēgūāchi ga āgūmūcū ga daxūcūāx ga maxēxū ga guxūwama āxētūxū naweama rū napēxewa. ⁷ Rū wūxi ga yema daxūcūāx ga maxēxū rū nanaxairaxū. Rū yema to rū nanawocaraxū. Rū yema norū tomaēxpūx rū nanaduūxūchiweraxū. Rū yema norū āgūmūcū rū nanaxīyū i gonagūxūraxū. ⁸ Rū yema āgūmūcū ga daxūcūāx ga maxēxū, rū wūxichigū nūxū nayexma ga 6 ga naxpēxatūgū. Rū guxūwama ga naxpēxatūētūwa rū naxpēxatūtūwa rū namuxētū. Rū ngunecū rū chūtacū rū űanagūrūgūecha:

"Naxūūne, naxūūne, naxūūne nixī ya tórū Cori ya Tupana ya guxūētūwa ngēxmacū rū woetama ngēxmaēchacū", űanagūrūgūecha. ⁹⁻¹⁰ Rū yema daxūcūāx ga maxēxū, rū yexguma nūxū yacuēxūgūgūxgu ga guma tochicaxūwa rūtōcū, rū moxē nūxna naxāgūgu, rū yema 24 ga āēxgacūgū ga

yaxōgūxūārū rü yima woetama ngēxmaēchacūpēxegu nacaxāpūxūgū, rü nüxū nicuēxūūgū, rü napēxegu nananu ga norū ngēxcueruūgū. ¹¹ Rü ñanagūrūgū:

“Pa Torū Cori, Pa Torū Tupanax, cuxū nixī i namexū na ticuēxūūgūxū rü cuxū tataxēēgūxū, erū guxūētūwa cungēxma. Yerū cuma cunaxū ga guxūma rü curū ngūchaūgagu nixī i nangōxū i ñuxmax”, ñanagūrūgū.

5

Popera ga idixixūchiga rü Tupana Nane ga ñoma wūxi ga carnerurūū imácūchiga

¹ Rü ñuxūchi nüxū chadau ga guma tochicaxūwa rütocū, rü norū tūgūnemēxēwa nanange ga wūxi ga popera ga idixixū. Rü dūxētūwa rü aixepewa rü naxāmatū ga yema popera. Rü 7 wa ñiñaxtachipēxe. ² Rü nüxū chadau ga wūxi ga norū orearū ngeruū ga daxūcūāx ga poraxūchixū ga tagaācū içaxū rü ñaxū:

“¿Texé tixī ya yixema mexe na tayagautanūxū i norū ñaxtachipēxexū rü itayadixgūxū i ñaā popera?” ñaxū. ³ Natūrū woo ga daxūgūxū ga naānewa rü bai ga ñoma ga naānewa rü bai ga yuexūtanūwa, rü tataxuma ga texé ga mexe na itayadixgūxū rü nüxū tadaumatūxū na ñuxū ñaxū ga yema popera. ⁴ Rü choma rü poraācū chaxaxu yerū tataxuma ga texé ga mexē na itayadixgūxū rü nüxū tadaumatūxū na ñuxū ñaxū ga yema popera. ⁵ Natūrū wūxi ga yema 24 ga āēxgacūgū ga yaxōgūxūārū, rü ñanagūrū choxū:

“¡Tāxū i cuxaxuxū! Erū yima Cristu ya Yudátaa ya airūxū poracū ya āēxgacū ya Dabítaa ixīcū, rü marū nüxū narūyexera i guxūma i chixexū. Rü ngēmacēx nūma nixī i namexū na yagautanūāxūcēx i ngēma 7 i norū ñaxtachipēxexū i ngēma popera rü na iyawēgūāxūcēx”. ⁶ Rü ñuxūchi nüxū chadau ga Tupana Nane ga ñoma wūxi ga carneruxacū ga mēxwa írūdaxūrūū yexma chicū naxūtagu ga guma tochicaxūwa rütocū rü natanūgu ga yema āgūmūcū ga daxūcūāx ga maxēxū rü yema 24 ga āēxgacūgū. Rü nüxū nayexma ga 7 ga nachatacuxre ga norū poraarū cuēxruū rü 7 ga naxētū. Rü guma 7 ga naxētū rü ngēma nixī i Tupanaāē i Ūñexū i guxūma i ñoma i naānewa namuxūārū cuēxruū ixīxū. ⁷ Rü guma pecaduarū ūtanūcēx yucū rü guma tochicaxūwa rütocūcēx nixū, rü nanayaxu ga yema popera ga norū tūgūnemēxēwa yexmaxū. ⁸ Rü yexguma nayauxāgu ga yema popera, rü yema āgūmūcū ga daxūcūāx ga maxēxū rü yema 24 ga āēxgacūgū rü inacaxgūāpūxū napēxegu ga guma pecaduarū ūtanūcēx yucū. Rü wūxichigū ga yema āēxgacūgū rü nüxū nayexma ga wūxi ga norū paxetarūū ga arpa. Rü yexgumarūū ta nüxū nayexma ga copa ga uirunaxcēx ga pumaratēxemaā napagūxū. Rü yema pumaratēxe rü nayixichi ga yexguma yaxaxgu. Rü yema pumaragū, rü ngēma nixī i Tupanaārū duūxūgūarū yumūxēgūarū cuēxruūgū. ⁹ Rü nagu nawiyaegū ga wūxi ga wiyae ga yexwacaxūxū ga ñaxū: “Cuma nixī i cumexū na cunayaxuxū i ngēma popera rü cuyagautanūxū i ngēma norū ñaxtachipēxexū. Yerū cuma rü marū quimēxchirēx, rü cugūmaā Tupanaāxū naxcēx cutaxe i nagūxūraūxū i duūxūgū i nagūxūraūxū i nachiūānecūāx i nagūxūraūxū i nagawa idexagūxū. ¹⁰ Rü ngēmagūxū cuxūchica i ngextā āēxgacū íquixūwa, rü Tupanaārū ngūxēerūgūxū cuyaxīgūxēē na cumaā wūxigu guxū i naānemaā inacuēxgūxūcēx”,

ñanagürügü. ¹¹ Rü yemawena ichadawenü, rü nüxü chaxínü ga naga ga muxüchixüma ga Tupanaärü orearü ngeruügü ga daxüçüâx. Rü norü ngäxüwa nayexma ga yema tochicaxü rü yema ägümücü ga daxüçüâx ga maxëxü rü yema 24 ga äëxgacügü. Rü namuxüchima ga yema Tupanaärü orearü ngeruügü ga daxüçüâx ga yéma yexmagüxü. ¹² Rü tagaäcü ñanagürügü:

“Daa nixi ya yima ñoma wüxi i carneruacürü imácü ga pecaduarü ütanüçèx yucü. Rü nüma nixi i namexü na guxüärü äëxgacü yixü, rü guxüärü yora yixü, rü guxü i cuèx nüxü ngëxmaxü, rü guxüärü yexera naporaxü. Rü nüma nixi i namexü na guxâma nüxü ngechaügüxü rü nataxëëgüxü rü nüxü icuèxüügüxü”, ñanagürügü. ¹³ Rü nüxü chaxínü ta ga naga ga guxüma ga yema Tupana üxü i daxügüxü i naañewa rü ñoma i naañewa rü naañetüüwa rü taxtü i taxüwa ngëxmagüxü ga ñagüxü:

“Name nixi na guxügutâma guxâma nüxü icuèxüügüxü rü nüxü ngechaügüxü rü nataxëëgüxü ya yima pecaduarü ütanüçèx yucü rü yima ngëma tochicaxüwa rütocü, erü nümagü nixi i guxüguma äëxgacügü yixügüxü”, ñanagürügü. ¹⁴ Rü yema ägümücü ga daxüçüâx ga maxëxü rü ñanagürügü:

“Ngëmaäcü yî”, ñanagürügü. Rü yema 24 ga äëxgacügü rü inacaxgüäpüxü rü nüxü nicuèxüügü.

6

Yema 7 ga ñaxtachipëxe-ruüchiga

¹ Rü ñuxüchi nüxü chadau ga yexguma guma pecaduarü ütanüçèx yucü yagauyegu ga yema nüxüraüxü ga norü ñaxtachipëxexü ga yema popera. Rü nüxü chaxínü ga wüxi ga yema daxüçüâx ga maxüxü ga tagaäcü ñoma duruanexürü ñaxü choxü:

“¡Nuã naxü!” ñaxü. ² Rü ichadawenü rü nüxü chadau ga wüxi ga cowaru ga cómuxü. Rü yema naëtüwa rüttoxü rü nüxü nayexma ga wüxi ga norü würa. Rü wüxi ga ngëxcuerü nüxna naxã. Rü poraäëcüma norü cowarumaã inaxüächi na duüxügüxü nayexeraxüçèx. ³ Rü yexguma guma pecaduarü ütanüçèx yucü yagauyegu ga yema norü taxre ga yema poperaarü ñaxtachipëxexü, rü nüxü chaxínü ga yema norü taxre ga yema daxüçüâx ga maxüxü ga ñaxü choxü:

“¡Nuã naxü!” ñaxü. ⁴ Rü yéma naxü ga wüxi ga cowaru ga dauxü. Rü yema naëtüwa rüttoxü rü wüxi ga tara ga taxü nüxna naxã. Rü yexgumarü ta pora nayaxu na iyanaxoxëëaxüçèx na nügü nangechaügüxü ga duüxügü. Rü yemaäcü nanaxü na nügü nadëixüçèx ga duüxügü. ⁵ Rü yexguma guma pecaduarü ütanüçèx yucü yagauyegu ga yema norü tomaëxpüx ga yema poperaarü ñaxtachipëxexü, rü nüxü chaxínü ga yema norü tomaëxpüx ga yema daxüçüâx ga maxüxü ga ñaxü choxü:

“¡Nuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naëtüwa rüttoxü rü naxmëxwa nüxü nayexma ga wüxi ga taçuarü yaruü ga balanza. ⁶ Rü nüxü chaxínü ga wüxi ga naga ga yema daxüçüâx ga maxëxüärü ngäxütanüwa inaxüxü ga ñaxü:

“Wüxi i ngunexüärü puracütanü rü naxâtanü i wüxi i kilo i trigu. Rü wüxi i ngunexüärü puracütanü naxâtanü i tomaëxpüx i kilo i chebada. ¡Natürü taxü i cuyanatauxëëxü i ngëma chixü rü yima binu!” ñanagürü. ⁷ Rü yexguma guma pecaduarü ütanüçèx yucü yagauyegu ga yema norü ägümücü ga yema poperaarü ñaxtachipëxexü, rü nüxü chaxínü ga yema norü ägümücü ga yema daxüçüâx ga maxëxü ga ñaxü choxü:

“¡Nuã naxũ!” ñaxũ. ⁸ Rũ ichadawenũ rũ nüxũ chadau ga wüxi ga cowaru ga dexexũ. Rũ yema naetüwa rütoxũ rũ Yu nixĩ ga naega. Rũ yema naweama ne üxũ, rũ Yuexũchica nixĩ ga naega. Rũ yema taxre nanayauxgũ ga pora na ñoma ga naãnewa rũ wüxi ga yema norü ägümücütücumũ ga duũxügümaã inacuëxgüxcëx na daimaã rũ taiyamaã rũ ñaaweanemaã rũ ngoxo idüraexümaã nayuexëëãxüxcëx. ⁹ Rũ yexguma guma pecaduarü ütanüxcëx yucü yagauyegu ga yema norü wüximëëxpüx ga yema poperaarü ñaxtachipëxexũ, rũ nüxũ chadau ga wüxi ga nachica ga ngextá Tupanacëx naxũnagü nawa yagugüxũ na nüxna naxãgüãxüxcëx. Rũ yema nachicatüüwa nüxũ chadau ga naãëgü ga yema duũxügü ga Tupanaarü orexü na yaxugüxcëx nadëjxũ. ¹⁰ Rũ yema naãëgü rũ tagaãcü ñanagürügü:

“Pa Torü Cori ya Guxüetüwa Ngëxmacü rũ Üünecü rũ Ixaixcümacüx, ¿ñuxgura tá ta i nüxna cucaxũ rũ cunapoxcuexũ i ngëma duũxügü i chixexũ ga toxũ dëjxũ?” ñanagürügü. ¹¹ Rũ ñuxüchi ga Tupana rũ wüxichigü ga yema duũxügüna nanaxã ga naxchiru ga máxũ rũ cómuxũ. Rũ yema duũxügüãëgüxũ ñanagürü:

“¡Paxaãchi iperüngüë ñuxmatáta yangu i peeneëgü i Cristuaxũ puracüexũ i pexrüũ tá dëjxũ!” ñanagürü. ¹² Rũ yexguma guma pecaduarü ütanüxcëx yucü yagauyegu ga yema norü 6 ga yema poperaarü ñaxtachipëxexũ, rũ nüxũ chadau ga poraãcü na naxĩãxãchianexũ. Rũ üëxcü rũ wüxi ga naxchiru ga waxcharaxürü nixĩ. Rũ tauemacü rũ guxüwama nagürüü naduema. ¹³ Rũ woramacurigü rũ ëxtagü rũ daxüwa narüyi rũ ñoma ga naãnegu nayi. Rũ ñoma orix i doxüxüma buanecü ya tacü rüyixëëxürü nixĩ. ¹⁴ Rũ guxüma i daxüwa nüxũ idauxũ rũ inayarütaxu. Rũ ñoma wüxi i popera i dixcumãichixü rũ iyyarütaxuxürü nixĩ. Rũ guxüma ga mëxpünegü rũ capaxügü rũ nixĩgachi ga nachicawa. ¹⁵ Rũ ñoma ga naãnewa yexmagüxũ ga nachiüãnegüarü äëxgacügü, rũ mëxpünemagu rũ mëxpüneärü nutatanügu nicuxgü. Rũ wüxigu yexma namaã nicuxgü ga yema togü ga äëxgacügü ga taxügü ga ñoma ga naãnewaã icuëxgüxũ, rũ churaragüarü äëxgacügü ga taxügü, rũ yema duũxügü ga muärü dëruãxgüxũ, rũ yema duũxügü ga ñoma ga naãnewa poraexũ, rũ guxüma ga duũxügü ga coriãxgüxũ, rũ guxüma ga duũxügü ga ngearü coriãxgüxũ. ¹⁶ Rũ guxüma ga nümagü, rũ guma mëxpünexũ rũ guma nutagüxũ ñanagürügü:

“¡Toëtügu peyi na toxũ ipicuxgüxcëx naxchaxwa ya yima ngëma tochi-caxüwa rütocü, rũ naxchaxwa ya yima pecaduarü ütanüxcëx yucü erü tama tanaxwëxe na toxũ napoxcuexũ! ¹⁷ Erü marü ínangu i ngëma ngunexũ i äücümáxũ i nagu napoxcuexũ i ngëma duũxügü i tama Tupanaarü ixĩgüxũ. ¿Rũ texé tá namaã tapora i ngëma?” ñanagürügü.

7

Yema Yudügü ga nacatüwa cuëxruüãxgüxüchiga

¹ Rũ yemawena rũ nüxũ chadau ga ägümücü ga Tupanaarü orearü ngeruügü ga daxücüãx ga ñoma ga naãneärü ägümücüpëxegu chigüxũ. Rũ ínanapoxügü ga gucüma ga buanecügü na tama waixümuãneetügu naxüxcëx, rũ tama taxü i taxüëtügu naxüxcëx, rũ bai i tacü rũ naïëtügu naxüxcëx. ² Rũ yexgumarüü ta nüxũ chadau ga wüxi ga Tupanaarü orearü ngeruügü ga daxücüãx ga üëxcü íyarügoxüwaama ne üxũ. Rũ nüxũ nayexma ga Tupana ya Maxücüarü tacüarü üëgarü. Rũ nüma rũ tagaãcü nüxna nacagü ga yema togü ga ägümücü ga Tupanaarü orearü ngeruügü ga nayauxgüxũ ga pora na

nachixexēēgūāxūcèx ga guxūma ga waixūmū rū guxūma ga taxū ga taxtū.

³ Rū ñanagürü nüxū:

“¡Tāxū i yatacūma penachixexēēxū i waixūmū rū taxtū i taxū rū naīgū, ñuxmatáta nacatūwa tayaxūarū cuèxruūāxgū i ngēma Tupanaārū duūxūgū ixīgūxū!” ñanagürü. ⁴ Rū nüxū chaxīnū ga ñuxre na yīxū ga yema cuèxruūāxgūxū. Rū guxūma ga Yudiūgūtanūwa rū 144,000 nixī. ⁵⁻⁸ Rū yema cuèxruūāxgūxū ga Yudiūgū, rū ñaā nixī:

- Yudátaagū - 12,000
- Rubéūtaagū - 12,000
- Gadutaagū - 12,000
- Achetaagū - 12,000
- Netarítaagū - 12,000
- Manachétaagū - 12,000
- Chimeūtaagū - 12,000
- Lebítaagū - 12,000
- Ichacátaagū - 12,000
- Chaburāūtaagū - 12,000
- Yúchetaagū - 12,000
- Beyamítaagū - 12,000

⁹ Rū yemawena ichadawenū, rū nüxū chadau ga muxūchixūma ga nagūxūraūxū ga duūxūgū ga nagūxūraūxū ga nagawa idexagūxū ga guxūma ga nachīūānēwa ne īxū. Rū yema tochicaxūpēxegu rū guma pecaduarū ūtanūcèx yucūpēxegu nachīgū. Rū yema na namuxūchixū rū taxucūrūwa texē tayaxugū na ñuxre yīxū. Rū naxchiru ga icómūxū rū imáxūmaā nixāxchiru. Rū naxmēxwa nanangegū ga wairaátūgū. ¹⁰ Rū guxūma ga nūmagū rū tagaācū ñanagürūgū:

“Yima tórū Tupana ya tochicaxūwa rūtocū rū yima pecaduarū ūtanūcèx yucū nixī ya tūxū maxēxēēgūcū”, ñanagürūgū. ¹¹ Rū guxūma ga Tupanaārū orearū ngeruūgū ga daxūcūāx rū nüxū inachimaēgūāchi ga yema tochicaxū rū yema 24 ga āēxgacūgū rū yema āgūmūcū ga daxūcūāx ga maxēxū. Rū yema tochicaxūpēxegu nanangūcuchitanū ga yema orearū ngeruūgū, rū Tupanaxū nicuèxūūgū. ¹² Rū ñanagürūgū:

“Rū ngēmaācū yī. Rū nūma nixī i namexū na guxūguma guxāma nüxū icuèxūūgūxū, rū nataxēēgūxū, rū moxē nūxna ixāgūxū, rū nüxū ingechaūgūxū, erū guxū i cuèx nüxū nangēxma, rū guxūētūwa nangēxma, rū guxūārū yexera napora. Rū ngēmaācū yī”, ñanagürūgū. ¹³ Rū ñuxūchi wūxi ga yema 24 ga āēxgacūgū rū choxna naca, rū ñanagürū:

“¿Texégū tixīgū ya yīxema cómūchirugūxe, rū ngextá ne taxī?” ñanagürü.

¹⁴ Rū choma chanangāxū, rū ñacharūgū:

“Pa Corix, cuma nixī i nüxū cucuáxū na texégū tixīgūxū”, ñacharūgū. Rū yexguma ga nūma rū ñanagürü:

“Yīxemagū tixīgū ga nawa ngupetūtanūxē ga yema ngūxū ga taxū rū marū tūgū iyauxgūchiruxe nagūwa ga guma pecaduarū ūtanūcèx yucū. Rū ngēmacèx nixī i ticómūchiruxū. ¹⁵ Rū ngēmacèx nixī i Tupanaārū tochicaxūpēxewa tangēxmagūechaxū rū ngunecū rū chūtacū rū Tupana ingēxmaxūwa nüxū tapuracūexū. Rū nūmatama ya Tupana ya tochicaxūwa rūtocū rū tūxna nadau. ¹⁶ Rū marū tagutáma wenaxārū taiya tūxū nangux, rū tagutáma tītawae. Rū marū tagutáma uēxcū tūxū nigu, rū tagutáma uēxcūarū naīanexū

tüxü nangux. ¹⁷ Erü yima pecaduarü ütanüçex yucü i ngëma tochi-caxüxtawa ngëxmacü, rü tá aixcüma meã tüxna nadau ñoma carnerugüna idauxürüü. Rü nawa tá tüxü nagagü i ngëma dexaarü chuxchuxügü i maxëerüü. Rü Tupana tá tüxü ñnanapi i guxüma i tümagüüxëtü", ñnagürü.

8

Yema norü 7 ga ñaxtachipëxeruüchiga rü yema buetare ga uirunaxcëxchiga

¹ Rü yexguma guma pecaduarü ütanüçex yucü yagauyegu ga yema norü 7 ga yema poperaarü ñaxtachipëxexü, rü ngäxü ga ora nachipetüanemare ga daxüguxü ga naãnewa. ² Rü ñuxüchi nüxü chadau ga yema 7 ga Tupanaarü orearü ngeruügü ga daxüçüãx ga yexma Tupanapëxegu chigüxü. Rü wüxichigü nanayaxu ga norü corneta ga nüxna naxãxüne. ³ Rü yemawena ñnangu ga wüxi ga to ga Tupanaarü orearü ngeruü ga daxüçüãx. Rü yëma nanange ga wüxi ga norü buetare ga uirunaxcëx ga pumaraarü gutëxeruü. Rü yema uirunaxcëx ga pumaraarü gutëxeruütaxmüpëxegu nachi. Rü nanayauxtëxe ga taxü ga pumara ga nüxna naxãxü na yema tochiçaxüpëxewa yexmaxü ga pumaraarü gutëxeruütaxmüwa yaguãxüçex, na yemaãcü Tupanana naxãxüçex ga yema pumaratëxe na yema pumaraema rü wüxigu Tupanaarü duüxügüarü yumüxëmaã Tupanaxütawa nangüçex. ⁴ Rü yema pumaratëxe ga yema orearü ngeruüaxü yexmaxü rü daxü naxüëma wüxigu namaã ga Tupanaarü duüxügüarü yumüxëgü ñuxmata Tupanaxütawa nangu. ⁵ Rü ñuxüchi ga yema orearü ngeruü rü nanayaxu ga yema buetare ga pumaraarü gutëxeruü. Rü yema pumaraarü gutëxeruütaxmüwa nanayaxu ga äwe ga naicü, rü gumamaã nanaxüacu ga guma buetare. Rü ñuxüchi ñoma ga naãneetügu nanaña. Rü yexgumatama poraãcü naduruächiane, rü poraãcü nicuxcuane rü nibëixbëxane rü naxüãxächiane.

Tupanaarü orearü ngeruügü ga daxüçüãxarü cornetachiga

⁶ Rü yexguma ga yema 7 ga Tupanaarü orearü ngeruügü ga daxüçüãx ga icornetaãxü, rü nügü ñnamexëëgü na nagu yacuegüxüçex. ⁷ Rü wüxi ga yema Tupanaarü orearü ngeruü rü nüxira nayacue ga norü corneta. Rü yexgumatama ñoma ga naãneetügu narüyi ga gáuxü rü üxüema ga nagümaã äëxü. Rü wüxi ga yema norü tomaëxpüxarü üye ga ñoma ga naãne rü nixa. Rü yexgumarüü ta wüxi ga yema norü tomaëxpüxarü üye ga naãxneçü rü nixa. Rü guxüma ga natüane rü nixae. ⁸ Rü yema norü taxre ga Tupanaarü orearü ngeruü rü nayacue ga norü corneta. Rü ñuxüchi wüxi ga taçü ga taxüchixü ga namëxpüneraüxü ga iyauxraxü, rü yexma taxtü ga taxügu nanaña. Rü wüxi ga yema norü tomaëxpüxarü üye ga taxtü rü nagüxü nananguxuchi. ⁹ Rü wüxi ga yema norü tomaëxpüxarü üyetücumü ga yema taxtüwa maxëxü, rü nayue. Rü yexgumarüü ta wüxi ga yema norü tomaëxpüxarü üyetücumü ga wapurugü, rü ñnayı. ¹⁰ Rü yema norü tomaëxpüx ga Tupanaarü orearü ngeruü, rü nayacue ga norü corneta. Rü ñuxüchi wüxi ga taxüchicü ga woramacuri ga taemaxüchicü rü daxüwa narüngu. Rü wüxi ga omü ga ixaxürüü nixi. Rü nagu nangu ga wüxi ga yema norü tomaëxpüxarü üye ga natügü rü natüxacügü. ¹¹ Rü guma woramacuri rü üxüxü nixi ga naega. Rü wüxi ga yema norü tomaëxpüxarü üye ga guxüma ga dexä rü naxüxchiü. Rü muxüma ga duüxügü rü yema dexäwa nayue yerü naxüxchiü. ¹² Rü yema norü ägümücü ga Tupanaarü orearü ngeruü rü nayacue ga norü corneta. Rü wüxi ga yema norü tomaëxpüxarü üye ga üëxcü rü nixo. Rü yexgumarüü ta wüxi ga yema norü tomaëxpüxarü üye ga

tauemacü rü woramacurigü rü ětagü rü nixo. Rü yemaäcü wüxi ga yema norü tomaĕxpüxarü üye ga guxüma ga yema rü naxĕâne. Rü ga ngunecü rü ägümücü ga ora naxĕâne. Rü ga chütacü rü ägümücü ga ora nataxuma ga tauemacü rü bai ga woramacurigü rü bai ga ětagü. ¹³ Rü yemawena ichadawenü rü nüxü chaxínü ga wüxi ga İyü ga daxügu İxexeüxü ga tagaäcü ñaxü:

“Nangechaütümüügü i ngĕma duüxügü i yea pecaduäxü i naânewa maxĕxü i ngĕxguma yacuegüägu tá ya norü cornetagü i ngĕma togü i tomaĕxpüx i Tupanaärü orearü ngeruügü”, ñaxü.

9

¹ Rü yema norü wüximĕĕxpüx ga Tupanaärü orearü ngeruü, rü nayacue ga norü corneta. Rü nüxü chadaü ga wüxi ga woramacuri ga daxüwa rüngucü ga ñoma ga naânegu ngucü. Rü guma woramacuri nanayaxu ga yema äxmaxü ga taguma iyacuáxüärü chawi. ² Rü nayawäxna ga yema äxmaxü ga taguma iyacuáxü. Rü yema inayagoema ga caxixü ñoma wüxi i taxü i uxearü caxixüürü. Rü yema caxixü rü nanaxĕĕmaxĕĕ ga üĕxcü. ³ Rü yema caxixüwa İnachoxü ga munügü ga naâneĕtugu yixü. Rü yema munügü rü nanayauxgü ga pora ga nüxna naxäxü na ñoma tuxchinawerüü duüxügüxü nachixücĕx. ⁴ Rü yema munümaä nüxü nixu na tama natüanexü nachixexĕĕxücĕx rü bai i tacü rü nanetügü rü bai i tacü rü naĕgu. Natürü nanamu na nachixexĕĕgüäxücĕx ga yema duüxügü ga tama Tupanaärü cuĕxruü nacatüwa yexmaxü. ⁵ Natürü tama nanamu na yema duüxügüxü nadĕixücĕx. Natürü nanamu na ngüxü nüxü yangexĕĕmaregüxücĕx ga wüximĕĕxpüx ga tauemacü. Rü yema ngüxü ga nüxü yangexĕĕgüxü, rü ñoma tuxchinawe duüxügüxü chixüürü nixi. ⁶ Rü ngĕma ngunexügüga rü duüxügü tá naxcĕx nadaugü na nayuxü, natürü täütama nayue. Rü woo nanaxwĕxegüxüchi na nayuxü, natürü taxucürüwatama nayue. ⁷ Rü yema munügü rü ñoma cowaru i guerawa İxüürü nixigü. Rü naĕruwa nüxü nayexma ga tacü ga ñoma ngĕxcueruü ga uirunaxcĕxruü ixigüxü. Rü nachiwe rü nanaduüxüchieraxügü. ⁸ Rü nayaegü rü ñoma ngeäxyaerüü nixigü. Rü napütägü rü ñoma aipütägürüü nixigü. ⁹ Rü naxünewa nayexma ga norü poxüruü ga fierunaxcĕx. Rü naxpĕxatügüga rü ñoma muxüchine ya caru ya guerawa cowaru tügünegarüü ixixü. ¹⁰ Rü nareexügü rü ñoma tuxchinawerüü naxānegu. Rü yema naneguwa rü naxāguchata na wüximĕĕxpüx ya tauemacü duüxügüxü ngüxü yangexĕĕgüxücĕx. ¹¹ Rü yema munügüärü äĕxgacü, rü yema äxmaxü ga taguma iyacuáxüärü dauruü nixi. Rü Yudiugügawa ga yema munügüärü äĕxgacü, rü Abadóü nixi. Rü Griégugügawa rü Apolióü nixi. Rü ngĕma rü: “Chixexĕĕruü”, ñaxüchiga nixi. ¹² Rü yexma nayacuĕx ga yema nüxüraüxü ga chixexü ga taxü, natürü İnayaxüma ga to ga taxre. ¹³ Rü yema norü 6 ga Tupanaärü orearü ngeruü rü nayacue ga norü corneta. Rü nüxü chaxínü ga wüxi ga naga ga yema Tupanapĕxewa yexmaxü ga uirunaxcĕx ga pumaraarü gutĕxeruütaxmüwa inaxüxü. ¹⁴ Rü yema naga rü nanamu ga yema orearü ngeruü ga cornetaäxü, rü ñanagürü nüxü:

“İYawĕgüxü i ngĕma ägümücü i orearü ngeruügü i Chatanáärü ixigüxü i taxtü i Eufrägegu ngäxügüxü!” ñanagürü. ¹⁵ Rü yemaäcü niwĕgüxü ga yema ägümücü ga orearü ngeruügü na nadaiäxücĕx ga wüxi ga yema norü tomaĕxpüxarü üyetücumü ga duüxügü. Yerü ga yema orearü ngeruügü rü woetama yemacĕx İnamemaregü na yema ora rü yema ngunexü rü guma tauemacü rü guma taunecü nadaiäxücĕx ga yema duüxügü. ¹⁶ Rü nüxü

chaxînú na ñuxre na yiîxû ga yema orearû ngeruûgûarû churaragû ga cowaruétûgu îxû. Rû 200 miyónegû nixîgû. ¹⁷ Rû yemaâcü nixî ga nüxû chadauxû ga yema cowarugû ga yexguma changoxetûgu. Rû yema churaragû ga yema cowaruétûgu îxû rû nüxû nayexma ga norû ngêxcuxûnêxû ga poxûruû îxîxû ga ñoma üxûxetürûü iyauraxû. Rû yema poxûruû rû nixâmatû rû nidaumatû rû niyêuxmatû rû nidexmatû. Rû yema cowaruerugû rû ñoma aierurûü nixîgû. Rû naâxgûwa înauxû ga üxüema rû caxixû rû azufre. ¹⁸ Rû wüxi ga norû tomaêxpûxarû üyetücumû ga duûxûgû rû nayue namaâ ga yema tomaêxpûx ga chixexêêruû ga üxüema rû caxixû rû azufre ga yema cowarugûêxwa îchoxûxû. ¹⁹ Yerû ga yema cowarugû rû naâxwa rû nareexûwa nixî ga nüxû nayexmaxû ga norû pora na duûxûgûxû nadêjüxcêx. Yerû ga nareexûgû rû ñoma âxtaperûü nixîgû, rû yemamaâ nangôx ga duûxûgû rû ngûxû nüxû ningexêê rû nanadai. ²⁰ Natürû ga yema togû ga duûxûgû ga tama yema poxcuruûgûmaâ yuexû, rû tama nüxû narûxoe ga yema chixexûgû ga naxûgûxû. Rû tama nüxû narûxoe na nüxû yacuêxûügûxû ga ngoxogû rû norû tupananetachicünêxâgû ga uirunaxcêx rû dîêrumünaxcêx rû cobrenaxcêx rû nutagünaxcêx rû naînaxcêx. Rû yemaâcü nüxû nicuêxûügûama ga yema norû tupananetachicünêxâgû ga ngearû maxûâxû rû tama nüxû dauxû rû tama nüxû înuxû rû tama îxûxû. ²¹ Rû tama nüxû narûxoe na namáetagûxû, rû yayuüexû, rû nangêâêgûxû rû nangîtêêxgûxû.

10

Orearû ngeruû ga nüxû yexmaxû ga popera ga idixixûchiga

¹ Rû nüxû chadau ga wüxi ga to ga Tupanaârû orearû ngeruû ga daxûguxû ga naânêwa îrûxixû. Rû wüxi ga caixanexûârû ngâxûwa nayexma, rû wüxi ga chirapa naétûgu nabo. Rû nachiwe rû ñoma üêcxürûü niyauracüü. Rû naparagû rû ta ñoma üxüemaruû niyauracüü. ² Rû naxmêxwa nüxû nayexma ga wüxi ga poperaxacû ga îwêgûxû. Rû norû tûgûneparâ rû taxtû i taxûetûgu nachicutû. Rû norû toxwepara rû waixûmüânêgu nachicutû. ³ Rû ñuxûchi ga nüma rû tagaâcü aita naxû ñoma wüxi ya ai ya tagaâcü aita ücürûü. Rû yexguma aita naxûxgu rû 7 êxpûxcûna naduruâchiane. ⁴ Rû yexguma yema 7 êxpûxcûna na naduruâchianexûguwena rû chanaxûmatûchaû. Natürû nüxû chaxînú ga wüxi ga naga ga daxûguxû ga naânêwa inaxûxû ga ñaxû choxû:

“¡Tâxû i cunangoxêêxû i ngêma 7 i duruanexû nüxû ixuxû! ¡Rû ngerûma na cunaxûmatûxû!” ñaxû choxû. ⁵ Rû ñuxûchi ga yema Tupanaârû orearû ngeruû ga nüxû chadauxû na taxtû ga taxûetûgu rû waixûmüetûgu nachicutûxû, rû daxû naxunagû ga norû tûgûnechacüü. ⁶ Rû inaxuneta nagagû ga Tupana ya yima guxûguma maxûcü ya yima naxûcü i daxûguxû i naâne rû ñoma i naâne rû taxtû i taxû rû guxûma i tacû nawa ngêxmagûxû. Rû ñanagürû ga yema orearû ngeruû:

“Ñuxma rû marû tãütâma nuxcü ningu i ngêma Tupana nüxû ixuxû. ⁷ Erû ngêxguma nawa nanguxgu na ngêma norû 7 i Tupanaârû orearû ngeruû inaxûgûxû na yacueâxû ya norû corneta, rû ngêxguma tá nixî i yanguxû ga yema noxri êxûguxû ga Tupanaârû uneta, yema nuxcûmaügûxû ga norû orearû uruügûmaâ nüxû yaxuxû”, ñanagürû. ⁸ Rû yema naga ga noxri nüxû chaxînúxû ga daxûguxû ga naânêwa inaxûxû, rû wenaxârû chomaâ nidexa. Rû ñanagürû choxû:

“¡Naxûtawâ naxû i ngêma Tupanaârû orearû ngeruû i taxtû i taxûetûgu rû waixûmüânefûgu chicutûxû! ¡Rû nüxna nayaxu i ngêma poperaxacû i

marü íiwëgüxü i naxmëxwa ngëxmaxü!" ñanagürü. ⁹ Rü naxütawa chaxü ga yema orearü ngerüü, rü nüxna naxcëx chaca ga yema poperaxacü na choxna naxãaxüçëx. Rü nüma rü ñanagürü choxü:

"Ñaa nixí. ¡Rü nayaxu rü nangöx! Rü cuëxwa rü berurerüü tá namaicura. Natürü cuanüwa rü tá nanaxüxãchi", ñanagürü choxü. ¹⁰ Rü yema orearü ngerüüméxëwa chanayaxu ga yema poperaxacü, rü chanangöx. Rü chauëxwa rü berurerüü namaicura. Natürü yexguma chanangöxguwena rü chauanüwa rü nanaxüxãchi rü changüxneca. ¹¹ Rü ñuxüchi chomaã nüxü nixu, rü ñanagürü choxü:

"Name nixí na wenaxärü Tupanaärü orexü quixuxü namaã i muxüma i nagüxüraüxü i duüxügü, rü muxüma i nachiuñanecüãxgü i duüxügü, rü muxüma i duüxügü i to i nagawa idexagüxü, rü muxüma i nachiuñanegüarü äëxgacügü", ñanagürü choxü.

11

Taxre ga orearü uruüchiga

¹ Rü yemawena chanayaxu ga wüxi ga dexnemenëxã ga ngugüruü ixixüne ga choxna naxãxüne. Rü guma choxna naxãcü rü ñanagürü choxü:

"¡Inachi rü nangugü ya yima Tupanapata rü ngëma pumaraarü gutëxeruütaxmü! ¡Rü yaxugü rü ñuxre yüxü i ngëma duüxügü i ngëma Tupanaxü icuëxüügüxü! ² ¡Natürü ngëma naãxtü ya Tupanapata, rü täütáma cunangugü! Erü ngëma duüxügü i tama Tupanaãxü yaxögüxüna marü nanaxã. Rü nümagü rü tomaëxpüx ya taunecüarü ngãxü tá chixexü namaã naxügü ya yima ñane ya üünene ya Yerucharéü. ³ Rü choma rü tá chanamu i taxre i chorü orearü uruügü na 1,260 i ngunexü duüxügümaã nüxü yaxugüçëx i chorü ore. Rü nümagü i ngëma taxre rü tá niwëxchiru na ngëmawa duüxügü nüxü cuëxgüçëx na ngechaü nüxü nguxgüxü", ñanagürü choxü. ⁴ Rü ngëma taxre i orearü uruügü nixí i norü cuëxruü i ngëma taxre i nanetü i oribu rü ngëma taxre i weraarü üruügü i tórü Cori ya ñoma i nañeärü yora ixicüpëxewa ngëxmagüxü. ⁵ Rü ngëxguma texé chixexü namaã ügüchaügu i ngëma taxre i orearü uruügü, rü nümagü rü üxüema ya naãxwa ínacuxechinemaã tüxü tá ínagu. Rü ngëmaãcü tá inanaxoxëé i norü uwanügü. Rü ngëmaãcü tá tüxü nadai ya yixema chixexü namaã ügüchaüxë. ⁶ Rü ngëma taxre i orearü uruügü rü nüxü nangëxma i pora na íyachaxãchixüçëx ya pucü na tama napuxüçëx i guxüma i ngëma 1,260 i ngunexüügü i nagu Tupanaärü orexü yaxugüxü. Rü ngëxgumarüü ta nüxü nangëxma i pora na nagüxü yaxixëëgüãxüçëx i dexá. Rü ngëxgumarüü ta nüxü nangëxma i pora na ñoma i nañewa namugüãxüçëx i nagüxüraüxü i poxcuruügü na ngëmaãcü ngüxü duüxügüxü yangexëëgüçëx i ngëxguma ngëma taxre naxwëxëgü. ⁷ Natürü ngëxguma ngëma taxre i orearü uruügü naguxëëgügu na nüxü yaxugüxü i Tupanaärü ore, rü ngëma ngoxo i ngëma äxmaxü i taguma iyacuáüwa íxüxüxü, rü tá ngëma taxrena nayuxu. Rü tá nüxü narüyexera, rü tá nanadai. ⁸ Rü ngëma naxünegü i ngëma taxre rü tá yima ñane ga tórü Cori nawa curuchawa ipotane ya Yerucharéüärü ítamügüwa nawogü. Rü yima ñane rü nachixe rü ngëmacëx Chodomaärü ñanemaã rü Equituanemaã nanaxugü. ⁹ Rü tomaëxpüx i ngunexüärü ngãxü rü muxüma i nagüxüraüxü i duüxügü rü muxüma i guxü i nachiuñanecüãx i duüxügü rü muxüma i duüxügü i to i nagawa idexagüchigüxü, rü tá nüxü nadaugü i naxünegü. Rü täütáma nanaxwëxëgü na texé inatëxgüxü.

¹⁰ Rû ngêma duûxûgû i ñoma i nañewa maxêxû rû tá nataãêgû na marû nayuxê i ngêma taxre. Rû ngêma na poraãcû nataãêgûxûchixû rû tá nûgûna âmare naxâgû, yerû yema taxre ga orearû uruûgû rû poraãcû nanachixewe rû naãêwa nananguxêêgû. ¹¹ Natürû yema tomaêxpûx ga ngunexûârû ngâxûguwena, rû Tupana wenaxârû nanamaxêxêê ga yema taxre. Rû wenaxârû ínarûdagû. Rû guxûma ga yema duûxûgû ga nûxû daugûxû rû poraãcûxûchi namuûê. ¹² Rû ñuxûchi ga yema taxre ga orearû uruûgû, rû nûxû naxînuê ga wûxi ga naga ga tagaãcû daxûguxû ga nañewa inaxûxû ga ñaxû:

“¡Nuã daxûwa pexî!” ñaxû. Rû yemaãcû ga nûmagû rû wûxi ga caixanexûgu daxûguxû ga nañewa naxî. Rû norû uwanûgû rû yema nûxû narûdaunû. ¹³ Rû yexgumatama poraãcû naxîãxâchiane. Rû wûxi ga yema norû 10 arû ùye ga guma îâne, rû niwêxgû. Rû 7,000 ga duûxûgû nayue namaã ga yema îãxâchiane. Rû yema togû ga duûxûgû ga maxêxû rû poraãcûxûchi namuûê. Rû Tupana ya daxûguxû i nañewa ngêxmacûxû nicuèxûûgû. ¹⁴ Rû yexma nayacuèx ga yema norû taxre ga chixexû. Natürû paxa tá ínangu i ngêma norû tomaêxpûx íxîxû.

Guma norû 7 ga cornetachiga

¹⁵ Rû yema norû 7 ga Tupanaârû orearû ngeruû, rû nayacue ga norû corneta. Rû nayexma ga nagagû ga tagaãcû daxûguxû ga nañewa inaxûgûxû ga ñagûxû:

“Ñuxma rû yima mecû na namaã inacuèxgûxû i ñoma i naãne, rû nûma nixî ya tórû Cori ya Tupana rû Nane ya Cristu. Rû nûma rû guxûgutâma namaã inacuèxgû”, ñagûxû. ¹⁶ Rû nûmagû ga yema 24 ga âêxgacûgû ga norû tochicaxûgûwa rûtogûxû ga Tupanapêxewa, rû yexma nanangücuchitanû, rû Tupanaxû nicuèxûûgû. ¹⁷ Rû ñanagûrûgû:

“Pa Torû Cori ya Tupana ya Guxûârû Yexera Poracûx, cuma rû woetama cuyexmaêcha, rû ñuxma rû ta cungêxmaêcha. Rû moxê cuxna taxâgû, erû marû cugûmêxêwa cunangêxmaxêê i guxûma, rû marû icunaxûgû na namaã icucuáxû. ¹⁸ Rû ngêma duûxûgû i tama cuxrû íxîgûxû rû poraãcûxûchi nanuê, natürû nawa nangu i ngêma ngunexû i naga tá cunapoxcuexû. Rû ngêxgumarûû ta marû nawa nangu na nûxû quicagûxû i guxûma i duûxûgû i yuexû. Rû marû nawa nangu na nûxû cunaxûtanûxû i ngêma curû duûxûgû i curû orearû uruûgû, rû ngêma duûxûgû i cupêxewa imexû, rû guxûma i ngêma duûxûgû i cuxû muûêxû i yaexû rû buexû. Rû marû nawa nangu na icuyanaxoxêêxû i ngêma duûxûgû i nachixexêêxû i ñoma i naãne”, ñanagûrûgû. ¹⁹ Rû ñuxûchi Tupanapata ga daxûguxû ga nañewa yexmane, rû niwâxna. Rû yema norû aixepewa nûxû chadau ga yema baú ga Tupanaârû uneta ga nutagu ûmatûxû. Rû nibêxbêxane, rû poraãcû nicuxcuane, rû naxîãxâchiane rû poraãcû gaúxû narûyi.

12

Wûxi ga nge rû wûxi ga coya ga taxû

¹ Rû ñuxûchi daxûwa nangox ga wûxi ga cuèxruû ga taxû. Rû iyexma ga wûxi ga nge ga uèxcürûû iyaurachirucûcû. Rû ngítûûcutûwa nayexma ga taemacû. Rû yema ngîrû ngêxcueruû ga ngîruwa yexmaxû, rû 12 ga woramacurigû nixîgû. ² Rû yema nge rû itacharaû. Rû poraãcû aita ixû yerû íxîraxacûchaû rû poraãcû inguxnecaxûchi. ³ Rû yemawena daxûwa nangox ga to ga cuèxruû. Rû yema nayexma ga wûxi ga coya ga taxûchixû ga dauxû ga 7

ga naëru nüxü yexmaxü rü 10 ga naxchatacuxre. Rü wüxichigü ga naëruwa rü nüxü nayexma ga norü ngëxcuerü. ⁴ Rü nareexümaã inayatüchigü ga wüxütücumü ga norü tomaëxpüxaru üye ga woramacurigü, rü ñoma ga naãneetüga nanawogü. Rü yema coya rü ngipëxegu nayachi ga yema nge ga íraxacüchaücü, yerü tüxü nangõxchaü ga guxema ngíxácüxe ga yexguma tabuxgu. ⁵ Rü yema nge rü írixacaxü, rü nayatü. Rü nüma rü tá guxü i nachüíãneärü äëxgacü nixí, rü tá namaã inacüex. Natürü ga guma ngíne rü Tupana ngixna nanayaxu rü yema ínatoxüwa nanaga. ⁶ Rü yema nge rü wüxi ga nachica ga ngextá taxúema íxãpataxüwa íña. Rü yéma Tupana ngíxcëx nanamexëë ga wüxi ga ngíchica na yéma ngíxna nadauxücëx rü ngíxü naxüwemüxücëx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaärü orearü ngeruügüarü äëxgacü íxícu rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü rü norü orearü ngeruügü. Rü yema coya rü ñuxüchi norü orearü ngeruügü i chixexü rü poraãcü Tupanaärü orearü ngeruügümaã nügü nadai. ⁸ Natürü ga yema coya rü norü orearü ngeruügü rü tama Tupanaärü orearü ngeruügüxü narüporamaëgü. Rü ñuxüchi ga yema coya rü norü orearü ngeruügü rü nangechica ga daxüguxü ga naãnewa. ⁹ Rü yemaãcü ínatëxüchi ga daxüguxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixí i guxüma i ñoma i naãneçüãx i duüxügüxü nawomüxëëxü. Rü nüma rü norü orearü ngeruügümaã ñoma ga naãnegu narüwoü. ¹⁰ Rü ñuxüchi nüxü chaxínü ga wüxi ga naga ga daxüguxü ga naãnewa tagaãcü ñaxü:

“Ñuxma rü marü nawa nangu na tóru Tupana rü norü duüxügüxü namaxëxëëxü. Rü ñuxma rü nüma tüxü nüxü nadauxëë na guxüärü yexera naporaxü rü guxüärü äëxgacü yíixü. Rü Nane ya Cristu rü marü tüxü nüxü nadauxëë na guxümaã inacüaxü. Yerü marü daxüguxü ga naãnewa ínatëxüchi ga Chataná ga ngunecü rü chütacü tóru Tupanapëxewa taeneëgüxü yeüçürü ixuechaxü. ¹¹ Rü nümagü ga yema taeneëgü, rü marü Chatanáxü narüyexeragü nagügagu ga guma pecaduarü útanüçëx yucü rü nagagu ga Tupanaärü ore ga nüxü yaxugüxü. Yerü ga nümagü rü tama nayanuxügü ga norü maxü, rü ínamemaregü na Tupanacëx nayuexü. ¹² ¡Rü ngëmacëx petaãëgü i guxáma i pema i daxüguxü i naãnewa ngëxmagüxe! ¡Natürü pengechaltümüügü i pema i yea naãne i pecaduãxüwa ngëxmagüxe rü taxtü i taxüwa ngëxmagüxe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü ínayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu ícúxü rü yexguma nügü yacuëxächigu ga ñoma ga naãnegu na nataëxü, rü ngíwe ningëchigü ga yema nge ga íraxacücü. ¹⁴ Natürü ga Tupana rü ngíxü naxüxpexatü ga yema nge. Rü nanaxüyüpexatügüraxü. Rü yemaãcü nachica ga ngextá taxúema íxãpataxüwa íña naxchaxwa ga yema coya ga Chataná nagu ícúxü. Rü yema nachicawa nixí ga Tupana ngíxna dauxü, rü ngíxü üwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüëxwa ínaxüxüxëë na wüxi ga natü naxüxüçëx, rü yema natümaã ngíxü yachaxëëxüçëx ga yema nge. ¹⁶ Natürü ga waixüümü rü ningëx na iyachexëëaxüçëx ga yema dexá ga coya nügüëxwa íxüxüxëëxü. ¹⁷ Rü ñuxüchi ga yema coya ga Chataná, rü poraãcüxüchima ngímaã nanu ga yema nge. Rü ínixü na nügü namaã yadëixüçëx ga yema togü ga ngíxácügü ga yema nge. Rü ngëma ngíxácügü i

ngēma coyamaã nügü dèixü, rü ngēma nixī i ngēma duüxügü i meã Tupanaärü orega ñnüëxü rü meã yaxögüechaxü i Ngechuchu ya Cristuarü ore i aixcüma ixixü. Rü ñüxüchi ga yema coya rü norü numaã taxtü ga taxüñnacügu nayarüñu.

13

Taxre ga ngoxogüchiga

¹ Rü nüxü chadau ga wüxi ga ngoxo ga taxü ga taxtügu ññüächixü ga 7 eruxü rü 10 chatacuxrexü. Rü wüxichigü ga naxchatacuxrewa rü nüxü nayexma ga norü ngëxcuerüñ. Rü naërugügu naxümatü ga ñuxre ga naegagü ga Tupanamaã guxchigagüxü. ² Rü yema ngoxo ga nüxü chadauxü, rü wüxi ga airüñ nixī. Rü naxmëxgü rü chatü ga taxüñmëxgürüñ nixī. Rü naãx rü wüxi ga aiëxrüñ nixī. Rü yema coya ga Chataná rü yema ngoxoxü naporaxëë na naxrüñ naporaxüçëx rü naxrüñ ãëxgacü yïixüçëx na ñoma ga naãnemaã inacüáxüçëx. ³ Rü wüxi ga naëruwa ga yema ngoxo, rü nüxü nayexma ga wüxi ga taxü ga norü oxri ga namaã nayuxchaüxü. Natürü ga yema norü oxri rü nüxü nixë, rü naxçëx nitaane. Rü guxüma ga ñoma ga naãnecüãx ga duüxügü rü poraãcü yema ngoxomaã nabaixächie, rü nawe narüxī. ⁴ Rü ga duüxügü rü yema coya ga Chatanáxü nicüëxüñgü yerü yema ngoxoxü naporaxëë na ãëxgacü yïixüçëx. Rü yexgumarüñ ta yema ngoxoxü nicüëxüñgü, rü ñanagürügü:

“¿Texé tangëxma ya ñaã ngoxorüñ poraxe? ¿Rü texé tapora na namaã tügü tadèixü?” ñanagürügü. ⁵ Natürü ga Tupana rü tama yema ngoxona nanachüxu na nügü yacuëxüñxüçëx rü ñacü Tupanamaã yaxügüñxüçëx rü ãëxgacü na yïixüçëx ga 42 ga tauemacü. ⁶ Rü yemaãcü chixexü naxü ga yema ngoxo. Rü poraãcü ñacü Tupanamaã nixügü. Rü Tupanamaã naguxchiga, rü napatamaã rü ta naguxchiga, rü tümamaã naguxchiga ya guxäma ya yixema daxügüñ i naãnewa ngëxmagüxe. ⁷ Rü yema coya ga Chataná rü yema ngoxoxü naporaxëë na Tupanaärü duüxügümaã nügü nadèixüçëx ñüxmatáta tüxü nayexera. Rü ãëxgacüxü nayaxīxëë na namaã inacüáxüçëx ga nagüxüñraüxü ga duüxügü ga guxüma ga nachüñnecüãx ga nagüxüñraüxü ga nagawa idexagüxü. ⁸ Rü tá ngēma ngoxoxü nicüëxüñgü i guxüma i duüxügü i ñoma i naãnewa maxëxü i noxritama naãne üxgu ngeégagüxü nawa i norü popera ya yima pecaduarü ñtanüçëx yücü i nagu yawügüãxüñ i ngēma duüxügü i marü Tupana nüxna naxäxü i maxü i taguma gúxü. ⁹⁻¹⁰ Rü ngëxguma texé äxchixëgu, rü name nixī i naga taxīñü i ñaã tá pemaã nüxü chixuxü. Rü ngëxguma texé tümamaã naxuegugu na tüxü yayauxgüxü, rü noxtacüma tá tiyaxu. Rü ngëxguma texé tümamaã naxuegugu na tüxü yamëxgüxü, rü noxtacüma tá tüxü nimëxgü. Rü ngëmacëx ya yixema Tupanaärü duüxügü ixīgüxe, rü woo ñacü rü guxchaxü tüxü ngupetügu, rü tanaxwëxe na yaxna namaã taxīñüëxü rü tayaxögüamaxü. ¹¹ Rü yemawena nüxü chadau ga wüxi ga to ga ngoxo ga taxrechatacuxrexü ga waixüñmüãnewa íxüñxüxü. Rü yema naxchatacuxre rü ñoma carneruchatacuxrerüñ nixī. Natürü ga naga rü wüxi ga coya ga taxüchixüñgarüñ nixī. ¹² Rü yexguma yema nüxüñraüxü ga ngoxopëxewa nayexmagu, rü naxrüñtama napora. Rü ñoma ga naãnemaã inacüëx, rü nanamu ga ñoma ga naãnewa maxëxü ga duüxügü na yema nüxüñraüxü ga ngoxo ga ixëärü oxriáxüñü na yacuëxüñgüñxüçëx. ¹³ Rü yema ngoxo nanaxü ga taxü ga cuëxruñgü ga duüxügü tama nüxü cuáxü na naxügüãxü. Rü daxüwa nanayixëë ga üxü, rü ñoma ga naãnegu

nayi napêxewa ga duîxûgü. ¹⁴ Natürü ga Tupana rü tama yema ngoxona nanachuxu na ñoma ga naãnewa maxêxü ga duîxûgüxü nawomüxêxü namaã ga yema cuèxruügu ga yema nüxîraüxü ga ngoxopêxewa naxüxü. Rü yemaäcü ga yema ngoxo rü duîxûgüxü namu na naxügüãxücêx ga naxchicünêxã ga yema nüxîraüxü ga ngoxo ga taramã chexexü rü poraäcü rüxóxü rü tama yuxü. ¹⁵ Rü Tupana rü tama yema to ga ngoxona nanachuxu na namaxêêãxücêx ga yema nüxîraüxü ga ngoxochicünêxã. Rü yemaäcü ga yema ngoxo rü nanamaxêê ga yema naxchicünêxã na yadexaxücêx rü na nadaiaüxücêx ga guxüma ga yema duîxûgü ga tama nüxü icuèxüügüxü. ¹⁶ Rü yexgumarüü ta guxüma ga duîxûgüxü namu na norü tügünemêxêwa rü êxna nacatüwa nüxü na nayexmaxücêx ga wüxi ga cuèxruü ga yema ngoxoéga ixixü. Rü yemaäcü nanamu ga guxüma ga duîxûgü rü woo buxü rü êxna yaxü, rü woo duîxûgü i muärü dîeruãxgüxü rü êxna ngearü dîeruãxgüxü, rü woo duîxûgü i ngearü coriãxgüxü rü êxna duîxûgü i ixãärü coriãxgüxü. ¹⁷ Rü taxucürüwa texé tümaärü tacücêx tataxe rü êxna tümaärü tacümaa tataxe ga yexguma tümaärü tügünemêxêwa rü êxna tümacatüwa tüxü natauxgu ga yema ngoxoéga rü êxna yema ngoxoégarü cuèxruü ga número. ¹⁸ Rü ñaã orexü na icuáxücêx, rü tanaxwêxe na tüxü nangêxmaxü i tóru cuèx. Rü yíxema tüxü nangêxmaxê i tümaärü cuèx, rü name nixi i tanangugü i ngêma número i ngêma ngoxoéga ixixü. Erü ngêma número rü wüxi i yatüégachirêx nixi. Rü ngêma número rü 666 nixi.

14

Yema 144,000 ga duîxûgüarü wiyae

¹ Rü yemawena ichadawenü, rü nüxü chadau ga guma pecaduarü ütanücêx yucü ga guma mëxpüne ga Siðügu ägeganeütügu chicü. Rü naxütawa nayexma ga 144,000 ga duîxûgü ga nacatüwa ixãegaxü namaã ga guma pecaduarü ütanücêx yucüéga rü Nanatü ya Tupanaega. ² Rü ñuxüchi nüxü chaxinü ga wüxi ga naga ga tagaxü ga daxüguxü ga naãnewa inaxüxü ga ñoma taxü i cotüna i chuchchuxügarüü ixixü rü ñoma poraäcü yaduruanexürüü ixixü rü ñoma muxüchixü i duîxûgü i arpawa ípaxetagüxürüü ixixü. ³ Rü yema 144,000 ga duîxûgü rü nagu nawiyaeü ga wüxi ga yexwacaxüxü ga wiyae napêxewa ga Tupanaärü tochicaxü rü napêxewa ga yema ägümücü ga daxücüãx ga maxêxü rü napêxewa ga yema 24 ga äëxgacügü. Rü taxucürüwama texé ga togue nüxü tacüxéga ga yema wiyae. Rü yema 144,000 ga duîxûgüxícatama nixi ga nüxü cuèxgüxü. Rü yema nixi ga Tupana ñoma ga naãnewa deixü na namaxêêãxücêx. ⁴ Rü yema nixi ga duîxûgü ga tama ñoma ga naãnearü ngüchaü i chixexümaa nügu äñächiarü maxüãxgüxü rü tama nüxü rüxoexü na Tupanaãxü yaxögüãxü. Rü nümagü rü yima Tupana Nane ga pecaduarü ütanücêx yucüwe narüxü i ngextá inaxüxüwa. Rü yemagü nixi ga ñoma ga naãneçüãxtanüwa nüxira Tupana naxcêx taxexü na noxrü rü Naneärü duîxûgü i üünexü yixigüxücêx. ⁵ Rü yematanüwa rü taguma texé nüxü taxinü na doraxü yaxugüxü, erü Tupanapêxewa rü nataxuma i norü chixexü.

Orearü ngeruügu ga daxücüãxärü orechiga

⁶ Rü ñuxüchi nüxü chadau ga wüxi ga to ga orearü ngeruü ga daxüguxü ga naãnegu íxexüxü ga iyangexü ga Tupanaärü ore i guxügutáma ixixü, na guxü i nachüãneçüãxgümaa rü nagüxüraüxü i duîxûgümaa rü guxüma i duîxûgü i nagüxüraüxü i nagawa idexagüxümaa nüxü yaxuxücêx. Rü

yemaácü inayange ga yema Tupanaärü ore na guxüma i ñoma i nañewa maxëxü i duüxügümaä nüxü yaxuxücëx. ⁷Rü tagaäcü ñanagürü:

“¡Nüxü pemuüë ya Tupana rü nüxü picuëxüüügü! Erü marü nawa nangu na guxüma i duüxügüna naçaxü. ¡Rü nüxü picuëxüüügü ya yima naxücü i daxüguxü i naäne rü ñoma i naäne rü taxtü i taxü rü guxüma i natüxacügü!” ñanagürü. ⁸Rü yemawena nangox ga to ga orearü ngeruü ga daxüçüäx, rü ñanagürü:

“Marü nagu nayarüchixe ya yima ñäne ya taxüne ya Babiróniä, rü nagu napogüe rü nayawëxtaügüxëë ya norü ñgü. Yerü yema ñanecüäx rü nanachix-exëë ga guxüma ga to ga nachüñanecüäx ga duüxügü. Rü guxüma ga yema duüxügüxü namu na naxügüäxücëx ga yema chixexü ga guma ñanewa naxügüxü ga Tupanapëxewa poraäcü chixexü”, ñanagürü. ⁹⁻¹⁰Rü yemawena nangox ga to ga orearü ngeruü ga tagaäcü ñaxü:

“Ngëxguma chi texé nüxü icuëxüüügu i ngëma ngoxo rü naxchicünëxäxü ticuëxüüügu rü tügü itaxäxgu na tümacatüwa rü êxna tümamëxëwa ngëma ngoxoégamaä tacuëxruñäxü, rü Tupana rü poraäcüxüchi tá tüxü napoxcu namaä i ngëma poxcu i guxüärü yexera ixixü i nümatama ya Tupana norü numaä namexëëxü. Rü üxümaä rü azufre i iyauraxümaä tá ngüxü tüxü ningexëë napëxewa i norü orearü ngeruü rü napëxewa ya yima Nane ga pecaduarü ütänücëx yucü. ¹¹Rü naëma ya yima üxü ya nawa Tupana ngüxü tüxü ingexëene, rü guxügutáma ngëma nicaixqueecha. Rü bai i irarüwa tá tüxü narüna i ngëma ngüxü ya yixema ngëma ngoxoxü rü ngëma ngoxochicünëxäxü icuëxüüügüxe rü tügü ixäxë na ngëma ngoxoégamaä taxäegaxü. Rü bai i ngunecü rü bai i chütacü tá tüxü narüna i ngëma ngüxü”, ñanagürü. ¹²Rü ngëmacëx ya yixema Tupanaärü duüxügü ixigüxe rü norü orega ñnëxë rü Ngechuchuaxü yaxögüxe, rü name nixi na yaxna namaä taxinüëxü rü tayaxögüamaxü ega woo çacü rü guxchaxü tüxü ngupetügu. ¹³Rü ñuxüchi nüxü chaxñü ga wüxi ga naga ga daxüguxü ga nañewa inaxüxü ga ñaxü choxü:

“¡Naxümatü i ñaä ore i tá cumaä nüxü chixuxü! Rü ñuxmaücüü tá tataäëgü ya yixema tórü Coriaxü meä yaxögüäcüma yuexe. Erü Tupanaäë i Üünexü rü ñanagürü: ‘Ngü, ngëmaäcü tá tataäëgü ya yixema, erü tá itarüngüë nüxna i tümäärü puracügü. Rü ngëma mexü i taxügüxü rü tümamaä wüxigu daxüguxü i nañewa tá naxü’”, ñanagürü.

Ñoma i nañewa nanade i ngëma duüxügü i Tupanaärü ixigüxü

¹⁴Rü ñuxüchi ichadawenü rü nüxü chadau ga wüxi ga caixanexü ga cómuxü. Rü yema caixanexüëtüwa narüto ga Tupana Nane ga duüxüxü ixicü. Rü naëruwa nayexma ga wüxi ga norü ngëxcuerü ga uirunaxcëx. Rü namëxwa nayexma ga wüxi ga cüxchi ga ínapomaguxü ga tëxexixü. ¹⁵Rü Tupanapatawa ínaxüxü ga wüxi ga to ga orearü ngeruü ga tagaäcü ñaxü nüxü ga guma caixanexüëtüwa rütocü:

“¡Inaxügü na cunadexü i ngëma duüxügü i cuxrü ixigüxü! Erü marü nawa nangu na cugüxütawa cunagagüxü, erü ngëma curü duüxügü i ñoma i nañewa ngëxmagüxü rü ínamemare na cunadexü”, ñanagürü. ¹⁶Rü ñuxüchi ga guma yema caixanexüëtüwa rütocü rü ñoma trigu i buxuxürü ñañeëtügu ngümaä nayabuächi ga norü cüxchi. Rü nanade ga yema norü duüxügü ga ñoma ga nañewa yexmagüxü. ¹⁷Rü ñuxüchi daxüguxü i nañewa ngëxmane ya Tupanapatawa ínaxüxü ga wüxi ga to ga orearü ngeruü ga nüxü nayexmacü ga wüxi ga cüxchi ga ínapomaguxü ga tëxexixcü. ¹⁸Rü yema pumaraarü

gutêxeruũtaxmüwa ínaxũxũ ga wüxi ga to ga orearũ ngeruũ ga üxümaã icuãxũ. Rũ nüma rũ tagaãcü ñanagürü nüxũ ga yema to ga orearũ ngeruũ ga yema cüxchi ga ínapomaguxcü ga tẽxechixcü nüxũ yexmaxũ:

“¡Inaxügu na cunadexũ i ngẽma duũxügu i yéa naãnewa ngẽxmagüxũ i tama Tupanaãrũ íxíguxũ! Erũ marũ nawa nangu na Tupana napoxcuexũ”, ñanagürü. ¹⁹ Rũ yema orearũ ngeruũ rũ ñoma ga naãneetügu ngĩmaã nayabuãchi ga norũ cüxchi. Rũ nayadexechi ga yema duũxügu ga tama Tupanaãrũ íxíguxũ ga ñoma ga naãnewa yexmagüxũ. Rũ wüxi ga taxũ ga nachicagu nanawocu na yexma Tupana norũ numaã nadẽjxüçex, ñoma ubagü imẽjxtüũxürü. ²⁰ Rũ yema nachica ga íãneãrũ íxpemawa yexmaxügu nanadai. Rũ guma nagü ga yéma íyaxüchicü, rũ 300 ga kilõmetru inayarübaichi, rũ wüxi ga metruarũ ngãxũ nixĩ ga norũ mátama ga guma nagü.

15

Tupanaãrũ orearũ ngeruũgü ga nüxũ nayexmaxũ ga 7 ga poxcuruũgü

¹ Rũ ñüxüchi ga daxüguxũ ga naãnewa rũ nüxũ chadau ga wüxi ga to ga taxũ ga cuẽxruũ ga namaã íbaixãchixũ. Rũ nayexma ga 7 ga orearũ ngeruũgü ga daxüçüãx ga nüxũ yexmagüxũ ga 7 ga poxcuruũ. Rũ yema poxcugu nixĩ ga yagüxũ ga norũ nú ga Tupana. ² Rũ yexgumarüũ ta nüxũ chadau ga ñoma wüxi ga nanaxtaaëtüwaraũxũ ga woruarüũ iyauraëtücüüxũ ga üxüema nawa inachixũ. Rũ yéma tayexmagü ga guxema nüxũ rüyexeraxe ga yema ngoxo rũ yema ngoxochicünexã rũ yema ngoxoéga rũ yema númeru ga yema ngoxoéga íxíxũ. Rũ yema nanaxtaaëtüraũxügu tachigü. Rũ tüxũ nayexmagü ga tümaãrũ paxetarüũgü ga arpa ga Tupana tüxna ãxũ. ³ Rũ nagu tawiyægü ga Moiché ga Tupanaãrũ duũxũ íxícuarũ wiyae. Rũ yexgumarüũ ta nagu tawiyægü ga yema wiyae ga guma Tupana Nane ga pecaduarũ ütanüçex yucuarũ íxíxũ ga ñaxũ:

“Pa Torü Cori ya Tupana ya Guxüãrũ Yexera Poracüx, nataxüchi rũ namexëchi i guxüma i ngẽma cuxüxũ. Rũ cuma rũ guxügutãma guxüma i nachiüãnegüarũ ãëxgacü quixĩ. Rũ cuma rũ aixcüma meãma namaã icucuèx rũ tagama quidora. ⁴ ¿Rũ texé tãütãma cuxũ tamuũ, Pa Corix? ¿Rũ texé tãütãma cuxũ ticuèxüü? Erũ cuma rũ cuxicatama nixĩ i üünecü quixũ. Rũ guxüma i nachiüãnecüãx rũ nuã tá naxĩ, rũ tá cuxũ nicuèxüũgü. Yerũ marũ nüxũ nadaugü na quixaixcümaxũ i guxüma i ngẽma nüxũ quixuxüwa rũ aixcüma mea cunangugüxũ i guxüma i ngẽma chixexü ügüxũ rũ ngẽma mexũ ügüxũ”,

ñanagürü ga yema wiyae. ⁵ Rũ yemawena ichadawenü rũ nüxũ chadau ga daxüguxũ ga naãnewa na yawãxnaxũ ga yema nachica ga üünexũ ga Tupanapataarũ aixepewa yexmaxũ ga ngexta namaã ínanguxüũgüxüwa ga guma nuta ga Tupanaãrũ mugü nagu ümatücü. ⁶ Rũ guma Tupanapatawa ínaxoxũ ga yema 7 ga orearũ ngeruũgü ga daxüçüãx ga nüxũ nayexmagüxũ ga yema 7 ga poxcuruũgü. Rũ naxchiru ga mexëchixümaã rũ iyauracüüxümaã nixãxchiru. Rũ yema norũ goyeremüũgü rũ uirunaxcèx nixĩ. ⁷ Rũ ñüxüchi wüxi ga yema ägümücü ga daxüçüãx ga maxüxũ, rũ wüxichigü ga yema 7 ga orearũ ngeruũgüna nanaxã ga wüxi ga copa ga uirunaxcèx ga Tupana ya guxümguma maxëchacuarũ nu i äücümaxümaã íxãacuxũ. ⁸ Rũ guma Tupanapata rũ namaã naxãacu ga yema caixema ga Tupana ya mexëchicü rũ poracüwa ne üxũ. Rũ taxucürüwama texé yexma taxücu ñüxmata nagü ga yema 7 ga poxcuruũ ga yema 7 ga orearũ ngeruũgüxũ yexmaxũ.

16

copagü ga Tupanaärü numaã ixãäcuxüchiga

¹ Rü ñuxüchi nüxü chaxĩnü ga wüxi ga naga ga tagaäcü guma Tupanapatawa inaxüxü ga ñaxü nüxü ga yema 7 ga orearü ngeruügu:

“¡Ngema pexi, rü naãneetüwa peyabagüäcu i ngëma 7 i copagü i Tupanaärü nu i äücümaxümaã ixãäcuxü!” ñanagürü. ² Rü yéma naxü ga wüxi ga Tupanaärü orearü ngeruü, rü naãneetügu nayabaäcu ga norü copa. Rü guxüma ga duüxügü ga yema ngoxoégamaã ixãegaxü rü yema ngoxochicünëxãxü icuëxüügüxü, rü nawa inayarüogü ga taixna ga nguxuchixü ga taguma ixëxü. ³ Rü yema norü taxre ga orearü ngeruü, rü taxü ga taxtüëtügu nayabaäcu ga norü copa. Rü nagüxü nananguxuchi ga dexá, rü ñoma wüxi i duüxü i texé imáxügürüü nixi ga dexá. Rü guxüma ga tacü ga taxtüwa maxëxü rü nayue. ⁴ Rü yema norü tomaëxpüx ga orearü ngeruü rü natügüëtügu rü natüxacügüëtügu nayabaäcu ga norü copa. Rü guxüma ga yema natügü rü natüxacügü, rü nagüxü nanacëxichi. ⁵ Rü ñuxüchi nüxü chaxĩnü ga yema Tupanaärü orearü ngeruü ga guxüma ga dexámaã icuáxü ga ñaxü:

“Pa Torü Cori ya Tupana ya Üüncü ya Woetama Yexmaëchacü rü Ñuxma Ngëxmaëchacü, cuma rü wüxi i mexü cuxü na ngëmaäcü dexá nagüxü cunacëxichixëëxü naxchaxwa i ngëma duüxügü. ⁶ Yerü nümagü rü nanadai ga yema curü duüxügü rü curü orearü uruügu, rü inanaba ga nagü. Rü ñuxma i cuma rü wüxi i mexü nixi i cuxüxü na ngëma dexá nagüxü cunacëxichixëëxü na nawa naxaxegüxücëx. Yerü yema nixi ga yema nanaxwëxegüxü rü yemacëx nixi ga curü duüxügüxü nadëixü”, ñaxü. ⁷ Rü nüxü chaxĩnü ga wüxi ga naga ga yema pumaraarü gutëxeruütaxmüwa inaxüxü ga ñaxü:

“Ngü, Pa Cori ya Tupana ya Guxüärü Yexera Poracüx, aixcüma nixi i namexü i ngëma cuxüxü”, ñaxü. ⁸ Rü yema norü ägümücü ga orearü ngeruü rü üëxcüëtügu nayabaäcu ga norü copa. Rü yemaäcü poraäcü nananaiemaxëë ga üëxcü na yema norü naïëmaxümaã inaguäxücëx ga duüxügü. ⁹ Rü guxüma ga duüxügü rü poraäcü nüxü nanguxema, natürü tama nüxü narüxoe ga nacüma ga chixexü rü tama Tupanaxü nicuëxüügü. Rü naguxchigagüama namaã ga Tupana ya guxüma i ngëma porcuruümaã icuäcü. ¹⁰ Rü yema norü wüximëxpüx ga orearü ngeruü, rü yema ngoxoarü tochicaxüëtügu nayabaäcu ga norü copa. Rü guxüwama ga ngextá äëxgacü iyixüwa ga yema ngoxo, rü naxëäne. Rü yema na poraäcü nüxü nangüxü ga duüxügü, rü nügü nangöörü conüäxgü. ¹¹ Natürü woo yemaäcü nüxü na nangupetüxü ga duüxügü, rü tama nüxü narüxoechaü ga yema chixexü ga naxügüxü. Natürü yema na poraäcü nüxü nangüxü ga norü taixnagü, rü naguxchigagüama namaã ga Tupana ya daxügücü. ¹² Rü yema norü 6 ga orearü ngeruü, rü yema taxtü ga Eufatéëtügu nayabaäcu ga norü copa. Rü inayache ga yema taxtü na wüxi ga nama na yixüxcëx naxcëx ga yema nachiuänegüarü äëxgacügü ga üëxcü iyarügoxüwa ne ixü. ¹³ Rü nüxü chadau rü yema coyaäxwa, rü yema nüxüraüxü ga ngoxoëxwa, rü yema to ga ngoxo ga yema orearü uruünetaxëxwa, rü wüxiëxwachigü inaxüxü ga wüxi ga naãe ga chixexü ga ñoma curururüü ixixü. ¹⁴ Rü yema ngoxoäëgü nixi ga naxügüxü ga yema taxü ga cuëxruügü ga duüxügü taxucürüwa ügüxü. Rü yema ngoxogü rü inachoxü na nangutaquëxëëgüäxücëx i guxüma i ñoma i naãnewa ngëxmagüxü i nachiuänegüarü äëxgacügü na Tupana ya Guxüärü Yexera Poracümaã nügü nadaixücëx i ngëxguma nawa nanguxgu i naãneärü

gux. ¹⁵ Natürü dücax, rü pexuãëgü erü tórü Cori ya Ngechuchu ya Cristu rü ñanagürü:

“Choma rü ngürüãchi taxúetáma choxü ñanguxëëyane íchangu, ñoma wüxi i ngítëxáxü ñinguxürüü. Rü tataãë ya yíxema ímemarexe ñoma wüxi i duüxü i naxchiru ímexëëxürüü na tama tangexchiruxüçëx rü taxãnexüçëx i ngëxguma íchanguxgu”, ñanagürü. ¹⁶ Rü yema ngoxogü, rü nanangutaquëxexëë ga guxüma ga ñoma ga naãnewa yexmagüxü ga nachiuãnecüãxgüarü ãëxgacügü. Rü yema nachica ga nawa nangutaquëxegüxü, rü Armaguedóügu naxãega i Yudíugügawa. ¹⁷ Rü yema norü 7 ga orearü ngeruü, rü buanecügumare nayabaãcu ga norü copa. Rü guma Tupanapata ya daxüguxü i naãnewa ngëxmanewa inanaxü ga wüxi ga naga ga tagaxü ga yema Tupanaärü tochi-caxüwa inaxüxü ga ñaxü:

“Marü ningu”, ñaxü. ¹⁸ Rü nibëjxëxane, rü poraãcü nicuxcuane, rü niduruane. Rü poraãcü naxiãxãchiane. Rü noxri Tupana duüxügüxü üxgumama rü taguma nayexma ga wüxi ga íãxãchiane ga yemarüü poraxü. ¹⁹ Rü guma ñãne ga taxüne ga Babiróniã, rü tomaëxpüxgu ningüxyeane. Rü guma ñãnegü ga ñoma ga naãnewa yexmagüne rü niwëxtaüügü. Rü Tupana rü nüxna nacuxãchi ga guma ñãne ga Babiróniãrü chixexü. Rü yemacëx norü numaã poraãcü nanapoxcu ga guma ñãne, yerü poraãcüxüchi namaã nanu. ²⁰ Rü guxüma ga capaxügü rü guxüñema ga mëxpúnegü, rü inayarüxogü. ²¹ Rü daxüwa narüyi ga gáuxü ga itapütaxü, rü duüxügüëtügu nayi. Rü wüxpütachigü ga yema gáuxü, rü 40 ga kilogu nixi ga nayaxü. Rü ga duüxügü rü Tupanamaã naguxchigagü nagagu ga yema poxcuruü ga gáuxü, yerü poraãcü nüxü nangux ga yema poxcu ga Tupana namaã napoxcuexü.

17

Ñãne ga Babiróniã ga wüxi ga nge ga ngëãëxü- chicügu ixixüñe

¹ Rü yema 7 ga orearü ngeruügü ga nüxü yexmagüxü ga 7 ga copagü, rü yematanüwa rü wüxi ga orearü ngeruü, rü chauxcëx nixü, rü ñanagürü choxü:

“¡Nuã naxü! Rü tá cuxü nüxü chadauxëë i tacü tá nixi i ngürü poxcu i ngëma nge i ngeãëxüchicü i taxü i dexágüëtüwa rütoxcü. ² Rü ñoma i naãnewa ngëxmagüxü i nachiuãnegüarü ãëxgacügü, rü ngímaã namaxë, rü yemaãcü poraãcü chixexü naxügü. Rü guxüma i ñoma i naãnecüãx, rü ngürü chixexü nüxna naxüë”, ñanagürü. ³ Rü yexguma Tupanaãe i Üñexü yemaãcü choxü ngoxetüxëëgu, rü yema orearü ngeruü rü wüxi ga nachica ga ngextá taxúema íãpataxüwa choxü naga. Rü yëma ngíxü chadau ga wüxi ga nge ga wüxi ga ngoxo ga dauxüëtüwa rütoxcü. Rü yema ngoxo rü guxüwama naxãegaxüñe, rü yema naegagü rü Tupanamaã naguxchiga. Rü 7 nixi ga naëru rü 10 ga naxchatacuxre. ⁴ Rü yema nge rü wüxi ga naxchiru ga dauxracharaxü rü dauxümaã íãxchiru. Rü uirumaã rü nutagü ga mexëchicümaã ingãxãë. Rü ngíxmëxwa ngíxü nayexma ga wüxi ga copa ga uirunaxcëx. Rü yema copa rü namaã naxããcu ga nagüxüraüxü ga yema Tupanapëxewa chixexü rü nagüxüraüxü ga chixexügü ga yema nge üxü. ⁵ Rü ngícatügu naxümatü ga wüxi ga naega ga taxúema nüxü cuáxü na ñuxü ñaxüchiga yíixü. Rü yema naëga rü ñanagürü:

“Rü yima Babiróniã rü guxüma i ngema duüxügü i chixexü ügüxü i ñoma i naãnewa maxëxüarü mamá nixi”, ñanagürü. ⁶ Rü ngíxü chadau ga yema nge ga na nangãxüxü namaã ga guma nagü ga yema duüxügü ga Tupanaärü

ixígüxü rü yema duüxügü ga Ngechucharü orexü na yaxugüxüçèx dèixü. Rü yexguma yemaxü chadèuxgu, rü chabaixächi. ⁷ Rü yexguma ga yema orearü ngerü rü ñanagürü choxü:

“¿Täcücèx cubaixächi? Dücèx, tá cumaã nüxü chixu na tacüchiga yïixü i ngëma nge, rü tacüchiga yïixü i ngëma ngoxo i 7 eruxü rü 10 chatacuxrexü i naetüwa natoxü. ⁸ Rü ngëma ngoxo i nüxü cudauxü, rü yema nixi ga nuxcümäxüchi maxchirèxü natürü ñuxma rü marü yuxü rü ngëma äxmaxü i taxuguma iyacuáxüwa ngëxmaxü. Natürü paxa tá ngëma íxüxüxü, rü ñuxüchi ngëma nachica i guxügutäma nagu napoxcuxüwa tá üxü. Rü ngëma ngoxoma ä tá nabaixächiaëgü i ngëma duüxügü i ñoma i naänewa maxèxü i tama nawa ngoxégagüxü i ngëma Tupanaärü popera i noxritama naäne ixügügu Tupana nagu yawügüxü i ngëma duüxügü i nüxü nangëxmaxü i maxü i taguma güxü. Rü nümagü i ngëma duüxügü rü aixcüma tá namaã nabaixächiaëgü i ngëxguma nüxü nadaugügu i ngëma ngoxo ga nuxcümäxüchi maxchirèxü rü yuxü natürü wena táxarü ínguxü. ⁹ Rü ñaã nixi i wüxi i ore naxcèx i ngëma duüxügü i nüxü natauxchaxü na nüxü nacuèxgüxü. Rü ngëma 7 i naëru i ngëma ngoxo, rü yima nixi ya 7 ya mëxpünechiga. Rü yima 7 ya mëxpünegetüwa nixi i natoxü i ngëma nge. Rü ngëxgumarü ta i ngëma naërugü, rü 7 i nachiuänegüarü äëxgacügüchiga nixi. ¹⁰ Rü wüximèëxpüx i ngëma äëxgacügü rü marü togü nüxü narüyexeragü, rü ñuxma rü marü tama äëxgacügü nixigü. Rü ngëma norü 6 i ngëma äëxgacügü, rü nüma rü ñuxma rü äëxgacü nixi. Rü ngëma norü 7 tá nixi i yixcüra ínguxü. Natürü ngëxguma ínanguxgu i ngëma norü 7 i nawa iyacuáxü i ngëma äëxgacügü, rü paxaächimare tá nixi i äëxgacü yïixü. ¹¹ Rü ngëma ngoxo ga nuxcümäxüchi maxchirèxü rü ñuxma rü marü yuxü, rü ngëma nixi i norü 8 i ngëma äëxgacügü. Rü nüma rü ngëma 7 tanüxü nixi. Natürü i nüma rü ngëma nachica i guxügutäma nagu napoxcuxüwa naxü. ¹² Rü ngëma 10 i naxchatacuxre i nüxü cudauxü, rü 10 i nachiuänegüarü äëxgacügüchiga nixi. Natürü i nümagü rü tauta inanaxügüe na duüxügümaã inacuèxgüxü. Natürü yixcüra tá nanayauxgü i pora na wüxítäma i ora ngëma ngoxomaã wüxigu äëxgacügü yixígüxüçèx. ¹³ Rü ngëma 10 i äëxgacügü rü wüxigu nagu narüxinüë na ngëma ngoxona naxägüäxüçèx i norü pora, na ngëma ngoxo namaã icuáxüçèx. ¹⁴ Rü ñuxüchi i ngëma äëxgacügü rü ngëma ngoxo rü tá nügü nadai namaã ya yima Tupana Nane ga pecaduarü ütänüçèx yucü. Natürü ya yima Tupana Nane rü tá nüxü narüyexera, erü nüma rü guxü i corigüarü Cori nixi, rü guxü i nachiuänegüarü äëxgacügüarü Äëxgacü nixi. Rü yixema namücügü ixígüxe, rü yixemagü tixigü ya Tupana tüxü dexe rü tümacèx naçaxe. Rü tümagü rü aixcüma naga taxüinüë”, ñanagürü choxü. ¹⁵ Rü yema orearü ngerü rü ñanagürü ta choxü:

“Ngëma taxü i dexä i nüxü cudauxü i naetüwa natoxü i ngëma nge i ngëäëxüchicü, rü nagüxüraüxü i duüxügüchiga nixi, rü guxüma i duüxügü i to i nagawa idexagüxüchiga nixi, rü guxüma i nachiuänecüäëxgü i duüxügüchiga nixi. ¹⁶ Rü ngëma 10 i naxchatacuxre i nüxü cudauxü i nüxü ngëxmaxü i ngëma ngoxo, rü tá ngëma nge i ngëäëxüchicüchi naxaie. Rü tá ngëma ngena nanapuxü i guxüma i tacü i ngüxü ngëxmaxü, rü ngëmaäcü ngexchiruäcüma tá ngëxma irüxäüx. Rü tá ngüxü nangöxgü, rü üxüwa tá ngüxü nigügü. ¹⁷ Yerü ga Tupana rü yema 10 ga äëxgacügüxü nagu narüxinüëxèë na naxügüäxüçèx i ngëma nanaxwèxèxü i nüma ya Tupana. Rü ngëmacèx i ngëma äëxgacügü, rü tá wüxigu nagu narüxinüë na ngëma ngoxoxü naporaxèëgüxü na norü äëxgacü yïixüçèx ñuxmatáta Tupana yanguxèë i ngëma nüxü yax-

uxù. ¹⁸ Rù ngēma nge i ngīxù cudēuxcù, rù yima nixī ya yima ĩāne ya taxūne ya guxūma i nachīūānegūarū āēxgacūgūmaā icuáxūne”, ñanagürü.

18

Nagu nayarüchixe ga ĩāne ga Babiróniā

¹ Rù yemawena nüxù chadau ga wüxi ga to ga orearü ngeruü ga daxüguxù ga naānewa íruxixù ga taxù ga āēxgacù ixixù. Rù yema orearü ngeruüarü yauracüüxūmaā nangóone ga ñoma ga naāne. ² Rù tagaācù ñanagürü:

“Marü nagu nayarüchixe ya yima ĩāne ya Babiróniā ya itaégacüxūne. Rù ñuxma rü ngoxogüchiü nixī rü nagúxüraüxü i naāē i chixexügüchiü nixī. Rù ñuxma rü ngēma naxāchiü i nagúxüraüxü i ngurucugü rü werigü i chixexü i duüxügü naxchi aixexü. ³ Yerü guxūma ga nachīūānecüāxgü, rü guma ĩāneärü chixexü nüxna naxüe. Rù norü āēxgacügü, rü yēma poraācü chixri namaxē. Rù guxūma ga ñoma ga nachīūānecüāxgü ga taxetanüxügü, rü nügü namuärü dīeruāxēēgü namaā ga yema ĩāneärü yemaxügü ga tama Tupanapēxewa mexù”, ñanagürü. ⁴ Rù ñuxüchi nüxù chaxīnū ga to ga naga ga daxüguxù ga naānewa inaxüxù ga ñaxù:

“jDücēx i guxāma i pema ya chorü duüxügü ixīgüxe, rü ĩpechoxü nawa ya yima ĩāne na tama ngēma ĩānecüāxrüü pipecaduāxgüxcēx rü tama nagu peyixüdcēx i ngēma poxcu i tá yima ĩānewa nguxù! ⁵ Erü ngēma ĩānecüāxärü pecadugü, rü nügüētüwa narünucue, rü düxwa marü daxüguxü i naānewa nangu. Rù ñuxma ya Tupana rü nüxna nacuēxāchi i ngēma chixexü i naxügüxù, rü ngēmacēx tá yima ĩānexü napoxcu. ⁶ Rù ngēma poraācü chixexü na naxügüürüü, rü ngēxgumarüü tá ta nixī na chixexūmaā nüxù penaxütanüxù i pemax. jRü ñuxma na ngēma ĩānecüāx togūmaā chixexü naxügüxù, rü taxreēxpüxcüna tá penachixexēē i pemax! jRü ngēma chixexü ga yema ĩānecüāx togücēx mexēēgüxù, rü pema rü taxreēxpüxcüna tá ngēmaācü naxcēx penamexēē! ⁷ jRü ngēma na nügü yacuēxüüügüxù rü mexēchixüwa na namaxēxù, rü ngēxgumarüü tá ta nixī na ngúxù nüxù pingexēēgüxù rü ngechaü nüxù pingexēēgüxù! Erü ñuxma i ngēma ĩānecüāx rü nügüāewa ñanagürügü: ‘Yixema rü ñoma wüxi i āēxgacürüü mexēchixüwa tangēxmagü. Rù tagutāma wüxi i yutexürüü tangechaügü’, ñanagürügü nügüāewa i ngēma ĩānecüāx. ⁸ Rù ngēmacēx tá nixī i wüxítātama i ngunexügu ĩnanguxù i ngēma ĩāneärü poxcuruü. Rù ngēma ĩānecüāx rü ngüanemaā tá nayue, rü poraācü tá nangechaügü, rü poraācü taiya tá nüxù nangux, rü norü ĩāne rü üxūmaā tá nigu. Erü naporaxüchi ya yima Tupana ya guxüärü Cori ixīcü i ngēma ĩānexü poxcucü”, ñanagürü ga yema naga. ⁹ Rù ngēma nachīūānegūarü āēxgacügü ga yema ĩānewa poraācü chixri maxēxü rü mexēchixüwa yexmagüxù, rü tá poraācü norü ngechaümaā yima ĩānecēx naxauxe i ngēxguma nüxù nadaugügu i ngēma üxüema i namaā yaxaxù. ¹⁰ Natürü ngēma āēxgacügü rü ngēma poxcuxù na namuētēxüchēxwa rü tá yaxüwa nüxù narüdaunü, rü ñanagürügü tá:

“Cungechaütümüü, Pa Itaégacüxūne ya ĩāne ya Babirónia ya Guxü i Nachīūānegūmaā Porachirēnex. Erü wüxítama i oragu cuxcēx ĩnangu i curü poxcu”, ñanagürügü tá. ¹¹ Rù guxūma i ñoma i naānecüāx i taxetanüxù, rü tá poraācü norü ngechaümaā naxcēx naxauxe ya yima ĩāne. Erü marü taxüetāma naxcēx nüxù tataxe i norü ngēmaxügü i ngēma nangegüxù. ¹² Rù marü taxüetāma naxcēx nüxù tataxe i norü uiru, rü norü dīerümü, rü norü

nutagü i mexêchixü, rü naxpügü i mexêchixü i dauxracharaxü rü idauxcharaü i ngema nangegüxü. Rü ngêxgumarüü ta taxúetáma naxcêx nüxü tataxe i nagüxüraüxü i norü naixchipanügü i yixixü, rü norü ngêmaxügü i marfilnaxcêx rü mürapewa i mexêchixü naxcêx rü cobrenaxcêx rü fierunaxcêx rü nutanaxcêx i ngema nangegüxü. ¹³ Rü taxúetáma naxcêx nüxü tataxe i norü canela rü togü i norü üexüwemüxügü i yixixü, rü pumaratêxe i guruü ixixü, rü togü i pumaragü i yixixü, rü binügü rü chixügü, rü arina i mexêchixü, rü trigu i ngema nangegüxü. Rü ngêxgumarüü ta ngema nana-gagü i wocagü, rü carnerügü, rü cowarügü, rü autügü i cowaru itüchigüxü, rü duüxügü i puracüruügü. Rü ngêmaäcü woo duüxêgü rü ngema tüxü nagagü na tümamaä naxtegüxü cêx. ¹⁴ Rü ngêma taxetanüxü, rü ñanagürügü tá nüxü ya yima ñâne:

“Cuwa rü marü nataxuma i ngêma orix i curü duüxügüarü me ixixü. Rü marü nataxuma i guxüma i ngêma meruügü ga noxri cuxü yexmaxü, rü tagutáma wenaxârü cuxü nangêxma”, ñanagürügü tá. ¹⁵ Rü ngêma taxetanüxü i guxüma i ngêma orixgümaä rü ngêma meruügümaä taxegüxü rü guma ñânegu nügü muârü diêruâxêxüchigüxü, rü yaxüwa tátama nüxü narüdaunü ya yima ñâne, erü nüxü namuê i ngêma poxcu i yima ñanexü üpetüxü. Rü tá poraäcü norü ngechaümaä naxauxe. ¹⁶ Rü ñanagürügü tá:

“Nangechaütümüü ya yima ñâne ya itaxégacüxüne. Erü noxri rü ñoma wüxi i nge i mexêchixü i naxchiru i dauxracharaxü rü dauxcharaxümaä äxchirucü i uirumaä rü nutagü ya mexêchicümaä ngêxâêxcürüü nixi. ¹⁷ Natürü ngürüâchi nagux i guxüma i ngêma ñâneârü meruügü”, ñanagürügü tá. Rü guxüne ya wapurugüarü âxegacügü, rü guxüma i norü duüxügü ya yima wapuruwa puracüexü, rü guxüma i duüxügü ya yima wapuruwa ixü, rü guxüma i taxetanüxügü i wapurugu yarüxüüxü, rü yaxüwa tátama nayachaxgütanüâchi, rü ngema tá nüxü narüdaunü. ¹⁸ Rü ngêxguma nüxü nadaugügu i norü caxixü na yaxaxü ya yima ñâne, rü tagaäcü tá ñanagürügü:

“Nataxuma ya nái ya ñâne ya daa ñâne ya itaxégacüxünerüü ixixüne”, ñanagürügü. ¹⁹ Rü norü ngechaümaä nügüétügu tá waixüümü nagünagügü, rü tá poraäcü naxauxe, rü tagaäcü ñanagürügü tá:

“Nangechaütümüü ya yima ñâne ya itaxégacüxüne. Rü noxri rü norü yemaxügümaä nügü nimuârü diêruâxêêgü ga guxüne ga wapurugüarü yoragü. Natürü i ñuxma rü ngürüâchi wüxi i oragutama rü inayarüxo i guxüma i ngêma. ²⁰ Natürü ñuxma na napoxcuxü ya yima ñâne, rü name nixi i petaâêgü i pema i daxügüxü i naânewa ngêxmagüe, rü pema i Tupana pexü imugüe, rü pema i Tupanaârü orexü ixügüe, rü guxâma i pema i Tupanaârü duüxügü ixigüe. Erü ñuxma na napoxcuxü ya yima ñâne, rü ngêmaäcü Tupana pexü naxütanü naxcêx ga yema chixexü ga pemaä naxügüxü ga guma ñanecüâx”, ñanagürügü. ²¹ Rü ñuxüchi wüxi ga Tupanaârü orearü ngeruü ga daxüçüâx rü nanangenagü ga wüxi ga nuta ga taxüchicü ga ñoma tacüarü carüürüü ixicü. Rü yema orearü ngeruü rü taxtü ga taxügu nanaña ga guma nuta ga taxüchicü, rü ñanagürü:

“Ngêxgumarüü tá quixi na icuyarüxoxü, Pa ñâne ya Itaxégacüxüne ya Babiróniâx, rü tagutáma texé wena cuxü nadau. ²² Rü tagutáma wena curü itamügüwa texé nüxü taxinü i paxetarügü i arpagü rü quenagü rü cornetagü. Rü ngêxgumarüü ta cuwa nataxütáma i puracütanüxügü i tacüwa puracüexü, rü tagutáma texé nüxü taxinü na cuwa inapuracüexü i chawüarü carügü. ²³ Rü marü tagutáma texé nüxü tadau i cuwa i omü. Rü marü

tagutáma texé nüxü taxínü i ngîgüchigaarü petagüarü cuxcuane. Rü ngêmaäcü tá cumaã nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüârü yexera nixigü. Rü ngêmacêx tá poraäcü cupoxcu nagagu ga yema chixexü ga namaã cunawomüxêëxü ga guxüma ga togü ga nachiuãnecüãx ga duüxügü”, ñanagürü. ²⁴ Yerü guma iãnecüãx ga duüxügü nixi ga nadêixü rü inabaxêëgüxü ga nagü ga Tupanaârü orearü uruügü rü yema duüxügü ga Tupanaârü ixigüxü rü guxüma ga duüxügü ga ñoma ga naãnegu Tupanaarü oregagu nadêixü.

19

¹ Rü yemawena nüxü chaxínü ga muxüma ga duüxügüga ga daxüguxü ga naãnewa tagaäcü ñagüxü:

“¡Ngîxã Tupanaxü ticuëxüügü! Erü nüma nixi i tüxü namaxêëxü. Rü nüma ya tórü Tupana nixi i guxüârü yexera namexêchixü rü naporaxüchixü.

² Rü nüma rü aixcüma meãma nanangugü i guxüma i duüxügüarü maxü, rü aixcüma tá nanapoxcue i ngêma chixexü ügüxü. Rü ngêmacêx marü nanapoxcu ya yima iãne ya itaxégacüxüne ya chixene ya norü chixexümaã nachixêëne i guxüma i ñoma i naãnecüãx i duüxügü. Rü ñuxma i nüma ya Tupana rü norü duüxügü ga guma iãnecüãx dèixüxü naxütanü”, ñanagürügü.

³ Rü ñuxüchi wenaxârü ñanagürügü:

“¡Ngîxã Tupanaxü ticuëxüügü! Erü ngema norü caxixü na yaxaxü ya yima iãne, rü tagutáma ngêma nayarüxo”, ñanagürügü. ⁴ Rü yema 24 ga âëxgacügü rü yema ägümücü ga daxüçüãx ga maxêxü rü yexma nanangücuchitanü, rü Tupana ya norü tochicaxüwa rütocüxü nicuëxüügü. Rü ñanagürügü:

“Rü ngêmaäcü yii. ¡Rü ngîxã nüxü ticuëxüügü ya tórü Cori!” ñanagürügü.

⁵ Rü ñuxüchi yema tochicaxüxütawa inanaxü ga wüxi ga naga ga ñaxü:

“Name nixi i tórü Tupanaxü picuëxüügü i guxãma i pemax Pa Buxügü rü Pa Yaxügüx i norü duüxügü na pixigüxü rü nüxü na pemüëxü”, ñaxü.

Tupana Nane ga pecaduarü ütanücêx yucüarü ngîgüarü petachiga

⁶ Rü ñuxüchi nüxü chaxínü ga tacü ga ñoma muxüchixü ga duüxügü idex-agüxürrü ixixü ga ñoma taxü i dexá i chuchxürrü ixixü ga ñoma poraäcü yaduruanexürrü ixixü ga ñaxü:

“¡Ngîxã Tupanaxü ticuëxüügü! Erü nüma ya tórü Cori ya Tupana ya guxüârü yexera poracü, rü marü ningucuchi na guxümaã inacuáxü. ⁷ ¡Rü ngîxã tataãëgü rü guxü i tórü taãëmaã nüxü ticuëxüügü! Erü marü nawa nangu na iyangüxü ya yima Tupana Nane ga pecaduarü ütanücêx yucü. Rü ngêma norü duüxügü i ñoma namêxürrü ixigüxü rü marü nügü ínimexêëgü.

⁸ Rü yima Tupana Nane rü ngêma nüxü yaxögüxüxü namu na mexêchixü rü comüxü rü iyauracüxüxü i naxchirumaã na yaxäxchiruxü. Rü ngêma naxchiru i mexêchixü rü ngêma nixi i ngêma duüxügüarü maxü i mexüchiga”, ñanagürügü. ⁹ Rü ñuxüchi ga Tupanaârü orearü ngerürrü, rü ñanagürü choxü:

“Chanaxwêxe i cunaxümatü i ñaã ore i cumaã tá nüxü chixuxü: ‘Tataãëgü ya yixema tüxna naxuxe i norü ngîgüarü petawa ya yima Tupana Nane ga pecaduarü ütanücêx yucü’”, ñanagürü. Rü ñuxüchi ñanagürü ta:

“Ngêma ore i cumaã nüxü chixuxü, rü Tupanaârü orexüchitama nixi”, ñanagürü. ¹⁰ Rü choma rü yema orearü ngerürrüpêxegu chacaxäpüxü na nüxü chicuëxüxüçêx. Natürü ga nüma rü ñanagürü choxü:

“¡Tãxü i ngêma cuxüxü! Erü choma rü ta Tupanaârü duüxü chixi, ngêxgumarürrü i cuma rü cueneëgü i Ngechucharü ore i aixcüma ixixü

ixõgüechaxürüü ta chixĩ. Rũ name nixĩ i Tupanaxũ quicuèxüü”, ñanagürü. Erü ngëma ore i Ngechuchuchiga ixĩxũ, rü yematama ore nixĩ ga Tupanaärü orearü uruüügü nüxũ ixugüexũ ga yexguma Tupanaäe i Üünexũ nawa ideaxgu.

Guma Tupana Nane ga cowaru ga cómixüetügu tonagücüchiga

¹¹ Rũ ñuxüchi nüxũ chadau ga daxüguxũ ga naäne na yawãxnaxũ. Rũ yéma nangox ga wüxi ga cowaru ga cómixũ. Rũ guma naetüwa rütocü rü İxaixcümacü rü Aixcüma Yanguxëécü nixĩ i naega. Rũ nüma rü aixcüma guxüma i duüxügüarü maxüxũ nacuèx, rü aixcüma tá guxüma i ngëma chixexũ ügüxümaã nügü nadai rü tá nanapoxcue. ¹² Rũ naxëtügü, rü ñoma üxüemarüü niyauracüü. Rũ naëruwa rü namu ga norü ngëxcueruüügü. Rũ nacatügu naxümatü ga wüxi ga naega ga nüxĩcatama nüxũ nacuáxũ. ¹³ Rũ wüxi ga naxchiru ga ducharaxügu nicux. Rũ naega rü Tupanaärü Ore nixĩ. ¹⁴ Rũ nawe narüxi ga guxüma ga norü churaragü ga daxücüãx. Rũ nümagü rü naxchiru ga imexëchixũ rü cómixümaã nixãxchiru. Rũ cowarugü ga icómüxüetügu naxĩ. ¹⁵ Rũ naãxwa nayexma ga wüxi ga tara ga tëxechixũ na yemamaã naplexëãxüçex i guxüma i ngëma duüxügü i tama nüxũ yaxõgüxũ. Rũ tá nüma nanaxwëxexüãcüma ngëma duüxügümaã inacuèx. Rũ nüma rü tá poraãcü ngëma duüxügü i tama yaxõgüxüxũ napoxcu namaã i ngëma poxcu ya Tupana ya Guxüxũ Rüporamaëcü norü numaa mexëëxũ. Rũ ñoma ubagü i norü maıxruüwa imëixtüüxürüü tá nixĩ na napoxcueãxũ. ¹⁶ Rũ naxchirugu rü naperemagu naxümatü ga wüxi ga naega ga ñaxũ:

“Guxüma i nachiüãnegüarü äëxgacügüarü Äëxgacü, rü guxüma i corigüarü Cori ixĩcü”, ñaxũ. ¹⁷⁻¹⁸ Rũ ñuxüchi nüxũ chadau ga wüxi ga Tupanaärü orearü ngeruü ga daxücüãx ga üexcügu chixũ. Rũ nüma rü tagaacü ñanagürü nüxũ ga guxüma ga ngurucugü ga yexma ixexexütanüxũ:

“ıNuã pexĩ rü pengutaquëxegü naxcëx i õna i taxũ i Tupana pexcëx mexëëxũ na penangõxüçex i nachiüãnegüarü äëxgacügümachi, rü churaragüarü äëxgacügümachi, rü yatügü i poraxüchixümachĩ, rü cowarugümachi, rü ngëma cowaruëtügu İxũ i duüxügümachi, rü ngëma duüxügü i coriãxgüxümachi rü ngëma ngearü coriãxgüxümachi rü ngëma buxügümachi rü ngëma yaxügümachi!” ñanagürü. ¹⁹ Rũ ñuxüchi nüxũ chadau ga yema nüxĩraüxũ ga ngoxo rü guxüma ga nachiüãnegüarü äëxgacügü ga norü churaragümaã yéma ngutaquëxegüxũ na nügü nadeixüçex namaã ya yima cowaruëtügu İxüçü rü norü churaragü. ²⁰ Rũ yema nüxĩraüxũ ga ngoxo rü niyaxu. Rũ wüxigu namaã niyaxu ga yema to ga ngoxo ga orearü uruünetaxi xũ ga yema nüxĩraüxũ ga ngoxopëxewa naxüxũ ga cuëxruüügü ga duüxügü tama nüxũ cuáxũ na naxügüãxũ. Rũ yema cuëxruüügümaã nixĩ ga nawomüxëëãxũ ga yema duüxügü ga nüxũ icuëxüüügüxũ ga naxchicünëxã ga yema nüxĩraüxũ ga ngoxo rü nügü ixãgüxũ na yema ngoxoégamaã na yaxüëgagüxũ. Rũ yema nüxĩraüxũ ga ngoxo rü yema to ga ngoxo ga orearü uruünetaxi ixĩxũ, rü wüxigu maxëxüma nawa nawoü ya yima naxtaa ya üxümaã iyaurachiüne ya azufremaã ixaxüne. ²¹ Rũ yema tara ga tëxechixũ ga guma cowaruëtüwa rütocüëxwa yexmaxümaã nanadaı ga yema ngoxogüarü ngüxëëruüügü ga äëxgacügü rü norü churaragü. Rũ guxüma ga ngurucugü, rü yemamachimaã nangãxcharaügü.

20

Chataná rü 1,000 ga taunecü ninëix

¹ Rü yemawena nüxü chadau ga wüxi ga Tupanaärü orearü ngeruü ga daxüguüxü ga naänewa íruxüxü. Rü naxmëxwa nayexma ga yema äxmaxü i taxuguma iyacuáxüärü chawí rü ñuxüchi wüxi ga cadena. ² Rü yema Tupanaärü orearü ngeruü rü yema coyaxü niyaxu. Rü yematama coya nixí ga yema nuxcúmaüxü ga äxtape ga ngoxo ga Chataná ixíxü. Rü yema orearü ngeruü rü 1,000 ga taunecügücëx nayanëix. ³ Rü yema orearü ngeruü rü yema äxmaxü i taxuguma iyacuáxügu nayatëxcuchi. Rü ñuxüchi yexma meäma nanawäxtaü na nüma ga Chataná rü marü taguma wenaxärü duüxügüxü nawomüxëëxücëx ñuxmatáta 1,000 ya taunecü ngëxma yangeä. Rü ngëxguma marü yanguxëëägu ya yima 1,000 ya taunecü, rü tá paxaxächi nayangëx. ⁴ Rü ñuxüchi nüxü chadau ga ñuxre ga tochicaxügu. Rü yema tochicaxüwa tarütogü ga guxema Tupanaxütawa nayauxgüxe ga pora na duüxügüxü ticagüxücëx. Rü yexgumarüü ta nüxü chadau ga naäëgü ga yema duüxügü ga Ngechucharü orexü na yaxugüxücëx nadaünaägüxü. Rü yema nixí ga duüxügü ga meäma nüxü ixugüxü ga Tupanaärü ore rü tama yema ngoxoxü icuëxüügüxü rü bai ga yema ngoxochicünëxäxü icuëxüügüxü, rü tama nügü ixägüxü na nacatüwa rü ëxna naxmëxwa yema ngoxoégamaä yaxäegaxü. Rü nüxü chadau ga wena na namaxëxü, rü 1,000 ga taunecü Cristumaä wüxigu äëxgacü nixígü. ⁵ Rü yemagü nixí ga nüxírama írüdagüxü. Natürü ga yema togü ga yuexü rü täütama namaxë ñuxmatáta yima 1,000 ya taunecüguwena. ⁶ Rü tataäëgü ya yíxema tuxira írüdagüxe erü Tupanaärü duüxügü tixígü. Rü ngëma Tupanaärü poxcu rü marü täütama tümacëx nixí. Rü tá Tupanaärü rü Cristuarü ngüxëëruügü tixígü. Rü 1,000 ya taunecü tá Cristumaä äëxgacügü tixígü.

ngoxo i Chataná rü marü naga nayarüchixe

⁷ Rü ngëxguma marü nangupetügu ya yima 1,000 ya taunecü, rü Chataná rü tá ningëx i ngëma ínapoxcuxüwa. ⁸ Rü nüma i Chataná rü tá ínaxüxü na yawomüxëëxücëx i guxüma i ñoma i naänecüäx i duüxügü rü Goga rü Magoga na ngëmagüxü nangutaquëxëëxücëx na Tupanaärü duüxügümaä nügü nadëjxücëx. Rü ngëma Chatanáärü churaragü, rü ñoma taxtü i taxüärü naxnecüchicütëxerüü tá namuxüchi. ⁹ Rü ngëmaäcü i Chatanáärü churaragü rü tá ñoma i naäneärü tagu ninguuchi. Rü tá Tupanaärü duüxügüxü rü yima íane ya Tupana nüxü ngechaxüne ya Yerucharéxü ínachoeguächi. Natürü Tupana rü daxüwa tá nanayixëë ya üxü, rü yimamaä tá nixae i guxüma i ngëma namaä rüxuanügüxü. ¹⁰ Rü ngëma ngoxo i ngëma duüxügüxü womüxëëxü, rü nawa tá natäe ya yima naxtaa ya üxümaä iyaurchiüne ya azufremaä íaxüne. Rü yima nixí ya naxtaa ga marü nawa nawoüne ga yema nüxíraüxü ga ngoxo rü yema to ga ngoxo ga orearü uruünetá ixíxü. Rü yima naxtaawa tá nixí i guxügutáma ngunecü rü chütacü ngüxü yangegüxü.

Ngëma taxü i tochicaxü i cómüxüwa rütocüpëxewa nangugü i duüxügü

¹¹ Rü ñuxüchi nüxü chadau ga wüxi ga taxü ga tochicaxü ga cómüxü, rü nüxü chadau ga guma nawa rütocü. Rü gumachaxwa nibuxmü ga ñoma ga naäne rü guxüma ga daxüwa nüxü idauxü, rü inayarütaxe. ¹² Rü nüxü chadau ga yema yuexü ga yaexü rü buexü ga Tupanapëgegu chigüxü. Rü ningena ga poperagü. Rü yexgumarüü ta ningena ga yema Tupanaärü popera i naga yawügüxü i ngëma duüxügü i nüxü nangëxmaxü

i maxũ i taguma gũxũ. Rũ yema yuexũ rũ yexgumarũũ ga ñuxãcũ na namaxẽxũ ga wũxichigũ rũ yexgumarũũ ga ñuxãcũ na yema poperawa inaxũmatũxũrũũãcũma Tupana namaã nũxũ nixu na ngextã tá naxĩxũ. ¹³ Rũ yema yuexũ ga taxtũ ga taxũwa yexmagũxũ rũ wenaxãrũ ñnarũdagũ. Rũ yema yuexũ ga taxuqewa yexmagũxũ rũ wenaxãrũ ñnarũdagũ. Rũ yemaãcũ ñnarũdagũ ga guxũma ga duũxũgũ ga yuexũ. Rũ guxũma ga yema yuexũ rũ Tupana nũxna nicachigũ rũ yexgumarũũ ga ñuxãcũ na namaxẽxũ ga wũxichigũ rũ namaã nũxũ nixu na ngextã tá naxĩxũ. ¹⁴ Rũ yemawena rũ guma naxtaa ga ùxũmaã iyaurachiũnewa nawoũ ga yu guxũma ga norũ poramaã. Rũ guma naxtaa ga ùxũmaã iyaurachiũne, rũ ngẽma nixĩ i poxcu i taguma iyacuãxũ i tũmacẽx ixĩxũ ya yĩxema tama Tupanaãrũ duũxũgũ ixĩgũxe. ¹⁵ Rũ guma naxtaa ga ùxũmaã iyaurachiũnewa tawoũ ga guxema ingeãgaxe nawa i ngẽma Tupanaãrũ popera i nagu tiwũgũxũ ya yĩxema tũxũ nangẽxmaxẽ i maxũ i taguma gũxũ.

21

Ngexwacaxũxũ i ñoma i naãne rũ guxũma i daxũwa ngẽxmaxũ

¹ Rũ yemawena nũxũ chadau na nayexwacaxũxũ ga ñoma ga naãne rũ guxũma ga ñacu ga daxũwa yexmagũxũ. Yerũ yema nũxĩra yexmagũxũ rũ marũ nangupetũ, rũ yema taxũ ga taxtũ rũ marũ nataxuma. ² Rũ nũxũ chadau ga guma ñãne ga mexũne ga Yerucharẽũ ga yexwacaxũne ga daxũguxũ ga naãnewa Tupanaxũtawã írũxĩxũne ga guxũwama mexẽchine ñoma wũxi i pacũ i ngẽxguma iyangĩxgu rũ ngĩtecẽx ngĩgũ mexẽxcũrũũ ixĩxũne. ³ Rũ nũxũ chaxĩnũ ga wũxi ga naga ga yema tochicaxũwa inaxũxũ ga tagaãcũ ñaxũ:

“Tupana rũ duũxũgũtanũwa nangexma i ñuxmax. Rũ natanũwa tá namaxẽcha. Rũ nũmagũ rũ norũ duũxũgũ tá nixĩgũ. Rũ nũma ya Tupana rũ natanũwa tá nangẽxmaẽcha, na guxũguma norũ Tupana yĩxũcẽx. ⁴ Rũ nũma tá ñnanapi i naxgũũẽtũ i guxũma i ngẽma duũxũgũ. Rũ marũ tãũtãma texẽ tayu, rũ texẽ tũmaãrũ ngechaũmaã taxaxu, rũ texẽ ngũxũ tingegũ. Erũ guxũma i ngẽma ngũxũ rũ marũ inayarũxo”, ñnanagũrũ. ⁵ Rũ guma yema tochicaxũwa rũtocũ rũ ñnanagũrũ:

“Dũcẽx, choma rũ chanangexwacaxũxẽ i guxũma i ñacu i ngẽxmaxũ”, ñnanagũrũ. Rũ ñuxũchi ñnanagũrũ ta:

“¡Naxũmatũ i ñãã ore! Erũ ñãã ore rũ aixcũma nixĩ, rũ ñãã nixĩ i ore i mexũ na yaxõxũ”, ñnanagũrũ. ⁶ Rũ yemawena rũ ñnanagũrũ choxũ:

“Ñuxma rũ marũ ningu i guxũma. Rũ chowa nixĩ ga inaxũgũxũ ga guxũma, rũ nataxuma i ñacu i chorũ yexera ngẽxmaẽchaxũ. Rũ yĩxema ñtawaxe, rũ choma rũ tá nangetanũãcũma tũxũ chaxaxẽẽmare nawa i ngẽma dexã i maxẽerũ. ⁷ Rũ yĩxema nũxũ rũporamaẽgũxe i chixexũ, rũ tá tanayauxgũ i guxũma i ngẽma mexũgũ i nũxũ chixuxũ. Rũ choma rũ tá tũmaãrũ Tupana chixĩ, rũ tũma i chauxacũgũ. ⁸ Natũrũ ngẽma muũẽxũ i nũxũ rũxoexũ na chowe naxĩxũ, rũ nawa tá nawoũ ya yima naxtaa ya ùxũmaã iyaurachiũne ya azufremaã ixaxũne. Rũ ngẽxgumarũũ ta i ngẽma tama yaxõgũxũ, rũ ngẽma chixexũ gũgũxũ, rũ ngẽma mãẽtagũxũ, rũ ngẽma naĩ i ngemaã ipexũ, rũ ngẽma iyuexũ rũ ngõxwẽxegũxũ, rũ ngẽma tupananetachicũnẽxãxũ icuẽxũgũxũ, rũ ngẽma idoratẽxegũxũ, rũ nawa tá nawoũ ya yima naxtaa ya ùxũmaã iyaurachiũne ya azufremaã ixaxũne. Rũ ngẽma nixĩ i poxcu i taguma iyacuãxũ i nũxũ ñnanguxẽxũ i ngẽma tama yaxõgũãcũma yuexũ”, ñnanagũrũ.

Yexwacaxîne ga Yerucharéûchiga

⁹ Rû yema 7 ga orearû ngeruûgû ga nûxû yexmagûxû ga 7 ga copagû ga yema 7 ga poxcuruûmaâ ixââcuxû, rû yematanûwa rû wûxi ga orearû ngeruû rû chauxcêx nixû, rû ñanagûrû choxû:

“¡Nuâ naxû! Rû tá cuxû nûxû chadauxêe i ngêma yaxôgûxû i ñoma namêxrûû tá ixîgûxû ya yima Tupana Nane ga pecaduarû ûtanûcêx yucû”, ñanagûrû. ¹⁰ Rû yexguma yemaâcû Tupanaâe i Üünexû choxû ngoxetûxêêgu, rû yema orearû ngeruû rû wûxi ga mêxpûne ga taxûnewa choxû naga. Rû choxû nûxû nadauxêe ga guma îâne ya üünene ga Yerucharéû ga daxûguxû ga naânewa Tupanaxûtawa írûxîxûne. ¹¹ Rû guma îâne rû Tupanaârû yauracûûxûmaâ nangóone. Rû yema norû yauracûûxû ga guma îâne rû ñoma wûxi ya nuta ya mexêchicûrûû nixî. Rû ñoma nuta ya yasperûû nixî na yachipetûxû. ¹² Rû guma îâne rû guxûwama ínapoxegu. Rû nataxûchi rû namáchanexûchi ga yema norû poxeguxû. Rû yema norû poxeguxû rû nûxû nayexma ga 12 ga norû îâx. Rû wûxichigû ga yema îâxwa nayexma ga wûxi ga Tupanaârû orearû ngeruû. Rû wûxichigû ga yema îâxwa nangoxéga ga wûxichigû ga yema 12 ga Acobu nane ga Yudiûgû nawa ne îxû. ¹³ Rû tomaêxpûx ga norû îâx rû napêxewaama nayexma, rû yema to ga tomaêxpûx rû norû toxwecûwawa nayexma, rû yema to ga tomaêxpûx rû norû tûgûnecûwawa nayexma, rû yema to ga tomaêxpûx rû naweama nayexma. ¹⁴ Rû guma îâneârû poxeguxû, rû 12 ga nuta ga taxûchicûétûwa inaxûgû. Rû wûxichigû ga guma nutagûwa nangoxéga ga wûxichigû ga norû ngûexûgû ga guma Tupana Nane ga pecaduarû ûtanûcêx yucû. ¹⁵ Rû yema orearû ngeruû ga chômaâ idexaxû, rû nûxû nayexma ga wûxi ga norû ngugûxû ga uirumenêxâanaxêx na yemamaâ nangugûâxúcêx ga guma îâne, rû norû îâxgû, rû norû poxeguxûgû. ¹⁶ Rû guma îâne rû nawûxigumare ga guxûcûwawa. Rû norû mêx rû nawûxigumare namaâ ga norû tatachinû. Rû yema orearû ngeruû rû yema uirumenêxâmaâ nanangugû ga guma îâne. Rû 2,200 kilómetru nixî ga norû mêx. Rû yexgumarûû ta 2,200 kilómetru nixî ga norû tatachinû. Rû 2,200 kilómetru ta nixî ga norû máchane. ¹⁷ Rû yemawena rû inanangu ga yema norû poxeguxû ga guma îâne. Rû 65 metru nixî ga norû máchane. Rû yemaâcû duûxûgûarû ngugûxûmaâ nanangugû. ¹⁸ Rû yema norû poxeguxû ga guma îâne, rû nuta ga mexêchicû ga yaspencêx nixî. Rû nûmatama ga guma îâne rû uirunaxcêx nixî. Rû ñoma woruarûû niyauracûû. ¹⁹ Rû guma nutagû ga itacû ga norû poxeguxûpara ixîgûcû, rû nagûxûtraûcû ga nuta ga imexêchicûmaâ nangêxâe. Rû guma nûxîraûcû ga napara rû nuta ga yaspemaâ nangêxâe. Rû guma norû taxre ga napara rû nuta ga safirumaâ nangêxâe. Rû guma norû tomaêxpûx ga napara rû nuta ga ágatamaâ nangêxâe. Rû guma norû âgûmûcû ga napara rû nuta ga esmerádamaâ nangêxâe. ²⁰ Rû guma norû wûximêxpûx ga napara rû nuta ga onichemaâ nangêxâe. Rû guma norû 6 ga napara rû nuta ga cornalínamaâ nangêxâe. Rû guma norû 7 ga napara rû nuta ga crisólitumaâ nangêxâe. Rû guma norû 8 ga napara rû nuta ga berilumaâ nangêxâe. Rû guma norû 9 ga napara rû nuta ga topásiumaâ nangêxâe. Rû guma norû 10 ga napara rû nuta ga crisoprásamaâ nangêxâe. Rû guma norû 11 ga napara rû nuta ga yachítumaâ nangêxâe. Rû guma norû 12 ga napara rû nuta ga amatístamaâ nangêxâe. ²¹ Rû yema 12 ga norû îâx ga guma îâneârû poxeguxû rû perlanaxcêx nixî. Rû wûxichigû ga yema îâx rû wûxitama ga perla nixî. Rû yema norû ítamû ga guma îâneârû ngâxûwa dapetûxû, rû uiruxicanaxcêx

nixĩ. Rũ ñoma woruarũũ niyauracũũ. ²² Rũ guma ñãnewa rũ taxúnema ga ngutaquẽxepataxũ ga ngextá Tupanaxũ nawa yacuẽxũũgũnẽxũ chadau, yerũ nũmatama ga Tupana ya poracũ rũ Nane ga pecaduarũ ũtanũcẽx yucũ rũ yema nayexma na duũxũgũ nũxũ icuẽxũũgũxũcẽx. ²³ Rũ yima ñãne rũ taxucẽxma uẽxcũ rũ tauemacũ nũxũ nabaxi, erũ Tupanaãrũ ngóonexũtama nixĩ i nangóonexẽẽxũ. Rũ yima Tupana Nane ga pecaduarũ ũtanũcẽx yucũ nixĩ ya norũ omũ ixĩcũ. ²⁴ Rũ ngẽma Tupanaãrũ ngóonexũ i yima ñãnẽxũ ngóonexẽẽxũ tá nixĩ i nangóonexẽẽxũ naxcẽx i guxũma i ñoma i naãnecũãx i duũxũgũ. Rũ ngema tá nangugũ i guxũma i nachiũãnegũarũ ãẽxgacũgũ i yaxõgũxũ rũ tá Tupanana nayana i norũ mexũgũ. ²⁵ Rũ norũ ñãxgũ rũ tagutãma narũwãxtagũ erũ ngema rũ guxũguma nangunexecha rũ taguma nachũta. ²⁶ Rũ ngema tá nanana i guxũma i ñoma i naãnẽarũ mexũgũ. ²⁷ Natũrũ tagutãma ngẽxma naxũcu i ñacũ i Tupanapẽxewa chixexũ, rũ bai ya texé ya chixexũ úxe rũ ẽxna idoratẽxãxe. Rũ yĩxema Tupana Nane ga pecaduarũ ũtanũcẽx yucũarũ poperawa ngõxẽgagũxexicatãtama tixĩgũ ya ngẽxma chocuxe.

22

¹ Rũ ñuxũchi ga yema orearũ ngerũ rũ choxũ nũxũ nadauxẽẽ ga wũxi ga natũ ga metacũchiũxũ rũ ichipetũchiũxũ ga dexã ga maxẽẽruũ. Rũ yema tochicaxũ ga nawa natogũxũ ga Tupana rũ Nane ga pecaduarũ ũtanũcẽx yucũ, rũ nawa nixĩ ga ne nadaxũ ga yema natũ. ² Rũ guma ñãnẽarũ ngãxũwa dapetũxũ ga ítamũarũ ngãxũgu nida ga yema natũ. Rũ norũ guxũcutũwa narũxũgũ ga naĩgũ ga maxẽẽruũ. Rũ yema naĩgũ rũ wũxicanatama naxo ga wũxichigũ ga tauemacũgu rũ yemaãcũ 12 ẽxpũxcũna naxo ga wũxi ga taunecũgu. Rũ naãtũgũ ga yema naĩgũ, rũ guxũ i nachiũãnecũãx i duũxũgũ i yaxõgũũãrũ taãexẽẽruũ nixĩ. ³ Rũ ngema rũ nataxũtãma i ñacũ i Tupana chixexũ namaã naxuxuchixũ. Rũ yima ñãnewa tá nangẽxma i norũ tochicaxũ ya Tupana rũ Nane ga pecaduarũ ũtanũcẽx yucũ. Rũ norũ duũxũgũ rũ tá nũxũ nicuẽxũgũ. ⁴ Rũ ngẽma norũ duũxũgũ rũ tá nachiwexũchixũ nadaugũ, rũ tá naegamaã nixãegacatũ. ⁵ Rũ ngema rũ tagutãma nachũta. Rũ ngẽma norũ duũxũgũ, rũ taxucẽxtãma nanaxwẽxe i daparina rũ ẽxna uẽxcũ na nangóonexũcẽx. Erũ nũmatama ya tórũ Cori ya Tupana rũ tá nũxũ nabaxi. Rũ nũmagũ i ngẽma duũxũgũ rũ guxũgutãma wũxigu Tupanamaã ãẽxgacũgũ nixĩgũecha.

Marũ ningaica na wena núma naxũxũ ya Ngechuchu ya Cristu

⁶ Rũ ñuxũchi ga yema Tupanaãrũ orearũ ngerũ rũ ñanagũrũ choxũ:

“Ñãã ore rũ aixcũma ixĩxũ nixĩ, rũ ñãã nixĩ i ore i mexũ na yaxõxũ. Rũ nũma ya tórũ Cori ya Tupana ga nuxcũma norũ orearũ uruũgũmaã nũxũ ixucũ ga ñacũ tá na ngupetũxũ, rũ nũmatama nixĩ i ñuxma inamuãxũ i norũ orearũ ngerũ i daxũcũãx na norũ duũxũgũxũ nũxũ nadauxẽẽxũcẽx na ñacũ tá paxa nangupetũxũ”, ñanagũrũ. ⁷ Rũ nũma ya tórũ Cori ya Ngechuchu rũ ñanagũrũ:

“Paxa tá íchangu. Rũ tataãẽ ya yĩxema naga ñũxẽ i ngẽma Tupanaãrũ ore i ñãã poperagu ũmatũxũ”, ñanagũrũ. ⁸ Rũ chomatama i Cuãũ rũ nũxũ chaxĩnũ rũ nũxũ chadau i guxũma i ngẽma nũxũ chixuxũ. Rũ yemaxũ chaxĩnũguwena rũ nũxũ chadẽuxguwena, rũ yema orearũ ngerũ ga yemaxũ choxũ dauxẽẽxũpẽxegu chacaxãpũxũ na nũxũ chicuẽxũxũcẽx. ⁹ Natũrũ ga nũma rũ ñanagũrũ choxũ:

“¡Tāxū i ngēma cuxūxū! Erū choma rü ta Tupanaärü duuxū chixī, ngēxgumarūū i cuma rü cueneēgū i Tupanaärü orexū ixugūxū rü ngēma duuxūgū i naga ĩnūxū i ngēma ore i ñaā poperagu ūmatūxū. Rū name nixī i Tupanaxū quicuēxū”, ñanagürü. ¹⁰ Rū ñanagürü ta choxū:

“Tama name na icuyacūxū i ngēma Tupanaärü ore i ñaā poperagu ūmatūxū, erū marū ningaica na yanguxū i ngēma ore. ¹¹ Natürü ngēma chixexū ūgūxū, rü chixexū tá naxūgūecha. Rū ngēma Tupanapēxewa chixri maxēxū, rü chixri tá namaxēecha. Natürü yīxema mexū ūgūxe, rü name nixī na mexū taxūgūechaxū. Rū yīxema Tupanapēxewa ixūñexē, rü name nixī na Tupanapēxewa tixūñeēchaxū”, ñanagürü. ¹² Rū ñanagürü ga Ngechuchu:

“Düçex, paxa tá íchangu namaā i ngēma āmare i wūxichigūna tá chaxāxū ngēxgumarūū na ñuxācū tanaxūxū i tūmax. ¹³ Choma nixī i norū ūgū i guxūma, rü chowa nixī i yaxuāxū erū nataxuma i ñacū i choweama ūxū. ¹⁴ Rū tataāēgū ya guxāma ya yīxema yima pecaduarū ūtanüçex yucūgūwa tūgū iyauxgūchiruxe na Tupanapēxewa timexüçex na yima ĩāneärü ĩāxwa tichocuxüçex rü nüxū tangōxnetagūxüçex i ngēma norū o i ngēma naī i maxēerū. ¹⁵ Natürü tāūtāma yima ĩānewa nichocu i ngēma tama yaxōgūxū, rü ngēma iyuūxū rü ngōxwēxegūxū, rü ngēma naī i ngemaā ipegūxū, rü ngēma máētagūxū, rü ngēma tupananetachicūñexāxū icuēxūñgūxū. Rū ngēxgumarūū ta i ngēma idorateēxgūxū i norū me ixīxū na togūxū nawomūxēēgūxū, rü tāūtāma nawa nichocu ya yima ĩāne. ¹⁶ Rū choma i Ngechuchu, rü guxāma i pema i yaxōgūxūtanūwa chanamu i chorū orearū ngerū na pemaā nüxū yaxuxüçex i guxūma i ngēma chorū ore. Rū choma nixī i Dabītaa chīxū. Rū choma nixī ya yima woramacuri ya pēxmama poraācū nangōonexēçürü chīxū”, ñanagürü. ¹⁷ Rū Tupanaāē i Üñexū rü guxūma i yaxōgūxū, rü Ngechuchuxū ñanagürügū:

“¡Nuā naxū!” ñanagürügū. Rū yīxema nüxū ĩnūxē i ñaā ore, rü:

“¡Nuā naxū!” ñanagürügū. Rū yīxema ĩtawāxe rü tūxū nachixégaxe, rü name nixī i nuā taxū rü tūxū nangetanūācūma nawa taxaxe i ngēma dexā i maxēerū. ¹⁸ Rū guxāma ya yīxema irūxīñūxē i ñaā Tupanaärü ore i ñaā poperagu ūmatūxū, rü tūmamaā nüxū chixu rü ngēxguma chi texē ĩyatōxēgū i ngēma Tupanaärü ore i ñaā poperagu ūmatūxū, rü Tupana rü tá tūmacēx nanayexeraxēē i ngēma poxcuruūgū i ñaā poperawa nachiga naxūmatūxū. ¹⁹ Rū ngēxguma chi texē nüxū ūpetūgu i wūxitama i ñaā Tupanaärü ore i ñaā poperagu ūmatūxū, rü Tupana rü tāūtāma tūxū nüxū nangoxnetaxēē i ngēma norū o i ngēma naī i maxēerū i ñaā poperawa nachiga naxūmatūxū. Rū ngēxgumarūū tá ta tāūtāma tūxū nimucuchi nawa ya yima ĩāne ya ūñene i ñaā poperawa nachiga naxūmatūne. ²⁰ Rū yima nüxū ixucū i ñaā ore, rü ñanagürü:

“Ngēmaācū, paxa tá íchangu”, ñanagürü. Rū ngēmaācū yī. Rū choma i Cuāū rü ñacharügū:

“¡Nuā naxū Pa Cori ya Ngechuchu!” ñacharügū. ²¹ Rū chanaxwēxe i tórū Cori ya Ngechuchu ya Cristu poraācū pexū narūngūxēē i guxāma i pemax. Rū ngēmaācū yī.